

清  
實  
錄



世宗憲皇帝實錄(一)

卷一至卷七  
康熙六十一年至雍正六年

# 清實錄

第七冊

中華書局影印

清 實 錄

(第七冊)

世宗實錄(一)

\*

中 華 書 局 出 版

(北京王府井大街36號)

北京市中國書店發行

中國建築工業出版社印刷廠印刷

\*

787×1092毫米1/16·71 3/8印張

1985年10月第1版 1985年10月北京第1次印刷

印數 0,001——1,500冊

統一書號: 11018·1355—7 定價: 53.00元

# 清實錄第七冊目錄

## 世宗憲皇帝實錄(一)

首卷一	序	一
凡例		四
首卷二	目錄	九
首卷三	進實錄表	一九
	修纂官	二二
卷一	康熙六十一年十一月	二九
卷二	康熙六十一年十二月	四五
卷三	雍正元年正月	六七
卷四	雍正元年二月	九四
卷五	雍正元年三月	一二二
卷六	雍正元年四月	一二五
卷七	雍正元年五月	一三九
卷八	雍正元年六月	一五三
卷九	雍正元年七月	一六四
卷一〇	雍正元年八月	一七九

卷一一	雍正元年九月	一九六
卷一二	雍正元年十月	二一五
卷一三	雍正元年十一月	二三〇
卷一四	雍正元年十二月	二四四
卷一五	雍正二年正月	二五六
卷一六	雍正二年二月	二六五
卷一七	雍正二年三月	二八二
卷一八	雍正二年四月	二九六
卷一九	雍正二年閏四月	三〇八
卷二〇	雍正二年五月	三一八
卷二一	雍正二年六月	三三八
卷二二	雍正二年七月	三五〇
卷二三	雍正二年八月	三六二
卷二四	雍正二年九月	三七七
卷二五	雍正二年十月	三八八
卷二六	雍正二年十一月	三九八
卷二七	雍正二年十二月	四一一
卷二八	雍正三年正月	四二三
卷二九	雍正三年二月	四二九



卷三〇	雍正三年三月	四四六
卷三一	雍正三年四月	四六六
卷三二	雍正三年五月	四八三
卷三三	雍正三年六月	四九六
卷三四	雍正三年七月	五一三
卷三五	雍正三年八月	五二六
卷三六	雍正三年九月	五三七
卷三七	雍正三年十月	五四六
卷三八	雍正三年十一月	五五四
卷三九	雍正三年十二月	五六五
卷四〇	雍正四年正月	五八五
卷四一	雍正四年二月	六〇二
卷四二	雍正四年三月	六一六
卷四三	雍正四年四月	六二七
卷四四	雍正四年五月	六四〇
卷四五	雍正四年六月	六六六
卷四六	雍正四年七月	六八七
卷四七	雍正四年八月	七〇四
卷四八	雍正四年九月	七一九
卷四九	雍正四年十月	七三四
卷五〇	雍正四年十一月	七五〇
卷五一	雍正四年十二月	七六〇
卷五二	雍正五年正月	七七九
卷五三	雍正五年二月	七九四
卷五四	雍正五年三月	八一二
卷五五	雍正五年閏三月	八二九
卷五六	雍正五年四月	八五〇
卷五七	雍正五年五月	八六六
卷五八	雍正五年六月	八七六
卷五九	雍正五年七月	八九六
卷六〇	雍正五年八月	九一一
卷六一	雍正五年九月	九二七
卷六二	雍正五年十月	九四五
卷六三	雍正五年十一月	九六〇
卷六四	雍正五年十二月	九七七
卷六五	雍正六年正月	九九三
卷六六	雍正六年二月	一〇〇三
卷六七	雍正六年三月	一〇一七



世宗憲皇帝實錄序

國家受

天眷命。集慶垂光。承承繼繼。肆我

皇考世宗憲皇帝荷

三聖之洪庥祗紹

聖祖仁皇帝丕緒宵衣旰食。底區宇於和

恒。以茂衍億萬年無疆之祉。厚德隆

功。溢於簡牒。巍乎煥乎。治平之盛軌

未有逾茲者也。

皇考徇齊敦敏。仁孝性成。蚤歲承歡。

聖祖友愛同氣。迨膺大統。一切禮儀隆備。

廟號尊崇。莫不定自

宸衷。符乎典則。仰惟

聖祖仁皇帝臨御六十餘年。歲澤洽人心。

醇化流方外。豐亨豫大之福。極盛無

加

皇考承郵治之餘。因時制宜。以善繼而善

述。惟是本之以誠。持之以敬。行之以

中正要之以寬仁。用能杜玩愒於熙  
時。綿昇平之泰運。大經大法。粲然爲  
後嗣子孫法焉。薦馨

郊

廟。必躬必親。旁秩祀典。懷柔百神。間遇水

旱。微愆祈禱。

深宮罔弗潛孚立應。

聖學高深。探性命之精。操治平之要。天德

王道一以貫之。隆禮

先師孔子。增祀先儒。右文重道之典。

超越常制。猶復表章經術。廣勵士風。

籲俊興賢。蔚有德造。辟雖鐘鼓。後先

疏附之風。殆無以過。念用人爲愛民

之本。自公孤卿尹。下至庶司百職事。

登明選公。咸稱任使。而守令之親民。

暨封疆大吏之司董率者。尤厯

聖心。重撫字之方。嚴貪墨之罰。明四目達

四聰。賜復蠲租。農桑被野。遂躋斯民



於衽席之安。刑罰者所以佐政教之  
不逮也。

皇考如天好生。既已刊布律令。俾愚氓重  
於犯法。復詳定貴賤服色。兵民婚喪  
禮制。更闡明。

聖祖諭旨十六條。細加訓注。家喻戶曉。翕  
然從風。河防之關於運道民生也。萬  
里黃流。匯以百川之水。充徐而下。歲  
苦沮洳。

皇考默運神謀。指示經畫。加長淮之石堰。  
闢三省之引河。渙發帑金。厥有成績。  
又吳越海塘。南北水利。凡可以惠此  
蒸黎者。悉因時而修舉之。先是

聖祖親統六師。平定朔漠。威靈所加。青海  
扎什巴圖爾等。震警承命。因沛殊恩。  
畀以爵秩。垂三十年。而羅卜藏丹津  
與吹拉克。諾木齊等。誕敢首造逆謀。  
擾犯邊域。

皇考聲罪致討。密授方畧。於閫帥戈鋌所  
指。電掃風驅。振旅獻俘。勒成功於太  
學。準噶爾蠢動。西陲數肆患於喀爾  
喀部落。南方苗蠻蔓延。行旅居民苦  
其侵掠。

皇考爲藩服計久遠。爲遐陬圖寧謐。或命  
將興師。或諭文武諸臣。隨宜搜勦。至  
逆夷悔禍。輸誠傾心。納土則皆宥其  
前愆。而曲賜包容焉。德威並耀。無遠  
弗屆。賜安南之地。減朝鮮之貢。鄂羅  
斯南掌等國。阻昧幽深。胥漸被於聲  
教。他若警怠荒。矯浮薄。求言納諫。教  
孝褒忠。宗室天潢之胄。多方造就。八  
旗根本之地。備予綢繆。頒訓諭於臣  
工。飭官常也。錫侯封於明裔。示殊典  
也。豐盈遍萬國。而服御有經。見  
聖躬之儉焉。嘉應在庶徵。而憂勤益懋。昭  
聖德之謙焉。蓋我

皇考誠敬之心。中正之道。寬仁之恩。悉同符乎。

聖祖以綏猷而立極。十三年中。有如一曰。宜其治功之盛。綱舉目張。蕩蕩平平。樂樂利利。傳之愈遠。而可法可守也。歟。予小子繼序之初。即命監修總裁。大學士等。董率儒臣。稽歷年之紀載。敬謹纂修。次第進呈。齋肅披閱。迄今五載。恭成。

世宗憲皇帝實錄一百五十九卷。在昔唐虞三代。制治保邦之道。備載於書。惟我

皇考際重熙累洽之盛。勵精圖治。良法美意。歷久彌新。玉簡琅函。實與典謨訓誥。相輝映。用是裝繕尊藏。朝夕循誦。以志繹思。衣德之義。垂裕後昆。永永無極焉。謹序。

乾隆六年十二月十一日

世宗憲皇帝實錄

修纂凡例

一

登極典禮書

一

視朝

御門聽政皆書

一恭上

聖祖仁皇帝

上刊

仁皇后尊諡加上

三朝帝后尊諡書冊寶文全錄

一恭上

皇太后徽號書

一祀

天

地

太廟

山陵

日月

社稷

郊祀躋配

太廟

奉先殿升祔配享祭

堂子書詣

壽皇殿

恩佑寺行禮書

一

上刊

萬壽節

皇后千秋節及元旦上元冬至凡大慶賀禮儀

筵宴舉行停止皆書

一

皇太后懿旨全錄

一恭詣

皇太后宮問安侍奉書尊封

皇太妃書

一大喪禮儀書奉安



地宮禮儀書

一冊立

皇后冊封皇妃書冊封皇子書冊封王妃公主

書

一皇子生書

一恭謁

山陵禮儀賞賚書

一祈穀耕藉詣學經筵大閱皆書其禮儀

宴賚亦書

一

御製

聖祖聖德神功碑文敬錄

詔敕

上諭敬錄

御製各體文有關大典政要者敬錄

一纂輯

實錄

聖訓

玉牒

國史

起居注

上諭執中成憲會典律例軍行紀律一統志八

旗志書明史皆書

欽定各種書籍書

一宗室分爵親王郡王以下奉恩將軍以

上冊封襲封晉封及降革皆書冊封郡

主郡君等亦書

一公主下降郡主郡君等出嫁授固倫額

駙和碩額駙多羅額駙固山額駙書

一異姓公侯伯精奇尼哈番阿思哈尼哈

番封授襲替書陞降黜革亦書

一外藩王貝勒貝子公封授襲替書陞降

黜革亦書

一文武大臣加三公三少及官銜書降銜

復銜亦書

一宗人府總領府事宗正宗人領侍衛內

大臣內閣大學士學士六部理藩院尚書侍郎都察院左都御史左副都御史倉場盛京五部侍郎內務府總管

陵寢總管翰林院掌院學士通政使司通政使大理寺卿太常寺卿光祿寺卿太僕寺卿詹事府詹事順天府尹及直隸各省總督漕運河道總督巡撫提督學政布政使司布政使按察使司按察使等官除授皆書

一。鑾儀衛掌衛事鑾儀衛鑾儀使八旗都統副都統前鋒統領護軍統領提督九門步軍統領奉天等處直隸各省鎮守將軍都統副都統提督總兵官等除授皆書

一。滿漢文武官員奉使外藩書奉差直隸各省事關重大者亦書特差觀風整俗宣諭化導營田勸農巡察巡漕等官增設裁汰皆書

一。鎮守將軍都統副都統督撫提鎮陸見仰聆

聖訓書藩臬道府等官引

見曾加

訓諭亦書

一。文武大臣以老疾乞休書蒙

恩旨加銜獎賚書慰畱及起用皆書緣事休致

降革亦書

一。京察大計軍政書文武大臣自陳降革

亦書

一。滿漢文武內外大小官制添設更改裁

并皆書銜署移駐亦書

一。文武選法品級考及考課則例有更定

者書

一。開拓疆土設立邊鎮及府州縣衛所改

設分置裁并皆書

一。每歲人丁戶口田地稅糧茶鹽鑄錢之數並於歲暮書開墾軍屯丈量地畝折

徵漕糧蠲除賦役并漕運錢法茶鹽權  
關則例有更定者皆書

一凡官員俸祿士子廩餼行伍錢糧加恩  
增給書

恩詔蠲賦

特旨免徵發粟賑荒截漕平糶及常例外

特恩減賦緩徵皆書

一盛治祥徵聯珠合璧慶雲甘露芝草醴

泉嘉禾瑞麥黃河澄清鳳麟應瑞書日

食地震亦書

一

聖德謙冲不言符瑞凡有臣下稱頌功德

特頒諭旨加意警勉書

一頒曆進春書

一頒詔天下書詔文全錄

一每歲祭

歷代帝王

先師孔子及

先農太歲凡在祀典諸神書遣官祭長白山

嶽鎮海瀆歷代陵寢

先師闕里書

敕封山川神號書加崇祀典亦書

一先賢後裔襲五經博士書

一王以下文武大臣蒙

特恩賜予書賜宴亦書

一直隸各省鄉試文武會試殿試傳臚書

殿試

制題全錄

特恩開科書增廣鄉會試中額書加增取進府

州縣衛學文武生員書添設翻譯舉人

生員書

欽賜舉人一體會試殿試書選庶吉士及教習

授職皆書

特命薦舉賢良方正博學鴻詞保送才守兼優

人員皆書

一國子監及直隸各省學政條例有更定



者書

一。遠方外國慕化歸誠遣使進貢書

賜封爵給敕印書外藩來朝及遣使進年貢遣

侍子入學皆書定年貢則例及

特恩減免貢物書宴賚亦書

一。王以下奉恩將軍以上民公以下阿思

哈尼哈番以上及在京文武官三品以

上在外將軍都統副都統督撫提鎮等

官及外藩王貝勒貝子公故卹典皆書

於常例外

特恩優卹亦書

一。邊疆文武大小官員及軍士蒙恩予卹

者皆書於常例外

特加恩卹亦書

一。旌表孝子順孫義夫節婦並於歲終書

烈婦烈女有奇蹟予旌者另書

一。諸臣條奏事關朝章國政奉

旨允行者書彈劾有當允行者亦書

一。平定青海征討準噶爾綏靖苗疆命將

籌邊訓兵轉餉一切方畧書軍中奏捷

獻俘及輸誠向化入隸版籍書

一。奉命安輯邊疆王以下文武大臣侍郎

副都統以上及督撫提鎮等軍中奏報

事宜書建立軍功加銜陞賞授世職書

失誤軍機降革問罪亦書其文武大小

官員軍功議叙

特恩陞賞者並書

一。邊遠地方土司酋長及宣撫宣慰招討

等使授職襲職書改土為流亦書

一。八旗增設佐領甲兵及外省增置駐防

弁兵皆書

一。直隸各省水陸標營兵制及驛傳烽墩

添設裁減歸併書

一。八旗及直隸各省綠旗軍士奉

恩詔及

特旨頒賞書出征戍防軍士於常例給餉外

特加恩賞亦書

一文武大臣犯罪拘禁遷謫及正法書

特恩寬宥亦書不論官吏軍民犯叛逆大罪正

法者皆書

一慎獄明刑停決肆赦皆書律例有更定

者亦書

一修建

壇

廟營造

山陵整新宮殿書重建闕里聖廟興復各省書

院建設賢良昭忠祠宇及凡在祀典諸

神宮廟皆書

欽賜御書匾額亦書

一經理南北兩河疏濬直隸各省及邊塞

地方河渠水利建築城垣修防堤岸平

治道塗一切工役皆書

大清世宗敬天昌運建中表正文武英明寬仁  
信毅大孝至誠憲皇帝實錄目錄

卷之一

康熙六十一年十一月

卷之二

康熙六十一年十二月

卷之三

雍正元年正月

卷之四

雍正元年二月

卷之五

雍正元年三月

卷之六

雍正元年四月

卷之七

雍正元年五月

卷之八

雍正元年六月

卷之九

雍正元年七月

卷之十

雍正元年八月

卷之十一

雍正元年九月

卷之十二

雍正元年十月

卷之十三

雍正元年十一月

卷之十四

雍正元年十二月

卷之十五

雍正二年正月

卷之十六

雍正二年二月

卷之十七

雍正二年三月

卷之十八

雍正二年四月

卷之十九

雍正二年閏四月

卷之二十

雍正二年五月

卷之二十一

雍正二年六月

卷之二十二

雍正二年七月

卷之二十三

雍正二年八月

卷之二十四

雍正二年九月

卷之二十五

雍正二年十月

卷之二十六

雍正二年十一月

卷之二十七

雍正二年十二月

卷之二十八

雍正三年正月

卷之二十九

雍正三年二月

卷之三十

雍正三年三月

卷之三十一

雍正三年四月

卷之三十二

雍正三年五月

卷之三十三

雍正三年六月

卷之三十四

雍正三年七月

卷之三十五

雍正三年八月

卷之三十六

雍正三年九月

卷之三十七

雍正三年十月

卷之三十八

雍正三年十一月

卷之三十九

雍正三年十二月

卷之四十

雍正四年正月

卷之四十一

雍正四年二月

卷之四十二

雍正四年三月

卷之四十三

雍正四年四月

卷之四十四

雍正四年五月

卷之四十五

雍正四年六月

卷之四十六

雍正四年七月

卷之四十七

雍正四年八月

卷之四十八

雍正四年九月

卷之四十九

雍正四年十月

卷之五十

雍正四年十一月

卷之五十一

雍正四年十二月

卷之五十二

雍正五年正月

卷之五十三

雍正五年二月

卷之五十四

雍正五年三月

卷之五十五

雍正五年閏三月

卷之五十六

雍正五年四月

卷之五十七

雍正五年五月

卷之五十八

雍正五年六月

卷之五十九

雍正五年七月

卷之六十

雍正五年八月

卷之六十一

雍正五年九月

卷之六十二

雍正五年十月

卷之六十三

雍正五年十一月

卷之六十四

雍正五年十二月

卷之六十五

雍正六年正月

卷之六十六

雍正六年二月

卷之六十七

雍正六年三月

卷之六十八

雍正六年四月

卷之六十九

雍正六年五月

卷之七十

雍正六年六月

卷之七十一

雍正六年七月

卷之七十二

雍正六年八月

卷之七十三

雍正六年九月

卷之七十四

雍正六年十月

卷之七十五

雍正六年十一月

卷之七十六

雍正六年十二月

卷之七十七

雍正七年正月

卷之七十八

雍正七年二月

卷之七十九

雍正七年三月

卷之八十

雍正七年四月

卷之八十一

雍正七年五月

卷之八十二

雍正七年六月

卷之八十三

雍正七年七月

卷之八十四

雍正七年閏七月

卷之八十五

雍正七年八月

卷之八十六

雍正七年九月

卷之八十七

雍正七年十月

卷之八十八

雍正七年十一月

卷之八十九

雍正七年十二月

卷之九十

雍正八年正月

卷之九十一

雍正八年二月

卷之九十二

雍正八年三月

卷之九十三

雍正八年四月

卷之九十四

雍正八年五月

卷之九十五

雍正八年六月

卷之九十六

雍正八年七月

卷之九十七

雍正八年八月

卷之九十八

雍正八年九月



卷之九十九

雍正八年十月

卷之一百

雍正八年十一月

卷之一百一

雍正八年十二月

卷之一百二

雍正九年正月

卷之一百三

雍正九年二月

卷之一百四

雍正九年三月

卷之一百五

雍正九年四月

卷之一百六

雍正九年五月

卷之一百七

雍正九年六月

卷之一百八

雍正九年七月

卷之一百九

雍正九年八月

卷之一百十

雍正九年九月

卷之一百十一

雍正九年十月

卷之一百十二

雍正九年十一月

卷之一百十三

雍正九年十二月

卷之一百十四

雍正十年正月

卷之一百十五

雍正十年二月

卷之一百十六

雍正十年三月

卷之一百十七

雍正十年四月

卷之一百十八

雍正十年五月

卷之一百十九

雍正十年閏五月

卷之一百二十

雍正十年六月

卷之一百二十一

雍正十年七月

卷之一百二十二

雍正十年八月

卷之一百二十三

雍正十年九月

卷之一百二十四

雍正十年十月

卷之一百二十五

雍正十年十一月

卷之一百二十六

雍正十年十二月

卷之一百二十七

雍正十一年正月

卷之一百二十八

雍正十一年二月

卷之一百二十九

雍正十一年三月

卷之一百三十

雍正十一年四月

卷之一百三十一

雍正十一年五月

卷之一百三十二

雍正十一年六月

卷之一百三十三

雍正十一年七月

卷之一百三十四

雍正十一年八月

卷之一百三十五

雍正十一年九月

卷之一百三十六

雍正十一年十月

卷之一百三十七

雍正十一年十一月

卷之一百三十八

雍正十一年十二月

卷之一百三十九

雍正十二年正月

卷之一百四十

雍正十二年二月

卷之一百四十一

雍正十二年三月

卷之一百四十二

雍正十二年四月

卷之一百四十三

雍正十二年五月

卷之一百四十四

雍正十二年六月

卷之一百四十五

雍正十二年七月

卷之一百四十六

雍正十二年八月

卷之一百四十七

雍正十二年九月

卷之一百四十八

雍正十二年十月

卷之一百四十九

雍正十二年十一月

卷之一百五十

雍正十二年十二月

卷之一百五十一

雍正十三年正月

卷之一百五十二

雍正十三年二月

卷之一百五十三

雍正十三年三月

卷之一百五十四

雍正十三年四月

卷之一百五十五

雍正十三年閏四月

卷之一百五十六

雍正十三年五月

卷之一百五十七

雍正十三年六月

卷之一百五十八

雍正十三年七月

卷之一百五十九

雍正十三年八月

十八

十八

大清世宗敬天昌運建中表正文武英明寬仁  
信毅大孝至誠憲皇帝實錄目錄

十八

十八



及忠良專祠特建播萬言之

彝訓發蒙警贖慇懃保赤之誠慎三尺之科條

肆赦祥刑浩蕩好生之德偶逢災沴賑

貸頻施卽屬偏隅蠲除必遍濬水泉於

畿輔煙耕雨耨農田資蓄洩之功繕隄

障於江淮海晏河清澤國底平成之績

旣

仁恩之溥洽亦

聖武之布昭恤兵無事之時整旅修文之後

天戈所指青海獻俘

帝命甫申西陲納款化蠻疆爲郡縣重譯傾心

奠藩服於金湯窮邊跂踵持盈保泰視

遐荒在戶牖之前明目達聰周

睿念於寰瀛之表神人協應愈嚴陟降於深宮

符瑞駢臻倍飭修和於庶府凡夫慈祥

愷悌無非體

聖祖之心以爲心間有損益變通祇是法

聖祖之政以爲政

鴻圖廣運殫十三載之憂勞

龍馭遐升動億萬方之愴慕內寧外謐樂利無

窮網舉目張規條斯在制治保邦之軌

範洵可法而可傳福鍾善慶所留遺遂

彌昌而彌熾恭惟

皇帝陛下

元善長人

孝思錫類

本親揚而御宇旰食宵衣

善繼述以綏猷誠民阜物體乾常健靡忘

兢業之心際泰方亨普被和恒之化溯

前徽之丕顯彰

寶帙以長新乃於雍正十三年十二月

命臣鄂爾素爲監修總裁官臣張廷玉臣徐本臣爲總裁

官臣任蘭枝臣張廷玉臣爲副總裁官臣德

舒臣爲提調官臣許希孔臣德新臣爲副提調官臣劉

數文臣文保臣赫臣穆臣穆臣李臣文臣多臣爾臣徐臣以臣恒臣萬臣永臣吳臣文

臣楊廷棟臣田志勤臣阮學濤臣蔡新臣張廷玉臣周章臣阮學治臣唐繼賢臣陳壽臣常海

臣廣安臣世祿臣阿濟圖臣儲良臣羅福祿臣色楞額臣言肅臣德成臣葉爾登博克

臣達色臣吉蘭泰臣叔寶臣常在臣巴達圖臣伍金臣常壽為纂修官給

札彤廷繙書紫籙商皇成憲窺赤文綠

字之藏巍煥舊章搜芸閣蘭臺之秘歷

寒閏暑披尋不啻再三紀事考文義例

俱歸畫一恭成

世宗憲皇帝實錄聖訓合凡例目錄清漢蒙古

文共五百五十八卷繕寫進

呈臣等素愧三長全疎半部身依日月尚

懷攀戀於當年目懾星辰祗効編摩於

此日遵

聖主敬承之志分年繫月有美畢書煥

先朝垂裕之模述德徵功無詞能贊伏願

聿懷多福

長發其祥

荷千載之傳薪心源直接

綿萬年而肯構治象重光梓材之丹雘惟

修家法之羹牆如見昭茲來許用期致

治以揚庥綏我思成永懋紹庭而受祐

臣等無任瞻

天仰

聖激切屏營之至謹奉

表隨

進以

聞

乾隆六年十一月十一日臣等奏為奏請將議奏各條擬定

理部事務總纂臣等謹奏為奏請將議奏各條擬定

部尚書仍兼管吏部尚書翰林院掌院事尋伯加丁級臣張廷玉光祿大夫經筵講官

起居注徐鑣奏為奏請將議奏各條擬定吏部尚書仍兼管翰林院掌院事加級臣福祿

奏為奏請將議奏各條擬定吏部尚書仍兼管翰林院掌院事加級臣福祿奏為奏請將議奏各條擬定

辦閣學事務禮部尚書仍兼管太常寺鴻臚寺事臣等謹上表

修纂官

監修總裁

光祿大夫議郎金華侯殷寧兼都軍總兵都書簿加歲臣鄂爾泰

總裁

蘇公謫居處多寒多瘴故臣等每欲爲書而苦於無善地叙  
張廷玉

光祿父繼晉書起屢行赦免嚴學厚高仍營輸送訖加二級臣福敏

光祿大夫經筵講官太子太保東閣大學士兼禮部尚書加六級臣徐本

光祿寺經筵講官致仕協辦內閣大學士事務禮部尚書仍兼管宗人府事務臣 三

副總裁

光祿大夫經筵講官禮部尚書革職留任臣任蘭枝

光祿大夫議政大臣兵部尚書固額駙加二級紀錄次臣班

光祿大夫議政大臣理藩院尚書兼理驛院事務加一級紀錄三次臣納延泰

光祿大夫議政大臣都察院左都御史世襲輕車都尉臣杭奕祿

光祿大夫工部左侍郎加四級紀錄九次臣張廷璠

## 提調

通奉大夫官賜書慶承新勅統緒輝赫桑等奉聞謹望永備加茲紀錄次臣德通

資政大夫內閣侍讀學士加四級紀錄二次臣舒魯克

纂修滿漢文

資政大夫工部右侍郎加一級紀錄三次臣許希孔

資政大夫內閣學士兼禮部侍郎佐領臣德新

中憲大夫日講官起居注詹事府少詹事兼翰林院侍講學士臣呂燾

通議大夫翰林院侍講學士兼佐領加二級臣石介

中憲大夫太常寺少卿紀錄一次臣劉綸

資政大夫太僕寺少卿加四級紀錄二次臣昂

朝議大夫國子監祭酒紀錄四次臣敷文

資政大夫詹事府左春坊左庶子兼佐領加四級臣文保

通議大夫翰林院侍讀兼佐領加二級紀錄二次臣赫 瞻

奉直大夫候補左春坊左諭德加一級紀錄三次臣嵇璜

承德郎日講官起居注右春坊右中允兼翰林院編修<sub>臣</sub>朱良襄

承德郎左春坊左贊善兼翰林院檢討加一級紀錄二次臣李文銳

承德郎國子監司業紀錄三次臣徐以烜

文林郎翰林院編修臣萬承蒼

文林郎翰林院編修加二級臣吳兆燮

文林郎翰林院編修加一級臣楊廷棟

文林郎日講官起居注翰林院編修紀錄二次臣阮學藩



文林郎翰林院編修 <sub>臣</sub> 蔡新	文林郎翰林院編修 <sub>臣</sub> 張孝程	文林郎翰林院編修紀錄三次 <sub>臣</sub> 周玉章	文林郎翰林院檢討加一級紀錄二次 <sub>臣</sub> 阮學浩	徵仕郎翰林院檢討 <sub>臣</sub> 唐進賢	文林郎翰林院檢討加一級 <sub>臣</sub> 陳先峯	中憲大夫內閣侍讀加三級紀錄三次 <sub>臣</sub> 常海	朝議大夫內閣侍讀加二級 <sub>臣</sub> 廣安	資政大夫一等護衛加二級 <sub>臣</sub> 世祿	資政大夫二等輕車都尉兼佐領加三級 <sub>臣</sub> 阿濟圖	奉政大夫盛京刑部員外郎加一級紀錄二次 <sub>臣</sub> 德成	奉政大夫盛京刑部員外郎加一級紀錄三次 <sub>臣</sub> 岳安	中憲大夫工部員外郎加四級紀錄二次 <sub>臣</sub> 舒敏	奉政大夫工部員外郎加一級 <sub>臣</sub> 博寬	通議大夫佐領候補員外郎加一級 <sub>臣</sub> 淑寶	纂修蒙古文	資政大夫太僕寺卿兼佐領加三級紀錄二次 <sub>臣</sub> 鼐滿岱	中憲大夫國子監司業加二級 <sub>臣</sub> 多爾濟
--------------------------	---------------------------	-------------------------------	----------------------------------	---------------------------	------------------------------	---------------------------------	-----------------------------	-----------------------------	-----------------------------------	------------------------------------	------------------------------------	----------------------------------	------------------------------	--------------------------------	-------	-------------------------------------	-------------------------------

奉直大夫戶部員外郎紀錄一次 <sub>臣</sub> 儲爾漢	奉直大夫兵部員外郎紀錄二次 <sub>臣</sub> 羅布藏	奉直大夫兵部員外郎紀錄一次 <sub>臣</sub> 色楞查武	奉直大夫兵部員外郎紀錄一次 <sub>臣</sub> 吉泰	中憲大夫理藩院員外郎加三級 <sub>臣</sub> 達色	奉政大夫理藩院員外郎加一級 <sub>臣</sub> 吉蘭泰	資政大夫騎都尉加三級 <sub>臣</sub> 常在	承德郎吏部主事紀錄一次 <sub>臣</sub> 巴達克圖	承德郎吏部主事紀錄一次 <sub>臣</sub> 伍余泰	原任理藩院侍郎 <sub>臣</sub> 常壽	收掌	奉直大夫理藩院員外郎紀錄一次 <sub>臣</sub> 九格	奉直大夫兵部主事加一級 <sub>臣</sub> 那朗阿	承德郎內閣撰文中書舍人加三級 <sub>臣</sub> 德禮	承德郎內閣撰文中書舍人加三級 <sub>臣</sub> 穆通阿	文林郎內閣撰文中書舍人加一級 <sub>臣</sub> 覺羅伊爾根	徵仕郎內閣辦事中書舍人加一級 <sub>臣</sub> 查錫	修職佐郎翰林院待詔加二級紀錄二次 <sub>臣</sub> 緯奇
--------------------------------	--------------------------------	---------------------------------	-------------------------------	-------------------------------	--------------------------------	----------------------------	-------------------------------	------------------------------	-------------------------	----	--------------------------------	------------------------------	--------------------------------	---------------------------------	-----------------------------------	--------------------------------	----------------------------------

徵仕郎翰林院八品筆帖式加一級臣赫

繙譯滿文

中憲大夫佐領臣松祿

文林郎工部節慎庫司庫紀錄四次臣芳泰

儒林郎大理寺評事加一級臣寶成

徵仕郎內閣中書舍人臣海明

徵仕郎內閣中書舍人臣永浩

承德郎候選知縣七品筆帖式加二級臣魏象乾

儒林郎翰林院七品筆帖式加一級臣良格

儒林郎起居注七品筆帖式加一級臣明通

修職郎吏部八品筆帖式臣恭安

文林郎刑部八品筆帖式加二級臣富琦

徵仕郎起居注八品筆帖式加一級臣永貴

徵仕郎翰林院八品筆帖式加一級臣關鍵

徵仕郎翰林院八品筆帖式加一級臣德克敏額

文林郎七品筆帖式臣孫琦

文林郎七品筆帖式臣安福

修職郎八品筆帖式臣穆爾斌

修職郎八品筆帖式臣瑪理

繙譯舉人臣劉銳

生員臣覺羅寧高

繙譯生員臣英永

繙譯生員臣額爾登額

義學生臣世奇

繙譯蒙古文

通議大夫佐領候補員外郎加一級臣僧德

中憲大夫佐領臣悟隆阿

文林郎內閣辦事中書舍人加一級臣悟勤釋濟

徵仕郎內閣辦事中書舍人臣成德

徵仕郎內閣辦事中書舍人臣端珠克

徵仕郎內閣辦事中書舍人臣德善

儒林郎七品筆帖式加一級臣常有

文林郎七品筆帖式臣長生保

文林郎七品筆帖式臣達賴

文林郎七品筆帖式臣班泰

文林郎七品筆帖式臣勒爾金

文林郎七品筆帖式 <small>臣</small> 福昌	文林郎七品筆帖式 <small>臣</small> 吳爾蘇	徵仕郎八品筆帖式加一級 <small>臣</small> 春泰	徵仕郎八品筆帖式加一級 <small>臣</small> 飛森布	徵仕郎八品筆帖式加一級 <small>臣</small> 德寧	徵仕郎八品筆帖式加一級 <small>臣</small> 常明	徵仕郎八品筆帖式加一級 <small>臣</small> 喇嘛金布	徵仕郎八品筆帖式加一級 <small>臣</small> 明和	徵仕郎八品筆帖式加一級 <small>臣</small> 色布騰	徵仕郎八品筆帖式加一級 <small>臣</small> 常德	修職郎八品筆帖式 <small>臣</small> 丹木巴	騰錄滿洲字	承德郎刑部主事紀錄一次 <small>臣</small> 興德	儒林郎內閣中書舍人加二級紀錄三次 <small>臣</small> 那錫泰	徵仕郎內閣中書舍人 <small>臣</small> 富義	徵仕郎內閣中書舍人 <small>臣</small> 富昆	內閣副中書舍人 <small>臣</small> 科占	內閣副中書舍人 <small>臣</small> 世德
------------------------------	-------------------------------	---------------------------------	----------------------------------	---------------------------------	---------------------------------	-----------------------------------	---------------------------------	----------------------------------	---------------------------------	-------------------------------	-------	---------------------------------	---------------------------------------	-------------------------------	-------------------------------	-----------------------------	-----------------------------

儒林郎吏部七品筆帖式加一級 <small>臣</small> 武登額	儒林郎工部七品筆帖式加一級 <small>臣</small> 傅崑	文林郎吏部八品筆帖式加三級 <small>臣</small> 鄂爾博	徵仕郎禮部八品筆帖式加一級 <small>臣</small> 伍雲保	徵仕郎起居注八品筆帖式加一級紀錄二次 <small>臣</small> 明泰	徵仕郎翰林院八品筆帖式加一級 <small>臣</small> 成桂	徵仕郎翰林院八品筆帖式加一級 <small>臣</small> 倭克成額	徵仕郎翰林院八品筆帖式加一級 <small>臣</small> 費成額	徵仕郎翰林院八品筆帖式加一級 <small>臣</small> 常明	徵仕郎國子監八品筆帖式加一級 <small>臣</small> 永明	徵仕郎戶科八品筆帖式加一級 <small>臣</small> 成祿	修職郎八品筆帖式 <small>臣</small> 蘓方阿	修職郎八品筆帖式 <small>臣</small> 薩炳阿	修職郎八品筆帖式 <small>臣</small> 三喜	修職郎八品筆帖式 <small>臣</small> 明泰	修職郎八品筆帖式 <small>臣</small> 寶德	修職郎八品筆帖式 <small>臣</small> 寧福	修職郎八品筆帖式 <small>臣</small> 武登
------------------------------------	-----------------------------------	------------------------------------	------------------------------------	--	------------------------------------	--------------------------------------	-------------------------------------	------------------------------------	------------------------------------	-----------------------------------	-------------------------------	-------------------------------	------------------------------	------------------------------	------------------------------	------------------------------	------------------------------

官	官	官	武	繡	繡	繡	繡	繡	繡	生	生	生	生	監	監	監	監	監
學	學	學		譯	譯	譯	譯	譯	譯									
生	生	生	生	生	生	生	生	生	生	員	員	員	員	生	生	生	生	生
臣傳寧阿	臣拔昌	臣覺羅托拜	臣八哈布	臣德敬	臣赫隆額	臣穆通阿	臣伏魔保	臣覺羅國恩德	臣博臨泰	臣張廷瑞	臣拉興祖	臣傳隆安	臣傳生阿	臣瑪爾古	臣那岱	臣博成額	臣德寧	臣德寧

官	官	官	官	官	官	官	官	官	官	義	義	義	義	義	義	義	義	義
學	學	學	學	學	學	學	學	學	學	學	學	學	學	學	學	學	學	學
生	生	生	生	生	生	生	生	生	生	生	生	生	生	生	生	生	生	生
臣蘇楞額	臣玉保	臣傳志	臣富隆阿	臣有福	臣鄂朔	臣明倫	臣薩克信	臣和昇	臣蘇布洞阿	臣索諾穆	臣哈拉扣	臣福顯	臣忠保	臣善德	臣常山	臣	臣	臣

騰錄蒙古字

徵仕郎內閣辦事中書舍人

儒林郎七品筆帖式加一級

徵仕郎八品筆帖式加一級

徵仕郎八品筆帖式加一級

徵仕郎八品筆帖式加一級

徵仕郎八品筆帖式加一級

徵仕郎八品筆帖式加一級

徵仕郎八品筆帖式加一級

徵仕郎八品筆帖式加一級	臣黑達色
徵仕郎八品筆帖式加一級	臣額圖洪
徵仕郎八品筆帖式加一級	臣永祿
徵仕郎八品筆帖式加一級	臣伍保
徵仕郎八品筆帖式加一級	臣三達色
修職郎八品筆帖式	臣蘇明
修職郎八品筆帖式	臣六十八
門上筆帖	臣鄂齊爾
繙譯舉	人臣達爾扎
繙譯舉	人臣安泰
候補筆帖	式臣文都爾虎
監生	臣富通阿
繙譯生	員臣喜福
繙譯生	員臣五十五
繙譯生	員臣阿木呼郎
繙譯生	員臣馬爾薩
官學	生臣福明
官學	生臣孫迪

官	學	生 <small>臣</small> 鎖桂
官	學	生 <small>臣</small> 代音部
官	學	生 <small>臣</small> 福祿
官	學	生 <small>臣</small> 諾稭國
義	學	生 <small>臣</small> 興福
義	學	生 <small>臣</small> 國泰
騰錄漢字		
徵仕郎內閣辦事中書舍人 <small>臣</small> 商思敬	進	士 <small>臣</small> 許炯
儒林郎都察院七品筆帖式加一級 <small>臣</small> 豐盛		
舉		人 <small>臣</small> 史曾
舉		人 <small>臣</small> 李源
舉		人 <small>臣</small> 楊湖觀
舉		人 <small>臣</small> 徐翼燕
舉		人 <small>臣</small> 董淑英
舉		人 <small>臣</small> 吳虎炳
即用	州	同 <small>臣</small> 張繼齡
即用	州	同 <small>臣</small> 李森

即	即用	州	同 <sub>臣</sub> 何積中
即	用	州	同 <sub>臣</sub> 邱雲錦
候選	選	州	同 <sub>臣</sub> 張齡丰
候	選	州	同 <sub>臣</sub> 程光弼
候補	八品筆帖	式 <sub>臣</sub> 陳奇聖	
候	補筆帖	式 <sub>臣</sub> 張廣沂	
即用	直隸州	判 <sub>臣</sub> 顧祖望	
即用	州	判 <sub>臣</sub> 朱存章	
即用	州	判 <sub>臣</sub> 侯傳山	
即用	府	歷 <sub>臣</sub> 方至	
候選	正	品 <sub>臣</sub> 姚興渥	
副	榜貢	生 <sub>臣</sub> 沈均安	
副	榜貢	生 <sub>臣</sub> 李復泌	
候選	主	簿 <sub>臣</sub> 張裕燝	
候選	主	簿 <sub>臣</sub> 沈鴻	
候選	主	簿 <sub>臣</sub> 顧宗預	
候選	主	簿 <sub>臣</sub> 張鼎新	
候選	主	簿 <sub>臣</sub> 顧永佑	

監	生 <sub>臣</sub> 韓佐唐
監	生 <sub>臣</sub> 易祖棧
監	生 <sub>臣</sub> 楊耀曾
監	生 <sub>臣</sub> 朱縉
監	生 <sub>臣</sub> 朱源
監	生 <sub>臣</sub> 王作霖
監	生 <sub>臣</sub> 蔣晉榮
監	生 <sub>臣</sub> 沈與文
監	生 <sub>臣</sub> 徐熊占
生	員 <sub>臣</sub> 趙滋本
生	員 <sub>臣</sub> 商書

大清世宗敬天昌運建中表正文武英明寬仁  
信毅大孝至誠憲皇帝實錄卷之一

監修總裁官光祿大夫經筵講官太僕議政臣等和碩大學士兼兵部尚書領侍衛內大臣等官

總裁官光祿大夫經筵日講官起居注大學士兼兵部尚書領侍衛內大臣等官

第三等伯加十三級臣張廷玉光祿大夫經筵日講官起居注大學士兼兵部尚書領侍衛內大臣等官

翰林院掌院事加級臣福敏光祿大夫經筵講官太子太僕東閣大學士兼禮部尚書加六級臣徐本光祿大夫

經筵講官議政大臣傅爾丹閣大學士事務禮部尚書仍兼官太子少師禮部尚書等事

較修

世宗敬天昌運建中表正文武英明寬仁信毅

大孝至誠憲皇帝諱胤禛

聖祖合天弘運文武睿哲恭儉寬裕孝敬誠信

中和功德大成仁皇帝之第四子也。

母孝恭宣惠溫肅定裕贊天承聖仁皇后吳雅

氏。原任護軍參領加封一等公衛武之女。瑞

莊恭肅。慈惠安和。事

聖祖仁皇帝。恪襄內治。著範宮庭。嘉祥肇集。嘗

夢月入懷。華彩四照。已而誕

上。時康熙十七年戊午十月三十日寅時也。誕

生之久。祥光煜燦。經久弗散。闔宮稱異。

上天表奇偉。隆準頤身。雙耳豐垂。目光炯照。音

吐洪亮。舉止端凝。大智夙成。宏才肆應。允恭

克讓。寬裕有容。幼耽書史。博覽弗倦。精究理

學之原。旁徹性宗之旨。天章濬發。立就萬言。

書法道雄。妙兼衆體。每籌度事理。評隲人材。

因端竟委。燭照如神。韜畧機宜。皆所洞悉。而

性尤純孝。婉愉愛慕。悉本乎至誠。逮事

孝莊文皇后。

孝惠章皇后。備膺

慈眷。侍奉

聖祖仁皇帝。

孝恭仁皇后。盡禮盡敬。仰恆歡心。偶遇

聖祖達和。必躬親湯藥。問視惟虔。晝夜無少懈。

聖祖常稱爲誠孝焉。又誼敦友愛。值二阿哥罪

廢。衆議當幽禁。

上獨涕泣不能起。

聖祖爲之動容。平日無私交。無賞援。無干譽。秉

道守義。巍然自重。嘗奉

命隨征。統率將士。軍紀肅然。初封多羅貝勒。晉封和碩雍親王。每值

鑾駕巡方。翠華駐蹕。輒命扈行。軍國大計。亦多諮決。禮祀鉅典。恒令恭代。

聖祖嘗諭諸大臣曰。朕萬年後。必擇一堅固可託之人。與爾等作主。令爾等永享太平。蓋

天心默定。神器攸歸久矣。及奉

大行遺詔。繼荷丕基。孝思彌切。哀慕無窮。一切

喪儀隆備。

廟號尊崇。素服三年。齋居別殿。奉安

陵寢。親掖龍輦。莫不定自

宸衷。動符典則。至於撫馭臣民。又安中外。揆幾

達變。振紀飭綱。體

聖祖之心。以爲心法。

聖祖之政。以爲政。欽若

昊天。祇承

列祖。隆師重道。敦族親賢。恩膏溥浹於九垓。治

化遐孚於八表。風俗移易。吏治澄清。仁漸義摩。熙熙皞皞。共遊於堯天舜日之下。又復刊

訓諭。昭布章程。以覺世牖民。提撕而引翼之。彰瘁之用肅焉。君師之極備矣。武功赫濯。邊圉用寧。威惠奄敷。苗夷從乂。闢版圖於絕域。徠職貢於遐陬。

神功聖德。炳炳麟麟。與天同覆。與地同載。與日月合其明。與四時合其序。蓋臨御者十有三載。垂裕者億萬斯年。殫宵衣旰食之勞。篤覲光揚烈之志。措海宇於晏安。登民物於康阜。蒼穹應瑞。坤軸呈靈。從古邈隆之代。罕有比擬。從古憂勤之聖。亦罕有等倫。是以經綸美備。軌度光昭。允足爲萬世則。微云

康熙六十一年。壬寅十一月。壬午朔。○甲午

聖祖仁皇帝賓天。先是十月癸酉。

聖祖自暢春園。幸南苑行圍。遂駐蹕南苑。至是

月戊子。



聖躬不豫。因回駐暢春園。庚寅。以冬至屆期。將大祀於

南郊。命

上恭代行禮。

諭曰。郊祀

上帝。朕躬不能親往。特命爾恭代。齋戒大典。必須誠敬嚴恪。爾爲朕虔誠展祀可也。

上遵

旨於齋所致齋。敬念

聖躬。孝思篤切。每日三次遣護衛等恭請

聖安。至甲午。丑刻。

聖祖疾大漸。遣官馳召

上於齋所。且令速至。隨召誠親王允祉。淳郡王

允祐。多羅貝勒允禩。固山貝子允禧。敦郡王

允祜。固山貝子允禩。皇十三子允祥。尚書隆

科多至

御榻前。

宣諭曰。皇四子胤禩。人品貴重。深肖朕躬。必能

克承大統。著繼朕登基。即皇帝位。

上聞。召馳至。趨進

寢宮。

聖祖告以病勢日臻之故。是日。

上問

安。進見五次。戌刻。

聖祖賓天。

上哀痛號呼。擗踊不已。尚書隆科多進曰。

大行皇帝深惟大計。付授鴻基。宜先定大事。方

可辦理一切喪儀。

上慟哭仆地。良久乃起。趨至

御榻前。撫足大慟。親爲

聖祖更衣。遵用

孝莊文皇后製賜御服。

上皆敬加於首。然後進御。時諸王大臣恭議殯

殯大禮。宜奉

大行皇帝還宮。於是命淳郡王允祐守衛暢春

園。固山貝子允禩至乾清宮。敷設几筵。十六

阿哥允祿世子弘昇肅護宮禁十三阿哥允祥尚書隆科多備儀衛清御道

上親安奉

大行皇帝於黃輿攀依號哭欲徒步扶

輦隨行諸王大臣以

大行皇帝付託至重神器攸歸當此深夜執事

繁雜請

上前導以行

上乃前導哭不停聲至隆宗門跪接

黃輿親扶而入安奉

大行皇帝於乾清宮○乙未遣領侍衛內大臣

公馬爾賽告祭

奉先殿○禮部奏大殮儀注諭曰

皇考教養文武大小臣工六十餘年孰不躬沐

深恩今一旦

升遐悲痛切至實出衷忱大殮時著令王貝勒

貝子公文武大臣俱入乾清門內令其瞻仰

得盡哀戀之情○禮部又奏儀注內公主王

妃例於乾清宮丹墀齊集諭曰公主王妃豈可遠列丹墀著仍入大內親近

梓宮使得盡哀朕之兄弟子姪亦令俱入乾清

門在丹陛上隨朕行禮○戌刻

大行皇帝大殮

上痛哭失聲擗踊無數既殮遂行祭奠禮凡尊

壘簋簋

上皆躬自陳設奠侑飲食儼如視膳哀感羣臣

咸痛哭伏地莫能仰視○是日因薄大駕全

設王以下文武各官俱成服齊集舉哀○諸

王大臣奏請諒陰之次或御昭仁殿或御弘

德殿諭曰朕遭

皇考大事哀痛方深何忍安居內殿其以乾清

宮東廡為倚廬自後

上居乾清宮東廡晝必席地夜必寢苦每日上

香奠禮凡五次哭必盡哀又慮

皇太后高年過於哀痛每夜五鼓必親詣問

安乃回喪次○命貝勒允禩十三阿哥允祥大

學士馬齊尚書隆科多總理事務諭曰朕苦塊之次中心紛贅所有啟奏諸事除朕藩邸事件外餘俱交送四大臣凡有諭旨必經由四大臣傳出并令記檔則諸事庶乎秩然不紊其奏事官員處亦令記檔至

皇考時所有未完事件何者可緩何者應行速結朕未深悉著大臣等將應行速結等事會同查明具奏諭總理事務王大臣等西路軍務大將軍職任重大十四阿哥允禩勢難

暫離但遇

皇考大事伊若不來恐於心不安著速行文大將軍王令與弘曙二人馳驛來京軍前事務甚屬緊要公延信著馳驛速赴甘州管理大將軍印務并行文總督年羹堯於西路軍務糧餉及地方諸事俱同延信管理年羹堯或駐肅州或至甘州辦理軍務或至西安辦理總督事務令其酌量奏聞至現在軍前大臣等職名一併繕寫進呈爾等會議具奏尋議

諭旨甚屬周詳應速行文大將軍王將印敕暫交平郡王訥爾素署理即與弘曙來京得旨副都統阿爾納著隨大將軍王來京副都統阿林保著隨弘曙來京○諭內閣貝勒允禩十三阿哥允祥俱封為親王二阿哥之子弘皙封為郡王○以戶部尚書孫渣齊暫理工部事務兩江總督查弼納暫理禮部事務○乾清門一等侍衛拉錫暫管理藩院事務○丙申冬至祀

天於

圓丘遣鎮國公吳爾占行禮○遣官祭

永陵。

福陵。

昭陵。

暫安奉殿。

孝陵。

孝東陵。

仁孝皇后。

孝昭皇后。

孝懿皇后陵○停止次日朝賀○

上哀慟不已。毀瘠過甚。

聖母皇太后。屢傳諭勸進飲食。

上泣奏曰。若能進飲食。臣必稍進。以慰慈衷○

諸王大臣等。合詞奏請節哀。並勸進饘粥。諭曰。仰思

皇考深恩。不但諸王大臣哀慕無窮。凡官員兵民。均茲依戀。况朕親承鞠育。盡孝盡哀。乃爲

子之道。奚能自己。且朕既受付託之重。朕自

酌量。可進飲食。朕自少進。若勉強飲食。反於

朕躬無益。嗣後不必勸奏○諭理藩院。先時

皇考甚愛惜諸蒙古王。台吉等。一應大事。其未

出痘者。皆不令來京。朕何敢有違前旨。著行

文各蒙古處。其未出痘者。不必前來。諸蒙古

皆感戴我

皇考撫養重恩。今來朝謁

梓宮。非常日可比。可增給口糧。以示優典○賞

給

梓宮前太監皮衣○以十六阿哥允祿署理內

務府總管○以兵部右侍郎阿克敦兼翰林

院掌院學士。內閣學士勵廷儀。兼管翰林院

掌院學士事。吏部右侍郎張廷玉。兼內閣學

士。協辦翰林院掌院學士事○丁酉。宣讀

大行皇帝遺詔。頒行天下。初。禮部奏進宣讀

遺詔儀注。止載自宮中捧出。未載

皇上行禮之處。

上命總理事務王大臣。及禮部。酌定典禮。

遺詔捧出時。

上立乾清宮簷下。大學士謹捧

遺詔。由中路而出。

上跪俟

詔過。乃起○命總理事務王大臣。速行修理景

山壽皇殿。諭曰。朕受

皇考深恩。如天罔極。忽升

仙馭。攀戀無從。惟有朝夕瞻近

梓宮。稍盡哀慕之忱。今王大臣等所議安奉之處。或在南海子。或在鄭家莊。此二處隔越郊外。離宮禁甚遠。朕心不忍。緬惟

世祖章皇帝大事時。曾安奉景山壽皇殿。朕意亦欲安奉於景山壽皇殿。庶得朝夕前往。親行奠獻。○又諭。先因京師米價騰貴。

皇考宵旰焦勞。特命朕查視各倉。彼時見倉糧充溢。露積不少。因請將應行出倉之米。迅速辦理。蒙旨俞允。朕今仰體

皇考軫念民生至意。務令米價漸平。著交與監督張垣麟。陳守創等。會同倉場總督帶領工部賢能司官。將倉廩確實料估。應修補者速行修補。應添建者。於明歲春初添建。所需錢糧。動用捐貯驛站銀兩。其應否補項之處。再議。此事豈非此時應下之旨。係遵奉

皇考原下之要旨。是以特諭。○又諭。

皇考念切天下兵民生計。因京師米貴。焦思極慮。當

龍馭上賓之時。猶惓惓未釋於懷。向來口外米穀。不准運進口內。而燒鍋仍照常開設。可速令口外米穀准其進口。其開設燒鍋。著行禁止。○解順天府府尹俞化鵬任。擢工科給事中。陳守創為順天府府尹。○戊戌。禮部奏進登極儀注。

上自乾清宮月臺。坐御輿。出乾清正門。諭曰。乾清宮安奉

梓宮。雖懸設簾幙。朕何忍在

皇考前乘輿而出中門。著移向乾清門外。朕出東旁門乘之。○禮部又奏請

御殿行禮畢。例應列坐賜茶。諭曰。朕祇承

皇考遺命。勉抑哀痛。以遵大禮。豈忍安坐飲茶。即在朝羣臣。亦誰能下咽。著停止賜茶。○禮部又奏捧寶人員。應捧玉寶。由乾清宮御路中行。諭曰。此寶雖

皇考舊日所御。今傳之於朕。

梓宮在上。豈可竟由中路而出。著由甬路旁行

○封固山貝子蘇努爲多羅貝勒○命兵部尚書白潢協理內閣大學士事務○以精奇尼哈番音德爲散秩大臣○署鑲白旗護軍統領○正藍旗護軍統領宗室色亨圖緣事革職○陞鑲白旗漢軍副都統希爾根爲正藍旗護軍統領○一等侍衛拉錫爲鑲白旗漢軍副都統○命工部左侍郎署湖廣總督滿丕來京○在厠任侍郎內行走○陞廣東巡撫楊宗仁爲湖廣總督○以原任江南安徽布政使年希堯署理廣東巡撫○命王以下閒散宗室以上於屬下人員內各保舉一二人○贈故大學士諡文端張英爲太子太傅刑部侍郎諡文恪勵杜訥爲禮部尚書○以從前內廷行走年久端謹恪勤亦曾教諸皇子讀書○上篤念舊勞特加恩卹也○特賜閒散覺羅查喇等千餘人孝布○其年老病廢並未及年齒者俱准全給○己亥

上以

大行皇帝遺詔定制二十七日釋服諭諸王滿漢大臣曰○三年持服乃人子之道○若未遂朕志○必致慙恨無已○爾諸王滿漢大臣宜體朕意○以總督倉場侍郎張伯行辦理戶部右侍郎錢局事務○陞內務府總管李英貴爲總督倉場侍郎○庚子○

上以登極遣官告祭

天○

地○

太廟○

社稷○

奉先殿○禮部奏

皇上登極先詣

皇太后前行禮畢然後御殿○並啟奏於

皇太后奉

皇太后懿旨○皇帝誕膺大位○理應受賀○至與我

行禮有何關係○况

先帝喪服中○即衣朝服受皇帝行禮○我心實爲

不安著免行禮。是日王大臣等又繕摺固請。  
皇太后仍不允。

上又再三懇請奉

皇太后懿旨。諸王大臣等既援引

先帝所行大禮。懇切求請。我亦無可如何。今晚  
於

梓宮前謝恩後。再行還宮。○禮部又奏

皇上紹承大寶。應詣

梓宮前行告祭禮。至上食奠酒。請遣員恭代。諭

曰。奠酒時。朕仍親奠。強自節哀。朕得多近

皇考梓宮。愈增福祉。更復何所避忌。明蚤上食。

爾部大臣引朕至乾清宮門外。朕親奠畢。旁

立。候徹祭。再行告祭禮。○辛丑

上即皇帝位。是日黎明。鹵簿全設。各官齊集於

朝

上素服。詣

梓宮前。跪。上香。告受

命於

大行皇帝。行三跪九叩頭禮。

聖容哀感。受命畢。至東偏殿。易禮服。詣永和宮

皇太后前行禮畢。御太和殿。升寶座。鳴鐘鼓。中

和樂。設而不作。王以下文武各官行朝賀禮。

免宣慶賀表。○頒詔大報。詔曰。惟我國家受

天綏佑。

太祖。

太宗肇造區夏。

世祖章皇帝統一疆隅。我

皇考大行皇帝臨御六十一年。德茂功高。文經

武緯。海宇寧謐。曆數悠長。不謂謝棄臣民。遽

升

龍馭。親授神器。屬於藐躬。朕

皇考大行皇帝

德妃之子。昔皇二子弱齡建立。深為

聖慈鍾愛。寢處時依。恩勤倍篤。不幸中年神志

昏憤。病類風狂。

皇考念

宗社重任。付託爲艱。不得已再行廢斥。待至十有餘年。沉疾如故。痊可無期。是以

皇考升遐之日。詔朕繼承大統。朕之昆弟子姪甚多。惟思一體相關。敦睦罔替。共享昇平之福。永圖磐石之安。孔子曰。三年無改於父之道。我

皇考臨御以來。良法美政。萬世昭垂。朕當永遵成憲。不敢稍有更張。何止三年無改。至於

皇考知人善任。至明至當。內外諸大臣。朕方亟資翊贊。以期始終保全。務宜竭盡公忠。恪守廉節。俾朕得以加恩。故舊克成孝思。儻或不守官箴。自干國紀。既負

皇考簡拔委用之恩。又負朕篤愛大臣之誼。部院屬吏直省有司。亦宜實心任事。潔已奉公。不得推諉上官。自曠厥職。天下百姓受

皇考恩澤日久。蠲賑頻施。勸懲備至。間有愚氓甘犯律令

皇考每遇讞決。必加詳審。爰書累牘。披閱靡遺。

少有可生之路。立施法外之仁。凡我百姓。各宜孝親敬長。畏罪懷刑。以副朕仰法

皇考如天好生之意。茲因諸王。貝勒。大臣。文武官員人等。僉謂天位不可久虛。

宗社允宜蚤主。再三陳請。朕勉徇輿情。暫抑悲痛。於是月二十日。祇告

天

地

宗廟

社稷。即皇帝位。以明年爲雍正元年。仰惟

先志之宜承。深望皇圖之永固。適昭新化。期衍舊恩。於戲。追慕前徽。繼述無忘。於夙夜。廣推

聖澤。恩膏願被於寰區。凡爾親賢文武。其共矢蓋誠。各輸心膂。用紹無疆之業。永垂有道

之庥。布告天下。咸使聞知。○詔內恩款。凡三十條。○諭禮部。朕惟自古賢聖之君。必有顯

號徽稱。以昭功德之盛。垂於萬世。此國家不易之鉅典也。仰惟我



皇考大行皇帝臨御六十一年。蚤承大統。寅畏小心。旦明凜昭格之忱。

郊祀親升中之典。監於成憲。率由舊章。孝奉兩宮。尊養兼至。展敬

陵

廟。備物盡誠。總攬萬幾。阜成兆姓。蠲賦動盈千萬。賑恤曾不稽時。水旱先籌。雨暘必達。寬刑肆赦。德洽好生。盛暑則釋囹圄。嚴寒則賑饘粥。兵糧預給。優賞頻頒。淮甸屢巡。動數百萬之帑金。運

睿謨而兩河底績。魯邦特幸。行數千年之殊禮。屈

帝尊而九拜崇師。覽奏牘而利弊周知。覲臣僚而賢愚立辨。保全勲舊。庇廕宗支。廣育人材。敦厚風俗。布昭聖武。申討不庭。元裔背叛。而旋踵就殲。三孽逆命。而剋期獻馘。鄂羅斯佔喀爾喀之疆圉。諭以威德。即奉約章。喀爾喀逼厄魯特之暴殘。納其困窮。胥登衽席。噶爾

丹肆毒鄰境。三臨絕漠。掃靖烽煙。策安阿喇布坦。摧滅與國。出師命將。恢復藏地。臺灣置郡。紅苗革心。南朔東西。無思不服。至於天縱生知日新好學。講筵時御。手定六經。廣博士於五賢。配先儒於十哲。文婉二典。書邁百家。貫徹天文。總括地理。旁羅術數。考正元聲。研索羣編。鑒裁纂輯。凡此難名之美善。洵亘古帝王首出之一人。雖復累牘連章。不能紀述萬一。朕方與天下臣民。均切怙戴。不意

龍馭上賓。顧予冲人。嗣膺大統。仰承佑啟之恩。敢後顯揚之禮。謹考彝章。宜升

尊諡。爾部詳察典禮具奏。○又諭朕惟君國之道。必崇孝理。化民之本。務重尊親。欽惟我母后。仁承天德。順協坤儀。恭儉溫慈。懋昭淑範。思勤顧復。誕育藐躬。朕纘荷鴻圖。恭承懿訓。顯揚聖善。儀典宜隆。式考舊章。恭上

皇太后尊號。爾部詳察典禮具奏。○壬寅諸王大臣等具奏。請遵

大行皇帝遺詔二十七日釋服得旨。

皇考大行皇帝聖德神功罕有比倫實爲亘古未有之

聖君朕亦不宜行近代相沿之典禮釋服之制以日易月雖始於漢文而高宗諒陰三年獨非古制乎朕不能上比高宗而哀慕之情不能自己且稽之史冊漢文以來誰能媲美皇考則朕又安忍守漢文二十七日之制乎本朝舊制釋服亦待百日之期庶可稍盡思君

思父之哀衷揣爾等之意惟恐過勞朕躬殊不知朕若持服尚可少進饘粥暫眠苦塊如必強朕釋服則朕必至寢食俱廢矣朕言及此曷勝嗚咽爾諸王大臣其諒之○加封故大學士三等公圖海爲一等公致祭一次仍遣官修理墳塋以其孫領侍衛內大臣三等公馬爾賽爲一等公○癸卯諭兵部題補引見武職官員著派王大臣驗看查例補授赴任以免守候之苦○大學士等奏頒雍正年

號錢文式樣得旨錢文係國家重務向因錢價昂貴常屢

皇考聖懷今何以使錢文價平方合

皇考便民利用之意從前雲南巡撫楊名時題請鼓鑄部議不准舉行滇省之外何省應令鼓鑄與錢價有益著總理事務王大臣九卿公同會議具奏尋議鼓鑄錢文應令雲南四川兩省設爐鼓鑄從之○甲辰

上詣

梓宮前行初祭禮備盡誠敬哀慟不已○諸王大臣等復奏國家

郊

廟祀典必待

皇上除服後舉行大禮不可久闕考據古今典禮合詞懇請遵奉

大行皇帝遺詔以二十七日釋服得旨覽諸王大臣所奏引據經書義理明晰朕惟有嗚咽悲慟耳始知爲君之難祇此持服一節乃天

子第一苦衷。曾不如臣庶尚能各盡其心。雖勉從所請。朕之哀思。因茲愈切矣。○諭內閣。佟國維襲公奏摺。蒙

皇考留中。此一等公爵。著隆科多承襲。佟國維墳塋。交與該部修理。加祭一次。○傳諭大將軍以下。各路將軍及直省督撫提鎮等。有差員齋摺到京者。照常啟奏。無得沉隱停滯。違者。照大不敬律治罪。并嚴諭伊等在京子弟家人。○乙巳。總理事務王大臣等奏

大行皇帝尊諡廟號。伏候

皇上親定得旨。

皇考大行皇帝尊諡廟號。諸王大臣等請朕親定。朕思子臣尊崇君父之心。何有止極。然必須至允至當。方孚千秋定論。若少有溢美之詞。不獨失天下之至公。且開後人之僭越。是因臣子之愚忠愚孝。轉將君父盛德大業之實行。涉於贊頌之虛文。朕心殊不安也。我皇考大行皇帝續繼大統。舊典本應稱宗。但經

云祖有功而宗有德。我

皇考鴻猷猷駿烈。冠古轡今。拓宇開疆。極於無外。且六十餘年。手定太平。德澤恩溥。萬國來王。論繼統則爲守成。論勲業實爲開創。朕意宜崇

祖號。方副豐功。但追崇大典攸關。理應僉謀共協。爾諸王大臣等。會同九卿詹事科道文六品以上。武四品以上。詳考舊章。從公確議。毋得依違。毋得附和。務期紀實。以垂萬年。○丙午。諭內閣。隆科多應稱呼舅舅。嗣後啟奏處。書寫舅舅。隆科多。○諭總理事務王大臣等。步軍統領隆科多。總理事務。甚屬繁劇。著護軍統領袁泰署理。步軍統領事。○鑲紅旗漢軍都統馬雲霄緣事革職。以刑部尚書陶賴兼管鑲紅旗漢軍都統。○戊申。命内外文武大臣官員。從前領奉大行皇帝硃批諭旨。悉封固繳進。無得留匿焚棄。○賞守護

梓宮人等。各銀三十兩。整理衣服。擢原任庶吉士福敏。爲內閣學士兼禮部侍郎。以鑲藍旗滿洲副都統伊都善署本旗護軍統領。○己酉。諸王貝勒貝子公。文武大臣官員等議奏。

大行皇帝尊諡廟號。議曰。謹按傳云。爲人君止於仁。禮運云。仁者義之本。順之體也。得之者尊。說文云。在天爲元。在人爲仁。故易曰。元者善之長。仁者德之首。

大行皇帝體元立政。茂育羣生。以義制事。綏安兆姓。史稱帝堯其仁如天。惟

大行皇帝實與並之。又按禮經云。有虞氏禘黃帝而郊嚳。祖顓頊而宗堯。而尚書舜典云。舜格於文祖。釋者謂文祖堯廟也。又歸格於藝祖。釋者謂藝祖堯之祖也。合之祖顓頊之文。則有虞氏有三祖矣。宋臣陳祥道云。凡配天者。皆得稱祖。故國語展禽有有虞氏祖高陽而郊堯之說。堯所以稱文祖也。顓頊至堯。皆

黃帝子孫。而皆稱祖。又周禮。大宗伯。祫禘追享朝享。辭云。古者朝廟。合羣祖而祭焉。故祫謂之朝享。以合羣祖爲不足。又禘其祖之所自出。故禘謂之追享。夫祖之所自出。始祖也。而其下曰羣祖。則自始祖以下。皆可稱祖矣。又諡義曰。帝王功業隆盛。引古者祖有功之義。得稱祖。此皆經書可據者。臣等竊謂惟聖字。可以贊揚。

大行皇帝之峻德。惟

祖號。可以顯彰。

大行皇帝之隆功。恭擬敬上

尊諡曰。

合天弘運文武睿哲恭儉寬裕孝敬誠信功德

大成仁皇帝。

廟號曰

聖祖。是日。

上召諸王大臣等入諭曰。諸王大臣官員俱深悉我

皇考一生神聖實行同心合詞恭上尊稱無一人異詞。甚愜朕懷。朕之哀思庶可稍釋。諭畢。上持針刺中指出血。將奏內。

聖祖二字圈出。敬恭高捧。交與大學士等齎出。

○諭總理事務王大臣等。

陵寢自修理以來。歷有年所。今應重加修繕。彩畫表飾。著議奏。尋議。

陵寢重大。應派內務府總管一員。工部堂官一員。閱看修理。得旨。著派十七阿哥允禮去。再。

著孫渣齊佛保去。○諭內務府總管等。諸王。

大臣僉云。朕持服二十七日後。應居乾清宮。

朕思乾清宮。乃。

皇考六十餘年所御。朕即居住。心實不忍。朕意欲居於月華門外養心殿。著將殿內畧爲葺理。務令素樸。朕居養心殿內。守孝二十七月。以盡朕心。○庚戌。諭大學士等。朕惟敷政之道。用人爲先。闢門籲俊之典。由來尚矣。然知人則哲。自古爲難。朕在藩邸。不與朝臣往來。

所以內外大小官吏。皆不能晰知。今荷皇考大行皇帝命。承大統。臨御之初。簡用人材。爾諸大臣。皆久蒙。

皇考知遇。任以股肱。茲值。

梓宮在上。靈爽式憑。爾等哀感交迫之時。益當各竭忠蓋。仰報高深。內而大臣。以及間曹。外而督撫。以及州縣。或品行端方。或操守清廉。或才具敏練者。爾等各據真知灼見。從公具摺密奏。古人云。內舉不避親。外舉不避讎。爾等果矢公忠。以人報國。或素日同僚共事。或同鄉同年。或門生親戚子弟。俱准保奏。勿避嫌疑。勿徇私援黨。勿沽名市恩。勿輕聽風聞。勿言過其實。有一於此。則上負。

皇考任用之恩。又負朕諮詢之意矣。

皇考遺命。囑朕篤愛懿親。保全臣下。數十年來。聖明之世。本不容有姦貪昭著之人。朕所需者人材。但當有舉無劾。毋得修怨陷害。爾等具摺。或滿字。或漢字。各須親寫。不可假手於。

子弟。詞但達意。不在文理字畫之工拙。其有不能書寫者。即行面奏。至於政事中有應行應革。能裨益國計民生者。果能深知利弊。亦著各行密奏。朕自即位以來。用人行政。若有闕失。亦宜直言無隱。朕之諄切詢問者。一則急欲得人。以資治理。二則欲知朕行事之當否。三則觀爾等所舉之人。及所奏之事。便可知爾等之居心制行矣。○諭理藩院。翁牛特公鄂齊爾。自幼跟隨我

皇考。効力多年。人甚謹慎。朕十歲時。亦曾跟隨出獵行走。著封為貝子。○宗人府右宗正鎮國公準。達患病辭任。以左宗人輔國公阿布蘭。為右宗正。○陞盛京工部侍郎覺羅蘇庫。為禮部尚書。戶部左侍郎敦拜。為都察院左都御史。內閣學士勵廷儀。為兵部左侍郎。仍兼管翰林院掌院學士事。○河南巡撫楊宗義疏報。鄧州新野等七州縣。開墾康熙六十年分田地五百六十三頃有奇。下部知之。○

停止江南常州府解送薦新廂米。○辛亥。諭吏部。現今調來引見人員。著將職名。分晰繕寫進呈。其中有應令引見者。或應派大臣驗看者。其補授赴任之處。候旨定奪。○以兵部尚書孫柱充經筵講官。○陞內閣學士格爾布。為盛京戶部侍郎。○遣滿漢御史各一員巡查

陵寢道路。嚴禁往來人等騷擾村莊。飭地方官修理道路。不得豫派累民。○靖逆將軍富寧安奏報。巴爾庫爾等處地方屯田。收穫青稞一萬五百七十石有奇。下部知之。

大清世宗敬天昌運建中表正文武英明寬仁  
信毅大孝至誠憲皇帝實錄卷之一

大清世宗敬天昌運建中表正文武英明寬仁  
信毅大孝至誠憲皇帝實錄卷之二

敕修

康熙六十一年壬寅十二月壬子朔以奉移

大行皇帝梓宮安奉

壽皇殿日期行告祭禮

上從苦次望見陳設祭品失聲大慟諭誠親王

允祉等曰

皇考明年七旬大慶吾兄弟等方思

萬壽聖節在暢春園盡誠致敬供奉甘旨與四

海臣民共效無疆之祝豈意今年此日乃於

乾清宮作如此陳設耶復大慟不止諸王皆

伏地號慟大臣近侍在左右者咸感泣不能

仰視○恭檢

大行皇帝御用服物於

梓宮前頒賜諸王大臣及內廷効力人員有差

○諭宗室及覺羅人等

皇考至仁至厚恩篤宗支凡宗室覺羅大罪薄

懲小罪寬免歷年無一人及於刑辟者必不

得已乃令圈禁朕思

皇考時問罪圈禁之人原不應釋放祇以現遇

恩赦姑與寬宥伊等當念身係宗室覺羅須

閉戶家居安分靜守慎毋怙過不悛再罹重

罪禁止八旗官員詬罵屬下人等父母違

者交該管官懲治以鑲紅旗滿洲副都統

馬爾薩署正黃旗滿洲都統鑲藍旗滿洲副

都統伊都善署正黃旗蒙古都統鑒儀使李

林署正黃旗漢軍都統○癸丑諭戶部

皇考御極六十餘年澤周兆姓恩洽人心凡巡

幸所經州縣小民無不除道清塵趨事恐後

古北口一路爲我

皇考每年行幸之地農工商賈皆得瞻仰

天顏親承膏澤今聞

皇考賓天民心倍深悲痛朕念此路百姓歷年

殫力宜加恩恤著將宛平順義懷柔密雲平

谷五縣昌平一州雍正元年正項錢糧盡行

蠲免又

陵寢一路此時正當修道亦宜加恤著將大興

三河二縣通薊遵化三州雍正元年正項錢

糧亦盡行蠲免爾部即遵諭行○是日向夕

上以翼日

梓宮將移

壽皇殿特命御膳房供祭加隆

上奉掌獻饌哀號陳奠諸王大臣皆慟哭失聲

○甲寅恭移

大行皇帝梓宮安奉

壽皇殿

上先於

梓宮前親奠呼搶擗踊痛哭盡哀



靈駕由景運門出。升大輿。

上西向跪哭隨行。是日鹵簿全設。內大臣侍衛俱在乾清門外分翼跪列。總理事務王大臣內務府禮部工部大臣等俱在兩旁敬謹護侍。其餘王以下公以上文武滿漢大臣等俱分翼齊集候。

梓宮至。跪迎畢。號哭隨行。聲震衢路。

梓宮入殿門。

上於東首跪迎。

皇太后率同太妃。

皇后妃嬪等預俟於殿內皆跪迎。隨安奉。

梓宮畢。

上行奠祭禮。號哭盡哀。○是日恭奉。

大行皇帝服御諸物及圖籍寶器文房武庫之具。手澤攸存者悉陳列。

几筵左右。自後。

上每日黎明詣。

壽皇殿獻食三次。每獻畢。於觀德殿席地坐。有。

應奏事件。仍命照常呈進。至日脯。方回。苦次。

○諸王大臣等合詞恭懇節哀。諭曰。我朝自。

太祖

太宗

世祖以至

皇考。咸貴實行。不尚虛文。朕受

皇考教誨鞠育。迄今四十餘年。恩勤篤摯。慈愛

無窮。今遇

皇考大事。五內哀痛。至情迫切。實不能已。朕非

於此自謂盡孝。亦非博盡孝之虛名也。况

天降縞雪。林木皆白。自安奉。

梓宮。羣鴉環繞殿庭。哀鳴七夜。仰觀

天意。俯察物情。尚且如此。朕能已於沉痛乎。今

梓宮奉移壽皇殿。朕未釋服之前。必每日三次

親詣獻食。一月內每日一次親詣獻食。一月

後。數日親詣一次。如此。庶可稍釋悲思。若欲

朕銜哀強制。則朕心愈無以自解。爾諸大臣

不必再奏。○諭總理事務王大臣等。從前。

皇祖母孝惠章皇后大事時

皇考命貝子允禩署理內務府總管事務辦理

妥協

皇考曾深嘉之。今茲大事。允禩經理三衙門事務。井井有條。其辦理

梓宮事務甚為効力。允禩著封為郡王。其總理

事務之王大臣等。亦克殫惓誠。諸事允當。除

二王已經加恩外。舅舅隆科多大學士馬齊

俱著賞給阿達哈哈番世職。○調戶部左侍

郎李永紹為盛京工部侍郎。陞內閣學士李

周望為戶部左侍郎。太常寺卿黃叔琳為內

閣學士。兼禮部侍郎。○乙卯。禮部會同王大

臣。及大學士。翰林各官等。恭上

皇太后徽號曰

仁壽皇太后。遂將應行典禮。儀注具奏。奉

皇太后懿旨。予蒙

大行皇帝深恩。備位妃列。幾五十年。雖夙夜小心。勤修壺職。未能圖報萬一。今日予子仰遵

遺命。繼承大統。實深悚惕。當

龍馭升遐。予本欲相從冥漠。予子皇帝再三諫

阻。情辭懇至。予念

先帝付託之重。丕基是紹。

宗社攸關。勉慰其心。未伸予志。今諸王大臣援

引舊典。請上尊稱。此時

梓宮大事。正在舉行。淒切哀衷。何暇他及。尊崇

典禮。實非予心所安。予戒慎居心。謙沖訓子。

但願予子體

先帝之心。永保令名。諸王大臣體

先帝之心。各抒忠悃。則兆民胥賴。海宇蒙休。予

躬大有光榮。勝於受尊稱遠矣。諸王大臣共

諒予心。勿復固請。於是諸王大臣等復援據

典禮。具摺懇請。

皇太后堅執不允。

上誠敬諄切。叩請再三。始奉

皇太后懿旨。諸王大臣援引舊典。懇切陳辭。皇

帝屢次叩請。這所奏知道了。○命八旗詳察

孝行素著者以聞○丙辰

上詣

壽皇殿祭奠○內閣禮部撰擬元旦萬壽冬至

表式奏請頒發得旨

皇考大事未過百日正哀慕之時朕豈忍升殿

受賀元旦冬至賀表俟雍正二年舉行至萬

壽表文過二十七月後舉行○遣公鄂倫岱

仍往軍前總理驛站事務○陞盛京佐領噶

達鴻為內務府總管○丁巳

孝惠章皇后忌辰遣官祭

孝東陵○諭內閣朕仰荷

祖宗眷佑續承大統恭上

皇考聖祖仁皇帝

尊謚敬念

太祖高皇帝

太宗文皇帝

世祖章皇帝

三聖相承功高德盛載考典章加上

尊謚因念

孝莊文皇后肇基翊運啟佑

兩朝朕在冲齡備膺慈愛

孝康章皇后誕育

先皇懿徽流慶

孝惠章皇后德隆福厚篤愛朕躬朕意亦宜並

加

尊謚但追尊固出至情而推崇必遵定禮爾等

酌古準今會同確議俾朕得稍展思慕之誠

又念

仁孝皇后作配

皇考孝敬寬仁坤儀懋著

孝昭皇后恪恭溫順樹範宮闈

孝懿皇后徽音淑德慈撫朕躬思勤備至均應

恭上

尊謚以昭示萬年內閣九卿翰詹科道會同詳

察典禮具奏尋議臣等伏查從前恭上

列祖尊謚

太祖承天廣運聖德神功肇紀立極仁孝睿武  
弘文定業高皇帝。今擬於睿武字下。加上端毅  
二字。

太宗應天興國弘德彰武寬溫仁聖睿孝隆道  
顯功文皇帝。今擬於睿孝字下。加上敬敏二字。  
世祖體天隆運英睿欽文大德弘功至仁純孝  
章皇帝。今擬於體天隆運字下。加上定統建極  
四字。又查從前恭上

列后尊謚

孝慈昭憲敬順慶顯承天輔聖高皇后。今擬於  
敬順字下。加上仁徽二字。

孝端正敬仁懿莊敏輔天協聖文皇后。今擬於  
仁懿字下。加上哲順二字。

孝莊仁宣誠憲恭懿翊天啟聖文皇后。今擬於  
恭懿字下。加上至德二字。

孝惠仁憲端懿純德順天翼聖章皇后。今擬於  
端懿字下。加上慈淑二字。

孝康慈和莊懿恭惠崇天育聖章皇后。今擬於

恭惠字下。加上溫穆二字。又

仁孝皇后。

孝昭皇后。

孝懿皇后尊謚。應遵照初上

尊謚十二字之典禮。恭擬上

仁孝皇后尊謚曰

仁孝恭肅正惠安和儷天襄聖皇后

孝昭皇后尊謚曰

孝昭靜淑明惠正和欽天順聖皇后

孝懿皇后尊謚曰

孝懿溫誠端仁憲穆奉天佐聖皇后。伏候欽定

得旨。是依議。○諭總理事務王大臣等。朕奉

皇太后懿旨。

孝懿皇后曾撫育爾躬。貴妃係

孝懿皇后親妹。應將貴妃封爲皇貴妃。又和妃

奉事

先帝。最爲謹慎。應將和妃封爲貴妃。朕惟

皇太后聖心至仁至厚。此

旨實爲允當。爾等會同禮部查例具奏。又諭朕奉

皇太后懿旨。爾兄弟之母。當加意相待。朕念十二阿哥之母。多年侍奉

皇考。甚爲謹慎。久列嬪位。今晉封爲妃。十五阿哥十六阿哥之母。亦晉封爲妃。再現在有曾生兄弟之母。未經受封者。俱應封爲貴人。六公主之母。應封爲嬪。內有一常存年已七旬。亦應封爲貴人。戊午諭吏部兵部王大臣等。驗看革退人員內。其武職官曾在軍旅

効力。身經受傷。雖年齒衰邁。仍留職銜。文職官除年老庸劣外。若由進士舉人正途出身。初選知縣。即以才力不及革退。亦屬可憫。嗣後將此等人員。或改授教職。或以原品休致。著會同酌議。定例遵行。停止直省將軍督撫提鎮等官貢獻方物。其有恭獻

梓宮前食品。及齋送御用藥物。仍照常呈進。定下五旗補放叅領

各缺。均勻公派。親王門下叅領。不得過三員。郡王門下叅領。不得過二員。○己未諭總理事務王大臣等。

皇考因八旗都統護軍統領前鋒統領等。印信過多。易致營私作弊。是以左右翼只各設印信一顆。今當大事之際。政務紛繁。若俟一翼大人齊集。乃始用印。恐致遲誤。若分設印信二十四顆。未免過多。著總理事務王大臣會同禮部兵部定議具奏。尋議。八旗皆有滿洲蒙古漢軍都統三員。應於每旗共給印信一顆。以昭信守。從之。○諭理藩院外藩小台吉等到日。應給與廩餼。不必久留。即令起程。各回本處。隨到隨令瞻仰。

梓宮。至於除服之後。朕隔一二日。至

壽皇殿。乘便著蒙古王貝勒貝子公並大台吉十餘人。齊集見朕。其各小台吉。亦令於景山東門內遠處齊集。○以故多羅貝勒克起子固山貝子魯賓改授爲襲封固山貝子。○以

鑲白旗蒙古都統馬武。爲鑲黃旗領侍衛內大臣。仍兼理內務府總管事務。正紅旗滿洲副都統宗室勒什亨。署正黃旗領侍衛內大臣。陞正白旗蒙古副都統覺羅舒魯。爲正白旗領侍衛內大臣。調正藍旗漢軍都統宜兆熊。爲鑲白旗漢軍都統。○庚申。釋服。行大祭禮。

上號慟不已。羣臣伏地環跪懇請。

上乃於

几筵前。行三跪九叩頭禮。跪撫

寶榻。悲哀逾切。良久。始易素服。是日

上從苦次。移居養心殿。自是每日黎明。親詣

壽皇殿奠獻。致敬盡哀。○以領侍衛內大臣公

鄂倫岱。爲正藍旗漢軍都統。○辛酉。

上詣

壽皇殿行禮。○

上詣

皇太后宮問安。○諭總理事務王大臣等。往年

稅差官員。公帑無虧。而羨餘又足養贍家口。兼及親族。近日則不然。率多虧帑獲罪。歸亦無顏見其族戚。公私均屬無益。

皇考洞鑒其故。每將稅務交與地方官管理。各省已居其半。嗣後稅務悉交地方官監收。歲額之外。所有羨餘。該撫奏聞起解。應賞給者。再行賞給。爾等會同戶部工部議奏。○又諭山東按察使黃炳。著補授山東巡撫。山東巡撫謝賜履。操守頗好。人亦謹慎。但現今漕船阻凍。兼有修築河工之事。謝賜履係新任之員。未能諳悉。著以相當之缺。另行補用。至於黃河衝決。現在堵築未竣。今冬若不乘時辦理。恐至來春桃汛之時。愈難措置。國子監祭酒齊蘇勒。著補授山東按察使。先赴河南。會同楊宗義。陳鵬年。將今冬修理黃河之處。商酌明白。再赴按察使新任。山東漕運河道事務。亦著齊蘇勒會同巡撫辦理。李樹德。向蒙皇考簡任山東巡撫。旋改福州將軍。尚未赴任。

今東省錢糧急宜清查。著宜兆熊前赴福州署理將軍事務。李樹德代宜兆熊署理都統事務。清查伊任內錢糧。○以鎮國公登塞爲宗人府左宗人。○禮部議覆據朝鮮國王解送山東採漁人楊三等十四人。被風飄至伊國。審無信票。又據奉天將軍咨報。楊三等至鳳凰城。始將信票交出。復被領催雅爾泰失去。應將楊三等。交山東巡撫確查。曾否給票。雅爾泰照例治罪。得旨。朝鮮誠心篤敬。臣服我朝。歷年已久。今將被風飄至楊三等船隻送回。伊等或實係風飄到彼。或匪類借端。欲爲不法。俱未可定。嗣後飄風船隻人口。驗有票文。並未生事者。照舊令其送回。若無票文。生事犯法者。著朝鮮國即照伊國法究治。庶足懲匪類而戒妄行。著九卿詹事科道。公會議具奏。○振武將軍傅爾丹奏報。鄂爾齊圖果爾等處地方。屯田收穫。糜子青稞麥子。共一萬二百石有奇。下部知之。○免山西黎

城縣康熙六十年分雹災額賦。○壬戌

上詣

壽皇殿行禮。

上詣

皇太后宮問安。○諭總理事務王大臣等。署理寧古塔將軍宗室巴賽。奉天將軍唐保佳。雲貴總督高其倬。總河陳鵬年。山西巡撫德音。廣東提督馮毅等。俱著實授。○諭八旗都統。比見八旗官員兵丁內。嗜飲沉湎。以致容貌改常。輕生破產。肆行妄爲者甚衆。其中豈乏材具可用之人。朕實憫之。惜之。著八旗都統。各查該屬官員兵丁內。酗酒不肖之徒。定以限期。速令悔改。能改則已。如不能改。係官員即行題參。應襲者令人承襲。係兵丁即行革退。以示懲戒。法在必行。○封貝勒允禩爲和碩廉親王。十三阿哥允祥爲和碩怡親王。貝子允禩爲多羅履郡王。二阿哥子弘晳爲多羅理郡王。○禮部遵

大行皇帝諭旨議覆

歷代帝王廟原祀伏羲氏神農氏軒轅氏金  
天氏高陽氏高辛氏陶唐氏有虞氏夏禹王  
商湯王周武王漢高祖世祖唐太宗遼太祖  
宋太祖金太祖世宗元太祖世祖明太祖二  
十一位今擬增夏啟仲康少康杼槐芒世不  
降扁廛孔甲皋發商太甲沃丁太庚小甲雍  
己太戊仲丁外壬河亶甲祖乙祖辛沃甲祖  
丁南庚陽甲盤庚小辛小乙武丁祖庚祖甲  
康辛庚丁太丁帝乙周成王康王昭王穆王  
共王懿王孝王夷王宣王平王桓王莊王僖  
王惠王襄王頃王匡王定王簡王靈王景王  
悼王敬王元王貞定王考王威烈王安王烈  
王顯王慎靚王漢惠帝文帝景帝武帝昭帝  
宣帝元帝成帝哀帝明帝章帝和帝殤帝安  
帝順帝冲帝桓帝靈帝昭烈帝唐高祖高宗  
睿宗元宗肅宗代宗德宗順宗穆宗文宗武  
宗宣宗懿宗僖宗遼太宗景宗聖宗興宗道

宗宋太宗真宗仁宗英宗神宗哲宗高宗孝  
宗光宗寧宗理宗度宗端宗金太宗章宗宣  
宗元太宗定宗憲宗成宗武宗仁宗泰定皇  
帝文宗寧宗明太宗仁宗宣宗英宗景皇帝  
憲宗孝宗武宗世宗穆宗愍皇帝凡一百四  
十三位其從祀功臣原祀黃帝臣風后力牧  
唐虞臣皋陶夔龍伯夷伯益商臣伊尹傅說  
周臣周公旦召公奭太公望召虎方叔漢臣  
張良蕭何曹參陳平周勃鄧禹馮異諸葛亮  
唐臣房元齡杜如晦李靖郭子儀張巡許遠  
李晟宋臣曹彬韓世忠岳飛金臣幹魯粘沒  
喝幹离不元臣木華黎伯顏明臣徐達劉基  
三十九人今擬增黃帝臣蒼頡商臣仲虺周  
臣畢公高呂侯仲山甫尹吉甫漢臣劉章魏  
相丙吉耿弇馬援趙雲唐臣狄仁傑宋璟姚  
崇李泌陸贄裴度遼臣耶律曷魯宋臣呂蒙  
正李流寇準王曾范仲淹富弼韓琦文彥博  
司馬光李綱趙鼎文天祥元臣不忽木脫脫



明臣常遇春李文忠楊士奇楊榮于謙李賢  
劉大夏凡四十人得旨是依議速行○癸亥

上詣

壽皇殿行禮○

上詣

皇太后宮問安○諭內閣九卿等陳夢雷原係

叛附耿精忠之人

皇考寬仁免戮發往關東後東巡時以其平日  
稍知學問帶回京師交誠親王處行走累年

以來招搖無忌不法甚多京師斷不可留著  
將陳夢雷父子發遣邊外或有陳夢雷之門  
生平日在外生事者亦即指名陳奏楊文言  
乃耿逆偽相一時漏網公然潛匿京師著書  
立說今雖已服冥刑如有子弟在京者亦即  
奏明驅遣爾等毋得徇私隱蔽陳夢雷處所  
存古今圖書集成一書皆

皇考指示訓誨

欽定條例費數十年

聖心故能貫穿今古彙合經史天文地理皆有

圖記下至山川草木百工製造海西秘法靡  
不備具洵為典籍之大觀此書工猶未竣著  
九卿公舉一二學問淵通之人令其編輯竣  
事原稿內有訛錯未當者即加潤色增刪仰  
副

皇考稽古博覽至意○諭九卿等自

皇考升遐以來朕心哀慕無已一應典禮俱詳  
考舊章務從隆備蓋不敢以天下儉其

親也但上之所行下必效之向來八旗官員於  
喪葬等事每多糜費今見朕備禮如是恐習  
以成風競尚奢侈而兵民等或至傾家蕩產  
殊非朕以禮教天下之意論語云禮與其奢  
也寧儉喪與其易也寧戚禮記云喪具稱家  
之有無載在典籍灼然昭著著九卿等將滿  
漢職官按其品級分爲等次及兵民喪葬務  
從簡樸毋得僭妄併將婚嫁等禮詳議定例  
著爲令○諭刑部恩詔內赦罪一款徒開惡

人微倖之門於政治甚無裨益因朕即位之初諸臣援例陳請姑用允行實則此等罪人皆其自取並非治之以不應得之罪也此番援赦豁免人等俱宜詳記檔案如既赦之後仍不悛改干犯法紀務必將伊等加等治罪著詳悉曉諭○命大學士蕭永藻尚書凱音布陳元龍刑部右侍郎周道新原任侍郎穆爾泰都統馬三奇石文英副都統胡必圖談巴領侍衛內大臣宗室敬恒散秩大臣伍格巴渣爾內務府總管董殿邦等往馬蘭峪護視陵寢以蕭永藻勤慎廉潔特命加太子太傅銜○實授弘昇爲左翼前鋒統領調正白旗蒙古都統武格爲鑲白旗蒙古都統○以輔國公延信爲西安將軍仍署撫遠大將軍印務○禮部遵旨議奏雍正元年特開恩科請於四月鄉試九月會試十月殿試其癸卯甲辰鄉會試正科改於雍正二年舉行二月鄉試

八月會試九月殿試從之○理藩院遵旨將曾經軍前効力荷蒙

聖祖仁皇帝恩眷之蒙古王台吉等分別次序在

梓宮前以

聖祖仁皇帝御用物件賞賜

上諭曰凡此皆

皇考御用之物爾等乃

皇考信任之人故頒賜爾等嗣後當永永思念

皇考恩遇之隆倍加効力○命年老大臣六十

五歲以上許乘馬入內由東華門入者至箭

亭前下馬由西華門入者至內務府總管衙

門下馬○以大學士馬齊襲伊祖哈世屯一

等阿思哈尼哈番世職○晉封阿霸垓輔國

公達爾漢德木楚克爲鎮國公以其侍

聖祖年久謹慎樸誠也○裁直隸惠清河監督

缺令通州坐糧廳兼理○甲子

上詣

壽皇殿行月祭禮畢詣

皇太后宮問安○諭部院各衙門凡出示曉諭原欲利民除弊使人知所遵奉以昭功令也近見各衙門出示或變易舊章或恣徇私意或作威作福或釣譽沽名往往朝夕自爲更改彼此互相矛盾胥吏因之以作姦宵小借端以滋擾種種弊竇不可勝舉

先帝嘗深惡之嗣後各衙門遇當禁約曉諭之事務期矢公矢慎協情當理可以永遠奉行者方准出示儻仍蹈舊轍科道官即行參奏治罪○諭戶部自古惟正之供所以儲軍國之需當治平無事之日必使倉庫充足斯可有備無患

皇考躬行節儉裕國愛民六十餘年以來蠲租賜復殆無虛日休養生息之恩至矣而近日道府州縣虧空錢糧者正復不少揆厥所由或係上司勒索或係自己侵漁豈皆因公那用

皇考好生如天不忍即正典刑故伊等每恃寬容毫無畏懼恣意虧空動輒盈千累萬督撫明知其弊曲相容隱及至萬難掩飾往往改侵欺爲那移勒限追補視爲故事而全完者絕少遷延數載但存追比虛名究竟全無著落新任之人上司逼受前任交盤彼既畏大吏之勢雖有虧空不得不受又因以啟效尤之心遂借此挾制上司不得不爲之隱諱任意侵蝕輾轉相因虧空愈甚一旦地方或有急需不能支應關係匪淺朕深悉此弊本應即行徹底清查重加懲治但念已成積習姑從寬典除陝西省外限以三年各省督撫將所屬錢糧嚴行稽查凡有虧空無論已經參出及未經參出者三年之內務期如數補足毋得苛派民間毋得借端遮飾如限滿不完定行從重治罪三年補完之後若再有虧空者決不寬貸至於署印之官更爲緊要必須慎重簡擇蓋署印之人始而百計鑽營既而

視如傳舍。肆意貪婪。圖飽慾壑。或取媚上官。供其索取。貽害小民。尤非淺鮮。其於前任虧空。視作泛常。接受交盤。復轉授新任。苟且因循。虧空之弊。終不得清。嗣後如察出此等情弊。必將委署之上司。與署印之員。一併嚴加治罪。爾部可即傳諭各省督撫。○諭戶工二部。財者利用之源。古帝王足國裕民。務必制節謹度。朕初即位。每恐府庫金錢中飽於胥吏之侵蝕。以後凡戶工二部。一應奏銷錢糧米石。物價工料。必須詳查核實。開造清冊具奏。毋得虛開浮估。儻有以少作多。以賤作貴。數目不符。核估不實者。事覺。將堂司官從重治罪。○命吏部尚書富寧安。爲武英殿大學士。兼吏部尚書。以理藩院尚書舅舅隆科多。爲吏部尚書。仍兼管步軍統領事務。廉親王允禩。爲理藩院尚書。理藩院侍郎特古忒。加尚書銜。仍辦理侍郎事務。副都統拉錫。兼署理藩院侍郎事。○乙丑

上詣

皇太后宮問安。○陞鑲黃旗滿洲副都統壽智。爲本旗護軍統領。○丙寅。

上詣

壽皇殿行禮。

上詣

皇太后宮問安。○諭怡親王允祥等。朕受

皇考深恩。四十餘年。未嘗遠離。

皇考升遐。無由再瞻色笑。今追想音容。宛然在

目。御史莽鵠立精於寫像。昔日隨班奏事。常

覲

聖顏

皇考有

御容數軸。收藏內府。今

皇考高年

聖顏微異於往時。著莽鵠立敬憶

御容。悉心薰沐圖寫。○諭總理事務王大臣。從

前揀選庶吉士外。諸進士俱留京學習三年。

伊等若果用心學習猶可。如不用心學習。則留京何益。嗣後進士中揀選學問好者。著令爲教習。年滿照例錄用。其餘進士等。俱令回籍候缺補用。○命怡親王允祥總理戶部三庫事務。○陞內閣學士吳爾泰爲戶部左侍郎。○實授馬爾薩爲正黃旗滿洲都統。陞鑲白旗漢軍副都統拉錫爲正白旗蒙古都統。署鑲白旗護軍統領音德爲正藍旗滿洲都統。○命禮部改鑄太常寺及內務府總管銀印。○裁廣善庫衙門。停止內外官員借俸例。○丁卯。

上詣

皇太后宮問安。○諭總理事務王大臣等議政處將進藏損傷之駝隻牛驪。照噶什圖所奏議定著陝西省六省官員賠補。朕思官員賠補亦皆由民力而出。自有軍需以來。此數省民人亦甚勞苦。其賠補之處。俱著豁免。○陞三等侍衛衛觀音保爲正白旗漢軍都統。○陞

江西按察使石文焯爲江南安徽布政使司布政使。江西饒南九道陳安策爲江西按察使司按察使。停止直隸等四省官員運米餉軍例。戊辰。

上詣

皇太后宮問安。○諭內務府總管等。內廷各執事人員俱係隨侍

皇考之人。其中亦有大臣官員子弟。著各該處總管揀選保奏引見。朕酌量錄用。有通曉滿漢文者。著聲明。○諭議政大臣等。大將軍王來時朕止令副都統阿爾納隨來。弘曙令副都統阿林保隨來。旨意甚明。侍郎渣克旦係參贊大臣。擅自違旨前來。是何意見。著議政大臣詢問明白具奏。尋議侍郎渣克旦違旨私從軍前來京。應革職。照例枷責。其阿達哈哈番世職。應交該旗另請承襲。得旨渣克旦理應治罪。但係

皇考簡用。官至侍郎。此數年軍務伊亦効力。著

革職留任並帶伊世職。令其自備資力速回軍前。効力贖罪行走。○調鑲紅旗漢軍副都統廣福爲本旗蒙古副都統。陞河南南陽總兵官張致爲鑲紅旗漢軍副都統。○貴州提督張文煥以目疾休致。陞雲南鶴麗總兵官趙坤爲貴州提督。雲南援勦右協副將郝玉麟爲雲南鶴麗總兵官。正藍旗叅領佟世琳爲河南南陽總兵官。○調湖廣荊州右翼副都統寧古禮黑龍江副都統額爾賽來京。陞正黃旗叅領馬爾圖爲湖廣荊州右翼副都統。一等待衛阿思海爲黑龍江副都統。正白旗叅領蔡瑜爲廣東廣州左翼副都統。正黃旗叅領吳成龍爲廣東廣州右翼副都統。○戶部議覆河南巡撫楊宗義疏稱河南所屬不近水次州縣徵收折色米一十五萬一千三百八十石。每石折銀八錢。照例節省一錢五分。解部存銀六錢五分。令糧道採買。今年秋收歉薄。市價每石需銀一兩五六錢。與部

內所定之價大相懸殊。且恐採買如許漕糧米價更貴。貧民艱於得食。請將附近水次州縣應徵本色。現在徵收其不近水次州縣折色銀兩徵銀解部。或於來年秋後豐收分作三年採買搭運。應行令該撫將此項徵收折色銀兩於本年內採買一半。米石起運其餘一半銀兩收貯庫內。陸續採買於來年盡數起運。得旨今年應徵本色米石照常運送。其應買米石俱免其運送。著折銀解部。○工部議奏臺灣各屬軍器損缺應令賠補。得旨去年賊犯朱一貴等作亂官兵俱各効力。此項著落賠補軍器之處俱免其賠補。○己巳

上詣  
壽皇殿行禮○

上詣

皇太后宮問安○命協辦內閣事務兵部尚書

白潢爲文華殿大學士兼兵部尚書○調鑲

黃旗蒙古副都統宗室汝福爲本旗滿洲副

都統正藍旗漢軍副都統哲爾袞。爲鑲黃旗蒙古副都統。陞正白旗叅領多賽。爲正藍旗漢軍副都統。調正白旗漢軍副都統覺羅諾穆齊。爲本旗滿洲副都統。陞王府長史哈達。爲正白旗漢軍副都統。正白旗前鋒叅領薩哈查。爲本旗蒙古副都統。鑲白旗漢軍副都統眞泰。緣事革職。陞鑲白旗護軍叅領關色。王府長史巴爾呼達。俱爲鑲白旗漢軍副都統。巴爾呼達。仍兼長史行走。停徵江南海州武進九州縣水災漕糧。從江寧巡撫吳存禮請也。庚午。

上詣

皇太后宮問安。大學士馬齊等奏請纂修

聖祖實錄。得旨。是。大學士白潢具摺懇辭大學士之命。諭曰。朕嗣紹丕基。夙夜祇惕。惟恐負。

皇考付託之重。念內閣要地。襄贊匪輕。特命爾入閣辦事。爾具摺懇辭。朕素聞爾居官操守

甚好。巡撫江西時。綏輯地方。甚有裨益。及任兵部尚書。清勤恪慎。

皇考每加優獎。今朕以機務重大。資爾料理。爾可即遵旨供職。不必固辭。兵部事務亦緊要。仍著爾兼管。以宗室佛格。太常寺卿三泰。監察御史常保。俱爲內閣學士。兼禮部侍郎。三泰仍兼理太常寺事務。以原任貴州平越副將吳如譯。爲河南河北總兵官。陞直隸山永副將王安國。爲浙江處州總兵官。禮部等衙門議奏。帝王即位。首重元正。元者歲之始。正者月之始也。故曰春王正月。所以紀即位之始也。明年雍正元年。爲

皇上龍飛之首歲。

皇上孝思罔極。即不陞殿受賀。而羣臣進表之禮。斷不可缺。臣等請雍正元年元旦在京諸王百官恭進

皇太后表文

皇上表文。仍照例呈覽。交與內閣收貯。將此表

文式樣頒發朝鮮直隸各省於雍正二年具奏

皇上萬壽冬至雖不受賀其表文亦照例具奏交與內閣收貯如此則

皇上之孝思已盡而國家之大典亦全矣從之  
○辛未

上詣

皇太后宮問安○先是宗人府奏稱親王阿哥等名上一字與

御諱同應請更定

上以名諱由

聖祖欽定不忍更改禮部宜奏請

皇太后裁定至是禮部等衙門具摺啟奏得旨

朕曾奏聞

皇太后諸王阿哥名上一字著改爲允字○以

監察御史佟吉圖署工部左侍郎事 禮部

遵旨議覆嗣後山東等處沿海地方人民被

風飄至朝鮮國境內若有票文未生事者仍

令遵照舊例送回其並無票文私自越境生事之匪類許該國王緝拏照伊國之法審擬咨明禮部具題請旨命下之日行文該國王於伊處完結仍報部存案從之○河道總督陳鵬年奏秦家厰等隄工河水漫溢得旨此漫溢之處不於歲前堵築完竣來年桃汛水發愈難辦理陳鵬年會同楊宗義務於歲前速行堵築完竣○贈故一等侍衛副都統謚果毅海清爲一品致祭一次○壬申

上詣

皇太后宮問安○禮部奏請雍正元年正月元旦令節

皇上具禮服詣

皇太后宮行禮王公大臣官員各依班次行禮

禮畢

皇上陞太和殿行禮得旨朕轉奏

皇太后奉

皇太后慈諭前皇帝登極鉅典攸關故勉從諸



王大臣之請。今雍正元年元旦。尚在百日之內。何忍即行慶禮。欽此。諭爾等知悉。至朕元旦升殿。前請頒發表式之本。已降諭旨。封裕親王保泰子廣善為世子。陞吏部右侍郎張廷玉為禮部尚書。○以內閣學士福敏充經筵講官。○吏部題大學士馬齊奉旨特給一等阿達哈哈番。併前所襲一等阿思哈尼哈番。又一拖沙喇哈番授為二等伯。准其世襲。從之。○癸酉。

上詣

壽皇殿行禮○

上詣

皇太后宮問安○遣散秩大臣覺羅諾爾遜祭長白山。散秩大臣永壽祭醫巫閭山。宗人府府丞吳梁祭東嶽泰山。內閣侍讀學士田文鏡祭西嶽華山。侍讀學士瓦渾泰祭中嶽嵩山。翰林院侍讀學士吳士玉祭南嶽衡山。都察院左副都御史伊忒海祭北嶽恒山。提督

四譯館太常寺少卿吳廷揆祭南鎮會稽山。翰林院侍講學士涂天相祭南海侍講學士查嗣庭祭太昊伏羲氏等陵。都察院左副都御史金應璧祭炎帝神農氏等陵。通政使司左通政黨古禮祭女媧氏等陵。左通政錢以壇祭黃帝軒轅氏等陵。右通政楊汝穀祭少昊金天氏等陵。孔子闕里大理寺少卿八十。三祭顓頊高陽氏等陵。太常寺少卿穆里渾祭夏禹王陵。太僕寺少卿黃叔琬祭遼太祖陵。○甲戌。

上詣

皇太后宮問安○陞都察院左僉都御史魏方泰為太常寺卿。○乙亥。

上詣

皇太后宮問安○命大學士二等伯馬齊為聖祖實錄館監修總裁官。吏部尚書一等公舅舅隆科多。大學士嵩祝。白潢。吏部尚書張鵬翮為總裁官。禮部尚書張廷玉。都察院左都

御史朱軾兵部侍郎勵廷儀阿克敦內閣學士額黑納登德爲副總裁官○又諭承修

皇考實錄之事所關甚屬緊要所派大臣官員內有陞轉者著仍兼理行走若有陞轉外省者其員缺著即奏聞○賜都察院左都御史朱軾宅一所銀一千兩○加大學士馬齊嵩祝吏部尚書張鵬翮俱爲太子太傅○喀爾喀澤卜尊丹巴胡土克圖率達什垂木丕爾託音多爾濟託音來京恭弔

大行皇帝喪並獻駝馬酌納之○丙子

孝莊文皇后忌辰遣官祭

暫安奉殿

上詣

壽皇殿行禮

上詣

皇太后宮問安 諭總理事務王大臣兵部在京武職官員亦當照外省武職官員例五年一次考選軍政其如何考選之處著定議具

奏尋議在京武職官員如領侍衛內大臣八旗都統前鋒統領護軍統領副都統步軍統領等俱係近御大臣不必令其自陳遇五年考選軍政時各將屬員詳核填註考語照外省薦舉及八法例分別具奏其各省駐防將軍都統副都統等照提鎮例自陳其屬員俱照京城之例舉行至德州等處之城守尉協領派大臣前往考選其屬員即會同城守尉協領等詳核填註考語具奏從之○陞內閣學士黃叔琳爲刑部右侍郎○盛京兵部侍郎楊桂緣事革職陞都察院左副都御史伊忒海爲盛京兵部侍郎○丁丑

上詣

皇太后宮問安○是日以增設

歷代帝王廟牌位致祭遣履郡王允禩行禮

戊寅

上詣

壽皇殿行禮

上詣

皇太后宮問安○是日御史莽鵠奏恭繪

聖祖御容畢捧進於養心殿

上瞻仰依戀悲慟不勝命俟

梓宮發引後敬謹供奉於

壽皇殿○戶部奏雲南鑄錢事宜得旨依議部

議錢上清字鑄雲泉京城二局係寶泉寶源

字樣錢乃國家之寶其雲南鑄錢清字著鑄

寶雲四川鑄寶川此外別省俱將寶字爲首

次將各本省字樣鼓鑄○己卯歲暮裕祭

太廟遣貝勒滿都護行禮○遣官祭

永陵

福陵

昭陵

暫安奉殿

孝陵

孝東陵

仁孝皇后

孝昭皇后

孝懿皇后陵

上詣

皇太后宮問安○遣官祭太歲之神○諭總理

事務王大臣等噶斯遣兵駐劄特爲防範策

妄阿喇布坦之人侵犯青海今噶斯一路官

兵無事可將駐劄年久之人撤回其新往官

兵內驗看漢仗好者移至巴爾庫爾効力再

量留兵丁駐防噶斯一路之處爾等詳議具

奏尋議噶斯現有滿洲綠旗兵共一千六百

八十七名應行文將軍宗查布令其挑選滿

洲綠旗兵五百名暫於噶斯一路駐劄防守

其餘兵丁俱撤回原處貝勒色卜騰扎爾盆

蘇克汪扎爾達顏之子達錫策零駐守處既

與噶斯相近伊等兵丁亦令預備如有用兵

之處與青海西寧等處兵丁一並調遣從之

○庚辰

上詣

壽皇殿行禮○

上詣

皇太后宮問安○順天府進春○旌表八旗節婦瑚立妻趙氏等三人直隸各省節婦趙萬卷妻唐氏等二十四人貞女姚氏等二人孝子衛大訓一人各給銀建坊如例○是歲人丁戶口二千五百三十萬九千一百七十八又永不加賦滋生人丁四十五萬四千三百二十田地山蕩畦地八百五十一萬九百九十二頃四十畝有奇徵銀二千九百四十七萬六千六百二十八兩有奇米豆麥四百六十六萬八千八百三十三石有奇草四百九十二萬二千八百一十束茶三十五萬九千一百五十四引行鹽五百五萬一千六百五十六引徵課銀四百四萬四千一百一十一兩有奇鑄錢四十六萬一千七百有奇

大清世宗敬天昌運建中表正文武英明寬仁信毅大孝至誠憲皇帝實錄卷之二

大清世宗敬天昌運建中表正文武英明寬仁  
信毅大孝至誠憲皇帝實錄卷之三

監修總裁官光祿大夫禮部議官太僕寺卿保和殿大學士兼兵部尚書總理事務三寶伯加五級臣鄂爾泰

總裁官光祿大夫禮部議官起居注太僕寺卿保和殿大學士兼戶部尚書總理事務三寶伯加五級臣鄂爾泰

事三寶伯加三級臣張廷玉光祿大夫禮部議官起居注太僕寺卿保和殿大學士兼戶部尚書總理事務三寶伯加五級臣鄂爾泰

翰林院掌院事加三級臣福敏光祿大夫禮部議官太子太僕寺卿保和殿大學士兼禮部尚書加六級臣徐本光祿大夫

經筵講官議政大臣協辦內閣大學事務禮部尚書仍兼管太常寺鴻臚寺事臣王泰等奉

敕修

雍正元年癸卯春正月辛巳朔

上詣

壽皇殿行禮回宮不陞殿受賀詣

皇太后宮問安奉

懿旨免行慶賀禮○朝鮮國王李昀遣陪臣李

混李萬選表賀冬至元旦

萬壽節及歲貢禮物賞賚如例停止筵宴○頒

雍正元年時憲曆○頒發訓諭直省總督以

下等官

上諭十一道諭總督自古帝王疆理天下必有

岳牧之臣以分猷佐治而後四方寧謐共臻  
上理此封疆大臣以總督為最重也總督地  
控兩省權兼文武必使將吏協和軍民綏輯  
乃為稱職但統轄遼遠職務殷繁較巡撫之  
所屬更大是在遴選屬僚之賢能者委任得  
宜則振綱飭紀可無廢弛之虞而以人報國  
亦得大臣之體特是澄清吏治必本大公之  
心虛懷察訪果係清節素著才具練達者任  
以要劇即行保薦則舉一可以風百今或以  
逢迎意指為能以沽名市譽為賢甚至暗通  
賄賂私受請託不肖官吏濫列薦章而樸素  
無華敦尚實治者反抑而不伸是豈風勵屬  
員之道乎朕視天下如一家視臣隣如一體  
爾等亦宜深體此意以一家之心視兩省以  
一體之心視屬吏本之至公用之至當則上  
司之任使下僚如身之使臂臂之使指凡有  
才有守之人皆樂為効用矣至於所在管轄  
地方有作姦犯科之豪猾倚勢剝民之縉紳

理應重加懲治。因巧於結納。反得僥倖自全。而家居之大臣官員。皆經

皇考任用之人。致政投閒。安靜自好。為大吏者。並不加以禮貌。或反被土豪侵欺者有之。亦非所以表率屬僚。彰善癉惡之道也。總督與巡撫將軍提督。誼屬同寅。凡地方軍民事務。宜互相商榷。各本虛公。勿苟且雷同。勿偏執臆見。方於國計民生有所裨益。總督叅劾知府。例由司道揭報。叅劾州縣。例由兩司道府揭報。衆論僉同。所以示公也。近有叅劾之後。始行補揭。夫果其當劾。司道府不能揭報於前。既有徇庇之愆。而令其補揭於後。又欲寬其失察之罪。彼此巧飾。以欺朝廷。尚得謂之至公乎。朕觀古之純臣。載在史冊者。興利除弊。以實心行實政。實至而名亦歸之。故曰。名者實之華也。今之居官者。鈞譽以為名。肥家以為實。而云名實兼收。不知所謂名實者。果何謂也。爾督臣膺茲簡畀。固宜篤矢忠誠。尤

當戒諭屬員。痛改陋習。更有仕宦之初。頗著廉名。及身躋大位。則頓易其操者。古人謂之巧宦。其心事豈可問乎。且職居制閫。亦非徒以清操自善也。若但謹身節用。而遇地方大事。一籌莫展。雖免貪冒之名。究鮮屏翰之實。國家又何所倚毗耶。爾督臣皆

皇考擢用之大臣。朕嗣紹丕基。一切遵循成法。惟冀爾等。察吏安民。練兵核餉。崇實行而不事虛名。秉公衷而不持偏見。故諄諄告誡。並兩司道府。州縣各有諭旨。爾等亦宜細心體察。與爾屬吏。共勵官箴。交相儆惕。朕自優加恩禮。始終保全。若爾等恣意徇私。不能竭忠盡職。則深負

皇考簡用之恩。其罪甚大。國法森嚴。朕雖欲寬貸爾等。不可得矣。○諭巡撫。國家任官守土。綏輯兆民。封疆之責。惟撫臣為重。今之巡撫。即古者保釐夾輔之臣也。一省之事。凡察吏安民。轉漕裕餉。皆統攝於巡撫。苟非正己率

屬振飭勵精。則一切政刑錢穀。必致隳墮。拊循保障之功。何賴乎。夫吏治不清。民何由安。從來大法則小廉。自兩司以至郡縣。平時參見接談。即可畧知其才品優劣。迨試以委任。訪之輿情。賢否清濁。自難清混。惟上官偏私好諛。屬僚善於逢迎者。即推爲才能。其樸直自好。潔己愛民之員。反無見知之地。及至計典黜陟。并遇選擇保題之缺。或先納賄賂。或責報異時。始爲之薦引。亦有寄耳目於監司等官。聽毀譽於幕賓僚友之口。以致舉劾不公。潛滋奔競。勸賞黜陟。既失其當。地方安得良有司乎。藩庫錢糧虧空。近來或多至數十萬。蓋因巡撫之貲用。皆取給於藩司。或以柔和平交好。互相侵那。或先鈎致藩司短長。繼以威制勒索。分肥入己。徒供一身夤緣自奉之費。罔顧朝廷帑藏財用之虛。及事發難掩。惟思加派補庫。輾轉累民。負國營私。莫此爲甚。州縣積穀。本爲備荒之計。水旱歉收之歲。待

此拯濟。於民生最有關係。今皆視爲正供之餘項。借出陳易新之名。半爲胥吏中飽。半爲州縣補空。一遇災荒。茫無賑貸。皆由巡撫平時疎畧。包容玩愒所致也。屬員缺出。委署雖由兩司詳請。其實巡撫操其權。下屬鑽營囑托。以缺之美惡。定賄賂之重輕。攝篆之人。久則年餘。近亦數月。往往視爲傳舍。情同行劫。不卹小民之脂膏。但飽谿壑於無厭。務償得署之餽遺而止。試思此一年數月之間。窮黎何罪。而可縱貪暴以剝削之乎。此等積弊。尤爲國法所不容者。巡撫叅劾知府。應由司道揭報。叅劾州縣。應由司道府揭報。所以示公慎無私之義也。近有先行叅劾。而令其補揭。若所劾不公。則其補揭未免以勢陵之。使不得不從。果其當劾。則司道府既不能公揭於前。而復巧飾於後。以寬其徇庇失察之咎。上下容隱。視功令爲具文。公慎無私之謂何。撫標兵丁。多者二千餘名。少亦千餘名。境內設

有匪類竊發藉以捍禦搜捕。今撫臣自謂無行軍進剿之職。置標兵強弱於度外。不加訓練。器械朽鈍。營伍廢弛。裁汰老弱之兵。空糧悉歸私橐。大非國家設兵衛民之意矣。雲貴川廣。犛獠雜處。其奉公輸賦之士。司皆當與內地人民一體休養。俾得遂生樂業。乃不虛朕懷保柔遠之心。嗣後毋得生事擾累。致令峒氓失所。至於土豪巨猾。結交官吏。武斷鄉曲。逞姦干紀之徒。每或彌縫漏網。而告休歸田之大臣官員。安分杜門。反徇私吹索。借端陵踐。此皆大失好惡之公。尤損保全耆舊之義。非鎮撫者所當留意乎。爾諸撫臣。皆荷皇考任用之恩。受全省撫綏之寄。朕纘承大統。祇遵成憲。優禮大臣。保全終始。惟冀爾等各抒忠悃。安靖封疆。朕所諭者。有則悔悟速改。無則省躬加勉。兩司道府州縣。各有諭旨。爾亦宜詳細體察。與諸屬吏共相勉勗。同心協力。以盡職守。若不念

皇考簡畀之隆。致貽地方黎庶之害。負恩曠職。自取罪戾。朕又安能廢法以宥爾乎。○諭督學。朕惟自古帝王。皆以興賢育才爲務。我國朝自

太祖

太宗肇造鴻圖。

世祖定鼎中夏。首隆學校。加意人才。開國規模。超越前古。至我

皇考聖祖仁皇帝御極六十一年。培養教育。恬

冒涵濡。深仁厚澤。有加無已。

御製訓飭士子文。頒布學宮。東西南朔。海澨山陬。戶習詩書。家敦禮樂。遐邇無不嚮風。文教之隆。莫過於此矣。朕纘承大統。遵守舊章。寤寐求賢。惟恐或失。念學校爲士子進身之階。督學一官。尤人倫風化所繫。遴選各省學臣。倍加鄭重。爾等須廉潔持身。精勤集事。實行文風。兩者所當並重。若徒事文華。而不敦崇實行。猶未爲盡職也。表揚忠孝節義。崇祀先



聖先賢訪求山林隱逸。搜羅名蹟藏書。而衡文一道。專以理明學正。典雅醇潔為主。古人云。言乃心聲。氣由風養。必士品端而後文風正。他日爲國家柱石。爲朝廟羽儀。不綦重歟。勿私納苞苴。勿瞻徇情面。勿輕視武途。勿濫取祠蔭。勿矯激沽名。勿昏庸廢事。勿卑污貶節。勿驕暴陵人。胥吏必謹關防。幕客尤宜選擇。如此。則內外交悉。本末兼修。上不負朝廷。下不愧多士。朕耳目所及。必有見聞。若罔顧聲名。廉隅不飭。國有常憲。罰必隨之。尚其勉旃。毋忽。○諭提督國家武功赫濯。綏靖區夏。用資專閫。統率全省將士。俾黎庶誠和。疆圉寧謐。提督之任綦重矣。當茲海宇承平。士卒狃於宴安。不以兵革爲事。相沿日久。營伍漸弛。非所以肅軍政。飭戎行也。爾等皆係皇考簡用。節鉞之大臣。尤宜恪遵令典。倡率所屬將弁。簡閱卒伍。整理器械。操演技勇。平時討論軍實。訓練精勤。乃稱節制之師。折衝禦

侮。庶幾有備無患矣。夫儲糧裕餉。所以足兵食。壯干城。非爲飽一人之私橐也。乃虛名冒餉。侵漁扣剋。視爲故常。以致朝廷恤兵養士之典。止供將吏肥家之計。居心多慾。自難彈壓下僚。馭衆寡恩。何以振興士氣。提臣職任拊循。果能廉正自持。無虛給餉。俾士飽馬騰。有不感激思奮者乎。至山海要區。得人最重。爾身爲大帥。凡將佐偏裨。果其智勇素著。才技優長。肅紀律而輯兵民。歷有成績之員。或軍政薦舉。或破格題請。皆當予以優擢。如本係庸劣之弁。徇情面。受賄賂。始則權宜委任。旋復列名保奏。不特冒干名器。必致貽誤地方。濫用匪人之咎。其能逃於功令乎。且設兵所以衛民。文武官屬殊途。而轄兵愛民。均有責焉。如各執己見。不相和協。勢必有縱兵虐民。挾制長吏。以逞威作姦者。在文臣豈容辭咎。而提臣統領水陸重師。管轄不嚴。調劑不力。致文武抗衡。兵民異視。責更難逭。書曰。同

寅協恭。和衷哉。爾當一秉虛公。和衷辦事。嚴飭將弁。於所屬汛地。實心捍衛。勤緝姦宄。俾居民安堵無虞。地方咸受其利益。爾等皆勤勞素著。効力年久之人。

皇考屢加拔擢。洊膺斯任。朕祇遵成憲。優遇大臣。保全終始。爾等其各抒忠悃。以無負朕愛養兵民之至意。其總兵。副將。叅遊等官。各有諭旨。爾亦應詳細體察。同心協力。共相策勵。靖共爾位。永奠封疆。○諭總兵官。國家幅幘廣大。凡巖疆重鎮。關塞要害之地。設立總兵。俾之鎮守。上承督臣之節制。下樹將弁之表率。輯兵安民。厥任綦重。居是官者。當以寧謐地方爲念。嚴飭官兵。巡緝姦宄。儻有匪類。務必窮盡根株。使宵小無從潛匿。良民得以寧居。若平時漫無覺察。日久必致蔓延。綢繆未雨之謂何。武臣雖不干民事。然保障捍衛。責有攸歸。守此方。即當軫念此方之民。毋得視之膜外。縱兵肆擾。至文武職任雖分。盡心王

事則一。彼此和衷。同心共濟。自不致貽誤公事。況揆文振武。經術同源。善於恤兵。必善於愛民。尚何至縱兵虐民。失國家設兵衛民之意乎。總兵統轄營汛甚多。當以訓練爲先。嫻騎射。整隊伍。備器械。限期校閱。勤惰嚴分。賞罰明而軍政肅。隱然一長城矣。所屬將弁兵丁。智勇超羣。則立登薦剡。武藝精熟。則特拔戎行。以之鼓勵軍士。猶有古良將風焉。兵之所需。糧餉最重。給糧而扣剋。則師旅有枵腹之憂。缺兵而不補。則營伍有空虛之患。總兵率先潔已。嚴飭偏裨。毋得久懸兵缺。以恣侵漁。毋得尅減額糧。以肥囊橐。則兵籍無虛。士氣益奮。有不收臂指之效者乎。至於馭兵之道。務在寬嚴得中。過寬則兵以怠玩而生驕。過嚴則兵以拘迫而滋怨。能於嚴明之中。隱寓愛恤之意。庶幾上下一心。忠義自奮。此又在爾鎮臣之善爲運用者也。仰惟

皇考垂誠提鎮諸臣。有曰。鞫鈴宜裕。紀律宜明。

拊循宜至。訓練宜精。又曰。文武輯睦。毋相抗衡。軍民調劑。各得其平。煌煌

天語。勒於歲規久矣。爾等皆係

皇考簡畀之人。果能實心力行。不致始勤終怠。上負

聖訓。朕心嘉乃成績。必懋錫殊典。如其徒擁厚祿。虛糜爾位。既無益於兵民。致有乖於令典。國法森嚴。朕不爾貸也。○諭布政司。朕惟國家官制。分省開藩。爾職居方伯。任寄旬宣。所

以綏輯羣黎。布昭德意。實庶邦之喉舌。列服之綱維。任既重矣。責亦大矣。府州縣官之賢不肖。最關民生休戚。當不時察核治行。務知其實。分別臧否。以告督撫。爾以無私自信。督撫自不以私心致疑。協和盡力。以勸賢懲不肖。則除害興利一方安矣。今計典之黜陟。特疏之薦彈。朝廷憑督撫之奏章。督撫憑布按之詳揭。爾布政爲官吏表式。自當益矢公忠。若愛憎任情。是非倒置。以詔事上官。通行請

託爲賢。以不善逢迎。恥投暮夜爲不肖。其何

以稱之。屏之翰。百辟爲憲者哉。夫官至監司。敬歷有年。當服官之初。廉潔自守。漸登高位。頓改初心。更有矯飾虛聲。潛納賄賂。陋俗相沿。謂之名實兼收。其罔上行私爲尤甚。孔子謂事君勿欺。寧不聞乎。賦役會計。皆爾專司。調劑均平。乃爲稱職。今錢糧火耗。日漸加增。重者每兩加至四五錢。民脂民膏。朘剝何堪。至州縣差徭。巧立名色。恣其苛派。竭小民衣食之資。供官司奴隸之用。爾試思戶版稅籍。誰爲職掌。私派橫征。誰任其咎。顧可失於覺察乎。各省庫項虧空。動盈千萬。是侵是那。總無完補。耗盡公帑。視爲泛常。尤爲不法。宜嚴革前弊。永杜侵那。如司庫盤查之責。在巡撫。虧空之根。亦由巡撫。巡撫借支。而布政不應者少矣。然職在監守。果能廉正自持。則巡撫挾勢借支。斷不能行。但謹身節用。量入爲出。司庫必無虧空矣。州縣庫盤查之責。在知府。

覺察虛實之責獨在布政。爾但潔己率屬。不容徇庇。州縣庫必不虧空矣。朕深悉弊源。所以反覆諄切言之。冀爾等悔且改也。

皇考德洽區宇六十餘年。朕嗣守丕基。惟成法是式。爾等皆蒙

皇考簡拔。職任藩宣。果能各効忠誠。凜遵功令。朕自始終保全。加以擢用。若營私黷貨。曠職累民。爾既負

皇考之深恩。朕又安能弛國家之令典。三尺莫違。爾其慎之。○諭按察司。朕惟直省大小獄訟。民命所關。國家各設按察司。以專掌之。一切州縣申詳。至爾司而獄成。凡督撫達部題奏事件。皆由爾司定案。任豈不重與。

皇考仁覆如天。每覽西曹奏牘。反覆推詳。惟寬惟慎。逮情實罪當。猶施緩決之恩。好生之德。洽於民心。六十餘年於茲。朕嗣守大訓。思四海之內。有匹夫匹婦。罰非其辜者。即非所以

繼

皇考之志。夙夜凜凜焉。何道而能不濫不寬。實爾司是賴。朕惟國家考定律例。所以弼教。非以厲民。是故嚴立刑書。防其或罹於法。及至斷獄。又條分縷析。思以曲全其生。書曰。欽哉。欽哉。惟刑之恤哉。又曰。與其殺不辜。寧失不經。此律例之本意也。今或情例相違。牽合文法。以納民於網。或有兩例並見。輒上下其手。以自遂其私。安得無冤獄哉。

太祖高皇帝之訓曰。生殺之際。不可不慎。聽斷之官。必期得情。大哉聖言。包舉虞書周禮之義。夫折獄憑口供。而平反憑案卷。今法吏不求得情。惟求完結。州縣案卷之申詳。爾司者多。鍛鍊口供。附於律例。冀免爾司之駁查。爾司之詳督撫。督撫之揭部院者。又加文致焉。冀免三法司之駁查。漢路溫舒所云。奏當既成。雖臯陶視之。猶以爲死有餘辜者也。口供案卷如是。冤抑何從平反。咎在聽斷之初心。原非欲必得其情也。今宜釐剔宿弊。歸於明

允。毋得因循故事。自墮姦欺也。大計黜陟。由爾司詳報督撫。宜以用刑明慎。執法不阿者爲賢能。毋以善事督撫。弗逆爾意者爲賢能也。地方豪猾。若苗有莠。不除不剪。害我嘉生。至於良善巨室。致政大臣。猾吏或借端侵抑之。非所以稱朕意也。邇來士大夫。好云名實兼收。所謂名者。官爵也。所謂實者。貨財也。習俗媮薄。朕甚憫焉。夫六廉之義。百司攸同。至納賄出入人罪。於法尤重。戕人之命。破人之家。以潤屋奉身。歷觀古來。逃於國法者。十無一二。免於天罰者。更百無一二。書之呂刑曰。獄貨非寶。非聽訟者之明訓歟。爾司其正己率下。使法無枉撓。庶幾刑措之風。尚其勗諸。○諭道員。爾等官歷監司。所以贊襄藩臬。承流宣化者也。分守分巡。職居協理。糧河鹽驛。各有專司。身居是官。必顧名思義。名者實之華也。克副其實。而後名歸焉。如守巡兩道。首當潔己惠民。凡府州縣之廉潔貪污。俱宜細

加察訪。不時密詳督撫。以憑舉劾。地方有土豪武斷。尤宜禁戢剪除。衛良鋤莠。乃稱其實。若但知趨承大吏。或祇圖下屬陋規。一切吏治民生。樂置不問。貪庸陋劣。殊負朝廷設官之意矣。糧道專理漕運。職任匪輕。使徒知起運規例。扣剋運費。苦累運丁。營私煩擾。有玷官箴。貽害百姓。何所底止。河道有董率工程之責。凡分修河員。孰賢孰否。俱應洞晰。並宜親身經歷。查勘估計。某口險峻。某口平易。某處堤工堅固。某處冒支帑金。儻不計虛實。不辨勤惰。僅以納賄多者爲能員。餽遺少者爲拙吏。而於工程。漠不經意。一遇坍潰。誰之咎耶。鹽道一員。尤關國課。邇年鹽法。弊竇叢生。正項錢糧。每多虧欠。一由上下各官需索商人。巧立名色。誅求無已。窮商力竭。不得不那新補舊。上虧國課。高擡鹽價。下累小民。至於官鹽騰貴。貧民販賣私鹽。捕役鬪毆。株連人命。流弊無窮。一由商人用度奢靡。相仍陋俗。

不知節儉。致欠額徵。爾等運籌鹽法。宜將陋例積習。盡情禁革。必思何以甦商。何以裕課。上供軍國。下利閭閻。方爲稱職。驛道爲驛站。錢糧所係。必廉潔自守。乃克剔弊登茲。凡驛遞馬匹。數目多寡。每有假冒開銷。歲修船隻。亦有虛浮不實。該員一貪貨貨。勢必昏庸。或過於苛覈。勒索多方。經管屬吏。疲不能支。總之病官病民。悉緣貪黷。敬爾有官。垂諸古訓。靖共爾位。載在風詩。爾等各有常職。各守官方。名實二字。極宜體認。今以獻賂爲實。虛譽爲名。動云名實兼收。內以欺己。外以負國。有覲面目。其何以立身而抒忠藎乎。

皇考御極六十餘年。以軫恤民生爲首務。各省道員。必親加遴擢。諄諄戒勉。極其詳慎。朕纘承大統。翼翼小心。惟仰體

皇考愛養元元至意。亦期爾等爭自濯磨。振飭風憲。以副朕望。果能肅清綱紀。無致廢弛。朕當破格獎勵。其或因循不改。朕必置之重法。

○諭副將叅將遊擊等官。朕惟國家兵制。凡疆宇要地。既設提督。總兵。統率鎮守。又設副將。叅將。分列營伍。遞相鈐轄。蓋從古治兵。有大帥。必有偏裨。所以宣揚威武。協贊軍機。收指臂之效。奠磐石之安也。爾等所屬地形有險易。兵數有多寡。各宜預定練兵之法。親校騎射。嚴試技勇。簡拔驍銳。更換老羸。務令一營士卒。人材雄健。武藝精嫺。又時教以行陣。使之步伐進退。井然有法。日演月習。氣壯心齊。自成有制之師。而無難折衝禦侮矣。乃有不肖將弁。不勤訓練。按籍徒有虛名。責效毫無實濟。營伍廢弛。爲害最大。究其弊由於將弁之貪利而廢法。一在冒虛糧而兵無實數。一在尅月糧而兵有怨心。上虧天家之糧餉。下廢窮卒之脂膏。身司戎務。而不能廉正。以服衆。雖日示訓練之法。誰爲之踴躍用命乎。爾等遇有兵丁空缺。即選力勇技精者補足隊伍。至於馬步各糧。按期領給。不得尅減分

毫古之良將多以愛恤士卒克建膚功投醪挾纊之風爾等宜知嚮慕焉官軍之協守一方所以捍衛一方之百姓故曰設兵以衛民也防亂於未萌緝姦於已發俾居民安家樂業共享昇平自然受兵之利而不受兵之害儻或約束不嚴縱兵肆虐誘賭放債恃強奪利甚至地方小警漫不防禦緝捕以致姦宄滋蔓徒卸責於有司文武失和秦越相視殊背國家設兵鎮守之意律法具在罪有攸歸至於爾等簡用督撫中軍責任匪輕尤宜潔已奉公恪遵法紀至都司守備千總把總等員各有城守汛防之責亦宜努力稱職自奮功名朕念爾等曾受

皇考選擢之恩自應保守前勞力圖後效果能整飭戎伍允著干城之望朕自不惜寵以崇階儻若廢隳武備侵漁糗芻甚且妄執武官不惜死之言恣意逞威虐民生事爲害於地方王法森嚴決難輕貸○諭知府國家親民

之官莫先於守令蓋州縣官與民最親而知府又與州縣官最親凡州縣興利除弊之事皆於知府有專責焉是知府一官分寄督撫監司之耳目而爲州牧縣令之表率承流於上宣化於下所繫綦重矣漢宣帝有曰太守吏民之本也又曰庶民所以安其田里而無歎息愁恨之心者政平訟理也與我共此者其惟良二千石乎故兩漢循良稱盛而賢守尤多龔黃召杜諸人大都皆廉潔和平正身率屬以與民休養生息史稱其所居民富所去民思此皆彰明較著者也

皇考澄肅官方慎簡僚吏知府中有政績茂異聲名著聞者必加優眷數年之間即膺殊擢所以鼓勵循良務令羣黎受福爾等蒙皇考簡用之恩受國家民社之寄地方不甚遼遠則於民間之疾苦可以周知勢分不甚懸殊則於屬下之賢否可以洞悉爾果廉潔自持屏絕賄賂則督撫監司必不致肆行需索



而州牧縣令亦不敢恣意貪婪。近聞州縣火耗任意加增。罔知顧忌。以小民之脂膏飽貪吏之谿壑。由爾不能却遺金於暮夜。又安能禁屬吏之濫征乎。盤查倉庫必須覈實。不可視為故事。乃或借盤查之名勒索餽遺。是因盤查而虧空愈甚矣。爾能時勤勸誡。加以體恤。則州縣可無虧空之虞。能制節謹度。淡泊是安。則爾亦可免虧空之累。勸農課桑。以厚風俗。禁戢強暴。以安善良。平情聽斷。以清獄訟。皆爾職守之所當盡者。至於督撫舉劾州縣。必由爾之詳揭。務須秉公持正。勿涉偏私。若善於逢迎者。從而護庇薦拔之。而端方恬靜之人。反故為摧抑。下吏皆苟且營私。以求容悅。地方之事。尚可問乎。居官者每有初入仕途。清操自矢。漸登華要。頓改初心。既知砥礪廉隅。即當始終一節。更有巧於仕宦者。人每謂其名實兼收。朕最不解此語。夫名者實之華。果能廉潔愛民。奉公盡職。此所謂實也。

治行稱首。民歌輿誦。此所謂名也。實至而名隨之。如本立而華茂焉。若以弋取虛譽為名。而以封殖多藏為實。此則小人之尤。更甚於貪黷彰聞之輩矣。朕繼承大統。夙夜祇懼。惟恐有負。

皇考付託之重。深冀爾等各體此意。精白乃心。以古循良自勉。若徇私納賄。不能率屬愛民。貽害地方。蔑視憲典。三尺具在。朕不能為爾等寬也。諭知州知縣。朕惟國家首重吏治。爾州牧縣令。乃親民之官。吏治之始基也。貢賦獄訟。爾實司之。品秩雖卑。職任綦重。州縣官賢。則民先受其利。州縣官不肖。則民先受其害。膺茲任者。當體朝廷惠養元元之意。以愛民為先務。周察鄙陋。綏輯鄉里。治行果有其實。循卓自有其名。非內聚賄而外干譽。謂之名實兼收也。全省吏治。如作室然。督撫其棟梁也。司道其垣墉也。州縣其基址也。書云。民惟邦本。本固邦寧。夫所以固邦本者在吏。



治而吏治之本在州縣。苟州縣之品行不端。猶基不立。則室不固。庸有濟乎。

皇考臨御六十一年。灼知州縣之重。特行引見。咨詢明試。至詳至慎。其有廉能之員。每不次超擢。以示鼓勵。今海內羣黎。皆

皇考所懷保也。朕膺

宗社重寄。思繼

皇考之治功。惟爾州縣諸臣。具有父母斯民之責。其爲朕立之基址。以固邦本焉。誠能潔已

奉公。實心盡職。一州一縣之中。興仁興讓。教孝教忠。物阜民安。刑清訟簡。朕將升之朝。寧用作股肱。如或罔念民瘼。恣意貪婪。或朘削肥家。或濫刑逞虐。或借刻以爲清。或恃才而多事。或諂媚上司。以貪位。或任縱胥吏。以擾民。或徇私逞欲。以上虧國帑。王章具在。豈爾貸歟。更有任州縣時。私肥已橐。而漫云。且俟顯要。方立名節者。其與初市清名。晚而改操之人。何以異哉。至於錢糧。關係尤重。絲毫顆

粒。皆百姓之脂膏。增一分。則民受一分之累。減一分。則民霑一分之澤。前有請暫加火耗。抵補虧空帑項者。

皇考示諭在廷。不允其請。爾諸臣共聞之矣。今州縣火耗。任意加增。視爲成例。民何以堪乎。嗣後斷宜禁止。或被上司察劾。或被科道糾參。必從重治罪。決不寬貸。夫欲清虧空之源。莫如節儉正直。節儉則用無不足。正直則上官不可干以私。若朘小民之生。以飽上官之貪欲。冒不測之罪。以快一時之奢侈。豈砥礪廉隅。爲民父母之道乎。爾州縣等官。其恪共乃職。勿貽罪戾。母謂地遠官卑。朕不及察。其賢否也。○壬午。諭戶部。恩賜老人。原爲崇年尚齒。而地方賞老人者。每州縣動支數千金。司府牧令。上下通同侵扣。吏役復任意需索。老人十不得一。上負曠典。罪不容逭。今飭令督撫嚴查。務令有司親自沿鄉訪察。據實造冊給發。不許絲毫侵扣。儻仍蹈前弊。立即參

處。如督撫奉行不謹。朕若訪出。必加以失察之罪。再老人九十以上者。州縣不時存問。其或鰥寡無子。及子孫貧不能養贍者。督撫以至州縣。公同設法卹養。或奏聞動用錢糧。務令得霑實惠。○以翰林院檢討胡瀛為雲南鄉試正考官。內務府員外郎鄂爾泰為副考官。編修沈宗敬為貴州鄉試正考官。刑部員外郎朱崧為副考官。○癸未。諭大學士等。前年因黃河衝決。

皇考特遣牛鈕。齊蘇勒等堵築修理堤工。一切完竣。交與楊宗義。乃楊宗義不能時時加謹防守。致修築之處。又復衝決。經九卿議將楊宗義革職。拏交刑部從重治罪。

皇考從寬恕免。將一切河工。令其効力贖罪。今被衝決之堤工。俱已合龍。仍著楊宗義加謹防守。不時修築。春日冰融之先。務期預為防守堅固。斷不可似從前疎忽。又致衝決。果能加謹防護。即可贖其前愆。如將已完堤工。再

致衝決。朕必重治其罪。○甲申。

上詣

皇太后宮問安。○諭內閣。倉場侍郎李英貴患病。倉場事務著順天府府尹陳守創暫行協理。○調湖北按察使趙弘運來京。擢雲南廣南府知府蔡起俊為湖北按察使。司按察使。○總理事務王大臣議覆倉場總督李英貴等疏言。八旗官兵米石。請將所有六七成米折算添給支放。應如所請。得旨。所給之米。照伊等所奏米色微高尤善。如支給米色不及所奏。必將倉場大臣該倉監督從重治罪。○乙酉。平郡王訥爾素摺奏。十二月二十四日。輔國公延信到甘州。臣遵旨將撫遠大將軍印敕交明。於二十五日起程赴京。奏入。報聞。○丙戌。孟春。享

太廟。

上親詣行禮。○

上詣

皇太后宮問安○遣官祭太歲之神○諭內閣  
原任大學士阿蘭泰王熙李光地尚書趙申  
喬等俱係

皇考時宣力効忠之人作何追恤加恩之處總  
理事務王大臣會同大學士白潢尚書張鵬  
翮左都御史朱軾查例議奏尋議大學士阿  
蘭泰王熙各加祭一次大學士李光地贈太  
子太傅戶部尚書趙申喬贈太子太保從之

○  
上召來京叩謁

梓宮之科爾沁達爾漢親王和碩額駙羅卜藏  
滾布等入養心殿諭曰爾等先世俱在  
太祖時歸誠効順竭力同心誼若一家懋著勤  
績爾等皆深沐

皇考加恩愛養之人今聞

皇考升遐叩謁

梓宮哀號擗踊朕心深爲憫惻仰惟

皇考視爾等如子孫於茲六十餘年恩隆情篤

今

龍馭上賓屬大位於朕躬朕仰承

皇考付託之重當視爾等亦如一家深加愛養  
爾等宜感念

皇考深恩和衷共勵竭誠効力爾等衆扎薩克  
俱有辦理旗務統轄衆庶之責凡事秉公矢  
慎各撫恤屬下人等慎勿擾累○丁亥

世祖章皇帝忌辰遣官祭

孝陵○

上諭

壽皇殿行禮○戊子大學士等議奏纂修

聖祖仁皇帝實錄開館事宜並開列纂修翻譯  
收掌人員請旨得旨是

皇考御極六十一年

聖謨神烈甚多卿等督率各官務期悉心敬纂  
速輯告成俾永垂方冊以副朕繼述顯揚先  
德之意○己丑

上以

壇

廟祭祀典禮重大。命派王二人散秩大臣御史各二員。部員侍衛各四員。稽查失儀及扈從人等任意行走著為例。○庚寅命總理事務王大臣及大學士嵩祝白潢吏部尚書張鵬翮戶部尚書田從典禮部尚書張廷玉左都御史朱軾將漢御史各部郎中分別三等引見。○辛卯祈穀於

上帝。

上親詣行禮。

上詣

皇太后宮問安。○戶部等衙門遵旨議覆。許聖揚州龍江蕪湖湖口贛關太平橋粵海閩海等九關稅務。應照淮安天津等關例。交與各該撫令地方官兼管從之。○署理撫遠大將軍事務輔國公延信摺奏。甘州所屯兵丁除京城滿洲兵外。有預備調遣鄂爾多斯兵三百名。及宣化兵五百名。古北口兵四百八十

名。山西兵五百九十名。陝西榆林兵一百九十名。分屯各處。現今並無調遣。請俱令撤回本處。奏入。報聞。○和碩莊親王博果鐸薨。○壬辰諭總理事務王大臣議政大臣等。青海台吉策零董洛卜著封為貝勒。自西陲用兵以來。青海之王以下。台吉以上。各著勞績。皇考曾降旨。俟凱旋之日。再行計功。今青海王。台吉等。歷年効績。作何加封施恩之處。察明議叙具奏。○諭內閣。現今封印。各部院應奏本章。不用印信。照常送入內閣。票簽進呈。其應用摺奏事件。著繕摺具奏。儻因封印之故。將應用本章具奏之事。概用摺奏。日後恐無憑據。將此通行曉諭。○諭署直隸巡撫趙之垣。河南巡撫楊宗義。朝廷設官置吏。原以養民。遇有災荒。即多方撫恤。方不負委任之重。今據山東巡撫黃炳奏。稱直隸河南鄰境小民。資生無策。間有攜家就近覓食者。朕覽奏惻然。當此春初農事方興。若任其流離。則小

民何所依歸。著即遴選賢員。招輯復業。核實賑濟。務令得所。勿失農時。以副朕惠養元元之至意。○追封輔國將軍巴爾堪爲輔國公。謚武襄。以其子巴賽襲爵。○河道總督陳鵬年。以病劇具奏。命山東按察使齊蘇勒署理河道總督。御史佟吉圖署理山東按察使司按察使。○癸巳。

上詣

壽皇殿行禮。○調江西巡撫王企靖。湖北巡撫張連登來京。陞貴州布政使裴律度爲江西巡撫。山西布政使納齊喀爲湖廣湖北巡撫。山西按察使森圖爲山西布政使司布政使。擢江西瑞州府知府高成齡爲山西按察使司按察使。○理藩院奏來謁。

梓宮之蒙古王貝勒貝子公額駙台吉等奏稱。世受國恩。不忍即歸。擬住京師。候送。

梓宮得旨。候送。

梓宮尚須兩三月。若去而復來。殊屬勞苦。時當

春季。馬匹必致羸瘦。來而復歸。必更艱難。著照王等所請在京候送。

梓宮。俟安奉。

陵寢享殿禮成後。令回本地。至九月內。

梓宮安奉。

地宮。伊等必復來送。正值草盛馬肥。可即從伊本處前詣。

陵寢。○甲午。諭內閣。各省奏銷錢糧。除地方正項及軍需外。其餘奏銷項內。積弊甚大。若無部費。雖冊檔分明。亦以本內數字互異。或因銀數幾兩不符。往來駁詰。一有部費。即糜費錢糧百萬。亦准奏銷。或將無關緊要之處。駁回。以存駁詰之名。掩飾耳目。咨覆到日。旋即議准。內外通同欺盜虛冒。此等情弊。盡在皇考睿照之中。

聖恩寬大。未行深究。朕今不得不加整理。嗣後一應錢糧奏銷事務。無論何部。俱著怡親王隆科多大學士白潢左都御史朱軾會同辦

理或將各部賢能司員指名保題或酌量另取官員令伊等管辦之處著王大臣四人議奏尋議錢糧關係甚重應另立衙門設滿漢郎中員外郎各二員主事各三員筆帖式十員俱遴選賢能補用至錢糧除地方正項外其軍需各省動用之項具題到日應准應駁臣等會同該部查核議覆其設立署名恭候欽定得旨署名著爲會考府餘依議○乙未上詣

皇太后宮問安○諭九卿朕受

皇考付託之重撫育羣黎夙夜孜孜惟恐閭閻失所昨山東巡撫黃炳奏稱東兗二屬上年二麥失收小民未免困苦直隸河南鄰境之民有攜家覓食者朕即飭諭直隸河南巡撫加意撫綏招集復業但兩省巡撫並未奏聞朕恐其視爲泛常奉行不力爾等可會同確議或特遣大臣或交與該撫作何賑濟安輯之法務使窮黎得霑實惠又前歲河南黃水

潰決汎溢於直隸地方比年以來兩省近水居民耕種無資衣食匱乏均應加恩撫恤爾等一併議奏尋議直隸河南流民應各派大臣一員會同該撫動常平倉穀賑濟其無力耕種者酌量賞給不能回籍者應令直隸河南山東巡撫加意撫輯從之○諭戶部原任兩江總督常鼎勳奏兩淮巡鹽御史張應詔科派加勛銀兩經工部尚書李先復等審明覆奏爾部駁詰以爲加勛銀兩去年衆商既已供爲張應詔所派今常鼎身故衆商遂改前供所審未爲允協朕聞常鼎居官本無令名

皇考亦曾向朕言之其所奏豈可爲準

皇考當日不肯據常鼎所奏定案故遣大臣前往察審今既已審明不必再行駁詰況張應詔本無科派之事衆商安得不改易前供乎至於商人欲以此項銀兩充餉朕豈需此其已交十三萬餘兩准其抵算往年商欠其未

完銀二十餘萬兩。盡行豁免。我

皇考恤商愛民。若辦理此事。亦必如此歸結也。至於衆商歷年所欠正項。關係國帑。著該部悉心確議。定限徵收。○丙申。

上詣

壽皇殿行禮。○是日。

上以莊親王博果鐸薨。欲親臨祭奠。諸王大臣等懇請停止。得旨。王大臣等所奏雖是。但朕之長輩。止有莊親王一人。宗親誼篤。朕心必

欲親往。著宗人府並有執事之王大臣等隨

往。○諭總理事務王大臣等。八旗滿洲人等。

除照常考試漢文秀才。舉人。進士外。至於繙

譯技勇。亦屬緊要。應將滿洲人等考取繙譯

秀才舉人。進士。并武秀才。舉人。進士。著會同

該部。將作何考試。額數多少之處。定議具奏。

○諭吏部。八旗滿洲翰林。向無陞轉之途。甚

爲可憫。伊等如何陞轉之處。著議奏。尋議嗣

後翰林院滿洲侍讀侍講。諭德。洗馬。國子監

司業缺出。將各部俸滿應陞之人。補授一員。

將翰林院編修檢討。補授一員。分缺補用。從

之。○陞內務府郎中李延禧爲內務府總管

○命八旗舉人生員內。有在護軍執事人。行

走者。俱退回。生員仍給銀二兩。舉人仍給銀

三兩。令伊等讀書。○先是。理藩院奏。澤卜尊

丹巴胡土克圖。原係法教內之第一人。數世

行善。垂九十年。當噶爾丹叛亂時。身率七旗

之喀爾喀等來歸。最爲有功。伊係喀爾喀汗

之子。土謝圖汗之弟。遭逢

聖朝。疊蒙殊遇。前年

聖祖仁皇帝面諭之曰。癸卯年朕壽七十。爾壽

九十。大慶之年。爾必前來。斷勿食言。胡土克

圖領旨而回。今雖年邁衰病。遵諭來京。謁見

梓宮。志願已遂。泊然示寂。請照達賴喇嘛。班禪

額爾得尼之例。給賜名號印冊。以示優典。得

旨俞允。命給與名號印冊。既而喀爾喀土謝

圖汗等。以停止往弔。胡土克圖奏請。

上諭曰。胡土克圖極蒙

皇考聖祖軫念。禮遇加隆。

皇考聖祖升遐。係甲午日。今胡土克圖圓寂。亦係甲午日。佛果

聖因。證明不昧。胡土克圖。非尋常僧人比。朕躬親往懸帕供茶。以盡朕心。將此旨傳與喀爾喀汗王。額駙及胡土克圖徒屬人等知之。至是。理藩院以移送澤卜尊丹巴胡土克圖龕座。請派大臣官員護送前往。

上特命敦郡王允祇世子弘晟齋賜印冊奠儀。又命散秩大臣尚崇廩等護送胡土克圖龕座前行。所過蒙古地方。勿得任意騷擾需索。○總理事務王大臣議覆河南布政使護理巡撫事。年欽元摺奏。豫省開封府以南。各州縣歲獲豐收。惟河北之衛輝彰德懷慶三府。自前歲黃河決口。田被水佔。不得耕種。加以堵築工程。小民輸運物料。自百里以至數百里。供應頗力。而現在涸出之田。苦無籽種。不

免乏食之虞。請動藩庫銀二萬兩。分行賑給。并將本年分錢糧。及歷年舊欠。暫行緩徵。應如所請。從之。○戊戌。諭總理事務王大臣等。刑部事繁。阿錫鼐。停其兼理倉場事務。著回部辦事。李英貴。補授滿洲倉場侍郎。陳守創。以府尹帶管倉場事務。○命總理事務王大臣。裕親王保泰。世子弘昇。公馬爾賽。領侍衛內大臣阿爾松阿。大學士嵩祝。都統阿爾賽。尚書孫柱。會同八旗前鋒統領。護軍統領。將前鋒參領。護軍參領。分別三等帶領引見。○庚子。

上詣

壽皇殿行禮。○諭吏部。開列各省試官。在部院之舉人進士出身者。不比翰林人員。文章或致荒疎。若將此等人差往。不能閱文。殊屬無益。伊等如有自稱文章未經荒疎者。著開列朕加考試。○調鑲紅旗蒙古副都統秦布。為本旗滿洲副都統。陞一等護衛舒米達。為鑲紅旗蒙古副都統。○以鑲黃旗滿洲副都統



宗室汝福署鑲白旗護軍統領○理藩院議覆喀爾喀和碩額駙策零奏請將原編入察哈爾旗分一佐領之人停其給與錢糧懇恩令帶回本處共爲兩箇佐領一體承辦差徭應如所請從之○辛丑

上詣

皇太后宮問安○陞湖南巡撫王之樞爲吏部右侍郎翰林院侍講學士查嗣庭爲內閣學士兼禮部侍郎○以內閣學士魏廷珍爲湖

南巡撫○壬寅諭總理事務王大臣等

母后誕育朕躬續承大統謹考彝章請上

尊號

母后以

皇考梓宮奉移

山陵之事未畢不忍即受

尊稱前據王大臣等合詞虔請敬上

仁壽皇太后尊號

盛德謙光屢辭不允諸王大臣援引舊典懇求

再三始蒙

慈允今恭上

冊

寶典禮亟應舉行

母后聖意仍欲遲遲朕復再四陳懇未蒙許允

見今

山陵之期已近尊崇大典訃吉何時總理事務王大臣會同禮部九卿確議具奏○又諭前往

陵寢之處著總理事務王大臣會同裕親王履郡王公馬爾賽大學士嵩祝詳議具奏尋議宋明之禮梓宮至山陵嗣帝皆不親送宋時以親王宰相充之明時或以皇子親王主之祈

皇上思宋明定制之深意念

宗廟

社稷之重任以慰臣民之心得旨凡事當遵奉祖考已行典禮方爲盡善前

曾祖母太皇太后發引時

皇考親自恭送。至

祖母皇太后發引時

皇考聖躬違和。兼有足疾。尚且

親送

梓宮啟行。諸王大臣豈能勸止乎。親送

皇考梓宮至

山陵。朕意已定。大臣等勿再強奏。○又諭。提鎮

副將俱係

聖祖仁皇帝簡用之員。故將遺存弓矢橐鞬等

物。各行給賞。伊等應作何敬謹迎接供奉。俾

聖祖仁皇帝恩澤遺及子孫。累世永戴之處。爾

等會同兵部議奏。尋議所賞物件。應令伊等

於子弟內。選擇謹慎之人。赴部祇領。子孫永

遠供奉。從之。○鑲黃旗漢軍副都統馬天寵

年老休致。以工部左侍郎滿丕。爲鑲黃旗漢

軍副都統。○陞內閣學士登德。爲工部左侍

郎。以原任國子監祭酒尹泰。爲內閣學士。辦

理工部侍郎事。○降刑部尚書陶賴。四級調

用。張廷樞。五級調用。侍郎王景曾。二級留任。

以審擬陳夢雷一案。徇縱故也。○戶部等衙

門議覆。倉場總督李英貴等條奏倉場事宜

四款。一。漕兌定例。原帶耗米。以備曬颺折耗。

不准旗丁批抵。聽作倉中折耗。一。旗丁應給

照米三升八合。查米既入倉廩。復行照出。恐

滋弊端。請將此項米石留倉。量給價值。一。倉

差滿漢監督各一員。請嗣後於部員內擇家

道殷實。操守清勤者題補。再於現任各監督

內。擇其操守清廉。米好數足者。題留復任。二

年。再於候補候選人員內。擇其年力精壯。才

猷敏達者。題請補用。給與本銜食俸。以爲養

廉之資。其應補應選之缺。咨部仍行補選。一

年差滿。果操守清廉。米好數足。亦題留復任

二年。共三年。准作試俸三年。任滿之日。任內

米數謹慎收貯。數目充盈。題明交與吏部。以

應陞之缺。即陞。若改易操守。偷盜倉糧者。照

侵欺錢糧例。盡法治罪。一。倉場衙門。有查倉查船及大通橋石土兩壩。五閘等處。巡查諸事。舊止設筆帖式四員。請添滿漢司官四員。同筆帖式在臣衙門差委稽察。該員果能實力辦事。訪察利弊。三年後。亦照監督以應陞之缺。即陞筆帖式。俟五年俸滿。以應得之缺即用。儻查驗不實。徇私隱蔽。及怠惰誤事者。嚴加叅處。俱應如所請。從之。○癸卯。

上詣

壽皇殿行禮。○諭工部。去年黃河漫溢。衝決秦家廠。一時不能堵塞。朕念數省生民。暨東南漕運攸關。特遣齊蘇勒前往堵修。幸將秦家廠馬營口。俱經堵築完工。但冬日水凍。所修工程。或未必堅固。目今水解流漸之時。水勢定行稍長。況三月桃花水降。其堵築堤岸。不可不加保固。今楊宗義丁憂。布政使年欽元署理巡撫印務。凡齊蘇勒所需河工物料。及所用官員。著年欽元即行給與。毋得遲誤。該

部速行文。年欽元知之。○諭直省主考官。爾等俱係

皇考選用之人。朕諒爾等必能自好。是以特簡為主考官。爾等務秉公考取學問優長之士。果能不徇私情。聲名無忝。則不但無負朕之選用。亦不負

皇考愛養之恩矣。回京之日。朕自加陞擢。如有徇私之處。經朕訪聞。定行從重治罪。決不寬貸。○陞翰林院侍講學士巴泰為都察院左

副都御史。○以翰林院編修莊楷為四川鄉試正考官。編修程元章為副考官。工科給事中康五瑞為廣東鄉試正考官。檢討王思訓為副考官。檢討朱曙孫為廣西鄉試正考官。檢討德齡為副考官。右中允張廷璐為福建鄉試正考官。編修朱一鳳為副考官。○吏部等衙門。遵旨議覆。新進士除欽點庶吉士外。揀選學問好者。令為內外官學教習。年滿遇月官扣缺補用。餘令回籍候選。從之。○甲辰。

諭總理事務王大臣從前每逢科場有無賴

棍徒造言生事此風斷不可長著傳諭該管

衙門考試之前即嚴行曉示儻有此等無賴

匪類務將為首之人從重治罪以示儆戒○

封多羅淳郡王允祐子弘曙為長子貝子允

禔子弘春為固山貝子○授固山額駙達爾

瑪達都四品額駙薩克信多羅額駙僧滾扎

卜俱為和碩額駙○陞湖廣襄陽總兵官佟

國弼為鑲藍旗漢軍副都統湖廣辰州副將

萬際瑞為湖廣襄陽總兵官○乙巳總理事

務王大臣會同禮部九卿遵旨議奏臣等謹

考典章恭上

仁壽皇太后尊號伏承

懿旨以

聖祖仁皇帝梓宮奉移

山陵之事未畢屢辭不允臣等衆籲懇求始荷

允行今恭上

冊

寶典禮

皇太后仍欲遲遲仰見

聖德謙光追念

先皇誠敬哀慕之心至真至切從古未有臣等

竊思尊上

崇稱聖王之盛軌恪遵

慈諭大孝之至情況值

聖祖仁皇帝梓宮奉移

山陵在邇謹俟事畢之後恭上

皇太后

冊

寶典禮吉期交與欽天監選擇舉行得旨是○

陞鴻臚寺卿胡煦為內閣學士兼禮部侍郎

內務府郎中伊都立為詹事府詹事○以國

子監祭酒劉師恕為貴州布政使司布政使

○大學士王掞以老病乞休得旨卿才品優

長

皇考簡任機務以來宣力年久恪勤盡職倚毗

正殷。今以老病乞休。情辭懇切。著以原官致仕。○朝鮮國王李昫奏謝敕封弟李昫爲世弟恩。并報該國議政金昌集中樞李頤命左議政李健命判中樞趙泰來等謀逆伏誅。顛末報聞。○丙午。

上詣

皇太后宮問安。○策妄阿喇布坦使臣垂納木喀等朝見。

上命都統拉錫理藩院尚書特古忒傳諭曰。爾

國台吉在我

聖祖皇考時。雖有微勞。亦多罪戾。乃無故侵我哈密。發兵往招殺害。拉藏毀壞佛教。惟天子統御萬邦。理宜興師問罪。我

聖祖皇考至仁如天。但令陳兵邊境。俟其深悔前非。即加恩寬宥。並無意於殄滅爾國也。其後澤卜尊丹巴胡土克圖爲策妄阿喇布坦再三求赦。我

聖祖皇考追念舊日微勞。又曲鑒胡土克圖老

人懇款之意。允其所奏。令遣使往諭待其伏罪自陳。即降

恩旨。今

聖祖皇考升遐。朕繼承大寶。胡土克圖老人遠來。再爲奏請。是以復遣使於爾。若爾台吉即遣親信之人。誠懇陳辭。朕即寬宥。以寧爾土宇。若冥頑不靈。仍構兵端。亦可明言其意。如欲廣我

聖祖皇考之仁恩。惟爾台吉欲振我

聖祖皇考之武烈。亦惟爾台吉。朕仰承丕緒。行我軍威。爾台吉詎不稔知。今胡土克圖大喇嘛。又已圓寂。從此亦無有爲爾台吉奏請者矣。可作速定奪。來奏若仍前支吾。則兵由爾起。無與於朕也。爾非專使。故不與爾敕書。爾其謹識。朕言。一一往諭。○諭內務府。朕補授官員。但觀其言語明白。人材去得。即加擢用。伊等應各加勤慎。矢心報効。若以朕選用之故。或怠玩居心。貪婪易守。又或年老臃頽。或

疾病昏眊。爾等無得瞻徇。即行題叅。以故阿霸垓多羅郡王巴特瑪袞楚克子索諾木拉卜坦。科爾沁多羅貝勒阿畢達子多爾濟各襲爵。○丁未。

上詣

壽皇殿行禮。○以鑲藍旗滿洲都統輔國公阿布蘭署右翼前鋒統領。○戶部議覆直隸巡撫趙之垣。題請領賣通倉變色米石。應如所請。得旨。此係朕親自辦理之事。

皇考因直隸各州縣有米穀短少之處。將通倉變色米石。糶賣於民。甚屬有益。並非勒令每處糶賣若干也。今趙之垣請於二百里內。附近水次之州縣。派定數目糶賣。而戶部照議准行。俱屬錯謬。此項變色米石。只宜於米穀短少之州縣。然使領運繁難。便爲無益。即應停止。儻民間實因米穀短少。情愿赴通糶買。自行運回。則聽其買去可也。○考察天下軍政。卓異官二十九員。不謹官二十六員。罷軟

官二十員。年老官六十八員。有疾官三十八員。才力不及官七十五員。浮躁官十八員。分別陞賞處分如例。○已酉。諭內閣。從前

皇考之時。凡上三旗大臣侍衛官員人等。俱不許在諸王門下行走。即諸王屬下人。非該屬處。亦不許私相往來。著領侍衛內大臣及旗下大臣等。各將該管侍衛官員等。嚴行稽察。嗣後如有私相行走之人。一經查出。即行叅革。如不糾叅。經朕查出。或被旁人首告。定將該管大臣。一併從重治罪。○諭理藩院。賞賜蒙古扎薩克台吉。協理台吉之處。恩詔內並未議及。朕意欲賞賜伊等。著該院議奏。尋議扎薩克台吉。塔布囊白克及協理台吉內之締姻協理台吉。平等協理台吉等。應照賞賜公等之數。酌量遞減。和碩額駙。應照扎薩克台吉例。多羅額駙。應照締姻協理台吉例。固山額駙。應照平等協理台吉例。賞給從之。○以原任都察院左副都御史李紱署吏部右

侍郎○庚戌諭山東巡撫黃炳朕續承大統父母斯民普天之下皆吾赤子凡身任封疆者當深體朕心遇有災荒及時賑濟使窮黎實被其澤據奏東兗兩屬去歲二麥失收小民未免困苦直隸河南鄰境之民資生無策亦有攜家覓食者朕覽奏惻然爾奏欲各捐已貲以爲賑濟朕思爾等資從何出勢必仍取之於民是賑民實以累民也不如動用倉儲遴選賢員確查乏食窮民分路賑濟小民庶得均霑實惠至鄰省流移之民亦宜一體撫恤毋令失所又奏請平糶倉穀於民食大有裨益必得實心任事之人方副朕惠養元元之意再奏請漕糧十萬石分貯各縣往年曾經屢次截留此項曾否支用所存多寡併如何分貯之處著具本奏聞○又諭運道淺阻舊例撥派民夫挑淺濟運朕思東省連年薄收百姓困苦未必堪此重役將來流亡日多民生日蹙深爲可憫古人救荒之策有大

興役以濟民食者不若竟動正項錢糧僱募民夫給以工食挑濬運河則應值既多散者復聚民資工食稍延殘喘民心鼓舞工程易就運道早通於興役之中即寓賑濟之意莫便於此已有旨命佟吉圖署理按察使速赴河南與總河齊蘇勒商定回任料理運道俟其到日爾可與公同竭力料理務使小民得霑實惠○戶部議覆工部尚書李先復奏兩淮鹽價督撫會同御史酌量料理應無庸議得旨李先復等所奏兩淮行鹽國課攸關凡關鹽務之事督撫應會同該御史酌量料理等語部覆定例遵行已久應無庸議但督撫與該御史如相和好即長鹽價以致病民如不相和好即不巡緝私鹽以致累商嗣後儻各有意見著將情由達部聽部定奪○兵部題陝西應陞副參遊擊等員照例應各加銜一等仍留原任得旨近年用兵以來陝西武官雖陞別省不令其赴新任仍留原任甚屬

可憫嗣後以陞銜留原任者遇有本省相當缺出著該總督提督即行題補

大清世宗敬天昌運建中表正文武英明寬仁信毅大考至誠憲皇帝實錄卷之三

大清世宗敬天昌運建中表正文武英明寬仁信毅大考至誠憲皇帝實錄卷之四

監修總裁官光祿大夫經筵講官太僕寺卿和碩大將軍武庫部尚書總理事務三等伯加十五級臣鄂爾泰  
總裁官光祿大夫經筵講官太僕寺卿起居注太僕寺卿和碩大將軍武庫部尚書總理事務三等伯加十五級臣鄂爾泰  
事三等伯加十五級臣張廷玉光祿大夫經筵講官起居注太僕寺卿和碩大將軍武庫部尚書總理事務三等伯加十五級臣鄂爾泰  
翰林院掌院事加二級臣福敏光祿大夫經筵講官太子太僕寺卿和碩大將軍武庫部尚書總理事務三等伯加十五級臣鄂爾泰  
經筵講官議政大臣協辦內閣大學士事務禮部尚書仍兼管太常寺鴻臚寺事臣王泰等奉

勅修

雍正元年癸卯二月辛亥朔

上詣

壽皇殿行禮○陞內閣學士宗室佛格兵部左侍郎勵廷儀俱為刑部尚書翰林院侍讀學士吳士玉為內閣學士兼禮部侍郎○陞鑲紅旗護軍統領吉當阿為本旗漢軍都統仍兼護軍統領○以故喀爾喀多羅貝勒喇嘛扎布子策登扎布襲爵○壬子

上詣

皇太后宮問安○諭各路將軍等策安阿喇布



坦無故起釁用兵八載。兵丁甚屬勞苦。從前雖將老弱者撤回。今又歷一二年矣。夫兵不務多。惟在精耳。須將實堪効力者存留足用。裕其糧餉。方有裨益。現今爾等各處兵丁。不拘滿洲蒙古漢人。擇其精練者存留軍營。其年老殘廢者。於今年青草之時。令其各回本處。○命吏部尚書張鵬翮為文華殿大學士。兼吏部尚書。○辦理土默特事務刑部郎中福柱等奏披甲阿納等盜牛二頭。照例應絞立決。得旨偷盜一二牲餽。即將蒙古立絞。人命重大。嗣後應改為擬絞監候。若從此蒙古盜案漸少。則照此例行。儻蒙古無知法輕多玩。而盜案比往年較多。則仍照原例擬罪。○癸丑追封

仁壽皇太后曾祖額布根祖一等阿思哈尼哈番兼佐領額參。父護軍叅領衛武俱為一等公。妻俱為公一品夫人。並命衛武子白啟襲封一等公。世襲罔替。○以正黃旗滿洲都統

馬爾薩署理領侍衛內大臣。○盛京禮部侍郎巴濟納休致。以鑲白旗漢軍副都統關色為盛京禮部侍郎。○福建浙江總督覺羅滿保疏報臺灣變亂。有南路下淡水及安平鎮等處義民李直三等倡率鄉勇首先殺賊。仰懇

皇恩酌加議敘。其鄉壯等量予獎賞。得旨據奏臺灣義民李直三等帶領鄉勇協助官兵擊敗賊衆。竭忠効命。殊為可嘉。著該部從優議敘。○甲寅

上詣

壽皇殿行禮。○諭禮部朕奉

皇太后懿旨。風化之基。必資內輔。人倫之本。首重坤儀。此天地之定位。帝王之常經也。嫡妃那拉氏懿範性成。徽音素著。孝敬盡乎承歡。惠慈彰於逮下。宜承光宸極。顯號中宮。應立為皇后。以宣壺教。朕祇遵

慈訓。五妃為皇后。應行典禮。爾部詳察具奏。○

·乙卯。

上詣

皇太后宮問安○諭大學士等國家養育人材首重翰苑既讀中秘之書必當五品端方居心敬慎方不愧官箴聞有僥倖之徒平昔結黨營私至科場年分互相援引轉爲請託遇謹守之人畏干法紀不肯通同作弊反羣相排詆飛語誣陷此風甚不可長亟當甄別以示勸懲著大學士張鵬副尚書田從典徐元夢左都御史朱軾侍郎張伯行李紱會同滿漢掌院學士將翰林院詹事府等官不安本分有玷官箴者勒令解退回籍無得徇情○諭禮部陳鵬年潔已奉公實心爲國因河工決口自請前往堵築寢食俱廢風雨不辭積勞成疾歿於工所聞其家有八旬老母著該撫賜司庫銀二千兩資其養贍伊母給以封典並予陳鵬年諡照一品廕其子○宗人府題莊親王博果鐸薨逝無嗣其所襲乃承澤

王碩塞之王爵承澤王係

太宗皇帝之子。

世祖皇帝親兄與

皇上甚近理應

聖祖皇帝之子承襲得旨宗人府奏請莊親王之王爵於朕諸弟內著一人承襲朕奏請於皇太后奉

懿旨令十六阿哥允祿承襲允祿著襲封莊親王其惠郡王博翁果諾之孫球琳著封爲多

羅貝勒將惠郡王原有佐領屬下人等俱著給與○以河南武陟等處七縣夏被旱災入秋

又值黃水爲害將康熙六十六十一年分未完錢糧分作三年帶徵從巡撫楊宗義請也○

以故喀爾喀輔國公汪舒克子扎木禪襲爵

○丙辰命駐紮旦木將軍宗查布往署大將軍延信軍營効力都統宗室西倫圖往柴旦

木辦理撤兵事務旌表浙江海鹽縣烈婦

戴子亭妻杜氏拒姦不污被刃殞命給銀建

坊如例○丁巳遣大學士白潢祭

先師孔子○戊午祭

大社

大稷

上親詣行禮○諭總理事務王大臣等趙之垣將虧空錢糧知縣連參二員從前

皇考令趙之垣署理直隸巡撫事務專為清理伊叔趙弘燮錢糧也而伊視為與已無干但將屬下知縣遽行參奏定例督參事件交巡

撫審理撫參交總督審理直隸既無總督著將趙之垣所參虧空錢糧之知縣二員交與刑部確審他省若有此等參奏虧空內有別情者亦將一二案提交刑部審訊○諭吏部直省教官專司訓迪士子今捐納教職人員有不諳文藝之人不可為年長學優者之師應照伊所捐品級別任補用該部議奏尋議各省教職俱以舉人恩拔副榜廩生揆貢補用其捐納人員教諭改以縣丞用訓導改以

主簿用從之○以左僉都御史嵇曾筠署理

河南巡撫事務給路費銀一千兩令作速赴任○己未

上詰

壽皇殿行禮○封左都御史朱軾母為一品夫人並給銀二千兩○吏部左侍郎降級留任李旭升以老病乞休命給還原品加尚書銜致仕○補行山西甘肅二省康熙六十年分大計貪酷官一員不謹官三員罷軟官二員年老官七員有疾官四員才力不及官三員浮躁官三員分別處分如例○庚申諭總理事務王大臣及諸王大臣等外間匪類捏造流言妄生議論謂朕鍾愛十六阿哥令其承襲莊親王王爵承受其家產朕為君上多封諸弟數人為親王何所不可而必藉承襲莊親王以加厚於十六阿哥乎現今廉親王怡親王履郡王朕皆封以親王郡王矣大阿哥之子弘昉一間散宗室亦現居親王邸第豈

伊本分所應得乎。且如發遣一人。即謂朕報復舊怨。擢用一人。又謂朕恩出於私。今諸王大臣具在。朕所用佛格。尹泰等。何私之有。佛格係宗室輔國將軍。在

皇考時。無薦舉之者。故未蒙錄用。朕聞其人可用。或有裨政事。是以擢爲尚書。尹泰爲人明達。伊係四格親戚。或曾在二阿哥處行走。一二次。亦未可定。

皇考惜其材品。仍授爲盛京佐領。今朕既知之。何忍置之閒曹。夫天子簡用所知之人。乃分內之事。非臣下所可妄議也。勒什亨。儉邪小人。伊父蘇努。係七十之黨。結爲生死之交。七十等朋比爲姦。搖惑人心。擾亂國是。朕於蘇努父子。宥其罪戾。疊沛恩施。封蘇努爲貝勒。授勒什亨領侍衛內大臣。御前行走。亦冀其感念國恩。悛改舊惡。豈知伊等心無廢足。仍然結黨營私。護庇貝子允禔。代爲支吾巧飾。將朕所交之事。顛倒錯謬。以致諸事掣肘。難

於辦理。又朕諸弟兄家有姦惡太監數人。種種引誘伊主。若明正其罪。詳審究擬。則牽連伊主之處甚多。朕念兄弟之情。加意保全。不加明訊。將此輩姦惡小人。發遣遐方。令其疎遠。曾謂勒什亨曰。此不過懲治家人。其事甚細。不必記在檔案。而勒什亨顯悖朕旨。記載檔案。復敢以懇給佐領冒昧陳請。狂妄悖謬。勒什亨不可在內廷行走。著革職。發往西寧跟隨允禔効力。又我朝舊制。行軍之處。必派王公等前往。大將軍王允禔到京後。未定應行回任與否。經諸王大臣酌議。將貝子允禔派往軍前。駐劄西寧。此不過爲國邊疆起見。而允禔怠慢。不肯起程。奏云。俟過百日。又云。俟

陵寢回來。屢次推委。耽延時日。誠屬何心。且允禔之太監何玉柱。一至微至賤之人。而使有家貲數十萬。伊府管領何人不可用。而用一漢給事中秦道然。豈非欲耀內廷太監以財

利。而要外廷漢人之稱譽乎。如此作爲。朕猶  
竊未革其貝子。降其俸祿。撤其家奴。所懲治  
者。特一二姦惡太監耳。而遽謂朕陵逼弟輩。  
揚言無忌。悖亂極矣。朕受

皇考弘恩。歷年身居藩邸。享安閒之福。登極以  
來。不辭勞瘁。治益求治。安愈求安。誠以

皇考付託神器至重。思欲仰副

皇考知人之明。事事必求至當。爾諸臣理宜感  
發天良。靖共爾位。同心協力。翼贊朕躬。乃爾

等之職分。朕爲普天率土之主。爾等莫非臣  
下。若任爾等之縱恣。朕何以對

聖祖皇考乎。魯論有曰。三年無改於父之道。可  
謂孝矣。朕受

皇考鞠育教誨深恩。四十五年。今承大統。惟思  
永永無改。何止三年。是以朕之弟兄。及諸大  
臣。一切過犯。無不施恩寬宥。如陳夢雷罪大  
惡極。朕詢問九卿大臣。僉云。陳夢雷斷不可  
留。應行正法。朕猶將伊免死發遣。陶賴張廷

樞。竟將奉旨發遣之犯陳夢雷二子。擅自釋  
放。朕猶欲保全大臣。免其治罪。止以降級結  
案。爾等果能悔改惡習。竭力供職。一二年後。  
必有誠於中而形於外者。朕自必知之。如不  
悔改。不思

皇考六十餘年教養深恩。不感戴朕保全寬宥  
之意。妄生事端。干犯法紀。朕斷不寬宥。總之  
使朕廣推

皇考之仁慈。惟爾等自勉之。使朕昭宣

皇考之天威。亦爾等自取之。朕仰體

皇考聖心仁愛。欲保全爾等之意。實出於至誠。  
爾等務必成全朕之孝思焉。特諭。○陞詹事  
府少詹事拉錫希布。爲內閣學士兼禮部侍  
郎。○實授齊蘇勒爲河道總督。予故和碩  
額駙耿聚忠所尚和碩柔嘉公主。一等公佟  
國維母覺羅氏妻和舍里氏。各立碑致祭。○  
辛酉。

孝康章皇后忌辰。遣官祭

孝陵○

上詣

皇太后宮問安○陞順天府府丞張聖佐爲兵部左侍郎○免湖廣荆門鍾祥等四州縣衛康熙六十一年分旱災額賦有差○予故莊親王博果鐸祭一次造墳立碑諡曰靖○壬戌調福建按察使董永芳湖南按察使張安世廣西按察使李繼謨俱來京陞雲南道御史秦國龍爲福建按察使司按察使山西河東道甘國奎爲湖南按察使司按察使雲南永昌道白洵爲廣西按察使司按察使○癸亥

上詣

壽皇殿行禮○諭禮部致治之要首在風化移風易俗莫先於鼓勵良善使人人知彝倫天則之爲重忠孝廉節之宜敦古帝王勞來匡直所以納民於軌物者舍是無由也朝廷每遇覃恩詔款內必有旌表孝義貞節之條實

係鉅典邇來直省大吏往往視爲具文並未廣諮遠訪祇憑郡縣監司申詳卽爲題請建坊而山村僻壤貧寒耕織之人或菽水養親天性篤孝或栢舟矢志之死靡他鄉鄰嗟歎爲可欽而姓氏不傳於城邑幽光湮鬱潛德銷沉者何可勝數爾部卽行傳諭督撫學政嗣後務令各屬加意搜羅虛公核詢確具本人鄉評實蹟題奏旌獎勿以匹夫匹婦而輕爲沮抑勿以富家巨族而濫爲表揚以副朕成俗化民實心彰善至意○實授陳守創爲總督倉場侍郎仍署順天府府尹事務○總管內務府事莊親王允祿等奏言順貞門爲內庭禁近之地請將旗下護軍更換令內府護軍等看守分爲六班竝於內府三旗內每旗補放管轄之員以司稽察得旨每旗著補放統領一員定爲三品餘依議○都察院奏請科道等員內陞外轉得旨陞轉拘定年限未爲允協如外任好官因一盜案註誤不得

陞遷豈不可惜。嗣後科道官內陞外轉。不必拘定歷俸年限。俱行開列。○以山東泗水等十一縣連年旱災。發帑賑給。及隣省就食窮民。一體散賑。并緩徵康熙六十一年分未完額賦。從巡撫黃炳請也。○甲子。諭禮部。奉皇太后懿旨。側妃年氏。封爲貴妃。側妃李氏。封爲齊妃。格格鈕祜魯氏。封爲熹妃。格格宋氏。封爲懋嬪。格格耿氏。封爲裕嬪。爾部察例具奏。○乙丑。春分。朝。

日於東郊。遣廉親王允禩行禮。○

上詣

皇太后宮。問安。○宗人府題。輔國公揆慧。因昏憤不瑞革退。其應襲公爵。除溫良郡王猛莪之子輔國公延信。並無別子。請將延信改爲襲封輔國公。得旨。延信兼二公爵。著封爲貝子。○丙寅。諭總理事務王大臣等。八旗滿洲蒙古漢軍內。前鋒護軍另戶領催披甲閒散人等。有能繙譯書寫清字者。從前並無陞用

之路。著通行查詢。如有長於繙譯書寫清字。情願考試者。開具人數奏聞。令其考試。擇其甚優者呈覽。○諭六部尚書侍郎等。各部屬員既各分司。則各有職守。彼此不得干預。況每司滿漢共有六員。不可謂辦事無人。若皆闕冗貪庸。何難指名題參。另易其人。安用他司越俎代庖乎。此明係鑽營包攬。爲漁獵之計。嗣後不論何司。不論滿漢。永遠不得借才能之名。一人兼攝數司之事。若有緊要事件。

暫時派出。指辦一二事尚可。○諭戶部。治天下要道。莫過安民。朕纘承大統以來。軫念蒼生。痼瘼時切。直隸山東河南連年歉收。特命緩徵額賦。遣官賑濟。至於京師。每年自十月初一日起。至三月二十日止。五城設立粥廠。令巡視五城御史煮粥賑饑。今尚在青黃不接之時。著展期一月。煮粥散賑。至四月二十日止。但四方窮民就食來京者頗多。著每日各增加銀米一倍。務使得需實惠。以副朕

憫念窮黎至意○諭禮部國家掄才大典首重試官主考憑房考閱薦之文定其去取則一榜衡鑒之當否係於分校諸臣之賢不肖亦匪輕矣近科以來

皇考慎重闢門籲俊之典於順天鄉試及會試房考官慮其人邪正不一特命每房各用二人同閱試卷使之互相覺察彼此鈐制用意良爲周密但法久弊生一房兩考官豈皆遇秉公持正之人設有一狡黠者參雜其間即爲賢者之累況兩人或皆不肖則朋比作姦爲弊更甚嗣後仍著照原定科場條例各房止用一人校閱其責既專其功罪亦難推諉務俾鎖闈清肅悉拔真才以仰繼

皇考旁求俊乂之志爾部即遵諭行○諭都察院各衙門募設書辦不過令其繕寫文書收貯檔案但書辦五年方滿爲日既久熟於作弊甚至已經考滿復改換姓名竄入別部姦弊叢生更有一等缺主名色掌握一司之事

盤踞其中交通賄賂上下朋姦書辦尚有更換缺主總無改移子孫世業遂成積蠹自後書辦五年考滿之後各部院堂司官查明勒令回籍聽選如有逗遛不歸者飭令五城司坊官稽察遣逐其缺主倚恃勢力抗違潛匿者刻即叅究押解回籍各部院一年一次保結具奏儻仍有潛居京師者或經朕聞知或被科道題叅將出結之大臣官員一併治罪○諭科道等官

皇考臨御六十餘年至聖至明無日不以國計民生爲念凡所以咨訪吏治通達民情之意至爲殷切邇年以來無知小人見科道疏章稀少遂疑

皇考不甚信納羣言又譏言官皆緘默取容此大失

皇考本懷真所謂坐井觀天也當時內而滿漢大臣外而督撫提鎮皆許其密摺言事蓋因各省地方事務督撫身親閱歷自能詳悉周



知較言臣風聞言事勝什倍矣。以此

皇考據所聞見折衷行之。大小國政措置咸宜。言官無所用其建白。而實則天下之利弊無不洞燭於

聖心也。朕仰承大統。一切遵守成憲。尤以求言爲急。在京滿漢大臣外省督撫提鎮。仍令摺奏外。爾等科道諸臣。原爲朝廷耳目之官。凡有所見自應竭誠入告。絕去避嫌顧忌之私。乃爲忠蓋。若此時不能盡言。即後日官至大僚豈能期爾建立謀猷乎。今著各科道每日一人上一密摺輪流具奏。一摺祇言一事。無論大小時務皆許據實敷陳。即或無事可言。摺內亦必聲明無可言之故。在外候旨。或召進面見。或令且退。其所言果是。朕即施行。即或未甚切當。朕亦留中不發。不令人知。僅有徇私挾讎等情。巧爲瀆奏。亦不能惑朕之耳目也。摺內之言。不許與人參酌。如有漏洩。或同僚知而言之。則同僚即可據以密聞。朕將

兩人之摺。合驗情事。必不能隱諱推諉矣。至於有能面折廷諍。或彈劾權要。或更革弊端。不妨仍以露章奏聞。朕亦不拒。又朕居藩邸時。在朝大小官員。及

皇考御前之人。以至藝術之流。從無熟識往來者。即藩邸豈無素所任使之。人然從不假以顏色。信用其言。今朕躬攬大權。所用一二人。皆深悉其人可用而用之。非有念舊偏徇之心。誠恐向日効力微員。借稱王府舊臣。在外招搖嚇騙。生事干法。其害甚大。斷難姑容。爾等可不時留心察訪。一有聞見。著即密奏。切勿畏忌。爾諸臣其敬承明諭。各抒忠悃。毋負朕懸轡設鐸之意。諭直省督撫。爾等抵任。每使家丁管理事務。號爲堂官。往往串通中軍旗牌。威嚇勒索。且使潛往各屬探聽事件。各屬皆有坐省家人。與督撫司閤一氣相通。爾謂甚密。而彼已知之。因得預爲賄囑。若誤信其言。則是非顛倒。爲害滋甚。至走差齟

本之人。每至驛遞。抑勒多端。騷擾百出。尤屬不法。嗣後著永行禁止。堂上辦事。則遣佐貳官輪班直日。奔走出差。則於衙役中擇家道殷實。謹厚熟練之人分任。仍嚴加察訪。若招搖生事。即行革退。工部議覆。河道總督齊蘇勒等疏言。豫省黃河北岸。沁黃交匯之處。至詹家店十八里。請建築遙堤一道。趙莊地方。並沁河迤東。各築挑水壩一座。應如所請。從之。○賜朝正外藩王。貝勒。貝子。公。台吉等。

銀幣鞍馬有差。丁卯。大學士等恭擬。

聖祖仁皇帝陵名進呈。

上覽奏。哀慟不勝。親刺指血。圈出。

景陵字樣。○命廉親王允禩。辦理工部事務。裕。

親王保泰。辦理理藩院事務。○以河南道御。

史呂謙恒。為浙江鄉試正考官。翰林院編修。

田嘉穀。為副考官。山西道御史何世璠。為江。

西鄉試正考官。編修任蘭枝。為副考官。廣西。

道御史漆紹文。為湖廣鄉試正考官。編修景。

考祥。為副考官。戊辰。鑲黃旗蒙古副都統哲爾袞。緣事革職。陞鑲黃旗護軍參領巴爾米忒。為本旗蒙古副都統。改直隸古北口總兵官缺。為提督。以總兵官董象緯陞補。陵寢副將缺。為總兵官。以副將范時繹陞補。陞署山東按察使佟吉圖。為山東布政使司布政使。山東濟東道程光珠。為山東按察使司按察使。以山東壽張等五州縣。黃沁水決麥豆被淹。緩徵康熙六十年分未完漕項銀米。己巳。恭上。

聖祖仁皇帝尊諡。先期禮部具儀注題奏。

上曰。爾部所奏閱。

冊。

寶儀注內。並未議及朕躬行禮之處。凡閱。

壇廟祝帛。悉皆行禮。今閱。

聖祖仁皇帝冊寶。亦當行禮。為是。禮部隨遵旨。

議定。凡閱。

壇廟祝帛。

皇上並皆行禮。今閱

冊

寶亦應照閱祝帛儀。行一跪三叩頭禮。得旨是。是日設

冊

寶案於太和門正中。大學士二員恭捧

香冊

香寶安奉案上。行一跪三叩頭禮。畢。禮部奏請皇上升太和門視

冊

寶

上素服乘輿出宮。至太和門後階下。即降輿。步出太和門東門。望見

冊

寶。即悲感涕泣。閱畢。行三跪九叩頭禮。大學士恭捧

冊

寶。由正中階下。奉安各彩亭內。前列御仗。出協

和門。彩亭啟行後。

上方回駕預詣

壽皇殿恭候。是日

大行皇帝鹵簿全設於

壽皇殿大門外。彩亭由景山東門入。大學士恭捧

冊

寶。由中門中路入殿中。榻扇奉安於東邊案上。上從大門中門入。進殿東就拜位。行三跪九叩

頭禮。大學士恭捧

香冊箱跪獻

上受

冊。供獻畢。授左邊禮部大臣跪接。恭安

冊案上。大學士恭捧

香寶盞跪獻

上受

寶。供獻畢。授右邊禮部大臣跪接。恭安

寶案上。典儀官奏宣

冊宣

寶隨捧

絹冊

絹寶宣畢

上行三跪九叩頭禮。奠帛。獻爵。亞獻。終獻畢。

上行三跪九叩頭禮。恭奉祝帛。

絹冊

絹寶。詣燎位。贊禮官奏禮畢。

上趨至

几筵前。跪撫

寶榻。呼號大慟。左右無不悲感。以各有執事。不

敢進勸捧

冊

寶大學士二人。進前哀懇良久。

上方出。及乘輿。猶涕泣不止。供獻時。

上高捧頂戴於首。備極恭敬。自初閱

冊

寶。至於畢事。思

功德之隆盛。感

神人之禮隔。哀慟失聲。涕泗交頤。駭奔左右者

咸感動悲切。幾不能持。因大禮攸聞。皆勉強

抑制。以襄鉅典。冊文曰。源遠流長。寶曆綿延

於萬葉。功高德盛。鴻名炳耀於億年。參覆載

以成能。亘古今而立極。光垂寶冊。典重彝章。

恭惟

皇考大行皇帝。智勇表邦。寬洪錫福。統

天作則。符大德之好生。法

祖綏猷。繼顯謨而垂裕。湖自

乾綱始握。暨夫

泰運宏開。推上理之化成。以至仁爲治本。勤勞

幾務。皆緣利濟蒼黔。愛惜人才。總爲輯寧區

寓。泣

法宮而問夜。民隱周知。御

鑒輅以省方。輿情畢慰。導黃流於淮海。悉本

宸衷。輓紅粟於東南。用寬物力。無一夫之不獲

致。比屋之可封。萬象如春。媲美三皇之世百

祥從善凝和四德之元

尊號宜崇惟

仁克允若乃時際守成功同開創我

皇考膺圖受籙繼緒重光大治休明威靈赫濯

值三藩之叛逆

命諸將以誅鋤攘元裔之跳梁擣其巢穴滌臺

灣之氛祲隸我版圖喀爾喀窮威來歸綏闡

却而享安全之樂噶爾丹兇頑不戢

統六師而彭掃蕩之勲惟彼策妄阿喇布坦者

潛蹤遠竄負固弗庭禁旅長驅露布捷馳於

北闕

天威遠震

御碑屹立於西藩光

列聖相繼之謨猷拓自古未通之疆土式遵彝

典載考詩書禹謨以帝堯爲聖君商頌以成

湯爲烈祖德無不備必稱

聖而始該功有獨隆非稱

祖其曷副予小子寅紹丕基仰承鴻業莫罄顯

揚之悃僉詢朝野之公謹奉冊寶恭上

尊諡曰

合天弘運文武睿哲恭儉寬裕孝敬誠信功德

大成仁皇帝

廟號曰

聖祖萬年有赫百代彌尊伏冀

天慈俯垂

鑒格謹言寶文曰

聖祖合天弘運文武睿哲恭儉寬裕孝敬誠信

功德大成仁皇帝之寶是日頒詔天下詔曰

古帝王有出世之勲必有非常之諡故黃帝

表中和之美顓頊著謙約之文大行受大名

揚光本因乎法地有功兼有德加號必極於

同天此追尊之鉅典守國之常經也恭惟我

皇考大行皇帝受籙綿長膺圖悠久以生知安

行之至聖行存誠主敬之實功無一事不上

合

天心無一念不下周民慮禋郊饗

帝歲必躬行。祈穀佑民。典恒虔舉。

慈闈定省。宗系展庸。問夜求衣。卑宮菲食。萬幾悉歸於盡善。庶政一出於大中。式勸官方。廣開言路。獎廉課吏。勅法儆邪。器以使人。公能服衆。賑卹之詔。屢下十行。蠲免之租。動成千萬。寬刑肆赦。發帑資兵。巡省恩膏。備詳方策。治河經畧。具載史書。以自強不息之精神。爲久道化成之事業。武功之赫濯。則蕩清三孽。平定沙漠。元裔滅除。臺灣置郡。收水西而撫紅苗。定土番而復三藏。文德之光華。則親臨太學。特幸闕里。嚴飭學臣。敦訓士子。增博士之員。躋十哲之享。手定五經。窮研六藝。詩同雅頌。文婉典謨。學貫百家。聖實天縱。深仁厚澤。溯四千餘載之史冊。莫有等倫。偉烈豐功。紀六十一年之政治。何能悉舉。今龍馭上賓。星霜未改。普天之思慕。應與歲月而俱深。率土之攀號。惟望

徽稱之允合。朕繼承鴻寶。嗣守丕基。方繼述之

是圖。豈追崇之敢後。謹命諸王。貝勒。大臣。文武羣臣。稽考禮文。恭薦

諡號。卿士百辟。不謀同辭。聲舉上儀。恪遵舊典。

祇告

天

地

宗廟

社稷。於雍正元年二月十九日。奉冊寶恭上皇考大行皇帝尊諡曰

合天弘運文武睿哲恭儉寬裕孝敬誠信功德大成仁皇帝。

廟號曰

聖祖。既表尊親之大義。當施逮下之洪恩。於戲帝德難名。固揄揚之莫罄。

聖功丕顯。期昭示於無窮。庶慰遐邇之心。以協天人之願。布告天下。咸使聞知。○詔內恩款

凡十一條。○庚午。諭理藩院。據察哈爾總管諾爾布奏報。察哈爾厄魯特佐領羅卜臧錫

拉布。藍翎侍衛垂木丕爾等逃遁等語。著作速傳知將軍等。令其派兵各路。要截捕擒。再著喀爾喀蘇尼特。嚴令各處哨汛。追勦擒獲。其現在厄魯特。恐伊等妄生疑慮。著一等侍衛達鼐。郎中鄂賴。前往照管。俟將羅卜臧錫拉布等。擒獲之後。再回京。○諭內務府。孫思克之妻。係公主長輩。且係功臣之妻。今聞溘逝。朕意欲令公主穿孝。此事交與該部議奏。將內庫銀賞給二千兩。派大臣一員。侍衛十員。將茶酒往奠。東西旗除有承辦事件之大員外。俱著前往。發引之日。仍著往送。○辛未上詣

皇太后宮。問安。○實授宜兆熊。為福建福州將軍。○直隸巡撫趙之垣。緣事革職。陞直隸守道李維鈞。為直隸巡撫。○給川陝總督年羹堯。二等阿達哈哈番世職。併加其父原任巡撫年遐齡。尚書銜。○壬申。命在京部院衙門。復行三年考察例。○癸酉。行百日大祭禮。

上詣

壽皇殿。躬親奠獻。哭泣盡哀。諸王大臣等奏。

皇上追念

先皇悲思篤切。躬襄大事。勞瘁倍常。伏懇強持

哀情。仰慰

先皇付託之命。其詣

壽皇殿拜奠之處。乞多隔數日得旨。朕因

皇考付託鴻基之重。故愛惜此身。於臣子哀慕

之道。十分未盡二三。朕非強飾以取孝名。但

朕受

聖祖皇考四十五載。顧復教育深恩。今一旦永

訣。中心悲痛。何能自己。目今尚可瞻仰

梓宮。罔極哀思。乘此猶可稍展。至

梓宮睽隔之後。何由再得瞻仰

皇考乎。朕躬尚能自持。朕亦儘力強制。諸王大

臣所奏。知道了。○甲戌。陞四川東道胡期

恒。為陝西西安布政使司布政使。○陝西西

安按察使。永太。緣事革職。擢陝西臨洮府知

府王景灝爲陝西西安按察使司按察使實授傳德爲陝西甘肅布政使司布政使擢四川成都府知府劉世奇爲陝西甘肅按察使司按察使○乙亥遣官祭

先農之神○諭總理事務王大臣等向來地方官奏銷錢糧不給部費則屢次駁回恣行勒索朕欲革除此弊特設會考府衙門前降諭旨甚明近見各處奏銷之事並不送會考府各部有擅行駁回者則勒索之弊尚未革

除嗣後有應駁之事定須送會考府查看如

果應改駁會考府王大臣官員列名駁回○

陞廣東廣州協領張天植爲江南京口右翼

副都統○總理事務王大臣等遵旨議覆自

西陲用兵以來青海王台吉等俱各効力應

酌加封賞親王羅卜藏丹津應加俸銀二百

兩緞五疋郡王戴青和碩齊察罕丹津應

封爲親王貝勒額爾得尼厄爾克托克托奈

應封爲郡王貝子巴爾珠爾阿喇布坦墨爾

根戴青拉查卜應封爲貝勒輔國公噶爾旦達錫敦多卜達錫應封爲鎮國公吹拉克諾木齊亦應封爲貝勒其貝勒阿爾布坦溫布應加俸銀一百兩公諾爾布彭蘇克應加俸銀五十兩此外領兵進藏以及駐防噶斯柴旦木人員應行文該將軍查明具奏分別加賞從之○封和碩瑞敏公主和碩純禧公主和碩恪靖公主俱爲固倫公主○追封青海貝子丹忠爲郡王遣官致祭賜銀二百兩以其領兵進藏著有勞績也○丙子

孝昭皇后忌辰遣官祭

陵○諭總理事務王大臣等從前土默特因遷

移臺站殊爲擾累伊等於用兵之際知係國

家大事看守臺站毫無遲悞甚屬可憫除照

例賞給米糧外應按人數再加恩賚此前往

給賞之處或另委人員或即交與管理臺站

人員辦理著議奏尋議土默特坐臺蒙古應

每兵各賞給銀五兩公鄂倫岱整理軍臺事



竣不必前去。亦不必另派人員。其賞給銀兩之事。即交管理臺站人員辦理。從之。○以翰林院侍講吳襄提督順天學政。○丁丑。

上詣

壽皇殿行禮。○遣官祭

歷代帝王。○以大學士蕭永藻總理

三陵內外事務。內務府總管董殿邦管理

三陵包衣佐領下官員執事太監等事務。○以

戶部郎中張坦麟署理順天府府尹。○戊寅。

上詣

皇太后宮問安。○晉封喀爾喀多羅郡王額駙

敦多卜多爾濟為和碩親王。和碩額駙台吉

策凌貝勒丹津多爾濟俱為多羅郡王。輔國

公博貝為多羅貝勒。副將軍阿喇衲摺奏

哈密扎薩克一等達爾漢白克額敏在吐魯

番地方不服水土。呈請帶領回人四百名。至

哈密塔爾那沁種地効力。應將額敏發回哈

密從之。○己卯。諭吏部。虧空錢糧各官若革

職留任催追必致貽累百姓。伊等既已獲罪革職。豈可復留原任。嗣後虧空錢糧各官。即行革職。著落伊身勒限追還。若果清完。居官好者。該督撫等奏明。著通行直隸各省督撫知之。副將軍阿喇衲奏報羅卜腦兒地方回人古爾班等率領哈喇庫爾薩達克圖哈喇和邵三處戶口一千餘人輸誠投順。下部知之。

大清世宗敬天昌運建中表正文武英明寬仁信毅大孝至誠憲皇帝實錄卷之四

大清世宗敬天昌運建中表正文武英明寬仁  
信毅大孝至誠憲皇帝實錄卷之五

監修禮部官光祿大夫經筵講官太僕議政大臣併和殿大學士兼兵部尚書總理兵部事務等伯加十五級臣鄂爾泰

總辦官光祿大夫經筵日講官起居注太僕兼太子太僕保和殿大學士兼戶部尚書仍兼吏部尚書翰林院掌院

書等伯加十三級臣張廷玉光祿大夫經筵日講官起居注太僕議政大臣武英殿大學士兼工部尚書仍兼管

新院掌院事務加二級臣福敏光祿大夫經筵講官太子太僕東閣大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼官太常寺鴻臚寺事務臣三泰等奉

敕修

雍正元年癸卯三月庚辰朔清明節

上詣

壽皇殿致祭行禮○遣官祭

永陵

福陵

昭陵

暫安奉殿

孝陵

孝東陵

仁孝皇后

孝昭皇后

孝懿皇后陵○復福建福州府駐防漢軍馬兵

錢糧舊額○辛巳

上詣

皇太后宮問安○以翰林院侍講王國棟爲陝

西鄉試正考官○編修吳家驥爲副考官○刑部

右侍郎黃叔琳爲江南鄉試正考官○修撰鄧

鍾岳爲副考官○禮部左侍郎革職留任王

思軾以老病乞休命復還原職○致仕○癸未

命建故一等公佟圖賴佟國綱佟國維圖海

等祠○春秋致祭○增給外省駐防滿洲前鋒

兵○每月錢糧一兩○甲申諭總理事務王大

臣等在藏之兵或撤回或於通藏之路駐扎

及西寧所餘官兵撤回之處集議以聞○尋議

西藏地方因策妄阿喇布坦妄行擾亂用申

天討○平藏之後留兵防護恐屯劄日久○唐古

特等供應繁費○應將駐藏官兵盡行撤回○察

哈爾及額駙阿寶之兵丁應令公策旺諾爾

布都統武格阿寶等統領由西寧路遣回阿寶在軍營年久應令伊與策旺諾爾布等一竝來京其江寧杭州兵丁令副都統吳納哈帶領由雲南遣回四川綠旗兵丁令副將李現光帶領由打箭爐遣回至兩路適中之人木多係通藏大路應於四川綠旗兵內挑選一千駐防應令總督年羹堯於川陝總兵副將內揀選管轄再阿里地方甚屬緊要今康濟鼎親身赴藏同隆布奈等料理藏地其阿里地方無人辦事應交康濟鼎派出効力之人奏聞賞與職銜協助防守再查西寧有綠旗兵六千防守地方已屬足用其都統汪悟禮帶領京師之兵應盡行撤回得旨額駙阿寶令其帶領兵馬前往遊牧地方休息數日再令來京○命吏部定直省督撫兼銜○加吏部尚書兼步軍統領勇勇隆科多保和殿大學士馬齊川陝總督年羹堯俱爲太保○兵部議覆川陝總督年羹堯條奏川陝事宜

一打箭爐之外中渡河口係通西藏要隘不可無兵彈壓請將分駐嵐州之化林協守備移駐中渡建立土城撥把總一員兵二百名隨往分防一保縣在大河之南爲土番出入隘口防汛不可不增請撥威茂營千總一員帶兵一百名移駐保縣以資防禦其應支月糧即以威州所徵彝糧就近支給一松潘口外各番部落不一而阿樹一處最爲緊要今止給以委牌暫令土目管理終不足見信於羌番請給長官司職銜以資鈐束一建昌所屬越窩衛地方甚爲寥濶每多蠻獠出沒搶奪今僅設守備一員兵二百五十名實難分撥防禦請改設遊擊一員現在守備卽爲中軍再添千總一員把總一員兵二百五十名共五百名分防彈壓一大金川土司之土舍色勒奔曾因出兵羊崗著有勤勞請給以安撫司職銜分小金川土司之勢一烏蒙土府地界最廣姦目達木等自土司祿鼎乾故後

益逞兇暴土舍祿鼎坤祿爲固情願擒獻俟  
二人擒獻達木給以土職各管其地一川省  
滿城營房有官生捐資蓋造者准予議敘一  
川省軍前効力之武進士武舉自備鞍馬資  
糧勤勞口外武進士請題補守備武舉請拔  
補千總均應如所請從之○追封下嫁和碩  
額駙興德之和碩格格爲和碩懷恪公主遣  
官致祭修墳立碑如例○乙酉

上詣

壽皇殿行禮○諭部院各衙門凡一應衙門卷  
案各有典守之官稽查引據全以舊檔爲憑  
此固一代之典冊六官之掌故不得視爲具  
文也收貯卷案封禁雖嚴而翻閱查對不能  
脫書吏之手盜取文移改易字跡百弊叢生  
莫可究詰嗣後司官遷轉將所掌卷案新舊  
交盤各具甘結說堂存案如有疎失換易等  
弊一經發覺與受同罪爾各部院衙門急宜  
查核清楚設法封貯永杜弊端不得因卷案

浩繁畏難退沮其交盤事例爾部院諸臣公  
同確議具奏尋議各衙門卷案俱應呈堂用  
印收貯遇有查閱滿漢司官親身驗看陞轉  
之日出結交代并請揀發專寫檔案筆帖式  
三年無誤保送補用從之○諭吏部各省督  
撫衙門事繁非一手一足所能辦勢必延請  
幕賓相助其來久矣但幕賓賢否不等每有  
不肖之徒勾通內外肆行作弊黷陟屬員則  
清濁混淆申理獄訟則曲直倒置敗督撫之  
清節誤督撫之功名彼則置身事外飽索而  
去殊屬可恨夫今之幕客即古之叅謀記室  
凡節度觀察等使赴任之時皆徵辟幕僚功  
績果著即拜表薦引彼愛惜功名自不敢任  
意苟且嗣後督撫所延幕客須擇歷練老成  
深信不疑之人將姓名具題如効力有年果  
稱厥職行文咨部議敘授之職位以示砥礪  
該部詳議具奏尋議各省督撫應將幕客姓  
名造冊報部勤慎無過者照應得職銜即用

無職銜者量給職銜特疏舉薦者從優議敘如徇私保舉照徇庇例議處從之 丙戌

上詣

皇太后宮問安 諭吏部行取知縣今年著停止俟雍正二年舉行 諭都察院御史巡城關係緊要嗣後缺出通行開列具題候朕點用 陞二等侍衛郎泰爲

景陵總管 戶部右侍郎赫成額差往歸化城

以侍讀學士托時署戶部侍郎 戊子大學

士等纂

聖祖仁皇帝實錄首篇及首卷二冊進呈

御覽

上敬謹閱畢諭曰纂修是如有應入條件仍著

陸續纂入 諭內閣江蘇巡撫吳存禮將署

理上海縣同知鄭山題請革職留任催追虧

空錢糧鄭山既係賢能遴選署印之員何至

虧空錢糧此項虧空應將遴委鄭山署理之

上司查明令其分賠嗣後凡委署印應遴選

賢員署理如署印官虧空錢糧著落遴委署

印之督撫布政使分賠如有將虧空錢糧勒

逼接任官收受情由著接任官開列情由竟

報部科該部科即行據實奏聞 追封

皇后之父原任內大臣步軍統領費揚古爲一

等公致祭一次修理墳塋其子孫襲封一等

侯 追贈一等公佟圖賴爲太師一等公佟

國綱佟國維俱爲太傅 封川陝總督年羹

堯爲三等公 調鑲藍旗蒙古副都統滿丕

爲正紅旗滿洲副都統陞正黃旗護軍參領

博爾吞爲鑲藍旗蒙古副都統王府長史林

柱玉爲鑲紅旗漢軍副都統陞西西寧總兵

官王以謙爲鑲白旗漢軍副都統 己丑諭

都察院巡視五城御史每城設滿洲漢軍漢

人三員太多以後只派二員漢軍漢人合派

一員筆帖式亦隨御史更換 以內閣學士

查嗣庭教習庶吉士 旌表河南祥符縣烈

婦盧廷宣妻靳氏守正拒姦被刃殞命給銀

建坊如例○庚寅諭大學士等侍郎王懿在軍前効力已久亦有年紀著原任江西巡撫王企靖前往更換協辦軍需錢糧現今大將軍處事少兵部侍郎渣克旦原任湖北巡撫張連登吏部侍郎王之樞著俱交與年羹堯在布隆吉爾地方墾地築城仍帶原品効力○追封下嫁和碩額駙舜阿顏之和碩溫憲公主爲固倫公主遣官致祭○調刑部右侍郎黃叔琳爲吏部左侍郎陞署陝西甘肅巡撫光祿寺卿盧詢爲刑部右侍郎以甘肅布政使傅德署理甘肅巡撫○調工部右侍郎常壽爲兵部左侍郎陞內閣學士尹泰爲工部右侍郎擢戶部郎中諾敏爲內閣學士署工部侍郎事○辛卯以刑部左侍郎王景曾在禮部侍郎行走擢額外御史馬爾齊哈爲額外內閣學士署刑部侍郎事○陞江南安徽布政使石文焯爲河南巡撫福建按察使董永艾爲江南安徽布政使司布政使○陞

四川按察使高其佩爲光祿寺卿辦理刑部侍郎事○解四川布政使戴鐸任陞吏部郎中羅殷泰爲四川布政使司布政使擢知府銜管甘州同知事彭振翼爲四川按察使司按察使○江西南贛總兵官馬良燦緣事革職調陝西興漢總兵官董玉祥爲江西南贛總兵官陞四川永寧副將吳正安爲陝西興漢總兵官調四川重慶總兵官楊盡信爲陝西西寧總兵官四川松潘總兵官路振揚爲四川重慶總兵官○陞四川化林副將周瑛爲四川松潘總兵官帶兵駐劄木多地方○壬辰

上詣壽皇殿行禮○諭總理事務王大臣等吳爾占所犯之罪甚重朕即位伊始未曾誅戮一人吳爾占又係宗室朕不忍將伊即正典刑著從寬免死從前伊父獲罪於皇考貶其親王之爵伊等怨望肆行誹謗

皇考深知伊等承襲王爵者不知感恩不承襲者又生怨望是以未令承襲伊等希圖王爵互相傾害陷伊宗嗣於死地色亨圖又覬覦王爵各處鑽營卒不能得復生怨望去年在南海子舉止傲慢以致

皇考震怒伊等俱屬無知妄亂不安本分之人不可容留京師經希之子竝吳爾占父子色亨圖父子給假五日料理發往盛京到盛京時無論城內城外令其在五十里內居住伊等屬下佐領交與該旗請旨朕另有處置包衣佐領內令其酌量力能養贍人數帶往其餘交該旗請旨至於一切器用交與伊隨往之家人限兩個月務令收拾清楚起身前去不可潛留一人儻仍來往京師暗通音信彼時朕不得已定按律治罪○調江西布政使許兆麟回京以候補道員石成義爲江西布政使司布政使○癸巳

上詣

皇太后宮問安○諭總理事務王大臣等朕降旨速議事件每至遲延應定限速結議政九卿會議事件亦有待一二人不至以致耽延者嗣後議政九卿會議事件縱使一二人有事不至現在之人即列銜定議其未到者不必列銜經朕查問本人各自陳奏尋議以奉旨速議事件定於五日內完結從之○轉禮部右侍郎景日珍爲左侍郎陞內閣學士蔣廷錫爲禮部右侍郎仍在學士裏行○吏部遵旨議覆直省督撫兼銜查川陝總督統理西安甘肅四川三處事務控制番羌兩江總督統理江蘇安徽江西三處事務地連江海俱應授爲兵部尚書兼都察院右都御史其餘總督及各省巡撫仍照舊例由各部侍郎以及別項官員補授總督者俱改爲兵部右侍郎兼都察院右副都御史由侍郎補授巡撫者亦改爲兵部右侍郎兼都察院右副都御史由學士副都御史及卿員布政使補授

巡撫者俱授爲右副都御史由左僉都御史

補授巡撫者改爲右僉都御史永爲定例從

之○禮部議覆福建巡撫黃國材疏奏琉球

國進貢頭號船內貢使表文及方物一半沉

海所到二號船內葬目應准其返國令補具

表文方物進呈得旨琉球國進貢使臣毛宏

健等所坐頭號船內人員俱衝礁覆沒甚屬

可憫所失表文方物免其補進二號船內所

存方物交與來使帶回仍准作進貢其賞給

之處著察例具奏所賞之物行文該地方官

賞給令其起程○甲午諭內閣禮部

至聖先師孔子道冠古今德參天地樹百王

之模範立萬世之宗師其爲功於天下者至

矣而水源木本積厚流光有開必先克昌厥

後則聖人之祖考宜膺崇厚之褒封所以追

遡前徽不忘所自也粵稽舊制

孔子之父叔梁公於宋真宗時追封啟聖公

自宋以後歷代遵循而叔梁公以上則向來

未加封號亦未奉祀祠庭朕仰體

皇考崇儒重道之盛心敬修崇德報功之典禮

意欲追封五代竝享烝嘗用伸景仰之誠庶

慰羹牆之慕內閣禮部可會同確議具奏

以左翼前鋒統領弘昇爲鑲白旗滿洲都統

○以淳郡王允祐管理左翼四旗都統事務

鑲白旗滿洲副都統納秦管理左翼四旗護

軍統領事務輔國公阿布蘭管理右翼四旗

都統事務鑲紅旗漢軍都統吉當阿管理右

翼四旗護軍統領事務○以都察院左僉都

御史嵇曾筠爲河南鄉試正考官翰林院侍

講文岱爲副考官侍講王傳爲山東鄉試正

考官貴州道御史柯喬年爲副考官內閣學

士查嗣庭爲山西鄉試正考官編修鄂爾奇

爲副考官○乙未諭禮部

陵寢重地凡有關風水者理合嚴禁但有相隔

甚遠本無關礙之地概行設禁則無知小民

以私竊耕種樵採而獲罪者必多前因



陵寢地方柴薪甚艱曾令欽天監會同總管副將詳確相度將遙遠無礙之地令衆樵採此等田土或交皇莊耕種或應作賞給之用著總理事務王大臣會同戶部禮部工部欽天監定議尋議

陵寢風水關係重大謹查自分水嶺起至五靈山頂止俱應禁止採樵現在偷種地畝竝行查出所有寺廟居住僧人於風水遙遠之寺廟酌量安住將草搭窩鋪窰座等項盡行拆毀其當禁止之處各令樹立紅椿交與古北口總兵官竝四關官兵加謹巡查再鳳凰山及分水嶺等處地勢微窪應派官員前往查勘即行填墊從之○戶部議覆雲南巡撫楊名時奏稱兵多米少之昆明等十六府州縣并建川駐扎各兵月糧每年酌給本色三季折色一季其一季折色米共三萬一百五十一石八斗零應照時價借動庫銀折給於兵少米多竝運解最遠之祿豐等十二府州縣

照數折徵解銀還項停四年折徵一次之例應如所請從之○丙申朝鮮國王李昫遣陪臣李枋恭進

聖祖仁皇帝香賞賚如例○戶部議覆貴州巡撫金世揚奏稱清鎮等十四州縣折徵各營兵米共二萬一千七百五十石餘各準地價應徵銀一萬五千四百十五兩餘均勻配搭徵支俱無偏累應如所請從之○刑部議奏臺灣叛賊鄭文遠等家口應分別定罪得旨凡謀反大逆以及謀叛重罪均無可宥按律凌遲處死正犯之祖父子孫兄弟及同居之人期親及伯叔父兄弟之子不限已未析居男十六以上不論篤疾廢疾皆斬但此案事起倉卒遠隔海洋親屬人等有身在臺灣者亦有身在內地者若概從誅戮情堪憫惻除身在臺灣者依律正法外其內地者從寬免死解部給與功臣之家爲奴該督撫逐一詳查應行正法者正法應行解部者解部予

追封一等公額布根額參衛武及妻一品夫人祭葬造墳立碑○丁酉

上詣

壽皇殿行禮○尚純禧公主和碩額駙般迪尚恪靖公主和碩額駙敦多卜多爾濟俱封爲日倫額駙○戶部議覆巡視中城監察御史莫爾洪等疏言伏讀恩詔內開直隸山東河南流民有就食京師不能回籍者著五城清查口數資送回籍毋致失所遵查五城有直

隸山東河南流民共一千二百九十六名口計伊等回籍之遠近每口每程給銀六分老病者加給三分委員管送沿途患病者令地方官留養醫治俟病痊再行轉送仍令各原籍地方官將收到流民作何安插之處彙疏題報至所給流民盤費應撥何項錢糧候部議撥等語查五城現有奉旨發銀一萬兩以備賑濟之項應於此內動用從之○達賴喇嘛遣使達旺堪布等表進方物優賚之○戊

戌

仁壽皇太后聖壽節禮部題請諸王大臣文武官員應齊集行慶賀禮筵宴暫停一次得旨

聖誕行禮朕再三奏請奉

懿旨免行禮○己亥

上詣

皇太后宮問安○諭理藩院追勦厄魯特羅卜藏錫拉布等之王貝勒貝子公台吉大臣侍衛暨兵丁等一聞厄魯特潛遁俱各奮力追勦賊衆斬獲無遺伊等皆因感戴

聖祖皇考仁恩爲朕抒誠効力朕已深悉伊等忠誠甚爲欣悅凡効力之人著查明具奏朕將特加恩賚將此旨繕寫通行傳諭至緝賊身亡受傷之人一併查奏○復輔國公普照原爵○以署吏部右侍郎李紱署都察院左副都御史○擢理藩院郎中鄂賴爲內閣學士兼禮部侍郎○前往西藏辦事○陞正藍旗護軍統領希爾根爲左翼前鋒統領鑲黃旗

滿洲副都統宗室汝福爲正藍旗護軍統領  
以正白旗護軍統領覺羅涂拉爲額外護軍  
統領陞鑲白旗滿洲副都統納秦爲正白旗  
護軍統領○正黃旗滿洲副都統赫世亨緣  
事革退以吏部侍郎勒什布爲正黃旗滿洲  
副都統○兵部遵旨議奏古北口總兵官現  
經改爲提督其中軍遊擊應改爲中軍參將  
馬蘭口副將改爲總兵官其中軍應添設遊  
擊一員從之○旌表廣東曲江縣烈婦周彬  
妻楊氏遇兇不辱被毆殞命給銀建坊如例  
○庚子諭禮部明季帝王皆不親送梓宮故  
令親王大臣奉主回京朕既親往若不躬奉  
神主於心何安俟  
山陵事畢點  
主禮成朕親奉  
皇考神主回京途間如何分站及先還預備奉  
迎之處一併詳議具奏尋議  
聖祖仁皇帝梓宮奉安

地宮禮畢應設黃輿於  
享殿丹陛上  
享殿內設安奉  
神主寶座俟點  
主禮成內府官恭捧  
神主跪安寶座  
皇上恭捧奉安黃輿內乘輿隨後行途次按程  
設置黃幄仍朝夕致奠  
升祔前一日  
皇上還宮恭候奉迎  
神主入  
太廟行  
升祔禮得旨是依議○以一等侍衛來保署內  
務府總管○鑲藍旗蒙古副都統常齡緣事  
革退陞正紅旗護軍參領馬喇爲鑲藍旗蒙  
古副都統○辛丑諭戶部陝省自軍興以來  
大兵駐劄運送糧餉供支草豆無一不需民  
力

皇考每爲軫念今當大沛恩膏子惠元元所有康熙六十年以前陝西全省除借給籽種著該督撫查明定議分年帶徵外其餘凡有民屯衛所實在未完銀米豆草悉予蠲免儻有不肖官吏以虧空捏稱民欠濫邀曠典者一經發覺罪在不赦該部作速行文毋得遲留○以戶部左侍郎李周望內閣學士查嗣庭吳士玉都察院左副都御史李紱俱充經筵講官○江南江蘇巡撫吳存禮緣事革職以江南京口將軍何天培署理江蘇巡撫江南京口右翼副都統張天植署理京口將軍○解江蘇布政使李世仁任擢內務府員外郎鄂爾泰爲江南江蘇布政使司布政使以太僕寺少卿黃叔琬爲福建布政使司布政使調湖南布政使宋致來京以江南學政翰林院侍講學士鄭任鑰爲湖南布政使司布政使原任布政使劉廷琛爲廣西布政使司布政使○移奉天錦州府通判駐義州義州巡

檢駐天橋廠從奉天府府尹鄒汝魯請也○壬寅。

上詣

皇太后宮問安○陞都察院左副都御史巴泰爲吏部左侍郎以翰林院侍讀學士史貽直署理吏部右侍郎○陞廣西蒼梧道遲維臺爲湖南按察使司按察使○癸卯以

聖祖仁皇帝梓宮移送

景陵遣官告祭

天

地

太廟

社稷○解領侍衛內大臣德爾金任在都統處行走以輔國公普照署理領侍衛內大臣○予故河道總督陳鵬年祭葬諡恪勤○予故浙江處州總兵官薛士傑祭葬如例○甲辰聖祖仁皇帝梓宮將發引

上恭行祖奠禮攀戀哀切號慟失聲○加都察

院左都御史朱軾。吏部尚書銜○以正白旗漢軍副都統哈達署鑲白旗護軍統領○戶部議覆。原任江蘇巡撫吳存禮疏言。江蘇等屬并蘇太等衛康熙三十三年以前民欠各項錢糧與蠲免歷年積欠之恩旨相符。應請銷結。查該撫請免銀內有蘆課學租等項與民屯地丁不同。未便概予豁免。得旨。此民欠地丁等項銀一百三十一萬餘兩。內蘆課等項銀九萬八百餘兩。雖非恩詔內。應行蠲免之項。但歷年最久。儻行催徵。窮民必致受累。著一併豁免○乙己。

上詣

壽皇殿行禮○晉封輔國公阿布蘭為多羅貝勒○陞翰林院侍讀學士史貽直為內閣學士兼禮部侍郎。仍署理吏部右侍郎○封厄魯特和碩額駙色卜騰旺布為多羅貝勒。輔國公多爾濟色卜騰為固山貝子○免山東壽張等五州縣衛。康熙六十一年分水災額。

賦有差○旌表江南上元縣節婦李順妻林氏。夫亡守節。絕粒殞命。吳縣貞女戴氏。聞夫身故。自縊捐軀。各給銀建坊如例○丙午。聖祖仁皇帝梓宮發引。

上詣

壽皇殿望見

殿門即哀慟不勝。行奠獻禮。擗踊悲哀。羣臣皆伏地痛哭禮畢。

上攀戀

梓宮哀號良久。羣臣環跪固請。

上悲慟不止。隨恭奉

梓宮升

大昇輿

上步從。哭不停聲。和碩親王以下滿漢一品大臣以上。齊集殿門外跪送。滿漢二三品大臣。齊集景山東門外跪送。滿漢四品官員。齊集朝陽門外跪送。不隨往。陵上各官俱步從。至朝陽門關外跪送。及

梓宮至羣臣感念

先皇高厚洪恩無不瞻戀悲痛號慟之聲震徹遠近

皇太后率

聖祖妃嬪及

皇后妃嬪等由別道行先至

蘆殿

上預詣

蘆殿躬親詳視恭俟

梓宮至哭泣跪迎於黃布城北門外奉安

梓宮於

蘆殿行夕奠禮自是每日黎明

蘆殿行朝奠禮畢跪送

梓宮啟行出黃布城南門

上先由別道至前途

蘆殿行夕奠禮如前儀每日早晚詣

皇太后行宮問安

聖躬勞瘁未嘗稍間沿途哀慟悲不自勝道路

所經遠近村莊士農工賈白叟黃童仰沐

聖祖仁皇帝六十年深仁厚澤皆扶攜奔走遙望

梓宮叩顙哭泣

上益增悲慟云○是日駐蹕楊家聞○丁未

上奉

聖祖仁皇帝梓宮啟行是日駐蹕小新莊之東

○戊申

上奉

聖祖仁皇帝梓宮啟行是日駐蹕呂家莊之東

○己酉

上奉

聖祖仁皇帝梓宮啟行是日駐蹕薊州城南○

諭八旗都統等私行科派殊非善事貧乏兵

丁所恃以爲生者惟在錢糧嗣後各旗佐領

下一應公中事務概不許私自派取若有擅

行私派者即以作弊治罪○以詹事府詹事

伊都立署內閣學士○陞黑龍江協領烏察

拉爲墨爾根副都統○免山東東平歷城等四十六州縣濟南等三衛康熙六十年分旱災額賦有差

大清世宗敬天昌運建中表正文武英明寬仁信毅大孝至誠憲皇帝實錄卷之五

大清世宗敬天昌運建中表正文武英明寬仁信毅大孝至誠憲皇帝實錄卷之六

監修總裁官光祿大夫經筵講官太僕議政大臣保和殿大學士兼兵部尚書總理兵部事務等伯加十五級臣鄂爾泰  
總裁官光祿大夫經筵講官起居注太僕卿太子太保保和殿大學士兼戶部尚書何爾琿吏部尚書翰林院掌院

事三等伯加十三級臣張廷玉光祿大夫經筵講官起居注太僕卿太子太保議政大臣武英殿大學士兼工部尚書仍兼管

翰林院掌院事加二級臣福敏光祿大夫經筵講官太子太保東閣大學士兼禮部尚書加六級臣徐永光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺等臣三奏等奉

敕修

雍正元年癸卯夏四月庚戌朔享

太廟遣貝勒阿布蘭行禮○

上奉

聖祖仁皇帝梓宮啟行是日駐蹕梁家莊○河道總督齊蘇勒疏言河南黃河北岸陽武祥符封邱一帶有岔流三道逼近隄岸遠行五十餘里始歸正河南岸青佛寺地方有支河一道沿隄下注四十餘里方與正河交會若不急爲截斷恐被刷寬深傷及大隄現在築壩堵斷支河并請接築壩尾子隄九千二百

八十八丈。隔隄七百八十丈。以制旁流。從之。

○予故河南河北鎮總兵官漢都祭葬如例。

○辛亥。

聖祖仁皇帝梓宮至。

景陵。

上先率扈從王以下。文武各官恭謁。

暫安奉殿。行禮奠酒。舉哀。次詣。

孝陵。

孝東陵。

實錄卷六

二

仁孝皇后。

孝昭皇后。

孝懿皇后陵。行禮如前儀畢。隨詣。

景陵碑亭南跪迎。

梓宮。

上號泣不止。隨行各官。無不感慟。聲震林木。

上候。

梓宮過。步行以從。親視奉安於。

享殿。奠酒。舉哀。悲慟良久。始回行宮。是日。

皇太后率。

皇后及貴妃等謁。

陵。行禮。

上以。

梓宮安奉。

山陵享殿。大禮克盡。而思慕哀慟。不能自己。降。

旨欲留駐。

山陵數日。諸王大臣懇請回鑾。再三陳奏。乃允。

之。○諭誠親王允祉曰。朕送。

實錄卷六

二

皇考梓宮至。

陵寢。不忍遽去。欲留數日。以盡朕心。諸王大臣。

勸奏懇切。明日祭畢。朕將回鑾。王暫留數日。

將。

陵寢。一應典禮酌定。著諸人俱照定例遵行。再。

貝子允禩著留。

陵寢附近湯泉居住。俾得於大祀之日。行禮盡。

心。○壬子。行奉安。

享殿禮。



上慟哭哀號。班令扈從諸舊臣入享殿大門內行禮祭畢。

上依戀

梓宮。伏地慟哭。隨侍諸臣跪請止哀。勸奏再三。

出至

殿門外。仍依戀跪哭。諸臣環跪固請。至

隆恩門。仍回望哀慟。諸臣又復跪勸。

上始出

隆恩門。瞻望久之。不忍回鑾。諸臣復懇請再四。

上始命移輿。趨過燎所之南。然後升輦。既即路。

尚顧望洒淚云。○諭禮部。

景陵辦理修飾甚好。十七阿哥孫渣齊薩爾納

甚屬盡心。敬謹効力。十七阿哥封為郡王。孫

渣齊薩爾納。從優議叙。○是日

上回鑾。駐蹕豪門村南。○癸丑。

上駐蹕舊白河村南。○雲南提督張谷正以老

疾乞休。慰留之。○甲寅。

上駐蹕劉格莊西。○乙卯。

上回宮詣

皇太后宮問安。○諭理藩院。爾衙門人員來往

蒙古地方者。聞有不肖之徒。肆行無禮。勒索

陵虐。夫外藩之與天朝。不但扎薩克王。即台

吉亦係賓客。豈可令領催等卑賤之人。肆其

欺陵。爾衙門嚴行申禁。詳定條例。俾嗣後永

遠遵行。○以都察院左都御史朱軾為順天

鄉試正考官。禮部尚書張廷玉為副考官。

兩廣總督楊琳題。廣西太平府羅陽縣土知

縣黃世康。故請以其弟黃世瓚承襲。下部知

之。○予故鑲藍旗護軍統領杭奇祭葬如例。

○丙辰。兩廣總督楊琳等摺奏。新會縣盜首

張祖珠等。聚眾搶掠。已遣兵擒獲。奉

上諭。朕知粵東兵馬懦弱。不堪大盜。竟敢與地

方官公然抗衡。武備不强。賊何能盡。如欲勒

盡山賊。必以操練兵馬為先。粵省此一事。最

為緊要。爾等共膺封疆。重寄。不可偷安。亟宜

加意振作。方能改革舊習。且朕觀天下督標

撫標之兵尤屬不堪。率皆不以爲事。彼此怠弛。不肯同心合力。整頓料理。而往往以避嫌藉爲口實。若以標下軍卒視爲督撫之私兵。天下有是理乎。各省督撫。自茲各當奮勉。惕勵操習。以勤賞罰。以公何慮。營伍之不整肅耶。○命怡親王允祥總理戶部事務。○命察八旗年老人員有獨子在軍前者。奏聞。○戊午。總理事務王大臣等以聖祖仁皇帝梓宮奉安。

山陵大禮已成。奏請

上御門聽政。得旨。諸王大臣所奏雖是。但

皇考梓宮尚在

享殿安奉。朕今即臨御正門理事。心實不忍。念皇考付託重大。節養朕身。一切禮儀多有未盡。每以天下萬民事關緊要。勉強照常辦理。亦無遽誤。臨御正門理事。俟

皇考梓宮奉安

地宮之後。再爲舉行。己未

上詣

皇太后宮問安。○諭莊親王允祿等。漢軍叅領員缺。每以八旗滿洲蒙古人員補授。則該旗缺出。反致乏人。漢軍旗下。亦有可用之人。嗣後漢軍叅領缺出。即將漢軍旗下人員具奏引見。○諭戶部巡視長蘆鹽課監察御史。旣爲商人等代還所欠銀二萬兩。而商人又欲自欠。自還。每年出銀一萬兩。必係出差官員勒派商人。未必實出本心。須特遣大臣一員。將運使段如蕙并衆商人等。詳悉查明。定議具奏。毋致有累商人。○諭兵部。官馬出牧。派遣部員。有何用處。伊等有在家不去者。有中途而回者。亦有到彼數日而回者。並無効力之處。不過給伊等半年假耳。不如不派。伊等爲善。著總理事務王大臣議奏。尋議收放官馬所派部員。實係並無効力之處。相應停其派遣。其缺俱派旗員前往。從之。○庚申。諸王大臣復援據典禮。再三懇請。

上御門聽政乃允之。以鎮國公德普爲宗人府右宗人。山西太原總兵官金國正患病解任。調直隸天津總兵官袁立相爲山西太原總兵官。陞直隸大名副將韓良輔爲直隸天津總兵官。辛酉。封怡親王允祥子弘昌爲固山貝子。調正白旗滿洲副都統大成爲鑲黃旗滿洲副都統。總理事務王大臣等會同禮部兵部遵旨議覆。八旗滿洲人等設繙譯技勇之科。嗣後將滿洲蒙古能繙譯者。三年之內考取秀才二次。舉人一次。進士一次。其所取額數。臨期視人數多寡請旨欽定。再照漢軍例考取武秀才四十名。舉人二十名。進士四名。從之。撤甘州侍衛火器營官員兵丁。令伯欽拜率領回京。壬戌。諭內閣。黑龍江船廠等處生齒日繁。而各處之人聚彼貿易者又甚衆。皆屬地方官應行辦理之事。今祇設武弁人員。致有於例不合之處。此二處應於御史及部院賢能官員內酌派

一二員到彼料理。其差滿更換年限著議奏。尋議嗣後令各衙門保送滿漢科道部院賢能官員。黑龍江差滿官一員。船廠差滿漢官各一員。每年更換從之。又諭。陝省數年以來軍需錢糧至今尚未奏銷。皆由承辦之人不顧國帑。惟圖利己。恣意貪婪之所致也。猝令奏銷。即互相推諉。遲延日月。設法掩飾。若使事事如此。效尤成風。則承辦錢糧之人安知畏懼乎。蘭州藩庫軍需奏銷。仍著折爾金造冊。西寧大兵處巡撫辦理之錢糧。仍著噶什圖造冊。其原造冊官員該部查明奏聞。發往噶什圖處著噶什圖帶往西寧清查銷算。以輔國公普照署鑲藍旗護軍統領。以陝西寧夏總兵官范時捷署理陝西西安巡撫。陞陝西漢中副將楊起元爲陝西寧夏總兵官。仍署理陝西甘州提督。癸亥。諭總理事務王大臣等。朕臨御以來。時以天下蒼生爲念。凡自外省來京之員。各處雨暘豐歉必

面加詳詢。蓋欲周知民隱也。今差往致祭華  
嶽侍讀學士田文鏡回京。朕詢彼經過地方  
情形與百姓生理。據奏山西平定州壽陽縣  
徐溝縣祁縣等處雨澤歉少。民間生計維艱。  
汾州府屬地方得雨亦未霑足。地方官現在  
徵比錢糧。夫巡撫以撫綏地方愛養百姓爲  
職。今平定壽陽等處黎民饑饉。並未奏請賑  
濟。緩徵反行催科。小民何以存濟。此皆因伊  
等去年曾奏報得雨。今欲掩飾前言。甚屬不  
合。巡撫德音布政使森圖著交該部察議。仍  
即命侍讀學士田文鏡會同巡撫德音率領  
地方官員將平定等四州縣饑民速行賑濟。  
務使恩澤實霑。撫養得所。毋羈時日。以致羣  
黎失業。爾等即傳諭遵行。諭吏部引見月  
官衣服頗甚整齊。聞貧窘之員有賃覓衣服  
者。朕之觀人。並不在于服飾也。嗣後引見官  
員各量已力。尋常潔淨衣服亦可引見。勿圖  
鮮華。強爲備辦。至於侍衛等只務被服華美。

亦當量力服用。茲著曉諭傳示。命各部院  
滿漢堂官將郎中員外主事等員十人內保  
舉一等人一人二等人一人列名具奏。甲子奉  
聖祖仁皇帝御容敬供於

壽皇殿

上親詣行禮。感念悲愴。瞻顧依戀。儼如

神爽式憑云。

上詣

皇太后宮問安。諭直隸各省督撫國家敦勵

風俗。首重賢良。舉髦士以勸秀民。實爲政教  
之大端。凡封疆大吏宜共體此意。廣詢博訪。  
不可視爲具文。漫不加察也。前所頒恩詔內  
有每府州縣衛各舉孝廉方正。暫賜以六品  
頂帶榮身。以備召用一條。距今數月。未有疏  
聞。豈通都大邑之中。海澨山陬之遠。遂無潛  
修砥操克稱俊乂。可應詔旨者歟。誠恐有司  
怠於採訪。雖有端方之品。無由上達。殊負朕  
殷殷延攬之至意。特著直省各督撫速遵前

詔確訪所屬果有行誼篤實素爲鄉黨所推者即列名具奏毋得隱蔽及濫引塞責直隸巡撫李維鈞奏原任署撫趙之垣應發回原籍令川陝督臣清查伊叔趙弘燮家產以完帑項得旨

皇考御極六十餘年用人之道嘉善獎能不吝爵賞宥罪赦過率多矜全如勇畧將軍趙良棟乃心王室忠勇素著始終宣力

皇考待以隆恩異數超越等倫其子趙弘燮承襲餘廕位任封疆不思竭力報稱惟圖利偷安以致事務廢弛庫帑虧空

皇考不忍遽加罷斥寵遇如初格外優容冀其改悔迨至病故又令伊姪趙之垣往署撫篆爲之料理一切未完事件蓋不欲其行事一朝破露遂罹國法有損先人名節耳

皇考之所以待功臣者至於如此亦云厚矣朕繼承大統即洞悉趙之垣暗昧無知萬難勝任然猶仰體

皇考深仁厚澤曲加優庇面飭訓諭數次乃趙之垣怙終不悛昧於大義具摺捐銀三十萬兩始知前此所聞勒要屬官銀兩進上之言並非虛語試問此銀出於何所直隸全省數十萬民生係於巡撫一人之賢否奉職無狀貢納財物謂可邀免有是理乎畿輔重地貽誤匪輕特令解任准其暫回原籍仍著速來完補伊叔任內虧空俟其完日另降諭旨猶是

皇考厚待功臣之意也趙氏子孫忍負國恩皇考與朕寧忍負功臣後裔耶該部速將此諭行文川陝總督出示曉諭使咸知朕意○兵部議覆川陝總督年羹堯奏打箭爐迤西臺土司加克瓦斯之兵請照內地兵丁給與鹽菜銀兩應如所請從之○鑾儀衛鑾儀使師懿德以疾請解任允之○乙丑諭翰林院自古帝王臨朝施政右史記言左史記動蓋欲使一舉動一出言之微無不可著爲法則垂

範百世也。

皇考聖祖仁皇帝英年踐阼。即設日講起居注官。於詞臣中擇其才品優長者。以原官充補。鉅典茂昭。度越前代。誠為聖帝哲王之盛事。御極六十一年。紹精一執中之統。勵敬

天勤民之心。文謨武烈。經緯萬幾。盛德日新。大業鴻顯。天下臣民。仰瞻至治。不啻日月麗天。江河行地。莫不敬信悅服。記注之臣。美不勝書。

皇考聖祖仁皇帝謙德彌光。聖不自聖。惟恐史官或多溢美之詞。故康熙五十六年以後。裁省記注。祇令翰林五員。於理事時輪侍班行。凡有重務要旨。仍令內閣諸臣記而存之。意至周深也。茲朕繼承大統。夙夜兢業。日昃不遑。思所以上繼。

皇考功德之隆。下致四海晏安之治。顧惟涼德。深懼負荷之難。今御門聽政之初。益當寅畏。小心綜理庶事。咸期舉措允宜。簪筆侍臣。何

可闕歟。當酌復舊章。於朕視朝臨御祭祀壇

廟之時。令滿漢講官各二人侍班。不獨記載諭旨政務。或朕有一言之過。一事之失。皆必據實書諸簡策。朕用以自警。冀寡悔尤。庶幾凜淵冰之懷。以致久安。慎樞機之動。以圖長治。其仍復日講起居注官。如康熙五十六年以前故事。爾衙門即遵旨行。諭總理事務王大臣等。前諭各衙門司官遷轉。將所掌案卷新舊交盤。說堂存案。向日部中案卷面書堂司官姓名。下註題押。其接縫處或標封字。或用司印。尚可私竊增刪。嗣後皆用堂印。有添寫處亦用堂印。並設立印簿。開明年月用印數目及用印司官姓名。如此則弊端可杜。而卷案亦按簿可查。傳諭各衙門一體遵行。諭理藩院厄魯特垂木丕爾等逃遁。蒙古人遇之。俱各努力追擒。伊等感激。皇考覆育深恩。竭誠仰報。朕覽奏章為之墮淚。

嘉歎不已。將此旨繕寫發與達爾。令將効力人等查明具奏。毋使一人遺漏。朕將加以特恩。○封十七阿哥允禮爲多羅果郡王。○丙寅。

孝端文皇后忌辰。遣官祭。

昭陵。○以兵部右侍郎管翰林院掌院學士事。阿克敦。刑部尚書管翰林院掌院學士事。勵廷儀。詹事府詹事伊都立。翰林院侍講學士岳色。冷天相。左庶子常保。何國宗。侍讀王國棟。侍講王傳。吳襄。右中允張廷璐。編修劉於義。任蘭枝。吳家驤。檢討覺羅達泰。德齡。李鍾義。鞏建豐。俱充日講起居注官。○實授來保爲內務府總管。○吏部議覆。國子監祭酒伊爾登等奏。監丞助教博士學正學錄等員。各有司教之職。請停止捐納。專用正途出身之教授學正。教諭陞補。應如所請。從之。○丁卯。上始御乾清門聽政。追念聖祖仁皇帝垂統貽謀。自升座以至竣事。

天顏慘戚。諸臣咸頌純孝云。

上詣

皇太后宮問安。○諭滿漢文武大臣官員等朋黨最爲惡習。明季各立門戶。互相陷害。此風至今未息。惟我

皇考允執厥中。至仁在宥。各與保全。不曾戮及一人。爾諸大臣內。不無立黨營私者。即宗室中。亦或有之。爾等若以向蒙

皇考寬大。幸免罪愆。仍蹈前轍。致干國法。昏昧極矣。豈但滿洲。即漢人亦與一家骨肉。無異。何苦波累及之。夫人之性情。各有所向。豈有與通國之人。無不投契之理。但辦理公事。不可存私。今諸大臣俱在朕前。朕居藩邸。曾與爾等議及私事。密相往來乎。

皇考知朕中立不倚。是以命朕繼承大統。朕自思之。亦惟朕方能不戮一人。無一人不保全耳。朕非獨因

皇考付託之重。實感

皇考四十餘年教養深恩。委曲周至。言念

弘慈。昊天罔極。此朋黨之習。爾諸大臣有則痛

改前非。無則永以爲戒。爾等當思

皇考數十年寬厚之恩。亦當共體朕委曲保全

至意。若仍怙惡不悛。朕雖欲勉強仰體

皇考聖衷。力爲寬宥。豈可得乎。夫朕言是。即宜

遵行。朕言非。即宜陳奏。朕未嘗拒也。朕屢詔

求言。雖小臣欲進言者。咸得上達。每多召入

屏去左右。令其面陳。爾諸大臣非不得奏之

人。乃隱匿不奏。退有後言。某人不當用。某事

不當行。誠小人之惡習也。夫朕所用之人。所

行之事。如有不當。爾等身爲大臣。何難陳奏。

所言果是。朕即用之。如不奏而但肆譏議。設

有人詰以不奏之故。能無愧於心耶。賢者朕

之所好。爾等即宜好之。不肖者朕之所惡。爾

等即宜惡之。乃或其人爲朕所信任。盡心竭

力於國家之事。則反謂其專擅作威。如此人

孰肯效其所爲。自取誹謗乎。其或唯諾成風。

諸事不問。但思自便其身。爲己則得矣。於國

何補。夫君親大義也。譬若父之讐。則與之相

愛。父之愛。則與之爲讐。爲人子者。有是理乎。

要之以君之好惡。爲好惡。然後人人知改其

惡而遷於善。君臣一心。國之福也。傳之萬世。

亦有令名。爾等其祇承朕諭。○諭大學士等。

爾等皆

皇考簡任者。舊大臣。論年齒。雖與

皇考相等。若經歷事務。豈能仰及

皇考萬一。

皇考實足爲爾等之師。是以爾等但能奉遵

諭旨者。斯稱善已。朕自幼未曾理事。

皇考命朕紹承大統。朕深念付託之重。凡朕所

降諭旨。爾等以爲是。則曰是。以爲非。則即陳

奏。勿得面從。雖封還硃批。諭旨。朕亦深喜斷

不譴責。若但隨聲附和。致自取辱。非朕所望

也。○諭吏部。戶部。兵部。各省給發駐防官兵

米穀草豆等項。價值不一。除已有定額。省分



照常給發外其餘未曾定額省分多寡不符理應將本省歷年給發之價酌處其中畫一定議價值一定便於遵行如遇年豐價平稍有贏餘於官兵亦屬有益僅歲歉價昂該督撫據實陳奏朕自加恩○諭領侍衛內大臣八旗大臣等國家武備關係重大爾等皆有訓兵責任昔

皇考常躬率士卒寓訓練於較獵之中

皇考騎射超倫士卒無不欽服各相鼓勵豈非爾等訓練所致朕不能企及

皇考則訓練之事惟爾等是賴但訓練士卒有實心操習者亦有虛應故事者若爾等按期較射以圖塞責不過閑談飲茶而散則不但徒勞軍士爾等亦徒多往返何益之有此皆朕居藩邸時素所深知者爾等能盡職朕必全爾等顏面爾等亦宜全朕繼述之孝思嗣後爾等務宜實心訓練比來軍士生計稍艱皇考教養六十餘年

思賚頻施無不周備以天下之正供贍養兵丁如此外再欲加增錢糧亦恐難給兵丁生計之艱其故雖多大抵因奢侈所致爾等皆管轄兵丁之人應將平素守分者加以優獎奢侈者加以訓飭則自知懲勸矣此事一時亦難移易朕與爾等約以三年爲期如三年後仍不能改爾等之罪不止罷黜且一經罷黜勿希復用彼時勿更怨望○禮部遵旨議覆孔子先世五代俱應封公爵以昭隆典得旨五倫爲百行之本天地君親師人所宜重而天地君親之義又賴師教以明自古師道無過於

孔子誠首出之聖也我

皇考崇儒重道超軼千古凡尊崇

孔子典禮無不備至朕蒙

皇考教育自幼讀書心切景仰欲再加尊崇更無可增之處故敕部追封

孔子先世五代今部議封公上考歷代帝王

皆有尊崇之典。唐明皇封

孔子爲文宣王。宋真宗加封至聖文宣王。封

孔子父叔梁紇爲齊國公元加封

孔子爲大成至聖文宣王。加封齊國公爲啟

聖王。至明嘉靖時猶以王係臣爵。改稱爲

至聖先師孔子。改啟聖王爲啟聖公。王公雖

同屬尊稱。朕意以爲王爵較尊。

孔子五世應否封王之處。著詢問諸大臣具

奏。○直隸巡撫李維鈞奏言。修築太行等堤

銀兩。請公同捐助。得旨。修築甄家莊等四處

漫決堤工。用過銀兩。俱係緊要工程。動用。不

必捐補。著以正項錢糧奏銷。○江寧將軍雍

吉納奏言。江寧標下步兵七百名。不敷巡察

請再添一百名。從之。○免山東德州章邱等

四十一州縣臨清等三衛。康熙六十年分旱

災額賦有差。○戊辰禮部議。朝鮮國冬至元

旦表文。卅年貢仍照舊例行。至恭進。

萬壽表文貢物。應於九月內來京。得旨。朝鮮國

所進萬壽表文貢物。不必於九月內來京。著

仍照例十二月內與年貢同進。○宗人府左

宗人鎮國公登塞。以年老乞休。允之。○以故

三等阿思哈尼哈番碩色子常祿襲職。○除

山西陝西教坊樂籍。改業爲良民。○己巳。調

正藍旗蒙古副都統佛倫爲正白旗滿洲副

都統。陞鑲白旗護軍叅領哈濟噶爾爲正藍

旗蒙古副都統。正黃旗護軍叅領李桂爲鑲

白旗滿洲副都統。○庚午。予故一等公追贈

太傅佟國維諡端純。○辛未。諭宗人府分給

廉親王怡親王之莊田財物等項。查有少於

誠親王之處。著補給。果郡王理郡王除所分

旗分佐領包衣佐領人員外。其莊田財物等

項俱查照敦郡王之數分給。履郡王之莊田

財物等項。查有少於敦郡王之數。亦著補給

○復准鄉會試錄。照例刊刻進呈。○壬申。

上詣

皇太后宮問安。○諭都統拉錫追擒逃遁厄魯

特之効力人員已諭令議叙其收管未曾逃遁厄魯特之人員亦著查明議叙（癸酉吏部議奏山西巡撫德音布政使森圖隱匿地方災荒既不奏報又不停徵應革職得旨遣祭華嶽之侍讀學士田文鏡到日朕詢彼經過地方情形與百姓生理據奏山西平定州等處民間生計維艱地方官現在徵比錢糧是以即遣田文鏡速往賑濟且聞年羹堯來京之時曾囑德音查明歉收州縣奏請緩徵至今並未啟奏巡撫係封疆大吏一聞百姓饑饉即當陳奏德音既不奏聞反行催科徵納其不能勝巡撫之任於此可見德音從寬免革職著來京在學士任効力行走其員缺著內閣學士諾岷補授布政使森圖人不及著革退在驍騎參領効力行走其員缺著順天府府丞連肖先補授（甲戌正黃旗滿洲副都統納爾賽年老休致以散秩大臣永壽為正黃旗滿洲副都統）追封故阿達哈哈

番佟養真為一等公加贈太師諡忠烈 乙亥

上詰

皇太后宮問安○諭戶部朕臨御以來宵旰憂勤凡有益於民生者無不廣為籌度因念國家承平日久生齒殷繁地土所出僅可贍給偶遇荒歉民食維艱將來戶口日滋何以為業惟開墾一事於百姓最有裨益但向來開墾之弊自州縣以至督撫俱需索陋規致墾荒之費浮於買價百姓畏縮不前往往膏腴荒棄豈不可惜嗣後各省凡有可墾之處聽民相度地宜自墾自報地方官不得勒索胥吏亦不得阻撓至陞科之例水田仍以六年起科旱田以十年起科著著為定例其府州縣官能勸諭百姓開墾地畝多者准令議叙督撫大吏能督率各屬開墾地畝多者亦准議叙務使野無曠土家給人足以副朕富民阜俗之意該部即遵諭行 諭都統拉錫嗣

後遊牧處八旗察哈爾來京引見人員內有軍前効力曾經

皇考識認者爾預先奏聞朕加恩賞賜○命卓異官員留京以應陞之缺用○戶部議奏公庫銀兩應照常借與官兵得旨此項支借銀兩原欲使官兵有所裨益其果否支借及該管官員有無指名侵用情弊現在庫內存數若干遣副都御史牛鈕給事中鄂托拜速往查核再出征官兵支借庫銀亦有已經豁免者一併查明○丙子諭宗人府淳郡王數年以來安分守己敬順小心朕御極後尤竭誠盡敬於

皇考大事一應典禮不顧殘廢黽勉曲盡殊屬可嘉著晉封親王○免江南海州桃源等十州縣徐州一衛康熙六十一年分旱災額賦有差○丁丑

孝陵著草生馬蘭口總兵官范時繹奏聞恭進上命傳視廷臣無不驚喜贊頌以爲奇瑞江

南安徽巡撫李成龍摺奏二麥豐收分數奉上諭雨水年歲及吏治民生總宜據實上達不可以寬慰聖懷恐煩睿慮爲辭粉飾欺蔽而託名忠順君臣本爲一體中外原無間隔要當彼此披露毫不隱諱上下同心和氣充滿則自能感召

天庥百物阜成萬姓蒙福矣○命各省總兵官俱以摺子奏事○給戶部尚書孫渣齊內務府郎中薩爾納拖沙喇哈番世職○戊寅命發內庫銀九十萬兩交與諸王大臣分派八旗及包衣三旗令屬下官員營運生息以備各旗護軍校驍騎校前鋒護軍領催馬甲步兵等有喜喪之事俾得永遠霑恩其應給銀數自二十兩至四兩止令叅領以下至各族長查明具保該旗都統咨行內務府領取無得虛冒有不敷者酌量加增於二年正月爲始○命各部院衙門堂官於筆帖式內每十員保舉一等人二等人

大清世宗敬天昌運建中表正文武英明寬仁  
信毅大孝至誠憲皇帝實錄卷之六

大清世宗敬天昌運建中表正文武英明寬仁  
信毅大孝至誠憲皇帝實錄卷之七

監修總纂官光祿大夫正議大夫翰林院大學士兼兵部尚書總理兵部事務等伯加十五級

總裁官光祿大夫經筵日講官起居注太僕寺卿翰林院大學士兼兵部尚書總理兵部事務等伯加十五級

第三等伯加十五級

翰林院掌院事加二級

經筵講官議大夫正議大夫經筵講官太僕寺卿翰林院大學士兼兵部尚書總理兵部事務等伯加十五級

敕修

雍正元年癸卯五月己卯朔

實錄卷七

上詣

皇太后宮問安大學士等奏言

孝陵新產著草修葺尋許外澤中堅清芬遠布

皆由

世祖

聖祖功德之隆

皇上孝治之感請宣付史館得旨

孝陵新產著草皆由

世祖

聖祖功德隆盛所致。非朕孝思所能感格。諸臣陳奏剴切。著照所請行。○禮部等衙門奏請御殿受朝。諭曰。朕原欲週年之後。始陞御正殿。今諸臣援引古典。合詞懇奏。朕限於禮制。勉從所請。其奏樂賜茶。著停止。○擢內務府郎中薩爾納爲都察院左副都御史。辦理工部侍郎事務。實授馬爾齊哈爲內閣學士兼禮部侍郎。○庚辰。轉宗人府右宗人鎮國公德普爲左宗人。以輔國公訥圖爲右宗人。○命都統宗室西倫圖。揀選西寧綠旗烏鎗兵五百名。并柴旦木兵丁。帶往察罕托羅海地方駐劄。○兵部議覆雲貴總督高其倬奏。鶴麗永北等處。取藏兵丁。倒斃馬匹。懇免賠補。應無庸議。得旨。兵丁遠馳異域。甚屬勞苦。且滿洲綠旗。俱當一視。其倒斃馬匹。若仍令伊等賠補。朕心不忍。著悉行豁免。○免江南壽州合肥等十四州縣。廬州等六衛。康熙六十一年分。旱災額賦有差。○辛巳。

仁孝皇后忌辰。遣官祭。

陵。○壬午。加武英殿大學士王碩齡爲太子太傅。○議敘追捕厄魯特羅卜臧錫拉布等。并收管未曾逃遁厄魯特人員功。封喀爾喀貝勒旺扎爾。爲多羅郡王。公策布登策木楚克納木扎爾。爲多羅貝勒。追贈陣亡蘇尼特台吉進達克。爲輔國公。給察哈爾副總管宮額孫。拜他喇布勒哈番世職。護軍校多爾濟喀爾喀塔布囊巴賽。寨桑喀爾詹巴圖爾。拖沙喇哈番世職。并兵等各陞賞賜。卹有差。其收管未曾逃遁厄魯特之一等侍衛色卜騰。藍翎侍衛納木扎。俱加賞賚。○癸未。上御太和殿視朝。不作樂。文武陞轉各官謝恩。○是日。

上詣

皇太后宮問安。○甲申。諭內閣。湖北布政使員缺。朕熟思數日。不得其人。著大學士尚書都御史侍郎副都御史等各保一人。密摺封奏。

如更有堪任他職者亦併繕入。再有裨益政事。啟沃朕躬之言。併附陳奏。務宜謹密。所奏必出於公正。儻有交通約會等情。經朕聞知。不獨見輕於朕。且彼此非笑。亦當顧惜。尚其慎之。○諭禮部。近日天時頗旱。

皇考先年屢降

諭旨云。大喪之後。必有旱年。

太皇太后

世祖章皇帝

皇太后皇后之事。俱曾經過。朕當此之際。嘗恐懼於懷而未置也。三月十二日。雨雖霑足。朕曾兩三次以儆惕之意。曉諭衆人。三月以來。多風不雨。遂覺旱乾。再直隸。山東。山西。河南。地方。連年雨水不調。田禾歉收。朕雖遣大臣官員賑救。當此旱時。民必皇皇。朕心甚以爲慮。朕在宮中。久已盡心虔誠祈禱。爾部亦虔誠祈禱。諸大臣各敬謹齋戒。○諭八旗大臣。步軍統領及都察院。大小官員有一定之品。

級。即有一定之服式。所以重名器辨等威也。近多不按品級。佩帶數珠。且馬項懸纓。前用導馬。更有將紬爲坐具者。尤屬僭越。嗣後應各按品級。遵奉定例而行。爾等嚴加稽察。有仍前僭越。即行叅處。大臣官員亦無得徇情隱庇。再舊例諸王等以數珠鞍轡賞其屬下。許令服用。今後著將賞用之處。行文該旗存案。年終彙奏。以便稽查。○直隸巡撫李維鈞摺奏。直隸從前虧空。計州縣歲之所餘積彙填補。二年督令清理。奉

上諭。州縣官令少從容。不慮窘乏。方可責其盡心撫字。少有餘資。亦可自爲地方興利之舉。何可勒令爲他人補苴虧缺耶。○陞正黃旗護軍叅領雅親。爲鑲藍旗滿洲副都統。○正紅旗蒙古副都統保德。緣事革職。陞鑲藍旗護軍叅領馬起達。爲正紅旗蒙古副都統。○乙酉。諭宗人府。鄭家莊修蓋房屋。駐劄兵丁。想

皇考聖意或欲令二阿哥前往居住。但未明降諭旨。朕未敢揣度舉行。今弘皙既已封王。令伊率領子弟。於彼居住。甚爲妥協。其分家之處。現今交與內務府大臣辦理。其旗下兵丁。擇日遷徙之處。俟府佐領人數派定後舉行。弘皙擇吉移居。一切器用。及屬下人等。如何搬運安置。何日遷移。兵丁如何當差。府佐領人等。如何養贍。及如何設立長久產業之處。著恒親王。裕親王。淳親王。貝勒滿都護會同詳議具奏。一切供用務令充裕。勿使伊艱難。並貽累屬下之人。彼處離京二十餘里。不便照在城居住諸王一體行走。除伊自行來京請安外。其如何上班。及會射諸事。著一併議奏。尋議理郡王弘皙遷移鄭家莊。由兵部領取車輛。將需用物件載往。其給與理郡王人數共三百四十五名。現有護軍領催馬甲。並親隨執事等。均給錢糧。令其當差行走。鄭家莊城內原有房四百間。如尚不敷。再行添造。

現有欽放長史一員。所請護衛十二員。暫行跟隨侍衛三員。藍領侍衛一員。俟有缺出。照例各部題明補放。鄭家莊離京二十餘里。陞殿之日。理郡王聽傳來京。每月朝會一次。射箭一次。從之。設駐防鄭家莊城守尉一員。佐領六員。防禦六員。驍騎校六員。筆帖式二員。領催二十四名。兵五百七十名。○諭總理事務王大臣等。八旗外任廢官。有願在臺站効力贖罪者。令其具呈。如果効力無誤。著議敘。○九卿分別議敘四川蓋造營房官員得旨。議敘四川蓋造營房一事。前則不及。今又太過。議事以公平正直爲主。何至參差如是。若朕欲加恩。何難特發諭旨。所以令諸臣公議者。原以求其至當。朕本無成見。爾諸臣宜矢公矢慎。共襄盛治。凡事當理。即合朕意。逢迎之術。斷不可用。○兵部議覆甘肅巡撫綽奇奏。同知遲煥等應貽駝隻銀兩。又遊擊王兆萬等。倒斃駝隻俱應勒限追賠。得旨。此項駝



隻買備已久。原牧養官員。亦有身故者。且俱係微員。著落伊等賠補。勢必不能。著俱從寬免。○丙戌。八旗都統等議覆給事中已圖奏。每年開倉放米之時。鋪戶買人。紛紛囤積。俟價昂時。糶賣。頗有礙於生計。請將買人買米。兵丁賣米之處。槩行禁止。查鋪戶買人。雖買米積貯。而米仍在京師。且居民俱仰給於倉米。若槩不准賣。恐價值反致昂貴。所請應毋庸議。嗣後遇青黃不接之時。米價騰貴。請限定價值。以杜指勒。至兵丁米石。實有贏餘者。聽其糶賣。僅不計足食。盡行出糶。令該管官責懲示警。從之。○丁亥。

上詣

皇太后宮問安。○廣西巡撫孔毓均。摺薦梧州府知府張若需等。陞補蒼梧道等缺。奉

上諭。蒼梧道員缺。業已部選殷邦翰。朕聞張若需。居官聲名較優。所以允行。至其餘各員。俱照爾所請。爾統率一省。該屬員自必有深知

灼見處。始行奏請。假若日後改易操行。切毋存回獲之念。姑息從事。今日因其賢能而保薦。後日因其改易而糾參。正見爾之公正無私。將朕此旨。轉諭伊等。俾各知警懼。時加慎勉。庶不敢恃被薦在前。而稍有放縱也。保薦一事。甚難。人或懷銜玉求售之心。掩其不善。而著其善。一被愚惑。他日受累不淺。斷不可輕忽於一時也。朕將合省百萬赤子。付託督撫。似此薦舉數人。有何可疑。而不推心信任。其間設有徇情納賄。假公濟私。實據斷不輕恕。○戊子。諭翰林院。凡部院衙門。俱設司官。專管定稿說堂。筆帖式專管繕譯。廳官專管收發文書。翰林院衙門。亦有錢糧出入。陞遷議敘。並各衙門文移往來。事務煩瑣。關係匪輕。乃俱出自筆帖式典簿廳之手。豈得保無弊端。嗣後於俸淺編修檢討內。擇才守優長者。滿漢各二員。充作司官。專主定稿說堂。庶小吏不得作弊。而衙門清肅。所委充司官之

編檢果實心任事。辦理公敏。掌院學士據實奏聞。加以殊恩。○以工部左侍郎內閣學士裏行登德充經筵講官。○調陝西甘肅按察使劉世奇爲四川按察使。司按察使四川按察使彭振翼爲陝西甘肅按察使。司按察使。○己丑。諭大學士等。此番鄉試落卷。著大學士王項齡。刑部尚書勵廷儀。署吏部侍郎內閣學士史貽直。戶部侍郎張伯行李周望。兵部侍郎阿克敦。副都御史李紱。同南書房翰林檢閱。如人不足。於翰林院編檢內。揀選十員同閱。再此番係雍正元年特恩加科。士子有因迴避。不曾應試者。殊屬可憫。即令派出大臣。擬題奏請。候朕點出。於內閣考試。○諭川陝總督年羹堯。現今駐劄甘州。兵丁無多。護軍統領吳世拔。儘可管轄。都統楚宗不必管理。著在甘州効力。○九卿等遵旨議定。民公侯伯滿漢職官。以及兵民一應殯葬婚嫁之禮。毋許僭越。請著爲令。從之。○庚寅。諭大

學士等。刑部直省命盜案件。主稿雖在刑部。然必由三法司等衙門。公同確勘。畫題方行請旨。今刑部議覆被盜疎防。及人命失察等案。有該督撫未將所屬地方官升報。參者。刑部於具題完結本尾。聲明行令查參。到日再議。嗣經該督撫。有照例補參者。亦有援例請免者。止用咨覆刑部。既不再題。又不照會都察院大理寺衙門。是以部中姦猾胥役。得以操縱其事。暗地招搖。有部費者。則爲援引輕例。且有竟將咨文沉匿。日久潛消者。如無部費。雖督撫聲明。在所可寬。不准邀免。欺隱朦混。事同議異。嗣後凡三法司會議案件。本尾有帶及行令補參者。督撫咨覆到部。其或處分或寬免。作何完結之後。令刑部知會。畫題衙門。公同刷卷。如此。則胥役不得萌逞故智。上下其手矣。○以正藍旗滿洲副都統阿林保。署本旗滿洲都統。○辛卯。遣官祭關聖帝君。○壬辰。

上詣

皇太后宮問安○陞福建福州副將邊士偉爲廣西左江總兵官○癸巳諭大學士等清文譯漢綸綍攸關職司宜慎必須修詞典雅文義貫通方可宣達諭旨嗣後內閣滿漢諸臣於清字上諭及改簽旨意俱會同詳酌譯定繕寫進呈朕覽○湖廣總督楊宗仁摺薦廣東南海縣知縣宋瑋陞補湖南寶慶府知府廣州守備范宗堯改補湖北漢陽縣知縣奉  
上諭各省盡屬版圖在在皆需賢員何地非民何缺非要隔省題官實屬越例假若別省賢員彼之督撫不加褒獎不行薦擢者備將情節聲明密奏則可今因初次朕姑從爾請特諭○甲午調雲南按察使金啟復來京陞雲南學政按察使司僉事張謙爲雲南按察使司按察使○以原任廣東巡撫法海提督江南學政右春坊右中允蔡嵩提督雲南學政○戶部議覆御史單疇書條奏安徽湖廣承

辦銅觔日久未完恐有借詞故延之弊請敕戶工二部清查歷欠銅觔勒限完解又從前解官皆屬微員易於誤公宜遴選府佐家道殷實者委令領解均應如所請令各該督撫限四個月速催完解逾限不完照例叅處竝選賢能府佐領解從之○乙未諭滿漢九卿詹事科道等天時亢旱朕夙夜焦勞敬謹齋戒久未得雨意者用人行政之間尚有缺失不能感召天和以致甘霖未沛朕欲在廷諸臣直言得失猶恐視爲具文槩以諛詞頌揚負朕實心求言之意今特諭爾等各具密摺凡朕所行之事或有過失務盡言無隱即所行無過或更有應行事宜亦各據已見陳奏使朕有則改之無則加勉方得古大臣責難於君之義至用人一途或有未當爾等務必據實指陳勿避嫌怨即朕親信重臣亦不妨指出上古君臣都俞吁咈至今傳爲盛事爾等若能披肝露膽極言直諫即所奏未盡合

宜朕亦重其人品。儻仍瞻徇依違。浮詞塞責。朕亦薄其爲人。爾等各宜副朕實心。果有嘉謨嘉猷。俾得見之政事。將召天和而蘇民困。胥在於此矣。○諭吏部。國家大典。首重掄才。必主司鑑。空衡平。內外簾官。協心共事。加意釐剔。故榜後方得士心悅服。京師首善之地。關係尤重。朕於雍正元年。特行開科。并廣額數。欲振興文教。俾單寒績學之士。人人自奮。今順天主考朱軾。張廷玉。公慎自矢。細心搜閱。盡拔佳文。內外簾官。亦能各自淬礪。屏除弊端。榜發之日。輿論翕然。朕心甚爲嘉悅。其酌加議敘。用示優獎。兼使嗣後考官。咸知激勸。以副朕興賢育才之意。○諭兵部。武職人員。原因騎射而得功名。當以弓馬之優劣爲授官之先後。向來部發外省。年滿千總。挨次補用。不論騎射之優劣。原以杜奔競而絕營求也。但優劣不分。止按名次。伊等以爲名次既定。補授有期。不復以弓馬爲事。何以勵人

才而收實用。嗣後命往年滿千總。應令督撫確加考驗。騎射優者。先行題補。劣者。令其學習。不按名次。以爲先後。庶武弁皆知勉力。騎射不至廢弛。爾部確議具奏。尋議嗣後守備缺出。應歸部選者。照例銓選。其應補分發年滿千總者。令督撫不論名次。秉公考驗。弓馬優長。具題補用。技藝生疎。令其學習。從之。○丙申。以裕親王保泰管理鑲黃旗滿洲都統。○丁酉。命工部尚書徐元夢署理內閣大學士。戶部尚書孫渣齊辦理工部事務。○以署右翼前鋒統領貝勒阿布蘭協辦總理事務。鑲藍旗護軍統領輔國公普照署右翼前鋒統領。○以陝西漢中副將黃喜林署理陝西西寧總兵官。○戊戌。夏至。祭地於方澤。遣裕親王保泰行禮。○上詣皇太后宮。問安。○諭大學士等。山西平定州等

處山多田少。粒食恒艱。小民向賴陶冶器具輸運直省易米。以供朝夕。近聞直隸州縣因米貴禁糶。此方百姓何以仰給。昔春秋時諸侯各君其國。尚申遏糶之禁。今天下一家。海內之民。皆吾赤子。自宜緩急共濟。現今陝西督臣運米萬石。賑救山西。甚愜朕意。豈有坐視鄰封乏食。反行遏糶之理。自今凡鄰近郡邑。偶遇荒歉。即相拯卹。毋得各分疆界。漠不相關。其所當禁者。富戶規利。販米動盈千萬。又沿海數省運米出洋。玩法網利。該督撫提鎮當嚴查禁止。至肩負小民貿易度日。悉從自便可也。著直隸巡撫曉諭鄰近平定州等處州縣。不得禁糶。以副朕一視同仁之意。并諭直省各督撫知之。○諭戶部山東連年荒旱。百姓艱食。朕夙夜焦勞。已諭巡撫多方賑濟。近聞兗州等處雨未霑足。誠恐小民乏食。無以爲生。現今糧艘未入閘河。可乘此時截留漕米。以備賑卹。爾部酌議截留米石數目。

及分貯何府州縣。作速具奏。尋議將江西省漕糧截留二十萬石。交與山東巡撫分貯府州縣地方。以備賑濟。從之。○諭河道總督齊蘇勒。漕運總督張大有。山東巡撫黃炳。歷年漕船遲滯。皆由運河淺阻。運河之水。全賴山東諸湖蓄水。以資灌注。近歲諸湖漸就淤積。附近居民或侵佔耕種。以致水少。不能引以濟運。今宜乘夏秋水之時。預爲蓄水之計。爾諸臣應各留心相度。凡沿河近地。已經成田者。不必追究。其未經耕種者。當湖水稍落。速宜嚴禁。不可仍令侵佔。至諸湖隄防。務須修築堅固。引河開濬。務須啟閉得宜。則湖水深廣。運道流通。將來漕艘更無阻滯之虞矣。○諭河南巡撫石文焯。河南居四方之中。地廣民庶。爲幅員要區。素封之家。常喜儲藏米穀。以收居奇之利。比年連遇荒歉。民食維艱。貧者逃亡。頗衆。朕夙夜廑懷。思所以安全拯濟之道。前特遣官往賑。務令實心奉行。俾窮

黎得安祗席。河以南數郡。雖已得雨。河北三府。時逾麥秋。尚未霑足。誠恐小民。勢難耕種。該撫即預爲籌畫。俾富室之粟。皆得流通。出糴於官。以爲賑恤之用。○陞江南徐州副將張耀祖爲廣東瓊州總兵官。○己亥。諭大學士等。孝經一書。與五經並重。蓋孝爲百行之首。我

聖祖仁皇帝欽定孝經行義。以闡發至德要道。誠化民成俗之本也。鄉會試二場。向以孝經爲論題。後改用太極圖說通書。西銘。正蒙。夫宋儒之書。雖足羽翼經傳。豈若聖言之廣大悉備。今自雍正元年會試爲始。二場論題。宜仍用孝經。庶士子咸知誦習。而民間亦敦本勵行。即移孝作忠之道。胥由乎此。又聞各省鄉試房考。凡州縣官由科甲出身者。止許入闈一次。夫考官以秉公精鑒識拔人才爲主。何論曾否入闈。嗣後凡遇鄉科。各省督撫臨場調齊科甲出身之員。不論已未分房。監臨

試以時藝一篇。其文理優長者。爲內簾房考。荒疎者。供外場執事。則分校得人。而佳文盡拔矣。朕於雍正元年開科廣額。總欲鼓勵人才。興起教化。著該部通行直省督撫。俾副朕崇教育才之意。○

上因天時少雨。減膳虔禱。甘霖立霑。大學士等恭請

皇上照常進膳。

上曰

上天暨

皇考在

天之靈。慈憫朕躬。即時昭應。朕心焉有不感荷欣慶之理。所奏知道了。○鑲白旗漢軍都統李樹德緣事降調。陞兵部左侍郎張聖佐爲鑲白旗漢軍都統。○湖北布政使張聖弼緣事革職。陞河南按察使朱綱爲湖北布政使。司布政使。監察御史張保爲河南按察使。司按察使。○調福建南澳總兵官陳良弼爲廣

東碣石總兵官○大學士等以擬取迴避士子試卷并落卷進呈

上曰今年特恩開科爾等擬取四卷竝落卷中之前二名俱著取中爲舉人以示鼓勵人才之至意○賜禮部尚書張廷玉房一所銀一千兩○庚子

仁壽皇太后不豫

上詣永和宮親視湯藥晝夜無間○諭總理事務王大臣等青海台吉兄弟不睦儻邊境有事大將軍延信駐劄甘州相隔遙遠朕特將一切事務俱降旨交年羹堯辦理若有調遣軍兵動用糧餉之處著防邊辦餉大臣及川陝雲南督撫提鎮等俱照年羹堯辦理邊疆事務斷不可貽誤并傳諭大將軍延信知之○撤布婁爾地方隨征綠旗弁兵令山西大同總兵官馬觀伯帶回○以署理大學士工部尚書徐元夢禮部尚書張廷玉俱署都察院左都御史○辛丑丑刻

仁壽皇太后崩於永和宮自

聖祖仁皇帝升遐以來

皇太后哀痛深切每致撤膳

上在哀毀之中惟恐

慈體違和晨夕問視孝養倍篤

皇太后積哀日久疾遂大漸是日

仙馭上賓

上擗踊號慟搶地呼天哭無停聲水漿不御一切儀服隆備盡禮盡誠戍刻

大行皇太后大殮

皇后及貴妃妃皇子等俱成服親王以下文武大小官員王妃公主以下八旗二品以上官員命婦俱齊集舉哀先是

皇太后久御永和宮及禮臣等尊上

徽稱擇日恭進

冊

寶

上因奏請

皇太后移御寧壽宮屆期受朝賀

皇太后固執未允尚御永和宮至是奉安

梓宮於寧壽宮

上於蒼震門內設倚廬縞素居喪每日赴

梓宮前上食三次哀號弗輟儼如視膳羣臣莫

不感泣

上以時值炎熱諸臣齊集易致傷暑仰體

大行皇太后慈愛至意命設水於陰涼處聽其

取飲竝命年老者即或步履遲誤亦不深究

稽察官員不必過嚴又命傳諭命婦等咸使

知之諭理藩院傳知外藩公主郡主等蒙

古王貝勒貝子公台吉等今值

皇妣大事伊等感戴平日隆恩自必速來虔謁

但時值炎熱蒙古內未出痘者甚多著停止

前來其應來者恐塗間人馬中暑或致有傷

則重違

皇考

皇妣之聖心朕亦有所不忍前者

皇考大事朕曾諭蒙古諸藩令於八月杪來謁

山陵今亦定於八月杪來京且伊等旗下地方

亦屬緊要不可疎防來時或扎薩克或協理

台吉必留一人辦事至公主郡主等有必欲

來京者亦不必急迫著屆期從容前來諭

總理事務王大臣等貝子允禩原屬無知狂

悖氣傲心高朕屢加訓諭望其改悔以便加

恩但恐伊終不知改而朕必欲俟其自悔則

終身不得加恩矣朕惟欲慰我

皇妣皇太后之心著晉封允禩爲郡王伊從此

若知改悔朕自疊沛恩澤若怙終不悛則國

法具在朕不得不治其罪允禩來時爾等將

此旨傳諭知之○又諭舅祖岳色

皇妣向欲加恩今仰體

慈懷著授爲拜他喇布勒哈番准襲一次○壬

寅奉

皇太后遺誥頒示天下誥曰予承侍

聖祖仁皇帝夙夜兢業勤修壺職將五十年不



幸

龍馭上賓。予即欲相從冥漠。今皇帝再三諫阻。以老身若逝。伊更無所瞻依。雪涕銜哀。情詞懇至。予念

聖祖付託之重。丕基是紹。勉慰其心。遂違予志。後諸王大臣。援引舊典。請上尊號寶冊。予以聖祖山陵未畢。辭却再三。實出至誠。非故爲撓謙也。今皇帝視膳問安。靡間晨夕。備物盡志。誠切諄篤。皇后奉侍勤恪。禮敬兼至。諸皇孫學業精進。侍繞膝前。予哀感之懷。藉爲寬釋。予年齒逾邁。數盡難挽。予壽六十有四。得復奉

聖祖仁皇帝左右。愜予夙志。夫亦何憾。今皇帝勵精圖治。愛育蒼生。海宇乂安。兆姓樂業。天下萬世。稱君德之休明者。推功啟佑。予沒有榮施焉。惟是皇帝前當

聖祖仁皇帝升遐之時。哀毀過情。今復遭予之戚。若悲傷太甚。則予冥冥之中。實所未安。宜

念

宗社攸關。勉自損抑。中外羣臣。亦各恪奉。乃職竭忠盡慮。以副皇帝任用之意。喪制悉遵典禮。持服二十七日而除。皇帝成服後三日。即行聽政。無曠萬幾。

天

地

宗廟

社稷之祭。不可以藐躬之故。稽遲大典。百神祀事。亦悉如常。布告天下。咸使聞知。

上居苫次。晝夜悲號。水漿不御。諸王大臣等。公請節哀。諭曰。朕過

聖祖仁皇帝大事。雖抑制哀衷。尚勉盡臣子之道。不意復遇

皇妣皇太后之事。痛何容已。但負荷重大。務必節哀強忍。保護朕躬。以上慰我

皇考

皇妣在天之靈。爾諸王大臣。勿過爲朕慮。又諭

曰。天甚炎熱。年邁者六十五歲以上。但於早晨上食。齊集一次。六十五歲以下。有疾病不能者。亦著齊集一次。○癸卯

上以次日恭移

大行皇太后梓宮。安奉

壽皇殿。親詣

梓宮前。行告祭禮。攀戀哀號。慟哭不已。○甲辰

恭移

大行皇太后梓宮。安奉

壽皇殿。發引時。

上稽顙痛哭。跪送於履順門外。

梓宮由東華門。進景山東門。

上由神武門出。慟哭跪迎於

壽皇殿大門外。

梓宮奉安之後。致真行禮。號泣良久。近侍皆痛

哭失聲。自是以後。

上於順貞門內。設倚廬以居。每日親奠獻焉。

諭禮部。朕惟尊親之典。首重易名。聖善之修。

必崇顯號。我

皇妣大行皇太后。端莊恭肅。慈惠安和。奉侍

先皇。壺儀茂著。誕育冲藐。

母道備隆。顧復恩周。命提義盡。寬仁逮下。澤洽

宮庭。謙儉持躬。化流禁掖。朕繼承大統。嗣服

鴻基。方期合萬國之懽心。奉

慈闈之色養。不意遽遭大故。

仙馭上升。抱痛銜哀。感深罔極。惟藉顯揚之典。

少申孝慕之誠。允宜稽考。彝章。薦升

尊諡。應行典禮。爾部詳議具奏。○乙巳。

上每日詣

壽皇殿

大行皇太后梓宮前。號泣親奠。諸王大臣等奉

皇上兩遇大事。今又時當盛暑。請間隔兩三日。

親詣一次。諭曰。朕性本質誠。不事掩飾。前云強

忍節哀。言實由衷。爾等勿爲朕慮。惟是

皇妣誕育朕躬。慈恩罔極。今初成服。隔日一詣

梓宮親奠。朕實難安。按之典禮。三次上食。俱宜

躬親今止一次恭詣。已勉從爾等所請矣。每  
日清晨。哭奠盡哀。方得少展思慕之心。儻不  
勝暑熱。力不能支。自另降諭旨。諸王大臣。當  
諒朕此意。遵行。勿得再奏。○以果親王允禮  
署右翼前鋒統領。鑲藍旗滿洲副都統雅親  
署本旗護軍統領。○以鑲藍旗護軍統領署  
右翼前鋒統領。輔國公普照署陝西西安將  
軍。

監修經義官光祿大夫經筵講官太僕議政政保和殿大學士兼兵部尚書總理兵部事三等伯加十五級臣鄂爾泰  
總裁官光祿大夫經筵日講官起居注太僕兼太子太僕保和殿大學士兼戶部尚書仍兼管吏部尚書翰林院掌院  
事三等伯加十五級臣張廷玉光祿大夫經筵日講官起居注太僕議政大臣武英殿大學士兼工部尚書爲兼太子  
翰林院掌院事加二級臣福敏光祿大夫經筵講官太子太僕兼閣大學士兼禮部尚書加六級臣冷辰光祿大夫  
經筵講官議政大臣協辦內閣大學士事務禮部尚書仍兼管太常寺鴻臚寺事加二級臣等奉

熱審減等。國朝舊有成例。蓋念時當盛暑。因

聖祖仁皇帝如天好生。凡閱讞章。哀矜詳慎。秋審決囚。屢行停止。至每歲夏月。必

特沛恩綸監候者寬其刑具。松青者緩至秋涼。雖停熟審之例。仍寓減等之心。恩至渥也。朕

仰體

聖慈時深欽恤嗣後每逢熱審之期仍復減等舊例其監禁重犯亦量加寬恤至情罪可疑及牽連待質人等暫予保釋俟秋後再行拘禁凡內外讞獄衙門一體詳慎遵行庶幾刑期無刑之意其有故意遲延仍蹈前弊希圖漏網者除本犯不准減等外官吏嚴加議罪爾部即通行直省尋議熱審減等自奉

上諭之日起立秋日止直省一體遵行從之○

陞鑲黃旗佐領兼郎中多金爲本旗內府護軍統領正黃旗護軍叅領雅住爲本旗內府護軍統領吏科給事中巴圖爲正白旗內府護軍統領○命太僕寺少卿須洲等往山東發司庫銀二十三萬四千兩散賑濟南兗州東昌青州萊州等府旱災饑民○庚戌諭莊親王允祿等暢春園衛兵往來勞苦派八旗兵三千名分班守護蓋造兵房一萬間給與居住○諭總理事務王大臣等三屯營副將

李如柏著賜總兵銜與天津總兵官韓良輔前往總督年羹堯處聽用原任前鋒統領蘇丹原任都統噶爾弼俱賜原銜令往年羹堯處効力贖罪蘇丹噶爾弼韓良輔李如柏每人各賞內庫銀一千兩○壬子。

上詣

大行皇太后梓宮前行初祭禮哭泣盡哀○癸丑諸王大臣奏懇節哀間日一詣

壽皇殿諭曰朕儻不勝暑熱另降諭旨每日親

詣之處仍著預備○乙卯諭理藩院郭爾羅斯乏食爾等議將隣近扎薩克公巴圖旗下倉糧撥給散賑等語殊未妥協若將此項倉糧撥給將來伊旗下儻遇災旱又將何處米石撥給乎朕思白都納貯存倉糧頗多可備散賑之用但止給與米糧餬口竝無產業營生亦非久遠之計從前給產業買牲餼之事俱將富戶派出以致苟且塞責所給之物浮報數倍蒙古竝不得實惠夫科爾沁一旗與

別部落蒙古不同

太祖高皇帝時首先臣服且爲朕

皇曾祖妣孝莊文皇后

皇祖妣孝惠章皇后之母家世爲國戚恪恭與

順。歷今百有餘年。今聞伊屬下之人乏食朕

心軫惻著即動用正項錢糧三萬兩往賑再

派出大臣一員司官一員往郭爾羅斯旗下

將實在窮苦並無牲餼之人查明數目按其

戶口給與乳牛羊隻務令寬裕足用爾衙門

會同總理事務王大臣速議具奏尋議白都

納倉內發米二萬石按口給糧戶部發銀三

萬兩採買牲畜遣都統伯四格等馳驛前往

賑給從之○丙辰工部遵旨議覆河道總督

齊蘇勒奏稱山東運道濟寧一帶地居亢陡

全藉泉湖汶泗諸水入河濟運近因連年亢

旱汶泗二河僅存一綫細流而八閘以至大

王廟等處運河底水原微又無上源諸水會

歸糧艘挽運維艱急宜浚泉匯湖導引入河

方克濟運應如所請行文該總河會同總漕

東撫嚴飭各泉源所屬州縣挑濬疏通彙歸

運河務使漕艘前進并多募民夫協力挽運

抵通從之○丁巳大學士等恭擬上

大行皇太后尊謚曰

孝恭宣惠溫肅定裕贊天承聖仁皇后得旨是

○命雲貴革職總督高其倬仍留原任○陞

廣西提督左世永爲正黃旗漢軍都統直隸

天津總兵官韓良輔爲廣西提督直隸河間

副將徐仁爲直隸天津總兵官○戊午喀爾

喀多羅貝勒固山額駙功額喇卜坦故遣官

致祭○己未加封

孔子先世五代俱爲王爵木金父公爲肇聖

王祈父公爲裕聖王防叔公爲詒聖王伯夏

公爲昌聖王叔梁公爲啟聖王○實授托時

爲戶部右侍郎○戶部議覆御史向日正條

奏凡官員那移公帑爲本身捐陞及子弟捐

職以致虧空者本身無論離任現任子弟無

論先用即用。俱革職賠補。應如所請從之。○以江蘇等屬積年民欠地丁及蘆課等項銀兩。歷歲既久。窮民苦累。悉令豁免。○庚申。諭戶部。兵部。朕惟治安天下。欲兵民並得其所。必以敷恩減賦爲要。比年以來。策妄阿喇布坦。狂逞逆命。發師致討。四川陝西進藏官兵。歷經險遠。往返萬有餘里。甚屬勞苦。朕深憫念。其倒斃馱載馬匹價銀及口外沿途與西藏留駐兵丁續補馱馬價銀。著悉免追賠。又西陲軍興以來。民間急公趨事。供應差役。實厯朕懷。聞陝西甘肅二屬各州縣衛所地丁銀兩。每一錢額外徵收三釐。米每斗額外徵收三合。以爲備荒之用。此項徒有加賦之名。而無賑濟之實。著自雍正元年始。將額外徵收銀米永行停止。如有舊欠。亦悉予蠲除。務俾均霑實惠。以副朕篤念兵民至意。○吏部議奏。內閣漢中書員缺。嗣後於新進士內揀選學問好者。令爲內外官學教習。俟其三年

期滿。照科分名次。以中書補用。從之。○補行漕標四川衛所康熙六十一年分軍政罷軟官一員。年老官六員。才力不及官一員。浮躁官一員。分別處分如例。○辛酉。諭內閣。邊外地方遼濶。開墾田畝甚多。將京城無產業兵丁移駐於彼。殊爲有益。著直隸古北口提督董象緯定議。再著總理事務王大臣等會同兵部詳議具奏。尋議於熱河喀喇和屯樺榆溝三處駐兵。請派京城兵八百名於熱河駐四百名喀喇和屯樺榆溝二處各駐二百名。以五十名爲一佐領。每佐領設佐領一員。驍騎校一員。於派出兵丁內設領催四名。再設總管一員。翼長二員。令其統理管轄。其總管駐劄熱河。翼長二員分駐喀喇和屯樺榆溝二處。此移駐兵丁。令滿洲蒙古都統等於馬甲內擇其無產業情願前去併席北烏拉齊新滿洲內熟諳農務者。派往其總管翼長著兵部引見補授佐領。驍騎校著各旗引見補

授其官員缺出。照依各省駐防官員例。其兵丁缺出。即於彼處餘丁內挑補。如無餘丁。仍於京城原佐領內挑取。派往頂補俸餉米石。俱照京城例支給。所住房屋。派部院堂官一員查明。彼處官房撥給。如其不敷。買房添補。其總管關防著禮部鑄給。隨關防之筆帖式。令吏部題補。從之。○壬戌。廣東左翼總兵官汪鏞緣事革職。陞廣東香山副將藍鳳爲廣東左翼總兵官。山東沂州副將楊天縱爲雲南臨元總兵官。○署撫遠大將軍貝子延信。摺奏據青海郡王額爾得尼厄爾克托克托奈來稱。羅卜藏丹津等領兵來侵。率兵交戰四次。屬下人多陣亡。其餘亦行逃散。又將牲畜劫掠。今率妻子來投。乞賜救援等語。臣令伊等暫住蘇油口內。奏入報聞。○予故奉天副都統巴勒杭州副都統三等伯馬世斌各祭葬如例。○癸亥。陞內閣學士三泰爲禮部右侍郎。仍兼管太常寺事。○吏部題。二等阿

思哈尼哈番英素故銷去恩詔。所得一拖沙喇哈番。餘三等阿思哈尼哈番。以其孫郎保承襲。三等阿思哈尼哈番達郎阿故。以其長子五清格襲職。三等阿思哈尼哈番杜喀故。以其繼子明福襲職。從之。○甲子。諭工部據河南巡撫石文焯奏稱。黃河南岸中牟地方河隄衝決。著嵇曾筠前去。知有諳練河工之人。奏聞帶往。再八旗漢軍現任候補官員及註誤革職人員內。有願往河工効力者。該部開列。交與總理事務王大臣。將家道殷實人材可用者。挑選十人。引見。朕派出四五人。亦交與嵇曾筠帶往。嵇曾筠到河南時。將此決口作何堵築之處。與河南巡撫石文焯總河齊蘇勒。公同商議。即速修築。堅固其州縣被衝人民。應賑濟者。即速賑濟。毋致失所。向來河南預備河工錢糧。恐不敷用。此項工程著將司庫正項錢糧動用。工完之日。查核銷算。派出人員至河工時。如果効力勤勞。有河員

缺出應保奏者即行保奏補授若無缺出具題議敘再將諳練河務者常留數員於工上自於緊要工程有益○禮部等衙門奏言仁孝仁皇后諡號仁字重複謹請改易恭上尊諡曰

孝誠恭肅正惠安和儷天襄聖仁皇后得旨是○遣副都統廣福大理寺卿覺羅常泰往巴行喀拉大山致祭黃河之源○署撫遠大將軍貝子延信摺奏青海公噶爾丹達錫來至甘州據稱率弟台吉鄂齊爾台吉阿旺達克巴領兵與貝勒阿爾布坦溫布等相拒我兵敗散賊人肆行搶奪來投進口等語臣已令噶爾丹達錫暫與伊叔額爾得尼厄爾克托克托奈同居奏入報聞○乙丑陞左通政黨古禮爲光祿寺卿○工部議覆河道總督齊蘇勒疏稱徐州順河集徐家莊長樊大壩等隄工卑小單薄難資捍禦急宜加增高寬接築月隄應如所請從之○免直隸東明長垣

二縣康熙六十年分水災額賦有差○丙寅上詣

大行皇太后梓宮前行大祭禮諸王大臣於是

日請

上釋服

上涕泣不忍諸王大臣固請

上乃於

皇太后梓宮前行三跪九叩頭禮跪易素服

天顏悲愴感動左右先是諸王大臣以順貞門

內居處卑隘酷暑炎蒸屢次敦勸回宮

上皆不允至是復再三叩請

上始回養心殿○丁卯總理事務王大臣九卿

翰詹科道等官會議恭請

四后同祔

聖祖廟

尊諡竝加仁字諭曰朕惟

母后升祔

太廟大典攸關欲伸臣子之孝思必準前代之



成憲務得情理允協乃可昭示萬年諸王大臣等奏請

四后同祔

太廟引據宋朝太宗真宗四后祔廟之禮朱子及有宋諸儒皆以爲允當覽奏既得展朕孝敬無窮之心復合前代斟酌盡善之典不覺悲慰交集恭惟

孝誠仁皇后元配

宸極

孝昭仁皇后

孝懿仁皇后繼位中宮

孝恭仁皇后誕育朕躬母儀天下按先儒祔廟之議一元后一繼立一本生以次竝列今

母后升祔位次當首奉

孝誠仁皇后次奉

孝昭仁皇后次奉

孝懿仁皇后次奉

孝恭仁皇后如此庶於古禮符合而朕心亦安

矣○陞都察院左僉都御史嵇曾筠爲兵部左侍郎○戊辰命青海已故貝子丹忠家口及屬下人員回居原遊牧之地令親王察罕丹津管轄其屬下寨桑等素著勤勞俟秋涼時來京加賞○己巳陞翰林院侍讀學士涂天相爲詹事府詹事○鑲黃旗漢軍都統李繩宗年老休致以左翼前鋒統領希爾根署鑲黃旗漢軍都統○河道總督齊蘇勒疏報六月初七日中牟縣黃河南岸河水陡長漫開大隄水由劉家邨南入賈魯河時當汛水長發必須急爲堵閉至賈魯河下注之水恐山圩高堰臨湖隄工不能容納亦急宜相機堵閉刻期完竣得旨河水漫決前據石文焯摺奏已降諭旨至所奏山圩高堰一帶臨湖隄工今正值雨水之時該督帶領河員加意防護毋得疎忽○庚午

上詣

大行皇太后梓宮前行滿月致祭禮○辛未通

政使司通政使陸經遠以老病乞休允之○  
壬申追封

聖祖敏妃爲

皇考皇貴妃○諭直隸巡撫李維鈞畿甸之內  
旗民雜處向日所在旗人暴橫小民受累地  
方官雖知之莫敢誰何朕所稔悉爾當奮勉  
整飭不必避忌旗漢冰炭之形迹不可畏懼  
王公勲戚之評論即皇莊內有擾害地方者  
毋得姑容皆密奏以聞○癸酉以詹事府詹  
事伊都立署通政使司通政使○河南巡撫  
石文焯摺奏河南永城等處蝗蟲飛集奉  
上諭蝗蝻生發盡力捕捉乃不成災考古捕蝗  
惟有撲滅之法甚善若怠忽從事捕不盡力  
而委之天災者皆誤也○免直隸保定城守  
尉所屬滿洲兵丁古北口提標綠旗兵丁賠  
補馬匹以遠戍西陲四載有餘也○甲戌議  
敘順天考試官加都察院左都御史朱軾爲  
太子太傅禮部尚書張廷玉爲太子太保○

調正藍旗漢軍副都統金鐸爲正白旗漢軍  
副都統正白旗漢軍副都統朱廷柱爲正藍  
旗漢軍副都統○乙亥諭吏部兵部三年舉  
行大計五年舉行軍政其居官優者列爲卓  
異劣者分別輕重置之八法所以澄敘官方  
勸善懲過典至重也朕思卓異八法所舉所  
劾不過十數人而平等供職不列舉劾者尚  
有多員如文官倉庫之盈虧辦事之能否武  
官騎射之優劣訓練之勤惰皆未填註考語  
是考課羣吏尚有遺漏之處也嗣後大計軍  
政除卓異八法照舊例舉行外其平等官員  
文職自知縣以上武職自守備以上俱於大  
計軍政之年令督撫提鎮註明考語造冊報  
明吏兵二部務期秉公核實不得徇情任意  
顛倒是非爾等確議具奏尋議嗣後不入舉  
劾文武各官督撫提鎮等秉公填註考語送  
部察核從之○諭戶部各倉監督向有年限  
滿漢一同更換立法最善前任若有未清後

任豈肯接受所以稽錢糧之出入而除虧空之弊端也惟通州坐糧廳貯有通濟庫每年動用輕齎等項司其出入關係錢糧數十萬兩而坐糧廳一差竝無年限或滿員陞轉則更滿員或漢員陞轉則更漢員滿漢參差更換彼此牽制回護勢難徹底澄清況在任日久僅有虧欠必至積累增多更難清理爾部可將通濟庫錢糧逐一確查務期明晰其坐糧廳一差嗣後或限二年或限三年滿漢一同更換庶接受之際不至含糊而弊端亦自此清釐爾部即確議具奏尋議坐糧廳三年一次滿漢一同更換定爲例從之○諭領侍衛內大臣八旗都統等附近京畿等處駐防八旗官員兵丁內儘有曾經出征効力者伊等竝無陞轉之處應選其漢仗好人去得勞績宣著者給與陞階著公同會議具奏尋議考選軍政之年將記名賢員如德州等處之三品城守尉交兵部視應陞之缺列名具奏

玉田順義縣等處之防守尉及山海關張家口等處總管視伊等應陞之三品城守尉京城參領員缺題補德州玉田縣順義縣山海關張家口古北口等處之防禦及查圍場之官員等有記名者於本處應陞之協領京城之步軍副尉及查圍場之章京員缺題補各處之驍騎校於本處應陞之防禦及京城步軍校員缺題補各處之領催人等令該管之城守尉防守尉等保舉咨部於本處驍騎校京城驍騎校及六品官等員缺題補從之○陞右通政楊汝穀爲通政使司通政使○陞廣東肇高道朱絳爲廣東按察使司按察使○丙子諭內閣凡旗員爲外吏者每爲該旗都統參領等官所制自司道以至州縣於將選之時必勒索重賄方肯出結咨部及得缺後復遣人往其任所或稱平日加恩勒令酬報或稱家有急需那移求助或以舊日私事要挾至五旗諸王不體恤門下人等分外苛

求或縱門下管事人員肆意貪索種種陋習不可枚舉以致該員竭蹶餽送即欲潔已自好勢有不能於是虧空公帑被叅罹罪多由於此嗣後如有仍蹈前轍恣意需索等弊許本官據實密詳督撫轉奏儻督撫瞻顧容隱即許本官封章密揭都察院轉爲密奏即各御史亦得據揭糾叅務期通達下情以除積弊著通行八旗直省督撫徧諭內外旗員知悉諭領侍衛內大臣等奉天地方乃我國家啟祥之所甚屬緊要朕前詣奉天聞地方人言論悉知兵丁差役煩多不能休息之處曾降諭旨令將軍唐保佳將無用塘哨悉行撤退而將軍副都統於定額親隨兵丁之外多帶百餘人省城官員又各帶其子弟因而屬員效尤各多帶兵丁以致應差乏人兵丁仍多勞苦又於鎗手中以選擇熟練之人爲名每城調取二三十人田獵夫省城相隔遙遠往返人馬俱疲再自山海關以至廣寧皇

莊頭三百有奇止交筆帖式領催等微末人員駐劄中後所催徵錢糧辦理事務以致交結匪類糶賣官糧漁利入己且自中前所至錦州義州廣寧等處相隔二三百里詞訟案內干連之莊頭地方官調取抗不赴審即使到案亦抗不遵行以致案內干連之人每多苦累再人命案件呈報地方官之後雖相距數百里亦必俟筆帖式領催檢驗炎暑日久難以憑信則百方檢驗慘不可言朕之所聞如此從前雖每年派卿員前往管轄莊頭因不實心辦理於地方並無裨益應遣大臣一員駐劄於寧遠錦州大凌河等地方令其料理一應公務管轄里長獵戶遇有詞訟事件會同地方官審結此所遣官員應令駐劄何處著領侍衛內大臣等兵部內務府總管公同詳議具奏○諭理藩院塞外居住之八旗察哈爾蒙古護軍驍騎之器械三年查看一次而前往之護軍叅領驍騎叅領等騷擾蒙

古勒索馬牛等物其三年一往比丁之官員亦有勒索之處朕所洞悉再察哈爾蒙古內未曾出痘者甚多若來京挑選護軍僅遇出痘恐有損傷嗣後察哈爾八旗護軍缺出即著察哈爾總管副總管叅領公同閱看人材可用者挑補其挑補之護軍俟三年查看軍器時從京中奏派大臣一員前往查看軍器將所挑之護軍一併驗看其三年比丁亦照外省例交與該總管等詳察明白將比過丁數造冊送各該旗都統則衆蒙古無騷擾之患亦無往返京師之事於伊等大有裨益著八旗蒙古都統領侍衛內大臣前鋒統領護軍統領公同議奏尋議嗣後將三年一次查看器械之護軍叅領驍騎叅領及比丁官員俱停其派往越一年派大臣一員查看八旗察哈爾器械其人丁檔冊該總管叅領等繕寫明白轉送各旗都統再護軍校驍騎校前鋒親軍護軍等缺出著八旗總管副總管叅

領等秉公挑取著派往游牧處之大臣一併驗看若佐領世襲官員內有未出痘者亦著派往之大臣查奏承襲不必來京引見從之○命外任文武官員除特叅貪酷外其因公註誤降革解退之員將任內錢糧案件完結之後各親赴都察院具呈十日一次彙題代奏有可取者酌量錄用○陞江南江寧協領偏圖爲浙江杭州左翼滿洲副都統○山東布政使佟吉圖緣事革職以太僕寺少卿須洲署理山東布政使司布政使○丁丑諭戶部朕去年親閱京通各倉雖有積貯但京師人民聚集食指浩繁米糧儲備不可不裕查有漕各省惟湖廣江西產米最廣近年盛京年歲豐收米價亦賤此三處酌量動正項錢糧採買數十萬石催募民船運送京師大有裨益著怡親王隆科多會同詳議具奏○陞福建福州協領匡名世爲浙江杭州右翼漢軍副都統

大清世宗敬天昌運建中表正文武英明寬仁  
信毅大孝至誠憲皇帝實錄卷之八

大清世宗敬天昌運建中表正文武英明寬仁  
信毅大孝至誠憲皇帝實錄卷之九

救修

雍正元年癸卯秋七月戊寅朔享

太廟遣簡親王雅爾江阿行禮○己卯諭駐劄

西寧辦青海事務兵部左侍郎常壽據貝子

延信奏報親王羅卜藏丹津貝勒益蘇克汪

扎爾等率兵四千搶奪王額爾得尼厄爾克

托克托奈等爾宜遣人勸阻令其和好若羅

卜藏丹津借此侵犯邊塞則不可不加懲治

此事或爾親往和解或遣賢能官員喇嘛等

往彼和解爾悉心籌畫與年羹堯商酌而行

下嫁科爾沁和碩額駙策旺多爾濟之郡

主故遣官致祭 庚辰以翰林院侍講文試  
為順天武鄉試正考官編修徐葆光為副考  
官 命山東歷城等一百二州縣康熙六十  
年未完丁地錢糧六十九萬四千兩有奇自  
雍正元年始分三年帶徵從山東巡撫黃炳  
請也 議敘陝西四川雲南進藏綠旗官弁  
功各陞授有差 福建金門總兵官黃英年  
老休致陞福建澎湖副將聶國翰為福建金  
門總兵官 壬午以理藩院郎中恒德額外  
郎中本錫俱辦理理藩院侍郎事 實授年  
希堯為廣東巡撫 兵部議覆浙江福建總  
督覺羅滿保疏稱臺灣南路與中路適中扼  
要為崗山地方北路與中路適中扼要為下  
加冬地方應設兵彈壓今將鎮標右營守備  
領把總一員兵二百四十名駐劄崗山鎮標  
左營守備領兵一百五十名駐劄下加冬再  
令臺協水師中營千總一員領兵一百二十  
名駐劄鹽水港左營千總一員領兵一百五

十名駐劄笨港至安平鎮城甚為扼要應令  
水師副將領守備一員兵五百名駐劄城內  
均應如所請從之 貴州巡撫金世揚疏稱  
黔省地僻荒陬銅觔原無出聚間有一二礦  
廠久經封閉若令開採鼓鑄無論工費浩大  
一時難以獲效且貴州漢苗雜處每逢場市  
貿易少則易鹽多則賣銀今使錢文漢苗商  
賈俱非情願若以配充兵餉領運既難流通  
無時黔省用銀沿習已久請照舊例停開下  
部知之 予故鑲黃旗滿洲都統阿爾納祭  
葬如例 癸未諭八旗都統等八旗世襲佐  
領凡十六歲上朝委令一員率領指教俟四  
五年後再令其自行供職其世職官員十八  
歲上朝亦令委員指教俟三年後再令其自  
行供職都統等各當盡心教育一體遵行  
雲南巡撫楊名時摺奏巡撫衙門規禮共有  
五萬餘兩准留若干其餘應充公用奉  
上諭督撫羨餘豈可限以科則拘以繩墨惟視

秉心何如耳取所當取而不傷乎廉用所當用而不涉於濫固不可朘削以困民亦不必矯激以沽譽若一切公用犒賞之需至於拮据窘乏殊失封疆之體非朕意也必使兵民溫飽官弁豐足督撫司道亦皆饒裕乃朕之所願是在爾等揆情度理而行之其是與否自難逃朕之鑒照也○署正黃旗蒙古都統伊都善緣事革職以果郡王允禮管理正黃旗蒙古都統正白旗護軍統領納秦署理正藍旗蒙古都統正藍旗護軍統領宗室汝福署理鑲白旗蒙古都統正黃旗護軍統領查克旦署理正紅旗漢軍都統○甲申諭禮部國家祀典必貴潔誠先農壇每歲展祀且爲親耕耜田之所最宜清肅舊制圍牆內有地一千七百畝以二百畝給壇戶種植五穀蔬菜以供祭祀餘一千五百畝每年交租銀三百兩以備修理聞康熙四十年間內務府撥給園頭耕種菜蔬

菜無所從出惟向市井採買殊非潔淨精誠之意今著園頭清還地畝仍給太常寺壇戶耕種以供祭祀之需餘地一千五百畝著將內外圍牆查明丈尺每種地十畝估計令其修牆若干務期加謹葺護毋致傾壞每年派滿漢太常寺少卿一員不時稽察庶壇壝清潔祀事更加虔謹矣○命工部備造貢院內應用桌椅等器不許借用五城民間之物以滋擾害○以宗人府左宗人鎮國公德普爲右宗正○鑲黃旗滿洲副都統大成緣事革職調正藍旗滿洲副都統阿林保爲鑲黃旗滿洲副都統鑲白旗蒙古副都統何深爲正藍旗滿洲副都統陞太原城守尉把拜爲鑲白旗蒙古副都統○調鑲白旗漢軍副都統巴爾呼達爲正藍旗蒙古副都統陞雲南楚姚總兵官劉俊傑爲鑲白旗漢軍副都統○陞雲南督標副將南天培爲雲南楚姚總兵官○調雲南永順總兵官卜應奎福建福寧



總兵官費俊來京以雲南劍川副將李根潤署理雲南永順總兵官直隸大名副將顏光旸署理福建福寧總兵官福建漳州總兵官趙文璧年老休致陞直隸張家口副將陳棟爲福建漳州總兵官乙酉戶部遵旨議覆遣官往盛京江西湖廣採買米糧得旨南方差漢御史或給事中一員前往動正項錢糧照時價買米催覓民船即行起運趕上漕船可以先到即先來如其不能在何處遇見

糧船即隨便同行此係官買之米若交與地方官恐派累小民亦未可定不必交與地方官運送著派同知通判等官一員協同買米之員管運到京武職內派守備一員押運到淮之日總漕處派守備一員更換盛京差滿官一員前往近據內府佐領等奏稱現今莊頭等將窖米一十一萬五千四百八十四石糶賣一半其餘一半米石暫行存貯俟得新糧於次年糶賣再庫內現存銀內留下七千

五百餘兩其十萬兩交與何處請旨等語此派去之員一到盛京將錦州等處將軍府尹及內府佐領所屬現存米石查看總數於近海口處兌十萬石即將內府佐領等所存庫銀動用催覓民船裝運如倉內現存米石數目不敷動盛京錢糧買米運送再天津衛係總會之所理應修建倉廩其應建幾倉之處八月間送

梓宮時爾等面傳諭旨與直隸巡撫著直隸巡撫會同天津總兵官定議具題建造丙戌諭大學士等總督巡撫保題官員與例不合者部議不准行甚是其應否照伊所請補授朕自另降諭旨朕亦看保題官員之人何如耳如恣意徇私妄行保奏朕斷不准行

皇考當日亦是如此○諭戶部兵部從前商人王綱明因虧空銅觔銀兩具呈願採買兩江浙閩湖廣五省營驛馬匹於每匹額價內節省三兩填補虧空後五省以王綱明所交之

馬疲瘦不堪易於倒斃題請仍自行採買每匹扣銀三兩交部爲王綱明補墊虧空此事雖行已數年但各省採買額價不敷不能採買臚壯營驛之馬恒至倒斃以至地方官員歲有賠累況商人王綱明虧空銀兩與各省地方官員何涉而代爲補墊除從前五省解部補墊銀兩外以後每匹扣銀著俱行豁免其王綱明欠項著另行查明清結 工部議覆川陝總督年羹堯疏奏布隆吉爾地方北連哈密西接沙州去嘉峪關約五百餘里請建城一座屯兵駐守則柳溝赤金始得屏捍應如所請從之○免直隸東明縣康熙六十年分水災額賦有差 以故一等阿思哈尼哈番鄂爾多子圖那襲職一等阿思哈尼哈番李淑德緣事革退以其弟李淑明襲職○予故墨爾根副都統馬喀禮祭葬如例

丁亥

孝懿仁皇后忌辰遣官祭

景陵○議政大臣等議覆副將軍阿喇衲疏奏察哈爾兵丁現在行間之人雖於軍前員缺補用但軍前缺少其本處員缺並不補用轉將在家從未効力及軍前撤回之人補用爲護軍校驍騎校等員揆諸情理似未允當嗣後應令阿喇衲將伊所領察哈爾官兵內効力人員查明咨送該旗遇察哈爾地方員缺題補至於其缺不便久懸令該旗揀選現在應用之人奏請引見暫行委署得旨自有策妄阿喇布坦之事已經八載凡出征之在京八旗及盛京黑龍江寧古塔西安右衛等處滿洲綠旗官兵內有宣力行間分內應陞者若於各本處補授恐致懸缺不敷看守是以將現在之人揀選補授以致軍前効力官兵轉壅滯其陞遷之路著行文諸路將軍等於滿洲蒙古漢軍綠旗官員兵丁內有宣力行間分內應陞人等查明選舉在京者咨送該旗外省咨送各將軍綠旗咨送各該督撫提

鎮嗣後遇伊等應陞缺出令該處即行題補至補授軍前之人其缺不便虛懸著該處即行揀選人員奏請委署其補授之人若再陞轉此委署之人亦可得陞如此則軍前効力人等既獲陞遷之路即各本處才力可用人員亦不致於壅滯將此交兵部著徧行八旗諸路將軍及外省將軍督撫提鎮等知悉戊子諭內閣前因年羹堯奏稱趙之壇情願捐銀一萬兩往布隆吉爾地方築城効力朕念趙之壇係功臣之後若伊才具不勝知府之任道員事簡易辦捐銀敘用似屬可行若趙之壇才克勝任即仍留知府用現今趙弘燮虧空庫銀三四十萬兩交與趙之壇料理又何必另外捐銀況年羹堯啟奏築城已有張連登王之樞等可以竣事今復遣往効力議敘似又開一捐例斷不可行若布隆吉爾築城張連登等所捐之資不克完工今年羹堯密摺具奏再將情願効力者發往此朕從

前諭旨也爾等票簽全不符合將朕緊要語句俱行遺漏爾等俱係

聖祖仁皇帝委任大臣

聖祖仁皇帝天縱生知兼之臨御日久諸事精熟爾等舛錯之處全賴

聖祖仁皇帝改正所以不至誤事今朕臨御之初內藉大學士外藉督撫提鎮理應諸事勤慎盡心協辦如前日本上脫落一字事雖其小然不得謂小事便可輕忽本章用心細閱自無錯誤又如前日蔡珽所奏之事即係年羹堯奏過之事爾等又票該部議奏朕疑其或有異同照發批發及觀部議仍是一事何至玩忽如此朕若亦如爾等玩忽督撫本章該批依議用人一途聽之九卿隨意保舉豈不省事但爾等可以負朕朕何忍負我皇考之深思乎況朕於爾等陳奏虛心採納竝未有偏執之處人非聖賢孰能無過爾等果能指摘朕過朕心甚喜改過是天下第一等

善事有何繫吝以箝結爲老成以退諉爲謹  
慎非朕所望於爾等之意也諭兵部進藏  
及克復臺灣有功人員其現在者俱已邀恩  
議敘惟有身故者未得議敘同爲國家立功  
之人乃於身故之後不得均霑恩卹朕心深  
爲憫惻爾部著即酌加議敘定爲成例以副  
朕褒錄有功之至意 陞內閣學士史貽直  
爲吏部右侍郎停徵山東山西河南歷年  
帶徵舊欠錢糧寬限一年 己丑諭戶部朕  
自臨御以來勤求民瘼事無鉅細必延訪體  
察務期利民而於徵收錢糧尤爲留意惟恐  
間閭滋擾此念時切於懷如江西省有漕米  
各州縣運糧到省又自省倉搬上軍船故有  
脚耗扒夫修倉鋪墊等項編載全書歷來支  
給已久自康熙二十三年部中誤駁不准支  
給行令追還嗣後一例駁追究無完解至三  
十四年

聖祖仁皇帝特頒諭旨將從前已經支給者俱

免追賠恩至渥也至康熙三十八年部議又  
以脚耗與扒夫等項分晰未清仍令扣追不  
知脚耗乃貼運之總名扒夫等項乃支給之  
細數實一事非兩項也自康熙三十八年至  
今已二十餘載應追銀五十一萬餘兩米六  
十一萬餘石積累增多究無完解追比日久  
官民均受其累朕知之甚悉特諭爾部將從  
前積欠盡免追賠向後准其支給副朕加惠  
黎元體恤有司之意 諭署撫遠大將軍貝  
子延信爾移書與額爾得尼厄爾克托克托  
奈等稱欽奉諭旨青海台吉皆係顧實汗之  
嫡孫自我朝

太宗皇帝時顧實汗與達賴喇嘛和好恭順効  
力至今百年蒙我

皇考施以恩寵加封名號普加庇護後經策妄  
阿喇布坦敗壞黃教圍困西藏殺害拉藏且  
復謀侵爾等於是朕

皇考遣發大兵同爾等送達賴喇嘛至藏振興

黃教今羅卜藏丹津無故稱兵以王等不入伊黨自相侵害朕仰體

皇考眷念顧實汗子孫之意其罪未明尚不忍即加征討已遣侍郎常壽往問羅卜藏丹津所行情事若羅卜藏丹津知罪悔過朕當定其是非和解爾衆仍令爾兄弟照舊居住青海如果羅卜藏丹津不遵朕旨侵犯邊塞豈可不遣兵征勦今王之屬下人等盡被搶擄窮困投至甘州朕聞之不勝惻然特遣郎中通智辦給王公并屬下人等廩餼牲畜令從豐厚王等在彼安居不須憂慮朕斷不使爾等稍有拮据也可如是往諭并譯蒙古文發往○直隸巡撫李維鈞摺奏直屬丁銀請攤入田糧奉

上諭此事尚可少緩更張成例似宜於豐年暇豫民安物阜之時以便熟籌利弊期盡善盡美之效今既經題奏候部議到時朕再酌定○轉宗人府右宗人輔國公訥圖爲左宗人

以輔國公普照爲右宗人○庚寅諭倉場侍郎糧運關係國儲必須遄行無阻始得及早抵通自楊村至通州河道多有淤淺糧船起剝每致耽延以致回空凍阻并誤新漕著該督嚴飭坐糧廳查看河道有淤淺處作速挑濬深通毋使阻滯并知會天津總兵官用心催趕且天津一帶地方向有販賣私鹽等弊糧船不許停泊火速趲行直抵通州至抵通後速行起卸交倉毋得需索抑勒苦累軍丁朕去年親自閱倉知漕糧過壩一晝夜可五萬袋可見交卸甚易爾等加意督催務使空船早得回南新漕亦可無誤漕運一事朕親身閱歷纖悉洞知爾等儻不盡心料理或因勒索致有遲延責無所諉○辛卯諭禮部朝鮮國歸順我朝以來恪盡藩職進貢年久在太宗文皇帝世祖章皇帝聖祖仁皇帝時屢次施恩將伊國貢物減免今

所貢禮物尚多此內若有可減去者爾部會同內務府確議具奏再加減免以紓朝鮮民力尋議朝鮮貢物嗣後請酌減布八百匹獺皮百張青黍皮三百張紙二千卷從之頒賜朝鮮國王李昫緞疋及使臣李穡等賞賚有差停止筵宴

上召使臣李穡進見諭曰爾朝鮮國王啟疆東土於我

太宗文皇帝時誠心豫附恪守藩封我

太宗文皇帝

世祖章皇帝視同一家恩施優渥爾國王祖父亦能仰承厚澤奉職惟謹百年於茲矣我

聖祖仁皇帝化成久道萬國來王念爾國君李煇幼纘嗣服克紹前猷權不下移惠能撫衆數十年來職貢匪懈用是

隆恩異數寵眷有加賚予便蕃貢物頻減病則賜之以珍藥歿則錫之以榮名

特遣近臣優頒奠帛今朕纘承大統爾嗣王李

昫遣爾恭進賀表朕嘉爾嗣王忱悃肫篤又念爾係嗣王宗族特行召見以示優禮爾歸告爾嗣王繼乃祖父之緒夙夜黽勉慎守綱維毋替厥服長爲屏翰不忘恭順克殫忠誠朕必體

列聖怙冒弘仁俾爾遠藩保安於永久爾其識之○允浙江杭州左翼副都統帶色致仕特加都統銜食俸給拜他喇布勒哈番世職○添設陝西耀州金鎖關駐防外委把總一員兵二百名蒲城縣永豐塘坊外委把總一員兵五十名三水縣石門關把總一員兵六十名從川陝總督年羹堯請也○壬辰中元節

上詣

壽皇殿

大行皇太后梓宮前行禮舉哀○遣官祭

永陵

福陵

昭陵

暫安奉殿

孝陵

孝東陵

景陵○禁止出差官員不嚴束人役需索餽送騷擾地方州縣官亦不得借欽差公費名色私派里民○總理事務王大臣等議覆給事中碩塞條奏八旗都統印信清文係固山額真字樣額真二字所關甚鉅非臣下所可濫用應請改定以昭名分應如所請將固山額真改爲固山昂邦伊都額真改爲伊都章京將八旗印信改鑄給與從之○署撫遠大將軍貝子延信摺奏額爾得尼厄爾克托克托奈之子阿拉布濟索諾木達什來稱率兵與賊人交戰相拒六七日賊人退去領兵五百及妻子共一千餘口來投等語臣已遣往額爾得尼厄爾克托克托奈處居住奏入報聞○癸巳諭內閣下五旗諸王將所屬旗分佐

領下人挑取一切差役遇有過失輒行鎖禁籍沒家產任意擾累殊屬違例嗣後仍照舊例旗分人員止許用爲護衛散騎郎典儀親軍校親軍或諸王挑取隨侍之人或欲令所屬人內在部院衙門及旗下行走者兼管家務或需用多人以供差役或補用王府官職或令隨侍子姪著列名請旨將奉旨之處知會該旗都統等令都統等覆奏其旗分人員不許擅行治罪必奏聞交部僅有仍將旗分人員妄行擾累令其多供差役兼管散職著該都統等奏聞若都統等隱匿瞻徇一經御史叅劾即將該都統等治罪○命八旗各派滿洲御史二員稽察八旗一應事務調旗派用○甲午諭大學士等史書務紀其真而史才古稱難得蓋彰善癉惡傳信去疑苟非存心忠厚學識淹通未能定得失於一時垂鑒戒於久遠也有明一代之史屢經修纂尚未成書我



聖祖仁皇帝大公至慎之心旌別淑慝務期允當。惟恐幾微未協遂失其真。鄭重周詳多歷年所。冀得良史之才。畀以編摩之任。朕思歲月愈久。考據愈難。目今相去明季將及百年。幸簡編之紀載猶存。故老之傳聞不遠。應令文學大臣董率其事。慎選儒臣以任分修。再訪山林績學之士。忠厚淹通者。一同編輯。俾得各展所長。取舍折衷。歸於盡善。庶成一代信史。足以昭示於無窮。著將滿漢大臣等職名開列具奏。諭工部沿河州縣向有額設河夫。自百名至數十名不等。興工則併力濬築。工停則分遣巡防。損者隨補。塌者隨培。修搶擁護。俱係熟諳夫役。故雖偶有衝決。不能爲患。近聞管夫河官侵蝕河夫工食。每處僅存夫頭數名。遇有工役。臨時僱募鄉民充數。塞責。以致修築不能堅固。損壞不能隄防。冒銷誤工。莫此爲甚。嗣後著總河及近河各省巡撫嚴飭河道。不時稽查。按冊覈實。禁絕虛

冒。儻有仍前侵蝕。貽誤河防者。即行指名題參。○盛京兵部侍郎伊忒海緣事革職。調戶部左侍郎。吳爾泰爲盛京兵部侍郎。兵部左侍郎常壽爲戶部左侍郎。以兵部右侍郎阿克敦專管翰林院掌院學士事。陞詹事府詹事伊都立爲兵部左侍郎。都察院左副都御史牛鈕爲兵部右侍郎。○兵部右侍郎王度昭患病乞休。允之。陞署都察院左副都御史李紱爲兵部右侍郎。以鴻臚寺卿李鳳蕭署理兵部左侍郎。軍前禮部左侍郎薩哈布爲額外侍郎。調工部左侍郎登德爲禮部左侍郎。轉工部右侍郎尹泰爲左侍郎。陞都察院左副都御史薩爾納爲工部右侍郎。仍兼左副都御史。○擢戶科掌印給事中鄂托拜爲內閣學士。兼禮部侍郎。太常寺寺丞孫卓爲太常寺卿。○補行雲南貴州二省。康熙六十年分軍政。卓異官四員。不謹官四員。年老官八員。有疾官五員。才力不及官七員。分別



陞賞處分如例○乙未御史湯之旭條奏律例款項請酌定畫一刊刻成編頒示天下得旨此所奏律例畫一之事未嘗不是但天下事有治人無治法得人辦理則無不允協不得其人其間舞文弄法正自不少雖條例畫一弊終難免著大學士等會同總理事務王大臣及刑部都察院詳酌密奏○加四川松潘總兵官周瑛爲都督僉事○丙申以軍前鑲黃旗滿洲副都統智勇爲額外副都統陞鑲白旗叅領常在爲鑲黃旗滿洲副都統○浙江學政馬豫緣事革職以山西道御史何世璠提督浙江學政○戊戌廣東巡撫年希堯疏報欽州澄海南海衛東莞所等二十九州縣衛所開墾六十一年分田地一百四十二頃有奇下部知之○下嫁喀喇沁多羅額駙門都之郡君故遣官致祭○己亥奉天將軍唐保住奏虧空錢糧各官應照數追完得旨將軍唐保住將虧空錢糧之存住等叅

奏甚是歷年以來諸臣不知感戴

皇考寬厚慈祥之恩轉以侵盜國帑勒索小民之事視爲固常玩法已甚不可不隨時整理此案係已往之事是以但加申飭儻三年之後仍復如是斷不寬宥爾等宜深悉朕心凡事須秉公辦理○以陝西固原提督李麟爲鑾儀衛鑾儀使調陝西涼州總兵官述明回京陞陝西西寧總兵官楊盡信爲固原提督辦理涼州總兵官事務以都統噶爾弼暫署固原提督實授黃喜林爲西寧總兵官庚子

上詣

壽皇殿

大行皇太后梓宮前行月祭禮○河道總督齊蘇勒疏報六月二十二日黃沁二水併漲從姚其營漫灘而來漸與隄頂相平將各處隄工漫坍八處水由原武陽武等縣流去至二十五日水勢消落各處坍卸隄工俱已斷流

其大溜仍走正河竝未遷徙得旨沁黃二水  
消落歸槽該督須速率河員將坍卸各工晝  
夜修築完固以禦秋汛○辛丑諭禮部尚書  
張廷玉曰

聖祖仁皇帝欽定孝經衍義一書廣博精深宜  
頒布海內使天下之人觀覽誦習以爲修身  
務學之本○山東巡撫黃炳摺奏秋禾暢茂  
雙穗瑞穀處處挺生採取恭進奉

上諭此誠

天地神祇竝

皇考聖靈垂佑之所致也今歲北四省俱報豐  
收閭閻自得充裕朕不勝慶幸亦由民風淳  
樸封疆大吏治理有方始克睹嘉穀之祥念  
茲感應神速愈當加勤職業仰答

天庥○河道總督齊蘇勒遵旨查奏東省湖隄  
可以蓄水濟運者在汶上則有南旺馬踏蜀  
山等湖在東平則有安山湖在濟寧則有馬  
場湖在魚臺則有南陽昭陽獨山等湖在滕

嶧二縣則有微山刺山等湖水漲則引河水  
入湖水涸則引湖水入漕隨時收蓄以備接  
應運河之淺古人名曰水櫃實運道所資以  
爲利者也迨歷年既久昭陽湖因昔年黃河  
水淤積有肥土盡爲豪戶佔種安山南旺等  
湖原有隄界近因附近居民垂涎湖地或私  
種或開墾亦與昭陽無異臣除將湖邊已經  
成田者不追究外其未經耕種者俟湖水消  
落嚴行丈量樹立封界永行嚴禁侵佔將現  
在入湖之水設法收蓄濟運至馬踏蜀山馬  
場南陽諸湖夏秋水發則皆深滿原設有斗  
門閘座加以土壩則可以收蓄深廣以備來  
年濟運之資而獨山一湖濱隣運河一線小  
堰且多缺口現在相度水勢如遇河水長聽  
其灌注湖中一見湖河之水相平即便築堰  
截堵河水消落之後不許湖水走洩涓滴或  
遇運河淺溢則引湖水從高下注庶幾接濟  
便捷至諸湖修築隄防或栽封樹再將閘座

仍照舊例灌塘積水俟其盈滿啓閉以時則湖水深廣運道流通漕艘無阻滯之虞矣下部知之○壬寅以舅舅公隆科多大學士王項齡爲明史監修官署理大學士事務工部尚書徐元夢禮部尚書張廷玉左都御史朱軾翰林院侍講學士覺羅蓬泰爲總裁官○癸卯予故雲南臨元激江總兵官林國賢祭葬贈右都督甲辰以加上列祖尊謚典禮先期遣官祭告

天地

社稷○陞詹事府詹事涂天相爲內閣學士兼禮部侍郎○正黃旗蒙古都統圖拉緣事革職調正黃旗漢軍都統汪悟禮爲本旗蒙古都統○以果郡王允禮管理鑲藍旗漢軍都統○免陝西涼州古浪所屬大靖地方康熙六十年分電災額賦有差○乙巳免江蘇等衛康熙四十六七九年分屯折未完銀兩有

差免陝西平涼等廳州縣衛所康熙六十年分旱災額賦有差○予故廣東瓊州總兵官任重遠祭葬如例○丙午諭諸王大臣及内外文武各官朕惟自古帝王撫御寰區治化隆盛中外臣民紀功述德頌禱情殷故天保之詩卷阿之什擬升恒於日月期純嘏之彌長祝釐之詞形諸歌詠者往往有之我

聖祖仁皇帝御極六十餘年至治神功參兩天地深仁厚澤超邁百王薄海内外無不食德飲和淪肌浹髓臣工黎庶無以致其感激愛戴之誠故每於

萬壽聖節京師暨直省各建道場誦經祝壽總因

聖祖仁皇帝恩德及人者至久感人者至深諸臣於無可報答之中勉竭忱悃以普天同慶之心儆華封稱祝之意在諸臣亦藉以自盡其心耳今朕嗣位之初夙夜祗懼不敢少懈所以立政圖治者安能及

聖祖之萬一。爾諸臣工於朕誕日。儻仍照從前建立道場。則自此以後。將成定例。在京王公以下。及部院等官。未免從事靡文。稽遲公事。在外文武大吏。亦恐科派屬員。貽累地方。且以有用之財。供無益之費。既非朕以勤儉勵有位之心。又非朕以康阜期海內之意。尚虛文而無裨實政。朕甚無取焉。特宣布中外。於朕誕日。毋得建立祝壽道場。但冀內外諸臣。各殫厥心。勉襄化理。勤修職業。利濟蒼生。以慰朕宵衣旰食之焦勞。即不啻天保卷阿之祝頌矣。若不遵諭。旨朕必加以處分。不少寬貸。○諭大學士等。藏地兵馬已撤。計程將至內地。從前統領兵馬之大臣。怠忽者多。縱兵橫行。騷擾民人。種種無恥之行。朕所深知。著嚴行該地方官。竝統領兵丁之大臣。若不各自約束。仍縱所屬兵丁。跟役任意。或前或後行走。逞強搶奪。肆無紀律。地方官於何處。拏獲。即將該管官一併拘留。該處請旨。將統領

之大臣。從重治罪。若地方大臣。徇情隱蔽。朕別有訪聞。將地方大臣官員一併治罪。將此諭旨明白曉諭兵馬。經行各路軍民知悉。○諭禮部。湖南士子赴湖北鄉試。必經由洞庭湖。湖水浩瀚。無涯波濤不測。六七月間。風浪尤險。間有覆溺之患。朕心甚爲惻然。或至士子畏避險遠。裹足不前。又非朕廣育人材之意。今欲於湖南地方。建立試院。每科另簡考官。俾士子就近入場。永無阻隔之虞。共遂觀光之願。明年二月爲鄉試之期。爾部可即行文湖南巡撫。若能於二月之前。預備場屋。則於明春。即分湖北湖南兩闈考試。儻爲期已迫。預備不及。則於下科舉行。至於湖廣通省。取中原有定額。今既分兩闈。其取中之數。應如何分別之處。著湖南湖北巡撫公議。湖廣總督從公酌定具奏。○廣西巡撫孔毓珣。摺奏。左江鎮標公費分糧浮多。其中應留應補之處。奉

上諭將弁之名糧須酌量去留必令各得養廉  
方爲允當營伍中但能操習嫺熟器械整齊  
亦何必在此瑣屑處計較總要酌中爲之○  
命尚書侍郎等官每日一人輪班奏事密摺  
封進○陞翰林院侍讀學士岳色爲都察院  
左副都御史翰林院侍讀鄂爾奇爲詹事府  
詹事

大清世宗敬天昌運建中表正文武英明寬仁  
信毅大孝至誠憲皇帝實錄卷之九

大清世宗敬天昌運建中表正文武英明寬仁  
信毅大孝至誠憲皇帝實錄卷之十

敕修

雍正元年癸卯八月戊申朔祭

大社

大猷遣貝勒阿布蘭行禮○總督倉場侍郎李  
英貴緣事革職擢直隸巡道法敏爲總督倉  
場侍郎○己酉加上

太祖承天廣運聖德神功肇紀立極仁孝睿武  
弘文定業高皇帝尊謚曰

太祖承天廣運聖德神功肇紀立極仁孝睿武  
端毅弘文定業高皇帝

孝慈昭憲敬順慶顯承天輔聖高皇后尊謚曰

孝慈昭憲敬順仁徽慶顯承天輔聖高皇后

太宗應天興國弘德彰武寬溫仁聖睿孝隆道

顯功文皇帝尊謚曰

太宗應天興國弘德彰武寬溫仁聖睿孝敬敏

隆道顯功文皇帝。

孝端正敬仁懿莊敏輔天協聖文皇后尊謚曰

孝端正敬仁懿哲順莊敏輔天協聖文皇后

孝莊仁宣誠憲恭懿翊天啓聖文皇后尊謚曰

孝莊仁宣誠憲恭懿至德翊天啓聖文皇后

世祖體天隆運英睿欽文大德弘功至仁純孝

章皇帝尊謚曰

世祖體天隆運定統建極英睿欽文大德弘功

至仁純孝章皇帝。

孝惠仁憲端懿純德順天翼聖章皇后尊謚曰

孝惠仁憲端懿慈淑純德順天翼聖章皇后

孝康慈和莊懿恭惠崇天育聖章皇后尊謚曰

孝康慈和莊懿恭惠溫穆崇天育聖章皇后恭

奉

神牌入

太廟

上親詣行禮○諭各省鹽政官員國家欲安黎

庶莫先於厚風俗厚風俗莫要於崇節儉周

禮一書上下有等財用有度所以防僭越禁

驕奢也孟子亦曰食時用禮菽粟足而民無

不仁朕臨御以來躬行節儉欲使海內之民

皆敦本尚實庶康阜登而風俗醇夫節儉之

風貴行於閭里而奢靡之習莫甚於商人朕

聞各省鹽商內實空虛而外事奢侈衣服屋

宇窮極華靡飲食器具備求工巧俳優妓樂

恒舞酣歌宴會嬉遊殆無虛日金錢珠貝視

爲泥沙甚至悍僕豪奴服食起居同於仕宦

越禮犯分罔知自檢驕奢淫佚相習成風各

處鹽商皆然而淮陽爲尤甚使愚民尤而效

之其弊可勝言哉爾等既司鹽政宜約束商

人嚴行禁止出示曉諭諄切勸誡使其痛自

改悔庶循禮安分不致蹈僭越之愆而省一

日之靡費。即可以裕數日之國課。且使小民皆知警惕。敦尚儉約。於民生亦有裨益。庶不負朕維風振俗之意。若仍前奢侈。不知悔改。或經朕訪聞。或被督撫叅劾。商人必從重究治。爾等亦不能辭徇縱之咎。○諭各省關差官員。國家之設開稅。所以通商。而非以累商。所以便民。而非以病民也。朕撫御寰區。加惠黎庶。惟恐民隱不能上達。近聞權關者。往往寄耳目於胥役。不實驗客貨之多寡。而止憑

胥役之報單。胥役於中。未免高下其手。任意勒索。飽其欲者。雖貨多稅重。而蒙蔽不報者有之。或以重報輕者亦有之。不遂其欲。雖貨少稅輕。而停滯關口。候至數日。尚不得過。是以國家之額稅。聽猾吏之侵漁。以小民之脂膏。飽姦胥之谿壑。司其事者。竟若罔聞知乎。又聞放關。或有一日止一次者。江濤險急。河路窄隘。停舟候關。於商民亦甚不便。嗣後權關者。務須秉公實心查驗。過關船隻。隨到隨

查。應報稅者。納稅即放。不得任胥役作弊。勒索阻滯。以副朕通商便民之意。至於崇文門收稅。及分派各處查稅之人。亦有多方勒索。分外苛求之弊。京師爲四方輻輳之地。行李絡繹。豈宜苛刻滋擾。監收者尤當不時稽查。杜絕弊端。爾等若不遵諭旨。經朕訪聞。定行重治其罪。○庚戌。

上詣

壽皇殿

大行皇太后梓宮前祭奠舉哀。○監察御史孫塔等題。參戶部事件。違限得旨。從前戶部堂官。將部中事件。累百壅積。怠玩不理。自怡親王辦理戶部事務。於展限四十日之內。一切積弊。剔除殆盡。獎勸屬員。清理數千案件。甚屬可嘉。即使偶然遺漏一二小事。不但無庸議處。其清理如許事案。尚應議敘。察議之處。著從寬免。至御史孫塔等。以逾限題參。如此方是。凡勤敏効力之人。偶有過失。姑從寬宥。

其權在朕。大學士亦不得徇庇情面。草率歸結。至於戶部職掌。皆係銷算會同稽考錢糧之事。較於別部。加倍繁多。非如銓選地方員缺等項。可比。似應稍展限期。得細加察核。於事更有裨益。著都察院科道。將戶部事件。展限歸結之處。另行定議具奏。尋議。嗣後戶部辦理事件。其本部題覆者。於原限二十日外。加增十日。其行查會稿各衙門者。於原限三十日外。加增十日。如過限不行完結。照例查叅。永著為例。從之。○察哈爾總管常濟保。以老病乞休。命給副都統銜致仕。○壬子。調福建金門總兵官聶國翰。為福建南澳總兵官。○癸丑。以詹事府少詹事塞楞額。翰林院侍講文岱。檢討朱曙蓀。俱充日講起居注官。○甲寅。諭兵部。提督總兵。副將等官。仍照舊例。不許在任所置產入籍。其叅將以下。俱係微員。任所縱有房產。諒亦微薄。若概勒歸原籍。必致困累。爾等會同九卿。定議具奏。尋議。叅

將以下等官。任所置有產業。或本身休致。事故解退。或經身故。子孫留住任所。有欲在彼入籍者。許令地方官報明督撫。即准其入籍居住。田土丁糧。與土著之民一體輸納。從之。○調山西布政使連肖。先回京。以山西按察使高成齡。署理山西布政使司。布政使。○乙卯。以鑲黃旗滿洲副都統阿林保。署正白旗護軍統領。○鑲黃旗漢軍副都統滿丕。緣事革職。調正藍旗蒙古副都統巴爾呼達。為鑲黃旗漢軍副都統。陞一等侍衛莽喀拉。為正藍旗蒙古副都統。察哈爾總管富爾丹。為鑲紅旗蒙古副都統。○陞兩廣督標中軍副將雅斯哈。為廣東右翼總兵官。○兵部議覆。巡視臺灣御史吳達禮奏言。諸羅縣北。半線地方。民番雜處。請分設知縣一員。典史一員。其淡水係海岸要口。形勢遼濶。竝請增設捕盜同知一員。均應如所請。從之。尋定諸羅分設縣曰彰化。○丙辰。



太宗文皇帝忌辰遣官祭

昭陵○

上詣

壽皇殿

大行皇太后梓宮前祭奠舉哀○以禮部尚書

張廷玉兼管翰林院掌院學士刑部尚書勵

廷儀專理刑部事務○免山西霍州靈石等

九州縣借賑銀六萬五千六百兩有奇○丁

巳遣大學士嵩祝祭

先師孔子○

上親書

景陵碑匾復命誠親王淳親王及翰林官善書

者恭寫一幅隨召九卿及南書房翰林一並

敬閱諭曰

景陵碑匾事關重大誠親王淳親王素工書法

朕已令其恭寫翰林中善書者亦令其恭寫

朕早蒙

皇考庭訓做學

御書常荷嘉獎今

景陵碑匾朕亦敬謹書寫非欲自耀已長但以

大禮所在不親寫於心不安爾諸臣可公同

細看不必定用朕書須擇書法極好者用之

方愜朕心諸臣奏曰

御筆之妙天矩自然而仁孝誠敬之意流溢於

楮墨之間正與

陵寢大事相稱

聖祖仁皇帝在天之靈實爲欣慰○都察院題

請掌河南道御史得旨前因巡城裁去御史

一員故將漢軍御史歸併漢人班內分派巡

城其餘仍照漢軍舊例不必更改掌河南道

缺關係緊要著都察院揀選嗣後掌河南京

畿二道缺出俱著揀選具奏○戊午

太祖高皇帝忌辰遣官祭

福陵○以恭上

大行皇太后尊謚遣官告祭

天

地

太廟

社稷

奉先殿○遣官告祭

景陵○以兩廣總督楊琳專管廣東總督事務

陞廣西巡撫孔毓珣爲廣西總督仍兼巡撫

事務○大學士等奏言江南山東所產麥穀

皆兩歧雙穗蜀黍一幹四穗內池蓮房同莖

分蒂諸瑞疊呈實皆

皇上盛德之所感召請宣付史館下部知之○

予故福建海壇總兵官程漢鵬祭葬如例○

己未恭上

大行皇太后尊謚

上素服率諸王大臣文武官員詣

壽皇殿

大行皇太后梓宮前躬獻

冊

寶致祭行禮冊文曰母儀正位仁風誕播於八

方。壹德流輝。寶訓永垂於萬世。進徽稱於清

廟。玉冊爰新。議典禮於容臺。彤編式煥。欽惟

皇妣大行皇太后華渚炳靈。慶都凝瑞。秉含弘

之淑性。應地安貞。樹難肅之芳型。儼天作則

贊襄內治。逮膺御以加恩。輔佐

先皇。自宮庭而起化。寬仁夙著。胥食德而飲和

樸素攸崇。務去奢而從儉。荷生成於

聖母。誕育藐躬。極尊養於慈闈。未酬厚載。上推

崇之號。允諧萬國歡心。執謙讓之衷堅。却百

僚敦請。音容倏隔。應慕實深。茲當升祔之辰

莫罄顯揚之悃。嘉言懿行。永懷至德於坤元

琬刻瑤琨。肅薦明禋於閔寢。謹奉冊寶。恭上

尊謚曰

孝恭宣惠溫肅定裕贊天承聖仁皇后。伏冀默

扶景祚。宏衍慶源。啓後人紹衣之圖。克承克

繼。導宸宇龐鴻之祉。俾熾俾昌。謹言。寶文曰

孝恭宣惠溫肅定裕贊天承聖仁皇后之寶○

諭兩江總督查弼納。江南提督高其位。署江

蘇巡撫何天培。浙江巡撫李馥等。太湖三萬六千頃。連跨數郡。地勢既廣。支流復多。爲盜賊出沒之所。平時既易藏姦。巡捕恐難著力。爾等均有統轄之責。可公同確議。遴選賢員。清查嚴緝。務俾匪類就擒。餘黨解散。地方長享寧靜之福。以副朕禁盜安民之意。○福建巡撫黃國材。摺奏服色僭越。請行分別嚴禁。違者以僭妄治罪。奉

上諭。奢僭之弊。朕亦稔知。但陋習因循。一旦遽然禁止。若非立法嚴峻。有犯無宥。不能使之永遠遵奉。揆之於理。移風易俗。宜漸不宜驟。究以從容不迫。爲貴。爾等姑且徐徐勸導。誘掖維持。倘仍不改革。然後嚴爲定制。以法繩之耳。○庚申。恭上

大行皇太后尊謚禮成。頒詔天下。詔曰。朕惟國之盛典。報本莫重於尊親。禮之大經。易名實垂於永世。蓋恩深顧復。斯必著其徽稱。惟事極推崇。爰有資乎顯號。彝章攸在。簡冊具存。

欽惟

皇妣大行仁壽皇太后。端莊恭儉和惠。柔明仁孝。本乎天資。靜專同乎坤載。夙事

皇考。懋著壺儀。誕育藐躬。備隆母道。劬勞鞠育。恩殫弱齡。諄復命提。誨周成立。寬仁逮下。厚澤洽於宮庭。謙約持身。盛德孚於禁掖。及朕祇承丕業。紹續皇基。每因定省之辰。時切憂勤之懃。慈敷中外。化及家邦。方期合四海之歡心。永以奉

慈闈之孝養。夫何遽昇仙馭。莫逮瞻依。追感方深。銜哀何極。惟藉鴻名之薦。少伸孺慕之誠。是用稽考禮文。恪遵舊典。祇告

天

地

宗廟

社稷。於雍正元年八月十二日。率諸王貝勒大臣。文武羣臣。恭奉冊寶。上

尊謚曰

孝恭宣惠溫肅定裕贊天承聖仁皇后既展追崇之大義。當推教孝之宏仁。於戲。至德弘恩。豈掄揚之可盡。隆名煥號。尚昭顯於無窮。布告萬方。咸使知悉。○詔內恩款。凡十五條。○禁止官民人等服用五爪龍紗緞。從兵部右侍郎牛鈕請也。○辛酉。以太常寺卿魏方泰爲詹事府詹事。○奉差開河大學士張鵬翮等奏豫省北岸欽隄。關係黃沁並衛河運道。理合保固。再秦家廠大壩北尾隄。應築隄一道。接連遙隄。庶溢出之水。不致下注。又遙隄單薄。應再加幫築。得旨。

聖祖指示釘船幫挑水壩。既應保固。即當從壩尾。接至遙隄。若從秦家廠北壩尾。接至遙隄。恐其兜水。其秦家廠月隄。與從中填實工價。應行估計之處。著派一員前往。與齊蘇勒穆曾筠。石文煒會同辦理。○都察院議覆御史戴芝奏稱。戶部支放兵餉。二月八月兼放制錢。請改爲兩月一次。銀八錢二兼放。戶部寶

泉局。鑄錢不敷。行文工部。於寶源局領取。添給俾軍民等。知陸續放錢。則市價不至騰貴。應如所請。從之。○癸亥。以禮部尚書兼管翰林院掌院學士事張廷玉。翰林院編修黃之雋。俱充日講起居注官。○添設歸化城理事同知一員。從歸化城都統丹晉請也。○定朝陽門外新建倉曰萬安倉。設滿漢監督各一員。從倉場侍郎法敏請也。○予故鎮國公三官保祭二次。造墳立碑如例。○予故福建福寧總兵官費俊。廣東右翼總兵官謝治祭葬。俱贈署都督僉事。○甲子。

孝恭仁皇后梓宮將發。引行祖奠禮。上親詣奠獻。哀慟良久。諸臣再三勸請。方還宮。○是日己刻。

上御乾清宮西煖閣。召總理事務王大臣滿漢文武大臣。九卿入面諭曰。我聖祖仁皇帝爲宗社臣民計。慎選於諸子之中。命朕繼承統緒。

於去年十一月十三日倉猝之間一言而定大計薄海內外莫不傾心悅服共享安全之福

聖祖之精神力量默運於事先貫注於事後神聖睿哲高出乎千古帝王之上自能主持若朕則豈能及此也

皇考當日亦曾降

旨於爾諸臣曰朕萬年後必擇一堅固可託之人與爾等作主必令爾等傾心悅服斷不致貽累於爾諸臣也朕自即位以來念

聖祖付託之重

太祖

太宗

世祖創垂大業在於朕躬夙夜兢兢惟恐未克負荷向日朕在藩邸時坦懷接物無猜無疑飲食起居不加防範此身利害聽之於命蓋未任天下之重也今躬膺

聖祖付託神器之重安可怠忽不爲長久之慮

乎當日

聖祖因二阿哥之事身心憂悴不可殫述今朕諸子尚幼建儲一事必須詳慎此時安可舉行然

聖祖既將大事付託於朕朕身爲

宗社之主不得不預爲之計今朕特將此事親寫密封藏於匣內置之乾清宮正中

世祖章皇帝御書正大光明匾額之後乃宮中最高之處以備不虞諸王大臣咸宜知之或收藏數十年亦未可定諸王大臣等當各竭忠悃輔弼朕躬俾朕成一代之令主朕於爾等亦必保全成就篤厚恩誼豈非家國天下之大慶乎朕意若此諸王大臣其共議之諸王大臣奏曰

皇上聖慮周詳臣下豈有異議惟當謹遵

聖旨

上曰爾諸臣既同心遵奉諭旨朕心深爲慰悅乃命諸臣退仍留總理事務王大臣將密封

錦匣收藏於乾清宮正大光明匾額後乃出  
○以鑲紅旗蒙古副都統富爾丹署鑲藍旗  
護軍統領○兵部分別議敘陝西四川雲南  
官兵平定西藏功得旨平定西藏乃自古未  
至之絕域所以

皇考曾有從優議敘之

旨况

皇考當春秋高邁備兵於極邊宣揚威畧峻德  
鴻功允垂億萬斯年之美政也此一次議敘

軍功前固無例可援後亦不得爲例將軍延  
信著封爲貝勒兩路率領八旗官員進勒之  
將軍等著給與世襲三等阿達哈哈番叅贊  
大臣給與拜他喇布勒哈番副都統營總等  
給與拖沙喇哈番其護軍校驍騎校給與頭  
等功牌二面仍加一級綠旗官員經大將軍  
等咨送冊開頭等者照攻取打箭爐功加一  
倍二等者功加五等三等者功加二等至於  
滿洲漢軍綠旗之外委官俱係一體効力人

員無論由部委外委概行從優議敘以仰副

我

皇考恩綸特沛從優議敘之

諭旨○乙丑

孝恭仁皇后梓宮發引

上親詣

壽皇殿望見

梓宮即哀慟不勝行禮畢奉

梓宮昇龍輿啓行

上步從至景山東門外諸王滿漢文武大小官

員蒙古諸王台吉塔布囊等俱齊集舉哀

上由地安門出東直門是日駐蹕楊家園○丙

寅

上奉

孝恭仁皇后梓宮啓行是日駐蹕小新莊○命

賞叩謁

梓宮之察哈爾厄魯特散秩大臣羅卜藏錫拉

布等馬匹行糧○兵部遵旨議奏駐防奉天

杭州。成都三處。各增設蒙古協領一員。右衛。西安。荊州。江寧四處。各增設蒙古協領二員。管轄蒙古兵丁。至滄州。河南等處。嗣後遇有城守尉等缺出。令該旗揀選蒙古官員與滿洲官員。一同引見補授。從之。○兵部分別議敘福建官兵克復臺灣功。得旨。臺灣地方自古未屬中國。

皇考聖畧神威。取入版圖。逆賊朱一貴等倡亂。佔據臺地。

皇考籌畫周詳。指授地方官員遣調官兵。七日之內。剿除數萬賊衆。克復全臺。

皇考當春秋高邁。威揚海外。功德峻偉。官兵感戴。

皇考教養之恩。奮勇攻取。甚屬可嘉。固不必援引前例。後亦不得爲例。茲仰副。

皇考從優議敘之曠典。官員現行議敘功加外。著概行各加一等。總督滿保雖有失陷地方之罪。但一聞事發。即親往廈門。撫慰衆心。遵。

依

皇考指示調遣官兵。七日之內。克復臺灣。滿保著兼兵部尚書職銜。提督施世驃統領大兵。徑度海洋。鼓勵將士。屢經大戰。擊敗賊衆。七日之內。克復臺灣。厥功甚大。施世驃著給與世襲一等阿達哈哈番。總兵官藍廷珍。曾協助施世驃。著給與世襲三等阿達哈哈番。水師營副將許雲。失陷臺灣。非關伊罪。奮勇前進。多殺賊衆。身又陣亡。著給與世襲拜他喇布勒哈番。叅將羅萬倉。遊擊游崇功。俱係陣亡。著給與世襲拖沙喇哈番。總兵官歐陽凱。著追贈太子少保。叅將林亮。著給拜他喇布勒哈番。遊擊董方。守備何勉。俱著給拖沙喇哈番。○工部議覆河道總督齊蘇勒疏言。陽武大隄。綿亘五千餘丈。地處卑窪。有關運河。請添築遙隄。以爲重障。應如所請。從之。○丁卯。

上奉

孝恭仁皇后梓宮啓行是日駐蹕呂家莊○諭  
總理事務王大臣等都統前鋒統領護軍統  
領副都統內頗有家計艱窘之人頃者外省  
副都統等既已酌給親丁坐糧將如何酌給  
伊等坐糧之處著議奏尋議京城滿洲都統  
親丁八名蒙古漢軍都統領侍衛內大臣六  
名前鋒統領護軍統領步軍統領五名滿洲  
副都統三名蒙古漢軍副都統二名步軍總  
尉一名每月給銀三兩每歲給米一十二石  
每石折銀一兩從之○吏部議覆廣西總督  
孔毓珣奏言粵西南太慶思四府缺出舊例  
將桂平潯柳五府屬內選擇調補歷俸三  
年具題報滿今改爲揀選之員五年報滿由  
部掣選之員仍通省較俸陞轉遲速不均請  
將揀選人員仍照本省調補之例三年報滿  
由部掣選者五年報滿應如所請從之○戶  
部議覆長蘆巡鹽御史莽鵠立奏言長蘆六  
十一年鹽引因年歲歉收河水乾淺引鹽積

多運少所轄一百八十餘州縣銷引未完者  
甚多請展限一年長蘆產鹽有南北二場北  
場舟行利便衆商易於買運南場陸路腳價  
稍重以致運者絕少請於本年額課內留銀  
五萬兩遴委能員專司收買發商行運其買  
鹽官本隨課兼徵均應如所請從之○戊辰

上奉

孝恭仁皇后梓宮啓行是日駐蹕薊州城南○  
己巳兩

孝恭仁皇后梓宮未啓行

上駐蹕行宮○管理藩院侍郎事都統拉錫奏  
言喀喇沁等處歲歉乏食請於查覆到日賑  
濟得旨據奏俟查覆到日加恩拯救現今乏  
食人等必至失所著戶部作速派官二員領  
銀五萬兩前往再著侍郎本錫副都統阿林  
保作速馳驛赴喀喇沁處俟錢糧一到即行  
散賑扎薩克八處俱一面清查一面給發毋  
得稽遲○庚午



上奉

孝恭仁皇后梓宮啓行是日駐蹕梁家莊○命往青海侍郎常壽摺奏臣於七月二十二日抵親王羅卜藏丹津駐牧之沙拉圖地方恭宣諭旨令伊等兄弟罷兵和睦據羅卜藏丹津訴稱戴青和碩齊察罕丹津額爾得尼厄爾克托克托奈欲霸佔招地捏言我遣使準噶爾欲同策妄阿喇布坦背叛以爲讒害是以衆台吉等不服會盟興兵并備言戴青和碩齊等過惡擬於數日起程渡河與決勝負臣察其情形勢難和好後據察罕丹津訴稱羅卜藏丹津興兵逐額爾得尼厄爾克托克托奈於內地今勒令衆台吉聚兵於巴爾托羅海處意欲獨佔西招青海地方其兵大約不過一萬二三千名其黨率多勒從若渡河前來定即力拒等語又據衆蒙古告稱羅卜藏丹津勒令衆等呼伊爲達賴混台吉其餘台吉俱令呼舊日名號一概不許稱呼王貝

勒貝子公封號細揣其意先滅額爾得尼厄

爾克托克托奈再滅察罕丹津獨佔青海會同衆台吉奏請賞伊汗號駐佔招地遙管青海顯然可見至問遣往準噶爾處使人音信據云準噶爾以青海人等不足憑信又云準噶爾兵丁已至噶斯口前九月內可至青海等語今將臣所見情形與羅卜藏丹津所呈蒙古字奏章二本並與臣蒙古字書一封密奏得旨此事甚大行在總理事務王大臣議政大臣詳議并發往在京之總理事務王大臣議政大臣等詳議具奏○辛未

上謁

暫安奉殿

孝陵

孝東陵率諸王文武官員行禮舉哀遂詣

景陵望見

陵門即長慟至

享殿躬奠行禮哭不停聲傳諭諸王大臣悉至

聖祖仁皇帝梓宮前衆皆感慟哭聲震地良久  
孝恭仁皇后梓宮至

上跪迎

景陵門外安奉

享殿奠獻行禮號泣不止近侍諸臣敦請節哀  
上出

景陵門猶顧望流涕是日駐蹕馬蘭峪城東南

○諭諸王大臣等

皇太后素性謙謹事

聖祖仁皇帝數十年恪恭罔懈現今

享殿內奉

聖祖仁皇帝梓宮

皇太后梓宮暫安奉於

蘆殿一應供獻及祭文不可由中門出入俱應

於西門行走以仰體我

皇妣謙冲至意○壬申秋分夕

月於西郊遣裕親王保泰行禮○

上詣

景陵

聖祖仁皇帝梓宮前上食奠獻旋詣

孝恭仁皇后梓宮前行暫安

享殿禮躬親奠獻慟哭良久扈從諸王滿漢文

武大臣蒙古諸王台吉塔布囊等齊集舉哀

是日

上駐蹕行宮○癸酉

上欲仍詣

景陵瞻仰奠獻諸王滿漢大臣恭念

聖躬連日勞瘁且哀痛過甚奏請停止

親往諭曰

梓宮於初一日安奉

地宮及今每日親往尚得躬親瞻仰過此則不

得瞻仰矣諸臣復再三陳奏始允焉○是日

駐蹕行宮○召入

陵寢官員諭曰

聖祖仁皇帝鹵簿之內備鞍馬匹向在御廐俱

曾經

皇考乘騎應送至達里剛愛交與福壽敬謹牧養俾之終老若有私自騎用及抵換者事覺即行正法○甲戌

上詣

景陵

聖祖仁皇帝梓宮前上食奠獻旋詣

孝恭仁皇后梓宮前行百日祭禮奠獻哭泣扈從諸王滿漢文武大臣蒙古諸王台吉塔布囊等齊集舉哀禮畢

上回駐行宮○總理事務王大臣等遵旨議奏羅卜藏丹津久懷異志糾衆盟誓

皇上念伊祖顧實汗恭謹效順不即加罪特遣侍郎常壽諭以利害前往和解羅卜藏丹津並不聽常壽之言欲與戴青和碩齊察罕丹津交戰又冀望汗名號又私稱伊爲達賴混台吉殊屬背逆現今伊欲往察罕丹津處爭戰應調遣西寧之兵俟羅卜藏丹津渡黃河時於渡口邀截其後至松潘兵丁請令提督

岳鍾琪帶領前往就近應援以張聲勢其西路軍務應行文年羹堯詳加定議辦理從之○駐扎西寧侍郎常壽摺奏親王戴青和碩齊察罕丹津領兵與羅卜藏丹津相持勢難抵敵率妻子屬人一百四十餘名來至河洲老鴉關外臣即令其進邊居住其餘人衆令伊寨桑管束邊外防守要隘奏入報聞○乙亥

聖祖仁皇帝升祔

太廟屆期命大學士等恭奉

神主填青

上曰填青典禮所關最重古人必取名望素著德行純粹學問淵深者以充此任今爾等位既貴顯人品皆優是以特加簡命爾等當體朕敬恪之誠潔誠齋戒屏除塵慮儼如

聖祖在

天之靈陟降上下誠意所孚洋洋如在方副朕一片孝思爾等不必有意於哀慟不必有意

於儀文只以一誠感格爲是○

上駐蹕行宮○予故食都統俸圖什希祭葬如例○丙子

上詣

景陵

聖祖仁皇帝

孝恭仁皇后享殿內行奉移

梓宮敬安地宮禮哭泣奠獻旋奉移

梓宮安奉

寶城前

蘆殿內

上率扈從諸王滿漢文武大臣蒙古諸王台吉

塔布囊等行禮舉哀畢回駐行宮○諭各蒙

古王貝勒貝子扎薩克台吉塔布囊等自爾

先世歸附

太祖

太宗蒙被聖化於茲五六代矣世締國姻恩深祿重兄弟主臣洽比保聚安居樂業百有餘

年其間厄魯特噶爾丹猖獗弄兵破喀爾喀七旗侵及內扎薩克蒙古蹂躪遊牧之地

皇考爲爾等三次自將出師乃滅噶爾丹使爾等永享太平之福六十餘年以來爾等屬下偶有饑饉災傷莫不發帑與糧資給畜牧更派富戶屯田代耕使饑者復安散者復聚皇考養育爾等蒙古恩澤重矣大矣曩者郭爾羅斯以歲饑聞朕仰體

皇考聖意即遣大臣前往發倉賑救賞給牛羊

今喀喇沁翁牛特八旗又以歲饑聞復遣大臣前往即速查明饑口動用正項錢糧買米散賑夫一時阻饑朕雖賑之常年貧乏之民在爾各君長於本旗內裒多益寡互相調恤以養育之庶幾得所耳若仍然厚斂重徭納之於阨危之域使之至於散亡孰爲爾等納賦孰爲爾等供徭愛民惠下是第一要務不可不知也連歲災旱頻仍今年又遭饑饉爾等各子其民者如何減賦如何輕徭如何裕

其農功如何。寧其畜牧。爾等王貝勒大臣等議定。務使各得生理。以仰副我

皇考聖心。以慰朕心。定議之後。儻有顯背公議。仍然重賦苛役者。國法具在。非朕所得而私也。我

皇考目覩爾等長成。愛如子孫。事事包容。處處軫恤。爾等視

皇考如祖父侍

皇考之慈愛。每事懈怠。朕新即位。務須各盡爾

職。謹慎小心。管轄屬下。訓練兵丁。嚴禁盜賊

奉公守法。循分安生。仰報我

皇考軫愛之恩。俾朕得以仰法

皇考慈惠。爾等至意。始終保全。永永勿替。朕之

願也。今日特於

皇考梓宮前。諭爾等知之。

大清世宗敬天昌運建中表正文武英明寬仁  
信毅大孝至誠憲皇帝實錄卷之十

大清世宗敬天昌運建中表正文武英明寬仁  
信毅大孝至誠憲皇帝實錄卷之十一

監修總裁官光祿大夫總纂修官太僕寺卿加殿大學士兵部尚書總理兵部事務加十五級臣鄂爾泰

總裁官光祿大夫經筵日講官起居注太僕寺卿加殿大學士兵部尚書仍兼吏部尚書翰林院掌院

第三等伯加十二級臣張廷玉光祿大夫經筵日講官起居注太僕寺卿加殿大學士兵部尚書仍兼吏部尚書

翰林院掌院事加二級臣福敏光祿大夫經筵講官太子太傅東閣大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼吏部尚書鴻臚寺卿加三級臣奉

敕修

雍正元年癸卯九月丁丑朔早

實錄卷之十一

上詣

景陵至

碑亭即慟哭進至

明樓前

蘆殿內跪撫

梓宮哀號擗踊羣臣皆哭失聲已刻

上於

聖祖仁皇帝梓宮前行奠獻禮次於

孝恭仁皇后梓宮前行奠獻禮禮畢

上出至

陵寢門外向北跪哭執事諸臣恭率校尉等先

奉

聖祖仁皇帝龍輜入

寶城次奉

孝恭仁皇后龍輜入

寶城時諸王大臣及各官仰見有祥雲五色自

西北起覆於

景陵繚繞不散皆以為

實錄卷之十一

聖祖峻德神功之瑞應

皇上至誠大孝之感格焉隨奉安

梓宮於各寶牀陳

冊

寶於各石案畢恭閉

元宮石門

上復入

陵寢門於祭臺前奠獻畢

上依戀不捨哭無停聲羣臣再三跪勸

上方出至幄次更禮服午刻

上詣

隆恩殿行恭題

神主大祭禮大學士嵩祝王頊齡恭奉

聖祖仁皇帝神主填青大學士馬齊戶部尚書

田從典恭奉

孝恭仁皇后神主填青隨奉安

神牌於

寶座

土獻香獻帛獻酒行三跪九叩頭禮

上親捧

神牌奉安

黃輿內行三叩頭禮

黃輿由

隆恩殿中門出

上由東門先出跪候

黃輿過由別道恭候

黃輿至奉安於宿次

黃輿行夕奠禮是日

上回鑾駐蹕馬伸橋以

山陵禮成遣官告祭

暫安奉殿

孝陵

孝東陵遣官以升祔

太廟吉期告祭

天

地

太廟

社稷戊寅早

上詣

黃輿行朝奠禮畢跪送

神牌起行至駐蹕所設

黃輿安奉

神牌行夕奠禮是日駐蹕新店己卯早

上詣

黃輿行朝奠禮畢跪送

神牌起行

上先回京恭候奉迎

神牌遣官代行夕奠禮○調直隸古北口提督董象緯爲廣東提督陞山東登州總兵官何祥書爲直隸古北口提督山東臨清副將黃元驤爲山東登州總兵官○工部議覆河道總督齊蘇勒疏奏碭山縣黃河南岸陳家窑隄工卑小應加築三千五十七丈桃源縣黃河北岸七里溝隄身單薄建築月隄八百八十七丈宿遷縣黃河北岸葉家莊縷隄單薄加築月隄五百二十七丈均應如所請堅固修築從之○庚辰

神牌黃輿由朝陽門入諸王大臣滿漢文武官員齊集大清門外朝服跪迎

上於端門外朝服跪候

黃輿過至孰城門外

上詣

聖祖仁皇帝神牌黃輿前行三叩頭禮諸王詣

四后神牌黃輿前行禮

上親捧

聖祖仁皇帝神牌敬升奉安

太廟

太宗文皇帝之次諸王捧

四后神牌以次奉安遂行升祔

太廟致祭禮如時享儀禮畢

上更禮服詣

奉先殿恭捧

聖祖仁皇帝神牌諸王恭捧

四后神牌奉安於

奉先殿行致祭禮如朔望大祭儀禮畢還宮

是日恭上

孝誠仁皇后尊謚冊文曰道協坤元樹母儀而作則化隆內治揚聖淑以垂休晉千秋有耀之榮稱奉萬世無疆之寶冊欽惟

皇妣孝誠仁皇后慶鍾厚載德媲皇家當

先帝敕天凝命之辰乃



中宮應地含章之會。虔奉

重闈之滄瀟。曲慰慈顏。潔承

九廟之蘋蘩。克襄孝治。仁能逮下。推惠澤於掖

庭。恪以持身。贊勤勞於旰食。椒塗緬企芳型

閔久以長存。彤管昭垂懿範。如新而未遠。期

當

升配兩儀。均健順之功。事極尊崇。奕葉著肅。雖

之範。刻瑤函而煥彩。彝典丕彰。依玉几以薦

馨。徽音允協。謹奉冊寶恭上

尊謚曰

孝誠恭肅正惠安和儷天襄聖仁皇后。伏冀慈

恩默佑。錫介祉以熾昌。壹教永新。致協和於

悠遠。極顯揚之微悃。庶靈爽之式憑。謹言。寶

文曰

孝誠恭肅正惠安和儷天襄聖仁皇后之寶

恭上

孝昭仁皇后尊謚冊文曰。襄治化於昌朝。夙合

二儀之撰。耀徽音於典冊。聿昭萬葉之光。勲

華之盛烈。丕彰任姒之芳規。並播欽惟

皇妣孝昭仁皇后性含柔順。範表溫莊。華閱鍾

祥。協坤貞而作則。椒塗正位。偕帝德以交輝。

侍膳慈闈。克謹晨昏之奉。勞心中。壹每分宵

旰之勤。歲銘茂著於彤編。綸翟久辭於丹禁。

溯淑恭之懿行。茂典流光。揚藹吉之仁風。貞

珉煥彩。茲值繼承之始。彌深崇報之思。

清廟森嚴。考彝章而合祔。寶函鄭重。列俎豆以

升馨。謹奉冊寶恭上

尊謚曰

孝昭靜淑明惠正和欽天順聖仁皇后。伏冀在

天靈爽。永貽萬世之安。裕後儀型。長介億年

之福。進鴻稱而允協。垂琬琰以光昭。謹言。寶

文曰

孝昭靜淑明惠正和欽天順聖仁皇后之寶

恭上

孝懿仁皇后尊謚冊文曰。儷乾作則。坤元彰厚

載之功。體巽流徽。廟祀舉尊親之典。賁瑤函

於有耀熙鴻號於無窮欽惟

皇妣孝懿仁皇后毓粹高門騰芬戚畹佐顯承之弘烈壹政勤修篤慈愛之盛心

母儀懋著履和思順致誠孝於彤闈尚儉懷謙翼昇平於黼座撫冲齡而顧復備蒙鞠育之仁溯十載之劬勞莫報生成之德緬宮庭之佑啟翟茀如存感歲月之遷流萱幃久闕追維慈覆彌懷高厚之恩誕紹丕基倍切顯揚之願安貞令範洵應地以無疆炳曜徽音長配天而不泯謹奉冊寶恭上

尊謚曰

孝懿溫誠端仁憲穆奉天佐聖仁皇后伏冀淑靈式庇茂膺天祿之熾昌嘉德惟馨永廓聖圖之廣大潔必芬而肅薦耀金石以長垂謹言寶文曰

孝懿溫誠端仁憲穆奉天佐聖仁皇后之寶

辛巳以升祔

太廟禮成頒詔天下詔曰朕惟禮先報本孝首

尊親表功德之隆大祀著乎清廟原烝嘗之薦配食始於閔宮所以備登祔之儀洽神人之望舊章具在鉅典孔彰恭惟

皇考聖祖仁皇帝體合乾坤聲昭日月開萬年之景運揚

三祖之耿光 and 惠寬仁民物咸樂生遂性信誠節儉刑政悉內治外修廓從古未登之版圖要荒並隸弘歷代未施之聲教漸被無垠循繼述之功以守成而兼創業數聖賢之主實首出而無比倫惕厲憂勤六十一載之精神為黎民耗竭謳吟感慕千億兆人之思仰與天地悠長洵百世而不遷宜

九廟以崇饗

皇妣孝誠皇后正位璇宮作配宸極徽音懋著淑德素成

皇妣孝昭皇后明哲溫和恪莊柔順佐理內政表樹壹儀

皇妣孝懿皇后純粹天根敬恭性蘊動循禮則

行法前修慈撫朕躬恩勤篤摯

皇妣孝恭皇后孝仁端厚肅敬柔明誕育藐躬  
命提教切隆彰母道顧復恩深謙約持身惠  
慈撫下皆流輝於椒掖合繼善於丹闈允宜

同祀

神宮合登禮室謹率諸王貝勒文武羣臣於雍  
正元年九月初四日恭捧

聖祖合天弘運文武睿哲恭儉寬裕孝敬誠信  
功德大成仁皇帝神位

孝誠恭肅正惠安和儷天襄聖仁皇后神位

孝昭靜淑明惠正和欽天順聖仁皇后神位

孝懿溫誠端仁憲穆奉天佐聖仁皇后神位

孝恭宣惠溫肅定裕贊天承聖仁皇后神位合

祔於

太廟天象與坤儀同著

父恩與

母德俱深大典既成鴻施宜逮於戲寢成孔安  
儼若思之敬春秋匪懈凜如在之心陟降於

庭鑒一人之孝享篤厚其慶錫九有之恩膏

布告天下咸使聞知 詔內恩款凡十五條  
諭禮部自古祖功宗德制在不祧饗帝饗  
親祀應並舉報本之情罔極配

天之典宜隆仰惟我

皇考聖祖仁皇帝亶聰御宇至德誠民早歲而  
攬弘綱恩覃無外小心以勤昭事誠著升中  
寢園備物於春秋

重闡將敬於朝夕軫萬民之疾苦水旱預籌勵

百爾之勸懲賢愚立辨赦愆宥罪仁風廣被

祥刑發帑蠲租豐歲頻聞減賦時邁歌而黃

淮底定清問及而稼穡周知闕里隆九拜之

儀考亭躋十哲之列科目以增加而益盛士

子因訓飭而交修

聖自多能心猶好學總百家之間奧垂千古之

典謨經天緯地之文一貫萬殊之理禹鼎湯

盤之句龍翔鳳翥之書莫不蒼萃并包商皇

典麗至於

皇威遠暢廟畧遐宣臨邊塞而萬幕傾心示神謨而三尊授首察哈爾不敢伏莽厄魯特頓爾傾巢鄂羅斯稽顙以奉共球烏斯藏望風而銷鋒鏑以至波澄紫海箐靜紅苗雨露及於天維疆索通於地紐清寧合撰參兩大以成能覆載同流兼三才而立極武功文德前代之所未聞聲教車書史冊之所未覩建中錫福久道化成萬物逸而宸衷弗釋其勞四海寧而

皇躬弗辭其瘁六十一載豐功厚澤深浹人心四千餘年哲后賢君難侔曆服紫壇紺幄知天意之同符蒼壁黃琮思德馨之並薦朕纘承丕緒永念

前徵我

皇考聖祖仁皇帝允宜崇祀

郊壇克配

上帝以後冬至祈穀祭

天俱奉

聖祖仁皇帝同

太祖高皇帝

太宗文皇帝

世祖章皇帝配享夏至祭

地亦如南郊祈穀禮祇奉配享其應行禮儀爾部詳議具奏 陞雲南鶴麗總兵官郝玉麟爲雲南提督 壬午以都察院左都御史加吏部尚書銜朱軾禮部尚書張廷玉爲會試正考官 調戶部尚書田從典爲吏部尚書

禮部尚書張廷玉爲戶部尚書仍兼管翰林院掌院學士陞戶部右侍郎張伯行爲禮部尚書刑部右侍郎盧詢爲兵部尚書 癸未調禮部左侍郎景日昡爲戶部右侍郎以禮部侍郎行走王景曾爲禮部左侍郎陞內閣學士涂天相爲刑部左侍郎光祿寺卿高其佩爲刑部右侍郎 調廣東瓊州總兵官張耀祖爲雲南鶴麗總兵官湖廣襄陽總兵官萬際瑞爲廣東瓊州總兵官陞福建延平副

將張殿臣爲湖廣襄陽總兵官 甲申諭順天府尹鄉飲酒禮敬老尊賢之古制近聞年久視爲具文所備筵宴亦多草率爾衙門應加謹舉行 戶部議覆直隸巡撫李維鈞請將丁銀攤入田糧之內應如所請於雍正二年爲始將丁銀均攤地糧之內造冊徵收得旨九卿詹事科道會同確議具奏 理藩院奏準噶爾策妄阿喇布坦屬下明嘎忒人博羅忒達什扎卜巴圖蒙克多爾濟哈拉嘛克達巴什六人來降得旨伊等來歸可嘉爲首之博羅忒達什扎卜著賜與侍衛翎伊等稱有近族兄弟在貝勒博貝處爲護衛即將此六人賞與博貝加意撫養 乙酉

上詣

堂子行禮 丙戌諭鴻臚寺陞殿時令糾儀御史稽察班次整肅朝儀 以鑲紅旗蒙古副都統富爾丹署本旗蒙古都統 工部議覆河道總督齊蘇勒疏奏邳州黃河北岸張王

廟至宋家莊應加幫餞隄一千一百八十八丈宿遷縣黃河北岸五堡應築月隄格隄一千二百丈南岸墩卽廟險工應築月隄三百二十四丈俱應如所請從之 丁亥諭八旗都統等查驗器械國家定制從前查驗時彼此那借及租賃弓矢支吾掩飾朕所深知著寬限一年各將器械修理完備朕於明歲十月間遣大臣會同兵部一日查驗一旗封貯公所再驗一旗將二十四旗悉行據實驗存交還各旗各自收貯庶免那借租賃之弊 諭戶部江西巡撫裴率度疏稱請捐俸工銀兩賑恤被水居民夫官吏俸工特爲贍養伊等家口而設原不可少縱將通省官員俸銀捐助爲數亦屬無幾有何裨益至若胥役工食亦盡行捐出何以令其應差行走如果民遇災祲該督撫卽應奏聞動支正項錢糧若偶遇水旱微災不無賑恤或修理隄岸城垣之小費該地方大小官員有願出己資捐助

効力者何必具題即欲報聞亦止可另行摺奏著該部行文直省督撫凡地方遇有公事奏請捐助俸工之處永行停止理藩院奏扎魯特貝勒阿諦沙畢魯瓦額爾德卜鄂齊爾等三旗乏食請加賑恤得旨著再給銀二萬兩交與本錫阿林保齎往此項因從前發去銀五萬兩或有不敷添解備用並非分別此一旗給與若干彼一旗給與若干也可將兩次銀兩合數旗之人通同散給如有不敷再行請旨陞川陝督標中軍副將田峻爲陝西涼州總兵官前往軍營協助提督路振聲辦事以陝西固原提督楊盡信仍署理陝西涼州總兵官命隨往陵寢之大臣官員各加一級戊子諭總理事務王大臣等時值寒冷駐防熱河兵丁著於明春移往行走既爲便益房舍亦易於修理調江南京口副都統甘國培回京陞廣東廣州叅領朱炯爲江南京口左翼副都統

己丑遣官祭

歷代帝王遣官祭城隍之神諭川陝總督年羹堯侍郎常壽奏報親王羅卜藏丹津攻王察罕丹津已渡黃河肆行猖狂或遣使與策妄阿喇布坦期約作亂或欲窺取西藏皆事所必有軍務宜預先籌度爾宜將西寧松潘甘州等處軍兵整備務期剿滅羅卜藏丹津自夏間作亂以來人馬疲乏若不乘此時擊之遲延日久則賊人得以蓄養氣力爾其盡心籌畫克奏膚功以內務府郎中薩哈廉協理內務府總管以原任廣西布政使王沛懌爲太常寺卿原任湖北布政使張文燦爲太僕寺卿庚寅禮部尚書覺羅蘇庫以病乞休允之辛卯

上詣

壽皇殿行禮

上御太和殿視朝諸王大臣及陞轉文武官員謝恩不作樂諭總理事務王大臣等八旗

辦理事務甚屬緊要都統副都統內有在  
皇考時宣力行間擢用者伊等於旗務並不辦  
理惟以曾經効力爲辭伊等出征勞績得功  
牌者已登部冊得傷者已加賞賚應授官職  
者已經議授且擢用伊等原爲辦事豈徒以  
其宣力行間之故耶嗣後都統有奉差四五  
日者著即題請署理之人或命本旗副都統  
或另派人署理○又諭目今策妄阿喇布坦  
甚屬恭順我兵在外已久著將阿爾泰兵丁  
如何撤回永固疆圍應駐兵若干駐劄何處  
或作戍兵迭更或令永遠駐防應將何處兵  
丁移駐爾等可詳加確議具奏再吐魯番巴  
爾庫爾布隆吉爾等處兵丁俱著照此行○  
諭兵部從巴爾庫爾阿爾泰軍前因年老殘  
疾裁減撥回革退之官員及具呈告退之人  
員內有効力行間者將在京八旗及外省官  
員等著查明具奏○諭湖廣總督楊宗仁天  
下綠旗兵丁大率十分中有二三分空糧爲

專閫大臣及將弁等所侵冒而老弱殘疾不  
能騎射者復充當兵數徒令國家錢糧費於  
無用之地夫武備關係重大額設兵數不特  
緩急恃以爲用并藉以防緝盜賊守護城汛  
豈可任聽將弁挑選隨丁一無拘限今奉天  
等處將軍副都統官員俱令酌選數名著爲  
定額其提督總兵以下等官亦宜照例酌定  
各於該管兵內查有不堪者亟應沙汰選擇  
年力精壯漢仗雄偉者頂補嗣後營伍騎射  
須時加操演火器營兵在春秋二季操演水  
師營兵在戰船操演其安營布陣進退作止  
之法務令精熟盔甲器械船隻等項務令堅  
固沿途守望煙墩之兵量增數名酌計幾墩  
令千把等員輪流分轄不時稽察至山谷林  
麓近江濱海險僻處所或有匪類潛藏亦未  
可定應派委叅遊以下二員領兵四十名時  
往巡哨更須嚴飭所領兵丁經過地方毋許  
騷擾兵丁內有實能效力弓馬嫻熟者遇有

把總缺出即行錄用以示鼓勵其懶惰刁悍者嚴行責革以彰法紀從前把總一缺提鎮將弁每將家丁及同鄉戚屬虛冒錢糧毫無勞績者朦混占補似此何以服士卒之心今限一年之內徹底肅清儻不遵諭旨仍蹈前轍定將該管大臣及將弁等從重治罪爾封疆大吏各宜敬凜毋忽○命署山東布政使須淵巡視河務以戶部郎中博爾多署理山東布政使司布政使○命以官房八所爲八旗大臣等公衙門○免江南海州上元等十五州縣揚州一衛康熙六十一年分旱災額賦有差○壬辰免江蘇太倉等衛舊欠民屯地丁等銀兩有差○癸巳諭兵部右衛佐領蘇柱克等十七人皆由軍前裁減撥回並無罪愆而右衛副都統努爾布將伊等盡行革退著努爾布來京將緣由陳奏努爾布員缺著副都統李柱署理○以裕親王保泰管理鑲黃旗滿洲蒙古漢軍三旗事務原任鑲白

旗護軍統領蘇克肱爲鑲黃旗滿洲都統○總理事務王大臣等議准浙閩總督覺羅滿保奏請修築海寧塘隄得旨錢鏐時所築塘隄中間雖被沖壞至今尚有存者數年來督撫等所修塘隄俱虛冒錢糧於不當修築處修築以至隨修隨壞又聞赭山有三處海口今一處淤沙壅塞水不通流若濬治疏通使潮汐不致留沙壅塞則海寧一帶塘工方可保固言之者雖未必稔知然不可不留意抑或地方大臣恐糜費錢糧此等處雖明知而不顧也傳諭該督撫知之○兵部議覆雲南提督張國標奏言雲南地極邊遠副叅遊守缺出部推人員每不諳邊情請照舊例仍令該督撫提臣將才技優長熟諳邊情之員越銜一二等揀選題補嗣後請副叅遊擊缺出准其越銜揀補至守備員缺仍於分發年滿千總內秉公揀選補用從之○刑部議覆御史湯之旭條奏六部現行則例輕重不一請



簡諳練律例大臣爲律例館總裁將康熙六十一年以前所行條例雍正元年以後所奉上諭陸續纂修增入應如所請得旨左都御史朱軾兵部尚書盧詢刑部左侍郎阿錫魯兵部左侍郎伊都立著充總裁官甲午以正白旗蒙古都統拉錫署鑲白旗滿洲都統禮部議奏自古帝王功德隆盛未有不配天者此古今通義也欽惟

聖祖仁皇帝嗣

太祖

太宗

世祖之鴻緒守成創業兼隆集三皇五帝至聖之大成玉振金聲並茂沖齡而克基於聖堯期而不倦於勤是

聖祖之至誠不息即

天地之悠久無疆也開古今未開之景運闡帝王未闡之版圖察吏安民達聰明目是

聖祖之無爲致治即

天地之不言成化也減稅蠲租祥刑肆赦屢廣生徒之額頻加營伍之恩是

聖祖之湛恩汪濊即

天地之雨露滋培也神謨天算赫聲濯靈平三孽而永靖烽煙臨二庭而廓清沙漠是

聖祖之神武布昭即

天地之風霆流形也生知好學天縱多能會理道之精微不遺象數挹經史之芳潤兼擅詞章是

聖祖之奎文藻麗即

天之雲漢爲昭

地之山川煥彩也協氣布濩年穀順成六十餘年萬方蒙福是

聖祖之召致休徵即

天之不愛其道

地之不愛其寶也允宜升配

郊壇光昭禮祀應同

太祖

太宗

世祖配享

園丘

祈穀壇

方澤請於本年冬至二年孟春上辛及夏至大祀之日舉行得旨是依議工部議覆兵部左侍郎嵇曾筠奏言武陟縣黃河隄工請由釘船幫壩尾直對姚其營北首斜接遙隄加築再秦家廠月隄內積有清水請填實以禦頂沖應如所請從之乙未諭大學士等朕近於

聖祖仁皇帝所遺書笥中檢得未經頒發

諭旨一道以明太祖崛起布衣統一方夏經文緯武爲漢唐宋諸君之所未及其後嗣亦未有如前代荒淫暴虐亡國之跡欲大廓成例訪其支派一人量授官職以奉春秋陳薦仍令世襲朕伏讀之下仰見我

聖祖仁皇帝海涵天覆大度深仁遠邁百王超

軼萬古朕思史載東樓詩歌白馬商周以來無不推思前代後世類多疑忌以致歷代之君宗祀殄絕朕仰體

聖祖如天之心遠法隆古盛德之事謹將

聖祖所貽

諭旨頒發訪求明太祖支派子姓一人量授職銜俾之承襲以奉春秋祭享但恐有明迄今年代久遠或有奸徒假冒致生事端爾內閣大學士即會同廷臣詳明妥議以副

聖祖仁皇帝寬仁矜恤之至意命各省情實

人犯停止秋決陞福建臺灣總兵官藍廷

珍爲福建水師提督戶部議覆漕運總督

張大有條奏一行月二糧例係半本半折其

折色銀兩宜解送糧道驗明將一半給發該

丁開船一半封固於各幫過淮時糧道親行

給發一運弁回南令坐糧廳給完呈限單限

一月到淮報驗逾限者照規避例咨革漕

糧開兌令額設監兌等官親身照數交兌開

行之後仍令該員親押到淮聽總漕盤驗如有不足即將該員叅處應如所請從之○大學士王碩齡以老病乞休溫旨慰留之○丙申以軍前副將軍阿喇衲爲鑲紅旗蒙古都統○正黃旗蒙古都統汪悟禮年老休致以鑲紅旗滿洲副都統秦布署正黃旗蒙古都統○調福建海壇總兵官程漢鵬來京陞福建臺灣水師副將朱文爲福建海壇總兵官閩安水師副將徐日昇爲福建金門總兵官○除浙江紹興府情民丐籍○丁酉諭內閣世襲官員所得三品廕生內有願在武職行走者仍賜以應得原品其內外廕生監生等到部考試繙譯書法再分派各部行走令伊等咸得勉力學習至世襲官員所得三品廕生內若考試有列優等者仍著奏聞賜以所應得原品如此則伊等必痛自砥礪以求上進不但國家得有用人才足供任使即各部院衙門亦不致令無知子弟羣廁其間率意

肆行爲衆人所譏議矣○陞鴻臚寺卿李鳳翥爲內閣學士兼禮部侍郎○以鑒儀衛鑾儀使李林署江南京口將軍○戊戌九卿遵旨議覆直隸巡撫李維鈞請將丁銀攤入地糧徵收應令該撫確查各州縣田土因地制宜作何攤入田畝之處分別定例庶使無地窮民免納丁銀之苦有地窮民無加納丁銀之累得旨巡撫李維鈞條奏丁隨地起一事九卿並不據理詳議依違瞻顧皆由迎合上意起見即如本內有地窮民一語既稱有地何謂窮民不與有米餓莩之語相似乎不但此也凡九卿會議理應將所議事件預先詳審至臨議時各出己見平心靜氣公同商榷以求至當邇來九卿坐班多有不齊及至會議彼此推諉不發一言或假寐閒談遲延累日令一二科道新進者昌言於衆便羣相附和以圖塞責在九卿遲延一日內而六部八旗外而各省俱因以遲延矣以此爲居官安

靜及至保舉議行事件又有請託賄賂等弊爾等在

聖祖時皆受

深恩不圖實心報効每事迎合有時依議准行便爲迎合得計遇有駁回事件雖加嚴飭又謂上有深意以此事君負恩殊甚此皆朕之所深知而不忍見者

聖祖與

天相似諸臣豈能以人意揣度

天心所有種種惡習皆在

聖祖洞鑒之中包涵已久有何益處朕即位以來將此等惡習概置不究爾等自揣平日所爲亦當知懼亦當知感矣今仍欲迎合朕意朕於諸事本無成見有何迎合之處所發會議事件原欲與衆共商即書所云汝則從龜從筮從卿士從庶民從之意也元首股肱誼同一體朕祇欲諸弟盡爲賢王諸臣盡爲良臣事事當理即朕意耳朕從不自以爲是所

議允當朕即不從不妨面折廷諍再三執奏即不顯言亦可密摺敷陳至爾等以堯舜比朕朕果能上法堯舜乎抑屬贊頌之詞也如或不能正可因此自勉即爾等亦當上法古名臣也

聖祖良法美政布在方策朕與爾等期共相黽勉以臻至治朕宵旰勤勞爾等可圖安逸乎嗣後務宜洗心滌慮痛改前非凡事皆持公正止論是非毋事揣度朕實心延納果能據實直陳豈肯拒阻若仍蹈前轍朕或據理飭行或擇人另議爾等豈不自愧乎原本發還九卿著仍照戶部議行○四川成都副都統法喀以老病乞休允之己亥以內閣學士李鳳翥署理工部侍郎以禮部郎中呂文櫻提督山東學政翰林院侍讀劉於義提督山西學政侍講學士張廷璐提督河南學政編修吳家驥提督湖廣學政編修黃之雋提督福建學政檢討陸紹琦提督廣西學政編

修任蘭枝提督四川學政提督陝西學政編修王謦提督廣東學政編修惠士奇提督貴州學政檢討張大受俱仍留任工部議覆河道總督齊蘇勒奏言清口爲淮黃交會之區八月初五六日秋汛驟至黃水有倒灌之處隨經動支工料於清口兩岸接築大壩各一座中留口門五十丈束清抵黃以防汎溢應如所請從之移湖北襄陽府同知駐樊城鎮從湖廣總督楊宗仁請也庚子以詹事府存貯清字資治通鑑綱目一百六十函賞給王大臣之未經受賜者以內閣侍讀學士田文鏡署理山西布政使司布政使辛丑鑲藍旗都統貝勒阿布蘭等奏言內務府員外郎常壽族中人等及伊堂叔額爾奇所管佐領下人請悉行移隸於正黃旗得旨此等佐領若悉移於上三旗則下五旗必至虧少矣著將額爾奇佐領從伊該王屬下撤出改爲該旗公中佐領額爾奇佐領下所有

一等護衛圖巴海二等護衛永柱暫留該王處其餘官屬兵丁俱著於上三旗當差行走王府親軍二人著交內大臣令在上三旗親軍內當差若有缺出內大臣照例選取其官員俸祿兵丁錢糧仍由本旗行文支領嗣後下五旗諸王屬下有應移佐領及統轄佐領之人乏嗣者俱照此例從該屬下撤出改爲該旗公中佐領按左右翼令在鑲黃旗正黃旗當差行走著總理事務王大臣會同八旗都統等議奏尋議嗣後下五旗王貝勒貝子公及宗室等屬下所有滿洲蒙古漢軍佐領內有應移於上三旗及獲罪應撤之佐領與統轄佐領之人乏嗣者俱照此例撤出以爲本旗公中佐領此公中佐領內文武大臣官員等止令本身按翼在鑲黃旗正黃旗行走如叅領佐領驍騎校等係在該旗供職辦事之人仍應留於本旗其前鋒護軍等令在上三旗當差併照例挑取親軍其應給俸餉仍

由該旗行文支取至馬甲步軍人等仍留本旗當差奏入得旨補授外省駐防官及前鋒叅領前鋒侍衛等公中缺出仍由本旗揀選餘依議○解浙江布政使傅澤淵任調廣東布政使王朝恩爲浙江布政使司布政使加大理寺卿銜陞兵部郎中圖理琛爲廣東布政使司布政使○總理事務王大臣等議覆署山東布政使戶部郎中博爾多條奏東充一區周方數千里請照舊例復置一鎮設總兵官一員駐劄兗州府以資彈壓應如所請從之○予故議政大臣一等侯巴渾德祭葬謚恪恭○予故戶部尚書王鴻緒祭葬如例○補行直隸康熙六十一年分軍政卓異官一員年老官一員才力不及官三員分別陞賞處分如例○壬寅諭八旗都統等爾等所奏承襲佐領摺子甚屬不明據摺內除原管佐領外其攢湊佐領公中佐領內有管理數世者如初編一佐領令人管理因本佐領已

故其子年幼令他人管理至於四五世者夫原管佐領之子年幼暫令他人管理一世則可其後再放佐領時應令原管佐領之子管理如何令他人管理四五世乎著將此等佐領原係如何管理或係賞給或係有故令他人管理之處一一查明原委八旗畫一辦理○諭大學士蕭永藻景陵處官房尚未造完所派侍衛內有願於冬季回京者令其回京明年房屋造完再去若遇大祭日令伊等速去其中有願在彼處住者著給行糧命八旗各教場設學舍五間每旗選擇二人訓誨教場內居住兵丁子弟操演騎射並習清書清語禮部奏言請定今科取中進士名數得旨今科進士照朕所定一百八十名之數取中仍降旨與總裁官朱軾張廷玉此外不拘省分不限額數如有佳卷選出另行具奏放榜後其落卷照今春例再行檢閱免江南宿遷縣康熙六十一年

年分旱災額賦有差○癸卯

孝慈高皇后忌辰遣官祭

福陵○刑部右侍郎劉相緣事革職以原任陝西巡撫噶什圖爲刑部右侍郎○左副都御史金應璧緣事解任陞通政使楊汝穀爲都察院左副都御史○實授范時捷爲陝西西安巡撫○甲辰湖廣總督楊宗仁奏言百姓食鹽價值應請欽定下慰商民仰望得旨據楊宗仁奏請欽定鹽價伊並不體察事理但固執己見仍照原題具奏夫士農工商雖各異業皆係國家子民理當一視同仁督撫偏袒百姓巡鹽御史偏袒商人可乎總督係地方大臣凡辦理事務必須平心靜氣期於合理楊宗仁身爲總督於此等處並不留意混行瀆奏著黃叔琳謝賜履前往楚省會同楊宗仁將鹽價確議酌定謝賜履印務著運使何順暫行署理○乙巳諭大學士等人臣膺命効職果能實心愛民清白自矢則官去民

思甘棠留詠有愈久而不能忘者從古有之若今之生祠書院不知始自何人自督撫提鎮以及監司守令所在多有究其實不過該員在任之時或係屬員獻媚或係地方紳士逢迎甚至有出入公門包攬詞訟之輩倡議糾合假公派費占地興工以致園囿亭臺窮極華麗勞民傷財一無顧惜營造之後或爲宴會遊玩之場或本官竟據爲產業果係官去民思不忘遺愛特爲興建者甚少此事向曾禁止而踵弊如故應加嚴飭嗣後如有仍造生祠書院或經告發或被糾參即將本官及爲首之人嚴加議處其現在之生祠書院如實係名宦去任之後百姓追思蓋造者准其存留其餘俱著地方官查明一概改爲別用或爲義學延師授徒以廣文教如此則以無用爲有用惜民財力杜絕虛浮於地方風俗大有裨益○理藩院奏言陣亡台吉進達克蒙恩優加恤典今伊子噶爾馬孫多布等

謝恩得旨蘇尼特王垂濟拱蘇隆旗下台吉

管理旗務官進達克帶領屬下兵丁與逃竄

之厄魯特羅卜藏錫拉布等鏖戰身亡甚屬

可嘉此並非出兵之時亦並未令其率衆追

擒而伊奮勇前行臨敵致命是以朕交部議

敘部議二等台吉加一等授爲頭等台吉具

奏朕曾特降諭旨施恩將進達克照依公爵

致祭今襲頭等台吉進達克之子噶爾馬孫

多布著授爲輔國公○予故雲南提督張國

樑祭葬謚勤果贈右都督○丙午諭內閣朕

惟我

太祖高皇帝天錫智勇肇造鴻基

太宗文皇帝繼業恢圖布昭聖武

世祖章皇帝統一寰區功成治定其時内外文

武勲舊臣工戡亂効力茂著厥功

皇考聖祖仁皇帝特敕內閣翰林院諸臣纂修

三朝國史用揚

列聖之鴻謨並及諸臣之勞勩迄今尚未編輯

矧惟

聖祖仁皇帝垂統六十餘年以守兼創

恩澤聲教遠及海外絕域

德業之盛超於百世凡於指授所及能顯立功

勲誠敬任事之大臣與夫軼羣出衆有才之

人若不及今博採聞見薈萃成編恐閱世久

遠或致闕畧著將國初以來文武諸臣內立

功行間誠敬任事卓越之才有應傳述者行

文八旗將諸王貝勒貝子公以及文武大臣

之冊文誥敕碑記功牌家傳等項詳加查核

暨有顯績可紀者亦著詳察逐一按次彙成

文冊悉付史館刪去無稽浮夸之詞務採確

切事實編成列傳如此可以垂之萬世庶爲

國家宣力有功之大臣不致泯沒矣○工科

給事中永福條奏威遠堡等關口六處地近

邊門請揀選能員查拏私參並派官兵分守

得旨威遠堡等六處關口逃人在彼偷創人

參甚屬擾亂著照永福所請行永福著補授



副都御史總管威遠堡等六處與將軍等商酌辦理五年此五年內著薩爾納仍兼副都御史行走○增廣東省鄉試舉人中額六名武舉中額四名從署廣東巡撫年希堯請也賜多羅果郡王允禮銀一萬兩

大清世宗敬天昌運建中表正文武英明寬仁信毅大孝至誠憲皇帝實錄卷之十一

大清世宗敬天昌運建中表正文武英明寬仁信毅大孝至誠憲皇帝實錄卷之十二

敕修

雍正元年癸卯冬十月丁未朔享

太廟

上親詣行禮○遣官祭

永陵

福陵

昭陵

暫安奉殿

孝陵

孝東陵

景陵○

上詣

壽皇殿行禮○頒雍正二年時憲曆○恭刻

聖祖仁皇帝御製曆律淵源一百卷告成內分三部一曰曆象考成一曰律呂正義一曰數理精蘊

上夙承

聖祖指授理數精詳本末該括敬製序文詳述體例闡發大義奉爲千萬世不易之法云

戊申諭兵部據川陝總督年羹堯奏稱青海

羅卜藏丹津恣肆猖狂臣領兵於九月二十日自甘州起程十月初間至西寧相機行事等語總督年羹堯既往西寧辦理軍務其調遣弁兵之任甚屬緊要須給大將軍印信以專執掌著將貝勒延信護理之撫遠大將軍印即從彼處送至西寧交與總督年羹堯其貝勒延信現有防守甘州沿邊等處事務將庫內現存將軍印信著該部請旨頒發一顆送給尋議應將平逆將軍印信送給貝勒延

信從之○敕諭撫遠大將軍年羹堯我朝自創業以來皆效法

列祖用兵紀律無往不施仁德孟子云仁者無敵統兵者之大義莫要於此羅卜藏丹津係青海一台吉自伊祖顧實汗以後敬謹恭順請安進貢至扎什巴圖爾台吉慕

聖祖仁皇帝德化叩覲

天顏蒙

聖祖仁皇帝念及顧實汗從前敬謹恭順晉封扎什巴圖爾爲親王疊沛隆恩及病故後令伊子羅卜藏丹津襲封羅卜藏丹津宜仰體寵眷效法祖父敬奉法紀乃妄逞強梁弟兄骨肉自相仇敵欺陵親王戴青和碩齊察罕丹津郡王額爾得尼厄爾克托克托柰等恣行倡亂朕甫聞其事即遣侍郎常壽前往令伊等講和修睦羅卜藏丹津等宜遵朕旨式好無尤乃肆意稱兵侵襲親王戴青和碩齊察罕丹津郡王額爾得尼厄爾克托克托柰

等殺戮抄掠以至察罕丹津等情急投入內境顯負朕恩悖逆天常擾害生靈誅戮不可少緩故加天討遣發大兵聲伐羅卜藏丹津朕欲拯救西域生靈大張天威特命爾爲撫遠大將軍統領滿洲蒙古綠旗大兵一切事宜爾與蘇丹岳鍾琪常壽等酌定方畧公同計議而行勿當事會而致失機宜勿恃兵強而輕視逆寇密偵遠探罔或疎虞各路大兵暨蒙古兵丁聽爾調遣凡遇有警即遣發官兵應援撲勦防備詐降如羅卜藏丹津敢於抗拒即行勦滅其黨內亦有懼羅卜藏丹津之勢脅從而行者伊等果悔罪來歸即行寬宥有能擒斬羅卜藏丹津來歸者分別具奏有情急來歸者加意撫恤其不抗拒者毋加殺戮須嚴禁兵將凡經過地方勿得騷擾百姓勿離人父子夫婦勿淫人婦女勿掘人墳墓降附者勿得侵取其物勿拆毀廬舍祠宇勿擾害廟內番僧副朕戡亂靖逆之意官兵

或臨陣退縮貽誤軍機爾會同商議官員以下即以軍法從事示衆官兵犯小過者徑行處治勿泯沒官兵功績勿寬縱違犯之人賞罰務極嚴明爾酌量調遣各路大兵將羅卜藏丹津殲勦廓清安靖邊圉斯稱委任爾務宜殫竭心力早奏膚功欽哉故敕○以翰林院侍讀學士綽爾岱辦理北路軍營糧餉○予故正藍旗蒙古副都統呢牙韓楚祭葬如例○己酉諭歸化城都統丹晉前

聖祖皇考由寧夏親征漠北時巡狩歸化城地方見歸化城土默特兩旗官兵士衆萎靡弓馬不嫻法度廢弛因將兩旗都統革退另選在京都統副都統叅領等員管轄歷年訓練有方軍律嚴整舊習漸改是以數年來將在京選用之例停止今爾保送之官兵人等盡皆弓馬嫻熟且兩旗兵弁行伍整齊凡有行圍及出征等事與內地兵丁一體効力此皆我

皇考教育所致也。歸化城土默特兩旗原在四十九扎薩克內。其都統副都統等官皆係國初歸附之土默特功臣子孫世職。今既已棄咎從忠。允宜遵復舊例。楚宗著授京城額外都統。楚宗員缺。將原任都統阿必達之子副都統良敦補授。良敦員缺。著丹晉將爾兩旗內應補人員與原任都統副都統世家子孫及叅領內人材可用儀表修偉向能管轄兵丁。曾經効力行間人等查明保送引見。以便簡擢。○庚戌。令各部院衙門無品筆帖式三年一考試。其文理優長者給與品級。○辛亥。諭總理事務王大臣等。部院筆帖式食俸僅二十八兩。不及一護軍領催之錢糧。而伊等樂於供職者。冀有陞轉之途也。伊等既有陞轉之途。若概與加俸。恐伊等不知鼓勵。轉不竭力。嗣後各部院筆帖式著各堂官及該管之人。將伊等內謹慎無過。又或辦事勤敏。或寫本精工。或善於繕稿者。於年終分別保奏。

此保奏之人如何照伊等品級增添俸銀。或另行加恩之處。朕再降旨。○諭兵部驛站關係重大。經朕屢加嚴諭。然其間積弊難以盡詰。有在官之累。有在民之累。如直隸山西等省差徭更爲浩繁。雖驛馬足數亦供應不敷。乃內而兵部外而驛道。於給發馬匹時。官吏通情受賄。往往所給浮於勘合之數。且行李輜重皆令驛卒乘馬背負。多至八九人不等。所到州縣。以見馬換馬。向有舊例不敢詰問。至督撫提鎮經過之處。更唯命是從。嗣後照勘合之外。有敢多給一夫一馬者。許前途州縣即據實揭報都察院。以聽糾參。如甲縣容情不揭。而被乙縣揭報者。並甲縣一併治罪。其督撫提鎮騷擾驛遞者。皆照此例。庶少甦在官之累。至若河南山東諸省離京稍遠。謂耳目易欺。每驛額設馬匹不過十存三四。其草料工食仍照舊開銷。且逐年詳報倒斃侵蝕補買之價。差使一至。則照里科派。將民間

耕種牲口。強遣當差。令其自備物料。跟隨守候。種種累民。尤屬不法。著該地方督撫。將所有驛站。徹底清查。缺額者。勒限買補。至派借民間牲口。尤當勒石永禁。違者。即從重治罪。○兵部奏言。山西出征兵丁。倒斃。馱載輜重馬匹。應令賠補。得旨。山西兵丁。遠馳異域。其屬勞苦。其倒斃。馱載輜重馬匹。著照川陝例。免其賠補。○壬子。諭總理事務王大臣等。各處工程。有請將俸工銀兩捐助者。此事斷不可行。伊等名為捐助。實則借端勒派。擾累小民。若直省大吏。將已分內所得羨餘。捐助完工者。聽其捐助。如或不能著奏。請動用正項錢糧。○又諭。向來八旗護軍。皆係精兵。近日竟有不能射箭之人。著前鋒統領。護軍統領。自十一月起。給限四月。將前鋒護軍等。操練教訓。務令整齊。明年二月。朕躬行閱試。○鎮國公晉貴。因病解退。封其子智保。為輔國公。○鑲藍旗漢軍副都統佟國弼。年老休致。陞

王府長史布達。時為鑲藍旗漢軍副都統。以鑲黃旗滿洲副都統覺羅佛倫。署正白旗護軍統領。○甲寅。諭兵部。在京八旗及外省兵丁。有因衰病罷退。而無子弟可倚賴者。著賞給半分錢糧。養贍終身。○赦平郭羅克賊番功。封川陝總督年羹堯。為二等公。給四川提督岳鍾琪。拜他喇布勒哈番世職。遊擊姚文玉。周瑛。以下十五員。及外委官馬萬倉等。九十七員。各功加二等。餘俱賞賚有差。○禮部遵旨議奏。八旗直隸各省。凡有孝行節義之人。例得請旌。給銀建坊恭遇。皇上彰善大典。即鄉曲貧民。勿令湮沒。又以節婦年逾四十。而身故者。守節已歷十五載以上。亦應予旌。又酌設祠宇。入於祀典。誠激揚風化。敦率人倫之善政也。請敕下八旗直隸各省督撫學臣。令所在有司。徧加採訪。凡有節義之人。從前無力上達者。悉行查報。其婦人守節十五載以上。年逾四十而身故者。亦

詳查報明一體予旌直省該督撫學臣覈實於歲終彙題八旗該都統於歲終咨送臣部臣部於次年二月彙題請旨旌表永爲定例其設立祠宇應令順天府奉天府直隸各省府州縣衛每處各建二祠一爲忠義孝弟之祠建於學宮之內祠門立石碑一通刊刻姓氏於其上已故者設牌位於祠中一爲節孝婦女之祠另擇地營建祠門外建大坊一座亦標題姓氏於其上已故者設牌位於祠中其八旗分左右翼擇地各建二祠每年春秋二次致祭直省交與各府州縣衛所官兩翼交與大宛二縣至於建坊銀兩嗣後應行停給如係有力之家仍聽其自行建造得旨孝行節義建立牌坊年久毀壞遂至湮沒今欲設立祠宇特爲昭垂久遠之意竝非欲節省錢糧部議建立祠宇停給建坊銀兩不合建坊銀兩仍著給與餘如議行○裁雲南潯江府經歷缺其經歷事務歸本府司獄兼管添

設麗江府經歷一員兼管司獄事務從雲貴總督高其倬請也○復鑲白旗一等阿思哈尼哈番富寧世職○乙卯添設熱河滿洲理事同知一員從刑部尚書勵廷儀請也○丙辰河道總督齊蘇勒疏報九月二十一日水湧風狂將中牟縣楊橋後官隄漫開十丈有餘飛催堵築完竣得旨漫開隄工該督會同河南巡撫嚴飭印汛各官速爲堵築完竣仍加謹防護保固○丁巳頒賞朝鮮國進香使臣如例停止筵宴○戊午諭內閣九卿詹事科道等從來用人之道必兼聽竝觀疇咨博採方能允當而無失朕於選用人員勤加諮訪正以朕一人之耳目有限不若合爾諸臣之見聞始無遺漏也乃爾等僉云未能深知互相推諉夫百職在廷四方具集同鄉親故豈無見聞其賢者即小善亦應稱舉不肖者即小惡無容隱匿若知其賢而不言是謂蔽賢知其不肖而不言是謂黨惡即如月選官

內有劉尚儉者係四川夔州府叅革貪酷知府劉天觀之子其父刻剝民膏爲伊子捐職罪莫大焉如此之人豈可錄用在廷豈無一人知之者乃俱緘默不言以此推之可見知而不言者甚多爾等之意惟恐結怨於朋友不若徇情容隱自保功名雖誤朕選用之事而不顧貽害於地方而不恤試思得罪於朋友與見棄於君父孰重孰輕全一人之功名與貽地方之患害孰大孰小即所舉之人爲賢爲不肖朕不過於引見時借以參酌自有裁奪並非責爾等保其終身無過致貽日後之累何必過慮乎嗣後務宜痛改積習苟有見聞即從實舉出進賢勿避嫌退不肖勿避怨朕生平惟以真誠待人爾等亦當以至誠報朕尚其各抒忠悃勿負朕推心置腹之至意○禮部遵旨議奏請將文廟從祀先儒位次及各壇廟祭品祭器樂器逐一繪圖彙爲成書頒示天下從之○己

未江西巡撫裴率度摺奏擒獲寧州銅鼓營姦匪請嚴加搜捕奉

上諭此等匪類固不容姑息亦不宜急迫若涉因循恐漸致滋蔓若不辦姦良又恐驚衆激成事端但須整理營伍修飭政治官吏廉明百姓畏威懷德此一二匪類何難消弭全在封疆大吏相機而行實心任事也○庚申正紅旗滿洲都統圖思海緣事革職以鎮國公德晉爲正紅旗滿洲都統○辛酉

上詣

壽皇殿行禮○諭八旗大臣等嗣後凡查富戶將從外任丁憂及無罪致仕回京者永遠免其行查○陞一等侍衛宗室申穆德爲鑲紅旗滿洲副都統○直隸巡撫李維鈞摺奏保定郡城天降瑞雪奉

上諭冬令之雪消蝗潤麥洵稱瑞應我君臣惟互相勗勉以恭迓天庥不因瑞雪及時遂爾逸豫怠忽則一誠上格自必永承彼蒼之垂

佑耳○壬戌諭內閣親王郡王俱賜封號所以便於稱謂也如無封號之王貝勒在諸臣章奏內自應直稱其名再小人等竝將閒散宗室亦稱爲王又有貝勒王貝子王公王之稱嗣後俱著禁止○諭湖廣總督楊宗仁凡爲大臣者身任封疆重寄必當和平詳愼曲體人情虛懷博詢以求適中庶於國計民生俱有裨益近聞湖廣鹽勛涌貴良由減價太過所致在爾意原欲利民而不期先已病商乃致商運裹足不前衆口食淡是欲利民而民轉受其困矣至如楚地本產米之鄉素爲東南之所仰給因爾禁米出境以致川米亦不到楚不但隣省價昂而本省糧價亦致漸長是爾之過釋原欲封殖本境而本境之民竝未沾毫釐之益也夫隣省黔黎莫非朝廷赤子大臣體國當以公溥爲心似此偏執褊狹殊屬不諳大體其速行改圖務令販運流通遠近民食有賴○撫遠大將軍年羹堯摺

奏西藏撤回額駙阿寶所領蒙古兵丁馬匹軍器皆不堪用且阿寶身有殘疾應令回原處定西將軍公策旺諾爾布帶領之察哈爾兵漢仗俱好將察哈爾兵揀留四百名交都統武格管轄其餘交策旺諾爾布帶領起程再都統西倫圖現駐於東郭爾廟甚屬無益伊所領京城兵在外日久馬匹器械俱已缺乏交待衛班領阿齊圖帶領發回西倫圖漢仗猶好請留軍前管轄察哈爾前鋒兵西寧現在滿洲兵無幾應令署西安將軍公普照派烏鎗驍騎四百名前鋒一百名交副都統覺羅伊禮布帶領速赴西寧再用兵不可無參贊大臣前鋒統領蘇丹經事頗多岳鍾琪總統綠旗土司兵丁請授爲參贊大臣至青海之事并請侍郎常壽一等侍衛達鼐參議奏入報聞○癸亥以正紅旗護軍統領吳禮布爲山西右衛右翼副都統○陞四川夔州副將馮傑爲山東兗州總兵官○甲子諭總



理事務王大臣等

聖祖仁皇帝週年致祭朕親往

景陵行禮往返不過五六日其應派侍衛及護軍等不必多人著議奏○乙丑諭怡親王允祥等策妄阿喇布坦之來使將至朕亦欲遣使臣與伊來使同往將理藩院郎中衆佛保授爲內閣學士前去○諭大學士等國家建官分職於翰林之選尤爲慎重必人品端方學問醇粹始爲無忝厥職所以培館閣之材儲公輔之器也從前

聖祖加意育才循循訓導又纂修各種書籍需員甚多故翰林院編檢幾至二百人庶吉士亦五六十人朕臨御之初未有編纂諸事又未能如

聖祖之善於訓導誠恐人才置之閒散特多方錄用內而科道吏部外而道府州縣俱各隨材器使務令疏通今編檢尚有百餘人庶吉士尚有數十人著內閣大學士會同翰林院

掌院教習秉公別擇其學問優長字畫端楷或精於繙譯國書者留本衙門辦事及派各館纂修其或才具練達可當科道吏部之選或長於吏治編檢可爲道府庶吉士可爲州縣者一一分別具奏至或老病衰廢願自解退者聽其以原官休致其有行止不端事蹟確實者奏聞革退今朕特恩開科人材輩出將來揀選庶常朕當親加考試引見揀選至日後散館仍照舊例以三等分用目今正屆殿試之期朕深知向有擬送策聯鑽營甲第等弊殊可痛恨朕所點閱卷大臣俱係平日實心委任之人各宜虛公謹慎杜絕諸弊倘有仍蹈前轍者必嚴加處分務使文治日隆英材蔚起以副朕籲俊興賢之至意○禮部奏請總督巡撫銅關防應照將軍提督之例用銀鑄給以重職掌從之○丙寅諭總理事務王大臣等今年殿試天氣已寒諸貢士若照舊例在丹墀對策恐硯池冰結難於書寫

著在太和殿內兩傍對策。再傳諭總管太監多置火爐。使殿內和暖。諸貢士得盡心作文。寫卷。○諭理藩院厄魯特公茅海同伊伯王丹津阿拉布坦來時。我

皇考深加眷愛。授爲公爵。茅海今在軍前。翰誠効力多年。著授爲固山貝子。○丁卯。諭部院八旗大臣等。據副都統祁爾薩條奏。從前滿洲遇有喪事。親友饋送粥茶弔慰。後風俗漸弛。至多備羊豕。大設饋饌。送飯過事。奢靡等語。夫饋粥一事。乃我朝滿洲淳樸之俗。因其人篤於居喪。至廢飲食。親友恐其傷生。特饋粥糜。勸令少進。竝非設宴也。此禮相沿至今。失其本意。竟至過爲侈費。昔廉親王允禩。值伊母妣之事。欲沽取孝名。詭爲孝行。迨至百日。猶令二人扶掖匍匐而行。於定例外。加行祭禮。每祭焚化珍珠金銀器皿等物。所費不貲。半年後。仍令人扶掖而行。當日朕慮伊致殞其生。深加軫惜。再三慰勸。及事畢。見伊容

體充肥。畧無衰損。有識者多厭憎。而譏議之。敦郡王允禩。郡王允禔。貝子允禧。三人相結。指稱饋食。大設筵席。自初喪。以至百日。日用羊豕二三十口。備極饋品。輪流饋送。舉國喧傳。此衆人所共知者。我

皇考洞鑒其情。曾於衆阿哥會集時。

諭云。孝必本於誠心。如欲邀孝名。即屬虛僞。凡爲人子者。不務盡敬於生前。而欲矯飾於歿後。可謂孝乎。以此指責允禩者。屢矣。朕遭

皇考

皇妣大事。惟遵

皇考當

皇祖考

皇祖妣大事時。所行儀禮。不敢僭稱。盡孝稍有矯飾之處。論語云。禮與其奢也。寧儉。喪與其易也。寧戚。朕前曾降諭旨。著大臣等考稽喪禮。定爲儀節。具奏。尚未議覆。茲朕欲援據典則。揆情合義。且期有裨於旗人生計。將副都

統祁爾薩所奏准行。但恐衆人謂朕抑制伊等。使居喪不得備禮。有礙於子孫盡孝之心。親友相關之誼。是以躊躇未定。著各部及八旗大臣等會同詳議具奏。尋議事親之道。務盡其誠。我

皇上大孝格

天

聖祖仁皇帝

孝恭仁皇后大事時哀感本於中心。儀節協諸典禮。此中外臣民共知者。若橋飾邀名。徒見鄙於有識。禮云祭不欲數。數則煩煩則不敬。惡有不敬而可稱孝乎。宋臣司馬光云。居喪饋食。或因親朋慮其不能成禮。齋送粥糜。往勞之。若肥饌美膳致之者。爲不義。受之者爲不孝。我朝甚重喪禮。親友憐其廢食。特饋粥糜。蓋以人子居喪。疏食飲水。古之道也。未聞大設筵席。備具肥甘饋者不止。受者不辭。而猶得稱爲孝者。伏讀

聖諭是非誠僞。昭然共喻。內閣九卿等已將婚喪等事分別條款奏准允行。應如祁爾薩所請。嗣後不得以饋粥爲名。過情棄禮。致失當年淳樸之俗。違者查出。叅處得旨。凡作僞矯飾。以取虛名。朕平日所羞爲者。且自

太祖

太宗

世祖

聖祖以來。歷代相繼。專務誠實。撫天下之黎元。登國家於平治。毫無粉飾之政。諸臣咸當恪遵我朝制度。崇尚實行。鄙薄虛名。將兩次所降諭旨一併傳示八旗。徧令遵行。○撫遠大將軍年羹堯摺奏。青海羅卜藏丹津等聚集各台吉。肆行邊外。臣已劄令又木多總兵官周璣率兵截其往藏之路。但羅卜藏丹津急即遁至穆魯烏蘇等處。亦未可定。臣令靖逆將軍富寧安調都統穆森往吐魯番駐防。調吐魯番駐防副將軍阿喇衲帶領滿洲蒙古

綠旗兵二千名。由噶斯一路前往截殺。若羅卜藏丹津實心恭順。即將此二千名暫駐布隆吉爾。再查布隆吉爾地方駐防兵甚少。四圍皆係厄魯特喇布坦巴蘇泰。每令伊屬下人截奪台站馬駝。應令綠旗兵二千名調往布隆吉爾交叅將孫繼宗管轄。若用兵。即令率所管兵丁勦滅喇布坦巴蘇泰。與副將軍阿喇衲會合。共截羅卜藏丹津。如此賊人不能脫逃。而布隆吉爾地方亦甚堅固。奏入報聞。○戊辰。豁免陝西長武西鄉二縣浮額銀二千二百一十兩有奇。○予故福建水師提督姚堂祭葬。贈署都督同知。○庚午。陞鑲藍旗滿洲副都統雅親為正紅旗護軍統領。○辛未。策試天下貢士楊炳等於太和殿內。制曰。朕惟致治之道。必君臣一德。賢材奮興。孝悌申於黨庠。仁厚洽乎海宇。然後一道同風。克躋郅隆之治。朕荷天庥。丕承大統。仰惟

聖祖仁皇帝撫御寰區六十餘年。本至誠以御下。頒

聖諭以教民。故能使俊乂盈廷。民風淳厚。朕旰食宵衣。惟恐一事未理不克。丕紹前烈。尚賴股肱耳目之司。匡所不逮。周易泰卦言天地交而萬物通。上下交而其志同。謂君推誠以任下。臣盡誠以事君。此朝廷之泰也。朕推心置腹。以至誠待下。大小臣工宜精白一心。昌言無隱。今果能以嘉謀入告。無媿責難之義。歟。抑或有依違瞻顧不克。以至誠報上者歟。周禮大司徒以三物教萬民而賓興之。鄉大夫三年則大比。考其德行道藝而興賢者能者。至州長黨正族師各以歲月考校。故其時人知奮勵克崇實學。今三載賓興猶行古之道也。朕加意作人。特開恩科。何以使道藝兼修。德行無忒。歟。抑司造士之責者宜倣古歲月考校之制。俾文行並茂。歟。百行莫先於孝。六計必主於廉。今欲使家有孝子。國有廉吏。

所以倡導鼓舞之者其道安在至帝王之治始於家邦終於四海今欲比戶可封何道臻此放勳由克明峻德以至黎民於變時雍周公召公布王化於二南意風化始於君成於臣漸仁摩義非一手足之烈歟夫君明臣良聯爲一體必能旁招俊乂連茹彙征賢才自然振興也敦崇孝行砥礪廉隅風俗自然醇樸也爾多士積學有年必有以抒風抱而佐朕之新政者其悉以對朕將親覽焉○召入八旗大臣等諭曰八旗滿洲爲我朝根本植本不可不固近見八旗兵丁技勇產業大減於前此皆文武臣工仰恃

皇考之寬仁遂乃怠於公務不勤厥職玩忽苟安因而法制廢弛兵丁等既無教訓之人遂少警惕之意不習騎射不諳生計妄費濫用競尚服飾飲酒賭博漸至困窮從前

皇考恩養兵丁屢加賞賚代償逋欠又設立公庫以利濟之惠澤雖頻空乏如故曾何裨益

乎朕今初登大位未遑徧行查視惟爾諸臣是賴限於三年內將一切廢弛陋習悉行整飭其各實心任事訓練騎射整齊器械教以生理有頑劣者即懲之以法儻至三年仍不俊改朕必行罰無赦再叅領一官管轄多人辦理旗務甚屬緊要優者留用劣者即行罷黜至於兵丁器械既於明年十月點閱爾諸臣應即行查看有不齊者令其佐領內預爲補足今不置備臨期倍價賒買又爲債負所累貧乏兵丁何以爲生凡此等處諸臣宜各留意也○調正白旗漢軍都統觀音保爲鑲黃旗漢軍都統陞左翼前鋒統領希爾根爲正白旗漢軍都統仍兼管前鋒統領事務○以湖廣道御史江芑爲雲南鄉試正考官翰林院檢討任際虞爲副考官吏部郎中王恕爲貴州鄉試正考官編修曹源郊爲副考官○壬申諭戶部朕御極以來宵衣旰食無日不以民依爲念督撫以下守令以上凡有地

方之責者均宜公忠體國仰副朕心今年夏月朕以北省二麥歉收差員到南省於秋成後採買米石以備賑貸平糶朕意切於爲民正欲酌盈劑虛以羨補不足也又恐有不便於民之處於差員臨行之時再三申諭地方米多方可採買不必定要買足今聞各省地方官因欽差買米禁止商販不許出境大負朕痼瘼一體之意其屬不合況浙江及江南蘇松等府地窄人稠即豐收之年亦皆仰食於湖廣江西等處今秋成歉收若商販不通必致米價騰貴該部速即行文各省總督巡撫凡有米商出境任便放行使湖廣江西安慶等處米船直抵蘇州蘇州米船直抵浙江毋得阻撓庶幾有無流通民皆足食以副朕愛養元元之意○陞鑾儀衛冠軍使伯欽拜爲鑾儀衛鑾儀使○癸酉調署理大學士工部尚書徐元夢爲戶部尚書仍辦理大學士事戶部尚書孫渣齋爲工部尚書以公阿爾

松阿爲禮部尚書陞工部左侍郎尹泰爲都察院左都御史調刑部左侍郎阿錫鼐爲工部左侍郎陞內閣學士馬爾齊哈爲刑部左侍郎詹事府少詹事塞楞額爲內閣學士兼禮部侍郎仍兼會考府行走太常寺卿王沛懌爲通政使司通政使一等侍衛林祖成爲光祿寺卿○以正白旗滿洲都統貝勒滿都護管理正白旗三旗事務調正白旗蒙古都統拉錫爲本旗滿洲都統陞鑲黃旗蒙古副都統巴爾米特爲正白旗蒙古都統鑲黃旗參領花色爲本旗蒙古副都統○鑲白旗漢軍副都統劉俊傑緣事革職調鑲白旗滿洲副都統李柱爲本旗漢軍副都統正白旗滿洲副都統覺羅諾穆齊爲鑲白旗滿洲副都統鑲黃旗蒙古副都統奇爾薩爲正白旗滿洲副都統陞一等護衛查史爲鑲黃旗蒙古副都統○撫遠大將軍年羹堯摺奏十月十九日賊人來侵鎮海堡臣令都統武格率察

哈爾兵西安滿洲兵援救二十日厄魯特兵二千名番賊一千餘人圍堡二十一日至二十三等日賊人陸續添兵日夜轉戰臣將前鋒統領蘇丹所領兵丁交叅將宋可進等帶領軍前効力滿洲綠旗官員於二十五日前往援救賊衆六千餘人或據堡前之山或在谷中埋伏我兵分隊奮攻礮傷賊人甚多賊人敗走鎮海堡內滿洲察哈爾綠旗兵齊出截殺賊人四散逃去共殺傷厄魯特六百餘人我軍陣亡五人被傷六人再多巴之囊素阿旺丹津從前叛歸羅卜藏丹津今爲我兵擒獲理應正法但軍務未完暫行監禁奏入報聞（丙子）

萬壽節停止朝賀筵宴○遣官祭福陵

昭陵

暫安奉殿

孝陵

孝東陵

景陵○

上詣

壽皇殿行禮○遣官祭真武東嶽城隍之神（是日）

上御懋勤殿召讀卷官入詳定甲第聞進呈十卷一一酌定大學士馬齊等奏曰

皇上加意作人恩施格外落卷迴避卷俱遣官校閱有善必錄固有遺才士子無不感服

上諭曰入闈各官爲國家宣力伊子弟反不得應試殊屬可憫考試迴避諸生其永著爲例又諭曰國家取士大典原應加意朕惟以至誠御下竝非欲其感恩也即如爾等大臣若以恩意籠絡反爲輕視爾等朕平日行路從不輕踐人影左右近侍皆所深知豈於大臣而肯輕視耶爾等能佐朕爲令主朕亦樂爾等爲良臣隨命讀卷官等坐賜茶畢

上回宮

大清世宗敬天昌運建中表正文武英明寬仁  
信毅大孝至誠憲皇帝實錄卷之十二

實錄卷十二

三十

大清世宗敬天昌運建中表正文武英明寬仁  
信毅大孝至誠憲皇帝實錄卷之十三

監修總裁官光祿大夫經筵講官太保議政大臣保和殿大學士兼兵部尚書總理兵部事務等伯加十五級臣鄂爾泰

總裁官光祿大夫經筵日講官起居注太保兼太子太保保和殿大學士兼戶部尚書仍兼管吏部尚書翰林院掌院

事三等伯加十三級臣張廷玉光祿大夫經筵日講官起居注太保議政大臣武英殿大學士兼工部尚書仍兼管

翰林院掌院事加二級臣福敏光祿大夫經筵講官太子太保東閣大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事臣三泰等奉

敕修

雍正元年癸卯十一月丁丑朔

實錄卷十三

上詣

壽皇殿行禮

上御太和殿傳臚賜殿試貢士于振等二百四  
十六人進士及第出身有差○戊寅總理事  
務王大臣等議覆撫遠大將軍年羹堯奏稱  
羅卜藏丹津率兵四五千名進攻西寧之南  
川口因守口兵少賊人冲入防守兵見賊勢  
衆即據中堡賊人圍堡堡內囊素潛與賊  
通欲鑿牆而入守備馬有仁等奮力抵禦臣



令叅將宋可進遊擊元繼尹等率領弁兵往援賊人迎戰我兵內外夾攻殲殺厄魯特番兵九十餘名賊人敗遁因申中堡囊素助賊攻戰盡皆殺滅所獲賊人器械馬匹俱賞給兵丁外我兵陣亡七人隨加賞卹俟各處調齊兵丁臣即見機勦滅但甘州兵少力弱查喀爾喀厄爾得尼王各扎薩克離甘州甚近乞調蒙古兵三千名協駐甘州以壯軍威等語查喀爾喀厄爾得尼王各扎薩克兵丁調往甘州雖屬近便但冬令嚴寒喀爾喀等散處遙遠應停其調遣請就近派鄂爾多斯兵五千名令副都統花色等帶領歸化城土默特兵五百名令副都統查克旦等帶領大同鎮兵一千名總兵官馬觀伯帶領前往甘州其馬觀伯員缺查永北鎮總兵官馬會伯現在京師應著馳驛往赴大同署理從之○己卯諭內閣四川成都兵丁據大將軍年羹堯奏請調往松潘等口其駐防四川副都統法

喀年近衰老著護軍統領納秦前往協理所有兵馬錢糧事務會同巡撫蔡珽商酌辦理○庚辰總理事務王大臣等遵旨議奏謁陵之禮始於東漢歷唐宋明皆間歲一行至於週年親謁陵寢未見紀載我皇上至仁大孝一歲之中兩詣山陵孝思備摯現今冬至將近聖祖仁皇帝配天大典指日恭行伏望

皇上以禮制情停止親謁於諸王內命一人恭代得旨諸王大臣援據典禮勸止朕行姑暫停往謁今歲兩次躬送梓宮地方百姓亦甚勞苦俟明歲清明親往恭謁○辛巳以內閣學士塞楞額仍充日講起居注官○以鑲黃旗蒙古副都統查史署正藍旗蒙古都統○總理事務王大臣等議覆

戶部侍郎常壽條奏外省駐防弁兵病故若在京並無產業養贍無資所遺孤寡請免其

送樞回京。又太常寺少卿穆里渾條奏外省駐防弁兵內有寡婦及年老告退之人有親子在駐防處充補食糧者請仍留就養查外省駐防八旗弁兵其宗族俱在京師若令於駐防處造墳立業年久旗民混淆難於分別嗣後除盛京等處外其餘各省駐防弁兵身故仍令送樞回京其寡婦及年老告退之人有親子在彼處頂補馬甲者准留駐防處就養從之○壬午以原任吏部侍郎塞爾圖為

甲午十一月

○

兵部侍郎以翰林院侍讀學士沈翼機提督江西學政九卿議覆兵部尚書盧詢條奏請定捕盜官役勸懲及窩主之罪嗣後捕役獲盜設立賞格其窩主應發遣黑龍江得旨此議尚未詳盡從來盜案內盜首脫逃尚未緝獲或報稱病故者甚多如何使盜首必不漏網盜案不致稽遲之處應再加詳議至於窩主有窩強者有窩竊者有知情者有不知情者有分贓者有未分贓者律內按罪分

甲午十一月

三

別立法監候斬絞以至杖笞開載甚明今槩行議遣黑龍江可乎又議獲盜過半免其治罪過半之外拏獲一名賞銀十兩等語夫獲盜過半免其治罪足矣過半之外拏獲一二名即加賞賚此不過地方官酌量行之以示鼓舞又何得預定數目援為定例乎此本著發回再行詳議具奏尋議嗣後承緝各官不獲盜首者雖獲盜過半仍按限分別議處如盜首果係病故必查有實據方准免其處分捕役拏獲盜首令州縣官從優給賞其不獲者將家口監禁勒比至窩盜之家知情存留分別定以杖流存留三人以上者充發三姓地方永著為例從之○兵部議奏叅遊以下等官丁憂應給假十個月回籍安葬得旨所奏亦是但尚未詳盡直省人居官有遠近不同一例給假十個月勢必將任內事件不交代清楚草率離任可乎武職有防禦之責從前定例俱著在任守制必有深意嗣後武職

丁憂之員該部應酌量地方遠近防守之處有無緊要與應否給假之處該督撫提鎮聲明具奏此本著再詳議尋議武職叅將以下等官嗣後應仍照定例不准給假如實係獨子及家無以次成丁者再查其駐防地方非係緊要許該督撫提鎮具題請旨其限期難於預定應照該員任所地方與原籍相距遠近酌量定限近者不得過六個月遠者不得過十個月儻於定限外借端逗遛照例議處

從之○癸未調鑲藍旗蒙古副都統馬喇爲本旗滿洲副都統陞鑲藍旗護軍叅領碩色爲本旗蒙古副都統○撫遠大將軍年羹堯摺奏據隨侍郎常壽之千總馬超羣等回稱常壽於初九日至羅卜藏丹津所駐巴顏布拉克地方羅卜藏丹津云是月十五日我等

陵辱拔刀自刎等語常壽現被禁堪布廟中奏入報聞○甲申大學士等檢舉悞票京口將軍本章請交部議處得旨忠君愛國之心發於至誠凡事自不致舛錯遺漏若但思竊位沽名趨利避害僥倖於萬一而於國家制度政事輕重絕不加意茫昧失序豈不貽笑於世此等小事猶非所重但能各守君臣大義使朕不致恐懼疑惑便是國家之福朕之所望於大臣者於一切利欲之心勉自克制精白乃心維持國家大體不使我朝君臣貽譏於萬世朕之所望足矣○以雲南援勦右協副將紀成斌署理雲南永北總兵官○禁止姦棍私販中國幼穉出口賣與蒙古關口官員兵丁不行查拏者分別議處著爲例○乙酉諭大學士等古制凡遇廟諱字樣於本字內但缺一筆恐未足以伸敬心昨朕偶閱時憲曆二月月令內見

聖祖仁皇帝聖諱上一字不覺感痛嗣後中外

奏章文移遇

聖諱上一字。則寫元字。遇

聖諱下一字。則寫燭字。爾等交與該部。即遵諭

行。○免浙江安吉。仁和等五十州縣。杭州右

衛等三衛。湖州嚴州二所。本年分旱災額賦

有差。○賑浙江富陽等二十九縣。台州一衛

嚴州一所。旱災饑民。○丙戌。撫遠大將軍年

羹堯。摺奏。北川新城有逆賊二千餘。據住遊

擊馬成。輔擊殺逆賊甚衆。臣令副將王嵩。叅

將宋可進等。帶領兵丁三千。往援賊據山。抵

拒我兵奮力攻擊。破賊六營。賊遂敗走。再莊

浪爲河西五府總路。東西兩山。俱番人遊牧

之地。此內謝爾蘇一夥最強。厄爾布一夥助

其行惡。賊恃山高林密。以爲巢穴。其地最險

者。係碁子山。茨爾溝二處。臣調集涼州兵二

千。土司魯華齡兵一千。各處鄉兵一千。令涼

州總兵官楊盡信。涼莊道蔣洞管領四面夾

攻。斬賊人數百級。俘獲其妻子。番賊奔入鐵

保城。生擒厄爾布。賊首魯木受等二人。及謝

爾蘇。賊首坎柱等六人。俱已審明。正法。臣見

餘賊無幾。將兵調回西寧。守備王福晉把總

陳昌及兵丁二十餘人陣亡。其被傷人數。俟

查明詳報。得旨。據奏侵犯西寧之南川。西川

鎮海堡。北川等處逆賊厄魯特羅卜藏丹津

被官兵協力奮攻。斃殺殆盡。賊衆墮膽逃竄。

竝將莊浪等處截路行劫之賊。番擊敗擒。獲

大將軍年羹堯。調遣指授官兵。俱各奮勇。實

心効力。殊屬可嘉。此次立功報効。陣亡受傷

官兵。俱著註冊。俟事平之日。該部從優議敘。

○丁亥。諭戶部。浙省偶值秋旱。被災地方。已

經蠲免錢糧。令有司加意撫綏。舊額杭嘉湖

所屬十四州縣。應徵漕米三十二萬石。今荒

歉之歲。民間納米爲艱。著令徵收一半。改折

一半。既可以濟民之食。又可以紓民之力。其

改折之價。著照康熙九年例。每石折銀一兩

完交。其應徵漕米十六萬。米色或未能純一

著令紅白兼收以示朕軫恤地方格外施仁之至意○撫遠大將軍年羹堯摺奏西寧北川上北塔下北塔二處蒙古回子占地數百里丁衆糧裕素懷異志臣令千總馬忠孝前往下北塔將所有三十村莊回目錫拉墨爾根等俱已招撫馬忠孝等又帶領兵一千名往勦上北塔賊衆擒獲頭目阿布多吳園厄爾克喀等即行正法其餘回人俱已招撫馬忠孝等請俟大兵凱旋議敘奏入報聞○撫

遠大將軍年羹堯摺奏察罕丹津在河州居住羅卜藏丹津欲行劫據臣令少卿花善帶領察罕丹津妻子并伊屬下人等移至蘭州居住奏入報聞○靖逆將軍富寧安奏報吐魯番等處地方屯田收穫麥子糜子共九千三百三十石有奇下部知之○戊子大學士等遵旨議奏國史紀載傳信萬世應將

太祖

太宗

世祖

聖祖四朝有功任事之臣博採見聞查核一切檔冊陸續作傳其滿漢監修副總裁等官恭候欽定得旨著修

聖祖仁皇帝實錄之大臣等兼修翰林纂修官著另派○己丑

聖祖仁皇帝暮年大祭

上親詣

奉先殿行禮復詣

壽皇殿瞻拜

聖祖仁皇帝御容行禮盡哀○

上命

皇四子弘曆祭

景陵○庚寅太僕寺卿張文燦緣事革職擢吏

部文選司郎中沈近思爲太僕寺卿○緩徵

江蘇屬武進等七州縣本年旱灾一半漕糧

又命溧陽等十三州縣紅白私種各色兼收

從署江蘇巡撫何天培請也○辛卯

上詣

壽皇殿行禮○諭理藩院據大將軍年羹堯奏稱青海台吉索諾木達什在布隆吉爾地方由羅卜藏丹津處脫身來歸等語向者索諾木達什盡忠効力乃被叛賊羅卜藏丹津誘擒今聞伊已來歸良慰朕懷索諾木達什先與駐劄柴旦木地方之官兵一處効力繼又往西藏軍前竭誠報國深屬可嘉特沛殊恩著封爲貝子給與上等產業加意撫綏併著大將軍傳諭俾知朕意○鑄給巡視山東河湖工務監察御史印○戶部議覆漕運總督張大有條奏一守備千總請酌量繁簡保題調補一押運千總完運一次二次俱准加銜三次押運全完者准其議敘即陞一部發効力武舉領運事竣赴淮考核後請令咨部推用一江西南昌衛前後兩幫併九江衛前幫運艘俱一百餘隻領運千總勢難查察請酌派廣信等五幫分轄稽查著爲定例均應如

所請從之○河道總督齊蘇勒等奏報中牟縣十里店決口合龍得旨前聞中牟縣隄口漫決朕念切民生深爲軫懷覽奏十里店東口已經堵築合龍斷流但係隆冬所築工程仍加意防守保固○壬辰鑄給禮部侍郎薩哈布辦理征西將軍軍前糧餉事務關防○吏部議覆禮部左侍郎登德奏言內閣滿洲漢軍侍讀學士侍讀中書俱有繙譯之任嗣後侍讀學士缺出請將漢字出身郎中等官俸深者十員考試繙譯選擬正陪題補侍讀缺出將中書內辦事敬慎之員題補中書缺出將本旗進士舉人與現任筆帖式及應陞人員內考試繙譯選擬正陪題補應如所請從之○添設宗人府漢主事二員以進士出身人員補授○予故廣東碭石鎮總兵官游觀光祭葬如例○癸巳以吏部尚書田從典爲武會試正考官吏部右侍郎史貽直爲副考官○禮部奏本月二十五日郊祀

圉丘恭奉

聖祖仁皇帝神位配享次日

皇上陞殿行慶賀禮頒詔天下得旨朕惟

聖祖仁皇帝大禮告成普天同慶朕陞殿頒布

恩詔蓋以賀

列祖之鴻禧慰萬方之誠悃也然朕思念

顧復深恩中心哀慕今未滿三年不忍陞殿受

慶賀禮著內閣九卿等詳察典禮酌古準今

務期於禮允協庶朕心得安可即確議具奏

尋議先王制禮原以節情鉅典攸宜古今不

易禮臣所請懇賜

允行得旨諸臣酌古準今詳察典禮具奏朕今

亦難固却但朕中心實甚不安著允諸臣所

請行○撫遠大將軍年羹堯摺奏厄魯特番

子賊衆在新城堡等處往來劫奪據陸續報

稱守備李國強外委馮光永俱陣亡把總李

孝身受重傷兵民俱被擄掠臣調西寧總兵

官黃喜林等領兵前往征剿羅卜藏察罕等

賊共殺傷奇嘉寺逆賊五百餘名喇嘛番子

一千餘人獲賊頭目七名器械駝馬牛羊無

算因時值寒冷臣令黃喜林等撤兵至西寧

奏入報聞○甲午戶部議覆廣西總督孔毓

珣疏言粵西地方邊遠商人資本無多以致

誤課誤鹽民憂淡食請動藩庫銀六萬兩令

鹽道委員辦理官運官銷行之三年可以酌

減鹽價應如所請從之○復設太常寺協律

郎一員贊禮郎二員司樂二員從禮部右侍

郎三奉等請也○乙未諭內閣衍聖公孔毓

圻襲爵多年克守成法敬慎素著因朕追念

先師德澤崇封五代王爵謝恩來京不期患

病溘逝朕心深爲軫悼遣大臣賜奠茶酒○

兩江總督查弼納疏言江西萬載縣流匪溫

上貴係朱一貴餘黨糾夥哨聚當經地方官

擒獲應行正法得旨三法司核擬具奏知縣

施昭庭李珣於賊始發覺即行撲滅著議敘

其率衆擒賊之原任把總漆啓瑞著補授把

總鄉勇嚴林森等收伍食糧恤賞之處俱著准行○丁酉諭內閣爲治之道在於務實不尚虛名朕纘承丕基時刻以吏治兵民爲念事無大小周思詳慮求其見諸施行實可以有濟天下者必下諭旨諄諄告戒中外條奏有當理者無不嘉與採納所冀內外臣工實在遵行庶有成效一年以來所降諭旨及內外條奏頒發於六部九卿八旗直隸各省者亦已多矣內外衙門於奉到事件若不過行一文書出一告示徒托空文竟不見諸實事則不徵不信豈朕倚毗相助爲理之至意歟儻所降諭旨及條奏准行之事其中果有一二未盡允協宜加損益者須據實入告候朕酌定總於來年十二月將各條各款實在如何施行及行之如何成效條分縷晰明白奏聞○諭禮部  
孔子道冠古今爲萬世師表薄海內外無不俎豆尊崇國學乃四方表率其制尤重

聖祖仁皇帝臨雍釋奠典禮優隆朕纘承大統景仰先型羹牆如見念國學爲造士之地聖教所被莫先於此恐歷歲既久有應加修葺之處爾部會同工部詳加閱視凡文廟殿宇廊廡及講堂學舍務須整理周備俾廟貌聿新以申景慕朕將親詣焉○陞貴州巡撫金世揚爲工部右侍郎雲南布政使毛文銓爲貴州巡撫○直隸宣化總兵官張自成年老乞休允之以正黃旗漢軍副都統許國桂署理直隸宣化總兵官○戊戌諭內閣今科庶吉士散館滿漢試卷著吏部尚書隆科多戶部尚書張廷玉禮部尚書張伯行禮部侍郎登德閱看具奏從前已將庶吉士內揀選分用此內或更有才堪外任及可任部員者爾等會同左都御史朱軾分別具奏朕思編檢庶常乃清要之選必須學問優長人品端方始爲稱職若品行有虧雖文藝可觀亦無足取至今歲所中進士爾等務悉心



察訪必得文行兼優之士。擢爲庶吉士。將來始可以收得人之效。其第一甲第一名于振著。即授翰林院修撰。第二名戴瀚。第三名楊炳。即授編修。二甲第一名張廷珩。即授檢討。俱著在南書房行走。己亥。鑄給翰林院侍讀學士綽爾岱。辦理布拉罕軍前糧餉事務。關防。撫遠大將軍年羹堯條奏進勦青海事宜。預備進勦兵丁。請將陝西督標西安固原寧夏四川甘州大同榆林土默特鄂爾多斯巴爾庫爾吐魯番等處兵丁。共挑選一萬九千名。令提督岳鍾琪等分領。從西寧松潘甘州布隆吉爾四路進勦。防守邊口土司兵二千名。及西安滿兵五百名。留守西寧各邊口。陝西撫標兵五百名。防守永昌西安滿兵五百名。防守甘州。其布隆吉爾舊有兵一千名。應仍留駐防。至副將張成龍現領兵五百防守巴塘。其裏塘止駐兵二百。請將四川撫標兵三百名。增派防守。再令署松潘鎮

副將張英。副都統黑色領兵一千五百名。出松潘。在黃勝關駐劄。雲南提督郝玉麟領兵二千名。駐劄入木多。則羅卜藏丹津等斷不敢前往巴爾喀木等處。一購買馬駝。臣在陝西買馬一千匹。甚不敷用。請令在歸化城張家口採買。或將太僕寺上都打布孫腦兒孳生馬匹解送三千匹。巴爾庫爾挑送駝二千。再於甘涼肅州等處採買一千五百。則兵丁進勦之時。可無貽誤。一貯備軍糧。臣在西安慮青海有事。已預買米六萬石。將來自不致有誤。一精煉火器。請將景山製造之火藥。每駝以一百八十觔計算。賞給一百駝。於明年正月內解送西寧得旨。總理事務王大臣議政大臣會議具奏。尋議大將軍年羹堯所奏進勦賊寇。調遣兵馬。堅守隘口。備足糧餉等款。均應如所請。其所請馬數外。再增一千匹。解送至火藥。於所請額數外。增送一倍。再行文郝玉麟。即由中甸帶兵前往入木多駐

劄其中甸地方。應令總督高其倬簡選總兵官一員帶兵五百名前往駐劄從之。○庚子以恭奉

聖祖仁皇帝配

天遣官祭告

天

地

太廟

社稷○禮部奏言冬至令節於

皇后前進箋行慶賀禮得旨朕舉行冬至慶賀禮因

聖祖配

天大典諸王大臣強之再三朕不得已從之皇  
后前上箋慶賀之禮過三年舉行○辛丑冬至祀

天於

圜丘恭奉

聖祖仁皇帝配享

上親詣行禮恭捧

聖祖仁皇帝神位奉安於

上帝神位之右

太宗文皇帝神位之次○遣官祭

永陵

福陵

昭陵

暫安奉殿

孝陵

孝東陵

景陵○停止次日朝賀○

上詣

壽皇殿行禮○諭王大臣等怡親王於

皇考時敬謹持身廉潔立品未嘗圖利干預一事糾黨邀結一人所屬人員畧無擾累其安分自守家計空乏舉國皆知朕素崇獎自朕御極以來一心戴朕克盡臣弟之道所交事務悉効公忠亦衆所共知也查從前朕弟兄

分封之例。總計各得錢糧二十三萬兩。朕欲援此例賜之。王奏辭不已。朕勉諭再四。僅受十三萬兩而已。再照裕親王例。令支官物六年。王又叩首固辭。極其懇切。朕欲以王之善表揚於衆。且爲後日子孫模範。故特諭諸王大臣。今不允王之所請。既不可得。允王所請。則超軼尋常。實心爲國宣力之弟。轉不得以諸弟兄應得之分賜之。朕心實爲不忍。著諸王大臣議奏。以翰林院檢討鞏建豐爲四

川鄉試正考官。戶部主事許隆遠爲副考官。翰林院侍讀學士王國棟爲廣東鄉試正考官。編修胡彥穎爲副考官。左春坊左庶子李鍾羲爲廣西鄉試正考官。翰林院侍讀德新爲副考官。侍講文岱爲福建鄉試正考官。右春坊右庶子張照爲副考官。○壬寅以聖祖仁皇帝配

天禮成。

上御太和殿。王以下文武各官朝賀行禮。是

日。頒詔天下。詔曰。朕惟孝經云。孝莫大於嚴父。嚴父莫大於配天。禮記云。惟聖人爲能饗帝。孝子爲能饗親。故周頌著思文之什。大易垂殷薦之辭。歷稽遠古。脩食始於有虞。爰考前章。合祀起於周室。所以報功崇德。尊祖顯宗也。朕纘承大業。綏理萬方。既用享於祈年。將升中於

迎日。恭惟

聖祖仁皇帝。動符乾健。靜合坤元。廣大高明。奉無私以成化。涵弘清穆。推至教以乘時。育萬物而顯諸仁。德周有截。包五行而藏諸用。道運不言。建極敷猷。剛柔並濟。體元立制。仁義兼施。禮樂兵農。法四序之春秋。冬夏刑威。勸賞代六氣之風雨。雷霆戶牖。三光提封。八極東漸。西被。北變南諧。中國有聖人。瀛海仰日。星之臨照。王者大一統。遐荒沐霜露之霑濡。得一以清。得一以寧。號均三大。無不持載。無不覆幬。聲並兩儀。論參贊之成功。與天地而

俱泰補化育之不足。見民物之咸亨。蕩蕩無名。豈梯階之可及。蒼蒼在望。非測管之能窺。三五以來。所稱裁成輔相。範圍曲成。先天而天弗違。後天而奉天時者。惟我

聖祖仁皇帝實克盡之。允宜

配享南郊。躋壇北時。用是上稽前典。下慰輿情。昭告

天

地

宗廟

社稷。率諸王貝勒。文武羣臣。於雍正元年十一月二十五日。冬至。恭祀

上帝奉

聖祖仁皇帝配享。雍正二年正月初六日。上辛。祈穀恭祀

上帝。五月初一日。夏至。恭祀

皇地祇。並奉

聖祖仁皇帝配享。振金聲以達氣。

吳帝來賓。捧玉瓚而獻誠。

列聖昭格。隆儀備舉。浩澤均宣。於戲貽謀。佑啓敢忘覆載之洪慈。對越駿奔。儼觀陰陽之合撰。青門升燎。虔一人報本之心。紺幄居歆。協萬國尊親之願。布告天下。咸使聞知。○詔內恩款。凡十五條。○諭總理事務王大臣等。撫遠大將軍年羹堯。進勦羅卜藏丹津。將巴爾庫爾吐魯番兵調往五千名。朕恐巴爾庫爾兵力單弱。著於振武將軍傅爾丹軍營兵丁內。撥派二千名。令前鋒統領丁壽都統良敦帶領。於明年二月內前往巴爾庫爾駐劄。○陞翰林院侍讀學士綽爾岱爲內閣學士兼禮部侍郎。仍留軍前辦理糧餉事務。○總理事務王大臣等議奏。將軍傅爾丹處兵丁既派往巴爾庫爾阿爾泰地方。未免兵少。僅有調遣。應將祁里德所領之兵。共合一處。歸一人總統。恭候欽點。得旨。兩處將軍僅有合行處。著傅爾丹總統。祁里德今在參贊上行走。

○癸卯。賞會試中式武舉銀各四兩。爲整理衣服。貸取馬匹之用。○給正白旗滿洲都統拉錫拜他喇布勒哈番世職。○詹事府詹事魏方泰。乞假回籍。允之。陞國子監祭酒王圖炳爲詹事府詹事。○兵部奏在京武職官員考選軍政得旨。此係初次考選。爾等秉公考驗。內有出兵効力行走。年老俸深者。諸事尚能坐理。仍著留任。再人雖年老衰頹。不宜留任。而出兵効力之處甚多。將伊即行革退。致令無以度日。深屬可憫。應另行分晰具奏。朕自加恩。其雖無効力行間之處。而供職年久者。伊等身逢太平之世。何由經歷戰陣。爾等亦宜留心驗看。○命八旗蒙古各建立官學。吏部理藩院考取能蒙古文蒙古語者。每旗設助教一員。於每佐領下選擇一人肄業。准其考試筆帖式補用。○甲辰。策妄阿喇布坦使臣根頓等朝見。上召入諭曰。爾台吉於

聖祖皇考時。有獲罪之處。亦有効力之處。爾台吉今悔過引罪。朕甚嘉之。所貢方物。朕酌量收納。俟爾回日。另降敕諭。○乙巳。諭王大臣等。前將怡親王奏摺。交王大臣等議奏。王又屢次奏辭。力求允其所請。朕尚難於酌定。想王大臣等自難定議。今俱著照所請。以副王謙抑之懷。朕另行加恩。將現在王所兼管之佐領。俱令爲王之屬下。賞給一等護衛四員。二等護衛四員。三等護衛十二員。加賜豹尾槍二。長桿刀二。每佐領下添給親軍二名。以此加恩於王。即遵旨行。○諭大學士等。向來庶吉士學習清書。散館之後。每至荒廢。殊爲可惜。嗣後清書散館之翰林。不可令其荒廢。今年新科進士。選拔庶常。朕意學習清書者。少派數人。令其盡心學習。務期通曉。散館後亦不可荒廢。或在翰林。或在部曹。即令與滿員一同繙譯。如此。方實有裨益。新科進士。於引見之前。朕欲先行考試。知其學問。再行引

見選拔庶人才不致遺漏。目今天氣寒冷。一應仍照殿試預備考試題目。朕將詩文四六各體出題。視其所能。或一篇。或二三篇。或各體俱作。悉聽其便。○吏部議奏。日講起居注官出差。非陞任可比。若以侍班員少。請將翰林等員署理。仍開列請旨。候該員差滿回京。署理之員。仍回本任。應將條奏內開缺另補之處。無庸議從之。

大清世宗敬天昌運建中表正文武英明寬仁信毅大孝至誠憲皇帝實錄卷之十三

大清世宗敬天昌運建中表正文武英明寬仁信毅大孝至誠憲皇帝實錄卷之十四

敕修

雍正元年癸卯十二月丙午朔

上詣

壽皇殿行禮○諭八旗官員等。老安郡王居心

不正。諂附輔政大臣。又自恃長輩。每觸忤

皇考。蒙

聖德寬仁。始終容宥。而伊諸子。全不知感。不務

竭誠効力。馬爾渾。經希吳爾占等弟兄之間。

互相傾軋。競爭營求。色亨圖。亦妄冀得爵。讒

害骨肉。此衆所共知者。安郡王諸子之中。馬

爾渾。係應襲封王爵之人。似屬安分。其子華

監修總裁官光祿大夫經筵講官太僕議政大臣保和殿大學士兼兵部尚書總理兵部事務三等伯加十五級臣鄂爾  
總纂官光祿大夫經筵講官起居注太僕兼太子太僕保和殿大學士兼戶部尚書仍兼管吏部尚書翰林院掌院  
筆三筆伯加十三級臣張廷玉光祿大夫經筵講官起居注太僕議政大臣武英殿大學士兼工部尚書仍兼管  
翰林院掌院筆加二級臣福敏光祿大夫經筵講官太子太僕東閣大學士兼禮部尚書加六級臣徐光祿大夫  
經筵講官議政大臣協辦內閣大學士事務禮部尚書仍兼管太常寺鴻臚寺事務五筆等奉

玘尚無劣蹟。而天絕其嗣。封爵懸虛。是以  
皇考審擇其人。躊躇有待。乃安郡王之子孫。遽  
生怨望。吳爾占色亨圖等。至屢形於辭色。夫  
國家恩施。詎可倚恃。而強邀。今廉親王。以不  
襲封安郡王之故。讒間宗室。搖動該王屬下  
人等之心。以累世仰受。

太祖

太宗

世祖

聖祖恩施之舊人。豈肯被伊引誘。遂其擾亂。若  
強欲令朕襲封安郡王。則朕從容施恩之本  
念。俱不可行矣。將襲封安郡王之本章。發回。  
不准承襲。其屬下佐領著俱撤出。另賜他人。  
○吏部疏奏。京畿四路捕盜同知缺出。應令  
該督撫於現任屬員內揀選。如本省無人。請  
於筆帖式等官內揀選。從之。○免江南海州  
溧陽等二十二州縣。本年分旱災額賦。有差。  
○予故廣東提督馮毅祭葬如例。○丁未安

徽巡撫李成龍疏報。潁州太湖等七州縣開  
墾康熙六十一年分田地五十八頃有奇。下  
部知之。○戊申。諭吏部兵部定例。八旗官員  
等。一經革職。盡謂之廢官。令當勞苦差役。挑  
取烏鎗馬甲。情屬可憫。嗣後八旗革職人等。  
各視其罪之輕重。著為定例。如婪贓枉法。虧  
欠帑項。規避怠惰。行止不端。曠班等罪。仍照  
舊例當差。此外因公註誤。衰老有疾。才力不  
及。無心等過。概行寬免。著交該部議奏。尋議  
革職旗員。

皇上格外施恩。欽遵曉示。八旗外至旗員內。或  
有家計艱窘。現在馬甲執事人內有願留者。  
准其仍留。其未當馬甲執事人內有願効力  
者。亦准其挑取。從之。○議敘軍前効力蒙古  
人等功。封厄魯特多羅貝勒額駙阿寶為多  
羅郡王。台吉沙畢多爾濟為固山貝子。喀喇  
沁一等塔布囊噶爾馬色楞扎薩克一等台  
吉沙克都爾扎布。俱為輔國公。餘各陞賞有

差○己酉命九卿於新科進士內有居家孝友人品端方者各舉所知親識亦不必迴避○分湖北湖南鄉試額湖北中式五十名副榜十名湖南四十九名副榜九名武舉各二十五名○添設刑部現審司辦理在京八旗命盜及各衙門欽發事件從刑部尚書佛格等請也○征西將軍祁里德奏報烏闌古木地方屯田收穫青稞糜子四千四百二十石有奇下部知之○理藩院議覆察哈爾右翼捕盜章京應授爲六品官照例給與半俸再每旗添設兵丁十名月給錢糧一兩從之○靖逆將軍富寧安奏報已爾庫爾地方屯田收穫青稞二萬一千六十石有奇下部知之○予陣亡四川提督康泰祭葬謚壯勇陝西涼州總兵官康海直隸宣化總兵官司九經祭葬俱贈署都督同知○予故福建水師提督施世驄祭葬謚勇果贈太子少保○庚戌諭內務府總管等凡爲莊頭之人以力田節

儉爲本如李姓鄔索住等奢侈僭妄俱已獲罪嗣後當深以爲戒勤農務本躬行節儉教訓子孫讀書守分如果有才能朕自加恩錄用爾等傳諭知悉伊等所居房舍應量其家口酌定額數無得違例興造非分之物無得擅用如有仍前諸弊定行正法○禮部議覆御史田嘉穀條奏各省學政科考生員舊例用四書題文二篇請增用經題文一篇以崇經學如遇三冬日短減去四書文一篇應如所請從之○辛亥  
孝惠章皇后忌辰遣官祭  
孝東陵○諭八旗都統等向者每甲喇止設叅領一員因不敷用始委署一員協理昨議政大臣奏稱護軍校驍騎校等官以之委署叅領職卑不勝其任應停其委署等語朕加以酌量將委署叅領改作副叅領秩爲五品嗣後副叅領員缺仍將護軍校驍騎校等官一併揀選引見補用若叅領副叅領奉有差遣



其員缺應行委署者奏聞委署如此則責任專而管轄得力由兵丁出身者其陞轉之途亦不致壅滯旗下既得人材辦理事務亦大有裨益至現在委署叅領應分別優劣優者授爲副叅領劣者令其各回原職○予故衍聖公孔毓圻祭葬加祭二次謚恭愍○免直隸開州永年等二十二州縣康熙六十年分旱災額賦有差○壬子內閣學士拉錫希布以老疾乞休加侍郎銜致仕以原任甘肅按察使巴錫爲內閣學士兼禮部侍郎○調湖北布政使朱綱爲湖南布政使司布政使湖南布政使鄭任鑰爲湖北布政使司布政使○吏部疏奏舉人揀選知縣每逾三十年不克及時試用除現在已經截取赴部者聽其照例銓選外其餘無論已未揀選之員除本科外應行令直省督撫每於鄉試事竣會同主考官秉公驗看凡年力精壯克勝吏治者給文赴部銓選其年老及才具平常者雖已

經截取俱准於本籍具呈改就教職歸班銓選從之○予故原任禮部尚書陳詵祭葬謚清恪○癸丑

上詣

壽皇殿行禮○免江南太倉鎮海揚州三衛本年分旱災額賦有差○命緩征河南開歸彰衛懷河六府屬積欠錢糧以紓民力○撫遠大將軍年羹堯奏王察罕丹津屬下厄爾克扎爾固齊阿爾塔爾和碩齊拉布木三人將羅卜藏丹津看守伊等賊兵殺散帶領一千餘戶口來投貝勒色卜騰扎爾帶領青海左翼公冊零之弟台吉巴爾珠爾等妻子并屬下人二千餘口來投臣即宣諭

皇仁赦其被脅從逆之罪安插於西川口外奏入報聞○予臺灣陣亡總兵官贈太子少保歐陽凱副將許雲叅將羅萬倉遊擊游崇功孫文元守備胡忠義馬定國等祭葬叅將羅萬倉妻蔣氏從夫殉難給銀立碑以表貞烈

○予故臺灣都司閻威守備楊士虎祭葬以捕賊傷殞照陣亡例賜卹也○甲寅授多羅貝勒延信女為郡君婿阿克敦為多羅額駙○解刑部尚書佛格任調禮部尚書阿爾松阿為刑部尚書○四川巡撫蔡珽題雅州府喇滾安撫司副使側汪交故請以其子革松結承襲下部知之○丙辰諭內閣每日條奏甚多朕覽訖或交王大臣等議奏或交九卿或交該管處議奏至於日久朕安能一一記憶凡朕交議事件內與前奏有重複者即行奏聞若事雖相似而所陳有更詳悉者仍行定議具奏○諭吏部庶吉士邵泰等教習已久今加考試應分別授職滿書俞元祺勵宗萬邵泰錢陳羣謝道承曹涵喬世臣蔣恭棐漢書劉嵩齡吳啟昆姚之駟王蘭生李光燾楊廷選陸奎勳黃秀馮謙唐繼祖唐紹祖覺羅恩壽留保俱照例授為翰林院編修檢討王克宏李同聲著以部員對品用楊魁甲姜

任修李應綬俱著以外官對品用楊魁甲等三合於御門辦事之日帶來引見○以內閣學士李鳳翥為浙江鄉試正考官吏部郎中王一導為副考官內閣學士吳士玉為江西鄉試正考官國子監司業孫嘉淦為副考官翰林院侍講學士德齡為湖北鄉試正考官工科給事中蔡仕舛為副考官刑部郎中莊清度為湖南鄉試正考官翰林院編修陳萬策為副考官○撫遠大將軍年羹堯摺奏察罕丹津之婿喇卜坦寨桑巴圖等屬下一千四百餘戶及丹忠屬下七百餘戶俱從羅卜藏丹津處脫逃來投仍令往原處居住奏入報聞○移廣東廣州左翼總兵官駐順德縣鎮標左右二營守備隨防改鎮標中營遊擊為前營遊擊移駐增城縣從廣東總督楊琳請也○丁巳策試天下中式武舉李琰等一百三十名於太和殿前○命八旗都統衙門於護軍領催

馬甲閒散人內揀選筆帖式繕寫檔案文移之事。滿洲四名。蒙古漢軍各二名。効力五年行走勤慎。咨送吏部。以各部院筆帖式補用。

○戊午。

上御瀛臺紫光閣閱視中式武舉騎射。○撫遠大將軍年羹堯摺奏。墨爾根戴青拉查卜之子察罕喇卜坦旺舒克喇卜坦二人率衆來投云。我父墨爾根戴青拉查卜聞大兵前來逃往巴爾喀木地方。再堪布諾門汗亦率屬人來投。查墨爾根戴青拉查卜與羅卜藏丹津併力擄掠察罕丹津情屬可惡。已令察罕喇卜坦遣人喚回伊父。俟到日審明請旨堪布諾門汗係邊口內塔兒寺喇嘛。乃察罕丹津親姪。唆令羅卜藏丹津叛逆。又令伊等喇嘛與我兵交戰。雖勢窮來投。情難姑恕。到日臣即行正法。奏入報聞。○以故行聖公孔毓圻長子孔傳鐸襲爵。○補行江南江西二省及河營康熙六十一年分軍政。不謹官十一

員。罷軟官一員。浮躁官七員。年老官二十員。有疾官九員。才力不及官三十三員。分別處分如例。○予故陝西涼州總兵官迷明祭葬如例。○己未。

上御瀛臺紫光閣閱視中式武舉步射。○諭翰林院選拔庶常。原以作養人才。今科進士特加簡閱。除于振戴瀚楊炳張廷珩已經授職外。取中沈淑吳龍戴永椿徐以升嚴民法焦祈年張江周學健張廷璩呂齡李徵臨沈榮仁李瑞尹繼善李徽黃元鐸胡光濤繆曰芑王坦何玉梁胡蛟齡馬金門許煇沈文豪馮懋華薄履青沈師孟顏希聖胡香山黃祐陶正中松壽陶士傑范咸王喬林劉敬輿保良陳齊寶盧生薰王又樸吳釗陳弘謀李淮王步青喀爾欽朱仕遇張考高山吳大受張來求李桐楊臚賜萬承芑顧海張若涵牧可登等五十六員。俱著改爲庶吉士。分別滿漢書教習。○又諭昨引見新科進士名單內有用

點記名者三十員。雖有年紀人尚可用。著以知縣即用。現今湖廣請發人員。該部將候補州縣之員。揀發十五員。此內亦選五員發往。又名單內有尖圈記名者十七員。年力尚壯。傳問伊等有願在各館効力及在內官學教習者。令各自陳明。若行走勤謹學問好者。朕仍拔爲翰林。○免江南淮安大河二衛本年分旱災額賦有差。○庚申。

上詣

壽皇殿行禮。○諭九卿。朕惟靖盜所以安民。而欲靖盜必須嚴諱盜之處分。併正竊盜之刑法。州縣有司因畏盜案叅處。往往諱盜不報。或以強爲竊。或以多爲少。或賄囑事主。通同隱匿。以致盜賊肆無忌憚。定例諱盜處分。不爲不嚴。無如督撫等官。全無覺察。殊負朕保愛良民之至意。且竊賊雖非強劫。然行竊日久。必至夥劫。所以律載竊盜三犯即絞立法之意。原在防微杜漸。今各直省竊盜依律究

擬者絕少。盜案之多實由於此。如何使有司不敢諱盜。併如何重懲竊盜之處。該部會同詳議具奏。○免河南中牟等十縣本年分水災額賦有差。○予故原任工部右侍郎王懿祭葬如例。○辛酉。

上御瀛臺紫光閣。閱視中式武舉技勇。○以內閣學士塞楞額充經筵講官。○賞給諸路軍前兵丁行糧一月。○撫遠大將軍年羹堯摺奏。賊人來侵布隆吉爾地方。叅將孫繼宗。遊擊孫超。節領兵往迎。遇賊三千餘人。正交戰時。副將潘之善引兵繼至。併力奮擊。殺賊甚衆。所獲器械無算。奏入。報聞。○壬戌。

上御瀛臺紫光閣。覆閱選取中式武舉五十餘人射。○宗人府疏奏。履郡王允禩受

皇上深恩。不敬謹辦事。每思推諉。應革去多羅郡王。降授輔國公。得旨。允禩自封王以來。並不感激効力。著革去郡王。仍在原固山貝子上行走。○吏部題。原任領侍衛內大臣一等

侯兼一拖沙喇哈番已渾德故銷去二次恩詔所得五拖沙喇哈番爲一等伯又分一拖沙喇哈番奉旨與已渾德長男已隆承襲餘二等伯以其四男馬哈大承襲從之○禮部題輔國公訥圖女請授爲鄉君其婿豐盛額現係散秩大臣一等公無庸另給品秩從之禮部議覆浙閩總督覺羅滿保疏奏西洋人在各省起蓋天主堂潛住行教人心漸被煽惑毫無裨益請將各省西洋人除送京効力外餘俱安插澳門應如所請天主堂改爲公所俟入其教者嚴行禁飭得旨西洋人乃外國之人各省居住年久今該督奏請搬移恐地方之人妄行擾累著行文各省督撫伊等搬移時或給與半年數月之限令其搬移其來京與安插澳門者委官沿途照看送到毋使勞苦○復設江南雲臺山東海營以海州營守備一員移駐並添設把總一員兵一百六十六名從漕運總督張大有請也○設

立廣西太平土州學以養利州訓導一員移駐額取文武童生各四名從廣西總督孔毓珣請也○旌表山西寧鄉縣烈婦趙進妻馮氏守正拒姦被勒殞命給銀建坊如例○甲子諭兵部國家保障封疆惟武臣是賴叅將以上責任尤重其年老有疾不能辦理以致營務廢弛者自難姑容但其間或有久歷戎行曾著勞績者情亦可憫嗣後叅將以上有老病之員該督撫提鎮照例題叅仍將伊從前行間効力之處查明繕摺夾入本章內同送內閣奏聞朕酌加恩典以示篤念舊勞之意○喀爾喀扎薩克多羅貝勒垂扎木散故遣官致祭○旌表河南孟縣烈婦謝廷報妻鄧氏拒姦不辱斧傷殞命福建福清縣烈女林勝卿聘妻何氏未婚夫故投繯殉節俱給銀建坊如例○乙丑上御太和殿傳臚賜殿試武舉李琰等一百三十六人武進士及第出身有差○兵部遵旨

議奏平復臺灣外委官張春等一千八百餘員淡水營援守外委官張朝任等二百三十餘員均應加等議敘從之福建巡撫黃國材以年老乞休溫旨慰留之丙寅以冊立皇后及冊封

貴妃

齊妃

熹妃

上親詣

奉先殿行告祭禮遣官告祭

天

地

太廟

社稷陞福建臺灣水師副將林亮爲福建臺灣總兵官升山西平遙縣中學爲大學額取文武童生各十五名從山西學政彭廷訓請也添設宣化鎮屬土木堡岔道城榆林堡鷄鳴堡左衛城懷安城六處駐防兵共一

百九名從宣化總兵官許國桂請也丁卯上御太和殿命太保吏部尚書公隆科多爲正使領侍衛內大臣馬武爲副使持節齎冊寶冊立嫡妃那拉氏爲

皇后冊文曰朕惟道原天地乾始必賴乎坤成化洽家邦外治恒資乎內職既應符而作配宜正位以居尊咨爾嫡妃那拉氏祥鍾華胄秀毓名門溫惠秉心柔嘉表度六行悉備久昭淑德於宮中四教弘宣允合母儀於天下曾奉

皇太后慈命以冊寶立爾爲皇后爾其承顏思孝務必敬而必誠逮下爲仁益克勤而克儉恪共祀事聿觀福履之成勉嗣徽音用贊和平之治欽哉命文華殿大學士嵩祝爲正使禮部右侍郎三泰爲副使持節冊封貴妃冊文曰朕惟起化璇闈爰賴贊襄之職協宣坤教允推淑慎之賢聿考彝章式崇位序咨爾妃年氏篤生令族丕著芳聲賦質溫

良持躬端肅凜箴規於圖史克儉克勤表儀  
範於珩璜有典有則曾仰承

皇太后慈諭以冊寶封爾為貴妃爾其時懷祇  
敬承慶澤之方新益懋柔嘉衍鴻庥於有永  
欽哉○命保和殿大學士馬齊為正使都察  
院左都御史尹秦為副使持節冊封

齊妃冊文曰朕惟教始宮闈端重肅雖之範  
禮崇位號實資翊贊之功錫以綸言光茲懿  
典咨爾妃李氏持躬淑慎秉性安和納順罔  
愆合珩璜之矩度服勤有素膺禔翟之光榮  
曾仰承

皇太后慈諭以冊印封爾為齊妃爾其益懋溫  
恭尚祇承夫嘉命彌懷謙抑庶永集夫繁禧  
欽哉○命禮部左侍郎登德為正使內閣學  
士塞楞額為副使持節冊封

熹妃冊文曰朕惟贊宮庭而衍慶端賴柔嘉班  
位號以分榮丕昭淑惠珩璜有則綸綍用宣  
咨爾格格鈕祜魯氏毓質名門揚休令問溫

恭懋著夙効順而無違禮教克嫺益勤修而  
罔怠曾仰承

皇太后慈諭以冊印封爾為熹妃爾其祇膺異  
命迓景福以咸綏翊輔坤儀荷鴻庥於方永  
欽哉○命兵部右侍郎牛鈕為正使禮部右  
侍郎蔣廷錫為副使持節冊封

懋嬪冊文曰朕惟協贊坤儀用懋珩璜之德  
佐宣內治必資柔順之賢爰考彝章式隆新  
典咨爾格格宋氏臧嘉成性著淑問於璇宮  
敬慎持躬樹芳名於椒掖曾仰承

皇太后慈諭冊封爾為懋嬪爾其祇承象服昭  
勤儉而化翼宮闈永荷鴻庥履謙和而誕膺  
綸綍欽哉○命吏部左侍郎巴泰為正使禮  
部左侍郎王景曾為副使持節冊封  
裕嬪冊文曰朕惟化理肇自閨闈令儀是式  
功容凜夫圖史禮秩攸崇爰賁徽章用昭彝  
典咨爾格格耿氏克叶柔嘉早推淑慎允合  
珩璜之度宜膺象服之榮曾仰承



皇太后慈諭冊封爾為裕嬪。爾其聿修懿行。迓景福於方來。式佩綸言。荷洪禧於勿替。欽哉。

○戊辰以冊立

皇后禮成。頒詔天下。詔曰。朕惟乾施坤成。廼布和於四序。日明月儷。竝臨照於萬方。故王者建邦。必正宮庭之位。聖人作則。首隆冊命之文。所以理教人倫。輔修內治也。朕丕續鴻基。欽承大業。奉

皇妣孝恭仁皇后諭旨。以嫡妃那拉氏誕秀高門。稟貞華胄。淑恭中度。懿範性成。孝敬盡於晨昏。承顏養志。柔嘉著於宮壺。惠下肅躬。令德克全。徽章允稱。宜冊立皇后。洎

慈闈失恃。典禮久稽。而宗事聿嚴。正名斯亟。茲敬遵

慈訓。載考舊儀。祇告

天

地

太廟

社稷於雍正元年十二月二十二日冊立那拉氏為皇后。俾承光於軒耀。式正號於長秋。大禮既成。湛施應溥。於戲祉貽璇室。宏昭式穀之原。福備椒庭。廣錫敷恩之典。布告天下。咸使聞知。○詔內恩款凡十三條。○是日遵旨。免行慶賀禮。○己巳諭兵部。今科中式武進士。係元年所取。狀元授為一等侍衛。榜眼探花。授為二等侍衛。二甲十三名。授為三等侍衛。令戴孔雀翎。三甲記名三十六人。俱授藍翎。餘照例揀選補用。○河道總督齊蘇勒疏。報河南中牟縣楊橋決口。已經堵築。合龍得旨。此係隆冬加築。今值春融。尤宜加意保護。務期永遠堅固。○庚午。

孝莊文皇后忌辰。遣官祭

暫安奉殿。○癸酉。遣內閣侍讀學士班第祭太昊伏羲氏等陵。左副都御史楊汝穀祭炎帝神農氏等陵。侍講學士覺羅逢泰祭女媧氏等陵。左副都御史江球祭黃帝軒轅氏等陵。



內閣學士胡煦祭少昊金天氏等陵孔子闕里吏部左侍郎已泰祭顓頊高陽氏等陵大理寺卿覺羅常泰祭夏禹王等陵左僉都御史陳允恭祭遼太祖陵撫遠大將軍年羹堯摺奏西寧一帶番賊俱經剿滅惟南川口外郭密九部肆行截搶臣廣行招撫祇有沙克都爾阿拉布坦率三部來投其餘部落仍行恣肆其呈庫活爾賈二部暴戾尤甚岳鍾琪帶來瓦斯雜谷之兵熟習山路臣前令岳鍾琪在歸德堡將上寺東策布下寺東策布之助惡賊番勦撫兼施已俱安插即移師進勦郭密番賊搜捕賊穴將呈庫一部攻殺殆盡活爾賈等部首惡已誅其餘盡皆投降奏入報聞○甲戌歲暮禋祭

太廟

上親詣行禮○遣官祭

永陵

福陵

昭陵

暫安奉殿

孝陵

孝東陵

景陵遣官祭太歲之神己亥旌表八旗節婦滿洲齊藍保妻馬佳氏等四十六人漢軍唐璽妻田氏等二十四人滿洲孝子鍾保等三人直隸各省節婦陳之鸞妻譚氏等一百三十五人貞女施氏等十三人孝子李東等九人各給銀建坊如例是歲人丁戶口二千五百三十二萬六千三百七又永不加賦滋生人丁四十萬八千五百五十七田地山蕩畦地八百九十萬一千八百七十九頃六十二畝有奇徵銀三千二十二萬三千九百四十三兩有奇米粟麥四百一十二萬八千六百五十七石有奇草四百八十二萬七千八百六十一束茶四十九萬五千六百三十引行鹽五百二萬四千一百三十八引徵課

銀四百二十六萬一千九百三十三兩有奇  
鑄錢四十九萬九千二百有奇

大清世宗敬天昌運建中表正文武英明寬仁  
信毅大孝至誠憲皇帝實錄卷之十四

大清世宗敬天昌運建中表正文武英明寬仁  
信毅大孝至誠憲皇帝實錄卷之十五

監修總纂官光祿大夫經筵講官太僕議政大臣保和殿大學士兼兵部尚書總理兵部事務三等伯加十五級正鄂爾泰

總裁官光祿大夫經筵講官起居注太僕卿太子太傅保和殿大學士兼戶部尚書仍兼管吏部尚書翰林院掌院

第三等伯加十三級正殿學士光祿大夫經筵講官起居注太僕議政大臣武英殿大學士兼工部尚書仍兼管

翰林院掌院事加二級正福祿光祿大夫經筵講官太子太傅東閣大學士兼松花江尚書加六級正徐永光祿大夫

經筵講官散秩大臣松齡日盛欽此

敕修

雍正二年甲辰春正月丙子朔

上詣

堂子行禮回宮拜

神畢御殿王以下文武各官外藩王及使臣等

上表朝賀停止筵宴○朝鮮國王李昀遣陪

臣李穡等表賀冬至元旦

萬壽節及進歲貢禮物賞賚如例○策妄阿喇

布坦使臣根頓等隨班朝賀行禮特令賜宴

○丁丑諭理藩院朕問貝勒博貝管轄之吳

梁海人民近時何以資生據奏在將軍祁里

德處借餉一萬八千五百六十兩。買牲分給。各得產業。今勝於昔。其所借餉銀。伊將俸銀逐年抵補等語。朕思博貝。歷年宣力。勲績卓然。且吳梁海等衆。均係朕之百姓。豈有養育朕之百姓。而借餉於朕之理。所借銀兩。不必扣還。著行文將軍祁里德知之。○以河南道御史陸賜書。爲陝西鄉試正考官。翰林院編修徐雲瑞。爲副考官。侍讀學士吳隆元。爲江南鄉試正考官。檢討李蘭。爲副考官。○撫遠

大將軍年羹堯摺奏。十二月十三日。羅卜藏丹津。送侍郎常壽回營。并呈奏章一函。筆帖式多爾濟被賊掠去。仗義捐軀。請施恩優卹。以示鼓勵。得旨。侍郎常壽。乃簡任西寧辦理青海事務之員。伊並不將羅卜藏丹津謀叛情形奏聞。一切軍務。悉推諉於年羹堯。又擅棄西寧。輕往青海。爲羅卜藏丹津所獲。及羅卜藏丹津。將伊釋放。復覲顏生還。溺職已甚。著將常壽。拏解西安監禁。至筆帖式多爾濟

被賊擒獲。不屈身死。甚屬可嘉。著交部照殉節例議敘。仍著大將軍年羹堯。照例予祭。○戊寅。命朝期行禮。左右兩班。增派侍衛二員。隨御史稽查。○諭撫遠大將軍年羹堯。朕前曾降旨。羅卜藏丹津被囚時。必將常壽送回請罪。今果將常壽送回矣。羅卜藏丹津。從此又以甘言巧懇。阻滯吾兵。亦未可定。羅卜藏丹津。乃辜負國恩。與吾兵對敵之叛賊。國法斷不可宥。不得因伊曾封王爵。稍存疑慮。再

與羅卜藏丹津同謀之王。貝勒。貝子。公等。既經背叛。其爵即宜削除。伊等或來歸順。或被擒獲。不必更論其先曾封爵。但論其行事之輕重。可寬者從寬。應治罪者治罪。辦理奏聞。○庚辰。孟春。享

太廟。遣怡親王允祥行禮。○是日。以故大學士一等公謚文襄圖海配享

太廟西廡。○遣官祭太歲之神。○辛巳。祈穀於上帝。恭奉

聖祖仁皇帝配享。

上親詣行禮。恭捧

聖祖仁皇帝神位。奉安於

上帝神位之右。

太宗文皇帝神位之次。○領侍衛內大臣一等

公馬爾賽等。以伊祖圖海配享。具疏謝恩。得

旨。此出自

聖祖皇考所遺恩旨。爾祖茂著功勳。爾等其法  
祖報効。各相奮勉。○實授許國桂。爲直隸宣

化總兵官。○壬午。

世祖章皇帝忌辰。遣官祭

孝陵。○甲申。諭理藩院。西海逆賊羅卜藏丹津

一事。喇嘛等。理宜將叛亂之人。善言開導。令

其和輯。不致起事。戕害生命。是爲維持佛教。

如其不能。亦應呈明該將軍等。各自閉戶安

居。豈意反助西海悖逆之人。竟糾合數千喇

嘛。手持兵刃。公然抗拒官兵。及至潰敗。猶不

降順。入廟固守。以致追殺覆滅。有玷佛教。甚

矣。欽惟

太宗文皇帝時。第五輩達賴喇嘛。遣使入覲。極  
爲恭順。及

世祖章皇帝時。將第五輩達賴喇嘛。延至京師  
封爲瓦齊拉達喇達賴喇嘛。蒙被殊禮。百年  
以來。法教興隆。皆我朝之恩賜也。前者準噶  
爾寇犯招地。殺戮僧徒。拆毀寺廟。

聖祖仁皇帝遣發大軍。恢復招地。俾達賴喇嘛。  
重安法座。佛教復興。如此隆恩。喇嘛並不感  
激。反助悖逆之人。兇惡已極。於佛門之教。尚  
可謂遵受奉行。者乎。將朕此旨。遍諭各處寺  
廟喇嘛。并住居蒙古扎薩克處之大小喇嘛  
等知之。○乙酉。順天府進春。○調署理山西  
大同總兵官馬會伯。回雲南。永北總兵官任  
以正藍旗叅領陳王章。署理山西大同總兵  
官。○丙戌。賞給巴爾庫爾滿洲察哈爾綠旗  
種地兵丁銀兩有差。○丁亥。授四川提督岳  
鍾琪。爲奮威將軍。○戊子。封喀爾喀鎮國公

策旺諾爾布爲固山貝子○庚寅以光祿寺少卿羅其昌爲河南鄉試正考官翰林院修撰于振爲副考官太僕寺卿沈近思爲山東鄉試正考官福建道御史朱一鳳爲副考官編修夏力恕爲山西鄉試正考官侍講黃鴻中爲副考官○辛卯諭兵部副將孫繼宗領兵在布隆吉爾等處同遊擊潘之善大敗青海逆賊孫繼宗者賞給總兵官職銜俟有陝西總兵官缺出題補○壬辰鑲藍旗漢軍都統伊爾拜緣事革職以果郡王允禮爲鑲藍旗漢軍都統○命鑲白旗蒙古都統武格總管殺虎口至阿爾泰一路軍臺事務○陞鑲白旗蒙古副都統巴拜爲本旗蒙古都統王府長史額爾錦爲鑲白旗蒙古副都統○陞河南布政使牟欽元爲太常寺卿調署理山西布政使田文鏡爲河南布政使司布政使陞山西按察使高成齡爲山西布政使司布政使浙江糧儲道張楷爲江南江蘇按察使

司按察使以原任雲南按察使金啓復爲山西按察使司按察使○癸巳諭總理事務王大臣等額駙策凌奏稱伊自阿爾泰軍營來時副都統勒欽圖原任將軍席柱年俱衰邁原爵公德瞻在軍營患病請將此三人撤回等語席柱勒欽圖著撤回德瞻係前往効力贖罪之人俟軍務告竣再令伊回京○諭宗人府  
皇考以公星尼招搖生事革去公爵繼又念伊先人之故仍復施恩令伊子星海承襲公爵詎知星海又復不才昏庸懶惰身罹國憲皇考尚冀星尼或知懲創悛改惡習復其公爵以觀後效今星尼不惟不感戴  
皇考之恩不知改行易轍且各處鑽營無恥莫甚有玷天潢著仍革去公爵拘禁在家將應襲公爵之人查明具奏再伊屬下佐領甚多與公爵不稱可酌留數佐領給與襲公之人其餘佐領存於公處○諭內閣廣東總督楊

琳。辦理鹽務以來。聞將窮民生理。盡行霸佔。百姓怨憤。夫錢糧雖屬緊要。當爲百姓存留。微利養生。若既爲錢糧起見。又圖自己取利。絲毫不與百姓。使窮民失所。成羣竊盜。其害較缺欠錢糧。爲更大矣。務須謹慎廉潔。從公辦理。方屬稱職。不可只爲錢糧起見。不顧百姓。○八旗都統。以年終將閱射優劣等人。及奏銷錢糧紙張等項。各具摺彙奏。得旨覽。八旗都統所奏。甚屬糊塗。理應陸續乘便。各將一二事具奏。朕得次第披覽明悉。方可辦理。今將一年所積事件。於年終彙奏。盈千累百之摺。朕一時從何處看起。朕若不披覽明悉。如何辦理。嗣後或應陸續分奏。以便朕覽。或應公摺彙奏。以便交部查核之處。俱著詳議具奏。尋議八旗箭摺。嗣後請按月造冊送部。其技藝生疎者。令該旗勒限教訓。如再任意怠惰。即行叅奏治罪。技藝優長者。令該旗記名。以示鼓勵。至俸餉米石紙張等項。亦停其

於年終奏銷。令兩翼各會同四旗。將一年內支領過數目。開明奏聞。並送戶部查核。得旨。箭摺所議尚是。至俸餉等項。著照部院奏銷紙張例。酌量陸續呈覽。○甲午。諭內閣。嗣後本章奏摺。內字樣及人名。有與朕名同者。應迴避更改外。其餘與朕名音同字異。及邊傍字樣畧同者。俱不必迴避更改。○諭總理事務王大臣等。朕御極以來。加恩文武官員。各得陞階。而宗室獨無仕進之路。朕欲施恩。予以陞階。思之再三。總不可得。如用伊等爲大臣等。及侍衛。猶可供朕使令。若用部院或遇屬下人。爲大臣難。以行走。勢必至瞻徇情面。若令其應鄉會試。與民人一體搜檢。恐失觀瞻。可否補用宗人府官員筆帖式之處。爾等傳與宗人府議奏。再宗室內。有學優才美者。作何考選之處。亦著議奏。○撫遠大將軍年羹堯摺奏。張家胡土克圖之胡必爾汗。原住西寧東北郭隆寺。屬下喇嘛甚多。素與羅卜

藏丹津阿爾布坦溫布和好。本年正月郭隆寺衆喇嘛忽聚兵操演。臣隨給示禁止。而寺內喇嘛傳令東山一帶番人。約於是月十一日齊集拒戰。臣見反形已露。急宜勦滅。隨遣提督岳鍾琪會同前鋒統領蘇丹副都統覺羅伊禮布等統兵進剿。尚未至郭隆寺。而賊衆已於十二日駐營哈拉直溝迎敵。我軍直前奮擊。斬賊數千。據其三嶺。燬其十寨。副將宋可進總兵官吳正安黃喜林等各有斬獲。隨沿途燬其七寨。焚其房屋七十餘所。次日抵郭隆寺。寺外山谷間伏賊千餘人。皆逃入洞內。我兵施放鎗礮。復聚薪縱火。賊俱薰死。計前後殺傷賊衆共六千餘名。隨燬郭隆寺并究張家胡土克圖之胡必爾汗消息。衆喇嘛已預先攜往大通河西雜隆地方。臣即將達克瑪胡土克圖正法。此次効力弁兵及陣亡受傷者。俟查明咨部。得旨効力官兵。俟事竣議敘。其勞績尤著之官弁俱著加銜二等。

○湖廣提督魏經國摺奏楚省大吏皆減輕火耗。嚴禁餽送。清正自矢。奉上諭。目下如此。自茲日新不已。止於至善。方好。恐一時鼓舞。勉強從事。又復因循。漸流於下。朕所慮者此也。須不時留心體訪。少有不法者。必即奏聞。方見實心効力。忠君愛國之誠也。○正黃旗漢軍都統左世永緣事革職。以兵部尚書盧詢爲正黃旗漢軍都統。○丁酉諭宣化總兵官許國桂宣鎮兵丁出征勞苦。軍前倒斃馬匹。從寬免其賠補。○正紅旗漢軍都統宗室西倫圖年老休致。陞刑部右侍郎高其佩爲正紅旗漢軍都統。○河南巡撫石文焯摺奏請將巡撫衙門繳存節禮及節省規例銀兩。解充西寧軍餉。奉上諭。助餉之說。斷然不可。止宜留充本省公用。如補苴虧項。修理城垣。道路橋梁隄岸。及兵馬器械犒賞之需。以公完公。方爲允協。將用過數目開除。摺奏以聞。○戊戌。以翰林院侍

讀學士吳隆元教習庶吉士○湖廣巡撫納齊喀疏報蘄州等十三州縣及荆右施州二衛康熙六十一年分開墾田畝八百八十八頃有奇下部知之○己亥諭內務府從前借欠內府公庫銀兩展限未完者俱著豁免○鑲白旗漢軍都統張聖佐年老休致以原任刑部尚書宗室佛格為鑲白旗漢軍都統○庚子建

孔子廟於歸化城左右兩翼各設滿學教官一員從都統丹晉請也○辛丑諭八旗都統等八旗滿洲蒙古漢軍人等俱經累世効力見今承平既久滿洲戶口滋盛餘丁繁多而護軍馬甲額設有定是以不得披甲之間散滿洲至有窘迫不能養其妻子者朕每加憫念將如何施恩俾得資生之處再四籌度竝無長策若欲增編佐領恐正項米石不敷若不給與錢糧養贍伊等何以聊生既不能養其家口何由造就以成其材今將八旗滿洲

蒙古漢軍內共選取四千八百人為教養兵訓練藝業所選人等每月給與錢糧三兩計四千八百人每年共需錢糧十七萬二千八百兩每一旗滿洲蒙古漢軍共六百名內滿洲四百六十名蒙古六十名漢軍八十名其漢軍之八十名令為步兵每月給與錢糧二兩就此錢糧數內計其贏餘通融料理可以多給四十名兵丁每漢軍一旗著選取一百二十名再軍器內長槍尤為有用著滿洲蒙古每佐領下選取護軍四名馬甲四名令其學習長槍漢軍每佐領下選取馬甲四名令其學習藤牌挑刀此四千八百名教養兵若計佐領選取恐其人多寡不同應於旗下甲喇內通計人數選取則護軍馬甲益得有用之人而間散餘丁亦得學習成就矣至於如何編錄教訓管轄之處八旗都統護軍統領副都統等公同盡心詳酌務期永遠可行定議具奏尋議滿洲旗下佐領人數多寡不



甚相懸。所選四百六十名教養兵。應令各旗不論佐領在甲喇內選取。蒙古漢軍旗。下佐領數目多寡不同。俱應不論旗分。各計八旗總數。按其佐領多寡。均行選取。其選取時。必擇其實係貧乏。諳於騎射。可以學習之另戶。餘丁選取。其管轄教訓等事。應令八旗大臣。各派員管轄。每五日習步射一次。十五日習馬射一次。優劣分別記名。俟有護軍馬甲缺出。將優者拔用。再滿洲蒙古學習長槍。漢軍學習藤牌挑刀。實有裨武備。應令該旗大臣等。照前選取。派員管轄。其教習槍法。由八旗巡捕三營官兵內。選取四十人。教習藤牌挑刀。由巡捕三營及古北口之綠旗官兵內。選取四十人。俱每旗各派五人。以充教習。每月給工食銀三兩。學習人等。三年期滿考試。擢其優者。以爲伍長。長槍兵丁。每人給官馬一匹。至所用器具。俱行文應辦之處。備辦齎送。從之。封喀爾喀一等台吉滾卜扎布。爲輔

國公。兵部議奏。直隸巡撫李維鈞疏言。從前宣化鎮。出師軍士。所給十個月行糧。兩個月口糧。經部准議。政大臣等原議。乃係給與。竝無扣還字樣。請旨免扣在案。今古北。密雲等鎮。協營官兵。與宣化鎮屬官兵。同時同地一體出師。所給錢糧。請照宣化鎮之例。免其扣還。應如所請。從之。壬寅。直隸巡撫李維鈞。奏請揀發人員。以收實效。奉

上諭。直隸。咫尺京師。必無懸缺久待之慮。朕於遠省。每揀發人員。不過暫時權宜。止行一二次。竝非常例。應將一省屬員內。量才器使。斟酌調補。隨時摺奏。以聞。癸卯。諭禮部。朕於三月內。舉行視學釋奠大典。定例行聖公。應行陪祀。聞孔傳鐸有疾。且值守制之初。可令伊子弟一人來京。代伊行禮。遣署理大學士戶部尚書徐元夢。告祭先師孔子。禮部尚書張伯行。告祭崇聖祠。以加封

孔子五代王爵神牌入祠也。封故喀爾喀多羅貝勒功額喇卜坦子佛保爲固山貝子。總理事務王大臣等議覆安徽巡撫李成龍疏奏鳳陽府屬壽州定遠鳳陽等縣及安慶府屬桐城太湖二縣歉收請於從前截漕米內動支四萬石減價平糶應如所請從之。刑部遵旨議覆諱盜不報處分例州縣革職道府同知通判失察者降二級調用。徇庇者降三級調用。州縣既經揭報而上司不行轉報者降四級調用。州縣以強爲竊以多爲少上司不行詳查遽行轉報及解審時不能審出者亦降三級調用。若督撫失察降一級留任。其兼轄武官亦照文職例議處。至律載竊犯三次者絞。賊至一百二十兩以上者絞。嗣後不照賊究擬或於初犯再犯時不依律刺字以至累犯者亦照失出例議處從之。廣東巡撫年希堯疏奏盤查藩庫用巡撫封條封貯但新收錢糧多寡未悉請另設一庫。

委道官一員兼同藩司察視收支得旨朝廷設官各有職掌巡撫乃朕任用之人藩司亦朕所簡用者理應協恭辦理况撫藩同在一城儻有虧空何難覺察年希堯欲令道員監查藩庫向來道員倉庫藩司有盤查之責今反欲自下察上殊屬倒置原本發回嚴加飭行。甲辰陞正黃旗護軍叅領阿漢泰爲本旗漢軍副都統。戶部議覆山東巡撫黃炳疏奏康熙六十年并雍正元年散賑銀米著落各官賠補得旨地方偶有災祲朕即軫念窮黎遣官散賑動支正項銀米務使均沾實惠此拯救災黎之至意也如將散賑銀米不入正項開銷著落各官賠補殊非朕特遣官員拯救災黎之本意巡撫黃炳所奏康熙六十年散賑用過穀石及雍正元年散賑用過銀兩二疏俱交與該部准入正項報銷。

大清世宗敬天昌運建中表正文武英明寬仁  
信毅大孝至誠憲皇帝實錄卷之十五

大清世宗敬天昌運建中表正文武英明寬仁  
信毅大孝至誠憲皇帝實錄卷之十六

敕修

雍正二年甲辰二月乙巳朔陞廣西梧州副

將蔡成貴為貴州安龍總兵官○戶部議覆  
倉場侍郎法敏等條奏漕務事宜一運丁正  
副不許包丁代運一挑淺添夫按日派給錢  
文不得如前索給食米以致借端盜賣一催  
用水手給發工價開幫之後不許勒添工食  
應飭令漕臣通行曉諭又各倉監督俟一年  
差滿遣大臣一員會同倉場侍郎稽察米好  
數足者議敘陞用短少汜爛者從重治罪以  
示懲勸均應如所請從之○丙午初

聖祖仁皇帝

御製上諭十六條。頒示八旗及直省兵民人等。自綱常名教之際。以至耕桑作息之間。本末精粗。公私鉅細。各舉要領。垂訓萬世。

上以各條遵行日久。慮民或怠。宜申誥誡以示提撕。迺復尋繹其義。推衍其文。共得萬言。名曰

聖諭廣訓。並製序文。刊刻成編。頒行天下。序文曰。書曰。每歲孟春。適人以木。鐸徇於路。記曰。司徒修六禮以節民性。明七教以興民德。此皆以敦本崇實之道。爲牖民覺世之模。法莫良焉。意莫厚焉。我

聖祖仁皇帝久道化成。德洋恩溥。仁育萬物。義正萬民。六十年來。宵衣旰食。祇期薄海內外。興仁講讓。革薄從忠。共成親遜之風。永享昇平之治。故

特頒上諭十六條。曉諭八旗及直省兵民人等。自綱常名教之際。以至於耕桑作息之間。本

末精粗。公私鉅細。凡民情之所習。皆

睿慮之所周。視爾編氓。誠如赤子。

聖有謨訓。明徵定保。萬世守之。莫能易也。朕纘承大統。臨御兆人。以

聖祖之心爲心。以

聖祖之政爲政。夙夜黽勉。率由舊章。惟恐小民尊信奉行。久而或怠。用申誥誡。以示提撕。謹

將

上諭十六條。尋繹其義。推衍其文。共得萬言。名

曰

聖諭廣訓。旁徵遠引。往復周詳。意取顯明。語多直樸。無非奉

先志以啟後人。使羣黎百姓。家喻而戶曉也。願爾兵民等。仰體

聖祖正德厚生之至意。勿視爲條教號令之虛文。共勉爲謹身節用之庶人。盡除夫浮薄器凌之陋習。則風俗醇厚。家室和平。在朝廷德化。樂觀其成。爾後嗣子孫。竝受其福。積善之

家必有餘慶。其理豈或爽哉。○諭都察院。元年恩科典試諸臣。皆體朕意。矢公矢慎。應試士子。亦皆恪遵功令。未敢苟且鑽營。自臨場以至發榜。前後俱各帖然。今聞應試士子。不比去年安靜。竟有投送詩文往來干謁者。現今開列之同考官。若少爲其所搖動。乃自取罪戾也。朕賞罰悉秉至公。今場前既多奔競。榜後必生事端。今歲同考官當加意謹慎。毋蹈法網。都察院即頒示曉諭。應試士子宜安分守法。毋得希圖僥倖。仍實心察訪。如有鑽營彰著者。即行拏叅。治以重罪。○諭八旗文武官員人等。我國家念爾等祖父。皆屬從龍舊臣。著有勲績。故加恩後裔。量才授官。冀收心膂驅策之效。爾等自當恪守官箴。勤勞王事。建股肱之盛烈。垂清白之家聲。庶幾上以仰報君恩。下以顯揚世美。乃每見旗員居官不能悉體朝廷期望之意。賢否雜出。志行不齊。由筮仕之初。輒謂旗人與漢人不同。漢人

無累。可以硜硜自守。旗人則本旗官屬。需索多端。親族往來。責望甚衆。萬一任滿。又不免有當差之累。此念一起。百弊叢生。不以忠君體國爲心。不以殫職殃民爲懼。潛通賄賂。恣意苞苴。惟期囊橐之充。盡喪廉隅之守。殊不思國家察吏。廉者獎。貪者懲。滿與漢無二法也。爾等果能潔已奉公。始終一節。休聲丕著。惠政日聞。朕自當從優擢用。以示獎勵。凡所過慮。皆可不必。如其不然。則法網難寬。縱家擁厚貲。安能坐享乎。至於爾等家世武功。業在騎射。近多慕爲文職。漸至武備廢弛。而由文途進身者。又祇徼倖成名。不能苦心向學。玩日愒時。迄無所就。平居積習。尤以奢侈相尚。居室器用。衣服飲饌。無不備極紛華。爭誇靡麗。甚且沈湎梨園。遨遊博肆。不念從前積累之維艱。不顧向後日用之難繼。任意糜費。取快目前。彼此效尤。其害莫甚。朕特加誨諭。自此以後。出任者各宜精白乃心。靖共爾位。

人人以廉能自矢。不得藉旗人多累之說。以遂其罔上行私之術。八旗子弟各習其業。文則潛心制義。博覽詩書。務求用世之實學。武則嫻習弓馬。講究韜畧。預儲閫外之良材。且各崇儉戒奢。安分循禮。父誠其子。兄誠其弟。與其恣情縱意。博一日之豪華。何如量入爲出。謀百年之生計。與其蕩檢踰閑。作無藉之匪類。何如謹身寡過。勉有用之事功。以報朝廷。以綿世澤。以敦風俗。以保身家。顧不美歟。大雅之詩曰。凡周之士。不顯亦世。蓋欲疏附後先之子孫。亦世世修德與周匹休也。爾等八旗皆佐命後昆。深願克紹前修。榮名悠遠。國家亦重有賴焉。其各欽承毋忽。○諭各省關差鹽差等官。從來關榷鹽稅之設。所以通商裕國。或用欽差專轄。或令督撫兼理。無非因地制宜。利商便民之至意也。朕前於關鹽兩差。各下諭旨。誥誡諄切。但旗員向來相沿成習。陽奉陰違。任意侈靡。不知撙節。額外加

派。苦累商民。差滿之日。惟恐回京有當差効力之事。每以缺額懇求寬限。希圖掩飾。是以不憚叮嚀。再加申飭。大抵關差之弊。皆惟知目前小利。恣意侵漁。聽信家丁。縱容胥吏。開關。分別遲早。肆無厭之誅求。報單。任意重輕。為納課之多寡。飽谿壑者。則任其漏稅。代爲朦朧。不遂欲者。則倒篋傾箱。不遺纖細。致商賈畏懼。裹足不前。行旅徬徨。越關迂道。則困商實所以自困也。鹽差之弊。尤合重懲。飛渡重照。責賣夾帶。弊之在商者猶小。加派陋規。弊之在官者更大。若不徹底澄清。勢必致商人失業。國帑常虧。夫以一引之課。漸添至數倍有餘。官無論大小。職無論文武。皆視爲利藪。照引分肥。商家安得而不重困。賠累日深。則配引日少。配引日少。則官鹽不得不貴。而私鹽得以橫行。故逐年之課。難以奏銷。連歲之引。盡皆壅滯。非加派之所致與。故關差惟在嚴禁苛求。使舟車絡繹。貨物流通。則稅自

足額鹽差。惟在力除加派。使商困少蘇。盡復舊業。則課自贏餘。至於督撫係封疆大吏。更當仰體朝廷歸併之意。關政不得視為帶理。漫不經心。誤任屬員。聽其剝削。鹽政不得因恤窮商。獨專厚利。硬派州縣計口征錢。夫權關部屬尚有顧忌。恐督撫持其短長。令歸督撫。則何所瞻顧。巡鹽御史。地方官或不奉約束。今歸督撫。則孰敢抗違。況欵差猶每年更換。而督撫兼理。則無限期。若不實心奉行。使風清弊絕。則大負歸併之本意矣。至將耗羨充課。固屬急公。但恐以耗羨歸正額。而正額之外。復加耗羨。商民重輸疊出。何以堪此。朕深悉關鹽擾累之害。垂念商民營逐之苦。特諭爾等經理權稅者。務期奉公守法。遠委得人。知商旅之艱辛。絕箕歛之弊竇。通商即所以理財。足民即所以裕國。如自利自便。罔上行私。責有攸歸。其悉遵朕旨。○禁八旗武員朝期會集。乘車至東西闕門。○朝鮮國王李

昫。遣使謝頒。賜減貢恩。並貢禮物。命停止收受。准作年貢。○以故喀爾喀扎薩克多羅貝勒垂扎木散子納木扎爾冊素隆襲爵。○丁未。遣大學士嵩祝祭。

先師孔子。○調寧古塔將軍輔國公巴賽來京。陞正白旗漢軍副都統哈達為寧古塔將軍。○寧古塔副都統馬威年老休致。陞一等侍衛阿岱為寧古塔副都統。○吏部左侍郎黃叔琳條奏。標營汎地。各有定所。州縣屯衛徵收兵米。亦有定額。應確察營汎兵丁實數。及州縣衛所額米配搭。先撥給最近地方。如有不敷。再於附近州縣衛撥運。於今年秋季存案。永為定例。得旨。此奏甚是。速議行。○浙閩總督覺羅滿保題奏。臺灣鳳山縣加走山土官加率雷等率領八社生番。傾心歸化。每社歲輸鹿皮五張。以代貢賦。下部知之。○戊申。祭。

大社

大稷。

上親詣行禮。○陞雲南驛鹽道李衛爲雲南布政使司布政使。仍兼理鹽務。○總理戶部三庫怡親王允祥條奏三庫事宜四款。一除加平之弊。嗣後各處錢糧。務令照庫法解送。不得如前故爲短少。與庫官講明輕兌。在外加平。違者治罪。一除加色之弊。從前各省解送銀兩外。有加色一項。解官與庫官侵蝕分肥。便將潮銀入庫。嗣後若解潮色銀兩。將直省經辦及解送官員。提叅治罪。一三庫請設主事一員。辦理檔案。登記一應數目。至年終復將各處冊檔詳加查對。以杜欺隱之弊。一請設庫大使一員。各省解送錢糧物料。將限定日期。銀兩物件數目。及官役姓名。預行知會大使。回堂登簿。俟解到之日。令大使同該司官查驗。庶無那移偷盜遺漏等弊。從之。○雲南巡撫楊名時摺奏。奉到諭旨。社倉保甲及盜案內改強爲竊。諱盜誣良之弊。又禁止

餽送京差等條。臣等凜遵料理。奉

上諭。此通行督撫之諭。爾等分閫宣猷。風土各異。要當審習俗。順民情。因地制宜。酌其緩急。次第舉行。設有牽制難行處。抑或行而無益。即據實奏覆。毋得陽奉陰違。更勿因朕諭而膠固迎合。以貽天下後世笑也。勉之。○廣西提督韓良輔摺奏。謝賞賚恩。奉

上諭。賞罰之柄。雖操於朕。若徇於愛惡之私。則對天下後世。不能無慚。惟本至公而施之。各當。然後人心悅服。是賞罰雖云在朕。而實在海內臣民之自取也。○己酉。諭諸王大臣九卿等。欽惟

孝莊文皇后。躬備聖德。

天錫純禧。誕育

世祖章皇帝。瑞應昌期。君臨萬國。逮我

聖祖仁皇帝。繼

聖嗣統。久道化成。立萬世無疆之業。皆我

孝莊文皇后福德。無隆之所啟佑也。康熙二十



六年十二月。

慈馭升遐先期再三面諭我

聖祖仁皇帝曰。我身後之事。特以囑汝。

太宗文皇帝梓宮。安奉已久。卑不動尊。此時未便合葬。若另起塋域。勞民動衆。究非合葬之義。我心戀汝父子。不忍遠離。祇於遵化州

陵塋近處安厝。我心無憾矣。我

聖祖仁皇帝涕泣受

命。爰

諭諸王大臣集議僉同。於康熙二十七年四月。

安奉

梓宮於

孝陵之南。爲

暫安奉殿。迄今三十餘年矣。朕惟禮經云。合葬

非古也。先儒又云。神靈有知。無所不通。是知

合與不合。惟義所在。今

昭陵安奉日久。若於左近。另起

山陵。究非合葬之義。且自

孝莊文皇后安奉以來。我

聖祖仁皇帝曆數綿長。海宇乂安。子孫蕃衍。想孝莊文皇后在天之靈。極爲安妥。

遺命諄諄。

聖祖仁皇帝遵奉三十餘年。今朕身任付託之重。

山陵典禮。宜斟酌盡善。永垂萬世。事莫大焉。著

諸王大臣九卿等。會同確議具奏。○以河南

彰德。衛輝。懷慶三府。及開封府屬之陽武。原

武。封邱。延津。四縣。麥收歉薄。民食稍艱。發倉

穀賑濟。從撫臣石文焯請也。○庚戌。諭刑部

部內彙奏本內。有罪應割筋者。定例固然。但

割後即成廢人。理宜審慎。今部奏入彙題冊

中。恐致疎忽。嗣後滿洲人等有此罪之案。另

行具奏。○以吏部尚書田從典。爲順天鄉試

正考官。內閣學士福敏。爲副考官。○辛亥。喀

爾喀輔國公策凌達錫故。遣官致祭。○壬子。

命給御膳房執事人等喜喪恩賞銀兩。照八

旗護軍校驍騎校及兵丁例一體支領○撫遠大將軍年羹堯摺奏青海貝勒羅卜藏察罕貝子濟克濟扎布台吉滾布色卜騰納漢伊席羅卜藏察罕之母率領伊等妻子及貝勒策凌敦多卜之姊投至西寧隨酌給茶葉大麥等項仍令往口外駐劄訖臣思羅卜藏丹津欲威脅懦弱以益兵力衆人尚在游移若不乘機派兵前往則來投之人勢難保全臣令提督岳鍾琪總兵官吳正安黃喜林侍衛達爾副將王嵩宋可進紀成斌等領兵六千名分二路進剿前鋒統領蘇丹留於西寧軍營辦事奏入報聞○癸丑諭直隸各省督撫等朕惟撫養元元之道足用爲先朕自臨御以來無刻不厯念民依重農務本但我國家休養生息數十年來戶口日繁而土田止有此數非率天下農民竭力耕耘兼收倍穫欲家室盈寧必不可得周官所載巡稼之官保介田畯皆爲課農設也今課農雖無專官

然自督撫以下孰不兼此任其各督率有司悉心相勸並不時諮訪疾苦有絲毫妨於農業者必爲除去仍於每鄉中擇一二老農之勤勞作苦者優其獎賞以示鼓勵如此則農民知勸而惰者可化爲勤矣再舍旁田畔以及荒山曠野度量土宜種植樹木桑柘可以飼蠶桑粟可以佐食柏桐可以資用即榛櫟雜木亦足以供炊爨其令有司督率指畫課令種植仍嚴禁非時之斧斤牛羊之踐踏奸徒之盜竊亦爲民利不小至孳養牲畜如此方之羊南方之豕牧養如法乳字以時於生計咸有裨益總之小民至愚經營衣食非不迫切而於目前自然之利反多忽畧所賴親民之官委曲周詳多方勸導庶使踴躍爭先人力無遺而地利始盡不惟民生可厚風俗亦可還淳爾督撫等官各體朕惓惓愛民之意實心奉行倘視爲具文苟且塗飾或反以擾民則尤爲不可也○宴朝鮮國使臣李曉

等於禮部○甲寅。差往德州山海關等處護軍統領汝福等。考察軍政事竣回奏。得旨防守各處兵丁。有五十名者。邊口兵丁。亦有二十四名者。似此則不成部位矣。可將五十名兵丁之處。添爲百名。其守邊口之二十四名兵丁。酌量添設。儻遇有用之時。可成部位。且在京城閒散人內。挑爲馬甲派往。亦於滿洲人等有益。著交與總理事務王大臣會議。尋議。山海關等處。滿洲兵已足數。無庸添設外。山西太原府。現有正藍鑲藍二旗兵四百十三名。山東德州。現有鑲黃正黃二旗兵三百四十名。直隸保定府。現有正紅鑲紅二旗兵四百一名。應各添足五百名。古北口。喜峯口。現有八旗兵八十名。獨石口。現有八旗兵六十名。應各添足一百名。冷口。現有八旗兵二十四名。應添足五十名。從之○賑江南靖江丹陽二縣。淮安大河二衛旱災饑民○乙卯。孝康章皇后忌辰。遣官祭

孝陵○諭吏部。由吏員捐納出身。知縣以上官員。直省共有幾人。著查明奏聞。尋查明覆奏。得旨。現今查出者。其居官優劣之處。著督撫出具保結報部。如不詳細。日後發覺。將隱蔽之上司。一并革職○丙辰。以鑲白旗蒙古副都統吳廣署本旗護軍統領○禮部等衙門奏言。

聖祖仁皇帝。以明太祖宗祀淪絕。訪求支派一人。授之官爵。恪奉烝嘗。我

皇上繼志存恤。特申前諭。臣等謹按明太祖之子。封藩者十二人。迄今三百餘年。子姓雖繁。無從考証。查得廂白旗朱文元。係明太祖第十三子代簡王之後。明崇禎時。簡王後裔代王。爲洪承疇監軍於松山。我

太宗文皇帝時。代王與伊姪文元。同被俘獲。遂歸我朝。曾蒙

聖祖仁皇帝召見。親詢宗系。今原任內閣侍讀學士朱汝錫之子衆關係等。俱文元之孫也。

文元於順治年間。曾奏明往大同。取其宗族來京。今見任直隸正定府知府朱之璉一支是也。請於此一支內。查取譜牒。吏部揀選引見。擇用一人。隨飭禮部差官。同伊告祭明太祖陵。及昌平十三陵。以承祀事。仍令回京居住。嗣後每年春秋二季。令其呈明前往。從之。

○丁巳。以翰林院編修王奕仁提督貴州學政。○戊午。諭總理事務王大臣等。青海之事。不日告竣。而策妄阿喇布坦。亦屬恭順。其撤回各路之兵。及固守地方之事。應預行定議。額駙策凌。貝勒博貝。俱在阿爾泰駐劄年久。地方情形。皆所悉知。現皆在京。可詳詢阿爾泰一路兵丁。如何撤回。及駐防兵丁。應於何處安設之處。確議具奏。尋議策妄阿喇布坦。於伊使垂納木喀去後。中心悅服。遣使誠懇前來。甚屬恭順。然永固邊陲之策。宜預爲籌畫。查阿爾泰一路。振武將軍傅爾丹軍前。現在兵丁。共三千八十二名。征西將軍祁里德

軍前。現在兵丁。共六千九十八名。俱應撤回。各本處查先奉。

聖祖仁皇帝諭旨。喀爾喀邊疆。係與策妄阿喇布坦。及鄂羅斯接壤。交將軍及喀爾喀王等會議。茂岱察罕。叟爾。扎克拜達里克兩處。俱係緊要形勢地方。相應駐兵。已經蓋造城二座。後以烏蘭古木地方。廣闊豐腴。可以屯田。於是又遣哨兵。於彼種地修城屯駐。但烏蘭古木。直抵阿爾泰山前。與茂岱察罕。叟爾。扎克拜達里克。及喀爾喀遊牧處。相隔千里。應停其在烏蘭古木駐兵。仍於茂岱察罕。叟爾。扎克拜達里克兩處。派京城滿洲兵二千名。防守四年一換。蒙古兵二千名。永遠屯駐。滿洲兵。請於京城佐領內。選派一千七百四十二名。其不足兵丁。於八旗漢軍。礮手內。均派充補。蒙古兵。請於八旗遊牧察哈爾佐領內。挑選一千名。再於右衛佐領內。挑選七百名。其不足兵丁。請於歸化城土默特佐領內。酌

派充補。此四千兵。應派將軍一員。副都統一員。統領將軍。在察罕叟爾駐劄。副都統在扎克拜達里克駐劄。應鑄給駐防茂岱察罕叟爾等處地方將軍印信。其察哈爾右衛歸化城蒙古兵二千名。俱設總管等管轄。於兩城左近游牧駐劄。至阿爾泰軍前。現有喀爾喀扎薩克兵二千名。應暫行存留。交與王丹津多爾濟額駙策凌。貝勒博貝等。統領調遣。丹津多爾濟應鑄給管轄喀爾喀左翼兵丁副將軍印信。策凌應鑄給管轄喀爾喀中路兵丁副將軍印信。博貝應鑄給管轄喀爾喀右翼兵丁副將軍印信。軍營一應器械盔甲。交與兵部工部製給。俸餉馬駝等項。按員令戶部支賞。京城滿洲兵。於明年四月內起身。令將軍副都統帶領出張家口。由中路行走。察哈爾右衛歸化城兵。令總管等帶領。各隨其便。游牧前去。至茂岱察罕叟爾。扎克拜達里克兩處。地畝豐腴。應俟將軍到彼。派兵耕種。并

令官商范毓麟等輓運米石。備支給口糧之用。其屯種事務。奏派大臣一員。鑄給辦理茂岱察罕叟爾扎克拜達里克兩處兵餉關防。俟四年與將軍一同更換。再阿爾泰兩路兵內。令傳爾丹挑留五千名。暫行駐劄。其餘今歲七八月間。令征西將軍祁里德統領撤回。並將征西將軍印敕帶繳。至阿爾泰現在所設軍臺。俱係僻路。且瀚海遼濶。水草不佳。查張家口。抵朱爾輝。翁機。推河甚近。水草亦佳。應遣大臣一員。將臺站那移安設。庶於驛站人員牲畜。俱有裨益矣。得旨爾等所議。令傳爾丹處暫留兵五千名。阿爾泰既有喀爾喀之兵。著留四千名。餘依議。并行文大將軍年羹堯知之。○諭直隸各省總督巡撫。凡百姓完納錢糧。當令該戶親身投納。不許里長甲首。巧立名目。希圖侵蝕。不肖生員監生。本身田產無多。輒恃一衿。包攬同姓錢糧。自稱儒戶宦戶。每當地丁漕米徵收之時。遲延拖欠。

有悞國課。通都大邑固多。而山僻小縣尤甚。該督撫著即嚴查曉諭。革除儒戶官戶名目。如再有抗頑生監。即行重處。毋得姑貸。倘有瞻顧。不即革除此弊者。或科道叅劾。或被旁人告發。治以重罪。○解浙江巡撫李馥任。以吏部左侍郎黃叔琳爲浙江巡撫。○撫遠大將軍年羹堯摺奏。據岳鍾琪報稱。二月初八日。領兵出口。聞巴爾珠爾阿喇布坦。在烏蘭博爾克地方。即分兵三路進剿。及至其地。賊人已經逃遁。遂令總兵官吳正安率兵由北路。總兵官黃喜林。副將宋可進率兵由中路。岳鍾琪。侍衛達烏率兵由南路。往追賊人。副將王嵩。紀成斌等。各率兵搜山。岳鍾琪追至伊克哈爾吉地方。阿爾布坦溫布。逃入哈爾吉山中。我兵進山。遂擒獲阿爾布坦溫布。黃喜林擒獲巴爾珠爾阿喇布坦。並其叔伊克喇布坦。今追剿賊首羅卜藏丹津。不可遲延。即携擒獲之阿喇布坦等三賊進剿。併收撫

逃散部落。奏入。報聞。○己未。

上御太和殿視朝。諸王暨文武陞轉各官謝恩。○予陣亡原任湖廣總督額倫特祭葬。謚忠勇。○庚申。補行福建。浙江。四川三省。及總河屬員。康熙六十一年分大計。卓異官十員。才力不及官二十四員。罷軟官七員。年老官二十三員。有疾官七員。浮躁官十二員。不謹官十一員。分別陞賞處分如例。○兵部議覆。山東巡撫黃炳疏言。東省復設兗州一鎮。應轄中右二營。每營各設遊擊一員。守備一員。千總二員。把總四員。兵八百名。其德州臨清等十四營。俱歸兗鎮管轄。改原設兗州營參將。爲臺莊營參將。臺莊營遊擊。爲兗州鎮標中軍遊擊。兗州營守備。爲中軍守備。所有原設滿家硎界河營二營守備。把總兵丁。俱應裁汰。應如所請。從之。○改福建銅山烽火二營遊擊。爲參將。邵武城守營參將。爲遊擊。浙江大荆營參將。爲遊擊。瑞安營陸路副將。爲水師副將。鎮海營陸路參將。爲水師參將。磐石

營陸路遊擊。爲水師叅將。其溫州鎮右營水師  
弁兵。俱爲陸路。添設乍浦遊擊一員。守備一員。  
千總一員。把總二員。從浙閩總督覺羅滿保請  
也。○辛酉。諭禮部。帝王臨雍大典。所以尊師重  
道。爲教化之本。朕覽史冊所載。多稱幸學。而近  
日奏章儀注。相沿未改。此臣下尊君之詞。朕心  
有所未安。今釋菜伊邇。朕將親詣行禮。嗣後一  
應奏章記注。將幸字改爲詣字。以伸崇敬。○工  
部左侍郎阿錫爵。緣事革職。轉工部右侍郎薩  
爾納。爲左侍郎。陞內閣學士綽爾岱。爲工部右  
侍郎。○壬戌。調刑部右侍郎噶什圖。爲盛京禮  
部侍郎。以鑲黃旗滿洲副都統馬喇。爲刑部右  
侍郎。仍署理副都統事務。○癸亥。

上親耕耤田。詣

先農壇致祭。畢。更服。至耕所。樂工歌三十六  
禾詞。

上躬秉耒。執鞭扶犁。三推畢。又加一推。以示勸  
農至意。

上御觀耕臺。命莊親王允祿。裕親王保泰。怡親  
王允祥。行五推禮。吏部尚書隆科多。戶部尚  
書張廷玉。禮部右侍郎三泰。兵部右侍郎李  
紱。刑部尚書勵廷儀。工部尚書孫渣齊。都察  
院左都御史尹泰。通政使司通政使圖蘭大  
理。寺少卿唐執玉。行九推禮。各以次耕。如儀。  
上御齋宮。順天府官員率耆老農夫行禮畢。至  
耕耤所。農夫終畝。是日。停止慶賀筵宴。加賞  
耆民老農布各四疋。○甲子。命直隸山東河  
南山西四省。舊欠錢糧。分作三年帶徵。以紓  
民力。○諭直隸各省督撫等。朕惟四民以士  
爲首。農次之。工商其下也。漢有孝弟力田之  
科。而市井子孫。不得仕宦。重農抑末之意。庶  
爲近古。今士子讀書砥行。學成用世。國家榮  
之以爵祿。而農民勤勞作苦。手胼足胝。以供  
租賦。養父母。育妻子。其敦龐淳樸之行。雖寵  
榮非其所慕。而獎賞要當有加。其令州縣有  
司。擇老農之勤勞儉樸。身無過舉者。歲舉一

人。給以八品頂帶榮身。以示鼓勵。○撫遠大將軍年羹堯摺奏。羅卜藏丹津背叛。阿岡部落賊番。每探報內地信息。臣令涼莊道蔣洞等。率兵四路進剿。擒斬人口牲畜無算。即將賊首阿岡囊蘇正法。得旨。蔣洞著加按察使銜。○丙寅。諭總理事務王大臣。清明節。朕親詣

陵寢致祭。應傳之處。俱著傳知。○刑部尚書勵廷儀奏。請團練民壯。於每州縣選取五十名。分習鳥鎗弓箭。長槍。其尤壯者。選爲頭役。即於州縣俸工內酌給工食。勤加訓練。於武備實有裨益。得旨。此奏甚好。嚴諭直省督撫實心奉行。○雲貴總督高其倬疏報。中甸地方原係麗江所屬。後爲青海佔去。領逆賊羅卜臧丹津僞劄。臣遵旨令提臣郝玉麟帶兵駐劄中甸。其番夷人等。隨即投繳僞劄。歸誠納土。現在詳細安撫。清理疆界。得旨。郝玉麟遵旨率兵至中甸。揚威駐劄。宣布德意。中甸番

夷頭目。歡忭感激。率衆三千五百戶。男婦一萬七千五百名。喇嘛一千十四人。投誠納土。高其倬復遣官安撫。殊屬可嘉。俟青海事竣之日。議叙具奏。○撫遠大將軍年羹堯摺奏。據岳鍾琪報稱。二月十四日。領兵至席爾哈色地方。知吹拉克諾木齊。現在天城察罕哈達居住。因即派兵前往。擒獲男婦牲畜甚多。吹拉克諾木齊。於十四日帶三百餘人。乘夜遁往噶斯地方。其屬下都喇爾寨桑。及扎錫敦多卜之母。帶領屬下人口馬匹逃遁。被台吉益蘇克注扎爾等。擒獲投獻。即賞給伊等緞匹銀兩。令帶領蒙古兵五百名。往噶斯一路。追擒吹拉克諾木齊。并令守備劉廷彥等帶兵同往。再訪得羅卜臧丹津。仍在原處居住。大兵務於十九日。至伊所住地方進剿。奏入。報聞。○丁卯。轉吏部右侍郎史貽直爲左侍郎。陞太僕寺卿沈近思爲吏部右侍郎。以兵部左侍郎伊都立兼管太僕寺卿。○戶部



議覆雲貴總督高其倬疏奏。滇省兵多米少之處。除祿豐十二府州縣。已經永遠折徵外。其安寧等三十二府州縣。亦以遠運爲艱。請仍照舊例。四年一折。其米價酌豐儉之中。每石定價八錢。再撥運之處。以兩站至三站爲限。庶使民力不勞。均應如所請。從之。○撫遠大將軍年羹堯摺奏。據涼莊道蔣洞報稱。石門寺喇嘛。率衆蘇山丹等所屬多卜藏馬賈等部落。從前佯稱歸順。潛與謝爾蘇厄爾布二部落逃散人等。倚石門寺爲巢穴。肆行劫掠等語。臣隨令蔣洞率領綠旗土司及民兵。分爲五路進發。至石門寺。奮勇齊擊。殺死喇嘛番賊六百餘人。搜得盔甲五十餘副。刀鎗撒袋等物甚多。因即將寺焚燬。收兵而還。奏入。報聞。○授多羅貝勒蘇努女爲郡君。塔那省阿爲多羅額駙。○免直隸古北口提標出征兵丁。賠補倒斃馬價。○戊辰。湖廣總督楊宗仁題。保靖宣慰使彭澤宏。緣事革退。請

以其子彭御彬承襲。下部知之。○庚午。春分。朝。日於東郊。上親詣行禮。○孝昭仁皇后忌辰。遣官祭景陵。○上以雨澤愆期。親詣西山黑龍潭祈禱。是夕。駐蹕黑龍潭之東。○辛未。上回宮。○康親王崇安等遵旨議奏。聖祖仁皇帝遵奉孝莊文皇后遺旨。奉安暫安奉殿。至今三十餘年。聖祖仁皇帝福壽康寧。四海生民樂育。誠希有之吉兆。允宜定爲陵寢。得旨。是著即擇日興工。○壬申。諭刑部。今屆仲春。雨澤愆期。時有大風。朕心深用兢惕。念自臨御以來。惟恐政事或有缺失。時時省察。不敢少有忽畧。且令諸臣直言陳奏。而諸

臣所奏。徒事頌揚。毫無裨益。朕之虛公至意。可以質諸

天地。實堪自信。無少愧處。熟思刑名爲國家之要務。上關

天和。下係民命。若刑獄未能清理。卽爲天時亢旱之由。是以朕於讞獄再三詳慎。卽懲治之人。雖置之於法。朕於其中從寬從輕之處。惟天地知之。至於兇頑之徒。情罪重大。衆人有知者。亦有不能盡知者。朕俱於法外從寬。不可

勝數。並未寬押一人。此亦可自信者。但爾部所辦案件。雖如朕親理。然其中終有微間。夫用法不得不嚴。所謂火烈而民畏之。爾等執法之官。固宜外示嚴明。而中心須存仁恕。凡案件到部數日可結者。不得固執定限。卽當速行審結。以免拖累牽連。則輕罪之人。不致久羈囹圄。且案件早完一日。則無辜者得早脫一日之苦。若因限期未滿。任意耽延。雖所告得伸者。亦必致其含怨。卽訊鞫罪人。亦不

可輕用重刑。若云非夾訊不能定案。此尤爾部之大謬。錄囚之際。當如懲治家人子弟。嚴切之下。務存矜憫之心。但求平允。不可過當。所謂如得其情。則哀矜而勿喜也。朕在藩邸時。奉

聖祖諭旨。發審事件。初見用刑。遍體驚顫。不覺淚下。至數見之後。遂覺少異於前。爾等刑官。訊獄動刑。習爲常事。若少有未當。所關甚鉅。卽大負朕任用之意。且爾等亦當自念其子孫。豈可疎忽。致有後悔乎。蓋刑部非他曹可比。尤不可以愚昧意思。想不到以致錯誤爲辭。嗣後諸事。當同寅協恭。速爲辦理。毋得恃才偏執。毋得瞻徇推諉。務宜仰體朕心。欽恤民命也。○都察院左都御史尹泰疏奏。文武大小官員。頂帶補服坐褥。俱照本身品級。定有等次。不可僭越。定例五六品官。不得過四品。二三品官。不得過一品。今文武官員。無論曾否加級。越分僭用。彼此效尤。以致官常廢弛。

嗣後該管大員等查明參奏。又官員兵民服用。皆有定制。元狐。黃色。米色。香色。久經禁止。嗣後如有違禁僭用者。照例加等治罪。從之。  
○癸酉。命巴爾庫爾管理屯種事務。原任江西巡撫王企靖回籍。以正紅旗蒙古副都統雅圖。總理屯種事務。○撫遠大將軍年羹堯摺奏。楚克賴納木扎爾。率伊子策凌敦多卜。及屬下一千餘戶。前來投順。臣賞給茶葉。大麥等物。仍令往伊克烏蘭和邵等處。照舊居住。奏入。報聞。  
○甲戌。刑部等衙門議奏。五臺山喇嘛鎖喇木。元旦。強姦民人杜青雲之妻王氏。王氏持刀。詈拒。至夜忿縊。應給銀建坊。入祠致祭。喇嘛犯姦。應比光棍爲首例立決。永著爲令。從之。  
○工部議覆。河道總督齊蘇勒疏。請釘船幫大壩。當沁黃會合之衝。應於壩尾添建雁翅壩。上流迴刷處。添建挑水壩二座。倉頭口對面沙灘。應開引河一道。再釘船幫北堤尾。直對姚其營北首。接築堤工一

道。又秦家厰月堤。靠堤并南尾堤。及詹字店馬營口隔堤。沁河遙壩。俱宜加幫堅築。均應如所請。從之。  
○予故廣州右翼副都統曹廷諫。祭葬如例。  
○旌表直隸交河縣烈女劉福住女劉氏。拒姦不辱。被殺慘死。給銀建坊。入祠致祭。如例。

大清世宗敬天昌運建中表正文武英明寬仁信毅大孝至誠憲皇帝實錄卷之十六

大清世宗敬天昌運建中表正文武英明寬仁  
信毅大孝至誠憲皇帝實錄卷之十七

監修總裁官光祿大夫經筵講官太保議政大臣保和殿大學士萬兵部尚書總理兵部事三等伯加五級臣郭爾泰

總裁官光祿大夫經筵日講官起居注太保兼太子太傅保和殿大學士兼戶部尚書仍兼管吏部尚書翰林院

事三尋伯加十三級臣張廷玉先陳大夫證道日講官起居注保議政大臣武英殿大學士兼工部尚書仍兼宗

翰林院掌院事加二級  
臣福敏光祿大夫經筵講官太子太保東閣大學士兼禮部尚書加六級臣徐本光祿大夫

經廷議官議政大臣協辦內閣大學士等。於吏部尚書仍兼管八堂考試諸事。三。奏等奉

敕修

雍正二年甲辰三月乙亥朔。

上詣太學謁

先師孔子

上由大成中門步進

先師位前行釋奠禮畢。

上御彝倫堂。王以下及衍聖公孔傳鐸子孔繼

溥祭酒司業文武各官行禮畢賜坐隨命講

官坐滿漢祭酒。以次講大學。滿漢司業講書。

經翰林官及五經博士五氏子孫國子監官

員進士舉人廩貢監生序立拱聽於堂下。講

畢宣制曰聖人之道如日中天講究服膺用  
資治理爾師生其勉之宣畢賜王以下各官  
茶

上回宮。隨頒賜諸生食品。諭禮部等衙門治天下之要。以崇師重道。廣勵澤宮爲先務。朕親詣太學。釋奠。

先師孔子禮畢進諸生於彝倫堂講經論學  
凡以明道術崇化源非徒飾園橋之觀聽也

孔子道高德厚萬世奉爲師表其祔享廟庭諸賢皆有羽翼聖經扶持名教之功然歷朝進退不一而賢儒代不乏人或先罷而今宜復有舊缺而今宜增其從祀崇聖祠諸賢周程朱蔡外孰應升堂祔享者竝先賢先儒之後孰當增置五經博士以昭崇報均闕大典九卿翰林國子監詹事科道會同詳考定議以聞再邇年文教廣被由我

聖祖仁皇帝壽考作人六十年山陬海濱莫不

不讀書稽古直省應試童子人多額少有垂老不獲一衿者其令督撫會同學臣查明實在人文最盛之州縣題請小學改爲中學中學改爲大學大學照府學額數取錄督撫等務宜秉公詳查不得徇私冒濫至鄉試解額聖祖仁皇帝屢次增廣乙酉戊子等科復於額外加中五經三名至五十六年而罷以其久而滋弊也嗣後各學臣及祭酒司業於錄科時先加面試主考閱文果佳本監加中四名直隸各省大小不一某省應加中幾名著分別詳議定數具奏如無佳文寧缺勿濫會試臨時請旨本監貢生監生本科鄉試中式著加增十八名朕臨雍講學雖率由舊章然必期於世道文教有益不蹈一切虛文諸生其各欽遵○雲南巡撫楊名時疏報大理蒙化二府開墾康熙六十一年分田地三十八頃有奇下部知之○丁丑祭歷代帝王

上親詣行禮○是日甘雨大霑遠近需足上製喜雨詩示內廷翰林官皆敬和進呈○河南巡撫石文焯摺奏請將捐穀耗羨銀兩收存司庫留充公用奉

上諭耗羨存庫不過暫寄以備地方公用斷不可歸入錢糧之內凡此等羨餘概不得牽混正項國家經費自有常額若將此入正項爾等羨餘必仍另取不特名實相違且恐移東就西反致滋弊○山東巡撫黃炳奏稱父子兄弟同登仕籍繕摺謝恩奉

上諭爾一門榮寵固幸遭逢然必能互相砥礪感恩圖報方期福澤綿遠若倚恃家庭顯耀任情縱恣朋比黨援轉相請託順之者曲意容隱逆之者多方排擠甚至欺君虐民有所不顧如此則目前富貴非爲福基翻爲禍媒歷觀古今人事履盛滿之時不惟不敢稱慶且更加謙謹所以世代子孫長保安全也爾可體此意傳親族之在仕籍者俱令知之

戊寅詣學禮成。

上御太和殿。王以下文武各官行慶賀禮。衍聖公孔傳鐸子孔繼溥率五經博士五氏後裔祭酒司業率國子監官員進士舉人廩貢監生等進表謝恩。是日。

上召孔繼溥等十人入見。諭曰。爾等是聖賢後裔。與衆不同。必心爲聖賢。後裔之心。恪守先聖先賢之訓。方爲不愧。朕詣學大典。爾等遠來。特行召見。面諭爾等。慎修厥德。以繼家聲。隨賜茶各賜墨及貂皮有差。并賜祭酒司業等官宴於禮部。己卯。賜國子監敕諭一道。諭國子監祭酒司業等官。朕惟聖人之道。昭揭日月。彌綸天地。萬世帝王下逮公卿士庶。罔不仰遵成憲。率由教言。我國家尊崇至聖。遠邁前代。朕纘承大統。古訓是學。惟日孜孜。茲雍正二年三月朔日。親詣辟雍。祇謁先師孔子。行釋奠禮。思以鼓勵羣英。丕隆文治。爾監臣宜嚴督諸生。善爲誘導。諸生亦宜

殫心肄業。實踐躬行。秉端方以立身。敦忠孝以興誼。勿營奔競。勿事浮華。文必貴於明經。學務期乎濟世。俾品成詣進。以副朕教育至意。此爾多士之庥。亦惟爾監臣董率之功也。慎勿怠荒。職業以貽。爾羞。諸師生其共勉之。隨賜衍聖公祭酒司業國子監官員冠服。進士舉人廩貢監生銀兩有差。大學士等奏言。

皇上至誠至敬。感協

天心。甘雨應時。隨禱立應。合辭稱賀。得旨。誠敬二字。朕之所勉。朕能先天下之憂而憂。諸卿必後天下之樂而樂也。期卿等共勉之。諭刑部。昨曾面諭爾部。刑獄上關

天和。當欽恤民命。無得牽連多人。久行羈禁。當即恪遵朕旨。釋放數百餘人。不越三四日。甘霖大霽。遠近霑足。可見天人之感。捷如影響。莫謂適逢其會。事屬偶然也。嗣後宜更加詳慎。以副朕刑期無刑之至意。轉工部右侍

郎金世揚爲左侍郎陞內閣學士署工部侍郎李鳳翥爲工部右侍郎順天府府丞張令璜爲順天府府尹○以鑲黃旗滿洲副都統常在署正白旗滿洲都統鑲紅旗漢軍副都統張致署鑲藍旗漢軍都統○河南巡撫石文焯疏報陳州正陽等六州縣開墾康熙六十年分田地三百五十二頃有奇山東巡撫黃炳疏報新泰等七縣開墾康熙六十一年分田地六十五頃有奇江西巡撫裴率度疏報進賢等七縣開墾康熙六十一年分田地六十六頃有奇俱下部知之○封科爾沁協理旗務台吉烏爾呼滿爾和托輝特台吉沙克扎俱爲輔國公○以故喀爾喀扎薩克輔國公策凌達錫子敦多布額林陳襲爵○庚辰

上恭謁

陵寢行清明節致祭禮是日啟行駐蹕趙里○諭吏部刑部賭博案內有將該旗大臣官員

一併議處之例但都統等並無捕役其該旗人或於僻處賭博伊等從何知之若因一人犯賭該旗大臣官員一併議處似覺太重著再議奏尋議嗣後失察賭博之都統副都統至五次者罰俸一月三次者叅領罰俸一月佐領及驍騎校罰俸一月包衣佐領下處分亦照此例分別治罪家人犯賭其主如係官員亦罰俸兩月閒散人等二十五該管官免其議處至專司查賭有捕役之員其處分仍如舊例從之○諭吏部兵部朕命各省督撫提鎮將所知官員保題特以要缺須得人辦理耳若其人著有勞績陞任別省者概不肯令赴陞任仍復題留本省殊未允協夫天下一體豈得各分爾我嗣後如係水師營緊要員缺仍許題請外餘俱不許題留○移江西湖口關於九江分設口岸於大姑塘從江西巡撫裴率度請也○辛巳

上駐蹕定符莊○壬午

上駐蹕賈家莊○癸未

上駐蹕姚家莊○諭吏部兵部三年一次舉行大計軍政此內有應革職者若俟部議具題奉旨之後方行解任其地方遠者為日甚久劣員預知被革恐其恣肆妄為嗣後舉行大計軍政之時有應革職者即令解任若具題之後或有免其革職者仍可再行補授○撫遠大將軍川陝總督年羹堯奏報二月初八日遣奮威將軍岳鍾琪率大軍往勦青海逆賊羅卜藏丹津由布爾哈屯直抵賊巢額母訥布隆吉地方分兵一千往北路柴旦木豫截賊眾逃往噶斯要路岳鍾琪率兵從南路尾追二十日探知賊眾逃往烏蘭穆和兒地方及至其地賊眾復逃往柴旦木地方又分兵一千追逐大軍隨後沿途進擊擒獲羅卜藏丹津之母阿爾太喀屯及其妹夫克勒克濟農藏巴吉查等并男女牛羊無數二十二日至柴旦木羅卜藏丹津帶二百餘人逃竄

潛匿隨分兵至烏蘭白克地方擒獲吹拉克諾木齊扎錫敦多卜并男女駝馬無算其助亂之八台吉等亦併擒獲現今羅卜藏丹津之母及賊黨阿爾布坦溫布等八人及歸降之益蘇克汪扎爾等四人俱解送軍前青海部落悉經平定奏入報聞授怡親王允祥女為郡主婿富參格為和碩額駙甲申

上詣

暫安奉殿

孝陵

孝東陵行禮躬奠舉哀遂謁

景陵遙望慟哭入

隆恩門至

寶城前行禮奠獻哀泣不止諸王以下及親近

大臣俱命至

明樓前

上伏地慟哭近侍大臣敦勸再四

上乃還至



隆恩門外猶瞻望流涕不已 是日駐蹕馬蘭

峪 諭總理事務王大臣等青海逆賊羅卜

藏丹津之事大將軍年羹堯奮威將軍岳鍾

琪以及兵丁皆奮勇殺賊於十五日內即能

將逆賊剿滅平定殊為可嘉年羹堯著授為

一等公再賞一精奇尼哈番岳鍾琪著授為

三等公凡効力官兵俱加優恩策勲外著戶

部動用錢糧二十萬兩送至大將軍年羹堯

處分別官兵効力等次賞給以示格外加恩

之意 封大將軍年羹堯之父年遐齡為一

等公加太傅銜賜緞九十疋 乙酉清明節

遣官祭

永陵

福陵

昭陵

上命簡親王雅爾江阿祭

暫安奉殿誠親王允祉祭

孝陵恒親王允祺祭

孝東陵

上親詣

景陵著黃布護履躬自負土膝行至

寶頂跪添土畢匍匐退行又詣

隆恩殿行大祭禮祭畢入至

寶城前伏地哀慟諸王大臣敦請再四出

隆恩門猶瞻望移時乃回行宮○

上回鑾駐蹕薊州○命原任將軍宗查布總管

殺虎口至阿爾泰一路軍臺并辦理遷移臺

站事務○免廣東雷州屬海康遂溪二縣雍

正元年分被淹田畝額賦○丙戌

上駐蹕夏店○兵部議覆兩江總督查弼納江

南提督高其位署江蘇巡撫何天培浙江巡

撫李馥等遵旨會奏太湖巨浸界連江浙港

汊繁多易於藏匪查太湖營原設遊擊一員

守備一員千總二員把總四員合江浙兵共

八百六十四名分防汛口六十六處巡船三

十二隻往來巡哨然地廣勢分非設大員安

能彈壓請將原設遊擊一員改爲太湖營叅將除舊設兵二百七十名巡船八隻外再添把總二員兵六十名巡船四隻仍駐洞庭西山統率各弁居中調度又查太湖之四隅要路東北曰鮎魚口東南曰簡村西南曰大錢口西北曰周鐵橋其隸於浙省之大錢口地方弁兵巡船足資緝禦惟江南濱湖處所三倍於浙如鮎魚口及簡村附近之胥口花涇港七里港等處周鐵橋之汛口九處皆州邑交錯之區姦宄出沒之境從前設防頗爲簡畧是以竊盜之案浙江少而江南多今議於洞庭東山除文職巡檢一員外原設把總一員兵七十五名仍舊駐劄內撥兵二十五名分防鼇山其鼇山之原設千總移駐鮎魚口所有兵六十九名巡船一隻似不敷用再添兵三十一名巡船三隻防守太湖東北一帶又簡村地方應請添設守備一員兵一百四十五名巡船五隻防守太湖東南一帶又周

鐵橋原設把總一員兵六十八名應改設千總一員添兵三十二名巡船三隻以原設之把總移駐馬跡山添兵五十名巡船三隻防守西北一帶如此庶四隅有備致清寧於永久矣得旨此內添設之兵似覺尚少營房巡船動用正項錢糧蓋造著隆科多朱軾張廷玉再會同該部詳議具奏尋議太湖營原設遊擊係浙省所屬之員今議改爲叅將仍駐西山究難兼管兩省地方應於江南另設叅將一員竝於議添新兵三百十八名外再添一百八十二名以足五百名之數將原設守備一員新添守備一員分爲叅將左右兩營其原設千總一員把總二員新添千總一員把總二員及新舊兵丁船隻令該督等酌量分派江南所轄湖濱各口巡防叅將駐劄之處一併酌議至太湖營遊擊仍令照舊駐劄統領弁兵巡查浙省所轄湖口從之○丁亥上回宮○裕親王保泰等遵旨議覆平定青海

應照平定吳逆噶爾丹之例遣官告祭

天

地

宗廟

社稷

永陵

福陵

昭陵

暫安奉殿

孝陵

孝東陵

景陵并

奉先殿得旨是○命內閣學士鄂賴自藏至西

寧辦理蒙古事務○琉球國王尚敬遣陪臣

翁國柱等表賀登極附貢方物并遵旨遣官

生鄭秉哲鄭繩蔡宏訓三人入監讀書○河

道總督齊蘇勒疏言陽武大隄危險應添築

遙隄又自豫省至徐州一帶大隄年久應修

至豫省南北兩岸隄子均應加幫高厚再北

岸自滎澤縣至山東曹縣南岸自滎澤縣至

江南碭山縣兩岸千餘里即應加幫修築遙

月格隄今擇大隄最要應加幫隄工之處四

萬七千三百四十丈又南岸七萬六千四百

五十六丈均請修築從之○庚寅封裕親王

保泰子廣華為輔國公○以一等侯田象坤

為正白旗漢軍副都統陞江西南贛總兵官

董玉祥為正藍旗漢軍副都統四川夔州副

將宋可進為江西南贛總兵官○辛卯授輔

國公愛音圖女為鄉君塔哈準秩四品○壬

辰敕諭準噶爾台吉策妄阿喇布坦爾前者

無故侵擾我哈密疆界罪在不赦

皇考聖意止令於邊地防守雖各路發兵原無

勦滅準噶爾之意也其後澤卜尊丹巴胡土

克圖為爾奏懇

皇考欲施恩寬宥所以遣使楚楊託音等諭爾

前年爾所遣使垂納木喀布厓等至澤卜尊

丹巴胡土克圖處轉至總督年羹堯軍前送至京師朕定爾平生功罪開示大義面諭遣回今爾深省前非歸誠請罪遣使根頓同楚楊託音前來奏辭恭順得遂

皇考初心朕意嘉悅爾奏稱惟祈休養生靈聞揚正教爲第一要務等語爾台吉不過準噶爾一部落之主尚欲休養生靈聞揚正教何況朕爲四海臣民之主普天之下皆朕土率土之濱皆朕臣乎用是特遣御前總管京城

喇嘛班第副扎薩克大喇嘛達爾漢楚楊託音內閣學士衆佛保副都統扎錫喇嘛錫拉卜格春等宣諭若台吉果欲輯寧爾國尚其誠一乃心與朕所遣大臣等申定疆圉諸事循理妥議歸於和順朕必施恩軫念永加眷顧仍前通市使命往來爾台吉誠能以鮮終爲戒其必惟和惟順無貳無疑披瀝悃忱以期永好不特克協於朕休養生靈至意爾台吉遊牧地方亦永永無虞安居樂業矣特此

諭示竝賜各色緞二十七疋爾其祇承是日賞來使根頓等緞足銀壹等物有差江南提督高其位摺奏松江之泖湖澱湖澄湖港汊叢雜姦宄易滋目今太湖遵旨稽查防範之法泖澱諸湖亦宜預籌防禦計松江所屬一百十三處俱應釘椿立柵編民船嚴啟閉以杜姦宄出沒之路奉

上諭此事廷議不准行夫地方文武大吏酌量彼處情形相機而爲又在爾等權宜措置也查果無礙於商民之處毋因廷議不准遂爾中止地方諸務總以便民爲主誠實心任事自必情理俱洽○撫遠大將軍年羹堯摺奏據副將軍阿喇衲報稱阿拉布坦蘇巴泰等截路搶奪宜行殲除臣令總兵官孫繼宗喀爾喀扎薩克通摩克等率兵進剿至哈拉腦兒知阿拉布坦蘇巴泰等逃往阿祿巴爾虎即進兵追至推墨爾地方賊人拒敵被官兵擊敗盡棄牛羊止率妻子逃去奏入報聞

癸巳琉球國王尚敬遣陪臣翁國柱恭上

聖祖仁皇帝香 甲午諭刑部刑獄關係重大  
必須虛公詳慎盡得實情不可疎忽遺漏以  
致民有冤抑夫君臣之義本同一體朕視臣  
下如手足也爾等遇事有可疑不能決者不  
妨面奏俟朕斟酌至當然後施行若既不面  
奏又以私心揣度巧爲迎合及刑罰不中則  
退有後言將所謂股肱大臣之任而存心卑  
污如此豈不可恥或朕有未當之處亦不好  
直陳所見人非聖人孰能無過君子之過如  
日月之食過而能改善莫大焉朕之不吝改  
過諒爾諸臣素所共知凡有功者加以以賞  
有罪者加以以刑此乃帝王馭世之大權朕  
但知因事順應竝不先有成見爾等皆宜體  
朕欽恤之意不可自恃已見亦不可彼此推  
諉和衷協恭平心靜氣毋得有意逢迎務使  
用法如衡之平如鑑之明庶幾民不輕犯國  
無冤獄以共成咸中有慶之治○又諭下五

旗王等屬下問罪發遣者部議俱發往各該  
打牲處但發往該王打牲地方數年之後該  
王每有私令回京者嗣後因公事治罪發遣  
者不得發往該王門上打牲各量其罪之輕  
重發往三姓黑龍江等處地方著定例具奏  
以原任員外郎覺羅塞德爲都察院左副  
都御史 以正藍旗漢軍副都統多賽署本  
旗蒙古都統 戶部議覆署江蘇巡撫何天  
培奏言江蘇等屬去歲秋禾水淹窮黎乏食  
業經題請散賑民困未蘇請於本年正月起  
至二月止令各州縣添設粥廠廣爲煮賑應  
如所請從之 工部議覆河道總督齊蘇勒  
疏言宿遷縣駱馬湖爲運道要處其東岸舊  
河低窪易洩舊築土壩未足捍禦請於湖東  
陸塘河通寧橋西相度高地築攔河滾水壩  
再築攔水隄六百丈中間口門寬三十丈以  
便宣洩庶於濟運有資應如所請從之○免  
江南鎮江府丹徒縣濱水圩田銀糧有差

乙未大理寺卿李敏啟休致陞右通政梁文科爲大理寺卿 丙申以青海平定遣官告祭

天

地

宗廟

社稷

奉先殿 諭河南巡撫石文焯豫省官塘以及偏僻道路煙墩俱宜整理修葺直隸山東大道兩傍皆種樹木此法甚善可豫飭明春栽植無誤再誠訓屬員不得借此擾民 撫速大將軍年羹堯遵旨議奏防守邊口八款一大兵在巴爾庫爾吐魯番地方駐劄日久今策妄阿喇布坦恭順遣使雖事屬未完而兵可暫撤臣請於巴爾庫爾吐魯番兵丁內選滿洲蒙古綠旗兵暫於巴爾庫爾駐劄二千名吐魯番駐劄一千五百名再令綠旗兵二千名駐劄哈密地方其餘兵丁俱撤回原處

一布隆吉爾築城原爲駐兵防守疆界臣請於布隆吉爾令總兵一員統兵五千名駐劄分爲五營其遊守千把等官照例增設沙洲離伊孫察罕齊老圖之口相近地方緊要應分一營官兵駐劄其哈密地方窄隘容兵甚少應俟巴爾庫爾吐魯番駐防兵丁撤回後派出鎮標遊擊一員千總一員把總二員兵五百名防守每年輪班派往其駐兵新城乞欽定嘉名以垂永久一布隆吉爾出嘉峪關五百餘里口外募兵一時難得現有甘涼肅三州應撤回之兵丁請即令駐劄其地其眷口俱官給路費送往遇有兵丁缺出由該營餘丁內挑選充補一布隆吉爾駐劄官兵俸餉若由內地運往於錢糧殊多糜費查從前赤金衛柳溝所等處曾募人種地今應於每營派餘丁二百名每人官給牛二隻籽種四石口糧三石第二年再給半分至第三年但給半分籽種過三年後不必再給此項地畝

即作伊等恒產不論米麥青稞收糧三石以爲兵丁月餉。一布隆吉爾沙洲民間事務不可不設文官管理赤金靖逆二衛舊設通判同知應留通判一員兼管二衛另於布隆吉爾增設衛守備一員沙洲增設衛千總一員今專管種地事務其靖逆衛同知今移駐布隆吉爾均屬肅州道統轄一肅州總兵官四營共有兵三千二百名肅州在口內布隆吉爾既有大兵駐劄其肅州兵丁於口外分守臺站事件甚少應將肅州鎮標兵撥出一營八百名歸入布隆吉爾再將柳溝所兵一百名靖逆衛兵一百名俱撥入布隆吉爾兵丁數內靖逆衛設都司一員赤金衛柳溝所各設千總一員俱屬布隆吉爾總兵管轄。一布隆吉爾沙洲原係蒙古地方赤金衛柳溝所亦曾爲伊等遊牧之所因大兵在外我兵種地駐劄若大兵撤後仍令伊等遊牧行走必至爭競生事查布隆吉爾南山內空地甚多

應派大臣一員帶領賢能章京分地令其居住庶内外地界分明。一寧夏地濶田肥原設總兵官駐劄遇哈密有事將滿洲兵由內派往路途遙遠甚屬無益寧夏賀蘭山之外離哈密不甚遙遠宜於寧夏令滿洲兵駐防其駐兵若干及官員數目俟西寧事完臣親加審視詳細定議再行奏聞得旨此事甚鉅著議政大臣等各抒己見詳加定議具奏尋議撫遠大將軍年羹堯八款分晰詳明俱應如所請從之。○丁酉直隸巡撫李維鈞摺奏現行地方事宜各款。一虧空地丁銀兩均攤十分之四以便逐漸補完。一減火耗每兩二三以紓民力。一起解兵餉知府例有規禮今悉裁革令州縣自行解司。一各官衙署例有里下鋪墊陋規今已革除。一清查地畝無致隱佔。一行保甲以杜姦匪。一查飭武弁除募兵虛兵之弊。一親檢三營甲幟勤加操演。一修整煙臺添建營房增設馬步兵五名以嚴

防汛。一徧飭村莊築牆掘壕兼選壯丁習練以防盜賊。一驛路兩傍栽種柳樹以卹行旅奉

上諭天下督撫皆當如此留心擴而充之何虞吏治不肅民生不遂耶村莊溝壑實係有益之事但須預爲陳說利害使愚民灼知有益踴躍樂從秋成之後方可行之斷不宜急遽強迫也民壯頭目殊難其人須擇平素爲衆所推服者方可委之董率尤須飭地方官不時稽查其行止勿致生事至種樹即古人列樹表道之意朕現刊諭一道尚未頒發爾奏恰合隨即通行直隸各省矣。賞各旗窮乏兵丁置備盔甲兵器銀兩定限屆期齊備該管官點勘如有典質盔甲兵器等物嚴行禁止。命復故狼山總兵官施而寬原銜予祭葬贈太子太保。○予故鑲紅旗蒙古都統楊都故致仕杭州右翼副都統加都統銜帶色各祭葬如例。戊戌以原任翰林院侍讀學

士陳世倌爲內閣學士兼禮部侍郎授允禔女爲縣君壻塞楞納穆占爾爲固山額駙輔國公普照女爲鄉君壻奎寶秩四品遣官往勘鄂爾多斯六旗被災人民牲畜已亥禁八旗官員兵丁無得於戲園酒館縱飲違者治罪革除各省門差牙帖庚子予故致仕禮部尚書凱音布祭葬如例旌表湖北江夏縣烈女徐三汲聘妻毛氏未婚夫殞投繯殉義給銀建坊入祠致祭如例辛丑禮部議覆青海構逆天兵往勦爲期二旬悉經平定邊陲安輯大軍凱旋應如諸王大臣所請

皇上擇日陞殿行慶賀禮得旨此次平定青海實由我

皇考簡用將帥之得宜恭養弁兵之有素伊等感恩効力克奏膚功此皆

謨烈貽留豈可爲朕有乎朕纘承

前列守而弗違應行典禮勉從所請俟告祭



陵寢後擇日具奏 壬寅江西巡撫裴率度摺  
奏湖口關稅贏餘應悉解部奉

上諭今歲贏餘是爾等清釐所致但數覺過多  
僅額外剝削商民則斷然不可關稅多少係  
於年歲之豐歉難可預定或遇不及之年不  
可勉強必求足數不然是又增加稅額矣當  
嚴飭胥吏毋致苦累商民 晉封喀爾喀鎮  
國公顏楚卜多爾濟爲固山貝子 癸卯撫  
遠大將軍年羹堯摺奏據侍衛達鼐報稱三  
月初三日與副將紀成斌等搜尋羅卜藏丹  
津屬人探得夾木燦堪布喇嘛在布代山後  
藏匿恐由西藏一路逃遁遣人往調台吉濟  
木巴等派蒙古兵往西藏邀截即率兵前進  
至梭羅木地方夾木燦堪布等拒戰敗遁我  
兵隨後勦殺濟木巴台吉等抄路迎賊將夾  
木燦堪布垂扎木素二人擒斬梟首送至軍  
營奏入報聞

大清世宗敬天昌運建中表正文武英明寬仁  
信毅大孝至誠憲皇帝實錄卷之十七

大清世宗敬天昌運建中表正文武英明寬仁  
信毅大孝至誠憲皇帝實錄卷之十八

監修總裁官光祿大夫經筵講官太僕議政大臣保和殿大學士兼兵部尚書總理兵部事三等伯加十五級臣鄂爾泰

總裁官光祿大夫經筵日講官起居注太僕議政大臣保和殿大學士兼兵部尚書仍兼管吏部尚書翰林院掌院

事三等伯加十三級臣張廷玉光祿大夫經筵日講官起居注太僕議政大臣武英殿大學士兼工部尚書仍兼管

翰林院掌院事加二級臣福敏光祿大夫經筵講官太子太僕東閣大學士兼禮部尚書六級臣徐元祿太夫

經筵講官議政大臣協辦內閣大學士事禮部尚書仍兼管太常寺鴻臚寺事日三泰等奉

敕修

雍正二年甲辰夏四月甲辰朔享

實錄卷十八

太廟

上親詣行禮○乙巳以青海平定遣官告祭

暫安奉殿

孝陵

孝東陵

景陵○叙平定青海功除已授大將軍年羹堯

爲一等公將軍岳鍾琪爲三等公外授叅贊

蘇丹總兵官宋可進爲三等阿達哈哈番總

兵官黃喜林爲二等阿達哈哈番按察使王

景灝總兵官周瑛副將王嵩紀成斌爲拜他

喇布勒哈番提督郝玉麟總兵官武正安爲

拖沙喇哈番以侍衛達鼎爲副都統授拜他

喇布勒哈番其餘有功將士各陞賞有差

八旗都統議覆副都統馬起達奏稱八旗世

襲官員佐領有因其子幼小及無嗣者其職

給與族人承襲致本家之寡婦貧乏不能聊

生請將襲職族人之俸稍行分給寡婦得以

養贍等語查凡襲職年幼之員原有食半俸

實錄卷十八

半米之例應照副都統馬起達所奏其年幼

未行上朝官員之半俸及養贍寡婦終身之

半俸亡故官員命婦期年之半俸請仍照常

賞給再無嗣之世職官員其職襲與族人者

將襲職人員之俸三分中以一分養贍本家

之寡婦從之○丙午怡親王允祥等議覆副

河道總督嵇曾筠疏奏河工調遣不敷請設

標下河兵應不准行得旨嵇曾筠已授副總

河駐劄南河兼管運河於河南黃河相去甚

遠猝有緊要工程實難相顧若無標下官兵難供驅使現在總河標下河兵十營爲數甚多或令齊蘓勒酌撥分給務期永遠可行爾等詳議具奏尋議河南黃河險要之處莫如懷慶府屬之武陟縣應令副總河駐劄彼處督率防護就近撥河南撫標守備一員千總一員把總二員馬步兵一百名按季更替聽副總河差遣至河標營兵應令總河齊蘇勒酌撥分給從之○刑部等衙門議奏焦宏勳

聖裁奉  
旨

侵隱莊親王財產議罪一案御史楊纘緒田嘉穀俱不畫題得旨楊纘緒田嘉穀俱有言職風聞事件尚許奏聞此案三法司堂官俱已畫題若議罪之處與伊等意見不合即應另行啟奏伊等既不畫題又不另奏非欲沽名即係徇私爾等傳諭楊纘緒田嘉穀令其明白回奏嗣後凡會稿有不畫題者該部即行聲明具奏○丁未以廣西總督孔毓珣爲廣東廣西總督兵部右侍郎李紱爲廣西巡

撫○添設滿洲蒙古副護軍叅領每旗十六員○戊申諭八旗官員等朕以八旗滿洲等生計時厯於懷其縱肆奢靡歌場戲館飲酒賭博等事屢經降旨訓誡即諸臣條奏所請應行禁止之處亦已施行凡朕所降諭旨及各項禁約務將歷年利弊詳加剖析明白書寫每旗每佐領各頒一張嚴示衆人各都統亦宜時加訓誡謂主上厯念八旗滿洲等生計種種恩施不一而足各宜安分遵守儉樸

聖裁奉  
旨

之道力改奢靡凡賭博縱飲遨遊園館等事洗滌惡習以副主上訓諭仁愛至意儻不實心感戴不學爲善不遵法度則一生徒自暴棄不但終身卑賤且無益於生計雖主上疊布恩施何益之有主上頻勞心慮諄諄訓飭爾等誠宜省悟日夜仰戴遵行儉樸之道凡清語騎射當差行走操演技藝嫻習禮儀等事皆當盡心努力學之或有不改前愆不遵法度之人一經查出務必從重治罪以警衆

人併將此語書寫。不時傳示。始爲有益。不然。但於朕降旨時。暫申禁令。久而遂輟。亦何益哉。將此傳諭八旗都統知之。○諭理藩院。據蘇尼特阿霸垓阿霸哈納蒙古人等。俱稱連年災傷。今又遭大雪。牲餽俱已倒斃等語。若差官查奏。始行加恩。則現今乏食之人。恐至饑餒。著叅領多索里侍衛納蘭馳驛前往查核。發戶部帑銀二萬兩。會同阿霸垓公德木楚克。逐一查明。計算實在無畜牧。不能度日。

實錄卷一八

五

者。將此銀兩酌量散給。均使沾恩。○陞都察院左副都御史楊汝穀爲兵部右侍郎。以故烏朱穆秦鎮國公塔妄拉布坦之子彭蘇克。拉布坦襲爵。○己酉。以青海平定遣官告祭。

永陵

福陵

昭陵。○給雲貴總督高其倬。拜他喇布勒哈番世職。以其在滇調兵出口。諸事盡心也。○庚

戌。諭諸王大臣等。自戊子年來。朕之無知兄弟數人。種種妄行。以致

皇考暮年。憤懣未嘗貽

皇考一日之安也。是以肌體消瘦。血氣衰耗。伊等。非惟不自引咎。毫無愛戀之心。且固結黨援。希圖僥倖。由來久矣。朕時時殫竭心力。寬慰。

皇考保全伊等。不但伊等知之。諒亦衆所共知也。朕即位後。惟篤兄弟之誼。曲予包容。指示

實錄卷一八

丁

教誨。冀其改過。以期終始成全。此朕向在

皇考時。即志願如此。豈今紹承大寶。而於兄弟間。有指瑕求疵之理乎。允禩素行陰險狡詐。皇考深知。曾於朕兄弟前。屢降

諭旨。不可悉數。今姑舉其一。與衆知之。康熙五

十三年

皇考自熱河回鑾。駐蹕遙亭。允禩遣人以將斃

二鷹上進

皇考閱見。甚怒。隨有

硃批諭旨以示朕及諸皇子比時捧覽之下俱

無奏言朕獨繕摺具奏所批

諭旨誠親王收貯現今繳上諒此

嚴旨允禩未必得知即允禩亦斷不以告也

皇考所遺諭旨諸王大臣一經捧閱即知之矣

朕豈有意凌虐苛責之哉自朕即位允禩優

封親王任以總理事務理應痛改前非感朕

包容委任之意輸其誠悃以輔朕躬乃不以

事君事兄爲重猶以同輩諸弟允禩允禩爲

伊出力之故懷挾私心至今未已也諸凡事

務不實心辦理有意隳廢且每遇奏事並不

身到亦不親加檢點苟且草率付之他人豈

非欲故激朕怒以治伊罪加朕以不令之名

乎允禩較諸弟頗有辦事之材朕甚愛惜之

非允禩允禩等可比是以朕屢加教誨令其

回心改過殫厥至誠佐理政治爲國家得力

之人不但成朕友于之誼亦以全

皇考慈愛之衷伊果盡心國事即盡心於

太祖

太宗

世祖

聖祖也豈惟身受隆恩且傳之子孫亦永永勿

替若仍不知悛改肆行悖亂干犯法紀朕雖

欲包容寬宥而國憲具在亦無可如何當與

諸大臣共正其罪矣昔

皇考年十五執巴圖魯公鰲拜往事可鑒朕若

果欲將允禩治罪豈有於衆前三復教誨之

理實望其回心耳爾諸王大臣宜時加規勸

務令改悔允禩果能回心改過明於君臣大

義感激朕恩表裏如一爾等即據實陳奏若

怙過不悛亦斷不可隱諱允禩

聖祖仁皇帝之子朕之弟也安可目覩其日即

於凶惡乎伊之善惡若不據實奏明稍有隱

匿非惟負朕更有何顏瞻拜

景陵朕向日並無希望大位之心亦不效伊等

營謀有所糾合之人以市私恩小義之名他

人容或不知深知朕者無過允禩也

皇考以大位付朕朕念

皇考四十五年顧復深恩勉承大統仰荷貽謀之重大夙夜祇懼不遑寢食天下幾務無分巨細務期綜理詳明朕非以此博取令名特以欽承

列祖開創洪基仰體

皇考付託至意爲

社稷之重勤勞罔懈耳古云爲君難若祇圖一

身逸樂亦復何難惟欲繼美

皇考之治則憂勤惕勵莫難於爲君矣朕既受

皇考所付重任則朕之一身上聞

宗廟

社稷不得不爲防範且允禩於

皇考時毫不遜順恣意妄行匪朝伊夕至今猶

然不止朕可不念

祖宗肇造鴻圖永貽子孫之安乎茲大臣等奏允禩一招曾與誠親王恒親王淳親王閱

看王等皆云猶有

皇考大內所降諭旨伊等不知之處甚多隨以皇考從前所降諭旨另行繕摺具奏因請將此摺傳示諸王大臣乃允禩再三懇求奏請免其宣示以全顏面等語果能從此改悔著將另行繕摺之處暫停宣示著宗人府內閣一併鈐印封固內閣敬謹存貯○諭刑部朕惟明刑所以弼教君德在於好生從來帝王於用刑之際法雖一定而心本寬仁是以虞廷以欽恤垂訓周書以慎罰爲辭誠以民命至重少涉疑案寧過乎仁無過乎義也朕自臨御以來一切章奏無不留心細覽於刑獄一事尤加詳慎誠恐法司未能平允情罪未能悉當故凡京城及直省題奏讞獄少有可矜者無不法外施仁量加末減獨念朝審重囚其情實者刑科必三覆奏聞勾除者方行處決而外省情實重囚惟於秋審後法司具題即咨行該省無覆奏之例朕思中外一體豈

在京諸囚宜加詳慎在外省者獨可不用詳慎乎人命攸關自當同仁一視自今年爲始凡外省重囚經秋審具題情實應決者爾法司亦照朝審之例三覆奏聞以副朕欽恤慎罰之至意爾部即遵諭行○諭兵部每年派往出牧之官員兵丁內竟有不去者即馬匹駝隻俱不足數此朕所悉知也其官員兵丁有於邊內閒住者亦有於邊外閒住者若此次派往之叅領及官員等優者大臣等即行保奏不及者即行叅劾○辛亥解宗人府宗令簡親王雅爾江阿任以裕親王保泰爲宗人府宗令○兵部叅奏允祿奉使口外不肯前往捏稱有旨令其進口竟在張家口居住得旨廉親王允禩議奏允禩尋議應作速行文仍令允祿前往差遣之處併將不行諫阻之長史額爾金交部議處得旨允祿既於中途私回不肯前往今又何必令其出口伊既進口亦聽其自便至額爾金原非允祿意之

所重何必治罪著允禩再議具奏允禩又議允祿奉使口外不肯前往捏旨進口應革去多羅郡王撤其所屬佐領沒入家產解回交宗人府永遠禁錮得旨所奏著交諸王貝勒貝子公及議政大臣詳議具奏允祿卑鄙性成行止妄亂文學武藝蒙

皇考訓諭數十年終於一無所成平生無一事可以上慰

皇考聖心貽

皇考一日之悅豫抑且賦性陰險既不自知其庸懦無能又不肯安分守己恣意崛強覽廉親王所奏允祿惡蹟似無虛語數十年來朕諸兄弟各人行誼昭然在人耳目朕之兄弟知之舉國孰不知之諸王大臣等務期各秉公忠自出意見議奏儻稍有迎合之念及苟且照廉親王所奏議覆之處豈特隳壞爾等臣節更有何顏瞻拜

景陵且廉親王所奏或出至誠或蓄他志在朕

猶自遲疑未信此事惟賴諸王大臣公忠辦理著速議具奏諸王大臣尋議允祇奉使不肯前往捏旨私自進口不法已極應革去郡王撤回佐領交宗人府永遠禁錮得旨允祇之事交與允禩者特以觀其如何處置向來允禩允禔允祇等俱聽允禩指示即便遵行故朕望允禩教誨伊等使之改過乃不但不行教誨反激成伊等妄爲朕所差遣之處竟不前往私回觀望居住口外數月又稱奉旨進口如此不法任意妄行惟欲朕將伊等治罪以受不美之名豈知此等無理無義乖戾犯法之弟治之以罪適足以昭朕無私之善政何疑之有朕今施以恩澤而不知感喻以法令而不知懼朕自當明罰勅法雖係兄弟亦難顧惜諸王大臣理應將允祇素行與今所作之罪明白指陳或照允禩所議治罪或加等減等治罪之處請旨定奪朕自降諭旨○壬子諭刑部禁止私創人參舊例不論已

得未得俱解送刑部往返拖累故於盛京刑部監禁每年差官前往審理朕思伊等俱係圖利窮民春夏時被獲監至九月十月方得審結延挨月日身受寒暑多致疾病死亡甚屬可憫寧古塔有將軍辦事御史盛京有將軍刑部併副都御史永福嗣後將各地方所獲者即行審理作速完結年底彙齊具本啟奏自今將審理偷創人參之部院衙門堂官停其遣往如此則案內之人無久禁凍餒之苦累矣○諭江南總督查弼納漕運總督張大有署理江蘇巡撫何天培等朕惟漕運所經河道固以通國廩之輓輸亦以便商民之利涉旗丁與商民自應一視同仁無容偏護而偏累也去年因秋冬雨少河流淤淺而旗丁人等不顧漕運維艱任意攬載客貨致船重難行聞今春丹陽常州等處地方及沿途遇淺概拏商船起剝且借名需索貪暴公行得賄者雖空船亦行釋放不遂其欲者勒令



當差有將貨物行李拋棄河干紛紛露積或爲風雨所損傷或爲盜賊所窺伺該管漕運文武官弁漫無約束毫不經心小民營販資生何以堪此擾害爾等係地方大吏皆當實心體恤稽察周詳奉諭之後或再有起剝之事當各嚴飭所屬官弁申明約束不得仍蹈前轍竝出示遍諭軍民人等使知朕一體軫恤之至意至張大有身任總漕糧艘往來乃其專責尤宜整肅綱紀釐奸剔弊嚴明馭下毋使玩法犯科乃往往固執已見袒護下屬任其沿河盜賣漕糧兼倚勢藐法貽累地方甚屬不合今除已往不深究外嗣後若仍不加意約束屬員有心縱容及失於覺察再經朕訪聞定行嚴加議處○陞陝西漢中副將馮允中爲雲南開化總兵官○甲寅鑲藍旗蒙古都統德爾金緣事革職陞軍前右翼前鋒統領丁壽爲鑲藍旗蒙古都統○九卿等遵旨詢問御史田嘉穀楊纘緒會議焦宏勳

一案不畫題又不另議緣由具奏得旨焦宏勳一案由嘉穀楊纘緒意見不合即當兩議或將不畫題緣由繕摺奏聞不然即應同三法司畫題具奏言官尚許風聞言事乃在與議之列既不兩議又不奏明緣由又不畫題耽延命案是屬何心因朕問及耽延之故始知由伊等不畫題所致伊等既故爲隱瞞設朕不問及不知伊等之不曾畫題竟照法司所議完結伊等必以爲人命案件三法司大臣官員不能詳審定案是以我等不曾畫題借此邀名干譽無所不至古人慎重民命每戮一人必謀之左右謀之大夫更謀之國人今縱不能謀之國人如何與議官員內尚爾議論不能僉同况朕自即位以來屢經面諭大臣官員務宜矢公矢慎同寅協恭不可少有偏私拘執意見如有於心不合之處不妨奏聞朕自有定奪朕深望爾等之直言陳奏爾等自應仰體朕心直陳所見今觀田嘉穀

楊纘緒之所爲是專務虛聲自樹黨援非愚昧無知即其心叵測事雖微小亦不可不防微杜漸此風斷不可長田嘉穀楊纘緒著革職回籍今尚在三年之內故但令革職回籍如三年後大小臣工猶有各執己見邀譽盜名者朕必治以重罪○乙卯諭果郡王允禮暢春園修造兵丁居住房屋將及告竣朕從前降旨撥派兵丁駐劄之處爾會同都統拉錫前鋒統領希爾根護軍統領查克旦吉當阿等議奏尋議暢春園修造房屋共一萬間分爲八營每營蓋房一千二百五十間八旗各派護軍參領一員副護軍參領二員委署護軍參領四員護軍校十員護軍三百七十五名派護軍校護軍時令護軍統領等將爲人老實家道貧窮者派往竝祈皇上施恩賞給銀兩以爲遷移之費得旨依議此所派官兵著怡親王公馬爾賽統轄管理此官員等亦著怡親王馬爾賽公同驗看選

派○丙辰諭湖廣總督楊宗仁湖北巡撫納齊喀湖南巡撫魏廷珍等國家設立常平諸倉蓄穀積粟偶逢旱澇詳報踏勘往返察驗未免後時古人云備荒之倉莫便於近民而近民則莫便於社倉前諭爾等勸導建設蓋專爲安民起見也爾等自應轉諭屬員體訪各邑士民中有急公尚義之心者使主其事果掌管得人出納無弊行之日久穀數自增至於勸捐之時須俟年歲豐熟輸將之數宜隨民力多寡利息之入務從乎輕取償之期務從乎緩如值連年歉收即予展限令至豐歲完納一切條約有司毋得干預至行有成效積穀漸多該督撫亦止可具摺奏聞不宜造冊題報使社倉頓成官倉貽後日官民之累朕初意如此孰料該督撫欲速不達令各州縣應輸正賦一兩者加納社倉穀一石且以貯穀之多少定牧令之殿最近聞楚省穀石現價四五錢不等是何異於一兩正賦外

加收四五錢火耗耶。是爲裕國乎。抑爲安民乎。諭到。該督撫速會同司道府等官。確商妥議。務得安民經久之法。以副朕意。○以吏部左侍郎史貽直。爲順天武鄉試正考官。內閣學士胡煦。爲副考官。○以正黃旗護軍統領查克旦。署鑲藍旗蒙古都統。○總理事務王大臣議覆。河道總督齊蘇勒疏言。臺莊閘以下。徐唐口以上。建設三閘。蓄水濟運。應如所請。從之。○丁巳。陞大理寺少卿唐執玉。爲太僕寺卿。○旌表廣東揭陽縣烈婦吳朝覲妻張氏。黃夜拒姦。扼喉殞命。給銀建坊。入祠致祭。如例。○戊午。以青海平定功成。上御太和殿。諸王貝勒貝子。公文武官員。上表行慶賀禮。○諭內閣。朕於朝會大典。行禮有年。見近來禮儀。比前甚屬廢弛。大非尊君敬上之道。我皇考寬仁。如天覆幬。槩予包容。故稽察之大臣。官員。遂皆視爲尋常。並不約束。糾叅漸致玩

忽。朕今若不整肅嚴禁。將來流弊無所底止。夫朝堂之上。大典攸關。君臣之分。大義所係。玩忽之人。不得不以法治之。朕御極以來。屢有諭旨。近又申飭嚴禁。乃李建勳羅植。於行禮之日。紊越朝章。顯違朕旨。著將二人俱革職。拏送刑部。按法懲治。並飭稽察御史侍衛等。嗣後加謹嚴查。有失儀者。即行糾叅治罪。○撫遠大將軍年羹堯。摺奏侍衛達鼐副將紀成斌等。領兵前往布哈色布蘇地方。擒獲阿布濟車陳台吉。再喀爾喀扎薩克沙爾都台吉。前來投順。奏入報聞。○庚申。孝端文皇后忌辰。遣官祭昭陵。○以多羅貝勒滿都護。爲纂修玉牒總裁官。○陞二等侍衛納彥。爲孝陵總管。○辛酉。署京口將軍李杕疏奏。領催劉起鵬等。請補授驍騎校。得旨。各省此類記名之員。甚多。缺出之時。皆將記名者題補。則未記名之人。苦無補用之途。伊等何以効力

行走著該部行文各省將軍等將未記名人內有人材可用弓馬嫻熟盡心効力者揀選具奏○以軍前前鋒統領蘇丹爲右翼前鋒統領○刑部遵旨議覆下五旗包衣佐領下人嗣後因公事犯罪俱停其發往諸王所屬打牲烏喇處均改發三姓地方當差若情罪稍輕酌量發黑龍江等處請著爲令從之○癸亥總理事務王大臣議奏青海大捷應獻俘於

太廟恭請

皇上臨御午門受俘得旨平定青海實乃

皇考留貽之功故捷音到日恭告

景陵今造逆首惡吹拉克諾木齊阿爾布坦溫布藏巴札布等三人檻送來京朕令議獻俘太廟之禮以慰

列祖在

天之靈諸王大臣等乃議請受俘歸功於朕非朕本意也可否祇行獻俘不行受俘之禮諸

王大臣等再察典禮具奏尋議出師凱旋執獲醜類獻於廟社即受俘於廷歷代行之大典攸昭應請允行從之○宗人府叅奏貝子允禔差往西寧居住擅自遣人往河州買草踏看牧地抗違軍法肆行邊地請將允禔革去固山貝子其所有屬下佐領撤出爲旗下公中佐領得旨允禔革去貝子撤出佐領之處俱著寬免○革辦理察罕叟爾糧餉侍郎薩哈布職以其侵蝕軍餉也○丙寅吏部議奏內閣漢中書員缺因專用景山教習之進士補授每致辦事乏人嗣後請照舊例以願就中書之進士舉人銓補內閣酌量考取擇其字畫端楷者分班選用從之○丁卯都察院奏言奉旨交五城銀一萬兩散給流民令回原籍外其餘剩銀兩請存貯五城以備賑濟得旨此銀存貯五城備用遇有掩骼之事亦於此內動支但須核實毋得冒濫○撫遠大將軍年羹堯摺奏河州口外鐵布等寨番

人皆係青海所屬劫擄道路恣意妄行臣派遣署河州副將岳超龍等帶兵進剿攻取四十一寨剿服三十七寨殺傷番賊二千一百餘名擒獲人口牲畜無筭皆賞給官兵奏入報聞○戊辰旌表廣東曲江縣烈婦譚夢韶妻鄭氏守正拒姦被毆殞命給銀建坊入祠致祭如例○已巳諭總理事務王大臣等允祇不肯前往奉差地方並不請旨私自回來詐稱抱病任意出入邊界朕已寬容數月伊毫無惶懼之意公然居住彼處近召入王大臣等嚴降諭旨允祇料已稔悉亦竟不差一人前來謝罪奏請殊失人臣之節著革去王爵調回京師永遠拘禁允祇之子與伊家產及佐領下人員將如何措置並拘禁處所著各該管處另行請旨○調浙江按察使王之麟來京以原任湖南按察使甘國奎爲浙江按察使司按察使○庚午以鑲黃旗滿洲副都統常在副都統銜那敏俱署鑲白旗滿洲

都統○辛未諭內務府爾衙門補放園頭弊端百出聞噶禮石文桂等入官家人中富戶願爲園頭壯丁者百計鑽營希圖挑取賂遺園頭倩人代役偷安暇逸又彼此相倚爲姦營謀取利賄賂該管官員撥給膏腴之產因此所給田畝肥瘠不均得瘠地者受累不堪此等處朕知之甚悉爾等嗣後務秉公平必應行補放之人方可揀選派給地畝務令均平併將斷不受人請託等語明白曉示則伊等自必醒悟不致受人欺詐矣儻不悛改經朕訪知罪在爾等○壬申考察奉天等處駐防軍政卓異官五十五員罷軟官九員不謹官一員浮躁官二員才力不及官十員年老官四十七員有疾官二十三員分別陞賞處分如例○增孔顏曾孟四氏學舉人中額一名從山東巡撫黃炳請也

大清世宗敬天昌運建中表正文武英明寬仁  
信毅大孝至誠憲皇帝實錄卷之十八

大清世宗敬天昌運建中表正文武英明寬仁  
信毅大孝至誠憲皇帝實錄卷之十九

監修總裁官光祿大夫經筵講官太僕寺卿和碩大學士兼兵部尚書理藩院尚書三寶伯加十五級臣鄂爾泰  
總裁官光祿大夫經筵講官起居注太僕寺卿太子太保保和殿大學士兼戶部尚書仍兼管吏部尚書翰林院掌院  
事三寶伯加十五級臣張廷玉光祿大夫經筵講官起居注太僕寺卿武英殿大學士兼工部尚書仍兼管  
翰林院掌院事加二級臣福敏光祿大夫經筵講官太子太保保和殿大學士兼禮部尚書加六級臣徐本光祿大夫  
經筵講官議政大臣編修內閣大學士事務禮部尚書仍兼管太常寺鴻臚寺事臣三泰等奉

敕修

雍正二年甲辰閏四月甲戌朔以護軍統領

實錄卷十九

十一

納秦署四川提督○乙亥以都察院左副都  
御史覺羅塞德爲戶部額外侍郎仍兼左副  
都御史○鑲白旗滿洲副都統達色年老乞  
休允之○旌表福建閩縣烈女楊輝祖聘妻  
林氏古田縣林曰肅聘妻陳氏晉江縣陳士  
衡聘妻黃氏俱殉夫捐軀守貞就義各給銀  
建坊入祠致祭如例○丁丑諭直隸各省總  
督巡撫等社倉之設原以備荒歉不時之需  
用意良厚然往往行之不善致滋煩擾官民

俱受其累。朕意以爲奉行之道。宜緩不宜急。宜勸諭百姓。聽其自爲之。而不當以官法繩之也。近聞各省漸行社倉之法。貯蓄於豐年。取資於儉歲。俾民食有賴。而荒歉無憂。朕心深爲嘉悅。但因地制宜。須從民便。是在有司善爲倡導於前。留心稽核於後。使地方有社倉之益。而無社倉之害。此則爾督撫所當加意體察者也。又聞民間輸納錢糧。自封投櫃亦屬便民之法。但偶有短少之處。令其添補。

實錄卷之九

每至多方需索。其數浮於所少之外。應將原銀發還。仍於原封內。照數補足交納。庶可免多索之弊。此雖細事。督撫大吏。亦不可不留心體察。嚴飭有司。以除民累。○總理事務王大臣等議覆。禮部侍郎蔣廷錫奏請纂修大清會典。按本朝會典。自崇德元年起。至康熙二十五年止。已刊刻成書。其後四十年來。所定章程。未經編輯。應如所請。自康熙二十六年。至雍正二年。各部院衙門所定禮儀條例。

俟開館後。造冊送館編輯。其總裁纂修官員。併開館事宜。請俟命下。遵行從之。○授簡親王雅爾江阿女爲郡主。壻李廷兆爲和碩額駙。○戊寅諭刑部。朕披覽奏章。其中人命案件。如故殺謀殺者。尚少。而以鬪毆傷人者甚多。或因口角相爭。或因微物起釁。揮拳操戈。一時殞命。及至抵罪。雖悔何追。此皆由於愚賤鄉民。不知法律。因一朝之忿。貽身命之憂。言之可爲憫惻。古有月吉讀法之典。

實錄卷之九

聖祖仁皇帝上諭十六條內。有講法律以儆惡頑一則。蓋欲使民知法之不可犯。律之無可寬。畏懼猛醒。遷善而遠過也。但法律包舉甚廣。一時難以遍喻。爾部可將大清律內所載凡毆殺人命等條。逐條摘出。疏解詳明。通行各省。令地方有司。刊刻散布於大小鄉村處。張掛遍加曉諭。風雨損壞。仍復再頒。俾知鬪毆之律。尚然如此。則故殺謀殺罪。更可知。父兄子弟。互相講論。時存提撕警戒之心。以化



其好勇鬪狠之習。庶命案可以漸少。以副朕好生慎罰之至意。○命左右兩翼各立宗學一所。揀選宗室四人爲正教長。十六人爲副教長。宗室子弟願入學者。分別教習清漢書。讀書之暇。演習騎射。併月給銀米紙筆等項。以隆教育。○

上諭宗學正教長輔國將軍善福等。朕惟睦族敦宗。務先教化。嘗見宗室中習氣未善。各懷私心。互相傾軋。竝無扶持愛護之意。惟知寵厚妻黨姻婭。其於本支骨肉。視若仇敵。殊爲悖謬。或因祖父昔日微嫌。追念舊惡。必圖報復。卽如齊正額行事無狀。甘蹈匪僻。以致重干法紀。王貝勒之子孫。妄自尊大。任意奢侈。不顧禮義。陷於罪戾者。往往有之。其將軍及閒散宗室。不知自重。狎比小人。蕩盡先人產業者。尤爲不少。昔我

皇考加恩宗室。養育栽培。撫恤備至。苟有片長薄技。靡不收錄。如普奇經希勒什亨等。皆曾

擢用。伊等不思感恩酬德。反要結朋黨。專事鑽營。大負

皇考委任之意。且其居家素行。亦多乖戾。又如賴士。不安本分。蕩產破家。及其贖罪。軍前仍不改過。生事訐告。此皆宗室中之可爲炯戒者。朕嘗歎明代宗室年久繁衍。失於訓教。末流猥鄙。至不可言。誠恐朕之宗室日流日下。不知前鑒。深用爲憂。是以亟籌保全之道。若非立學設教。鼓舞振興。循循善誘。安能使之改過遷善。望其有成。今特立義學。揀選爾等教習宗室爾等。隨其資質。勸學興行。導以禮義。夫教訓之方。漸摩陶淑。非可責效旦夕也。但須盡心竭力。善爲開導。毋避怨。毋倦怠。教習久而禮義明。自當遠惡從善。或有不遵教訓。罔顧廉恥。有玷名教者。小則爾等自行懲戒。大則揭報宗人府會同奏聞。其行止端方。精勤好學者。無論年齒長幼。卽行保奏。從來立教之術。莫要於獎善懲惡。善不獎不能使



之勸惡不懲不能使之改爾等既膺簡任其各平心靜氣屏除私意教訓宗室子弟如己之子弟懇懇然無毫髮不盡其心所頒諭旨令其朝夕記誦如木鐸之警衆俾皆覺悟自新庶幾積習可除翕然嚮化以協休風爾等務期勤慎龜勉恪供厥職以副朕篤厚宗親殷勤教育之至意○授輔國公華善子寶格爲奉恩將軍○復授輔國公察尼子原任奉恩將軍察達爲奉恩將軍○以多羅貝勒滿都護協辦總理事務○以鑲白旗漢軍副都統李柱署本旗蒙古都統正白旗漢軍副都統田象坤署正藍旗漢軍都統○已卯戶部等衙門議覆山西巡撫諾岷疏言晉省太原平陽二府地方遼遠請改設直隸州分轄將平陽府屬之臨晉榮河萬泉猗氏四縣分隸蒲州安邑夏縣平陸芮城垣曲五縣分隸解州太平襄陵稷山河津四縣分隸絳州蒲縣鄉寧二縣分隸吉州大寧汾西永和三縣分

隸隰州太原府屬之樂平盂縣壽陽三縣分隸平定州定襄靜樂二縣分隸忻州五臺繁峙崞縣三縣分隸代州河曲興縣二縣分隸保德州至直隸州各有倉庫向無專責恐致侵那請將蒲州解州絳州吉州隰州五州錢糧就近令河東道盤查平定保德忻州代州四州錢糧令雁平道盤查澤州遼州沁州三州錢糧令糧驛道盤查如通同隱匿失察照知府例議處應如所請從之○庚辰授故鎮國公三官保弟噶喇瑪爲鎮國將軍停止江寧浙江福建駐防滿洲兵丁查拿私鹽俱交地方官嚴緝從兩江總督查弼納等請也○以正白旗滿洲副都統覺羅佛倫署本旗滿洲都統○旌表直隸交河縣烈婦趙順興妻閭氏拒姦不污被刃殞命給銀建坊入祠致祭如例○辛巳諭刑部近聞刺字人犯私自銷毀者甚多即屬怙終不悛之明證且此等必有用藥代爲銷毀者嗣後如有私毀刺

字之人理應審明若係本身私毀者本律杖六十補刺似屬太輕作何重治其罪其代爲銷毀者將代毀之人一併作何治罪之處著妥議定例具奏尋議嗣後竊盜等犯銷毀刺字者照例枷責補刺並用藥代毀之人一併枷責從之○兵部議覆條奏內地方官員私動驛站馬匹處分得旨朕以天下民生爲念凡一切欽差與祭祀山川之大臣官員回京時必召入面見詳詢生民景況地方情形以及雨水田苗間得地方官祇知嚴緊驛站諸凡敕詔經過迎送俱不成禮至伊等私事及上司差役轉擅動驛馬逢迎應付從前惟恐騷擾驛站朕曾降旨嚴飭但敕詔經過地方官吏迎送有關大典豈可疎玩爾等繕寫諭旨申飭各省督撫○癸未以平定青海所獲叛逆俘囚吹拉克諾木齊阿爾布坦溫布藏巴扎布三人解送至京行獻俘禮遣官告祭太廟

社稷○諭順天府府尹京師廣寧門外向有普濟堂凡老疾無依之人每棲息於此司其事者樂善不倦殊爲可嘉

聖祖仁皇帝曾賜額立碑以旌好義爾等均有地方之責宜時加獎勸以鼓舞之但年力尚壯及游手好閒之人不得借名混入其中以長浮惰而生事端又聞廣渠門內有育嬰堂一區凡孩穉之不能養育者收留於此數十年來成立者頗衆夫養少存孤載於月令與扶衰恤老同一善舉爲世俗之所難朕心嘉悅特頒匾額并賜白金爾等其宣示朕懷使之益加鼓勵再行文各省督撫轉飭有司勸募好善之人於通都大邑人烟稠集之處照京師例推而行之其於字弱恤孤之道似有裨益而凡人怵惕惻隱之心亦可感發而興起也○諭湖廣總督楊宗仁等國家設立官員分別等次俱有定分不得僭越湖北糧儲道郭維新於起程之前請訓旨時朕曾諭如

有裨益地方百姓之事著令密奏郭維新蒞任後奏稱該省漕船式樣寬大遇水淺之處輓運維艱請照江浙漕船式樣減小成造朕未降諭旨今伊又奏稱遵旨將船僦造完工兌載漕糧於正月十七等日起程三月十六日過淮等語夫改造漕船亦屬大事郭維新理應報明該督撫如果有益題明改造今竝未報明上司即行任意改造著湖廣總督楊宗仁巡撫納齊喀魏廷珍等將曾否報明及督撫因何不奏并有無裨益之處據實明白具奏其郭維新兩次奏摺一併發往○陞兩淮鹽政右僉都御史謝賜履爲都察院左副都御史仍管鹽務○解山東按察使程光珠任陞山東糧道余甸爲山東按察使司按察使○予故白都納副都統徐昌祭葬如例○甲申兵部等衙門議覆條奏內改併各衛所歸於州縣管轄一條查得各處軍民戶役不同未便歸併且武官科甲出身人員專選衛

所守備千總若盡裁衛所必致選法壅滯應無庸議得旨此事部議所見甚小滇蜀兩省曾經裁減衛所未聞不便今除邊衛無州縣可歸與漕運之衛所民軍各有徭役仍舊分隸外其餘內地所有衛所悉令歸併州縣飭令直省督撫分別詳悉區畫其武舉武進士作何銓選不令壅滯之處吏兵二部詳議奏聞○乙酉諭戶部朕惟錢糧固屬緊要而民瘼尤宜體恤聞有州縣虧空錢糧百姓情願代賠者此端斷不可開虧空之員未必愛民况百姓貧富不等斷無闔縣情願代賠之理或係棍蠹勾連借端科歛或不肖紳衿一向出入衙門通同作弊及本官被叅猶冀題留復任因而號召多事之人連名具呈稱係闔縣願賠後官畏懼承追處分接呈入手即差役按里追呼名曰樂捐其實強派累民不淺嗣後紳衿富民情願協助者聽其自行完納其有闔縣具呈者即將爲首之人治以重罪

如府州縣官擅准派賠著該督撫查叅重處至因公那移之項依限全完定例准其開復嗣後督撫題報全完即給咨本官令其隨本引見朕觀其人可用者即用如不可用以原品休致其年老及不願補官之人亦於本內聲明給還原職不必來京爾部行文直省督撫一體遵行○丙戌王以下文武百官齊集午門前設鹵簿鳴金鼓

上御午門樓前楹陞寶座受俘兵部官率解俘將校將平定青海所獲叛逆俘囚吹拉克諾木齊阿爾布坦溫布藏巴札布三人白練繫頸跪伏兵部堂官奏所獲俘囚謹獻

闕下

上命交刑部於是刑部官領旨兵部官引俘押出王以下文武各官行禮畢

上回宮是日賜解俘官各蟒緞朝衣帽鞞加賞銀百兩兵丁各賞銀二十兩○以兵部左侍郎嵇曾筠爲河南副總河○丁亥諭宗人府

及部院大臣等宗室阿布蘭朕素不深知在皇考時伊於委任之事尚爲勉力廉親王又於朕前保奏朕因特加殊恩由輔國公晉封貝勒賞給佐領又令總理事務外人不知以爲阿布蘭曾奏聞二阿哥礬書一事故爾擢用不知礬書事敗阿布蘭尚自遲疑未奏係貝勒蘇努指使奏聞非其本心也阿布蘭自任用以來竝不實心効力而且素行卑污前大將軍允禩自軍前回時伊特出班跪接從來宗室公於諸王阿哥竝無此例也宗人府建立碑亭翰林院所撰之文阿布蘭以爲不佳另行改撰竝不頌揚

皇考功德惟稱贊大將軍允禩擬文勒石朕即位後伊自知誣謬復行磨去辦理旗務每每徇私近叅奏佐領一事經朕交部查出傳示衆大臣似此罪惡種種朕是以交宗人府議處非有別意也再李英貴勒什亨俱朕施恩擢用之人因其不肖有負朕恩始行革退善

則用之不善則退之朕素性也

皇考每訓朕諸事當戒急用忍屢降

諭旨朕敬書於居室之所觀瞻自警今於阿布

蘭既不加詳察任用太急今伊自干不可寬

宥之罪又難以容忍則

皇考訓誡之聖明益著而朕亦知過矣阿布蘭

應作何治罪之處爾部院滿大臣會同宗人

府定議具奏○以吏部左侍郎史貽直充經

筵講官○以內閣學士陳世倌爲山東巡撫

山東巡撫黃炳爲內閣學士兼禮部侍郎○

調浙江布政使王朝恩來京以原任山東布

政使佟吉圖署理浙江布政使司布政使○

戊子以鑲黃旗蒙古副都統花色署理藩院

侍郎事○己丑諭河南山東巡撫并沿河鎮

道等官糧船關係甚重務須及時抵通豫省

向因漕米截留竝不留心河道漸至淤淺今

糧船逾限未至此係爾地方官責任必須開

濬深通使舟行無阻早到早回不誤抵次再

南糧大米幫船亦爲遲滯至今未過臨清爾

等皆有催漕之責當協力趲行務令速得抵

通將來回空之船方不致遲誤冬兌○陞陝

西兆岷副將黃起憲爲江西南贛總兵官○

庚寅陞

昭陵總管覺羅巴延德爲鑲白旗滿洲副都統

○諭總理事務王大臣等策妄阿喇布坦來

使已回胡土克圖處事務亦竣前令順承郡

王世子弘晟在彼守護今既無事著伊等從

容回京○宗人府遵旨議覆宗人府官員定

額郎中六員員外四員主事六員筆帖式二

十四員於此定額內一半照例仍用旗員一

半補用宗室其鎮國將軍輔國將軍奉國將

軍以郎中用奉恩將軍宗室佐領以員外用

廕生之五品官以主事用至閒散宗室內考

選學優材美之人一等等以主事用二等等以筆

帖式用從之○四川巡撫蔡珽題烏蒙土知

府祿鼎乾故請以其子祿萬鍾承襲下部知

之○辛卯諭漕運總督及直隸山東河南巡撫各省旗丁運糧進京沿途水次理應奉公守法乃數年前浙江湖廣糧船運丁因懷挾私忿彼此爭鬪逞其兇頑持戈放箭致有殺傷又聞前歲之冬糧船守凍在山東地方竟行搶奪擾害居民去歲回空又聞強取百姓衣物此等妄行皆大千法紀嗣後總漕若不嚴加禁約仍然寬縱直隸山東河南巡撫即轉飭沿河官弁不時稽察儻犯法爲非即分別輕重按律治罪不得稍有徇縱推諉以長刁風若仍前有爭鬪傷人及搶奪擾民之事該督撫即行奏聞請旨於彼地正法決不寬貸可預行曉諭各省運丁知之○豁免江西南昌府屬寧州南昌等七州縣浮額銀七萬五千五百四十兩有奇從江西巡撫裴率度請也○癸巳鑄給河南副總河印○甲午四川巡撫蔡珽題建昌道屬喇滾安撫司喇瑪布故請以其子丹正邦承襲下部知之○乙

未諭沿海各省督撫提鎮等出洋巡哨船隻最爲緊要舊例地方官承管修造營員每多方勒索不顧州縣賠累地方官惟知交結營員屬其收受彼此俱挾私心修造豈能堅固以致出洋船隻易至朽壞重修朕深知其弊欲改歸營員修造使州縣無賠累之苦而於軍政似實有裨益爾等可會同速行確議具奏若有不可行處不可迎合強以爲是○陞內閣侍讀學士班第爲內閣學士兼禮部侍郎○兵部議奏嗣後各處駐防兵丁如有歸旗之後私行逃回者令該管官員嚴行查捕解京治罪儻有隱匿不報者照隱瞞逃人之例該管官以失察議處從之○河道總督齊蘇勒遵旨議奏河南黃河另駐副總河管理標下官兵臣即遵旨於江南河營撥兵八百四十名連前撥留豫省協濟之兵一百六十名共足一千名併選撥千總把總各三員令其管轄前往河南聽候副總河隨工調用以

防大汛下部知之○以鑲黃旗護軍統領壽智爲散秩大臣陞正白旗滿洲副都統覺羅佛倫爲鑲黃旗護軍統領○丙申刑部等衙門議覆漕運總督張大有疏奏請嚴回空糧船夾帶私鹽及闖關闖關之例嗣後如回空糧船夾帶私鹽拒捕殺人將爲首者立決爲從者邊衛充軍其闖關闖關將船丁舵戶枷號充軍爲從者杖徒押運等官不行約束知情故縱者革職請著爲令從之○丁酉陞右

翼前鋒統領蘇丹爲正黃旗蒙古都統○戊戌齊齊哈爾副都統鄂山軍前緣事革職陞齊齊哈爾協領多起納爲齊齊哈爾副都統○己亥諭兩江總督查弼納署江蘇巡撫何天培河道總督齊蘇勒漕運總督張大有等京口一帶運河爲南北漕運咽喉歷年以來挑濬淤淺皆係丹徒丹陽兩縣百姓派辦工役物料俱出民間殊屬偏累此運河乃杭嘉湖蘇松常六郡共濟之河而獨累兩邑之民

其何以堪朕深爲軫念今後須確估每年經費悉心會商或令地方官支用地丁錢糧或令河員專司其事於河帑內動支開銷無致累民更聞六郡向有協濟之例抑或共襄工費以濟運道爾等確議奏聞以副朕愛惜黎元至意○庚子陞兵部侍郎塞爾圖爲禮部尚書○壬寅陞浙江鎮海叅將張溥爲浙江定海總兵官

大清世宗敬天昌運建中表正文武英明寬仁信毅大孝至誠憲皇帝實錄卷之十九



大清世宗敬天昌運建中表正文武英明寬仁  
信毅大孝至誠憲皇帝實錄卷之二十

監修總裁官光祿大夫經筵講官太僕議政大臣保和殿大學士兼兵部尚書總理事務三等伯加十五級臣鄂爾泰

總裁官光祿大夫經筵日講官起居注太僕兼太子太保保和殿大學士兼戶部尚書仍兼吏部尚書翰林院

事三等伯加十三級臣張廷玉光祿大夫經筵日講官起居注太僕議政大臣武英殿大學士兼吏部尚書仍兼管

翰林院掌院事加二級臣福敏光祿大夫經筵講官太子太保東閣大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事臣三泰等奉

敕修

雍正二年甲辰五月癸卯朔夏至祭

地於

方澤恭奉

聖祖仁皇帝配享

上親詣行禮恭捧

聖祖仁皇帝神位奉安於

皇地祇神位之西

太宗文皇帝神位之次○甲辰諭戶部朕惟漕

運關係甚大經費本無不敷而運丁恣行不

法者皆由官弁剝削所致如開兌之時糧道

發給錢糧任意扣剋運丁所得十止八九而

僉丁之都司監兌之通判又多誅求及至啟

行沿途武弁借催趲為名百計需索又過淮

盤查私貨徒滋擾累究屬無益運丁浮費既

多力不能支因而盜賣漕糧偷竊為匪無所

不至矣嗣後各省糧道給發錢糧不許扣剋

分釐沿途武弁不許借端需索運丁除包攬

抗違外所帶些須貨物亦無庸苛刻盤查至

江浙船政同知經管修造糧船侵漁尤甚此

官於漕政毫無裨益著即裁去爾部行文各

督撫不時查察如有仍前需索等弊立即指

叅從重治罪庶運丁漸有起色自必保守身

家凜遵約束禁官弁之侵削即所以戢旗丁

之刁悍也○諭兵部陝西地屬雍涼人材壯

健強勇者多騎射嫺熟勝於他省每科鄉試

取中不過三十名而入學額數亦與他省不

相上下額少人多不無屈抑自雍正四年鄉

試為始西安甘肅武舉各加中十名其武童



入學額數若通省俱加恐有冒濫照文童改學例令督撫會同學臣查明技勇最優之州縣酌量數目奏請加額○直隸巡撫李維鈞摺奏畿輔地方得雨奉

上諭京都左近二十八日雖亦得雨尚未均徧初一日雨至初二日早方得十分霑足朕深爲忻慶頃者夏至有事於

方澤朕親詣行禮向蒙

高天之恩今復叨

厚地之德惟默感

篤祐益加凜惕耳○諭河南巡撫石文焯等有人條奏河南河工買草辦運及搶工夫役州縣俱派累里民覽之不勝駭異朕如此推心置腹任用爾等凡有累民之舉緊令據實入告而爾等竟若罔聞政令乖方一至於此朕亦無可諭爾等也石文焯嵇曾筠田文鏡同看○乙巳

孝誠仁皇后忌辰遣官祭

景陵○丙午諭刑部朕因朝儀不肅曾屢降諭

旨嚴飭刑部司官李建勲羅植朝賀失儀此二人違旨大不敬本即應正法但念即位以來立心不以己意輕殺一人且係立法之初故令監候秋後處決以觀衆人知畏法與否若衆人仍不畏法秋後定行處決以爲大不敬者之戒則此二人乃衆人殺之也後於獻俘之日見班行整齊祭壇之日亦皆敬謹夫二人之可殺者欲以明法也今既人人皆知遵法是法已明矣則犯法之人可從寬宥乃衆人生之也可將李建勲羅植免罪釋放勒令回籍并行文該地方官勿令出境爾等將此旨交與內閣傳諭大小官員知悉○又諭律例內雖有父母年老家無次丁應存留養親之條但兇徒恃此有意傷人殊未可定已死之人亦屬可矜嗣後如此類存留養親之人視其所犯罪之輕重作何飭令多出銀兩給與死者之家若不給與仍照原擬治罪之

處爾部定例議奏○解四川巡撫蔡珽任以禮部尚書塞爾圖署理四川巡撫○改廣東順德營遊擊爲左翼鎮標中營遊擊原駐增城之鎮標前營遊擊爲增城專營遊擊隸提標統轄其香山春江二協廣海新會二營仍隸鎮標統轄從署廣東總督年希堯請也○戊申陞鑲紅旗護軍統領吉當阿爲右翼前鋒統領○己酉宗人府等衙門議奏阿布蘭負恩背逆奏事不敬應革去多羅貝勒撤出所賞佐領圈禁在家原襲之輔國公其子不准承襲得旨阿布蘭著革去多羅貝勒仍令在輔國公上効力行走將增賞之佐領俱撤出○四川巡撫蔡珽題夔州府石碛宣慰使馬洪裔故請以其子馬宗大承襲下部知之○庚戌諭兵部各省武職有未經引見者可行文督撫提鎮自副將以下遊擊以上除地方有緊要事務及曾經引見之員外將人材可觀素有聲名者每省陸續保送四五人輪

流來京引見○諭內務府內府佐領渾托和下人分檔時派給各莊頭者以生薑日增錢糧浩繁因令往各莊服田力穡庶幾仰事俯育人各有資朕特念伊等生計故有此舉爾等奉行不善竟似將伊等發遣者以致恐懼疑惑再莊頭等役使壯丁頗多暴悍非理嗣後如敢肆行陵虐者許壯丁即行控告所告果實止一二人則另撥與別處屯莊至四五人即將莊頭革退治罪其分檔漢人內有欲歸民籍者著詢問原主如情願令其爲民則准其爲民有欲撤回亦准其撤回○以果郡王允禮管理鑲紅旗滿洲都統仍兼管鑲藍旗漢軍都統事務伯四格爲鑲藍旗滿洲都統陞鑲藍旗漢軍副都統布達時爲鑲紅旗護軍統領仍兼鑲藍旗漢軍副都統以軍前鑲白旗護軍統領吳世核爲額外護軍統領調正藍旗護軍統領宗室汝福爲鑲白旗護軍統領陞鑲黃旗滿洲副都統阿林保爲正

藍旗護軍統領○陞福建閩安副將謝希賢爲福建金門總兵官○辛亥諭禮部兵部安南國王黎維禔遣陪臣范謙益等賀登大寶貢獻方物並三年歲貢從廣西桂林府水路進京朕因嚮來驛遞供應多有騷擾曾諭定例供給之外不許溢額應付今安南慶賀大禮遣使遠來應加恩恤其經過地方供給食物酌量增加令其充足以示朕嘉惠遠人至意○陞正紅旗護軍叅領綽奇爲鑲藍旗滿洲副都統○癸丑以正藍旗額外副都統那敏爲正白旗滿洲副都統○兵部議覆吏部侍郎史貽直條奏武闡直省鄉試請照會試例擇其弓馬嫻熟技勇出羣者另立好字號以便取拔應如所請得旨考試武舉議定編好字號在京武鄉試朕派信用大臣考試嗣後各省武鄉試或以好字號取中或以文章好取中之處著於解部武鄉試錄內註明以便會試時查對○甲寅諭諸王大臣等李元

璽等一案係伊等新犯之罪刑部宜照律審擬具奏今覽刑部所奏將步軍統領衙門以李元璽照大光棍例拏送之舊案及遇赦寬免之處查出一併敘入本內夫伊等舊案與此案毫不相涉乃刑部援引敘入豈以李元璽之罪曾經

皇考寬免亦欲朕將李元璽等寬免耶抑以從前步軍統領將李元璽等爲大光棍送部之處俾朕知之即行正法耶此明係以難處之事歸之朕躬欲以試朕也近日馬爾齊哈在朕前稱蓮豆之事則有司存是譏朕不當察及細務其心欲朕不加詳察則伊等可以邀結黨與任意擅行夫古帝王明四目達四聰舜好問而好察通言故上下之情不致壅隔閭閻疾苦利弊無不周知古人云黜繡充耳前旒蔽明亦有所謂而云然也馬爾齊哈粗識數事便於朕前誦述古語妄行瀆奏註云道之全體固無不該然其分則有司之守非

君子之所重。並非謂全不留心也。如耕田播種。乃農夫之事。講誦訓詁。亦屬文士之業。若云不親細務。朕又何用行耕耨諸學之典乎。國家設官分職。各有專司。而總攬萬幾。全在一人之裁決。但云委諸有司。則六部之事。付之六部。爲天子者。惟有端默高拱而已。豈不爲逸。但天下之事。可以如此料理乎。朕以刑部事件。民命攸關。所係非小。務期明罰敕法。簡孚慎恤。每案必詳審再三。求其至當。始愜於衷。而欲朕付之不見不聞可乎。若云有司。則刑部尚書侍郎。非大有司乎。今所辦事件。顛倒如此。有司寧可恃哉。馬爾齊哈向在各旗行醫。朕以伊係行醫之人。必然好生。其爲人似尚坦率。即位後。洊擢刑部侍郎。當感恩思報。竭力盡忠。以奉君上。而猶不改舊習。存從前分黨之念。其始召見時。即禮貌疎畧。絕無對君恭敬之意。聞其在乾清門。與大學士列坐共食。曾降諭旨嚴飭。令其改過。今又以

曾子語譏諷朕躬。設令朕或有不當。何妨直陳其事。冀朕採擇。而爲此隱約之詞。狂妄甚矣。朕御極以來。用人行政。自返絕無過當。朝廷清肅。亦無攬權怙勢之人。總理事務。王大臣皆

皇考素所信重。遵奉

皇考遺旨。輔佐朕躬。而非其願者。每懷嫉妬。輒以絕無影響之事加之。此皆有意擾亂國政。造言生事者之所爲也。爾等心所不快之人。欲借事巧傷。朕確有成見。豈爲宵小所動搖乎。

皇考常言。每事當防微杜漸。朕服膺

聖訓。爾等稍萌邪僻之見。朕斷不能隱默也。朕用人任使。全出至公。而無知小人妄生議論。謂朕聽用總理事務大臣之言。所用者皆係伊等親友。伊等俱係

皇考簡用之人。非朕即位後所特擢也。今朝廷之上。俱是

皇考時所用大臣朕豈有私乎馬爾齊哈係蘇努之黨觀其行事伊等結引黨與至今猶未散解朕屢申諭旨告誡諄切望伊等洗心滌慮將從前結黨徼幸之想悉行改除伊等自求生全身家可以永保若執迷不悟心懷二三不竭力抒誠爲朝廷効力則伊等自干國法斷不輕貸嗣後如馬爾齊哈仍似從前狂悖諸王大臣見即參奏拘拏故特諭知○乙卯遣官祭

關聖帝君○丙辰諭諸王大臣等廉親王允禩今日具奏貝子允禔事又將議處滿丕事一併具奏謂之無心可乎再議處滿丕案內並不將總兵等官取供遽行草率擬罪向來定例有如此者乎皆因前日朕於馬爾齊哈案內言及蘇努之故是以間日一次欲以擾亂朕心耳從前

皇考時審訊與允禩相面之張明德供出賴士普奇一案

皇考在乾清門降旨曰蘇努之祖阿爾哈圖土門貝勒褚英薨逝時

太宗特降諭旨云此人若在必亂國家大抵此一宗枝向日原有嫌隙即如蘇努於我父子兄弟骨肉之中讒譖離間暗中鑽營惟擾亂國家是務朕防之有年矣爾等其知之每事留意此

諭旨乃衆阿哥及諸大臣等所共聞也朕即位後於蘇努格外加恩晉封貝勒伊子勒什亨委署領侍衛內大臣亦冀伊等感朕寬大之恩遷善改過耳詎意勒什亨並不感戴仍袒護貝子允禔扶同隱匿將所交事件故爲遲延及朕將勒什亨派往西寧伊弟烏爾陳指稱武備院奏事入內於朕前顯露憤恨之容勒什亨係獲罪之人例不得奏請訓旨而烏爾陳將伊兄引入紫禁城內殊屬不合是以并將烏爾陳同伊兄發往軍前今蘇努以七十病故退有後言是仍念伊等舊日黨與擾

亂國家之心毫無悛改也。蘇努不可留在京師。煽惑衆心。著革去貝勒。其屬下佐領著撤回存貯公所。止留伊府佐領著伊同在京諸子。於十日內帶往右衛居住。到彼之後。若不安靜自守。仍事鑽營。差人往來京師。定將蘇努明正國法。諭貴州巡撫毛文銓。黔省吏治戎政俱懈弛。不可問矣。爾必竭力整飭一番。提督趙坤能清勤自勵。實心任事否。聞伊近來殊不及從前總兵任內之聲名也。爾等宜文武和衷。互相勸勉。更聞貴州苗種不一。而种家苗尤屬兇狠。年來內地刁頑人民往往入彼巢穴。勾連生事。報復私讐。而營伍中每公攤銀錢。以備贖取兵弁之費。甚屬可笑。究其故。總因武備廢弛。官兵不敢正視苗獠。故爲此掩耳盜鈴之舉。以因循自便耳。有司貪暴不恤民隱。驅之爲盜。武弁畏懦不敢察詰。任其逃亡。頽風積弊。至於此極。爾亟當悉心籌畫。既不可姑息。以滋長惡習。亦不可急

驟致激起事端。逐漸整理。勤而勿懈。訓練營伍。時時教演。申飭屬員。務得民心。更加懲姦。瘳惡。除暴安良。行有成效。庶不有忝厥職也。將朕此諭亦通知趙坤。汝二人密相商酌。諸凡講求萬全而爲之。戊午。禮部議奏。朝鮮國王李昀恭賀。孝恭仁皇后尊諡禮物。應遵旨停其收受。交內務府存留。准作年貢從之。己未。調鑲白旗蒙古副都統額爾錦爲鑲黃旗滿洲副都統。陞一等侍衛阿齊圖爲鑲白旗蒙古副都統。○調署理山西大同總兵官陳王章署理江西南昌總兵官。○庚申。諭總理事務王大臣。朕從前曾傳諭外省文武大臣等。凡陞見來京。不必進獻一切物件。朕近日將鎮協等官調來引見。特欲識認其人。詢問地方事務。理應輕騎速來。不可帶食物進獻。嗣後著永行禁止。○諭直省總督巡撫等。前四川巡撫蔡珽題報重慶府知府蔣興仁病故。本到之日。

朕聞蔣興仁之死乃係自盡特令蔡珽明白回奏乃蔡珽回奏仍復支吾不明夫一介小民偶有此事尚必報明官長詳察情節焉有身叨一命而輕生若此必有萬不得已之情或係本人犯法畏罪或被上司逼勒或受同事欺陵斷非無因豈容草率含糊冀逃國法嗣後大小職官若有此等之事該督撫據實具奏○陞都察院左僉都御史汪潒爲太常寺卿○撫遠大將軍年羹堯奏報莊浪之謝爾蘇部落番人首倡爲惡擅據桌子山碁子山又涼州南崇寺之沙馬拉木扎木巴等與蒙古通連去年曾搶掠新城張義等堡再郭隆寺郭莽寺逃出之喇嘛煽惑西寧之納朱公寺朝天堂加爾多寺番人與莊浪番賊串通並不歸順臣與奮威將軍岳鍾琪及在西寧大臣等商議派綠旗土司兵共分十一路於四月十五日由西寧進發後據岳鍾琪等陸續報稱納朱公寺喇嘛番人俱經投順即

於朝天堂添設小張家胡土克圖居住至加爾多等番人派副將紀成斌張玉總兵黃喜林等分兵四路直抵賊穴殺賊數百其餘死於溝河者甚多寺亦焚毀又據遊擊馬忠孝王大勲等殺賊於和石溝遊擊王序吉范世雄敗賊於石門口涼莊道蔣洞殲賊於喜達堡而前鋒統領蘇丹率兵至旁伯拉夏口番人假稱來投察其情形可疑令人偵探則衆賊伏匿放鎗遂率官兵直抵賊穴殺賊甚衆又涼莊道蔣洞搜勦碁子山破賊於巴洞溝土司魯華齡殺賊於天王溝前後被勦殆盡其爲首謝爾蘇之番賊阿旺策凌被先密寺喇嘛擒獲解送岳鍾琪又領兵至鎮羌探得賊人俱在木茂山即派員率兵截阻殺賊甚衆其餘賊人竟棄妻子逃去隨留總兵官宋可進涼莊道蔣洞統率綠旗土司民兵五千名暫駐防守又守備馬光在寬溝地方殺賊二十餘人衆俱逃散再查先密寺番人順逆

無常且與碁子山賊穴相連恐後日復聚賊生事是以令伊等喇嘛番衆俱移於加爾多寺之外居住其先密寺即行焚燬此次陣亡受傷綠旗土司官兵及所撫番人戶口數目俟查明造冊另行咨部奏入得旨碁子山碁子山番賊甚屬兇頑倚恃地方危險屢行劫掠大將軍年羹堯籌畫調遣令奮威將軍岳鍾琪等統率官兵進剿於山險林密之處奮戰五十餘日盡行剿滅屢勉効力克奏膚功永靖邊塞甚屬可嘉此次勲績著將大將軍年羹堯及岳鍾琪等弁兵俱從優議敘○辛酉諭四川陝西湖廣廣東廣西雲南貴州督撫提鎮等朕聞各處土司鮮知法紀每於所屬土民多端科派較之有司徵收正供不啻倍蓰甚至取其馬牛奪其子女生殺任情土民受其魚肉敢怒而不敢言孰非朕之赤子方令天下共享樂利而土民獨使向隅朕心深爲不忍然土司之敢於恣肆者大率皆由

漢姦指使或緣事犯法避罪藏身或積惡生姦依勢橫行此輩粗知文義爲之主文辦事助虐逞強無所不至誠可痛恨嗣後督撫提鎮宜嚴飭所屬土官愛恤土民毋得肆爲殘暴毋得濫行科派儻申飭之後不改前非一經發覺土司叅革從重究擬漢姦立置重典切勿姑容寬縱以副朕子惠元元遐邇一體之至意○布隆吉爾副將軍阿喇衮患病以署固原提督噶爾弼署理布隆吉爾副將軍軍前正黃旗蒙古都統蘇丹署理陝西固原提督陝西西安左翼副都統覺羅伊禮布署理陝西西安將軍○禮部等衙門遵旨議奏古昔聖王制祀凡有道有德施教於學者祀於瞽宗漢文翁立學宮於成都首祀孔子又畫七十二子之像於壁此諸賢從祀之始也厥後有功經傳皆得從祀謂之經師自唐至明歷代進退不一而當代賢儒得預於祀典蓋自宋始伏讀



聖諭云附饗廟庭諸賢或有先罷而今宜復者  
臣等議得明嘉靖時釐定祀典改祀於鄉者  
七人林放蘧瑗鄭康成鄭衆盧植服虔范甯  
罷祀者四人秦冉顏何戴聖何休今俱宜復  
其從祀也

聖諭云有舊缺而今宜增者臣等公同詳考先  
儒事實請增入兩廡從祀者共十八人孟子  
門人樂正子公都子萬章公孫丑漢諸葛亮  
唐陸贄宋韓琦尹焞黃幹陳淳何基王栢元  
金履祥許謙陳澧明羅欽順蔡清本朝陸隴  
其允宜增入祀典者也

聖諭云崇聖祠或有可升而附者臣等議得宋  
張子橫渠之父張迪一人可以附入崇聖祠  
聖諭云先賢先儒之後孰當增置五經博士臣  
等議得孔門弟子冉伯牛仲弓冉求宰子子  
張有若六子均宜確訪嫡裔賜以世襲五經  
博士以昭崇報者也以上四條恭候  
睿鑒裁定得旨先儒從祀

文廟關係學術人心典至重也宜復宜增必  
詳加考證折衷盡善庶使萬世遵守永無異  
議爾等所議復祀諸儒雖皆有功經學然戴  
聖何休未爲純儒鄭衆盧植服虔范甯謹守  
一家言轉相傳述視鄭康成之淳質深通似  
乎有間至若唐之陸贄宋之韓琦勲業昭垂  
史冊自是千古名臣然於孔孟心傳果有授  
受而能表彰羽翼乎其他諸儒是否允協以  
及宰子冉有增置博士之處著再公同確議  
務期至當不易具奏予故正藍旗漢軍副  
都統朱廷柱祭葬如例壬戌諭總理事務  
王大臣等七十馬爾齊哈常明等皆黃緣妄  
亂之人伊等皆廉親王之黨七十原爲阿靈  
阿謀主各處鑽營阿爾松阿視爲恩人在戶  
部時專主戶部之事今在刑部又專主刑部  
之事凡小有才者俱被引誘愚懦又畏警其  
威竝入伊黨常明業已正法伊等俱在八旗  
王大臣并近侍人家或用逢迎或用離間又

有暗地鑽謀者數人朕悉知之但不遇事發姑不深究伊等悔心悛改則已若仍固執不改伊等斷不能掩朕之耳目也七十自薊墅闕差回隱匿半年任內浮額稅銀數萬朕俱加寬宥止令出銀數千兩爲朕弟莊親王修理府第理應踴躍効力乃竟不感戴寬宥之恩並不作速全完遷延至今不肯交納且又造言怨望經莊親王具奏朕著莊親王將七十圈禁伊府內令其交納無論何人求爾爾即奏聞七十仍復怠玩反營求裕親王差蘇克肫囑託布達時照看朕御極之初即諭諸王大臣曰彼此結黨互相戕害甚屬惡習爾等當以朕之所好者好之所惡者惡之是非畫一則姦黨無自而起善者朕所嘉美爾等一體嘉美之則其人愈加鼓舞以向於善他人亦企慕效法之矣惡者朕所賤惡爾等一體賤惡之則其人無地自容亦可望其悔悟悛改矣傳曰惟仁人能好人能惡人羣臣當

輔朕以成仁人果能盡言規諫朕並無所拒抑也昔日

皇考時凡被譴責之人本出於至公至當而內有黨同袒庇者稱爲冤抑衆皆隨聲附和素有仇者亦解其仇素不識面者轉成相識本人亦忘其有應得之罪隨衆自稱冤抑誠爲惡習人臣事君當同德同心協力和衷乃國家之福即不得已亦當致身盡忠直言進諫何故競效此最下惡習朕甚不解其故今將是非所在聽君上之自爲王大臣等專擅行私於下可乎如此則各自爲黨矣欲除朋黨之源當令舉國內外共爲一心既爲一心則是非與予一人同之朕有過誤大臣盡忠諫諍朕必將用其讜論鑒其忠心其人亦足垂名萬世何故行此無父無君小人之行乎朕在藩邸甚惡此風斷不爲其所染廉親王至今與朕結怨亦即此故今廉親王之意不過欲觸朕之怒多行殺戮使衆心離散希圖擾

亂國家耳。如此天豈肯如其願乎。古人云。亂臣賊子。人人得而誅之。

皇考每引述此語。特指廉親王言之。乃至今朋黨之人。尚猶未息。不知君臣大義之輕重。效法衆人惡習。其事難以枚舉。今七十等。夤緣妄亂之人。若不繩以國法。則憲典不行矣。現今審理七十。搜查家產。俟查完之時。著阿爾松阿馬爾齊哈奏聞。七十著革職。拏交阿爾松阿馬爾齊哈。聽其作何處分。阿爾松阿馬爾齊哈往查七十家產。細微物件。不得藏匿。阿林保布達時。亦往協助。其查出之家產。仍給莊親王爲修府之用。諸王大臣等。此後專心一志。輔翼朕躬。成全仁人之名。同好其所當好。同惡其所當惡。如仍固執不改。各爲一是。非朕亦不得不執法從事矣。爾等謹識朕言。實心奉行。以副朕好生慈愛之至意。此事可徧諭八旗文武大臣官員知悉。○又諭。自西陲逆賊羅卜藏丹津等。背棄國恩。招集同惡。

殘其骨肉。侵犯邊城。朕命年羹堯揆度機宜。指麾將士。犁庭掃漠。迅奏膚功。惟逆賊犯塞之初。邊民畧被騷擾。克敵之後。居民安堵。不知有兵。且士馬有飽騰之歡。閭閻無轉運之苦。支用錢糧。一無糜費。昨因野番掠劫成性。出沒無常。又令奮威將軍岳鍾琪。領兵搜捕餘孽。將士用命。於深山林木之中。轉戰五十餘日。俱已蕩平。從此鋒鏑永清。疆圉开拓。今具奏善後事宜十三條。又定禁約青海十二事。運籌周密。措置精詳。朕心嘉悅之。至其所奏善後諸事。皆合機宜。惟新聞地方宜廣屯種。而欲令五省有罪之人。發往開墾。恐此等之人。未必習於耕種。又無室家。可以羈留。於邊塞之處。少當留意耳。爾等一併悉心妥議具奏。○諭禮部。內廷太監及王公家太監之爲民者。率多在京居住。此輩最好生事。不可容留。俱著回籍。如內有六十五歲以上。曾經効力。因得殘疾。而爲民者。許其在京居住。令

總管大監奏聞其一應回籍者著行文該地

方官嚴查如不在本籍居住又往別省將該

地方官一併從重治罪○鑲黃旗滿洲都統

蘇克朶年老休致陞正白旗滿洲副都統那

敏爲鑲黃旗滿洲都統○旌表江南宿州烈

婦陳忍妻胡氏拒姦不污被勒殞命給銀建

坊入祠致祭如例○癸亥賜朝鮮陪臣李檀

等宴賚如例○甲子改山西蒲州營遊擊爲

副將管轄黃河以北中條以南及潞澤平垣

等營從山西巡撫諾岷請也○乙丑

孝恭仁皇后週年忌辰遣官祭

景陵○

上以

母后升遐倏經周歲痛

色笑之難追想

音容而切慕

御製哀詞以誌悲感云○丙寅命吏部尚書舅

舅隆科多戶部尚書張廷玉左都御史尹秦

朱軾爲纂輯

大清會典總裁官吏部侍郎史貽直禮部侍郎

蔣廷錫兵部侍郎伊都立內閣學士福敏翰

林院掌院學士阿克敦爲副總裁官○以內

閣學士黃炳署理刑部侍郎仍在學士裏行

○戊辰諭宗人府弘春朕加恩授爲貝子令

其効力行走乃伊父及伊伯廉親王每事逼

迫禁止伊父伊伯既不願其在朕前効力弘

春著革去貝子○命協理內務府總管薩哈

廉仍在郎中任行走以上駙院總管常明爲

內務府總管○總理事務王大臣等遵旨議

覆撫遠大將軍年羹堯條奏青海善後事宜

十三條○奏稱青海各部落人等宜分別功

罪以加賞罰也從前羅卜藏丹津侵犯內地

時貝勒色卜騰扎爾及賊人侵犯西川南川

時嘗報信息並未出兵協助即首先投誠併

引策凌諾爾布羅卜藏察罕等來投台吉噶

爾丹戴青始終未助賊人且與貝勒盆蘇克

汪扎爾力戰吹拉克諾木齊又隨大兵出口亦爲効力扎薩克阿喇布坦係察罕丹津之婿隨大將軍進勦効力均應請加封爵以示鼓勵應如所請色卜騰扎爾晉封郡王噶爾丹戴青封爲固山貝子阿喇布坦封爲輔國公又奏稱俘獲之諾顏格隆乃圖爾古特台吉今已爲喇嘛隨提督岳鍾琪在軍前効力貝勒盆蘇克汪扎爾從前雖助逆賊後知悔過投誠擒賊贖罪應與投誠之公策凌諾爾布留其原封之爵以示寬大應如所請各復伊等原爵又奏稱輔國公羅卜臧察罕台吉濟濟克扎布雖經投順從前與貝子阿喇布坦巴爾朱爾阿喇布坦擾亂內地請革爵爲民貝勒策凌敦多卜貝子拉查卜雖經投誠但久助逆賊應降其所封之爵以示懲戒應如所請羅卜臧察罕濟濟克扎布革爵爲民策凌敦多卜降爲固山貝子拉查卜降爲鎮國公一奏稱青海部落宜分別遊牧居住也

請照依內扎薩克編爲佐領以申約束每百戶編一佐領其不滿百戶者爲半佐領將該管台吉俱授爲扎薩克於伊等弟兄內揀選授爲協理台吉每扎薩克俱設協領副協領叅領各一員每佐領俱設佐領驍騎校各一員領催四名其一旗有十佐領以上者添設副協領一員佐領兩員酌添叅領一員僅蒙俞允請將一等侍衛副都統達鼎暫留辦理其每年會盟奏選老成恭順之人委充盟長不准妄行私推以致生事滋擾均應如所請一奏稱朝貢交易宜按定期地也請自雍正三年起於諸王台吉內派定人數令其自備馬駝由邊外赴京請安進貢青海諸王貝勒應分作三班三年一次九年一周其與內地之人互相交易之處則定以每年二月八月二次交易俱以邊外爲集臣選得西寧西川邊外有那拉薩拉地方請指定爲集不准擅移屆期仍令總兵官飭委營弁領兵督守如

有擅進邊牆者即行懲治應如所請但各蒙古需用茶葉布麵等物交易之期過遠必致窮乏應令四季交易又奏稱羅卜藏丹津所屬垂寨桑係首先歸順之人應令於松潘口外駐牧授爲土百戶職銜丹忠部下寨桑噶隆色卜騰達什等率領數百餘人赴松潘投順現駐潘州應給以千戶百戶文憑均應如所請一奏稱喀爾喀厄魯特之四部落宜不屬青海也查伊等原非被擄之人今青海諸王台吉內之投降者咸歸仁化助逆者俱已被擒而喀爾喀內有隨大兵投降者宜乘此軍威遠振將不願爲青海屬人之喀爾喀等照青海例編旗分爲佐領添設扎薩克等分駐剿滅逆賊之舊地其情願歸本處者聽其自便則青海之勢可分而喀爾喀台吉等無不感恩報効應如所請一奏稱西番人等宜屬內地管轄也查陝西之甘州涼州莊浪西寧河州四川之松潘打箭爐裏塘巴塘雲南

之中甸等處皆係西番人等居住牧養之地自明以來失其撫治之道或爲喇嘛耕地或爲青海屬人交納租稅惟知有蒙古而不知有聽衛營伍官員今西番人等盡歸仁化即係內地之良民應相度地方添設衛所以便撫治將番人心服之頭目給與土司千百戶土司巡檢等職銜分管仍令附近道廳及添設衛所官員管轄其應納糧草較從前數目請畧爲減少以示寬大至近邊居住帳房逐水草遊牧者仍准伊等照舊遊牧均應如所請一奏稱青海等處宜加約束也查青海巴爾喀木藏危乃唐古特四大部落顧實汗據佔此地以青海地面寬大可以牧養牲畜喀木地方人衆糧多遂將伊子孫分居此二處伊則在青海遊牧居住喀木地方爲伊等納貢藏危二處從前原施捨爲達賴喇嘛班禪喇嘛香火今因青海叛逆取此一帶地方交四川雲南官員管理達賴喇嘛向差人赴打

箭爐貿易。每獸向人木多。乍了巴塘裏塘居。住喇嘛。索取銀兩不等。名爲鞍租。至打箭爐。始行納稅。請飭達賴喇嘛等。不准收受鞍租。并飭打箭爐收稅官員。亦免其納稅。再每年請賞給達賴喇嘛茶葉五千觔。班禪喇嘛減半賞給。均應如所請。一奏稱喇嘛廟宇。宜定例稽察也。查西寧各廟喇嘛多者二三千。少者五六百。遂成藏污納垢之地。番民納喇嘛租稅。與納貢無異。而喇嘛復私藏盔甲器械。前羅卜藏丹津侵犯時。喇嘛等帶領番民與大兵抗衡。今臣於塔兒寺喇嘛內之老成者。揀選三百名。給與大將軍印信執照。諭令學習清規。請嗣後定例。寺廟之房。不得過二百間。喇嘛多者三百人。少者十數人。仍每年稽察二次。令首領喇嘛出具甘結存檔。至番民之糧。應俱交地方官管理。每年量各廟用度。給發。再加給喇嘛衣服銀兩。庶可分別其賢否。地方官得以稽察。均應如所請。一奏稱陝

西邊防宜嚴界限也。查邊外自黃河入中國之處。至於河州。西寧。蘭州。中衛。寧夏。榆林。莊浪。甘州等。其間水草甚佳。林麓茂密。乃棄此不守。以致蒙古等佔據大草灘之地。將常寧湖爲牧廠。是以各處相通。竟無阻礙。請於西寧之北川邊外。上下白塔之處。自巴爾托海至扁都口一帶。地方創修邊牆。築建城堡。則西番人等。肆行據攘之區。悉成內地。又肅州之西。桃賚河。常馬爾。鄂敦他拉等處。俱膏腴之地。應令民人耕種。布隆吉爾地方。修城駐兵。之後。可漸至富饒。至寧夏險地。無過於賀蘭山。顧實汗之諸孫及額駙阿寶等。向俱在山後居住。遊牧。今竟移至山前。請令阿寶等嚴飭所屬。仍照前在賀蘭山後居住。遊牧。則山前營盤水長流水等處。俱爲內地。均應如所請。一奏稱甘州等處。宜添設官弁也。查甘州。西寧。疆界相連。應於此二處。設立營汛。至於青海。巴爾處。鹽池。自古原係內地。後竟棄



爲塞外蒙古等至西藏噶斯等處必於此處經過應速取回於新設邊內大通河設立總兵一員兵三千名管轄中左右三營於大通南邊設立叅將一員兵八百名大通北邊設立遊擊一員兵八百名鹽池地方設立副將一員及左右都司二營兵一千六百名四川邊外單噶爾斯地方移鎮海營叅將駐劄兵一千名再拉科閣門等處各設守備一員兵二百五十名恒鈴子地方移南川守備駐劄兵五百名南川舊營留千總一員兵一百名至西寧地方宜改設同知移西寧通判駐劄鹽池令其辦理稅務再河州保安堡應設遊擊一員千把總各一員兵四百名歸德堡應添設把總一員兵二百名俱隸西寧總兵道員管轄則蒙古等不敢覬覦番民等亦有所依仗均應如所請。奏稱打箭爐等處亦宜添設官弁也查青海既已平定應將巴爾喀木處人等悉行收集除羅隆宗之東又木多

乍了地方俱隸胡土克圖管轄外其餘番衆頭目等俱應給與印信執照與內地土司一體保障打箭爐之外木雅吉達地方應設總兵遊守千把等官兵二千名雅龍江中渡處設守備一員千總二員兵五百名裏塘巴塘之吹音等處設守備一員兵二百名裏塘地處四衝應設副將一員都司一員兵一千二百名鄂洛地方各路咽喉應設叅將一員兵六百名巴塘係形勝要地應設遊擊一員兵五百名宗都地當雲南孔道應設叅將一員兵一千名俱令新設之總兵統轄以爲雲南四川兩省聲援又青海所屬左格等處番人應亟移於內地再阿巴之土司頭目墨丹住等帶兵進剿屢次建功應給與安撫司職銜不隸青海管轄又黃勝關外潘州舊城應設遊擊一員兵六百名河巴地方山河圍繞應設副將一員都司一員兵一千五百名黃河兩邊渡口應設守備一員兵三百名悉隸松



潘總兵統轄裏塘添設同知一員令其管理兵糧收納番民貢賦則南至滇省北至陝省俱可援助均應如所請一奏稱邊地弁兵宜歸併裁汰也查西寧地方設立總兵留兵四千即可敷用應裁五百名歸併於大通鎮屬甘涼莊浪等處其餘營汛兵丁可裁一千名寧夏既添駐滿兵其綠旗兵丁亦可裁汰一千改爲四營將後營遊守千把等員補入大通鎮標四川重慶川北二鎮應改設副將都司守備千把等員裁汰總兵官二員遊擊六員遵義夔州兩協遊擊各二員亦行裁汰化林副將一員額兵一千名應改爲遊擊一員留兵五百名均應如所請一奏稱邊內地方宜開墾屯種也查西寧邊牆內俱屬可耕之田布隆吉爾地方現在修築城垣請將直隸山西河南山東陝西五省軍罪人犯盡行發往大通布隆吉爾等處令其開墾查西寧本處人民與駐大通三千兵丁之子弟親戚情

願往種者正不乏人大通河地方不必發遣犯人惟布隆吉爾地方遠居邊外願去之人甚少應如所請行文刑部并直隸山西河南山東陝西五省僉妻軍犯內除盜賊外有能種地者即發往布隆吉爾地方令地方官動支正項錢糧買給牛具籽種三年後照例起科一奏稱番人部落宜加撫綏也今兵事已竣臣應遵旨回西安辦理三省事務暫令奮威將軍岳鍾琪駐劄西寧留兵四千名聽其管束其撫遠大將軍印信現今策妄阿喇布坦遣使請罪應俟撤回各路將軍時臣即行恭繳收貯內庫再甘州地方黃番各部落乘此軍威收聚撫綏亦可抵禦青海臣同岳鍾琪會商俟七八月馬匹肥壯時親率兵丁由西寧口外到甘州地方招撫番民均應如所請至年羹堯奏請禁約青海十二事一朝見進貢定有限期一不准自稱盟長一番子唐古特人等不許擾累一喀爾喀輝特圖爾古

特部落不許青海佔爲屬下。編設佐領。不可抗違。一。內外貿易。定地限時。以上六事。臣等已於善後事宜內議定。其餘六事。一。背負恩澤。必行勦滅。一。內地差遣官員。不論品級大小。若捧諭旨。王公等俱行跪接。其餘相見俱行賓主禮。一。恪守分地。不許強佔。一。差員商賈往過。不許搶掠。一。父沒不許娶繼母。及強娶兄弟之婦。一。察罕諾門汗喇嘛廟內。不可妄聚議事。均應如所請。得旨。所議甚屬周詳。依議。○己巳。諭宗人府。王府佐領分出之人。編設佐領。令其兄弟子姪管理。尚可。若以旗分之人。湊集編設佐領。令其兄弟子姪管理。朕意以爲非宜。雖係兄弟子姪。亦各有定分。宗室等豈可將他人之定分佔據乎。凡此等處。應行區別。宗室爲鎮國將軍等職。乃伊等分內之事。一爲佐領。竟成諸王之屬下矣。其宗室覺羅佐領。惟朕可以役使。若在王等門下。以供使令。王等既難自安。且多掣肘之

處理。應置之公中。令在上三旗行走。況閒散宗室內。亦有統轄旗分佐領者。王公理宜統轄屬下。閒散宗室。豈宜統轄屬下乎。似此者。亦應撤出。置之公中。王等果能爲國宣力。著有嘉行。朕自將佐領添增。賜給再公等之長輩。宗室陵侮幼輩。擾累伊等屬下之人。視爲泛常。公等亦不能相抗。任其所爲。其屬下人等。念係本公宗族之長。亦不便於首告。或千百之中。僅有一二發覺。爾其無辜受累者甚多。伊等行輩雖卑。亦係統轄屬下之人。若恃其輩長而陵侮之。可乎。擾累其屬下之人。又可乎。將此著宗人府一併詳議具奏。○諭刑部。朕從前並未認識七十。但聞其行止。今又適遇此事。七十常明馬爾齊哈等在王大臣家。往來鑽營。不但朕知之。舉國誰不知之。七十。在部中專主事件。平日又不安靜。今大臣等因朕一時之怒。請將七十正法。朕若日後追悔。大臣等亦不可當爾等會同議政大臣

三法司秉公詳議具奏如有不便畫一之處各抒所見另議具奏若不秉公議奏即是負朕之恩○工部遵旨議覆河道總督齊蘇勒疏言運河西岸地洞口一帶隄工地當頂衝隄身單薄應幫築五百十丈高寶江運河東西兩岸隄工關係漕運民生應幫築五千二十四丈寶應西隄七里閘迤南至柳園頭內臨運河外臨長湖舊埽朽爛單薄應幫築五百七十一丈俱應如所請速行興築從之○

庚午諭諸王大臣等德寧蒙

聖祖仁皇帝擢至大臣之列身沐

聖祖仁皇帝隆恩毫無圖報之心悠忽玩愒捏稱足疾希圖推諉並不効力行走深負

聖祖仁皇帝簡用之恩且素行不安本分鑽營允禩令伊子永端在軍前跪求允禩在侍衛班內行走永端既願與允禩効力著發往跟隨允禩再德寧前往江南時多方網利飽其私橐又聞伊曾有強佔人家產之事爾等可

將伊家產查明抵補虧空之項酌留伊養贍之資外其餘查明應行給還之人定議具奏德寧身為宗室而似此夤緣請託有玷天潢若不加懲創則衆何以知儆戒也○辛未諭工部聞前三門外溝渠壅塞積水泥濘行路艱難應作何疏濬務使居民便於行走爾衙門查明奏聞○貴州巡撫毛文銓摺奏黔省窮荒州縣請三年之內有稱職者督撫保題以應陞之缺即用奉

上諭貴州政務不甚繁劇且有邊俸推陞之例亦可使仕途不留滯矣若因其窮苦而特開新例恐他省咸欲效尤夫邊缺之苦豈止貴州一省况朕原有不次擢用之途以待賢員循吏如果有戢盜安民刑清政簡之能員該撫量才題請何待三年五載亦不須大計甄別之歲隨時舉薦以示鼓勵安用拘定成規以啟鑽營以滋口實耶

大清世宗敬天昌運建中表正文武英明寬仁  
信毅大孝至誠憲皇帝實錄卷之二十

大清世宗敬天昌運建中表正文武英明寬仁  
信毅大孝至誠憲皇帝實錄卷之二十一

監修總纂官光祿大夫經筵講官大學士領侍衛內大臣保和殿大學士吏部尚書理問兵部尚書戶部尚書加十五級

總纂官光祿大夫經筵日講官起居注太僕寺卿太子太保保和殿大學士吏部尚書理問兵部尚書戶部尚書加十五級

第三等伯加十五級

翰林院掌院學士加二級

經筵講官議政大臣協辦內閣大學士事務禮部尚書侍郎太常寺鴻臚寺寺正三系等奉

敕修

雍正二年甲辰六月壬申朔○甲戌諭刑部

向來盜案有滾案之弊強盜被獲審實定罪者於別府州縣或隣省未結案內賄囑他盜供稱同夥州縣官即關提質審一案甫畢一案復起名曰滾案輾轉相連動歷年歲或更中途脫逃遂使已結之案終歸未結劫殺大盜借此支延無所畏懼而州縣轉喜此等供扳可為獲賊過半之地附會了事此弊不除無以鋤莠安良爾部定例議奏尋議盜犯被獲審實之後陸續狡供又於某案行劫者槩

不准行。至其扳出夥盜之中。在別處已經審實定罪。不必提審對質。但行文問取口供。查兩案輕重。從重歸結。以杜藉案遷延脫逃等弊。從之。○以鑲藍旗滿洲副都統綽奇署正紅旗護軍統領。○以江西南贛總兵官宋可進署陝西涼州總兵官。○丙子。以裕親王保泰辦理禮部事務。吏部尚書舅舅隆科多兼理理藩院事。○丁丑。正紅旗滿洲副都統滿丕。年老休致。調鑲紅旗蒙古副都統富爾丹。為正紅旗滿洲副都統。陞一等侍衛喀爾吉善。為鑲紅旗蒙古副都統。○戊寅。戶部遵旨議奏。查江南浙江福建陝西四省。民欠錢糧。自康熙十八年起。至四十五年止。與應免之例相符。其四十六年。至六十年未完。乃係近年欠項。毋庸議免。得旨。五十年以前未完民欠銀共九十四萬一千六百餘兩。著概予豁免。○授廉親王允禩女為郡主。壻五福為和碩額駙。○己卯。陞鑲黃旗護軍叅領哲爾袞。

為正白旗滿洲副都統。○理藩院議覆。總管阿爾泰路軍臺宗查布奏稱。阿爾泰一路軍臺共四十七處。內除十二站照舊不移外。其自殺虎口。至扎克拜達里克城。所設軍臺三十五站。水草不佳。道路迂遠。請移在張家口外一路安設。應如所請。從之。○庚辰。以尊封聖祖仁皇帝皇貴妃。

貴妃

密妃

定妃

通嬪遣官祭告

太廟。

奉先殿。○刑部等衙門遵旨議覆。凡係鬪毆殺傷人者。律應抵償。因伊祖父母父母老疾。奏請留養。此係法外之仁。嗣後除謀殺故殺。不准留養外。凡戲殺誤殺。例應留養者。令該地方官酌量該犯情由。重者追銀五十兩。輕者三十兩。其貧窮無力之人。重者追銀二十兩。

輕者十兩。給死者之家資其養贍。如抗違不給。仍將該犯照原擬治罪。從之。○予故福建金門總兵官徐日昇祭葬如例。○辛巳。遣官齋冊寶尊封。

聖祖仁皇帝皇貴妃

貴妃

密妃

定妃

通嬪。○諭戶部。八旗給放米石。原係七月開倉。今因閏四月。恐食米不能接續。故特施恩。令六月開倉給放。但現今雨水之際。車價必貴。時又暑熱。其有願俟天晴路乾領米者。不必催促。仍照七月開放之限。將此傳諭八旗。及該部倉場侍郎。○以翰林院侍講蔡世遠。左春坊左諭德彭維新俱充日講起居注官。○吏部議覆。湖南巡撫魏廷珍疏言。湖北湖南鄉闈既分。教職亦請分選。查未分闈以前。就教舉人湖北共有一百五十四人。湖南止

有二十九人。若南北分選。湖南必致有缺無人。而湖北教職必多壅滯。請仍照舊例選用。俟用完日。將分闈後就教者南北分選。從之。○壬午。諭禮部。民間祈求晴雨一事。甚不合理。任意設壇。觸犯鬼神。聚集不肖僧道。妄行求雨。殊屬非分。只宜各存誠心。叩禱。何必種種作法。嗣後除奉旨外。或在寺廟誦經求雨。尚可。如私自設壇。借求雨之名。妄作法術。即以妖言惑眾治罪。○九卿議覆。戶部侍郎覺羅塞德奏稱。逃人之例甚嚴。而限期又迫。地方官員懼罪。故行隱匿。因而逃人反得潛藏。應如塞德所奏。嗣後逃人在該地方居住。已過一年。而地方官不行拏獲。將地方官降一級留任。十家長里長隣居及窩逃之家。俱照不應重律責三十板。完結不及一年者。俱各免議。儻過二年發覺。仍照從前定例治罪。如所居之家不知情者。免議。其逃人在所逃之處。置有家產者。將一半入官。在逃之單丁男

婦年過六十。或原有廢疾者。即未及六十。而伊家主願令爲僧道者。俱免照逃人例治罪。若逃出後。自改爲僧道。及故將其身殘毀者。仍照逃人定例從之。○癸未。大學士王頊齡以年老請致仕。得旨。卿學識優裕。品行端雅。增重巖廊。年雖耄耋。體素康寧。今力辭祿位。朕弗忍焉。即不獲已。而諒闇之年。卿其可不強留耶。蓋一日之留。勝千里之睽也。卿當少安。體朕眷舊之至意。○又諭內閣。諸老臣皆係

皇考簡用。貽朕之人。如因衰老休致。朕心不忍。大學士王頊齡著仍在內閣辦事。年邁之人。間時行走可也。○諭刑部。刑法上關

天和。下係民命。實爲政治之要。朕御極以來。讞斷必加詳慎。務期當罪而得其平。惟明克允。所以體

天心而重民生也。向來八旗官軍人等待家人。過嚴微小之失。甚至毆責斃命。奴僕雖賤。彼

亦人子。況性命攸關。何得任意荼毒。朕於刑部成獄。除強盜故殺謀殺等犯。不得不依律正法。其餘罪犯。畧有可恕者。俱行寬免。從未降旨特殺一人。朕大君也。於有罪者。尚不忍輕加刑戮。爲臣下者。乃可毆死無辜之奴僕乎。且奴僕奔走服勞。又性多愚暗。易獲過愆。全賴上人之矜恤。而原宥之。即有酗酒冒犯之處。應加懲治。亦不宜過重。致於死地。以逞一時之憤怒。該部即行文曉諭八旗。嗣後務宜待下以寬。不得擅自毆死家人。凡遇毆斃家人。詳其情罪。分作三等。定例議奏。尋議凡旗人奴僕。違犯教令。家主依法決罰致死。及過失殺者。仍照舊例。不論外。其官員違法責打奴僕致死。及持刀殺死者。分三等。定以罰俸降革鞭責。平人犯者。分三等。鞭責枷號。至官員平人有致死族中家僕者。各從重擬。八旗畫一遵行。從之。○命吏部尚書田從典。協理內閣大學士事務。左都御史朱軾。兼理吏

部尚書事務調戶部右侍郎景日昫爲禮部右侍郎。禮部右侍郎蔣廷錫爲戶部右侍郎。刑部左侍郎涂天相緣事降調。陞內閣學士黃炳爲刑部左侍郎。仍兼學士行走。○甲申。以軍前正黃旗蒙古都統蘇丹署理陝西西安將軍。奮威將軍四川提督岳鍾琪兼理陝西甘州提督印務。陞西寧總兵官楊啟元爲陝西固原提督。川陝督標中軍副將王嵩爲陝西寧夏總兵官。○乙酉。諭總理事務王大臣等。丁壽在軍前年久。朕欲調回另用。著議奏。尋議都統丁壽已自阿爾泰帶兵前往巴爾庫爾。現今已爾庫爾。有將軍富寧安吐魯番有都統穆森統兵分駐。請將丁壽帶往兵丁。交與將軍富寧安就近派大臣管轄。令丁壽馳驛來京。從之。○禮部題請撰擬平定青海碑文勒石國學。頒發直省。以昭功德。碑文曰。我國家受天眷命。撫臨八極。日月所照。罔不臣順。遐邇乂

安。兆人蒙福。乃有羅卜藏丹津者。其先世顧實汗。自國初稽首歸命。當時使臣建議。畀以駐牧之地。其居雜番羌。密近甘涼。我皇考聖祖仁皇帝睿慮深遠。每厯於懷。既親御六師。平定朔漠。威靈所加。青海部落札什巴圖爾等震讐承命。聖祖仁皇帝因沛殊恩。封爲親王。兄弟八人咸錫爵祿。羈縻包容。示以寬大。而狼心梟性。不可以德義化。三十年來。包藏異志。朕紹登寶位。優之錫賚。榮其封號。尚冀革心。緝寧部衆。而羅卜藏丹津昏謬狂悖。同黨吹拉克諾木齊阿爾布坦溫布藏巴札布等實爲元惡。謂國家方宏浩蕩之恩。不設嚴密之備。誕敢首造逆謀。迫脅番羌。侵犯邊城。反狀彰露。用不可釋於天誅。遂命川陝總督太保公年羹堯爲撫遠大將軍。聲罪致討。以雍正元年十月師出塞。自冬涉春。屢破其衆。凡同叛之部落。戈鋌所指。應時摧敗。招降數十萬衆。又降其



貝勒貝子。公台吉等二十餘人。朕猶閱其蠢  
愚。若悔禍思愆。束手來歸。尚可全宥。而怙惡  
不悛。負險抗違。乃決翦滅之計。以方畧密付  
大將軍年羹堯。調度軍謀。簡稽將士。用四川  
提督岳鍾琪。爲奮威將軍。於仲春初旬。禡牙  
徂征。分道深入。搗其窟穴。電掃風馳。搜剔巖  
阻。賊徒倉皇糜潰。窮威失據。羅卜藏丹津之  
母。及謀逆渠魁。悉就俘執。擒獲賊衆累萬。牲  
畜軍械。不可數計。賊首逃遁。我師踰險窮追。  
獲其輜重人口。殆盡。羅卜藏丹津。子身易服。  
竄匿荒山。殘喘待斃。自二月八日。至二十有  
二日。僅旬有五日。軍士無久役之勞。內地無  
轉輸之費。克奏膚功。永清西徼。三月之朔。奏  
凱旋旅。鐃鼓喧轟。士衆訢喜。四月十有二日。  
以倡逆之吹拉克諾木齊等三人獻俘

廟

社。受俘之日。臣民稱慶。伏念

聖祖仁皇帝威靈震於遐方。福慶流於奕葉。用

克張皇六師。殄滅狂賊。行間將吉亦由感激  
湛恩厚澤。爲朕踴躍用命。斯役也。芟夷凶悖。綏  
靖番羌。俾烽燧永息。中外人民胥享安阜。實  
成

先志。以懋有不績。廷臣上言。稽古典禮。出征而  
受成於學。所以定兵謀也。獻馘而釋奠於學。  
所以告凱捷也。宜刊諸珉石。揭於太學。用昭  
示於無極。遂爲之銘曰。

天有雷霆。聖作弧矢。輔仁而行。威遠寧邇。維  
此青海。種類實繁。錫之茅土。列在藩垣。被我  
寵光。位崇祿富。負其阻遐。禍心潛構。恭惟  
聖祖慮遠智周。睠念荒服。綏撫懷柔。朔野既清。  
西陲攸震。爵號游加。示之恩信。如何兇狡。造  
謀逆天。鼓動昏慙。寇侵於邊。惟彼有罪。自干  
天罰。桓桓虎貔。爰張九伐。王師即路。冬雪初  
零。日耀組練。雷響輦鉦。蠢茲不順。敢逆戎旅。  
奮張螳臂。以當齊斧。止如山嶽。疾如雨風。我  
戰則克。賊壘其空。彼昏終迷。曾不悔戾。當翦

而滅斯焉決計。厲兵簡將。往擣其巢。踰歷嶽。嘔垣若垠郊。賊棄其家。我繫而獲牛馬谷量。器仗山積。塞免失窟。何所遁逃。枯魚游釜。假息煎熬。師以順動。神明所福。旬日凱歸。不疾而速。殪彼逆謀。懸首藁街。獻俘成禮。金鼓調諧。西域所瞻。此惟雄特。天討既申。羣酋惕息。橐戈偃革。告成辟靡。聲教遐暨。萬國來同。惟我

聖祖親平大漠。巍功煥文。邁桓軼酌。流光悠久。視此銘辭。繼志述事。念茲在茲。○山西布政使高成齡摺奏。臣見內閣文出。請禁提解火耗之條。奏。臣伏思直省錢糧正供之外。向有耗羨。雖多寡不同。皆係州縣入己。但百姓既以奉公。即屬朝廷之財。賦臣愚以為州縣耗羨銀兩。自當提解司庫。以憑大吏酌量分給。均得養廉。且通省遇有不得已之費。即可支應。而不分派州縣。借端科索。至以羨餘賠補虧空。今撫臣諾岷將每年存貯耗羨銀二十

萬兩留補。無著虧空之處。先經奏明。臣請皇上敕下直省督撫。俱如山西撫臣諾岷所奏。將通省一年所得耗銀約計數目。先行奏明。歲終將給發養廉支應公費留補虧空若干之處。一一具摺陳奏。則不肖上司不得借名提解。自便其私。如條奏所慮矣。奉

上諭。此事著總理事務王大臣九卿詹事科道平心靜氣秉公持正會議。少有一毫挾私尚氣阻撓不公者。國法具在。斷不寬宥。各出己見。明白建議具奏。如不能畫一。不妨兩議三議皆可。○丙戌工部議覆河道總督齊蘇勒疏言。睢寧縣黃河南岸周家樓村大溜頂冲。應下埽加幫宿遷縣黃河北岸五堡內逼運道外臨黃河。應下魚鱗大埽。又竹絡汰黃等壩。西岸關黃運之門戶。應添築攔黃土堤。共工程長一千四百七十三丈。均應如所請。速行僱築。從之。○戊子。陞山西右衛右翼副都統吳禮布為山西右衛將軍。降右衛將軍覺

羅延壽爲山西右衛副都統。工部議覆直隸巡撫李維鈞疏言永定河堤岸柳岔口至王家園一帶內有淤塞一千一百丈請速行挑濬深通。又郭家務工堤係沙土幫築不能防護急溜請嚴飭專管分修官培築堅固均應如所請從之。湖廣巡撫納齊喀疏報彝陵宜都等三州縣開墾雍正元年分田地共二十二頃有奇下部知之。己丑兵部等部遵旨議覆武舉武進士作何銓選不令壅滯之處查每科武進士前半以營守備用後半以衛守備用。今衛守備之缺既經裁減嗣後請將衛守備用之武進士內再分十五名以營守備用於雙月營守備各班之末另立一班推補守禦所千總裁減之外存缺無幾舊例糧船回空隨幫千總以衛千總推用此等人員總漕稱爲明季世職子孫今既非世職應停其頂補請將揀選之武舉候推守禦所千總人員內頂補推用再裁缺之衛守備及

現任衛所千總應陞衛守備者請於單月營守備各班之末添設裁班相間輪補至衛千總領運有二百一十一缺加以邊衛千總照舊分隸則所裁衛千總之缺無幾應以候推衛千總之武舉照常銓選其裁缺另補者仍以衛千總原班補用守禦所千總裁缺人員亦應仍以原班補用從之。庚寅諭吏部直省督撫統轄屬員必中正和平推誠體察屬員有一善則獎勸誘掖以成之其微瑕小疵則多方訓導使之省改必至恬過不悛方據實題參如此始能激濁揚清於地方有益若妄自尊大暴戾恣睢甚而一言不當即加叱辱如四川巡撫蔡珽慢罵屬官以致重慶府知府蔣興仁憤激而死似此褊急任性不惟有乖大臣之體且恐屬吏相率顧畏阿順取容喪其氣節尚欲建立功名安可得乎爾部行文各督撫須仰體朕意正己率屬虛懷待下即檄行申飭亦無慢罵之理至尊卑相見

尤有一定典儀。毋得倨傲。致長詔誅之風。其部院堂官亦當和衷。俞受待屬員以禮。始不負朕委任之意。○湖南巡撫魏廷珍緣事革職。陞浙江布政使王朝恩爲湖南巡撫。實授佟吉圖爲浙江布政使司布政使。博爾多爲山東布政使司布政使。○辛卯。四川巡撫蔡珽題鎮雄土知府隴聯嵩故。請以其子隴慶侯承襲。下部知之。○壬辰。刑部等衙門奏。七十應即正法。得旨。七十行爲妄亂。應行正法。但朕自御極以來。除強盜故殺。謀殺人犯外。並未降旨特殺一人。七十雖應處斬。亦不足以當朕之初命正法之人。常明之惡甚大。皇考亦未加戮。但行發遣。後在發遣處仍復妄行。始行正法。七十著從寬免死。僉妻子發往三姓地方。若仍造言生事。妄作妄爲。則是伊自殺其身也。不可以彼地僻遠。謂朕聞見不及也。將此諭旨曉諭七十。○補行右衛雍正元年分駐防軍政年老官六員。有疾官四員。

才力不及官二員。分別處分如例。○癸巳。理藩院議覆都統拉錫疏言。察哈爾右翼四旗生計不足。請嚴捕積盜。以裕畜牧。應如所請。從之。○予故廣東總督楊琳祭葬如例。○甲午。諭五旗王貝勒貝子公等。凡王府等佐領下人。有用於部院者。有用於外省州縣者。王等宜爲國家得人。起見。獎成循吏。俾勤勞官職。竭力自効。王等亦與有光榮。乃反令其酷害地方百姓。侵尅錢糧。妄取財物。汝爲伊主。顏面置於何地耶。如王成勲。一州縣官。伊主星尼。一公爵耳。尚勒取銀兩數千。若屬於王府。而爲大員者。尚可問乎。今將王成勲一事遍諭五旗王貝勒貝子公等。嗣後儻仍不悛改。再有發覺。朕必將五旗王府佐領下人。一槩裁革。永不敘用。○衍聖公孔傳鐸奏報闕里。聖廟災。六月初九日申時。大雷電。火自鳩吻中出。

先師大成殿及兩廡俱燬

聖像神位移奉新建崇聖祠內幸得無恙得旨朕惟

孔子道高德厚爲萬世師表所以維世教立人極者與天地同其悠久朕臨御以來思極尊崇之典以申仰止之忱今闕里

聖廟被災豈朕尊師重道之誠有未至歟朕在諒闇之中素服齋居無庸更事減膳撤樂謹擬親詣國學

文廟虔申祭奠宣讀告文以展朕跼蹐不安之誠先期齋戒二日於二十七日不設鹵簿朕素服前往諸王大臣官員陪祀者亦皆常服從事仍遣官馳赴闕里告祭以慰神靈幸新建崇聖祠無恙

聖像神牌不至露處朕心稍寧遣工部堂官一員會同該撫作速計材料工擇日興修務期規制復舊廟貌重新告成之日朕將親詣行禮該部遵旨速行○陞直隸正定副將石

禮哈爲貴州威寧總兵官○戶部議覆戶部

侍郎塞德奏請設立井田查內務府餘地一千六百餘頃入官地二千六百餘頃應於此內擇二百餘頃爲井田將八旗無產業人內自十六歲以上六十歲以下者派往耕種滿洲五十戶蒙古十戶漢軍四十戶共一百戶各受田百畝周圍八分爲私田中間百畝爲公田共力同養公田俟三年後所種公田之穀再行徵取於革職大員內揀選二人勸教

管理三年分別議敘每年十月後農事既畢校園學射并令戶部派員往視設立村莊蓋造土房四百間計口分給其耕種之人每名給銀五十兩以爲置辦種粒牛具農器之用其井田地畝儻有旗民交錯之地請將附近良田照數給換從之○乙未達賴喇嘛班禪額爾得尼喇達克汗等遣使表貢方物○丙申戶部等衙門議覆直隸巡撫李維鈞疏言直隸正定府管轄三十二州縣知府實有鞭

長不及之虞。請改設直隸州分轄。將南宮、新河、棗強、武邑、衡水、五縣分隸冀州。栢鄉、隆平、高邑、臨城、寧晉、五縣分隸趙州。武強、饒陽、安平、三縣分隸深州。無極、藁城、二縣分隸晉州。曲陽、新樂、二縣分隸定州。直隸知州、照知府之例稽查各縣錢糧案件。其五州錢糧倉庫等項令直隸守道不時委員盤查。均應如所請。從之。○工部尚書李先復以衰老乞休。允之。○丁酉。宗人府疏奏貝子允禩將

聖祖仁皇帝配享儀注及封

妃金冊遺漏舛錯。應將允禩革去固山貝子。降一等。授爲鎮國公。從之。○陝西莊浪紅山堡報恩寺都綱閻老藏哈板旦進貢。賞賚如例。○戊戌。

上以闕里大成殿災。親詣國子監致祭。

先師孔子。○命都察院及八旗都統等申嚴官員等違越定制。前施引馬及馬項懸纓等禁。○閏家胡土克圖丹進扎木素進貢。賞賚

如例。○己亥。命禮部左侍郎王景曾往闕里告祭。○吏部議覆。禮部右侍郎三泰奏稱滿洲六科給事中。應令考選進士舉人出身之員。庶內稽六部事務。外察各省案件。俱各通曉漢文。辦事稱職。查滿洲給事中員缺。舊例由員外郎等官各按旗分論俸陞補。嗣後將進士舉人出身應陞科員之內閣侍讀六部員外。先行補授。其科甲出身之小京官。不便驟補科員。請仍照舊例補用。俟小京官轉至

應陞科員之時。再按旗陞補。則滿洲讀書之人。可以鼓勵矣。從之。○封科爾沁固山額駙拉錫協理旗分事務一等台吉噶爾弼俱爲輔國公。○庚子。諭江西巡撫裴率度地丁錢糧。百姓自行投納。此定例也。聞江西省用里民催收。每里十甲。輪遞值年。名曰里長催頭。小民充者有經催之責。既不免姦胥之需索。而經年奔走。曠農失業。擾民實甚。須即查明通行裁革。若慮裁革里長。輸納不前。亦當另

設催徵之法。或止令十里輪催。花戶各自完納。庶爲近便。務須斟酌盡善。無滋民累。以廣朕惠愛元元之意。○又諭。朕惟除莠所以安良。黜邪乃以崇正。自古爲國家者。綏戢人心。整齊風俗。未有不以詰姦爲首務也。聞江西地方。頗有邪教。大抵妄立名號。誑誘愚民。或巧作幻術。夜聚曉散。此等之人。黨類繁多。踪跡詭秘。苟不絕其根株。必致蔓延日甚。地方各官。儻務姑息。不行訪拏。是養姦也。澄清風俗之謂何。該督撫亟當嚴飭各屬密訪爲首之人。嚴加懲治。能去邪歸正者。則予以從寬。如有出首者。即酌量獎賞。務令萌蘖盡除。姦民屏跡。風俗人心。咸歸醇正。儻或仍前因循。不能查禁。事發之後。該管官一併從重議處。此等查禁之事。亦不必張大聲勢。以駭衆聽。惟當留心密訪。設法緝獲。祇將爲首者重懲。其餘被誘惑者。槩不深究。如此。方合朕意。假若不肖有司。借此恐嚇平民。波及無辜。則不

特無益而反有害矣。須飭諭屬員知悉。○陞陝西西安按察使王景灝爲四川巡撫。陝西洮岷道黃焜爲西安按察使。司按察使。○飭禁貴州省童生寄籍冒考。凡同省異府同府異縣。不得混行收試。從學臣王奕仁請也。○辛丑。撫遠大將軍年羹堯摺奏。據岳鍾琪報稱。進剿碁子山。桌子山。謝爾蘇屬下番賊。殺傷賊目班第馬牙。竝賊衆甚多。其餘皆敗奔山內。隨派署總兵官宋可進。統兵進剿。賊番頭目嘎住。帶領男婦老小。共一千一百六十二口來投。已准其投服。但仍居碁子山。恐日久生事。請移於土司魯華齡地方。令嚴行約束。其四川陝西綠旗土司官兵。俱已撤回。奏入。報聞。

大清世宗敬天昌運建中表正文武英明寬仁  
信毅大孝至誠憲皇帝實錄卷之二十一

大清世宗敬天昌運建中表正文武英明寬仁  
信毅大孝至誠憲皇帝實錄卷之二十二

監修總裁官光祿大夫經筵講官大學士兼兵部尚書總理事務加十五級臣弘明奏

總裁官光祿大夫經筵日講官起居注大學士兼兵部尚書總理事務加十五級臣弘明奏

事等因加十三級臣張廷玉光祿大夫經筵日講官起居注大學士兼兵部尚書總理事務加十五級臣弘明奏

翰林院掌院事加二級臣福敏光祿大夫經筵講官太子太保兼閣大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事臣三泰等奏

敕修

雍正二年甲辰秋七月壬寅朔享

太廟。

上親詣行禮○甲辰大學士等奏據松江提督  
高其位摺奏飛鴉食蝗秋禾豐茂請將原摺  
發抄竝宣付史館以彰嘉瑞得旨若以飛鴉  
食蝗為瑞則起蝗之初得無有由乎昨發下  
奏摺與諸王大臣閱看者誠恐爾等體朕憂  
民之意不釋於懷故將蝗不成災之處令眾  
知之非以為瑞也其發抄及宣付史館俱不  
必行○以副都統克什圖管理吐魯番等處



屯田事務○乙巳諭直省總督巡撫等引見月官內經朕改調人員特因地方緊要觀其人言動舉止似屬可用是以記名調用然必俟任事後方可定其賢否若督撫不實心訪察而因朕一時稱許遂爾優容任其恣意行事豈朕改調之意乎再揀選命往各省人員該督撫亦不可因係揀選之人聽其妄為不行糾參此等人係朕特用必當益加勉勵實心愛民方不負簡拔之意倘任意放縱有玷官箴即當從重治罪嗣後督撫題參官內有此等官員著將原係奉旨調用或揀選命往不思報効辜負擢用之處於參本內聲明○丙午川陝總督年羹堯疏奏寧夏地方向資渠水灌溉因渠隄日久失修奉旨令臣相度增築臣親至寧夏渠口中爲漢渠東爲秦渠西爲唐渠而唐渠之中向東分流者則爲我朝大清渠引水溉田不啻萬頃見在各渠尚無

倒壞漫溢即間有衝決修築甚易查寧夏設有水利都司專司修濬請俟秋收水涸查勘修理從之○丁未總理事務王大臣九卿科道等議覆山西布政使高成齡條奏提解火耗一疏得旨高成齡提解火耗一事前朕曾降諭旨令爾等平心靜氣秉公會議今觀爾等所議見識淺小與朕意未合州縣火耗原非應有之項因通省公費及各官養廉有不得不取給於此者朕非不顧天下州縣絲毫

不取於民而其勢有所不能且歷來火耗皆州縣經收而加派橫徵侵蝕國帑虧空之數不下數百餘萬原其所由州縣徵收火耗分送上司各上司日用之資皆取給於州縣以致耗羨之外種種饋送名色繁多故州縣有所藉口而肆其貪婪上司有所瞻徇而曲爲容隱此從來之積弊所當剔除者也與其州縣存火耗以養上司何如上司撥火耗以養州縣乎爾等奏稱各屬火耗請將分數酌定

朕思一省之內州縣有大小錢糧有多寡地廣糧多之州縣少加大耗已足養廉若行之地小糧少之州縣則不能矣惟大耗不定分數儻地方遇差多事繁之時則酌計可以濟用或是年差少事簡則耗羨即可量減矣又或偶遇不肖有司一時加增而遇清廉自好者自可減除矣若酌定分數則將來竟爲成額必致有增無減此大耗分數之不可以酌定者也又奏稱提解大耗將州縣應得之項聽其如數扣存不必解而復撥等語現今州縣徵收錢糧皆百姓自封投櫃其拆封起解時同城官公同驗看耗羨與正項同解分毫不能入己州縣皆知重耗無益於己孰肯額外加徵乎是提解大耗既給上下養廉之資而且留補虧空有益於國計若將州縣應得之數扣存於下勢必額外加增私行巧取浮於應得之數累及小民況解交督撫則顯然有據扣存州縣則難保貪廉此州縣羨餘之

不可扣存者也又奏稱巡撫諾岷清勤敏幹布政使高成齡操守亦優應令二人盡心商確先於山西一省照所奏試行之此言尤非也天下事惟有可行與不可行兩端耳如以爲可行則可通行於天下如以爲不可行則亦不當試之於山西譬如治病漫以醫藥試之鮮有能愈者今以山西爲試行之省朕不忍也且天下撫藩豈盡不如諾岷高成齡而謂二人獨能行之乎又奏稱提解大耗非經常可久之道凡立法行政孰可歷久無弊從來有治人無治法文武之政布在方策其人存則其政舉朕謂有治人即有治法法有因時制宜者譬如人有疾病因症投藥病愈即止今提解大耗原一時權宜之計將來虧空清楚府庫充裕有司皆知自好則提解自不必行大耗亦可漸減今爾等所議爲國計乎爲民生乎不過爲州縣起見獨不思州縣有州縣之苦上司亦有上司之苦持論必當公

平不可偏向。又朝廷之與百姓原屬一體。朝廷經費充足。民間偶遇歉收。可以施恩賑恤。百姓自無不足之虞。是清補虧空。於國計民生均有益也。天下督撫有如諾岷等不避嫌怨。實心任事。自能酌量行之。通省羨餘絲毫不能隱匿。又孰敢此外多取一錢。以干罪戾乎。朕於臣下。期望甚殷。卽州縣官員亦冀其爲臯夔稷契。自此各加勉勵。勿侵蝕國帑。勿貪剝小民。各省火耗。自漸輕以至於盡革。此朕之願也。爾等所奏與朕意不合。若令再議。爾等必遵朕諭議覆准行。朕亦不能保其將來無弊否也。各省能行者聽其舉行。不行者亦不必勉強。可將此諭旨。竝爾等所議之本。交存內閣。○諭兵部。嗣後文官在軍前効力者。卽著兵部議敘。永著爲例。○諭內務府。八旗滿洲蒙古漢軍內有賃住官房不能完租者甚多。著查明概行豁免。○雲南巡撫楊名時疏報開化廣西二府開墾雍正元年分田

地二十頃有奇。下部知之。○戊申。諭禮部。嗣後親祭

歷代帝王廟日鹵簿大駕俱由廟前映壁外行。○喀爾喀輔國公滾布扎布故遣官致祭。以其子沙克都爾扎布襲爵。○己酉。諭戶部。圓明園駐防官兵應領米石。若來京城支領。不無車輛之費。著行文倉場總督將應給米石備貯清河倉。便於給發支領。○庚戌。諭吏部。遠省州縣員缺舊例部選月官領憑赴任。每至需遲累月。甚而懸缺日久。署印屢易其官。以致遺誤地方不少。朕意將揀選舉人選期尚遠者。挑選命往各省聽候缺出。委用署事。至應選時。仍來京候選。庶遠省署事不致乏人。於吏治有益。爾部可定議具奏。尋議會試後下第舉人應取具同鄉京官印結。吏部揀選引見。發往雲貴川廣五省。委署試用。如果才守兼優。著有實效。該督撫保題於本省補用。平常者。咨部請旨。有情願會試者聽從

之○班禪額爾得尼遣使來賀

登極

上召見賜茶○辛亥

孝懿仁皇后忌辰遣官祭

景陵○諭總理事務王大臣等

皇考陵寢關係重大若照定例祇派總管等守

護朕衷實切不安朕意於朕兄弟內酌令一

人封以王爵子姪內二人封以公爵用代朕

躬居守

山陵從前已經降旨該部現在營造房屋隨酌

令郡王允禩代朕前往居住且諭允禩若欲

攜帶家眷前往亦聽其帶往既而奏伊福金

患病朕即降旨擇醫生之善者命往如若水

土不宜可來京醫治若必須允禩親看醫治

則允禩亦應據實陳奏且福金疾病竝非一

旦得之其病勢豈不能預知者乃今忽奏福

金患病奄逝現在照郡王例辦理外爾王大

臣等會同拉錫佛倫議奏尋議應照郡王例

辦理安葬黃花山允禩釋服後仍在祭祀處

行走從之○壬子諭戶部從前出口密雲縣

南天門渡船俱派令地方富戶預備似屬擾

累著行停止嗣後交與通州坐糧廳每一處

需用渡船幾隻照例預備應給水手工費著

倉場侍郎坐糧廳酌定支給○癸丑諭內閣

御前大臣侍衛等轉傳諭旨一字一語綸綍

攸關儻有字句舛訛之處所係匪輕若不記

載無憑查閱且原傳諭旨之人或遇他往更

難稽考嗣後轉傳諭旨之人各令繕錄一通

用印交與奏事人等記檔如係無印之人則

各用本人圖記於每月奏事處一併繕錄彙

奏○諭大學士及內務府總管等內閣中書

內務府筆帖式各員內有謹厚自好通曉清

漢文能善書者各揀選保舉二員六部筆帖

式內亦每部揀選保舉一員帶領引見具奏

○諭兵部各省副將以下遊擊以上官員未

經引見無由識認著令輪流來京朕親視其

漢仗弓馬。即可知其優劣。至伊等操守如何。訓練營伍如何之處。各省將軍督撫提鎮。於咨送引見時。據實密奏。○鑲白旗漢軍都統宗室佛格。緣事革職。以鑲黃旗漢軍副都統巴爾呼達署鑲白旗漢軍都統。○浙江巡撫黃叔琳疏報。象山等六縣開墾雍正元年分田地共一千一百頃有奇。下部知之。○甲寅山西右衛左翼副都統瓦哈禮。緣事降調。陞鑲白旗叅領穆禮庫為山西右衛左翼副都統。○怡親王允祥等遵旨議覆都統世子弘昇疏奏。丈量察哈爾右翼四旗地畝。共二萬九千七百餘頃。每年應徵銀十九萬餘兩。請設滿洲理事同知一員。駐扎北新莊地方。督管農民事務。並設滿洲千總二員。催糧稽察。再察哈爾西界窮山僻谷。易於藏匪。請再設滿洲理事同知一員。駐扎張家口。管理詞訟。稽查邊口出入之人。均應如所請。從之。○乙卯。以原任河南巡撫楊宗義為鑲白旗漢軍

都統。○丙辰中元節。遣官祭

永陵。

福陵。

昭陵。

暫安奉殿。

孝陵。

孝東陵。

景陵。○丁巳。諭諸王。貝勒。公。滿漢文武大臣官員等。朕即位後。於初御門聽政日。即面諭諸

王。文武大臣。諄諄以朋黨為戒。今一年以來。此風猶未盡除。

聖祖仁皇帝亦時以朋黨訓誡廷臣。俱不能仰體

聖心。每分別門戶。彼此傾陷。分為兩三黨。各有私人。一時無知之流。不入於此。即入於彼。朕在藩邸時。敬慎獨立。深以朋黨為戒。從不示恩。亦無結怨。設若朕當年在朋黨之內。今日何顏對諸臣。降此諭旨乎。

皇考深知朕從無偏黨必能保全爾諸臣名節故

命朕繼承大統今日大小臣工所以安然無事得享太平之福者皆我

皇考之恩賜也朕平日並未樹立黨援而登踐寶位爾等亦可知朋黨之無益矣夫朋友亦五倫之一往來交際原所不廢但投分相好止可施於平日至於朝廷公事則宜秉公持正不可稍涉黨援之私朕今御製朋黨論一

篇頒示爾等須洗心滌慮詳玩熟體如自信素不預朋黨者則當益加勉勵如或不能自保則當痛改前非務期君臣一德一心同好惡公是非斷不可存門戶之見即爾等彼此亦當互相砥礪時相訓誡行事共求當理諸一臣不負朕心則朕可不負

皇考付託之重朕之不負

皇考全在爾諸臣之贊成朕得為天下之令主也諸臣不負朕朕豈忍負諸臣乎朕之用人

加恩容有未當之處或不能自信至於治人以罪無不詳慎間有法外寬貸之處不令人知者即下一嚴旨亦求至當從未隨意輕加呵斥此朕可自信者也如七十之惡亂舉國皆知發遣在道竟寬其械繫臨行時王大臣內多有贈遺此朋黨未消之明驗也夫朕用一人而非其黨者嫉之罰一人而是其黨者庇之使榮辱不關於賞罰則國法安在乎嗣後朋黨之習務宜盡除爾等須捫心自問不可陽奉陰違以致欺君罔上悖理違天毋謂朕恩寬大罪不加衆儻自干國法萬不能寬朕雖未必盡行誅戮然或千人之中百人百人之中十人爾等能自保不在百人十人之列乎爾等務期斷絕黨私同心輔佐盡誠極言勿使朕躬有過此朕所厚望於爾等也凡人於朋友箴規尚不可背況君臣大義耶爾等當上念朝廷任用之恩下為身家子孫之計各勉之慎之

御製朋黨論曰朕惟天尊地卑而君臣之分定爲人臣者義當惟知有君惟知有君則其情固結不可解而能與君同好惡夫是之謂一德一心而上下交乃有心懷二三不能與君同好惡以至於上下之情睽而尊卑之分逆則皆朋黨之習爲之害也夫人君之好惡惟求其至公而已矣凡用舍進退孰不以其爲賢而進之以其不賢而退之或恐其所見之未盡當也故虛其心以博稽衆論然必衆論盡歸於至正而人君從之方合於大公若朋黨之徒挾偏私以惑主聽而人君或誤用之則是以至公之心反成其爲至私之事矣孟子論國君之進賢退不肖既合左右諸大夫國人之論而必加察焉以親見其賢否之實洪範稽疑以謀及乃心者求卿士庶民之從而皇極敷言必戒其好惡偏黨以歸於王道之蕩平正直若是乎人君之不自用而必欲盡化天下之偏私以成大同也人臣乃敢溺

私心樹朋黨各徇其好惡以爲是非至使人君懲偏聽之生姦謂反不如獨見之公也朋黨之罪可勝誅乎我

聖祖仁皇帝御極六十年用人行政邁越千古帝王而大小臣僚未能盡矢公忠往往要結朋黨

聖祖戒飭再三未能盡改朕卽位以來屢加申飭而此風尚存彼不顧好惡之公而徇其私暱牢不可破上用一人則相與議之曰是某所汲引者也於是乎遠之若浼曰吾避嫌也不附勢也爭懷妬心交騰謗口以媒孽之必欲去之而後快上去一人則相與議之曰是某所中傷者也親暱者爲之惋惜疎遠者亦慰藉稱屈卽素有嫌隙者至此反致其殷勤欲借以釋憾而修好求一人責其改過自新者無有也於是乎其人亦不復自知其過惡而愈以滋其怨上之心是朝廷之賞罰黜陟不足爲輕重而轉以黨人之咨嗟嘆惜爲榮

以黨人之指摘詆訾爲辱。亂天下之公是非。作好惡以陰撓人主予奪之柄。朋黨之爲害。一至是哉。且使人主之好惡而果有未公。則何不面折廷諍。而爲是陽奉陰違。以遂其植黨營私之計也。書曰。予違汝弼。汝無面從。退有後言。當時君臣告語。望其匡弼。而以面從後言爲戒。夫是故一堂之上。都兪吁咈。用能賡歌颺拜。以成太和之運。朕無日不延見羣臣。造膝陳詞。何事不可盡達。顧乃默無獻替。而狡獪叵測。蓄私見以肆爲後言。事君之義。當如是乎。古純臣之事君也。必期致吾君於堯舜。而人君亦當以堯舜自待其身。豈惟當以堯舜待其身。亦當以臯夔稷契待其臣。孟子曰。責難於君。謂之恭。陳善閉邪。謂之敬。吾君不能謂之賊。夫以吾君不能而謂之賊。則爲君者以吾臣不能亦當謂之忍。語云。取法乎上。僅得乎中。苟不以唐虞君臣相期待。而區區做法。僅在漢唐以下。是烏能廓然盡

去其私心。而悉合乎大公至正之則哉。宋歐陽修朋黨論。創爲異說曰。君子以同道爲朋。夫罔上行私。安得謂道。修之所謂道。亦小人之道耳。自有此論。而小人之爲朋者。皆得假同道之名。以濟其同利之實。朕以爲君子無朋。惟小人則有之。且如修之論。將使終其黨者。則爲君子。解散而不終於黨者。反爲小人乎。設修在今日。而爲此論。朕必飭之以正其惑。大抵文人掉弄筆舌。但求騁其才辯。每至害理傷道。而不恤。惟六經語孟及宋五子傳註。可奉爲典要。論語謂君子不黨。在易渙之六四曰。渙其羣。元吉。朱子謂上承九五。下無應與。爲能散其朋黨之象。大善而吉。然則君子之必無朋黨。而朋黨之必貴解散。以求元吉。聖人之垂訓。亦既明且切矣。夫朋友亦五倫之一。朋黨不可有。而朋友之道不可無。然惟草茅伏處之時。恒資其講習以相攸助。今既登朝莅官。則君臣爲公義。而朋友爲私情。



人臣當以公滅私豈得稍顧私情而違公義且即以君親之竝重而出身事主則以其身致之於君而尚不能爲父母有况朋友乎况可藉口於朋以怙其黨乎朕自四十五年來一切情偽無不洞矚今臨御之後思移風易俗躋斯世於熙皞之盛故兼聽竝觀周諏博採以詳悉世務且熟察風俗之變易與否而無知小人輒議朕爲煩苛瑣細有云人君不當親庶務者信若斯言則皋陶之陳謨何以云一日二日萬幾孔子之贊舜何以云好問好察此皆朋黨之錮習未去畏人君之英察而欲蒙蔽耳目以自便其好惡之私焉耳朕在藩邸時坦易光明不樹私恩小惠與滿漢臣子素無交與有欲往來門下者嚴加拒絕聖祖鑒朕居心行事公正無私故令繼承大統今之好爲朋黨者不過冀其攀援扶植緩急可恃而不知其無益也徒自逆天悖義以陷於誅絕之罪亦甚可憫矣朕願滿漢文武大

小諸臣合爲一心共竭忠悃與君同其好惡之公恪遵大易論語之明訓而盡去其朋比黨援之積習庶肅然有以凜尊卑之分歡然有以洽上下之情虞廷賡歌颺拜明良喜起之休風豈不再見於今日哉○諭刑部嗣後具題案內官員人等有一人於兩案犯罪而前案罪輕先行題結俟後案審明從重歸結者至後案從重題結之日仍將前案所擬輕罪敘入然後就本案所犯重罪按律定擬如前案已擬重罪後案之罪輕於前案者至後案題結之日亦必將前案所犯重罪聲明仍歸前案定擬如有數案犯罪者亦必將各案所擬應得之罪俱簡明敘入最後題結本章內○陞江南江蘇按察使張楷爲江西布政使司布政使浙江糧儲道徐琳爲江蘇按察使司按察使○喀爾喀扎薩克鎮國公烏巴什緣事革退以其弟完舒克襲爵○辛酉兵部議覆兵部侍郎牛鈕條奏江寧杭州荊州

京口廣州福州等處駐防兵丁請令學習水師勤加操演查京口現設戰船應令該將軍揀選兵丁二千名學習精熟於協領叅領防禦驍騎校內派出一半管轄操演其江寧等處並無戰船未便學習水師從之○壬戌兵部議覆阿爾泰一路派兵駐劄請派將軍一員駐劄察罕叟爾地方副都統一員駐劄扎克拜達里克地方開列大臣職名恭候欽點得旨鑲藍旗蒙古都統丁壽著為總領阿爾泰駐防兵丁將軍其副都統一員爾部另奏派往○調鑲藍旗滿洲都統伯四格為鑲藍旗蒙古都統以鎮國公普照為鑲藍旗滿洲都統○癸亥諭總理事務王大臣等副將軍阿喇衲在布隆吉爾病故朕甚惻然阿喇衲在軍前効力年久伊身原有精奇尼哈番著再賞一拜他喇布勒哈番并令伊子承襲或令其弟承襲俟阿喇衲靈柩到日議奏再阿喇衲遺本內請給伊父阿南達謚號亦著賞

給○工部議覆副總河嵇曾筠疏言鄭州大隄石家橋迤東一帶大溜南趨應於迎溜處下埽發椿加鑲高厚復於埽灣處加工鑲築再建磯嘴壩一座中牟縣拉牌寨黃流逼射應下護崖埽加工鑲墊建磯嘴挑水壩二座再將斷隄一道加幫接至大隄其穆家樓隄上坐當頂衝應下埽加鑲以資捍禦均請撥帑修築應如所請從之○甲子陞太僕寺少卿花善為理藩院侍郎○辦理船廠事務給事中趙殿最條奏船廠地方應建造文廟設立學校令滿漢子弟讀書考試得旨文武學業俱屬一體不得謂孰重孰輕文武兼通世鮮其人我滿洲人等因居漢地不得已與本習日以相遠惟賴烏喇寧古塔等處兵丁不改易滿洲本習耳今若崇尚文藝則子弟之稍穎悟者俱專意於讀書不留心於武備矣即使果能力學亦豈能及江南漢人何必舍己之長技而強習所不能耶我滿洲

人等篤於事上。一意竭誠孝於父母。不好貨財。雖極貧困窘迫。不行無恥卑鄙之事。此我滿洲人之所長也。讀書者亦欲知此而行之耳。徒讀書而不能行。轉不如不讀書而能行也。本朝龍興。混一區宇。惟恃實行與武畧耳。竝未嘗恃虛文以粉飾。而凡厥政務悉脗合於古來聖帝明王之徽猷。竝無稍有不及之處。觀此可知實行之勝於虛文矣。我滿洲人等。純一篤實。忠孝廉節之行。豈不勝於漢人之文藝。蒙古之經典歟。今若崇尚文藝。一概令其學習。勢必至一二十年始有端緒。恐武事既廢。文藝又未能通。徒成兩無所用之人耳。爾等理宜遵朕從前所降毋棄滿洲本習之諭旨。專令兵丁人等。各務實行。勤學武畧。以敦儉樸之習。何必留意於此等無有實效之處。以貳兵丁之心。強其所不能。而徒事於虛名也。此皆妄聽發遣人內稍能識字之匪類。不顧大體。肆言搖惑之所致耳。果能盡心

鼓勵。得材勇卓越者數人。以備朕之用。俾保障國家。收股肱之效。較之成就一二驚芳無能之生員。爲遠勝也。將朕所降諭旨。及此奏請之處。曉諭烏喇寧古塔等處人等。知悉。竝行知黑龍江將軍。共相勉勵。但務守滿洲本習。不可稍有疑貳。再通行京城八旗人員。知之。在京之滿洲人等。與盛京烏喇等處之滿洲不同。文武二藝。俱爲不得不學之事。如果二者兼優。朕必重用。但人之能精一藝者尚少。二者俱優。自必更少矣。儻不能造詣。是徒成一無用之人也。滿洲子弟。雖教以讀書。亦不可棄置本習。果有可學之子弟。務須加意教訓。俾其精詣優通。如不能望其精詣者。仍應令其學習滿洲之武畧。騎射。勿但崇尚文藝。以致二者俱無成就。而以滿洲之武畧爲可鄙也。惟我滿洲本習。純一篤實。忠孝廉節之行。所宜敦勉。○乙丑。復設太僕寺主簿一員。并給官房一所。爲太僕寺衙門。從兵部侍

郎兼理太僕寺事務伊都立請也○戊辰以左春坊左諭德彭維新提督浙江學政○陞江西南昌總兵官楊長春為浙江提督○庚午予故浙江提督鍾世臣祭葬如例

大清世宗敬天昌運建中表正文武英明寬仁信毅大孝至誠憲皇帝實錄卷之二十二

大清世宗敬天昌運建中表正文武英明寬仁信毅大孝至誠憲皇帝實錄卷之二十三

監修總裁官光祿大夫經筵講官太僕寺卿和碩大學士兼兵部尚書總理事務三等伯加十五級尋爾泰

總裁官光祿大夫經筵日講官起居注太僕寺卿和碩大學士兼兵部尚書仍兼管吏部尚書翰林院掌院

事三等伯加十三級臣張廷玉光祿大夫經筵日講官起居注太僕寺卿武英殿大學士兼吏部尚書仍兼管

翰林院掌院事加二級臣福祿光祿大夫經筵講官太子太僕寺卿和碩大學士兼禮部尚書加六級臣徐本光祿大夫

經筵講官議政大臣滿洲內閣大學士事務禮部尚書仍兼管太常寺鴻臚寺事上奏等奉

敕修

雍正二年甲辰八月辛未朔補行山西大同

鎮康熙六十一年分軍政不謹官四員年老

官二員有疾官一員才力不及官四員浮躁

官一員分別處分如例○壬申陞鑲藍旗護

軍統領袞泰為鑲紅旗蒙古都統○癸酉王

大臣等奏蒙恩頒賜

御製朋黨論訓誡諄切臣等共矢公誠敬謹奉

行

上召諸王大臣進見諭曰諸王大臣等所奏未

知衆意僉同否抑出於二三人之意而衆人

附名同奏者歟。今爾等既稱衆意，僉同朕心，深爲慰悅。爾諸臣但能如陳奏之言，實心奉行，不但朕之福，即

宗廟

社稷之福，亦爾諸王大臣之福也。朕受

聖祖仁皇帝付託之重，繼登寶位，朕之身上承祖宗之大統，爲天下臣民主。若朕居心行事，有一時一事，少存意見，即朕自輕其身。爾諸王大臣若尚存私見，是豈知君臣之大義乎？若因中有私心，尚懷疑畏，則又不知朕之甚者也。朕在藩邸時，光明正大，不立黨援，爲

皇考洞鑒。爾等即當以朕躬爲法。朕四十五年之內，旁觀甚明，在朝諸臣豈能無一瑕疵？朕俱寬宥。時時諄切訓誨，冀其改過自新。今日諸王大臣既在朕前，僉稱共矢公誠，並無異念。此言

天地

祖宗實鑒臨之。嗣後爾諸王大臣等果能同心

奉公協力襄贊

上天必加默佑，不但身受厚福，餘慶且及子孫。若或心懷異念，退而違背禍，必隨之。豈能倖免乎？朕惟望爾等一德一心，輔佐朕躬，爲天下令主。若朕行事偶有闕遺，爾等或面折廷諍，或密封陳奏，朕必嘉納。至諸臣中有誠心爲國者，衆人當敬禮優待之。其有心懷二三者，當警戒愧厲之，以期君臣交勉，共臻上理。庶今日諸王大臣所奏不徒託之空言也。願爾等共勉之。甲戌諭禮部鄉會試爲掄才大典，內外簾官子弟理應迴避，但跋涉數千里，志切觀光，既至京師，不得與試，深爲可憫。朕於上科特降諭旨，另行考校。然此只可暫行，不便普爲定例。今科凡官員入闈者，其子弟著一體應試。將試卷另封進呈。朕派大臣校閱遴選，庶人才不致屈抑。至於闈中謄錄試卷弊端甚多，其有賄囑者，則書寫精工，否則潦草舛錯，致誤佳文。著知貢舉及監試御

史嚴行申飭其謄寫不工者必重加責懲令其重寫竝令對讀官嚴飭各生悉心校對勿使字畫錯誤儻外廉官失於查察日後發覺將該管官員一竝嚴加議處○湖北巡撫納齊喀疏報蘄州公安等六州縣開墾雍正元年分田地一百四十頃有奇下部知之○乙亥撫遠大將軍年羹堯摺奏據岳鍾琪報稱副將張玉帶領綠旗土司官兵出口至歸德堡其雙蓬攢都澤蓋博拉等處番人頭目各帶屬下人投順又至薩喇地方分兵二路進剿拉扁上下二寨殺傷無數獮賊餘俱就撫照舊安插奏入報聞○陞吉林烏喇協領亨特爲阿爾泰防守副都統駐劄扎拜達里克地方○丙子以吏部尚書朱軾戶部尚書張廷玉爲會試正考官內閣學士福敏吏部左侍郎史貽直爲副考官○撫遠大將軍年羹堯奏報青海之事已定從前調集駐防涼州等處西安滿洲兵一千名柴旦木調回之察

哈爾兵一百名駐劄松潘之四川滿兵五百名駐劄甘州之鄂爾多斯土默特兵一千名駐劄山丹之大同兵一千名駐劄布隆吉爾之滿洲蒙古烏喇索倫察哈爾厄魯特兵二千名俱令原管將弁陸續統領撤回本處奏入報聞○丁丑秋分夕

月於西郊

上親詣行禮遣署理大學士戶部尚書徐元夢祭

先師孔子戊寅祭

大社

大稷遣果郡王允禮行禮○定親王以下輔國公以上護軍領催等額數親王護軍領催四十名馬甲一百六十名郡王護軍領催三十名馬甲一百二十名貝勒護軍領催二十名馬甲八十名貝子護軍領催十六名馬甲六十四名鎮國公護軍領催十二名馬甲四十八名輔國公護軍領催八名馬甲三十二名

刑部等衙門議覆條奏內稱官員虧空錢糧審係那移案內有多至數萬兩者或以罪止擬流而任意那用或以罪無遞減而故意不完請嗣後那移一萬兩以上至二萬兩者發邊衛充軍二萬兩以上者雖屬那移亦照侵盜錢糧例擬斬俱限一年全完免罪二年完者減二等三年完者減一等三年限滿不能全完查未完之數照例治罪應如所請從之○己卯

太宗文皇帝忌辰遣官祭

昭陵○調湖北按察使蔡起俊來京陞河南開歸道陳時夏爲湖北按察使司按察使○辛巳

太祖高皇帝忌辰遣官祭

福陵○陞鑲藍旗滿洲副都統綽奇爲本旗護軍統領○廣東巡撫年希堯疏報新寧縣潮州衛澄海所等十二縣衛所開墾雍正元年分田地五十七項有奇下部知之○壬午諭

刑部朕君臨天下常願無一夫不獲其所今年直隸河西務隄水畧有漫溢江西一二縣水發江南海嘯與浙江起蛟之處俱不成災其餘直省各州縣以及口外用兵地方俱田禾茂盛五穀豐收億兆樂生遂性咸受和平之福而秋審朝審情實重犯罹於典刑雖其罪本無可赦然朕心深爲軫惻爰體

上帝好生之心著將今年情實人犯停其處決以副朕欽恤至意○發下裁名奏摺叅劾浙

江巡撫黃叔琳徇庇鄉紳陳世倌杖斃民人賀懋芳又從前審理湖廣鹽務收受商人吳雨山賄賂又伊弟巡視臺灣御史黃叔瓚回京時路過浙江縱僕騷擾地方

上諭大學士等黃叔琳前差江南主試及任吏部侍郎時聲名頗好故用爲浙江巡撫自命下目屢次召見觀其神氣頓異言語浮泛跪聆訓旨總不安詳敬聽及到任後舉薦不公敷陳不當密摺奏請之事多屬支離朕頻降

嚴旨置若罔聞。今覽此奏。大概真確。事雖屑小。然初蒙委任。即如此肆志。將來放縱何事。不可爲。大負委任。黃叔琳著解浙江巡撫任。以布政使佟吉圖署理巡撫印務。其陳氏僕人黃叔璣兩案情由。著將軍安泰、佟吉圖審理。吳雨山一案。著李周望、塞楞額、噶爾泰審理。○癸未。諭八旗都統護軍統領等。護軍該班行走之處。稍覺繁密。朕非欲令兵丁等耽於安逸也。兵丁等不時當差。該班行走學習勞苦。亦甚善事。但差役過於繁密。恐誤伊等操練騎射。學習技勇。著挑選馬甲中優者。令署護軍行走。其馬甲原缺。由教養兵內揀擇委署。遇有護軍馬甲缺出。即由委署人內挑補。至於每旗應署幾人。及如何分令看守之處。爾等公同詳議具奏。尋議八旗每佐領應處。在馬甲內挑選署護軍三名。其馬甲缺將教養兵充署。護軍缺出。即由署護軍內挑取。如教養兵及餘丁內有較優於署護軍者。亦令

挑取。俟軍前護軍等回京。及學習長鎗之護軍等。嫺熟之後。當差行走。俱皆足用時。另行奏聞。從之。○封喀爾喀扎薩克一等台吉策凌旺布爲輔國公。○順天府府尹張令璜。恭進耜田瑞穀一莖。雙穗三穗四穗者共十八本。下部知之。○甲申。諭吏部。凡官員虧空錢糧倉穀。該管上司失於盤查。自應革職分賠。但定例虧空官員。審無侵欺入己之項。勒限一年內賠補。全完准以原職補用。而失察革職之上司。轉不得與本官一體開復。似屬可憫。嗣後虧空銀穀。限內全完。例應開復者。該督撫查明原叅失察之上司。一併題請開復。爾部即行文直省督撫遵行。○諭江浙督撫等。朕思天地之間。惟此五行之理。人得之以生。全。物得之以長養。而主宰五行者。不外夫陰陽。陰陽者。即鬼神之謂也。孔子言鬼神之德。體物而不可遺。豈神道設教哉。蓋以鬼神之事。即天地之理。不可以偶忽也。凡小而邱



陵大而川嶽莫不有神焉主之故皆當敬信而尊事。況海爲四瀆之歸宿乎。使以爲不足敬。則堯舜之君何以望秩於山川。文武之君何以懷柔百神。及河嶽。今愚民昧於此理。往往信淫祀而不信神明。傲慢褻瀆致干天譴。夫善人多而不善人少。則天降之福即稍有不善者亦蒙其庇。不善人多而善人少。則天降之罰雖善者亦被其殃。近者江南奏報上海崇明諸處海水泛溢。浙江又奏報海寧海鹽平湖會稽等處海水衝決隄防致傷田禾。朕痛切民隱憂心孔殷。水患雖關乎天數。或亦由近海居民平日享安瀾之福絕不念神明庇護之力。傲慢褻瀆者有之。夫敬神固理所當然。而趨福避禍之道即在乎此。能敬則謂之順天。不敬則謂之褻天。褻天之令顧可望綏寧之福乎。詩曰敬天之怒無敢戲豫。又曰畏天之威于時保之。朕固當朝夕惕不遑寧處以敬承天意。亦願百姓共凜此言。

內盡其心外盡其禮敬神如在以至誠昭事而不徒尚乎虛文人意即神意一念之感格自足以致休祥豈獨一鄉一家之被其澤哉。若百姓果能人人心存敬畏必獲永慶安瀾。著該督撫將此諭旨令地方官家喻戶曉俾沿海居民一體知悉。○停差巡視湖河御史○兵部議覆直隸馬蘭口總兵官范時綽奏言

陵寢近地設立紅椿之處應設弁兵巡查。今查東邊一帶靈溝窩與鮎魚關相近向有鮎魚關把總一員無庸添設應將鮎魚關兵丁每班撥出五名於靈溝窩分設一汛其窄道子應添設把總一員馬兵五名步兵十五名再有旁通徑路之檀帽山溝與大安口相近應撥大安口兵丁十名於檀帽山溝分設一汛。又鴿子塘係羅文峪把總管轄應撥羅文峪兵丁十名於鴿子塘分設一汛。大窪西香溝二處係鮎魚關管轄應各添設兵丁十名巡

查至西邊一帶。心思峪與黃崖關相近。向有黃崖關把總一員。無庸添設。應將黃崖關兵丁每班撥出五名。於心思峪分設一汛。惟楊柳溝有溝口二處。應添設把總一員。每溝口添設馬兵五名。步兵十五名。再有旁通徑路之十里河內連青陽嶺。與將軍關相近。應撥將軍關兵丁十名。分設一汛巡查。至大安口等五關弁兵。向屬三屯石匣副將管轄。但既係附近。

陵寢地方。請俱歸馬蘭鎮統轄。均應如所請。從之。○丙戌。安徽巡撫李成龍疏報。潁州太湖泗州衛等十四州縣衛。開墾雍正元年分田地七十三項。有奇。下部知之。○戊子。諭都察院。嗣後外省督撫。有懷扶私心。背法逞威。如蔡珽之逼死知府黃叔琳之杖斃無辜小民等事。給事中御史等若受其請託。賄賂瞻徇。隱瞞。經朕於別處訪聞。將都察院堂官一併議處。○陞雲南援剿右協副將署永北總兵

官紀成斌。為河南河北總兵官。○陞廣東廣州協領張可用。為江南京口左翼副都統。○刑部議覆署掌山東道監察御史許容條奏。秋審朝審民命攸關。九卿詹事科道有緊要公事。不能到班者。即知會刑部。不必列銜。請派滿漢御史各一員。在班稽查。其無故不到者。指名題參。應如所請。從之。○己丑。諭吏部。國家分理庶績。務在得人。道府州縣等官。尤屬要職。其有才幹素著廉潔。自持者。儻不得以時上聞。何以示勸。著於各省道府同知通判州縣等官內。總督保奏三員。巡撫保奏二員。布政使按察使各保奏一員。將軍提督亦屬本省大員。將所知者。亦令保奏一員。俱各密封保奏。不得會同商酌。此保奏內。不必將朕特用之員塞責。朕特用人員。有才守兼優者。不拘人數。亦另摺奏聞。俟朕降旨調取之時。再令來京引見。如保奏不當。日後劣蹟敗露。將保奏上司一併治罪。○又諭。恩詔內。漢

大臣廢生每因缺少壅滯不得補用著將年二十以上者查明人數請題考試其在外省有清願來京考試者亦著一體考試限明歲八月赴考○庚寅調河南巡撫石文焯署理浙江巡撫以河南布政使田文鏡署理河南巡撫○禮部議覆奉天府府尹鄒汝魯疏言臣遵奉

皇上詣學恩旨增定盛京入學額數奉天府學錦州府學請各加增五名滿字號加增一名

合字號加增二名應如所請從之○壬辰

上召諸王宗室等俱入諭曰書云克明峻德以親九族朕今續承

皇考聖祖仁皇帝大業若不首正宗室何以正天下萬民年來朕見宗室之習氣未善往往彼此視若仇讎交相陷害動輒語人曰彼與我甚不相合專欲陷我否則曰彼原與我有仇夫今日宗室皆是同

祖骨肉仇自何來此皆讒邪構聞其間令骨肉

生隙耳朕未登大位之光不但朕之兄弟宗室即八旗大臣官員竝無一人與朕有仇不特不與人結仇亦不與人結黨爾宗室等一家骨肉視若仇讎反將母黨妻族子壻及漫不相干之人視為至戚親密往來朕在藩邸有年與舅族皇后族及諸姻戚之家竝無一親密太過者且亦竝無與滿漢大臣及內廷執事人侍衛等一人交結親密往來者初時弟兄之內尚相往來自戊子年

皇考下訓旨之後弟兄之內亦竝無私相往來之處若有私相往來之事豈能掩人之耳目乎自前歲恭請

皇考臨幸花園弟兄畢集自後曾具饅招莊親王公允禩看花又曾具饅招誠親王因病不起又曾招恒親王怡親王果郡王達允禔出征時亦曾屢次具饅召之此外更無有也或有疑朕與二阿哥不睦者夫二阿哥為皇太子時乃國之儲君也二阿哥未得罪之先朕

但盡弟道臣道凡事敬謹因

皇考隆恩篤愛朕躬二阿哥恐有妨於已遂至以非禮相加然朕惟有盡己之道恭敬與順而已此皆衆所共知戊子年二阿哥得罪令伊保全者誰之力歟比時

皇考聖躬違和又有禁錮允禔拏問允禩之事朕忘身與家惟以

皇考爲念靡晝靡夜凡百躬親者四閱月欲報皇考隆恩於萬一

皇考灼知朕之爲人行事爰付大位蓋因朕心仁慈毫無朋黨偏私能明大義可以保全爾等之故也前歲十一月十三日

皇考賓天之後朕繼承大業授受之際中外敦寧以成國家之善慶夫宗室之惡習朕若明知而不爲整理仍聽爾等相仇相陷是負

皇考付託大業之意矣爾等內有背主鑽營結黨之人豈能逃爾等衆人耳目若果能努力改過自新頂戴君上殫心盡力於國家朕亦

必爲包容如蘇努等懷挾伊祖舊讎專意離間宗支使互有煩言人人不睦朕即位以來棄伊過惡格外施恩欲其改過從善伊等不從仍鑽營構亂毫不悛改朕當以國法懲之豈可容其如此乎爾等當念朕躬爲

聖祖之繼體承

太祖

太宗

世祖

聖祖天下

社稷之重朕爲今主羣生共享太平之福使感戴朕躬是即感戴

聖祖皇考也聖經云在止於至善朕望爾等偕至於善尤望爾等輔佐朕躬善益求善朕居大位勤念

皇考付託之重思日孜孜惟善是從施於有政以期兼善天下爾等當體朕此意各存善心各行善事朕若少有過失爾等各竭所知力

爲匡弼俾朕得爲今主誠使宗室之內無非善人善事以示天下後世豈不美哉昔爾宗室不能親睦相陷如仇幸遇

聖祖仁皇帝及朕躬概與包容百事消釋以有今日爾等自後當益相親相睦恪遵國法各守本分敬慎勤儉豈獨朕心歡悅天下之人誰不稱美而加尊敬乎如大阿哥允禔廉親王允禩郡王允禩貝子允禔俱不知本量結爲朋黨冀遂其志

皇考洞鑒此情禁錮允禔令允禩出征西寧置之遠地無知之人反謂試用允禩將定儲位允禩遂妄生覬覦盍亦思

皇考年高體弱置繼統之子於數千里之遠有是理乎伊等本係嫡親兄弟又結爲同盟示相親密鑽營內廷之人巧行賄賂收服人心家貧者陰與貨財好名者美言稱獎徧置耳目思欲待間乘時成伊大志此皆皇考所洞悉者也從前衆皆保廉親王爲皇太

子視爲奇人今朕封伊爲親王用之重地彼之所以報朕待朕者舉國皆知之伊先不知君臣之大義況其他乎因此朕即位以來離散伊黨令居遠地惟望伊等改悔前行不致生事罹於國法耳朕之仁愛至意上天知之朕躬非所惜但所居者

太祖

太宗

世祖

聖祖之位

社稷天下之所係也書曰以親九族九族既睦夫親之者朕也睦則在於爾等若不知大義擾亂國政朕雖曲加寬宥多方教訓爾等不悛不改朕亦無可奈何也夫人不知己之惡反以人之言其惡者爲仇又如子孫既知祖父所行之非理應勉修省乃以先世所仇益相仇恨庸懦者挾仇尚淺英雋者挾仇更深此等習氣實爲亂階亟宜省改凡人必言

行相合乃可嘉耳朕今嗣大位何者爲朕所行之事六部大臣外省督撫皆能遵旨奉行是即朕所行之事也朕下訓旨於爾等而爾等不能悛改舊習即朕之不能言行相合也俾朕之言行相合者在爾等爲朕努力矣爾等內有爲蘇努吳爾占星尼之幼輩者誠知爾等長輩之罪戾雖未能匡救於前但從此勤修善行不復繼其姦宄惡跡則庶乎其可也若聞此慈訓猶執祖父以來舊仇稍存報復之見其人適自取殃禍耳爾等敬識之尚其竭力自治能自治則皆善人矣又爾宗室等居家各宜守分節儉毋或侈費當以虛名僭稱爲戒爾等行事僭侈亦非美事貝子公等輒擬諸王官員間散宗室輒擬貝子公使其身果爲王貝勒而下人稱爲王貝勒宜也下人非分之諂稱於己何崇適足取人嘲笑耳朕初爲貝勒時人稱爲王輒爲報顏又爾等宗室如有讀書作文等事欲資講習當用

漢人中舉人進士此輩皆吾國家考取錄用之員其心本自無他有一種考試不中之人不安本分在外各處夤緣誘人不善從中覓利乃漢人中之賤流斷不可與之親近爾等敬識之朕望爾等克篤忠誠盡心効力凡知君臣大義者衆共敬之其有怨望搆亂不知君臣大義者衆共非之如此則善人知感愈加爲善惡人知恥思改其惡矣凡諸陰詭詐惡好結仇讎之習爾等返之於身有則速改無則加勉家庭之間崇實安分習武學文存敬慎勤恪之心行睦婣任卹之事朕所深望者誠實之人光明正大所深惡者作偽之人詭詐陰險爾等惟朕所望者是遵所惡者是戒福祿自至矣吾宗室甚衆果能和衷一體交相愛恤交相匡救各持大義爲子孫表範世世率由如此則我家庭之內和氣達於天地億萬斯年垂諸史冊我宗室之榮顯何如哉何爲守目前之陋習扶往日之微嫌而棄

千萬載之令名乎。況爾等雖固守此陋習，必無所益。堅挾此微嫌，必不能報。徒然犯法受辱，貽羞天下萬世而已。不虛朕此一番誠心訓誨乎。爾宗室等尚其誠服而力行之。朕不勝厚望。○授原任鑲白旗漢軍都統宗室佛格爲鎮國將軍。○癸巳，戶部等衙門議覆河南巡撫石文焯疏言：豫省開封府轄四川三十縣，河南府轄一州十三縣，汝寧府轄二州十二縣，地方遼濶，請改設直隸州分轄。將開封府屬之西華、商水、項城、沈邱四縣分隸陳州。臨潁、襄城、郛城、長葛四縣分隸許州。密縣、新城二縣分隸禹州。滎澤、滎陽、河陰、汜水四縣分隸鄭州。其原武、延津二縣均在河北原武縣就近歸懷慶府管轄。延津縣就近歸衛輝府管轄。河南府屬之靈寶、閿鄉二縣分隸陝州。汝寧府屬之光山、息縣固始、商城四縣分隸光州。直隸州稽查各縣錢糧案件俱照知府之例處分。至直隸州經徵錢糧令道員

不時盤查，均應如所請從之。○甲午，諭戶部：前因江浙督撫等摺奏七月十八十九等日驟雨大風，海潮泛溢，衝決隄岸，沿海州縣近海村莊居民田廬多被漂沒。朕即密諭速行具本奏聞賑卹。但思被災小民望賑孔迫，若待奏請方行賑卹，致時日耽延，災民不能即沾實惠。朕心深爲憫惻，著該督撫委遣大員踏勘被災小民，即動倉庫錢糧速行賑濟。務使災黎不致失所。其應免錢糧由畝即詳細察明請蠲。凡海潮未至之村莊不得混行濫冒。至於緊要隄岸衝決之處，務須速行修築，無使鹹水流入田畝。朕念切痼瘼，務令早沾實惠。該地方官各宜實心奉行，加意撫綏，俾凋瘵得蘇，生全速遂。以副朕勤恤民隱至意。○詹事府少詹事錢以瑄條奏闕里孔廟內外儒臣各宜捐貲修建，得旨：前聞孔廟被災，朕即降旨遣大臣前往作速估計。動支正項錢糧，擇日興工。務期規制復舊，廟

貌重新覽錢以瑄所奏內外大小臣工幼業詩書仰承聖澤各宜捐貲修建等語雖爲當理今有旨已令動支錢糧不必再令臣工捐貲但朕亦不便阻儒士之私情今直省府州縣

文廟學宮或有應修者本籍科甲出身現任之員及居家進士舉人生員平日讀聖人之書理宜飲水思源不忘所自如有情願捐貲不必限以數目量力捐出修理各該地方

文廟學宮並祭器等項其不願者不必強勒○禮部等衙門遵旨再議從祀

孔廟宜復祀者六人林放蘧瑗秦冉顏何鄭康成范甯宜增祀者二十人縣亶狄皮樂正子公都子萬章公孫赤諸葛亮尹惇魏了翁黃幹陳淳何基王柏趙復金履祥許謙陳澧羅欽順蔡清陸隴其八宗聖祠者一人張廵宜增置博士者四人冉雍冉伯牛子張有若此三十一人或親承訓諭遞衍源流或遠契

心傳倡明正學升諸從祀之列予以延世之賞人心公論皆爲允合得旨朕念先賢先儒扶持名教羽翼聖經有關學術人心爰命九卿詳議今諸臣參考周詳評論公正甚合朕心著依議行○禁武弁不得以私事役使屬下兵丁○增八旗滿洲蒙古廩膳生員增廣生員各四十名漢軍廩膳生員增廣生員各二十名從順天學政吳襄請也○乙未諭江南浙江江西湖廣山東河南督撫等漕船關係緊要朕前降諭旨除本船正副旗丁外其頭舵水手皆應擇用本軍庶各知守法不敢誤漕生事此雖係總漕專責然亦有關係地方之事爾等當嚴飭所屬糧道都司衛所等官務使清查什軍毋令隱漏規避頭舵水手作何更換換去之人作何安插毋令失所俱宜協同總漕悉心籌畫商確實力奉行以爲永遠之計○丙申遣官祭

歷代帝王○遣官祭城隍之神○以詹事府



少詹事錢以埏翰林院侍講黃鴻中修撰于振俱署日講起居注官○戶部等衙門議覆查倉御史張坦麟條奏倉場事宜三款一倉內人夫出入應取其連環保結給以腰牌以憑稽核一倉場盜米等弊應嚴飭監督及看守章京等不時查拏一大西中南二倉應裁汰舊設巡捕二名鋪軍一百四十五名添設披甲一百二十名行文八旗挑選令其巡邏查緝均應如所請從之○貴州提督趙坤摺奏處置神家苗機宜及請增定番一路額兵奉

上諭安靜近於因循振作近於多事迹雖相類而其實不同無事時不可多事有事時不可因循要在審觀時勢相度機宜而為之方能中其肯綮也若一味苟且彌縫置庶務廢弛而不問則爾等職任封疆之謂何然不熟思審處謀及始終而孟浪從事脫至有損國威則尤其不可者也總在爾等文武大員正已

率屬勤慎自勵誠以馭下公以考績營伍既皆整飭有司又復廉明則兵民和輯根本固矣果能若此遇此等愚頑苗獍或以德化或以威服胡令不行曷禁不止耶可與撫臣同心協力治理地方務宜夙夜敬謹精勤勿懈以革除習弊置黔民於衽席之安方不負朕諄諄告誡企望之殷也○給原任正藍旗都統馮國相拖沙喇哈番世職○旌表山西猗氏縣烈婦杜得福妻楊氏守正拒姦忿激自縊給

銀建坊入祠致祭如例○丁酉諭兵部營千總把總亦應給與封典其封號敕命該衙門擬擬具奏○禮部議覆都察院左副都御史江球條奏各省生員優劣應令學臣將舉黜之數於任滿日造冊報部各省捐納貢監應令學臣約束歲終將優劣造冊送部以便查核應如所請從之○兵部議覆山西巡撫諾岷疏言山西掌印都司一官專司督催屯糧兼轄衛所今衛所現在議裁錢糧刑名原係

藩臬二司兼理請將該都司及都司首領經歷一併裁汰應如所請並行令各省督撫照例查明議裁從之○戊戌諭兵部青海既平之後涼州莊浪所有賊番以次剿撫官兵効力歷著功勳今大將軍年羹堯等奏稱乘川兵回汛之便並將歸德至松潘口外一帶番族或剿或撫悉無梗化殊屬可嘉在事有功人員著於剿撫桌子山之外另行議敘○己亥大學士等奏言豐澤園

皇上躬耕田內收穫之稻一莖四穗者五本一莖三穗者四十五本一莖二穗者二百三本皆穗長盈尺珠粒圓堅前措田之內既見瑞穀之登今

御苑之中復覩嘉禾之獲此皆

皇上敬誠所感仁孝所孚上瑞嘉祥莫過於是祈宣付史館書諸簡牒報聞○庚子總理事務王大臣議覆倉場侍郎法敏奏言山東河南遞年輪辦運薊糧船乃係

陵督所關請令該省委員督押抵津之時坐糧廳會同通永道驗明米色即今地方官收受以免攙雜勒捐等弊應如所請從之○戶部議覆內閣學士巴錫條奏整飭州縣先宜革除陋規如派催里長有茶菓之名編審有酬勞之例迎春鄉飲均有謝禮應令各該督撫嚴行禁革違者叅處應如所請從之

大清世宗敬天昌運建中表正文武英明寬仁信毅大孝至誠憲皇帝實錄卷之二十三

大清世宗敬天昌運建中表正文武英明寬仁  
信毅大考至誠憲皇帝實錄卷之二十四

監修總裁官光祿大夫經筵講官太僕寺卿兼翰林院侍讀學士吏部尚書總理事務處第一等伯加十五級臣鄂爾泰

總裁官光祿大夫經筵講官起居注太僕寺卿兼翰林院侍讀學士吏部尚書總理事務處第二等伯加十五級臣鄂爾泰

事等伯加十五級臣張廷玉光祿大夫經筵講官起居注太僕寺卿兼翰林院侍讀學士吏部尚書總理事務處第三等伯加十五級臣鄂爾泰

翰林院掌院事加二級臣張廷玉光祿大夫經筵講官起居注太僕寺卿兼翰林院侍讀學士吏部尚書總理事務處第四等伯加十五級臣鄂爾泰

經筵講官議政大臣協辦內閣大臣掌書稽察部尚書仍兼掌太常寺鴻臚寺事臣等奉

敕修

雍正二年甲辰九月辛丑朔諭總理事務王

實錄卷之二十四

大臣等阿爾泰處軍事已竣著將軍功議敘  
將軍丁壽特給拜他喇布勒哈番世襲罔替  
議敘時仍照伊應得爵級歸併計算○諭兵  
部浙閩總督滿保摺奏衢州副將馬璘平時  
操演兵丁整理營伍俱好但年過六十兩耳  
重聽因令告退等語此奏殊屬未合營伍官  
弁理應論其居官之賢否人才之優劣不必  
拘其年力其平時能整理營伍操演兵丁耳  
雖重聽自當留任如居官無能惟知扣克糧

餉之員雖年力少壯亦當參處再出兵効力  
人員其年雖老尤宜體恤嗣後督撫提鎮於  
各營將弁中但視其居官之賢否及曾否効  
力不必因其年力少衰遽爾勒令解退○諭  
各省將軍督撫提鎮等朕前曾下諭旨各省  
自副將以下遊擊以上除地方有緊要事務  
及曾經引見之員外將儀表修偉素有聲名  
者每省陸續保送四五人輪流來京引見今  
河北鎮總兵吳如譯將伊該管官弁盡行送  
京引見以致地方無人營伍空虛殊非朕意  
嗣後各省應陸續保送每次不得過四五人  
將伊操守如何及整練營伍如何之處據實  
密奏其戰陣有功而筋力就衰者不必來京  
將伊練兵及操守之處亦據實密奏至陝西  
甘肅四川雲南現在辦理軍務不必來京引  
見○四川北總兵官王允吉以年老乞休  
允之○壬寅諭八旗都統等從前因八旗窮  
乏兵丁益甲器械不全賞銀置備若一時並

實錄卷之二十四

一

置價必昂貴。著於今年置一半。俟明年春季再置一半。查閱之時亦分二季查閱。昨世子弘昇奏鑲白旗盔甲器械俱已全備。此事辦得甚好。各都統等始則漫不經心。及聞置備。又一時催逼辦理。兵丁艱苦。價值倍增。著遵朕前諭行。○授故奉國將軍白努伊子噶林爲奉恩將軍。○癸卯諭戶部前往臺灣換班兵丁。俱在臺灣支給糧餉。伊等所留家口無力養贍。必至內顧分心。著將兵丁所留家口。每戶賞月米一斗。內地米少。即動臺灣所有之米。合算船價。僱運至廈門。交地方官按戶給發。務使均霑實惠。○又諭開例捐納。少助軍需。原屬一時權宜。非可行之久遠。

皇考曾屢言捐納非美事。朕繼承大統。亦以軍需浩繁。戶部供支不繼。捐納事例。仍暫開收。今仰賴

皇考在天之靈。西邊軍務將已告竣。即現有需用錢糧之處。爲數無多。著將戶部與陝西各

項事例。即行停止。其運糧赴巴爾庫爾與肅州所動西安藩庫銀兩。悉作正項報銷。○陞二等侍衛章桂爲

福陵總管。○宗人府遵旨議奏宗室覺羅等佐領。向在各王門下。者應俱歸上三旗。得旨宗人府議將宗室覺羅所管之佐領。在各王門下者。撤出歸併在上三旗行走。但伊等佐領內所有護衛官員。歸併後。作何補用。在上三旗作何當差之處。並未議及。況伊等佐領內所有護衛官員。並無過犯。豈可遽令解任。此處應行酌議。著交與八旗文武大臣。各出所見。每旗各爲一議具奏。尋議各旗撤出佐領內所有長史護衛典儀等官。俱交內大臣帶領引見。如何行走之處。候旨遵行。其前鋒參領前鋒侍衛護軍參領副參領署參領護軍校前鋒護軍人等。俱令於上三旗當差行走。其旗員部員及馬甲執事人等。俱令在各本處行走。從之。○內閣學士巴錫以年老乞休。

慰留之○甲辰戶部等衙門議覆兩江總督查弼納奏言江南爲財賦重地而蘇松常三府之州縣尤爲煩劇額徵賦稅款項繁多獄訟刑名案牘紛積爲牧令者即有肆應之才亦難治理請將蘇州府屬之長洲吳江常熟崑山嘉定五縣太倉一州松江府屬之華亭婁縣青浦上海四縣常州府屬之武進無錫宜興三縣各分立一縣庶得因地制宜之法又此三府舊設同知共六員通判共六員今應各裁去三員每府止留同知一員通判一員以捕盜者兼司防海管糧者兼司水利亦足辦理其長洲吳江崑山華亭婁縣青浦上海七縣舊有縣丞二員亦應各裁去一員新分之十三縣各設知縣一員典史一員將各該縣疆域田畝均勻分界一應錢糧刑獄案卷詳查分晰各歸所轄之處辦理均應如所請至於建立城垣工費浩繁江南雖有大市鎮率多溪河水港錯雜其間形局不能方整

應將新縣之官吏衙署各與舊縣同城而居如係附郭之縣所分者仍駐府城其學宮亦不必另建似爲省便從之尋定蘇州府長洲分縣曰元和吳江分縣曰震澤常熟分縣曰昭文崑山分縣曰新陽嘉定分縣曰寶山太倉州分縣曰鎮洋松江府華亭分縣曰奉賢婁縣分縣曰金山青浦分縣曰福泉上海分縣曰南匯常州府武進分縣曰陽湖無錫分縣曰金匱宜興分縣曰荆溪○江蘇布政使鄂爾泰摺奏七月十八十九兩日颶風迅發海塘衝決民廬倒塌溺死者衆海外崇明一縣被災尤甚已撥存留米一萬石又買米二千石平糶其餘州縣並詳明督撫量災之輕重發銀散給再查松江府屬之海塘土堤衝決三千六百七丈上海護塘衝決九百一十丈均應急爲搶築以防秋潮大汛請權動正項地丁給發堵築即以被災之民充役給以工食一舉而塘工民命並可兩全奉

上諭應如是行築堤之策甚屬良法去歲山東挑淺大得其益可核詳督撫題請舉行○乙巳

上御太和殿視朝文武陞轉各官謝恩○調正黃旗蒙古副都統額爾德爲鑲藍旗滿洲副都統陞正黃旗前鋒叅領費雅思哈爲本旗蒙古副都統○丙午調山東布政使博爾多爲江南安徽布政使司布政使安徽布政使董永芳爲山東布政使司布政使○戊申諭

兩廣總督孔毓珣據奏請於廣東開採以濟窮民朕發廷臣會議知昔年粵省開礦聚集多人以致盜賊漸起隣郡戒嚴是以永行封閉夫養民之道惟在勸農務本若皆舍本逐末爭趨目前之利不肯盡力畝畝殊非經常之道且各省游手無賴之徒望風而至豈能辨其姦良而去留之勢必至衆聚難容況礦砂乃天地自然之利非人力種植可得焉保其生生不息今日有利聚之甚易他日利絕

則散之甚難曷可不徹始終而計其利害耶至於課稅朕富有四海何藉於此原因憫念窮黎起見諭爾酌量令其開採蓋爲一二資生耳爾等揆情度勢必不致聚衆生事庶或可行若招商開廠設官徵稅傳聞遠近以致聚衆藏姦則斷不可行也○又諭爾任廣西巡撫時與提督韓良輔會奏大金蕉木等山礦徒地方官不能驅逐添調官兵防汛今廣西巡撫李紱摺奏有外省無籍礦徒流入蕉木山隨飭賀縣知縣會同富賀營守備帶兵三路並進驅入廣東又稱廣東梅崗宿塘等處礦徒梁老二聚集多人汎兵子弟亦多附和巡檢不能防緝等語據此廣東既有巢窟雖從廣西暫驅出境亦復何益此關係地方利害爾總督全粵宜會同兩省巡撫提督設法驅除解散毋因前曾奏請開礦小有回護以致慢忽因循且聞所聚礦徒已有名目

將來爲害不輕。非比一二窮民偷採。或可法外寬宥。斷宜速行嚴禁。解散無使滋蔓。督撫身任封疆。重寄職在戢暴安民。如應提調官兵處。悉心籌畫。而爲之不可姑息。省事貽害地方。務期整飭寧謐。以副朕意。○旌表直隸遷安縣烈婦馬成妻張氏。拒姦不污。被毆殞命。給銀建坊。入祠致祭。如例。○庚戌戶部等衙門議覆山東巡撫陳世倌疏言。濟南府轄三十州縣。兗州府轄二十七州縣。幅輳既廣。管轄殊難。請改設直隸州。分轄將濟南府屬之新泰、萊蕪、長清三縣。分隸泰安州。陽信、海豐、樂陵三縣。分隸武定州。利津、霑化、蒲臺三縣。分隸濱州。兗州府屬之曹縣、定陶二縣。分隸曹州。郟城、費縣二縣。分隸沂州。嘉祥、鉅野、鄆城三縣。分隸濟寧州。將泰安州、武定州、濱州、曹州、沂州、濟寧州。俱升爲直隸州。統轄各縣。一應考成。照知府之例處分。其泰安等三州錢糧。令濟東道盤查。曹州等三州錢糧。令

兗寧道盤查。均應如所請從之。○命賞給會試舉人盤費。雲南、廣東、廣西、貴州、四川、五省每人銀十兩。福建、浙江、江南、江西、湖廣、陝西、六省每人銀七兩。直隸、山東、山西、河南、四省每人銀五兩。○辛亥陞鑲紅旗護軍叅領達爾占爲鑲藍旗蒙古副都統。○命會試及順天鄉試元魁卷并錄二三場文進呈。○靖逆將軍富寧安摺奏。阿爾泰調來之盛京烏喇右衛察哈爾土默特兵二千名。交都統民敦。自巴爾庫爾起程。各回原處。奏入報聞。○壬子兵部議覆浙閩總督覺羅滿保疏言。嘉興之乍浦與江南洋面交界。請增設兵五百名。撥定海鎮戰船十隻。以副巡防。其兵數請於水陸各營內酌量抽撥。再磐石營馬兵既改爲水師。應將該營馬兵七十三名月餉改添爲水戰兵一百四十六名。其磐石營陸汛請改歸樂清營管轄。再鎮海瑞安二營俱改水師。請將二營馬兵二百二十四名改爲水戰



兵四百四十八名其鎮海營陸路穿山崑亭  
霽靄各汛請改歸提標左營管轄瑞安營陸  
汛請改歸溫鎮平陽營管轄均應如所請從  
之○裁陝西寧夏水利都司行都司成縣黃  
渚關巡檢各一員○癸丑諭戶部驍騎校護  
軍校雖係官員實與兵丁無異其通倉支領  
米石所用車價較多嗣後著於京倉支領○  
以原任湖南巡撫魏廷珍爲盛京工部侍郎  
○甲寅山西布政使高成齡摺奏地畝生息  
有常戶口貧富不等富者田連千畝竟少丁  
差貧民無地立錫反多徭役請照直隸新例  
將丁銀併入地糧官民兩便奉  
上諭此奏甚是今山東地方亦諭令踵行爾與  
撫臣繕本具奏將直隸行有成效之處引入  
可也○乙卯福建福州將軍宜兆熊摺奏駐  
防滿洲漢軍協領與在京叅領俱係三品副  
後在京副都統缺出請將駐防協領與在京  
八旗叅領一體較俸開列奉

上諭此奏甚屬公當朕自即位以來外省副都  
統缺出率多用駐防協領等陞補內外皆朕  
之臣工朕惟一視同仁簡拔其優者而用之  
耳○丙辰諭總理事務王大臣等原任總兵  
官劉俊傑等本應從重治罪朕思伊等若能  
改過仍可與國家効力是以寬其治罪發往  
軍臺如果實心効力朕仍加恩錄用儻怙惡  
不悛騷擾驛站朕必從重治罪著行文管轄  
驛站武格等三年之後將伊等到臺効力賢  
否據實奏聞再從前發往軍臺人員三年滿  
後將効力賢否之處亦據實奏聞或換或否  
候降諭旨○諭禮部今歲會試取中二百九  
十名朕茲續取硃卷著於本科榜後再行出  
榜○兵部議覆兩江總督查弼納疏言江南  
太湖口岸極多惟洞庭東山最爲緊要請將  
新設叅將一員駐劄其地左營守備應駐湖  
東南隅之簡村右營守備駐湖東北隅之周  
鐵橋千總二員分駐鮎魚口馬跡山把總四



員分防龜山、東山、鳳川、吳淞。其原防江南鳳川、吳淞之浙江把總改歸浙江防汛。江南西山地方仍令原駐西山之浙江遊擊巡防。再江南新添兵丁五百名，若於各營抽調未免汎廣。兵單請於提鎮以至千把親丁內撥補均應如所請從之。○戊午，禮部議覆條奏內稱孔氏子孫應於宗族內擇品學兼優者專司訓迪，與曲阜教官公同督課。

文廟樂舞音節及樂舞生衣冠俱宜照國子監畫一遵行。至先賢五經博士應襲職之子孫宜送禮部考試文藝，方者送監肄業三年。方准承襲。均應如所請從之。○己未，戶部議覆巡倉御史張坦麟條奏漕務六款。一、隨漕銀兩應於起運之日令該衛守備出具印領給與本運千總親赴該道衙門支領，以除預借扣抵之弊。一、漕船宜先時修脩，不得藉稱守候新丁以致遲誤。一、收兌時嚴察做斛飛芑走盪等弊。悉行除革。一、開兌後宜責成舵

工以防運丁盜賣糧米等弊。一、搭解漕欠務徵本色不得以米豆等雜糧抵充。一、清查過淮糧石不得借別船包米湊數盤驗以掩虧缺。俱應如所請從之。○戶部議覆兩江總督查弼納疏言：江南財賦甲於天下，款項繁多，地方遼濶，知府實難查察。請以鳳陽府之潁州、亳州、泗州、廬州府之六安州、蘇州府之太倉州、淮安府之邳州、海州、揚州府之通州俱改為直隸州，以潁上、霍邱二縣隸潁州，太和、蒙城二縣隸亳州，盱眙、天長、五河三縣隸泗州，英山、霍山二縣隸六安州，鎮洋、嘉定、寶山、崇明四縣隸太倉州，宿遷、睢寧二縣隸邳州，贛榆、沐陽二縣隸海州。如皋、泰興二縣隸通州。其直隸州一切考成俱照知府例處分。至潁州等四州錢糧令廬鳳道盤查，太倉州錢糧令蘇松糧道盤查，邳州錢糧令淮徐道盤查，海州通州錢糧令淮揚道盤查。均應如所請從之。○予故貴州大定總兵官張宏印祭

葬贈署都督僉事○辛酉諭總理事務王大臣等前降旨交總理處及各部院所議之事每致遲延宜定限歸結已經具奏遵行今又漸懈弛著再行徧諭各部院衙門及八旗務照前定限議結若所議之事或別有行查遲延者於滿限時聲明奏請凡奉旨交查之事著給一月限○諭內閣據河道總督齊蘇勒副總河嵇曾筠奏稱黃淮二水經過秋汛工程平穩齊蘇勒與嵇曾筠各率屬員將各處堤工搶修保固雖河水泛漲堤工俱各無虞甚屬可嘉齊蘇勒著給與世襲拜他喇布勒哈番嵇曾筠著加三級其河工實在効力勤勞顯著之員著察明造冊送部議敘○諭江南浙江總督巡撫等今歲七月中颶風大作海潮泛溢江南浙江沿海州縣衛所堤岸多被衝塌居民田廬漂沒朕軫念深切已降諭旨令江浙地方官亟行賑濟撫綏毋使災黎失所今被衝海塘若不及時修築恐鹹水灌

入內河有礙耕種爾督撫等著即查明各處損壞塘工料估價值動正項錢糧作速興工至沿海失業居民度日艱難藉此傭役俾日得工價以資餬口是拯救窮民之法即寓其中矣將此再行飭諭務期實心遵旨速行以副朕憂恤元元至意○以正黃旗漢軍副都統阿漢泰協辦正紅旗滿洲副都統事務○增河南省各學取進文童額數祥符杞縣太康陳州商邱永城鹿邑睢州安陽河內洛陽十一州縣向係大學照府學額各取進二十名陳留通許中牟西華臨潯濟源武陟孟縣溫縣偃師靈寶十一縣向係中學升為大學各取進十五名臨潯滎陽原武長葛四縣向係小學升為中學各取進十二名○壬戌諭湖廣江西河南山東安徽督撫等今歲各省秋成大有惟浙江江南沿海地方七月十八九等日海潮泛溢近海田禾不無損壞朕軫念災黎惟恐失所業經嚴飭各省督撫發倉

賑濟但蘇松杭嘉等府人稠地狹產米無多雖豐年亦仰給於湖廣江西及就近鄰省今沿海被災恐將來米價騰貴小民艱食湖廣江西地居上流河南山東二省接壤江南今歲俱各豐收安徽寧太等府屬亦俱收成豐稔著動湖廣藩庫銀買米十萬石江西藩庫銀買米六萬石運交浙江巡撫平糶動河南藩庫銀買米四萬石山東藩庫銀買米六萬石安慶藩庫銀買米五萬石運交蘇州巡撫平糶俱著速即辦理委員運送毋得怠緩遲誤○癸亥諭兵部各省副將以下遊擊以上官員輪流來京引見者朕皆賞給銀兩其雲南貴州四川廣東廣西福建六省路途甚遠尤與別省不同俱著令馳驛前來按品量給驛馬只照常計程行走不必因令馳驛過於急速○陞直隸正定副將丁士傑爲貴州大定總兵官廣西桂林副將高世定爲福建漳州總兵官○湖廣鎮總兵官戴良弼緣事

革職陞山東臨清副將董象台爲湖廣鎮總兵官○正白旗蒙古副都統薩哈查以病乞休允之○甲子給軍前工部侍郎綽爾岱拖沙喇哈番世職○以領侍衛內大臣公馬爾賽爲鑲藍旗滿洲都統○振武將軍傅爾丹疏報鄂爾齊圖果爾等處屯田收穫青稞麥糜共一萬一千石有奇下部知之○乙丑諭大學士九卿等朕前因兵部所奏年滿千總一事未詢定例誤降諭旨彼時大學士等應即詳陳其故使朕不致有誤今幸所降諭旨尚未發出朕已詢知定例儻朕知之不早勢必將發出諭旨追還更改殊妨政體皇考御極六十餘年諸事無不諳練朕在藩邸年久雖於羣情利弊事理得失無不周知至於國家政事有關定例者朕既經歷未久如何可比皇考其匡正之責實在爾等朕屢降諭旨君臣誼同一體即使人君不能容納臣下之言猶

當一心愛主極陳無隱。況朕自御極以來。痛懲逢迎之弊。諄諄以實心匡弼朕躬。期望爾等。君子之過也。如日月之食。其過也。人皆見之。及其更也。人皆仰之。朕之素性。不吝改過。苟自知其非。即於大廷廣衆之中。明言以改之。從無護庇粉飾之事。今爲年滿千總所降諭旨。爾等具悉成例。辦事有年。豈不知朕偶誤。總以逢迎緘默爲心。或是或非。聽朕爲之。而不言。則待朕者何薄耶。嗣後爾等各宜深悔前非。務思君臣一體之大義。竭誠殫慮。仰副朕懷。○諭吏部直隸各省。凡經徵督徵承催督催之官。知限期將屆。必催降革。因求上司調煩調簡。希圖巧脫者。有之。著行文各省督撫。嗣後如題請調煩調簡。官員須將伊等任內。有無承督事件。於本內聲明具奏。○陞湖廣荊州協領德爾本爲江南江寧右翼副都統。○喀爾喀車臣汗滾臣遣使進九白年貢賞賚如例。○予故鎮國公登塞祭二次。造

墳立碑。諡恪恭。○丙寅。靖逆將軍富寧安疏報哈密塔爾那沁地方屯田收穫青稞一千七百四十六石有奇。下部知之。○丁卯。孝慈高皇后忌辰。遣官祭。

福陵。○工部議浙閩總督覺羅滿保疏。覆御史錢廷獻條奏請開西湖東湖灌溉仁和錢塘海寧三縣田畝。查三縣之田皆賴上下兩塘河流灌溉。水源皆自西湖流注。自明季東湖壅塞。而西湖之流不能停蓄。三縣之田旱不兼旬。即憂枯槁。湖內舊址先被民人佔爲田蕩。妨礙水源。其納官銀糧爲數無幾。而所損於三縣民田者甚多。應請豁除糧額。盡行清出。其淤淺沙灘三千一百二十二畝。相應挑濬。城內之河通西湖之血脈。亦應酌量開濬。城外一帶河身及支港淤塞之處。應責成沿河各縣勸諭業主佃戶漸次開濬。至東湖實西湖蓄水之地。上塘庫水之源。自宋以來從未開濬。僅存湖址六百餘畝。竟同陸地。工程

甚大。非一時可以並舉。俟西湖工完再爲確  
議。運河四十餘里皆多淤淺。糧船出入田畝  
車戽最關緊要。急應疏濬。均應如所請。從之。  
○增福建省各學取進文童額數。閩縣侯官  
長樂。福清。莆田。仙遊。晉江。南安。惠安。同安。安  
溪。龍溪。漳浦。海澄。南靖。平和。南平。建安。甌寧  
建陽。崇安。邵武。長汀。上杭。永定。福寧。二十六  
州縣。向係大學。照府學額。各取進二十名。連  
江。福安。二縣。向係中學。升爲大學。各取進十  
五名。永春。德化。尤溪。三縣。向係小學。升爲中  
學。各取進十二名。○戊辰。靖逆將軍富寧安  
疏報。巴爾庫爾等處屯田收穫青稞一萬二  
千二百九十石有奇。下部知之。○己巳。復設  
江蘇蘇松巡道一員。從署江蘇巡撫何天培  
請也。

大清世宗敬天昌運建中表正文武英明寬仁  
信毅大孝至誠憲皇帝實錄卷之二十四

大清世宗敬天昌運建中表正文武英明寬仁  
信毅大孝至誠憲皇帝實錄卷之二十五

監修總裁官光祿大夫經筵講官太僕議政大臣保和殿大學士兼兵部尚書總理兵部事務三等伯加十五級臣鄂爾泰

總纂官光祿大夫經筵講官起居注太僕議政大臣保和殿大學士兼戶部尚書仍兼吏部尚書翰林院掌院

事三等伯加十三級臣鄂爾泰光祿大夫經筵講官起居注太僕議政大臣保和殿大學士兼工部尚書仍兼

翰林院掌院事加二級臣福祿壽光祿大夫經筵講官太子太僕東閣大學士兼禮部尚書加六級臣徐本光祿大夫

經筵講官議政大臣內閣大學士事務禮部尚書仍兼管太常寺卿領侍衛內大臣三等奉

敕修

雍正二年甲辰冬十月辛未朔享

于東來二一五

太廟

上親詣行禮○遣官祭

永陵

福陵

昭陵

暫安奉殿

孝陵

孝東陵

景陵○頒雍正三年時憲曆○壬申策試天下

貢士王安國等於

太和殿前制曰朕惟至治之世君臣一心一  
德郡縣大法小廉士尚躬行農勤力作用能  
盈廷師濟吏治澄清教化洽而休養備何風  
之盛也朕撫臨區宇夕惕朝乾冀內外臣工  
共襄治理以成郅隆之運意甚殷矣孔子曰  
臣事君以忠人臣必有公正無私之學乃克  
盡忠誠不二之心朕推心置腹以待羣下每  
延見廷臣必諄諄誥誡凡厥有位果能公爾  
忘私矢精白於隱微之地歟其何以交相儆  
勉共遵蕩平正直之王道也洪範稱有猷有  
爲有守吏治以操守爲本而非謀慮施設無  
以濟之朕慎簡大吏下逮守令皆務得人誠  
欲其興事慎憲有裨地方匪直潔己自好而  
已夫生事苦其紛更而避事必至隳廢操切  
患其滋擾而優容又至養姦何道而成明作  
惇大之治歟王制樂正崇四術立四教順先  
王詩書禮樂以造士其不帥教者有郊遂之

移寄棘之屏。而論其秀者。則升之司徒司馬。而人材出焉。夫士爲四民之首。必敦尚學行。以倡風化。今或務華鮮實。甚者器陵狙詐。豈漸摩化導有未至耶。抑崇德絀惡。所當勸懲互用歟。古者勸農有官。力田與孝弟同科。蓋農務若斯之重也。我國家休養生息數十年來。戶口日以蕃滋。而地畝止有此數。非講求農政。竭人力以盡地利。何以家給而戶足耶。朕欲地方大吏。督率有司。多方勸課。俾惰農盡力於作勞。曠土悉成爲膏壤。何道而可。夫朝臣絕黨援之私。則外吏從風。政多循績。士子勵廉隅之節。則小民務本。俗化敦龐。爾多士積學有素。其悉心以對。朕將親覽焉。○喀爾喀瓦齊賴巴圖土謝圖汗汪扎爾多爾濟及達什垂木丕爾託音。各遣使進九白年貢。賞賚如例。○癸酉。八旗大臣等議覆條奏內稱。佐領驍騎校等。係管轄兵丁之員。乃有借放重利銀兩。每月支領錢糧之時。勒令清償。

本科以致兵丁生計匱乏。請嚴行禁止。應如所請。嗣後除兵丁等自相借貸外。其佐領等借放重利銀兩。坐扣錢糧。概行嚴禁。違者議處。從之。○靖逆將軍富寧安疏報吐魯番等處屯田收穫麥糜五千五百四十石有奇。下部知之。○甲戌。戶部議覆兩廣總督孔毓珣條奏鹽政五款。一。竈價水脚宜增。請將埤商所增鹽包羨餘銀二萬兩賞給竈丁船戶。一。福建汀州府八縣例食粵鹽。其引課請專責知府彙總八縣協辦通融銷售。一。歸善等縣淡水等各塲產鹽甚多之處。請擇廉幹之員督收其實心辦事者。三年保舉議敘以示獎勵。一。潮州場鹽例配潮惠汀贛四府屬二十九縣。應有專員經理。請復設運同一員。揀選題補。一。請於兩廣運使衙門復設經歷一員。以供差遣。均應如所請。從之。○乙亥。上御太和殿傳臚。賜殿試貢士陳惠華等二百九十九人進士及第出身有差。○諭吏部八

旗世襲官員。如因罪革退。不准其子孫承襲。應令伊嫡親兄弟承襲。若無嫡親兄弟。即襲與親兄弟之子孫。如兄弟亦無子孫者。將原立勲績之處。及獲罪緣由。與原立功人之子孫。一併查奏。其應否承襲之處。俟朕閱定。如此。庶爲國家宣力之人。不至泯沒矣。○丁丑。漕運總督張大有疏。奏山東運河八閘內之得勝閘。至張莊閘。係十二里直河水。難停蓄。易致淺阻。請於兩閘適中之地。六里石地方。建築石壩一座。蓄水濟運。從之。○鑲紅旗蒙古副都統廣福。正黃旗蒙古副都統花色。以病乞休。俱允之。○戊寅。吏部遵旨。帶領明代後裔鑲白旗正定府知府朱之璉等六人。引見。得旨。朕遵。

皇考諭旨。仰體。

皇考聖心。於明代後嗣。特加曠典。封以侯爵。著將阿思哈尼哈番朱廷楸之嫡孫朱之璉。封爲一等侯。世襲。凡伊族內人丁。俱令入於正。

白旗。○己卯。添設山東運學額。取武童八名。從長蘆鹽政監察御史莽鵠立請也。○庚辰。以通政使司右通政王國棟。提督河南學政。○以鑒儀使伯欽拜。爲正黃旗蒙古副都統。陞正白旗叅領李桂。爲本旗蒙古副都統。一等侍衛常安。爲鑲紅旗蒙古副都統。○正藍旗蒙古副都統伍爾泰。緣事革職。陞鑲白旗護軍叅領常色。禮。爲正藍旗蒙古副都統。○工部議覆山東巡撫陳世倌奏。闔屬紳士。公捐修理文廟銀四萬兩。得旨。著動正項錢糧修理。此捐銀之處。不准行。○辛巳。鑲黃旗漢軍副都統韓永傑。緣事革職。陞鑲黃旗叅領岳興阿。爲本旗漢軍副都統。○癸未。諭九卿詹事科道。朕惟周禮有司勲之官。凡有功者。書名太常。祭於大烝。祭法曰。以死勤事。則祀之。凡以崇德報功。風勵忠節也。

太祖高皇帝肇造鴻圖。

太宗文皇帝式廓區夏。



世祖章皇帝奄有萬邦自創業以至定鼎將帥之臣致命立功者不少。

聖祖仁皇帝臨御六十一年中間殲滅三逆永清朔漠以及平定西藏臺灣雖天戈所指如疾風振槁而師旅之臣捐軀馬革及守土之官見危授命者所在多有。邇者青海蕩平西域効順然自用兵以來將士奮勇前驅亦有歿於行陣者。此皆盡忠報國之臣朕甚嘉之亦甚憫之。當於京城建立祠廟春秋妥侑其偏裨士卒力戰敵愾舍生取義者亦附列左右。用以褒崇大節揚表芳徽俾遠近觀聽勃然生忠義之心於治道亦有裨益。仍令翰林官纂其籍貫事蹟各爲立傳彙成一編垂諸永久。爾等悉心詳議具奏尋議凡文武諸臣臨陣捐軀守土授命以及偏裨士卒赤心報國奮不顧身者應令兵部詳查檔案行文八旗直省督撫將籍貫事蹟詳悉繕冊具奏其建祠之處應於京城內相度地方鳩工庀材。

建立祠廟製造牌位恭請欽定扁額擇日懸掛文武諸臣牌位安設正祠偏裨士卒牌位安設兩廡入祠日遣官致祭其每年春秋二次祭祀交太常寺備辦仍交翰林院詳查史冊立傳成編從之。○兵部議覆川陝總督年羹堯奏稱郃陽縣之東鄉夏陽川地方險阻最易藏姦請建築城堡設叅將一員守備一員千總二員把總四員兵八百名以便彈壓稽查應如所請從之。○甲申諭刑部朕繼承大統於各衙門事務無不加意詳察爾部之事尤有不同俱係民命所關豈可絲毫錯誤乃司官于灝勒可得審理冒領俸米一案將無辜之人妄行夾訊洵酷吏也凡用刑最宜詳慎必遇人命盜案其罪重者方可夾訊若其輕罪則斷不可用蓋執法不可不嚴存心不可不慈也即如審理此案初次訊問不明只須向通州細細察訪便可得實何得如此濫用重刑乎擬罪必按律例講求習熟方不

至於錯誤乃當閒暇之時置律例於不問臨時聽信書吏高下其手尚得謂之詳慎乎且司官有承審定招之責非實在能幹之員不能辦理于瀨勒可得據爾部堂官稱為中等夫中等者尚且如此下等者更可知矣傳諭各司官等須自己酌量年力精壯者尚可勉勵其年老殘疾不能辦事者當速告退勿得尸位素餐○戶部議覆正白旗滿洲副都統奇爾薩條奏八旗開檔併為義子人等嗣後不得越佐領認戶請仍留在本佐領下當差方不負原主養養之恩應如所請從之○丙戌以鑲白旗蒙古副都統阿齊圖署鑲黃旗蒙古都統○丁亥諭兵部奮威將軍岳鍾琪具奏副都統達鼐阿爾什總兵黃喜林王嵩孫繼宗營總蘇圖等統領大兵窮追羅卜藏丹津直至花海子拏獲丹津渾台吉及其妻子並招撫三十三家台吉當此口外水凍草枯之候官兵奮勇遠行甚屬可嘉自大將軍

以下著從優議敘官兵勞苦朕甚憫之一切馱載輜重馬駝必多損傷著查明免其賠補其軍營馬匹如有倒斃亦令領帑購買補數再馬兵每名賞銀八兩步兵每名賞銀六兩蒙古兵有隨軍効力者亦著奮威將軍按其行走効力等次應如何賞給之處確議奏聞○八旗大臣及步軍統領議覆條奏內稱京師外城七門俱係綠旗兵門軍看守請將每旗滿洲蒙古教養兵一體挑補查內九門每門漢門軍四十名嗣後請將漢門軍缺註銷其內九門門軍由滿洲蒙古教養兵內挑補外七門門軍將漢軍教養兵挑補再每門有千總二員嗣後千總缺出停其補授漢人將滿洲漢軍武舉並漢軍捐千總者補授從之○戊子戶部議覆福建巡撫黃國材疏言福泉漳三府及福寧州均兵多米少應奏給折色其興延建邵汀五府均米多兵少應將餘米運至省倉配給應如所請從之○己丑工

部尚書孫渣齊緣事革職陞甘肅巡撫綽奇爲工部尚書仍留肅州辦理軍需事務○實授陳王章爲江西南昌總兵官○庚寅禮部奏請冬至次日行禮得旨去歲冬至次日因聖祖仁皇帝配

天禮成頒詔是以御殿今年冬至次日著停止行禮○諭戶部兩淮巡鹽御史噶爾泰奏稱七月內海潮衝決范隄沿海二十九場溺死竈丁男婦四萬九千餘名口鹽地草蕩盡被漂沒朕心憫惻如同執熟著即動鹽課銀三萬兩委員分路賑恤務使得所不必該御史捐補其未完折價錢糧四萬餘兩悉行蠲免毋得仍稱帶徵名色致累見在窮丁該部遵旨速行至淮商運行鹽觔恐竈丁一時未能煎辦應作何接濟民食該部作速確議具奏尋議淮屬鹽觔缺乏請令該御史將癸卯綱未掣之引與壬寅未完之引酌量掣給除食鹽易銷之地照額給運外其食鹽難銷地方計其本年未能即

銷之數暫且扣存留備明歲不敷之用其甲辰綱補辦額引請分於乙巳丙午兩年置辦從之○陞一等侍衛玉柱爲鑾儀衛鑾儀使○欽賜舉人張泰基爲進士○宗人府題正黃旗宗室三等鎮國將軍兼拜他喇布勒哈番噶喇瑪呈懇照例兼併應將噶喇瑪所襲三等鎮國將軍仍加拜他喇布勒哈番授爲一等鎮國將軍從之○戶部議覆著河南巡撫田文鏡奏稱豫省兌運漕糧請將河北之彰德衛輝懷慶三府及陽武原武封邱三縣起運本色米一十萬四千餘石仍在衛輝五陵水次兌運外其開歸等五府一州折徵採買米一十五萬餘石自衛輝府至大名府小灘鎮沿河一帶地方不拘何處買米即於彼處交兌不必拘定衛輝小灘則兌運既屬便宜而漕船不致遲誤查河北三府三縣之糧向在衛輝五陵水次兌運應如所奏至開歸等處採買漕米該撫奏稱不必拘定衛輝小

灘恐沿路交兌漫無處所則駕運漕艘者有往來移候之苦辦買漕糧者開爭近避遠之端殊爲未便查衛輝至小灘經濬滑內黃大名四縣境其間沿河村落頗多巨鎮大市商販所集計運糧之船約三百隻莫若分定地方撥兌既有一定之所而糧米散於各處採買又可免牙行囤戶之弊矣從之○辛卯陞甘肅布政使傅德爲內閣學士兼禮部侍郎○陞陝西西安布政使胡期恒爲甘肅巡撫郎中諾穆渾爲陝西西安布政使司布政使陝西甘肅按察使彭振翼爲甘肅布政使司布政使陝西西安糧鹽道張适爲甘肅按察使司按察使○振武將軍傅爾丹疏報烏闌古木等處屯田收穫麥子四千一百七十石有奇下部知之○壬辰命陝西西安右翼滿洲副都統覺羅伊禮布來京以原任都統燾思漢爲陝西西安右翼滿洲副都統○癸巳諭直省督撫提鎮等從前題奏事件俱有部

費朕屢次降旨嚴禁今聞仍蹈前轍凡事不講部費不能結案各衙門書吏勢難枵腹辦事酌量稍給紙筆飯錢於理猶無違礙何得費至盈千累萬以遂小人無厭之求況各省大臣題奏事件俱朕親覽交部定議及議覆時朕詳覽獨斷在各省大臣何不自信甘受蠹役欺誑耶至會考府係朕新設特爲稽查各部諸弊以清錢糧之出入會考府王大臣朕可保其無受使費之理今聞有一二省畏懦不明之大臣另加一倍使用殊可痛恨嗣後著永行禁止若經朕查出與受一體治罪○戶部議覆直隸巡撫李維鈞疏奏直隸九郡豐收惟霸州東安大城武清玉田寶坻梁城所七州縣所田禾偶有淹損本年錢糧請緩至雍正三年帶徵應如所請得旨霸州等七州縣所被水村莊朕已諭巡撫李維鈞將倉糧發賑念此時小民生計維艱若將今歲錢糧歸於明歲帶徵則新舊之賦輸納於一年

之內勢難兼顧爾部行文該撫著將霸州等七州縣所被水村莊今年應徵錢糧內或應有蠲免之處詳查議奏以紓民力○甲午以詹事府詹事王圖炳充日講起居注官○以吏部右侍郎沈近思爲武會試正考官內閣學士吳士玉爲副考官○正紅旗滿洲副都統富爾丹以老病乞休允之仍給半俸○乙未理藩院議覆厄魯特多羅郡王額駙阿寶呈稱自伊祖顧實汗歸誠向附至今百年受聖祖仁皇帝隆恩安居樂業因青海兄弟妄亂生事致干

天討臣等理應一併殄滅復荷寬恩存留遊牧臣請於青海處賜閒曠之地居住管理青海人等不致復萌亂心等語查阿寶之父巴圖爾額爾克濟農和洛里自青海來歸封爲貝勒阿寶承襲後於平定西藏有勞封爲郡王應如王請見有貝子丹忠所居之地甚爲寬大即令阿寶駐牧并令大將軍年羹堯派員

齋餉助其移徙安插從之○撫遠大將軍年羹堯疏奏寧夏駐劄滿洲兵丁之處應設將軍一員副都統二員滿洲協領四員蒙古協領二員每旗滿洲佐領各二員蒙古佐領各一員每佐領下防禦各一員驍騎校各一員八旗共派駐防兵二千二百名又八旗應添步兵一千二百名左右兩翼添放防禦各一員令其管轄步兵看守城池倉庫於馬甲內擇其漢仗好者令爲前鋒再寧夏既駐滿洲兵丁應設理事同知一員從之○丙申諭諸王大臣等朕盡三年喪禮齋居養心殿聞裕親王保泰在家演戲及面詢之公然承認復任意妄奏大失臣節保泰性本昏庸並無爲國宣力之志雖勉強任用亦於國事無益著將伊所管宗人府禮部都統武備院及看守大阿哥等事俱行罷革伊子亦俱著革退朕登極時即將保泰加恩重用伊之三子俱格外優待保泰幼年在內廷行走

皇考令朕教其經書算法多方率領指示保泰受朕恩遇甚深乃自蘇努問罪以來即生異心其不知輕重如此朕特降此諭旨宣付起居注並令宗人府及諸王大臣等知之○諭內閣前因刑部尚書不得其人將阿爾松阿特加擢用乃受任以來無心効力朕勸之不聽懲之不畏令其總理天下刑罰大事於國事無益刑部尚書員缺著禮部尚書塞爾圖調補○增陝西省各學取進文武童生額數

文童鳳翔慶陽平涼三府蒲城華陰二縣及寧夏衛俱照府學額各取進二十名咸陽乾州鄠縣武功同州興平膚施清澗洛川寶雞城固興安州涇州安化會寧文縣伏羌秦安十八州縣涼州鎮番二衛俱升為大學各取進十五名三水商州安定葭州汧陽汧縣鎮原盛寧禮縣九州縣俱升為中學各取進十二名武童鳳翔平涼慶陽三府華州咸寧長安蒲城四州縣寧夏甘州行都司等衛各取

進二十名甘州同州興安固原咸陽鄠縣膚施岐山城固九州縣寧夏中衛後衛靈壽莊浪山丹肅州涼州靖遠八衛所各取進十五名商州藍田神木三州縣榆林永昌鎮番靖邊高臺鎮彝六衛所各取進十二名○丁酉吏部議覆太僕寺少卿繆沅奏稱新改直隸州稽查屬縣錢糧刑名與知府無異請令督撫於通省屬員內揀擇才能題請調補應如所請從之○又議覆川陝總督年羹堯奏言

甘肅之河西各廳自古皆為郡縣至明代始改為衛所今生齒繁庶不減內地宜改衛所為州縣請改寧夏衛為寧夏府其所屬左衛改為寧夏縣右衛改為寧朔縣中衛改為中衛縣平羅所改為平羅縣靈壽所改為靈州寧夏中路廳改為寧夏水利同知西路廳應仍舊駐劄中衛以資彈壓俱隸寧夏府管轄西寧廳請改為西寧府所屬西寧衛改為西寧縣碾伯所改為碾伯縣西寧通判專管鹽

池即爲西寧鹽捕通判西寧之北川應設一衛爲大通衛俱隸西寧府管轄涼州廳請改爲涼州府所屬涼州衛改爲武威縣鎮番衛改爲鎮番縣永昌衛改爲永昌縣古浪所改爲古浪縣莊浪所改爲平番縣莊浪同知經理茶務應仍其舊俱隸涼州府管轄甘州廳請改爲甘州府所屬左右兩衛改爲張掖一縣山丹衛改爲山丹縣高臺所改爲高臺縣以肅州之鎮彝所併入俱隸甘州府管轄其肅州衛事務即令肅州通判管理靖遠衛事務改歸靖遠廳管理所有衛所之守備千總及舊有大使三員悉行裁去均應如所請以上四府設知府四員經歷四員知州一員吏目一員知縣十四員典史十四員其大通衛設守備一員張掖縣添設縣丞一員至各處教職或添設或改移應令該督撫確查另議從之○封厄魯特多羅郡王和碩額駙阿寶之姪協理台吉功額喇卜坦爲輔國公○戊

戌二等公阿爾松阿緣罪革退以其伯音德襲爵○己亥諭兵部川陝進藏出口一應用兵之處倒斃騎馱馬匹著悉免賠補○廣東巡撫年希堯奏報暹羅國王入貢稻種果樹等物應令進獻并運米來廣貨賣其來船捐目九十六人本係漢人今皆求免回籍并爲奏明得旨暹羅國王不憚險遠進獻稻種果樹等物最爲恭順殊屬可嘉應加獎賚其運來米石令地方官照粵省見在時價速行發賣不許行戶任意低昂如賤買貴賣甚非朕體恤小國之意嗣後且令暫停俟有需米之處候旨遵行其壓船隨帶貨物一概免徵稅銀來船捐目徐寬等九十六名雖係廣東福建江西等省民人然住居該國歷經數代各有親屬實難勒令遷歸著照所請免令回籍仍在該國居住以示寬大之典○陞直隸巡撫李維鈞爲直隸總督○庚子萬壽節停止朝賀筵宴○遣官祭



福陵

昭陵

暫安奉殿

孝陵

孝東陵

景陵○遣官祭真武東嶽城隍之神○以正藍旗滿洲都統公音德散秩大臣夸岱俱爲正白旗領侍衛內大臣

大清世宗敬天昌運建中表正文武英明寬仁信毅大孝至誠憲皇帝實錄卷之二十五

大清世宗敬天昌運建中表正文武英明寬仁信毅大孝至誠憲皇帝實錄卷之二十六

監修總纂官光祿大夫經筵講官太僕議政大臣保和殿大學士兼兵部尚書總理兵部事務三等伯加十五級臣鄂爾泰

總裁官光祿大夫經筵日講官起居注太僕兼太子太僕保和殿大學士兼戶部尚書仍兼管吏部尚書翰林院

第三等伯加十三級臣張廷玉光祿大夫經筵日講官起居注太僕議政大臣武英殿大學士兼工部尚書仍兼管

翰林院掌院事加二級臣福敏光祿大夫經筵講官太子太僕東閣大學士兼禮部尚書加六級臣徐本光祿大夫

經筵講官議政大臣鴻臚內閣大學士事務禮部尚書仍兼管太常寺鴻臚寺事臣李紱等奉

敕修

雍正二年甲辰十一月辛丑朔○壬寅

上諭王貝勒公等悉有一定品制國家大典攸關不可稍有踰越亦不可過爲貶損各按品制遵行乃爲合理朕前爲貝勒時並無僭越之處後爲親王亦未有意謙抑惟遵國之制守己之分而已近聞廉親王允禩過爲貶損凡事俱減於伊爲貝勒之時至將引馬悉行撤去此伊專事詭詐巧取謙讓之名誑惑愚人邀其稱譽懷姦敗法心跡昭然將此曉諭諸王貝勒公等嗣後再有此等不按定制過



爲貶損。以取虛名。紊亂典章者。著宗人府。即行糾參。○以和碩額駙舜阿顏。總理

三陵事務。○調兵部左侍郎伊都立。爲刑部左侍郎。以正黃旗蒙古副都統伯欽拜。兼兵部侍郎行走。○陞內閣學士鄂賴。爲理藩院額外侍郎。○癸卯。諭禮部。考試繙譯舉人。不必分作三場。只須一次考試。一日一夜。量其所能。章奏一道。或四書或五經。酌量出一題。其優劣。便已可見。此考試。並無漢文。不必派漢大臣。再考試舉子。俱係八旗內人。其繙譯好者。衆所共知。即字蹟亦最易識認。伊等試卷。應行謄錄。著於六部各衙門。善書之筆帖式內。酌量足用。選取。令其謄寫。選中之卷。進呈時。再定額數。仍選備卷呈覽。其分校及巡察等員。亦俱照文鄉試例派用。○命莊親王允祿。總理宗人府事。信郡王德昭。爲左宗正。轉左宗正貝勒滿都護。爲右宗正。右宗正鎮國公德普。爲左宗人。左宗人輔國公訥圖。爲右

宗人。○甲辰。諭各省巡撫等。朕念商賈貿易

之人。往來關津。宜加恩恤。故將關差歸併巡撫兼管。以巡撫爲封疆大吏。必能仰承德意。加惠商旅也。但各關俱有遠處口岸。所委看管之家人。賢愚不一。難免額外苛求。及勒取飯錢等弊。稍不如意。則執送有司。有司礙巡撫之面。徇情枉法。則商民無所控訴矣。嗣後將上稅課之貨物。遵照則例。逐項開明。刊刷詳單。分發各貨店。徧行曉示。使衆皆知悉。其關前所有刊刻則例之木榜。務令豎立街市。人人共見。不得藏匿屋內。或用油紙掩蓋。以便高下其手。任意苛索。立法如此。自能剔除弊端。但爾等受朕委任之重。尤當仰體朕心。遴選誠實可信之人。以任稽查之責。必期商民有益。方爲稱職。○丙午。冬至。祀

天於

圓丘。

上親詣行禮。○遣官祭

永陵。

福陵。

昭陵。

暫安奉殿。

孝陵。

孝東陵。

景陵○停止次日朝賀○以戶部尚書徐元夢

為繙譯鄉試正考官。內閣學士福敏。兵部右

侍郎阿克敦。光祿寺少卿杭奕祿。為副考官。

○陞鑲黃旗滿洲副都統額爾錦。為本旗滿

洲都統○丁未。以正黃旗蒙古都統署陝西

西安將軍蘇丹。為陝西寧夏將軍。其子正黃

旗叅領蘇圖。為陝西寧夏左翼副都統。協辦

將軍事務。陞山西太原城守尉阿林。為陝西

寧夏右翼副都統○宗人府府丞吳梁。以年

老乞休。允之○戊申。以正白旗蒙古副都統

李桂。署正藍旗漢軍都統○戶部等衙門遵

旨議覆。積貯備荒事。將河南巡撫石文焯。山

東巡撫陳世倌條奏內酌議六條。一。民間積

貯莫善於社倉。積貯之法。務須旌勸有方。不

得苛派滋擾。其收貯米石。暫於公所寺院收

存。俟息米已多。建廩收貯。設簿記明。以便稽

考。有捐至三四百石者。請給八品頂帶。一。社

長有正有副。務擇端方立品。家道殷實之人。

以司出納。著有成效。按年給獎。十年無過。亦

請給以八品頂帶。一。支給後。每石收息二斗。

遇小歉之年。減息一半。大歉。全免其息。十年

後。息倍於本。祇收加一之息。一。出入斗斛。官

頒定式。每年四月上旬。依例給貸。十月下旬

收納。兩平交量。不得抑勒。一。收支米石。社長

逐日登記簿冊。轉上本縣。縣具總數申府。一。

凡州縣官。止許稽查。不許干預出納。再各方

風土不同。更當隨宜立約。為永遠可行之計。

應令各督撫於一省之中。先行數州縣。俟二

三年後。著有成效。然後廣行其法。從之○已

酉。諭怡親王允祥。外藩人等來朝。給以食物。

及其歸國。頒以賞賜。俱有定制。但該管官員。未免忽畧。遂使遠人不沾實惠。朝鮮國守職恪順。百年有餘。今琉球來使。亦甚恭謹。伊等歸國時。一切應賞之物。擇其佳者給與。務使得沾實惠。嗣後除理藩院蒙古賓客外。朝鮮。鄂羅斯。暹羅。安南等國。遣使來朝。所給食物。歸時所頒賞賜。爾會同該部辦理。或有應行加賞之處。酌量定議奏聞。○陞大理寺少卿須洲。爲宗人府府丞。○授一甲進士陳惠華。爲翰林院修撰。王安國。汪德容。俱爲翰林院編修。○加直隸總督李維鈞。兵部尚書銜。提鎮俱聽其節制。○賜滇省鹽井龍神靈源普澤封號。致祭一次。○免浙江仁和等十一縣。本年分水災額賦有差。○巴爾庫爾軍前副將軍鑲紅旗蒙古都統阿喇衲喪歸。遣官奠茶。並命八旗蒙古大臣出城往迎之。○庚戌。諭翰林院。選拔庶常。原以作養人才。今科進士。特加簡閱。取汪由敦。羊煥然。趙大鯨。于枋

姚璣。吳應枚。張泰基。程恂。諸錦。蔣振鷺。主峻。潘思渠。金相。吳龍應。陳浩。周長發。陳璟。謝朋。庚。王泰姓。周廷燮。開泰。李重華。朱陵。李清植。徐廷熙。趙晃。周吉士。程光鉅。顧贊。嚴源。肅。楊士鑑。吳兆雯。朱良裘。劉統勳。恒德。王廷琬。徐天麒。舒明。張聖訓。熊暉吉等四十員。俱著改爲庶吉士。并修撰陳惠華。編修王安國。汪德容。分別滿漢書教習。○以翰林院侍講學士德新。充日講起居注官。○調鑲黃旗漢軍副都統巴爾呼達。爲鑲白旗漢軍副都統。陞一等侍衛傅鼐。爲鑲黃旗漢軍副都統。○宗人府議奏。世子弘晟。屢次獲罪。俱蒙恩宥。今又訛詐銀兩。請革世子爲閑散宗室。令伊父和碩誠親王允祉。嚴加約束。從之。○八旗滿洲。蒙古都統等。遵旨議奏。寧夏地方遼遠。官員兵丁。有遣往之處。照例各給車輛口糧外。其驛站。舊例一百里爲一站。今應改八十里爲一站。至駐防兵丁各養官馬二疋。兩人共養

駱駝一隻。今既帶家眷前往。應添馬一匹。共給三匹。到時。仍著餵養二匹。此給與之馬匹。照前各折銀十三兩。令伊等自行置備。由殺虎口。過鄂爾多斯。進橫城口前往。再派理藩院章京二員。在鄂爾多斯東西交界處。各駐劄一員。禁止蒙古偷盜。約束兵丁所用口糧。應用四十日。自京支給二十日。至大同時。再給二十日。馬匹各給草束。蠶旗著工部支給。駝四十位。著大將軍年羹堯辦理。於明年四月內。八旗分爲八起。兩日一起起程。得旨。兵丁往口外行走。收拾帳房。鑼鍋等物。須得費用寬裕。馬甲每人著加銀三十兩。步甲每人著加銀十五兩。賞給○嚴禁兵民等出殯時。前列諸戲。及前一日。聚集親友。設筵演戲。○浙閩總督覺羅滿保疏報。臺灣生番蘭郎等四社。輸誠納貢。願附版籍。下部知之。○辛亥。諭總理事務王大臣等。五旗諸王所屬佐領。有移置者。其佐領下人內。如有感戴舊屬王。

不能舍去之處。令將情由奏明。其舊屬王等。有役使年久。不忍遣去者。亦著將情由奏明。候旨定奪。若既移置他王門下。無得仍在舊屬王處。夤緣來往。查出從重治罪。○以左春坊左贊善俞兆晟。署日講起居注官。○陞廣西潯州副將馮廷輔。爲浙江黃巖總兵官。○以巴林二等台吉桑里達。出兵有勞。授爲輔國公。協辦巴林旗務。○免陝西康熙五十七年至六十年。民欠地丁銀二十二萬餘兩。及糧草等有差。○壬子。諭大學士等。廣西地方。猺獞雜處。匪類不時竊發。踰山越嶺。難以擒緝。汎兵各守地界。不敢擅自越境。嗣後分防各弁。不論何標何汎。凡係附近處所。毋分彼此。互相應援。庶匪類不得潛藏矣。設兵原以衛民。設有匪類。自當彼此策應。協力擒緝。著廣東廣西督撫提鎮。公同酌議。嚴飭各營汎一體遵行。并傳諭直省督撫提鎮等。凡地方有此等事。當公同協力。不可以疆界爲限而

分彼此也○調吏部左侍郎已奏。為工部右侍郎。擢吏部郎中查郎阿。為吏部左侍郎。以工部右侍郎綽爾岱。為工部額外侍郎○以原任陝西榆林道楊文乾。署理河南布政使司布政使○陝西右翼漢軍副都統烏林帕休致。陞陝西西安協領金無極。為陝西西安右翼漢軍副都統○八旗漢軍都統等議覆。副都統岳興阿奏言。火器營操演。俱有圖式。請將進步連環。方營。團營。及各旗操演。八旗

漢軍合演。與大閱圖式。詳加議定。繪為定式。俾得按圖操演。應如所請。從之○湖南巡撫王朝恩奏報。岳州衛所屬地方旱災。雖據詳報。但臣履任伊始。未經確查。事關蠲免錢糧。動支倉穀。請俟勘明分數。題請賑濟。得旨。岳州衛田穀被旱情形。從前曾經署撫朱綱題報。差員確勘。已將該衛所屬地方實被旱災之田畝。應免錢糧分數。造冊呈送矣。王朝恩當如救焚拯溺。應散賑者。即行散賑。應免錢

糧者。即行奏聞。如俟再加確查。始行散賑。被災之民。寧可待乎。若謂錢糧緊要。民命尤屬緊要。有民始有錢糧。所奏甚屬錯謬。此事已經遲誤。嗣後再如此遲誤。定行治罪。將本發回。著嚴飭行○裁陝西潼關。榆林。靖邊等衛所守備。千總。及教職等缺。移華陰縣縣丞駐潼關。各衛所錢糧。歸併附近州縣管理。生童歸該管州縣考試。至潼關應支兵糧。就近改撥。令潼商道收支。從陝西巡撫范時捷請也

○予故輔國公普照。祭二次。造墳立碑如例○予故盛京禮部侍郎管色。祭葬如例○予故福建漳州總兵官陳棟。祭一次○癸丑

聖祖仁皇帝再期忌辰。

上命

皇四子弘曆祭

景陵○諭總理事務王大臣等。廉親王。存心狡詐。結黨營私。自朕即位以來。凡遇政事。首端阻撓。即如清查工部清片一案。廉親王以重

爲輕。以輕爲重。顛倒錯亂。其從前所犯應議之案。交宗人府議處者。不止數十事。朕俱曲爲寬宥。但切加訓誡。冀其改過自新。並未降一階。罰一俸。乃在廷諸臣。向爲廉親王所愚。反以朕爲過於苛刻。爲伊抱屈。此朕審察衆人神色而知之。一年以來。大小臣工。因廉親王貽累者甚多。乃甘受罪戾。毫無悔心。而廉親王亦恬然自安。竟不知愧。並不念及國法。稍加警懼。由此觀之。黨援終不能解散也。黨援必由衆人附和而成。若廉親王一人。何所恃而如此行爲乎。工部郎中岳周拖欠錢糧。廉親王私幫數千金。代伊完納。其意以爲他人凡事苛刻。而我獨優容加恩。不但邀結岳周一人。並令所管之人。無不感戴。如此沽名邀譽。竟不知其何意。岳周並非無力完項之人。昨伊將見銀二萬兩。請託大將軍年羹堯。薦伊爲布政使。年羹堯據實奏。朕用人皆出至公。此等小人。不止微倖妄進。並欲使朕

之聲名有玷耳。廉親王至今尚無改悔之心。諸臣復不醒悟。積習若此。何所底止。朕用是諄諄誡諭。儻諸臣洗心滌慮。盡改前非。則廉親王黨散勢孤。朕得以不傷骨肉手足之情。兼可無負

聖祖仁皇帝保全之恩。其令天下臣民咸知朕意。○諭內閣。九卿詹事。科道等。歷年戶部庫帑。虧空數百萬兩。朕在藩邸。知之甚悉。此乃國家經費所關。甚爲重大。故朕特令怡親王。管理清查。朕思康熙年間之虧空。此時不能清楚。儻雍正年間。又有虧空。將來亦復不便稽查。積弊相因。何以經國用而垂法紀乎。後經怡親王查出。實在虧空二百五十餘萬兩。深以追補爲難。請以戶部所有雜費。逐年代完。約計十年。可以清楚。此怡親王欲善爲歸結之意。朕思歷年經手。俱有堂司官員。當時任意侵漁。此時置之不問。令其脫然事外。國法安在。諭令交與戶部尚書孫渣齊辦理。孫

渣齊職司戶部。以致虧空如此之多。朕曲加寬宥。並未革職。只令伊查明經手官員量力派令完補。乃孫渣齊徇情庇護私人。又有曾瞎子一案。撻厥情罪。實不容逭。朕又念

先帝舊臣。不忍正法。將孫渣齊革職。其各員名下應追銀兩。照所派數目。作速追完。其餘一百餘萬兩。照怡親王所請。在戶部逐年彌補。若各員應行追完之項。將來仍不全完。則按律治罪。朕亦不能再寬矣。至於怡親王。欲上

補國課。下全衆員。多方籌畫。辦理此事甚屬可嘉。而無知嫉妬小人。反謂王過於苛刻。不但昧於天理。即人情公好之一念。何在乎。特諭爾等知之。○諭九卿大臣。及工部。上駟院兩衙門官員等。朕御極以來。令廉親王總理事務。凡伊所辦之事。皆要結人心。欲以惡名加之朕躬。從前令伊管理藩院時。伊將來京。科爾沁台吉等。不給盤費。盡皆逐去。致使科爾沁台吉等。哭泣而回。後令伊管理工部。凡

關係錢糧。應嚴追還項者。伊欲市恩。竟行寬免。應寬免者。反行嚴追。凡係小事。故作寬容。並不顧理之是非。大事有錯。便自承當。欲以抗違朕旨。前因工部郎中岳周。遲誤柴炭。廉親王既已題參。隨暗給銀二次。共一千七百兩。後又借與銀二次。共一千六百五十兩。以此施恩。欲收衆人之心。今岳周竟以銀二萬兩。許大將軍年羹堯求薦爲布政使。年羹堯奏聞。訊問各犯。皆吐實情。此乃廉親王有心玷朕之名。顯而易見者也。廉親王所作罪過。宗人府屢次議罪奏聞。朕皆寬宥。從無罰俸一月。降級一次之事。案卷俱存。歷歷可考。朕屢次降旨教諭。並不改悔。必欲擾亂國政。暗使銀錢。惑買人心。朕不使允禩。允禔。允禔等過於富厚者。爲此故也。允禩居心行事如此。爾諸大臣。定已盡知。惟是工部上駟院兩衙門官員人等。恐不知廉親王之居心。姦詐。一墮其術中。便爲所累。朕豈忍以兩衙門之臣

下。爲伊所愚弄乎。用是再加曉諭。非令爾等每事與伊抗拒。但令爾等於辦事効力之處。一歸於正。勿被伊引誘惑亂而已。若廉親王允禩。果將好官保題。朕亦錄用。題叅者實係不好。朕亦治罪。如有無知小人。受其引誘。入其黨與。朕必治以重罪。後悔無及。○以鑲藍旗護軍統領綽奇署理步軍統領。○甲寅。諭工部。

陵寢所需物料。典禮攸關。理應敬謹遵照辦理。

允禩等議稱

陵寢所用紅土。折銀發往彼處採買。可省脚價。此特允禩存心陰險。欲加朕以輕

陵工而重財物之名也。此議豈可准行。所用紅土。著仍在京採買好者。運送應用。如有不肖官員。串通部員。不將紅土領運。折銀攜往本處採買。定行從重治罪。○以故輔國公普照子恒冉襲爵。○以江南學政法海爲浙江巡撫。○調陝西西安巡撫范時捷來京。以署浙

江巡撫石文焯。爲陝西西安巡撫。○以翰林院侍讀俞兆晟。提督江南學政。○吏部議覆。兵部尚書孫柱條奏。部院漢司官指缺補授之後。該堂官試看才具。分別司分繁簡。引見調補。其見在司官有人缺不稱者。亦照此例。應如所請。從之。○乙卯。

上御太和殿視朝。文武陞轉各官謝恩。次琉球國使臣行禮謝恩。○陞鑲藍旗護軍統領綽奇。爲正黃旗蒙古都統。調鑲紅旗漢軍都統吉當阿。爲本旗蒙古都統。以軍前署副將軍都統護軍統領噶爾弼。爲鑲紅旗漢軍都統。陞王府長史阿三。爲正紅旗滿洲副都統。以鑲紅旗滿洲副都統泰布。署本旗蒙古都統。○調廣西布政使劉廷琛來京。以福建布政使黃叔琬。爲廣西布政使。司布政使。陞福建按察使秦國龍。爲福建布政使。司布政使。巡視福建臺灣御史丁士一。爲福建按察使。司按察使。○議敘川陝官弁安藏功。給原任山



東登州總兵官今陞鑾儀使李麟拜他喇布勒哈番。餘靖海侯施世藩等。各給功牌。加等授銜有差。○廣西巡撫李紱題奏。墾荒事宜。得旨。李紱條奏墾荒六款。請動支捐穀。爲開墾之費等語。朕觀其意。不過爲開銷廣西昔年捐納穀石之計。此項捐納之穀。原係陳元龍。王沛懷經手。其間有名無實。首尾不清之處甚多。朕知之最悉。李紱難於料理。故借開墾之名。以爲開銷虧空之地。可著陳元龍。王沛懷。前往廣西。將此項徹底清楚。儻有不清。著李紱據實叅奏。○吏部議覆雲貴總督高其倬疏。言彌勒州人烟漸稠。嵐瘴漸息。請停調補例。開化廣西二府瘴雖漸減。而地居極邊。又祿勸州新平縣地方緊要。請將知府同知通判州縣等官。俱照例調補。五年報滿。如無合例之員。請旨揀選補用。其廣西府屬之五槽地方。去府治遠。請以該府通判分防彈壓。其各屬教職。皆歸月選。俱應如所請。從之。

○旌表湖廣黃岡縣烈婦范彩雲妻吳氏。遇強不屈。母女慘斃。給銀建坊。入祠致祭。如例。○丙辰。原任四川巡撫蔡珽題建昌道屬瓜別安撫司王珠珀故。請以其子己角承襲。下部知之。○丁巳。諭怡親王等。貴州定廣狝苗。比他省苗蠻尤甚。朕向知之。前雲貴總督高其倬摺奏。請調官兵勦捕。朕曾降旨。狝苗向屬兇頑。所居之地。山深箐密。進勦官兵。務期擒捕首惡。勿致疎忽。茲據高其倬等奏。稱進勦惡苗。官兵用命。攀援而入。直抵賊巢。於十月初七十四等日。擒獲渠魁阿近。暨其弟阿卧。及妻子賊黨等。地方從此安靜。深爲可嘉。高其倬趙坤毛文銓。著從優議敘。此內著有勞績官員。該督查明。造冊報部。一併從優議敘。効力兵丁。即加恩賞。○戊午。達賴喇嘛。及班禪額爾得尼等。遣使表賀。萬壽聖節。並貢方物。賞賚如例。○宴琉球國王。尚敬使臣翁國柱等。於禮部。賞賚緞布有差。

○免湖南臨湘縣本年分旱災額賦有差○已未。命直省督撫提鎮各於標下千總內挑選弓馬人材好者一員保送引見。以侍衛補用。如千總內不得其人。於把總兵丁內挑取。即授爲千總。送至京師○免湖北沔陽。江陵等四州縣荊州等三衛。本年分水災額賦有差○庚申。賞給布隆吉爾撤回之滿洲蒙古索倫并兵等銀兩有差○辛酉。諸王大臣等恭擬

孝莊文皇后

暫安奉殿爲

昭西陵得旨。是○壬戌。宗人府議奏。裕親王保泰。自幼蒙

聖祖撫養內廷。又蒙

皇上疊沛隆恩。付以重任。伊子俱封尊爵。乃不知感戴。值

聖祖服制未滿。

皇上素服齋居。伊在家唱戲爲樂。及承訊問。殺

然承認。反稱於伊母喪事時。六年並未唱戲等語。又迎合廉親王允禩。昧於君臣大義。奏言不避。不忠不孝。罪狀昭然。應將保泰革去王爵。另與應襲之人承襲。得旨。保泰著革去親王○刑部議奏。原任四川巡撫蔡珽。逼死重慶府知府蔣興仁一案。得旨。部議將蔡珽援引應斬之律。又減等擬以枷責。此特設法欲寬免蔡珽耳。蔡珽果當寬免。亦應明白陳奏。大臣可殺而不可辱。何得將封疆大吏。解京枷責。著另議○扎魯特鎮國公蘇里故遣官致祭○癸亥。陞鑲紅旗蒙古副都統喀爾吉善爲鑲藍旗護軍統領○陞江南督標中軍副將楊國相爲江南狼山總兵官○甲子。陞戶部郎中布蘭泰爲山東布政使司布政使。調山東按察使余甸來京。以山東布政使董永茂爲山東按察使司按察使○乙丑。諭內閣。岳周一案。牽連多人。怡親王等承審訊問。並未加刑於一人。而能將其中情弊徹底

審出。足爲獄獄諸臣標準。較之阿爾松阿馬爾齊哈等。將無辜之人。濫施刑訊者。不啻霄壤。此所審事情。著九卿詹事科道秉公定議具奏。尋議岳周妄行鑽營。應擬斬立決。廉親王允禩。以私恩固結匪人。應交宗人府嚴加議處。得旨。岳周改爲應斬。秋後處決。允禩從前所犯之罪。較此重大者甚多。朕已俱行寬免。著從寬免。交宗人府議處。○議敘平定青海及擒獲桌子山。恭子山番賊功。加大將軍年羹堯。一等阿思哈尼哈番世職。○吏部議覆。川陝總督年羹堯等疏言。延安府屬三十營堡。綿亘千餘里。除神木廳所轄東路黃甫川等十營堡。應照舊分管外。查榆林城堡廳所轄中路十堡內。雙山。常樂堡。寧歸德。魚河五堡。俱環繞榆林鎮城。今榆林衛守備千總既裁。應將鄜州州同移駐鎮城。改爲分駐榆林州同。將榆林衛并雙山等五堡地方民事俱交該州同經管。其嚮水。波羅。懷遠三堡。以

波羅爲適中之地。今西安都司經歷既裁。應將該經歷改爲葭州州同。駐劄波羅。爲分駐波羅州同。兼管嚮水。懷遠二堡。又清平。威武二堡。壤地相接。應於威武添設威武巡檢司一員。兼管清平堡。所有榆林稅課大使。應行裁去。其稅務歸榆林道兼攝。至靖邊廳所轄西路十堡。惟靖邊所與定邊爲扼要重地。而定邊離鹽場堡二十里。鹽販由此出入。應設專員巡緝。查定邊東有磚井堡。西有鹽場。宜川。邑非繁劇。應將宜川縣縣丞移駐定邊。爲分駐定邊縣丞。兼管磚井鹽場二堡。且鹽場堡原係延屬地方。舊設管理鹽務之寧州州同。及鹽場大使。俱係慶陽府屬寧州管轄。以致呼應不靈。應將州同掣回寧州。鹽務改歸靖邊廳就近經管。而令定邊縣丞稽查私販。其鹽場大使亦歸靖邊廳管轄。又靖邊東爲鎮羅堡。西爲寧塞堡。靖邊事繁民衆。今靖邊廳千總既裁。請將延安府經歷司移駐靖邊。

兼管鎮羅寧塞二堡。再鎮靖一堡。路當孔道。應添設巡檢司一員。為鎮靖巡檢司。兼管龍州一堡。將榆林驛丞事務裁歸城堡廳。兼管其安邊。柳樹澗二堡。幅員遼闊。必得彈壓之員。應將寧州州同。改為綏德州州同。移駐安邊。兼管柳樹澗堡。為分駐安邊州同。歸延安管轄。均應如所請。從之。○戶部議覆署理江蘇巡撫何天培疏言。蘇松鎮淮揚五府屬太倉。吳江等十四州縣。風潮渰損田禾。請將本年漕糧緩徵一半。海州被災尤甚。全請緩徵。他府不成災者。并請紅白兼收。私粳並納。俱應如所請。從之。○禮部遵旨議覆暹羅國恭進穀種果樹。應加賞該國王。及王妃緞紗等。如康熙六十一年例。其船長乃文吐等。應照通事例。番稍偓吉等。應照從人例。賞給俱行。文該撫。如數給船長等齋回。從之。○賞給會試下第武舉回籍路費。如文會試例。○丙寅。策試天下中式武舉馬踰隆等一百三十人。

於

太和殿前。○鑲藍旗蒙古都統伯四格。緣事革職。陞正黃旗護軍統領查克旦。為鑲藍旗蒙古都統。調鑲白旗漢軍副都統巴爾呼達。為鑲黃旗滿洲副都統。陞王府長史博第。為鑲白旗漢軍副都統。○正紅旗漢軍副都統紀綬。緣事革職。陞河北總兵官吳如譯。為正紅旗漢軍副都統。調鑲紅旗蒙古副都統常安。為本旗滿洲副都統。以一等侍衛阿爾納。鑲紅旗滿洲副都統泰布。俱為鑲紅旗蒙古副都統。○封阿霸垓台吉德木楚克。為貝子。○丁卯。上御瀛臺紫光閣。閱試中式武舉騎射。○刑部右侍郎馬喇。緣事革職。陞內閣學士塞楞額。為刑部右侍郎。○戊辰。上御瀛臺紫光閣。閱試中式武舉步射。○己巳。上御瀛臺紫光閣。閱試中式武舉技勇。○戶部議覆。川陝總督年羹堯疏言。寧夏新築滿城。

係寧左右三衛民間田地。其原額正賦。應請豁免。以河濱淤地撥補。令陸續報墾。照例六年後起科。應如所請。從之。

大清世宗敬天昌運建中表正文武英明寬仁信毅大孝至誠憲皇帝實錄卷之二十六

大清世宗敬天昌運建中表正文武英明寬仁信毅大孝至誠憲皇帝實錄卷之二十七

監修總裁官先穆大皇帝是日講官起居注及保奏太子太傅保和殿大學士兼兵部尚書總理事務等伯加十五級臣鄂爾泰

總纂官先穆大皇帝是日講官起居注及保奏太子太傅保和殿大學士兼兵部尚書總理事務等伯加十五級臣鄂爾泰

纂修官先穆大皇帝是日講官起居注及保奏太子太傅保和殿大學士兼兵部尚書總理事務等伯加十五級臣鄂爾泰

纂修官先穆大皇帝是日講官起居注及保奏太子太傅保和殿大學士兼兵部尚書總理事務等伯加十五級臣鄂爾泰

敕修

雍正二年甲辰十二月庚午朔

上御瀛臺紫光閣覆閱選取中式武舉五十九人射○辛未

上御太和殿傳臚賜殿試武舉苗國琮等一百三十六人武進士及第出身有差○實授田文鏡為河南巡撫○壬申陞浙江杭州協領董吉那為杭州左翼漢軍副都統○吏部題三等伯馬世弼故銷去恩詔所得兩拖沙喇哈番餘一等精奇尼哈番以其子馬元熙承襲二等阿思哈尼哈番胡西屯故以其子海

常襲職從之○禮部疏奏雍正三年元旦令節恭請

皇上陞殿進表行禮得旨朕即位之初諸王大臣奏請元旦陞殿受賀至再至三朕無可如何准於次年舉行今年元旦陞殿讀表時朕聽之不禁傷感悽然垂淚明歲元旦尚未過三年著停止行禮○旌表直隸清苑縣烈婦戴國興妻王氏守正拒姦被刃殞命給銀建坊入祠致祭如例○癸酉諭吏部尚書朱軾

—實錄卷二七—

浙江沿海塘子最為緊要署撫石文燁前經奏稱應用石工後又奏稱不必用石全無定見誠恐貽誤塘工朕已諭令法海佟吉圖作速詳議具奏矣但恐法海等初任不諳地方情形爾曾為浙江巡撫必深悉事宜著馳驛前往浙江作何修築之處會同法海佟吉圖詳查定議交與法海等修築朕思海塘關係民生務要工程堅固一勞永逸不可吝惜錢糧江南海塘亦為緊要俟浙江議定即至蘇

州會同何天培鄂爾泰將查勘蘇松塘工如何修築之處亦定議具奏○諭禮部工部國子監進士題名之典始於唐時新進士榜後於慈恩寺塔下題名立碑自宋明以至我朝皆建碑於國學按其甲第先後勒載姓名籍貫於上所以重科名也今太學

聖廟戟門外所立本朝歷科題名碑自順治丙戌科起至康熙戊戌科而止稽之會典諸進士釋菜後禮部題請工部給建碑銀一百

—實錄卷二七—

兩交與國子監立石題名康熙三年輔政大臣裁省自後每科諸進士各自捐貲立石我國家振興文教凡鄉試會試動用帑金數萬朕即位之始即開恩科誠以科目一途實關用人取士之要題名之典豈宜缺焉著工部動用正項錢糧令國子監將雍正癸卯甲辰兩科題名碑速行建立康熙辛丑科亦宜補建嗣後每科仍照舊例題請庶士子觀覽此碑知讀書登榜之榮益勵其潛修上達之志

爾該衙門即遵諭行○陞鑲紅旗蒙古副都統阿爾納爲正黃旗護軍統領○鑲紅旗漢軍副都統林柱玉緣事革職陞鑲藍旗叅領金以坦爲鑲紅旗漢軍副都統○甲戌諭刑部刑名案件最爲緊要朕所賴者諸大臣之贊襄諸大臣所賴以辦事者各司之盡職是以每司必得一二實心辦事才能之員方有裨益朕思翰林院滿漢編修檢討庶吉士俱係進士出身伊等即未必素諳律例亦必不難於練習爾等於滿漢編修檢討庶吉士內揀選或有情願在刑部學習辦事者或有爲爾等所知者共揀選二三十員帶領引見分在各司學習辦事如有辦事明白實心効力者酌量題補○乙亥

孝惠章皇后忌辰遣官祭

孝東陵○丙子授故輔國將軍佛爾奇子扎延爲奉國將軍○陞雲南督標副將孫宏本爲雲南永順總兵官○丁丑諭刑部殺人之犯

因伊親老家無次丁奏請免死留養然亦須查明被殺之人有無父母是否獨子若係親老又係獨子一旦被殺以致親老無人瞻養而殺人之人反得免死留養殊與情理未協著行文直省督撫如奏請殺人之犯存留養親務須將被殺之人有無父母及以次成丁之處一併查明於本內聲明具奏○命禮部左侍郎登德以侍郎銜在學士裏行走調兵部右侍郎牛鈕爲禮部左侍郎以鑲黃旗漢軍副都統傅鼐爲兵部右侍郎○調江西布政使張楷來京陞直隸巡道常德壽爲江西布政使司布政使直隸守道桑成鼎爲湖北按察使司按察使○安南國王黎維禰遣陪臣范謙益等表賀

登極并貢方物賞賚如例○戊寅諭吏部直隸守道職司通省錢穀巡道職司通省刑名即如各省之有藩臬二司也今若槩與諸道員一體不加分別似未允協蓋向以畿輔重地

不立布政按察名色。朕思畿輔與各省有何區別。今應更改畫一。著將守道改爲布政司。巡道改爲按察司。前因李維鈞辦事勤慎。且能訓練士卒。整飭營伍。故授爲直隸總督。竝令提督總兵官聽其節制。此係特旨。不爲定例。將來李維鈞或陞任後。直隸仍用巡撫。一切俱照巡撫舊例。即有授爲總督者。亦只照趙弘燮例行。不得援李維鈞之例。○旌表浙江遂安縣烈女洪祖選聘妻毛氏未婚夫故。絕粒殞命。給銀建坊。入祠致祭。如例。○己卯。吏部尚書朱軾奏言。

皇上至仁大孝。居喪三年。猶如一日。今服制已滿。請祫祭。

太廟。即吉釋哀。得旨。朕覽朱軾所奏。當之甚愧。朕受。

皇考四十餘年。顧復深恩。罔極。莫報。諒陰三年。祇以默盡一點私情。非謂歷代帝王不能行之事。朕能行之。思欲立法定制。以垂令名也。

且如祭祀朝會大禮。不容久曠者。朕亦勉徇諸王大臣之請。照常舉行。惟有齋居素服悲哀思慕。盡一己之誠於宮禁之中。古人云。禮之至者無文。哀之深者無節。朕自嗣統以迄於今。撫時生感。觸物增懷。優見愾聞。潛然出涕。情不容以自禁。心不能以自覺。遑論其合於古制否乎。昔。

世祖

聖祖皆以冲齡登極。一時禮制容有未備。設

世祖

聖祖踐阼之日。已若朕躬之年。則盡禮盡制。必有朕所萬不能逮者。今朕抱歉之處尚多。敢云盡禮乎。至所奏三年以來。深山窮谷。無不哀思戀慕。過密八音等語。此乃。

皇考六十餘年。深仁厚澤。浹髓淪肌。四海臣民。哀痛迫切。感激思慕。愈久不忘。出於人心之自然。非有所禁約而然也。夫以薄海內外。凡有知識之倫。尚且哀慕不忘。如此況躬爲子。



臣欲報昊天罔極之德其終身哀慕復何時能已耶朕之衷曲非欲表暴於人特因奏章過於稱揚朕心滋愧故畧爲宣寫以示中外○以翰林院編修戴瀚署日講起居注官○以原任理藩院郎中羅密爲直隸布政使司布政使擢直隸河間府知府浦文燁爲直隸按察使司按察使○庚辰朝鮮國署國事世弟李昫遣陪臣李穡等告其兄國王李昫喪得旨朝鮮國王李昫謹守藩封竭誠盡敬恭順事上慈愛撫民深爲可嘉忽聞溘逝朕心不勝軫惻應得卹典著察例議奏○旌表河南修武縣烈女傅文鳳聘妻薛氏未婚夫故絕粒完貞給銀建坊入祠致祭如例○辛巳諸王大臣奏雍正三年元旦恭請上御殿受賀得旨諸王大臣雖請朕俯順輿情亦當仰體朕意朕以爲與其行慶賀禮以示萬國不若盡孝道以示天下二年元旦因行元年之禮故允所請去年長至行禮因

聖祖仁皇帝配

天大典朕不得已勉從衆請至於元旦御殿進表受賀不比尋常之御殿謝恩行禮也朕已降諭旨諸王大臣著即遵行○議敘進藏官弁功一等阿思哈尼哈番又一拖沙喇哈番明保加一拖沙喇哈番歸併爲三等精奇尼哈番一等阿思哈尼哈番滿色加一拖沙喇哈番授爲一等阿思哈尼哈番又一拖沙喇哈番一等阿達哈哈番魯爾舍加一拖沙喇哈番授爲一等阿達哈哈番又一拖沙喇哈番拜他喇布勒哈番又一拖沙喇哈番邁徒加一拖沙喇哈番歸併爲三等阿達哈哈番拜他喇布勒哈番博恩和爾加一拖沙喇哈番拖沙喇哈番廣西五十俱加一拖沙喇哈番歸併爲拜他喇布勒哈番副都統吳禮布寶色覺羅伊禮布許國桂侍衛納秦奎蘭大郭柱雙寶四哥貝和諾穆爾泰塞爾圖蔡玉阿爾善希第黑子覺羅都是喜富黑德四

格物寶來寶毛其他忒阿克敦色楞阿藍太圖閣楊鼎薩穆哈顧綠恩合浦達爾津都斯噶爾查穆八喇色勒木素舒穆努唐吉禮永寶岳寶穆克登烏林帕戴寶柱新太黑牙圖拖穆蘇魏善三碩色張八世敦吉納拉錫太偏圖俱授爲拖沙喇哈番○吏部題理藩院侍郎鄂賴奉旨以取藏功給與拖沙喇哈番查鄂賴原係二等阿達哈哈番相應歸併授爲一等阿達哈哈番從之○湖廣總督楊宗仁題長茅關土司指揮使覃顯詰故無嗣請以其甥田司南承襲下部知之○壬午王大臣等奏二阿哥病勢甚篤得旨前看守之王大臣奏聞二阿哥病症朕即下旨與王大臣於太醫院擇良醫調治昨者少愈二阿哥披誠陳奏感激朕恩殊爲可憫今日醫云病復變重朕欲往看恐二阿哥執爲臣之禮俟有事後朕再往奠前二阿哥福金事既照親王福金辦理若二阿哥有事亦應照親王之例

辦理一切所用之物交與內務府大臣莊親王常明來保等俱於內府取給理郡王所屬人等俱著穿孝即傳諭令其預備二阿哥之子孫交與總管太監多派人照看從前皇考時大阿哥福金曾派在內阿哥穿孝如二阿哥有事著誠親王公允禩長子弘曙弘暉弘曦弘昉弘春弘昂穿孝照親王例齊集時值隆冬福金及大臣之命婦免其齊集著擇定出殯日期送至鄭家莊設棚安厝令伊子弘晳得盡子道出殯時每翼派領侍衛內大臣各一員散秩大臣各二員侍衛各五十員送至鄭家莊○吏部議覆直隸總督李維鈞疏言直隸所屬冀州趙州深州晉州定州俱經改爲直隸州分管南宮等縣則各縣盜案有州同者應歸於州同兼理無州同者歸於州判兼理凡疎防督緝年限照通判同知之例查叅議處應如所請嗣後各省新舊直隸州遇有盜案疎防等事應將該管之州同與

專汎之印捕各官一併指參其州判兼理者即以州判指參臣部俱照同知通判之例分別議處限年督緝但州同州判俱係佐貳微員今既有督緝盜賊之責非勤敏才幹之員不克勝任嗣後請將新選直隸州之州同州判一體引見補授從之○增順天府大興宛平二縣文童入學額數照府學例各取進二十五名○癸未二阿哥允初薨追封爲和碩理親王謚曰密○調正紅旗滿洲副都統薩爾禪爲鑲紅旗蒙古副都統以原任一等侍衛常雲爲正紅旗滿洲副都統○解奉天將軍唐保住任以正黃旗蒙古都統綽奇爲奉天將軍○以鑲白旗蒙古副都統阿齊圖署理步軍統領○正紅旗漢軍副都統騷達色以衰病乞休允之○甲申諸王大臣等恭聞皇上有旨往奠二阿哥合詞懇請停止親往得旨王大臣勸朕雖是但朕心不能自己之處爾等尚未盡知二阿哥獲重罪於

皇考其身若存乃係負罪之人今既薨逝則罪案已畢依然朕之兄也從前裕親王歿時皇考自熱河回京躬臨致奠朕之弟兄俱著穿孝今封二阿哥爲親王即與裕親王無異朕登大寶以來於二阿哥處未降一旨未遣一人雖錫賚頻加皆未言及朕所頒賜惟交與總管太監傳送蓋朕心不欲受伊拜謝並不欲聞伊感恩之言也前日聞伊病篤朕遣大臣往視二阿哥奏曰臣蒙皇上種種施恩甚厚臣心實深感激又訓伊子理郡王曰爾若能一心竭誠効力以事君父方爲令子等語此皆二阿哥至誠由衷之言朕今往奠乃兄弟至情不能自己並非邀譽也明日朕必往奠王大臣不必再奏○又諭弘皙之母奉侍二阿哥有年人甚淳謹著封理親王側妃令居伊子府第弘皙盡心孝養理親王侍妾曾有子女者伊子如欲迎養聽其迎養有欲隨側妃居住者亦聽其隨住不願者另給廨舍

與居豐其衣食以終餘年著通諭理親王府  
下人等知之○乙酉

上詣五龍亭哭奠理親王○以內閣學士福敏

吳士玉教習庶吉士○增福建省鄉試舉人

中額四名從福建巡撫黃國材請也○丁亥

諭兵部爾等所奏廕生內有情願在旗行走

六十四人朕從前曾降諭旨給與廕生人員

令其分部行走因伊等俱係年少子弟藉祖

父効力得一品二品廕生遽授以員外等官

儻不能辦事日後必致叅革殊非朕加恩之

意所以將世職一品二品廕生俱著給與三

品廕生考試分給部內學習行走如行走好

者著本部大臣具奏仍以原品級補用今此

六十四人既不能學習文藝情願在旗行走

伊等皆因祖父世職應得廕生今既不得用

於部員著仍照伊等世職給與原品級廕生

於明年擇日考試○陞雲南糧儲道江芑為

雲南按察使司按察使○戊子遣散秩大臣

覺羅舒魯翰林院學士阿克敦賜祭故朝鮮  
國王李昫謚恪恭封朝鮮國王世弟李昫為  
朝鮮國王敕諭曰爾兄王昫薨逝朕心惻然  
據傳順王妃金氏奏稱爾聰明孝友寬弘仁  
恕夙有長人之德為國人所願戴請冊承襲  
朕俯順輿情特允所請茲遣官齎詔誕告爾  
國封爾為朝鮮國王繼理國政封爾妻徐氏  
為國王妃佐理內治并賜爾及妃誥命彩幣  
等物爾宜永矢靖共懋績承於侯服迪宣忠  
順作屏翰於天家爾其欽哉毋替朕命○免  
江南太倉長洲海州安東興化等二十八州  
縣本年分水災額賦有差○己丑諸王大臣  
又奏雍正三年元旦恭請

皇上陞殿受賀得旨諸王大臣奏請朕於明歲  
元旦陞殿受賀朕因未過三年故著停止今  
諸王大臣又復引經據典陳懇再三著准行  
禮其表文但行呈進不必宣讀○禮部疏奏  
請將

皇上潛邸升爲宮殿。交與工部會同內務府繪圖呈覽。敬謹營造。內閣翰林院撰擬嘉名恭候。

皇上欽定從之。○庚寅順天府進春。○封和碩裕親王次子保壽之長子廣寧爲和碩裕親王。○陞鑲紅旗滿洲副都統宗室申穆德爲正黃旗蒙古都統。○禮部議覆兩廣總督孔毓珣疏言西洋人先後送到廣東者。若盡送往澳門安插濱海地窄難容。亦無便舟令其歸國。廣州省城爲洋船聚泊之所。應將各省送到西洋人令其暫住省城之天主堂。其年壯願回者令其陸續附舟歸國。年終造冊報部。年老有疾不願回西洋者聽其居住省城天主堂。不許各處行走行教誦經。其外府之天主堂俱改爲公所。素日誤入其教者俱令改易。應如所請從之。○兵部議覆直隸總督李維鈞奏宣化鎮張家口副將標下步兵一千名內將藤牌三百名改爲鳥鎗手。大刀

二百名改爲弓箭手。應如所請從之。○移山東武定營守備一員兵八十名駐劄海豐縣。之余家港專司巡緝。從山東巡撫陳世倌請也。○兩廣總督孔毓珣題廣西南寧府下雷州土知州許定烈故請以其子許乾毓承襲。太平府太平州土知州李蕃故請以其子李璋承襲。下部知之。○旌表陝西平涼縣烈婦王應寧妻沈氏拒姦不辱投繯殞命。給銀建坊入祠致祭如例。○辛卯封故鎮國公登塞子鎮國將軍塞爾臣爲輔國公。○以原任禮部尚書賴都爲禮部尚書。○以翰林院侍讀學士阿爾賽充日講起居注官。○添設湖南提督學政一員。從湖南巡撫王朝恩請也。○雲貴總督高其倬疏報雲南魯魁山獠賊方景明普有才等擅攻村寨肆行搶掠。遣弁兵勦捕擒斬淨盡。得首魯魁獠賊爲害有年該督分遣官兵奮力追勦。賊首成擒。賊黨根株盡行收捕。高其倬及在事有功人員著加恩

議敘○予故布隆吉爾副將軍阿喇衲祭葬  
謚僖恪○壬辰諭總理事務王大臣等丁壽  
已授爲鎮守茂岱察罕叟爾等處地方將軍  
但伊漢仗雖好識見不足此處將軍乃管束  
邊境初駐兵丁且與喀爾喀一處居住職任  
緊要著丁壽以都統銜授爲叅贊其應補授  
將軍之人爾等議派三員再此處駐防兵內  
有蒙古兵丁應派蒙古副都統管轄爾等亦  
議派三員具奏尋議茂岱察罕叟爾等處地  
方將軍擬派振武將軍傅爾丹護軍統領覺  
羅佛倫歸化城都統丹晉再管轄蒙古兵丁  
副都統擬派察哈爾總管哈吉噶爾達什鑲  
白旗蒙古叅領諾爾布扎木素恭候欽定得  
旨巴爾庫爾軍營前鋒統領穆克登著補授  
鎮守茂岱察罕叟爾等處地方將軍令其馳  
驛來京理藩院侍郎花善著授爲副都統管  
轄鎮守蒙古兵丁○甲午

孝莊文皇后忌辰遣官祭

昭西陵○乙未陞鑲白旗護軍叅領常在爲正  
紅旗漢軍副都統○丙申陞步軍總尉額爾  
勤爲盛京副都統○總理事務王大臣等議  
覆副都統費雅思哈奏稱黑龍江將軍現在  
齊齊哈爾駐劄請移駐呼蘭地方副都統移  
駐阿爾楚哈墨爾根駐劄之副都統移駐拉  
林再設副都統一員駐渾春地方俱選增拔  
甲等語查齊齊哈爾船廠等處共有將軍二  
員副都統五員兵九千五百名其防範鄂羅  
斯蒙古等及一切差務並無不敷且齊齊哈  
爾墨爾根等處北捍鄂羅斯西護索倫打虎  
兒若將此項兵丁移駐呼蘭拉林等處則北  
拒鄂羅斯益遠所關匪細相應將移駐添兵  
之處無庸議但黑龍江將軍所駐之齊齊哈  
爾地方硠薄難以耕種令將軍移駐黑龍江  
實屬有益其齊齊哈爾亦屬緊要設一副都  
統應駐兵若干之處交與黑龍江將軍悉心  
議奏又副都統田象坤條奏白都納船廠等

處墾田一事。查白都納船廠俱係驛站大路沿路墾田似屬無益。拉林阿爾楚哈等處地方遼濶宜於墾田且與船廠白都納相近如何移駐墾田之處亦交與船廠將軍令其查奏得旨依議。黑龍江地方捍拒鄂羅斯今令將軍移駐黑龍江著增兵三百名船廠所屬阿爾楚哈拉林等處既駐閒散滿洲不可無管轄人員著將船廠所屬之兵亦增二百名派一協領令其駐劄管轄○戊戌歲暮祫祭

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵○遣官祭太歲之神○己亥旌表八旗節

婦滿洲四哥妻民覺羅氏等一百二十一人蒙古扎母布拉妻張氏等二十四人漢軍管諒忠妻佟氏等一百三人直隸各省節婦彭長春妻楊氏等四百九十四人貞女李氏等二十二孝子李曰沆等十七人各給銀建坊如例○是歲人丁戶口二千五百五十一萬一百一十五又永不加賦滋生人丁六十萬一千八百三十八田地山蕩畦地八百九十萬六千四百七十五頃二十四畝有奇徵銀三千四十四萬六千六百九十二兩有奇米豆麥四百五十九萬六千一百一十九石有奇草四百九十二萬二千七百九十八束茶四十九萬五千六百三十六引行鹽五百二萬四千四百九十引徵課銀四百四十二萬六千一百五十五兩有奇鑄錢四十九萬九千二百有奇



大清世宗敬天昌運建中表正文武英明寬仁  
信毅大孝至誠憲皇帝實錄卷之二十七

大清世宗敬天昌運建中表正文武英明寬仁  
信毅大孝至誠憲皇帝實錄卷之二十八

監修總裁官光祿大夫經筵講官太僕議政大臣保和殿大學士兼兵部尚書總理事務王公伯和十五級臣鄂爾泰

總裁官光祿大夫經筵講官講官起居注太僕卿和殿大學士兼戶部尚書仍兼管吏部尚書翰林院掌院

事三傳伯和十五級臣張廷玉光祿大夫經筵講官起居注太僕議政大臣武英殿大學士兼工部尚書仍兼管

翰林院掌院事加二級臣福敏光祿大夫經筵講官太子太僕卿東閣大學士兼禮部尚書加六級臣徐本光祿大夫

經筵講官議政大臣編修內閣大學士事務禮部尚書仍兼管太常寺尚書等事臣三泰等奉

教修

雍正三年乙巳春正月庚子朔

上詣

堂子行禮回宮拜神畢御殿王以下文武各官

外藩王及使臣等朝賀停止讀表筵宴○朝

鮮國王李昫遣陪臣李柱等表賀冬至元日

萬壽節及進歲貢禮物賞賚如例○安南國陪

臣范謙益等以次朝賀行禮賞賚如例○甲

辰調廣東布政使圖理琛為陝西西安布政

使司布政使陞廣東按察使朱絳為廣東布

政使司布政使擢廣東廣州府知府宋瑋為



廣東按察使司按察使○以原任山東文登副將梁永禧爲廣西左江總兵官○丙午世祖章皇帝忌辰遣官祭

孝陵○丁未孟春享

太廟

上親詣行禮○遣官祭太歲之神○戊申實授楊文乾爲河南布政使司布政使○辛亥祈穀於

上帝

上親詣行禮○壬子陞膳房總領永福爲鑲黃旗內府護軍統領○調陝西西安右翼滿洲副都統素思漢爲西安左翼漢軍副都統以原任副都統覺羅伊禮布爲陝西西安右翼滿洲副都統○癸丑戶部遵旨議奏遣官於直隸固安縣擇官地二百頃爲井田從之○丙辰諭總理事務王大臣等目今甘州無事著貝勒延信赴西安將軍任其平逆將軍印信齎送來京甘州兵丁著寧夏副都統阿林

前往管轄楚宗著來京○正黃旗滿洲都統馬爾薩緣事革職陞正紅旗滿洲副都統常雲爲正黃旗滿洲都統以湖廣荊州將軍阿魯爲鑲藍旗滿洲都統陞江南江寧左翼副都統吳納哈爲湖廣荊州將軍調正白旗蒙古副都統李柱爲江南江寧左翼副都統○以禮部尚書賴都署理鑲藍旗滿洲都統○己未諭福建巡撫黃國材古帝王以豐年爲祥瑞而不以景星慶雲靈芝甘露爲祥瑞以賢才爲寶而不以珠玉爲寶矧耆艾舊臣閱歷既多其嘉猷善政有益於天下國家非寶而何故朕於老臣尤加珍惜爾等各宜加勉○陞光祿寺少卿杭奕祿爲光祿寺卿○陞一等侍衛明金爲鑲紅旗滿洲副都統○添設雲南楚姚鎮馬兵六十名步戰兵二百四十名步守兵三百名並增置鎮屬景蒙一營設叅將一員守備一員千總二員把總四員兵一千名裁援勦左右兩協弁兵撥補從雲

貴總督高其倬請也○庚申封和托輝特協理台吉圖巴爲輔國公○辛酉諭大學士等蔡珽身爲巡撫縱情任性將所屬知府蔣興仁威逼自盡經年羹堯奏朕始知之降旨詰問蔡珽屢次朦混陳奏罪實難逭因交與塞爾圖將此案情節一一查出本到內閣應票擬嚴旨乃大學士等以蔡珽已於開礦案內革職將此本票擬該部知道庇護蔡珽之意顯然及刑部議罪擬以枷責具奏蔡珽曾爲大吏有罪當置之於法枷責殊失國體此不過巧爲開釋之意國法所在恩威當自朕出臣下以意爲輕重徇情市德可乎後經刑部將伊按律擬斬今奏蔡珽已到京請旨監禁朕思蔡珽所犯係年羹堯奏今若將蔡珽置之於法人必以朕爲聽年羹堯之言而殺蔡珽矣朝廷威福之柄臣下得而操之有此理乎即如岳周之罪本應即行正法因係年羹堯所奏故改爲監候再四川巡撫王景

灝乃年羹堯所薦王景灝在軍前辦事出力及來京陸見朕觀其才幹可用故簡任巡撫以觀其後故朕之存心大公至正是非功罪惟求其當且罪疑惟輕功疑惟重寧可使人謂朕聽年羹堯之言而用王景灝斷不可使人謂朕聽年羹堯之言而殺蔡珽著將蔡珽從寬免罪並將始末諭衆知之○諭理藩院邊關城門祇令來往之商人納稅其請安進貢之蒙古等並無收稅之例今聞將伊等餘帶馬匹及裝載口糧之車輛與買用之茶茗俱勒令停止私行收稅并索取零星物件又有姦商希圖匿稅專僱蒙古車輛偷載商貨出入此皆守口旗員及收稅官不嚴束胥役之故也著行文該管官員嚴行禁止○調鑲白旗滿洲副都統覺羅巴延德爲正紅旗滿洲副都統○正藍旗滿洲副都統何深緣事降調調正藍旗漢軍副都統多賽爲本旗滿洲副都統陞鑲黃旗前鋒叅領哈岱爲鑲白

旗滿洲副都統一等侍衛傅森爲正白旗蒙古副都統散騎郎濟星爲正藍旗漢軍副都統○壬戌諭大學士等前因蔡珽有病復有蔣興仁一事將伊革職今召令入見並無疾病伊學問尚優著補授都察院左都御史○理藩院議覆管理蒙古同知白石奏言張家口外入官地畝請照邊內例定爲三等起科每犁一具徵銀四兩二錢張家口之東百里內蒙古漢人雜居盜賊詞訟應嚴加管理又德勝口張家口之倉應糴穀分貯每年出舊糴新報部其衙署倉庫應蓋造於張家口內城郭會集之處添派千總一員把總一員馬兵二十名協同辦理看守俱應如所請得旨民人交納維艱不得催科太迫如不能足四兩二錢之數著再量減二錢餘依議○裁山東濟南衛守備一員千總一員管河千總二員○予故國子監祭酒王傳祭一次○癸亥諭吏部覽年羹堯將驛傳道金南瑛等參奏

金南瑛曾經大學士朱軾保題在會考府行走怡親王亦曾奏薦朕是以揀選任用年羹堯遽行題參必有錯誤金南瑛著仍留任去歲年羹堯來京陛見時朕將文武官員揀選多人命其帶往祇令學習事務並非悉令補用也且伊等歷俸甚淺亦未至於即用今年羹堯將金南瑛等參奏特欲出缺用朕所命往之人此斷乎不可著降旨年羹堯此次命往之人如有缺出不得即行題補雖委署印務亦著請旨再行又本內所參官員俱係胡期恒詳揭胡期恒朕未識面此所參官員朕亦未知其人除金南瑛外其餘官員著胡期恒帶領來京具奏伊等員缺暫且不必補人甘肅巡撫印務著甘肅布政使彭振翼署理○實授阿齊圖爲步軍統領○理藩院議覆阿霸孩貝子德木楚克呈稱熱河之喀拉和屯錫喇他拉哈祁爾伊嘛圖多倫腦兒等處之人民數千俱在達爾腦兒地方捕魚此腦

兒周圍二百餘里其外柳林叢密人不可行  
腦兒內陸地長三十里寬二十餘里有人偷  
盜蒙古馬匹牲畜載藏匿生事應將捕魚  
人等一併驅逐得旨達爾腦兒處打魚人等  
聚集至二三千人若將伊等即行逐去俱係  
無籍窮民雖回原處亦未必安分爲生此皆  
扎薩克等希圖微利縱容積漸所致著馬爾  
薩帶銀三千兩前去其有本商人著即發回  
其無力回籍者酌給盤費俾此窮民安居原  
處著曉諭扎薩克等知之○甲子山西巡撫  
諾岷以病乞假命解任來京調治以刑部左  
侍郎伊都立署理山西巡撫○吏部奏請差  
湖南山東學政得旨從前學政主考皆就其  
爲人謹慎者派往並未考試文藝其中竟有  
不能衡文者或因中式之後荒疎年久故耳  
著應差之翰林并進士出身之各部院官員  
查奏俟朕試以文藝再行差委○正白旗蒙  
古副都統傅森奏言長槍營馬甲挑爲別營

護軍則伊所習技藝皆廢請照烏鎗營定例  
止在本營挑取護軍庶兵丁等益得專精學  
習從之○乙丑諭大學士等凡大小臣工面  
奉諭旨皆國家政務不當輕洩於外昔  
聖祖仁皇帝時有兩人同見而將旨意漏洩者  
則彼此互相推諉有一人獨見將旨意漏洩  
者則謂近侍內監竊聞朕悉知其弊是以召  
見臣工常令一人獨進不許三尺之童在側  
伊等出外恐因漏洩獲罪遇親友詢問不能  
謝却則托他詞以告之其實非朕諭旨也周  
易曰臣不密則失身若將密旨宣露於外則  
其爲人已不明於君臣大義並利害不知所  
言尚可聽乎況其言又不確實無益有害嗣  
後切勿輕問輕信自干罪戾著將此旨頒行  
中外○貴州巡撫毛文銓摺奏安順府神苗  
焚劫不法請親往查明奉  
上諭凡事貴協於中不宜偏執遇有事時惟圖  
安靜則悞於因循無事時銳意振作則失之

孟浪若貪功而妄逞兵威斷然不可苗獮雖愚亦人類也豈無良心既示之以威即宜繼之以德總要武弁整飭營伍有司清白吏治數年後再無不感化之理也○丙寅陞陝西涼莊道蔣洞爲山西按察使司按察使○兵部議覆山西大同總兵官馬觀伯疏奏改隸營制事宜一殺虎口副將原轄之北樓東路二營參將請歸大同總兵官統轄一山陰路原轄之井坪城守備請歸平魯路朔州城守備歸寧武營乃河堡把總歸老營營俱聽殺虎口副將管轄一平魯路參將請歸殺虎口副將管轄其平魯路屬之破虎堡并兵分隸助馬路管轄一利民路參將請移駐寧武爲寧武營參將其利民路參將中軍守備改爲利民營守備寧武營守備改爲參將中軍守備並添撥利民路把總一員隸之均應如所請從之○追賜原任福建巡撫許嗣興祭葬從其子宣化總兵官許國桂請也○丁卯浙

閩總督覺羅滿保續報臺灣陳阿難益難等六社生番歸化每歲照例以鹿皮代稅下部知之○戊辰欽天監奏謹推得本年二月初二日庚午日月合璧以同明五星聯珠而共貫宿躔營室之次位當椒營之宮查亥子丑同屬一方二曜五星聯絡晨見亘古罕有爲此繪圖呈覽請勅下史臣永垂典冊得旨朕惟日月五星運行於天本有常度是以從古曆元可坐算而得然古稱高陽時五星會於營室漢帝時五星聚於東井宋祖時五星聚於奎史書皆紀以爲祥蓋七政會合數雖一定而遭逢其時者實海宇昇平民安物阜之會也若以爲德化所致朕方臨御二載有何功德遽能致此嘉祥皆由我

皇考六十餘年聖德神功際天蟠地爲千古不世出之君爲

上天第一篤愛之子所以純禧駢集曆數綿長錫祚垂光至於今日觀此難逢之嘉瑞朕嗣

統以來兢兢業業。率由舊章。惟以

皇考之心爲心。以

皇考之政爲政。定衷圖事。罔敢稍越尺寸。故邀

上天垂鑒。仍如

皇考之御宇。綏猷而錫以無疆之福也。朕幸逢

嘉會。不但不敢自居。亦且不敢自謙。總由

上天申眷

皇考朕與天下臣民同在福祐之中。當與天下

臣民共慶之。所奏著付史館。并頒示中外。○

諭大學士等。貝子允禩外飾淳良。內藏姦狡。

並不約束屬下人等。縱恣騷擾民間。朕曾令

楚宗來京。今不必來京。著往允禩處約束其

屬下人等。如有擾亂等事。即行攔阻。允禩如

不聽從。即行參奏。楚宗若不嚴行約束。事覺

一併治罪。○諭九卿詹事科道等。雲貴總督

高其倬條奏黔省事宜。本內細掠販賣一款。

與毛文銓密摺所奏川販之事。詞語竟不相

同。是高其倬欲將川販字樣隱避。但以境連

川楚一句。含糊帶過。此特畏懼年羹堯之所

致也。朕君臨天下。每事出於大公。至正豈有

重視川陝。而輕視雲貴。厚待年羹堯。而薄待

高其倬之理。督撫須深知朕心。庶無瞻顧。將

此川販細掠一事。交與年羹堯王景灝嚴行

禁止。務除從前積弊。毋害黔省民苗。儻不實

力奉行。定將伊等一併嚴加議處。○諭兵部。

朕前降旨。甘州延信之缺。著阿林前往。今策

晏阿喇布坦之使。將到阿林不甚威重。著都

統查克旦前往甘州居住。可賞銀二千兩。令

其速行料理。馳驛前往。○諭兩廣總督孔毓

珣。廣西蕉木山場。常有礦徒騷擾。雖屢經驅

禁。而巢窟尚在。廣東終難安靖。聞蕉木山路

共有四汛。在廣西者三。在廣東者一。兩省汛

兵。各宜盡心防緝。不得坐視推諉。嗣後著該

管文武官。分地查核。以專責任。或礦徒從某

地來。不能稽察。或已至某地。不能擒逐。或逃

入某地。不能堵截。即將該管官。并題參議處。

○湖北巡撫納齊喀疏報均州公安漢陽三  
州縣雍正元年分開墾田地十一項有奇下  
部知之

大清世宗敬天昌運建中表正文武英明寬仁  
信毅大孝至誠憲皇帝實錄卷之二十八

大清世宗敬天昌運建中表正文武英明寬仁  
信毅大孝至誠憲皇帝實錄卷之二十九

監修總裁官光祿大夫經筵講官太僕寺卿弘文館大學士兼兵部尚書總理事務三寶通判十五級加六級臣等奉  
總裁官光祿大夫經筵講官太僕寺卿弘文館大學士兼兵部尚書總理事務三寶通判十五級加六級臣等奉

事三寶通判十三級臣等奉

翰林院掌院學士二級臣等奉

經筵講官弘文館大學士兼兵部尚書總理事務三寶通判十五級加六級臣等奉

教修

雍正三年乙巳二月己巳朔諭諸王大臣等

據奏二月二日庚午日月合璧五星聯珠為

亘古難逢之大瑞請陞殿慶賀等語朕惟

皇考六十餘年敬

天勤民始終如一是以

上天申眷至於今日觀此嘉祥在

皇考為福鍾善慶之餘在朕躬為迎迓

天庥之始惟有兢兢業業竭力盡心永久如一

以仰答

上天之眷佑以克承

皇考之弘猷期與大小臣工矢誠心而敦實政  
陞殿受賀不必舉行但念

天瑞實因

皇考而致應遣官告祭

景陵以昭祥瑞之自應行典禮著該部具奏○  
兵部議覆兩廣總督孔毓珣疏言廣東香山  
澳向有西洋人來貿易居住納租踰二百年  
今戶口日繁總計男婦多至三千五百六十  
七名大小洋船近年每從外國造船回澳共  
有二十五隻恐致日增請將現在船數作爲  
定額除朽壞重修之外不許添置西洋人頭  
目自彼處來更換者許其存留其無故前來  
之人仍令隨船歸國不許容留居住俱應如  
所請從之○定布隆吉爾爲安西鎮設總兵  
一員標下五營遊擊五員守備五員千總十  
員把總二十員兵五千名○庚午卯刻日月  
合璧五星聯珠並見於姬訾之次○是日諸  
王大臣等再奏請

皇上陞殿受賀得旨朕生平存心真誠內外如  
一昨頒諭旨已悉朕意今諸王大臣等再申  
懇請是以有意謙讓視朕矣

上天既賜嘉祥朕與內外臣工惟有益加敬謹  
以仰答

上天昭示之恩承

皇考詒謀之遠所奏陞殿慶賀不必行○陞陝  
西神木副將孫繼宗爲陝西安西總兵官○  
辛未調盛京副都統來文爲鑲白旗蒙古副  
都統○停止竊賊逃人等割脚筋例○旌表  
江南鹽城縣烈婦張新臣妻劉氏拒姦不污  
自縊完節給銀建坊入祠致祭如例○壬申  
江西巡撫裴倬度疏報南昌等十二縣開墾  
雍正元年分田地五十二頃有奇河南巡撫  
田文鏡疏報蘭陽等五十一州縣開墾雍正  
二年分田地二千五百七十頃有奇俱下部  
知之○科爾沁卓禮克圖親王已特瑪故遣  
官致祭○甲戌免江南吳江等四縣雍正二



年分水災額賦有差○以故扎魯特鎮國公蘇里子察罕伶華襲爵○乙亥春分朝

日於東郊遣廉親王允禩行禮○以翰林院編修王希曾提督山東學政侍講學士黃鴻中提督湖南學政○大計天下官員卓異官二十八員貪官一員不謹官三十員罷軟官十員年老官五十六員才力不及官四十五員有疾官十八員浮躁官二十六員分別陞賞處分如例○賑雲南嵩明宜良等五州縣地

震災民○丙子諭內閣各省督撫提鎮將朕摺批密諭有同在一省而彼此互相傳看者有隔越隣省而彼此互相通知者亦有經過其地而私相探問者周易曰幾事不密則害成是以歷來會議軍務皆極慎密以防漏洩凡文武大吏之密奏及朕所降密旨俱係國家緊要事件豈不更重於軍務而可輕洩以貽害乎嗣後若有此等一經發覺該部察照洩漏軍機律治罪○諭總理事務王大臣等

穆克登已經召回副都統鄧奇章病故都統穆森年齒稍邁將軍富寧安處大臣甚少朕調袁泰來京俟其到日授為護軍統領同副都統額爾錦前往富寧安處聽其指麾行走○丁丑遣果郡王允禮祭

先師孔子○刑部等衙門議奏廣西生員陳為翰打死何壯深一案巡撫李紱仍照鬪毆殺人律擬絞監候具題應改為斬監候得旨獄獄之道貴於虛公詳慎務得其平不可稍存一毫意見以致畸輕畸重朕駁審陳為翰一案該撫審出實情仍照前擬具題而該部又欲駁重朕籌之再四若依部駁恐將來督撫等俱有意迎合而事情委曲有所未盡若仍照該撫所擬又恐將來督撫等堅執前見不肯改易朦朧結案二者皆於法不得其平朕慎重讞獄期於盡善無弊此案著九卿等會同詳議悉心斟酌以歸至當夫衿棍倚勢欺壓平民固屬不法至於閉戶讀書之人設

或遭土棍欺凌。又豈法所能容。書曰。惟明克允。蓋用法惟明。允乃得其平也。尋議陳爲翰。應仍照關毆殺律擬絞監候。從之。○戊寅祭

大社

大稷

上親詣行禮。○命工部侍郎已泰內閣侍讀學士雙喜。往阿爾泰辦理糧餉屯田事務。○己卯

孝康章皇后忌辰。遣官祭

孝陵。○諭總理事務王大臣等。署四川提督護軍統領納秦。不甚熟練綠旗兵丁之事。調又本多駐劄之化。林副將張成隆協同納秦辦事。入木多兵丁著年羹堯派員前往管轄。○庚辰

上以

聖祖仁皇帝三年服闋。親詣

太廟行祫祭禮。○諭直省督撫等。朕惟古昔帝王。以孝治天下。誠以孝者天之經。地之義。民

之則也。故魯論云。慎終追遠。民德歸厚矣。朕以藐躬。繼承大統。永惟

皇考聖祖仁皇帝顧復洪慈。恩德罔極。中心哀痛。什伯恒情。以日易月。實所不忍。特以

天

地

宗廟大祀。朝會重典。不容久曠。時亦勉從諸王大臣之請。遵禮舉行。惟於宮庭內。素服齋居。默盡此心。每撫時觸景。輒增悽愴。僉見愴聞

之際。哀發於中。潛然出涕。古人云。禮之至者。無文。哀之至者。無節。實非有所做而行。亦非欲以立法定制。垂譽於天下後世也。終身孺慕。寧有已時。今諸臣據二十七月。即吉之文。合辭公請。祫祭釋服。朕以禮制情。勉允所請。於雍正三年二月十二日。祫祭

太廟。釋服即吉。伏念

皇考聖祖仁皇帝御極六十餘年。深仁厚澤。普遍寰區。

賓天之日。凡京畿直省。海濱山陬。士農工賈。白叟黃童。莫不呼號哀泣。孺慕之誠。三載以來。有如一日。今舉行吉禮。應敷告天下。朕嗣位以來。惟日兢兢。嚴恭寅畏。不敢怠息。庶幾克荷。

皇考聖祖仁皇帝付託之重。羣黎百姓受

皇考聖祖仁皇帝教育深恩。當勉勵忠誠。勤守職業。言慈言孝。克友克恭。農夫盡力於南畝。工商致精於器用。毋尚奢侈。毋事浮偽。共期

歸真還樸。比戶可封。以無負

皇考六十餘年培養漸摩之至德。於朕奉先思孝之心。實有賴焉。爾該地方官。通行曉諭。俾薄海黎民。咸悉朕意。○辛巳。以

昭西陵興工。遣官告祭

永陵。

福陵。

昭陵。

孝陵。

孝東陵。

景陵。先是翰林院撰擬祭告

諸陵文。啓奏得旨。

暫安奉殿建爲

昭西陵。乃朕仰體

皇考祗承

慈命之孝思也。應另撰文。詳陳本末。達朕繼述之意。以告祭

景陵。祭文曰。欽惟

孝莊文皇后。躬備聖德。貽慶垂庥。隆

兩朝之孝養。開萬世之鴻基。及大漸之際。面諭

皇考以

昭陵奉安年久。不宜輕動。建造兆域。必近

孝陵。丁寧再三。我

皇考恭奉

慈旨。擇地於

孝陵之南。爲

暫安奉殿。歷三十餘年。我

皇考曆數綿長子孫蕃衍且海宇昇平兆人康阜胤禩祗紹丕緒夙夜思維古合葬之禮原無定制神靈所通不間遠近因時制宜惟義所在即

暫安奉殿建爲

昭西陵以定萬年之宅兆卜吉於雍正三年二月初三日辛未動土興工十六日甲申恭移孝莊仁宣誠憲恭懿至德翊天啓聖文皇后梓宮安奉

享殿恪遵

聖母之遺命仰體

皇考之孝思驗吉兆於己彰考舊章而允合天開地設儲悠遠之休徵巽輦川迴裕繁昌之慶祚伏乞

聖鑒謹告○壬午諭諸王大學士九卿等壬寅之冬朕繼承大統幾務殷繁恐哀戚之中思慮不到或有差誤是以特令廉親王怡親王大學士馬齊舅隆科多四人總理事務迄

今三年服制已滿合奏懇辭具見忱悃准照伊等所請各歸職守辦事此三年來疊遭

皇考

皇妣大事怡親王悉心辦理諸事妥協所委大小事務絲毫不苟小心謹慎竭盡忠誠實屬可嘉著從優議敘隆科多馬齊亦著議敘廉親王自委任以來諸事推諉無一實心出力之處無一有裨政治之言且懷挾私心遇事簸弄希冀搖動衆志攪擾朕之心思阻撓朕之政事即如管理工部之事值

皇考梓宮奉移

山陵需用夫役向例皆用二萬餘名伊密奏費用錢糧太多今減省一半便可足用朕不知舊例准行若非大學士奏阻幾爲其所悞又命管理理藩院事謂外藩到京糜費口糧將科爾沁台吉等於邊口攔阻逐回今不得拜謁

皇考梓宮蒙古等涕泣而歸怨聲載道若非拉

錫奏聞。隨即開示。蒙古等幾致寒心。又如管理上駟院事。奏稱馬圈畜馬太多。請行裁減大半。以省錢糧。其意非欲以彰揚

皇考糜費之名。即欲使馬匹不足。將來設有緩急。無所取資也。至如以破紙書寫奏章。祭所更衣。幄次。油氣薰蒸。刻不可近。又用破損桌案。安奉祝版。種種不敬之事。舉國所知。其他顛倒是非。草率怠忽。悖慢無禮之處。不可枚舉。朕皆容忍寬免。允禩非才力不及。智慮不到之人。而存心行事若此。誠不知其何意。且朕之於允禩。崇重信任。伊不當如此待朕也。其應否議敘之處。著秉公會議具奏。尋議廉親王允禩挾私懷詐。阻撓政事。

山陵典禮至重。竟將定例夫役。誑奏裁減。外藩叩謁甚衆。竟於邊口攔阻。幾失蒙古等心。他如請減院馬。破損奏章。供奉

祝版。不虔預備。油幄草率。盛京陵寢。需用紅土。違例發價。就被採買。不忠不敬。

應議處之案。實難枚舉。允禩有罪無功。不應議敘從之。○裁浙江杭州。温州衛所千總共九員。○癸未。諸王大臣等奏言。服制已滿。恭請

皇上於乾清宮聽政。一應齋戒之處。俱照吉禮舉行。再圓明園水土清潔。允宜隨時駐蹕。得旨。國家大禮。

皇考

皇妣。雖有輕重之別。而朕之私衷。則

皇考

皇妣。不容分視。外廷吉禮。已令照國家典制舉行。若朕於宮中。務期獨盡人子之禮。據奏駐蹕圓明園。不但朕心實爲不忍。

皇考

皇妣之事。朕何可有所分別。況今之二十七月。並非勉強從事。沽取孝名。以爲觀美。祇求朕心之安耳。禮盡則朕心自安。朕意已定。諸王大臣毋得再奏。○甲申。恭移

孝莊文皇后梓宮安奉

昭西陵享殿遣官致祭○諭靖逆將軍富寧安軍興以來已經數載爾在軍前効力小心謹慎提督路振聲係初次派往之人在邊地効力已久現今策妄阿喇布坦之事未完又不便撤兵若以兵丁久戍之故即令更換轉令伊等軍前數年勞績有初鮮終矣但爾等在外年久甚廬朕懷今特賞帑金二十萬兩內給將軍二萬兩提督五千兩其餘按弁兵効力年分以爲賞賜之等次綠旗兵丁向係輪班行走伊等作何賞賜之處爾會同路振聲商酌所賞銀兩著行文年羹堯動西安庫帑派賢能官員解送賞給○乙酉諭各省督撫提鎮等凡司道知府副將叅遊等官出京之時奏請訓旨朕或言及地方之事間有與督撫提鎮諭旨中批示所不能盡者向伊等諭及今各省督撫提鎮往往有奏稱某屬官口傳上諭臣即遵奉施行等語如此則大非朕

意矣督撫提鎮等聞屬官口傳旨意必當再行奏聞俟批准之後方可奉行若地方有應行事宜朕自諭部傳旨或摺批密諭豈有命微員隨便口傳之理况伊等奉朕面諭時亦有不能明晰領會傳宣錯悞而督撫提鎮覆奏時竟與原旨不符者甚多此等皆大有關係且伊等至彼處傳旨時只應在衙署內密向本人傳宣若於大庭廣衆以屬員而傳旨與上司亦屬非體皆非朕本意也○鑲紅旗蒙古都統兼右翼前鋒統領吉當阿緣事革職以寧夏將軍蘇丹爲正紅旗滿洲都統兼管右翼前鋒統領陞步軍總尉加副都統銜席伯爲陝西寧夏將軍○貴州巡撫毛文銓疏言貴州山高多雨積貯米石恐致潮濕霉變得旨積貯倉糧特爲備荒賑濟之用南省地氣潮濕貯米在倉一二年便致霉爛實難收貯著改貯稻穀似可長久應否改折稻穀收貯之處著九卿詳議具奏尋議南方諸省

土脉潮濕。兼有嵐瘴。積貯倉米。易致浥爛。不若稻穀可以耐久。嗣後江南。浙江。福建。湖廣。江西。四川。廣東。廣西。雲南。貴州等省。存倉米一石。改換稻穀二石。加謹收貯。需用之歲。碾舊貯新。尤爲盡善。從之。○旌表山東曹縣烈婦張坦妻沙氏。拒姦不污。被毆殞命。給銀建坊。入祠致祭如例。○丙戌。遣官祭

歷代帝王。○裁江南清江浦理事同知一員。○丁亥。

### 上親耕耤田。詣

先農壇致祭畢。更服。至耕所。仍行四推禮畢。上御觀耕臺。命裕親王廣寧。怡親王允祥。莊親王允祿。行五推禮。吏部尚書隆科多。戶部尚書張廷玉。禮部尚書賴都。兵部尚書盧訥。刑部尚書勵廷儀。工部左侍郎薩爾納。都察院左都御史尹秦。通政使司通政使圖蘭。大理寺卿覺羅常泰。行九推禮。各以次耕如儀。上御齋宮。順天府官員率耆老農夫行禮畢。至

耕耤所。農夫終畝。王以下各官行慶賀禮。賜茶。停止筵宴。○戊子。命修廣寧門外石路。○鑲白旗護軍統領宗室汝福。緣事革職。陞正藍旗漢軍副都統濟星爲鑲白旗護軍統領。○己丑。諭兵部。前條奏議行各省齎送本章。一日限行四站。定限以來。聞驛站時有苦累者。蓋各處驛站。平險不一。遠近不齊。或遇陰雨連綿。河水暴漲。途路泥濘。急馳甚艱。不能一晷日行四站者有之。國家定法。必寬嚴得中。始可永遠遵行。嗣後齎送本章。其難行四站者。應將途路艱難情由聲明。稍爲通變。至黑龍江。平常本章著照將軍陳泰所請。以三站爲限。○諭撫遠大將軍年羹堯。據岳鍾琪奏。稱青海郡王額爾得尼。厄爾克托克托。索所屬部落窮困流離。資生窘乏。親王戴青和碩。齊察罕丹津等。所屬部落雖稍能存活。亦屬貧窮。爾身爲撫遠大將軍。凡西陲軍務。調發糧餉。綏輯遠人。皆爾之責。理應酌量

事勢緩急。人口多寡。盡心籌畫辦理。乃僅發銀一萬兩賑濟。此諸部落流離失所之衆。豈萬金所能遍給。是知爾於諸務皆未實盡其心矣。托克托素等。遭叛賊擄奪。投命來歸。全賴安插得所。俾其衣食有資。今爾既不能籌畫於未然。又不克拯濟其現在。如諸部落內。或有一二人窘急萬難自存。潛逃遠匿。竄入策妄阿喇布坦之地者。朕必重治爾罪。○陞索倫副總管外三。爲正藍旗漢軍副都統。○科爾沁扎薩克鎮國公圖努滿爾故。遣官致祭。○庚寅。諭內閣。禮部。欽惟皇考聖祖仁皇帝德業生安。功隆參贊。光被四表。協和萬邦。集千聖之大成。超百王而首出。鴻猷駿業。史不勝書。今景陵大禮告成。應擇吉恭建聖德神功碑。備紀耿光大烈。以昭垂萬世。永永無極。著敬謹會議具奏。尋議聖祖仁皇帝德業崇高。蟠天際地。允宜建立。

聖德神功碑。昭垂萬世。其應辦事宜。照例交與各該衙門敬謹辦理。得旨。是。依議。○辛卯。清明節。遣官祭

永陵。

福陵。

昭陵。

昭西陵。

孝陵。

孝東陵。

景陵。○以翰林院修撰王世琛充日講起居注官。○予故太子太傅文華殿大學士吏部尚書張鵬翮祭葬。加祭一次。贈少保。謚文端。禮部尚書張伯行祭葬。加祭一次。贈太子太保。謚清恪。○壬辰。諭河南巡撫田文鏡。據奏。欲以存司耗羨。彌補州縣無著虧空。既以填實倉庫。又省案牘之煩。固屬美舉。果如此行。本內或作承追督催各官。代爲完結。仍將該犯照例處分。則可。若直將通省公用耗銀。明爲



貪劣叅員抵補虧項。是只以錢糧爲重。而國家懲貪殫惡之法轉輕矣。如何其可。無論謹飭廉員。聞之心不甘服。寧不大啓一切貪員希冀之念乎。斯乃創始之舉。當審酌而行。○工部左侍郎金世揚緣事革職。以原任工部左侍郎郝林爲工部左侍郎。○戶部議覆漕運總督張大有疏言。漕艘輓運。全用本軍子弟駕運。應先令頭舵水手數名教習。自雍正三年爲始。一年內能教成本軍十分之六七者。記功一次。不能教習過淮時。查驗仍用雇募水手五分以上者。答責并記大過一次。運弁以上叅處等語。應限八年。以次更換。頭工舵工須俟本丁嫻熟方可更替。從之。○又議覆八旗家奴或自行贖身。冒於旗民之間。或隨伊主仕宦。私立產業。鑽謀贖身者。俱查明歸於本旗。如果伊主念其累世効力。情願令其贖身爲民。檔案可查。以後不得借端控告。庶定例遵行。訟端可息矣。從之。○兵部議覆

直隸總督李維鈞疏言。京衛歲考取入武童共一百名。燕山等六衛地丁編屬順天。保定河間。正定四府。衛學武童亦應分歸四府。請於順天大宛二縣各取進二十名。歸入順天府武學。其餘六十名於保定河間二府各取進二十名。惟正定府又分設直隸州。應於正定府取八名。趙州冀州各三名。定州晉州深州各二名。俱撥入本府本州儒學。庶人材相埒。額數均平。應如所請。從之。○癸巳諭大學士等。進勦青海。臬子山等處兵弁具人材可觀。技勇優長者著將軍岳鍾琪揀選保奏。守備二員。千總二員。把總二員。馬兵四名。總兵官黃喜林。主嵩。紀成斌。宋可進。孫繼宗。每人保奏守備一員。千總一員。把總一員。馬兵四名。文到限三日書名報部。候旨調來引見。錄用。○頒示工部製造盔甲式樣。每旗各一副。又令工部收貯二副。永爲定式。○增湖北省各學取進文童額數。江夏武昌興國州黃岡

蘄水黃梅黃陂京山景陵沔陽州孝感江陵公安石首監利襄陽十六州縣向係大學照府學額各取進二十名大冶雲夢二縣向係中學升為大學各取進十五名應山縣向係小學升為中學取進十二名○裁安徽鳳陽右衛歸併中衛管理○甲午

孝昭仁皇后忌辰遣官祭

景陵○江西巡撫裴率度遵旨摺奏查廣信府之封禁山相傳產銅舊名銅塘山明代即經封禁其中樹石充塞荒榛極目並無沃土可以資生亦無頑民盤踞在內此山開則擾累封則安寧歷有成案康熙五十九年鉛山匪類擒獲之後此山搜查二十餘日並無藏匿據實奏聞得旨當開不得因循當禁則不宜依違但不存貪功圖利之念實心為地方興利除弊何事不可為也在秉公相度時宜而酌定之○增四川省各學取進文章額數嘉定州向係大學照府學額取進二十名成都

宗慶州簡州閬中南部遵義眉州邛州雅州瀘州十州縣向係中學升為大學各取進十五名溫江新繁新津郫縣已縣江津南充宜賓富順奉節綏陽洪雅遂寧十三州縣向係小學升為中學各取進十二名○乙未諭戶部雲南四川鼓鑄錢文聽其流通各省以便民不必禁止出境○一等公鄂倫岱緣罪革退以其弟領侍衛內大臣夸岱襲爵○丙申以翰林院檢討衛昌績著日講起居注官○戶部議覆雲南巡撫楊名時條奏一滇省丁銀有民丁軍丁之分民丁請照直隸例攤入田糧完納至軍丁之額自二錢八分起有重至六錢二分者難與輕額民丁一槩均攤應俟查出吳逆平後隱匿田土量加增攤○民間田產先由吳逆賊重差繁減價絕賣今承平墾熟之後指定原價告找告贖爭控不休應通飭永禁○雲南府屬舊有三泊縣在萬山之中先併入昆陽州遠至二百餘里請改

歸相近十餘里之安寧州。勢方聯屬。可以便民。糧儲道爲通省道員之首。請改爲守道。永昌道轄迤西數郡。有稽察地方之責。請改爲巡道。均應如所請。從之。添設河南開封府南北兩岸管河同知各一員。懷慶府管河同知一員。從副總河嵇曾筠請也。丁酉。

上召諸王滿漢文武大臣等入諭曰。朕因貝子允禩。行事悖謬。在西寧地方。縱容家下。生事妄爲。特發諭旨。著都統楚宗。往彼約束。今

據楚宗摺奏。臣至西大通。允禩並不出迎。請安良久。始令臣進見。允禩氣概強盛。形色如前。並無憂懼之容。臣令出院跪聆諭旨。允禩並未叩頭。即起立向臣云。諭旨皆是我有何說。我已欲出家離世。有何亂行之處。其屬下人等亦毫無敬畏之色等語。朕遣楚宗到彼傳旨。約束其屬下之人。原恐其生事騷擾。且冀其改悔前愆。遵守法度。曲爲保全。乃允禩肆行傲慢。全無人臣事君之禮。且稱出家離

世等語。其意以爲出家則無兄弟之誼。離世則無君臣之分也。荒誕不經如此。朕弟兄中如允禩。允禩。允禩。允禩。允禩等。在

皇考時。結黨妄行。以致

皇考聖心憂憤。日夜不寧。

皇考賓天時。允禩從西寧來京。並不奏請

太后安。亦不請朕安。反先行文禮部。問其到京如何行禮儀注。及在

壽皇殿叩謁

梓宮後。見朕。遠跪不前。毫無哀戚親近之意。朕向前就之。仍不爲動。彼時拉錫在旁掖之。使前。伊出。遽將拉錫罵詈。復忿然至朕前云。我本恭敬盡禮。拉錫將我扯拽。我是皇上親弟。拉錫乃擄獲下賤。若我有不是處。求皇上將我處分。若我無不是處。求皇上即將拉錫正法。以正國體等語。朕亦不意其咆哮無禮至此也。及梓宮奉移

山陵時。朕因允禩倨傲不恭。且與拉錫佛倫爭鬪。降旨訓誡。而允禩忽從帳房中出。勸令允禩跪。而允禩即跪。是事事聽從允禩之言。爲其指使。此其明驗也。又允禩妻病故。朕厚加恩卹。乃伊奏摺中。有我今已到盡頭之處。一身是病。在世不久等語。朕思允禩恭代朕躬奉祀

景陵。任至重也。又以月子加封王爵。有何屈抑。而出此怨望之語乎。又允禩身爲大將軍。將不應支用之錢糧。濫支數萬。以市恩邀譽。而不知有違定制。例應賠補。此皆國帑所關。何得任意侵取乎。至若允禩奉旨送澤卜尊丹巴胡土克圖。至張家口外。乃託病不行。又私與允禩暗相往來。餽送馬匹。允禩回書。有事機已失。悔之無及之語。悖亂已極。允禩又私行禳禱。將雍正新君字樣連寫入疏文之內。甚屬不敬。蓋由允禩等私結黨援。牢不可破。朕若一經訊詰。則國法難容。朕居心寬大。不

忍爲此。務欲保全骨肉。不事深求。仰體

皇考之心。爲心也。阿靈阿、鄂倫岱二人。原係允禩等之黨。首罪惡至重。從前懷毒逞姦。上費皇考無限慈懷。屢干

聖怒。當日因允禩得罪。在遙亭地方。將伊門下太監審訊。供云。阿靈阿、鄂倫岱乃我主子之黨。問此二人。便知彼時阿靈阿、鄂倫岱在傍。無言可辯。顏色改變。但隨口支吾抵飾。豈能欺君父與衆耳目乎。戊子年。擊問允禩。既而

寬赦。次年春

皇考從霸州回鑾。自行宮啟行。至南紅門。言及鄂倫岱等結黨之事。

皇考震怒。沿途切責鄂倫岱。行至三十里。而聖怒未解。鄂倫岱悍然不知畏懼。亦無一毫愛君之心。朕在傍悚惕不安。向妻徵額云。

聖躬初愈。今又震怒。於風沙中行三十里。若少頃

聖駕出。又復動怒。爾先行奏勸。我當隨同奏懇。

及

聖駕出。而鄂倫岱仍悍然向前迎立。以觸

聖怒。致

皇考復嚴加切責。婁徵額進前奏勸。朕遂泣奏云。

皇父聖體初愈。此等悖逆之人。何足屢煩

聖心。亂臣賊子。自有國法。若交與臣。便可即行誅戮。懇奏再三。

皇考之怒方解。又在熱河時。

皇考聖體違和。大臣侍衛等俱請安。求瞻仰

聖顏。惟鄂倫岱並不請安。且率同乾清門侍衛等。每日較射遊戲。鄂倫岱悖惡多端。每事干

犯

聖怒。

皇考行圍哨鹿時。曾悉數其罪。令侍衛五哥鞭責之後。令其前往邊地料理驛站。伊到彼處。並不撫恤驛站之人。反將驛站事務敗壞。致蒙古等不能存活。朕即位後。聞知其事。特加

恩賞賚數萬金。另遣員前往料理。以甦蒙古

之困。鄂倫岱種種罪惡。俱行寬免。從驛站調

回。仍令為領侍衛內大臣。又為都統。伊之父

祖。朕皆厚加恩典。鄂倫岱並無感激報効之

念。在朕前並不無一語奏謝。鄂倫岱引見本旗

襲職人員。明知罪人之子。例不得承襲。乃違

例帶來引見。朕亦寬免其罪。伊身為火器營

統領。乃於操練兵丁之處。並不親到一次。去

年伊從鄂羅斯回來。奏請將蘇尼特為賊之

台吉數人。調來京師披甲。朕諭以不如仍留

本處。交扎薩克王等自能管束。令其悔改。如

不能悔改。再依爾等所奏行。鄂倫岱並不遵

照朕旨。乃自行繕寫。內有云

皇考時。調來披甲。朕心不忍等語。其意以為

皇考欲行之事。朕不忍行。欲將歸過

皇考之名。加之於朕也。朕有硃批諭旨降與阿

爾松阿者。令鄂倫岱轉交。乃鄂倫岱於乾清

門衆人前。將朕諭旨擲之於地。且極力黨護

阿爾松阿將其死罪承認在身。此等頑悍之狀。有是理乎。朕每召諸王大臣等。頒發諭旨。鄂倫岱從未有一次點首心服。前召旗下大臣面諭云。近日大臣等辦事。將從前積習。已改十之七八。若再整頓一二年。便可全改。朕嘗慮向來惡習。恐非誅戮一二人。不能挽回。今看來可不用誅戮矣。為此朕心甚喜。諸臣無不點首喜動顏色。惟鄂倫岱畧無喜容。俯首冷笑。昨因辦理旗下之事。在衆人前。將一原當侍衛之人。問鄂倫岱。鄂倫岱並未認識。妄奏云。此人平常。朕責以欺罔。鄂倫岱奏云。我信口回奏。含忿搖頭。故激朕怒。由此觀之。總因伊私相依附之人。未遂其願。故將怨望皇考之心。怨望於朕。鄂倫岱之罪。與阿靈阿等。雖置極典。不足以蔽其辜。朕念係

皇祖妣

皇妣之戚屬。其父又經陣亡。不忍加誅。從寬發往奉天。令與阿爾松阿一同居住。伊既遠離

京師。庶不致遇事生波。煽惑朝政。嗣後大小臣工。若有怙惡不悛。暗附其黨者。朕必明正其罪。置之重辟。使伊等黨援解散。無附會濟惡之人。正所以曲為保全之計。總之朕兄弟中。積習沉痾。既不能懾之以威。使其遷改。而加意施恩。又終不能使之感化。朕衷深為抱愧。不過竭盡朕之心力。曉諭內外臣工。令伊等不能為害於國家。若必盡拔根株。朕心實有所不忍。寧可使天下後世議

皇考及朕優容寡斷。過於姑息耳。不得議

皇考與朕見不及也。朕種種苦心

上天垂鑒。

皇考在

天之靈照察。惟欲爾等滿漢文武大臣。共知朕心。天下後世。亦共知朕心耳。○陞戶部左侍郎李周望為禮部尚書。○以正黃旗蒙古副都統費雅思哈署鑲藍旗護軍統領。○戊戌兵部議覆。凡文武大小官員兼世職。並叅領

佐領獲罪革去本職者。如因貪污不端獲罪。無論所兼之世職。叅佐領俱行黜革。若因有玷官箴而獲罪。革退所兼之叅佐領。其世職應否承襲。令該旗請旨。其部院官員因病告休者。兼職及世襲之俸。暫行停給。文員俟病痊補授。武員具呈當差之日。仍行給俸。再由世職佐領挑爲侍衛者。若實係貧乏不能行走。著領侍衛內大臣奏。革侍衛令以原官回該旗行走。若因懶惰規避。品行不端。叅革者。將世職佐領俱行革退。令應襲之人襲替。請永定爲例。畫一遵行。從之。

大清世宗敬天昌運建中表正文武英明寬仁信毅大孝至誠憲皇帝實錄卷之二十九

大清世宗敬天昌運建中表正文武英明寬仁  
信毅大孝至誠憲皇帝實錄卷之三十

監修總裁官光祿大夫經筵講官太僕議政大臣保和殿大學士兼兵部尚書總理兵部事務三等伯加十五級戶部尚書  
總纂官光祿大夫經筵講官太僕議政大臣保和殿大學士兼兵部尚書總理兵部事務三等伯加十五級戶部尚書  
纂修官光祿大夫經筵講官太僕議政大臣保和殿大學士兼兵部尚書總理兵部事務三等伯加十五級戶部尚書

事等伯加十三級戶部尚書經筵講官太僕議政大臣保和殿大學士兼兵部尚書總理兵部事務三等伯加十五級戶部尚書

翰林院掌院學士四品頂戴光祿大夫經筵講官太子太僕兼太僕寺卿大學士兼禮部尚書四品頂戴光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事務三品奉直

數修

雍正三年乙巳三月己亥朔增山東省各學

實錄卷三十

取進文章額數歷城章邱泰安州萊蕪德州  
武定州濱州滋陽滕縣濟寧州魚臺單縣曹  
州曹縣東平州沂州四氏學聊城高唐州濮  
州益都壽光安邱諸城掖縣膠州蓬萊萊陽  
二十八州縣向係大學照府學額各取進二  
十名新城濟陽長清陽信海豐樂陵商河利  
津霑化寧陽鄒縣城武定陶鉅野鄆城汶上  
東阿陽穀堂邑茌平館陶臨淄昌樂莒州日  
照高密即墨棲霞寧海州文登三十州縣向

係中學升為大學各取進十五名嶧縣費縣  
觀城高苑蒙陰五縣向係小學升為中學各  
取進十二名○庚子兵部帶領左右兩翼軍  
政卓異官員引見

上諭曰保舉卓異乃該旗大臣之要務非陞進  
官階可比必將漢仗好曾經効力應保之人  
薦舉方為合宜其人平常不應保者伊等或  
受請託入於其間朕必將徇情薦舉之人治  
罪○調正白旗漢軍都統希爾根為正藍旗

實錄卷三十一

漢軍都統以領侍衛內大臣公夸岱為正白  
旗漢軍都統仍兼管領侍衛內大臣事務○  
鑲白旗漢軍都統楊宗義緣事革職陞西安  
巡撫范時捷為鑲白旗漢軍都統○考試翰  
林及部院進士出身等員於  
太和殿以備學政典試等差也○吏部議覆  
左副都御史江球條奏考試月官履歷摺子  
止須簡明直敘無用繁冗履歷之後請增一  
條議以觀其才識應如所請從之○辛丑諭



兵部部院官之兼武職者。但由該旗保舉。其在部院衙門行走如何之處。該旗大臣並不得知。俱令部院衙門於京察時察覈。○諭撫遠大將軍年羹堯爾。欲令康濟鼐駐劄西藏。所議雖是。但康濟鼐居住阿里地方。亦甚緊要。不知康濟鼐情願與否。且與阿爾布巴隆布奈等。彼此能和睦與否。今令康濟鼐爲總領。帶領伊屬下唐古特往居西藏。阿爾布巴等倘有不服康濟鼐。孤身在彼。雖欲効忠勢。必不能朕意。康濟鼐仍兼兩處往來行走。似有裨益。若令康濟鼐居住西藏。伊即欲往阿里地方。照管亦不可得。此事極宜斟酌。如以康濟鼐兩處行走。爲是。康濟鼐往阿里地方去後。令何人居住西藏。總領辦事。著會同侍郎鄂爾琿詳慎妥議。辦理。尋議康濟鼐應遵旨於招地方阿里地方兩處來往。若康濟鼐往阿里地方。其招地方事務。即著貝子阿爾布巴總領辦理。從之。○裁江南掌印都司一員。

○壬寅轉戶部右侍郎蔣廷錫爲左侍郎陞內閣學士吳士玉爲戶部右侍郎。仍兼內閣學士裏行。○以陝西洮岷副將張元佐署四川松潘總兵官。○增直隸省各學取進文章額數。文安通州寶坻豐潤蠡縣高陽河間任邱景州冀州定州南宮東強清豐滑縣東明開州長垣十八州縣。向係大學照府學額。各取進二十三名。薊州盧龍遵安昌黎樂亭博野祁州安州新安獻縣阜城靜海寧津天津衛萬全蔚縣衡水安平雞澤成安清河魏縣南樂內黃二十四州縣。衛向係中學。升爲大學。各取進十八名。香河順義深澤青縣西寧靈壽行唐贊皇新河高邑無極新樂曲陽廣宗唐山內邱十六縣。向係小學。升爲中學。各取進十五名。○癸卯諭吏部科道外轉。向屬降用。是以令其將科道原銜帶於新任。前御史陳時夏越分奏事。朕曾嚴飭。今河南管河道給事中陳世倌。係專管錢糧工程之員。在

副總河嵇曾筠處甚是掣肘於緊要工程所需物料不即給發價銀以致遲誤去歲江南撥到河兵三月不給兵餉河道近省尚屬易知他省所用道員倚恃科道職銜抗違上司亦未可定朕用人行政豈可令上下不遵定分乎除新用許容柯喬年陸賜書三人仍帶科道職銜外其餘兼科道銜之各省道員各該督撫問明情願不兼科道銜在道員効力者留任其有不願在道員者仍調回原任再陝西洮岷道單疇書去年總督年羹堯陛見時奏伊才力不及操守不廉朕看此人老成端謹必係不能迎合今年羹堯之所致單疇書辦事才情或有不及斷非操守不廉之人著調回以卿員用○禮部疏奏奉旨加封四海四瀆及天津之大沽海口浙江之海潮湖廣之洞庭諸神字號請遣官致祭得旨加封神號與祭告大典有別著停派大臣官員令筆帖式等齋祭文香帛前去烏喇地方即著將

軍致祭餘省附近祭所或督撫提鎮前往致祭若相隔太遠布政按察兩司內一員前往○鑲黃旗漢軍副都統岳興阿摺奏旗下辦理事務並無定例往往不能一時即定從前兵部頒給中樞政考一書日久破損請將中樞政考及現行則例每旗給發一部得旨八旗大臣等遇有查例之處無有則例不時向部內行查亦屬非宜爾等將中樞政考與現行則例俱向部查取如無清文者補譯清文及部內一應定例凡於八旗有用者亦俱查取再自雍正元年以來朕所辦理八旗事務及降旨改定事件俱另立一冊籍將此為例以便遵依查考嗣後八旗內有一旗所奏事件經朕辦理之處即行文知會八旗遵為成例則八旗事務不致各有參差矣○甲辰增廣東省各學取進文童額數南海番禺東莞順德新會香山海豐海陽潮陽揭陽澄海十一縣向係大學照府學額各取進二十名三

水增城保昌英德興寧長樂龍川程鄉饒平 儋州十州縣向係中學升為大學各取進十 五名新寧和平永安大埔惠來平遠鎮平開 平吳川東安西寧十一縣向係小學升為中 學各取進十二名○乙巳都察院叅奏修造	太祖	太宗	世祖	神牌管工部事廉親王允禩草率不敬應將允 禩並堂司官按律治罪	上召入大學士九卿等諭曰	祖宗神牌關係甚大允禩供稱祇查看	太廟	奉先殿所修	神牌至他處	神牌修造時並未查看伊乃承辦工部事務理 應俱行親往敬謹看造乃漫不經心祇交與 司官草率從事以致修造時日未久遂至漆
---	----	----	----	---------------------------------	-------------	-----------------	----	-------	-------	--

流字漫且允禩並非思慮不到不能辦事之 人特有意草率欲陷朕以不敬之名耳又聞 伊欲卸罪於司官將已給之口供復行掣回 此罪名不但司官難以承當即允禩又可以 承當乎朕既欲寬伊罪惟有躬自引咎而已 據爾等奏稱康熙三十七年	天壇配享	神牌	皇考特諭佛保監督內府工匠修造彼時允禩 未將舊例查奏朕在諒陰之中心神恍惚未 及周詳是朕疎忽之過也今	神牌應如何敬謹修造之處大學士會同九卿 確議具奏再各處	壇	廟所供	神牌著太常寺堂官前往敬謹閱視如有應修 之處一併議奏尋議現據太常寺敬謹瞻視 祈穀壇神牌有塌陷裂縫之處相應重新修理
--	------	----	--	-------------------------------	---	-----	---

天壇

地壇

太廟

奉先殿神牌微有脫金落青應粘補修理請於

天壇

祈穀壇派工部內務府司官二員

地壇派司官二員

太廟

奉先殿派司官二員各督率修理其興工告竣

日期交與欽天監選擇敬啓

神牌並修完供奉之儀令禮部照例辦理從之

○兵部議覆川陝總督年羹堯疏言臬子碁

子等山爲匪類潛匿之所相度形勢惟他拉

渡川東通莊浪西通刀林又仙米寺四圍之

山林木叢茂盜賊俱由北路出沒應於他拉

渡川有水之地設立遊擊一員千總一員把

總二員馬步兵五百名請即移涼州高古城

遊擊等員調兵駐防仙米寺應設立守備把

總各一員馬步兵三百名請即移高溝堡守

備黑松堡把總調兵駐防應如所請從之

裁直隸延慶衛守備一員梁城所千總一員

保定左所教授訓導千總各一員改天津衛

爲州設立知州一員改衛經歷爲吏目教授

爲學正其保定左所學生員并入保定府學

每試額取童生十八名分入清苑等六州縣

酌量加增原附左所考試之任邱衛軍籍生

員歸入河間府學延慶衛生員分入昌平延

慶二州學每試額取童生亦分撥各府州學

考取從直隸總督李維鈞請也○以順承郡

王錫保爲宗人府宗令○丙午增山西省各

學取進文章額數陽曲榆次文水臨汾洪洞

曲沃翼城聞喜汾陽介休忻州代州長治蒲

州臨晉猗氏解州安邑澤州高平陽城絳州

太平襄陵二十四州縣向係大學照府學額

各取進二十名絳縣臨縣大同蔚州朔州遼

州平定州孟縣崞縣夏縣沁州稷山十二州

縣向係中學升爲大學各取進十五名黎城壺關繁峙保德州興縣吉州隰州七州縣向係小學升爲中學各取進十二名○丁未諭戶部豫省陽武封邱中牟三縣從前兩被水災聞其近隄地畝有被水漲漫流爲支河者有水去沙停變爲沙灘者有地土變爲鹽鹼者昔年特遣大臣專司堵築又念民間輸賦維艱於蠲免之外將應納錢糧寬期分年帶徵今幸修築功成河流順軌民獲安居但念被災之後元氣未復若將新舊錢糧竝徵民力未免竭蹶且恐被水與停沙之地以及鹽鹼之區一時未能耕種則國課何由而辦朕心深爲軫念著戶部侍郎托時前往會同巡撫田文鏡將三縣昔年被災地方悉心查勘其地土被災之輕重及荒地成熟之遲早與舊欠新徵之錢糧應徵應免之處一一確實分別定議○以貴州提督趙坤爲鑾儀衛鑾儀使陞雲南永北總兵官馬會伯爲貴州提

督山西助馬路叅將柳時昌爲雲南永北總兵官○議政王大臣等遵旨議覆條奏內稱查得大將軍年羹堯條奏善後十三款內一款打箭爐以外木雅等處共添設兵六千名議裁四川重慶川北二鎮化林一協并將遵義等營共裁汰兵三千四百名查化林地方係打箭爐扼要關隘若將所有額兵一千名止留五百又於此內分兵二百名看守打箭爐則四川之西邊兵勢甚微矣至重慶總兵官標下額兵二千名重慶地方係在四川大江沿邊據湖廣荊州上流若將總兵官并兵一千名裁汰則四川之東邊兵勢甚微矣再川北總兵官駐劄保寧額兵二千名四川保寧與陝西漢中相爲犄角若將保寧總兵官并兵一千名裁汰則四川之北邊兵勢甚微矣在昔於兩省接壤之處相其地勢多設兵丁者特爲互相聲援且防查各省盜賊故也古來皆以內地爲重外地爲輕則裁內地

之兵安設邊外正未可以爲得計請將內地額設官兵俱照常存留再打箭爐至巴塘地方九百里將內地官兵六千名安設邊外如何使不侵擾打箭爐之土司部落裏塘巴塘之番人致生事端至番地只產青稞不產米穀內地官兵自來習於穀食如何挽運米糧蓋造城屋之處竝未詳議請仍今年羹堯確議具奏應如條奏所請將年羹堯議裁之川北重慶化林遵義巫山達州各處鎮協并經制官兵仍照常設立再查年羹堯奏請打箭爐之外添兵六千名又黃勝關之外潘州等處添兵二千四百名兵既太多口外撥餉不易又恐騷擾番民亦未可定今川北等處兵二千五百名既不便裁去應將此二處所設兵丁八千四百名內減去二千五百名其餘之五千九百名兵丁尚多亦應酌量裁減應今年羹堯將裁減兵丁及挽運糧米蓋造城屋之處分晰具題到日再議從之○戶部議

覆湖北巡撫納齊喀疏報荊州府巴東縣北紙倍溪地方忽涌鹽泉居民煎煮每日得鹽約二千餘觔請照淮鹽行引於楚北各州縣分銷應如所請從之○四川巡撫王景灝疏報成都等府開墾雍正元年分田地六十八頃有奇下部知之○裁湖北掌印都司一員都司經歷一員○準噶爾厄魯特台吉策妄阿喇布坦遣使臣博洛胡爾哈進表貢獻方物賞賚如例○戊申諭大學士等前聞南坪壩番人聚衆梗化朕料其必有起釁之由曾降諭旨今據提督岳鍾琪摺奏叛番懼罪逃散拏獲起事首惡喇嘛番子拔那等九名其餘脅從逃匿者現在陸續投誠數日可以安輯此事實因石泉營守備孟繼先魚肉番人縱兵騷擾茂州知州邊鴻烈擅作威福因修城苛虐番人以致伊等憤激殺傷兵民等語番人敢行悖逆自有憲典至守備知州等既有苛刻激成之由必須審出實情分別治罪

以伸國家之法。以服番衆之心。著刑部侍郎黃炳前往審理。○諭八旗都統等。凡驍騎校缺出。定例俱於本佐領下揀選補授。嗣後若本佐領下無可補之人。著請旨於該旗揀選引見補授。將此旨宣示八旗一體遵行。○左副都御史謝賜履。緣事降調。陞大理寺卿梁文科爲都察院左副都御史。○吏部議覆直隸總督李維鈞奏言。直隸向年未設藩臬兩司。故通永天津霸昌大名口北五道俱挂山西山東河南等布按二司銜。今直隸守巡二道既改爲布按二司。其五道等俱應改直隸布按二司銜。應如所請。從之。○添設安徽提督學政一員。從都察院左都御史蔡珽請也。○添福建臺灣府新設彰化縣儒學教諭一員。額取童生八名。改諸羅縣原轄之羅漢門地方歸臺灣縣管轄。從浙閩總督覺羅滿保請也。○以故績順公沈之義子沈鐸襲爵。○己酉諭八旗大臣等。爾等已經增給親丁錢

糧。其前鋒參領護軍參領副護軍參領等官行走之處。既多守衛之責。又關緊要。應如何加恩給與親丁錢糧之處。公同會議具奏。尋議。前鋒參領護軍參領向例給與親丁一名。每月錢糧一兩。今請增給二兩。再折給米銀一兩。其前鋒侍衛副護軍參領向無親丁。今亦給與一名。每月給錢糧一兩。折給米銀一兩。得旨。前鋒侍衛亦照依參領給與。○特賜原任正黃旗副都統阿南達謚恪敏。造墳立碑。致祭一次。從其子巴爾庫爾副將軍阿喇衲遺本奏請也。○喀喇沁輔國公嘎爾麻色楞故遣官致祭。○庚戌。廣西巡撫李紱疏言。廣西捐穀價值每石三錢。今據原任廣西布政使今陞通政使王沛懌到粵。咨稱原捐穀價每石實收一兩一二錢。除發穀價外。餘銀幾及百萬。並無著落。請將從前經手之督撫司道以下等官質訊得旨。大凡開捐處稍有盈餘。亦人所共知。如將此項盈餘。即作枉法



婪贓一律治罪。其他捐納之省。必致生事訛詐。但不清查。則不肖官員。竟視此爲分內之事。任意肆行矣。著行文各省。取具各員確供。咨送廣西。并咨原藩司黃國材處。將收捐始末情弊奏聞。如敢欺隱。從重治罪。○湖北巡撫納齊喀惠病。請假調理。以湖廣總督楊宗仁兼署巡撫事。○辛亥。諸王宗室等。以建立宗學具摺謝恩。

上召入乾清宮。諭曰。書云。以親九族。九族既睦。爾等宗室之內。自應和協。彼此保護。骨肉之親。豈可相爲讎敵乎。朕在藩邸時。雖知宗室惡習。但孔子云。不在其位。不謀其政。又云。非天子不議禮。不制度。不考文。朕今即位。教育愛護宗室。俱係朕躬職分之事。前朕議處蘇努。吳爾占之罪。伊等竝非與朕舊有隙怨。祇以骨肉之內。彼此傾陷。互爲讎敵。一有微隙。可乘。羣起而攻之。則其人何所容身乎。今我宗室內。互相讎陷之習。皆由蘇努所致。凡讎

當解不當結。所謂九世之讎。必報者。指敵國而言之耳。非言宗族骨肉也。以骨肉而信下人。無影響之言。彼此視爲讎敵。反與旁人相親。豈非輕重倒置乎。今朕宗室僅千餘人。尚不及十佐領人數。若如此互相傾陷。何所底止。朕甚惜之。惟望爾等習爲善人。爾宗室內。不但同心協力。報効國家之人。爲朕所深眷。只安靜守分。不干法紀之人。即在朕眷注之中。若妄行犯法。朕必照例處分。豈可望朕之寬宥乎。爾等爲立宗學之故。謝恩。如以朕設立此學。果爲有益。爾諸王宗室之子弟。或在家庭師讀書亦可。或勞其身心。閱歷事務。令入宗室學中讀書亦可。惟令教習等嚴加訓誨。爾等又時加約束。自可望其成就。若溺愛袒護己子。反怨教訓之人。何由望其成立耶。爾衆宗室等。聽朕此旨。實心奉行。各自勉勵。或學習經書。或嫻熟武藝。宗族骨肉內彼此扶持。各守本分。無貽羞辱。如果學習數年。文



武兩途有幾人成材則朕心喜悅如獲奇珍庶此學之設不爲虛矣再宗室子弟之成丁者宜各自勉勵嚮學至於鼓舞振作之勤則在爾宗人府王貝勒公等如數年中各自勤學誠得幾人成立彼時不但爾等謝朕之恩朕且舉行筵宴以誌歡慶總之宗族骨肉之間以和爲貴爾等勉旃○諭吏部考試月官履歷摺子必令伊等自撰若煩人代作引見時查出定行覆試治罪○工部奏請修理

壇

廟等處事宜得旨此本內將修理

壇

廟及修墳立碑等事俱在一處繕寫殊爲不敬縱使舊式如此亦應更改另行分晰繕寫纔是廉親王竝非意見不到之人著查詢具奏○壬子諭領侍衛內大臣等各處俱有其次辦事之人如部院則有司官都統則有副都統叅領等惟領侍衛內大臣前鋒統領護軍

統領等竝未派有其次辦事之人著領侍衛內大臣處每旗派侍衛班領一員侍衛什長二員次於領侍衛內大臣等辦事前鋒統領處派前鋒叅領一員前鋒侍衛一員前鋒校二員護軍統領處派護軍叅領一員副叅領一員護軍校二員次於前鋒統領護軍統領等辦事若大臣等辦事錯誤將伊等竝議處分如此則伊等各勤厥事皆得殫心於大臣之前矣此所派之侍衛班領等當差之處仍著照常行走○癸丑

上御太和殿視朝諸王及文武陞轉各官謝恩○召入內閣部院諸大臣諭曰大臣之道貴於殫精竭忠事事盡心務求至當爾吏部兵部近又有議罪太重之弊爾等以爲議輕則上必從重不若議重則恩自上出必從寬典此等私心揣度皆係從來積習朕所洞悉何得仍其故智乎如朱綱鉛法一事議以革職因朱綱平日奏摺朕命隆科多代奏故從重

議以見避嫌之意。盧詢獨奏一事。議以革去都統。因其同爲兵部堂官。故從重議。以見不瞻徇之意。吉當阿於舉行計典時。上三旗無一卓異之員。豈有下五旗皆有可薦之人。而上三旗獨無一人可信乎。據稱伊等或係出差。或派往打圍。故未行薦舉。夫既有可薦之人。獨不可展限補薦乎。朕將吉當阿交部議處。而該部又謂此必朕欲重處者。遂議革職。以迎合朕旨。夫朕欲褫吉當阿之職。何難竟行斥革。而必借此一事。以從部議乎。此等但知行私自便。全無公忠爲國之心。所當痛加峻改者也。又如大學士張鵬翮員缺。吏部即行開列具題請旨。朕令內閣確查舊例。其初含糊回奏。及朕憶

皇考加恩李光地。有一月後開列之旨。內閣始查出檔案。請罪當時李光地之事。朕在藩邸時。即聞人傳頌皇考待大臣恩意周渥。不忍遽行開缺。以爲盛

事。爾等豈不聞知。且現有檔案。而置若罔聞。必待朕再四往復查詢。始具奏請罪。是誠何心。朕非過於煩瑣。欲爾等屢次請罪。特欲求其當耳。蓋大學士之缺。必遲回鄭重。以得其人。非如他職有一缺出。即有一人可補。況

皇考加恩閣臣。尤爲備至。李光地係

皇考登極後之進士。洊歷台輔。恩禮優渥。至於如此。張鵬翮爲

皇考之舊大臣。朕擢任機衡。今加恩乃不如李

光地可乎。此係

皇考非常恩典。在新任閣臣。及吏部或尚可託詞。未經詳查舊檔。至如馬齊嵩祝。與李光地同時共事之人。如此

隆恩。豈有遺忘不知之理。設朕不滿意查詢。乃於張鵬翮之缺。遽著開列補授。又將使朕引爲己咎矣。此等事皆有關係。爾等大臣全不在意。豈爾等不盡心辦事。抑或爾等才情俱出朕下耶。朕但期事之歸於至當。非好爲苛

求乃不得已也。諸大臣其勉之。○諭各省督撫等。周禮稱惟王建國。體國經野。孟子亦言仁政必自經界始。疆界所關誠爲至重。從來兩省交壤之地。其界址多有不清。雲貴川廣等處爲尤甚。間有一省之內。各州縣地界亦有不清者。每遇命盜等事。則互相推諉。礦廠鹽茶等有利之事。則互相爭競。甚非息事寧民之意。各省督撫其共矢公心。詳細清查。如與鄰省地界有不清者。則兩省各委賢員公同勘定。若本省內地界有不清者。即委本省賢員勘定。地皆朕土。人皆朕臣。此盈彼絀。悉在版圖之內。無容分視也。雖地界或間有難定之處。但平心勘畫。即使稍有不協。然一定之後。久遠得以遵據。永無推諉爭競之處。於地方大有裨益矣。○甲寅。諭大學士等。應開科道人員。俱係科甲出身。再考文字亦屬無益。今次著於翰林各部院衙門應行開列人員內。令各堂官薦舉。從前朕於科道中欲用

外省道員。故將有才幹者選用。今外省道員將次用足。科道職司言路。務擇忠誠爲國直言無隱者。方爲稱職。如錢廷獻之徒。務虛名。劉燦之挾讎爲己。崔致遠之抗違狂妄。此數人皆但知有身而不顧朝廷。如此存私之人。斷不宜於言責。今次薦舉人員內。若有此等行爲。必將原保舉之人一併究問。○諭吏部月選道府州縣等官。於地方民生最爲切近。與其甄別於既仕之後。不若詳慎於未仕之前。是以我

皇考特重其事。每於月官銓選之後。令九卿詹事科道驗看。凡有出身不正。素行不端之人。各將所知據實陳奏。而九卿等每多瞻徇。莫肯抒誠。及朕臨御以來。屢降明諭。務令直陳無隱。乃仍循舊習。瞻顧懷私。係同鄉則畏避嫌怨。係別籍又謂不能確知。如此殊非慎選官方之道也。嗣後月官掣缺之後。九卿照例驗看。但九卿人少。不能周知。竝令各部院衙

門堂司官將所知漢人內有出身不正行止不端者各具密摺於月官考履歷之目至乾清門進呈。其有品行素優者亦令密奏若係旗員則令本佐領叅領都統副都統亦照此例各具密摺奏聞。倘有扶離誣奏者朕叅聞衆論自能洞悉諸臣亦斷不能欺朕也。如此則不肖倖進之徒皆知敬畏名器不致濫邀矣。○禮部議覆左通政陳良弼條奏八旗漢軍筆帖式貢監生員官學生亦有學習繙譯者請照滿洲蒙古例一體考試應如所請嗣後三年之內考取秀才二次舉人一次進士一次其取中額數視人數多寡臨期請旨欽定從之。○乙卯諭九卿等節行爲風化之首故旌揚盛典歷代崇之朕即位以來拳拳以敦教化勵風俗爲務恩詔中敕令旌表節義嗣又頒發諭旨至再至三誠欲地方有司加意採訪每見直省舉報節行俱係民間婦女而營伍中人絕少豈旌典例由生員具呈教

官具結與兵丁聲氣渺不相通無由舉報耶嗣後必使兵民一體凡營伍中節行貞烈之婦女盡得舉報不致冒濫亦不致隱漏以副朕廣勵風節至意尋議嗣後令直省督撫提鎮學臣宣諭地方文武官弁查明營伍中合例節婦移明教官申報州縣詳請題核旌表永爲定例從之。○丙辰鑲白旗漢軍副都統林桂緣事革職陞正白旗叅領石文煬爲鑲白旗漢軍副都統。○議政王大臣等議奏振武將軍印出征十年威布邊疆應將此印給與鎮守茂岱察罕叟爾扎克拜達里克將軍穆克登掌管從之。○工部遵旨議覆吏部尚書朱軾疏言浙江杭州等府全賴海塘捍禦潮汛查紹興餘姚縣自澁山鎮西至臨山衛六十里舊有土塘三道內一道爲老塘距海三四十里或十餘里係百姓自築其二道爲外塘詢據土人云潮水從不到塘若加高三四尺厚五六尺即遇風潮亦不致衝溢係民

間竈戶修築。今被災之後民竈無力。應令地方官動用公帑興修。又自臨山衛至上虞縣烏盆村十五里。自村至會稽縣漚海所四十里。內石塘二千二百餘丈。係康熙五十八年建至今鞏固。其石塘東西共土塘七千丈。坍塌甚多。應令填築亂石。上鋪大石。以固塘基。貼石築土。栽種榆柳。近塘窪地一概築平。庶可永固。自陳文港至尖山二十餘里。內草塘七十四丈。亂石砌邊。土塘三千七百二十丈。塘外淤積沙土。潮水猶注塘下。應將土塘加寬添鋪條石。其草塘七十四丈。並照式修改。再塘外原有亂石子塘。寬三四尺不等。外加排樁遮護塘脚。最為緊要去。秋風潮排樁欹倒。子塘零落。應修砌完固。從前原無子塘之處。亦照式興修。又海鹽縣東自秦駐山三澗竈西至演武場石塘二千八百丈。明時修建最為堅固。年久水沁。塘根樁木朽壞。共塌八十餘丈。今應移就實地修築。又去秋風

潮衝潰七十丈。其附石土塘亦應照式修築。自演武場至平湖縣雅山礮臺一帶土塘。現在地方官加修。指日完工。通共估計石價夫匠土方雜費。應用銀十萬五千七百兩有奇。俟工完後核實報銷。至支發錢糧及督修大小官員應聽撫臣法海另疏題報。俱應如所請從之。又議覆吏部尚書朱軾疏言。江南松江府之華婁上海等縣沿海二百五十餘里。地窪土鬆。捍海塘工尤為緊要。自金山衛城北十里至華家角四十餘里。土塘六千二百餘丈。內最險工一段。自滬缺墩至東灣九百六十九丈六尺。緣大小金山聳峙。洋面山北壅積沙墩。潮水直衝滬缺。前明修築石塘三百餘丈。日久侵蝕。石塘孤露。水中康熙四十七年另築土塘。去秋風潮坍塌入海。此段工程最為緊要。又次險工四段。自金山墩至西新墩七百六十八丈。自兵廠至張家舍二百八十八丈。自倪家路至三壘墩三百六十

大自周公墩至花家角一千四百六十八丈八尺。此四段老岸久坍。新塘屢易。皆當易土爲石。以資保障。其修築石塘之法。應於地面開深二三尺。務見實土。乃用木椿長一丈者。密釘土內。椿間杵築。使底土堅實。上鋪條石。縱橫相間。下寬而上縮。層層收進。三面鋪砌條石。中間填塞碎石。自基至頂。共砌石十層。自能永久保固。通共應用銀一十九萬二千九百兩有奇。所有石料。必須辦齊。方可興工。至支發錢糧。及督修大小官員。應聽撫臣何天培另疏題報。亦應如所請。從之。○丁巳。管理戶部事務怡親王奏。請酌減蘇松浮糧。得旨。蘇松浮糧。常廩。

皇考聖懷。屢頒諭旨。本欲施恩裁減。乃彼時大臣。以舊額相沿已久。國課所關。綦重。數以不應。裁減固執。覆奏。凡國家大事。因革損益。必君臣計議。畫一。始可舉行。若

皇考違衆獨斷。既非詢謀僉同之意。且恐一時

減免。倘後來國用不足。又開議論之端。是以從衆議而中止。然

聖慈軫念蘇松。誕敷渥澤。屢蠲舊欠。以紓民力。其數較他處爲多。是亦與裁減正額無異也。今怡親王等悉心籌畫。斟酌奏請。朕仰體

皇考愛民寬賦之盛心。准將蘇州府正額銀蠲免三十萬兩。松江府正額銀蠲免十五萬兩。論語曰。百姓足。君孰與不足。易曰。損上益下。民說無疆。朕但願百姓之足。時存益下之懷。

用是特沛恩膏。著爲定例。俾黎民輕其賦稅。官吏易於催科。可飭令該地方官知之。○追封和碩裕親王廣寧父保壽親王爵。遣官致祭。立碑造墳。如例。謚曰悼。○封喀爾喀扎薩克台吉通摩克爲輔國公。○浙閩總督覺羅滿保疏報。臺灣山後七十四社生番先後輸誠歸化。齎獻土物。戶冊願附版圖。下部知之。○戊午。添設河南省河南營參將一員。改河南營都司爲守備。移駐陝州。另立陝州一營。

添設把總二員。兵三百四十名。分防靈寶閭鄉二縣。嵩縣營添把總二員。分防永寧盧氏二縣。汝寧營添把總一員。兵三十名。分防遂平縣。從河南巡撫田文鏡請也。○己未。禁止直省道員。調用雜職充巡捕官。從御史殷式訓請也。○庚申。工部議覆河道總督齊蘇勒疏。稱徐州黃河北兩岸。及宿遷縣運河北岸。駱馬湖西寧橋等處。隄工凡五千二百二十四丈。亟宜修築。以資捍障。應如所請。從之。

○辛酉。川陝總督年羹堯。以日月合璧。五星聯珠。具本奏賀。得旨。年羹堯所奏本內字畫潦草。且將朝乾夕惕。寫作夕陽。朝乾年羹堯。平日非粗心辦事之人。直不欲以朝乾夕惕四字。歸之於朕耳。朕自臨御以來。日理萬幾。兢兢業業。雖不敢謂乾惕之心。足以仰承天貺。然敬

天勤民之心。時切於中。未嘗有一時懈怠。此四海所知者。今年羹堯既不以朝乾夕惕。許朕

則年羹堯青海之功。亦在朕許與不許之間。而未定也。朕今降旨詰責年羹堯。必推託患病。係他人代書。夫臣子事君。必誠必敬。陳奏本章。縱係他人代書。豈有不經目之理。觀此則年羹堯自恃己功。顯露不敬之意。其謬誤之處。斷非無心。此本發與年羹堯。令其明白回奏。○癸亥。諭大學士等。甘肅巡撫胡期恒。朕素不識其人。因西海初經平定。必得熟悉邊方情形者。畀以巡撫之職。朕詢問年羹堯。伊即薦胡期恒。謂可勝任。前年羹堯曾薦王景灝。求令陞見。及王景灝來京。朕觀其才具實屬可用。是以此番薦舉胡期恒。朕亦不疑。即用為甘肅巡撫。後見揭帖。金南瑛等七人。朕察其情節。甚不允協。且年羹堯於王景灝。則請令陞見。於胡期恒。則不請令陞見。是殆欲借王景灝一人。使朕信其言之不誣。遂可薦舉胡期恒之類。以肆其蒙蔽也。今胡期恒來京所奏之言。皆屬荒唐悖謬。觀其人甚屬



卑鄙豈特不稱巡撫即道府之職亦屬有玷著革職甘肅巡撫員缺著將軍岳鍾琪兼理○又諭覽年羹堯奏稱委赴南坪築城之知州邊鴻烈守備孟繼先不恤番民欲令寒冬入山砍木且出言恐嚇以致各寨番民驚惶生事曾經一面繕摺奏明一面調兵勦撫等語伊前奏摺內止稱彼處原無城郭今欲築城駐兵喇嘛衆番等不能任意行事是以聚衆離叛竝未將邊鴻烈等情由聲明朕降旨察問伊將從前奏摺內全無之事竟稱已於摺內奏明含糊具題或是年羹堯從前有心隱匿具題抑或被屬員欺瞞遂爾朦混具題之處著年羹堯明白回奏○陞順天府府尹張令璜爲大理寺卿仍兼理府尹事○調署四川松潘總兵官張元佐爲四川北總兵官仍署理松潘總兵官印務署陝西延綏總兵官李如柏署理四川北總兵官○浙江溫州總兵官戴坤年老乞休命加右都督銜

致仕以原任廣西左江總兵官邊士偉爲浙江溫州總兵官○設立廣西崇善荔波二縣儒學取進文武童生各四名撥太平府訓導駐崇善宜山縣訓導駐荔波從廣西巡撫李紱請也○甲子調署四川提督護軍統領納秦回京以鑒儀使趙坤署四川提督○乙丑莊親王允祿等遵旨將總理事務王大臣等分別定議具奏得旨廉親王允禩怡親王允祥爲人聰明強幹廉潔自矢才具優裕朕深知其能辦大事遭

皇考上賓之日朕心神恍惚恐事有錯誤爰於即位之初命二王贊佐朕躬効力國家總理事務朕倚任二王原無異視也廉親王因不得遂志又以朕疎遠允禩允禩致生怨恨每事煩擾朕之心思阻撓朕之政事惑亂衆心朕爲備極焦勞是竟以歷年之煩擾皇考者又欲以之煩苦朕躬矣怡親王極其敬慎遵守臣節凡朕所交事件竭盡忠誠勤勞



辦理。三年來佐朕治理之功甚大。廉親王種種悖謬之罪。朕既盡行寬宥。如怡親王之誠心効力者。若不加恩褒異。則將來之宗室諸王爲國効力之心必至懈怠矣。怡親王著賞一郡王。聽王於諸子中指名奏請受封。隆科多著賞給世襲一等阿達哈哈番。馬齊著賞給拜他喇布勒哈番。餘依議。○授奉國將軍阿哈尼子五十九爲奉恩將軍。○丙寅諭內閣。盛京乃開基之地。寧古塔。黑龍江。三姓等處俱屬接壤。向來發遣人犯安插於此。至今漸多。此輩原係匪類。兇惡習成。豈能後改。其子孫亦未必能成善類。而本處無知少年。或爲其引誘。流染匪僻。廢壞風俗。所關甚大。且將來發遣之人多於本地兵丁。亦深有未便。嗣後凡發遣人犯可否分發內地邊遠之區。令地方官嚴加管束。人數無多。禁約亦易。至強盜理應正法。其減等發往三姓地方。乃法外之仁。今應作何變通。俾其安輯。再八旗內

府佐領王府佐領下有罪發往打牲烏喇者。人數漸加。亦當酌量著諸王大臣等會同詳議。務期得當。經久可行。○又諭大臣等之家。人互相黨比。結爲兄弟。鑽營請託之處甚多。大臣等彼此和洽。其請託固不待言。如彼此不睦。家人從中或爲調停。或爲激怒。干態萬狀。各欺其主。以圖己利。伊主爲其所惑。不能辨別。是非反爲家人所用。而忘己之利害。獲罪敗名。不可勝數。此朕數年來所深知。亦衆人所共知也。此等事大有關係。不可不嚴行禁止。著交與步軍統領。五城官員。凡大臣等之家人。如有嫁娶筵席。延請親友等事。令各稟明家主。然後舉行。倘有私結黨與。約爲兄弟。彼此會飲。藉以請託事件者。即行嚴拏治罪。將此通行八旗曉諭。○命署江南江蘇巡撫何天培。仍回江南京口將軍任。陞江西布政使張楷爲江蘇巡撫。○廣東廣州將軍管源忠。年老休致。調署江南京口將軍。李杓爲

廣東廣州將軍解廣東廣州左翼副都統蔡瑜任。調正紅旗漢軍副都統吳如謬爲廣東廣州左翼副都統。○丁卯。諭雲貴總督高其倬。貴州巡撫毛文銓。提督趙坤等。黔省狝苗。最爲不法。上年三四月間。輒敢蟻聚搶奪。集市定廣協副將領兵驅逐官兵。多被損傷。至八月間。撫提會調兵丁二千名。委員進剿。於九月行至定番州。兵丁強買民物。喧鬧罷市。暮抵谷蘭地方。夜火不戢。又復焚燬熟苗五寨。以致民苗合圍。射傷官兵。夫師出以律。乃沿途騷擾平民。激變熟苗。種種強橫。何漫無法紀。竟至如此。且狝苗及紅黑諸苗之巢穴。附在各州縣者。種類不一。出沒無常。朕意與其有事而加勦撫。孰若未事而預爲計畫。黔省文武各官。萎靡成風。匪伊朝夕。爾等須大爲整頓。身先倡率。文自司道。以至府州縣衛。惟撫恤是務。武自鎮協。以至叅遊備弁。惟操練是勤。務使民無派累之苦。兵無怠玩之習。

將見各處向化熟苗。必皆舉踵企慕。擇其頭目中淳良可用者。命該管官宣播恩德。加以優賚。俾各愛養所屬。以備驅策。其有干紀犯科者。從而重懲。以示警戒。不一二年間。內地之民。莫不感激奮勵。已附之夷人。胥皆畏威懷惠。彼狝苗及紅黑諸苗。多與漢姦聲氣相通。自當俛首帖耳。望風惕息。猶敢縱肆猖獗乎。設有怙惡不悛者。亦必審查。果係族類衆多。稔惡渠魁。始遣熟苗頭目。先行招撫。撫之不從。然後行知所在將弁。塞其奔逸之路。一面命熟苗頭目。率伊部落前往勦捕。大兵從而繼之。自獲全勝。所獲牲畜等物。即頒賞熟苗。酬其功績。將勞効尤著之輩。或奏請賜一職銜。如是平定一二處。則其餘不待招撫而歸誠。恐後矣。至於直省各員。俱有大耗羨餘畀之養廉。黔省錢糧額寡。耗羨無幾。或以養廉不足。加派民苗。然州縣員缺。較他省無多。猶易爲設法。莫若將各項陋規。通盤查清。即

以本省之所出還濟本省之公用似屬允協聞自巡撫提鎮及司道等官各有納糧官莊每歲收米千百石至數十石不等府州縣亦間有之此皆國家正賦豈容私行隱占又聞貴陽鎮遠安順普安四處權稅每歲抽收一二萬金而報解正項不過數千思南威寧黔西大定畢節等處俱有過往牛馬銅鹽并落地等稅每歲可收至八九千金少亦不下二三千金而報解正項不過數百此等府州縣養廉太覺有餘至若都勻思州石阡平越獨山麻哈廣順定番清鎮安平等處養廉又甚屬不足一省之中豐吝懸殊安可不為調劑嗣後爾督撫應將各處稅課逐一清查每年盈餘若干量留該管官養廉餘者貯庫并將文武各員所占官莊交納之米盡數貯倉闔省錢糧耗羨一總提解合此三項通行會計自巡撫司道以下及府州縣分別銜僻繁簡酌定養廉之數而派與之如此則溥徧均平

缺美者無虧空之虞缺苦者亦不致科累民苗上下俱無染指各員咸得奉公盡職矣再者除養廉外量存數千金貯司庫以備賞犒兵丁苗保之用亦未始非裨益地方之一助也爾等其周思詳議具摺陳奏務令官民兩賴可以永久行之無弊庶幾地方寧輯民苗樂利以副朕懷遠籌邊之至意

大清世宗敬天昌運建中表正文武英明寬仁信毅大孝至誠憲皇帝實錄卷之三十

大清世宗敬天昌運建中表正文武英明寬仁  
信毅大孝至誠憲皇帝實錄卷之三十一

監修總裁官光祿大夫經筵講官太僕寺卿和碩大學士吏部尚書總理事務正人等伯加十五級臣鄂爾泰

總纂官光祿大夫經筵講官起居注太僕寺卿和碩大學士吏部尚書總理事務正人等伯加十五級臣鄂爾泰

纂修官光祿大夫經筵講官起居注太僕寺卿和碩大學士吏部尚書總理事務正人等伯加十五級臣鄂爾泰

纂修官光祿大夫經筵講官起居注太僕寺卿和碩大學士吏部尚書總理事務正人等伯加十五級臣鄂爾泰

纂修官光祿大夫經筵講官起居注太僕寺卿和碩大學士吏部尚書總理事務正人等伯加十五級臣鄂爾泰

敕修

雍正三年乙巳夏四月戊辰朔享

太廟

上親詣行禮○諭直隸河南山東督撫朕因兩  
省接壤之區人民雜處最易藏姦已令直省  
督撫清理疆界聞曹州西南桃源集地方界  
聯三省壤接七縣而離各州縣治又皆遼遠  
文武兵役巡察難周此處甚為緊要爾等可  
差員會勘將如何專委弁員撥兵彈壓及應  
歸某省管轄之處會同詳議具奏○己巳以  
正白旗滿洲都統拉錫兼理太僕寺卿○吏

部議奏原任翰林院檢討董玘以親老乞在  
籍終養應准其所請俟親終服滿令其來京  
候補得旨凡人誰無父母為人子者無不欲  
其父母常存今於告請終養疏內聲明親終  
服滿補用為人子者聞之何以爲情況該撫  
舉董玘爲孝廉方正此人雖暫未錄用朕但  
願伊克盡子職常奉伊親耳似此不仁之語  
朕不惟不忍降旨亦不忍閱覽將本發回著  
刪去此段具奏○庚午怡親王允祥奏辭議  
敘得旨王忠敬勤勞佐朕辦理政事三年以  
來實多裨益茲因議敘特加封王一子爲郡  
王以彰國家酬庸之典王其祇遵不必固辭  
○陞詹事府少詹事何國宗爲內閣學士兼  
禮部侍郎○以國子監司業孫嘉淦提督安  
徽學政○禮部議覆給事中李蘭條奏追封  
關帝祖父爵號據稱聖蹟圖誌一書所載關  
帝係夏臣關龍逢後裔祖諱審父諱毅世居  
解梁常平村寶池里等語查聖蹟圖誌乃係

近時盧湛所撰與正史不合。尊崇正神理宜詳慎。亞聖孟子之父。未詳名諱。止稱先賢孟孫氏。所以闕疑也。應照此例。追封關帝三代。俱爲公爵。牌位止書追封爵號。不著名氏。於京師白馬關帝廟後殿供奉。遣官告祭。其山西解州河南洛陽縣塚廟并各省府州縣擇廟宇之大者置主供奉。後殿春秋二次致祭從之。○裁山東掌印都司一員。都司經歷一員。○辛未以禮部尚書賴都兼理鑲藍旗滿洲都統。○廣東高州總兵官蘭佳進緣事革職。陞廣東將軍中軍副將趙儒爲廣東高雷廉總兵官。○安徽巡撫李成龍疏言五河縣烈婦白三之妻謝氏。逼姦不從。刎頸全節。應請旌表。得旨謝氏因伊夫縱勒通姦。守貞自矢。終不爲強暴所污。旋即自盡。可謂烈婦中之超衆者。殊爲可嘉。應加恩旌表。以敦風化。嗣後如有此等烈婦。應作何加恩旌表之處。一併定議具奏。尋議白三妻謝氏與尋常烈

婦不同。應照常例增給銀十兩。令地方官於墓所建坊。鐫列實蹟。遣儒學官致祭一次。嗣後如有此等超衆節烈婦女。應俱照此例旌表從之。○壬申諭刑部。朕每覽所奏罪犯案內多有僧人不法。致干憲典者。爲僧無清淨心行。究頑事。則其非僧也必矣。朕嘗覽釋氏之教。雖不足爲治世理民之用。而空諸色相。遺棄榮利。有戒定慧之學。有貪嗔癡之戒。爲說雖多。總不出乎寡慾攝心。戒惡行善四端。爲大要也。爲其徒者。雖有爲禪。爲律。爲講。爲持誦之不同。然莫不以四端爲本。至於混迹僧徒。實乖僧行者。飲酒食肉。肆爲不法。有應赴馬流鑾頭挂搭。闖棍江湖。捏怪煉魔。潑皮等名色。皆敗壞僧教。甘爲非法。何得稱佛門弟子乎。若概以僧目之。則苗莠弗辨。而涇渭莫分矣。朕非爲僧人正其名色。蓋核名實。辨是非。國家勸懲之法。不可忽也。爾部行文直省。嗣後凡遇緇流犯法。須按是何名色之僧。

人入案呈奏。審擬定罪。若既稱戒僧有干犯法紀之事。必嚴加治罪。○諭總理鑒儀衛事務公馬爾賽等。爾衙門之漢整儀尉員缺。將世襲官員與武進士。停其補授。世襲官員內。難得優員。如有優員。旗下且將用之。若係劣員。補授於爾衙門。亦屬無益。嗣後八旗漢軍內。領催馬甲。及閒散人等。有穎俊可用之人。與工於馬步射者。著怡親王。果郡王。兵部大臣。與爾衙門之大臣等。公同揀選。遇整儀尉缺出。引見具奏。伊等果有行走効力好者。咨送該旗。令得補授。副叅領如此。則漢軍既獲陞階人才。又可成就。即爾衙門亦可得優員矣。○裁廣東廣州左衛。前衛後衛。南海衛。東莞所。新會所。新寧所。增城所。從化所。靖遠衛。連州所。南雄所。韶州所。惠州衛。河源所。龍川所。長樂所。潮州衛。澄海所。程鄉所。肇慶衛。廣寧所。新興所。陽春所。陽江所。神電衛。高州所。寧川所。海南衛。萬州所。崖州所。廣海衛。海門

所。靖海所。蓬州所。清瀾所。并裁掌印都司。都司。經歷各一員。○癸酉。左都御史尹泰奏言。定例監察御史。試俸一年。不稱職者。以按察司經歷改補。請嗣後一年限滿。未能深信者。再試一年。庶賢否可以詳察。從之。○甲戌。吏部議覆兩廣總督孔毓珣疏言。太平府屬龍州土知州趙殿炆。貪婪殘暴。既經革職。其管轄地方。應擇趙姓近支二人。降為土巡檢二員。分轄管理。應如所請。從之。○丙子。諭議政王大臣等。策妄阿喇布坦來求吐魯番之地。曾諭將從前內附為首者。令其遷入內地。今將軍穆克登奏言。吐魯番處共有一萬餘人。若但遷首領數人。而不遷其所屬之人。則伊等生計必致艱難。且伊所屬之內。願移入內者。不下四五千人。等語。朕思瓜州。沙州。地方甚寬。亦必用人耕種。若有願移者。即在此居住。給與一二年養贍。令其耕種。羅卜腦兒地方。亦照吐魯番例。有願移來者。亦隨為首之

人一併移來。不願者。仍留本處著議。奏尋議歸順之狃子。若再給與策妄阿喇布坦恐致擾累。所以願移者甚衆。應令其在布隆吉爾地方沙州瓜州等處種地。其建立村莊養贍之處。行文將軍富寧安等詳議辦理。再羅卜腦兒狃子皆冰居打魚爲生。此內有願陸居爲生者。請照吐魯番例一併移來從之。○丁丑諭大學士等。怡親王恪恭盡職。夙夜匪懈。贊襄國政。披露忠誠。朕念茲勤勞。特加封王。一子爲郡王。以昭酬庸之典。迺王具疏懇辭。及見朕時。復再三陳奏。情詞諄切。出於至誠。朕亦難強。姑允其請。以成謙讓之美。○諭吏部庶吉士張鳴鈞等。教習已久。今加考試。應分別授職。除程元章已授編修。外滿漢庶吉士張鳴鈞。邵基。陶正中。何玉梁。鄒光濤。張江徐以升。沈淑。張廷璩。胡香山。牧可。登馬。金門。嚴民法。尹繼善。師念祖。許煒。繆曰芑。吳釗。焦祈年。周學健。戴永椿。倪師孟。薄履青。昌齡。松

壽俱著授翰林院編修。范咸。沈懋華。陳弘謀。王步青。保良。沈文豪。喀爾欽。吳大受。俱著授翰林院檢討。許均。王喬林。張仕遇。康忱。俱著以六部主事用。黃元鐸。吳王坦。李端。顏希聖。胡蛟齡。陶士傑。劉敬輿。楊臚。賜顧海。俱著以中行評博用。金相。張泰基。俱著以州縣用。周鳳來。李士杞。俱著以教職用。高山。陳齊寔。張考。李徽。已揀選刑部。即以刑部主事用。俞來求。俟服滿後補行引見。記名留京進士夏之芳。姜穎新。俱著授翰林院編修。黃岳牧。陸宗楷。俱著授翰林院檢討。王士任。邵錦濤。羅鳳彩。王輅。張蔭圻。俱著以六部主事用。蔣祝王藩。尙有基。俱著以中行評博用。萬里。著以州縣用。爾部即遵諭行。○戊寅諭大學士等。天人相感之理。至微而實至顯。凡人果實盡誠。敬自能上格。

天心人君受

天眷命。日鑒在茲。其感通爲尤捷。朕自臨御以



來敬

天之心。夙夜警惕。凡水旱災禱。皆

上天譴責朕躬。特示警戒。內省身心之過。愆外  
考政治之闕失。務期黽勉以回

天意。用是上承

帝鑒。有求輒應。如今年三月十六日。覽署山西  
巡撫伊都立奏摺。知平陽地方三春少雨。朕  
懷甚爲憂慮。祇告神明。齋心虔禱。續據伊都  
立奏報。於十八十九二十等日。得雨雪足三

月二十九日。覽河南巡撫田文鏡奏摺。知開  
封一帶地方亢旱。朕於四月初一日。禱於神  
明。竭誠致敬。刻不敢懈。昨田文鏡奏報。初三  
日。開封四境果得時雨。可見天人感通之理。  
捷於影響。益覺可畏。可懼。而不敢纖毫疎忽  
也。但恐督撫大吏於地方水旱之事。不速行  
奏聞。則朕無從省戒。以挽

天心。致使旱澇成災。閭閻受困。此則地方大吏  
隱蔽之咎也。嗣後督撫等於地方偶有水旱

之事。即據實速奏。庶朕可及時修省。爾督撫  
等亦宜省咎。思過勤求民隱。勿徒爲祝禱之  
虛文。以飾愚氓之觀聽。朕此旨。竝非自謂精  
誠昭格。欲以誇示於衆。蓋實有見於天人之  
際。感應不爽。呼吸可通。有善天既降福。則有  
過天亦必降罰。惟有兢兢業業。時存戒懼。盡  
人事以仰邀

天鑒。願日與諸臣。交爲勉勗而已。○工部右侍  
郎李鳳翥緣事降調陞廣東巡撫。年希堯爲  
工部右侍郎。○裁江西掌印都司一員。○己  
卯。諭大學士等。近來年羹堯妄舉胡期恒爲  
巡撫。妄奏金南瑛等員騷擾南坪寨番民。詞  
意支飾。含糊具奏。又將青海蒙古饑饉隱匿  
不報。此等事件。不可枚舉。年羹堯從前不至  
於此。或係自恃已功。故爲怠玩。或係誅戮過  
多。致此昏憤。如此之人。安可仍居川陝總督  
之任。朕觀年羹堯於兵丁尚能操練。著調補  
浙江杭州將軍。川陝總督印務著奮威將軍



甘肅提督兼理巡撫事岳鍾琪速赴西安署理其撫遠大將軍印著齎送來京。奮威將軍印如無用處亦著齎送來京。○調陝西西安巡撫石文燁爲陝西甘肅巡撫以西安布政使圖理琛署西安巡撫陞河南布政使楊文乾爲廣東巡撫西安按察使黃焜爲河南布政使司布政使江西糧道費金吾爲西安按察使司按察使。○以陝西寧夏總兵官王嵩署陝西甘州提督。○吏部題一等精奇尼哈番音德已襲二等公爵其一等精奇尼哈番應令故二等公額亦都之曾孫封阿達承襲從之。○禮部疏奏直省督撫將軍提鎮題奏事件本式會典原有定例理應畫一今直省題奏同屬一事任意參差與例不合嗣後一切錢糧刑名兵馬及地方民務所關公事皆用有印題本其本身事件俱用奏本不准用印如有違式者通政使司查叅交部議處從之。○遣內閣學士衆佛保副都統查史等往

準噶爾敕諭準噶爾台吉策妄阿喇布坦前歲台吉遣使根頓陳奏情詞恭順朕實嘉之。曾遣使答諭今覽爾使博洛胡爾哈齎奏及口奏之詞知爾仰副朕旨欲永息兵戈共修和好興教逸民出自誠心朕甚欣悅顧欲修和好不可不計久遠議定疆界以杜爭端乃垂久遠之道也朕去歲遣使與爾定議疆界大概以阿爾泰山嶺爲界原未實指地名今爾奏稱以唐奴山陰之克木可穆齊克地方爲詞又有哈噶斯地方係喀爾喀厄魯特之界哲爾格西拉胡魯蘇地方係會集之所哈濟爾地方係索林齊居住等語此爾但陳奏其故竝未執意爭求應無庸議外今姑以科布多烏闌古木等處言之喀爾喀厄魯特未構兵時原混雜住牧今喀爾喀西境直抵阿爾泰山嶺築城種地自唐奴山陰之克木可穆齊克至博木地方見有車零旺布博貝吳梁海居住今定疆界自紅郭壘至阿爾泰哈

道里嶺此千里內所有巴斯庫斯索羅斯畢漢哈屯阿爾古特阿爾坦腦兒等處爲爾疆界自哈道里以及克木之博木地方爲我疆界自哈道里以南由山嶺至額爾齊斯西邊自厄隆古布拉罕哈布塔克拜塔克直抵烏關烏蘇羅卜腦兒噶斯地方即係沙磧應自克里野以南定爲我國疆界朕爲元后統一寰宇爾所請可行無不俞允豈爲叢爾廢地致啟爭論不過欲明疆界永結和好耳再爾又奏稱爾使臣貿易之人若由內地往來途遠勞苦請由喀爾喀地方行走朕今照爾所請但人數不可過三百耳嗣後惟當不渝前好以信爲本普濟蒼生爾其思之特諭○庚辰諭盛京將軍滿漢大臣大凌河副都統衆城守尉等邇來盛京諸事隳廢風俗日流日下朕前祭

陵時見盛京城內酒肆幾及千家平素但以演戲飲酒爲事稍有能幹者俱於人參內謀利

官員等亦不以公務爲事衙門內行走者甚少其聚會往來不過彼此相請食祭肉嬉戲而已司官竟有終年不一至衙門者堂官亦置若罔聞坐臺之人看守邊口俱係關東人伊等雖有押送罪人之差而當兵者全無當兵之實爲官者亦無爲官之道朕深知此等陋習雖降諭旨數次竟不悛改因將將軍大臣內不及者革退另簡爾等補授爾等雖係新任但能留心細訪即便知之應將盛京陋習極力整飭令其悛改復還滿洲舊日儉樸風俗勤學騎射武藝若有惡亂之令即加重處以儆其餘將軍大臣其欽遵朕旨與下屬官員同心協力各自黽勉力改從前陋習再盛京地方乃本朝創業之地關係甚重爾等將聚集惡亂之令不時稽查應逐去者作速逐出境外大臣等若仍相推諉不實心効力朕訪聞治罪之時勿復怨悔○命江南江寧將軍雍吉納來京陞浙江杭州右翼副都統

董吉那爲江南江寧將軍○以鑲白旗漢軍副都統博第兼理鑲黃旗蒙古副都統陞一等侍衛滿泰爲正紅旗漢軍副都統○兵部議覆雲貴總督高其倬條奏苗疆事宜○定廣頑苗已經擒獲請於西孟地方撥定廣營千總一員兵一百名駐劄彈壓又定廣一帶路通廣西泗城土府請於青藤斷杉樹二處設立塘汛護衛行人○廣順州所屬之長寨者貢同筍蕉山安順府所屬之十三枝普定縣所屬之五枝及白老虎等處苗民宜添設官兵彈壓查大定一鎮所防僅一州之地請改爲一協只留左右二營以左營兼管中營帶兵一千名防守大定裁去中營遊擊一缺移中營守備一員千把總各一員兵四百五十名分防長寨等處移把總一員帶兵五十名分防羊城壘統歸定廣副將管轄再於平遠協分千總一員帶兵一百名防守白老虎一帶地方至都勻府屬之獨山州境接廣西

之南丹土州苗俗尤爲頑劣應於通省抽兵二百名移都勻守備一員帶領駐防○黔省境接川楚姦棍頑苗互相勾結販賣人口一事最爲地方之害請嗣後定例地方官於一年之內有能拏獲積棍頑苗者計人數分別議敘儘不能查緝爲別處官弁拏獲者亦計人數降革至窩藏護送及牽合之人亦分別嚴加懲治其外省客民有買貧民子女者令報官用印亦不許買至四五人違者仍照與販例治罪○黔省與楚蜀滇粵接壤多民苗互相讎殺搶劫之事請嗣後定例夷人越界未曾爲非者仍拏送本省如係越境偷搶及助人仇殺者即在拏獲之省審明發落又黔省有拏白放黑之習如被人劫殺力不能報復將無干之家奪其人口牛馬去插冤單令爲報復如不能代其報復則勒索銀兩取贖請嗣後定例照應得之罪加一等究擬○土司貧苦往往將所管有糧之田作爲無糧之

土賣與紳衿商民以致完納無資。每至派累苗戶。請敕令查核清楚。令各買田之人。照例輸納。又各土司下設立權目人等。應令報明有司。凡有事發。一併緝捕懲治。黔省地氣潮濕。倉米易致霉爛。請嗣後將兵米合計。共存三年之蓄。餘者於青黃不接之時。量行減價平糶。以濟民食。著爲定例。以上六條。均應如所請。又奏稱黎平一府。與楚省五開衛同在一城。民苗雜處。分隸兩省。事權不一。請將五開衛改爲一縣。歸黎平管理。銅鼓衛亦歸併五開。則中間古州八萬等苗區。皆屬於黔省。一切措辦。呼應得靈。查銅鼓五開二衛。歸黔歸楚。從前兩省督撫各執一詞。應令妥議畫一。具題再議。得旨。高其倬爲人謹慎。辦事精細。伊所奏之事。諒無錯誤。五開銅鼓二衛著照所奏。歸黔省管轄。餘依議。○辛巳。雲貴總督高其倬題。雲南蒙化土知府左嘉謨故請以其子左麟哥承襲。下部知之。○壬午。諭

兵部丁壽著授爲前鋒統領。同將軍穆克登前往軍營。○陞內閣學士福敏爲吏部右侍郎。內閣學士查嗣庭爲禮部左侍郎。○癸未。上召諸王。貝勒。公。大學士。九卿。及工部官員等入。諭曰。朕向見工部所製器械。類多粗率。是以即位之後。特降諭旨。此後細小工作。該部即行置辦。若工作稍太。及緊要物件。俱先行奏明。造成之後。奏請差人驗看。前因製造兵丁帳房錯誤。朕曾降諭旨。今製辦阿爾泰兵丁軍器。關係緊要。朕意其必盡心辦理。昨製成。奏請驗看。朕著夸岱來保查閱。據二人回奏。刀刃無鋼。盔有裂縫。甲係市買粗鐵所造。朕詢問廉親王。伊即具摺認罪。情願賠補。夫軍器所關至重。朕既屢降諭旨。伊又奏請驗看。而所製之物。並不堅利。若此。其居心尚可問乎。朕與廉親王允禩。分屬君臣。誼屬兄弟。今觀允禩之於朕。則情如水火。勢如敵國。朕嗣登大位。念

皇考付託之重凡用人行政朝乾夕惕務求至當而廉親王允禩處心積慮必欲自居於是而以不是歸之於朕朕自返無愧何必與之較論但朕之是非有關

皇考之得失不得不諄諄辯白也廉親王允禩若肯實心任事部務皆所優爲論其才具操守諸大臣無出其右者而其心術之險詐諸大臣亦無與之比者此惟

皇考暨朕躬深悉之向因允禩乳母之夫雅齊

布獲罪正法一案

皇考硃批諭朕衆兄弟有朕與允禩父子之義已絕之

旨允禩曾向朕再三哀懇云若將此

旨宣示則允禩實不可以爲人矣朕彼時因將此

旨封固交內閣收貯是朕之所以矜全允禩者如是允禩全不知感恩悔過專務沽取名譽邀結黨與希圖敗壞政事實爲國法所不宥

當日朕召允禩來京允禩奏云皇上如此加恩允禩必然悅服及允禩到京狂悖妄爲允禩又云此我未獲先寄書信於中途曉示之也觀此等言語則允禩在伊指使之中允禩在京日久允禩何竟無一言規勸令其改過乎朕於諸王大臣前降旨訓誨允禩視諸王大臣之意頗有以允禩爲屈抑者允禩罪案甚多朕俱曲加寬宥竝未治罪有何屈抑之處爾工部官員等受

皇考數十年教養之恩當念君臣大義爲朕竭力盡心以圖報稱勿因允禩之甘言詭計爲其所惑允禩故爲小心謹畏於屬員則作喫咻體恤之狀其心實欲敗壞事務且知朕必能察出將衆人治罪以彰朕之苛刻俾衆人感伊而歸怨於朕其居心大抵如此爾諸王大臣果能悉知允禩之非則其黨與自然解散允禩果能自知其非幡然改過盡爲弟爲臣之道則朕既得其是允禩亦歸於是豈非

朕之深願乎。過而能改則無過矣。朕仍望其改悔。又諭大學士九卿等。前日李鍾義奏稱翰林爲儲材重地。自康熙四十五年至六十年七科。每省俱有庶吉士。查雍正元年癸卯科漢軍及河南四川進士。無館選者。雍正二年甲辰科蒙古及山西河南陝西四川廣東湖南廣西雲南貴州進士。俱無館選者。請廣儲才之路等語。朕即位之後。以培養人材最重翰林。故加意詳慎。隆科多曾奏稱

聖祖時館選每省俱有庶吉士。所以朕於雍正元年癸卯科館選時。試其文義。觀其人品。於僻遠省分之人。亦酌量選取。又每諭教習之臣盡心訓迪。迨後歷經簡擇。及考試文章。其中惟江浙人文義實較各省爲優。因將各省人員分用於內外各衙門。而江浙人留館獨多。雍正二年甲辰科館選亦詳加考試。朕因以文義優者選爲庶吉士。於是山西河南等省進士遂多不得與選。蓋翰林職司文章。若

以文義不及者處之。則用違其才。而其人或有他長。反無以自見矣。朕凡於用人行政。無不審慎籌畫。務求當理。而選擇翰林更爲留意。實欲使人人勿枉其材。各効所長。庶國家得收器使之效。豈計及於各省翰林之多寡有無也。今覽李鍾義所奏。是必外人有此議論。故遂以入告。朕甚嘉之。大凡國家政事。朕有不及見聞者。若臣下不言。朕何由而知。朕正欲爾等盡心陳奏。朕因得以察其所奏之是否。是則改而從之。否則亦可以朕意宣示爾等。使天下之人曉然共白。不致妄生議論。嗣後館選庶吉士。或應考試文義。選取或應每省額選幾人。或應分爲南北兩院。向來教習止派滿漢各一員。今若按省分各選庶吉士。或亦按省分各設教習可乎。至各省未得館選之進士中。或有文義可充翰林之選者。爾等確有所知。即行舉出。毋使人有逸才之論。爾大學士會同九卿詳議具奏。尋議。

皇上振興文教。儲養英才。因人器使。館選之法。盡善盡美。更無遺逸之才。李鍾義條奏。應無庸議。從之。○諭內務府。今年京城附近地方。雖雨水霑足。然山東河南兩省。尚未得雨。進膳餽餼。宜為撤減。著每日只用菜蔬二器。餅餌二器。滿菜二器。用榼盛貯。進御餘物一概不用。○授故奉恩將軍寧靜子瑞昌為奉恩將軍。○甲申。

孝端文皇后忌辰遣官祭

昭陵○乙酉

上孝思純篤追慕

聖祖仁皇帝敬建

恩佑寺告成親詣行禮○諭戶部朕撫育蒸黎。務期休養寬裕。俾咸臻安阜。故於各省雨暘節候。時時咨訪體察。無刻少釋於懷。近聞河南山東春雨稍缺。朕心深切軫念。著將河南省歷年民欠錢糧寬作五年帶徵。山東省歷年民欠錢糧寬作八年帶徵。俾閭閻納賦舒

徐以副朕勤恤民隱至意○戶部議覆署山西巡撫伊都立奏。原任川陝總督年羹堯擅給鹽商印票。增引十萬道。既非部頒之引。無從稽核。且將應行收貯正課。並不請撥。擅自動用。又差咸寧知縣嚴士俊。於山西拏獲私茶。越境提人。將茶變價五萬兩。又擅罰茶犯王欽菴等銀九萬兩。私令贖罪。隨保題嚴士俊為河東運同。假捏商名私佔鹽窩。招搖生事。應特遣大臣前往確審。得旨遣吏部左

侍郎史貽直。刑部右侍郎高其佩前往審理。○增廣西省各學取進文章額數。全州鬱林州橫州新寧州賓州五州。臨桂蒼梧懷集宣化上林五縣。向係大學。照府學額各取進二十名。靈川興安灌陽桂平貴縣隆安武緣永淳八縣。向係中學。陞為大學。各取進十五名。平南縣向係小學。陞為中學。取進十二名。○丙戌諭漕運總督河道總督直隸總督山東巡撫等。自三月以來山東雨澤稍缺。恐運河



淺涸糧艘不免阻滯。目今京師雨澤及時。若山東一帶亦得雨如此。河水自可暢流。應速飭沿河文武官弁協力催趲漕船。勿致稽延生事。今年有新換水手之糧船。僅借稱新充。不能撐駕希圖延挨。時日該管官查明嚴究。并將押運官員題叅。毋致縱玩。總漕張大有今歲來京與否。亦著預先奏聞。○以翰林院侍講學士張照充日講起居注官。○旌表山東單縣烈婦蘇大魁妻王氏拒姦被刃矢死。不污。給銀建坊。入祠致祭。如例。○丁亥命貴州巡撫毛文銓來京。陛見。以貴州威寧總兵官石禮哈署理貴州巡撫。貴州定廣副將劉業濬署理貴州威寧總兵官。陞雲南督標中軍副將南天祥爲雲南開化總兵官。○以鑲藍旗漢軍副都統金以坦署正紅旗漢軍都統。○戊子諭直省督撫等爲政首重安民。安民必先察吏。邇年有司不能仰體

聖祖仁皇帝寬仁德意。吏治漸致廢弛。朕即位

以來。嚴加訓誡。整飭官方。欲其潔己愛民。奉公盡職。在朕竝非苛刻。亦非偏私。乃有庸懦無能之督撫。間有叅劾。每向人云。我若不叅。恐非上意。又恐他人叅劾。於我不便。以此等語解釋於衆。似覺叅劾爲迎合朕意。而出於不得已者。即如浙閩總督滿保。叅劾知府何國棟。似屬迎合。朕察其無貪污之蹟。仍准留任。則朕無成心可知矣。前滿保曾奏浙閩屬吏已劾多員。若再題叅。恐至無人辦事。魏廷珍巡撫湖南時。亦曾奏稱屬員叅劾過半。容再查奏等語。夫屬員之去留。惟視居官之優劣。豈論叅劾之多寡。朕心總出於至公。爾督撫等安得以庸鄙之見。偏私之心。妄爲窺測乎。又聞外間議論云。朝廷懲盜臣而重聚斂之臣。此語尤爲荒誕。自朕臨御以來。蠲免舊欠錢糧。不下千百萬兩。江南蘇松之浮糧。江西南昌之浮糧。共免額徵銀五十餘萬。此皆惟正之供。尚且大沛恩膏。特行豁免。見今各



省督撫大吏將諸項名色私派陋規裁革甚多莫非推惠於民尚得謂之聚斂乎至若虧空侵蝕以及貪婪枉法之輩蠹國殃民有干法紀既寬其誅已屬格外若又不嚴追完項一任貪吏優游自得國法安在耶此明係朋黨匪人懷私捏造悖謬之語以惑衆聽殊屬可恨故特諭衆知之願爾內外大小臣工深知朕心凡事秉公據理不可稍存迎合之見則庶政皆得其宜而吏治民生均有攸賴矣

○諭振武將軍穆克登喀爾喀地方駐兵年久每年由京城運送軍糧路途遙遠一時不及恐兵丁至於乏食鄂爾昆圖拉一帶甚爲寬濶若開墾屯田實爲永遠之計爾會同喀爾喀副將軍等確議具奏○以正藍旗蒙古副都統常色禮署鑲白旗蒙古都統○己丑諭大學士等朕從前將御前侍衛揀發年羹堯處特欲其効力軍前遇有緊要事務備其驅策竝非供伊之隨從也乃伊將朕揀發之

侍衛不用於公務俱留伊左右使令帶至西安以侍衛擺對前引後隨又令侍衛爲伊墜銕是誠何心向年

聖祖時富寧安傳爾丹處皆有揀發侍衛從未聞將軍等將侍衛作奴隸使令也督撫竝無跪接大將軍之例伊去年來京陛見又未帶有大將軍敕印而途中令總督李維鈞巡撫范時捷等跪接伊係征勦青海將軍青海之叛逆王台吉等則可令其下跪至竝無罪犯

蒙古王等亦令下跪阿寶係扎薩克郡王本朝之額駙亦竟令其下跪伊如此僭越無知是誠何心著年羹堯明白回奏○以都察院左都御史蔡珽兼理正白旗漢軍都統○先是雲貴總督高其倬奏言雲南開化府與交趾接壤有內地舊境失入交趾今因開銅礦經布政使李衛詳報臣隨委開化總兵馮允中勘查今查出都龍廠之對過鉛廠山下一百二十九里又南狼猛康南丁等三四十寨

皆被交趾占去。伏查雲南通志載開化府南二百四十里至交趾。賭呪河爲界。今交趾呼爲安邊河是也。後明季因其地曠遠。將塘汛移入內地。另指鉛廠山下一小溪。強名爲賭呪河。已失去一百二十里。本朝康熙二十二年。鉛廠山下小溪內斜路村六寨。復入於交趾。以見在之馬伯汛爲界。較明季又失去四十里。若論舊界。應將二百四十里之境徹底取回。臣見在移咨安南國王。交趾之都龍南丹二廠。皆在此內。交趾倚爲大利。必支吾抗拒。捏辭瀆陳。爲此詳奏。得旨覽奏。交趾舊界有遠近互異等情。朕思柔遠之道。分疆與睦鄰。論則睦鄰。爲美。畏威與懷德。較則懷德爲上。據云都龍南丹等處。在明季已爲安南所有。是侵佔非始於我朝也。安南自我朝以來。累世恭順。深屬可嘉。方當獎勵。是務寧與爭尺寸之地。况係明季久失之區乎。其地果有利耶。則天朝豈宜與小邦爭利。如無利耶。則

又何必與之爭。朕居心惟以大公至正爲期。視中外皆赤子。且兩地接壤連境。最易生釁。尤須善處。以綏懷之。非徒安彼民。正所以安吾民耳。即以小溪爲界。庸何傷。貪利倖功之舉。皆不可爲訓。悉朕此意。斟酌行之。至是安南國王黎維禔奏稱。臣國渭川州向與雲南開化府接壤。以賭呪河爲界。河之西歸開化府。河之東歸渭川州。聚龍社忽接雲貴總督移咨。臣國聚龍斜路村等六寨。皆係開化府屬內地。向爲都龍土目占侵。至今四十餘年。合行清立疆界。臣已具文回覆。隨有開化總鎮親來斜路村之鞍馬山。去賭呪河一百二十里。就立界牌。設立房屋。分兵防守。臣備錄情由。謹具奏聞。得旨。此事王未奏之先。雲貴總督高其倬方差員勘界之時。即已摺奏矣。朕念安南累世恭順。王能恪繼職守。可嘉。且此地乃棄自明朝。安南之民住居既久。安土重遷。恐有流離之苦。朕心存柔遠。中外一視

甚爲不忍已批諭將斜路村等處人員撤回別議立界之地務期允當諒茲時所批已到必另有料理矣王但自共厥職以綏爾民靜候可也○庚寅調鑲黃旗滿洲副都統常在爲正藍旗蒙古副都統陞一等侍衛宗室諾穆珠爲鑲黃旗滿洲副都統○議敘平定西藏功一等精奇尼哈番那穆渣布加一拖沙喇哈番二等精奇尼哈番多爾濟加一拖沙喇哈番歸併爲一等精奇尼哈番三等阿達哈哈番卓爾和覺羅佛保俱加一拖沙喇哈番歸併爲二等阿達哈哈番拜他喇布勒哈番格勒爾圖劉保寶色董吉納俱加一拖沙喇哈番世職章京納孫泰德成查代法喀席蘭泰烏雲寶雅起納阿爾善戴壽俱授爲拖沙喇哈番世職故署護軍叅領傅達里章京常壽朱其布護軍校哲庫納俱給一拖沙喇哈番令其子承襲○辛卯命協理大學士吏部尚書田從典爲文華殿大學士兼吏部尚

書○以順承郡王錫保管理正黃旗漢軍都統○正藍旗護軍統領署本旗滿洲都統阿林保緣事革職以鑲白旗護軍統領濟星署理正藍旗滿洲都統○壬辰免直隸霸州東安等六州縣梁城一所本年分水災額賦有差○癸巳陞太常寺卿汪潒爲內閣學士兼禮部侍郎○甲午調正白旗蒙古副都統覺羅傅森爲浙江杭州左翼漢軍副都統○禮部議覆翰林院侍講學士張照條奏

聖諭廣訓一書乃我

皇上仰體

聖祖仁皇帝覺世牖民之心而推廣其義請令各省學臣轉頒各州縣教官俾童蒙即加誦讀縣府考覆試時令其背錄一條方准錄取又國子監祭酒張廷璐奏請敕各直省將軍提鎮轉飭所屬將弁每月朔望齊集兵丁宣讀聽講均應如所請從之○乙未兵部議覆雲貴總督高其倬疏稱雲南苗獮平時踞元

江新平之間官兵勦捕則遁入威遠普洱茶山等處廣袤二千里難以控制請將威遠土州改土歸流設撫夷清餉同知一員經歷一員鹽井大使二員於猛班設巡檢一員分理民事再添設普威一營置叅將一員駐劄普洱守備二員一駐威遠一駐茶山千總四員把總八員兵丁一千二百名分汛防守至賊苗巢穴根株全在元江協新習營所轄之地而舊制新習止屬臨元不屬元江故兩界遇事易於推卸請將新習營歸元江管轄仍令臨元統轄又猺夷有討保之習勒索銀兩騷擾地方請於九龍江口夷人出入之處設立防汛照山海關例給以印票并將所屬村寨編立里甲戶口以憑稽察其夷人子弟有志讀書者准其於元江附考元江府入學額數應加取二名田畝照地肥瘠酌定額賦土地可闢者見今開墾照定例水田六年旱田十年陞科至於土官方普二姓糾衆騷擾所

有二姓土巡檢承襲之處應永遠停止均應如所請從之○丙申議政王大臣等遵旨議覆奮威將軍岳鍾琪摺奏查大將軍年羹堯條奏內稱青海與內地之人每年定於二八月貿易兩次擇定那拉薩拉地方爲交易之所經議政大臣議改四季交易已覺寬容今查親王察罕丹津公拉查卜等諸台吉部落居住黃河之東切近河州去松潘亦不甚遠向來原在河州松潘兩處貿易今若止令在於那拉薩拉一處恐不足供黃河東西兩翼蒙古易賣莫若仍令在河州松潘貿易終覺穩便河州定於土門關附近之雙城堡松潘定於黃勝關之西河口此二處地方俱有城堡房屋地方寬濶水草俱好利於互市可爲永久再查郡王額爾得尼厄爾克托克托奈郡王色卜騰扎爾等諸台吉部落住牧黃河西邊相近西寧請將貿易之地移在西寧口外丹噶爾寺至蒙古貿易全藉牲畜每在六

大清世宗敬天昌運建中表正文武英明寬仁  
信毅大孝至誠憲皇帝實錄卷之三十一

監修總裁官光祿大夫從筵講官太保議政大臣保和殿大學士兼兵部尚書總理兵部事三等伯加十三級日郭爾泰  
總裁官光祿大夫從筵日講官起居注太保兼太子太保保和殿大學士兼戶部尚書仍兼管吏部尚書翰林院掌院  
事三等伯加十三級日張廷玉光祿大夫從筵日講官起居注太保議政大臣武英殿大學士兼工部尚書仍兼管  
翰林院掌院事加二級日福敏光祿大夫從筵講官太子太保東閣大學士兼禮部尚書加六級日徐本光祿大夫  
從筵講官議政大臣滿洲內閣大學士事務禮部尚書仍兼管太常寺鴻臚寺事日三泰等奉

雍正三年乙巳五月戊戌朔直隸總督李維

釣摺奏各屬晴雨并見遵董仲舒春秋繁露  
祈雨之法虔誠祈禱奉

上諭覽奏。因檢春秋繁露。細閱其所雨之法。朕意似此。皆可不。必。蓋獲罪於天。無所禱也。大凡地方水旱。沴不虛生。或朕朝政闕遺。或爾等封疆大吏。治理紕繆。或小民習尚澆漓。之所致。消弭之道。當應之以實。不應之以文。惟返躬修省。克己改過。然後齋肅籲懇。則天人交感之際。潛孚默契。有如響之應聲。但庸

愚視爲杳渺無憑耳。朕即位以來。凡有所禱。從未命僧道之流。設壇作法。朕嚴恭寅畏。敬天之心。無時敢懈。至於鬼神之道。體物不遺。第宜敬而遠之。固不可輕忽。亦不可溺信而涉於諂瀆。茲亟應省察吏治。檢點刑名。其有關於國政者。奏聞於朕。我君臣期共懋勉。以恭迓天庥可也。○李維鈞又摺奏。向與年羹堯通問稀疎。近與相絕。奉

上諭。據奏。與年羹堯通問。歲不過一二次。殊屬

狡辯。西安總督署前。未有隔五日不見直隸總督李維鈞之使者。衆目昭彰。何能遮掩。但人非聖賢。孰能無過。如果奮然易轍。不少依回。猶可謂之勇於自新。若似此巧言粉飾。以狡獪爲得計。以隱蔽爲深謀。恐一旦發覺。罪無可逭。斷不能逃朕之鑒察。爾其思之。○己亥。諭大學士等。查弼納保奏。參將遊擊六員。彙寫一樣考語。豈有六人盡係相同之理。朕調取武員輪流引見。係國家用人要政。朕將

大臣等摺奏之語。悉皆躬自抄錄。又將朕看閱之處。逐一記於該員姓名之旁。爲將來用人之據。且可見各省大臣所保之公私。今查弼納如此怠忽。著將此摺行文訊問。查弼納○以故鎮國公智保弟蘇保襲爵。○庚子。孝誠仁皇后忌辰。遣官祭

景陵。○辛丑。諭吏部。月官條奏。原欲觀其人之存心。今漸有將地方關係事務條奏者。伊等新進小臣。恐或受人囑託。或將條奏事件。在外聲揚。以沽虛名。或刻入文集。此等情弊。一經查出。必治以重罪。爾等即明白傳諭。嗣後月官考試履歷。令其密封進呈。○壬寅。諭直省提鎮等。我

皇考聖祖仁皇帝優待武臣。恩眷之隆。自昔希比。諸武臣感激恩寵。遇事奮力効命。但平日居官砥礪操守。撫恤兵民之道。尚多不及。夫爲將弁者。雖貴乎材勇。然使有衝鋒破陣之才。而不能潔己愛人。撫綏士衆。或至扣剋貪

婪人罹其害則與盜賊何異彼盜賊之肆行劫掠不恤身命何嘗不勇惟因利人財物遂謂之爲盜賊而法在必誅勇不足稱卽爲可恥凡爾武臣務須廉潔持躬奉法循令恤兵愛民綏輯地方遵國憲正所以重身家也設或婪財貪利橫生事端致干法網則地方既滋擾害而法所不容國家又失一勇力有用之材豈不可惜是知心存報國最在平日之愛恤兵民安靜守分耳若至生事擾害之後

雖或捐軀亦何所補從前縱有微勞亦不足以贖此日之罪愆矣爾將弁當各輕目前小利勉爲國家梁棟垂名竹帛以圖光前裕後之功業可也勉之戒之勿負朕諄諄告誡之意○癸卯左副都御史江球乞假回籍陞浙江按察使王之麟爲都察院左副都御史○陞一等侍衛色爾璧爲正白旗蒙古副都統○鑲白旗滿洲副都統覺羅諾穆齊緣事降調陞一等侍衛覺羅佛保爲鑲白旗滿洲副

都統○以故三等精奇尼哈番伊靈阿弟西靈阿襲職○甲辰陞正藍旗蒙古副都統常色禮爲本旗護軍統領○戶部議覆正紅旗蒙古副都統馬起達條奏八旗滿洲蒙古家下開戶人等間有串通原主賣身漢人日後稱係滿洲蒙古借以訛索財賄此等惡風漸不可長嗣後請將伊主一併交部議罪銷其檔案給與後買之人爲奴應如所請從之○工部議覆河道總督齊蘇勒疏言遵旨閱視祥符縣北岸回回寨所挑引河一道應從上流口改挖三十餘丈以對頂沖以通大溜并於對岸築挑水壩一座應如所請從之○戊申夏至祭

地於

方澤

上親詣行禮○怡親王允祥等遵旨議覆原任大將軍年羹堯奏稱臣在西寧時因邊外波羅冲可克之鹽池青海蒙古人等運來邊內



貿易西寧軍民賴食此鹽臣奏設副將一員兵一千六百名駐防彼處將西寧通判移駐管理鹽務在案見今郡王額駙阿寶移在波羅冲可克地方駐劄官兵若仍住彼處恐其生事應將臣原議設立官兵駐劄鹽池之處請行停止其管理鹽務之通判亦請裁去應如所請從之○議政大臣等議覆鑲白旗滿洲副都統哈岱條奏上三旗親軍等雖係領侍衛內大臣管轄竝無專管之章京請於辦事之侍衛班領什長內揀選數員令其兼管應如所請從之○旌表山東曹縣烈婦劉子重妻李氏守正不污拒姦被殺給銀建坊入祠致祭如例○己酉鑲白旗漢軍都統范時捷奏原任大將軍川陝總督年羹堯欺罔貪婪五款○運米至軍前侵蝕腳價銀四十餘萬兩○管理捐納駝米勒取私費婪銀三十萬兩○違旨勒派屬員公捐俸工○與將軍督撫文書擅用令諭直書官名○保舉題

補各官悉多營私受賄應將年羹堯并通同欺罔之桑成鼎金啟勲胡期恒及伊家人魏之耀嚴大等一併敕部提拏嚴行審究治罪得旨著年羹堯明白回奏○庚戌皇后千秋節停止行禮筵宴○遣官祭關聖帝君○辛亥諭吏部前年羹堯奏稱陝西郃陽縣有鹽梟甚是兇惡必得用兵彈壓遂調集兵丁令河東運使金啟勲前往料理金啟勲不告知該處人民竟率兵驟至郃陽縣地方黑夜圍堡致無知男婦等多驚惶無措有自縊投崖溺井而死者范時捷先經摺奏朕將范時捷原摺發與年羹堯令其明白回奏而年羹堯希圖朦混反奏稱竝未傷損一人金啟勲料理此事甚屬妥協迨范時捷再行摺奏復今年羹堯查明今始將金啟勲領兵圍堡逼死人口名數奏聞金啟勲附合年羹堯生事擾民甚屬可惡著將金啟勲革職拏問并將范時捷年羹堯奏摺發與史貽



直高其佩等審理○正藍旗蒙古副都統常存緣事降調陞正藍旗參領岳爾岱爲本旗蒙古副都統○以山西大同總兵官馬燠署陝西固原提督○陞陝西洮岷副將石雲傳爲江西南贛總兵官○壬子禮部遵旨議奏欽天監敬擇本月十九日申時修飾

神牌

天壇

祈穀壇

地壇

太廟派太常寺堂官各一員

奉先殿派內務府大臣一員行禮恭捧

神牌交工部內務府承修官敬謹修飾得旨是

依議○陞翰林院侍講學士德新爲內閣學

士兼禮部侍郎○正黃旗漢軍副都統阿漢

泰緣事革職以散秩大臣宗室鄂齊爲正黃

旗漢軍副都統陞鑲黃旗護軍參領蘇穆爾

濟爲正藍旗蒙古副都統○浙閩總督覺羅

滿保疏報臺灣生番巴荖遠等四社猫仔等

十九社輸誠歸化各造報戶口願附版籍下

部知之○豁免江南丹徒縣濱江坍田額賦

銀一千六百二十兩有奇米麥一千九百七

十七石從原署江蘇巡撫何天培請也○旌

表安徽虹縣烈婦許守學妻子氏拒姦不從

投水殞命給銀建坊入祠致祭如例○癸丑

諭內閣朕軫念民生蠲租賜復不過行吾心

之所安使斯民共霑實惠竝無一毫市恩之

念欲以崇尚虛名也前蠲免江南蘇松兩府

浮糧彼處士民感激朕恩爲朕祈福聞有誦

經立碑蓋造龍亭聚會演戲者雖或出於愛

戴之誠然實非矢報君親之理朕所望於天

下者祇欲各安職業端本務實以生以養庶

幾家給人足共享昇平仰報我

皇考之付託耳以云祈報莫大於此至於誦經

禮懺諸事皆爲粉飾虛文即謂頌禱致虔亦

於朕躬毫無所益且聚衆演戲蓋造碑亭非

徒糜費金錢兼恐有不肖官吏及里胥人等借名私派乾沒肥己貽累小民俱未可定此等陋俗

聖祖仁皇帝久已洞悉曾屢降

諭旨禁止及朕臨御以來曉諭天下人民務本重農力行節儉而聚衆演戲諸事更屬奢靡浪費蘇松士民習於華侈今又爲此虛文以祈朕福甚非朕意著該督撫嚴行禁飭其碑亭建造之處槩行停止仍遍諭士民各歸本業以副朕懷○又諭制錢乃日用必需之物務使遠近流通以便民用京師錢局每歲鼓鑄則制錢應日加增今雖不致缺乏而各省未得流布民用不敷是必有銷燬官錢以爲私鑄者且聞湖廣河南等省私鑄之風尤甚著直隸及各省督撫申飭該地方官密訪查拏嚴行禁止毋使姦徒漏網儻稽察少疎仍蹈前弊一經訪覺定將地方大小官吏分別治罪○又諭前松江提督高其位署理江南

總督印務時年羹堯奏

聖祖仁皇帝云高其位年老衰憊兩耳重聽貪位隱飾貽誤地方不應畀以重任是以

聖祖仁皇帝降旨罷其署理之職及朕即位猶記年羹堯之言特召高其位來京陛見朕視其爲人老成忠厚善氣迎人雖已年老精力猶可任用適值年羹堯在京遂令伊詢問高其位觀汝筋力尚可爲朕効力數年不得固辭目下見有鑾儀使一缺旗下都統一缺著高其位量其力之所能或願在京効力或願仍回松江提督之任自行陳奏比時高其位奏稱都統事務向來不甚熟練至於鑾儀衛又無可効力之處朕遂降旨令回松江此乃出自朕意加恩老臣並非年羹堯贊助之力揣年羹堯必隱其從前之參劾反市德於高其位而高其位不知亦以爲出於年羹堯贊助之力也去年高其位奏進松江漁船所獲玉寶朕賞以四團龍補服等物又適值年羹

堯在京必又向高其位居功冀其感激間年  
羹堯將蘇州一無賴小人王廷貴薦與高其  
位高其位不察其能否不驗其騎射即授以  
把總未幾又特拔爲千總此事在向時外省  
督撫提鎮中皆所不免年羹堯尤視爲常事  
但高其位向被年羹堯所叅及朕加種種之  
恩皆特出朕意與年羹堯毫無干涉而年羹  
堯竊君恩爲己功高其位奉私囑如公令即  
此見年羹堯之巧詐營私隨處要結而內外  
臣工之爲所愚者不少矣以上情節著高其  
位明白回奏其所薦王廷貴著高其位速遣  
來京朕親自閱看○甲寅諭內閣江南浙江  
海塘已差尚書朱軾會同江浙巡撫查勘估  
議具奏但沿海黎庶全賴堅築海塘捍禦潮  
汐得以保全生聚事關民瘼朕時刻在念若  
塘工遲誤則海濱之人未能安居樂業所派  
効力人員雖經赴工惟恐遷延時日驟難告  
竣亦未可定著巡撫張楷法海等星速遴委

幹員動支司庫錢糧立限堅築剋期報完務  
使永保安瀾毋得因循延緩亦不得草率塞  
責貽誤民生○諭刑部龐登雲打死林榮一  
案吳隆元另議具奏毫無合理之處律載官  
司差人捕獲罪人聚衆中途打奪殺人及聚  
至十人爲首者斬監候等語是中途打奪殺  
人者即應擬斬若聚至十人即不殺人亦擬  
斬候律載甚明今此案龐登雲明係中途打  
奪殺人之犯而吳隆元忽稱所糾之衆止有  
三人與聚至十人有間遽以應照鬪毆殺論  
兩議具奏及詰問吳隆元兩議情由曾否與  
法司大臣商酌初則奏稱曾說與刑部書吏  
後又奏稱兩議之處曾向尚書塞爾圖言之  
在朕前奏對自相背謬如此吳隆元身爲僉  
都御史與各道御史不同即所見甚確亦當  
與法司諸大臣虛衷推詳以期平允今所議  
既與律例不符又於情理乖謬徒自貽恥安  
能顯其所長且吳隆元平日稱隆科多爲柱

石大臣又將年羹堯所薦落卷故意在年羹堯之前極力贊賞。看其行止不過趨承附勢希圖倣幸。殊不知生殺之權操之自朕。伊所逢迎之人何能保全伊之身名。似此假作剛方之態。陰爲姦險之謀。朕豈肯姑容。著隆科多查審。○諭八旗都統等。八旗恩賞銀兩。或有一旗不給與官員之子弟。或又有一旗給與者。夫推恩賞賜。理當畫一。即如貧乏筆帖式等。以其爲部院官員。不令給與。似屬難行。此必八旗大臣恐銀兩不敷。故行節省耳。大約每旗一月不令過一千一二百兩。則銀可足用矣。著八旗大臣詳悉畫一議奏。尋議恩賞銀兩。貧乏官員子弟及護軍校驍騎校看守城門官渡等員。並部院衙門筆帖式。前鋒護軍領催馬甲執事人等。應令一體給與。從之。○以故科爾沁和碩卓禮克圖親王巴特瑪子阿爾坦格勒爾襲爵。○丙辰。諭大學士等。從前年羹堯所奏事件。朕所降諭旨。並殊

批諭旨甚多。有交部者。亦有未曾交部者。其前後所奏事件。每有互相舛謬之處。爾等行文年羹堯。著將謬誤等帶往杭州。一切年羹堯所奏事件。奉朕所降諭旨。並殊批諭旨。俱著察明具奏。俟察明具奏時。將伊等如何措置之處。著年羹堯具奏請旨。至去冬年羹堯奏請帶往補用人員。內惟侍衛查爾扈係奉旨發去之員。其餘有請托年羹堯帶往者。有年羹堯自欲帶往者。此內亦有將督撫大臣官員子弟帶往者。亦有欲作質當帶往者。是以有感激年羹堯之人。亦有怨恨年羹堯之人。著伊等各將帶往緣由。請托情節。并年羹堯所行事蹟聲明。繕寫摺子。俱交與岳鍾琪轉奏。倘有不能聲明情由者。俱著仍隨年羹堯前赴杭州學習。高其倬之弟高其倬。著令回京。至於前歲朕揀選發與年羹堯之侍衛。俱係

皇考時所用。在朕左右隨侍之人。特欲伊等効

力軍前驅勉勤勞竝非令爲年羹堯廝役而供其驅使也伊等至彼貪其資財爲年羹堯前引後隨且爲墜鎧竟似奴僕聽命而行伊等既甘卑賤如此即令跟隨年羹堯前往杭州至杭州時將伊等如何措置之處著年羹堯具奏請旨○諭戶部去歲江浙海潮衝溢沿海場竈淹沒甚多兩淮鹽政所屬地方經噶爾泰奏聞朕即發帑賑恤并將雍正元年二年竈戶未完折價銀四萬餘兩悉行蠲免其兩浙鹽政所屬地方該巡鹽竝未將被災之處題報今謝賜履摺奏去秋海濤飄決情形兩浙與兩淮無異朕一視同仁務使均霑膏澤著將華亭婁縣上海海寧餘姚蕭山慈谿等縣雍正元年二年未完場課銀兩悉行蠲免○以正藍旗蒙古副都統蘇穆爾濟署本旗蒙古都統○以總督倉場侍郎法敏爲湖北巡撫戶部右侍郎托時爲總督倉場侍郎戶部額外侍郎覺羅塞德爲戶部右侍郎

光祿寺卿杭奕祿爲都察院左副都御史仍管光祿寺卿事○山西大同總兵官馬觀伯緣事革職發往阿爾泰軍營効力以原任鑲白旗漢軍副都統王以謙爲山西大同總兵官○解廣西按察使白洵任陞廣西左江道甘汝來爲廣西按察使司按察使○理藩院秦振武將軍傅爾丹咨稱輝特台吉濟克濟扎卜稱由錫喇他拉移遊牧於伊族公巴濟處大將軍年羹堯遣人看送出口即回道途困憊人畜散斃懇賜軫恤應准其與公巴濟同居俟伊屬下人等俱到再議編設佐領得旨輝特台吉濟克濟扎卜之事年羹堯止用密摺具奏竝無報部亦無行文與將軍傅爾丹及該扎薩克等但交與章京一員送至口上即回將此多人致此勞苦謬亂已極著年羹堯明白回奏○裁浙江掌印都司一員都司經歷一員并杭州前衛右衛經歷各一員○青海貝子策凌敦多卜故遣官致祭○旌

表浙江龍游縣烈婦席廿二妻方氏持刀拒  
姦被奪砍殞給銀建坊入祠致祭如例○丁  
巳諭大學士等頃將年羹堯解退大將軍總  
督職任補授杭州將軍陝西通省滿漢兵民  
羣稱得命復見天日靡不歡忻相慶乃聞年  
羹堯繫戀總督職任又設法揚言將行李發  
往巧圖仍留原任自負爲良臣欲加朕以遺  
棄功臣之名眩惑營求彼處兵民等年羹堯  
既負朕恩致犯衆惡若此尚復繫戀營求誠  
爲不識羞恥者間有愚人或貪圖年羹堯財  
物或仍畏年羹堯威勢代爲具呈朕必照逆  
黨例從重治罪斷不寬宥年羹堯應交岳鍾  
琪事件著作速交代急赴杭州任所將此行  
文岳鍾琪及該撫等令其知悉○以原任四  
川巡撫能泰爲都察院左副都御史○戊午  
八旗都統等議覆鑲白旗漢軍都統范時捷  
奏言從前八旗都統等各在私家辦事一應  
行文檔案堆貯家中並未按年登記今蒙賞

給公署都統等俱於公所辦事嗣後請照部  
院衙門另立檔案編定年月分析事件鈐押  
印記交於印房收貯應如所請得旨爾等所  
議止將檔案收貯旗下公所仍恐有火燭之  
虞應再造一冊存都統之家與印信一同收  
貯交代○以故一等侯馬三奇姪馬爾英襲  
爵故三等精奇尼哈番色楞子黑達色襲職  
○己未諭議政王大臣等副都統田象坤奏  
稱烏喇地方緊要止設將軍一人請添設副  
都統一員協同辦理著照所請行烏喇副都  
統著盛京副都統委色補授盛京副都統著  
鑲藍旗叅領覺羅傅哥補授○又諭策妄阿  
喇布坦遣使具奏言辭敬順巴爾庫爾等處  
兵丁在外年久將吐魯番等處駐劄兵丁俱  
撤到巴爾庫爾會合一處著照吐魯番鄂龍  
吉潤舍圖等處撤兵之數撤回再吐魯番地  
方揀選能員一人令其駐劄候我使臣歸國  
著行文將軍富寧安撤兵時吐魯番回人未

免怯懼將策妄阿喇布坦敬謹遣使及命使臣前去不必用兵緣由曉諭回人俟使臣來時其回衆移居之處照從前所降諭旨行著議奏尋議巴爾庫爾吐魯番濶舍圖鄂龍吉四處兵共計九千八百七十四名吐魯番兵內將種地兵一千名暫留彼處交與副都統克什圖管轄其餘兵丁照巴爾庫爾原有兵數暫留巴爾庫爾駐劄所餘兵丁俱行撤回得旨克什圖一人年老著留穆森一同管轄其留在巴爾庫爾之大臣及統領撤兵之大臣著將軍富寧安酌量派出奏聞諭大學士九卿等人君圖治首在用人書云任賢勿貳中庸云忠信所以勸士蓋君之待臣原宜開誠布公推心置腹相信如一體然後爲臣者乃可惟所欲言惟所宜行而無顧慮朕御極之始將隆科多年羹堯寄以心膂毫無猜防所以作其公忠期其報効孰知朕視爲一德伊等竟懷二心朕予以寵榮伊等乃倖爲

邀結招權納賄擅作威福敢於欺罔忍於背負幾致陷朕於不明朕深恨辨之不早寵之太過愧悔交集竟無辭以謝天下惟有自咎而已朕今於隆科多年羹堯但解其權柄不加刑誅者正以彼等之妄謬皆由朕之信任太過是以惟有自責而於伊等一槩從寬也自今以後既覺其姦僞曉諭衆知不復信任假以要權在朕既不失馭下之道而諸人亦免被其愚惑若伊等怨望不遂其欲仍怙惡不悛彼既視憲典等於弁髦朕豈能姑息以養姦邪至於二人門下向來趨附奔走者不少此亦中人之常情希其薦拔畏其加害之所致俱宜急解散黨與洗心革面若仍念舊情負國恩而感私惠蔑大倫而重小節往來鑽營妄有希冀或餽送賂遺或書札來往設計陷人或揣擬伺探朕意暗作威福不能改革惟務隱密巧詐若再發覺之時決以逆黨從重正法伊等各宜警懼無得自干誅滅朕



意已定法在必行○庚申

孝恭仁皇后忌辰遣官祭

景陵○壬戌諭禮部前博爾多來京陛見奏稱

僧人宏素處有朕昔年賞賜金剛經一部上有朕所製序文今欲刊刻流傳朕細思向來竝無此事因命博爾多將此經取來閱看昨日齋到文與字俱非朕筆且將朕名皆書寫錯誤甚不可解聞宏素已經身故其同寺僧人必有知其由來者著即行文問明具奏不必嚴拏拘禁前令各處呈繳御筆伊等既將此序認爲御筆何以不行呈繳若以爲非御筆何以不行詳察亦著問明朕在藩邸時因府第與栢林寺相近閒暇之時間與僧人談論內典竝非以僧人爲可信用也況今臨御天下豈有密用僧人贊助之理近日直隸宣化府江南蘇州府等處竟有僧人假稱朕旨行爲皆於朕之聲名大有關係爾部不可不

嚴行禁飭若再有此等著該地方官訪拏叅奏毋得疎縱年來各處呈繳御筆今限期已滿尚有未繳者所繳之內亦有假筆混雜者朕俱從寬不行深究今又有金剛經序文之事爾部可嚴行各省以文到之日再限一年務令全繳儻再有隱漏定行治罪○癸亥諭內閣盛京風俗甚屬不堪俱因蘇努爲將軍八年俯徇無知小人心沽取虛名私恩小惠逞其機詐惟利是圖毫無裨益地方軍民之處風俗由是大壞非有爲國家實心効力之大臣盡心竭誠大加整理不能挽回風俗著都察院左都御史尹泰以原品往盛京署禮部侍郎兼理府尹事○陞奉天府府尹鄒汝魯爲太常寺卿○添設雲南中甸撫番清餉同知一員經歷一員巡檢二員從雲貴總督高其倬請也○旌表烈婦直隸廣宗縣李喬龍妻裴氏江南霍邱縣武二妻汪氏宜興縣蔣瑞明妻張氏俱拒姦不污自縊全節各



給銀建坊入祠致祭如例○甲子吏部題一等精奇尼哈番兼一拖沙喇哈番色特黑故銷去三次恩詔所得四個拖沙喇哈番餘一等阿思哈尼哈番兼一拖沙喇哈番以其子英壽承襲從之○設山西朔平寧武二府改右玉衛爲右玉縣左雲衛爲左雲縣平魯衛爲平魯縣并割大同府屬之朔州馬邑縣俱隸朔平府管轄改寧武所爲寧武縣神池堡爲神池縣偏關所爲偏關縣五寨堡爲五寨縣俱隸寧武府管轄改天鎮衛爲天鎮縣陽高衛爲陽高縣移原駐陽高通判駐府城俱隸大同府管轄改寧化所爲巡檢司隸寧武縣管轄朔平寧武各設知府一員寧武府設同知一員右玉等九縣設知縣九員典史九員寧武設巡檢一員裁太原府中路西路同知二員右玉等衛守備十員寧武等所千總十三員從原任山西巡撫諾岷等請也○乙丑陞都察院左副都御史能泰爲左都御史

大理寺卿覺羅常泰爲都察院左副都御史○吏部兵部議奏杭州將軍年羹堯於川陝總督任內妄參金南瑛等七員應革職得旨此年羹堯總督任內之事竝非將軍任內之事乃吏部應議者與兵部無涉若果以將軍係兵部職掌即應請旨交與兵部而吏部可不必會議今竝未請旨含糊專擅會同兵部議革年羹堯將軍之職具奏特預先立意徇庇年羹堯耳如此巧爲殊屬不合隆科多等著交與都察院嚴察奏聞將本發回仍令吏部議奏○丙寅以翰林院編修程元章署日講起居注官○二等精奇尼哈番達爾查休致以其子巴牙思呼郎襲替二等精奇尼哈番伍巴什緣事革職以其弟五巴第襲替三等精奇尼哈番西常故以其弟來先襲職

大清世宗敬天昌運建中表正文武英明寬仁  
信毅大孝至誠憲皇帝實錄卷之三十二

大清世宗敬天昌運建中表正文武英明寬仁  
信毅大孝至誠憲皇帝實錄卷之三十三

監修總裁官光祿大夫經筵講官太僕議政大臣保和殿大學士兼兵部尚書總理兵部事務等伯加十五級臣鄂爾泰

總裁官光祿大夫經筵日講官起居注兼保奏太子太保保和殿大學士兼戶部尚書仍兼掌吏部尚書翰林院掌院

事三等伯加十五級臣張廷玉光祿大夫經筵日講官起居注太僕議政大臣武英殿大學士兼工部尚書仍兼管

翰林院掌院事加二級臣福敏光祿大夫經筵講官太子太保東閣大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼掌太常寺鴻臚寺事臣王泰曾奉

敕修

雍正三年乙巳六月丁卯朔諭內閣昔

實錄卷三十三

聖祖仁皇帝明目達聰無微不至而關係國計  
民生之事尤殷採訪屢降

諭旨令內外臣工各抒所見不時條奏無非欲  
洞悉下情興利剔弊期臻上理也在廷諸臣  
不能仰體

聖懷未見有剴切敷陳裨益政事者如科道等  
官之章奏或請開例捐納或請開設礦廠或  
請節省錢糧種種假公濟私之處不可枚舉  
皆在

聖祖仁皇帝洞鑒之中故近年來條奏之事

聖心裁擇其可行者見之施行其不可行者槩置勿用而言官之不得遂其私者反有

聖祖仁皇帝不甚納諫之妄議此等小人情狀朕在藩邸知之甚悉疾之甚深故臨御以來諄諄告誡期其各矢公忠直陳無隱夫條奏者原欲上以匡君下以澤民非爲臣子沽名之具也朕原有旨即密奏中朕不行者若有真知灼見力懇施行仍准其露章陳奏非必

止於密奏也因念諸臣之欲進言者或多所顧忌或恐招怨尤或有牽制之情或有不便顯言之處故令各人密封進呈其中言有可採而易於招怨者朕將摺內職名裁去發出或令諸臣會議或即見諸施行而外間不知何人所奏其所以如此者無非欲人人盡其所言無所瞻顧迴避而朕得收聽言之實效於治理大有裨益也乃有詐僞之人因所奏既行而誇耀於人者亦有因裁去銜名無可

稽考竟將他人陳奏之事據爲己有者亦有謂出之自朕託言諸臣而實非諸臣之條奏

者種種浮言深可痛恨又常見人文集中有擬稿未上之奏疏夫既有此疏何以未上既云未上何故存稿此乃欺罔之徒內懷詐僞外託忠誠遇事不敢直言故飾虛詞傳播人口以欺世盜名也且更有以特恩施行之事而冒爲己功者如蠲免蘇松浮糧一事係戶部所奏恩自朕出竝無一人條陳近間有人

自稱爲彼之密奏者人而無恥至於此極朕念爲政之道首在得人故自即位以來於文武大小臣工皆留意簡選而於伊等陛見之日必召入面詢親加訓誨欲其潔己奉公勤修職業謹守法度愛養兵民丁寧誥誡至再至三無非諭及內外事務及勉勵官方之語而諸臣出外每每任意增減多方粉飾以誇示於衆竟有與原降諭旨甚不相符者此皆大有關係著凡文武官員曾經面奉諭旨除

不能記載者俱將訓旨一一詳細將年月日一同繕寫進呈内外文武大臣著自行封進其不應摺奏之員著封固交與該上司轉奏自今以後凡面奉諭旨者俱著繕寫進呈若不繕寫進呈但私相傳播及私自記載者即係假捏旨意定當從重治罪○戊辰諭兵部陝西四川雲南進藏官兵朕從前俱已加恩議敘其康熙五十九年得藏之後四川雲南兩省官兵駐防藏內及查木多各處地方者久著勤勞甚屬可嘉至今尚未議敘爾部行文岳鍾琪高其倬各將駐防官兵查明報部交與議政處即行議敘○雲貴總督高其倬題雲南麗江府土知府木興病故臣以其胞弟木鍾聲名平常不能管轄土人將麗江土知府奏請改流以流通判改爲土通判在案今查木鍾之外悉皆遠族請將木鍾改襲麗江府土通判下部知之○己巳以翰林院編修尹繼善充日講起居注官○以果郡王允

禮管理鑲藍旗漢軍都統事務○調浙江巡撫法海來京以浙江按察使甘國奎署理浙江巡撫○兵部議覆廣東提督董象緯奏言水師員缺揀選題補務必聲明曾經何處水師効力不得混加諳練水師考語至水師原無熟練鞍馬者然弓箭鳥鎗藤牌大刀等項專精一藝方足以禦敵如無一長可錄應即行糾參不得濫保至洋面汛界難於確指請敕文武官於管轄沿海處所分析報部僅遇失事互相推諉知情不報照諱盜例嚴加議處均應如所請從之○庚午湖北按察使桑成鼎緣事革職陞湖南岳常道王克莊爲湖北按察使司按察使○署川陝總督岳鍾琪疏言遵旨察勘雜谷大小金川沃日等處土司構釁緣由差員到雜谷地方照舊立界傾心悅服又金川土司處有美同等寨本爲金川咽喉被前巡撫年羹堯強斷與沃日所以仇殺多年今斷歸金川以龍堡三歌退給沃

日兩家永無爭奪又土司承襲地方官勒索陋規多致遲延歲月請立嚴限具題不許勒指得旨本朝各省土司俱畏威懷德甚爲恭順間有一二梗化者皆由地方文武大吏調劑失宜之故今春年羹堯奏稱四川雜谷及大小金川等土司頗有不法情狀朕即知此必年羹堯希冀其多事欲借此名色得以久操大將軍之權固留川陝總督之任耳年羹堯若不速離川陝則川陝必至多事是以將年羹堯調往杭州未幾南坪壩之事果已安帖茲據岳鍾琪所奏雜谷金川沃日等土司又已悅服彼此和輯矣此諸土司向日皆因年羹堯辦理不公以致互相讎殺今岳鍾琪遵朕諭旨辦理有安寧番息事殊屬可嘉著交與該部議敘其條奏土司襲職之處著內閣九卿會議具奏○授故輔國將軍扎爾圖子尚德爲奉國將軍○辛未以直隸馬蘭口總兵官范時繹總理

三陵事務○工部議覆副總河稽曾筠疏稱蘭陽縣雷家莊儀封縣垆陽集祥符縣一覽臺考城縣石家莊商邱縣蔚家窪虞城縣待賓寺等處舊有大隄越隄子隄格隄俱年久未修殘缺卑薄急宜加幫高寬竝築子堰以固隄工均應如所請從之○旌表直隸東鹿縣烈婦邊瑚知妻李氏拒姦不污守正自縊給銀建坊入祠致祭如例○壬申諭內閣署總督岳鍾琪總督高其倬楊宗仁孔毓珣河道總督齊蘇勒提督吳陞魏經國在聖祖仁皇帝時服官有年勤勞素著自朕即位以來又能潔己奉公深知大義不附邪黨不事鑽營居官行己俱屬可嘉應沛殊恩以風有位岳鍾琪高其倬楊宗仁吳陞魏經國俱著加太子少傅銜孔毓珣齊蘇勒俱著加兵部尚書銜以示朕嘉獎優眷之至意○又諭天時暑熱輪班條奏著暫行停止俟三伏後仍前舉行○免河南陽武封邱中牟三縣本

年分水災額賦有差○二等伯李繩宗緣事革爵以其姪李淑忠襲替一等阿思哈尼哈番蘇班泰緣事革職以達諸護元孫滿丕襲替○癸酉諭大學士九卿等年羹堯如許大罪顯露而伊子年富年興等尚毫無畏懼之形若伊父果有冤抑之處應分晰代奏若無冤抑之處則應竭誠効力以贖伊父之罪乃隨處爲伊父探聽音信且怨憤見於顏色年富年興俱著革職交與伊祖年遐齡儻仍不悛改定行正法再隆科多之子鑾儀使玉桂行止甚劣亦著革職交與伊父隆科多○吏部議奏原任川陝總督年羹堯妄叅道員金南瑛等應嚴加治罪得旨所議甚屬悖謬年羹堯所犯之罪甚多雖即行正法亦不足蔽其辜竝不在此一事朕交此事即當就此事定議乃任意妄議處分過當前議既屬徇庇今議復爾過當料他人斷不敢如此定議此必隆科多有意擾亂之故隆科多著交與都

察院嚴加議處此本吏部另議具奏○命順承郡王錫保禮部尚書賴都兵部尚書孫柱都統范時捷會同三法司除欽交人犯及斬絞重犯外凡見審事件有應釋放者即行釋放其部議枷責送門之人亦著暫行保釋以時值盛暑故也○甲戌吏部等衙門遵旨公閱年羹堯奏摺疏叅年羹堯受皇上莫大之恩乃狂妄悖逆至於此極種種不法罪大彌天今調任杭州將軍又奏稱江南儀徵縣地方水陸分途臣至此靜候綸音等語更不知其何心人臣如年羹堯背義負恩越分藐法爲天地之必誅臣民所共憤請將年羹堯革職及所有太保竝世職一併革去從前恩賞團龍補服黃帶雙眼孔雀翎紫扯手等物悉行追繳敕下法司將年羹堯鎖拏來京嚴審正法以爲人臣負恩不忠之戒得旨年羹堯在任種種僭妄曾經降旨詢問今據年羹堯奏稱伊爲大將軍所行之事俱循

照俗例而行等語。昔年用兵有諸王掌大將軍印者。有大臣掌大將軍印者。惟允禔妄自尊大。種種不法。我朝大將軍如此行事者。從未之聞也。年羹堯不但踵而行之。且殺戮過焉。今乃云循照俗例。夫允禔所行。悉僭妄非制。豈可云例。假若云例。則係國家大將軍之定制。豈可云俗。此語狂悖已極。在年羹堯職分。即當年諸王掌大將軍印所行之例。伊尚不應比擬。而乃效法允禔狂妄不法之舉乎。又據年羹堯奏稱。既不敢久居陝省。亦不敢遽赴浙江。今於儀徵縣水陸交通之地。靜候綸音等語。朕前降諭旨。令速赴杭州。新任今逗遛中途。曠廢職守。遷延觀望。不知何心。其回奏摺內。凡支吾掩飾及未經回奏之處。俱著年羹堯一一分晰明白。回奏至九卿等所議革去一切職銜。追回恩賜等物。鎖拏來京。嚴審正法之處。俟年羹堯回奏到日。再行請旨。○乙亥。諭大學士等各直省督撫提鎮。舊

例俱有頒發王命旗牌。所以重節鎮之權。崇天室之威也。但傳守既久。或遇地方卑濕。蟲蛀漆剝。或因歷歲滋多。形製毀敝。而該督撫提鎮等。以旗牌損壞。例當叅處。但藏之神筭。不敢修整。甚有預防損壞。將所頒旗牌收貯。照樣另造者。尤為不可。嗣後各督撫提鎮。所頒王命旗牌。務須加謹收護。勿致損傷。亦不得另造。其有地方卑濕。歷歲滋多。不免蟲蛀。漆剝形製毀敝者。從寬免其處分。聽其一面照式整修。一面咨照該部。○領侍衛內大臣公馬爾賽等。帶領諸大臣子孫引見。上諭曰。爾等宣旨與納秦爾。在乾清門行走。因年羹堯舉奏。擢用至護軍統領。又令往署四川提督事務。爾乃竝不感恩効力。惟依附年羹堯。以諂媚為事。甚屬卑賤。朕將年羹堯所行二次硃批。諭爾。爾竝無一言陳奏。但多方諂附年羹堯。明係圖其利耳。不僅深負主恩。且玷辱爾之祖父。且玷及衆大臣之子孫。納

秦勿令在護軍統領處行走俟朕另降諭旨再爾等俱係勲舊大臣之子孫孰不當爲國家効用乎但今擇人任用大臣等之子孫內能勝任者不可驟得今大臣之子及散秩大臣侍衛等之子內爾諸臣有知其善者即行舉奏縱不深知訪問於章京護軍校等如得其人亦行舉奏以備朕之試用如此則人各加鼓勵矣且今大臣等多有不教其子弟者雖不教以漢書即教以清書亦可得明義理乃其中家資豐裕者並不黽勉正務而習爲嬉戲此皆不教之所致也其家道窘乏者又無教訓之力以致子弟往往陷於不才爾諸臣公同將上三旗勲舊世臣如公侯伯精奇尼哈番阿思哈尼哈番阿達哈哈番及登城巴圖魯等之子自二十歲以下十四歲以上或十二三歲而身軀長成者亦同揀選開明伊等履歷帶領引見朕量酌其宜加教訓成就之處另降諭旨○丙子以都察院左都御

史署盛京禮部侍郎兼理奉天府府尹事尹泰總管盛京

三陵人員○以禮部尚書賴都充經筵講官

陞巡視長蘆鹽政御史莽鵠立爲大理寺卿仍管長蘆鹽務○署山西巡撫伊都立摺奏太原平陽潞安汾州大同五府澤州等十二州俱經得雨霑足奉

上諭深慰朕懷頃聞邊外一帶糧多價賤去年曾有諭旨內地百姓如有情願用船載糧從黃河販運者任其糶賣毋禁如此似內外均獲利濟今歲不聞有照此行者爾其確查情形果若有益何不諭地方官勸導百姓行之但不可強之使爲也假若照此行後邊內糧價豈不更減乎總須爾酌量行之○吏部等衙門議覆原任川陝總督年羹堯等疏言陝西寧夏等衛所新經改設郡縣請分設寧夏西寧涼州甘州四府教授訓導各一員取進文武童各十二名廩增各四十名一年一貢



靈州學正一員取進文章十二名武童十五名廩增各三十名三年兩貢寧夏寧朔二縣教諭各一員取進文章各十五名武童各二十名廩增各二十名兩年一貢中衛縣教諭一員取進文章十二名武童十五名廩增仍照舊額三年兩貢西寧縣教諭一員取進文章武童生各八名廩增各二十名兩年一貢武威縣教諭一員取進文武童生各十五名廩增各二十名兩年一貢平羅碾伯古浪三縣訓導各一員取進文武童生各八名廩增各二十名兩年一貢高臺縣教諭訓導各一員取進文章十五名武童二十名廩增二十名兩年一貢永昌鎮番山丹三縣教諭各一員童生照題定之額取進廩增仍舊兩年一貢平番縣訓導一員童生照題定之額取進廩增仍舊兩年一貢張掖縣教諭一員童生照題定之額取進廩增出貢照寧夏例行應如所請從之○免浙江蘭溪建德二縣雍正二

年分水災額賦有差○戊寅工部議覆河道總督齊蘇勒疏言徐州黃河北岸豐碭汛內臨河舊隄年久卑薄應加幫高厚李道華家樓一帶向未築隄被刷成河恐水長時有碍運道宜幫上首子堰再築攔溜土壩一道乘時興修應如所請從之○己卯大學士奏請皇上潛邸升為宮殿撰擬嘉名恭候欽定

上欽命曰雍和宮○諭八旗都統等國家設立法制特欲使衆人遵行也若定制之內及條奏准行事件有不便施行者諸臣可將不便施行之故聲明具奏朕即諭令停止若既傳示衆人令其遵循事件必須實力奉行方為有益儻仍照常疎忽則與未嘗傳諭於衆者何異如白塔及九門例有信礮轟懾乃曉示士卒之標準也今不惟兵丁等不知此例即新任大臣亦有不知者大臣等俱係管轄兵丁之人儻值用兵爾等即為士卒之觀瞻職任甚屬要密不可妄意輕視爾等各旗俱給

有開載號令之書一冊作何曉示新舊兵丁咸令知悉凡事務須防於未然周思詳慮不少忽畧則自無可虞之事至於軍器爲用最要聞得兵丁等佩刀俱係粗鐵竝無鋒刃尚可謂之軍器乎且東華門西華門外間有賃刀之處步軍統領衙門應將此查明禁止爾等公同詳議具奏尋議嗣後所奉諭旨八旗於月朔宣示再於教場及一應會集之處宣讀曉諭至白塔九門所有信礮轟職雍正元年每旗給有書籍一冊甚爲明晰應交八旗於春秋二季凡該管兵丁有陸續挑取未經知悉者遍行曉諭至官兵有佩粗鐵刀者應令立限更換違者治罪其兵丁賃用佩刀尤屬不合應交與步軍統領嚴查禁止從之○庚辰諭內閣朕從前曾諭各省文武大吏令具密摺薦舉賢員陳世倌曾遵旨密薦知縣二員昨又具密摺奏稱見有武定州等缺臣從前密薦之員不敢再行保題今此本內又

另題崇邑縣知縣何多學等朕從前竝無密薦人員不許明題之旨况從前既可膺密薦今遇缺自應保題若云曾經密薦遇缺不行保題是密薦反阻賢員上進之路甚屬非理將原本發回著另行具奏陳世倌從前密薦之人不行保題之故亦著聲明具奏○又諭大臣妻病故雖無賜卹之例但大學士富寧安在軍前効力年久今伊妻病故著派出內大臣一員侍衛十員奠茶賜內庫銀五千兩該部致祭一次○辛巳陞鑲白旗蒙古副都統來文爲正白旗護軍統領○陞鑾儀衛冠軍使阿爾遜爲鑾儀衛鑾儀使○兵部議覆直隸總督李維鈞奏言大城營守備員缺請將藍翎侍衛張大烈補授應如所請得旨各省所發藍翎侍衛皆係藍翎侍衛中之平常者故命於外省補用此等應於不緊要之缺題補至分與各省年滿千總皆選騎射嫻熟者命往令其題補竝非命往令其學習也若

果騎射較前生疎該督理應題參李維鈞從前並未將年滿千總許印等參奏今遇缺出始稱此二人騎射尚未嫻熟反將藍翎侍衛張大烈題補此內必有情由許印苗世忠著調來引見○壬午八旗都統等議覆副都統董玉祥奏稱八旗看守倉庫請派三品以上官一員管轄稽察庶不急忽至八旗驍騎校係次佐領辦事之人若令佐領之子弟爲之不能無附和瞻徇之弊請調用於他佐領下則其弊可除應如所請派大臣一員巡察倉庫再令滿洲蒙古漢軍三旗每日合派參領或副參領一員晝夜巡警至遇驍騎校缺出佐領之子弟仍帶領引見補授之後再行調用從之○以鑲紅旗蒙古副都統秦布署鑲藍旗護軍統領○增雲南省各學取進文章額數安寧晉寧尋甸建水石屏新興鄧川趙州劍川騰越等十州昆明宜良南寧通海河西河陽太和浪穹保山楚雄等十縣向係大

學准照府學例各取進二十名陸涼霑益寧州阿迷賓川等五州呈貢蒙自雲南等三縣向係中學升爲大學各取進十五名和曲州向係小學升爲中學取進十二名添置黑井白井琅井三學爲小學各取進八名移定遠縣訓導駐黑井大姚縣訓導駐白井姚州訓導駐琅井○癸未諭大學士等朕即位時聞葛繼孔行止不端但未見其人是以曾降旨密問江南總督查弼納據查弼納奏稱葛繼孔辦事勤慎才尚可用又詢問署江寧巡撫何天培亦云其人尚知敬畏從事朕細加訪察恐二人皆爲其所愚故解其臬司之任調爲內閣侍讀學士欲親加試看其人也後見年羹堯奏之摺遂將葛繼孔改授鴻臚寺少卿乃葛繼孔於年羹堯來京時又私往納賄請託及朕降旨詰問始供年羹堯向索古玩既經魏送隨訂往見且誇獎才情許其留心照看前後兩次送銅器磁器玉器字畫等

件俱交年美堯家人魏之耀收受葛繼孔人  
品不堪黃緣年美堯至今尚各處鑽營殊屬  
可惡著革職發與李成龍開濬安慶府河道  
工程効力若少推諉必治以重罪至年美堯  
始以正人自居叅劾葛繼孔爲匪人繼又與  
之殷勤親密索取古玩許爲留心照看著行  
文年美堯伊係正人之流與抑匪人之流與  
葛繼孔之古玩果正人所當索取與且如何  
照看如何留心之處著一一明白回奏又年  
美堯摺內稱陳瓚乃伊所薦因其奏薦葛繼  
孔一事與陳瓚遂絕往來等語陳瓚之清操  
乃

聖祖所久知亦舉朝所共曉昔曾爲四川學道  
與年美堯同城而居無文辦之事是以不疾  
之已甚耳後絕往來定係陳瓚絕年美堯非  
年美堯絕陳瓚也年美堯欲借曾薦陳瓚以  
沽名真無恥之極此事亦不可不辨○鑲黃  
旗滿洲都統額爾錦緣事革職陞鑲黃旗護

軍統領覺羅佛倫爲本旗滿洲都統正白旗  
蒙古副都統色爾璧爲鑲黃旗護軍統領○  
兵部議覆雲貴總督高其倬疏言雲南進藏  
外委兵丁功加署副將等銜既未能赴部稍  
邀寸進又開除名糧貧乏不能養贍請留營  
食糧拔補千把應如所請照福建功加官張  
春之例有願留營差操者揀選分發各鎮協  
營與馬兵間補把總造冊報部得旨從前功  
加人員雖指有應補之缺因人多缺少至老  
不得錄用又無俸祿錢糧以致衣食匱乏情  
甚可憫且因不給俸祿錢糧無從稽其真僞  
此項替之弊所由生也見在此等功加人員  
應作何錄用不致壅阻作何給與微員俸餉  
留營差操以杜頂替之弊著九卿詳加確議  
具奏○甲申工部議覆河道總督齊蘇勒疏  
言運河南北兩岸甘羅城等處隄工殘缺宜  
加修築山陽縣黃河南岸湯董莊等處險工  
應創築撐隄格隄并加幫汰黃等隄以爲保

障瓜州胡家嘴運口東岸應下埽發椿幫護  
又唐家莊應建築草壩戩以便束水濟運  
均應如所請從之○乙酉諭吏部朕從前恐  
天下督撫叅劾屬員或有不公致受屈抑曾  
降諭旨令歷年廢官具呈都察院查核題明  
引見當經補用數員今見年羹堯題叅金南  
瑛等數人皆屬誣枉又如滿保之叅汀州府  
知府何國棟有意揣摩迎合朕深鄙其爲人  
已經降旨令湖州府知府曹掄彬曾有人在  
朕前叅奏伊於門生吳襄蔡嵩差往督學時  
有所需索朕降旨問石文焯如此之人豈能  
爲清白吏石文焯奏稱曹掄彬居官尚屬謹  
慎後石文焯離任將諭旨移交法海法海未  
悉情由將曹掄彬題叅并將接受諭旨之處  
具摺聲明但因委令親審屬縣人命曹掄彬  
以鹽案限期將屆不能兼審命案而法海竟  
以抗違玩視人命題請革職情罪未協曹掄  
彬著暫留浙省俟法海來京問明再降諭旨

朕爲天下臣民之主一夫不獲尚厯朕懷豈  
可令郡縣司牧枉受冤抑乎朕屢降諭旨令  
督撫務宜秉公體恤屬員今金南瑛等案既  
經發覺恐此外尚有冤抑之員嗣後道府以  
下知縣以上各官有實在冤抑被叅降革者  
仍令赴都察院具呈該衙門確查原叅緣由  
核實具奏其竝無冤抑係已身實有罪愆人  
品不端才力不及之人混行具呈者亦必重  
治其罪○命御門聽政日派翰林院編修檢  
討四員侍班○吏部議覆吏部右侍郎福敏  
條奏官員陞任時其不隨帶之加級漢官每  
一級例改紀錄一次滿官無改紀錄之例一  
緊削去請嗣後亦照例遵行以昭畫一應如  
所請從之○增取湖南衡州永州寶慶辰州  
四府郴州靖州二州所屬苗童入學額數每  
學三名從湖南巡撫王朝恩請也○丙戌諭  
內閣天庾積粟漕運最爲緊要而通商裕國  
關稅亦應留心朕上年因恐糧船遲滯曾有

旨船至大江不可攔阻搜查致生事端有誤漕運今聞各糧船有於兌糧起運之後即多包攬貨物及回空時又多夾帶私鹽此皆由經過馬頭處所停留裝卸而地方官不行嚴查之故也夫窮丁裝帶些微貨物情尚可恕至私鹽乃大千法紀之事況斷無沿途零買零賣之理必有一定地方其裝卸亦必非俄頃可辦若該地方官果實力稽查自然弊絕其如何稽查如何勸懲必使裕課通漕兩得其宜竝行不悖著總漕張大有安徽巡撫李成龍會同虛公詳議具奏又聞糧船中有帶火礮鳥鎗火藥者伊等皆係合幫結隊而行不畏盜賊火礮鳥鎗安所用之著通行嚴禁該管地方官弁若虛應故事陽奉陰違一經察出決不輕貸○又諭直隸大名府屬之滑縣濬縣內黃縣爲河南漕運所經地雖接壤而屬則隔省聞多有呼應不靈之處以致河南糧艘年年遲誤且大名府所屬計一州十

縣彰德府所屬只一州六縣衛輝府所屬只六縣若以滑濬內黃三縣分隸彰德衛輝則多寡既均而於運道得專責成亦有裨益著九卿速議具奏尋議濬滑爲古汲郡地內黃爲唐相州地本均屬河南省請以濬滑二縣隸衛輝府內黃縣隸彰德府運道糧艘咸資裨益從之○丁亥諭大學士等滇黔西粵俱苗夷雜處之區聞黔之安籠滇之廣羅廣南粵西之泗城鎮安安隆上林等協營爲三省交界之處層巒疊嶂苗夷巢穴其間每與鄰省小嫌輒相讎殺本地捕緝則竄往鄰省以致案牘難結必得大員統轄始於撫循巡緝有濟查貴州之安籠鎮本爲控馭苗蠻而設其駐劄之地與廣西雲南所屬地方均爲接壤若將廣西雲南接壤之土司與改流地方各協營汛悉受安籠鎮節制而該鎮亦受三省督提節制其將弁之舉劾兵丁之汰補糧餉之銷算仍照各本省舊制惟於苗蠻讎殺

劫擄諸事悉令安籠鎮總兵就近調度庶緝苗有專責而地方得以寧靜朕所聞如此未知果否有益邊疆著雲貴總督高其倬廣西巡撫李紱署貴州巡撫石禮哈廣西提督韓良輔悉心商酌辦理○陞一等侍衛塔拉圖爲鑲白旗蒙古副都統○己丑諭大學士等前據年羹堯摺奏鎮海堡城外之戰我兵已將賊人殺敗城內都統武格帶領滿兵及察哈爾兵開城西門尾追賊後搶掠物件以致賊人折回所傷西安驍騎校一員滿兵一名察哈爾兵二名武格首先敗回又復衝突綠旗隊伍致鎮海營千總與兵卒帶傷者十有餘人其餘行事昏慣不知羞恥西倫圖輕浮妄言狂叫無禮皆軍事所最忌者臣是以即行撤回等語朕比時即批示令其具本參奏隨據年羹堯奏稱都統武格西倫圖本應參劾然臣之受恩威權太重若再參兩都統於臣不利伏乞暫賜優容置之閒散之地等語

朕是以將武格西倫圖調回令其別處効力今據護軍參領常明奏稱羅卜藏丹津侵犯康城邊界時年羹堯令臣到鎮海堡送信與都統武格武格隨帶西安滿兵一百名察哈爾兵三百八十名入守鎮海堡凡四晝夜至第五日今陞總兵之宋可進帶西寧綠旗兵一千五百名來赴臣與都統武格參將張家翰同率在城滿洲蒙古綠旗兵丁六百餘名出西門向城下排列與賊戰賊即奔敗因深入賊壘交戰西安正藍旗驍騎校署參領四哥鑲藍旗披甲達三保陣亡正黃旗領催署驍騎校吳泰等五十六人俱數處重傷察哈爾兵亦有陣亡及受傷者此皆世受國恩遇敵感憤報効死傷之人臣不敢隱匿謹此奏聞等語常明身在軍前所奏如此與年羹堯從前所奏迥異且年羹堯既稱武格種種失律之處彼時又不參劾及朕令其參奏又云臣威權太重不便又參兩都統夫行軍之道只



論功罪之當否豈可意爲輕重且以年羹堯之擅作威福所參豈止兩都統而至此忽又懼威權太重耶觀常明所奏當日在事官兵奮力殺賊有受重傷者有陣亡者深屬可憫武格等既無失律之罪則効力之官兵等應加優卹此案功罪不便含糊歸結著年羹堯明白回奏○以湖廣荊州將軍阿魯爲鑲藍旗漢軍都統陞軍前署礮營章京鄂善爲左翼前鋒統領原任江南江寧將軍雍吉納給都統銜管右翼前鋒統領○陞正白旗護軍參領滿色爲本旗蒙古副都統○兩廣總督孔毓珣題廣西東蘭州土知州韋國棟故請以其子韋朝輔承襲下部知之○庚寅諭吏部外任官員迴避本族例俱赴京另補朕思督撫兩司及統轄全省之道員其族人迴避者自應赴京另補若分巡數府之道員及知府同知通判知州等官所轄之地無幾其屬員職分卑微若必一例赴京另補未免往返

稽延艱難拮据深可軫念嗣後遇此等應行迴避之員著該督撫即於本省內調補如此則屬員既遵本族迴避之例而又無另補守候之苦於公私均爲有益爾部即遵諭行○禮部等衙門疏奏密親王墳院請照例工部給銀五千兩自行蓋造得旨據奏由工部給銀雖係定例但密親王子年幼諸事未諳或恐不敷所用著蕭永藻盧詢范時繹照裕親王山園式樣公同料估動帑監造○湖廣總督楊宗仁疏報鍾祥宜都光化三縣雍正二年分開墾田地五十六頃有奇下部知之○壬辰諭內閣今年雨大屋漏牆欹者多朕軫念披甲人等家貧不能修理特加恩賜務使人人得所著動戶部庫銀九萬兩賞給八旗每旗一萬兩上三旗內府佐領一萬兩令得修理房屋著八旗都統前鋒統領護軍統領副都統內務府總管會同酌議分別賞給○諭刑部朕每覽審理案件常有無辜之人因



稍有干連即行解審以致往返拖累守候日久必待結案之後始得歸業此等株累之人深爲可憫乃承審各官並不留心民瘼視爲故常殊非朕愛育黎民之至意嗣後爾部暨各直省審案凡係干連之人作何即行釋放或有待質者作何取保之處爾部詳議具奏尋議嗣後京城八旗提督衙門五城等處解部案件臣部審明無干即行釋放管杖人犯先行懲責發落至直隸山海關古北口等處應解部完結之案管杖人犯并証佐干連之人俱免解部釋放取保儻必須審訊明確再行拘提命案屍親亦止申送口供免其解部至直省州縣案件自理細事速行完結其必須申解上司者應擬管杖等犯亦取供保釋不得濫行監禁差押如承審各官違者題參議處請著爲定例庶干連之人永無拖累之苦從之○癸巳諭吏部各省吏治今漸可觀惟四川陝西兩省劣員甚多皆因年羹堯任

用私人舉劾不公所致爾部將應補應選人員傳集會同九卿驗看除年老及人材甚劣者不用外其通曉文義人材可用者帶領引見朕親加揀取再行考試發往四川陝西補用○吏部議覆都統穆賽奏言外省調補革職旗員請勒限歸旗以起程之日報知該部該旗應如所請嗣後歸旗人員有驛站之路日行一站紆遠無驛之處限每日行七十里遲延者查叅議處得旨一日行七十里未免緊迫著改爲五十里○又議奏鑲白旗漢軍都統范時捷疏叅年羹堯婪贓侵帑越分犯法各款年羹堯乃敢狡飾回奏請將年羹堯革職拏問并案內有名之桑成鼎金啟勲胡期恆魏之耀嚴大等一併交與法司嚴審追擬以彰國法得旨年羹堯著暫停革職拏問從前以胡期恆於年羹堯無甚干連惡亂事件曾發往河南河工効力今年羹堯案內通同串合行爲之處甚多胡期恆桑成鼎金

啟勲魏之耀嚴大等俱著提解訊審○改陝西平涼固原二衛歸平涼府管轄慶陽衛歸慶陽府管轄臨洮河州蘭州三衛歸德一所歸臨洮府管轄洮州岷州靖逆三衛西固一所歸鞏昌府管轄從署甘肅巡撫彭振翼請也○甲午吏部覆奏原任川陝總督調杭州將軍年羹堯懷挾私心急欲出缺另行補人妄參道員金南瑛等列款全虛應將其太保職銜削去從之○丙申禮部議覆浙江巡撫法海疏言吳國上大夫伍員唐武肅王錢鏐宋安濟公張夏實爲浙省江海保障之神又明代紹興府知府湯紹恩創築三江閘有功紹郡請各加封號修整廟宇每歲春秋致祭應如所請得旨伍員封爲英衛公錢鏐封爲誠應武肅王張夏封爲靜安公湯紹恩封爲寧江伯

大清世宗敬天昌運建中表正文武英明寬仁信毅大孝至誠憲皇帝實錄卷之三十三

大清世宗敬天昌運建中表正文武英明寬仁  
信毅大孝至誠憲皇帝實錄卷之三十四

監修總裁官光祿大夫經筵講官太保領侍衛內大臣保和殿大學士吏部尚書總理事務三善伯加十五級臣鄂爾泰

總裁官光祿大夫經筵日講官起居注太保兼太子太保保和殿大學士吏部尚書仍兼管吏部尚書翰林院掌院

事王等伯加十三級臣張廷玉光祿大夫經筵日講官起居注太保議政大臣武英殿大學士吏部尚書仍兼管

翰林院掌院事加二級臣福敏光祿大夫經筵講官太子太保東閣大學士兼禮部尚書加六級臣徐永光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事臣三泰等奉

敕修

雍正三年乙巳秋七月丙申朔享

太廟

上親詣行禮○諭大學士等年羹堯從前題奏  
西藏青海等處軍功議敘文武官員多冒濫  
不實朕所深知今特施寬大之恩凡有軍功  
議敘文武官員若係年羹堯任內冒濫題奏  
者無論已陞未陞已授未授俱准速行據實  
自首其官職卑微不能自達者俱交該督撫  
提鎮齎送此皆出自年羹堯悖逆擅作威福  
之舉與伊等無干朕皆從寬宥釋若仍隱匿

不肯一經發覺定行嚴加治罪再此等無軍  
功者既可以効力議敘題補則實在立功人  
員亦必有挾私抑遏不行議敘者俱著將所  
以挾私之故詳細呈首○丁酉移河南開封  
府同知駐朱仙鎮陳州州判駐周家口從河  
南巡撫田文鏡請也○己亥諭大學士等朕  
惟治天下之道首重用人朕自臨御以來凡  
大小文武官員俱親加看驗考試補用至降  
革罰俸等項處分必再三詳審務使情罪允  
當不令稍有屈抑今吏兵二部銓選處分則  
例刊刻遵行已久其中不無前後互異之處  
又見行則例有未經校刻者部內抄白存查  
遇事引用外官無由得知姦胥猾吏因而上  
下其手亦未可定今律例館纂修律例將竣  
著吏兵二部會同將銓選處分則例并抄白  
條例逐一細查詳議應刪者刪應留者留務  
期簡明確切可以永遠遵守仍逐卷繕寫并  
原書進呈朕親加酌量刊刻頒行再書肆有

刻賣六部則例等書行文五城並各直省督撫嚴行禁止○庚子鑲紅旗漢軍副都統署鑲藍旗漢軍都統張致緣事革職陞正紅旗護軍叅領唐喀爲鑲紅旗漢軍副都統○旌表直隸平山縣烈婦王天爵妻朱氏守正拒姦被刃殞命給銀建坊入祠致祭如例○辛丑戶部等衙門議覆兩江總督查弼納浙閩總督覺羅滿保疏奏江西福建浙江三省安輯棚民事宜一見在各縣棚戶請照保甲之例每年按戶編冊責成山主地主並保長甲長出結送該州縣該州縣據冊稽查有情願編入土著者准其編入有邑中多至數百戶及千戶以上者添撥弁兵防守棚民有窩匪姦盜等情地方官及保甲長失察徇庇者分別懲治一編冊之後續到流移不得容留有欲回本籍者准其回籍一棚民有膂力可用及讀書向學者入籍二十年准其應試於額外酌量取進一南昌府之寧州武寧縣廣信

府之玉山縣棚民尤衆請將進賢縣巡檢二員移駐寧州新建縣巡檢一員移駐武寧專司稽察裁玉山縣之懷玉驛驛丞改設巡檢與玉山縣縣丞分轄隘口再將瑞州府同知移駐寧州之銅鼓營以資彈壓一南昌鎮標後營遊擊請移駐銅鼓營銅鼓營原設之守備移駐袁州府萬載縣後營遊擊所轄之千總一員移駐瑞州府新昌縣至袁州府屬之黎源廣信府屬之下鎮虛地方各添撥外委把總一員帶兵防守均應如所請從之○三等阿思哈尼哈番錫拉爾岱因病解退以其子佛保襲替○予故湖北巡撫納齊喀祭葬謚勤恪○壬寅以福建福州將軍宜兆熊署理福建總督○癸卯諭大學士等朕因隆科多年羹堯從前頗著勤勞賞給異數以示鼓勵今二人交結專擅諸事欺隱所賞隆科多年羹堯之黃帶紫扯手雙眼翎俱不許用四團龍補服俱著交入○甲辰衍聖公孔傳鐸

奏請頒賜

聖諭廣訓朋黨論二書得旨我

聖祖仁皇帝教育羣生

御製上諭十六條期以厚民風而端習俗朕仰承

先志推行發明著爲廣訓使愚氓易曉凡茲作述之閒悉本

先師孔子之道以爲是訓是行之本竝無一語出乎聖教之外也卿爲至聖後裔果能祇

遵祖訓身體力行則修身齊家之道化民善

俗之模莫大乎是且植黨爲聖人所深戒向

來孔氏子孫從無趨附匪黨之事所請二書

不必頒發卿其恪遵好學力行知恥之訓能

光家乘即廣國華勉之○乙巳

孝懿仁皇后忌辰遣官祭

景陵○丙午諭大學士等舊歲直隸總督李維

鈞奏稱畿輔地方每有蝗蝻之害土人虔禱

於劉猛將軍之廟則蝗不爲災朕念切惻瘼

凡事之有益於民生者皆欲推廣行之且禦

災捍患之神載在祀典即大田之詩亦云去

其螟螣及其蠹賊無害我田穡田祖有神秉

畀炎火是蝗蝻之害古人亦未嘗不藉神力

驅除也今兩江總督查弼納奏稱江南地方

有爲劉猛將軍立廟之處則無蝗蝻之害其

未曾立廟之處則不能無蝗此乃查弼納偏

狹之見疑朕專恃祝禱爲消弭災祲之方也

其他督撫亦多有奏稱設法祈雨禱晴者夫

天人之理感應不爽凡水旱蝗蝻之災或朝

廷有失政則

天示此以警之或一方之大吏不能公正宣猷

或郡縣守令不能循良敷化又或一郡一邑

之中風俗澆漓人心險僞以致陰陽沴戾災

祲洊臻所謂人事失於下則天道變於上也

故朕一聞各直省雨暘愆期必深自修省思

改闕失朝夕乾惕冀回

天意爾等封疆大吏暨司牧之官以及居民人

等亦當恐懼修省交相誡勉夫人事既盡自然感召

天和災祲可消豐穰可致此桑林之禱所以捷於影響也蓋惟以恐懼修省誠敬感格爲本至於祈禱鬼神不過借以達誠心耳若專恃祈禱以爲消弭災祲之方而置恐懼修省於不事是未免濬流而舍其源執末而遺其本矣朕實有見於天人感應之至理而斷不惑於鬼神巫禱之俗習故不惜反覆明晰言之

內外臣工黎庶其共體朕意○河南南陽總兵官佟世麟緣事革職以正藍旗漢軍副都統董玉祥爲河南南陽總兵官○丁未諭大學士等年羹堯自任川陝總督以來擅作威福顛倒是非異己者屏斥趨附者薦拔又借用兵之名虛冒軍功以朝廷之名器徇一己之私情目今事事敗露不可悉數其所用匪類如陝西官員內則有延安府知府李繼泰寧夏同知趙健河州知州許啓盛三原縣知

縣劉子正南鄭縣知縣嚴世傑四川官員內則有川東道金德蔚永寧道周元勲保寧府知府王國正重慶府同知楊文斌建昌衛通判崔鴻圖邛州知州張純巴縣知縣周仁舉遊擊年悅此等官員平日侵蝕軍需剝削民膏諂媚上司苛刻地方實爲兩省之害若即行文該省調取伊等來京引見定奪又如年羹堯數年來叅革及降調之文武官員甚多其中自有冤抑著吏兵二部一一查明繕摺具奏候朕親覽酌其情節降旨調來引見使年羹堯不得肆其蒙蔽而伊等不致受其誣陷且以爲罔上行私無知之大吏戒竝爲鑽營黨附無恥之屬員懲再如川陝兩省副將以下千總以上等武官經年羹堯冒濫題補者俱著岳鍾琪詳查擇其尤劣者叅奏○都察院疏叅吏部尚書隆科多議處年羹堯曲護徇庇不將伊公爵議革隆科多應革職得旨隆科多著削去太保職銜從寬免革職○

戊申河道總督齊蘇勒疏言。今歲六月中旬。山東山水陡發。駱馬湖口泛漲二百餘里。其湖水湧出宿遷縣竹絡壩口。抵阻黃水不能暢流。致將睢寧縣朱家海埽工沉陷。大隄坍塌。漫開水口四十餘丈。出口之水東歸洪澤湖。誠恐湖內不能容受。隨飭河員開放天然壩以分其勢。朱家海漫口大溜湍激甚難護防。兩邊大隄又經刷寬三十餘丈。旋於上流斜築挑水壩一座。水勢稍平。相度情形。必於對岸挑濬引河一道。俾大溜歸入正河。庶漫口易於堵塞。下部知之。○己酉諭禮部據奏八月二十三日。

皇妣孝恭仁皇后服制期滿請照  
皇考聖祖仁皇帝釋服之禮。祫祭太廟。頒諭中外等語。朕疊遭  
皇考  
皇妣大事。追念罔極深恩。莫由仰報。三年以來。祇於宮禁之中。齋居素服。默盡思慕哀戚之

忱。非敢自謂遵循古禮。更不欲宣播於衆也。父母之喪。人子之心。則一。而帝后之禮。國家之制。則殊。今八月二十三日。屆皇妣孝恭仁皇后釋服之期。著擇日於奉先殿告祭。自行家禮。至於頒諭中外。可不必行。○庚戌中元節。遣官祭

永陵  
福陵  
昭陵  
昭西陵  
孝陵  
孝東陵

景陵○諭內閣。凡官員離任。每有地方士民保留。如果該員在任實有政績。惠澤在人。愛戴出於至誠。理應赴上司呈請。即或清正廉幹之官。冤抑被劾。百姓爲之抱屈者。亦可赴闕申理。乃邇來積習。無論官員賢否。概借保留爲名。竟不呈明上司。輒鳴鑼聚衆。擅行罷市。

顯然挾制其中買囑招搖種種弊端殊為不法如果保留盡係真情何以陞任官員不聞有人愛戴者耶此乃刁風惡習斷不可長朕聞年羹堯自西安起身之時私囑咸寧縣知縣朱炯賄人保留因年羹堯悖逆貪虐罪惡滿盈去時人人稱快竟無一人肯應者然後出城所過州縣或有迎送多人者或有一人不出舉手加額稱慶甚且唾啐者夫百姓若果愛戴自必通省皆然斷無此迎彼唾之理可見保留官員者多非出於真情皆買囑逼迫而然也嗣後官員離任士民有擅行鳴鑼聚眾罷市者分別首從治罪其被保之員亦嚴加究治以儆刁風○辛亥都察院叅奏據趙弘燁首告伊姪趙之垣侵吞家產趙之垣具呈陳辨并首告年羹堯將清理伊叔趙弘燁虧空銀四十萬兩侵欺入己李維鈞朋比為姦請交部嚴審定擬得旨康熙六十一年冬朕即位後趙之垣李維鈞同來陞見朕於

倚廬召見二人諭趙之垣曰

皇考念爾祖舊日功勲加恩後裔爾父爾叔皆任以節鉞爾叔趙弘燁在直隸時聲名甚屬平常且未完公項累累

皇考特予保全是以爾叔身歿隨命爾署理直隸巡撫印務以完爾叔未完之項乃爾莅任以來未能改易前轍朕仰體

皇考優待功臣後裔之意諄切訓誡爾當竭誠黽勉以蓋前愆又諭李維鈞曰爾係趙弘燁屬官在直隸居官年久諸事諳練爾於趙之垣不可拘上司屬官之分當如骨肉相待諸事竭力規正使彼不至隕越以上成

皇考保全功臣之意竝副朕仰體

皇考之心比時李維鈞回奏云臣惟有盡心竭力以幫助趙之垣等語次年二月年羹堯進京面奏趙之垣庸劣紈袴不可以膺巡撫重任朕諭之曰趙之垣為人朕亦素知但伊之署理巡撫乃



皇考保全功臣後裔之盛心去冬伊等來京朕已諄切訓誡之矣年羹堯見朕意不爲搖動一月之後復奏云趙之垣斷不可令爲巡撫伊從前居官不過庸劣今自皇上訓誡之後不惟不凜遵明旨反大肆貪婪以進上爲名向各屬私派銀三十萬兩竝勒索從前未收之規禮朕聞之駭異亦不深信越七八日趙之垣果具摺進銀三十萬兩朕始以年羹堯之言爲實特將趙之垣解退今年羹堯帶往陝西以清趙弘燮虧項及至去年冬年羹堯又將趙之垣帶至京師再四懇求引見力保其可用年羹堯前後語言顛倒殊不可解今據趙弘燮首告又經都察院奏趙之垣控訴原委年羹堯欺罔姦詐設局誘陷情弊顯然著將此摺抄發年羹堯李維鈞令其明白回奏○予故固原提督楊盡信故杭州左翼漢軍副都統阿圖各祭葬如例○壬子文華殿大學士白潢以病乞解任調理允之命松江

提督高其位爲文淵閣大學士兼禮部尚書戶部尚書張廷玉署理大學士事務○命吏部尚書兼理藩院尚書隆科多往阿蘭善山等處修理城池開墾地畝以果郡王允禮辦理理藩院事務○實授岳鍾琪爲川陝總督圖理琛爲西安巡撫陞內閣侍讀學士巡視河東鹽政馬喀爲陝西西安布政使司布政使仍兼理鹽務○四川按察使劉世奇緣事革職陞四川川東道程如絲爲四川按察使司按察使以廣東鹽運使萬際璋署理廣東按察使司按察使○調湖廣提督魏經國爲江南提督鑾儀使署四川提督趙坤爲湖廣提督陞四川松潘總兵官周瑛爲四川提督以廣東提督董象緯爲鑾儀衛鑾儀使陞廣東瓊州總兵官萬際瑞爲廣東提督○癸丑以兵部尚書孫柱兼理吏部尚書○內閣九卿詹事科道合詞劾奏年羹堯欺罔悖亂各款請加誅戮以彰國法得旨年羹堯爲川陝

總督貪婪放縱網利營私本應即加處分因伊青海之功朕意尚欲委曲保全故罷其總督之任授爲杭州將軍令其効力以贖前愆乃今事事敗露不料其欺罔悖逆之罪至於此極實爲國法之所不宥朕展轉思維自古帝王之不能保全功臣者多有烏盡弓藏之譏然使委曲寬宥則廢典常而虧國法將來何以示懲此所奏乃在廷之公論而國家賞罰大事必諮詢內外大臣僉謀畫一可降旨詢問各省將軍督撫提鎮各秉公心各行己見平情酌議應作何處分即速具奏○乙卯命內閣學士何國宗等閱視河道諭曰運河關係重大言者皆似近理而議論多有不同今將廷錫條奏款項爾等前往詳加閱看凡泉源湖身與各水源流地方形勢務須身到測看方得確準定議不可苟且草率意爲揣度以致後日勢不可行河道總督凡黃河所經皆其管轄豈能處處親到即河屬官員偶

有所見亦未敢輕易舉行爾等將儀器輿圖一併帶去再有算法館行走明白測量人員著何國宗指名舉奏二人帶去詳加測量或將廷錫條奏款項之外有關係運道應查看修理之處亦逐一審視會同該督撫詳議具奏務期一勞永逸爾等於八月二十日起身乘驛前去僅遇無驛遞之處爾等輕騎減從該撫照料前往總河齊蘇勒見在堵築黃河決口爾等此去先看漳河衛河後到濟寧則總河隄工事完便可會同閱看僅該督撫有緊要事務爾等或稍候數日或躬往就之勿致貽誤地方○諭刑部安民莫先於弭盜而爲政必貴於實心從前兩江總督查弼納條奏種種弭盜之法且欲於水次釘椿以爲周防極似實心料理者乃今一月之內所報盜案竟有一百九件朕覽之不勝駭異豈因查弼納實心料理反致如是之多乎可見伊從前所奏盡屬虛僞欺飾耳查弼納身爲總督

統轄文武弭盜一事。尤其專責。今前後盜案  
纍纍。伊所司果何事耶。茲特降諭旨與查弼  
納。務必實心清致盜之源。察窩盜之所。竭誠  
料理。使盜賊斂迹。百姓安堵。以副朕意。若因  
有此嚴旨。更復隱諱。朦混使民害不得上聞。  
兇惡肆行無忌。必將查弼納治以重罪。○吏  
部議覆署川陝總督岳鍾琪疏。叅年羹堯建  
築郃陽縣夏陽川城堡。餘剩銀兩不歸司庫。  
並不題請。擅給各兵。應將年羹堯一等公降  
爲二等公。從之。○丙辰解兵部尚書盧詢任  
專管正黃旗漢軍都統事。陞左都御史蔡瑔  
爲兵部尚書兼理左都御史事。○陞廣東瓊  
州水師副將黃助爲廣東瓊州總兵官。○丁  
巳。諭禮部。自古修己治人之道。載在經書。帝  
王御宇膺圖。咸資典學。我  
聖祖仁皇帝。天亶聰明。而好古敏求。六十餘年  
孜孜不倦。朕幼承  
庭訓。時習簡編。自即位以來。更欲以研經味道

之功。爲敷政寧人之本。顧以亮陰之際。未舉  
經筵。今八月二十三日。爲釋服之期。爾部可  
擇日舉行經筵典禮。並詳查定例。以聞。○諭  
河道總督齊蘇勒等。今歲立夏以來。雨水過  
多。朕念黃淮伏秋兩汛。必然水勢浩濶。甚以  
爲憂。所以從前批發嵇曾筠奏摺。有無日不  
神馳淮黃兩岸之語。今據田文鏡奏稱。儀封  
縣南岸大寨。蘭陽縣北岸板廠後。兩處衝開  
決口。各十餘丈。朕迈躬惕厲。夙夜不安。其衝  
決隄。可星速會同副總河嵇曾筠督率各  
屬河員。併力搶築。務期永久堅固。其一帶危  
險工程。亦當增卑培薄。預爲之防。至被災人  
民。著速委能員實心確查。應賑恤者。即動正  
項錢糧賑恤。衝沒田地。詳加估勘。應豁免者  
題請豁免。朕從前曾命將河屬官員分別議  
敘。今儀封。蘭陽既被衝決。其疎防官吏例應  
叅處。今止停其議敘。不必叅處。并從寬免其  
賠修。○以翰林院掌院學士阿克敦兼理都

察院左副都御史○戊午朝鮮國王李昖遣陪臣李揖等齎表恭謝賜祭賜謚竝封王恩進獻禮物酌納之宴賚如例○己未戶部議覆條奏內稱州縣經制各役俱有定數濫行增設有干例禁乃有不肖官員私增白役多至數百人擾害小民其中姦猾者串通家人幕賓恣肆撞騙官民竝受其累請嚴爲查禁應如所請從之○庚申陞鑲黃旗叅領顧儼爲正藍旗漢軍副都統○吏部議覆河南巡撫田文鏡疏叅年羹堯鹽場遍置私人私鹽充斥又以印票運茶違廢茶引應將年羹堯二等公降爲三等公從之○旌表山東樂安縣烈婦薛應富妻劉氏拒姦不辱含忿投繯給銀建坊入祠致祭如例○辛酉諭直隸總督山東河南巡撫今歲夏秋以來直隸山東河南三省雨水過多小民謀生無術者有之朕心甚爲憫惻茲秋成將屆憂念彌深該督撫可速委能員實心詳察其有生計蕭條升

斗無資以及田地被淹房廬倒塌者卽一面賑恤一面具奏務使窮幽極僻之區亦不至一夫失所至所遣官吏或有草率將事及隱匿不聞甚至捏報賑給侵漁朦混使澤不下究者察出將該管官一併從重治罪斷不姑恕爾督撫等尤宜實心誠求竭力料理如恤子孫如辦家事勿視爲具文以副朕宵旰憂勞之至意○禮部議覆朝鮮國王李昖疏奏宗祀之重未有所託請將副室所生之子李緯封爲世子查該王甫過三十遽請封副室所生之子與例不符應無庸議得旨朝鮮請封世子事關伊國建立儲位該王必因萬不得已再三斟酌始懇切具奏著照所請行其請封所進禮物不必收受○封青海扎薩克台吉阿拉布坦爲輔國公○壬戌諭大學士等年羹堯以總督補放將軍亦爲陞遷伊前違旨欲在儀徵縣逗留居住今又止將接任日期具奏竝不謝恩有悖臣道著革退杭州

將軍任授爲閒散章京在杭州効力行走其將軍印務著原任副都統王府長史鄂彌達前往署理○癸亥諭大學士等據廣西巡撫李紱奏黃國材等向在廣西經收捐穀事例正項之外侵匿數倍應行查追黃國材者解福建巡撫任發往廣西質審○諭戶部今歲天津等處地方米價騰貴著行文奉天將軍綽奇府尹尹泰照去歲之例將伊等地方糧十萬石由海運至天津新倉交與該地方官收貯再若有自海運糧之商人不必禁止聽其運至天津貿易不許他往○又諭歸化城土默特地方年來五穀豐登米價甚賤查黃河自陝西黃甫川界入口河之兩岸一屬山西一屬陝西應自歸化城購買米石從黃甫川界黃河運至內地到土拉庫處修建倉廩收貯其歸化城大青山黃河岸口亦建一倉買米存貯以便由黃甫川界運至土拉庫處再修造船隻運至陝西潼關地方其修倉

修船往來挽運所費錢糧諒亦無多刑部員外郎覺羅明壽係朕深知之人再著理藩院遴選謹慎篤實賢能司官一員同伊馳驛速往會同山西巡撫伊都立歸化城都統丹晉等將查倉修船挽運水手及需用等項詳議具奏若此事易辦則外而蒙古內而百姓大有裨益○諭理藩院青海和碩親王察罕丹津疏請來京意甚懇切今年郡王額爾得尼厄爾克托克托柰與察罕丹津應輪班來京來時著侍郎鄂賴各賞銀一千兩明年郡王色卜騰扎爾貝勒益蘇克汪扎爾貝子索諾木達什俱應輪班來京來時王賞銀一千兩貝勒賞銀八百兩貝子賞銀六百兩○諭八旗大臣等朕前降旨發庫銀八萬兩賞給八旗按各佐領以內均勻定其數目該旗酌量賞給爾等惟天誠秉正查其實係貧乏之人量其實有裨益之處給與將此可曉諭衆人○諭直隸總督李維鈞聞近京各處地方橋

梁道路多被潦水淹沒行旅維艱諸物騰貴朕心甚爲軫念爾可轉飭各地方官悉心籌畫其大路中積水之處作何疏洩窪圯之處作何修墊通州一路可交與副將賽都通永道高鑛古北口一路可交與總兵何祥書及該管州縣官宣府一路可交與總兵許國桂及該管州縣官至近京一帶可交與大興宛平良鄉涿州等州縣俱速令其相度地勢設法修理使行旅之人通行無阻不可借端差派以便民之政反致累民○山西巡撫伊都立叅奏貝子允禩護衛烏雅圖等在平定州地方擅行毆打生員應請按律治罪得旨此事從前諾岷隱匿未奏經朕聞知降旨詢問諾岷始行題叅內有太監李大成乃允禩家下爲首緊要太監伊豈有不知此事之理諾岷訊審時以李大成患病不知此事竟爲脫卸遽行發回諾岷係滿都護屬下之人滿都護允禩比鄰而居伊等原屬同黨似此互相

瞻徇強爲掩飾將置國典於何地耶諾岷大負朕恩伊都立到彼理應詳究乃止據諾岷所審具奏疎忽殊甚此事仍著伊都立將太監李大成提往晉省明白對質將實情審出具奏至於允禩自來結納黨援不守本分且品行庸劣居心妄自尊大

聖祖皇考稍加訓誡輒云不過革去此微末貝子已耳偶遇勞瘁動稱若如大阿哥二阿哥一例拘禁我倒安逸此等狂悖之談時出諸

口朕與諸阿哥所共知者及遭

皇考大事並未見有點滴悲淚朕御極後允禩昂然恣肆抗違諭旨狂悖之形種種不一朕因發往西寧居住稍示警誡伊又寄書允禩語多悖亂且縱容屬下騷擾地方毆打民人罔顧國紀朕特遣都統楚宗前往約束及楚宗到彼宣旨伊並未迎接跪聽安居臥室毫無悔懼之容信口妄言有出家離世等狂悖之語且伊攜帶數萬金前往西寧濫行糜費

買結人心地方人等俱稱九王爺伊不過一  
貝子耳尚未及貝勒職分又安得漫稱王洵  
屬不識臣子大義悖亂之極允禩著革去貝  
子撤其佐領屬下並行文陝西督撫嗣後仍  
有擅稱允禩爲九五爺者從重治罪○乙丑  
調貴州巡撫毛文銓爲福建巡撫○調湖南  
按察使遲維臺來京以湖南驛鹽糧儲道謝  
吳署理湖南按察使司按察使○鑲白旗蒙  
古副都統吳廣年老休致陞正藍旗護軍叅  
領武格爲鑲白旗蒙古副都統兼署正藍旗  
滿洲副都統○戶部議覆山東巡撫陳世倌  
疏奏山東通省丁銀請攤入地畝之內徵收  
應如所請從之

大清世宗敬天昌運建中表正文武英明寬仁  
信毅大孝至誠憲皇帝實錄卷之三十四

大清世宗敬天昌運建中表正文武英明寬仁  
信毅大孝至誠憲皇帝實錄卷之三十五

監修總裁官光祿大夫經筵講官太僕議政大臣和碩大學士兼兵部尚書總理事務三等伯加十五級臣鄂爾泰

總裁官光祿大夫經筵講官起居注太僕兼太子太僕保和殿大學士兼戶部尚書仍兼管吏部尚書翰林院

第三等伯加十三級臣張廷玉光祿大夫經筵日講官起居注太僕議政大臣武英殿大學士兼吏部尚書仍兼管

翰林院掌院事加二級臣福敏光祿大夫經筵講官太子太僕兼開大學士兼禮部尚書加六級臣徐本光祿大夫

經筵講官議政大臣協辦內閣大學事務禮部尚書仍兼管太常寺鴻臚寺事加三級等奉

敕修

雍正三年乙巳八月丙寅朔諭戶部侍郎蔣

新錄卷三十五

廷錫內務府總管來保今年六七月間京師

雨水較多聞京城八倉內頗有積水停滯支

領甲米車輛來往甚艱其城外萬安倉附近

城垣城上瀉水流下倉內道路亦復泥濘如

何令各倉積水通洩低窪處加土修墊俾收

放糧米之所高燥潔淨既便於車輛行走亦

不致米糧狼籍又各倉廩底或應鋪墊石灰

或應支架平板爾等至各倉詳悉查看具奏

○以吏部右侍郎福敏署理浙江巡撫○吏

部議覆條奏內稱各省題奏命盜案件及刑

部咨稿俱係漢文滿洲司官如不識漢字必

被猾吏欺隱以致悞事嗣後刑部滿洲司官

缺出請揀選通曉漢文人員補授庶案件易

於料理滿洲學習漢字者愈加勉勵矣應如

所請從之○丁卯遣大學士馬齊祭

先師孔子○順天府府尹張令璜疏報藉田

所產嘉穀自一莖雙穗至八穗九穗者甚多

實為奇瑞下部知之○戊辰祭

大社

大稷

上親詣行禮○諭倉場侍郎今歲雨多道路泥

濘民商客貨車輛難行其五閘運河內載貨

民船既無礙漕運不必禁止○命截留漕糧

二十萬石貯天津新倉○己巳陞右翼前鋒

統領雍吉納為鑲紅旗蒙古都統仍兼右翼

前鋒統領○增江南各省學取進文章額數

江蘇所屬之上元江寧句容溧陽太倉長洲



吳縣。吳江。常熟。崑山。嘉定。華亭。婁縣。上海。青浦。武進。無錫。江陰。宜興。丹徒。丹陽。金壇。邗州。山陽。鹽城。高郵。通州。泰州。江都。儀徵。泰興。興化。等三十二州縣。向係大學。照府學額。各取進二十五名。溧水。高淳。崇明。海州。清河。桃源。安東。宿遷。睢寧。沐陽。寶應。如皋。等十二州縣。并金山一衛。向係中學。升爲大學。各取進二十名。江浦。六合。贛榆。等三縣。向係小學。升爲中學。各取進十六名。通州之海門。鄉舊例另取六名。今增爲十名。安徽屬之懷寧。桐城。宣城。涇縣。鳳陽。廣德。等六州縣。向係大學。照府學額。各取進二十五名。潛山。太湖。宿松。黟縣。寧國。旌德。太平。貴池。青陽。建德。當塗。蕪湖。無爲。六安。泗州。合肥。宿州。亳州。含山。建平。等二十州縣。向係中學。升爲大學。各取進二十名。望江。東流。繁昌。舒城。廬江。臨淮。定遠。蒙城。懷遠。等九縣。向係小學。升爲中學。各取進十六名。○庚午。

上御太和殿視朝。文武陞轉各官謝恩。○頒發孔子及顏曾思孟。閔子仲子廟。

御書匾額。

孔子廟曰：生民未有。顏子廟曰：德冠四科。曾子廟曰：道傳一貫。子思子廟曰：性天迷祖。孟子廟曰：守先待後。閔子廟曰：躬行至孝。仲子廟曰：聖道干城。又賜衍聖公孔傳鐸及六賢後裔。

御書匾額。聖裔曰：欽承聖緒。顏子裔曰：四箴常

凜。曾子裔曰：省身念祖。子思子裔曰：六藝世

家。孟子裔曰：七篇貽矩。閔子裔曰：門宗孝行。

仲子裔曰：勇行貽範。○大學士等奏請

御書生民未有四字。敕下禮部鈎摹。頒發直省

懸勝。

孔子廟昭垂永久。從之。○調四川北總兵

官張元佐。爲松潘總兵官。○辛未。諭大學士

等年羹堯從前竊弄權柄。擅作威福。所有脅

從。諂附者。原不足深責。今年羹堯之姦邪僭

逆種種敗露。朕已洞悉。屢頒諭旨。頻敕內外諸臣。令各洗滌。已往戒警。將來共期改過。若仍黨惡不悛。則斷不姑恕。諭旨甚明。乃直隸總督李維鈞。居心險譎。竟敢陽順陰違。如保定府城內。現有年羹堯私置之家產。藏留之財物。彼並不叅奏。迨朕降旨令查。尚具摺故作猶豫之狀。希圖延挨。俾得隱匿。此等情景。必有緣由。著馬爾賽。蔡瑛。同往保定府。詳細詢察。若果得姦欺黨惡實情。即將李維鈞拏問。請旨。○以原任浙江巡撫。法海。署兵部尚書。鑲紅旗漢軍副都統。唐喀。署吏部右侍郎。鑲白旗蒙古副都統。武格。署刑部左侍郎。○命江南江蘇布政使。鄂爾泰。來京。陞見。陞山東鹽運使。漆紹文。為江蘇布政使。司布政使。○吏部等衙門。議覆。吏部尚書朱軾條奏。四品以下官員。情願將本身妻室。誥封。移封。祖父母。及本生祖父母者。應准其移封。又八九品官。向例止封本身。不封妻室。是以移封止

及其父嗣。後應准其父母並封。又教授官。止九品。學正。教諭。訓導。並無品級。應將教授。照知縣例。封文林郎。學正。教諭。照縣丞例。封修職郎。訓導。照主簿例。封登仕郎。其有情願將本身。應得封典。移封父母者。亦准其父母並封。又定例。封贈止封嫡母。嗣後生母。繼母。應准並給封典。其八九品之母。照七品官例。封為八九品孺人。俱應如所請。從之。○壬申。調鑲紅旗滿洲副都統。明全。為鑲藍旗漢軍副都統。鑲藍旗漢軍副都統。布達。時為鑲紅旗滿洲副都統。○癸酉。諭內閣。九卿等。古有諱名之禮。所以昭誠敬。致尊崇也。朕臨御以來。恐臣民過於拘謹。屢降諭旨。凡與御名聲音相同字樣。不必迴避。近見各省地名。以音同而改易者。頗多。朕為天下主。而四海臣民。竭誠盡敬。如此。況孔子德高千古。道冠百王。正彝倫。端風化。為往聖繼絕學。為萬世開太平。自天子以至於

庶人皆受師資之益而直省郡邑之名有聖諱字在內者古今相沿未改朕心深爲不安爾等會議凡直省地名有同

聖諱者或改讀某音或另易他字至於常用之際於此字作何迴避一併詳議具奏○宗人府府丞須洲緣事降調陞太僕寺卿唐執玉爲宗人府府丞○都察院遵古察議吏部尚書隆科多於議敘銀庫郎中等員一案並不從公商酌擅囑司官將熟練人員一時概議陞轉必致接任辦事不能得人沽恩市惠甚屬溺職應革去世襲公爵得旨隆科多著從寬免革公爵止革去恩賜之一等阿達哈哈番○甲戌

太宗文皇帝忌辰遣官祭

昭陵○陞安徽巡撫李成龍爲湖廣總督以盛京工部侍郎魏廷珍爲安徽巡撫擢署光祿寺少卿增壽爲盛京工部侍郎○戶部議覆廣西巡撫李紱疏言柳州一府所轄二州十

縣東西八百里南北九百里地廣事繁其賓州上林等州縣獠獠頑劣察治尤難請以賓州改爲直隸州管轄附近之上林來賓遷汪武宣四縣其與柳州相近之七州縣仍歸府轄再梧州府治設在東偏其西南至鬱林州已三百餘里請以鬱林州亦改爲直隸州管轄北流博白陸川興業四縣其與梧州相近之五縣仍歸府轄庶各得就近綜理應如所請從之○乙亥吏部議覆鴻臚寺少卿單疇書疏叅年羹堯樹黨營私任用委署寧夏同知常璽等濫竊名器倚勢殃民實非尋常徇庇可比請將年羹堯所有三等公降爲一等精奇尼哈番從之○兵部等衙門遵旨議奏皇上軫念功加外委兵丁匱乏可憫令臣等確議如何錄用給俸之法謹將清查錄用條款開列奏聞○康熙三十年以前功加人員歷年久遠多係假冒無庸送部推用其近年以來克取打箭爐恢復西藏臺灣及平定逆番

各案合計共有四千人應令督撫提鎮轉行營協州縣將該員三代履歷年貌籍貫開載明白各加印結造冊分送部科存案以杜頂替之弊。從前議叙功加冊內多有徇私冒濫者應令督撫提鎮著領兵將弁及同事現任各官出具功績實在有無印結造冊送部以杜冒濫之弊。功加之遊擊都司現照舊例歸於雙月推用其功加守備一班向已裁去現在功加守備幾至二千餘人請於雙月單月增設功加守備一班。各省把總缺出於三缺內將功加人員補用一員其二缺仍歸於現在兵丁拔補。功加人員從前授劄之後悉令開除名糧因無別項生理以致困窮失所嗣後未得補用之功加人員俱令督撫提鎮收入標下差操各給目兵糧餉勤慎者給與外委把總職銜老病者題明給與半餉養贍終身。實在立功人員同在一案同加一銜者再令督撫提鎮會同考驗分爲三

等送部引見分別補用以杜鑽營奔競之弊。如此則查驗既清錄用有日功加人員共沐皇仁矣。從之。○太子太傅武英殿大學士兼工部尚書王頊齡故輟朝一日賜祭葬加祭二次諡文恭贈少傅。○吳喇忒扎薩克鎮國公達爾瑪西禮緣事革退以其子達爾瑪機里第襲爵。○丙子太祖高皇帝忌辰遣官祭福陵。○諭內閣滿洲兵丁於技勇武藝俱已精練惟向來未習水師今欲於天津地方設立水師營分撥八旗滿洲前往駐防操演似屬有益其應於何處駐劄設立幾營派兵若干用船若干並如何製造船隻如何演習兵丁之處著怡親王會同朱軾張廷玉蔣廷錫拉錫詳議具奏。○以鑲白旗漢軍副都統石文焄正藍旗漢軍副都統顧儼俱署理正白旗漢軍都統。○丁丑以理藩院侍郎本錫署理鑲黃旗蒙古都統。○西洋教化王伯納地哆

遣使嚮。噶都易德豐進表。貢獻方物。宴賚如例。○旌表山西祁縣烈女程爾潔女程氏。逼姦不從。守貞被刃。殞命。給銀建坊。入祠致祭。如例。○戊寅戶部侍郎蔣廷錫。內務府總管來保。遵旨議奏。查閱京倉事宜。

上召入諭曰。爾等所議甚妥。應開溝墊土添橋等項。著料估具奏。倉內空殿鋪架松板。著倉場衙門奏聞。其所用竹氣通高出米頂之上。以透洩汗蒸之氣。京師若不能多辦。可行令

江南糧艘帶上。至爾等所奏。以石灰鋪勻磚上。可隔潮濕。但恐石灰和入米內。於人不甚相宜。可將石灰於磚下鋪墊。餘依議。○陞大理寺少卿張謙為貴州巡撫。○調鑲紅旗滿洲副都統常安為正黃旗蒙古副都統。陞鑲紅旗叅領德成為本旗滿洲副都統。○增江西省各學取進文章額數。南昌新建豐城高安宜春清江廬陵吉水安福臨川金谿南城新城上饒鄱陽贛縣寧都等十七縣。向係大

學。照府學額。各取進二十名。奉新永新宜黃東鄉南豐廣昌貴溪餘干星子都昌建昌德化湖口大庾等十四縣。向係中學。升為大學。各取進十五名。萍鄉峽江玉山安仁安義瑞昌南康石城等八縣。向係小學。升為中學。各取進十二名。○旌表山東陽信縣烈婦高明妻吳氏。守正拒姦。被刃殞命。給銀建坊。入祠致祭。如例。○已卯諭吏部都察院。安民必先弭盜。盜風不息。皆由有司官諱盜不報之故。不但江南地方盜賊素多。近聞河南湖廣路上。有過往官員被劫。者州縣官賄賂事主。通同隱匿。司道既無覺察。督撫亦受蒙蔽。以致盜賊無忌。貽害不小。不可不嚴行稽察。朕思巡按御史。久經裁汰。自不可復。今或於滿漢御史。並部員內。揀選賢能。官酌量於湖廣江南浙江福建山東河南等省。每省或差二員。或一員。或兩省差一員。兼理。令其專司稽察盜賊。并巡查驛站烟墩。儻有縱容盜賊。隱諱

不報者許據實題叅一切地方事務差員不得干預。若生事滋擾必從重治罪。爾等詳細酌議具奏。○議政王大臣等議覆振武將軍穆克登奏稱鄂爾昆一帶尚有昔人耕種及灌水溝渠舊跡。圖拉等處現有大麥小麥並非不可開墾之所。但霜降遲早不一。米穀宜否不齊。請於屯長內酌派十餘人於明年三月內遣往耕種試看。俟秋收後具奏。應如所請。從之。○辛巳諸王大臣等合詞疏奏本月

二十三日

孝恭仁皇后三年服制已滿恭懇

皇上駕居乾清宮一應吉禮悉照成例舉行至圓明園密邇禁城風物清淑允宜隨時駐蹕以慰萬民瞻仰之忱得旨三年之內疊遭

皇考

皇妣大事朕追思永慕莫釋於懷今服制期滿大禮告成諸王大臣等援引典禮合詞陳奏朕念三年持服不過默盡其心非敢自謂盡

孝。今雖勉從諸王大臣所請而孺慕之誠終身不能忘也。○諭倉場總督今年米價騰貴可將廩內舊貯米石減價平糶并行文直隸總督凡近水州縣可通舟楫者俱令赴通倉領運平糶便民。○壬午秋分夕

月於西郊遣怡親王允祥行禮。○癸未諭大學士九卿等今年夏秋直隸地方雨水過多恐秋禾歉收窮民乏食已降諭旨令該地方官詳查賑濟朕早夜思維深切軫念若於賑濟之外有城工應修理者即行修理俾窮民傭工藉以養贍更為有益著於六部中選擇司官六員編檢庶常內選擇四員御史內選擇二員中書內選擇一員俱在漢官中擇其為人老實謹慎可用者帶來引見候朕指示修理城工地方令其前往再連歲口外收成頗好朕曾降旨進口糶賣米糧不得禁止近聞各口官弁於米糧進口之時每借稽察為名多方勒索以致阻滯著兵部行文各口毋得

仍蹈前轍使米糧不得通行○吏部議覆吏部左侍郎查郎阿奏稱直隸州州同州判雖係佐貳現管逃盜等案不便以捐納貢監補授管轄屬縣請將舉人銓補州同恩拔副榜貢生銓補州判應如所請從之○甲申諸王大臣等合詞疏奏本月二十一日

### 皇上告祭

奉先殿三年之大禮既盡萬載之嘉祥方始臣等謹按唐六典云皇帝即吉之辰百官奉表進賀列宴於紫宸殿宋嘉祐禮云仁宗宮中改吉百官奉觴上壽臣等法古典禮擬備筵宴進獻闕廷以展踴躍懼忤之忱祈皇上俯允所請得旨朕倚

天

祖默佑克盡三年之禮然孺慕之念終身莫釋於懷昨已曉諭廷臣矣茲諸王大臣援引古禮陳奏懇切勉從所請以慰臣民虔望之意○諭山東巡撫陳世倌據奏歷城聊城等州

縣秋禾被淹農民失望已飭各地方官撫恤等語該撫務須督率有司加意經理毋使窮民失所○八旗都統等議覆護軍統領阿爾納奏稱察哈爾地方挑取護軍及查點軍器現交於遊牧總管副總管其所有護軍參領二員並無可管之事請行裁汰撤回令其管理護軍營事務應如所請從之○乙酉直隸總督李維鈞緣事革職以兵部尚書蔡瑑署理直隸總督○丙戌

孝恭仁皇后三年服滿

上詣

奉先殿祭告行釋服禮

上御乾清宮召諸王大臣入見垂淚諭曰父母之恩鞠育顧復爲人子者終身仰報不盡而朕倚

皇考

皇妣教育之恩尤爲至深至厚誠所謂欲報之德昊天罔極也三年之中如祭祀朝會國家



大禮不可曠缺朕不得已勉從諸王大臣之請照例舉行不過於宮中持服以默盡其心而究未能盡此心於萬一也日月易邁已屆三載禮制有定而朕心無窮此一領素服朕衣之三年今日更換不勝悽愴之至朕之一念豈但三年固結於中即終身之久亦斷不能忘也○丁亥諭刑部嗣後直隸各省秋審情實緩決可矜人犯各該督撫仍照常具題外該部進呈黃冊時著將情實緩決可矜三項分別彙歸各項仍照省分遠近爲序從雲南省起刊刻刷印進呈○八旗都統等將服色等事各按等秩定制具奏

上召入諭曰覽奏欲定官員軍民服用一概加以禁約朕試問諸臣照此定制以申禁約能管束令其必改乎斷不能也法令者必其能禁而後禁之明知法不能勝而禁止之則法必不行從前屢禁而不能豈可復禁乎且照此奏各按等秩將緞足及貂鼠捨狝猊等細

裘悉行禁止不准服用轉令大臣官員得以賤價購而服之是乃富室獲其利也其兵丁等概令更換則布疋等物一時價值騰貴反致貧乏兵丁難以爲生有何益哉爾等見有服用僭越之人誠飭約束曉諭而訓導之以爲伊等生計漸至醒悟數年之後自然悛改一遵儉朴矣不必過於煩細以致紛擾○以故青海固山貝子策凌敦多卜子丹巴襲爵○兩廣總督孔毓珣題廣西茗盈土知州李續鼎患病休致請以其子李天蔭襲替下部知之○旌表直隸烈婦開州馮彥居妻劉氏逼姦不污被勒殞命南樂縣張二墨妻孟氏拒暴不辱含忿投繯各給銀建坊入祠致祭如例○戊子調直隸布政使羅密來京以戶部郎中德明署理直隸布政使司布政使○禮部議覆貴州學政王奕仁疏稱黔省苗人子弟情願讀書者准其送入義學一體訓誨每遇歲科兩試於該學定額外取進一名以



示鼓勵應如所請從之○己丑以舉行經筵大典告祭

奉先殿

上親詣行禮○遣官告祭

先聖先師○山東兗州總兵官馮傑緣事降調陞直隸三屯副將趙國璣為山東兗州總兵官○吏部議覆刑部左侍郎黃炳疏參原任川陝總督年羹堯係封疆大吏於南坪築城一案委用知州邊鴻烈等恣行擾累激變番民又不據實奏明係年羹堯啟釁生事隱匿徇庇應將所有一等精奇尼哈番降為一等阿思哈尼哈番從之○庚寅

上御文華殿行經筵禮講畢賜大學士九卿詹事及講官等宴○陞廣西巡撫李紱為直隸總督江南江蘇布政使鄂爾泰為廣西巡撫○辛卯

上御太和殿諸王大臣官員行禮畢侍宴大臣上殿進酒始奏樂

聖孝純至心不忘哀聽樂興感禮畢回宮○諭大學士九卿等前於天津蓋造倉廩原備截留漕米是以朕諭托時等將湖北湖南之米截留二十萬石存貯天津托時因奏天津倉廩地勢卑濕廩底須鋪墊乾草以隔潮氣昨牛鈕奏稱墊草亦不免浥爛如此則截留漕米無益前所降諭旨截留之米可仍令抵通歸倉當時蓋造倉廩原係李維鈞及地方官員經手乃並不相度高燥之地草率營建著托時前往天津會同莽鵠五柯喬年詳審地形或另擇高阜之處或將舊基培墊交與李維鈞親同當時經手之員賠補修造即著莽鵠五柯喬年監督工程至於直隸州縣倉穀李維鈞曾奏虧空無多今歲秋收即可全補無缺今蔡珽奏稱清苑倉穀並無顆粒清苑為保定附郭之縣倉穀尚虧空如此則他處可知李維鈞前此所奏不實著大學士會同刑部問明具奏又蔡珽奏稱日下省城米價

騰貴請令臬司浦文焯攜帶腳價親至天津將截留漕米星速運三萬石以二萬石直至省城平糶以一萬石量留沿途被水之處以濟急等語畿輔之地百姓艱食朕心深爲軫念著托時到天津將漕米撥三萬石交與浦文焯作速運去今歲近京一帶雨水較多恐此米尚不敷用再令陳守創將通倉變色米六成以上者撥十萬石交與余甸蔡起俊動用腳價運至天津或平糶或賑濟應運何處俱聽蔡珽調度朕念直隸地方低窪之處衆水積而不洩以致有水之害而無水之利疏通之道不可不講已諭朱軾張燦經理此事聞陝西潼商道王全臣在陝挑濬秦渠熟習水利著王全臣來京其潼商道員缺著松茂道孟以恂調補○遣官封朝鮮國王李昫子李緯爲世子賜賚如例○以江西南贛總兵官宋可進署陝西甘州提督○陝西固原提督楊啟元緣事革職實授馬煥爲陝西固原提

督○吏部議覆西安巡撫石文焯疏奏原任川陝總督年羹堯叅革四川夔州守程如緣私賣鹽觔貪殘克暴一案俱屬虛事明係年羹堯捏詞妄叅應將所有一等阿思哈尼哈番降爲一等阿達哈哈番從之○壬辰上幸圓明園駐蹕○諭宗人府怡親王果郡王實心爲國凡朕所交之事盡心竭力辦理操守亦甚清廉隨朕行走之處甚多所費甚繁著加怡親王俸銀一萬兩果郡王著照親王給與俸銀俸米護衛亦照親王府員額著順承郡王班居果郡王下○諭吏部兵部朕在圓明園與在宮中無異凡應辦之事照常辦理爾等應奏者不可遲悞若無應奏事件在衙門辦事不必到此其理事之日爾等於春末秋初可趁早涼而來秋末春初天時寒冷於日出之前起行不但爾等不受寒暑即隨從人夫亦不至勞苦矣○甲午

上回宮

大清世宗敬天昌運建中表正文武英明寬仁  
信毅大孝至誠憲皇帝實錄卷之三十五

大清世宗敬天昌運建中表正文武英明寬仁  
信毅大孝至誠憲皇帝實錄卷之三十六

監修總裁官光祿大夫經筵講官太僕議政大臣保和殿大學士兼兵部尚書總理兵部事務等伯加十五級臣鄂爾泰

總纂官光祿大夫經筵講官起居注太僕兼太子太僕保和殿大學士兼戶部尚書仍兼管吏部尚書翰林院掌院

事等伯加十三級臣張廷玉光祿大夫經筵講官起居注太僕議政大臣武英殿大學士兼工部尚書仍兼管

翰林院掌院事加二級臣福敏光祿大夫經筵講官太子太僕兼國大學士兼禮部尚書加六級臣徐本光祿大夫

經筵講官議政大臣內閣學士事務禮部尚書仍兼管太常寺鴻臚寺事等臣王泰等奉

敕修

雍正三年乙巳九月乙未朔

上幸圓明園○戶部議覆陝西巡撫圖理琛疏  
言陝省西安延安兩府管理州縣地廣事繁  
請將商州同州華州乾州邠州耀州鄜州葭  
州綏德州俱改爲直隸州其西安府屬之鎮  
安雋南山陽商南四縣分隸商州朝邑郿陽  
澄城韓城四縣分隸同州華陰蒲城二縣分  
隸華州武功永壽二縣分隸乾州三水淳化  
長武三縣分隸邠州同官白水二縣分隸耀  
州延安府屬之雋川中部宜君三縣分隸鄜

州吳堡神木府谷三縣分隸葭州米脂清澗二縣分隸綏德州應如所請從之○丙申以降調刑部左侍郎涂天相爲太僕寺卿○川陝總督岳鍾琪奏請陞見允之以西安巡撫圖理琛署理總督事務○調署四川北總兵官李如栢回京陞山東沂州副將張君烈爲四川北總兵官○議政王大臣等遵旨議覆靖逆將軍富寧安疏奏臣等伏讀諭旨策妄阿喇布坦遣使入朝甚屬恭順巴爾庫爾等處所有兵丁實無可用應行撤回除遵旨酌量存留外謹將吐魯番等處所有護軍交與副都統智勇薩爾禪等領回西安前鋒交與委署副都統登德禮領回已於八月初二日自巴爾庫爾起程其各路綠旗兵丁俱交與提督路振聲領回應請飭部將撤回官員兵丁名冊逐一查明行知各該旗該營照舊管轄從之○丁酉諭大學士等前因天津倉廩潮濕不能收貯米石故停止截留今據

蔡珽奏稱天津倉廩雖不能貯米可分發各州縣以備賑濟請仍截留二十萬石等語著戶部速派賢能滿漢司官各一員前往天津會同倉場總督托時將河南小米截留二十萬石一面行文蔡珽令其酌量應貯米之州縣撥派官員於天津地方領運收貯備賑前李維鈞奏請賑濟一月朕思賑濟原不可拘定日期著加賑三個月務令小民得所現今遣增壽等前往奉天採買米石運至天津可即行文伊等於米石之外採買高粱或十萬石或七八萬石一併運至天津於賑濟大有裨益爾等即遵諭行○諭戶部朕體恤臣工時深軫念每思經理區畫以贍其俯仰之資查舊例在京大小漢官每年俸米俱支給十二石蓋因向日漢官攜帶家口者少食指無多故給米十二石即可粗足今見漢官帶家口者多若俸米仍照舊數則日用或有不敷難免內顧之慮嗣後在京大小漢官著按俸

銀數目給與俸米俾祿糈所頒足供養贍以示朕加惠羣臣之至意○戊戌陝西甘肅按察使張迺緣事革職陞刑部郎中鍾保爲陝西甘肅按察使司按察使○辛丑廣西巡撫李紱奏報天河撞蠻在福祿里上中下三壠周圍八十里萬山重阻窟穴爲姦各在隘口之內難於搜捕但所種之田俱在各隘之外趁秋稼未收臣咨會督臣提臣調發漢土兵丁直至蠻峒斷其收穫之路諭以自投到案免死審結今已陸續投到各案可以就理兵丁所過鷄犬無驚理合奏明下部知之○陝西興安總兵官武正安疏請陞見允之○壬寅諭八旗都統嗣後八旗大臣查出該旗一切應行恭奏事件即行恭奏其奏過之大臣等將職名與事件緣由於歲底彙奏以聞至於未經查奏一次者亦著陳明既爲大臣各將所司之事不時稽察嚴加叅劾乃分所當爲不然諸凡俱不以爲事但務徇隱以沽虛

譽則法度蔑如矣將此傳示八旗○順天府府尹張令璜疏言藉田嘉禾一莖九穗實屬盛世奇瑞闔府紳士耆庶公籲撰文立碑昭示奕禩得旨藉田嘉穀雖有九穗之瑞但今歲畿輔地方被水小民乏食朕方修省之不暇所請撰文勒石不必行○甲辰上回宮○大學士高其位以衰老不勝機務具疏懇辭溫旨慰留之○加川陝總督岳鍾琪兵部尚書銜○命山東巡撫陳世倌來京陛見以山東布政使布蘭泰署理巡撫事務○乙巳補原任詹事魏方泰爲詹事府詹事○吏部等衙門議覆川陝總督岳鍾琪條奏各省土司承襲例取宗圖冊結隣封甘結由該管地方文武官以次申呈督撫具題乃地方官往往藉此居奇將其印信封固勒索陋規不爲請襲甚有數年不能用印管事者遂致部族番目專權生事互相爭奪釀成仇殺最爲隱害請定立嚴限以除地方官留難勒捐

之弊。應如所請。凡土官病故。該督撫於題報之時。即查明應襲之人。取具宗圖冊結隣封甘結。併原領號紙。定限六個月內。具題承襲。其未經具題之先。即令應襲之人。照署事官例。用印管事。地方官不得將印信封固。致滋事端。再查土司之許其承襲者。原因其祖父向化歸誠。著有勞績之故。今伊嫡長子孫。雖得承襲本職。此外支庶。更無他途。可以進身。亦屬可憫。嗣後各處土司文武官員嫡長子孫。仍令其照例承襲本職。其支庶子弟。中有馴謹能辦事者。俱許本土官詳報督撫。具題請旨。酌量給與職銜。令其分管地方事務。其所授職銜。視本土官各降二等。一體頒給敕印號紙。其所分管地方。視本土官多則三分之一。少則五分之一。庶幾本末各有條理。使勢足相維。而情更相安矣。從之。○予故山西太原總兵官金國正祭葬如例。○丙午。祭歷代帝王。

上親詣行禮。○遣官祭城隍之神。○丁未。上幸圓明園。○以內閣學士德新教習庶吉士。○四川巡撫王景灝題。雅州所屬故單東革什咱安撫使額魯七立子登進。故董卜韓胡宣慰使雍中七立子堅參達結。請各襲職。下部知之。○己酉。諭內閣。從前年羹堯查拏陝西郃陽縣私鹽用兵一案。初據年羹堯奏稱。並未傷損一人。及朕留心訪察。知有傷損居民之事。續據黃焜寄與范時捷稟帖。亦止稱傷損十數人。朕再加訪問。知所傷之人甚多。因傳諭審事侍郎史貽直。高其佩。令其用心查訪。勿似黃焜從前用威恐嚇小民。不敢申訴實情。今據史貽直高其佩奏稱。遵旨查訪。實在因年羹堯用兵。致死無辜男婦老幼共七百八十六名口。連前報出之十九名。共傷損八百零五名口。俱取有該縣冊結鑒鑿可據。又奏稱。年羹堯因查拏鹽梟曹猪頭。而該縣將良善之馮猪頭頂名解送。年羹堯並不

覆審即將馮猪頭正法等語。朕以愛養百姓爲心。惟恐一夫不獲其所。乃年羹堯負朕委任之恩。逞其兇殘之性。草菅民命。毒害無辜。以致多人受其慘酷。皆由朕任用匪人之故。深自愧憾。實無以謝郃陽之紳衿黎庶郃陽地方。既被騷擾。著該督撫等加意撫綏。其被害之家。雖經欽差官員賞給銀兩。著該督撫等再行優恤。雍正四年郃陽縣應徵錢糧。盡予豁免。該督撫等可遍行曉諭。合邑紳衿黎庶伊等遭年羹堯之殘害。幸朕留心察訪。研究實情。使伊等沉寃得伸。今特沛恩膏以示軫恤。務令僻壤荒村咸知朕意。○諭宗人府普照之子恒冉。現在承襲公爵。其家原不應有二公。向因普照在軍前効力。尚屬勤謹。且年羹堯之妻係普照兄女。朕因年羹堯青海之功。又念普照原係承襲公爵之人。是以特授爲輔國公。今年羹堯如此背負朕恩。其普照之公爵著不必承襲。○庚戌。裁會考府衙

門。其從前任事之大臣吏部尚書舅舅隆科多。尚書朱軾。原任大學士白潢。正黃旗漢軍都統盧詢等。各議敘有差。○以故三等阿思哈尼哈番進保壽子哈達襲職。○領侍衛內大臣公傅爾丹摺奏振武將軍印信已交代將軍穆克登所有喀喇沁土默特兵丁令協理旗務塔布囊沙津達賴台吉色楞拉什帶領歸化城之土默特兵丁令叅領常保佐領三都布綽斯希帶領各回原處。臣由鄂爾齊圖果爾地方起程帶領京城官兵赴京奏入報聞。○辛亥二等阿思哈尼哈番劉忠休致以其子劉琬襲替。○議政王大臣等遵旨議覆。一等侍衛副都統達鼐摺奏。臣奉旨將青海人等編設旗分佐領頒賜恩賞。准奮威將軍公岳鍾琪咨明遵旨到西安署理總督印務。其奮威將軍印敕已差官馳驛送京。西寧留駐一千兵交臣辦理軍情事務。現今青海人等感戴。



皇恩守法畏懼。西寧鎮標綠旗兵丁。可以調遣敷用。請將西寧留駐陝督標兵三百名。固原提標兵二百名。四川提標兵三百名。寧夏鎮標兵二百名。俱令撤回原處。應如所請。從之。○壬子。調雲南開化總兵官馮允中爲湖廣襄陽總兵官。○以故科爾沁扎薩克鎮國公圖努滿爾子喇嘛扎卜襲爵。○靖逆將軍富寧安疏報塔爾沁等處屯田收穫青稞八千九百三十二石有奇。下部知之。○癸丑。勾決四川廣東福建三省情實人犯。

上諭大學士等。人命至重。按罪務使情法得中。嚴固不可。寬亦不可。須平心研究。求罪犯可生之路。至於萬無可生。然後勾決。則國法所不容。亦其自取耳。從來法寬則愚民易犯。非刑期無刑之意。爾等識之。○鑲藍旗漢軍副都統明全緣事革職。以輔國公伊爾登爲鑲藍旗漢軍副都統。○以步軍統領阿齊圖署正白旗滿洲都統。○甲寅。命吏部尚書朱軾

爲文華殿大學士。仍管吏部尚書事。調兵部尚書蔡瑑爲吏部尚書。仍管兵部尚書。左都御史事。○以左翼前鋒統領鄂善署理鑲白旗滿洲都統。○丙辰。諭大學士等。凡事皆要持平。一有所偏。則輕重顛倒。爲累非淺。況用刑豈可或偏乎。爾等稱朕寬大詳審。朕看來詳審尤爲緊要。蓋能詳審而得其平。則所施一當於理。并無寬大之足名矣。此即用中之道也。且偶然錯誤。人所時有。語云。人非聖賢。孰能無過。人能自見其過。庶可馴至無過。如自謂無過。則過必更多矣。即如爾等歸美朕躬。朕不敢自謂已能也。全賴爾等匡弼。設使朕有過失。爾等果能直陳無隱。朕且欣然納受。雖詞色之間。必無幾微相拒之處。爾等不可不知也。○以詹事府詹事魏方泰充日講起居注官。○授先賢額孫師六十六代孫額孫誠道五經博士世職。○吏部議覆。川陝總督岳鍾琪疏。參原任川陝總督年羹堯將甘



州巴爾庫爾等處官員應行奏請錢糧之事  
誑稱此非交代事件並不交代明白應將年  
羹堯所有一等阿達哈哈番降爲拜他拉布  
勒哈番得旨年羹堯所有職銜俱著革去○  
丁巳諭大學士等朕體恤臣工凡官員辦事  
著有勞績者無論大小俱敕部議敘其有過  
誤致干吏議者亦照例處分夫一人之身有  
功有過一官之級有降有加舊例官員降級  
留任停其陞轉必三年無過方准開復降級  
後雖有恩詔加級不准抵銷殊非以功補過  
開人自新之義嗣後降級留任官員遇有恩  
詔及議敘加級者俱准以加一級抵銷降一  
級庶使人皆奮勵勉圖後效亦鼓舞吏治之  
一道也至於降級後捐納加級者不得抵銷  
前案○又諭古者視歲之上中爲儲蓄之節  
蓋官民經畫久遠不爲一時苟且之計積之  
於豐年用之於歉歲所謂有備無患法良而  
意美也朕自臨御以來宵旰勤求無刻不以

民依爲念乃重農積粟之詔屢下而閭閻卒  
少蓋藏官倉亦多虧缺即如直隸保定等府  
去歲頗稱有秋今春二麥亦熟乃以夏秋雨  
水過多田禾被澇而民間遂有饑色若非多  
方賑恤窮民必至失所此皆草野無知食不  
以時用不以禮但快目前之有餘罔計異日  
之不足一朝旱澇追悔無從至於常平義倉  
原爲備荒而設乃有司奉行不力多至缺額  
罪何可逭茲據江南浙江江西湖廣福建河  
南山西陝西廣東廣西雲南貴州等省督撫  
報稱今歲秋成八九十分不等朕覽奏不勝  
慰悅又重爲吾民計及長久宜乘此時講求  
儲蓄之道以備將來該督撫等可轉飭有司  
遍行曉諭務須撙節愛惜各留餘地預爲他  
時緩急之需社倉之法亦宜趁此豐年努力  
行之勿但視爲虛文故事朕爲吾民籌畫養  
贍之道惓惓於懷無時或釋而吾民自謀其  
身家若但苟且因循不復長顧遠慮則重負

朕軫念元元之意矣。至於州縣倉儲向有虧缺者。若不趁此豐收之時。速行買補。將來發覺。斷不姑貸。慎之慎之。○戊午。喀爾喀車臣汗滾臣遣使進九白年貢宴賚如例。○己未。裁陝西郃陽縣新設叅將一員。守備一員。千總二員。把總四員。兵丁八百名。從川陝總督岳鍾琪請也。○庚申。諭內閣。朕前曾降諭旨。凡來圓明園奏事之大臣官員等。不必太早。今見大臣等務皆早到。如在南城居住人員。必得五鼓前來。其年老有疾之人。必受寒冷。爾等効力。惟在實心辦事。似此奔走。並無關係。若侍衛及職司看守人等。則不得不然。蓋以伊等之專職也。爾等若不盡心於職務。雖經年如此奔走。何益之有。嗣後爾等咸遵朕旨。毋得有違。雖稍遲誤。或一二人不到。亦無妨礙。並不致有誤事之處也。○刑部等衙門議覆。吏部左侍郎史貽直。刑部右侍郎高其佩。奏稱臣等奉命審理原任川陝總督年羹

堯。誣罰茶商。私佔鹽窩二案。緣商人王欽菴。第自義等十一人。自湖廣買茶。屯貯陝州平陸等處。咸寧知縣嚴士俊。私稟年羹堯。遣人隔省提拏。誣以私販。勒派贖罪銀一萬四千兩。復將曲沃縣富戶高科等十人姓名。陷入案內。勒派幫助銀七萬六千八百兩。嚴士俊及曲沃知縣魏士瑛等。共得銀九千二百四十兩。又年羹堯管理鹽務時。革退舊商。將伊子年富年斌。偽編商人富斌等名色。私佔山西潞安澤州等十七處鹽窩。自出本銀行鹽。別令心腹人等。偽編商名。私佔陝西咸寧等十八處鹽窩。代已行鹽。前後得利銀十七萬二千二百兩。又聽信嚴士俊之言。私行印票一萬二千張。每票抵作十引。共增鹽引十二萬張。止以十萬具奏。其二萬張課銀。盡入私橐。請將年羹堯革職拏問。年富年斌革職。嚴士俊魏士瑛等。俱擬絞監候。秋後處決。年羹堯等所得銀兩。照例行追。分別入官。給主其

行鹽本利銀兩應於年羹堯名下嚴追一併入官。查年羹堯所有職銜已於別案俱行革去。應俟各省將軍督撫提鎮議奏到齊之日提拏至京審擬正法。一等精奇尼哈番年斌應革職。年富已於別案拏問。應從重歸結。餘並應如所請從之。○辛酉

孝慈高皇后忌辰遣官祭

福陵○琉球國中山王尚敬遣陪臣毛健元蔡淵等進貢方物賞賚如例○壬戌

上回宮○癸亥以右春坊右中允蔣漣署日講

起居注官○甲子

欽定律例告成○調鑲藍旗滿洲都統賴都爲鑲紅旗漢軍都統軍前鑲紅旗漢軍都統噶爾弼爲鑲藍旗滿洲都統兼管右翼前鋒統領事務○陞直隸河間府所屬天津州爲直隸州管轄武清青縣靜海三縣從長蘆鹽政御史莽鵠立請也○旌表福建永春縣烈婦吳立妻周氏拒姦不屈自縊完貞給銀建坊

入祠致祭如例

大清世宗敬天昌運建中表正文武英明寬仁信毅大孝至誠憲皇帝實錄卷之三十六

大清世宗敬天昌運建中表正文武英明寬仁  
信毅大孝至誠憲皇帝實錄卷之三十七

監修總裁官光祿大夫經筵講官太僕寺卿兼兵部尚書總理兵部事務三等伯李三綱臣鄂爾泰

纂修官光祿大夫經筵日講官起居注太保保和殿大學士吏部尚書仍兼吏部尚書翰林院掌院

書三等伯加十三級臣張廷玉光祿大夫經筵日講官起居注太保經筵講官太僕寺卿兼工部尚書仍兼工部

翰林院掌院事加二級臣福祿光祿大夫經筵講官太子太保東閣大學士兼禮部尚書加六級臣徐本光祿大夫

經筵講官經筵大臣協理內閣大學士事務禮部尚書仍兼管太常寺鴻臚寺事臣三泰等奉

敕修

雍正三年乙巳冬十月乙丑朔享

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵○頒雍正四年時憲曆○丙寅喀爾喀達

什垂木丕爾託音遣使進九白年貢賞賚如  
例○丁卯勾決河南山東二省情實人犯

上諭大學士等法律關係重大必至公至當俾

用法者之心與死者之心皆幾微無憾方為

明允各省情實人犯若輕重之間少有未協

朕必再四詳酌爾大臣等各據所見直陳無

隱○戊辰諭內閣外省官員督叅撫審撫叅

督審此係向來定例但朕思督撫果係同城

駐劄或相距不遠則舊例甚屬合理若隔處

遼濶該犯與干連人等不無往返拖累且案

件亦易至耽延即如山東河南山西俱無總

督但有巡撫凡題叅事件舊例亦仍交巡撫

查審嗣後督撫糾叅事件應如何得就近審

理使案件易於歸結情罪皆得公平著九卿

議奏尋議嗣後總督所叅之員仍照例令各

該撫審理其福建湖北陝西雲南等省巡撫

與總督同城江寧安徽廣東等省督撫雖不

同城兩江總督駐劄江寧府為江寧安徽適

中之地兩廣總督駐劄肇慶府與廣東巡撫駐劄之所相去不遠亦皆應照舊例撫叅督審外其湖南雖統屬湖廣相隔洞庭一湖甘肅雖統屬陝西相去千有餘里以及浙江江西四川廣西貴州等省均屬隔省巡撫所叅之員應即令該撫就近審結該布按兩司審轉時備詳總督稽核仍令巡撫將審案移會總督合詞具題從之○調雲貴總督高其倬爲浙閩總督陞刑部左侍郎署理山西巡撫伊都立爲雲貴總督山東布政使布蘭泰爲山西巡撫雲南布政使李衛爲浙江巡撫河南按察使張保爲山東布政使司布政使調江西布政使常德壽爲雲南布政使司布政使陞江西按察使陳安策爲江西布政使司布政使刑部郎中積善爲江西按察使司按察使○戶部議覆雲南巡撫楊名時疏言滇省社倉捐輸穀石自雍正二年爲始其貯穀實數請於次年歲終具題嗣後永爲定例庶

每年捐輸穀數并里民借支穀數以及有無發賑等項均得稽核應如所請從之○己巳諭果郡王允禮順承郡王錫保八旗漢軍內有平居孝友守分讀書之人考試既不獲中式而又不能別就者爾二人查明分別挑選其上三旗包衣旗鼓佐領下人令內務府總管保奏其王等包衣旗鼓佐領下人令各該王保舉如此則人不致於壅滯而亦可得才能之選矣○諭內閣四川提督周瑛從前領兵進藏時正值天氣寒冷又當匆遽之際弁兵甚屬勤勞朕心深爲軫念周瑛回至四川之日著巡撫王景灝動支司庫銀一萬兩交與周瑛將隨往進藏及入木多効力之弁兵等按其勞績分別等次通行賞賚俾遠征奮力之人得霑恩賜○刑部議覆川陝總督岳鍾琪疏叅年羹堯幕賓趙士河將故弟趙勳軍前効力知縣職銜令劉以堂頂替年羹堯掩護欺罔不行實奏應將年羹堯鎖拏來京

按律正法得旨此案顯屬年羹堯通同作弊明知故爲之事朕令其明白回奏並不據實陳首復立意欺罔佯爲不知巧飾奏聞朕已遣人將年羹堯提拏來京俟其到日嚴究質審○以吏部尚書蔡珽充經筵講官○庚午補行慶賀冊立

皇后禮

上御太和殿王以下滿漢大臣官員進表稱賀行禮○調工部額外侍郎綽爾岱爲刑部左侍郎盛京刑部侍郎馬進泰爲工部右侍郎以鑲白旗蒙古副都統署刑部侍郎武格爲盛京刑部侍郎○辛未勾決山西省情實人犯

上諭大學士等用刑貴於平恕惟平惟恕斯寬非濫而嚴非枉但平恕二字必詳慎精密得其至情方能無誤若祇照舊例斷決則一巡撫衙門老吏能之何待朕與爾等大臣悉心商酌爾等須竭力贊襄有言必盡毋畏毋隱

○壬申諭刑部鬪毆殺人本應抵償其奏准存留養親追給埋葬銀兩乃法外之仁也既免其抵償則埋葬銀兩自應照數追給以恤死者之家若止存給付之名而無領受之實是不但於情理未協而於法律亦未爲允當嗣後一應追給埋葬銀兩之案務必交與該地方官實在照數追給然後將該犯釋放報部存案若不行照數給付者必將該犯仍行監追儻並未追給而捏稱給付即將該犯釋放者告發之日將該管地方官一併從重議處○癸酉宗人府進呈

玉牒

上御中和殿閱畢復

御太和殿纂修王大臣官員行禮送

皇史宬尊藏賜總裁官簡親王雅爾江阿等及

副總裁纂修各官銀幣有差○

上幸圓明園○諭西洋教化王伯納地哆覽王奏竝進貢方物具見惓誠我

聖祖仁皇帝怙冒萬方無遠弗屆

龍馭升遐中外臣民悲思永慕朕繼承大統勉

### 思紹述

前徽教化王地處極遠特遣使臣齎章陳奏感先帝之垂恩祝朕躬之行慶周詳懇至詞意虔恭披閱之餘朕心嘉慰使臣遠來朕已加禮優待至於西洋寓居中國之人朕以萬物一體爲懷時時教以謹飭安靜果能慎守法度行止無愆朕自推愛撫恤茲因使臣歸國特頒斯敕竝賜粧緞錦緞大緞六十疋次緞四十疋王其領受悉朕惓惓之意○以散秩大臣宗室額騰吉爲鑲黃旗領侍衛內大臣○喀爾喀瓦齊賴巴圖土謝圖汗汪扎爾多爾濟遣使進九白年貢賞賚如例○甲戌浙閩總督覺羅滿保故遺疏奏聞得旨滿保向來居官雖無廉介之稱然才幹優長盡心辦事整飭營伍經理海疆實爲稱職昔年臺灣一事雖不能消弭於未然而能於七日之內即

行克復功過足以相抵朕即位以來時加教誨滿保亦知奮勵矢志廉潔及至抱病沉篤之際尚能留心地方將黃國材留閩以待新任巡撫竝將總督印務交與將軍宜兆熊此等料理之處俱屬得體今聞溘逝朕心深爲軫惻應得卹典著察例具奏大凡督撫離任封疆重務必須接受分明如廣東巡撫楊文乾聞計即便起程將巡撫印務交與總督孔毓珣孔毓珣交與李杕李杕復送還孔毓珣彼此互相推諉殊非體統嗣後督撫丁憂者不得遽行送印其任內文卷擇司道一人代行聽候諭旨方行離任庶不致貽誤公事○乙亥工部議覆河道總督齊蘇勒疏奏治河物料全資葦柳請酌定附近管河文武員弁裁種葦柳議敘其効力各官及民人等亦分別議敘至河兵補裁額柳向無議處之條今亦請嚴定專汛各官處分自雍正四年爲始著爲定例應如所請從之○丙子封簡親王

雅爾江阿子永謙爲鎮國公。恒親王允祺子弘旺。順承郡王錫保子熙良。俱爲輔國公。授恒親王允祺子弘昂。簡親王雅爾江阿子永煥。原鎮國公楊福子嵩阿。禮俱爲鎮國將軍。簡親王雅爾江阿子永欽。鎮國將軍準度子都香。都俞俱爲輔國將軍。原輔國將軍德儀子拉善。原輔國將軍拜察。禮子蘊清。原輔國將軍富良子哈孚喀。舒圖。輔國將軍薩木黨子伯勝。西林俱爲奉國將軍。原奉國將軍索達塞子裕寧。原奉國將軍塞爾都子格爾賓。託爾渾。原奉國將軍永德子格色泰。原奉國將軍永占子林安。原奉國將軍勒塞。禮子常山。原奉恩將軍達理祜子巴顏布。奉恩將軍崇揚赫子巴顏德。奉恩將軍畢喇錫子納顏。巴顏奉恩將軍申德子巴爾薩。俱爲奉恩將軍。○丁丑。免廣東海康遂溪二縣雍正二年分水災額賦有差。○戊寅。吏部議覆署直隸總督蔡珽奏言。向來督撫會稿。凡居不同城。

者。主稿者多一面具題。一面知會。至叅劾屬員。多有先拜疏而後補揭者。請嗣後凡地方大事及大計軍政等。督撫必公同商酌。具本其餘一切本章及薦劾人員。俱各自陳請。至所劾官員。由司道府揭報者。疏內載入。如司道府到任未久。或遠委公出。則不必列銜。應如所請從之。○前鋒統領鄂善奏。請將前鋒兵丁內一半。令爲烏鎗前鋒。每旗擇能管轄者四人。照副護軍校之例。令帶藍翎。爲烏鎗前鋒之長。得旨。前鋒等偵探信息。伺捉賊人。恐攜帶烏鎗有不便之處。著八旗都統等會同前鋒統領。護軍統領議奏。尋議烏鎗誠爲利器。遇有伺捉之事。原不攜帶。平時仍令演習。竝無不便之處。應令前鋒內一半。習用烏鎗。擇能管轄者四人。以爲隊長。仍著前鋒統領。叅領侍衛等。於演習烏鎗之暇。訓練騎射。不致生疎。從之。○己卯。廣東布政使朱絳。患病解任。陞戶部郎中常賚爲廣東布政使司。



布政使○辛巳陞鑲黃旗內府護軍統領永福爲正黃旗蒙古副都統○理藩院遵旨議覆喀爾喀副將軍多羅郡王和碩額駙策凌等奏言喀爾喀三部落之兵向分八旗今蒙恩准爲上三旗請令工部製造鑲黃旗纛六十桿腰旗六百桿給丹津多爾濟軍正黃旗纛四十二桿腰旗四百桿給策凌軍正白旗纛三十桿腰旗三百桿給博貝軍應如所請其舊有八旗旗纛應令交將軍穆克登收存從之○癸未增浙江省各學取進文章額數仁和錢塘海寧嘉興秀水嘉善海鹽平湖烏程歸安德清鄞縣慈谿山陰會稽諸暨餘姚臨海金華蘭谿西安建德淳安永嘉麗水等二十五縣向係大學今照府學額各取進二十五名奉化新昌嵊縣天台永康常山瑞安平陽等八縣向係中學升爲大學各取進二十名於潛昌化湯谿江山等四縣向係小學升爲中學各取進十六名定海縣向取進十

一名今改爲小學取進十二名○乙酉前鋒統領鄂善護軍統領色爾璧等奏言景運門等處一應記載奉旨事件及行文各部八旗等事見係筆帖式行走之護軍辦理請嗣後景運門於上三旗內每旗挑取筆帖式四人隆宗門後左門後右門於上三旗內每旗挑取筆帖式二人俱於各旗見在筆帖式行走之護軍及旗下護軍內擇其能辦事者每缺揀選二人咨送吏部兵部考取筆帖式辦理各門事件俟五年後由該處咨送吏部調用各部院衙門筆帖式得旨照所請行嗣後凡挑取筆帖式務視其優者挑取或挑取之後有不及者即行革退其係某大臣某司鑰某章京所舉出者明白登記檔案日後或有徇私及人不堪用之處亦易於查議○丁亥諭刑部凡強盜在監病故者將管獄官俱行議處但管獄官將強盜疎縱越獄誠應議處若監禁病故者將管獄官議處殊覺屈抑嗣後

監斃盜犯未經取供。其案未曾審明者。將管獄官照例議處。若已經取供審明後。並無別故。在監病故者。管獄官似可免其議處。爾部會同九卿。詳明分別妥議具奏。尋議嗣後管獄官。將監犯未經取供。案未審明監斃。及滅口致死者。仍照例議處。如已經取供審明後。管獄官並無致斃情事。在監病故四人以下者。免其議處。至將一案內盜犯監斃五人以上者。罰俸一年。以儆疎玩。從之。○河南布政使黃焜。緣事革職。陞陝西西安按察使費金吾。為河南布政使司布政使。○陝西甘肅布政使彭振翼。緣事革職。陞陝西甘肅按察使鍾保。為甘肅布政使司布政使。陝西平慶道李元英。為甘肅按察使司按察使。以陝西糧驛道許容。署理陝西西安按察使司按察使。○調廣東高雷廉總兵官趙儒。為四川建昌總兵官。陞浙江嚴州副將郝宏勳。為廣東高雷廉總兵官。○戊子。諭都察院。五城貧賑舊

例。自十月初一日起。至次年三月二十日止。每城每日發米二石。柴薪銀一兩。今歲直隸各州縣截留漕米二十三萬石。仍復運送通倉米十萬石。令散賑平糶。但恐來京就食之民尚多。每城日給米二石。或不敷用。著每日各增米二石。柴薪銀亦倍之。各該巡城御史親率司坊官散給。爾等不時稽查。務使窮民得需實惠。○庚寅。調雲貴總督伊都立。為山西總督。管理巡撫事務。陞雲南巡撫楊名時。為雲貴總督。仍管雲南巡撫事務。調廣西巡撫鄂爾泰。為雲南巡撫。管雲貴總督事務。山西巡撫布蘭泰。為湖南巡撫。以內閣學士汪潒。為廣西巡撫。湖南巡撫王朝恩。為內閣學士兼禮部侍郎。○靖逆將軍富寧安疏報吐魯番等處屯田收穫麥子糜子六千九十石有奇。下部知之。○賑直隸霸州保定等六十九州縣。天津梁城茂山三廳所水災饑民。○辛卯。署川陝總督圖理琛疏。奏四川巡撫王

景灝前在西寧地方經手辦理軍需於年羹  
堯冒銷軍需銀兩之處朦朧具奏請將王景  
灝解任質審得旨王景灝從前依附年羹堯  
相助爲惡凡年羹堯種種貪暴劣蹟王景灝  
事事阿附朕知之甚悉以年羹堯之勢力王  
景灝不能抗拒固屬不職然當此之際亦有  
出於不得已之處朕念王景灝年力方壯才  
亦可用姑從寬免其解任予以自新年羹堯  
任內凡係王景灝經手之項著逐一據實開  
明造冊移送陝西督撫以憑確核毋得絲毫  
朦混隱漏伊若能痛懲前非洗心改過朕自  
照舊任用儻仍復瞻徇私黨不實心爲國出  
力必嚴加治罪○實授謝旻爲湖南按察使  
司按察使○壬辰添設稽察盛京御史一員  
清查五部及將軍衙門事件每一年派換從  
奉天府府尹尹泰請也○喀爾喀扎薩克厄  
爾得尼畢什勒爾圖扎薩克圖汗和碩親王  
多羅額駙策旺扎布扎薩克和碩親王固倫

額駙敦多卜多爾濟副將軍扎薩克多羅郡  
王和碩額駙策凌巴林多羅郡王多羅額駙  
林穆布阿霸垓多羅郡王索諾木拉卜坦蘇  
尼特多羅貝勒西禮喀喇沁固山貝子和碩  
額駙僧滾扎卜翁牛特固山貝子鄂齊爾喀  
爾喀扎薩克固山貝子策旺諾爾布巴林輔  
國公桑里達喀爾喀扎薩克一等台吉達爾  
濟雅來朝○癸巳諭理藩院值年輪班之蒙  
古王貝子台吉等遇朕之萬壽慶賀來朝即  
與元旦朝賀無異見今距歲朝尚遠在此久  
候不無勞煩有欲歸者聽其回家如有情願  
守候者聽其居住○吏部議覆詹事府少詹  
事錢以塏條奏嗣後提鎮諸臣所得廕生除  
通習文理者照例考試以文職補授外其有  
幼嫻武藝人材壯健願改武職者令其呈明  
吏部移咨兵部恭候  
皇上考試簡用應如所請從之○甲午  
萬壽節停止朝賀筵宴賜內閣九卿等綵綉四

百尺翰林詹事等員扁綾一百幅○遣官祭

福陵

昭陵

昭西陵

孝陵

孝東陵

景陵○遣官祭真武東嶽城隍之神

大清世宗敬天昌運建中表正文武英明寬仁  
信毅大孝至誠憲皇帝實錄卷之三十七

大清世宗敬天昌運建中表正文武英明寬仁  
信毅大孝至誠憲皇帝實錄卷之三十八

監修總纂官光祿大夫經筵講官太僕寺卿弘文館學士兼兵部尚書禮部尚書三寶伯加十五級臣鄂爾泰

總裁官光祿大夫經筵日講官起駕王大臣原太子太保太子太傅太子太師太子太尉各部尚書翰林院掌院

事三寶伯加十五級臣張廷玉光祿大夫經筵日講官起駕王大臣原太子太保太子太傅太子太師太子太尉各部尚書

翰林院掌院事加二級臣福敏光祿大夫經筵講官太子太保東閣大學士兼禮部尚書加十五級臣徐本光祿大夫

經筵講官孫致大員編修內閣大學士事務禮部尚書仍兼太子太常寺卿禮部尚書臣王泰年奉

校修

雍正三年乙巳十一月乙未朔諭大學士等

今年直隸州縣被水小民乏食朕軫念殷切  
除截留漕米發給常平倉穀外又將通倉米  
六成以上者著托時陳守創親交余甸蔡起  
俊運赴天津分散賑糶今朕訪得所發之米  
朽爛不堪其高者不過三四成低者全屬灰  
土朕軫恤災黎宵旰憂勞無時或釋乃托時  
等全不仰體朕心將此無用之米運給有名  
無實小民何所資藉此已運成色米十萬石  
著賞給各處窮民再另發六成以上米十萬

石令托時陳守創余旬蔡起俊運往天津再  
今歲秋季所發官俸兵糧米色俱不好嗣後  
若再如此必從重治罪康熙五十五年曾發  
通倉米五萬石分貯各州縣備用歷年已久  
聞俱陳腐甚爲有司之累著從寬豁免○直  
隸按察使浦文燁緣事革職陞監察御史張  
廷棟爲直隸按察使司按察使○議政王大  
臣等議覆川陝總督岳鍾琪奏稱打箭爐界  
外之裏塘巴塘卡了又木多雲南之中甸又  
木多之外羅隆宗喇哇坐爾剛桑噶吹宗哀  
卓等部落雖非達賴喇嘛所管地方但羅隆  
宗離打箭爐甚遠若歸併內地難以遥制應  
將原係內地土司所屬之中甸裏塘巴塘再  
沿近之得爾格特瓦舒霍耳地方俱歸內地  
擇其頭目給與土司官銜令其管轄其羅隆  
宗等部落請賞給達賴喇嘛管理特遣大臣  
前往西藏將賞給各部落之處曉諭達賴喇  
嘛知悉再康濟鼎阿爾布巴既封爲貝子管

理西藏事務請令康濟鼎總理阿爾布巴協  
理頒給敕諭曉諭唐古特人等盡令遵奉二  
人約束庶免擾亂之患至從前年羹堯奏請  
噶達地方設立總兵官駐劄今若將羅隆宗  
等處賞給達賴喇嘛則噶達地方設立總兵  
官之處請行停止俱應如所請得旨畫定內  
地疆界給與達賴喇嘛地方曉諭番人之事  
著遣副都統宗室鄂齊學士班第扎薩克大  
喇嘛格勒克綽爾濟前往會同提督周瑛詳  
細辦理○丙申諭諸王大臣等內府佐領內  
管領等從前康熙三十年間所用錢糧不過  
三十餘萬兩今增至七十餘萬兩朕思以國  
家徵輸之額賦而養此並非正項兵丁無用  
人口且逐年增添無所底止甚非經久之策  
是以屢詢廷臣商酌變通之法據廉親王奏  
稱旗下披甲人每一佐領只二十四名內府  
佐領亦應照此辦理朕云內府佐領下人等  
甚多若照八旗裁減恐不可行廉親王奏稱

臣屬之圖巴海佐領俱係六七人始得一披甲錢糧照此辦理無不可行朕因將此事交與莊親王及常明來保同廉親王確議乃廉親王議將內府佐領下增甲九十餘副廉親王在朕前奏請裁減內府佐領之甲及至議奏反議增添誠不知其何心若果前奏難行亦當陳明從前所奏之誤何以面奏可裁而又議加增陰邪叵測莫此為甚伊從前種種姦謀欺騙諸臣在廷共識其姦伊計無所施又借此搖惑此等卑下之人欲以擾亂政事且邀結人心沽取名譽而加朕以不美之名朕念內府佐領披甲之人多係殷富官員之家入即如來保常明家人披甲者甚多且內管領人等即幼稚亦有錢糧其披甲錢糧乃分外多得之項將此裁去未嘗不可因酌量定額每佐領准其留甲五十副裁其家下披甲內之多者且目前亦不即行裁減俟其缺出扣除不補乃來保常明自顧其私將不甚

緊急事件連夜通傳守夜步軍不能禁止以致內府佐領無賴之人齊集廉親王府門妄行嚷鬧彼時廉親王來奏此事適本日朕將廉親王之舅家撥給廉親王朕意謂其必因撥給之事來奏未曾召入諭令於諸王大臣奏事之日同奏而廉親王並未聲明內府佐領人等嚷鬧情由即行退去次日莊親王內務府大臣奏稱內府佐領下人等至廉親王處嚷鬧朕降旨云親王之邸何得擅入嚷鬧且母妃在內豈可驚擾爾等速行逐散如不散即行銷拏若不能鎖拏即將莊親王革去王爵來保常明正法伊等遵旨前去乃是日並未至廉親王處嚷鬧朕往旃檀寺瞻禮問及提督阿齊圖奏稱三十日至廉親王處嚷鬧次日至李延禧家嚷鬧且搶去物件派出官兵拏獲數人等語朕始聞知而內務府大臣並未向朕奏明後莊親王與常明來保等拏獲數人審訊奏稱據供嚷鬧李延禧家係

廉親王所使廉親王亦直認不辯朕意若果係廉親王所使廉親王必不肯認今既承認必非廉親王所使朕素深知廉親王姦詐因令阿齊圖研審各犯果供並非廉親王所使及再問廉親王乃云此等無知小人我原替他應承來廉親王陰致人於死地而又於此等處代為應承冀人感激其居心之卑鄙尚可問耶況內府佐領下人數百前往嚷鬧此等不法之事伊視為淡然不行入告置之而去豈非欲加朕以不美之名耶此案搶奪李延禧之家固屬不法至於親王府邸擅入嚷鬧尤為大干法紀此俱係莊親王來保常明等始則孟浪通傳致起事端繼又不行據實奏聞所致莊親王著罰親王俸三年常明來保俱著革去內務府總管來保著枷號三箇月鞭一百廉親王審定為首嚷鬧之五人著廉親王查明具奏交與夸岱額騰吉同刑部侍郎二人監看正法其餘為從四十餘人

著交與刑部定擬斬絞監候秋後處決至王邸自有守門官員兵丁此等之人何由得入著將伊等交與今日面奉諭旨之王大臣會同察議具奏近日廉親王乘醉將伊門下之護軍酷打致斃隱匿不行奏聞恐死者之家申訴遣太監等囑令寢息今日朕當諸臣之前面問廉親王初猶支吾反覆窮詰始俯首無詞廉親王外市慈厚之虛名而內忍行慘酷斃人之實事雖工於矯飾而欲蓋彌彰著交領侍衛內大臣與宗人府會審具奏○陞營造司郎中五十一為內務府總管○丁酉上回宮○諭內閣來保原在辛者庫朕即位後拔入佐領下授為內務府總管理應凡事加謹効力乃並無一事輸誠陳奏一味苟且因循沽名釣譽甚屬不堪今姑從寬免其枷責伊兄現在跟隨誠親王著同伊兄一處行走効力無得推諉遲延○調正黃旗蒙古副都統費雅思哈為白都納副都統墨爾根副

都統烏察拉爲黑龍江副都統黑龍江副都統阿思海爲齊齊哈爾副都統齊齊哈爾副都統多起納爲墨爾根副都統○浙江按察使甘國奎緣事革職調山東按察使董永艾爲浙江按察使司按察使陞山東兗寧道徐湛恩爲山東按察使司按察使仍管兗寧道事○旌表直隸烈婦天津州張庚錫妻陳氏抗節被害武邑縣王五妻楊氏拒姦投繯各給銀建坊入祠致祭如例○戊戌諭內大臣等朕曾降旨著廉親王允禩奏爲首噶圖之五人即行正法今據廉親王允禩將爲首五人姓名具奏此內有自首一人又有一人堅供抱病未去而廉親王允禩據廚子認識遂入於五人之內可見廉親王所審甚不足憑人命關係重大豈可草率定案廉親王允禩生出事端擾亂政事若此等囂鬧妄爲之人不行處治則國法何在若即據廉親王允禩所審正法則其中不無冤抑此事原不必

急迫可將案內衆犯交與刑部監禁著內大臣大學士議政大臣九卿等公同詳確會議○陝西道御史太平倉監督殷式訓遵旨陳奏攤賠任內虧空米石實非本身虧折不應賠補得旨從前通倉霉爛虧耗米石原任倉場總督法敏等議令歷年監督概行賠補朕因歷年倉場監督疎忽因循種種情弊多不稱職是以姑允其議而所降諭旨中原許不應賠補之人自行陳奏隨有原任監督數人申訴得理朕已施恩寬免今覽御史殷式訓分晰陳奏之處甚爲明白著大學士九卿等將此案始末詳悉查明具奏至於歷年監督等有屈抑不應賠補之處著往都察院具呈申訴尋議各監督等除奉旨豁免及詳部議結外尚有五十二員在京者許赴都察院呈訴在籍及年老病故者限文到四月或親身或的屬赴都察院呈訴如果係牽累不應賠補者請旨豁免照倉場原議在倉役腳價內



扣還補項儻實係本員虧空朦混具呈加倍治罪仍著落家產變賠從之○以鑲黃旗滿洲副都統宗室諾穆珠署正藍旗漢軍都統○己亥諸王大臣等奏本月十三日

聖祖仁皇帝三週忌辰

皇上親詣

景陵行禮十二月初十日爲

孝莊文皇后梓宮安奉

地宮之期

皇上若又親往當此冬令嚴寒一月之內

聖駕兩次往還臣民之心實有未安又今年近

京州縣稍多雨水

皇上正在施恩賑恤之際恐地方官民不無迎

候供役請於躬詣

景陵祭奠之日即於

昭西陵先期行大祭禮

孝莊文皇后梓宮奉移

寶城之日遣諸王大臣前往祭奠得旨十二月

初十日

皇曾祖妣孝莊文皇后安奉

地宮朕本欲親往祭奠但

皇考聖祖仁皇帝三週祭期去十二月初十日

甚近一月之內兩次往還天氣嚴寒沿途官

民迎候供役未免勞苦朕意正在躊躇覽諸

王大臣所奏援引典禮請於十一月十三日

先期祭奠於禮既盡於心亦安所奏是著照

此行○宗人府遵旨議奏允禩心懷姦惡其

悖逆結黨之罪屢蒙

皇上寬免超授親王畀以重任理應感恩悔過

乃從前既欲裁減包衣披甲額數及交伊辦

理忽背前議奏請增添激令內務府人等嚷

鬧明係市恩惑衆毫無畏懼姦惡已極相應

革退和碩親王撤出屬下佐領以示懲警得

旨允禩革退和碩親王并撤出屬下佐領之

處俱從寬免○庚子以川陝督標中軍副將

姚文玉署陝西固原提督○壬寅

上以

聖祖仁皇帝三週致祭又恭值

孝莊文皇后安奉

地宮致祭躬詣

山陵○是日啟行駐蹕任家莊○癸卯

上駐蹕定府莊○甲辰

上駐蹕賈家莊○予故太子太傅湖廣總督楊

宗仁祭葬加祭一次謚清端贈少保并給拜

他喇布勒哈番世職○乙巳

上駐蹕姚家莊○丙午

上謁

昭西陵

孝陵

孝東陵躬奠舉哀旋謁

景陵至

寶城前行禮致奠畢詣

明樓伏地慟哭近侍大臣敦勸再四乃回行宮

○是日駐蹕馬蘭峪城東南○賜

四陵文武大臣官員緞疋執事兵丁銀兩及從

祭蒙古諸王台吉等衣服緞疋有差○丁未

上謁

景陵行三週致祭禮跪奠畢慟哭不止近侍大

臣敦請節哀

上旋詣

昭西陵行安奉

地宮告祭禮奠獻禮畢

上復詣

寶座前跪哭良久扈從諸王文武各官及蒙古

諸王台吉等俱齊集舉哀○是日

上回鑾駐蹕九百戶○戊申

上回宮○己酉諭禮部貴妃年氏秉性柔嘉持

躬淑慎朕在藩邸時事朕克盡敬慎在皇后

前小心恭謹馭下寬厚和平

皇考嘉其端莊貴重封為親王側妃朕即位後

貴妃於

皇考

皇妣大事悉皆盡心力疾盡禮實能贊襄內政  
妃素病弱三年以來朕辦理機務宵旰不遑  
未及留心商確診治凡方藥之事悉付醫家  
以致耽延日久目今漸次沉重朕心深爲軫  
念貴妃著封爲皇貴妃儻事出一切禮儀俱  
照皇貴妃行○壬子冬至祀

天於

園立

上親詣行禮○遣官祭

永陵

福陵

昭陵

昭西陵

孝陵

孝東陵

景陵○停止次日朝賀○

上幸圓明園○乙卯九卿遵旨議覆設立各省

巡察官并該員出差事宜及地方官盜案處

分十一條。一出差官職司巡察應令禮部鑄  
給關防以重職掌。一各州縣盜案於巡察官  
處一體通報以憑稽察。一巡察官令於所歷  
地方密訪盜賊窩藏之處會同地方文武官  
弁協力捕緝以清盜源。一衝途驛站有差使  
肆行騷擾者詳報巡察官據實題參。一道路  
煙墩應令巡察官加意查察儻有防守疎懈  
者題參議處。一巡察官務於一年內遍歷通  
省各府悉行訪察一年之內克稱厥職從優  
議叙儻遇有盜案通同隱匿或在地方生事  
滋擾者該督撫查參議處。一承緝盜案初限  
不獲降一級無級可降之官革職俱留任仍  
照舊例遵行外至再限不獲例應調用革職  
者今議再留任一年如一年內能獲盜過半  
照例開復如再不獲始照例調用革職其承  
緝官將一案盜犯全獲者每案紀錄二次一  
請寬承緝盜首之處分嗣後限內獲盜過半  
并獲盜首者免其參處限內獲夥盜過半而

盜首未獲者罰俸一年再限不獲盜首者罰俸二年三限不獲盜首者降一級留任。凡事主報盜如有地方官借端嚇阻者核實題叅照諱盜例革職。其有失察書役需索及拖累事主者一併題叅從重議處。若事主有以竊報強挾制官府妄行控告者查明治罪。地方官遇有盜案一面申報上司即一面開會鄰境州縣營汛等官遍處查察一月內拏獲鄰境案內盜首者加一級再紀錄一次。拏獲夥盜者每一名紀錄一次。拏獲之兵役令原失事之地方官給銀二十兩。一月後拏獲者紀錄三次。拏獲過半者紀錄二次。捕盜廳官於所屬州縣官如有諱盜不報及以強為竊察出揭報者免議。失察者罰俸一年。徇隱不報者革職。如所轄地方緝拏盜犯三月內全獲一夥者准其紀錄一次。得旨依議。浙閩二省不必派官前往。江寧安徽二處共派一員。湖北湖南二處共派一員。山東河南二

處各派一員。著大學士九卿等於小京堂及科道各部郎中內揀選引見。至所議請寬承緝盜首之處分一條甚是。著照所議行。○免江南山陽等四縣本年分水災額賦有差。○丙辰  
皇貴妃年氏薨  
上命輟朝五日。○己未以正白旗蒙古副都統滿色署鑲白旗蒙古都統。○辛酉諭內閣天津衛設立水師前令戶部兵部工部會議遲延數月。迨朕查問始行覆奏。明係工部耽誤。其逾限之處科道為何不行查叅。著大學士等將遲延之故查奏。從前朕屢降諭旨。期諸臣洗滌怠緩之習。訓誡再三。仍未悛改。殊不能體朕勵精圖治之意。凡速議事件與平常事件朕業已定有限期。嗣後務遵定限。議覆歸結。儻事件之內有行查他處咨提人犯不能依限歸結者。可於限滿之日將情由聲明交送內閣奏聞。如並無別項情由而逾限不

結科道即行查叅。儻科道不行查叅。著內閣都察院一并叅奏。尋大學士等覆奏。遵旨詢問科道等員。據供奉旨交議。及摺奏事件。俱不知會科道衙門。無憑稽查。嗣後請令於到部之日。即行知會內閣及都察院。如限內不能結案。將緣由聲明。若無緣由。逾限不完。科道不行查叅。察出一併議處。從之。○巴林榮憲固倫公主喀爾喀恪靖固倫公主科爾沁和碩達爾漢親王和碩額駙羅卜臧滾布妻郡主翁牛特多羅杜楞郡王和碩額駙蒼津妻郡主巴林多羅郡王多羅額駙林穆布妻縣主厄魯特多羅郡王和碩額駙阿寶妻郡主厄魯特多羅郡王和碩額駙車零旺布妻郡主主默特多羅達爾漢貝勒和碩額駙阿喇布坦妻郡主科爾沁輔國公固山額駙拉錫妻縣君科爾沁和碩額駙達爾瑪達都妻郡主喀喇沁和碩額駙納穆賽妻郡主巴林原爵多羅額駙納穆宗妻縣主喀爾喀和碩

額駙根扎卜多爾濟妻郡主巴林原爵公納木扎妻縣主喀喇沁扎薩克一等塔布囊喀寧嘎母鄉君等來京請安。○免雲南南寧甯益等四州縣本年分水災電傷額賦有差。○分設江南蘇松常三府屬州縣教職。原設之太倉州留學正一員。長洲吳江常熟崑山嘉定華亭妻縣青浦上海武進無錫宜興十二縣留教諭各一員。新分之元和震澤昭文新陽寶山鎮洋奉賢金山福泉南匯陽湖金匱荆溪十三縣撥訓導各一員。○改直隸原防滑縣濬縣之把總二員。兵七十九名。歸河南衛輝營叅將管轄。原防內黃縣之把總一員。兵四十一名。歸磁州營都司管轄。從河南巡撫田文鏡請也。○裁直省首領佐貳等缺。直隸倉大使一員。江南府照磨四員。檢校一員。都司經歷一員。縣丞一員。巡檢四員。驛丞四員。江西布政使司檢校一員。按察使司照磨一員。府知事三員。照磨一員。倉大使一員。縣

丞一員巡檢三員驛丞十三員浙江縣丞一員巡檢二員驛丞一員福建府照磨五員檢校一員稅課大使一員湖北府知事二員照磨一員倉大使一員州同一員湖南巡檢二員山東布政使司理問一員巡檢一員河南稅課大使一員山西布政使司理問一員按察使司知事一員州同三員州判三員衛經歷二員府司獄四員稅課大使二員倉大使四員縣丞十八員巡檢一員驛丞三員改設河曲縣巡檢一員陝西稅課大使二員窖大使一員都司一員都司經歷一員斷事一員廣東巡檢一員驛丞三員河泊所官一員廣西巡檢二員驛丞三員雲南通判三員州判一員鹽課大使一員改設驛鹽道衙門庫大使一員雲龍州吏目一員○壬戌調正藍旗漢軍副都統外三爲鑲白旗蒙古副都統以一等侯朱之璉爲正藍旗漢軍副都統○陝西寧夏副都統阿林緣事革職調正藍旗蒙

古副都統蘇穆爾濟爲陝西寧夏右翼副都統○旌表河南滑縣烈婦柯中元妻郭氏守正拒姦被刃殞命給銀建坊入祠致祭如例○癸亥陞兩淮鹽運使何世璠爲貴州巡撫○以奉天將軍綽奇爲鑲藍旗滿洲都統兼管右翼前鋒統領事務鑲藍旗滿洲都統噶爾弼爲奉天將軍○戶部議覆原任浙閩總督覺羅滿保疏言鳳山縣上淡水下淡水力加藤放練阿猴搭樓大澤機等八社每年額徵丁米四千六百四十五石每米一石折穀二石就中男番一千七百四十八丁每丁徵穀二石以至三石不等番婦一千八百四十四口每口徵穀二石此皆初定臺灣時循照偽鎮鄭成功所定之額未經改正查現在臺灣民丁每日祇徵銀四錢有奇並無婦女納穀之例即諸羅縣各社土番亦祇男番完糧不及番婦請照例將鳳山八社番婦一體免其納賦再查各番鹿場頗多閒曠應聽各

番租與民人墾種陸續陞科則番民均邀利賴而正賦亦復無虧應如所請從之

大清世宗敬天昌運建中表正文武英明寬仁信毅大孝至誠憲皇帝實錄卷之三十八

大清世宗敬天昌運建中表正文武英明寬仁信毅大孝至誠憲皇帝實錄卷之三十九

教修

雍正三年乙巳十二月甲子朔以署兵部尚

書法海為都察院左都御史兼管兵部尚書

事○調山西右衛右翼副都統覺羅延壽來

京以鑲藍旗滿洲副都統達爾馬為山西右

衛右翼副都統○定內閣侍讀學士翰林院

講讀學士為從四品翰林院侍讀侍講為從

五品從內閣學士班第請也○戶部議覆大

理寺卿仍管理長蘆鹽政莽鵠立疏言東省

丁銀攤入地畝之內徵收東運各場地少丁

多請將竈丁銀兩一半攤入竈地徵收一半

仍於竈丁均攤應如所請從之○乙丑解四川巡撫王景灝任調湖北巡撫法敏爲四川巡撫以湖廣總督李成龍兼管湖北巡撫事務○直省督撫提鎮等陸續疏叅年羹堯欺罔貪殘大逆不道請亟正典刑下部知之○予故正藍旗蒙古副都統莽喀拉祭葬如例○丁卯宗人府叅奏多羅郡王允禩前膺大將軍重任乃違背

聖祖仁皇帝訓示任意妄爲苦累兵丁侵擾地方軍需帑銀徇情糜費請將允禩革退多羅郡王降爲鎮國公得旨允禩著革去多羅郡王授爲固山貝子○戊辰調安徽按察使朱作鼎來京陞河東鹽運使段如蕙爲江南安徽按察使司按察使○移直隸保定府通判駐通州從署直隸總督蔡珽請也○己巳

孝惠章皇后忌辰遣官祭

孝東陵○和碩怡親王等遵旨議覆天津之海口爲京師重鎮滿洲兵丁令往天津駐劄學

習水師於海防大有裨益其撥派兵丁二千名之處已經奉有諭旨官兵駐劄地方亦奉旨派出大臣前往相度毋庸再議外此所派兵丁令八旗滿洲蒙古都統等於各該旗餘丁內挑選每滿洲旗分各派二百名設立三佐領蒙古旗分每旗挑選五十名設立一佐領立爲左右兩營兵丁習練火器爲烏鎗手并設副都統一員令其總管滿洲旗分應補佐領防禦驍騎校各三員每翼補協領各二員蒙古旗分應補佐領防禦驍騎校各一員每翼補協領各一員再駐防滿洲兵丁應補理事同知一員筆帖式三員其船隻令製造大趕繒船十六隻小趕繒船十六隻酌量分配官兵分爲兩班操演其趕繒船各隨小船一隻應令造杉板船三十二隻僱募駕船頭舵水手令兵丁學習熟練從之○庚午以初十日奉安

孝莊文皇后梓宮於



昭西陵遣官祭告

天

地

太廟

社稷○遣官祭告

永陵

福陵

昭陵○以翰林院掌院學士阿克敦兼理兵部

侍郎給事中海壽署刑部侍郎○增貴州省

各學取進文童額數貴陽威寧鎮遠三府學

各增額取進二十名貴筑縣向係大學照府

學額取進二十名畢節縣向係中學升為大

學取進十五名貴定清鎮普定甯安化五

縣向係小學升為中學各取進十二名○辛

未太僕寺卿涂天相緣事革職陞鴻臚寺少

卿單疇書為太僕寺卿○以散秩大臣佛保

住為正黃旗蒙古副都統○鑲藍旗蒙古副

都統達爾渣年老休致以伯馬蘭泰為鑲藍

旗蒙古副都統○陞廣東虎頭門副將陳祖

訓為福建汀州總兵官○陝西寧夏總兵官

王嵩陝西興漢總兵官武正安俱緣事革職

調四川川北總兵官張君烈為陝西寧夏總

兵官以原任四川建昌總兵官王之俊為陝

西興漢總兵官陞陝西潼關副將潘之善為

四川川北總兵官○壬申奉移

孝莊文皇后梓宮於

昭西陵蘆殿遣誠親王允祉行祭奠禮○癸酉

奉安

孝莊文皇后梓宮於

昭西陵寶牀陳

冊

寶於石案畢恭閉

元宮石門行真獻禮王以下文武官員以上及

守

陵大臣官員命婦俱齊集舉哀○是日以奉安

禮成遣官祭告

孝陵。

孝東陵。

景陵○科爾沁和碩土謝圖親王阿拉卜曇多  
羅郡王諾門額爾赫圖多羅郡王羅卜臧喇  
錫翁牛特多羅杜楞郡王和碩額駙蒼津喀  
爾喀扎薩克多羅郡王汪扎爾多羅貝勒噶  
爾桑扎魯特多羅貝勒阿諦沙厄魯特多羅  
貝勒和碩額駙色卜騰旺布阿霸垓固山貝  
子德木楚克巴林固山貝子巴忒麻厄魯特  
固山貝子茅海科爾沁和碩額駙策旺多爾  
濟和碩額駙達爾瑪達都喀爾喀和碩額駙  
根扎卜多爾濟扎薩克鎮國公屠巴扎薩克  
輔國公策凌旺布教漢多羅額駙扎木蘇科  
爾沁固山額駙色楞納木扎爾固山額駙班  
第來朝○甲戌議政大臣刑部等衙門題奏  
年羹堯反逆不道欺罔貪殘罪蹟昭彰彈奏  
交至案牘等邱山之積罪惡踰谿壑之深臣  
等謹將其罪案列款陳之其大逆之罪五一

年羹堯與靜一道人鄒魯等謀為不軌。將  
硃批諭旨。輒敢做寫進呈。見汪景祺西征隨  
筆。不行參奏。一家藏鎖子甲。又私行多貯鉛  
子。皆軍需禁物。偽造圖識妖言。其欺罔之  
罪九。邵陽用兵。致死無辜良民八百餘口。  
奉旨查問。始奏並無傷損一人。後又止奏出  
六人。縱容私人邊鴻烈等恣行騷擾。激變  
番民。不即參奏。捏參都統武格等鎮海堡  
失律。西安起身。私囑咸寧令朱炯買人保  
留。通同趙士河作弊。將劉以堂假冒趙勳  
名字。赴武功縣任。巧飾具奏。將幕賓張泰  
基父子。趙士河之弟趙淇。及伊兄年法堯。并  
高之傳等。共十八案。冒入軍功。家人魏之  
耀。家產數十萬金。年羹堯妄奏毫無受賄。  
西寧効力者。實止六十二員。冊報一百零九  
員。將退役王治奇名字。冒入軍功。令他人  
頂替。選授廣德州州判。其僭越之罪十六。  
出門黃土填道。官員穿補服淨街。驗看武

官。用綠頭牌引見。會府

龍牌前。設牀正坐。用鷲黃小刀荷包。擅穿四  
袂衣服。衣服俱用黃包袱。官員餽送俱  
云恭進。伊子穿四團補服。凡與屬員物  
件。令北向叩頭謝恩。總督李維鈞巡撫范  
時捷。跪道迎接。受之不辭。令扎薩克郡王  
額駙阿寶下跪。行文督撫書官書名。進  
京。陛見沿途墊道疊橋。鋪面俱令關閉。坐  
落公館。牆壁俱彩畫四爪龍。轅門鼓廳。畫  
四爪龍。吹手穿緞蟒袍。私造大將軍令箭。  
又將頒發大將軍令箭燒燬。賞賜動至千  
萬。提督叩頭謝恩。其狂悖之罪十三。兩次  
恩詔到陝。並不宣讀。亦不張掛。奏摺在內  
房啟發。並不穿朝服。大堂拜送。同城巡撫  
不許放礮。勒娶蒙古貝勒七信之女為妾。  
以待衛擺對前引後隨。又令墜鐙。大將  
軍印不肯交出。妄稱大將軍所行之事。俱  
循照俗例而行。縱容家人魏之耀等穿朝

服補服與司道提鎮同坐。在儀徵地方違

旨逗遛。勒令川北總兵王永吉告老。與  
行止妄亂之沈竹戴鐸結黨懷欺。煽惑衆聽。  
袒庇私人馬德仁阻回石文焯叅本。將  
本內朝乾夕惕故寫夕惕朝乾。其專擅之罪  
六。邵陽縣建築城堡。不行題請。擅發銀兩。  
將侍衛李峻等題請委署守備。奉旨不准  
題補。又不即行調回。擅用私票一萬二千  
張。作引十二萬道行鹽。將奉旨停捐雍正  
二年俸工。仍令照舊公捐。拏獲私鹽李乾  
勝。擅令銷案。面囑董玉祥將患病守備何  
天寵。不令照例填註軍政。囑李維鈞勒令陸  
篆接受王允猷虧空。其貪黷之罪十八。題  
補官員受謝儀四十餘萬兩。勒索捐納人  
員額外銀二十四萬兩。受趙之垣金珠等  
物值銀二十萬兩。取受樂戶竇經榮銀兩。  
受宋師曾銀一萬兩。並玉杯等物。遍置  
私人。私行鹽茶。私占咸寧等十八處鹽窩。

○取受葛繼孔餽送古玩。○受傅澤湮賄。明知虧空。不行查叅。○勒令四省効力人員。每員幫銀四千兩。○受叅革知府樂廷芳賄。欲帶往陝省。○將搶掠各番衣服等物。奄爲己有。○私征新撫各番雍正二年租糧。○蒲州盤獲私鹽。計值一萬兩入己。○差家人高四販買馬匹。○令家人顏泰將馬匹發興安各鎮。勒取重價。○委典史朱尚文販買木植。○令馬起龍賣茶得銀九萬九千餘兩。其侵蝕之罪十五。○冒銷四川軍需一百六十餘萬兩。又加派銀五十六萬兩。○冒銷西寧軍需四十七萬兩。○運米四萬石至軍前。冒銷腳價四十餘萬兩。○侵用康熙六十年起至雍正三年俸工銀十四萬九千餘兩。○借名建築布隆吉爾城垣。冒銷錢糧。○隱匿夔關歷年稅銀八萬八千兩。又加派軍需糧規五萬餘兩。○將拏獲私茶罰贖銀四萬餘兩入己。○侵用河東鹽政盈餘捐修銀五萬六千餘

兩。○將現貯西安未運米一萬石捏稱運至西寧。冒銷腳價四萬六千餘兩。○將寧夏各衛所貯倉耗一萬四千石並不題報。併留寧拴養馬匹工料銀一萬五千兩入己。○侵用城工餘剩銀一萬六千餘兩。○買貯咸長等八縣米浮銷價銀一萬五千餘兩。○抄沒塔兒寺礪砂茜草等物。私自變價一萬四千餘兩。○侵用紀廷詔等捐解銀一萬兩。○砍取桌子山木植。借稱公用。存貯入己。其忌刻之罪六。○現任職員陵虐遣調。任用私人。奪缺委署。○軍前官兵支給口糧。不先咨明晉撫。欲致其遲誤獲罪。○將綽奇會商軍餉清字咨文。差趙成誑說非交代事件。欲致岳鍾琪遲誤軍需。○捏叅程如絲販賣私鹽殺傷多人。○欲薦李維鈞爲巡撫。設計誘陷趙之垣。○遏抑阿炳安等軍功。共六案。其殘忍之罪四。○出示訪拏曹猪頭。該縣將馮猪頭錯解。並不覆實。即行枉殺。○無故將筆帖式戴蘇

鎖拏監禁。急欲出缺。劾叅金南瑛等七員庸劣病廢。將台吉濟克濟扎卜等。不善於安輯。致伊等困苦失所。以上各款。供狀昭著。謹按律內。凡謀反不分已未行。皆凌遲處死。又大不敬者斬。詐傳詔旨者斬。大逆知情故縱隱藏者斬。官員交結紊亂朝政者斬。妻子爲奴財產入官。官吏人等挾詐欺公。妄生異議。擅爲更改變亂成法者斬。造讖緯妖書妖言者斬。假與人官者斬。偽造茶鹽引者斬。在外大小各衙門官。但有入遞進呈實封公文至御前。而上司官令人於中途邀截取回者。斬。侵盜錢糧入己數滿三百兩者斬。有一於此法所不宥。而年羹堯所犯至九十二大罪。內外交武諸臣合口齊聲。恥同覆載。伏請皇上將年羹堯立正典刑。以申國法。其父及兄弟子孫伯叔伯叔父兄弟之子年十六歲以上者。俱按律斬。十五歲以下及母女妻妾姊妹及子之妻妾給付功臣之家爲奴。正犯財

產入官。仍將臣等審訊年羹堯惡蹟昭示中外。以爲天下萬世人臣反逆不道欺罔貪殘者戒。得旨。年羹堯不臣之心顯然。但因喪心病狂昏憤顛倒之所致。鄒魯乃無知小人相與謀逆之情雖實。而事蹟尚未昭著。朕念年羹堯青海之功。不忍加以極刑。著交步軍統領阿齊圖令其自裁。年羹堯剛愎殘逆之性朕所夙知其父兄之教不但素不聽從而向來視其父兄有如草芥。年遐齡年希堯皆屬忠厚安分之人。著革職寬免其罪。一應賞賚御筆衣服等物俱著收回。年羹堯之子甚多。惟年富居心行事與年羹堯相類。著立斬。其餘十五歲以上之子著發遣廣西雲貴極邊烟瘴之地充軍。年羹堯之妻係宗室之女著遣還母家去。年羹堯及其子所有家貲俱抄沒入官。其現銀百十萬兩著發往西安交與岳鍾琪圖理琛以補年羹堯川陝各項侵欺案件。其父兄族人皆免其抄沒。年羹堯族中

有現任候補文武官者。俱著革職。年羹堯嫡親子孫。將來長至十五歲者。皆陸續照例發遣。永不許赦回。亦不許爲官。有匿養年羹堯之子孫者。以黨附叛逆例治罪。著內閣明白記載。鄒魯著改爲立斬。其親弟兄子姪。著僉妻發往黑龍江給與披甲之人爲奴。其餘皆從寬免。○領侍衛內大臣公馬爾賽步軍統領阿齊圖恭捧諭旨。諭年羹堯爾亦係讀書之人。歷觀史書所載。曾有悖逆不法。如爾之甚者乎。自古不法之臣有之。然當未曾敗露之先。尚皆假飾勉強。僞守臣節。如爾之公行不法。全無忌憚。古來曾有其人乎。朕待爾之恩。如天高地厚。且待爾父兄及爾子。並爾闔家之恩。俱不啻天高地厚。爾捫心自思。朕之恩尚忍負乎。授爾爲川陝總督。又用爾爲撫遠大將軍。將西陲之事。全畀於爾。事事推心置腹。文官自督撫以至州縣。武官自提鎮以至千把。俱聽爾之分別用舍。朕意以爾實心

爲國。斷不欺罔。故盡去嫌疑。一心任用。爾乃作威作福。植黨營私。如此辜恩負德。於心忍爲乎。即如青海之事。朕命爾於四月間備兵。爾故意遲延。又命於八月進兵。爾復羈留不往。及朕嚴加催督。然後進兵。孤軍冒險。幾至失機。又如阿喇衲所領之兵。爾令其由噶斯地方前進。以險惡必不可行之路。令其行走。豈非欲陷害阿喇衲乎。又如爾令富寧安將駱駝三千餘隻。從巴爾庫爾送至布隆吉爾。爲無用之需。豈非設計欲陷害富寧安乎。又如令岳鍾琪之兵。調至西寧。其經由之路。爾指令舍近就遠。故意使其紆道數千里。欲使蔡珽運糧不及。豈非欲巧陷蔡珽乎。此皆國家軍務大事。而爾視爲兒戲。藉此以快私忿。尚得謂之有人心者乎。又如爾所奏善後十三條。於不應造城之處。建議造城。於不應屯兵之處。建議屯兵。並無一件有益於地方之事。爲國家籌畫邊機。如此草率錯亂。是誠何

心。如青海用兵以來。爾之殘殺無辜。顛倒軍政等事。朕尚皆未令入於廷臣議罪之條。即就廷臣所議九十二條之內。爾應服極刑。及立斬者共三十餘條。朕覽之不禁墮淚。朕統御萬方。必賞罰公明。方足以治天下。若如爾之悖逆不臣至此。而朕枉法寬宥。則何以彰國家之憲典。服天下之人心乎。即爾苟活人世。自思負恩悖逆至此。尚可以對天地鬼神。覩顏與世人相見乎。今寬爾殊死之罪。令爾自裁。又赦爾父兄子孫伯叔等多人死罪。此皆朕委曲矜全莫大之恩。爾非草木。雖死亦當感涕也。○科爾沁和碩達爾漢親王和碩額駙羅卜藏滾布和碩卓禮克圖親王阿爾坦格勒爾喀爾喀扎薩克厄爾得尼畢什勒爾圖汗和碩親王多羅額駙策旺扎布扎薩克和碩親王固倫額駙敦多卜多爾濟青海厄魯特和碩親王戴青和碩齊察罕丹津科爾沁多羅扎薩克圖郡王撒胡喇克多羅冰

圖郡王伊錫班第敦漢多羅郡王垂穆品爾。蒿齊忒多羅郡王雅穆聘爾。鄂爾多斯多羅郡王喇錫班珠爾。喀爾喀扎薩克副將軍多羅郡王和碩額駙策凌厄魯特多羅郡王車零旺布。青海厄魯特多羅郡王額爾得尼厄爾克托克托。扎魯特多羅貝勒畢魯瓦烏朱穆泰多羅貝勒策卜登。阿祿科爾沁多羅貝勒汪扎爾。科爾沁多羅貝勒多爾濟巴林固山貝子扎錫納木塔爾。翁牛特固山貝子鄂齊爾。阿霸垓固山貝子策伶東洛卜喀爾喀。固山貝子巴忒瑪旺扎爾。土默特固山貝子哈穆罕巴雅斯呼朗圖。喀爾喀扎薩克固山貝子策旺諾爾布。厄魯特扎薩克固山貝子多爾濟色卜騰。扎魯特鎮國公察罕伶華翁牛特鎮國公索訥木烏朱穆泰。鎮國公彭蘇克拉布坦。科爾沁輔國公固山額駙拉錫輔國公烏爾呼滿爾。喀爾喀輔國公通摩克扎薩克輔國公根敦和托輝特。扎薩克輔國

公沙克扎輝特扎薩克輔國公巴濟喀爾喀  
扎薩克一等台吉齊安班珠爾達爾濟雅根  
敦巴朗班珠爾多爾濟等來朝○乙亥命大  
學士馬齊爲正使禮部侍郎三泰爲副使齋  
冊寶追贈

敦肅皇貴妃謚號致祭行禮遣官祭告

太廟

奉先殿○免河南西華蒙澤等四縣本年分秋  
災額賦有差兼賑祥符睢州等十九州縣饑

民○丙子諭大學士等康熙六十年年羹堯  
奏請四川復設鋪司經部議准設立每年支  
給工食銀三萬六千餘兩及朕訪聞四川並  
未設立鋪司仍令塘兵傳遞文書將鋪司工  
食銀俱乾沒入己此係高其佩四川按察司  
任內經手之事爾等可即詢問高其佩令其  
據實一一陳奏不得絲毫隱瞞若高其佩稍  
有徇隱將來法敏程如絲查出回奏到日定  
將高其佩從重議處○調正紅旗漢軍副都

統滿泰爲鑲藍旗滿洲副都統陞直隸宣化  
總兵官許國桂爲正紅旗漢軍副都統○刑  
部尚書勵廷儀條奏監禁罪犯宜分別內外  
以杜弊端內監以居重囚并緊要人犯外監  
以居現審輕犯并案內聽審之人其女監另  
作牆垣隔別庶防範嚴肅亦不致有串通口  
供之弊從之○免雲南鄧川建水二州本年  
分水災額賦有差○丁丑調兵部右侍郎傅  
鼐爲盛京戶部侍郎○戶部遵旨議覆原任  
署江蘇巡撫何天培疏奏社倉事宜五款○  
社倉借貸散賑宜豫造排門細冊存案凡不  
務農業遊手好閒之人不許借給○正副社  
長外再公舉一身家殷實之人總司其事○  
州縣官不許干預出納如有抑勒那借許社  
長據實呈告○所需紙張筆墨須勸募樂輸  
或官撥罰項充用不得科斂擾累○積穀既  
多恐滋汜爛應於夏秋之交減價平糶秋收  
後照時價買補均應如所請從之○戊寅諭



戶部湖廣爲產米之鄉。穀石最宜多貯。將來運往別省。皆爲近便。今查湖廣通省存倉之穀。只數十萬石。爲數無多。今歲湖廣收成豐稔。著即行文該省督撫。令其動支庫銀十餘萬兩。遴委賢員。採買穀石。於省倉及府州縣應貯之處。加謹收貯。此時只宜陸續辦理。不可因有官價。一時採買。致令穀價騰貴。設若民間穀價稍昂。即便停止。俟明年再行採買。江南浙江。今歲俱獲豐收。著各該撫就近商酌。若亦可動項採買穀石。著即一面定數奏聞。一面採買。○移四川松茂道駐茂州。從川陝總督岳鍾琪請也。○己卯工部議覆河道總督齊蘇勒疏言。山東曹縣地勢平行。難以引溜下趨。不宜開挖引河。應於險工上流築挑水壩一座。又於埽工之前。復加魚鱗護埽。又芝蔴莊衛家樓後。舊有月隄。宜接築隔隄二道。以資鞏固。均應如所請從之。○庚辰諭吏部。教官專司課士。前恐捐納出身之員。文

藝未能精通。難以訓課士子。故令改補佐貳等官。朕思此等改補之員。並非事故處分之比。其從前教職任內所歷之俸。自應准其一併通算。不得將前俸開除。且此等改補人員甚多。其中豈無辦事可用之才。爾部可將現在赴部改補人員內。識字能書履歷者。傳齊帶來引見。此係朕愛惜人才至意。惟恐或有遺棄。特降諭旨。其優劣俱係朕親定。若伊等以不肖之心。自待妄行請託。爲人所愚。不但負朕深恩。自壞人品。日後發覺。且罹罪戾。爾部並傳諭知之。○調齊齊哈爾副都統阿思海回京。以鑲白旗蒙古副都統外三爲齊齊哈爾副都統。○陞雲南景蒙叅將劉起元爲雲南曲尋總兵官。○辛巳陞鑲紅旗叅領黃廷椿爲直隸宣化總兵官。○鑄給駐劄青海副都統達鼐總理青海番子事務關防。○刑部等衙門議奏。妄作西征隨筆之汪景祺。照大不敬律擬斬立決。得旨。汪景祺作詩譏訕

聖祖仁皇帝大逆不道。應當處以極刑。今大臣等定擬立斬。具奏姑從其請。著將汪景祺立斬。梟示其妻子。發遣黑龍江。給與窮披甲之人爲奴。其期服之親兄弟親姪俱著革職。發遣寧古塔。其五服以內之族人現任及候選候補者俱著查出。一一革職。令伊本籍地方官約束不許出境。○免江南太平。盱眙。泗州三州縣本年分旱災額賦有差。○壬午諭巡視五城御史。今年天氣寒冷。聞外間無屋居住之窮民。竟有受凍傷損者。朕心深爲憫惻。朕思居民中。豈無愷悌好善之人。但因慮及稽查牽累。不敢輕易收留。此亦人情之常。爾等可留心照看。使寒夜不致露處。若有好義之人。容其棲息者。不必禁阻。至明春二月和暖。便可無慮。爾等巡城之職。固在禁民爲非。亦當恤窮救困。嗣後儻有凍斃之人。經朕訪聞。爾等不得辭其責。○又諭。今年天氣甚冷。京城多有窮民。廣寧門安定門外。向有養濟

院。此二處著將變色米賞給一百石。煮粥賑濟。傳諭倉場侍郎。將米樣呈驗。然後賞給。○以陝西安西總兵官孫繼宗署陝西甘州提督。調署陝西甘州提督宋可進。署陝西安西總兵官。○吏部題二等伯穆爾泰因病解退。銷去恩詔。所得六拖沙喇哈番。餘一等阿思哈尼哈番。兼一拖沙喇哈番。以其子岐山襲替從之。○旌表廣東新會縣烈女梁仁女梁氏。遇暴被劫。投水完貞。給銀建坊入祠致祭。如例。○癸未陞廣西潯州副將齊元輔爲廣西左江總兵官。○署浙江巡撫福敏疏言。紹興府海塘工程。原議皆用條石。後以條石不易購致。限期已迫。遂用條石托外。亂石填中。今恐日後坍塌。仍改用條石。請寬限期。督催改築。得旨。海塘工程。關係民生。最爲緊要。必須一勞永逸。若因條石一時難以購致。從前便當聲明緣由。奏請展限。何得草率從事。著交與新任巡撫李衛悉心查勘。指示更改。修

理。務期永遠堅固。張楷在江南修理塘工。用木椿密釘。似為有益。可否做行。並令李衛酌量。○改管理天津水師營副都統為都統。甲申。

上回宮。○調吏部左侍郎史貽直為工部右侍郎。陞大理寺卿兼順天府府尹。張令璜為吏部左侍郎。仍兼順天府府尹事。○禮部右侍郎景日珍乞假回籍。允之。陞詹事府詹事魏方泰為禮部右侍郎。陞長蘆鹽政大理寺卿莽鵠立為兵部右侍郎。仍管長蘆鹽政。額外侍讀學士明圖為內閣學士。兼禮部侍郎。○以翰林院侍講王世琛提督山東學政。○調鑲黃旗漢軍副都統岳興阿為鑲白旗蒙古副都統。正藍旗漢軍副都統顧儼為鑲黃旗漢軍副都統。陞廣西左江總兵官梁永禧為鑲黃旗漢軍副都統。以額外副都統智勇為正藍旗蒙古副都統。工部右侍郎馬進泰為正藍旗漢軍副都統。仍兼理工部侍郎事務。

陞正紅旗滿洲副都統覺羅巴延德為直隸天津水師營都統。○宗人府奏。奏廉親王允禩因護軍九十六不遵伊之指使。立斃杖下。太監閔進代伊隱瞞所行之事。重賜銀兩衣服。允禩擅專生殺之權。甚屬悖亂。應將允禩革去親王。嚴行禁錮。將所屬佐領撤入公中。得旨。允禩革去親王。禁錮。并撤所屬佐領之處。俱著寬免。九十六之宗族佐領不可留於允禩屬下。著撤入公中。○戶部議覆。巡倉御史張坦麟條奏。北漕事宜三款。一自通抵津。三百七十里。沿河舊設汛堆三十八處。寫遠難以兼顧。請照旱汛五里之例。均勻安置。漕船到汛。催漕官并不親身赴河。并坐視前船阻抵。不行申報者。照催償不力例。叅處。應如所奏。其設汛之處。令直隸總督天津總兵官酌議。一漕船轉衛遇淺。僱覓民船彼此指阻。濡滯實多。請令坐糧廳於河西務截留騰空民船。幫丁向廳領封貼船。照定數給價。查

旗丁領封貼船。恐將商船濫行封捉。應令倉場轉飭坐糧廳。令旗丁照時價出銀僱剝。毋許彼此勒捐。一沿途疏淺。約十三四處。坐糧廳二員。一在兩壩料理起卸。一在河西務專司起剝。不能親爲佈置。請以各汛之淺。交各汛官弁督率該廳人役疏導。應銷錢糧。仍令坐糧廳管理。應如所奏。今坐糧廳轉行各汛官弁。先期疏濬。從之。○增設右衛漢軍協領一員。從右衛將軍吳禮布請也。○旌表湖北黃安縣烈女陳仔聘妻祝氏。守貞拒姦。自刎畢命。給銀建坊。入祠致祭。如例。○乙酉。諭兵部。朕君臨萬方。中外一體。有功必賞。有罪必懲。初無偏黨之心。亦並不存依違之見。前以羅卜藏丹津。潛行悖逆。謀擾邊陲。朕命將出師。用彰天討。滿洲綠旗漢土官兵。皆能奮勇爭先。克成懋績。論功行賞。恩所宜施。乃年羹堯。以私昵人員。冒濫入冊。以致綠旗官兵。議敘至今。駁查未定。而土司功冊。亦因之暫停。

朕心深爲憫念。夫土司非比內地。凡所遣調目兵。皆預定名數。按名隨師。無從虛冒。其功績等第。必當詳確稽查。如四川屬之瓦斯雜谷。二土司。部下目兵。與三寨包坐之頭目。所部番兵。皆屢年効力。戰功尤多。小金川土司湯鵬。陝西土司魯華。齡於攻取。桌子山時。其目兵亦能戮力用命。似此邊遠番衆。知効忠誠。則其寸功。必宜盡錄。爾部查照。領兵官所報各土司功冊。除各土兵已給賞賜外。其官目。應各加以職銜。仍予恩賞。陣亡帶傷者。照依綠旗兵丁一體優恤。務期均沾實惠。仍將此旨。下與該管督撫提鎮。轉飭各土司。自茲以往。尤宜益矢忠勤。各安駐牧。嚴束部落。不得滋事生非。和睦族鄰。不可恣行仇殺。尺地莫非王土。率土莫非王臣。番苗種類固多。皆係朕之赤子。或有强悍不平。各土司祇宜赴該管上司陳告。豈得任意戕殺。以背朕好生保赤之念。各該土官。果能凜遵訓誡。則世守

職土。朕自加恩。若敢恃功驕肆。陽奉陰違。則國法具在。亦斷不因今日之功賞。更從寬貸也。○丙戌。禮部左侍郎牛鈕緣事降調。陞翰林院掌院學士兼理兵部侍郎阿克敦爲禮部左侍郎。○和碩怡親王等陳奏直隸水利營田事宜三款。○白衛浚池等河情形。并繪圖進呈。○請於灤薊文霸等處。各設營田。○請揀選河員。得旨。直隸地方。向來旱澇無備。皆因水患未除。水利未興所致。朕宵旰軫念。莫釋於懷。特命怡親王及大學士朱軾。前往查勘。今據查明繪圖陳奏。所議甚爲明晰。且於一月之內。衝寒往返。而能歷勘周詳。區畫悉當。以從來未有之工程。照此措置。似乎可收實效。具見爲國計民生。盡心經畫。甚屬可嘉。著九卿速議具奏。至於工程應用人員。若交與九卿揀選。恐有掣肘。即令怡親王及朱軾揀選。請旨。其從前差往修城修隄之員。俱著於水利工程處一同辦理。○丁亥。諭大學

士等。今歲直隸地方被水。小民乏食。朕軫念維殷。已截漕發粟。多方賑恤。但恐停賑之後。正值東作之時。農民謀食無策。著再加賑一月。如從前所發之米。不足賑糶。著署理總督蔡璉。確查奏請。增發米石。以副朕愛養黎元之意。○戊子。

孝莊文皇后忌辰。遣官祭。

昭西陵。○諭大學士等。積貯倉穀。關係民生。最爲緊要。朕屢降諭旨。令該督撫嚴飭州縣。及時買補。昔年虧空之數。無如苟且遲延。奉行不力。即如原任直隸總督李維鈞。曾奏稱各屬倉穀。已補足七八分。及今冬發倉賑濟。虧空甚多。若非截留漕米。并發給通倉之米。窮民幾至失所矣。昨據月選官陳克復條奏。虧空倉穀。請支動正項買補。一面嚴追本官還項。朕已交與九卿議行。今直省地方。俱著定限三年。將一應倉穀。務期買補完足。不得顆粒虧欠。三年之後。朕必特差官員。前往盤查。

如有缺項。定行重治其罪。儻有不能補足情由。著該督撫題奏。凡虧空錢糧。猶可勒限追完。無損國帑。若虧空倉穀。則一時旱澇無備。事關民瘼。是虧空倉穀之罪。較虧空錢糧爲甚。自宜嚴加處分。並著內閣。九卿確議定例具奏。○諭內閣。山東歷城等四十三州縣。德州等五衛所。今歲被水。收成歉薄。巡撫陳世倌奏請將被災之州縣衛所。應徵漕糧。盡行緩徵。分作三年帶徵起運。經部議覆。以漕糧無本年全緩。分作三年帶徵之例。應緩徵一半。於雍正四年秋成後徵收起運等語。朕思被災地方。有輕重不等。若被災既重。即徵收漕米一半。閭閻亦覺艱難。著山東巡撫於四十三州縣五衛所之中。悉心詳查。其被災稍輕之處。仍照部議緩徵一半。被災重者。准其全緩。務期分別確當。不得草率偏枯。儻輕重失實。日後發覺。定行重治其罪。○以都察院左僉都御史王廷揚。江南安徽按察使段如

蕙。經理直隸水利事務。○陞湖南辰沅靖道祖秉圭爲江南安徽按察使。司按察使實授許容爲陝西西安按察使。司按察使仍兼管西安糧驛道事。己丑。諭陝西總督巡撫等。西安地方緊要。又有滿洲駐防兵丁。省倉米石。應當多貯。查西安現在所貯米石。爲數無多。今歲秦省收成豐稔。著總督岳鍾琪。巡撫圖理琛。就近商酌。動用庫銀採買米石。存貯省倉。以爲備用。其米數多寡。該督撫酌定奏聞。務須陸續採買。勿令價值騰貴。儻倉廩不足。亦令該督撫酌議收貯之法。該督撫等宜仰體朕心。實力奉行。○諭河道總督齊蘇勒。宿遷以下。因黃河決口。尚未堵成。黃河大溜不能暢直通流。致有淤淺。一二處水勢急溜。河身復多沙礫。該地方官概不實心料理。以致回空漕船。至此不無阻滯。儻冬底春初。決口尚未合龍。河溜不歸故道。宿遷運河一二淺處。明年重運漕船。定多梗阻。干係甚大。該

總河當嚴飭河員上緊堵築必於桃汛之前將宿遷決口修築堅固其淤淺處加工挑濬則來歲糧艘重運方無遲誤之患加副叅領靳治豫工部侍郎銜協理江南河工事務以其父靳輔向任總河著有勞績靳治豫亦明晰河務故也庚寅禮部等衙門遵旨議覆

先師孔子聖諱理應迴避惟祭

天於園丘丘字不用迴避外凡係姓氏俱加偏旁爲邱字如係地名則更易他名至於書寫常用之際則從古體卽字得旨今文出於古文若改用卽字是仍未嘗迴避也此字本有期音查毛詩及古文作期音者甚多嗣後除四書五經外凡遇此字並用邱字地名亦不必改易但加偏旁讀作期音庶乎允協足副朕尊崇

先師至聖之意諭刑部從前內外惡亂鑽營之人紊亂法紀朕知之甚悉是以登極以

來不時教訓宮內太監并外廷大臣等凡事無得欺隱有鑽營者斷不寬恕若被拏獲務必從重懲戒正法屢次諭旨甚明乃有掃院太監傅國相向奏事太監劉裕探聽外邊有一廢官欲圖開復曾否保奏一事劉裕止告訴總管太監俱不奏聞甚屬可惡著將總管太監并奏事太監劉裕問明情由凡有關涉此案人犯俱行鎖拏查問治罪陞河南開歸道沈廷正爲河南按察使司按察使辛

卯

上以

聖祖仁皇帝東西暖閣御用裁氈宣示廷臣諸王大臣等奏言

聖祖仁皇帝臨御六十餘年時時以愛惜物力崇尚儉素爲休養元元之本而

聖躬服御之物尤倍加撙節質樸無華歷久不易今臣等恭覽

御前陳設之氈歷三十餘年尚潔淨完整崇儉



惜物實從古未有。請宣付史館以昭

聖德。得旨是。戶部等衙門遵旨議覆直隸河

防水利事宜。據和碩怡親王等疏言。直隸之

衛河。淀河。子牙河。永定河。皆匯於天津州大

直沽入海。此直隸水道之大畧也。衛河與汶

河合流東下。德棣滄景以下。春多淺阻。一遇

伏秋暴漲。不免潰溢。請將滄州南之磚河青

縣南之興濟河。故道疏濬。於舊時建閘之處

築減水壩。以洩衛河之漲。靜海縣權家口。亦

築壩減水。白塘口入海之處。並開直河一道

使磚河興濟河之委。同歸白塘出口。修理海

口舊閘。以時啟閉。則滄瀛以北。水利興而水

患除矣。東西二淀。跨雄霸等十餘州縣。均應

疏濬深廣。并多開引河。使諸淀脈絡相通。其

已淤爲田畝者。四面開渠。中穿溝洫。庶圩田

旱澇有備。其趙北。苑家二口。爲東西二淀。咽

喉。趙北口。隄長七里。板石橋共八座。俱應升

高加濶。苑家口北之中亭河。上流之王帶河

對岸。爲十望河。均應開通。庶東西二淀無衝

決之患矣。子牙河爲滹漳下流。清濁二漳發

源山西。經廣平。正定。而滹沱。滏陽。大陸之水

會焉。其下流有清河。夾河。月河。皆分子牙之

流。同趨於淀。宜開決分注。以緩子牙河奔放

之勢。永定河。俗名渾河。水濁泥多。故道遂湮

應自柳口。引之稍北。遶王慶坨之東北入

淀。兩河淀內之隄。至三角淀而止。爲衆淀之

歸宿。應照舊開通。逐年疏濬。兩河之濁流。自

不能爲患矣。至各處隄防衝潰甚多。如高陽

河之柴淀口。新河南界之古隄。新安之電河

均應疏濬修築。再請於京東之灤。薊。天津。京

南之文。霸。任。邱。新。雄等處。各設營田專官。經

畫疆理。召募老農。課導耕種。民力不辦者。動

支正項錢糧。代爲經理。田熟歲收十分之一

以補庫帑。足額而止。營田一頃以上者。分別

獎賞。有能出貲代營者。民則優旌。官則議敘

至各屬官田。約數萬頃。請遣官首先舉行。爲



農倡率民間田廬有礙水道者計畝撥抵視其畝數加十之二三河淀淤地必須挖掘者將附近官地照數撥補則營田水利人皆趨事樂從矣均應如所請從之○提督山西學政右庶子劉於義奏言山右當豐亨之時宜豫籌積貯或動正項錢糧或從公費中每年將銀四萬兩發太原平陽潞安大同四府建倉積貯以備各州縣需用選擇州縣或府佐貳官廉潔有才者專董其事如能實心辦理三年准其議敘如有那移虧空嚴加處分每歲於青黃不接時出糶秋收時買補其間小歉平糶中歉出借大歉賑濟務定章程以垂永久得旨○劉於義所奏常平積貯事宜甚為有益著交與山西總督伊都立就近酌量一面定數具奏一面舉行從來積貯米穀自督撫以及州縣皆耽延瞻顧苟且塞責此弊務須痛革實心奉行○壬辰歲暮裕祭太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵○遣官祭太歲之神○癸巳賜朝正外藩

科爾沁翁牛特敖漢喀爾喀烏朱穆秦阿祿

科爾沁阿霸垓巴林扎魯特吳喇忒李曼蘇

尼特四子部落鄂爾多斯喀喇沁蒿齊忒郭

爾羅斯厄魯特土默特和托輝特輝特青海

厄魯特阿霸哈納杜爾伯特毛明安玉貝勒

貝子公額駙台吉塔布囊等及內大臣大學

士侍衛等宴○旌表八旗節婦滿洲那辛妻

楊佳氏等一百八十七人蒙古博羅起塔忒

妻白佳氏等三十六人漢軍朱珏妻劉氏等

四十四人直隸各省節婦朱景運妻劉氏等

八百二十一人。貞女朱氏等二十二人。孝子張桐等十六人。各給銀建坊如例。是歲人丁戶口二千五百五十六萬五千一百三十一。又永不加賦。滋生人丁五十四萬七千二百八十三。田地山蕩畦地八百九十六萬五千八百二十七頃四十七畝。有奇。徵銀三千七萬一千五百七十四兩。有奇。米豆麥四百六十二萬九千二百二十九石。有奇。草四百九十二萬二千五百七十四束。茶四十九萬五千六百三十六引。行鹽五百二萬四千四百九十引。徵課銀四百四十二萬六千一百五十五兩。有奇。鑄錢六十七萬五千一百六十有奇。

大清世宗敬天昌運建中表正文武英明寬仁信毅大孝至誠憲皇帝實錄卷之三十九

大清世宗敬天昌運建中表正文武英明寬仁  
信毅大孝至誠憲皇帝實錄卷之四十

監修總裁官光祿大夫經筵講官太保議政大臣保和殿大學士兼兵部尚書總理兵部事務三等伯加十五級臣鄂爾泰

總裁官光祿大夫經筵日講官起居注太保保太子太保保和殿大學士兼戶部尚書內務府尚書吏部尚書翰林院掌院

事三等伯加十三級臣張廷玉光祿大夫經筵日講官起居注太保議政大臣武英殿大學士兼工部尚書仍兼官

翰林院掌院事加二級臣福敏光祿大夫經筵講官太子太保東閣大學士兼禮部尚書內務府尚書仍兼官

經筵講官議政大臣協辦內閣大學士事務禮部尚書仍兼官太常寺鴻臚寺事臣三才等奉

敕修

雍正四年丙午春正月甲午朔

上詣

堂子行禮回宮拜

神畢御殿王以下文武各官外藩王及使臣等

上表朝賀○朝鮮國王李昫遣陪臣金興嗣

等表賀冬至元旦

萬壽節及進歲貢禮物賞賚如例○是日賜諸

王貝勒貝子公內大臣侍衛文武官員及朝

正外藩蒙古王貝勒貝子公額駙台吉塔布

囊等宴朝鮮國陪臣等及諸王屬下凡有頂

帶官員一體與宴

上御殿羣臣獻酒畢命蒙古親王等至

御座前授爵賜飲其餘王貝勒以下令侍衛等

分觴授飲諸樂竝作以昭盛典○諭理藩院

皇考大事三年禮成茲朕初慶元旦外藩王貝

勒貝子公額駙台吉塔布囊及使臣等俱應

賞賜阿霸垓貝子德木楚克翁牛特貝子鄂

齊爾科爾沁公烏爾呼滿爾台吉小鄂齊爾

等俱係年老之人著從優賞賜○乙未召內

大臣滿漢大學士尚書侍郎八旗都統副都

統內閣學士內廷翰林等賜宴於乾清宮

上諭曰今日君臣同堂合宴海宇承平上下和

樂皆我

聖祖仁皇帝深仁厚澤之所留貽也豈能暫忘

思慕之情豈敢稍弛警惕之念乎朕之才德

遠不及我

皇考今萬幾殷繁一人識力有限用是朝乾夕

惕晷刻靡寧仰惟

祖宗付託之重下念萬民待澤之殷全賴爾諸臣同心一德輔佐朕躬使庶政無不就理兆民無不被澤以成熙熙皞皞之風此朕所深望也夫移風易俗端於大臣是賴自古人臣之誼公爾忘私不可有游移瞻顧之心黨援朋比之習每見徇私不法之人好爲夤緣互相請託揆之於義則請託實爲可羞而度之於命則請託究屬無益且積習相沿遂成風俗既爲子弟親戚營求作弊是教之不以正矣何足爲其師範徒使子弟親戚有所恃以無恐終歸於壞品喪志不能上進其害可勝言哉朕於爾諸臣實以股肱手足一體相視爾諸臣亦當公忠體國視君上如元首腹心若悠悠忽忽安於習俗而不知奮發鼓勵爾諸臣自待居何等耶况朕在藩邸閱歷四十餘年人情世態無不周知亦非可以欺隱朦蔽者如年羹堯隆科多營私挾詐深負朕恩不旋踵而事事敗露爾諸臣自度才幹伎倆

未必能如彼二人若營私自便稍有不檢不惟薄待其身兼懼罹於國法尚可立身朝端爲衆人之表率耶從來朋友箴規一言尚當聽受况君上乎朕諄諄誥誡者無非欲爾諸臣各矢公心盡除私意如果能時時仰體朕訓彼此互相勸勉則天下之人觀感變化而風俗盡歸於淳厚爾諸臣之身家子孫亦並受其福矣諭畢隨各頒賜聖祖仁皇帝御批通鑑綱目各一部蟒緞貂皮合包等物○賜蒙古王貝勒貝子公額駙台吉塔布囊等銀幣有差○丙申順天府進春○諭內閣何國宗等所奏運河情形甚爲明晰但督理工程專委之地方官恐其因循遲誤若特差官員前往又恐呼應不靈且不得其人轉滋煩擾朕意將沿河州縣俱揀選賢能之員補用果能實心任事即著加恩議敘似於地方工程均有裨益著九卿速議具奏尋議沿河有應修工程之州縣請令該督撫

會同總河副總河等於所屬州縣官內揀選熟諳河務者保題引見調補如果實心任事著有功績題請議敘以示鼓勵從之○命再發通倉米十萬石運至天津加賑直隸霸州保定等七十五州縣水災饑民○丁酉諭諸王滿漢文武大臣等允禩平日居心詭詐行事乖張從前罪犯多端不可悉數朕不忍執法治罪令其居住西寧望其醒悟改悔乃怙惡不悛詭詐如故其門下親信之毛太佟保將編造字樣之書信縫於驢夫衣襪之內寄往西寧被九門捕役拏獲該提督奏聞朕見體製怪異有類西洋字跡因遣人詢問西洋人據西洋人稱此種字體亦不能識認朕因遣人詢問允禩之子弘暘據弘暘稱去年十一月佟保來京我父親寄來格子一張令我學習照樣繕寫書信寄去我向佟保學會了因此照樣寫信寄往等語從來惟敵國之人差遣姦細往來偷傳信息造作隱語防人知

覺允禩在彼朕何曾禁其寄書亦未禁其往來之人若果安分守法則所寄書無不可以令人共見何至於別造字體巧編格式暗藏衣襪之內居然為敵國姦細之行耶前朕見允禩諸子中惟弘暘尚覺老實故留京料理伊之家務不料其詭譎亦如此允禩名下應賠公項銀十三萬兩有零乃假作窘迫之狀百計遷延而以所得揆敘之銀數百萬兩帶往西寧恣意費用凡市買物件不論貴賤隨人索價即如數與之以此要結人心不知意欲何為即今毛太家中搜出借券八十餘紙其借與衆姓之銀至十萬餘兩則允禩之窘迫與否不問可知矣又如從前楚宗至彼宣旨允禩站立不跪自稱出家離世之人今觀造作字樣暗通書信等事出家離世之人顧如是乎允禩寄與弘暘書擅用硃書弘暘書信中稱伊父之言為旨意種種不法之處昭然又如允禩曾寄信允禩有事機已失之語

洵足駭人聽聞當時幸邀

天

祖

皇考之靈伊等不得肆其姦謀乃伊等之福儻若機會不失伊等首領尚得保乎毛太佟保六雅圖那丹珠雲敦克什圖俱係允禔親信之人允禩允禔允禔等匪黨固結人所共知佟保豈有不知之理昨將佟保等從出兵處撤回朕面下旨意詢問允禔若有冤抑之處

著即陳辯若實在行止妄亂亦著啓奏竝問伊等或仍願在允禔處或不願在允禔處亦據實啓奏伊等僉稱允禔行止妄亂我等願爲朝廷出力等語朕因其陳奏是以各授官職今允禔造作字樣行踪詭秘伊等竟不奏聞情實可惡著將毛太佟保等交與順承郡王及蔡瑛拉錫阿齊圖查郎阿高其佩常明公同審訊其允禔未往西寧以前之事朕不究問自到西寧以後如何妄爲及何人管理

此等書札之事俱令據實供明若仍隱匿不行供出立將伊等正法○以原任工部右侍郎年希堯爲內務府總管正黃旗蒙古副都統永福署內務府總管○戊戌上御西暖閣召入諸王貝勒貝子公滿漢文武大臣等諭曰今日凡我宗親及滿漢大臣齊集於此廉親王允禩狂悖已極朕若再爲隱忍有實不可以仰對

聖祖仁皇帝在

天之靈者朕在藩邸時居心行事公正無偏諸兄弟待朕亦皆恭順不敢存欺慢之念平日原無一毫嫌隙此爾等所共知亦允禩所深悉者朕今日紹登大位以天下一家萬物一體爲心豈於兄弟之間反生芥蒂有所刻求苛索耶當時允禩希冀非望欲沽忠孝之名欺人耳目而其姦險不法事事傷

聖祖仁皇帝慈懷以致忿怒鬱結無時舒暢康

熙四十七年冬

聖祖仁皇帝聖體違和令朕同允祉允禩檢點醫藥凡立方合劑朕與允祉每日悉心商酌允禩惟同允禔允禵促坐密語醫藥之事曾不一問不過以藥笥收拾方帖而已

天佑

聖躬旋即痊愈朕心喜慰向允禩云

皇父聖體大安矣允禩云目前

聖體雖愈將來之事奈何朕聞之不勝駭愕又是年二阿哥有事時

聖祖仁皇帝命朕同允禩在京辦理事務凡有

啓奏皆蒙

御批事竣之後朕將所有

御批奏摺交與允禩收貯後向允禩問及允禩

云前在遙亭時

皇考怒我恐有不測比時寄信回家將一應筆

札燒燬此

御批奏摺藏在佛櫃內一併焚之矣此允禩親

向朕言者康熙六十一年

聖祖仁皇帝龍馭升遐命朕繼承大統朕念允禩素有才幹諒伊此時自應仰體

皇考之心痛改前非爲國家實心出力故令其同怡親王及隆科多馬齊四人總理事務次日即加封親王朕事事推心置腹信任之專恩誼之厚此舉朝所共知者乃於封伊親王之日伊之妻黨往賀伊妻云有何喜可賀恐不能保此首領耳其言怪誕若此則平日之居心可知矣允禩總以未遂大志時懷怨恨詭詐百出欲以搖惑衆心擾亂國政其管理工部也

皇考梓宮奉移

山陵允禩明知舊例用夫二萬乃故以裁減奏請若非大學士奏明幾誤大事又將京中運送

陵寢所用之紅土議令發銀彼處採買可省腳價欲加朕以輕

陵工而重財物之名安奉祝版之案則朽爛破

損製造軍需之器則單薄鈍敝至於乘輿法  
物則斷釘薄板草率不堪更衣幄次則油漆  
薰蒸刻不可近其管理理藩院也以科爾沁  
台吉爲糜費口糧於邊口攔阻令不得拜謁  
皇考梓宮致蒙古等涕泣而歸怨聲載道若非  
拉錫奏聞隨經降旨開示幾寒衆蒙古之心  
矣其管理上駟院也奏稱馬圈牧馬太多請  
行裁減大半以省錢糧其意欲以彰  
皇考糜費無益之名歸之於朕且欲使馬匹不  
足將來設有緩急無所取資也至於妄費財  
物固結私人如岳周鑽營姦究之徒乃國家  
之蠹允禩以數千金助其爲非亂法其他顛  
倒是非肆行欺罔及傲慢不敬之處更不可  
悉數又雍正元年朕命莽鵠立恭寫  
聖祖仁皇帝御容朕於養心殿瞻拜時悲痛號  
泣允禩奏云從來帝王有供奉御容之禮否  
今供奉

聖祖仁皇帝御容則

太祖

太宗

世祖如何供奉朕沐

皇考四十餘年養育深恩時時瞻仰

天顏今遭大故悲思罔極是以供奉

御容冀得時時瞻拜而允禩以朕爲非禮又云

伊從前亦供奉母妃容像自

聖祖仁皇帝賓天之後即行收捲此言更不知

其何心也允禩從前遭伊母妃之喪欲沽孝

名故作哀毀之狀百日後尚用人扶掖而行

及遭

皇考大事全無悲戚之意以

父母之喪而前後迥異如此其意將誰欺乎三

年以來朕百凡容忍寬免諄諄訓誡猶冀其

悛改前愆宗人府及諸大臣交劾議罪之章

什伯累積朕俱一一寬貸乃允禩詭譎陰邪

日益加甚雍正三年十月在朕前奏稱內府

披甲食糧之人可以裁減每一佐領只應留



二十四名。朕令會同確議。允禩又奏一佐領下應增甲九十餘副。前後之語大相矛盾。不過欲邀結人心。沽取名譽。加朕以刻薄之名耳。及內府佐領之人。齊集伊門。囑開朕令伊查出爲首之人。以便正法。伊將並非爲首之人。混行指出。欲令朕枉殺無辜。快其私忿。其門下從實吐供之九十六伊。即登時杖斃。又因伊親信太監閔俊。爲伊隱瞞素行不法之事。特賞銀二百兩。及冬夏衣服。緞疋等物。朕雖尊居九五。從不敢罰一無罪之人。至於賞賜內侍太監。亦從未有如允禩賞閔俊之厚者。允禩以人臣而專賞罰之權。抗違國家之法。其罪可勝言乎。朕以其狂妄悖亂。包藏禍心。是以令宗人府訊問。從前何得將皇考御批焚燬。允禩頓改前言。奏稱因抱病昏迷。誤行燒燬等語。及朕面質之。伊公然於朕前設誓云。若有虛言。一家俱死。及宗人府審訊伊管事親信之太監常海等。俱供稱昔年

允禩在遙亭獲罪於

聖祖仁皇帝。特遣太監劉自成回京。將所有一切筆札燒燬。是時

聖祖仁皇帝御批亦在其內。供認鑿鑿。而允禩反覆其詞者。緣其平日與姦黨往來書札。皆不可告人之語。今欲掩其燒燬私書之跡。故竝此亦復隱匿不承。此確實萬無可辯之事。竟敢指天誓日。不畏天地鬼神。已盡喪其良心。至於一家俱死之語。伊向日曾在朕前設

此誓詞。朕諭之曰。一家二字所指者廣。獨不思及朕耶。今復於諸王大臣前重設前誓。明係咒詛。是允禩心中將

祖宗君上。悉行蔑棄矣。允禩既自絕於天。自絕於

祖宗。自絕於朕。宗姓內豈容有此不忠不孝大姦大惡之人乎。從前

皇考曾諭諸王等。允禩姦險詭詐。結黨設謀。欲弑皇太子。今事俱敗露。見在交審。是時允禩

允禩在側獨挺身保奏允禩竝無此意因致  
皇考震怒拔刀欲誅允禩恒親王等勸止將允  
禩責懲并允禔逐出又

皇考曾於乾清門諭諸王大臣曰自朕廢皇太  
子後允禩百計邀取美名盡惑衆人希圖冊  
立私結黨援其意叵測又奉

皇考諭旨朕駐蹕遙亭允禩以將覽之鷹來進  
口稱伊在湯泉等候進京竝不請旨擅行獨  
斷藐視朕躬朕因震怒心中寒戰幾乎危殆  
允禩自姦人張明德妄相伊有人君之貴伊  
遂不守臣節招集惡黨謀弑皇太子及大阿  
哥此舉國所知者其欲謀弑之時未知置朕  
於何地也又

皇考諭旨云朕與允禩父子之恩絕矣以上  
諭旨數道昭然具在凡爲臣子者不忍聽聞朕  
從前欲行發出允禩痛哭叩首再三懇求朕  
以其惟恐人知之念尚有愧悔之機故爾暫  
止今其作爲至此斷不可留於宗姓之內以

爲我朝之玷謹將

皇考諭旨發出朕撰文祭告

奉先殿仰體

列祖嚴懲姦惡之心祇遵

先朝削籍離宗之典將允禩黃帶子革去以嚴

宗牒以儆兇邪以爲萬世子孫鑒戒至允禔

蘇努吳爾占結黨搆逆靡惡不爲允禔中懷

悖亂其往來私書有事機已失悔之無及等

語聞者皆爲髮指今又造作字樣密傳信息

行同姦細視朝廷爲敵國無父無君不法已

甚蘇努積惡巨猾罪狀彰著舉國所知吳爾

占既素與允禩等比匪爲姦又且行止鄙劣

心懷怨望此三人者亦斷不可留於宗姓之

內著將允禔蘇努吳爾占革去黃帶子并令

宗人府將允禩允禔蘇努吳爾占名字除去

○又諭朕即位後恭檢

皇考所遺硃批諭旨內有料理宮闈家務事宜

一紙

皇考諭令有子之妃嬪年老者各隨其子歸養府邸年少者暫留宮中。朕謹遵

聖諭遣人詢問諸位母妃咸願隨子歸邸。慧妃母妃乃大阿哥之生母允禩之慈母也。允禩少時即爲慧妃母妃所撫養朕因大阿哥獲罪禁錮其諸子又少不知事意欲奉養於允禩之邸因遣人詢問慧妃母妃慧妃母妃欣然允從朕揣允禩畏朕訪察必於母妃前盡禮故令伊迎養府邸彼時允禩酌議諸位母妃移府之禮允禩議奏內有朕思念諸位母妃之時即令入宮相見等語朕以諸位母妃豈有召入相見之禮深責允禩之非迄今三年以來諸位母妃未曾遣人至朕前一問起居諸位母妃深居府中一切皆諸王主持此必允禩從中阻撓諸王亦遂觀望不前耳允禩之行事狂悖若此必不能於母妃之前曲盡孝道况允禩既經革去黃帶子則已非宗姓之人母妃亦不應在伊家居住著莊親王

誠親王迎歸宮中供養○諭吏部等衙門部院大臣以司官爲臂指今各部院司官筆帖式內有行走懶惰經年不到衙門者有庸劣不能辦事者有不能寫字僱人繙譯者有奔競鑽營招搖生事者其本衙門堂官不能盡知即有見聞或有瞻徇掣肘姑且優容今著爾等司官將本司之筆帖式分別勤惰優劣據實奏明所舉當否許筆帖式公同面質其司官內不可共事之人亦著同司官并筆帖式據實面奏毋得稍有瞻徇○己亥調四川布政使羅殷泰來京陞兵部郎中佛喜爲四川布政使司布政使監察御史何錫祿爲湖南按察使司按察使○山東巡撫陳世倌摺奏去年山東歷城等四十三州縣五衛所偶被水災其應納漕糧業經奉旨緩征復將存倉米穀借給窮民臣恐隆冬民食不周先於省城及德州一帶設立粥廠續於聊城茌平等十縣各設粥廠如有外省饑民到境一體

賑濟以廣仁恩得旨據奏務令窮黎咸各得所無一人向隅方愜朕懷舉凡可以安全保綏之術汝力所不逮第據實奏聞去歲各省俱慶豐稔惟直隸山東歉收直隸料理甚妥諒未必有流移至山東之民汝但能撫恤本省百姓不致遷離失業則亦可告無愧矣○  
庚子

世祖章皇帝忌辰遣官祭

孝陵○辛丑祈穀於

上帝

上親詣行禮○諭大學士等允禩等不可留於宗姓之內此朕灼知確見者今撰文告祭奉先殿可將祭文宣示諸王大臣等或朕之所見如此而仰體

列聖之心稍有不慊諸王大臣不妨直言各出所見回奏此事關係重大朕既切加詢問諸王大臣等若有所見而不直行陳奏則大不忠矣尋諸王大臣等覆奏允禩等逆天犯法

歷有確據臣等咸所深悉昭告

奉先殿除其宗籍實爲允協○癸卯諭內閣朕於文武官員赴任之初俱召入內廷諄諄訓誨無非欲其實心供職愛養兵民而伊等承旨之後出外私相傳播記載或記憶不全或粉飾太過以致錯誤之處甚多此等處大有關係是以朕特降諭旨令伊等繕寫呈覽其遺忘不能記載者即不必書寫進呈若官職不應奏事者則從該管上司彙集乘便轉奏近見數處繕寫進呈者或意指錯誤或言詞粗率且備開頒賜之物竝述伊等奏對之言如此則與朕令寫上諭之本意全不相符若一一發還令其更改則不勝其煩是以姑且存置竝非謂伊等繕寫合式也昨有廣東總兵官因屬員一人奏摺特行齎送未免煩瑣嗣後督撫提鎮等當遵旨彙集乘便啓奏其記憶不全者停其書寫進呈亦不得私自傳播記載錯誤失實自干罪戾至於朕召見文

武官員時。每頒賜物件。蓋欲其捧至任所。觸目警心。竝思朕訓誨之諄切。非專以此賜賚。爲鼓舞激勸之具。夫人臣事君。自有應盡之道。應修之職。豈在賜賚之有無多寡。若專以賜賚爲鼓舞。是以胥吏走卒。視文武官弁矣。豈朕優待臣工之至意乎。恐無識之人。不知朕心。并諭令知之。○甲辰。以病假正藍旗滿洲都統公音德。仍管理原官事務。○乙巳。諭戶部。據兩淮巡鹽御史噶爾泰奏。稱衆商感戴賑恤蠲免之恩。今鹽豐課裕。商業已隆。情願公捐銀二十四萬兩。備交運庫。又噶爾泰名下。有應得銀八萬兩。亦願報部撥解等語。從前兩淮鹽課虧欠甚多。自噶爾泰辦理以來。歷年商欠。正項贏餘。俱一一完納。恤商裕課。鹽政肅清。甚屬可嘉。朕前曾諭令江南督撫。酌議積穀備用。今衆商公捐。及噶爾泰奏請解部之項。共計三十二萬兩。著將二萬兩賞給噶爾泰。其三十萬兩。可卽爲江南買貯。

米穀蓋造倉廩之用。所蓋倉廩。賜名鹽義倉。即著噶爾泰交與商人經理。如此則於地方積貯甚爲有益。而衆商急公之項。亦得實濟。噶爾泰著該部從優議敘。其急公衆商行令。噶爾泰分別造冊報部議敘。以示鼓勵。○丙午。孟春享。

太廟。

上親詣行禮。○遣官祭太歲之神。

上幸圓明園。○丁未。以上元節。賜外藩科爾沁。

翁牛特。敖漢。喀爾喀。烏朱穆秦。阿祿科爾沁。阿霸垓。巴林。扎魯特。吳喇忒。索曼。蘇尼特。四子部落。鄂爾多斯。喀喇沁。高齊忒。郭爾羅斯。厄魯特。土默特。和托輝特。輝特。青海。厄魯特。阿霸哈納。杜爾伯特。毛明安。王貝勒。貝子。公。額駙。台吉。塔布囊等。及內大臣。大學士。侍衛等宴。○戊申。賜外藩王。貝勒。貝子。公。額駙。台吉。塔布囊等。及內大臣。大學士。侍衛等宴。○壬子。大學士九卿等。合詞奏。奏允禔性情乖。

張行止狂悖素與廉親王允禩及允祹允禔固結匪黨舉國盡知所犯罪愆難以悉數向曾寄書允祹竟有事機已失悔之無及等語在廷諸臣聞之無不驚駭憤怒乃蒙

皇上天恩曲加寬宥仍令安住西寧冀其改悔而允禔執迷不悟私帶多金欲以邀結彼地之人心於市買物件時不論貴賤隨人索價即行給與又如楚宗到彼宣旨允禔不迎不跪且口稱出家離世種種怨望之言我

皇上仍復包涵不行治罪允禔自應感恩悔過痛改前非不意狡獪如前詭譎益甚又復別造字樣巧編格式縫於驛夫衣襪之內傳遞往來竟同於敵國姦細之所爲且

皇上御極以來竝未禁其書信人役之往還允禔若果能安分守常無邪謀異念何以行踪隱僻書信秘密一至於此誠爲人心所共憤國憲所不容臣等爲此合詞叅奏仰請

皇上乾斷將允禔嚴加治罪以爲人臣不忠不

孝詭詐妄亂之戒得旨爾等題叅允禔一事著交與允禩允禔議處具奏允禔未在此處著於學士內或侍讀學士內派出一明白之人將此事持往允禔處令其看閱議覆著各出意見陳奏勿得互相商酌○靖逆將軍富寧安疏奏哈密塔爾沁等處屯田收穫青稞二千一百石有奇下部知之○癸丑諭大學士等今日朕坐勤政殿以待諸臣奏事乃部院八旗竟無奏事之人想諸臣以朕駐圓明園欲圖安逸故將所奏之事有意簡省耶朕因郊外水土氣味較城內稍清故駐蹕於此而每日辦理政事與宮中無異未嘗一刻肯自暇逸已曾屢降諭旨切告廷臣令其照常奏事若朕偶欲靜息自當曉諭諸臣知之儻廷臣不知仰體朕心將陳奏事件有意簡省是不欲朕駐蹕圓明園矣又見各衙門奏事有一日擁集繁多者有一日竟無一事者似此太覺不均以後八旗定爲八日各分一

日輪奏部院衙門各分一日輪奏六部之外都察院與理藩院爲一日內務府爲一日其餘衙門可酌量事務之多寡附於部院班次每日一旗一部同來陳奏則朕每日皆有辦理之事而不來奏事之大臣又得在京辦理誠爲妥便至朕聽政辦事各官齊集之日原不在輪班奏事之數次日仍按班次前來若該部院衙門輪班之日無事可奏其堂官亦著前來恐有召問委辦之事亦未可定其緊要事件仍不拘班次即行啓奏○甲寅諭大學士九卿等隆科多深負朕恩種種罪惡應置重典但伊辦事之才尚屬可用見今與策妄阿喇布坦將阿爾泰嶺定爲邊界之事甚屬緊要差往彼處官員計已將回應預爲詳審地勢明晰定議今已派出額駙策凌貝勒博貝散秩大臣伯四格護軍統領喀爾吉善前去著隆科多一竝同往至阿爾泰嶺再由空鄂羅東至楚庫拜姓地方詳察地勢公同

定議具奏再由楚庫拜姓之東額爾古納以至黑龍江之源舊定邊界亦未清晰俟阿爾泰事竣隆科多即從彼處前往楚庫拜姓將此等地方亦詳審定議見今鄂羅斯國爲定邊界之故差使前來隆科多候伊使臣到日即將定邊界之處會同議結此事隆科多非不能辦者伊若實心任事思蓋前愆朕必寬宥其罪若心懷叵測思欲僨事所定邊界不合機宜於策妄阿喇布坦鄂羅斯地方生事朕必將伊治罪○以正藍旗漢軍都統希爾根署理鑲白旗滿洲都統鑾儀使董象緯署理正藍旗漢軍都統○議敘進藏功給前鋒叅領滿丕拖沙喇哈番世職○乙卯諭吏部禮部原任禮部尚書顧八代品行端方學術醇正昔蒙

皇考簡用服官有年當征勦吳逆時以學士協贊軍務從將軍莽吉圖賴塔等克復粵西滇南勞績茂著備承

恩眷擢授秩宗。且深知其品學優長。足爲模範。特命爲朕兄弟之師。朕自幼與共朝夕。講論忠孝之大義。研究經書之至理。肫誠周至。獲益良多。嗣以公事註誤罷職。仍在內廷課讀數載。後因抱疾。遂就閒居。於戊子之冬。物故。是時朕親臨其喪。竝遣人經理殯葬。本欲陳情於

皇考之前。求加恩賜卹。適值

聖體違和。不敢瀆奏。迄今回憶當年誦讀情景。

宛然如昨。老成舊學。時眷於懷。應加優贈。卹以展朕篤念師資。酬獎前勞之至意。爾部會議具奏。尋允部議。顧八代復還尚書原職。加贈太傅。予全葬。致祭一次。謚文端。○甘肅巡撫石文焯題岷州衛土司馬天驥故請以其子馬繡承襲。下部知之。○丙辰工部議覆奉差勘河內閣學士何國宗疏言。山東運河必賴湖水。以濟輸輓。請將安山湖開濬。增築湖隄。再南旺湖馬踏湖。蜀山湖馬場湖諸隄。及

關家壩。俱應加高培厚。建築石閘。以時啓閉。其分水口兩岸沙山之下。各宜築束沙壩一道。又汶水之南有戴村壩。應加修築。再建坎河石壩於汶水之北。河南運河自百泉而下。歷仁義禮智信五閘。過水旁注。愚民不無截流盜水之弊。請將五閘拆去。於泉池南口建石堰一道。開三口門。分爲三渠。又建築小隄。使無旁洩。東西各開一渠。渠內照舊各建五閘。分灌民田。再小丹河自清化鎮上下開廣挑深。建築小隄。河東一里。開一水塘。建石閘三座。分爲三渠。小丹河爲官渠。東西各開一渠。爲民渠。其洹河舊有石壩。皆已堙廢。民間自築土壩。過水灌田。請將舊石壩修五丈。爲挑水壩。至於諸河泉源。各開深廣。使其入衛通流。查東省豫省河道關係重大。各項工程。應令總河副總河。山東河南巡撫逐一查明。確估具題。到日再議從之。○丁巳諭吏部兵部。凡官員任內。或有降革事故。及承追督催。



未完案件若一概不准保題則賢能必致遺漏嗣後有事故官員仍准保題著該督撫提鎮於保題本內將所有事故一一聲明具奏候朕調來引見再行定奪○陞翰林院侍講學士陳萬策爲詹事府詹事○都察院左副都御史梁文科緣事革職陞通政使王沛懽爲都察院左副都御史○陞鑲白旗滿洲副都統哈書爲大理寺卿○陞鑲白旗滿洲副都統哈岱爲本旗護軍統領○兩廣總督孔毓珣題廣西泗城土知府岑齊岱故請以其子岑映宸承襲下部知之○戊午以翰林院修撰鄧鍾岳提督江蘇學政○己未陞內閣侍讀學士通智爲大理寺卿○戶部等衙門議覆陝西道監察御史覺羅勒因特疏奏欲杜私燬制錢之弊必先於銅禁加嚴康熙二十三年大制錢改鑄重一錢彼時即有姦民私燬迨四十一年每文仍重一錢四分而錢價益復昂貴皆由私燬不絕制錢日少故也蓋以銀

一兩兌大錢八百五十文約重七觔有餘製造銅器可賣銀二三兩即如煙袋一物雖屬微小然用者甚多燬錢十文製成煙袋一具輒值百文有餘姦民圖十倍之利安得不燬請敕步軍統領五城順天府嚴行禁止等語查康熙十八年已嚴銅器之禁三十六年又定失察銷燬制錢處分之例而弊仍未除者以但禁未造之銅其已成者置之不議也臣等酌議欲杜銷燬制錢之源惟在嚴立黃銅器皿之禁今請紅白銅器仍照常行用其黃銅所鑄除樂器軍器天平法馬戥子及五觔以下之圓鏡不禁外其餘不論大小器物俱不得用黃銅鑄造其已成者俱作廢銅交官估價給值儻再有製造者照違例造禁物律治罪失察官員及買用之人亦照例議處則私燬之弊可息而於錢法亦有裨益從之○庚申諭刑部允祺誤指內府佐領下人到王府嚷鬧爲首之五人既審無確據豈可枉

行正法內中六十三一犯既到王府又到李延禧家抄搶著監禁議罪其餘竝搶李延禧家人犯俱分發雲南貴州廣西四川等省極邊若係另戶著安插當苦差若原係奴僕著與彼處兵丁爲奴○又諭茲當春令監內人犯宜及早清理其罪輕者速行酌定保釋至年羹堯案內干涉之人犯若尚有未結案者俱著速行完結○以禮部左侍郎阿克敦兼管翰林院掌院事○是日蒙古王貝勒貝子公額駙台吉塔布囊等謝恩

上召入諭曰爾等俱受國家深恩封號優崇非小部落可比爾等在

皇考時或有過被懲爾等毫無怨色及朕嗣位後厄魯特羅卜藏錫拉布等從察哈爾旗分逃去朕之諭旨未到而內外扎薩克等即領兵往追似此竭誠効力始終如一天必加爾多福今爾等歸各宜盡心養育屬下之人俾得各遂其生朕心滋爲喜悅特諭爾等知之

○辛酉諭諸王大臣等允禩愈加悖逆將朕所交之事毫不實心効力每事敗壞不但伊姦詐多端伊妻更屬殘刻允禩平日甚畏之戊子年

聖祖仁皇帝御乾清門曾

特降諭旨云允禩之妻殘刻皆染伊外家安郡王惡亂之習幾致允禩絕嗣伊妻聞之恐懼方容允禩收女婢一二人僅生一子一女朕即位以來於允禩無恩不施無事不教乃允禩終懷異心竝不悛改未必非伊妻唆使所致朕將允禩晉封親王時伊妻外家向伊稱賀伊云何喜之有不知隕首何日等語是誠何語是誠何心朕屢降嚴旨與允禩之妻又令皇后面加開導諭伊勸諫允禩感激朕恩實心効力乃屢次訓教允禩夫妻毫無感激之意伊等惡跡昭著允禩之妻亦不可留於允禩之家我朝

先世曾有舊例信郡王敖扎之妻因欺侮其王

聖祖仁皇帝曾令休回外家禮親王福金殘刻太祖高皇帝特遣王等將伊處死今爾等前去將朕諭旨降與允禩之妻革去福金休回外家降旨與伊外家人等另給房屋數間居住嚴加看守不可令其往來潛通信息再將此旨降與允禩嗣後伊若痛改其惡實心効力朕自有加恩之處若因逐回伊妻懷怨於心故意託病不肯行走必將伊妻處死伊子亦必治以重罪○刑部等衙門議奏隆科多挾勢婪贓差家人王五牛倫陸續索取揆敘家人安圖名下騾馬緞疋古玩等物併銀十四萬兩此外復收取趙世顯滿保甘國璧蘇克濟程光珠姚讓張其仁王廷揚年羹堯等金八百兩銀四萬二千二百兩隆科多世受國恩貪婪犯法應將尚書一等公竝世職俱行革去照大不敬律擬斬立決得旨隆科多婪贓犯法即應按律治罪但其才尚有可用朕心憫惜著革退吏部尚書令其料理阿爾泰

等路邊界事務已另降諭旨僅能盡心辦理尚可贖其前愆如稍有怠忽定難寬貸伊家人牛倫從前犯罪應死彼時交與隆科多自行處置乃隆科多徇私容留實屬可惡今招搖受賄諸事又復敗露再難寬宥著將牛倫即行正法其餽送銀兩之奉天府府丞程光珠著革職從寬留任淮徐道張其仁濟南府知府姚讓著調來引見○壬戌命增給五城飯廠米石并於東直西直安定右安廣寧五門增設飯廠以惠窮民○癸亥諭大學士等各倉米石平價發糶原欲與窮民有益今聞清河本裕倉發糶米石姦胥惡役串通鋪戶賤買貴糶此倉賣完又領別倉發賣是為富戶生利也殊屬可惡倉場侍郎所司何事嗣後如有此等情弊務將監糶官員正法倉場侍郎嚴加治罪○又諭近日米價漸貴兵丁米糧支放不必待至三月著倉場侍郎於二月初十日起即行支給○賑河南汝州延津

等十八州縣水災饑民河南巡撫田文鏡  
疏報睢州陳留等二十三州縣開墾雍正二  
年分田地二千八十頃有奇下部知之

大清世宗敬天昌運建中表正文武英明寬仁  
信毅大孝至誠憲皇帝實錄卷之四十

大清世宗敬天昌運建中表正文武英明寬仁  
信毅大孝至誠憲皇帝實錄卷之四十一

敕修

雍正四年丙午二月甲子朔調兵部尚書孫

柱爲吏部尚書仍兼理兵部事務陞都察院

左都御史法海爲兵部尚書吏部右侍郎福

敏爲都察院左都御史調刑部左侍郎綽爾

岱爲吏部右侍郎實授海壽爲刑部左侍郎

○調靖逆將軍富寧安來京陞見以領侍衛

內大臣鑲藍旗蒙古都統辦理甘州事務查

克旦署理靖逆將軍印務歸化城右翼副都

統伊席泰辦理甘州事務○調黑龍江將軍

陳太來京以內大臣公傅爾丹署黑龍江將

監修如故官光祿大夫經筵講官太僕寺卿大學士兼兵部尚書總理兵部事務等伯十五級止郭爾泰  
加散官光祿大夫經筵講官起居注太僕寺卿大學士兼兵部尚書總理兵部事務等伯十五級止郭爾泰  
三等伯加十三級止郭爾泰王光祿大夫經筵講官起居注太僕寺卿大學士兼兵部尚書總理兵部事務等伯十五級止郭爾泰  
翰林院掌院學士加二級止郭爾泰光祿大夫經筵講官太子太傅兼同大學士兼禮部尚書加六級止徐本光祿大夫  
經筵講官兼議政大臣協辦內閣大學士事務經筵講官尚書仍兼吏部尚書等伯十五級止郭爾泰

軍○湖北巡撫法敏疏報漢川等四縣開墾雍正二年分田地二百七十五頃有奇下部知之○乙丑

上回宮○諭大學士等副總河嵇曾筠料理河工。往往慮及後患。預先陳奏一二語。以爲將來卸過之地。如去年謗咎於屬員。朕已切加申飭。今年河道險工下移。朕已降旨。諭令早爲防禦。今挑汛將屆。嵇曾筠始奏稱相度情形。近來險勢下移。必須先事預防。又稱加幫

大隄。因河臣未到。尚未收工。或有雨淋坍塌之處。似此皆預留地步。以便將來卸責。況江南睢寧漫口。與此無涉。何得借以爲詞。可行文嵇曾筠嚴行申飭。武陟等處險工。既移於祥符蘭陽等處。著嵇曾筠移駐緊要地方。以便督工保固○丁卯遣大學士田從典祭先師孔子○諭八旗大臣等。今年直隸雨水過多。二麥收穫與否。尚未可知。因此京師米價騰貴。朕特降旨。將三月應領米糧。令其於

二月支放。乃聞八旗兵丁。冀得善價。將所領之米。盡皆糶賣。將來必致乏食。再復倍價糶買。則伊等生計。仍覺艱難。爾等將此曉示兵丁。嚴加禁約。務令存留食米。無得多糶○戊辰祭

大社

大稷

上親詣行禮○己巳

上幸圓明園○諭宗人府。允禩既革其宗室。授

爲民王。不可照宗室諸王例。留所屬佐領人員。凡有朝會之處。俱照民公侯伯例。交旗令其稽查各處。俱著書寫親王允禩○以吏部尚書孫柱。兵部尚書法海。爲繙譯鄉試正考官。禮部左侍郎阿克敦。刑部郎中憲德。爲副考官○加江南提督魏經國。尚書銜。並給拜他喇布勒哈番世職○庚午。諸王大臣等合詞。參奏允禩不孝不忠。悖亂姦惡。請即行正法。以彰國典。

上御勤政殿

召諸王大臣及允禩入諭曰爾諸王大臣等合詞叅奏允禩請即正典刑允禩乃

皇考之子

太祖

太宗之孫朕之弟也今日之舉我

列祖

皇考在

天之靈實昭察於上儻允禩不應正法而爾等

妄行陳奏以殘害

列祖

皇考之子孫而陷朕於不義爾等之罪尚可逭乎朕思爾等公同具奏時或有隨衆列名而不出於中心之誠者故特召入面加詢問若有以允禩爲不當正法者可出班另跪於右朕今日如此詢問儻衆人中猶有心口相違不肯據實陳奏者

列祖

皇考在

天之靈必加誅殛諭畢諸王大臣等回奏允禩悖倫亂政罪狀多端按之國法應正典刑諸臣實無異辭

上曰諸王大臣引據大義欲正國法所奏亦是但朕曾降諭旨斷不治允禩之罪即今令允禩離宗亦因伊將確實之事於諸臣前指天發誓詛咒一家不獲善終難以存留宗室之中此萬不得已所致耳朕本意斷不將允禩治罪此所奏知道了允禩之妻朕再詳酌另降諭旨○諭大學士等去年近京地方雨水稍多收成歉薄窮民乏食朕心軫念即令蠲免錢糧發通倉米四五十萬石徧行賑濟又念失業之民覓食來京者多故於五城飯廠兩次加添米石又於五門增設飯廠五處俾窮民得以養給但目前雖逐日散賑究非長策春氣漸暖正宜播種此等窮民不得早還故土必致有誤春耕應如何設法資送或由

陸路或由水路俾得各回原籍復其本業○以世子弘昇總理鑲白旗三旗事務○命查上三旗包衣佐領下護軍校驍騎校及八旗護軍校驍騎校等有食糧三十年者列名奏聞○辛未理藩院奏青海親王察罕丹津等起程北歸日期得旨察罕丹津等既欲於十一日起程著初十日至圓明園陛見伊等俱因青海之亂被賊搶掠此時回去恐牲口盤費不足著將內庫銀各賞給一千兩○壬申諭內閣安民必先弭盜而捕盜之法在於速拏聞有交界地方失事盜賊竄匿鄰境有司以地非管轄不便徑拘必用文移關提添差緝拏以致需遲時日聞風遠颺即使日後拏獲而賊已花銷懸案不結凡係地方官均有弭盜之責何分此疆彼界嗣後交界地方失事探實賊盜藏匿之處無論隔縣隔府隔省一面即行密拏一面移文關會拏獲之後仍報明所在該管地方官添差移解儻捕役借

端誣害良民照例從重治罪各該有司務須協力稽查使姦宄無可潛藏以副朕息盜安民之至意○頒賜在京各衙門御書扁額宗人府曰敦崇孝弟內務府曰職思總理吏部曰公正持衡戶部曰九式經邦禮部曰寅清贊化兵部曰整肅中樞刑部曰明刑弼教工部曰敬飭百工鑒儀衛曰恪恭與衛通政司曰慎司喉舌大理寺曰執法持平理藩院曰宣化遐方提督九門步軍統領衙門曰風清輦轂太常寺曰祇肅明禋太僕寺曰勤字天育光祿寺曰敬慎有節國子監曰文行忠信鴻臚寺曰肅贊朝儀欽天監曰奉時敬授順天府曰肅清畿甸倉場總督衙門曰慎儲九穀○戶部議覆雲貴總督高其倬疏言滇省鶴慶府鄧州騰越嵩明三州太和浪穹二縣土軍丁賦銀共九百餘兩此項軍丁並非承種軍田之丁緣前明嘉靖萬曆間安酋鐵鎖箐等夷人先後作亂暫撥民人協

防隨立太和所。鳳梧所等名目。每丁徵銀一兩。是伊等既納民賦於本籍。又輸軍賦於防所。流弊相仍。至今未革。查滇省民丁。每丁納銀五錢。至一錢不等。屯丁每丁六錢。至二錢不等。獨此項軍丁。徵銀多至一倍。而又身充二賊。誠爲苦累。請永行豁免。應如所請。從之。

○工部議覆。副總河嵇曾筠疏言。豫省衛河水勢奔瀉。河底俱係浮沙。隨挖隨淤。創淺無益。請於汲縣。濬縣。湯陰。內黃等處。築草壩二十六座。其直隸大名縣張兒莊。亦建築草壩一座。首尾接應。以濟漕運。應如所請。從之。

○癸酉。諭諸王大臣等。貝子魯賓。在西寧時。諂媚允禩。允禩曾遣伊屢次寄書與允禩往來。同謀姦宄。今在衆人前詢問時。魯賓仍感允禩之恩。朦混具奏。理應即行正法。但伊父止一子。伊又無子。若將伊正法。必致斷絕其嗣矣。朕不忍絕人之嗣。魯賓著從寬免死。竝伊妻妾。俱著監禁高牆。○命將允禩在宗人府

看守。尋命圈禁高牆。著總管太監派老成太監二名。在內隨侍。○諭大學士等。凡違禁偷創封禁礦砂等律。漢人發邊衛充軍。旗人解部枷責。朕思發遣治罪。滿漢應同一律。從前定例。將徒流等罪之旗人。改折枷責。今可否更改。與漢人畫一之處。著大學士會同八旗都統。及滿洲漢軍之九卿。確議具奏。○以詹事府詹事陳萬策。署日講起居注官。○予故理藩院額外侍郎鄂賴祭葬如例。○甲戌。

孝康章皇后忌辰。遣官祭。

孝陵。○諭大學士等。直隸近京地方。去歲被水歉收。朕已疊沛恩膏。毋使失所。其覓食來京者。又復增給米石。添設飯廠。俾窮民得以養給。近因東作方興。令大臣等酌議資送回籍。乃覓食之民。來京者日衆。是必傳聞京師。加恩賑濟。無知愚民。希冀非分之望。舍其耕種之本業。跋涉遠來。則大負朕綏輯窮黎之本意矣。可即傳諭順天府大興。宛平二縣。及近



京地方文武官員。將續來之民。曉諭回籍。目今春氣和暖。其有田可耕者。即當乘時播種。如無田可耕。則各處皆有工程。或修隄岸。或開水利。正需人力。以修土功。伊等回籍。就近傭工度日。不致離棄鄉井。轉徙外方。實爲謀生善策。可嚴切諭令伊等知之。并將此行文直隸總督。○又諭大學士朱軾之母冷氏。壺儀淑慎。訓子成名。今聞在籍病故。深可軫惻。朕優禮大臣。推恩賢母。用頒異數。以示眷懷。著江西巡撫裴率度。動支司庫銀二千兩。賞賜其家。讀文致祭一次。俟朱軾抵家之時。舉行。朱軾查勘水利事竣到京。後著馳驛回籍。○以鑲紅旗蒙古副都統秦布。署鑲藍旗蒙古都統。○宗人府叅奏固山貝子允禩。門下之太監劉玉逃走。並不報部。輒敢違旨。差遣私人往豐潤縣緝捕。擾民生事。甚屬不合。應將允禩革去固山貝子。降一等爲鎮國公。得旨。允禩革去固山貝子之處。著從寬免。○吏

部等衙門議覆。怡親王允祥等疏言。直隸興修水利。請分諸河爲四局。專官管轄。以便稽查。南運河與臧家橋以下之子牙河。垣家口以東之淀河。爲一局。應令天津道就近控制。同知以下等員。受其管轄。永定河爲一局。應將原設之永定分司。改爲河道。駐劄固安。沿河州縣以下等員。聽其管轄。其北運河爲一局。應將原設之分司。撤去。令通永道就近兼理。管河通判等員。悉聽統轄。苑家口以西各淀池。及畿南諸河。綿亘五六百里。經州縣二十餘處。亦爲一局。應將大名道改爲清河道。移駐保定府。所有管河同知。州判以下等員。悉聽管轄。其天津大名兩道。既定爲河道。專司河務。所屬州縣錢糧刑名事務。應各歸該知府考成。通永道所屬永平一府州縣事務。亦歸該知府考成。其通州以下無知府之八州縣。仍令通永道兼管。一應水田溝洫。各該道督率經理。錢糧虛冒。工程修廢。悉歸直隸

總督考核俱應如所請得旨依議速行○理藩院奏厄魯特多羅郡王額駙車零旺布多羅貝勒色卜騰旺布貝子茅海等請與衆一體編分佐領應遣官前往辦理得旨此係編分佐領之事甚屬緊要應遣大臣前往今散秩大臣伯四格等往定阿爾泰山邊界事竣之日即著四格從彼處前往會同副都統花善詳議編分尋議郡王車零旺布貝勒色卜騰旺布貝子茅海俱授爲扎薩克將伊等所屬厄魯特編爲四佐領從之○予故貴州巡撫張謙祭葬如例○乙亥調鑲黃旗滿洲都統覺羅佛倫爲鑲白旗滿洲都統陞左翼前鋒統領鄂善爲鑲黃旗滿洲都統仍兼管前鋒統領事務○陞湖北布政使鄭任鑰爲湖北巡撫湖北按察使王克莊爲湖北布政使司布政使刑部郎中憲德爲湖北按察使司按察使○議政王大臣等議覆據公舅舅隆科多等奏稱臣等驗看寧夏賀蘭山前插漢

拖輝至石嘴子等處寬濶一百里曠野而平其土肥潤籽種俱皆發生其地尚暖易於引水如西河六羊河皆係古舊渠大溝黑龍口倒流河新河黃泥河董家河皆係引水分水之路遺棄年久雖有形迹俱皆沙泥淤塞若修造渠壩及放水之閘兩岸可以耕種萬頃地畝等語又據甘肅巡撫石文焯等奏稱寧夏東北五十里插漢拖輝地方南北延袤百有餘里東西廣四五十里或二三十里不等東界黃河西至西河其地平行可以開墾自鄂爾多斯遷移之後十餘年來小民亦有私墾者必得開渠通水築隄建閘以時啓閉以資灌溉則曠土盡成膏壤今相度地勢自雙廟墩起至六羊河地方計長一百十餘里倣漢唐諸渠法開渠一道建正閘一座攔水閘稍開各一座迎水湃一道又六羊河口與黃河相近之處亦建正閘攔水閘稍開各一座以資蓄洩再自上泗墩起至六羊河岸東距

黃河五里許築隄一道約長一百里可以永禦黃水統計墾田六十餘萬畝等語查插漢拖輝爲漢唐靈州之地當時廣置屯田元至元間置屯田萬戶所明時套夷渡河而西侵占內地葫蘆河之東居民不得耕種遂致廢棄我

朝德洋恩溥番夷臣服鄂爾多斯移歸套內以河爲界插漢拖輝之地久屬版圖今寧夏衛志漢唐二渠之支流有百家良田滿達刺等渠向在插漢拖輝左近若仿其遺迹開渠建閘誠裕國利民之善政但隆科多石文焯等所奏建閘築隄等處情形互異事關久遠臣等難以懸定見今總督岳鍾琪親赴布隆吉爾查看地勢應將隆科多石文焯奏摺並地方畫圖一併交與大理寺卿通智帶往同岳鍾琪前至插漢拖輝等處照圖驗看核議具奏從之○補行廣西省及河南副總河屬員雍正二年分大計卓異官九員不謹官六員

罷軟官四員年老官七員有疾官三員才力不及官三員浮躁官五員分別陞賞處分如例○丙子陞貴州布政使劉師恕爲通政使司通政使江西布政使陳安策爲太僕寺卿福建按察使丁士一爲江西布政使司布政使貴州按察使申大成爲貴州布政使司布政使禮科給事中喬學尹爲福建按察使司按察使刑部郎中存柱爲貴州按察使司按察使○命倉場侍郎再發通倉米二萬五千石運往保定減價出糶以濟民食○予故副都統致仕薩滿達祭葬如例○丁丑

上回宮○免直隸薊州清苑等七十四州縣雍正三年分水災額賦有差○戊寅諭戶部去秋北方多雨直隸所屬七十四州縣被水歉收朕心深爲軫恤疊沛恩澤加惠窮黎已將七十四州縣被災田畝之錢糧照例蠲免其餘應徵額賦又復停徵在案朕思一省之中既有七十餘州縣收成歉薄則必有向鄰封

隔縣謀生覓食之民。當此青黃不接之時。閭閻豈能充裕。若仍照舊徵收民力。輸將未免竭蹶。用是特頒諭旨。施恩於常格之外。將雍正四年通省應徵額賦。一體停徵。俾民力寬紓。各得用力於南畝。以副朕勤恤民隱之至意。爾部即遵諭行。○工部左侍郎薩爾納緣事革職。陞內閣學士常保。爲工部左侍郎。通政使圖蘭。爲內閣學士兼禮部侍郎。江南安徽布政使博爾多。爲通政使。司通政使擢奏事員外郎覺羅石麟。爲江南安徽布政使。司布政使。○戶部等衙門。遵旨議覆嗣後州縣虧空倉穀。應照虧空錢糧例。分別侵蝕。那移二項定罪。其實係倉廩倒塌。雨水滲漏。或年深地濕。成色變爛者。三千石以下。仍照舊例革職留任。限年賠補三千石以上。即照那移錢糧之例。追完治罪。至直省地方。一應虧空倉穀。俱定限三年買補完足。違者從重議處。得旨。所議霉爛倉穀之處。分甚屬未當。凡倉

穀霉爛。皆倉廩不修之故。平日地方官所司何事。以致倒塌滲漏。虧折米穀。此愈當加懲者。今若寬其處分。則有司於倉廩。平日必不加意修理。以便借詞。著九卿再議具奏。尋議嗣後倉廩滲漏及牆壁木植不甚堅完。需費無多者。該地方官自行苦葺。若遇年久廩座木料朽壞。磚瓦破碎倒塌者。即詳明該上司估勘工費。一面報部。一面動支正項錢糧。急行修整。其見在無倉廩者。即詳請建蓋。儻有漫不經心。不及時苦葺。不詳請修理。蓋造以致米穀霉爛者。應照溺職例革職。勒限一年賠補。限內不完。照侵蝕錢糧例。以未完米穀之數。依律治罪。至修理倉廩之後。猶有託名霉爛虧空者。即照侵蝕例治罪。從之。○免湖廣沔陽州沔陽衛雍正三年分水災額賦有差。○己卯諭宗人府。輔國公富增人甚不及皇考用。爲散秩大臣。伊毫無感恩報効之意。朕仍留爲散秩大臣。令其効力行走。伊不但不

肯奮勉且時形退縮前革退賴士公爵時因無可承襲之人始令伊承襲今賴士在軍前行走數年其子伊爾登又甚勤謹竭力行走著將富增公爵革退與伊爾登承襲所撤伊之佐領亦著賞與伊爾登（辛巳春分朝日於東郊）

上親詣行禮○壬午諭內閣大學士朱軾事親最孝今聞伊母在籍病故自必哀痛切至但伊母年已八旬有餘伊祿養顯揚俱無餘憾此時正當節抑哀痛護惜此身為國家出力盡忠正所以盡孝朕前已降諭旨賜銀二千兩為伊母喪事之費今朱軾奔喪回籍著再賜銀二千兩為伊一切盤費之用其子亦令隨歸伊到家守孝百日將伊母之事料理完畢即來京辦事爾等可詳悉傳諭朱軾知之○大學士朱軾具摺謝恩並奏請解任開缺以終服制得旨據奏情詞迫切此乃伊名節所關朕知其出於至性誠懇允從所請解任

開缺以全其志但三年為時甚久卸事閒居在籍伊心亦未必自安況目前見有畿輔水利之事正資料理可於八月起身前來居住京師以備委任顧問不居見任之職則與家居無異於禮既盡於心亦可安矣朱軾素性誠篤今遭母喪深恐其哀毀過節爾等可將朕意諄切諭之伊年高體弱不宜過於悲戚況六十不毀載在禮經若能仰體朕心時思朕訓護惜此身為國家出力伊母有知亦必深慰斯為忠孝兩全儻過哀以致毀瘠則有負朕恩矣爾等並傳諭膳房侍衛永壽攜茶飯往賜○陞王府長史史宗室圖納為鑲白旗滿洲副都統○實授德明為直隸布政使司布政使○河南巡撫田文鏡疏報陝州鄆陵等九州縣開墾雍正三年分田地二百七十八頃有奇下部知之○癸未諭八旗大臣等從前護軍叅領副叅領等俱加恩賞給親丁錢糧及折米價銀兩此次驍騎叅領等甄別

訖時亦給與親丁錢糧及折米價銀兩稍減於護軍叅領等爾等會議具奏尋議驍騎叅領見在每月給親丁錢糧一兩每年三季給米二十四斛副叅領等並無親丁錢糧米石嗣後叅領等每月給親丁錢糧一兩五錢再折米價一兩將米二十四斛裁去副叅領等每月給親丁錢糧一兩五錢不折給米價從之○以翰林院編修程元章提督福建學政○禮部議覆順天學政吳襄疏報昌平州孝女何百順乃何淳之女淳子百魁早卒無嗣百順見父母年高矢志不嫁以女代子侍養終身年踰六旬歿於何氏恭請特賜旌門查定例無旌表孝女之文今何百順養親不嫁篤重天倫事關風化應請旨施行得旨著加旌表○旌表直隸靜海縣烈婦邊楷妻周氏矢志殉夫自縊捐軀給銀建坊入祠致祭如例○甲申

上御經筵講畢賜大學士九卿詹事及講官等

宴○乙酉先是宗人府奏據和碩簡親王雅爾江阿奏稱臣因進呈

玉牒式樣內將皇子遺漏停止俸糈撤六佐領入於公中臣懇乞隆恩量臣俸糈將佐領撤出將俸糈給與等語查五旗王等所屬佐領皆係

皇上之佐領今請將佐領進上以抵伊之俸糈殊屬不合應無庸議得旨雅爾江阿人甚卑鄙終日沉醉將朕所交事件漫不經心專懼允禩蘇努等悖逆之徒甚忝厥職又因數案議罪停俸況王等屬下之人豈有售於朝廷之理著嚴加議處尋議雅爾江阿身係親王毫不力圖報効忝職之處甚多又因數案議罪停俸乃並不悛改終日沉醉欲將

皇上之佐領進上抵俸甚玷王爵應將雅爾江阿革去親王令應襲之人承襲得旨雅爾江阿著革去親王○宗人府又叅奏鎮國公永謙由閒散宗室超授鎮國公不知感戴殊恩

乃於允禩一案並不據實陳奏。支吾抵飾。永謙應革去鎮國公爵。得旨。永謙著革去鎮國公。○予故鑲白旗護軍統領濟星祭葬如例。

○丁亥。

上親耕耜田詣

先農壇致祭畢。更服至耕所。仍行四推禮畢。

上御觀耕臺。命莊親王允祿。怡親王允祥。裕親

王廣寧。行五推禮。吏部尚書孫柱。戶部左侍

郎將廷錫。禮部左侍郎阿克敦。兵部尚書法

海。刑部尚書勵廷儀。工部尚書李永紹。都察

院左副都御史杭奕祿。通政使司通政使陞

授內閣學士圖蘭。大理寺少卿于廣。行九推

禮。各以次耕如儀。

上御齋宮。順天府官員率耆老農夫行禮畢。至

耕耜所。農夫終畝。王以下各官行慶賀禮。賜

茶。停止筵宴。○戊子。

上御太和殿視朝。文武陞轉各官謝恩。○陞鑲

藍旗漢軍副都統輔國公伊爾登爲右翼前

鋒統領。○鑲紅旗蒙古都統雍吉納年老休

致。以輔國公塞爾臣爲鑲紅旗蒙古都統。○

己丑。

孝昭仁皇后忌辰遣官祭

景陵。○授故鎮國將軍噶喇瑪子德爾登額爲

輔國將軍。○吏部遵旨議覆。江蘇布政使今

陞雲南巡撫管雲貴總督事鄂爾泰。前任江

蘇布政使時將應得銀兩買穀三萬三千四

百石有奇。分貯蘇松常三府以備賑貸。實屬

急公。應准加級議敘。得旨。鄂爾泰著加二級

伊平日實心辦事。聲名素優。又將應得之項

急公備用。是以降旨交部議敘。若各省大吏

不識此意。謂急公即得議敘。苟索妄取。致累

官民。此端斷不可開。可將此令督撫司道知

之。○庚寅。諭戶部。朕軫念東省被水窮黎粒

食維艱。特允山東巡撫陳世倌之請。於大清

河興工疏濬。令乏食小民得力役之資。爲餉

口之計。今天氣和暖。土脈鬆潤。正施畚插之

時去秋該撫奏請設廠煮賑目下赴工者衆粥廠可以停止但念此就食小民其中豈無老弱殘疾不能赴工者煮賑既停麥秋之期尚遠此輩窮無所歸之民或仍至失所朕心深爲惻然應行文山東巡撫陳世倌將不能赴工之窮民查明若干每日仍給與升合之資俟至麥收後停止所用銀兩俱作正項開銷該撫嚴飭各州縣官務期實心奉行以副朕養育百姓之至意爾部速遵諭行○又諭山東去年被水州縣其應輸漕米朕於部覆緩半之外敕令該撫查被災尤甚之處將漕項悉行緩徵但念各州縣應給兵糧例不在緩徵之內軍糈固爲緊要而被災黎庶於粒食之餘責其輸納糧米未免艱於措辦爾部行文山東巡撫陳世倌著於起運雍正三年漕米內截留五千石以爲支給兵糧之用儻有餘剩即留爲下年兵米其支給米石俟秋收後徵補還項爾部速遵諭行○兵部左侍

郎欽拜緣事革職調刑部右侍郎塞楞額爲兵部左侍郎擢貴州按察使存柱爲刑部右侍郎陞監察御史富貴爲貴州按察使司按察使○旌表河南夏邑縣烈婦戴超賢妻孫氏夫亡殉節自縊捐生給銀建坊入祠致祭如例○辛卯祭歷代帝王上親詣行禮○諭八旗都統等朕常飭八旗大臣八旗爲本朝根本凡係生計禁令習俗等事屢經申降諭旨從前皇考之時恩賞稠疊歷經多年而滿洲等生計竝不見其滋殖轉益減損者皆法令懈弛之故也今八旗兵丁貧乏即將倉糧國帑盡行頒賜朕固不惜但使隨得隨盡曾不決旬遽即蕩然亦何濟之有竝有將原置房產變易無遺者若於此輩加以顧恤不但惡者無所懲即善者亦無由勸矣凡此不肖人等各叅領佐領理宜痛加懲治如終不改即應革退



以爲不肖者戒。大臣等果能視兵如子。懲惡  
獎善。併責令叅領佐領等。不時教導。何事不  
成。今大臣等。但知不通賄賂。不徇情面。以校  
射爲要務。勤加操練而已。不知爾等職任。正  
不止於此也。必教以典禮倫常及治生之計。  
俾各好善惡。惡崇儉戒奢。方可謂教育有成。  
嗣後大臣及叅領等。宜痛加勉勵。竭誠管理。  
不可仍前粉飾。再佐領下人等。俱關係一佐  
領教導之事。較大臣叅領等。更爲切近。如原  
管佐領。世管佐領。或係年尚幼穉。或質甚愚  
昧。或衰老不能辦事。應行查明。如係伊祖父  
原管。及因宣力所得之佐領。只給伊佐領之  
俸。勿令管理事務。另於該旗大臣官員內。擇  
其能管理者。令其兼管。至驍騎校。亦屬緊要。  
若皆得其人。佐領下事務。自必整理。儻爾等  
仍不加意整飭。使兵丁等。生計無所資益。俟  
過三年。朕查閱之時。斷不輕釋也。○命協理  
大學士事務。戶部尚書張廷玉。爲文淵閣大

學士。仍管戶部尚書翰林院掌院學士事。○  
陞戶部左侍郎蔣廷錫。爲戶部尚書。江西巡  
撫裴率度。爲戶部左侍郎。仍辦理江西巡撫  
事。○以正黃旗蒙古都統宗室申穆德。爲山  
西右衛將軍。山西右衛將軍吳禮布。爲正黃  
旗蒙古都統。○壬辰。諭江蘇巡撫張楷。每見  
蘇松二府漕米虧空案內。一經承名下侵蝕。  
至二三千石。訪問其由。則糧重倉多之處。州  
縣官不能兼顧。每派點收書。經管收納。所收  
民糧。除丁兌外。原有斛面餘米。存留在倉。遂  
有糧戶將應納米石。折銀充抵。收書即以餘  
米抵算。迨收折既多。餘米不足以補。而所收  
米價。又已隨手花費。以致虧空漕項。此不可  
不嚴立條禁也。嗣後收書有侵蝕漕米者。該  
州縣詳叅審究。按其米數照監守自盜律治  
罪。并將僉派收書之員。題叅議處。查明折銀  
之糧戶。追補庶可懲猾吏而警愚民。至各州  
縣所收倉糧。丁兌之外。儻有贏餘。令該州縣

修理常平倉廩存貯以佐賑濟該撫嚴飭蘇松二府各州縣實心奉行儻有借餘米名色加收斛面遺累小民者定行重治其罪○命山西右衛左翼副都統穆禮庫來京陞前鋒侍衛圖爾賽爲山西右衛左翼副都統

大清世宗敬天昌運建中表正文武英明寬仁信毅大孝至誠憲皇帝實錄卷之四十一

大清世宗敬天昌運建中表正文武英明寬仁信毅大孝至誠憲皇帝實錄卷之四十二

教修

雍正四年丙午三月癸巳朔

上幸圓明園○復設直隸延慶衛守備一員梁城所千總一員從署直隸總督蔡珽請也○乙未轉吏部右侍郎沈近思爲左侍郎吏部左侍郎管順天府府尹事張令璜爲右侍郎○宗人府叅奏貝子允禩等俱係往

陵寢居住之人理應敬謹行走今

孝莊文皇后梓宮未入

享殿之前允禩即率領伊子白起廣善散回甚屬不合應將允禩革去固山貝子撤出所屬

監修總裁光祿大夫經筵講官太僕議政大臣保和殿大學士兼兵部尚書總理兵部事務等伯加十五級臣鄂爾泰  
總纂官光祿大夫經筵講官起居注太僕議政大臣保和殿大學士兼兵部尚書總理兵部事務等伯加十五級臣鄂爾泰  
纂修官光祿大夫經筵講官起居注太僕議政大臣保和殿大學士兼兵部尚書總理兵部事務等伯加十五級臣鄂爾泰  
翰林院掌院事加二級臣福敏光祿大夫經筵講官太子太保東閣大學士兼禮部尚書加六級臣徐本光祿大夫  
經筵講官議政大臣協辦內閣大學士事務禮部尚書仍兼管太常寺鴻臚寺事臣三泰等奉

佐領間散宗室白起廣善照不應重律杖八十。准其折贖得旨。俱著寬免。○敕封青海水神爲靈顯青海之神。○青海厄魯特扎薩克輔國公諾爾布彭蘇克故遣官致祭。○丙申清明節遣官祭

永陵

福陵

昭陵

昭西陵

孝陵

孝東陵

景陵○先是宗人府奏允禩允禔蘇努吳爾占等既已削出宗籍應將伊等本身及其子孫俱撤去黃帶更改舊名歸併各該旗各佐領其有品級之女一併銷去品級奉旨允行至是正藍旗都統音德等將允禩允禔等更名編入佐領事定議奏聞得旨爾等乘便行文楚宗將允禔之名併伊子孫之名著伊自身

書寫告知楚宗令楚宗報於爾旗允禩之名及允禩之子之名亦著允禩自身書寫編入佐領○工部議覆怡親王允祥等摺奏京東水利情形○河西數十里內止有鳳河一道即桑乾河之分流自蘆溝河經南苑至涿縣西南流入武清縣南河流本暢自武清之垓上村淤爲平陸偶遇水潦田廬瀰漫應循故道疏濬仍於分流處各建閘一座以時啟閉○香河寶坻二邑沿河堤岸坍塌甚多應及時修築再於牛牧屯以上斜築長堤一道以障上流俾運河無東溢之患○通州烟郊以南之水匯於窩頭分爲二支南流入運河東流經香河之吳村達於寶坻吳村以下大半淤塞難於開濬應將南流一支疏通暢入運河其由香河入寶坻之溝頭河亦加疏濬導之自寶坻城南達於大河不令漫溢○寶坻與薊州接壤薊運河自三台營會諸水至寶坻之白龍港又南經玉田豐潤合漕水以達

於海應先修築河堤再於薊州下倉鎮以南建橋下閘壅水注於兩岸以資灌溉。漕水出遷安之泉莊至崖兒口東決則淹豐潤西決則淹玉田應開直河二道與舊流分瀉其近河堤堰更加高廣建閘開渠庶令窪濕之區皆爲膏壤。玉田之藍泉流入薊運河河外諸水爲湖山水暴漲河與湖平應將河身疏通深廣束以堤防湖之西北另開小河引山澗諸水入河下流使湖不泛溢仍於湖心最深處儲爲水櫃以濟泉水之不足其泉河一帶仍多方疏導以廣水利。豐潤之王家河汊河龍堂灣泥河四道或流入大泊或流入薊運河田疇不蒙其利應滌源疏流築堤建壩於東北引陡河爲大渠橫貫四河之中廣開溝洫以備旱澇。永平所屬若盧龍之燕河營及營東五泉灤州之別故河龍溪沂河靳家河黃坨河陷河龍堂牯牛河遷安之徐流營泉河三里河皆應隨地制宜開溝引

流於水利營田大有裨益以上八條俱應如所請得旨依議速行。○戊戌以鑲藍旗蒙古副都統伯馬蘭泰署正黃旗蒙古都統。○陞直隸天津副將管總兵官事徐仁爲正藍旗漢軍副都統調山東兗州總兵官趙國瑛爲直隸天津總兵官陞直隸三屯副將栢之蕃爲山東兗州總兵官調四川川北總兵官潘之善爲陝西西安西總兵官陝西西安西總兵官孫繼宗爲四川川北總兵官仍署陝西甘州提督署陝西西安西總兵官宋可進仍署陝西涼州總兵官。○己亥陝西固原提督馬煥緣事革職陞四川重慶總兵官路振揚爲陝西固原提督調陝西西寧總兵官黃喜林爲四川重慶總兵官陞江西袁州副將周開捷爲陝西西寧總兵官。○議政王大臣議覆川陝總督岳鍾琪等遵旨議奏潼關係陝西要隘駐防滿兵於地方有益應於西安八旗餘丁內擇其人才壯健者選取馬兵四百名步兵

六百名給與錢糧馬匹器械等項設城守尉一員每旗設防禦一員驍騎校一員領催四名管轄操練於潼關西門城外建築營房分給弁兵并請將潼關撫民同知改爲理事同知審理案件均應如所請從之○兩廣總督孔毓珣題廣西南寧府果化土知州趙常茂故其子趙應龍年幼請以其弟趙常蔭暫行管理州務下部知之○庚子工部右侍郎馬進泰緣事革職擢監察御史邁柱爲工部右

侍郎○鑲白旗蒙古都統巴拜以病乞休允之○辛丑諭議政王大臣等據遣往策妄阿喇布坦衆佛保等奏稱策妄阿喇布坦以克木可穆齊克吳梁海地方原係伊所屬被丹津喇布坦侵佔仍欲得此地方等語今不令策妄阿喇布坦來使入內地即於巴爾庫爾地方遣回恐策妄阿喇布坦乘此時發兵侵擾克木可穆齊克吳梁海現今我滿洲蒙古兵丁在茂岱察罕叟爾扎克拜達里克駐劄

著前鋒統領丁壽帶滿洲兵五百名蒙古兵五百名副將軍貝勒博貝帶喀爾喀兵一千名前往唐奴山前之特斯等形勝地方駐劄於克木可穆齊克居住之車零旺布吳梁海居住之博貝處不時偵探若策妄阿喇布坦侵犯吳梁海等處賊兵若少即襲擊之如賊勢衆斷不可輕進著將軍穆克登副將軍丹津多爾濟策凌博貝等應於何處防守預備定議奏聞○封

皇后弟五格爲一等侯○移江南京口右營原駐薊灣守備一員及千總一員兵二百名駐防鎮江之圖山仍撥右營千總一員駐防薊灣從江蘇巡撫張楷請也○壬寅敬奉

聖祖仁皇帝御容於

恩佑寺

上親詣行禮○諭理藩院昨爲吳梁海人等特降諭旨發兵駐防朕復詳思克木可穆齊克地方之吳梁海人等俱係車零旺布博貝屬

下。其來歸之科羅爾賣等。現交博貝撫綏存恤。居之公所。此等人向在喀爾喀邊外樹內打牲爲生。與準噶爾所屬之吳梁海接壤。又與鄂羅斯連界。必當輕徭薄賦。俾伊等生計饒裕。乃爲有益。此等人素無知識。萬一策妄阿喇布坦設計哄誘。或興兵搶掠。雖地屬彈丸。人極愚賤。而儻被侵犯。即與蒙古王貝勒之部落一體。豈可置之不問。觀策妄阿喇布坦奏章。其意於吳梁海。每飯不忘。將來未必無乘間侵犯之事。今茲夏月。我師現在特斯等處遊牧。朕欲乘此遣大臣一員。攜帶布帛茶葉等物。同王車零旺布。貝勒博貝。或親至克木可穆齊克地方。或於附近吳梁海之唐奴特斯等處。齊集伊等爲首之人。分別賞賜。明示朕意。曰。皇帝軫念爾等民生。特命前來傳旨曉諭。爾吳梁海人。世居樹內。以打牲爲生。遇力強者。即爲納賦。由來舊矣。今爾等既納貢賦於蒙古王貝勒等。即爲朕之屬國。所

居與鄂羅斯。準噶爾邊界甚近。據今差往準噶爾使臣回奏。策妄阿喇布坦云。克木可穆齊克地方之吳梁海人等。向俱爲伊之屬下。甚恨爾等。皇帝恐爾等受伊侵害。故特遣大臣傳諭。預爲防備。且施恩賞賜爾等。嗣後遠設營哨。盡心防禦。策妄阿喇布坦所屬之吳梁海與爾等接壤。宜不時探察。再鄂羅斯亦與爾等甚近。儻伊國人等。侵爾邊界。造屋種地。立即報知。汛地轉報將軍。即使策妄阿喇布坦侵害爾等。將軍早聞。便可發兵救助。儻策妄阿喇布坦兵多。事起倉猝。爾等力不能當。即攜帶妻孥牲畜。暫移入內邊遊牧。若賊兵無多。爾等酌量已力。可以殄滅。即殄滅之。與其畧不設備。致策妄阿喇布坦忽來見侵。劫掠牲畜。殺傷人民。何如早備之爲善也。皇帝又軫念爾等生計。特命爾主王貝勒等。減爾貢賦。將所減之數。皇帝動支國帑賞賚爾主。期與爾等生計有益。爾等誠能感戴國恩。

恪遵訓旨。固守地方。探察詳報。朝廷恩賚。自必有加。無已等語。車零旺布。博貝同命。往大臣。如此詳悉。曉諭伊等。再於伊等中揀選老成服衆之人。作爲首領。令其守望相助。其遇有緊急事務。作何知會。傳報之處。亦著詳細定議。開示伊等。伊等果能深知利害。感佩恩澤。則必輸誠効力。從此邊圉益固矣。○癸卯。鑲藍旗漢軍都統阿魯緣事革職。調正紅旗蒙古都統伊爾哈岱爲鑲藍旗漢軍都統。以理藩院尚書特古忒爲正紅旗蒙古都統。仍兼理藩院事務。○豁免河南祥符縣被水衝決田地額賦九千四百兩有奇。從河南巡撫田文鏡請也。○甲辰。諭大學士等。去歲畿南被水深軫朕懷。雖截漕發粟賑糶頻施。然猶恐小民甫經災沴之後。無力供輸。是以又特降旨。將雍正四年通省錢糧俱令緩徵。夫今年錢糧尚且緩徵。則從前未完之項。豈有轉行急徵之理。今聞地方官竟有仍追比前欠。

者。漠視民瘼。莫此爲甚。深負朕憂念斯民之至意。著傳旨與直隸總督速飭各地方官。凡舊欠錢糧。一概緩徵。所有兵餉工料各項需用之處。俱動藩庫銀兩撥給。不得短少扣剋。如地方官仍有私徵等弊。一經察出。定行從重治罪。○諸王大臣等遵旨將允禩改名之處詢問。允禩允禩自改名爲阿其那。改伊子弘旺名爲菩薩保。奏入報聞。○丙午。調鑲藍旗蒙古副都統伯馬蘭泰爲本旗滿洲副都統。陞正黃旗護軍參領廣西爲鑲藍旗蒙古副都統。○調山西總督伊都立來京。以山西布政使高成齡署理山西巡撫印務。○丁未。諭鑲黃旗大臣等。世襲官員有舍兄而襲弟者。原襲職之初。或其兄情願告退。或庸劣殘疾。或非正室所出。因令其弟承襲。後遂專於此一支相繼承襲。殊爲屈抑。今後可將原立此官之人查明。共有子孫幾人。俱帶領引見。有庸劣疾病者。於本名下註明。各將家譜交

送八旗改定再進○戊申諭宗人府魯賓人原不及昨將允禩之事於衆人前詢問見其舉動狂悖原欲將伊正法因伊無兄弟子息不忍絕伊後嗣特予寬典諭令禁錮高牆爾衙門奏稱無應襲伊貝子之人朕令爾等往問魯賓據爾等奏稱魯賓甚是惶恐並非前日舉動且又耳聾據此將伊正法之旨伊或未聞所以如此伊之職銜既無應襲之人著將魯賓寬宥降授輔國公伊之佐領諒伊亦不能約束俱撤回置之公處○調江南江寧將軍董吉那來京陞陝西西安右翼滿洲副都統覺羅伊禮布爲江南江寧將軍直隸天津協領關保爲陝西西安右翼滿洲副都統○復置江南海口葦蕩二營設叅將一員守備二員千總二員把總四員兵一千二百三十名專管採葦巡河之事從河道總督齊蘇勒請也○己酉封和碩簡修親王雅布庶子神保住爲和碩簡親王○調貴州提督馬會

伯爲陝西甘肅提督陞雲南臨元總兵官楊天縱爲貴州提督調雲南永順總兵官孫宏本爲雲南臨元總兵官陞浙江嚴州副將霍昇爲雲南永順總兵官○甘肅提督路振聲以老疾乞休允之加太子少保兵部尚書銜致仕○定陝西延安府十七州縣丁銀概從下則以二錢爲率歲減舊額一萬二千八百九十兩從總督岳鍾琪請也○庚戌上詣恩佑寺行禮○命步軍統領阿齊圖內務府總管常明修理京城內外河道○辛亥諭各省督撫提鎮等凡文武官員赴任之時朕俱令其進見面加誨訓又恐其紀載傳播粉飾誇張故令繕寫呈覽其不能紀述者亦不强其繕寫諭旨甚明近見武弁由侍衛出身者所寫諭旨詞句鄙俚意指乖謬此等人員皆由督撫提鎮保送朕見其技勇可用遂授以偏裨之職今觀其陳奏如此則在外借稱冒充



侍衛曾戴藍翎。誇張恩遇。傲上陵下。恣意妄行。亦未可定。著督撫提鎮時加訪察。毋得稍有瞻徇。○陞河南按察使沈廷正爲福建布政使。司布政使擢浙江杭州府知府魏定國爲河南按察使。司按察使。○實授鄂彌達爲浙江杭州將軍。○壬子。諭雲南巡撫管理總督事務鄂爾泰。四川烏蒙土司縱恣不法。擅擾東川府地方。似此若不嚴行懲戒。將來益無忌憚。滋事愈多。雲南與烏蒙接壤。爾可與

岳鍾琪和衷酌辦。將烏蒙土官土目先行戒諭。令其毋虐土民。毋擾鄰境。痛改前非。恪遵法度。儻敢怙惡不悛。罔知斂戢。應作何懲治。爾當悉心籌畫。萬全勿少輕易。其會同岳鍾琪辦理之處。朕已頒諭。令知之矣。○賑河南汝州。襄城等二十三州縣水災饑民。○癸丑。正白旗漢軍副都統金鐸緣事革職。以直隸古北口提督何祥書爲正白旗漢軍副都統。陞署陝西涼州總兵官宋可進爲直隸古北

口提督。○甲寅。諭九卿。漢人爲外官者。俱迴避本省。朕思漢軍之在直隸。亦當如漢人之迴避本省也。直隸去京城甚近。漢軍中親戚友朋。散處直隸州縣。且伊等莊田地土。亦多分隸其地。保無請託牽制。徇私報怨之弊乎。嗣後應照漢人迴避本省之例。停其在直隸居官。令於別省各缺銓用。著九卿速議具奏。尋議。八旗漢軍人員。應照漢人迴避本省例。凡遇直隸道府州縣等缺。於銓選時扣除。布

按二司缺出。亦停其開列。得旨。布政使按察使。仍行開列。餘依議。○諭八旗漢軍官員等。人臣事君。須明大義。固不可矯情立異。尤不可挾私黨同。習氣陷人流。而不返。每至乖於大義。皆由察之不早。挽之不力故也。八旗漢軍向來惡習。好通聲氣。凡内外文武官員。無論平素識與不識。一登仕籍。必信息相通。互相袒護。雖其初意。不過矜名圖利。然積久不改。種種偏私。固結害正。誤公漸成大惡矣。夫

立身事主豈有二理。若果能孤介。一秉至公。自然能獲乎上。否雖竭盡心力。徒然敗品喪名。而且犯義撓法。況此輩邀結。原非至誠。利則同爭。害則各避。究何益乎。夫同此固結之心也。於君則爲忠。於友則爲黨。忠則爲君子。而賞必及之。黨則爲小人。而罰亦必及之。雖至愚之人。亦未有不欲爲忠良之君子。而甘爲匪黨之小人。以避賞就罰者也。毫釐之差。天淵之判。可不慎歟。或有云。人非聖人。誰能無私。又云。瞞上不瞞下。此等陋諺。不知出自何典。爾等既登仕籍。奈何爲此市井無賴之談。以自絕於聖人。而願爲有私瞞上之人耶。況朕從前局外旁觀。三四十一年。一切情態。知之甚悉。汝欲瞞上。而上究不能瞞。汝不瞞下。而下實互相瞞也。深可憫歎。漢軍中公正不阿之人。朕皆委任信用。如楊宗仁。持身剛介。既歿之後。尚屢邀朕恩。爾等若咸能實心遵朕訓諭。效法正人。必寵渥厥身。慶流後裔。若

面是心非。不能悛改惡習。不但身遭黜罰。此風不息。後人效尤。必且貽害子孫。嗣後各宜公忠自立。共絕攀依。官無論崇卑。惟盡已職。事無論大小。惟盡已心。人人皆能孤介。則衆孤介和合。而成一德同風之盛矣。○乙卯。以陝西安西總兵官潘之善署四川提督。○兩廣總督孔毓珣題。廣西慶遠府忻城土知縣莫振國故。其子莫景隆年幼。請以其弟莫振邦暫行管理印務。下部知之。○予軍前病故西安左翼副都統鄧奇章祭葬如例。○阿霸垓達爾漢貝子德木楚克故。照貝勒例遣官致祭。○丁巳。授輔國公吳友子富宏爲鎮國將軍。閒散宗室拜穆布子玖雅圖。爲奉恩將軍。○兵部議覆。兩江總督查弼納遵旨議奏。據江寧巡撫張楷疏言。江南省各州縣捕盜設有捕快一役。不載經制全書。竝無工食充此役者。率皆市井無賴。承緝盜賊。每多縱盜。扳良之弊。請一概革除。其緝拏之責。宜任民

壯以專責成。查州縣馬快僅有八名。實屬不敷。請與民壯五十名。合爲一役。名曰壯快一體操練。分班巡緝。拏獲盜首。按名給賞。應如所請。從之。○予故四川提督岳昇龍謚敏肅。○戊午。兵部議覆甘肅巡撫石文焯疏言。各省軍犯俱發河西。及平慶臨鞏四府各衛充伍。今各衛俱改爲州縣。止有赤金靖逆大通三衛。若充發太多。恐致疎縱。請照河東各衛歸併各該府管轄之例。令該州縣專管。庶無疎虞。應如所請。從之。○己未。以果郡王允禮兼管鑲藍旗滿洲都統事。○戶部議覆順天府府尹張令璜疏言。大興宛平二縣各門。歷年民欠房地租銀。請均作十年帶征。應如所請。從之。○庚申。

上詣

恩佑寺行禮畢。回宮。○諭各省督撫提鎮等。連年以來。朕令督撫提鎮等。保送所屬武弁進京引見。若該上司奏摺內。有某員操守平常。

字樣。朕於召見該員之日。必將所奏諭知。冀其洗滌前愆。以圖後效。無非愛惜人材之意。乃間有不肖之員。於回任之後。以上司既有貶抑之詞。心懷怨望。遂與上司日漸參商。或又以平時操守不謹。既爲朕所知。將來難望上進。由是志氣褻褻。見利忘義者有之。但當引見之時。伊等任內未嘗顯有過犯。該管上司又未參劾。朕姑且容留試用。豈能保其將來耶。嗣後該上司保送人員。務秉公心。勿存私意。儻伊等陞見擢用之後。改易前轍。即當據實參奏。勿謂朕曾擢用。有所瞻顧。勿謂已曾保舉。回護前非。總以大公至正。無偏無黨之心處之。則賞罰明。而屬員知所勸懲矣。○旌表直隸容城縣烈婦黃桂林妻孫氏。拒姦不污。自縊殞命。給銀建坊。入祠致祭。如例。○辛酉。諭議政大臣等。朕從前以直隸雨水過多。田禾歉收。米價騰貴。令盛京及口外地方嚴禁燒鍋。已下諭旨。今聞盛京地方仍開燒

鍋盛京口外蒙古交界之處內地人等出口燒鍋者甚多。無故耗費米糧。著嚴行禁止。○壬戌。大學士九卿等奏。食侍講俸之錢名世作詩投贈年羹堯。稱功頌德。備極諂媚。且以平藏之功歸美年羹堯。謂當立碑於

聖祖仁皇帝平藏碑之後。甚屬悖逆。應革職。交與刑部從重治罪。得旨。向來如錢名世。何焯。陳夢雷等。皆頗有文名。可惜行止不端。立身卑污。所以

聖祖仁皇帝擯斥不用。置之閒散之地。而錢名世諂媚性成。作爲詩詞。頌揚姦惡。措詞悖謬。自取罪戾。今既敗露。益足以彰

聖祖知人之明。但其所犯尚不至於死。伊既以文詞諂媚姦惡。爲名教所不容。朕即以文詞爲國法。示人臣之炯戒。著將錢名世革去職銜。發回原籍。朕書名教罪人四字。令該地方官製造匾額。張掛錢名世所居之宅。且錢名世係讀書之人。不知大義。廉恥蕩然。凡文學

正士。必深惡痛絕。共爲切齒。可令在京現任官員。由舉人進士出身者。仿詩人刺惡之意。各爲詩文。紀其劣蹟。以儆頑邪。并使天下讀書人。知所激勸。其所爲詩文。一并彙齊。繕寫進呈。俟朕覽過。給付錢名世。○陞正白旗滿洲副都統奇爾薩爲鑲白旗蒙古都統。○正紅旗漢軍副都統許國桂。緣事革職。陞福建漳州總兵官高世定爲正紅旗漢軍副都統。

大清世宗敬天昌運建中表正文武英明寬仁信毅大孝至誠憲皇帝實錄卷之四十二

大清世宗敬天昌運建中表正文武英明寬仁  
信毅大孝至誠憲皇帝實錄卷之四十三

監修總裁官光祿大夫經筵講官太僕議政大臣保和殿大學士兼兵部尚書總理兵部事務三等伯加十三級臣鄂爾泰

總裁官光祿大夫經筵日講官起居注太僕兼太子太傅保和殿大學士兼戶部尚書仍兼管吏部尚書翰林院掌院

事三等伯加十三級臣張廷玉光祿大夫經筵日講官起居注太僕議政大臣武英殿大學士兼工部尚書仍兼管

翰林院掌院事加級臣福敏光祿大夫經筵講官太子太僕兼太子太傅保和殿大學士兼禮部尚書加六級臣徐秉光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事務臣三泰等奉

敕修

雍正四年丙午夏四月癸亥朔享

太廟

上親詣行禮○議政王大臣等議覆據川陝總  
督岳鍾琪奏稱巴塘係打箭爐之門戶久入  
川省版圖至中甸貼近滇省久入滇省版圖  
附近中甸之奔雜拉和宗喇普維西等處雖  
係巴塘所屬之地向歸四川而其界緊接滇  
省汛防總通於阿墩子阿墩子乃中甸之門  
戶請改歸滇省管轄設官防汛與川省之裏  
塘打箭爐彼此犄角足以各收臂指控制番

民矣應如所請從之○甲子  
上詣

恩佑寺行禮畢幸圓明園○陞二等侍衛特恒  
爲

景陵總管○戶部等衙門議奏原任直隸總督  
李維鈞侵蝕俸工銀十四萬八千餘兩勒限  
五年追完若限滿不完或不足數照侵蝕例  
治罪得旨五年限滿分毫不完然後治罪於  
錢糧何益此等缺欠錢糧勒限追賠事件應

將所欠銀兩數目按所勒年限計算一年應  
完若干儻一年應完之數不完如何治罪年  
限已滿不能全完又如何治罪之處著分別  
定議嗣後一體遵行○戶部又議覆漕運總  
督張大有等疏言一長蘆兩淮產鹽之處姦  
民串通竈丁私賣私販伺回空糧船經過搬  
運上船地方官稽查不及請嚴行禁止違者  
官弁運丁販賣人等俱照私鹽例治罪一糧  
船回空時請於瓜州江口派委瓜州營協同

廳員搜查。以杜夾帶私鹽之弊。一運司等官拏獲夾帶私鹽。請照專管兼轄等官例議叙。一隨幫官專管回空。有能拏獲首明私鹽三次。及該幫船三次回空。並無私鹽事故者。該管上司咨部。以千總推用。一運糧船每船量帶食鹽四十觔。多帶者照私鹽例治罪。一糧船准帶土宜六十石。如有夾帶。並包攬商船未獲者。查出照漏稅例治罪。貨物入官。一糧船之中。不許帶火礮鳥鎗。違者照私藏鳥鎗例治罪。該管官照失察。銃礮鳥鎗例議處。俱應如所請。從之。○丁卯。諭議政王大臣等。前議於鄂爾昆圖拉地方種地時。曾有人奏稱喀爾喀人等。未必情願。朕思喀爾喀地方。原被噶爾丹抄掠。窮困已極。我皇考聖祖施恩收養。各按伊等品級。封爲汗王。貝勒貝子。公扎薩克。加以重恩。令食俸祿。數年間。遂致充裕。安居原遊牧地方。今復安插戍兵。令其種地。亦係特爲喀爾喀護庇久遠。

之計。伊等聞之。定各欣喜。有何不願之處。朕曾降此諭旨。今土謝圖汗汪扎爾多爾濟副將軍王丹津多爾濟等。感戴爲伊等安插兵丁之恩。復因先於厄爾得尼招地方開種地畝。穀不甚長。遣人從鄂羅斯處。尋得與伊地方相宜之穀。實請令按時耕種。又情願幫助耕種之人。口糧等因。具奏與朕前旨相符。喀爾喀汗汪扎爾多爾濟王丹津多爾濟等。實係感激深恩。爲國家竭誠効力之人。殊屬可嘉。著交與理藩院議叙。○戊辰。陝西西安左翼漢軍副都統熹思漢。緣事革職。以湖廣鎮軍總兵官董象台。爲陝西西安左翼漢軍副都統。○吏部疏奏。京察屆期。請派大學士尚書等大臣。會同考察。得旨。嗣後遇京察之年。著內閣滿漢大學士。吏部都察院。吏科河南道。公同閱看。著爲例。不必另派大臣。○下嫁正黃旗和碩額駙福僧格之郡主。故遣官致祭。○己巳。刑部疏奏。未殺人之首盜與傷人。

之夥盜原擬斬決若越獄脫逃被獲者請照殺人盜犯於本地方斬決梟示其未殺傷人之夥盜係免死發遣之犯如越獄脫逃者照未殺人之首盜於本地方斬決若因越獄殺傷兵役者亦擬斬梟文武官有能拏獲盜犯越獄及中途脫逃併從遣所逃回者照拏獲名數分別加級紀錄從之○添設直隸布政司經歷一員理問一員按察司經歷一員從署直隸總督蔡珽請也○庚午貴州巡撫何

世璽奏請訓旨以便遵守安輯民苗撫綏地方奉

上諭地方要務朕既未親歷其境安能悉知即有所見亦不過得之傳聞總賴爾等大臣無欺無隱據實入告君臣同心商酌則可耳至於居心立志應如何處朕今一一諭示於爾若能實力遵奉而行於地方吏治自大有裨益也不可惟務虛名而廢實事不可但求潔己而不奉公不可以因循爲安靜不可以生

事爲振作毋偏柔善以盜寬仁之譽毋事姑息以邀屬員之感毋徇友朋之情而欺主毋受權要之託而誑君黔省錢糧有限爾之操守朕所素知再者武備不宜輕視稍致懈弛當十分留心時加鼓勵苗夷雖蠢而無知然亦人也若地方有司實意矜恤令其知感營伍嚴肅令其知畏朕可保其永遠無事恩威二字萬不可偏用偏用之目前雖有小效將來必更遺大患非爲國家圖久安之策朕所不取鑒別屬員不可盡以科甲爲人林而視他途爲市井小人自古用人無方賢愚豈宜如此區別凡事虛衷秉公切勿預蓄成見平心以待彼來此應何事不得其理也勉之勉之莫負朕倚任之重○辛未諭內閣倉差甚有關係小京官內未必有人御史又各有職掌漢監督著將候補候選道府同知知州有情願効力者報名吏部戶部會同九卿揀選引見如任內果能効力以應陞之缺即用滿

監督著部院挑選筆帖式保送引見如能實心効力以主事即用若係中等仍回原職下等者革退○戶部議覆山西總督管理巡撫事務伊都立疏言積貯倉糧必須就近收貯庶緩急足恃請於陽曲等州縣增建倉廩每年動銀四萬兩採買穀石以備接濟遇青黃不接時酌量糶賣還項應如所請從之○工部議覆兵部左侍郎副總河嵇曾筠疏言豫省鄭州薛家寨等處堤身卑矮大溜頂衝請增修埽埧等工以備捍禦應如所請從之○壬申授故奉恩將軍達里伯子海澄爲奉恩將軍○癸酉諭議政王大臣等據差往策妄阿喇布坦處衆佛保等奏稱臣等與策妄阿喇布坦議定疆界仍欲以索爾畢嶺至唐奴山陰之哈喇巴爾魯克山爲界等語其事暫且不能完結朕思巴爾庫爾吐魯番之兵丁理應撤回著議奏尋議策妄阿喇布坦怙惡不悛輒敢指佔地方以圖倖得乃自取滅亡

也

皇上愛惜官兵以出征年久今即撤回應將巴爾庫爾吐魯番官兵俱行撤回但撤回之後策妄阿喇布坦或遣人往哈密地方盜取馬匹牲畜亦未可定查哈密地方現駐兵五百名應於安西兵內再撥五百名派副將遊擊各一員管轄駐劄令其遠設斥堠嚴加防範俟哈密建城完工將五百兵再行撤回安西將軍富寧安前降旨調回陞見應帶領大兵來京再甘州現有京城滿洲兵三百餘名亦令都統查克旦帶回并撤所設軍站其自嘉峪關以至安西沙州哈密應留軍站以備遞送從之○甲戌怡親王允祥奏言臣查修水利徧歷關隘所過正定府衢通九省地界重邊向設總兵官一員統轄自奉裁後改設副將隸於督標事多牽制防汛每多廢弛請復設總兵以資控制以靖地方得旨著照所請復設直隸正定總兵官以南營叅將張起鵬



補授○乙亥諭內閣督撫提鎮俱係朝廷簡用之大臣其因公晉接自有一定之禮儀不應過卑過亢以違制度乃間有督撫倨傲妄行而提鎮等遂卑躬屈節以爲諂媚者如年羹堯當日視提鎮等如同奴隸每令其披執進見常鼎在江南時令兩司侍立於傍此皆妄誕不法之甚嗣後督撫提鎮相見務遵會典所載一定儀注儻有違例披執者一經發覺定將倨傲諂媚之人一同治罪又屬員謁見上司遇應穿公服之日只用補服不許擅用朝服向日屢申明禁近來仍有違背不遵者今曉諭後若再有此等察出必加重處○陞山東沂州副將楊鵬爲河南南陽總兵官○戶部議覆兵部侍郎楊汝穀疏言直隸州縣存倉米穀已皆發賑請再運奉天米十萬石至天津又截南漕米十萬石分貯河間保定兩府適中之地備用應如所請從之○禮部議覆江西巡撫裴率度疏言白鹿書院已

經修葺請於各省薦舉孝廉方正中簡發一人授以官職或於詞臣中遴選文行兼優者爲掌教應不准行得旨朕臨御以來時時以教育人材爲念但期實有益於學校不肯虛務課士之美名蓋欲使士習端方文風振起必賴大臣督率所司躬行實踐倡導於先勸學興文孜孜不倦俾士子觀感奮勵五品勳學爭自濯磨此乃爲政之本至於設立書院擇一人爲師如肄業者少則教澤所及不廣如肄業者多其中賢否混淆智愚雜處而流弊將至於藏垢納污若以一人教授即能化導多人俱爲端人正士則此一人之才德即可以膺輔弼之任受封疆之寄而有餘此等之人豈可易得當時孔子至聖門弟子三千餘人而史稱身通六藝者僅七十有二其餘不必皆賢况後世之以章句教人者乎是以朕深嘉部議不肯草率從裴率度之請也其奏請頒發未備之典籍亦不知未備者是何

等書不便頒發。至於奏請特賜匾額。當年既經

聖祖仁皇帝賜以御書。朕亦不必再賜。西安

巡撫圖理琛奏請動存庫銀六萬兩採買豆草。以爲西安兵丁備用。得旨圖理琛向任廣東布政使時。密奏不准官兵預支俸餉。廣東及各省原有歲暮預支兩月錢糧之例。伊亦固執不行。以致兵丁度歲艱窘。怨謗繁興。撫臣年希堯強之而後給發。隨經具摺奏聞。此時朕恐圖理琛在廣東未必相安。故改調西安。旋因西安巡撫員缺。遂爾擢用。今圖理琛奏請預支銀兩採買豆草以備用。是圖理琛爲布政使時。則但知有錢糧。而不知有兵丁。今爲巡撫。又但知邀兵弁之歡心。而不復計錢糧之出納。身爲大臣。乃偏執己私。遂至前後大相矛盾。況雍正元年題定兵馬豆草折銀之例。悉照酌中之價。若遇豐年價賤。兵丁可得餘銀。若遇歉年價貴。許該管上司題請

增給。是兵丁原無歉年匱乏之慮。今西安兵丁之豆草請預買以備用。則他處兵馬之豆草獨不當預備乎。圖理琛身在西安。即欲加厚於西安之旗標兵丁。豈此外兵丁皆不當蒙惠乎。若一視同仁。使天下兵丁皆有備用之草豆。其事果能行乎。文武大臣各有職任。彼此不得干預。西安總統滿洲兵馬乃將軍之事。延信以宗室而爲將軍。經理軍務。乃其專責。圖理琛此奏。即有益於兵丁。亦當與延信商妥同奏。今妄憑臆見。獨自敷陳。顯欲侵將軍之職掌。延信既在同城。於圖理琛此奏。知而不阻。亦屬不合。丙子吏部議覆。山西總督管理巡撫伊都立疏奏增設移駐官弁事宜。朔平寧武二府請添設經歷各一員。老營堡雁門所添設巡檢各一員。太原府駐劄寧武之中路同知請改爲寧武府鹽捕同知。駐劄偏關大同中路管糧通判改爲大同府糧捕通判。大同府右衛西路同知改爲

朔平府管理糧餉同知左衛理事同知改爲朔平府總捕理事同知移駐朔平府。一萬億寧化二倉改隸寧武縣神池利民八角三倉改隸神池縣五寨倉改隸五寨縣其大同西路之常盈庫常豐倉改爲朔平府常盈庫常豐倉。一神池堡守備改爲神池營守備五寨營把總改爲五寨縣把總鎮西衛守備改爲鎮西城守備均應如所請從之○丁丑諭各省鄉試正副考官朕御極以來屢次開科取士凡屬考官皆擇人品端方素行謹恪者爲之而諸臣果慎守法度洗滌弊端各省榜發士林皆無異議但聞試官之內偶有學問不及而所取之文未盡滿人意者是以去年朕將在京科目出身官員應開列正副主考者通行考試分別等第記名以備簡用今鄉試屆期將記名人員掣籤命往使典試事夫文行原無二理豈有文藝優通而品行卑劣者況國家以文章取士爾等以文章發科今膺

鑑衡之任若文優而行劣使天下之人謂文章一道全無足憑則是讀書通籍之人貽玷於名教國法尚可容乎料爾等必無此事但朕慎重科場大典不得不諄諄告誡爾等其共加勉勵勿負朕心○戊寅陞鑲藍旗護軍叅領傅泰爲本旗漢軍副都統○兵部議覆貴州銅仁府正大營同知馮光裕條奏湖南平溪清浪二衛與貴州思州府接壤去湖南省會遼遠請改歸貴州管轄應如所請再查湖南天柱縣與貴州黎平府接壤應改隸貴州四川東川府與雲南尋甸州接壤應改隸雲南就近管轄從之○己卯孝端文皇后忌辰遣官祭昭陵○調兩江總督查弼納來京以直隸馬蘭口總兵官范時鐸署理兩江總督鑾儀使董象緯署直隸馬蘭口總兵官總理三陵事務○庚辰諭宗人府允禔著交與都統楚宗侍衛胡什里馳驛從西安一路來京沿

逵酌量派兵看守。伊之妻子家口著總督岳鍾琪巡撫圖理琛石文焯等派地方官兵嚴行看守。○又諭貝勒滿都護庸鄙卑污。所以皇考聖祖仁皇帝不令承襲貝勒。而用伊弟海山。其後海山獲罪禁錮。無應襲之人。不得已方令伊承襲。屢蒙

皇考聖祖仁皇帝厚恩。官至議政大臣。領侍衛內大臣。管理正白旗三旗都統事務。伊並未盡心辦事。竭力供職。不但不思圖報。

高厚之恩。反入允禩允禔允禵保泰蘇努阿靈阿鄂倫岱之黨。實爲深負我

皇考之人。朕雖知之甚悉。然朕即位以來。特望伊悔改。諄諄教誨。加以深恩。令伊在總理事務處協同行走。伊毫無竭誠効力。改悔前非之意。惟欲阻撓政事。搖亂人心。陰險姦僞。無所不至。從前不孝於父。不友於兄弟。衆所共知。實爲黨與中之巨魁。伊並不知朕之心迹。可令伊每日侍從行走。朕亦欲悉其性情也。

○諭大學士等。去歲畿南被水。朕軫念民生。除截漕賑濟。種種加恩外。又特命怡親王等親身前往。查勘地理情形。以除水患。以興水利。今一切工程事務。雖有分發効力人員。但地非素經。人非素轄。恐有呼應不靈之處。必得本處地方官。公同實心協辦。始克有濟。且事權必欲專一。方可奏功。凡直隸地方文武官。於水利事務。務須與分發効力人員秉公和衷協助。如有漠視推諉。及阻撓者。俱著怡親王題參。有實力奉公者。亦著怡親王保題。○吏部等衙門議覆。山西總督管理巡撫伊都立疏奏。新改朔平寧武二府。請各設教授一員。訓導一員。取進文武童生各十五名。右玉偏關二縣。各設教諭一員。訓導一員。取進童生各十五名。寧武縣。設教諭一員。取進童生各八名。左雲平魯陽高天鎮四縣。各設訓導一員。取進童生各八名。神池五寨二縣。各設訓導一員。取進童生各六名。應如所請。從

之○辛巳諭九卿等朕從前曾降諭旨凡遇理事之日若有大風雨雪著在京官員等即不必來圓明園朕自改期另傳昨日原擬今辰理事乃夜來下雨朕即傳諭諸臣不必前來而城中官員俱已行至西直門聞旨始回昨夜既有風雨在京大臣等理應遵照前旨何必多此往返嗣後有特旨所傳之官員若有風雨無阻字樣則不論風雨即著前來若朕御門之日遇有大風雨雪伊等即互相傳諭不必前來○調禮部左侍郎阿克敦為兵部左侍郎轉禮部右侍郎三泰為左侍郎調兵部左侍郎塞楞額為禮部右侍郎兼管兵部侍郎事○壬午諭內閣據總河齊蘇勒奏報朱家口水勢陡長東岸壩臺大埽衝陷現在防守修築等語黃河水性無定將來或有漫溢河水旁引恐有奪河之患齊蘇勒在工年久歷練老成清慎勤三字均屬無愧朕所深知但年已望七恐精力稍減河工勤勞思

慮有不及處兩廣總督孔毓珣素諳河工事務伊從前屢請陞見今准其來京著先至河上詳勘水勢協同齊蘇勒細加商酌妥議兩廣總督印務著兵部侍郎阿克敦前往署理○以翰林院侍講學士張煦為雲南鄉試正考官編修顧仔為副考官江西道御史趙城為貴州鄉試正考官編修戴瀚為副考官○調正藍旗蒙古副都統岳爾岱為正白旗滿洲副都統鑲白旗蒙古副都統岳興阿為正藍旗蒙古副都統陞正藍旗參領李淑德為鑲白旗蒙古副都統○調貴州大定總兵官丁士傑為福建漳州總兵官陞陝西督標副將姚文玉為湖廣鎮遠總兵官○癸未吏部議覆怡親王允祥疏奏直隸水利營田事務殷繁請設立滿漢司屬各四員水利營田使經歷一員應如所請從之○山東巡撫陳世倌疏報濟寧等十五州縣衛開墾雍正二年分田地九十五頃有奇下部知之○甲申諭

大學士等弭盜之法莫良於保甲。朕自御極以來。屢頒諭旨。必期實力奉行。乃地方官憚其繁難。視爲故套。奉行不實。稽查不嚴。又有藉稱村落畸零。難編排甲。至各邊省。更藉稱土苗雜處。不便比照內地者。此甚不然。村落雖小。即數家亦可編爲一甲。熟苗熟種即可編入齊民。苟有實心。自有實效。嗣後督撫及州縣以上各官。不實力奉行者。作何嚴加處分。保正甲長及同甲之人。能據實舉首者。作何獎賞。隱匿者。作何分別治罪。其各省通行文到半年以內。被舉盜犯。可否照家長自首之例。暫治以輕罪。舉首之盜。僅有從前未經發覺之案。地方官可否從輕處分。以免瞻徇畏縮。著九卿詳議具奏。再盜案踈防。文武各有處分。雖著有成例。但其中尚有分別。凡山海大盜。聚衆多人。土種苗蠻。成羣劫奪。及響馬老瓜等賊。聚有窩穴。勢難擒捕者。當責之弁兵。如久無緝獲。則文武一例處分。情罪俱

當若盜止十人以下。踪跡散處者。則捕役力能擒制。雖事發潛逃。亦能躡探。而營汛弁兵各有職守。勢難遠緝。此等盜犯。似當專責州縣武職處分。可否酌量從輕。庶情法得平。中無枉抑。著九卿一併確議具奏。○兵部議覆原任兵部侍郎牛鈕條奏。各直省驛站馬匹一事。先經臣部將應增應減之處。行令各該督撫詳查去後。今據各該督撫陸續具題到部。臣部詳加查勘。應以驛路之遠近。道途之險易。分別裁減。著爲定例。從之。○裁雲南松林驛歸併炎方驛。霑益驛歸併倘塘驛。從雲南巡撫楊名時請也。○乙酉。吏部遵旨議覆稽察內務府御史員缺。於內務府郎中員外等官選授所辦事件。年終赴京畿道刷卷。其陞轉照各部院司官陞轉御史之例。不兼內務府職銜。凡有題參事件。不必會同內務府總管列銜。如有徇隱。照例議處。并各設筆帖式二員。得旨。內務府所辦稿案。不必送京畿

道刷卷餘依議○吏部議覆山東巡撫陳世倌等疏奏請將直豫兩省所轄賈魯河等二十五處地方撥歸山東曹縣統轄以清地界其曹州州同並請移駐桃源集以資彈壓應如所請從之○丙戌署山西巡撫高成齡疏言平遙縣盜犯魏二越獄踈防知縣高大有因公出境請照例免其處分得旨魏二係爲首惡盜知縣高大有並不嚴行監禁竟致越獄脫逃殊屬不合著交與該撫並高大有務將魏二拏獲如不能拏獲將該撫議處高大有從重治罪至內稱高大有因公出境並未聲明前往何處著將高大有因何事派委前往何處等情交與該撫察明具奏儻有徇隱將該管各上司一併治罪再各省似此奏稱因公出境者甚多此內每有上司官員瞻顧情面受屬員請託掩飾具奏等弊部中不行詳察即照該督撫所請議覆以致地方官員俱漫不經心踈忽怠玩應如何分別議處著

九卿定議具奏尋議嗣後凡斬絞重犯越獄該管官除赴部引見委解錢糧奉調查審案件及承辦要務等事因公出境以及奉調入聞者該督撫即於疏內聲明吏部仍照因公出境例查議該管官或委署隣邑或檄調赴省等項公出時斬絞重犯越獄脫逃者仍照越獄定例處分至軍流徒罪等犯與斬絞重犯有間該管官員或因公出境以致越獄脫逃該督撫亦務將該員於某月日因何事公出何處逐一聲明到部察核仍照因公出境例議處如有並非因公出境該管上司瞻顧情面受屬員請託捏稱因公出境掩飾具奏者將該管上司照徇情例降二級調用該管有獄官照規避例革職從之○丁亥以都察院左都御史福敏管翰林院掌院學士事○陞內閣侍讀學士僧格爲內閣額外學士○九卿議覆怡親王允祥疏言淦陽河發源河南磁州州民攔河築壩致直屬之邯鄲永年



諸縣爭水訐訟事聞兩省文移動經歲月請將磁州改屬廣平府滏陽一河全歸直隸統轄應如所請從之 雲貴總督仍管雲南巡撫事楊名時疏言通省丁銀請於通省成熟田地內按畝攤徵自雍正四年爲始永爲定例其屯軍丁銀將無主影射田土清查漸次抵補從之 戊子諭吏部雲南貴州四川福建廣東廣西等省地處邊遠凡選授教職每曠缺遲久其作何補授之處該部議奏尋議遠省教職請將應選人員由部截定人數照科分名次填寫執照給發各該撫令其挨次具題選補并將到任日期報部從之 以鑲藍旗滿洲副都統伯馬蘭泰署鑲藍旗護軍統領 戶部議覆署四川巡撫羅殷泰疏言川省州縣多屬以糧載丁紳衿貢監等盡皆優免差徭請將優免之名永行禁革與民一例當差查川省以糧載丁之州縣紳士原無丁銀無庸優免得旨向來徵收錢糧每私立

儒戶官戶名色偏累小民已經降旨嚴禁而丁糧差徭或借紳衿貢監之名包免巧脫情弊多端羅殷泰所奏禁革紳士優免之處固屬太刻而部議但就其錯處指駁其餘未曾詳議亦屬朦混著九卿詳議具奏尋議照例優免本身一丁其子孫族戶濫冒及私立儒戶官戶包攬詭寄者查出治罪從之 兵部遵旨議奏正定副將既改爲總兵官應將標下兩營改爲鎮標復設遊擊二員以現有之守備二員卽爲遊擊中軍守備復設千總一員再設城守龍固營守備一員把總二員添設馬步兵二百三十五名從之 四川巡撫法敏疏言川省邊界番夷干犯法紀者請一面會同督撫提鎮具奏一面相機擒拏正罪并請嚴飭督撫提鎮約束沿邊弁員務以安戢邊境爲主不得一毫需索以致開釁生事得旨治內地當先寬而劑之以嚴治邊夷宜先威而繼之以恩方克有濟朕非好大喜功



偏於殘忍之主此數處番夷咸沐

聖祖數十年寬仁厚德自應傾心向化總緣地方官不實心任事苛求見小激出事端復隱匿養姦致令伊等恩不知感威不知畏所以大不法之案重見疊出今若照爾迂見而行爾能令所屬各員盡皆一塵不染乎僅再有不法事出將不肖員弁正法以謝罪於番夷乎抑別有料理之法乎若漫然不料事之始終亦豈無深謀遠慮止據無稽之迂談奉爲指歸信而不疑是豈封疆大臣之識見耶今爾所見亦不可謂全無用處但尚非其時俟將此歷來不法之積習極力振作整頓一番使伊等凜然知法當遵知威可畏然後再行爾此奏嚴飭將弁屬員遵守弗違彼時可保地方百姓永遠享昇平之福也○己丑諭內閣各省耗羨銀兩與營伍中數分公糧存貯公所原爲本省本營之中或有公事需用或爲各官養廉使地方營伍備用有資不至派

累兵民乃通權達變之法其來久矣豈非正項錢糧可比也邇來督撫提鎮中小心拘謹者恐目前經手將來無以自明具摺奏請咨部以記出納原係見小之舉該部祇應存案此豈非開銷正項錢糧也若將耗羨銀兩俱比照正項具題報銷相沿日久或有不肖官員指耗羨爲正項而於耗羨之外又事苛求必至貽累小民此風斷不可長裁廣西太平府龍州流官吏目缺從兩廣總督孔毓珣請也○庚寅諭吏部兵部蔡珽職掌太多不能兼管著將都察院左都御史及正白旗漢軍都統二缺另行開列具奏兵部尚書事仍令蔡珽管理○吏部議覆兩廣總督孔毓珣疏言外省回京旗員帶有眷屬若務令就陸所費甚多請於有水路之處聽其由水路行走仍令於原定限內到京無故遲延者照例治罪應如所請從之○兵部左侍郎副總河嵇曾筠疏請移駐儀封縣地方以便督率保

固各險要工程下部知之○免直隸霸州玉田等四州縣雍正三年分水災額賦有差○辛卯兩廣總督孔毓珣題廣西太平府思明土知府黃晟休致請以其子黃觀珠襲替下部知之

大清世宗敬天昌運建中表正文武英明寬仁  
信毅大孝至誠憲皇帝實錄卷之四十三

大清世宗敬天昌運建中表正文武英明寬仁  
信毅大孝至誠憲皇帝實錄卷之四十四

敕修

雍正四年丙午五月壬辰朔以宗人府左宗

人鎮國公德普爲右宗正。轉右宗人輔國公。

訥圖爲左宗人以輔國公塞爾臣爲宗人府

右宗人○刑部議奏西安閒散滿洲厄爾格

因飲酒不相遜讓。將披甲人李佳寶毆死。厄

爾格應擬斬決得旨滿洲殺死滿洲即行正

法。當日定例甚善。自定例後。此等事件甚少。

可見立法稍嚴。而全活者轉多。但此內亦有

故殺謀殺者。亦有鬪毆致死者。所犯之罪。有

斬絞之不同。其中宜加分別。嗣後將應斬者

定爲立斬。其應絞者定爲立絞。似爲允協。著交部著爲定例。又議。管理察罕叟爾等處糧餉兼理屯田巴泰奏言種地贖罪郭三瞎等二十人年老病廢無以資生請令種地官員養贍以示矜恤應如所請得旨伊等雖係重罪發遣之犯但在彼地方並無不法及逃回等事若果年老殘廢不能耕種情有可憫著行文巴泰詢問伊等有願留彼處者即給與種地官員分養有願回故里者遣人送部

實錄卷四十四

令其回籍。川陝總督岳鍾琪疏言寧夏駐防滿漢兵丁糧餉請分別折給得旨從來滿洲兵丁性情質樸奉公守法不知爭論財物自圖便利亦未聞於該管上司前有控告錢糧等事昔年福州漢軍駐防兵丁因爭競馬乾錢糧

聖祖仁皇帝將爲首之人重懲附和之人分別治罪蓋恐其漸成惡習故用法以儆將來也每見旗人爲上司往往袒護旗人亦有故意

刻待旗人袒護漢人以示公者漢人爲上司又往往袒護漢人亦有故意刻待漢人袒護旗人以示公者此皆非大公至正之道也朕君臨天下一視同仁惟期事事公平不肯稍有偏向如滿洲駐防兵丁其所得錢糧馬乾等項較綠旗兵丁爲多此非厚待旗人也蓋綠旗兵丁係土著之人經營度日稍覺容易滿洲兵丁於錢糧之外無所資藉故特加恩惠以養贍之旗兵既有多得錢糧之處則不

實錄卷四十四

應復占綠旗之分例今岳鍾琪奏據鍾保詳稱寧夏滿兵初到採買米石草束實難請將夏朔二縣實徵草束并額徵一萬五千石之米盡給滿兵以折價給與綠旗兵丁此奏甚屬錯謬若云折價足數採買之用則綠旗可以採買滿兵即可以採買且地方官亦可以採買矣若云折價不敷則滿兵不敷綠旗兵亦即不敷矣兵丁同爲朝廷養之人滿洲素性尚義輕財豈肯奪綠旗兵丁之利以自

使其私乎。據云詢問綠旗兵丁亦欣然樂從。凡辦事祇論理之當行與否。若於理當行。豈因綠旗兵丁不願而遂停止乎。若於理不當行。即綠旗兵丁情願固屬可嘉。獨不計及滿洲兵丁之顏面乎。又稱所需白米每石以一兩五錢折價爲數無幾等語。國家有一定之經費。若屬應用。則數千數萬亦不爲多。若不應用。則一絲一粟亦宜察核。豈有因數目不多。而遂可任意增添乎。況爲數不過七百餘金。即將此分與三十人衆。爲利幾何。而今滿兵徒受與國家較量錙銖之名。乎鍾保身爲藩司料理軍餉。乃其專責。滿洲兵丁所需米石草束。著交與鍾保管理。採買散給。不得稍有虧缺。若借端貽累地方。朕必加重處。俟辦理數年。兵丁住久熟習之後。再行奏聞。今兵丁各自採買。○癸巳。諸王大臣等奏。允禩身爲大將軍。毫不効力。止圖利己。營私貪受銀兩。縱容屬下騷擾地方。嚇詐官員。固結黨羽。

心懷悖亂。請即正典刑。以彰國法。得旨。阿其那。允禩。允禪等。結黨營私。同惡相濟。朕以宗廟

社稷爲重。遲迴詳慎。多方勸戒。而伊等怙終不悛。罪惡昭著。朕亦無可如何。但允禩與阿其那。允禔。雖均屬罪人。而允禩爲人。止於賦性糊塗。行事狂妄。至姦詐陰險之處。則與阿其那。允禔相去甚遠。因阿其那。允禔多方籠絡。允禩墮其術中。受其指使。不知悔悟。設令伊一人獨處。則才具庸劣。斷不能獨爲一事。若與阿其那。允禔一處。聽其愚弄。則狂悖恣肆。可以無所不爲矣。朕數十年來。於伊等之居心行事。知之甚悉。若謂朕於允禩。獨有所偏倚。則朕何以對

聖祖在

天之靈乎。朕之此心

天地神明。自能昭鑒。前令允禩在馬蘭峪居住。原

欲其瞻仰

景陵。感發天良。痛改前非。洗心滌慮。而允禩並不

醒悟改蔽錮日深姦民蔡懷璽又構造大逆之言冀行蠱惑則馬蘭峪亦不可令其居住著滿都護常明來求馳驛前往將允禔撤回朕思壽皇殿乃供奉

皇考

皇妣聖容之處將允禔於附近禁錮令其追思

教育之恩寬以歲月待其改悔伊子白起甚屬不堪著與允禔一處禁錮其子白敦尚好可封爲鎮國公令在伊家居住陝西巡撫圖理琛摺

奏保送遊擊守備赴部引見奉

上諭嘗見滿洲爲上司則以滿洲爲可信任漢人爲上司則以漢人爲可信任漢軍爲上司則以漢軍爲可信任不思身爲大臣管轄之人滿漢俱有一有偏向則諸事皆不得其平何以服人心而理庶務前朕令陝西督撫提臣各保遊擊一員守備一員送京引見朕意以陝西武弁可用者甚多而征討桌子山等處又多効力有功之人地方大臣當從公保薦以

副朕留心人才之意乃圖理琛於遊擊內將查爾扈保送前來查爾扈曾在乾清門侍衛行走用爲陝西撫標遊擊滿洲在陝爲綠旗武官者只有查爾扈一人而圖理琛即將伊保舉豈此外遂無可保舉者乎且查爾扈係朕深知熟識之人又何必進京引見著即令回任各潼關修造滿兵房屋延信圖理琛持差旗員四人前往監造若云滿洲房屋漢官監造未必合宜何妨指示規模令其照式爲之而必欲差委滿洲謂其不致侵蝕浮冒是明以漢人爲不可信用而以滿洲爲可信用即有意偏向之明驗矣著交與延信圖理琛不時稽查若所差旗員不善辦理或有侵蝕浮冒或在地方生事滋擾朕少有所聞定將延信圖理琛一併從重議處從前年羹堯署理大將軍印務將滿洲官員兵丁百計陵辱領兵征勦鎮海堡時將滿洲功績概行泯沒且加以敗北之名以致人人怨憤此又有意道抑滿洲者更爲悖逆身爲大臣一涉偏徇則

大乖爲政之道將來必干嚴譴凡居封疆大任者當深以爲戒○兵部等衙門議奏鄂倫岱阿爾松阿因結朋黨擾亂衆心屢蒙寬宥發往盛京仍怙惡不悛大千國紀鄂倫岱阿爾松阿應擬斬立決從之○兩廣總督孔毓珣題廣西思恩府上林土知縣黃爵泰休致請以其子黃瑞麒襲替下部知之 甲午

孝誠仁皇后忌辰遣官祭

景陵○諭兵部從前令各省督撫提鎮將本標弓馬嫻熟人材壯健之千總保送來京今所保送者將已用完著行令照前再各保送一員但從前保送各員內有年幼人平常者今見一體擢用則此次保送懷私而徇情受賄者必更多矣況前旨如千總不得其人准於把總兵丁內挑選即拔補千總是合營伍之內俱得挑選豈患無人若今次仍有以平常及年幼之人保送者著將保送之該督撫提鎮一併議處○戶部議覆直隸總督李紱奏

言直屬未被災之州縣請將穀石糶借應如所請得旨借放倉糧每爲地方官掩飾虧空之計且借放之時往往利歸有力之家窮民不得實惠直隸倉糧向來虧空甚多朕知之甚悉今李紱爲直隸未報災之州縣奏請糶借倉糧著派翰林御史部院賢能官十數員前往會同各該地方官核實監糶著吳隆元余甸總管查察務使小民均沾實惠其各處糧穀果否實貯在倉著一併查驗○禮部議覆江西巡撫裴率度疏言江西鄉試內廉書經房考舊例止用二員今人文日盛卷多房少請酌添書經房同考官一員應如所請從之○刑部議奏旌德縣民呂高戡死親兄應依律斬決得旨一家兄弟二人弟毆兄至死而父母尚存則有家無次丁存留養親之請儻父母已故而兄死弟抵必至絕其祖宗禋祀此處甚宜留意若因爭奪財產及謀殺故殺又當別論呂高家中無承祀之人交部

察明嗣後應如何定例之處著九卿確議具奏尋議除爭奪財產謀殺故殺按律正法外僅係一時爭角互毆致死胞兄而父母已故別無兄弟又家無承祀之人應令地方官據實查明取結疏內聲明如蒙恩准其承祀將該犯免死減等從之○京察滿漢各官不謹官五員罷軟官五員年老官十員有疾官十員才力不及官十員浮躁官一員分別處分如例○免直隸香河等三縣雍正三年分水災額賦有差○乙未議政王大臣等議覆川陝總督岳鍾琪等奏稱臣遵旨同通智將隆科多石文焯所奏插漢拖輝開渠建閘之事按圖驗看自插漢拖輝至石嘴子築堤開渠有地萬頃可以招民耕種請於插漢拖輝適中之地建城一座設知縣一員典史一員再將李綱堡把總一員兵五十名移防縣城石嘴子地方請撥平羅營守備一員把總一員兵二百名駐劄中衛邊口請撥寧夏鎮標

守備一員把總一員兵一百名分汛防守自河西寨至石嘴子築堤二百餘里開渠一道建攔水閘八座請於七月間動工即行招民開墾以資灌溉其新設縣名恭候欽定鑄給印信均應如所請得旨依議插漢拖輝之事甚屬緊要著通智留插漢拖輝地方辦事單疇書向官寧夏亦著前往同通智管理事務尋定新設縣名曰新渠○丁酉陞戶部左侍郎辦理江西巡撫事裴偉度為都察院左都御史調廣西巡撫汪潒為江西巡撫陞廣西按察使甘汝來為廣西巡撫○以翰林院侍講學士留保充日講起居注官○以鑲白旗漢軍副都統石文煥署理正白旗漢軍都統鑲黃旗漢軍副都統顧儼署理正白旗漢軍副都統俱仍管原旗事務○調廣東廣州將軍李杅來京陞貴州威寧總兵官石禮吟為貴州威寧總兵官廣西柳慶副將孫士魁為貴州威寧總兵官授和碩莊靖親王博果鐸

女爲郡君壻舒立善爲多羅額駙戊戌正  
藍旗蒙古副都統軍前嚮道總管智勇以老  
疾乞休允之己亥旌表山東安東衛烈婦  
胡義妻趙氏夫歿投繯捐軀完節汶上縣烈  
女岳興聘妻公冶氏未婚夫亡聞訃自縊各  
給銀建坊入祠致祭如例庚子諭大學士  
等從前阿其那允禩允禴等結黨營私每好  
造言生事凡僧道喇嘛醫卜星相甚至優人  
賤隸以及西洋人大臣官員之家奴俱留心  
施恩相與來往以備其用若欲排陷何人即  
捏造無影響之言使此等人傳播以黃惑無  
識見之輩

聖祖仁皇帝深知此輩姦惡時時留心至朕即  
位以後即有傳言云朕日日飲酒又云朕頻  
與隆科多飲至更深隆科多沉醉不勝令人  
擡出即蔡珽自四川到京越數月見朕毫不  
飲酒曾駭歎奏朕云臣在四川聞人流言皇  
上日日飲酒今臣到京已久朝夕侍從始知

皇上涓滴不飲昨路振揚來京陛見臨行時  
亦奏云臣聞流言謂皇上即位後常好飲酒  
今臣朝暮入對惟見皇上辦事不輟毫無酒  
氣如此陳奏者甚多此無他故皆因阿其那  
允禴素日沉湎於酒朕頻頻降旨訓誡而伊  
等遂播此流言反加朕以好酒之名傳之天  
下夫朕若於政事不誤即使飲酒亦復何傷  
然朕實天性素不能飲內外之所共知以天  
性素不能飲者尚偽造此言則此輩之流言  
何可限量也今又見報房小抄內云初五日  
王大臣等赴圓明園叩節畢皇上出宮登龍  
舟命王大臣等登舟共數十隻俱作樂上賜  
蒲酒由東海至西海駕於申時回宮等語夫  
人君玉食萬方偶於今節宴集羣臣即御龍  
舟奏樂賜飲亦蓼蕭湛露之意在古之聖帝  
明王亦所不廢何不可者但朕於初四日即  
降旨令在城諸臣不必赴圓明園叩節初五  
日僅召在圓明園居住之王大臣等十餘人



至勤政殿側之四宜堂賜饌食角黍。逾時而散。並未登舟作樂遊宴也。且先期內務府總管等奏請今歲照例修備龍舟。朕實止之。此非有意屏却讌遊。蓋厭其喧雜耳。而報房竟捏造小抄刊刻散播。以無爲有。甚有關係著。兵刑二部詳悉審訊。務究根源。以戒將來。以懲邪黨。○又諭從前降旨詢問查弼納凡八次。伊將蘇努七十。隆科多。互相串通。鑽營之處。隱匿。並不據實舉出。是以朕將伊調來京師。親面詢問。伊仍堅執不認。朕是以將伊革去總督。拏交王大臣詢問。彼時降旨云。伊若將蘇努七十。實情舉出。將伊口供繕寫具奏。若不據實供出。爾等將伊擬罪具奏。伊今供稱蘇努七十。阿靈阿揆敘。鄂倫岱。阿爾松。阿結爲朋黨。協力欲將阿其那致之大位。蘇努屢稱允禩氣象大方。蘇努結交七十。持爲結交允禩之故。允禩又與阿其那相好。結爲一黨。邀買人心。藐法妄行。隆科多專擅威權。又

結交揆敘。阿靈阿各處邀買人心。爲彼羽翼。等語。將種種實情舉出。查弼納係後進之人。伊特畏懼權勢。隨聲附和。今既據實供出。諸王大臣尚議將伊正法。甚屬不合。朕昨降旨時言及

聖祖仁皇帝。彼時查弼納即痛哭不止。此處伊尚有良心。著將查弼納之罪悉行寬免。仍降旨與查弼納。云從前朕降旨詢問之時。爾果照今日所供。將實情舉出。朕亦不將爾調來京師。爾在兩江總督任內。居官尚好。故將爾罪寬免。爾果痛改前愆。朕尚有用。爾之處若不悛改。定行正法。決不寬恕。再蘇努七十。阿其那。允禩等。互相結黨。串通鑽營。妄亂行爲之處。查弼納俱經供出。今蘇努七十。雖已身故。應如何追治其罪。以彰國法。至蘇努七十之子孫內。有克惡妄亂之人。爾等詳加察看。將應如何治罪之處議奏。又諭賜錢名世名教罪人四字。著伊製匾懸於居宅。又諭旨

一道及諸臣所賦刺惡之詩一併交與錢名世刊刻進呈凡直省學校所在各頒一部以示鑑戒諭領侍衛內大臣公馬爾賽等爾等傳諭鄂倫岱之妻子兄弟族人等昔日終國綱因鄂倫岱不孝奏請誅之我

聖祖皇考思念

皇祖妣孝康章皇后特從寬宥使離京師授爲廣東駐防副都統既而調回京師授爲領侍衛內大臣承襲公爵伊不念

皇考如此天高地厚之恩忍於背負與阿靈阿蘇努等結爲黨與保舉阿其那欲圖大位擾亂國家前者審訊阿其那之太監時供出阿靈阿鄂倫岱爲黨與之首顯干滅族之罪舉國皆知

皇考復加寬宥伊仍不知感激不思致身爲國以贖前愆乃己丑年

皇考自霸州回鑾時面數鄂倫岱結黨之罪伊毫無畏懼

皇考如此高年而伊一路觸犯行至六十餘里其倨傲克狠之狀朕與扈從人等旁觀無不痛恨及在熱河

皇考聖體違和並未請安一次其意頗以爲快在宮門前每日較射歡笑其後

皇考於行圍地方向鄂倫岱云爾甚無恩情爾所作之罪不可勝數實爲可殺之人伊承旨之下毫無畏懼倨傲如故親隨侍衛等不勝憤恨人人髮指因此

皇考憤懣終日伊平生於

皇考前敢於觸犯種種過惡其小者不可枚舉伊於

皇考則忍心違忤如此而於阿其那則結爲黨與擾亂國家政事朕無不知之朕即位以來效法

皇考仍不念其罪惡施恩保全乃伊每事擾亂傾身回護阿其那因阿其那佐領一事在外於衆人前一番議論在內代伊啟奏顯露悖

逆之狀將朕所交硃批諭旨擲於乾清門地上。在朕前舉止抗橫爲人臣者當如是乎。伊與阿其那固結死黨同阿爾松阿阻撓政事以亂衆心。朕百端諭令改悔。毫無悛心。益肆傲慢。故諸王大臣屢次奏請將鄂倫岱阿爾松阿即行正法。朕尚不忍。望其改悔。發往盛京。今其思過乃伊至彼處仍不知畏懼。妄生怨忿。終日酣醉。夫令其改過則斷不知改。加以恩澤則毫無感激。懲以國法又毫無畏懼。

朕其奈何。若不將伊等正法。伊等希圖大事之心斷不能絕也。故將鄂倫岱阿爾松阿正法。從前大臣等議奏籍沒鄂倫岱之家產。將妻子入辛者庫。朕思念

皇祖妣孝康章皇后。

皇妣孝懿仁皇后特與寬免。阿爾松阿效法伊父敢行悖逆。其罪尤重。故發遣其妻子至鄂倫岱之妻子兄弟族衆。理應感戴朕委曲保全之恩。若稍存異心。天亦不宥。昔者大禹父

雖殛死禹惟盡忠後人稱爲聖人豈以禹爲不孝乎。能知君臣之大義自當感朕寬大之洪恩也。觀鄂倫岱之子補熙尚無惡行著照常供職効力其餘亦各於本職効力行走補熙果能向上朕仍委用爾等若以報鄂倫岱之仇爲念不誠心感恩効力朕自知之。彼時切勿含怨也。諭畢。法海夸岱兄弟及鄂倫岱之子補熙並族人等跪泣叩頭奏請謝恩。又

奉

上諭著降旨與伊等爾族豈比他族乃朕

皇祖妣孝康章皇后

皇妣孝懿仁皇后之親支也。爾等雖犯大罪朕但治犯罪之人而已其餘兄弟族衆斷不累及。今因鄂倫岱悖棄國恩身獲重罪實爲國法難寬不得已而正法。鄂倫岱所作之罪指不勝屈。爾等皆所深知。爾等陳奏鄂倫岱種種罪惡感戴朕恩既欲叩謝准其叩謝。陞右通政王國棟爲光祿寺卿。免山東德州

禹城等十六州縣德州一衛。雍正三年分旱災額賦有差○辛丑以原任兩江總督查弼納爲內務府總管○壬寅一等精奇尼哈番西佛休致以其姪關係襲替○癸卯諭內閣五城設立米廠俱在城內僻巷老弱窮民糴買甚難著該城御史在城內添設米廠幾處以便窮民○以署理兩廣總督阿克敦署理廣東廣州將軍○調山東按察使徐湛恩爲廣西按察使司按察使陞江南鹽驛道楊紹爲山東按察使司按察使○甲辰皇后千秋節停止行禮筵宴○遣官祭關聖帝君○添設江南山東河南湖南等省漕船領運千總十四員隨幫八員從漕運總督張大有請也○乙巳諸王大臣等奏允禧改名所擬字樣存心姦巧殊屬不法應發令擬改得旨此事在允禧猶爲罪犯之小者阿其那允禧允祿允禩固結匪黨潛設機謀種種不法之事不可枚舉朕所舉以曉諭羣

臣及爾等所共知者不過十分之二三其餘有所干礙而不便言及繁瑣委曲而難以悉數者甚多朕俱爲隱忍難以宣示也祇因二阿哥在東宮時失儲君之道阿其那允禧等潛萌希冀之心而阿靈阿揆欲鄂倫岱等復私相附和將二阿哥百計傾陷以便遂其私願夫二阿哥居心行事

皇考無不照察廢黜斷自

宸衷豈伊等所得施其伎倆乎二阿哥一日在

東宮之位凡爲臣下者當守一日之臣節豈可以悖逆之私心而視東宮如讎敵乎及二

阿哥廢爲庶人已見斥於

皇考又有一等姦究之徒妄思復立以圖僥倖

此又背紀亂倫之罪人也當時伊等見二阿

哥廢黜妄以爲伊等姦計之所致邪黨愈加

堅固公然欲仗邪黨之力以東宮之位可唾

手而得慢無忌憚竟有敢與

皇考相抗之意此實朝廷之大患國家之深憂

是以朕即位以來。百凡整理。費盡苦心。乃三年之久。頑邪尚未盡化。風俗尚未丕變。爾等滿洲大臣。急宜醒悟。當日

世祖章皇帝御極。正在冲齡。睿親王輔政。大權在握。一日以黃色衣示在廷大臣。詢問可否衣著。而彼時大臣尚力爭以爲不可。凡滿洲者。舊內此等剛方正直之風。權勢所不能奪者。歷歷可考。當時上三旗風俗。只知有君上。後因下五旗之人。與上三旗之人並用。遂染

下五旗卑微之習。然從前下五旗之人。雖各有該管之主。而其心亦只知有君上。不知有管主也。何至今日。遂苟且卑靡。一至於此。如昨日都統武格。在朕前奏對。尚將獲罪削籍之允禔。稱之爲主。武格乃一無知武夫。此則風俗頹壞。大義不明之故也。孟子云。遵先王之法而過者。未之有也。朕事事效法

祖宗。願爾等亦效法爾之祖父。忠誠自矢。一念不移。古人云。天無二日。民無二王。臣子之於

君上。乃天經地義。苟懷二心。而存游移瞻顧之念。即爲亂臣賊子。天理國法。豈能容乎。如阿靈阿。鄂倫岱等之姦惡。不明大義。其存心行事。爾等當以爲戒。當日滿洲風俗醇樸。雖遇天潢宗室。未嘗不加禮敬。尊君親上之心。最爲肫篤。朕今日之諄諄訓誡。不憚反覆周詳者。無非欲正人心。化風俗。使國家永享昇平之福耳。至於允禔改名之事。諸王大臣議令發伊自改。若發令自改。伊必至又多姦詐。著交與誠親王。恒親王。酌改具奏。尋議允禔應改爲塞思黑。從之。○福建巡撫毛文銓。摺奏本年雨水過多。米價騰貴。請令江西巡撫裴率度。撥穀運濟。奉

上諭。此等情形。關係緊要。何不預先奏明。而爲斯臨渴掘井之計。今已時屆仲夏。乃云若至無可如何之後。必不能保其不滋事端。是何言歟。且計閩省存留新收米穀。有三十五萬餘石。各府常平倉穀。一百四十二萬餘石。摺

內總不提起作何撥用第言動發庫銀向隣省各處採買則前項穀石諒皆虧空無遺爾所司者何事朕之億萬赤子何以安全今於爾奏到之日隨已敕諭江西巡撫裴率度速運米十五萬石前赴閩界爾即遵照部文速行辦理丙午旌表江南句容縣烈婦嚴士盛妻王氏遇暴不污被戕殞命給銀建坊入祠致祭如例丁未以工科給事中鄭其儲爲四川鄉試正考官翰林院編修邵泰爲副考官編修王蘭生爲廣東鄉試正考官編修曹源郊爲副考官編修徐杞爲廣西鄉試正考官吏部員外郎尹會一爲副考官侍講學士留保爲福建鄉試正考官編修崔紀爲副考官福建道御史劉運鰒爲湖南鄉試正考官編修吳啓昆爲副考官戶部議覆盛京戶部侍郎傅鼐奏言盛京倉儲緊要請添派副監督一員互相稽察應如所請再查盛京監督向係三年一換嗣後竝請照京城各倉

例一年任滿更換以清交代從之旌表浙江武義縣烈婦徐文源妻邵氏夫故殉節自縊捐軀給銀建坊入祠致祭如例戊申召入諸王大臣九卿等諭曰歷年以來朕之數弟昏昧無知不安本分其姦僞逆亂之行爾衆大臣從前雖畧曉一二何能盡知爾等且不能盡知外間小人又何由知之伊等爲人存心行事朕因三四十年来共在一處知之甚悉伊等僭妄之心悖逆之行及其黨與於國家大有關係阿其那等歷年傷皇考之心不孝不忠結爲黨援擾亂國家其罪倍甚於二阿哥從前阿其那塞思黑允禔允祇等共爲黨與包藏禍心將不守本分詭隨之人百計千方引誘交結又將生事克亂喇嘛僧道醫卜棍徒優人之屬種種貪利小人留心收攬重利賄買各致死命且在各處稱揚伊等美名串通內外姦僞之人希圖大位有不入其黨者即妄加危言以恐嚇之故不

爲其所籠絡不爲其所欺蒙者蓋少國家被其擾亂人心受其蠱惑外則與阿靈阿鄂倫岱蘇努七十赫壽等亂臣結黨往來內則與皇考御前侍衛拜唐阿太監等鑽營交結探聽一切喜怒信息若非我

皇考神明聖智心如金石未有不爲伊等詭秘之計所動搖者伊等姦偽之計皆我

皇考所洞悉乃窮困懷羞兇心益逞當

皇考高年反種種激怒無所不至

聖躬憔悴成疾皆阿其那等不忠不孝姦偽結黨種種可誅之所致也知臣子者莫如君父

我

皇考因阿其那不孝不忠惡貫滿盈深用震怒曾謂阿其那爲亂臣賊子乃吳三桂之再世父子之恩絕矣此等之

旨難以盡錄

皇考之旨甚明伊等皆得罪於

宗廟

社稷

皇考之人國法所當誅者也朕即位以來將伊等罪過俱從寬宥凡事教訓冀伊等解散黨與去其僭妄之心改其悖亂之行將阿其那封爲親王簡用重任總理事務阿其那仍不改其覬覦悖逆之心姦偽之行凡朕所交之事俱有意欲敗壞之事事以美譽自居欲將惡名歸之於朕其悖逆之心無少改悔處具爲朕所覺察伊但兇心稍萌朕即顯然曉示於衆故伊計窮力絀知其悖逆之心姦偽之行斷不能施布意欲朕加以誅戮或可有玷朕名譽之萬一以洩其忿種種擾亂全無人臣之體竟至在衆大臣前發誓公然詛咒連及朕躬舉動狂悖一至於此也封阿其那爲親王之時伊妻家之親爲伊賀喜阿其那即云何喜之有我頭不知落於何日等語朕不知其何心而出此言再阿其那在拘禁之處向看守太監云我向來在家每餐止飯一碗

今飯加二碗。我斷斷不願全屍。以歿必使見殺而後已等語。豈有身為臣子。而如此暴虐悖逆之理耶。再。阿其那於

皇考在日。不能承歡奉事。以叨

君父之矜憐。不能保其貝勒之爵祿。不能不犯鎖拏之罪。伊之乳公乳母之首領。不能保妻子不能保家財。不能保則阿其那之才具福分。顯然可知。夫阿其那以此才具福分。兼以不孝不忠。挾其姦偽之心。恣其所行之事。儻至此大位。豈能上安

宗廟

社稷報答

祖父之恩澤。被生民之衆哉。果係誠心。為大清國之人。未必願阿其那位登大寶也。至塞思黑。乃係癡肥臃腫。矯揉妄作。粗率狂謬。卑污無耻之人。

皇考從前。不比之於人數。弟兄輩亦將伊戲謔輕視。即阿其那亦知伊庸昧。無能特引誘愚

弄使出奴力。塞思黑因阿其那事敗。未稱伊等之心。數年間挺身覬覦大位。若亦阿其那將伊慙懣之所致也。朕即位以來。因思伊等斷不可置之一處。將伊遣往西大通居住。原欲令其更改惡心。逆行也。伊覺朕之寬仁。斷不肯傷伊等身命。不但不改其悖逆之心。反種種妄亂。敢行自古人臣未行之事。敢言自古人臣未出之言。祇欲激怒朕心。務令誅之。而後已。至於帶給允祇書札。內有機會。已失悔之無及等語。數千里寄此等悖逆書信。毫無畏懼。如此不法。是誠何心。仰蒙

聖祖皇考隆恩。養臣子三四十一年之恩澤。豈有因未遂僭妄之私。即怨望

君父與國為仇。如此悖逆肆行。有是理乎。且伊蠢然無知。行事悖謬。不量己才。不知羞耻。以不足比數之人。賄買棍徒。而小人惑於流傳之言。以為塞思黑可邀大位。致使衆口紛紛。此亦世所罕聞也。而伊亦公然自受恣口亂



言自古以來亦未有不自度量。覲顏無耻悖。謬干法如塞思黑者也。至允禩生性糊塗急。暴不知天高地厚之人。

皇考知伊在家必然生事。特遠遣出征在外者。允禩乃信阿其那。塞思黑之唆誘。頓萌大志。自古有大志之人。豈有不願身名美善之理。而允禩於出征處妄費國帑。肆行貪婪。騷擾地方。又鑽營塞思黑。今在

皇考前巧爲設法。取青海台吉之女。逐日醉飲。種種淫亂貪污之行。衆皆知之。允禩身爲大將。而所行之事有國法在。有

皇考洞鑒在有公論。在自當黽勉圖功。粉飾邀譽。強爲忍耐。遂伊願望之心。而乃醜行不法。至於如此。似此伎倆人品。若至大位。恣任其意。何所不爲。豈能爲國家萬姓造福。也不過私心。令伊同黨中不忠不孝。姦究亂國。當誅之。數人微幸而已。非國家之福也。朕即位後。即降恩旨。將允禩喚回。允禩於未到京之時。

即露種種狂悖於到京之日。向朕輕躁妄行。

狀類棍徒。其罪不可枚舉。朕皆寬宥。施恩於皇妣梓宮前。封伊爲王。全不思報朕恩。並不改伊等朋黨之初心。逆志益恣。向朕種種欺妄。暴虐之心倍加。近者蔡懷璽投伊院內字帖。內開二七變爲主。貴人守宗山以九王之母。爲太后。數語允禩不行。奏聞將要緊字樣裁去塗抹。但交與總兵范時繹。今不論如何完結。且云。並非大事。看其如此悖亂之行。即史書內亦屬希有。至於允禩。但知索取民財。爭奪買賣。交結內侍。種種宵小刻薄。無耻劣行之處。難以屈指。舉國共知。阿其那將此等人。亦行設法牢籠。令其出力。以爲羽翼。阿其那等心懷姦惡。擾亂國政。煽惑人心。邀買美名。結交匪類。徧處稱揚伊善。不過欺人而已。豈能欺

上天

皇考乎。阿其那等承歡

皇考者何處。効力者何處。有裨國家者何處。利濟軍民者何處。施恩臣工者何處。有益兄弟者何處。且當

皇考聖明在御之時。阿其那爲皇子。何得交結外人。不曾與政事。有何善足稱。遂至人目之爲佛者何故耶。此皆伊等所結朋黨作亂之徒。招搖惑衆。小人愚昧。入其機變。不審始末。虛實之所致。甚顯然也。伊等如果有善可據。朕此數言。又安能掩沒伊等之善行乎。但衆多愚昧。伊等存心行事已久。衆人被其欺惑者深。朕若不如此明白降旨。分析伊等姦偽之術。充惡之性。不孝不忠之行。衆皆難以知曉。今衆人但將伊等果如何好。如何似佛之處。稍爲揣度。則若夢之醒。咸自曉然也。且當皇考之時。朕若欲似伊等結黨。不能得人耶。若欲似伊等邀名。不能致譽耶。若欲效伊等之所行。豈力不能爲之人耶。祇因上天照鑒可畏。

皇考恩德甚重。朕心不忍忘負。是以但寧靜守分。敬謹孝順於

皇考之前。朕自幼時諸兄弟俱恭敬朕躬。朕於兄弟中。亦竝無私嫌。而朕亦從無希冀大位之念。此

皇考所深鑒。衆人所共知也。昔朕之兄弟中。往往有得罪

皇考者。朕身爲之解釋調停。以寬解

皇考之怒。凡此不可枚舉。現今諸王與

皇考親近侍衛俱悉知之。朕非邀名。亦非爲伊等。乃實爲

君父年高。仰體

聖躬之故。是以堅持心志而行之耳。莅位以來。爲因國家利害所關。但欲伊等改其充悖之性。以及於善耳。設使朕先便有希冀此位之念。今已登此位矣。又於伊等何仇乎。朕從前若有被兄弟凌辱。或致朕於惡地。或於朕有虧傷處。如此等私怨。僅有一事。僅有一人。亦

必不能掩衆人之耳目。

皇考在時。朕賴

皇考之恩。平安尊榮。已四十五年。與此等不肖弟輩。豈但竝無仇隙。即些微一言之不合。亦未有也。朕臨御以來。日夜念

皇考之恩。付託之重。於政事竭力勤求。已經四載。爾衆大臣朝夕在廷。覲面奏事。豈有不知之理。自古帝王。未有如我

聖祖皇考之勤政者。即

皇考之勤。亦無自朝至暮。辦事之理。但朕甫登大位。因素性於事。不好干預。臣工皆所未識。政務皆所未經。念

皇考付託之重大。恐其隕越遺漏。故爾精勤求治。自晨至暮。總無間斷。伊等不得窺朕之瑕隙。於元年二年間。造言有謂朕每日早理事。日中即醉飲者。又有謂朕日中酒醒。日是方理事者。朕當時即已聞知。諸卿寧不聞乎。朕從不能飲。若彼時即降諭旨。似乎弭謗。亦謂

流言虛實。歷久自明。故未即降諭旨。經今日載。朕從前不飲之處。衆已共知。伊等見朕勤理政事。又

皇考以大業付託朕躬。姦惡之徒。遂欲以不美之名。加之於朕。以有過加之。

皇考欲使天下擾亂不已。故又造此等無稽之言。傳播聲揚。今郭允進作書。拋入塞。撈額驕中。內云。十月作亂。八佛被囚。軍民怨新。主又謂朕自即位以來。遭旱潦饑荒之災。等語。觀

此實乃阿其那。塞思黑。允禔。允祿等朋黨之姦。逆兇惡之小人行亂作惡之書。辨阜隸旗棍等貪取貨財。訛詐尋事。慣於鑽營之徒。見朕將部院衙門及各省私弊。盡行除革。政治肅清。此輩宵小之人。不能行其劫掠訛詐之事。始移恨於朕。不憚法度。不畏死亡。特造此等悖亂之語。以搖動人心。擾亂國家。欲使朕心疑畏。將此輩惡棍朋謀之人。容忍寬假之意。朕以聖賢大公至正之道。治天下。焉有因

此等悖逆之言遂爾畏懼寬假之理乎謂阿其那爲佛者豈以其不孝不忠如鬼如蜮之行乎不然伊又有何等忠孝仁慈之美行耶似此兇暴惡詐姦險之佛誠自古所未聞者況水旱疾疫世所有者此輩如此妄言儻偶逢其事衆即以其言爲驗而信之矣所關甚鉅朕即位三年以來幸叨

天貺衆所知者此豈可以假飾之事乎儻非皇天眷佑稍合此輩造作之言又不知如何造作謗訕矣如直省去歲偶值水災朕即發粟數百萬石賑救又令修治堤塘大開水利因軫念元元之故動用數百萬帑金使直省數百萬黎民竟若無災不致艱食直隸通省百姓之感戴亦難掩衆人之耳目天下軍民朕愛之俱如赤子自臨御以來所以推恩於軍民者甚備天下之人何故不戴朕恩反生怨恨也且不知怨朕何事也豈即以懲治阿其那等當誅之姦類故乎如朕即位三年有一

事可致軍民之怨朕萬歲後何以見我

皇考在

天之靈朕如有致軍民可怨之處衆人即當明言今者內有郭允進之輩外有蔡懷璽之徒任意造作各樣謚言實國家之姦賊不可以不正法也我朝自

太祖

太宗肇造區宇至我

皇考百有餘年滿洲等世沐恩膏朕承

皇考之命嗣此鴻基天惟一日國止一君八旗人等亦惟感戴大君一心事朕而已似此不忠不孝之輩擾亂國家妄行不法亂臣賊子之居心行事八旗之人聆朕曉諭之旨當必駭然深燭其行事之悖亂當切齒而共恨之者嗣後爾等各部院衙門八旗之內有如此等妄造語言搖亂人心者汝等加意訪拏誅殛數人羣小自然戒懼不敢妄爲矣儻知之間之故作不知被他處拏獲審出時將隱匿

之人照犯人一例治罪塞楞額陳奏甚是可嘉大凡微賤小人不知國家之大義懷姦隱匿以示私恩如塞思黑允禩等以關係已身之事值此等妄言之人尚故作不知縱之以示寬仁非國家之叛臣賊子而何且置法紀於何地乎從前諸王大臣請將阿其那塞思黑允禩即行正法斷不可留所奏甚為得理此輩包藏異心撓亂國政乃獲罪於

宗廟

社稷與我

皇考之人理應正法但伊等歷年結成黨與妄造語言盡惑人心久矣阿其那等種種姦詐惡逆之事中外及八旗軍民人等尚未得偏知此事乃關係

皇考及朕躬之事今故將此輩姦惡不忠不孝大罪備悉言明使中外之人昭然盡曉即將此輩正法亦屬當然日後亦不得議朕即姑留之不過少延其性命耳亦無所關礙汝等

謹記此旨錄出奏覽後傳與京城內外八旗軍民人等一體知之○旌表河南太康縣烈婦劉重三妻王氏拒姦不辱自縊完貞給銀建坊入祠致祭如例○己酉諭宗人府順承郡王錫保才品優長乃國家實心効力之賢王今在內廷行走差遣甚多王之費用亦多著給與親王俸護衛官員俱照親王之數用

○又諭十五阿哥允禩封為貝勒著在

陵上居住二十阿哥允禩封為貝子各賞給內

府佐領并各給藍甲兵丁○諭領侍衛內大臣等朕思教育三旗之記名功臣子孫若令伊等在一處讀書則教授之人必不加勉而衆幼童聚於一處亦不得實在肄業將此內二十歲以上曾習清漢書者爾等查明各與二兩錢糧米石今在部院為貼寫筆帖式令該管大臣將優者保奏以筆帖式補用若二十歲以上之不曾讀書者照護軍與四兩錢糧米石今在捕牲執事人處行走并給養馬

錢優者即可用爲侍衛或補授官職其十九歲以下者如在家能延師教訓無庸併及其餘每月與四兩錢糧以爲延師肄業之費此次恩施併將大臣等之子孫一體均沾交伊等父兄令將子弟之文武學業加意教訓俟伊等至二十歲時奏聞朕所以如此施恩者凡欲成就功臣之子孫也伊等父兄理宜仰體朕意各自諄切教其子弟庶伊等之文武學業俱得漸進以底於成就矣以鑲白旗護軍統領哈岱署正白旗蒙古都統陞內務府郎中尚志舜爲內務府總管添設山東鄭城縣大興鎮千總一員兵五十名屬沂州營管轄從山東巡撫陳世倌請也朝鮮國王李昫遣陪臣李橈賁表謝封世子恩并貢方物宴賚如例○庚戌刑部等衙門議奏捏造小抄之何遇恩等依律斬決得旨何遇恩邵兩山俱改爲應斬著監候秋後處決報房捏寫小抄以無爲有甚屬可惡朕素性事

事率真不爲粉飾今歲駐蹕圓明園適值花開時諸大臣奏事齊集朕於理事後偶爾率同觀覽賜以家常食饌爲時不過二三刻仍以吏治民生人心風俗諄諄誥誡君臣互相勸勉竝不因遊覽而忘咨儆也賜食畢朕仍至勤政殿辦事如常此滿漢文武大臣所共知共見者今觀小抄所載既可以捏造全無影響之談則從前之偶爾看花又不知如何粉飾傳播矣夫自古帝王遊燕亦所不廢果能於遊燕時所對者皆諸王大臣所言者皆民生國計其於勸勉化導不大有裨益乎總之人主所最要者在於一心果誠心戒省念茲在茲無地非咨儆之處也乃無識之人不能知此又加以捏造之言令人聞而疑駭如小抄所載正復不少又如各省督撫貢獻地方土產食物此亦封疆大臣達瞻仰之情展恭敬之悃實不便一概屏却昔聖祖仁皇帝時常擇其不適於用者皆不收受

朕思遠方之物既已齎至京師。若不收受。則  
攜回反多路費。故常體其情而受之。而宮中  
所用有限。每因諸臣奏事之餘。隨便賞賜。總  
因朕心之待諸臣。坦易真率。實是家人一體  
之誼。若謂朕借此爲鼓舞臣工之具。因以分  
別朕待諸王大臣之輕重。則不知大體之甚  
者也。又見督撫等自陳本中有將頒賜細物  
臚列詳載者。此等識見甚屬卑陋。至於外任  
微員武弁。出京時朕擇其可以琢磨者。每召  
入訓誨。又加恩賜。無非欲其捧至任所。觀瞻  
賜物。思朕訓誨之切。以盡職守。而伊等出外  
往往誇耀鋪張。以致訛傳失實。似此卑陋之  
見。謬誤之言。遠近傳聞。安能察其真偽。故因  
小抄捏造之事。竝諭及之。○辛亥。

上詣

恩佑寺行禮畢回宮。○壬子。工部等衙門議覆  
怡親王允祥疏言。畿輔西南水利。一拒馬河  
爲涿水之下流。白溝河爲拒馬河之歸宿。馬

頭芒牛諸水。又皆爲白溝河之枝。津水泉疏  
衍俱可灌田。惟芒牛下無所歸。多致泛溢。請  
於高橋以下。疏濬淤塞。使安流入淀。則房涿  
之水利可興。一房涿之間。王家莊等處。向係  
水田。改爲旱田。甚屬可惜。請於鐵鎖崖分流  
之處。深溝側注。使水之來者不窮。復於白溝  
河之上。隨宜建閘。使水之去者有節。則啓閉  
以時。王家莊等處之水田。可復。一易水有三  
濡水。名北易。電水。名南易。武水。名中易。自濡  
水與涿水合。其流始大。請循石壩之舊基。考  
開渠之遺跡。沿流建閘。以廣水利。一徐水分  
爲諸河。而安州實九河下流。有徐水爲蓄洩  
之方。則安州無泛溢之害。請分減依城河。以  
上諸水。令電水。徐水。徑趨東淀。復疏引一畝  
方順蒲水。九龍等泉。以資灌溉。一唐河上承  
涿水。合滋沙二河。明代於電水村架木爲槽。  
以過水。號爲騰橋。溉田無算。今請於唐水所  
經之處。築岸濬渠。復多設騰橋。以防衝潰。則

節宣有法而濡溉無窮。沙河在唐河之南者其流爲大。請凡阜平行唐新樂之水田有泉渠堙廢者盡行疏濬以資民利。一滋水自行唐縣牛飲山白鹿谷而下洶湧澎湃淤田沒稼請於靈壽之滋水七祖寨公頭錦繡大明川等處壅流積水以溉田疇復於深澤之龍泉垆沃仁橋等處疏濬河流鑿渠收利至豬龍一帶建閘築堤及時防護則惠去而利可獨存。一滹沱河性最悍急合治河而益大當開治河以殺滹沱之勢引洩河以導治河之歸請將治河入滹之處堅築大隄以遏絕之引入洩河以適其性則寧晉東鹿之民得有寧宇而正定諸縣水利可以漸興。一洩河爲四水交流故名洩城舊曾築隄以備旱澇仍請建壩蓄水令農民易於戽汲又縱橫開溝今可通流斯爲萬全之利。一槐水午水泚水泥河泚水沙水李陽河七里河小馬河柳河等諸水故道久堙源流可考請酌量疏通

令漫水有歸則腴田可復。一聖水井白馬河牛尾河諸水皆可爲田疇之利請將白馬入泊故道疏濬通暢嚴禁邢民閉閘專利復於牛尾河經行之處酌量建閘以時啟閉則任縣民田永賴。一邢臺泉河無數故曰百泉舊有均利均濟均惠通濟通惠通利永賴惠民邵家新閘博濟永潤普潤諸閘引百泉水溉田請按閘座上下遇需水之時先閉下閘俟蓄水既盈乃閉上閘復蓄如前各以三日爲期禁民無得擅專攬越并展拓河身一倍則南和任縣皆爲澤國。一野河引流凡七十二道會於沙河又有洺河與沙河合爲沙洺河常苦涸竭請引滏陽河入沙洺今永年鷄澤南和等縣並得沾溉之利。一滏陽河合諸沁二水其流甚鉅向時建有八閘應修復以時啟閉使上下均平各沾水澤。一南北二泊爲衆水所匯請於穆家口河道隘者廣之淺者深之令水勢得分復於邢家灣王甫隄諸處



橋之廢者葺之少者增之使水得暢流不致梗塞再將澧河古隄增卑培薄使水無泛決則任縣隆平之民俱獲利益。○寧晉泊地窪水深自滹沱橫截滄水七里河口淤爲平地泊水無歸滄之路遂爲民害請於交口營上村等處大加展挖使隘口寬深則積潦消而涸出之地可耕再作小隄以拒外至之水作斗門以洩內出之水則汙萊悉成沃壤矣。○滹沱爲京西大川綿亘千餘里時決時徙深州東鹿尤被其害查南和縣有乾河爲滹沱入滄舊路請自張岔開挑六七里務令寬深直達決河復改流自木邱至焦岡導滹河入滄水則腴田盡復深東之衝決可免矣。以上十七條均應如所請從之。○甲寅夏至祭地於方澤遣康親王崇安行禮。○孝恭仁皇后三週忌辰上詣

壽皇殿行禮先是

上有旨親往祭

陵王大臣等以

聖躬素畏炎暑萬幾已極勞苦又觸熱往返五六百里洵非所宜且二麥登場一路夫役祇候不免耽誤農功因合詞懇請停止

上勉從所請命

皇四子弘曆前往行禮。○丙辰

上御太和殿視朝諸王及文武陞轉各官謝恩

次朝鮮國使臣行禮。○

上詣

恩佑寺行禮畢幸圓明園。○丁巳廣東巡撫楊文乾疏報姦徒鼓衆打搶米廠毆傷官弁喧鬧公堂內有旗標兵丁請持差大臣審理得旨原任廣州將軍李林已今來京著兵部左侍郎塞楞額馳驛速赴廣州會同署廣州將軍阿克敦巡撫楊文乾審究。○戊午諭兵部勒什布著以副都統銜管理阿爾泰一路軍

臺事務。解正白旗護軍統領來文任以正白旗蒙古副都統滿色署本旗護軍統領。己未康親王崇安等議奏蘇努七十係阿其那塞思黑黨亂助逆之罪魁雖經身死應照大逆律戮屍揚灰抄沒家產以彰

國典其蘇努七十之子孫內有克惡妄亂者竝請正法其餘發白都納等處當苦差蘇努之第四子原任副都統赫世亨現在甘州請提拏正法得旨蘇努七十照議治罪以彰巨惡

伊等家產諒已隱匿何必抄沒蘇努之子赫世亨現在軍前著提解刑部監禁其餘子孫現在右衛著著交與將軍申穆德即在右衛監禁蘇努七十之子孫內有姦惡不可留者俱著右翼諸王旗下大臣公同分別詳察指名奏請候旨尋議蘇努七十之子孫內赫世亨等十二人實係姦惡俱請即行正法得旨蘇努七十結為黨援擾亂國政歷年傷

皇考之心伊等子孫理當加以誅戮但將如許

人正法朕心不忍蘇努之子勒什亨烏爾陳著仍在誠親王允祉處禁錮俟阿其那塞思黑事定另降諭旨赫世亨魯爾金福爾陳書爾陳木爾陳庫章阿不可今在一處著押往河南山東山西江南蘇州浙江等處分交該督撫於衙門內禁錮其餘俱著交與右衛將軍入於右衛兵額內嚴行約束如仍不悛改指名題參七十之子福永著擬斬監候珠棟福明七十之子壽善著交與伊族人其如何處治之處著誠親王允祉具奏其餘著發遣船廠披甲嚴行管束。禮部等衙門遵旨議覆朝鮮國王李昫之四代祖李倣在明天啟三年請封當據該國宗族臣民稱倣恭順因籲請統理國事今該國王奏稱有明十六朝記直以篡奪書之實屬冤証請刪除雜說著為定論應如所請俟明史告成後將列傳內立李倣之事頒發該國從之。庚申諭都察院聞京城近日米價騰貴恐有姦人囤積射

利因天氣連陰借此擾亂著都察院轉飭五城曉諭各行戶不得過高價值勒索小民儻有囤積遏糴不遵勸諭者該城御史密行察訪從重治罪將京倉好米發五萬石分給五城每城領米一萬石照例立廠委員平糴俟市價平減即行停止其未糴之米即存貯該城將來或市價復昂即將此米平糴若此米用完仍需平糴著都察院再行請旨○以內閣學士衆佛保兼理藩院侍郎事○辛酉太子少傅大學士高其位以老疾乞休溫旨慰留之○兵部議覆浙江巡撫李衛疏言浙省爲江閩咽喉向設礮位甚少請添設子母礮四十八位分給滿漢駐防兵揀選協領等員教習演放應如所請從之

大清世宗敬天昌運建中表正文武英明寬仁信毅大孝至誠憲皇帝實錄卷之四十四

大清世宗敬天昌運建中表正文武英明寬仁  
信毅大孝至誠憲皇帝實錄卷之四十五

監修總裁官光祿大夫經筵講官太僕寺卿和碩大學士兼兵部尚書總理事務王等伯加十五級臣鄂爾泰

總裁官光祿大夫經筵講官起居注太僕寺卿和碩大學士兼戶部尚書仍兼吏部尚書翰林院掌院

事王等伯加十五級臣張廷玉光祿大夫經筵講官起居注太僕寺卿和碩大學士兼工部尚書仍兼

翰林院掌院事加二級臣福祿光祿大夫經筵講官太子太僕寺卿和碩大學士兼禮部尚書加二級臣徐本光祿大夫

經筵講官議政大臣滿洲內閣大學士事務禮部尚書仍兼管太常寺鴻臚寺事王等伯

敕修

雍正四年丙午六月壬戌朔諭大學士九卿

字載奏四十二

翰詹科道等朕自即位以來念

皇考付託之重惟恐天下之人有一夫一婦不  
獲其所自朝至夜殫心竭慮晷刻靡寧無非  
欲休養民生澄清吏治使中外永享昇平之  
福以仰慰我

聖祖仁皇帝在

天之靈即如前歲雨澤偶愆去歲畿輔被潦朕

在宮中虔禱

上天中夜屢起瞻望雲色以卜晴雨祈禱之時

嘗終日飲膳不御不止於減膳而已此皆朕  
默盡其心不肯令人知之在朕心以為敬

天勤民勵精圖治之意至真至切可以自信無

少愧歉於中故凡下詔求言之事未曾舉行

今夏二麥登場之時適值連雨目前雖晴尚

未開霽朕為小民深切軫念且姦民郭允進

私貼謠歌有軍民怨新主之語朕因此反躬

自省不能無疑或用入行政之間在朕已實

盡其心而衆人觀論尚有以為未當之處亦

字載奏四十二

未可知總之千萬人之中有一二人或有異

議朕心即欲省察而權衡之爾諸臣皆朕簡

用之員職在劾勦誼同休戚若朕身有過可

直言無隱政治得失亦即各抒己見據實陳

奏朕必嘉納勿視為具文勿有所瞻顧苟且

塞責重負朕真切清問之至意尋大學士等

奏言

皇上自御極以來

郊壇大典禋祀必親精誠靡懈值暘雨偶愆虔

禱宮中。終日却膳。中夜屢興。

皇上敬

天之誠。從古未有也。諒陰大禮。盡倫盡制。齋居素服。優見愾聞之誠。三年如一日。每禮遇舊臣。必曰。此仰體

聖祖皇帝之意。每廣行惠政。必曰。此仰推

聖祖皇帝之恩。夙興夜寐。惟以繼志述事爲心。

皇上孝德之隆。從古未有也。開恩科。廣學額。崇

重科目。澄清吏道。命內外之臣。密舉所知。臨

軒召見。不以小善而或遺。不以微瑕而遽棄。

博采旁搜。惟恐不及。

皇上用人之當。從古未有也。綜理萬幾。細大必

周。兢兢業業。竟日端坐。至黃昏秉燭之候。尚

覽悉庶務。批答奏章。

皇上莅政之勤。從古未有也。豁除蘇松江西浮

糧。及各省積欠。不下數百餘萬。直省少有水

旱歉收。即蠲賑緩征。八旗人等。俱蒙養育教

誨。每遇刑讞。必詳求再四。迺定爰書。去年畿

甸偶遭水患。發太倉之貯。運奉天之糧。分遣

官員。察視賑濟。被水之區。官給耕牛。令其及

時播植。就食京師者。給資送回原籍。額征舊

欠。悉予停緩。又有畿甸九十九河。潴於三淀。

遇潦必溢。爲患已久。特遣親王大臣。相度疏

濬。壅闢水田。遠至寧夏邊外。浚河修渠。開沃

田累萬頃。以惠邊氓。米價驟貴。發米五萬石。

減價平糶。又將八旗甲米。先期支放。米價頓

減。

皇上愛民之仁。從古未有也。是以萬國九區。感

深高厚。遐邇臣庶。慶遇隆平。咸以爲

皇上嗣紹

聖祖仁皇帝丕基。協德重華。如舜之繼堯。今日

之運。即唐虞之盛也。蒼穹協應。地軸呈祥。日

月璧合於營室。五緯珠聯於乾方。響應畢臻。

昭然可覩。姦民郭允進。於無數億萬之中。自

絕於大造者。凡有血氣。皆切齒痛憤。不願與

之戴履。天地其私貼謠歌。又何能搖惑人聽。

予。至於求言之切。從古又未有如

皇上者。科道則封章奏事。文武諸臣則分班進  
摺。外而封疆大臣及方面有司。得以上陳地  
方事宜。內而引見各官。並於繕寫履歷中。皆  
得敷陳所見。是

皇上無時不求言。而諸臣無人不獲盡言也。芻  
蕘之論。每賜包容。千慮一得。輒令廷議。大舜  
之好問好察。執兩用中。我

皇上固已追媲盛德矣。臣等祇聆

聖諭。儻有未議。可効涓埃。即當陳奏。以仰副  
聖主懸帑設鐸之盛心。疏入

諭曰。朕自即位以來。朝乾夕惕。惟恐有負

皇考付託之重。於國計民生。風俗吏治。時時留  
心諮訪。而未專下求言之詔者。亦惟恐諸臣

因此或有頌揚之語也。近因雨水稍多。朕推  
誠降旨。詢問政治得失。今覽諸卿所奏。敷陳  
功德。朕若作愧歎之詞。觀覽亦屬居然任受  
矣。奏內頌揚之語。朕不作頌揚觀。惟實心作

規諫。期望觀益加黽勉。以期副諸卿陳奏之  
語。以仰慰

皇考在天之靈。諸卿近來皆守法奉公。恪勤供  
職。於敷奏舉劾之間。朕洞見諸卿之心。朕甚  
嘉焉。但似出於勉強。尚未底於自然。亦期諸  
卿交相砥礪。合於大公。贊襄化理。以副朕心。  
膺股肱之寄。朕既宵旰勵精。諸卿亦當公忠  
匪懈。必底自然。君臣至誠。勉勗一德。同心爲  
四海蒼生造福。澤於無窮。以共報我

皇考之深恩。是朕之厚望也。○以翰林院編修  
徐本檢討姚三辰俱署日講起居注官。○癸  
亥。諭議政王大臣等。穆克登屢次所奏之事。  
殊覺勉強。不勝將軍之任。公巴賽著授爲振  
武將軍。常色禮穆克登。丁壽俱授爲叅贊。協  
同辦事。○諭吏部兵部。凡因冤抑被叅而復  
職者。皆係朕特恩超拔之人。該員自應加意  
奮勉。以報格外之恩。嗣後此等人員。除因公  
註誤外。若居官仍有貪酷不法者。應重治其

罪題叅虧空革職之員補完開復與捐復者亦如之著行文各直省將軍督撫提鎮一體遵行○甲子康親王崇安及諸王貝勒貝子公滿漢文武大臣等公同議奏阿其那罪狀四十款阿其那秉性姦險立心詭詐康熙四十七年冬

聖祖仁皇帝聖體違和奉

旨檢視方藥阿其那毫無憂色醫藥之事漫不關心惟與塞思黑允禩等促生密語情狀叵

測及

聖躬平復毫無喜色反有目前雖愈將來之事奈何等語驚駭聽聞衆所共知者一也素蓄異志聽信相士張明德誑言遂欲謀殺二阿哥希圖儲位又與大阿哥暗蓄刺客謀爲不軌衆所共知者一也趨奉裕親王福全令其保薦及二阿哥既廢揆敘與廷臣暗通消息各人手心俱寫一八字衆所共知者一也詭托矯廉而凡有用財收買人心之處皆取之

於塞思黑托人重價購書誇其好學九流術士招至家中藏之密室厚加賞給俾各處稱揚衆所共知者一也平日受制於妻一日與何焯共談任聽伊妻門外大笑不知省避又將何焯之幼女私養宅中以爲己女衆所共知者一也二阿哥初廢時希冀儲位邪謀日熾結黨鑽營及事情洩漏

聖祖仁皇帝震怒提拏發審問所犯情由俱已顯著

聖祖仁皇帝召集諸王大臣等細數其姦惡降旨革去貝勒爲閒散宗室衆所共知者一也康熙五十三年冬

聖祖仁皇帝駐蹕遙亭阿其那遣人以將斃之鷹進獻又稱伊在湯山等候進京並不請旨行止自由

聖祖仁皇帝憤怒嚴訊伊之護衛及太監等朋黨姦謀盡行顯露其太監馮進朝供稱鄂倫岱阿靈阿係伊逆黨彼時鄂倫岱阿靈阿理

屈辭窮倉皇退避

聖祖仁皇帝降旨云。朕與伊父子之情絕矣。衆所共知者一也。是日

聖祖仁皇帝又降旨諭衆阿哥云。八阿哥允禩大背臣道。覓人謀殺皇太子。竟未念及朕躬也。前朕患病。諸大臣公保八阿哥。朕甚無奈。只得將不可冊立之允初放出。五載之內。極其鬱悶。允禩仍望遂其初念。與亂臣賊子等結成黨與。密行姦險。謂朕年已老邁。歲月無多。及至不諱。伊曾爲衆人所保。誰敢爭執。後日必有行同狗彘之阿哥。仰賴其恩。爲之興兵構難。逼朕遜位而立允禩。若果如此。朕惟有含笑而歿已耳。朕深爲憤怒。特諭爾等衆阿哥。俱當念朕慈恩。遵朕之旨。始爲子臣之理。允禩因不得立爲皇太子。恨朕切骨。伊之黨與亦皆如此。二阿哥悖逆。屢失人心。允禩則屢結人心。此人之險。實百倍於二阿哥也。此

聖祖仁皇帝之諭旨。衆所共知者一也。又因伊乳公雅齊布之叔廐長吳達禮與御史永泰同出關差。永泰所給銀兩不多。阿其那不顧國體。將永泰私行箠楚。

聖祖仁皇帝將雅齊布賞與公主。阿其那背旨潛留雅齊布在京。致將雅齊布夫婦正法嗣後

聖祖仁皇帝曾降諭旨云。允禩因朕將雅齊布正法。遂欲爲伊乳公報復。與朕結讎愈深矣。爲臣子者。竟敢與

君父結怨成讎。逆亂已極。衆所共知者一也。又自知種種不法。惟恐搜其字蹟。家中惡黨書札悉行焚燒。將

聖祖仁皇帝硃批摺子一併銷燬。悖逆不敬。衆所共知者一也。二阿哥復行拏禁之後。阿其那徑到

聖祖仁皇帝御前密奏云。我今如何行走。情願卧病不起。



聖祖仁皇帝知其志望非分。作此試探之語。降旨切責。衆所共知者一也。見儲位未定。與塞思黑允禩。允禩交結彌固。必欲遂其大志。誦詐萬端致。

聖祖仁皇帝憤恨感傷。時爲不豫。不孝之罪。上通於天。衆所共知者一也。既革貝勒之後。暗以銀馬等物。要結汝福等人入黨。又密同太監李玉。擅革膳房行走之厄穆克託。又與翰林何焯。固結匪黨。盜取名譽。潛蓄異心。衆所共知者一也。阿其那母妃喪時。凡事踰禮。沽取孝名。已及百日。尚令人扶掖而行。而受塞思黑允禩。允禩等每日輪班送飯。豕羊狼籍。筵席喧囂。脫孝後。面貌愈加豐碩。

聖祖仁皇帝降旨切責云。虛僞不孝。實屬姦詭。衆所共知者一也。康熙五十五年秋。阿其那偶患傷寒。正值

聖祖仁皇帝自熱河回鑾。冀以病痊。幸邀寬宥。故托大病。懇求魏珠誑奏。將所停俸米賞給。

病愈。仍稱病重。魏珠往看。乃下炕迎接在地叩謝。姦僞無恥。衆所共知者一也。康熙五十六年春。阿其那病痊。

聖祖俯垂慈憫。將賜食物。遣人降旨云。爾病初愈。不知何物相宜。故未敢送去。而阿其那忽起疑端。謂未敢二字。承受不起。即往宮中叩懇。

聖祖仁皇帝復降旨切責。僭分妄疑。大虧孝道。衆所共知者一也。外作矯廉。內多貪鄙。數遣護衛太監等。私向赫壽。吳存禮。滿丕。索要銀兩。衆所共知者一也。

聖祖仁皇帝賓天時。阿其那並不哀戚。乃於院外倚柱獨立凝思。派辦事務。全然不理。亦不回答。其怨憤可知。衆所共知者一也。

皇上龍飛御極。情敦同氣。冀其改過自新。念其尚有才幹。晉封親王。俾同總理事務。阿其那全無感激受恩之日。出口怨誹。衆所共知者一也。自蒙恩委任後。挾私懷詐。遇事播弄。冀

以歸過主上。搖惑衆心。如奉移。

聖祖仁皇帝梓宮。誑請裁減人夫一半。意欲遲誤。

山陵大事。衆所共知者一也。

皇上孝思罔極。特命莽鵠立。恭寫。

聖祖仁皇帝御容。供奉瞻仰。阿其那乃奏稱不當供奉。語言狂謬。衆所共知者一也。任理藩院時。科爾沁蒙古乃。

累朝近親蒙。

聖祖仁皇帝六十年厚恩。其台吉等叩謁。

梓宮。阿其那令人於邊口攔阻。致蒙古呼天號。

泣。衆所共知者一也。任上駟院時。心懷叵測。

請減內廐歷來所蓄馬匹。衆所共知者一也。

任工部時。盛京。

陵寢所用紅土。舊例自京採買運送。阿其那奏。

請折銀就彼採買。借節省脚價之名。輕慢。

陵工。衆所共知者一也。監造。

列祖神牌。漆流金駁。全不經心。實大不敬。衆所。

共知者一也。預備祝版之案。朽爛不堪製造。軍前之器。鈍敝無用。衆所共知者一也。雍正元年春。桃汛將發。要兒渡等處河工。關係緊要。地方官正值辦理。

陵工大事。乃奏請將河工交與地方官。不令監督看守。欲使彼此交代耽誤。隄岸衝決。殃害百姓。衆所共知者一也。

皇上乘輿法物。以斷釘薄板爲之。更衣幄次。以污油惡漆塗之。衆所共知者一也。清查工部錢糧。於應追者。反與蠲免。於應免者。反令嚴追。顛倒是非。使人怨望。衆所共知者一也。工部說堂之稿。將伊擡寫。伊看過並不改正。徑用印而行。妄自尊大。衆所共知者一也。庇護私人。謀集黨與。以私財數千金。代岳周完公補項。繼又以典舖數萬金。助其作姦犯科。衆所共知者一也。包衣披甲額數。在。

御前密奏之時。則請裁減。在公廷議覆之日。則請增添。及至姦僞敗露。衆怨沸騰。爭鬧其門。

皇上降旨察訊伊又枉陷無辜以亂國法衆所共知者一也阿其那之妻不守婦道

聖祖仁皇帝諭旨甚明

皇上降旨遣回母家伊女婢白哥勸伊於

皇上前謝罪奏懇乃憤然曰我丈夫也豈因妻室之故而求人乎白哥見伊日在醉鄉屢次勸諫不從遂憤恨自縊而死逆理昏亂衆所共知者一也門下太監閔進代伊隱瞞所行不法之事則厚賞銀幣護軍九十六據實供吐違其本意則立斃杖下長史胡什吞以直言觸怒痛加箠楚推入冰內幾致殞命身爲人臣敢操賞罰生殺之柄衆所共知者一也清查太常寺奏銷黃冊遲至一年之久尚不查奏違

聖旨而輕祀典衆所共知者一也門上佐領係管理事務之員阿其那所用哈升乃擄來之厄魯特用爲頭等護衛佐領衆所共知者一也捏稱工部郎中三泰虧欠銀兩尋隙奏

衆所共知者一也

皇上所交利益旗下銀十萬兩內擅自動用五六萬兩私買人口益張羽翼衆所共知者一也奉旨諭令峻改乃舍力發誓云我若再與塞思黑往來一家俱死一家二字顯行詛咒衆所共知者一也奉旨拘禁宗人府全無恐懼反有不顧全屍之語凶惡之性古今罕聞衆所共知者一也塞思黑罪狀二十八款塞思黑行止惡亂謀望非常暗以貲財買結人心且使門下之人廣爲延譽收西洋人穆經遠爲腹心誇稱其善希圖儲位衆所共知者一也康熙五十六年冬

聖祖仁皇帝召諸王子面詢建儲之事塞思黑陳奏之語背謬

聖祖仁皇帝面加切責是夜三鼓時聖祖仁皇帝念及塞思黑之言益增憤怒中夜起坐次日塞思黑即畏懼稱病平日結交近侍密行伺察探聽衆所共知者一也詐稱有

疾私向穆經遠云

皇父欲立我爲皇太子。是以詐病迴避。僭妄無恥。衆所共知者一也。

聖祖仁皇帝稍加教訓。即生怨恚。每云。不過革此微末貝子耳。又每云。如大阿哥。二阿哥。一例拘禁。我倒快樂。出言悖逆。衆所共知者一也。因封貝子。未遂其望。令秦道然各處稱其寬洪大量。慈祥愷悌。圖買人心。以謀大位。又密結何圖。令其姑赴同知之任。如有用處。即速來京。不軌之情。公然出口。無忌。衆所共知者一也。康熙四十七年。

聖祖仁皇帝降旨。凡非本王門上之人。俱不許在別王子阿哥處行走。而塞思黑抗不遵奉。仍復招集私人。往來無忌。衆所共知者一也。聖祖仁皇帝將阿其那鎖拏發審。塞思黑與允禩懷藏毒藥。願與同死。又令人攜帶鎖鑰。從行。以示同患之意。及阿其那蒙恩寬免。塞思黑當衆取出毒藥。與衆人看畢而棄之。因結

死黨。兇暴悖亂。衆所共知者一也。向秦道然言生有異徵。又言曾患病。見金甲神滿屋梁。詭詐妖言。欲惑人以圖非分。衆所共知者一也。將伊子弘晷認內侍魏珠等爲伯叔。窺探宮禁信息。行事卑污。衆所共知者一也。允禩往軍前時。塞思黑私與密約。若

聖祖仁皇帝聖躬欠安。即遣人馳信軍前。以便計議。衆所共知者一也。伊女聘與明珠之孫永福。索取貲財累百萬金。奪據各處貿易。貪婪無厭。衆所共知者一也。

聖祖仁皇帝賓天時

皇上正在哀痛哭泣。塞思黑突至

上前。對坐箕踞。無人臣禮。其情叵測。衆所共知者一也。

梓宮前上食。舉哀。塞思黑全無滴淚。

皇上降旨詢問。即出帕忿爭。情狀不遜。衆所共知者一也。允禩往軍前時。塞思黑遣太監隨從。復差人往來寄信。允禩回京時。又差人迎

過大同暗籌私事衆所共知者一也又私與允祇允禔相約彼此往來密信看後即行燒燬圖謀不法之處顯然衆所共知者一也

聖慈曲加保全發往西寧居住伊屢次延挨日期既到西寧寄書允祇內稱事機已失追悔無及逆亂之語公然形之紙筆衆所共知者一也初到西寧時向穆經遠云越遠越好心懷悖亂衆所共知者一也伊妻路經山右縱容手下人騷擾百姓毆打生員公行不法衆所共知者一也應賠錢糧抗不還項乃將詐取明珠家財數百萬兩帶往西寧凡市買物件聽人索價如數給與圖買人心又越禮犯規僭稱王號衆所共知者一也縱容屬下人在地方生事

皇上特遣都統楚宗往行約束及楚宗到彼宣旨伊不出迎接亦不叩頭謝罪口稱我已出家離世之人種種怨望衆所共知者一也寄與伊子及所屬官員人等字俱用硃批伊子

稱塞思黑之言爲旨僭逆已極衆所共知者一也別造字樣巧編格式令伊子學習打聽內中信息縫於驃夫衣服之內傳遞往來陰謀詭計儼同敵國衆所共知者一也

太祖高皇帝欽定國書臣民所共遵守塞思黑徑敢添造七字頭私行刊刻變亂

祖制衆所共知者一也在西寧時於所居後牆潛開牕戶密與穆經遠往來計議行踪詭秘衆所共知者一也又將資財藏匿穆經遠處令其覓人開鋪京中信息從鋪中密送詭秘若此衆所共知者一也又向穆經遠云前日有人送字來上寫山陝百姓說我好又說我狠苦的話我隨著人向伊說我們兄弟沒有爭天下的道理穆經遠勸將此人拏交楚宗塞思黑縱之使去身在拘禁尚爲此悖逆之語衆所共知者一也具摺請安稱奴才弟摺請

皇后安亦有弟字悖謬已極衆所共知者一也

自康熙元年以來竝無民人投充旗下之例。塞思黑不遵法度。隱匿私置民人一百四十名。又有投充入檔者五名。不入檔者二十名。引誘民戶糾合惡黨。衆所共知者一也。允禩罪狀一十四款。允禩性質狂悖。與阿其那尤相親密。

聖祖仁皇帝於二阿哥之案。將阿其那等問時。召入衆阿哥。諭以阿其那謀奪東宮之罪。現交議政究審。允禩與塞思黑同向。

聖祖仁皇帝之前。允禩奏云。阿其那竝無此心。若將阿其那問罪。我等願與同罪。

聖祖仁皇帝震怒。拔佩刀欲殺允禩。經允禩力勸稍解。將允禩重加責懲。與塞思黑一併逐出。衆所共知者一也。康熙四十八年夏。

聖祖仁皇帝避暑口外。恐伊等聚黨生事。止令阿其那跟隨行走。允禩敝帽故衣。坐小車。裝作販賣之人。私送出口。日則潛踪。而隨夜則至阿其那帳房歇宿。密語通宵。踪跡詭異。衆

所共知者一也。

聖祖仁皇帝知允禩昏愚狂妄。必生事端。因遣往軍前。使不得朋匪爲惡。而允禩與阿其那塞思黑密信往來。曾無間斷。機計莫測。衆所共知者一也。在西邊時。取青海台吉等女子。日夜縱酒淫亂。不恤軍政。修造房屋。勞民費帑。衆所共知者一也。指稱雜項名色。糜費國帑。三四十萬。而進兵止。到穆魯烏蘇。將所運糧餉遲誤。身未到藏。乃於無用之處。傷損官兵千餘。馬駝死者數千。衆所共知者一也。私受哲爾金銀六萬六千兩。將疲瘦馬匹。留與白訥。喂養。令其買辦駝隻。信用藍翎鐵柱。任其招搖撞騙。向噶什圖等索銀十二萬兩。又懼鐵柱舉發。始終庇護。衆所共知者一也。在西寧時。張瞎子爲之算命。詭稱此命定有九五之尊。允禩大喜。稱善。賞銀二十兩。衆所共知者一也。將到京師。一切禮儀。竝不奏請。皇上指示。及到京後。不請。

皇太后安。亦不請。

皇上安。大虧臣子之義。衆所共知者一也。叩謁梓宮。並不哀痛。至。

皇上向伊哭泣相見。伊並不向前抱膝痛哭。拉錫微加扶攜。令請。

上安。反肆咆哮。奏稱拉錫侮慢我。求連我交與宗人府等語。

皇上降旨開諭。伊愈加忿怒。退出。將拉錫痛罵。衆所共知者一也。

孝恭仁皇后上賓。

皇上仰體。

慈恩。將允禩晉封郡王。並無感恩之意。反有忿怒之色。衆所共知者一也。

皇上謁。

陵回蹕。遣拉錫等降旨訓誡。允禩並不下跪。反使氣抗奏。良久。阿其那見衆人共議允禩之非。乃向允禩云。汝應下跪。便寂然無聲而跪。不遵。

皇上諭旨止重阿其那一言。結黨背。

君。公然無忌。衆所共知者一也。允禩之妻病故。皇上厚加恩卹。乃伊奏摺中有我今已到盡頭。一身是病。在世不久等語。怨望非理。衆所共知者一也。不以禮葬其妻。乃於居室之後。幽僻之處。私造兩金塔。一爲伊妻葬地。一備己身葬地。不遵國制。反從番僧之教。悖理不經。衆所共知者一也。姦民蔡懷輿造出大逆之言。明指允禩爲皇帝。塞思黑之母爲太后。用黃紙書寫。隔牆拋入允禩院內。允禩不即奏聞。私自裁去二行。交與把總送至總兵衙門。令其酌量完結。及欽差審問。始理屈詞窮。悖亂之心顯然。衆所共知者一也。以上款蹟。皆舉臣等所知者言之。即秦道然何圖。穆經遠三人所供阿其那惡蹟。繁不勝書。臣等謹按阿其那等。以邪黨爲足恃。而要結之念彌堅。以大位爲可干。而構禍之心不已。不孝不忠。蔑天倫而干國典。罪惡滿盈。昭彰耳目。實朝。

廷之罪人

宗社之姦賊

聖祖仁皇帝嘗降旨嚴責阿其那舌亂臣賊子人人得而誅之

聖明遠鑒正謂今日伏乞

皇上大施乾斷將阿其那塞思黑允禩等即正典刑以爲萬世臣子之炯戒疏入得旨我

皇考聰明首出文武聖神臨御六十餘年功德隆盛如征勦三藩平定朔漠軍國大事皆不

動聲色而措置帖然凡屬凶頑無不革面革心望風嚮化而獨是諸子中有阿其那塞思

黑允禩者姦邪成性包藏禍心私結黨援妄希大位如鬼如蜮變幻千端

皇考曲加矜全寬宥之恩伊等竝無感激悔過之意以致

皇考震怒屢降嚴旨切責忿激之語凡爲子臣者不忍聽聞

聖躬因此數人每憂情感傷時爲不豫朕侍奉

左右安慰

聖懷十數年來費盡苦心委曲調劑此諸兄弟內廷人等所共知者及朕即位以阿其那實爲匪黨倡首之人伊若感恩改過自新則羣邪無所比暱黨與自然解散是以格外優禮晉封王爵推心任用且知其素務虛名故特獎以誠孝二字鼓舞勸勉之蓋朕心實實望其改惡遷善也乃伊辦理事務懷私挾詐過犯甚多朕俱一一寬免未罰伊一月之俸未治伊家下一人之罪亦始終望其改過遷善也迄今三年有餘而悖逆妄亂日益加甚時以蠱惑人心擾亂國政煩朕心激朕怒爲事而公廷之上諸王大臣之前竟至指天誓日詛咒不道不臣之罪人人髮指朕思此等凶頑之人不知德之可感或知法之可畏故將伊革去王爵拘禁宗人府將伊家下數人正法而阿其那反向人云拘禁之後我每飯加餐若全屍以歿我心斷斷不肯似此悖逆之



言實意想所不到古今所罕有也總之伊自知從前所爲之罪久爲朕心所洞悉且爲天地所必誅捫心自問萬無可赦之理遂以伊毒忍之性度朕亦不信朕實有寬宥之心所以故爲種種桀傲狂肆之行以激朕之怒但欲朕將伊即置之於法使天下不明大義之人或生議論致朕之聲名或有損於萬一以快其不臣之心遂其怨望之意朕受

皇考付託之重統御寰區一民一物無不欲其得所以共享

皇考久道化成之福豈於兄弟手足而反忍有傷殘之念乎且朕昔在藩邸時光明正大諸兄弟才識實不及朕待朕悉皆恭敬盡禮但不敢侮慢並無一語之爭競亦無一事之猜嫌此歷來內外皆知者不待朕今日粉飾過言也今登大位豈忽有藏怒匿怨之事而欲修報復乎無奈朕昆弟之中有此等大姦大惡之徒而朕於家庭之間實有萬難萬苦

之處不可以德化不可以威服不可以誠感不可以理喻朕輾轉反覆無可如何含淚呼天我

皇考及

列祖在天之靈定垂昭鑒阿其那與允禩塞思黑允禩允禵結爲死黨而阿其那陰險詭譎實爲罪魁塞思黑之惡亦與相等允禵等狂悖糊塗受其籠絡聽其指揮遂至膠固而不解總之此數人者希冀非分密設邪謀賄結內外朋黨煽惑衆心行險徼幸之輩皆樂爲之用私相推戴而忘君臣之大義此風漸積已二十餘年朕自即位以來竭力料理百凡訓誡而又不得不反覆諄諄告諭衆人者祇因伊等所結之姦黨所行之惡蹟惟朕知之最詳最確故三年以來感之以恩惕之以威百計化導冀其解散悛改無如阿其那倡率不從不但不肯解散悔過而固結復深況此姦黨之風如阿靈阿之子阿爾松阿蘇努之

子勒什亨等皆繼其父志而姦惡過焉似此毫無忌憚父子相承先後濟惡實爲國家之大患必貽後日之深憂者此不待朕之宣諭舉國之人豈不知乎伊等既不肯解散改過若朕此時不將朕所深知灼見者分晰宣諭昭示天下垂訓後人將來朕之子孫欲明晰此逆黨之事恐年歲久遠或有懷挾私心之輩借端牽引反致無罪之人枉被冤抑况朕之所深知者在廷之臣未必能盡知之因三年於茲朕遇便則備悉訓示明指伊等居心行事之姦險今在廷諸臣雖知之矣而天下之人未必能盡知之此是非邪正所關甚大朕所以不得不反覆周詳剖悉曉諭也諸王大臣等臚列阿其那塞思黑允禔各款合詞糾參請正典刑以彰國法叅劾之條事事皆係實蹟而奏章中所不能盡者尚有多端難以悉數今諸王大臣以爲邪黨不剪姦宄不除恐爲

宗社之憂數次力引大義減親之請者固爲得理但朕受

皇考付託之重而手足之內遭遇此等逆亂頑邪百計保全而不得實痛於衷不忍於情然使姑息養姦優柔貽患存大不公之私心懷小不忍之淺見而不籌及於國家

宗社之長計則朕又爲

列祖

皇考之大罪臣矣允禔允禩允禪雖屬狂悖乖張尚非首惡已皆拘禁冀伊等感發天良悔改過惡至阿其那塞思黑治罪之處朕不能即斷俟再加詳細熟思頒發諭旨可將諸王大臣等所奏及朕此旨頒示中外使咸知朕萬難之苦衷天下臣工自必諒朕爲

宗社久安長治之計實有不得已之處也○乙丑山西巡撫伊都立陛辭

上召入諭曰地方大吏一切關係地方事件務必實力行之不可視爲具文即如嚴保甲查

私鑄斷燒鍋。禁賭博。皆朕令爾等奉行之事。儻接到諭旨。毫不經意。只發幾張告示。行之州縣。貼於通衢。即以爲我已奉行矣。嚴禁矣。是將誰欺乎。要必實心遵奉。細訪密查。果有違犯。重治其罪。則懲一可以儆百。使法在必行。方爲有益。并諭令屬官使。皆知奮勵。辦理一切事件。悉出誠心。即如盜案。獲賊過半。照案緝拏。雖有成例。然必設法訪查。務期全獲。抵之於法。則人知畏懼。盜源可清矣。大凡爲大吏者。當正己率屬。砥礪廉隅。持身孤介。固不可貪婪肆志。亦不可矯飾偏枯。不可一味姑容。以貽誤。亦不可謬加叅劾。以塞責。凡事悉準天理。尊君親上。善則歸君。過則歸己。人臣之義。當如是也。朕待臣下。開誠布公。爾等有何疑慮。而不坦白乃心。以取信於朕。慶君臣之交泰乎。其竭力經營。殫心籌畫。毋負朕簡任之意。○調鑲藍旗漢軍都統伊爾哈岱。爲正黃旗蒙古都統。正黃旗漢軍都統盧詢。

爲鑲藍旗漢軍都統。仍令正紅旗滿洲副都統覺羅巴延德。署理陞戶部右侍郎。覺羅塞德。爲正黃旗漢軍都統。仍兼侍郎行走。○丙寅。諭吏部。三年舉行大計。所以激濁揚清。整飭吏治。必舉劾之間。至公至當。方足以昭勸懲之典。查定例。卓異人員。俱送京引見。而叅劾人員。則聽候部院議奏。不行引見。此中或有寬抑。及避重就輕等弊。亦未可定。嗣後大計之年。除貪酷之員。既已指明劣蹟。叅奏無庸。再行引見外。其餘叅劾等官。該部照例處分。出缺。其應作何送京引見之處。九卿詳議具奏。○調陝西延綏總兵官李耀。爲四川重慶總兵官。陞陝西漢中副將蔡良。爲陝西延綏總兵官。○西洋意達里亞國教化王伯納地。哆奏請援釋放。德里格之例。將廣東監禁之畢天祥。計有綱一體施恩。釋放。敕諭曰。德里格。於康熙五十九年。因傳信不實。又妄行陳奏。我

聖祖仁皇帝念係海外之人從寬禁錮及朕即位後頒降恩詔凡情罪可原者悉與赦免開以自新德里格所犯與赦款相符故得省釋彼時廣東大吏未曾以畢天祥計有綱之案入大赦冊內具題上聞今據王奏請朕查二人所犯非在不宥之條即王不行陳奏朕亦必察出施恩今特降旨與廣東大吏將畢天祥計有綱釋放以示朕中外一體寬大矜全之至意○丁卯解順天府府尹張令璜任在吏部侍郎職任行走以翰林院侍講學士山西學政劉於義爲順天府府尹翰林院編修沈錫輅提督山西學政○戊辰湖廣永州總兵官陳尚武緣事革職調雲南曲尋總兵官楊鯤爲直隸正定總兵官江南狼山總兵官楊國相爲湖廣永州總兵官陞浙江湖州副將王紹緒爲江南狼山總兵官○己巳增定湖南省各學取進文童額數長沙善化湘潭茶陵攸縣益陽衡陽衡山耒陽零陵祁陽邵

陽武岡新化巴陵華容澧州武陵桃源會同郴州靖州等二十二州縣向係大學照府學額各取進二十名湘鄉寧鄉常寧安鄉溆浦永興桂陽等七縣向係中學升爲大學各取進十五名辰谿縣向係小學升爲中學取進十二名○庚午諭刑部緝拏賭博當場所獲銀錢不必入官即賞給拏獲之人以示鼓勵嗣後永爲定例○諭總督倉場侍郎旗丁輓運天儲每歲勤勞朕屢降諭旨加恩優恤欲其俯仰充足不至匱乏近聞糧船抵通石壩經紀勒索斛費每船至三十金在從前旗丁多帶貨物射利營私所過地方不無需索煩擾故抵通之後有此陋規今各幫旗丁遵守法度押運官弁約束亦嚴所帶貨物有一定額數不敢多攜除所給行月糧外安有餘資以爲斛費爾倉場總督可嚴飭坐糧廳申飭經紀嗣後糧船抵通除應加耗米外不得借斛費名色索取銀兩亦不得淋尖踢斛以致

正糧虧缺苦累旗丁儻有違者必嚴加治罪。若該管各官失於覺察。經朕訪聞亦必從重議處。○兵部議覆奉天將軍噶爾弼疏奏。伊父原任長史額爾德黑曾在軍前立功未經議敘。請停噶爾弼進藏議敘。追賜額爾德黑謚。應不准行。得旨。噶爾弼爲伊父額爾德黑請謚。著照所請給與。至額爾德黑從前効力之處。若應行議敘。仍著議敘具奏。嗣後若跟隨王等出征護衛人員。內有出衆効力者。似亦應行議敘。著定例議奏。尋議從前隨王等出征護衛人員。因功冊無名。不錄。嗣後應令領兵將軍將功績據實造冊報部。分別等次。照出征官兵議敘。如有遺漏及冒開者。將該將軍題叅治罪。從之。○癸酉諭江西巡撫裴律度。聞福建今年春夏以來雨水稍多。天氣寒冷。禾苗興發甚晚。目前米價昂貴。民食頗覺艱難。江西素稱產米之鄉。況去歲今春皆獲豐收。理宜通融以濟閩省。近聞江西地方

官逼糶不令出境。甚非情理。著將江西存倉之穀碾米十五萬石。動用腳價。遴委能員。即速運至閩省交界地方。先期知會閩省督撫。委員領去。分給各地方。以濟民食。毋得遲緩。其動用腳價。作何還項。可與閩撫酌議。動用倉穀。作何還項。可與兩江總督酌議具奏。○鑲紅旗漢軍都統賴都緣事革職。以內務府總管查弼納署鑲紅旗漢軍都統。○甲戌諭戶部。江南泗州逼近黃河。地勢低窪。因去年黃水衝決之岸。尚未合龍。今年四月間。水勢漫溢。以致泗州地方禾麥又被淹損。朕心深爲軫念。著布政使石麟。動支庫銀二萬兩。親自前往泗州。確查被災之民。逐戶散給。勿令鄉約里長及胥吏人等絲毫侵蝕。務使窮民均霑實惠。不至失所。○諭八旗都統等。從前八旗護軍俱由京城往暢春園換班行走。朕念其往返之間。稍覺費力。特發帑金數十萬兩。於圓明園附近蓋造房屋。派護軍三千名

居住以供圓明園之差役。既有益於貧乏無房屋之人。而在京之護軍。又得免於往來行走之累。又念此三千護軍。差役甚多。是以疊沛恩施。恤其勞瘁。乃在京之護軍。以不得一體偏霑。致生怨望。而圓明園之護軍。又以管束太嚴。思欲規避。殊負朕愛養兵丁之心。嗣後朕再加察看。若在京護軍。仍以朕加恩於圓明園之護軍爲過厚。朕即俱令回京。照前由京城換班行走。爾等可將此旨。徧諭護軍。俾各曉悟。知朕加恩於圓明園護軍之處。竝非無故漫加。則彼此歡洽。無有怨言。而朕亦樂於加惠矣。○以鑲黃旗滿洲副都統巴爾呼達署正藍旗護軍統領。○乙亥吏部題。散秩大臣一等精奇尼哈番覺羅舒魯故銷去恩詔所得一拖沙喇哈番。餘二等精奇尼哈番。以其子伊靈阿承襲從之。○丁丑諭管理旗務王大臣等。爾等遇會議事件。緘默不言者甚衆。轉以言者爲專擅。似此何以議事。朕

因將爾等分別定爲班次。前議大臣一班。後議大臣一班。如會議事件。限以二十日者。前議大臣十日。後議大臣亦十日前。議大臣於限內議定立稿。與後議大臣公同閱看。如所議皆符。即定擬具奏。或有不符。著另議具奏。仍將另議之處。告知前議大臣。有願另奏者。亦准其另奏。如此。則學習之人。亦得諳練事體矣。將此著爲定例。○調鑲白旗蒙古副都統李淑德爲鑲黃旗漢軍副都統。鑲黃旗漢軍副都統梁永禧爲鑲白旗蒙古副都統。○戊寅諭議政王大臣等。盛京船廠黑龍江三處兵丁。從前有派往阿爾泰軍營之缺。皆已挑補。今三處兵丁業已撤回。於此浮額兵內。暫派五百名。作爲額外兵。令前往阿爾泰。照京城例一體更換。黑龍江副都統烏察格著調補船廠副都統。令其率領所派五百兵。往阿爾泰駐劄。船廠副都統委色著來京。此時仍令署理四川成都協領博斯果爾著補授。

黑龍江副都統○以詹事府詹事陳萬策爲  
浙江鄉試正考官。內閣中書周有堂爲副考  
官。禮部左侍郎查嗣庭爲江西鄉試正考官。  
翰林院編修俞鴻圖爲副考官。編修楊超曾  
爲湖北鄉試正考官。內閣中書曹儀爲副考  
官○庚辰正黃旗滿洲副都統勒什布。緣事  
革職。調正黃旗漢軍副都統宗室鄂齊爲本  
旗滿洲副都統。陞正紅旗護軍叅領關保爲  
正黃旗漢軍副都統○鑲藍旗滿洲副都統  
滿泰。緣事革職。以原任江南江寧將軍董吉  
那爲鑲藍旗滿洲副都統○以鑲白旗滿洲  
副都統圖納。佛保。俱協辦正白旗滿洲都統  
事務○辛巳頒給八旗叅領關防。凡佐領具  
報事件。俱令鈐蓋○壬午喀爾喀扎薩克和  
碩親王達什敦多卜。年老解退。以其長子喇  
嘛扎卜襲替○癸未添設順天府學滿洲教  
授訓導各一員○甲申陝西西安布政使馬  
喀。緣事革職。陞直隸按察使張廷棟爲陝西

西安布政使司布政使。以詹事府少詹事彭  
維新爲直隸按察使司按察使○吏部議奏  
國子監漢字助教員缺。將舉人副榜按科分  
每旗咨取十人。併將由舉人副榜出身之俸  
深筆帖式。每旗咨取五人。清文助教員缺。於  
清文俸深筆帖式內。每旗咨取十人。考取註  
冊不限旗分。各按名次補用。論俸陞轉從之  
○戊子盛京考察各部滿漢官員。不謹官四  
員。罷軟官二員。年老官一員。有疾官一員。才  
力不及官二員。分別處分如例○旌表山東  
沂州烈婦李文選妻趙氏。拒姦不辱。投水完  
貞。給銀建坊。入祠致祭。如例○己丑諭諸王  
大臣等。從古帝王之治天下。皆言理財用人。  
朕思用人之關係。更在理財之上。果任用得  
人。又何患財之不理。事之不辦乎。朕即位以  
來。推心置腹。以待爾等大臣。時時諮訪。務得  
人才。共襄庶政。爾大臣等亦各有所保薦。以  
備任用。朕深嘉之。但知人自古爲難。而保人



更非易事。知人者不過知其才具。豈能知其存心。保人者亦祇能保其目前。豈能保其異日。是以朕曲加體諒。從不苛求。但公私二字所關甚重。不可以不辨。而公中有私。私中有公。尤不可不時時警省也。即如始初見其人善而舉之。既舉之後。其人改操易轍。即當據實奏聞。儻以爲從前既舉而自護其短。爲之掩飾彌縫。此則公中之私也。或始初因朋友故舊之情而舉之。既舉之後。時時警戒提撕。相責以善。一聞其聲名不好。或即行檢舉。或密奏以聞。此則私中之公也。爾諸大臣。每一人所舉多者。不過二三十人。平時訪察其行爲。勸勉其廉謹。或有居官不善。即行叅奏。不稍回護。如此。則人人有所忌憚。爭自濯磨。國家可收得人之益。爾等亦不愧以人事君之義矣。又如爾等大臣各有子弟居官。爲父兄者。同列於朝。情關朋友。豈不望其有成。然與其私受囑託。庇護朋友之子弟。使子弟有所

恃而不肯努力上進。何如切加教導。使其儆惕。王之於成。若大臣子弟既有父兄之訓迪。又有堂官之督率。則成人者必多。國家豈不甚樂有世家大族之子孫而用之哉。總之朕之優待爾大臣與其遷官賞賚。不若成就爾之名節。爲一不朽之人。爾等之於朋友及薦舉之人。與其結以私恩小惠。護其過愆。而喪其人品。何如以大義相規。使之爲端人良吏。永保令名。至於家庭之間。訓導子弟。又不待言矣。勉之戒之。○宗人府叅奏。貝勒滿都護之屬下諾岷。爲山西巡撫時。不將塞思黑屬下爲首行惡之太監李大成等嚴究。顯係滿都護指使。黨庇。應將滿都護革去貝勒。與應承襲之人承襲得旨。滿都護著革去貝勒。授爲固山貝子。○靖逆將軍富寧安奏。報吐魯番之回子。恐爲策妄阿喇布坦擾累。情願遷入內地者。共六百五十人。應給與馬駝帳房等物。從之。○庚寅諭內閣。向年高天爵捐軀



盡忠大節可嘉。今大學士高其位等為伊父  
奏請賜卹。著追贈禮部尚書職銜。並賜卹典  
八旗各省。有似此被難而未獲恩卹者。俱著  
詳察奏聞。○兵部議覆兩廣總督孔毓珣疏  
言南海縣佛山鎮地方。商賈雲集。匪類易於  
藏匿。請將廣州協都司移駐佛山鎮。應如所  
請。從之。

大清世宗敬天昌運建中表正文武英明寬仁  
信毅大孝至誠憲皇帝實錄卷之四十五

大清世宗敬天昌運建中表正文武英明寬仁  
信毅大孝至誠憲皇帝實錄卷之四十六

敕修

雍正四年丙午秋七月辛卯朔享

太廟遣康親王宗安行禮。○諭內閣。凡各省地  
方。有缺米。或米價昂貴者。必係其地上年荒  
歉所致。今歲楊文乾奏廣東米貴。駐防兵丁  
有不許巡撫減糶之事。宜兆熊。毛文銓。又奏  
福建缺米。有土棍搶米之事。此二省上年俱  
奏稱豐收。並未云荒歉也。且據黃國材稱福  
建積穀。見有一百六十餘萬石。而毛文銓乃  
奏請於江西採買米石。朕已降特旨。令江西  
運米十五萬石。往福建平糶。然黃國材謂福

建有米而毛文銓則求米於鄰省。觀此則當日兩人之交代種種不清可知矣。滿保黃國材在福建多年諸事善於掩蓋彌縫。或毛文銓爲其所愚耳。至福建廣東二省地處極邊米穀應作何貯備。著九卿會議具奏。尋議福建地處海濱。福興泉漳四府人多田少。皆仰給臺灣之米。自嚴禁姦商販米出境之後。民食常苦不足。雍正二年奉旨飭發臺灣倉穀。每年碾米五萬石運赴泉漳平糶。今請再動正項錢糧運米十萬石存貯邊海地方。至臺灣商販仍許至福泉等府貿易。其米船出入口設禁巡防。應令該督撫另行詳議。至廣東近經總督孔毓珣以潮州穀少不足碾米給兵惠州穀多又不能出陳易。新請撥惠州府倉穀平糶。將價銀解交潮州府買穀存貯。實裒多益寡之良法。應令該督撫將通省倉穀照此斟酌。令其多寡得宜。以儲民食。再粵西梧州二府與廣東接壤產米甚多。先經巡

撫汪澄奏稱桂林等四府所有捐穀糶三價值不必轉糶還倉。請將銀解部經戶部議准在案。應將此穀價仍買穀石運交廣東分貯州縣亦足補益倉儲從之。○壬辰以山東道御史劉嵩齡爲陝西鄉試正考官。宗人府主事耿之昌爲副考官。吏部左侍郎沈近思爲江南鄉試正考官。翰林院編修曾元邁爲副考官。○以鑲黃旗漢軍副都統李淑德署正藍旗漢軍都統。○總理戶部事務怡親王允祥奏。河工効力之候選知州郎達侵蝕帑銀捏報被竊。請交部審究。得旨朕因直隸頻罹水患思除害興利以厚民生不惜多發帑金特令怡親王經畫察理無非愛養斯民之至意。凡屬効力人員皆當仰體朕心畏法懷德勤慎効力。乃郎達竟忍侵蝕帑銀捏報被竊似此劣員不得照常例處分著交刑部嚴審定擬具奏。○癸巳諭內閣從前發往軍前之御史陶彝任坪范長發孫紹曾高怡范允

鍋陳嘉猷王允晉高玠柴謙吳鎬給事中劉堂御史外轉道程鑣因其在京妄亂生事故發往軍前効力贖罪今已行走數年且大兵已撤著將陶彝等十三人調回遣歸原籍王奕清王奕鴻不比陶彝等著在阿爾泰一路所設兵站內自備資用養贍驛站人等効力行走如果盡心効力朕加恩寬免若怠忽從事定行從重治罪○甲午鑲白旗滿洲都統希覺羅佛倫緣事革職調正藍旗漢軍都統希爾根爲鑲白旗滿洲都統陞署理兩江總督范時繹爲正藍旗漢軍都統仍留總督任○吏部遵旨議覆三年大計叅劾八法人員除貪酷劣蹟無庸引見外其餘俱令該督撫給咨來京引見如有情屬冤抑及避重就輕等弊將督撫照例處分庶計典益加詳慎從之○戶部議覆御史馮長發條奏凡州縣平糶應多設廠所以便附近居民赴糶州縣官親臨監糶毋使窮民有遠涉守候之苦其有姦

商豪戶囤積射利者訪拏治罪平糶穀石每石准銷一二升以抵耗折如有攙和灰沙者指名題叅至借給與民之穀務令按名面給秋熟後按戶繳還儻吏胥捏名虛領秋時追欠無著將捏領之胥役從重治罪所欠米穀於該州縣名下追還并照失察例治罪其有官役侵尅者該督撫察出題叅應如所請從之○乙未湖南巡撫布蘭泰奏衡山縣知縣張翼觀劇飲酒不行轉解人犯并不接受民間詞狀應請革職得旨張翼各款俱屬應叅之事但稱不肯接受詞狀此語甚屬錯誤民間詞狀虛妄者多一概接受必啓刁民誣告健訟之端此風斷不可長若以收受詞狀之多寡定屬員之賢否則必致以此相尚生事滋擾矣○一等精奇尼哈番吉當阿緣事革職以其弟色克圖襲替○丙申

上詣  
恩佑寺行禮○丁酉諭吏部道府等官有表率

屬員之責必得賢能諳練之員方於地方事務不致貽誤朕慎重官方雖州縣等官皆審酌補用而於道府尤爲加意非審知其人材識足以勝任者不輕試用捐例候選人員初任者多於地方事務從未經歷一旦畀以道府驟膺民社未必遽能稱職及至不稱職時督撫糾叅反受黜革情亦可憫嗣後凡係捐例候選道府人員俱著補授各部郎中令其學習辦事至應陞道府時令各該堂官保送引見○戊戌諭直省督撫布按等居官立身之道自以操守廉潔爲本但封疆大吏職任甚鉅洪範所稱有猷有爲有守三者並重則是操守者不過居官之一節耳安民察吏興利除弊其道多端儻但恃其操守博取名譽而悠悠忽忽於地方事務不能整飭經理苟且塞責姑息養姦貽害甚大蓋此等清官無所取於民而善良者感之不能禁民之爲非而豪強者頌之故百姓之賢不肖皆稱之無

所取於屬員而亦不能禁屬員之不法故屬員之賢不肖者皆安之大臣之子弟親戚犯法則姑容而不行叅革地方之強紳劣衿生事則寬待而不加約束故大臣紳衿皆言其和平而望其久留甚至胥吏作姦而不能懲盜賊肆行而不能察故自胥吏至於盜賊皆樂其安靜而不欲其去任及至事務廢弛朝廷訪聞加以譴責罷斥而地方官民人等羣然歎息以爲去一清廉上司爲之稱屈此則平日摸稜悅衆違道干譽之所致也且操守平常者其心既不敢自恃心懷畏懼頗能整頓經理事務不至曠廢朝廷又時時留心訪察一有不善即加懲戒而在朝之官員及伊屬下之官吏紳衿人等皆伺察其過不肯爲之隱諱是以此等之人貽累於地方者尚輕而潔已沽譽之巧宦貽累於地方者更甚也夫操守雖清而皆顧惜情面一味遷就求容悅於人自使內外之人譽之者多若操守既

更勝於他人而又能實心任事整飭官民不避嫌怨因而遂不滿衆人之意或謗其苛刻或議其偏執或譏其驕傲故意吹索加以評論此風若不悔改必至封疆大吏皆以實心任事整理地方爲嫌相率而爲苟且之計吏治何所倚賴乎朕深望爾等爲明體達用之全材而深惜爾等爲同流合俗之鄉愿故諄諄誥誡不憚周詳此春秋責備之義勉之凜之○諭八旗都統等據拉錫奏請欲將旗印貯於公署但貯於公署又須派官兵看守著八旗大臣等公同會議具奏尋議八旗印信從前每旗原係各給三印康熙五十三年蘇努奏請左右兩翼各給一印於雍正元年正月遵奉諭旨滿洲蒙古漢軍三旗共給一印見今八旗印信俱係滿洲都統掌管其蒙古漢軍旗下遇有移咨用印之事稍覺不便請仍照前例每旗與三印收貯各都統家則事無遲誤亦不必添派官兵看守從之○調

工部右侍郎邁柱爲吏部右侍郎陞內閣學士明圖爲工部右侍郎擢工部郎中哲先爲內閣學士兼禮部侍郎○吏部右侍郎張令璜緣事降調陞都察院左副都御史王沛檀爲吏部右侍郎通政使劉師恕爲都察院左副都御史○命康親王崇安果郡王允禮稽察國子監事務○以通政使司右叅議李鳳翥提督浙江學政○己亥諭吏部朕從前曾下諭旨各省道府州縣之居官好者命總督保舉三人巡撫保舉二人提督布政按察二司各保舉一人密封具奏不得互相商議原以通省人才不少保舉多者不過二三人少者僅一人諸臣於所素知者各拔其尤自然精確督撫提督布按二司皆朝廷大吏受國家深恩自應體朕爲天下得人之意不徇私情秉公薦舉乃其中竟有挾私妄舉者及來京引見俱極庸陋殊非人臣以人事君之義今各員俱已引見爾部可再行文與各省督

撫布按二司除從前曾經密舉及朕特旨補授各員外督撫暨布按二司各於道府州縣中明舉一人不得雷同督撫自行題奏布按二司咨呈爾部文到日爾部即繕摺具奏被舉之州縣官員並令給咨來京引見保舉之道府官員不必來京如有挾私任情草率濫舉者朕必從重治罪斷不姑容○浙閩總督高其倬疏言閩省米價騰貴見撥溫台二府倉穀七萬石運往接濟更請於江南淮安等處採買二麥運閩平糶得旨朕因福建米價騰貴已降旨令江西巡撫運米十五萬石前往閩省以濟民食又令九卿酌議閩廣積穀之法今覽高其倬所奏備極周詳李衛又能實心辦事不分彼此均甚屬可嘉著照高其倬所請行並星速行文江南山東二省巡撫即遣能員協同辦理如高其倬差員未到該撫可借支錢糧預爲買備務令速發以濟閩省之用○庚子

孝懿仁皇后忌辰遣官祭

景陵○甲辰陞江西南贛總兵官石雲倬爲浙江提督調陝西延綏總兵官蔡良爲江西南贛總兵官四川北總兵官孫繼宗爲陝西延綏總兵官陞陝西中衛副將馬紀勲爲四川川北總兵官○奉使閱河內閣學士何國宗等條奏河道事宜得旨河南小丹河一件何國宗等與田文鏡嵇曾筠兩議具奏何國宗等乃一己之見田文鏡嵇曾筠身在地方所見必確著照田文鏡嵇曾筠所議行其山東疏濬泉源一件何國宗等議設管泉通判一員甚是著照所請行山東挑濬馬頰徒駭二河前經陳世倌差委道員徐德倬辦理此處工程緊要徐德倬不稱此任著御史尤清王之錡各管一處聽陳世倌調度不得自立意見其高家堰加修隄工關係緊要若於歲修案內逐漸增修恐致遲緩著照何國宗等所議即動正項錢糧作速估計興修著九卿

會議具奏尋議一河南百泉洹河丹河之水民資其利惟三日濟運一日灌田之舊制實屬有名無實查百泉原分三渠中爲官渠東西爲民渠東口門寬四尺四寸西口門寬三尺六寸請將東口加寬一尺一寸西口加寬九寸其洹河請自石橋東第十洞許民於需水之際自築石壩開渠引水其西三十三洞盡行疏濬則灌田濟運均有攸賴應如所請至小丹河斗門何國宗等請加寬一丈六尺副總河嵇曾筠河南巡撫田文鏡議稱恐山水直下一時瀉洩不及不便拆造惟將小丹河上下之秦董二渠口門量爲開寬使小丹河出水分灌民田其在內之三十六口門竝皆堵塞俾水勢盡入衛河於漕運有益應遵旨照嵇曾筠田文鏡所議一山東運道全賴泉源輸助請令州縣官時加疏濬其額設泉夫因地酌加增減有能濬出新泉者酌給銀米以示獎勵又獨山湖東水土壩南陽湖石

閘張穀山口草壩皆以蓄水濟運宜加謹修防一徒駭馬頰二河乃東省運道蓄水之支河宜相機挑濬鬲津趙牛等支渠水道係民間溝洫宜於農隙之時令地方官督率民夫挑挖均應如所請一高家堰土隄工程緊要若俟歲修恐致遲緩應遵旨即動正項錢糧作速興修一恩縣四女寺請建滾水壩一座博平縣運河西岸修復進水閘二座東岸建滾水壩一座濮州境內舊於沙河會趙王河之處築有土壩向北開引河以分其勢請將土壩修築竝開濬引河其河西州縣聽民開通水道匯入沙河於運道民生均有裨益一膠萊新河兩岸民田陂水俱藉以宣洩宜開濬深通一濮州等處之衛河聊城等處之洩水河宜聽民間自行挑挖武城縣運河北岸恩縣運河北岸請各挑引河一道均應如所請至所奏柳長河請一例聽民開挖之處查柳長河工程浩大民間果否願行開挖應行

令總河巡撫另行妥議具奏從之○乙巳中  
元節遣官祭

永陵

福陵

昭陵

昭西陵

孝陵

孝東陵

景陵○

上詣

恩佑寺行禮○諭內閣前命鄂爾奇繆沅往直  
隸清查州縣倉穀今據奏稱直隸借糶倉穀  
弊端種種無非地方官巧爲掩飾虧空之計  
向來直隸倉穀虧缺甚多朕知之甚悉各官  
惟恐敗露故設計彌縫詳請借糶此等州縣  
官員若仍留原任將來假公濟私那新掩舊  
必至剝削小民虧欠正項而地方倉廩始終  
不得清楚可將巧稱倉穀出借各官悉行解

任著吏部將投供到部候補候選之州縣官  
俱帶來引見朕親自選定人數其鄂爾奇等  
已經到過之正定順德大名廣平保定五府  
所屬贊皇等二十一州縣著即將揀選人員  
掣籤發往鄂爾奇等未到之永平宣化順天  
三府所屬之二十一州縣俟伊等到彼查出  
有出借倉糧者即咨吏部令籤掣人員前往  
代之以以上各州縣借出之穀俱著解任之官  
員自行催還以一年爲限限內全完者仍准  
即行另補若先期速完者隨到隨即另補逾  
限不還者治以那移虧空之罪如此則虧空  
之員不得復居見任挾制小民那移出納而  
接任之員交代井然又無前後不清之項若  
果係借欠在民按數催還其原官仍可另補  
於公私均有裨益又鄂爾奇等奏稱阜平贊  
皇等處違例將穀借給兵丁向來有無借給  
兵丁之例著九卿察明具奏聞直隸各處倉  
廩久未修理傾圮者多著李紱嚴飭各屬設



法速行修整尋議米穀原無借給兵丁之例或貧乏兵丁於青黃不接時該管官出具印文借支季米至支放秋糧時扣還今贊皇等處借給兵米應令該督會同該管總兵官查明再嗣後直省州縣遇借給民糧之時或有兵丁需借米穀者許具該管官印領借給於支兵糧時扣還儻有私領冒領私給擅給等弊各按律治罪庶兵丁無匱乏之虞倉穀亦免濫給之弊從之○諭大學士等據弘春所奏阿其那曾得過允禩銀二十萬兩塞思黑於康熙六十年曾得過允禩銀六萬兩阿其那僞爲矯廉而利允禩之貪惡以供其多取廉潔之人乃忍心害理至於此乎且得銀如此之多不審從前何功於允禩而當之不愧嗣後何以酬其贈而受之不疑至塞思黑當康熙六十年得撥敘家之銀已百餘萬而允禩尚以六萬兩予之塞思黑竟受之均屬可詫著將弘春此奏及順承郡王問阿其那回

奏之語一併與滿漢各衙門觀看○丁未諭內閣從來流言之傳播皆起於姦宄之徒欲擾亂政事顛倒是非故造作無稽之語煽惑人心流布遠近間或國家舉行一事因流言而中止而造作之人益自以爲得計肆其伎倆此等爲害不可勝言朕即位以來外間流言有謂好抄沒人之家產者有謂輕聽風聞之言以爲黜陟用舍者不得不以其故曉諭衆人知之從前貪贓犯法之官蠹國殃民罪大惡極即立置重典不足以蔽其辜但不教而殺有所不忍故曲宥其死已屬浩蕩之恩若又聽其以貪婪橫取之貲財肥身家以長子孫則國法何存而人心何以示儆況犯法之人原有籍沒家產之例是以朕將奇貪極酷之員抄沒其家貲以備公事賞賚之用此等兇惡之人本身應正典刑家產抄沒妻子皆當遠徙者朕皆從寬赦免而止於抄沒其贓私尚保其性命即本人稍有人心應知感

恩戴德何得因抄沒而生怨望乎且朕臨御以來覃敷恩澤蠲免錢糧不下數百萬兩賞賚兵丁及各地地方興利除患所費亦不下數百萬兩此皆中外所共知者夫以額徵錢糧及內庫帑金爲數如此之多朕尚毫無吝惜豈反爲此貪官污吏些微之財物以啓小人之議論乎即如年來抄沒之人不過是年羹堯滿丕李英貴何廷桂等及阿其那塞思黑等門下最用事爲非之人耳此皆姦惡顯著之徒法無可貸有何屈抑而爲之不平乎至謂朕喜聽風聞之言以爲黜陟用舍此語亦屬愚昧蓋因十數年來人情多詐每遇薦舉叅劾多有情弊不出公心重負我

聖祖仁皇帝集思廣益之至意是以

聖明洞鑒隱微不輕聽信於是懷私者既畏懼而不敢言謹慎者又避嫌而不肯言彼此緘默遂成積習朕即位以來常思

聖祖仁皇帝以天亶聖人臨御六十餘年一切

政治經

宸衷獨斷無不盡善若朕則辦事之初必須公聽竝觀盡去壅蔽庶能合於機宜而又恐大小臣工有所牽制而不敢直言有所瞻顧而不便明言是以令其密摺具奏及發與廷議有裁去本人姓名者無非欲諸臣無所回護直言無隱使下情盡能上達利弊悉能周知全無壅蔽之患永享昇平之治也至於密奏中薦舉叅劾者朕原未嘗輕信必細細留心訪察確有証據衆論僉同然後加以黜陟用舍未嘗因一人之奏而即定其人品見諸施行不知者以爲輕聽風聞而朕則慎重周詳務求實蹟也以上流言二事皆係阿其那塞思黑允祿允禩等同黨之小人心懷私忿故造狂悖之語盡惑人心擾亂國政更有一種貪贓犯法之徒畏懼抄沒叅劾是以造作此語傳播遠近希冀因流言而停止自古治天下之道發政施令只論理之當行事之當行

與否悠悠之口何足爲憑朕之此心可以對越

皇考可以對越

上天可以告天下億萬臣民而一二姦邪小人乃欲挾其如鬼如蜮之伎倆以惑衆聽而撓公事朕豈肯絲毫爲此輩流言所動乎天下之人姦惡者少而善良者多造作流言者少而誤聽流言者多彼姦惡之徒造作流言實自作之孽儻經緝獲按律在所必誅此外善良之人當共知朕心勿爲邪說所惑其偶行抄籍也實於懲貪罰惡之中尚寓寬仁之意其廣行採訪也實欲收好問好察之益以爲政治之資朕之宵旰憂勤無非爲國是民生思久安長治之計天下之人豈忍聽宵小狂悖之言而忘君上高厚之恩哉○又諭貴州仲家苗肆行不法十餘年來擾害平民朕知之甚悉石禮哈方署巡撫印務即奏稱應行征剿馬會伯到任亦奏與石禮哈相同朕恐

石禮哈年少孟浪用兵之事不可輕舉未即允行何世璠到任則奏稱苗人應行招撫不必用兵而武員好大喜功貪圖議敘且仲家苗藥箭鎗利地勢險阻亦不易於成事等語丁士傑所奏大概亦與何世璠同朕曾下旨與何世璠即令其招撫而何世璠竝不能有所招撫及高其倬到京亦面奏應行征剿以靖地方朕又降旨與鄂爾泰令詳悉斟酌鄂爾泰亦奏稱用兵爲是是以令石禮哈馬會伯協同辦理然此事甚有關係朕心時時厯念今據石禮哈奏報谷隆長寨者貢羊城坐等處俱已攻破首惡阿革阿紀及爲從兇苗川販等亦俱就擒朕心甚爲嘉悅何世璠未必能審究此案著將各犯交與鄂爾泰審究分別定議竝安插撫恤使地方永遠寧謐不受惡苗之擾一一經理具奏石禮哈俟事竣照例議敘外今先沛特恩著將伊父石文焯革職之處復還以示朕賞功推恩之意○諭

刑部國家立法本以懲兇暴之徒而因事原情則時深惻隱之念書云宥過無大刑故無小所以斟酌權衡用廣好生之德也朕慎重刑罰矜恤下民每遇讞鞫之案往復披覽至再至三求其可生之路嘗見各直省命案內或緣細事起爭或因護親情急或已經退避而毆者勢不相容或本意恐嚇而誤傷者遂至莫救其誤傷之中有經報官保辜者亦有未經保辜者有延至數日殞命者亦有延至數十日殞命者當其爭角之時祇知乘憤直前豈計因傷至斃按律抵罪法所當然但念蚩蚩愚氓祇因一朝之忿頓罹重罪每詳閱案情朕心實爲不忍且秋審時凡情輕之案多以情可矜原減等發落今特沛殊恩予以自新之路見在各直省具題到部已未入秋審案內除情由可惡者不准寬免外其餘一百七十七名俱著釋放分別有力無力照追埋葬銀兩給付死者之家此朕格外生全浩

蕩之恩爲舊例之所未有凡茲小民當體朕省刑宥過之慈懷身受者力圖改悔以贖前愆旁觀者觀感提撕時存警醒父訓其子兄勉其弟比閭族黨互相勸勉各安本業不犯王章則是朕之法外加恩與小民之望外受恩均爲移風易俗之美事儻以爲法網寬恕希圖倖免不改其好勇鬪狠之習重負朕痛民遷善之心則格外之寬典豈能屢邀而異日之追悔亦屬何益爾部將此行文各該地方官遍行曉諭務使鄉里愚民盡皆知悉○戶部議覆山東巡撫陳世倌疏言東省倉穀未經買足者應令各州縣乘二麥豐收時糴麥貯倉其民欠米穀竝准交麥俟秋收後易穀還倉應如所請從之○郭爾羅斯輔國公諾爾布故遣官致祭○戊申以河南道御史段曦爲河南鄉試正考官內閣中書蔣大成爲副考官翰林院檢討李振雲爲山東鄉試正考官兵部主事李同聲爲副考官檢討姚

三辰爲山西鄉試正考官禮部主事何宗韓爲副考官 陞

福陵總管章柱爲正藍旗蒙古副都統鑲紅旗叅領王常爲

福陵總管○湖廣荊州左翼副都統偏圖右翼副都統馬爾圖俱緣事降調陞一等侍衛白清格爲湖廣荊州左翼副都統調正黃旗漢軍副都統觀音保爲湖廣荊州右翼副都統陞正紅旗護軍叅領常明爲正黃旗漢軍副

都統○戶部議覆兩廣總督孔毓珣疏言粵東兵米俱藉本年額徵米石支放今值青黃不接之時民苦徵輸緊急兵苦散給愆期請於糴三穀內碾米支放兵餉秋收照數買補還倉應如所請從之○予故白都納副都統馬喀那祭葬如例○己酉禮部議覆雲貴總督楊名時疏言順治十六年流寇散入滇省宜良縣陳黼宸被害妻倪氏妻李氏女二姐殉節投崖徐大聘妻陳氏妻楊氏遇賊赴水請

補行旌表應如所請照例給銀立碑建坊入祠致祭從之○庚戌諭湖廣總督李成龍湖北巡撫鄭任鑰荊州長江兩岸隄防關係民生最爲緊要蓋因川湘二江之水匯歸於此易於泛溢聞今年雨水連綿水勢甚猛陸地之水爲江水所拒不能減退以致低窪之地禾苗淹沒又聞往年黃灘等處隄岸兩次衝決江陵潛江等州縣田苗被淹甚爲民害長江兩岸州縣雖每年各自興修然地方遼遠少有疎忽則民生重受其累爾等可同商酌委員踏勘應否作何修築防護之處悉心妥議具奏○辛亥

御書忠敬誠直勤慎廉明扁額賜怡親王諭大學士九卿翰詹科道等朕自即位以來怡親王事朕克殫忠誠至純至恪事事爲朕實心辦理而朕委任之處甚多約畧舉之職掌之大而且繁者有九議政關係機密戶部掌領度支三庫總理出納興修畿輔水利以厚民

生管領漢侍衛以育人材至於諸王子之事務舊邸之事務以及督領圖明園八旗守衛禁兵養心殿監理製造鉅細事件皆一人經畫料理而怡親王公爾忘私視國事如家事處處妥帖能代朕勞不煩朕心蓋其忠君親上之念肫懇篤摯是其忠也小心兢業無纖毫怠忽是其敬也精白一心無欺無偽是其誠也直言無隱表裏如一是其直也詎勉奉公夙夜匪懈即如日今王雖身抱痾疾而案牘紛紜披閱不倦朕聞之實至於不忍是其勤也一舉未嘗放逸一語未嘗宣漏是其慎也清潔之操一塵不染是其廉也見理透徹莅事精詳利弊周知賢愚立辨是其明也是以朕特書忠敬誠直勤慎廉明八字賜之惟朕深知王之德洞悉王之心覺此八字實不能盡其美善亦無一毫過量之詞若有一字不確不切是朕之頒賜非嘉獎之詞乃譏諷之語矣朕不為也且朕賜此八字乃就怡親

王事朕之大端而言至於王之當年侍奉皇考極盡誠孝深蒙

皇考之慈愛而其居心之方正秉性之和平待

人之寬厚遇下之仁惠種種善行筆不勝書

朕觀爾等在朝諸臣於忠勤慎明四字尚多

有之若敬誠直廉四字朕則未能輕許向後

咸當奮勉砥礪以副朕望○諭內閣從前江

西巡撫裴率度以該省州縣虧空係民欠居

多請交與接任官徵催具奏今聞德安縣知

縣蕭彬虧空并互揭知府李敬熙鹽驛道孫

蘭必詐贓一案司道揭報後裴率度遲延兩

月始行題叅又武寧縣知縣廖科齡已叅虧

空之後知府張景偉查伊任內已徵未解地

丁等項銀六千餘兩捏稱有民欠可抵申報

裴率度不行確查將虧空徇庇官員續叅反

令知府代完銀四千兩餘銀勒令新任知縣

方聲亮出結認徵夫以已徵在庫知縣虧空

之項重複徵之於民若百姓依限完納則有

一糧再輸之累或接任催徵不前勢必那新補舊冀免處分見收錢糧又致虧空將來彼此那移及離任盤查之日皆以民欠藉口國帑虛懸州縣牽累似此者直省不計其數裴律度身任封疆理應將此等積弊釐剔清除乃爲虧空之員蒙蔽巧隱令知府徇私料理以沽寬厚之名殊乖大臣公忠之道此事須派欽差前往將此二案徹底審究前候補知府王景望條陳請令抑勒交盤者毋庸揭報上司直揭部科部科轉咨督撫審結報部如後任枉揭者嚴加治罪等語此處著九卿會議具奏尋議嗣後州縣抑勒交盤者許揭報督撫題參或督撫司道護庇離任之員知府顧慮分賠抑勒交盤者許直揭部科儻接任官容隱不報者將欠項坐令賠補其出揭之員調任他省上司有多方誣陷者許赴都察院呈辦庶交代積弊可除州縣侵蝕漸少矣從之○命吏部尚書孫柱蔡珽俱專管兵部

事陞內務府總管查弼納爲吏部尚書仍管內務府總管事雲貴總督管雲南巡撫事楊名時爲吏部尚書仍留巡撫任以兵部尚書法海協辦禮部尚書兼內務府總管行走○宗人府議奏平郡王訥爾素在西寧軍前貪婪受賄應永停俸祿得旨訥爾素行止卑污在軍前貪劣素著及署大將軍印務更肆婪贓索詐地方官銀兩朕向即聞之因訥爾素與允禩不和朕意與允禩相善之人故爲播揚欲傾陷訥爾素所以未即深究治罪且加恩令辦理上駟院事務乃伊並不追悔前愆仍犯法妄行情屬可惡若仍在王列則於諸王有玷著將訥爾素多羅郡王革退在家圈禁其王爵令伊子福彭承襲○壬子吏部議覆湖南巡撫布蘭泰疏言臨武等二十五州縣界連滇黔苗徭錯雜若候部選要缺久懸請將候補候選州縣人員遴選命往遇缺委署量才題補應如所請得旨凡命往人具俱

係在部即應選用之人。又經朕揀選命往。若照吏部所議。必候臨武等二十五州縣缺出。方行委署題補。則伊等得官無期。轉多守候之苦矣。既經揀選人員命往。自應將湖南本省所出州縣各缺。暫停部選。令該撫將命往人員。與見任各員。細加比較酌量。人地相宜。或先委署。或行調補。則要缺不致久懸。而命往人員亦不致多年守候。方於情理允協也。

○甲寅。盛京工部侍郎增壽緣事革職。調工部左侍郎常保爲盛京工部侍郎。轉工部右侍郎明圖爲左侍郎。陞內閣學士哲先爲工部右侍郎。擢工部郎中桑格爲內閣學士兼禮部侍郎。○下嫁正藍旗漢軍多羅額駙邁圖之縣主故。遣官致祭。○乙卯。陞右通政繆沅爲通政使司通政使。○吏部遵旨議覆保甲之法。十戶立一牌頭。十牌立一甲長。十甲立一保正。其村落畸零及熟苗熟種亦一體編排。地方官不實力奉行。者專管兼轄統轄。

各官分別議處。再立民間勸懲之法。以示鼓勵。有據實首告者。按名數獎賞。隱匿者加以杖責。應通行直省。以文到半年爲限。有能舉首盜犯者免罪。其從前未經發覺之案。地方官即行揭報者亦免議處。至盜案疎防文武各官處分。除山海大盜。土獐蠻苗及響馬老瓜等賊勢難擒捕者。文武官照舊例處分。若盜至十人以下者。文職照例處分外。武職各官酌量分別寬減。惟未獲盜首者。專汛官仍照定例處分。得旨依議。通行各省。文到半年爲期。甚迫。著以一年爲限。○兵部議覆據前鋒統領護軍統領等奏稱。兩翼前鋒統領八旗護軍統領原係各一印信。因蘇努奏請俱經收回。今八旗滿洲蒙古漢軍都統俱每旗各給三印。臣等請照例賞給等語。應如所請從之。○丙辰。吏部議覆浙江巡撫李衛疏言。湖州府烏程縣所屬之烏鎮地方。界聯二省。三府接近太湖。易藏姦宄。請將湖州府同知。



移駐烏鎮以資彈壓應如所請從之○四川巡撫法敏題建昌衛阿都宣撫司募枝故無嗣請以其妻祿氏承襲下部知之○戊午諭內閣朕昨覽湖廣安陸府屬有一縣名即係景陵二字見之心甚不安該省督撫不具奏請改於心獨安乎此縣名著內閣擬改請旨尋內閣撰擬具奏得旨著改為天門縣○己未諭刑部律載鬪毆成傷定有保辜之限所以重民命也被毆之人受傷雖重尚可醫救一經移動勞頓冒風或致殞命嗣後鬪毆傷重者禁止移動若問理衙門委官親詣驗看使被鬪之人得以安卧醫救不致誤傷性命其應如何定例通行之處著三法司詳議具奏尋議凡京城內外有鬪毆傷重者該衙門即委官親詣驗傷就取確供定限保辜其被傷之人擡赴衙門驗傷之處永行禁止違者將該管各員治罪從之○禮部題河南杞縣壽民蕭俊德年屆一百十八歲應照例給銀三

十兩建坊得旨蕭俊德年過百齡之外實屬希有之事著於定例賞賜坊銀外加增兩倍共賞銀九十兩以示特恩嗣後年至一百一十歲者加一倍賞賜一百二十歲者加兩倍更有多得壽算者按其壽算加增著為定例○刑部等衙門審奏天津州民郭允進擅造狂悖不經之語肆行訛謗大逆不道應凌遲處死得旨郭允進捏造悖逆之詞詛詈朕躬尚無叛逆實跡若照部議將謂朕因怒而加以極刑矣郭允進著改為立決梟示○予故四川重慶總兵官黃喜林祭葬如例

大清世宗敬天昌運建中表正文武英明寬仁  
信毅大孝至誠憲皇帝實錄卷之四十六

大清世宗敬天昌運建中表正文武英明寬仁  
信毅大孝至誠憲皇帝實錄卷之四十七

監修總裁官光祿大夫經筵講官大學士領侍衛內大臣等處總理事務處副都統等處  
總裁官光祿大夫經筵講官起居注大臣保奏太子太保保和殿大學士兼戶部尚書仍兼管吏部尚書翰林院掌院  
學士等伯加十三級自張廷玉光祿大夫經筵講官起居注大臣保奏太子太保議政大臣武英殿大學士兼工部尚書仍兼管  
翰林院掌院學士加二級自福敏光祿大夫經筵講官太子太保奏明大學士兼禮部尚書加六級自徐本光祿大夫  
經筵講官議政大臣協辦內閣大學士事務禮部尚書仍兼管太常寺鴻臚寺等處三泰等奉

敕修

雍正四年丙午八月庚申朔諭吏部戶部直

隸地方旗民雜處猾吏舞文太監戚屬散處  
州縣兼皇莊王公等莊屯全在其間地方官  
往往掣肘今直隸虧空倉糧四十二州縣特  
行揀選人員命往令其清理倉庫整飭地方  
但直隸書吏積弊凡新官到任一切文卷悉  
行藏匿州縣官因限期嚴迫急而求之方始  
取出由是墮其術中以後事件皆任其把持  
爲害甚大州縣官能鉤致其隱而重置之法  
者不可多得錮弊相仍朕知之甚悉已諭令

總督李紱嚴查。但流弊既久。命往各官徹底清查。必需時日。一切案件。勢難依限完結。恐有遲延之虞。著將直隸各州縣現在欽部案件一年之內。暫行寬限。庶各員得以從容釐剔積弊。可除。再直隸州縣太監之父兄弟姪。在地方不無生事。本人亦未必盡知。可令該州縣大事照例詳報。總督具題。小事徑報內務府。內務府傳該太監曉諭。令其自行約束。如仍不悛改。內務府即酌量懲治。內府大糧莊頭并諸王大臣莊頭。如有生事梗法之處。大者仍申報總督具題。細微事件。屬內務府者。申報內務府懲治。其餘莊頭人等。申報都察院轉行各該管官員懲治。不必奏聞。再畿輔重地。理宜嚴肅。乃近來盜案較他省居多。定例強盜不分首從皆斬。立法甚嚴。當年聖祖仁皇帝法外施仁。凡有盜案。命大學士會同三法司核擬。止將爲首起意并傷人之犯擬斬。餘俱減等發落。乃不法之徒。不思感激。

實錄卷四十七

實錄卷四十七

三

愈肆玩法。甚屬可惡。自雍正五年正月初一日爲始。直隸盜案事發。仍照舊例。不分首從皆斬。直隸盜賊不盡係直隸之人。著行文各省督撫出示通行。曉諭使皆知所畏懼。毋致自投法網。如此。於弭盜似有裨益。此次命往人員果能清理錢糧。擒拏盜賊。不畏強禦。設或被入挾仇誣陷。致遭叅處者。許赴都察院控告。都察院即代爲奏聞。如果屈抑。朕必爲伊等主張。斷不令無辜受累也。○鑾儀使阿爾遜。伍達禮。俱緣事革職。陞冠軍使吳正安。一等侍衛伊忒納。俱爲鑾儀衛鑾儀使。○辛酉。諭八旗大臣等。侍郎一官係辦理部務大臣。職任與副都統相等。嗣後按班坐立之處。俱令在滿洲副都統之次。蒙古漢軍副都統之上。○癸亥。諭直省督撫等。數十年來各省錢糧虧空甚多。朕曾降諭旨寬限三年。令督撫催追完項。至今未見有奏報料理就緒者。惟原任直隸總督李維鈞曾於去年奏稱各

屬地丁銀兩俱已彌補。惟倉穀尚畧有缺欠。冬春之間即可補足。及去秋畿輔水澇歉收。須用穀石賑濟。而倉穀存者甚少。今夏遣官訪查各屬虧欠。一一顯露。倉穀如此。則庫帑之虧缺可知矣。李維鈞之罪誠無所逃。據此則他省之錢糧不能清楚。顯然可見。該督撫等特遲緩不行奏報耳。又如各省虧空。動稱無著之項。夫錢糧未經徵收。則欠在民。已經徵收而有虧空。則欠在官。州縣力不能完。則上司有分賠之例。本人雖已病故。而子孫有應追之條。何得藉口無著。以虛國帑。從前彌補虧空。皆指俸工銀兩。及朕有旨不許捐輸。俸工則皆稱以耗羨抵補。夫耗羨亦出於民。乃不問當日督撫等。所以致此虧空之由。而動稱耗羨彌補。以百姓之脂膏飽有司之谿壑。豈朕憫惜元元之至意乎。今特沛寬恩。凡各省虧空。未經補完者。再限三年。務須一一清楚。如屆期再不全完。定將該督撫從重治

罪。如有實在不能依限之處。著該督撫奏聞請旨。又如前年原任浙閩總督滿保。曾具摺奏稱。梁鼎任內虧空銀六萬兩。係聖祖仁皇帝南巡時所用。臣不便露此事情。彼時朕即批示云。當年皇考南巡。屢降諭旨。絲毫不取給於地方。凡行在所需。悉由內府預備。食用等物。俱發官價採買。賞賚銀兩。皆從司庫支給。嚴禁地方有司不許與扈從人員交結往來。私相餽送。違者以軍法從事。立法甚為嚴切。即或修理一二處行宮。亦皆本地方情願豫備。而所費亦屬有限。何至虧空多金。歷二十年之久。不能清結。我皇考及朕所行之事。無不可告天下臣民。其當年南巡時。如何費用之處。爾可據實直陳。而滿保理屈詞窮。不能回奏。蓋此等銀兩。皆當日地方官結交匪類。餽送知交。暮夜鑽營。恣意花費。及至虧空敗露。則動稱因南巡時用

去伊等違背

皇考聖旨。擅動公帑。以結私交。目無國法。其罪已不容誅。而又敢藉口南巡。將虧空之故。推卸於君上。以寬己罪。此尚得謂有人心者乎。又如山西河南兩省。昔年虧空甚多。俱稱應辦軍需所致。凡軍需所用。皆有正項錢糧。何至累及地方有司。此皆平日地方官不能大。法小廉下吏侵漁。上司需索。以致國帑久虧。反借支應公事之名。以掩其侵盜之實。深可痛恨。嗣後直省督撫等。當祇遵朕訓。仰體朕心。共矢公忠。盡除舊習。以副朕委任封疆之重。○兵部遵旨議覆。佐領一官。非散職可比。如兼在散騎郎行走。則佐領事務必致有誤。應將現在佐領之兼散騎郎者。俱撤回。嗣後散騎郎缺出。不准挑取佐領。俱於各屬精奇尼哈番以下。拖沙喇哈番以上。等官內。揀選引見補授得旨。現在王等屬下之散騎郎。照常准留。貝勒貝子之散騎郎。俱著退回。嗣後

王等如有欲挑欲留者。令其指名具奏。○賑湖南臨湘等四縣。岳州一衛水災饑民。○移河南磁州都司一員。守備一員。駐彰德府彰德府千總一員。駐磁州。從河南巡撫田文鏡請也。○追贈故王府長史額爾德黑。照伊子奉天將軍噶爾弼職銜。予祭葬。謚果毅。○乙丑。

上回宮。○以戶部尚書蔣廷錫。為順天鄉試正考官。左副都御史劉師恕。為副考官。○諭內閣。數年以來。蔣廷錫。協同怡親王。辦理戶部事務。秉公執正。釐剔諸弊。甚屬盡心。而胥吏宵小。徇私作弊之人。未必無嫉妒懷怨者。今將廷錫入闈典試。或乘此造作浮言。妄加謗議。亦未可定。科場關係大典。若聞中閱卷。果有不公。許應試舉子。赴都察院控告。奏聞。若有不軌之徒。假捏污蔑之詞。以洩私憤。而撓公事。則國法斷難寬宥。著步軍統領及順天府府尹。五城御史。密訪嚴拏。叅奏從重治罪。

○雲南巡撫管雲貴總督事鄂爾泰摺奏滇黔大小文武各官謹實據所知開注進呈奉  
上諭治天下惟以用人爲本其餘皆枝葉事耳  
覽卿之奏非大舍不能如是非注意留神爲  
國家得人不能如是非虛明覺照不能如是  
朕實嘉之但必明試以功臨事經驗方可信  
任即歷經幾事亦只可信其已往猶當留意  
觀其將來萬不可信其必不改移也卿等封  
疆之任古諸侯也閩省窺伺投其所好往往  
揜其不善而著其善粉飾欺隱何所不至惟  
才之一字不能假借凡有才具之員當惜之  
教之○追封故鎮國公準達爲固山貝子予  
祭二次造墳立碑謚溫恪○雲南巡撫管雲  
貴總督事鄂爾泰題雲南麗江府土通判木  
鍾故請以其子木德承襲下部知之○丙寅  
命各省情實人犯停止秋決○賑廣東南海  
等五縣水災饑民○丁卯祭  
先師孔子

上親詣行禮祭畢諭禮部侍郎三泰太常寺卿  
孫卓曰儀注內開獻帛進酒皆不跪朕今跪  
獻非誤也若立獻於

先師之前朕心有所不安可記檔案以後照  
此遵行○戊辰

太宗文皇帝忌辰遣官祭

昭陵○諭內閣從來直隸江南兩省盜案多於  
別省是必有爲首積盜糾合匪類巧於漏網  
各州縣被竊之處雖多而姦猾之盜首不過  
數人窩藏之巢穴亦不過數處而已畿輔之  
地爲四方觀瞻豈可聽宵小之潛藏任有司  
之疎忽李紱職司表率安可漠不關心可速  
飭屬員嚴加緝捕務令得其根柢以清盜源  
若仍前疎忽定將李紱治罪並諭直隸提鎮  
等官各飭弁員稽查防汎以靖地方毋得疎  
縱自干罪戾在京步軍統領衙門及巡捕營  
弁五城御史司坊官員各宜盡心緝訪以副  
詰姦弭盜之職○諭內務府內府佐領內管

領下人等。過繼義子。甚屬紊亂。佐領及內管領人頗多。何至宗族姻戚中。悉無可以過繼者。而必以陌路之人爲義子耶。朕非禁止伊等過繼。只因漢人中無賴之徒。混雜其間。冒食錢糧。內府舊人之子孫。轉不能得錢糧養贍。朕欲加恩內府人等之故。著勒令此輩悉歸民籍。可即曉諭伊等。各將實情自首。寬其治罪。僅此時仍隱諱不首。日後查出。著發邊衛充軍。○已已。

上御經筵講畢。賜大學士。九卿詹事及講官等宴。○

上幸圓明園。○吏部議奏署理大學士事務戶部尚書徐元夢。繙譯本章錯誤。應革職。交部治罪。得旨。徐元夢在內廷行走多年。從寬免其交部。著革職。在內閣學士之列。辦理票簽本章。一切繙譯事務。効力行走。○庚午。

太祖高皇帝忌辰。遣官祭。

福陵。○辛未。大學士九卿等奏。順天府府尹劉

於義恭進耜田所產嘉穀一莖雙穗者五本。三穗者四本。四穗者三本。五穗者五本。六穗者三本。七穗者四本。八穗者三本。九穗者三本。又內務府恭進豐澤園

皇上親植稻穀一莖四穗者二本。三穗者二十本。雙穗者二百七十本。臣等蒙恩宣示捧觀之下。不勝歡慶。

皇上敦本重農。歲舉親耕之典。寬租減賦。頒施益下之仁和氣。所鍾嘉禾獻瑞。誠簡冊所希聞。應請宣付史館。昭垂永久。報聞。○河南巡撫田文鏡奏報瑞穀得旨。據田文鏡奏進豫省所產嘉穀有多至十三穗者。此實罕見之事。大凡爲督撫者。果能殫心竭力。爲國爲民。必能感召

天和。化災禔而成豐稔。前歲畿輔偶旱。李維鈞奏稱。欲用法術祈禱。此時朕即降旨止之。蓋無實心實政。感格

上天而仗法術。以爲祈求。焉有感應之理。又如

畿輔地方常有水患。怡親王親身相度。悉心籌畫。爲國爲民之念。實爲誠切。故今歲六七月間。大雨時行之際。直隸地方雨澤調勻。凡開濬修築之處。皆得施工。而禾麥又復豐登。民生樂業。豈非至誠感通之驗乎。朕非以地方之事。卸責於督撫。凡屬督撫。皆朕簡用之人。若督撫盡心於地方。則是朕用得其人。伊之功。即朕之功。若督撫不盡心於地方。則是朕用非其人。伊之過。即朕之過。督撫受朕深恩。委以封疆重寄。乃悠悠忽忽。不加意於吏治民生。而轉令朕代爲受過。清夜捫心。亦忍爲之乎。督撫若有此等。不但伊身難逃國典。即冥冥之中。子孫亦必受譴罰。勉之慎之。○賑湖廣武昌等四縣武左等三衛水災。饑民○癸酉。解陝西西安按察使許容任陞戶部郎中。塞欽爲陝西西安按察使。司按察使兼管河東巡鹽御史事。○甲戌。添設內閣漢侍讀二員。照滿洲蒙古漢軍侍讀品級授。爲正

六品。○乙亥。吏部議覆。辦理理藩院事。正白旗滿洲都統拉錫。將吳梁海之事。隱匿不奏。請革職。交刑部從重治罪。尚書管侍郎事。正紅旗蒙古都統特古忒。侍郎本錫。均應革職。得旨。拉錫。將吳梁海之事。有心隱匿。情殊可惡。但伊辦理旗下事務。亦有效力處。著從寬免交刑部治罪。將伊議政大臣。散秩大臣。滿洲都統。辦理理藩院事務。並賞給伊世襲之職。俱著革退。以一等侍衛管太僕卿事務。効力行走。持古忒。本錫。趨附拉錫。行止甚卑。俱著革職。從寬留任。署領侍衛內大臣。伍格。著補授正白旗滿洲都統。信郡王德昭。著學習管理正白旗事務。○丙子。正白旗漢軍副都統田象坤。緣事革職。以鑲黃旗漢軍副都統石文煥。署理正白旗漢軍副都統。調署正藍旗漢軍都統。李淑德。署正白旗漢軍都統。以原任巡撫黃國材。署正藍旗漢軍都統。○予故福建汀州總兵官陳有功。祭葬如例。○戊



寅旌表山東烈婦文登縣王平國妻叢氏。寧海州姜二妻孫氏俱拒姦不污。自縊完貞。各給銀建坊。入祠致祭如例。○己卯。大學士等議覆浙閩總督高其倬疏請酌定福建積貯之法。前已奉旨。令江西運米十五萬石。往閩濟用。今請再將浙江漕糧截留十萬石。易穀二十萬石。就近運往。從之。○庚辰。授故奉恩將軍恩特赫默子色克爲奉恩將軍。○裁山西朔平府總捕理事同知缺。旗民爭訟事務歸併朔平府糧餉同知兼管。從右衛將軍宗室申穆德請也。○賞卹四川征勦羊崗逆苗南坪等處陣亡帶傷兵丁如例。○四川巡撫法敏題。明正宣慰司桑結係已故宣慰司蛇蜡喳吧之女。因無嫡派。向以其女護理在案。今桑結已故。其親子係現任董卜韓胡宣慰司堅叅達結。請令其兼襲明正宣慰司。從之。○辛巳。諭內閣。福建提督吳陞前以老病乞休。情詞懇切。朕不忍准其所請。令高其倬到

任後。看其年力如何。再行具奏。今據奏稱吳陞年老有病。精力衰邁。吳陞准其原品致仕。仍給與提督俸祿。以終其身。示朕眷念舊臣之至意。○又諭各處監督。俱由該部院堂官保舉。派出之後。著原保題之堂官時加訓誡。訪察若有劣蹟。許據實奏免其治罪。儻由別處發覺。則將原保題之人一併治罪。如此部院堂官必慎加揀選。而派出之監督亦知所畏懼。不敢妄行矣。○陞福建漳州總兵官丁士傑爲福建陸路提督。福建延平副將初有德爲福建漳州總兵官。○壬午。兵部議覆奉天將軍噶爾弼疏言。旅順口至鳳凰城水程幾及千里。止有旅順水師一營。請添設水師營三處。每一營兵丁三百名。各設佐領一員。防禦二員。驍騎校三員。令其管轄連絡巡哨。以固海疆。應如所請。從之。○癸未。

上詣恩佑寺行禮畢。回宮。○命江蘇巡撫張楷。廣西

巡撫甘汝來。西安巡撫圖理琛來京。陛見。加長蘆鹽運使陳時夏布政使銜。署理江蘇巡撫。以廣西提督韓良輔署理廣西巡撫。川陝總督岳鍾琪署理西安巡撫。○甲申。免江南泗州本年分水災額賦有差。○乙酉。盛京戶部侍郎傅鼐緣事革職。陞內閣學士王朝恩爲盛京戶部侍郎。○河道總督齊蘇勒恭奏。原任淮徐道潘尚智虧空庫帑八千兩。不即還項。又夤夜將銀十一包私自搬運。每包計一千兩。被淮關監督慶元家人搶去五包。據山陽縣知縣詳報。現飭淮揚淮徐二道嚴拘究審。得旨。潘尚智虧空國帑。不行完納。乃私自藏匿多金。慶元又與通同作弊。將此情由。竝本內有名人犯著侍郎黃炳前往會同總河齊蘇勒審理。○丙戌。諭諸王大臣內閣九卿等。我

皇考聖祖仁皇帝三年大禮已滿。朕追念罔極。深恩欲於

皇考忌辰。每歲遵照三年以內祭祀之禮。永遠舉行。恭讀祝文。用申誠悃。朕受

皇考教育慈恩。至深至厚。終身永慕。無有窮期。豈三年禮制之所能限。況天下億萬臣民。感戴

皇考深仁厚澤。六十餘年。自古帝王罕能比竝。一切禮儀。亦非定制所得拘也。朕舉行此禮。乃自展其思慕誠切之衷。至與舊制相合。與否。朕皆不遑計及。此禮亦惟朕躬特行之於我

皇考後世子孫。不得奉爲成例。其應行禮儀。著該部定議具奏。○諭內閣。國以民爲本。民以食爲天。朕即位以來。念切民依。舉行耕藉之禮。殫竭精誠。爲民祈穀於

上帝。乃雍正二年三年。藉田特產嘉禾。有至一莖九穗者。朕心亦以爲偶然之事。今據府尹劉於義進呈。今歲藉田所產。自一莖雙穗三穗。以至八穗九穗。皆碩大堅好。異於常穀。朕

見之心甚慰悅特令宣示廷臣朕竝非以此  
爲祥瑞誇耀於衆也蓋實有見於天人感召  
之理捷於影響無纖毫之或爽朕以至誠肫  
懇之心每歲躬耕藉田以重農事即蒙

上帝降鑒疊產嘉穀以昭休應似此八穗九穗  
之穀豈人力所能強爲亦豈人君所能強之  
使有乎天人感應之理朕見之最真最切但  
恐此心不誠耳誠則未有不動者即如從前  
青海蠢動朕爲邊陲憂慮虔禱於宮中不數  
旬而捷音即至疆圉寧謐又如前歲夏間近  
畿雨澤稍愆朕在宮中默禱減膳修省虔誠  
叩懇不數日而甘霖大沛禾稼有秋此皆近  
年以來朕親行親驗之事至去年夏秋之間  
時常陰雨而李維鈞竝不將畿輔被潦實情  
具奏是以朕未曾早爲虔禱彈竭誠心以挽  
天意而紓民困及蔡珽署直隸總督事務詳悉  
奏聞朕宵旰憂勤幾廢寢食於是截漕發倉  
多方賑濟京城設廠各邑興工俾窮民皆得

餬口是以地方雖被水災而小民不致流離  
失所今歲二麥豐收禾黍暢茂此皆

上天俯鑒朕衷故加惠黎元而錫以盈寧之慶  
也蓋天生民而立之君鑒觀在上人君一念  
敬謹政事無關天必嘉之佑之一念放逸政  
事有乖天必儆之戒之此一定之理也況人  
君撫馭臣庶位處極尊所以賞罰之者獨有  
上天耳是以朕每於水旱等事皆實心內省至  
於各省旱澇之事朕皆視同一體原無彼此  
之別惟是地方相隔路遠彼地偶有水旱有  
司未必即行具報及至奏達朕前而緊急之  
時已過是以朕無從盡其誠心爲之所禱此  
其責則全在本省督撫矣督撫受朕委任之  
重爲朕養育萬民必視百姓之疾苦如痛癢  
之在己身一遇水旱饑饉必思所以致此之  
由或因本省之政事吏治有關即思速爲改  
易之或因本地之人心風俗不端即思速爲  
化導之兢兢業業修省祈禱竭盡誠心一如

朕之朝乾夕惕斷無不可以挽回

天意者。假若聞朕之政治稍有缺失。亦即直言陳奏。不必隱諱。如此。則官與民聯爲一體。臣與君又聯爲一體。太和翔洽。實意交孚。天聽雖高。誠呼吸可通矣。朕每歲躬耕藉田。竝非崇尚虛文。實是敬

天勤民之至意。禮曰。天子爲藉千畝。諸侯百畝。據此。則耕藉之禮。亦可通於臣下矣。朕意欲令地方守土之官。俱行耕藉之禮。使知稼穡之艱難。悉農夫之作。苦量天時之晴雨。察地力之肥磽。如此。則凡爲官者。皆時存重農課稼之心。而凡爲農者。亦斷無苟安怠惰之習。似與養民務本之道。大有裨益。著九卿詳議具奏。又諭。吏治惟在得人。而各省有司員缺甚多。非廣收博取。不足備庶官之位。故數年以來。各省官員。經朕揀選命往者亦多。然當其揀選之時。或見其奏對明白。舉止從容。或見其條陳事宜。似屬可採。遂入於揀選之

中。命往各省以試用之。又有奉旨特用之員。大約因督撫上司等薦舉保奏。朕召來引見。見其才具可用。遂加遷擢。以鼓勵之。此等人員。朕不過取拔於臨時。竝未曾試驗於平日。實不知其居心行事何如也。伊等蒞任後。自應倍加敬謹。勉爲良吏。方不負朕格外之恩。若自恃爲揀選特用之員。傲上陵下。恣意妄行。而該管上司。以爲朕所揀選特用之員。不加約束。委曲寬容。則大非朕澄清吏治。整飭官方之意矣。朕以大公之心。撫馭萬民。凡屬臣工。只論其居官之賢否。以爲進退。豈以部選揀選常用特用。分別異視。有所偏向。凡爲督撫者。宜深知朕心。切勿以其爲揀選特用之員。有意優待。而姑容之。儻居官不善。即據實參奏。不爲隱蔽。不涉瞻徇。如此。則人皆知做官皆得人。而於吏治大有裨益矣。○又諭。朕欽恤刑獄。每遇讞決。無論罪之輕重。必原情酌理。再三推求。務使情罪允協。又念罪人

幽囚叢棘易致瘦斃屢諭問刑衙門修整監獄督責禁卒不時灑掃潔淨遇有疾病必加意調治務令痊可此亦矜恤罪囚之一端也乃近聞各省本章監斃人犯不少多由羈禁之處跼隘倒敝以致嚴寒酷暑侵骨刻肌潮溼穢惡之氣薰蒸傳染之故也況監獄不固防禦多疎罪人越獄脫逃亦所不免特飭各直省督撫通查所屬監獄逐一修葺竝高築牆垣以資防範其地勢低窪者改造高阜之處狹隘者酌量刑獄煩簡展寬蓋造凡枷號暫羈之門關倉所亦必繕治完固正印官仍不時稽查毋令獄官獄卒任意陵虐懈弛疎防如此則罪人不致瘦病而監禁既固亦可免越逃之虞該督撫其各仰體朕好生至意督令有司遵行毋忽○鑲黃旗漢軍副都統顧儼緣事革職陞鑲白旗叅領安華為鑲黃旗漢軍副都統正白旗叅領祖秉衡為本旗漢軍副都統○浙江巡撫李衛疏報杭州嘉

興紹興三府屬海塘修築告竣下部知之○

丁亥秋分夕

月於西郊遣怡親王允祥行禮○直隸總督李紱以塞思黑於八月二十四日病故奏報上召諸王大臣等入諭曰今日李紱奏報塞思黑病故塞思黑素性姦惡行止陰邪當日與阿其那允祇允禴結為死黨與其妻父七十及蘇努阿靈阿等互相固結潛蓄邪謀助塞思黑肆惡無所不為在

皇考時種種不孝之罪難以枚舉及

皇考升遐之日朕正在哀痛之際塞思黑突至

朕前箕踞傲慢而坐意甚叵測

皇考大事之中凡祭真行禮之處塞思黑從無

涕泣悲戚之狀顯露怨望辭色朕知其素行

兇殘若留在京必生事端是以發往西寧居

住伊在途竝無悔過之意與伊子副什澤及

勒什亨等一路嬉笑如常毫無畏懼且與允

祇等舊日邪黨仍不解散起身之日收受允

祇馬匹私相往來。及到西寧之後。寄與允祇書信。有機會已失。追悔無及之語。視朝廷如同敵國。造作字樣。巧編格式。密縫於驪夫衣襪之內。暗傳信息。又十數年前。有一山西無賴生事之窮民。流落在京。塞思黑欲收爲心腹。令伊太監幫助銀十兩。其人感激私恩。及塞思黑居住西寧。其人公然到伊寓所投遞書帖。稱願輔有道之主。不附無道之君。欲糾合山陝兵民。以救恩主等語。乃塞思黑聞此。大逆無道之言。不但不行出首。且向其人云。我兄弟無爭天下之理。竝囑咐勿令楚宗知之。唯恐其人受累。似此狂悖妄亂。包藏禍心。日益加甚。其罪難以悉數。又如伊在西寧時。朕將伊所用太監撤回京師。伊每人賞與金條及西洋金表等物件。皆貴重難得之物。是伊獲罪之後。尚私買人心。目無國法。肆行無忌。諸王大臣等屢次奏請。即行正法。以彰國憲。朕心尚在遲回。不忍即定。因其不便再留。

西寧。故令伊回京治罪。伊一路毫無改悔戒謹之心。談笑如常。因復令暫禁保定。以觀其行止。前李紱奏稱伊患腹瀉之疾。比即降旨。令李紱揀選名醫調治。不料伊惡貫滿盈。獲罪。

天

祖已付真誅。可見善惡之報捷如影響。似此不忠不孝大姦大惡之人。雖未受國法。亦不能逃天譴也。著李紱爲伊料理棺衾殯殮之事。俟其妻子家口。從西寧搬到保定之日。再行奏聞請旨。○又諭塞思黑病故。著尚書法海馳驛速往西大通將塞思黑之妻子家屬盡行帶至保定府。著派太監二人隨法海前往。約計塞思黑妻子何時可到保定府。預先奏聞。朕另有旨。○又諭朕從前差胡什禮前往帶領塞思黑回京。伊並未請旨。私與楚宗商議。擅將塞思黑用三條鎖鎖繫。彼時奏聞之際。朕將楚宗等奏摺發與諸王大臣等公看。

竝將塞思黑應否鎖拏之處詢問諸王大臣。據諸王大臣僉稱塞思黑係獲重罪之人。應當鎖拏等語。及胡什禮到京回奏。述李紱有候塞思黑一到。我便宜行事之語。朕聞知駭異。斷以爲不可。特命胡什禮星馳前往諭之。又於李紱奏摺中。硃批嚴飭之。李紱奏稱。竝無此語。胡什禮楚宗從前不待朕之諭旨。私將塞思黑鎖拏。後又故意將鎖寬鬆。任其脫卸。曾經李紱奏聞。彼時朕即欲將胡什禮楚宗拏問。治其任意之罪。又恐衆人不知。或因此謂朕欲寬待塞思黑。或因此謂朕欲加嚴於塞思黑。又致妄存意見。是以暫行停止。未曾究問。今塞思黑既伏冥誅。則從前胡什禮楚宗等擅將塞思黑上鎖。後又私自寬釋。明係有意欺罔。罪不可逭。著將胡什禮鎖拏交與副都御史常泰帶往保定。竝將楚宗鎖拏。一同明白嚴審具奏。即將二人留於保定候旨。○戊子。祭。

大社  
大稷。

上親詣行禮。○諭諸王大臣等。阿其那塞思黑罪大惡極。天下共知。諸王大臣等屢請將伊等即行正法。以彰國憲。朕意遲回不忍。即定今塞思黑已伏冥誅。昨聞奏報。朕心惻然。今欲將阿其那從寬曲宥。諸王大臣等以爲何如。著各秉忠誠陳奏。并詢問直省將軍督撫提鎮等。亦令其各行已見具奏。○以鑲紅旗漢軍副都統金以坦署鑲藍旗漢軍都統。○己丑。諭諸王大臣等。朕將塞思黑之事。交與楚宗楚宗始初所奏一二事件。尚有實心。勉効力之意。朕料伊久在軍前。年齒加長。必能改易前行。用加信任。畀以殊恩。乃楚宗將一二事件。致朕信任未久。遂奏稱塞思黑邀買人心。大有關係。斷不宜處之極邊。應拏送京城禁錮等語。似此明係見民人令狐士義之投書流言。因而具奏。恐嚇朕躬。楚宗係專



守塞思黑之人將令狐士義之投書流言竝塞思黑與西洋人穆經遠從牕牖出入時常計議如許事件妄亂行爲之處盡爲隱匿不行奏聞及朕明降諭旨伊知塞思黑罪惡深重斷不能逃於法網乃欲自蓋前愆將塞思黑從西大通解來保定時竝未奉朕諭旨擅將塞思黑鎖拏以見毫不徇情之意且既稱鎖拏自應實在加以鎖鈕又復虛應故事可以脫卸是屬何心再塞思黑一切事件已有旨交與李紱矣伊又行攙越將塞思黑之親隨四人另行拘禁他處楚宗之行爲甚是悖謬情殊可惡著交與常泰嚴行審明具奏○八旗都統等奏外省駐防官兵有身故及革退者例將其寡婦及家口解送來京每有到京未久託故告假而去者亦有因無所依附具呈回去者嗣後請令該將軍查明若有子弟披甲而京中竝無產業親族者准留彼處若無子弟披甲情願來京者解送回旗該旗

查明報部槩不准借端告假復回原處從之○貴州巡撫何世璽疏報平越普安州等四府州開墾雍正三年分田地四十九頃有奇下部知之○授輔國公巴賽子奇通阿爲輔國將軍原輔國將軍拜察禮子蘊興輔國將軍富良子斐新俱爲奉國將軍奉恩將軍畢喇席子石照奉恩將軍占泰子德克精額俱爲奉恩將軍

大清世宗敬天昌運建中表正文武英明寬仁信毅大孝至誠憲皇帝實錄卷之四十七



大清世宗敬天昌運建中表正文武英明寬仁  
信毅大孝至誠憲皇帝實錄卷之四十八

監修總裁官光祿大夫經筵講官太僕寺卿兼翰林院掌院學士等伯加十五級臣郭爾琿

總裁官光祿大夫經筵講官太子太保保和殿大學士兼兵部尚書總理兵部事務等伯加十五級臣郭爾琿

事等伯加十三級臣張廷玉光祿大夫經筵講官太子太保保和殿大學士兼戶部尚書仍兼管吏部尚書翰林院掌院

翰林院掌院學士二級臣福敏光祿大夫經筵講官太子太保東閣大學士兼禮部尚書四級臣徐本光祿大夫

經筵講官張廷玉臣協辦內閣大學士事務禮部尚書仍兼管太常寺鴻臚寺事三級等奉

敕修

雍正四年丙午九月庚寅朔○辛卯大學士

實錄卷四十八

八旗都統九卿等遵旨議覆向例旗人犯軍  
流徒罪者俱改折枷責結案未免輕於干犯  
查滿洲蒙古營生之道與漢民迥異有犯軍  
流罪者概行發遣恐致難以圖存請仍照舊  
例枷責完結其漢軍人等嗣後有犯軍流罪  
者一體照律發遣從之○壬辰以湖廣總督  
李成龍為正白旗漢軍都統福建福州將軍  
宜兆熊為湖廣總督○陞江西南贛總兵官  
蔡良為福建福州將軍浙江嚴州副將王郡

為江西南贛總兵官○工部議覆河道總督  
齊蘇勒疏言洪澤湖滾水石壩三座門檻太

高若遇水長周橋一帶石工甚屬危險請改

下一尺五寸庶尋常之水既可蓄蓄而暴漲

之時又得暢洩應如所請從之○癸巳以陝

西甘州提督馬會伯署四川提督○宗人府

參奏固山貝子滿都護屢犯大罪不知悔改

應革去固山貝子禁錮高牆得旨滿都護從

寬免其圈禁著革去固山貝子授為鎮國公

實錄卷四十八

所屬之佐領俱著撤出○禮部遵旨議覆

皇上躬親胼胝之勞歲行耕藉之典嘉禾疊產

異瑞駢臻今復行令地方守土之官俱行耕

藉之禮仰見

皇上敬

天勤民重農務本之至意宜恪遵

上諭通行直省督撫轉行各府州縣衛所各擇

潔淨之地照九卿所耕田數設立

先農壇於雍正五年為始每歲仲春亥日率

所屬恭祭

先農之神。照九卿例行九推之禮。所收米粟。敬謹收貯。以供各處祭祀之需。盛於國計民生。大有裨益。從之。○甲午。

上御太和殿視朝。諸王及文武陞轉各官謝恩。

○正白旗滿洲副都統哲爾袞緣事革職。調鑲白旗漢軍副都統博第爲正白旗滿洲副都統。陞西安布政使黃焜爲鑲紅旗漢軍副都統。○正白旗蒙古副都統滿色緣事降調。

以散秩大臣鄂密爲正白旗蒙古副都統。○乙未。議政王大臣議覆。振武將軍公巴賽奏稱。唐奴山前特斯等處駐劄之滿洲蒙古喀爾喀兵二千名。此際竝無事務。阿爾泰山嶺十月間降雪後。無庸防守。請將丁壽博貝所領兵二千名。於十月初間撤回軍營。俟來年青草發生時。令前鋒統領穆克登率察哈爾兵丁。在特斯駐牧。副將軍貝勒博貝率喀爾喀兵一千。在特斯河駐牧。丁壽率右衛蒙古

兵一千。在扎布韓駐牧。平時操練。儻遇有事。公同商議。相機而行。仍於十月降雪後。撤回軍營。應如所請。從之。○吏部議覆御史顧琮條奏各部院缺主。已經驅逐。請通行直省一體禁革。應如所請。從之。○裁甘肅屬之平涼固原慶陽臨洮河州蘭州岷州七衛西固一所各千總缺。歸併各州縣管轄。從甘肅巡撫石文焯請也。○丙申。諭內閣。錢文乃民間日用之所必需。向因錢價昂貴。朕悉心籌畫。至再至三。今鼓鑄之錢日增。而錢文不見其多。錢價仍復不減。是必姦民圖利。有銷燬制錢。打造器皿之事。若不禁止銅器。則錢價究不能平。嗣後除三品以上官員准用銅器外。其餘人等不得用黃銅器皿。定限三年。令將所有黃銅器皿悉行報出。官給應得之價。如旗人則於本旗交官領價。漢官民人則於五城該管之處交官領價。不論輕重多寡。隨便收買。不許發價之人絲毫扣剋。違者重治其罪。

若三年之後。仍有私藏黃銅器皿者。亦加重處。如此。可永杜燬錢制器之弊。而國寶流通。民用充裕。實為有益。著九卿確議具奏。○雲南巡撫管雲貴總督事鄂爾泰題雲南普洱府車理宣慰司刀召區猛故。請以其子刀召金保承襲。下部知之。○予故河南南陽總兵官董玉祥祭葬如例。○丁酉。宗人府叅奏旗人虧空帑項。不能賠者。入辛者庫。乃係定制。該旗王公竝無謝恩之例。輔國公阿布蘭從前訛取常泰之子銀兩。今又越例妄奏。應革去公爵。仍行禁錮。得旨。阿布蘭革退。輔國公禁錮之處。暫行寬免。將所屬佐領俱著撤出。○戊戌。

上御乾清宮西暖閣召皇子諸王大學士學士各部院寺堂官詹事府翰林院科道及武大臣之能詩者九十四員。至乾清宮賦栢梁體詩。欽定八庚韻。硃書黃籤。分給諸臣各一字。授几賜坐。筆墨燦陳。酒肴并列。內侍傳

諭曰。今日賦詩式燕。用昭君臣一體之誼。諸臣毋得過拘禮節。能飲者不必限以三爵。諸臣聆

諭。方共持杯染翰。

御製先成。命大學士張廷玉捧示諸臣。涵蓋萬有。義蘊精深。諸臣詩句次第構就。書於分韻黃籤進呈。皇子諸王及大學士九卿等。至御前進酒上壽。

上親賜皇子諸王大學士尚書都統等飲。命皇子諸王分賜諸臣飲。諸臣叩首跪飲畢。趨候於乾清門外。少頃復召至乾清宮。

上陞寶座。皇子諸王及文武諸臣分東西兩班序坐。作樂進膳。賜食演劇。宴畢。王以下諸臣叩頭謝恩。趨出。復頒賜糕餅瓜果等物。有差。上親製序文。宣示諸臣。序曰。朕繼大統。惟朝乾夕惕。兢兢仰法

皇考。期賢哲盈廷。民康物阜。永承至隆之聖治。嘗思古之明良。賡歌喜起。君臣一德同心。

曠代爲之欣慕。今在廷臣工。協衷以資贊理。

顧瞻濟濟。皆我

皇考數十年教育栽培之所詒也。是以庶政具

舉。兆民樂業。朕實嘉賴焉。康熙二十一年春。

聖祖於乾清宮開昇平之燕。振賡揚之歌。盛稱

一時美冠千古。今丙午九月。節屆重陽。覽百

穀之斯登。忻三農之有稔。光風溢目。海宇澄

清。爰集王公卿尹。用陳几筵。笑言勿禁。威儀

不拘。相悅於一堂。弗限夫三爵。然禮著享燕

之義。詩有嘉賓之詠。古君臣於飲食燕會間。

即具獻納拜賜之典也。唐虞文武之世。休風

如昨。朕與諸卿宜則倣之。今用柏梁體。朕爲

倡始。諸卿遞成篇什。今日也。非徒命酒徵歌。

揚華摘藻。蓋欲昭

聖祖養育之深恩。朕廷泰交之雅會。垂之奕世。

永傳斯事云爾。

製御天清地寧四序成。賡歌拜手頌昇平。和碩親王王碩誠

允卿雲旭日聯金英。和碩恒祺

恩覃九有仰文明。和碩怡親王王碩祥普天率土慶時亨。

和碩莊親王王碩祿願抒愚忱體維城。多羅果郡王王碩禮

湛恩渥澤周羣生

皇四子弘曆太和景象彌寰瀛。皇五子弘晝九族

敦睦沐

恩榮。多羅順承郡王王錫保

御筵陪侍玉琰琤。鎮國公王德普一庭和氣慶豐盈。和保

殿大學士馬齊素餐帷幄愧調羹。文華殿大學士王高

皇衷感召惟至誠。文華殿大學士王華老臣瑤席獻壽

觥。文淵閣大學士高其位梯航萬國歌永清。文淵閣大學士張

玉延黜陟維公玉衡呈。吏部尚書王查均平九式百

度貞。戶部尚書王蔣仁風四洽天宇晴。禮部尚書王望

聲靈赫濯昭鴻名。兵部尚書王瑛求厥明允先平

情。刑部尚書王塞虞廷弼教忝秋卿。刑部尚書王勵

司水土任匪輕。工部尚書王季千八百國胥朝

聖德剛健符乾行。御史大夫王福敬

正。都統臣碩德珠聯璧合佳瑞并。都統臣高其佩

錫壽兆民齊錢彭。侍郎臣登德一恪襄六計聲

教宏臣吏部左侍郎澄清官敘在銓衡侍郎部右

王沛版圖恢廓周八紘臣戶部左侍郎蔚興文教

廣彙征臣禮部右侍郎

天章爛熳雲霞頽臣禮部右侍郎止戈偃武靖鯢

鯨臣兵部右侍郎河海清晏環神京臣工部左侍郎

蓬萊佳譙張錦棚臣內閣學士陰陽調和奏六

莖臣內閣學士佐持風紀嚴章程臣左副都御史

大化翔洽綏蒸氓臣左副都御史

九重乾乾日勵精臣副都御史鳳城佳氣拂霓旌臣副都御史

璇璣光蘭蘅臣通政使司形足仙樂諧韶韻

嘉臣詹事府詹事馨香昭格潔犧牲臣太常寺卿

禾疊產供梁盛臣順天府府尹宣揚德化人歡

迎臣署理江蘇巡撫天廚惠賜飲珍烹臣右通政使

其昌臣羅承平雅頌音曾呖臣大理寺少卿梧岡

翹羽來鳳鳴臣少詹事橋門壁水波澄泓臣少詹事

酒事臣國子監祭酒蓼蕭燕譽義菁菁臣太常寺少卿

卷阿獻賦欽

睿評臣翰林院侍讀學士青壇祇肅侍

躬耕臣侍讀學士夙夜精白臣心盟臣侍讀學士魚

依蒲藻鹿食華臣侍讀學士叨隨駕序愧瑤瓊

雨澤滋春萌臣侍讀學士英囊拜錫逾賜櫻臣侍讀學士承天

輝長庚臣侍讀學士五音從律和球鐃臣侍讀學士星雲紉綬

御茗辨旗槍臣侍讀學士湛露恩濃仙掌擎臣侍讀學士

和鳴宮樹聽秋鶯臣侍讀學士銅壺晝漏聲丁

丁臣侍讀學士天香碧落飄浮雲臣侍讀學士紫烟瑞

靄互迴紫臣侍讀學士承恩館閣供使令臣侍讀學士

細書天祿藜火晶臣侍讀學士石渠東觀儲瓊瑛

馬金門臣侍讀學士世直丹禁懷屏營臣侍讀學士環閣分校

擲璣璣臣侍讀學士禮陶樂淑化自更臣侍讀學士仁

漸義摩俗靡爭臣侍讀學士三秋瑞穀充箱簾臣侍讀學士

本臣徐玉笋膏凝琥珀飴臣侍讀學士碧香丹實羅

金橙臣侍讀學士甘分珍果駢珠璣臣侍讀學士堂上

堂下調琴箏。

針大計臣

東序西序吹簫笙。

臣楊計

佳時雲日煥軒楹。

建豐臣

新開藥榜歡庠

贊。

吳計臣

南薰解阜聆鏗錚。

禮科給事中

方玉食傳香秬。

禮科給事中

監史不設心先

醒。

兵科給事中

璇題丹城仰崢嶸。

刑科給事中

新

堯樽惠澤逮簪纓。

工部給事中

舜日麗照倍晶瑩。

監御史

左圖右史玉案橫。

監察御史

所寶維賢輕白珩。

監察御史

珍羽貢雙睛。

監察御史

鈞天迭奏何砰鉤。

御史

重陽令節開九閱。

監察御史

帝庸作歌暢元聲。

監察御史

盈庭喜起臣鄰康。

監察御史

○乙亥諭吏部。

月選各官考試履

歷條奏。原以觀其學識。即知將來之趨向。今

考試各官內。將所進履歷條奏。詢問本人。竟

有不能奏對者。明係倩人代作。甚屬不合。嗣

後如仍有豫倩親友代作者。一經查出。將代

作之人與本人。俱以違旨例治罪。○以順承郡

王錫保管理鑲藍旗滿洲都統。○淮關監督

年希堯奏。原任監督慶元貪婪劣蹟。得旨

慶元莅任年餘。朕聞其聲名不好。曾屢次詢

問張大有。今其據實陳奏。張大有堅稱慶元

秉公奉職。商民皆便。朕又詢問張楷。張楷亦

稱慶元居官甚善。朕以二人陳奏之言自屬

可信。故將慶元留管淮關稅務。今覽年希堯

奏。慶元劣蹟多端。商民含怨。則從前張大

有張楷徇私妄奏。可知。年希堯所奏慶元款

蹟。及伊不法之家人。俱交與黃炳齊。蘇勒審

理。○湖廣提督趙坤奏報。沅州姦民謝祿正

等。盤踞山谷為盜。遣兵緝拏。謝祿正尚未擒

獲。請將地方官議處。得旨。不法匪類。藏匿山

谷。盜竊為非。地方文武大吏。遣兵緝拏。預先

若有調度。何難即時擒獲。乃發兵千餘名。而

賊徒竟敢抗拒。賊首公然逃脫。則大吏全無

布置。委用非人。而弁兵之怠玩。可知矣。且此

大吏何故因循疎忽縱盜養姦竝不早行緝捕著加查詢○順承郡王錫保奏阿其那染患嘔症前於初一日奏聞奉旨將阿其那用心調養欲食之物悉著給與臣遵旨令太監給與調養至初五日阿其那病勢加增不進飲食初十日病故報聞○庚子以禮部右侍郎塞楞額署理山東巡撫○廣東巡撫楊文乾疏報廣東廣州潮州肇慶三府開墾雍正三年分田地四十九頃下部知之○雲南巡撫管雲貴總督事鄂爾泰題雲南永北土知府阿錦輝故請以其弟阿錦先承襲下部知之○辛丑降工部左侍郎明圖爲內閣學士兼禮部侍郎○雲南巡撫管雲貴總督事鄂爾泰題猛卯安撫司衍玘故請以其子衍志承襲下部知之○壬寅諭內閣張楷由道員拔至巡撫理應感恩報効乃到任以後惟務沽取虛名於地方事務全不經心料理朕降旨訓飭而伊奏稱臣有潔己愛民之心無振

作有爲之能大凡愛民之政莫大於察吏緝盜張楷在任縱容不肖官吏鹽梟盜賊爲害地方朕訪知貪劣不及官員指名令其參奏伊始行參奏朕訪知鹽梟私販指名令其緝拏伊始行緝拏數年來裨益地方之事無一可稱乃公然以愛民自誇於君父之前又潔己二字乃朕獎勵臣下之語張楷何得以此自居乎且爲大吏者激濁揚清興利除害皆職分以內之事朕不知如何謂之振作如何謂之有爲朕之諄諄訓誨者不過欲地方大吏各勉其職各盡其道以爲息事寧人之本何當以苛刻爲能察察爲明而令督撫等生事以滋擾乎以朕綏靖地方之心而張楷視爲煩擾地方之事其意不過欲姑息優容得宵小之歡心而不顧國家之法度使名歸於己而怨歸於上尚得謂之知君臣之大義乎著將張楷革職鎖拏嚴審定擬○陞詹事府詹事鄂爾奇爲工部左侍郎○雲南巡撫管

雲貴總督事鄂爾泰題。騰越州蓋達副宣撫司刀思琳故請以其子刀思弼承襲。下部知之。○甲辰諭內閣。古者射御居六藝之中。聖人所重。本朝開國以來。騎射精熟。歷代罕有。倫比旗人。凡少長貴賤。悉皆專心練習。未有一人不嫻熟弓馬者。士子應試。必先試其騎射合式。方准入闈。蓋恐其專習文藝。或致騎射生疎。故先以此試之。即今部院堂司官亦每月如期在本旗教場。該管都統佐領看練弓馬。所謂有文事者必有武備。創制立法之意。誠深遠也。近來文官外任之人。漸漸不習於騎射。若聽其因循怠惰。將來必致騎射生疎。豈國家創制立法之意乎。凡旗人外任文官六十歲以下者。限二年之內。仍須熟練騎射。僅二年後有不能騎射者。該督撫即行叅劾。若督撫徇隱。經朕察知。將督撫一併治罪。○諭戶部。去年山東濟南兗州東昌三府。偶有水患。朕心軫恤。蠲賑兼施。復將本年漕米。

或全緩徵。或緩徵一半。以紓民力。今年山東雨水調勻。二麥豐登。民生樂業。惟是去歲被水低窪之處。又經今夏之雨。未必能及時播種。以獲全收。查去歲緩徵漕米。應於今年並徵。誠恐民力艱於輸將。用是再沛恩澤。將去年全緩之州縣。令其於今年帶徵一半。明年帶徵一半。務使民力寬餘。以副朕加惠閭閻之意。又聞山東登萊青三府。連年豐稔。此時商販之米。自東而西者。絡繹不絕。若山東巡撫酌量動用帑銀。委官購買。分貯於濟南等屬米少之州縣。再勸諭各商販等多運米石。至濟南三府。俾民間得以收買存貯。則明歲青黃不接之時。米價不至騰貴。實預籌足民之善策也。○諭禮部。明年乃會試之期。春季適有閏月。二月節候尚早。各省舉子途次遠來。及闈中考試。恐其寒冷辛苦。朕心軫念。著將場期改至三月。該部即行文諭知之。嗣後會試之年。遇有閏月。該部先期奏聞。○禮部



遵旨議奏

皇上御極以來恪守三年之制齋居素服凡晨昏之瞻拜朔望之祭享以至

山陵之致敬

廟寢之告虔無一時不思哀思敬無一事不盡禮盡誠誠千古未有之大孝也復以

聖祖仁皇帝之慈恩億萬臣民所共感戴一切禮儀非定制可拘今於

聖祖仁皇帝忌辰每年應遵照週年祭祀之例

恭讀祝文致祭永遠舉行得旨是○刑部等

衙門遵旨議覆河工効力知州郎達侵蝕帑

銀一案查定例侵盜錢糧數滿一千兩以上

者擬絞監候郎達雖未滿一千兩之數但此

等劣員不應照常例擬罪應擬斬立決得旨

郎達暫改爲應斬監候儻直隸水利河工効

力人員再有如郎達侵盜錢糧者發覺之日

與郎達一同正法著將此通行曉諭○雲南

巡撫管雲貴總督事鄂爾泰題遮放副宣撫

司多世祿故請以其子多量承襲下部知之

○丙午諭內閣大學士朱軾將至京師著學

士何國宗副都統永福迎勞賜食示朕眷念

之意○諭吏部州縣爲親民之官關係緊要

現在投供候補候選未用之人俱屬平常用

之於不甚繁劇之州縣尚可供職若任繁劇

必致貽誤地方及至督撫訪察題叅事務已

致廢弛著將在京候補候選無論已未投供

驗到各項人員查明帶來引見○諭戶部去

年莽鵠立奏稱長蘆竈地久未清查以致民

竈爭控不已請將竈戶灘地從前售與民人

者許其回贖如無力者仍許現在耕種之民

收租納糧俟原業竈戶有力之日再行回贖

等語比經九卿議覆准行近聞當年竈地轉

售與民其年分久遠有百餘年者業主售主

多半變更即有子孫當時價值多寡亦俱遺

忘或有逃亡等戶更無從質問以致同姓影

響之人彼此爭贖紛紛告訐實滋煩擾若必

俟原業竈戶有力之日回贖。儻或始終無力。則此項地畝久久竟成民地。亦非清查竈地之良法。朕意以爲不若將竈戶賣與民人之交易。年近確有實據者。令竈戶備價取贖。其餘年久迷失之地。所有爭告無憑詞狀。該衙門俱行註銷。凡民人所有竈地。嗣後止許賣與竈戶。永遠爲業。如有仍轉行典賣與民者。照盜賣官地律治罪。永以爲例。如此則數年之後。竈地自漸歸於竈戶。而無不清之弊矣。○陞翰林院侍讀學士吳襄爲內閣學士兼禮部侍郎。○以都察院左都御史福敏署理湖廣總督。大學士馬齊暫署都察院事。○丁命康親王崇安管理鑲紅旗漢軍都統。○丁未吏部議覆長蘆巡鹽御史顧琮條奏。州縣承審私鹽案件。每至拖延時日。監斃人犯。請嗣後除大夥興販。仍照定限審結外。其餘易結之案。儻有遲延至四月之外。一案監斃至三人。一年監斃至三案者。照司獄監斃例議。

處應如所請。從之。○戊申。遣官祭

歷代帝王。○遣官祭城隍之神。○移四川重

慶府同知駐黔江。裁酉陽司經歷一員。其雅

州天全二司經歷。瀘州九姓司吏目俱改設

州同。以資彈壓。從川陝總督岳鍾琪請也。○

己酉。雲南巡撫管雲貴總督事鄂爾泰題。雲

南路江安撫司線于故。請以其子線明承襲

下部知之。○免山東德州歷城等四十三州

縣濟南等五衛東平一所雍正三年分水災

額賦有差。○庚戌。議敘進藏功給驍騎校委

署章京葛爾忒安泰泰布。鎖爾科壽柱護軍

校委署章京葉綸拖沙喇哈番世職。○壬子。

諭內閣。賭博之事。最壞人之品行。若下等之

人習此。必至聚集匪類。作姦犯科。放僻邪侈

之事。多由此起。若讀書居官之人習此。必至

廢時失事。志氣昏濁。何能立品上進。乃向來

屢申禁飭。而此風尚未止息。深可痛恨。若不

嚴禁賭具。究不能除賭博之源。著京城內外

及各省地方官將紙牌骰子悉行嚴禁。不許貨賣。違者重治其罪。嘗有窩賭之家。誘人入局以取其利。嗣後准輸錢之人自行出首。免其賭博之罪。仍追還所輸之銀錢。庶使賭博之人有害而無利。則其風可以止息。又見漢軍惡習。常以工於馬弔。互相誇尚。夫既已居官。則應辦之事務甚多。日夕不遑。尚恐遲誤。安有餘閒爲此無益之戲。且聞有上司與屬員鬪牌爲樂者。尤非體統。大玷官箴。嗣後若有司官員鬪牌賭博。著該管上司及該督撫指名題參。至禁止賭博宜如何定例之處。該部議奏。尋議定例。旗人製造紙牌骰子售賣者。照光棍爲從例。擬絞監候。而民人止於枷責。所以不知畏懼。嗣後應將民人之製賣賭具及賭博者。以充發杖流分別擬罪。至官員賭博者。革職永不敘用。從之。○吏部奏翰林告病休致之員。恭逢恩詔俱准補用。嗣後凡有患病告假者。或仍令休致。或遵奉恩詔准

其起用。得旨准其起用。○癸丑諭內閣。大學士朱軾。丁憂回籍。朕本欲成全其志。准其在籍守制三年。但朕左右匡弼需人。而營田水利工程。亦係伊協同辦理之事。故召令來京。三年之內。不補原官。准其素服。凡朝會宴饗。及應穿補服之處。俱不必到。俾伊得盡人子之心。以展孝思。當日怡親王遭伊母妃之喪。聖祖仁皇帝恩准素服三年。今日朱軾即可比照此例。著仍在內閣兼吏部都察院行走。○河南副總河嵇曾筠奏報秋汛情形。得旨。今歲黃河秋汛。朕深爲繫念。屢降諭旨。令河工官員加意保固。茲據奏稱深秋水勢消落。堤工平穩。乃數十年希有之安瀾。朕心深慰。又稱濱河萬姓。踴躍歡呼。齊赴嘉應觀禮拜酬神。頂祝萬壽等語。禱祀神明。只在修德行善。安分循理。一心誠敬。自能潛通默感。獲福弭災。若聚衆喧囂。謝神酬願。恐姦胥匪類。借端科派。別生事端。反致良民滋擾。非誠敬事神

之道。著將此諭衆知之。○以吏部左侍郎查郎阿署都察院左都御史。○陞翰林院侍講學士留保爲詹事府詹事。○甲寅。諭內閣。向來邊省要缺。題請調補。乃督撫提鎮拔用私員之捷徑。其中多有妄用非人。且有題補後竝未身履其地。而因邊俸遂得速陞者。是以聖祖仁皇帝曾下特旨。以督撫提鎮題補太多。此習相沿日久。大有關係。著九卿議奏。經九卿以停止題補議准。遵行在案。朕思邊省地方。或煙瘴難居。或苗蠻頑桀。官斯土者。與內地不同。是以邊俸較腹俸之陞遷爲速耳。今太平日久。亦有煙瘴漸消。風俗漸淳之處。仍照舊例題補陞轉。亦覺太濫。著九卿將各邊俸之缺。或係瘴癘未除。宜令督撫等題補。或係風氣已轉。可照內地選用。一一分晰議奏。至文武原屬一例。武職官員亦應照文官遷轉之例。以邊俸較俸爲宜。著一併議奏。尋議凡邊俸非保題調補之缺。俱與內地一體較

俸陞轉從之。○以禮科給事中楊爾德提督廣東學政。○工部奏萬年吉地需用物料。請派出官員督同各省備辦。得旨。楠木難得。如果不得。即松木亦堪應用。其備辦此等木植。自京城差遣官員。未免騷擾地方。即交與總督巡撫。動正項錢糧採買。○貴州巡撫何世璽疏報大定貴筑等八州縣開墾雍正三年分田地一百二頃有奇。下部知之。○乙卯。諭內閣。九卿翰詹科道等。查嗣庭向來趨附隆科多。隆科多曾經薦舉。朕今在內廷行走。授爲內閣學士。後見其語言虛詐。兼有狼顧之相。料其心術不端。從未信任。及禮部侍郎員缺。需人。蔡珽又復將伊薦舉。今歲各省鄉試屆期。朕以江西大省。需得大員以典試事。故用伊爲正考官。今閱江西試錄所出題目。顯露心懷怨望。譏刺時事之意。料其居心澆薄乖張。必有平日紀載。遣人查其寓所及行李中。則有日記二本。悖亂

荒唐怨誹捏造之語甚多。又於

聖祖仁皇帝之用人行政大肆訛謬。以翰林改授科道爲可恥。以裁汰冗員爲當厄。以欽賜進士爲濫舉。以戴名世獲罪爲文字之禍。以趙晉正法爲因江南之流傳對句所致。以科場作弊之知縣方名正法爲冤抑。以清書庶常復考漢書爲苛刻。以庶常散館爲畏途。以多選庶常爲蔓草。爲厄運。以殿試不完卷黜革之進士爲非罪。熱河偶然發水則書淹死官員八百人。其餘不計其數。又書雨中飛蝗蔽天。似此一派荒唐之言。皆未有之事。而伊公然造作書寫。至其受人囑託代人營求之事。不可枚舉。又有科場關節。及科場作弊書信。皆甚屬詭秘。今若但就科場題目。加以處分。則天下之人。必有以查嗣庭爲出於無心。偶因文字獲罪。爲伊稱屈者。今種種實跡。現在。尚有何辭。以爲之解免乎。爾等漢官讀書稽古。歷觀前代以來。得天下未有如我朝之

正者况

世祖

聖祖重熙累洽八十餘年。深仁厚澤。淪肌浹髓。天下億萬臣民。無不坐享昇平之福。我皇考加恩臣下。一視同仁。及朕即位以來。推心置腹。滿漢從無異視。蓋以人之賢否不一。各處皆有善良。各處皆有姦惡。不可以一人而概衆人。亦不可以一事而概衆事。朕惟以至公至平之心處之。爾等當仰體朕心。各抒誠悃。交相勉勵。殫竭公忠。無負平日立身立德之志。或有一二心術不端者。亦宜清夜自省。痛加檢改。朕今日之諭。蓋欲正人心。維風俗。使普天率土。永享昇平之福也。爾等承朕訓旨。當曉然明白。勿存疑懼避忌之念。但能恪慎供職。屏去習染之私。朕必知之。朕惟以至誠待臣下。臣下有負朕恩者。往往自行敗露。蓋普天率土。皆受朝廷恩澤。咸當知君臣之大義。一心感戴。若稍萌異志。即爲逆天。逆天

之人豈能逃於誅戮報應昭彰纖毫不爽諸臣勉之戒之查嗣庭讀書之人受朕格外擢用之恩而伊逆天負恩譏刺咒詛大干法紀著將查嗣庭革職拏問交三法司嚴審定擬

○丙辰

孝慈高皇后忌辰遣官祭

福陵○丁巳諭內閣爲士者乃四民之首一方之望凡屬編氓皆尊之奉之以爲讀聖賢之書列膠庠之選其所言所行俱可以爲鄉人法則也故必敦品勵學謹言慎行不愧端人正士然後以聖賢詩書之道開示愚民則民必聽從其言服習其教相率而歸於謹厚或小民偶有不善之事即懷愧恥之心相戒勿令某人知之如古人之往事則民風何患不淳世道何患不復古耶朕觀今日之士雖不乏閉戶勤修讀書立品之人而蕩檢踰閑不顧名節者亦復不少或出入官署包攬詞訟或武斷鄉曲欺壓平民或抗違錢糧藐視國

法或代民納課私潤身家種種卑污下賤之事難以悉數彼爲民者見士子誦讀聖賢之書而行止尚且如此則必薄待讀書之人而并且輕視聖賢之書矣士習不端民風何由而正其間關係極爲重大朕自即位以來加恩學校培養人材所以教育士子者無所不至宜乎天下之士皆鼓舞奮興爭自濯磨盡去其佻達之習矣而內外諸臣條奏中臚列諸生之劣蹟請行嚴懲者甚多朕思轉移化導之法當先端其本原教官者多士之儀型也學臣者教官之表率也教官多屬中材又或年齒衰邁貪位竊祿與士子爲朋儔視考課爲故套而學臣又但以衡文爲事任教官之因循怠惰苟且塞責漫不加察所以倡率之本不立無怪乎士習之不端風俗之未淳也朕孜孜圖治欲四海之大萬民之衆皆嚮風慕義革薄從忠故特簡督學之臣慎重教官之職欲使自上而下端本澄源以收實效

也。凡爲學臣者。務須持正秉公。宣揚風化。於  
教官之稱職者。即加薦拔。溺職者。即行叅革。  
爲教官者。訓誨士子。悉秉誠心。如父兄之督  
課子弟。至於分別優劣。必至公至當。不涉偏  
私。如此各盡其道。則士子人人崇尚品誼。砥  
礪廉隅。不但自淑其身。而羣黎百姓。日聞善  
言。日觀善行。必共生感發之念。風俗之丕變。  
庶幾其可望也。○戊午。諸王、文武大臣等。合  
詞議奏。阿其那、塞思黑逆天大罪。應戮屍示  
衆。同黨之允禩、允祿、竝應正法。

上召入。諭曰。諸王、大臣等所奏。乃執法定罪。至  
公之論。但阿其那、塞思黑既伏冥誅。其戮屍  
之罪。著從寬免。允禩乃狂妄無知之人。爲阿  
其那、塞思黑所愚。入其邪黨。聽其指揮。尚非  
首惡。故將伊拘禁於

壽皇殿之旁。俟其悔改。當日

皇考拘執阿其那之時。允禩與塞思黑公然挺  
身保奏。允禩且曾邀約朕躬。伊等又私藏毒

藥。願與同死。昨阿其那身故之後。朕遣人詢  
問允禩云。阿其那在

皇考之時。爾原欲與之同死。今伊身故。爾若欲  
往看。若欲同死。悉聽爾意。比時允禩回奏。我  
向來爲阿其那所愚。今伊既伏冥誅。我不願  
往看。等語。據此。則允禩似有悔心之萌。或伊  
僞作此語。欲留其身。以圖將來報復。均未可  
定。著暫緩其誅。以徐觀其後。若竟不悔改。仍  
蹈罪愆。再行正法。允祿癡庸卑鄙。若將伊與  
阿其那等同列。亦覺不稱。今既已禁錮。亦免  
其正法。○予故浙江提督楊長春祭葬。謚勤  
恪。

大清世宗敬天昌運建中表正文武英明寬仁  
信毅大孝至誠憲皇帝實錄卷之四十八

大清世宗敬天昌運建中表正文武英明寬仁  
信毅大孝至誠憲皇帝實錄卷之四十九

監修總纂官光祿大夫經筵講官太僕議政大臣保和殿大學士兼兵部尚書總理兵部事三等伯加十五級臣舒圖

總纂官光祿大夫經筵日講官起居注太僕卿太子太保保和殿大學士兼戶部尚書仍兼吏部尚書翰林院掌院

事三等伯加十三級臣張廷玉光祿大夫經筵日講官起居注太僕議政大臣武英殿大學士兼工部尚書仍兼管

翰林院掌院事加二級臣福敏光祿大夫經筵講官太子太保東閣大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼管太常寺四庫書事臣三泰等奉

敕修

雍正四年丙午冬十月己未朔享

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵○頒雍正五年時憲曆○庚申諭內閣部



院大臣等朕宵旰勤勞勵精圖治諄諄以正人心端風俗爲首務而欲人心風俗同歸於善必先去其營求請託之私而後可以成公平之化大臣者羣僚之表率也職官者士庶之儀型也大臣不能去營求請託之私則標準不立而百僚士庶相習成風更無所底止矣外省督撫藩臬皆地方大吏其所辦理皆地方緊要之事若在京大臣以私情囑託必致進退人材不得其實聽斷獄訟不得其平種種倚仗勢力顛倒是非夤緣奔競之事皆由此起民生何由安吏治何由肅乎夫文以道接以禮聖人所不廢內外官員凡有問候書札及餽遺往來而無所干瀆者不必拒絕有闕說請託者宜嚴行禁止地方大吏正當謝絕知交囑託之私情以除向來相沿之陋習在廷諸臣亦可舉國法以謝親知秉公去私共襄移風易俗之化慎之勉之○諸王文武大臣等以十月三十日恭屆

萬壽聖節合詞奏請慶賀得旨朕即位以來事  
事效法

皇考當日

皇考聖誕未曾每歲行慶賀禮是以今年朕萬壽節禮部奏請慶賀朕降旨停止蓋

皇考六十年來所行之事朕力能效法者無不遵奉施行其力所不能者則待朕黽勉於他日即如

皇考慎重武備每歲巡行邊塞校獵講武一事

朕年來未一舉行而庸劣無知之官員及怠惰不堪之兵丁頗有以朕之不往爲是者此皆愚賤之人偷安自便不知大體之論國家武備關係緊要不可一日廢弛朕之不往乃朕不及

皇考之處朕自知之蓋

皇考德盛化神睿思廣運巡幸所至日理萬幾畧無曠缺與在宮中無異朕則從朝至夕殫竭心力尚恐經理未周實無暇及於校獵行

圍之事。此朕不及

皇考者也。

皇考神武天授。挽強貫札之能。超越千古。衆蒙古見之。無不驚服。而朕之技射。不及

皇考矣。

皇考聖體康強。如天行之常健。春秋已高。猶不減壯盛之時。而朕之精力。又不及

皇考矣。是以臨邊講武之事。未曾舉行。祇於前歲。令皇子出口行圍。以習訓練。而武弁及旗員引見。則皆試以技射。而後用之。朕欲俟經理政事。悉皆得宜。即當於農隙之時。躬行獮狩之禮耳。朕事事不及

皇考。惟有洞悉下情之處。則朕得之於親身閱歷。朕在藩邸四十餘年。凡臣下之結黨懷姦。夤緣請託。欺罔蒙蔽。陽奉陰違。假公濟私之習。皆深知灼見。可以屈指而數者。是以今日宵旰憂勤。爲世道人心長久之計。禁之不得不嚴。訓之不得不切。非好爲辨論。自取煩勞。

也。其他宣猷敷政。實不及

皇考之萬一。惟有事事黽勉效法而行。如萬壽節不行慶賀禮。乃事之易行者。著仍遵前旨。

○以吏部尚書內務府總管查弼納。協理兵部尚書事務。署正藍旗漢軍都統。黃國材。協理兵部侍郎事務。○陞左翼前鋒叅領馬爾齊。爲歸化城左翼副都統。○辛酉。陝西興漢總兵官王之俊。緣事降調。陞陝西河州副將劉世明。爲陝西興漢總兵官。○戶部議覆。左都御史兼理奉天府府尹事尹秦奏言。奉屬貯窖穀石。請照民倉存七借三之例。每年出納稽查完數。以免霉泔。應如所請。從之。○科爾沁固倫額駙班第。故遣官致祭。○壬戌。以是歲停決。將刑部情實人犯李公等十四人。緩決。人犯馬振圖等二十人。分別遣釋。○癸亥。調安徽學政國子監祭酒孫嘉淦。提督順天學政。浙江學政。通政使司右叅議李鳳翥。提督安徽學政。以國子監司業王蘭生。提督

浙江學政○調浙江布政使佟吉圖來京以原任陝西西安按察使許容爲浙江布政使司布政使○甲子諭九卿等朕聞浙省風俗澆漓甚於他省若不力爲整頓挽回及其陷於重罪加之以刑實有不忍朕意專遣一官前往浙江省問風俗稽察姦僞應勸導者勸導之應懲治者懲治之務使紳衿士庶有所儆戒盡除浮薄囂凌之習歸於謹厚以昭一道同風之治其如何設立衙門鑄給關防之處著詳議具奏尋議查唐貞觀中置觀風俗使巡省天下觀風俗之得失今遣官前往浙江省問風俗稽察姦僞應授爲浙江等處觀風整俗使鑄給關防以重職守從之○諭戶部從前因泗州逼近黃河常有水患今歲又復被水特命布政使石麟動支庫銀二萬兩親身帶往散給窮民此朕格外之恩也今魏廷珍奏稱已奉諭旨動庫銀二萬兩賞給無庸再議賑恤等語殊非朕格外加恩軫念窮

黎之意且賑濟之例應照被災分數酌定多寡若云已加特恩便不照常賑濟儻恩賞之數不及應賑之數則小民因此轉未蒙恩矣著交與魏廷珍仍照定例將應賑之處確核具題散賑○諭禮部直省學臣三年任滿著於各學生員內選擇人品端方有猷有爲有守之士大省舉四五人小省二人送部引見酌用○諭兵部各省駐防兵丁已故者其婦女每年以船載送回京江南浙江等處俱於七八月起程福建廣東荊州等處俱於四五月起程沿途換船船戶惟利是圖故意延挨一到臨清濟寧地方即稱恐致冰凍仍令旱路來京中途苦累甚屬可憫嗣後著於定限之前一月起程交與沿途地方官速換船隻與糧船一例照管督催務令必至張家灣庶寡婦等不致苦累而回空船隻亦不致守凍矣○以河南學政光祿寺卿王國棟爲浙江觀風整俗使大理寺少卿于廣提督河南學

政○理藩院遵旨議覆蒙古官兵於布拉罕布婁爾二路襲擊策妄阿喇布坦邊界擒殺賊衆應請分別賞給銀幣從之○丙寅

上諭纂修

實錄總裁官大學士張廷玉朕閱康熙四十七年

實錄內載

皇考褒獎朕之諭旨云朕之諸子多令人視養惟四阿哥朕親撫育能體朕意愛朕之心殷

勤懇切可謂誠孝當時降

旨原有幼年微覺喜怒不定一語朕曾奏曰臣侍

皇父左右時蒙訓誨頃者復降

褒綸實切感愧至於喜怒不定一語昔年曾蒙

皇父訓飭此十餘年以來

皇父未曾降旨飭臣有喜怒不定之處是臣省

改微誠已荷

皇父洞鑒今臣年逾三十居心行事大概已定

喜怒不定四字關係臣之生平仰懇

聖慈將

諭旨內此四字恩免記載隨蒙

皇父傳諭曰十餘年來實未見四阿哥有喜怒不定之處頃朕降旨時偶然諭及無非益加勉勵之意此語不必記載今朕繼承大統臨御寰區凡一喜一怒皆慎之又慎未敢輕忽如或尚有不定處足見

皇考知人之明評論不爽如朕已無喜怒不定

之處是朕仰遵

庭訓時時體察得以陶鎔氣質

皇考訓誨之恩尤不敢忘也爾等可將當日

皇考降旨及朕奏懇蒙

恩俞允前後情節據實添載

實錄中○諭內閣助教一官有教訓士子之責

若只考試繕寫則年少淺學但工寫字者皆可入選何能得人可傳諭各部院衙門將滿字筆帖式內為人老成有品行者保舉引見

其應考繙譯者。仍照例考試。○以原任鑲藍旗蒙古都統伯四格爲正白旗領侍衛內大臣。○正白旗蒙古副都統莊圖。年老休致。陞正藍旗護軍叅領拉布坦。爲正白旗蒙古副都統。○丁卯。調工部左侍郎郝林。爲禮部左侍郎。○陞正黃旗滿洲副都統宗室鄂齊。爲鑲紅旗漢軍都統。○實授董象緯。爲直隸馬蘭口總兵官。湖廣提督趙坤。爲鑾儀衛鑾儀使。陞湖廣襄陽總兵官馮允中。爲湖廣提督。調浙江定海總兵官張溥。爲湖廣襄陽總兵官。福建臺灣總兵官林亮。爲浙江定海總兵官。陞福建臺灣副將陳倫炯。爲福建臺灣總兵官。○戶部議覆黃銅器皿。除三品以上官員准用。民間樂器。天平。法馬。戥子。及五觔以下之圓鏡。不禁外。其餘文武各官軍民等。所有舊存黃銅器皿。限三年內。悉交官領價。收藏打造者。照例治罪。並請通行各直省。一體嚴禁。得旨。依議。其各省禁止銅觔之處。且先

於直隸八府。及各督撫駐劄之省城。試行之。○刑部等衙門議奏。楚宗胡什禮奉旨帶領塞思黑回京。並不請旨。擅將塞思黑鎖拏。又復故意寬鬆。任其脫却。明係懷挾姦邪。暗庇逆黨。應照律將楚宗擬斬監候。胡什禮擬絞監候。得旨。楚宗從寬免死。發往阿爾泰種地處効力。胡什禮。從寬免死。在粘竿處効力。○浙閩總督高其倬疏報。蘇祿國王遣使奉表貢獻方物。已抵閩界。理合奏聞。得旨。蘇祿國遠在海外。隔越重洋。從來未通職貢。今輸誠嚮化。甚屬可嘉。閩省起送來京之時。著沿途地方官護送。照看。應用夫馬食物。著從厚支給。以示朕加惠遠人之至意。○添設浙江杭嘉湖三府分巡道一員。從大學士朱軾請也。○戊辰。諭諸王大臣等。我皇考聖祖仁皇帝臨御六十餘年。富有四海。而躬行儉德。撙節愛養。以爲保惠萬民之本。此中外臣民所共知者。從來宮中服御之具。惟

尚質樸無華。至於古玩器皿。皆尋常平等之屬。竟無一物爲人所罕見可珍奇者。此等事朕向來且不深知。則外廷臣工。又何從而知之。朕即位後。偶令內監將大內所有玩器。稽查檢點。並將避暑山莊等處。歷年陳設之物。其中可觀者。皆取回宮中。看來較朕藩邸所藏。尚屬不逮。益欽服我

皇考之至德。即此一節。已超越前古矣。偶因閒暇。憶及實不忍令

皇考盛德。異日湮沒而不彰。特書此以留示子孫。俾知

皇考之節用愛人。戒奢崇約。不獨溥鴻恩於萬姓。亦且留厚福於子孫。而世世追思

聖德。祇遵

聖訓。敬謹奉行。毋稍踰越。此又人人所當自勉者也。○署湖廣總督福敏摺奏。湖廣沔陽潛江等十州縣。被水饑民。逃荒載道。查此十州縣。皆係水鄉。米商易通。目下止需穀六萬石。

即已足賑濟之用。楚省各衙門。現有贏餘銀兩。原充公用。請動二萬四千兩買穀備用。但一時採買。恐穀價反致騰貴。應暫借常平倉穀六萬石發賑。即將此項銀兩陸續買補。庶於積儲無損。而民生有益。奉

上諭。買穀散賑。籌畫甚爲允當。實屬可嘉。朕救荒心切。豈惜倉穀。但如此一轉移間。賑務既濟。積儲仍不虧缺。可謂一舉而兩得也。○己巳。諭大學士九卿等。直隸地方旗民雜處。往往以強陵弱。勢力相加。而謹樸良民。常被欺壓。因而相習於強悍之風。不知悔改。俗不淳厚。或由於此。朕勵精圖治。欲四海之廣道德。一而風俗同。况輦轂之下。首善之區。尤當整飭化導。以爲萬邦之式。今欲將滿漢漢軍御史各差二員。令其巡查直隸八府地方。凡旗下告退官員。及在屯之莊頭內監之族戚。與在籍之鄉紳衿監僕。有不安本分。陵虐良民。不畏官吏。恣行暴悍者。或即行懲治。或具本

奏其地方命盜案件。亦聽其查訪。務使豪強斂跡。良善安居。以副朕移風易俗之至意。其如何遣官分巡之處。爾等定議具奏。庚午。振武將軍宗室公巴賽疏報。鄂爾昆等處屯田收穫。麥。糜。青稞一百十石。下部知之。○辛未。諭戶部。朕覽所奏恩詔內。賞給老人一項。直隸各省七十以上。至百歲以上。老民老婦共一百四十二萬一千六百二十五名。其仕宦紳士商賈僧道皆不入此數內。洪範以壽居五福之首。而昔人稱七十爲古稀。誠以壽爲難得而可貴也。乃今日老人之多。至於如此。皆由我

皇考聖祖仁皇帝六十餘年以來。深仁厚澤。休養生息。凡山陬海澨。僻壤窮鄉。無不沐浴鴻慈。涵濡大化。太和翔洽。壽國壽民。所以期頤耄耋。龐眉皓首之人。至數百餘萬之多。所謂老者以壽終。幼孤得遂長者。皆我皇考之賜也。從此益加培養。日積月累。則民間

之享高年。介眉壽者。更不知如何之衆矣。此等老人。躬際昌期。年登上壽。大抵皆居心忠厚。力行善事之人。即或有一二年少時未盡醇謹者。亦必中年暮齒。能自悔悟。蓋一念修省。即荷

上天福祐也。是國家有培養之恩。而本人又能修善以祇承之。非倖而致之者也。爾等百姓。觀太平之盛事。當歡欣鼓舞。謹身修德。以迓天庥。父與父言慈。子與子言孝。兄弟友恭。夫婦和順。比閭族黨之間。相親相愛。無詐無欺。革薄從忠。循分守法。盡除乖戾之氣。爲國家淳樸善良之民。則

天地佑善錫福。長享遐年。此必然之理也。但生齒日盛。食指繁多。則謀生之計。不可不講。爾等百姓。當重農桑。以順天時。勤開墾。以盡地利。務本業。以戒游惰。謹蓋藏。以裕久遠。而且節省食用。愛惜物力。毋尚奢侈。毋競紛華。毋任意糜費。以耗有用之財。毋但顧目前而忘經

久之計。朕以勤儉先天下。宮禁之中。尚多方  
撙節愛養。以爲加惠元元之本。爾等小民。安  
可忘物力之艱難乎。誠能體朕諄諄訓諭之  
意。敦善行。則心體安。務本討則俯仰足。惜財  
用。則家室裕。人心和樂。風俗醇美。同爲壽考  
之人。長享昇平之福。朕蓋有厚望焉。著該部  
將朕此旨。轉發直省督撫。通行所屬郡邑鄉  
村。咸使聞知。○以詹事府詹事張廷璐爲順  
天武鄉試正考官。翰林院檢討鞏建豐爲副  
考官。○壬申。諭戶部。錢糧之有火耗。原非應  
有之項。但以相沿日久。地方官員。非此無以  
養贍。故姑且存之。而各省舊例。亦有輕重之  
不同。儻地方官員。於應取之外。稍有加重者。  
朕必訪聞。重治其罪。向來山西省虧空甚多。  
地方官無以藉口。動稱因預備軍需所致。並  
將侵蝕之銀。皆指爲軍需之用。及諾岷到任。  
加意整頓。盡革從前之加派。而各屬無著之  
虧空。不能填補者。則將各官應得耗羨歸之。

於公。以爲酌補虧空之計。又恐各官無以養  
廉。以致苛索於百姓。故於耗羨中酌定數目。  
爲日用之資。以官員之羨餘。補官員之虧空。  
既可完帑。亦不累民。實權宜得中之善策也。  
前聞伊都立將通省火耗應減者。皆出示裁  
減。朕甚嘉之。近日又聞伊都立以用度不敷。  
竟不奏聞。而將已減之耗羨。仍舊徵取。經朕  
訪聞。尚不肯深信。因降旨詢究。務令照前裁  
減。今伊摺奏。竟係實有之事。認咎無辭。伊都  
立如此。暮四朝三。前後矛盾。同於兒戲。可乎。  
夫以封疆大臣。不能宣揚德意。使小民知朕  
恤下之恩。而反爲此悖理營私之事。昏庸若  
此。豈事君理民之道。伊都立著交部嚴加議  
處。○諭刑部。逃人在外生事。被人毆死。與尋  
常鬪毆不同。不應擬抵。庶使逃人知所儆懼。  
爾部即知會各省遵行。○以左都御史兼理  
奉天府府尹事尹泰。協理奉天將軍事務。○  
河道總督齊蘇勒等奏報秋汛情形。得旨。年



來河水甚大。在工人員甚屬効力。應分別等次。報部議敘。以示嘉獎。夫獎勞賞功。乃國家激勸臣工之大典。亦上司鼓舞屬員之要務。必須秉公持平。方足以服衆心。而收實效。此次舉報河工人員。務秉公心。勿徇情面。以副朕加恩河員之至意。○癸酉。降兵部尚書蔡珽為奉天府府尹。○戶部議覆。江西巡撫汪滢疏言。江西協濟閩省穀石。俟明年秋後補運。查閩省積貯。最為緊要。而運道稍覺迴遠。應令江蘇安徽巡撫。截留漕米十萬石。從海運赴閩。至明歲秋收時。即以江西應運之米補還。從之。○甲戌。諭大學士九卿翰詹科道等。爾等多出自科甲之人。既誦法聖賢。讀書明理。當知君臣之大義。須上下一體。情分相聯。方克致昇平之治。人人共受其澤。自唐宋以來。去古已遠。習俗澆漓。人心詐僞。狂妄無忌。憚之徒。往往腹誹朝政。甚至筆之於書。肆其誣謗。如汪景祺查嗣庭。豈能逃於天譴乎。

我國家恩養休息。海宇晏清。八十餘年。萬民樂業。即爾等父母妻子。孰不沐浴膏澤。安享其福耶。且士人立身行己。以禮義廉恥為重。乃至昏夜乞憐。上書投札。滿紙稱功頌德之語。何廉恥蕩然。至於此極也。又有將子弟姻戚。門生故舊。私書請託者。不知以素所親愛之人。為之請託。照拂實屬無益。而有損。蓋彼無倚恃。尚知警惕。自守。勉勵供職。若先有請託。彼必以為勢力可恃。肆其狂妄。無所不為。及實在贓款發覺。則受請託者不能為之庇護。是非所以愛之。而實以害之也。又爾等皆係各省州縣之百姓。受治於有司者。如請託之風盡除。凡地方有司。皆有所畏懼。而廉潔愛民。則爾等之子孫。宗族。咸受其慶。不亦善乎。如請託之風不絕。則地方官員各有倚賴。將肆其貪婪。則爾等之家產。不足飽貪官污吏之豁壑。爾等自為身家桑梓計。亦斷應速改歷代之陋習也。查嗣庭請託賄囑之書札。

不一而足。其日記所載狂妄悖逆之語。與汪景祺相爲表裏。而其誹議

聖祖仁皇帝用人行行政。大逆不道之言。不可勝舉。實共工驩兜之流也。復有無知之徒。謂朕進人太驟。退人太速者。朕在藩邸時。從未與外廷諸臣往還。即認識者甚少。及即位後。有內外員缺。寧能不用人乎。而素無認識之人。不得不博採旁求以用之。及用之而徐觀其人。實不可用。則不得不更易之。故大自督撫提鎮。至於道府叅遊州縣。每一缺出。苟不得其人。朕將吏兵二部月摺。翻閱再四。每至終夜不寢。必得其人。方釋然於中。此爲君之難。實不可以言語形容者也。又有議朕求治太速者。朕受

聖祖仁皇帝付託之重。實欲治益求治。安益求安。以仰副

聖祖仁皇帝養育深恩。然於臣下辦理政務。從未嘗刻期促限也。但勵精圖治。欲使天下臣

僚振作奮興。去其怠玩。上下交相勸勉。庶底於有成。苟此志稍有或弛。則庶務積而叢脞矣。朕自朝至夕。凝坐殿室。披覽各處章奏。目不停視。手不停批。訓諭諸臣。日不下數千百言。悉出於至公至正之心。如從前政令。果有未協之處。爾等能直陳其非。朕卽爲改定。有獨見者。卽昌言之。或公同詳議具覆。此時不言。日後私相議論。發覺之日。必治以重罪。勿謂朕求言之不誠也。○諭禮部。士子讀書制

行之道。首在明經。其以五經取中副榜者。必有志經學之士。著將今年各省五經取中副榜之人。俱准作舉人。一體會試。再今科各省所中副榜內。有兩次中副榜者。亦准作舉人。一體會試。此係特典。後不爲例。○裁順天府武學教授訓導等缺。以滿洲蒙古漢軍武生。歸八旗滿洲教官管轄。大興宛平二縣武生。歸順天府儒學管轄。○鑄給八旗佐領圖書。一應行文事件。俱令鈐蓋。○乙亥。贈江西南

昌水師營陣亡遊擊楊光祖總兵銜從伊子直隸正定總兵官楊鯤河南南汝總兵官楊鵬請也。丙子諭各直省督撫春秋二季報戶部冊務將藩庫實存銀兩悉行開報應存應解靜候部撥儻有行賄私囑部中吏役者與受俱按律治罪。鑲黃旗蒙古副都統查史緣事革職。陞鑲黃旗護軍叅領昭保爲本旗蒙古副都統。丁丑戶部右侍郎覺羅塞德緣事革職調禮部右侍郎塞楞額爲戶部右侍郎。兵部右侍郎莽鵠立爲禮部右侍郎。陞西安巡撫圖理琛爲兵部右侍郎調四川巡撫法敏爲陝西西安巡撫以甘肅提督署四川提督馬會伯爲四川巡撫。解江西布政使丁士一任陞湖北糧道王承烈爲江西布政使司布政使。免湖北沔陽江夏等十一州縣武昌武左等六衛本年分水災額賦有差。戊寅諭九卿等各部漢司官實能辦事者不過一二人其餘庸碌無能之人偷惰

安閒實屬冗濫朕即位以來其賢能司官或陞道府或選科道擢用甚衆而平庸之人若一概陞用必致曠官廢事然尚不忍多行黜退蓋以各司人衆兼有堂官辦理事無貽誤故今春京察止將甚不堪者革退數人其餘概爲優容此朕寬大之恩也乃汪景祺查嗣庭等妄謂郎中員外主事等官壅滯不得陞轉至有白首爲郎十年不調等語此必司官中有不感朕寬容之恩而以不得陞用私相怨望者此等之人既不能爲國家効力而反以不得即陞爲怨又復多佔員缺阻塞後人陞補之路甚非整飭官方之道著各部堂官將所屬司官詳加甄別凡有才具平常目前不能辦事將來不堪陞用者盡行舉出與應留辦事人員一同帶來引見請旨各部堂官不得瞻徇情面稍有容隱。諭雲貴川廣湖南各省督撫直省地方官辦理欽部案件皆有定限其不依限完結者例有處分惟邊省

苗疆間有督撫自行歸結之案。地方官因無限期。遂生怠玩。以致案件稽遲。民人受其拖累。嗣後遇有民苗爭訟事件。該督撫嚴飭該管各官。作速查審完結。如地界兩省。或有關提之人。或有會勘之處。兩省大吏務須和衷辦理。不得互相推諉。其有不肖有司。託故稽遲。巧爲推卸者。即指名題參。毋得徇庇。○陞廣東瓊州副將林秀爲福建金門總兵官。○添設直隸河官。天津州州同一員。青縣子牙河主簿一員。屬天津道管轄。涿州霸州。州判各一員。吏目各一員。宛平良鄉固安永清東安武清六縣縣丞各一員。主簿各一員。屬永定道管轄。北運河同知通判各一員。要兒渡縣丞一員。東楊村主簿一員。薊州灤州。州判各一員。王田縣縣丞一員。豐潤縣主簿一員。屬通永道管轄。霸州清河吏目一員。屬清河道管轄。從直隸總督李紱請也。己卯。命大學士馬齊爲正使。領侍衛內大臣馬武爲副。

使齋冊寶封和碩怡親王奉

上諭。怡親王誠敬事君。公忠體國。自古賢王罕與倫比。數年以來。遇王之生辰。與遷移府第。朕每次加以恩賚之期。及遣王祭祀行禮。奉差起程之日。朕留心觀之。天氣必暄和爽朗。今日冊封。更覺風和日暖。足見朕之加恩上合。

天意而人臣之統一恪恭者。

天必降之福澤。其理昭然不爽。非人力所能強致也。朕心甚爲嘉悅。將此旨傳諭諸王大臣。庚辰。封故鎮國公準達子鎮國將軍永壽爲輔國公。辛巳。諭宗人府。裕親王廣寧朕授以王爵。並不感恩報効。反懷異志。退避不前。辦事錯謬。朕降旨切責。伊全無畏懼之容。尚未除保泰等朋黨之念。甚屬可惡。著拏交宗人府嚴加議處。尋議。廣寧身受隆恩。由閒散宗室封爲親王。又授爲領侍衛內大臣。乃不思感恩効力。反懷異志。所議藍翎侍衛李

瑤一案甚屬錯謬

皇上降旨切責。並無畏懼之容。結黨營私。有干國紀。應將廣寧革退王爵。在臣衙門永遠鎖禁。得旨。廣寧著永遠鎖禁。宗人府○正黃旗護軍統領阿爾那。緣事革職。以鑲藍旗蒙古都統查克旦。爲正黃旗護軍統領。仍兼理都統事。○壬午。諭刑部。直省命盜重案。州縣官承審不實。誤擬重罪。著照貪官例革職。永不敘用。其接任官。能將實情審出者。著交部議敘。嗣後俱照此例行。○諭直省督撫等。向來革職留任官員。從前無開復之例。但年久奉職無愆。亦應示以鼓勵。嗣後革職留任之員。如四年無過。該督撫等題明。准其開復。著爲定例。○以戶部尚書蔣廷錫。兼管兵部尚書事。○以翰林院編修繆曰藻。李鍾僑。俱署日講起居注官。○吏部議覆。山西總督管理巡撫事伊都立疏言。地方官收買小錢。例無議處。正條。年終報部之時。並無起解。明係奉行

不力。請嚴加議處。應如所請。嗣後州縣官收買小錢不力。照失察私鑄例處分。得旨。如此定例。則地方官自顧考成。必至奉行嚴迫。生事擾民。夫錢文乃民間日用必需之物。聞向來晉省民間所用。多係小錢。只應設法漸次收禁。若定例太嚴。逼令將小錢盡行收買。而大錢又未議及如何行布。民間日用。似有未便。著另議具奏。尋議。收買小錢。寬限三年。儻逾限。猶有小錢事發者。將奉行不力之地方官。照失察次數降級。俱准其戴罪。限一年內。拏獲小錢。仍照次數還職。如失察五次以上者。降一級調用。從之。○癸未。以協理兵部侍郎黃國材。爲正黃旗漢軍都統。仍協理兵部事。○調直隸按察使彭維新。爲河南按察使。司按察使。河南按察使魏定國。爲直隸按察使。司按察使。○甲申。諭議政大臣等。岳鍾琪現今經理。勦撫普雄番苗事務。地連三省。必須岳鍾琪前往四川。就近遣調。方能悉合機

宜。著岳鍾琪親赴川省。駐劄成都。以便相機調度。或於此時即便起程。或俟法敏到陝後起行。令岳鍾琪酌量辦理。○實授鄂爾泰爲雲貴總督。加兵部尚書銜。○免湖南臨湘等三縣。岳州一衛。本年分水災額賦有差。○乙酉。轉工部右侍郎史貽直爲左侍郎。陞都察院左副都御史劉師恕爲工部右侍郎。以湖北巡撫鄭任鑰爲都察院左副都御史。○解江西巡撫汪澄任。以吏部右侍郎邁柱署江西巡撫。陞湖北按察使憲德爲湖北巡撫。以雲南學政翰林院侍讀蔡嵩爲湖北按察使。司按察使。○丙戌。擢監察御史官達爲光祿寺卿。○禮部奏琉球國中山王尚敬遣陪臣向得功等進表謝賜匾額玉器綵緞等恩。并貢方物。應照例察收。得旨琉球國王因朕頒賜御書匾額及玉器綵緞等物。特遣使臣進表謝恩。貢獻禮儀具見誠悃。朕加恩遠藩。不欲收其貢物。但既航海遠來。不忍令其帶回。

本國著交內務府存留。准作二年一次正貢。以示朕體恤遠人之至意。○丁亥。諭大學士九卿等。朕自即位以來。以

皇考之心爲心。以

皇考之政爲政。寬嚴賞罰之間。祇此一理。而愚昧無知之人。陳奏摺內。往往將

皇考與朕之行事。強爲分別。有春溫秋肅。仁育義正之語。其意謂

皇考爲寬仁。謂朕爲嚴義。何其謬歟。帝王爲治之道。有應寬者。則用寬。而非廢法。應嚴者。則用嚴。而非濫刑。古人云。寬以濟猛。猛以濟寬。惟寬嚴得當。乃爲相濟。朕經理萬幾。用寬用嚴。皆因其人之自取。物來順應。初無成見。惟斟酌情理之至當而行之。天下惟有一理。諸臣須知朕今日之義。即

皇考當日之仁。朕今日之仁。即

皇考當日之義。道無二致。同歸一中。因時制宜。使得其平。此聖人所以言平天下也。朕臨下

御衆悉本至誠爾內外諸臣亦當體朕之心  
務實存誠秉公持正去私心揣度之陋習佐  
寬嚴得中之雅化行之恒久將刑措之風可  
以復見而太和翔洽民物長春永登邳隆之  
盛治實朕之所期望也戊子

萬壽節停止朝賀筵宴遣官祭

福陵

昭陵

昭西陵

孝陵

孝東陵

景陵遣官祭真武東嶽城隍之神

大清世宗敬天昌運建中表正文武英明寬仁  
信毅大孝至誠憲皇帝實錄卷之四十九

大清世宗敬天昌運建中表正文武英明寬仁  
信毅大孝至誠憲皇帝實錄卷之五十

駐修總裁官北輔大臣經筵講官太僕議政大臣保和殿大學士兼兵部尚書總理兵部事務三等伯加十五級臣鄂爾泰

總裁官北輔大臣經筵講官起居注太僕兼太子太僕保和殿大學士兼戶部尚書仍兼管吏部尚書翰林院掌院

事三等伯加十三級臣張廷玉光祿大夫經筵講官起居注太僕議政大臣武英殿大學士兼吏部尚書仍兼管

翰林院掌院事加二級臣福敏光祿大夫經筵講官太子太僕兼太僕議政大臣武英殿大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事臣王太奇奉

敕修

雍正四年丙午十一月己丑朔庚寅兵部

議覆京口將軍何天培疏言京口原駐牌灣  
守備業經移駐圖山其牌灣地方緊要議撥  
千總一員不足以資彈壓請將標下右營守  
備一員帶兵一百名移駐牌灣再撥京口水  
師右營把總一員巡查京口江面以專責成  
應如所請從之○辛卯諭大學士等各省學  
政有教導士子之責關係甚重乃向來定例  
由翰林科道簡用則為學院由部屬簡用則  
為學道不論其現任之職掌但論其前任之

官職似未允當應作何畫一之處著會議具  
奏尋議郎中等官奉差督學者應一體稱為  
學院停其開缺各以原銜督學差滿後仍歸  
衙門辦事得旨凡郎中等官奉差提督學政  
者若員缺不行另補恐部中辦事乏人所議  
尚未周詳朕意凡部內郎中等官膺督學之  
任則加以編修檢討之銜使其名實相稱其  
員缺另行銓補俟伊任滿考察之後仍歸本  
部補用如此庶為妥協著九卿定議具奏○  
調直隸馬蘭口總兵官董象緯來京陞  
景陵總管特恒為直隸馬蘭口總兵官一等侍  
衛佛倫為

景陵總管○以散秩大臣伍格總理

三陵事務○以翰林院編修楊超曾提督陝西  
學政修撰于振提督湖北學政編修習窩提  
督湖南學政編修李鍾僑提督江西學政江  
南道御史衛昌績提督廣西學政加吏部郎  
中宋在詩翰林院檢討銜提督四川學政右



春坊右中允鞏建豐提督雲南學政提督貴州學政左春坊左贊善王奕仁仍留任○調山西總督管理巡撫事伊都立爲江西巡撫陞直隸布政使德明爲山西巡撫以原任甘肅按察使張迺爲直隸布政使司布政使○士辰

上召見琉球國使臣向得功於乾清宮頒賜該國王尚敬內府玉器玻璃器皿端硯綵緞等物及向得功銀緞隨賜向得功等宴於禮部○乙未靖逆將軍富寧安自軍營回京帶領官弁陞見

上諭曰富寧安在軍前多年約束兵丁辦理事務俱井井有條而且行止端方廉潔此數年以來領兵之將軍等聲名未有出其右者其於我

皇考之寄任實心奮勉不負任使朕實嘉愛今朕代

皇考推恩特行旌賞封富寧安世襲侯爵爾諸

大臣果能以品行聲名爲念於國家公務一意抒誠勉盡人臣効忠之道豈惟主上嘉愛即

上天亦必慈佑報之以福矣○吏部遵旨議覆御史分巡直隸應令都察院於滿洲漢軍漢人御史內各派出二員差往其各員巡察之處分順天各屬及永平宣化二府爲一路保定正定河間三府爲一路順德廣平大名三府爲一路每路派御史二員遍歷巡查凡旗下告退官員在屯莊頭內監族戚及在籍鄉紳衿監并內府莊頭如有恣行不法者即行該地方官提拏訊實懲治其應交地方官歸結者即會同地方官歸結應奏者即行奏并請鑄給關防以重職守如該御史徇私容隱以及生事滋擾仍許直隸總督據實題參從之○丙申輔國公滿都患病解退以其姪裕壽襲爵○以故阿霸垓達爾漢貝子德木楚克子鄂爾哲圖爲達爾漢輔國公○丁

百以翰林院編修牧可登充日講起居注官  
○賑福建連江等五縣水災饑民○已亥諭  
內閣帝王體國經邦政治所施惟準乎道理  
之至當寬嚴賞罰各得其宜若一涉利弊二  
字便入於私是以孟子云仁義而已矣何必  
曰利蓋仁所以休養安全義所以裁成化導  
也朕嗣承大統四年於茲凡政教號令皆遵  
法

皇考

皇考在位六十一年

聖謨弘遠

諭旨周詳紀綱法度靡不備舉特當時臣下或  
有陽奉陰違不能實力遵行者或有事經歷  
久漸至廢弛者朕在藩邸時知之甚悉即位  
以來仰體

皇考仁育義正之心屢降明旨諄諄誥誡無非  
欲內外大小臣僚咸恪遵

皇考之良法美政實心奉行以共成久安長治

之盛是朕所行之政皆

皇考已行之章程朕所申之令皆

皇考已申之實訓實未嘗有所減省增益也特  
以歷年既久新進疎遠之臣未能悉知見朕  
所施之政令遂以為從前所未有而淺陋寡  
識之人往往於陳奏內有衆利皆興諸弊俱  
除之語朕經理天下凡用行政悉本大中  
至正之心事至而應惟理所當然從無計及  
利弊之私意如謂興利除弊則凡平治道路  
疏濬河渠修葺城垣開墾田畝此國家經野  
之常典而可謂之興利乎年歲豐歉不齊設  
有水旱為之賑饑平糶蠲賦緩徵此朝廷軫  
恤之恒政而可謂之興利乎老人應賜以衣  
食則賜之孤獨應卹以錢物則卹之勸以孝  
弟本小民自有之天良勸以耕桑固閭閻各  
盡之職業而可謂之興利乎至於盜賊姦宄  
法所應誅貪官污吏法所應黜豪紳劣衿法  
所應鋤而謂誅盜姦黜貪污鋤豪劣為除弊

可乎情罪重者予以刑辟情罪輕者予以矜釋此又謂之除弊可乎欲正民風而端士習不得不戒之用休董之用威也將以此爲興利乎抑除弊乎念習俗之流於奢靡也朕躬行節儉以身示天下慮農人之惰於南畝也朕親爲耕藉以身先天下將以此爲興利乎抑除弊乎夫存興利之心即有不利之害有除弊之意即爲啓弊之端由此類推治道安得有利弊之名朕又何嘗有興利除弊之舉也

皇考六十餘年豐功偉烈布在方策皆因事治事以人治人從不居興利除弊之名而以此頌揚朕之政事朕實不敢當朕亦不願當也外省督撫諸臣未能深悉朕意爲此曉諭知之○陞太常寺卿孫卓爲通政使司通政使仍兼太常寺卿○廣東巡撫楊文乾疏報歸善博羅等十一縣濱海被水秋收歉薄請加賑恤得旨上年廣東福建二省所屬郡縣有

數處歉收是以今年春夏米價昂貴已諭該督撫等設法接濟撫恤貧民今年福建雨澤調勻秋成豐稔廣東早禾大收惟八月間雨水稍多恐晚禾收成歉薄至明歲青黃不接之時小民不無乏食之慮此時正當預爲籌及應如何運送米穀赴廣備用著九卿確議該撫所報濱海被水之十一縣應如何賑恤之處一併速議具奏尋議除先撥廣西桂梧等六府存倉捐穀三十萬石運至廣東收貯備賑外應請將常平倉捐監事例改爲運穀令鄰省江西湖廣廣西願捐人等買糴穀石運送廣東照例折半交納該督撫計各州縣賑發穀數令該州縣收捐捐足原貯之數即行停止至現今被災之歸善博羅等十一縣應令該撫將各縣存倉穀石確查散給務使各需實惠其應徵錢糧暫行緩徵從之○太子太傅文淵閣大學士兼禮部尚書高其位以老疾乞休得旨卿効力年久恪慎奉職老

成練達茂著賢聲。是以簡預機務。用昭優眷。前以老病乞休。朕未忍俞允。特命供職數時。以示眷念。耆舊大臣之至意。今復行奏請情。詞懇切。准以原官致仕。○庚子。諭大學士等。近年豫省河務險工下移。堤岸完固。平穩。山東河務甚屬緊要。向係山東巡撫管理。但巡撫有地方責任。恐不能專理河務。山東與河南接壤。作何令副總河嵇曾筠兼管之處。著九卿會議具奏。○浙江黃巖總兵官馮廷輔緣事革職。陞貴州平越副將董一隆為浙江黃巖總兵官。○免江南宿松縣本年分水災額賦有差。○辛丑。

聖祖仁皇帝忌辰。遣誠親王允祉祭景陵。○兵部遵旨議覆。州縣民壯中有材力技藝出眾者。請與現在之步戰兵守兵一體比較。拔補馬步戰兵缺額。從之。○又議覆。原任山東巡撫陳世倌疏言。衛所歸併州縣。原為便於地方起見。東省安東等七衛及已裁之

雄崖浮山二所。俱係海疆重地。形勢險要。請將該衛所照舊存留。無庸裁併。其濟南衛所與海疆不同。請裁歸附近州縣管理。均應如所請。從之。○壬寅。免江南無為望江二州縣本年分水災額賦有差。○癸卯。諭大學士等。朕覽九卿所議。欲停夥盜減等發遣一案。當日將夥盜分別減等。乃

皇考聖祖仁皇帝好生至德。從古未有之仁政也。若照律不分首從。皆斬立決。則受戮者甚多。其中不無應酌量矜減之人。是以夥盜減等立法。誠為盡善。朕惟照舊遵行。但行之既久。地方官吏捕役人等。悉知此例。或將愚劣無能之輩。嚴刑逼迫。令其認為造意為首之人。反將姦狡積盜。入於夥盜之中。得邀減等。亦未可定。凡盜案內必有實在為盜者。亦有被人誘脅。並非素常為盜。情尚可憫者。若將實在強盜。拏獲即行正法。不但法無不當。且盜案亦不至於併積。當日

聖祖仁皇帝未將夥盜減等之條著爲定例。原有深意。但既施法外之仁。通行年久。朕意將此條另立檔案首載。

聖祖仁皇帝諭旨。次將凡因盜案所下諭旨。存案遵行。嗣後遇有盜案。務令地方各官。詳察情形。確實究審。將案內之悍惡凶暴。實在爲盜。及被人誘脅。或出於一時救死之計。並非素常爲盜者。一一分註明白。於疏內聲明。著大學士會同三法司。將造意爲首與極惡難

留者。仍按律擬斬。其被人誘脅。或非素常爲盜。情尚可憫。有應行減等發遣者。將應減等緣由。於本內聲明具題。至發遣之地。亦不必定於黑龍江寧古塔等處。應如何分發各省內地之處。爾等公同詳細定議具奏。戶部議覆。浙江巡撫兼管鹽務李衛疏言。仁和場之仁和倉。及許村等八場。向有給丁蕩地。例非按畝徵銀。實皆計丁輸課。應即以每丁應納之課。攤於給丁蕩地。定則徵輸。至台溫二

府屬之無地攤丁併錢塘倉及西路等九場。北監場之峽門華嚴二倉。黃巖等六場。白沙岳頭二倉。或係無地可攤。暫令各丁照舊輸納者。或雖有給丁蕩畝。而地少丁多。因於舊有納稅蕩灘之上。加攤者。必須清查陞漲。抵補。請將許村等場。新陞蕩地稅銀。抵除前報暫攤納稅蕩灘之丁銀。併抵補各場無地可攤丁銀。如有續漲及坍塌地。蕩照例增減抵補。應如所請從之。○甲辰

上詣

恩佑寺行禮畢。幸圓明園。吏部議覆巡視長蘆鹽政顧琮疏言。鹽道衙門經歷之印。竟掌於鹽道之手。僅有虧空那移。莫可稽察。請仍歸經歷掌管。公同用印。應如所請。并通行各省藩臬知府。凡有經歷者。其印信悉歸經歷掌管。不得專擅從之。○乙巳

上幸湯泉駐蹕。○鑄給直隸布政司按察司經歷理問等官印。○免江西南昌等七縣本年

分水灾額賦有差○兩廣總督孔毓珣題廣西太平府信倫土知州馮世英故請以其子馮朝憲承襲下部知之○丙午

上駐蹕湯泉○戶部議覆雲貴總督鄂爾泰疏言停止大理霑益二局鼓鑄請於雲南臨安二府共加爐九座鼓鑄錢文以四萬串發運湖廣四川江西兩廣等處應如所請從之○裁湖南永順保靖二司經歷缺各改設同知一員從湖南巡撫布蘭泰請也○丁未

上駐蹕湯泉○戶部議覆四川總督岳鍾琪疏報松潘口外毛羊蛇灣各番寨貢納糧馬數目并分別年分起科從之○戊申

上駐蹕湯泉○吏部議覆補用教職例由撫臣考校其考試四等五等者俱令解任學習三年再行考試六等者革職各學教官所屬文武生員抗欠錢糧捏詞唆訟該教官不行申詳縱容徇庇者革職如六年之內所屬士子無前項過犯該督撫學臣將該教官保題以

應陞之缺即用從之○免湖南巴陵等四縣本年分水灾額賦有差○己酉

上駐蹕湯泉○戶部議覆倉場侍郎托時等議御史殷式訓條奏漕務各款○糧艘往來兵丁於岸上催趕呼應不靈請於蔡村上下建造船隻令兵丁坐船催押來則催重回則催空一各倉例設滿漢監督各一員辦理倉務中南二倉相隔一城一倉一人難於查看應於中倉添設漢監督一員南倉添設滿監督一員可無顧此失彼之虞一應給旗丁口糧三升八合令其自便或本幫有欠抵補本幫或別幫有欠賣抵別幫○漕糧起卸及運到大通橋每見糧袋堆貯空隙處所恐致霉溼應令經紀車戶加謹鋪墊如有口袋霉爛糧米成餅串運入倉等弊查出照數賠補如不行查出別經發覺將倉場侍郎巡倉御史一併交部議處俱應如所請從之○庚戌

上駐蹕湯泉○刑部右侍郎存柱緣事降調調

禮部右侍郎莽鵠立為刑部右侍郎○戶部議覆倉場侍郎托時等條奏萬安倉請開設東門二座添船八隻以便水運入倉并令每年挑濬河道應如所請從之○禮部左侍郎郝林以老疾乞休命加尚書銜致仕○辛亥上駐蹕湯泉○以翰林院侍講蔣漣充日講起居注官○以額外副都統克什圖為散秩大臣署正藍旗護軍統領○戶部議覆甘肅巡撫石文焯疏言請動支庫銀二萬兩收買小錢開爐鼓鑄大錢即將大錢再收小錢源源收鑄收盡停止應如所請從之○禮部議覆原任總督管理山西巡撫事伊都立疏言關聖後裔在洛陽者已設守墓博士一員其後裔在解梁原籍者實係大宗請增設博士一員以奉祭祀應如所請從之○改廣西太平府屬之江州太平萬承龍英慶遠府屬之東蘭思恩府屬之田州等六州吏目俱為州同太平府屬之安平憑祥思恩府屬之向武

等三州吏目俱為州判添設慶遠府屬之南丹州州同一員那地州州判一員從兩廣總督孔毓珣請也○壬子

上駐蹕湯泉○封大學士富寧安為三等侯世襲罔替○阿祿科爾沁貝勒汪扎爾故遣官致祭○癸丑

上回宮○諭內閣滿洲風俗尊卑上下秩然整肅最嚴主僕之分家主所以約束奴僕者雖或嚴切亦無不相安為固然及至見漢人陵替之俗彼此相形而不肖奴僕遂生缺望雖約束之道無加於疇昔而向之相安者遂覺為難堪矣乃至一二滿洲大臣漸染漢人之俗亦有寬縱其下漸就陵替者此於風俗人心大有關係不可不加整飭夫主僕之分一定則終身不能更易在本身及妻子仰其衣食賴其生養固宜有不忍背負之心而且世世子孫長遠服役亦當有不敢縱肆之念今漢人之奴僕乃有傲慢頑梗不遵約束加以



訶責。則輕去其主。種種敝俗。朕所洞悉。嗣後漢人奴僕。如有頑傲不遵約束。或背主逃匿。或私行訛謗。被伊主覺察者。應作何懲治。與滿洲待奴僕之法。作何畫一之處。著滿洲大學士九卿詳悉定議具奏。尋議漢人奴僕有傲慢不遵約束。及訛謗家長。背主逃匿者。俱照滿洲家人例治罪。如典當僱工限內。及身隸門下爲長隨者。照滿洲白契所買家人例治罪。從之。○諭兵部。山東登州總兵官黃元驥年老。著以原品休致。山東登州總兵官印務。著原任福建金門總兵官謝希賢暫行署理。廣東提督萬際瑞著補授登州總兵官。其廣東提督印務。著石禮哈署理。○湖南按察使何錫祿緣事革職。陞刑科給事中趙殿最爲湖南按察使。司按察使。○戶部議覆。原任陝西巡撫圖理琛疏言。靖邊定邊二所距保安。安塞。膚施三縣甚遠。請將靖邊所地丁錢糧歸併附近之鎮樂寧塞二堡。令靖邊經歷

司徵收。定邊所地丁錢糧歸併附近之磚井鹽場二堡。令定邊縣縣丞徵收。俱應如所請。從之。○刑部等衙門議奏。老瓜賊任小山等請解往河南正法得旨。此等賊犯若越省解送。恐沿途疎脫。又生事端。既干連地方官員。而差解人役亦屬苦累。嗣後著即於現在監禁地方正法。仍於原行劫之處張掛告示。諭衆知之。永著爲例。○免江南銅陵縣本年分水災額賦有差。○乙卯諭九卿等讀書所以明理。講求天經地義。知有君父之尊。然後見諸行事。足以厚俗維風。以備國家之用。非僅欲其工於文字也。浙江文詞甲於天下。而風俗澆漓。敝壞已極。如查嗣庭。汪景祺。自矜其私智小慧。傲睨一世。輕薄天下之人。遂至喪心悖義。謗訛君上。以聖祖仁皇帝六十餘年聖德神功。深仁厚澤。普天率土。浹髓淪肌。聖敬日躋。純亦不已。用人行政。至公至正。事事



周詳盡善。實自古帝王中所罕見者。而查嗣庭。汪景祺。乃敢肆行謗議。悖逆猖狂。公然紀載。誰無君父。能不痛心。能不切齒。昔孔子作春秋。歷代因之。各有史冊。以垂法戒。今若容悖逆之人。顛倒是非。私行紀載。則史冊皆不足憑矣。豈非千古罪人乎。浙江風氣如此。儻聽其頽敝。不加整飭。何以成一道同風之治。朕思開科取士。原欲得人任用。豈徒以其文章詞藻之工。有益於民生吏治乎。且巡撫李衛等。從查嗣庭家中。搜出科場懷挾細字密寫文章數百篇。似此無恥不法之事。不但藐視國法。亦且玷辱科名。浙江士子。未必不因此效尤。應將浙江人鄉會試停止。俟風俗漸趨淳樸。再降諭旨。至於生員歲考。仍舊舉行。朕因人心風俗。關係重大。不得不嚴加整理。以爲久安長治之計也。○諭吏部。江西各州縣倉糧民欠。虧空不清。著伊都立。會同邁柱。清查巡撫印務。仍著邁柱署理。查出虧空之

州縣照直隸之例。俱令解任。留於本處賠補。賠補全完者。具題給咨赴部。另補所遺員缺。即將命往之人。題補事竣。日將巡撫印務。交與伊都立。邁柱再行來京。○丁巳冬至祀天於圜丘。上親詣行禮。畢。諭諸王大臣等曰。今日未祭之前。大雪。及行禮時。微止。行禮畢。雪復大作。此實上天垂佑之象。朕心甚慰。爾諸王大臣。諒亦必共相慶幸也。○遣官祭  
永陵  
福陵  
昭陵  
昭西陵  
孝陵  
孝東陵。命  
皇四子弘曆祭

景陵○停止次日朝賀

大清世宗敬天昌運建中表正文武英明寬仁  
信毅大孝至誠憲皇帝實錄卷之五十

大清世宗敬天昌運建中表正文武英明寬仁  
信毅大孝至誠憲皇帝實錄卷之五十一

此修禮部官先將大經禮部官太保議政大臣和碩大將軍等官一併由書院理兵部事三品以上官員等

總戰官先將大經禮部官太保議政大臣和碩大將軍等官一併由書院理兵部事三品以上官員等

第三等伯加十三級在張廷玉大經禮部官太保議政大臣和碩大將軍等官一併由書院理兵部事三品以上官員等

翰林院掌院事加二級在楊敏先徐大經禮部官太保議政大臣和碩大將軍等官一併由書院理兵部事三品以上官員等

禮部議官議政大臣和碩大將軍等官一併由書院理兵部事三品以上官員等

敕修

雍正四年丙午十二月戊午朔四川巡撫法

平定未主一

敏疏言建昌所屬苗獠種類不一冕山賊蠻  
金格關壽阿租等狂悖不法從前竝未殲其  
兇首因調漢土官兵分路進剿而金格等潛  
匿山箐茲又添兵深入梁山搜捕除各處調  
來土兵量給口糧外查官兵內地行走無支  
給口糧之例但官兵深入崇山峻嶺購米維  
艱與出口無異請暫照松潘戍守兵丁之例  
支給口糧於官兵應領米折銀內陸續扣還  
得旨向來官兵凡在內地行走者例不給與

口糧朕思內地亦有遠近之分行走不無遲速之別宜酌加恩澤以獎勤勞今建昌官兵因進剿賊蠻已經深入梁山此地舊稱險遠並非內地可比而賊徒金格等潛匿荒僻之區尚未授首現在官兵各處搜剿奮勇効力甚屬可嘉查前歲進剿南坪時官兵俱經給與口糧今進剿梁山官兵著照南坪之例一體支給口糧以示朕撫恤兵丁之至意○已未陞江南狼山總兵官王紹緒為廣東提督

○庚申康親王崇安等奏請將大逆不道之阿其那塞思黑妻子正法得旨阿其那塞思黑心懷不軌亂我國家大姦大惡不忠不孝違背主逆天之大罪諸王大臣遵依國法請將阿其那塞思黑妻子按律正法理所當然從來史冊中反叛篡逆之人則有之而未叛之先即公然敢與君上抗拒大逆不道無人臣禮如阿其那塞思黑年羹堯者實自古未聞也但阿其那塞思黑之大逆不道雖著而

平定縣志卷十一

三

反叛之事跡未彰其妻子從寬免其正法塞思黑之妻逐回其家嚴加禁錮阿其那塞思黑之眷屬交與內務府總管給與住居養贍四保既係過繼尼雅哈母之人著仍留伊家

○陞福建福州副將郭祺為江南狼山總兵官○旌表直隸烈婦深澤縣趙元吉妻宋氏夫亡守節盜劫自刎安州馬樹屏妻呂氏夫亡誓死投繯就義各給銀建坊入祠致祭如例○辛酉戶部議覆倉場侍郎托時疏言各省改兌米石例進通倉今通州大西中南兩倉存貯撥粟米石足支數十年廩座不敷新糧多係露囤請自雍正五年為始將改兌撥米全進京倉粟米亦撥京倉十萬石於京倉甲米內全放撥米一季通倉除王俸外其餘官俸亦照甲米例一季全放撥米雖撥米較之粳米價賤而較之粟米價貴若將粳粟以撥代放實無偏累嗣後每隔一年將撥米代放一季至撥米開放將完仍照例給發粳粟

平定縣志卷十一

三

糴三色應如所請從之○又議覆河南巡撫田文鏡疏言豫省丁銀請均勻攤入地糧之內一例征收嗣後遇有報墾陞科以及遇閏之年將丁銀隨年另行均派攤入至太康等十二州縣舊係按地收丁但輕重不等請與各屬一體按糧均攤皆以雍正五年為始照數徵收俱應如所請從之○刑部遵旨議定私刳人參人犯若仍發往黑龍江等處與伊等犯罪之處相近嗣後偷參發遣之犯係滿洲蒙古發往江寧等處有滿兵駐防省城當差係漢人漢軍發往廣西雲南等煙瘴地方當差從之○署湖廣總督福敏摺奏江夏沔陽等州縣被水歉收遵旨煮賑但雨雪連綿老幼頗難赴廠食粥即丁壯就食亦覺路遠南方地暖臘月可以傭工種麥每日往返有妨生業臣遵煮賑之法少為變通行令各州縣確查人口數目老弱丁壯一體給米俟來春賑畢造冊報部奉

上諭變通救濟總期災黎得沾實惠以慰朕饑溺之懷○壬戌免湖北澧州本年分水災額賦有差○癸亥

考惠章皇后忌辰遣官祭

考東陵○陞宗人府府丞唐執玉為禮部左侍郎○吏部議覆禮科給事中楊爾德條奏請

嚴吏員冒籍冒姓之禁應如所請嗣後各衙門考取書辦投充之初查取該役本籍本姓

親供行文原籍地方官取具印甘各結方准

著役至年滿考職時令各衙門咨明並無假姓冒籍字樣方准收考若有冒籍冒名等弊

事發者除本員照例治罪外其不能稽查之該管官照失察例處分從之○戶部議覆川

陝總督岳鍾琪疏言陝甘兩屬應徵丁銀請攤於地畝徵收以雍正五年為始著為定例

具有以衛改縣未經載丁及原有丁銀者按其額賦均載丁銀至陸續開墾及現今新開

渠閘屯墾之處亦照此糧額一例增載再川

省地方多係以糧載丁。間有數州縣以人載丁之處。亦應查改畫一。俱應如所請。從之。○兩廣總督孔毓珣題。廣西太平府羅陽土知縣黃世瑣故。請以其兄黃世瑾承襲。下部知之。○甲子。浙江道監察御史謝濟世奏。河南巡撫田文鏡營私負國。貪虐不法十罪。得旨。田文鏡秉公持正。實心辦事。乃天下督撫中所罕見者。貪賊壞法之事。朕可以保其必無。而謝濟世於天下督撫中。獨叅田文鏡。朕不知其何心。從前

聖祖皇帝見科道官員朋比作姦。互結黨羽。潛通聲氣。網利徇私。屢降諭旨切責。至再至三。朕即位以來。令滿漢文武諸臣及科道等官。皆用密摺奏事。蓋欲明目達聰。盡去壅蔽。以收實效也。而科道等官所密陳者。未見有裨益政治之事。是以停止密摺。令其專用本章。猶恐惡習尚存。顏風不改。諄諄訓誡。往復周詳。誠以欲正人心。端風俗。必自科道始。科道

無私方能彈劾人之有私者。若自恃爲言官。胸懷詭詐。聽人指使。顛倒是非。擾亂國政。實大有害於人心世道。爲國法之所斷不可容。朕豈不知誅戮諫官。史書所戒。然審其緩急。權其輕重。誅戮諫官之過小。而釀成人心世道之害大也。古人云。禮義不愆。何恤於人言。朕爲天下主。豈恤此區區之小節。而忘經國之遠圖哉。謝濟世若不嚴刑訊問。則鬼域之伎倆。得行於光天化日之下。人心何由正。風

俗何由端乎。著將謝濟世革職。令大學士九卿詹事科道等嚴訊。務將其中實情審出具奏。○浙江總督李衛查奏李維鈞家產。得旨。李衛清查李維鈞家產。不徇情面。洵屬可嘉。但叅奏李維鈞婢妾一節。未免過刻。不合大體。此事不必議覆。凡大臣審理公務。只當就事論事。不必於事外苛索。攻發人之陰私。朕嘗見好發人之陰私者。往往因己身行事有愧於心。故意揭人之過。以掩己之短。如年羹

堯素性貪婪。往往以貪婪之名。加之於人。朕以忠厚之道教天下。著將此訓諭李衛知之。○免江南江寧右衛本年分水災額賦。有差。○乙丑。刑部等衙門遵旨審奏。謝濟世叅劾田文鏡各款。自認風聞無據。顯係聽人指使。要結朋黨。擾亂是非。謝濟世應擬斬立決。疏入。

上召入大學士九卿翰林詹事科道等。諭曰。科道乃朝廷耳目之官。果能秉公持正。據實敷陳。方合天下之公。是公非。而於朝廷政事有所裨益。昨日謝濟世叅劾田文鏡貪贓壞法等事。今日朕特面詢爾等。滿漢大小臣工。僉言田文鏡竝無貪婪之事。謝濟世所叅各款皆虛。可見公道在人。難於掩蔽矣。夫身爲言官。背公懷私。朋比結黨。將造作竝無實據之浮言。轉相買囑。恣洩糾彈。以洩私忿。而報宿怨。令無知狂悖之人。愚弄指使。借風聞言事之名。以酬報私恩小惠。則顛倒是非。擾亂國

政其有害於人心風俗者不淺我

聖祖仁皇帝神明天縱深知其弊屢頒

諭旨嚴加訓誡停止風聞言事蓋以人君圖治

固貴於明目達聰而無稽之言勿聽弗詢之

謀勿庸則訪聞不確者尚不可採而況於構

黨傾陷此風豈可長哉朕在藩邸時從不識

田文鏡之面竝不知其姓名因雍正元年年

羹堯來京陞見時言山西年歲歉收宜早爲

賑恤朕因降旨與巡撫德音令其查奏而德

音回奏稱山西去年收成甚好道途亦無饑

民實無可賑濟之處時適田文鏡告祭華山

回京復命將山西通省荒歉情形激切敷陳

備極周詳朕以田文鏡係告祭之員經過山

西地方閭閻疾苦非伊責任乃目擊民瘼直

言無隱深屬可嘉若非忠國愛民之人何能

如此因遂令田文鏡往山西任賑濟之事田

文鏡到彼盡心竭力辦理甚妥即以田文鏡

爲山西布政使令其與諾岷料理山西一應

未清案件。二人秉公和衷。將積年虧空及地方宿弊。剔除清理。吏治整頓一新。嗣因河南諸事廢弛。故將田文鏡調爲河南布政使。旋即用爲河南巡撫。朕之所以擢用田文鏡。原委如此。及爲巡撫後。三年以來。整飭河工。堤岸堅固。河汎安瀾。年歲豐稔。紳衿畏法。正已率屬。地方寧謐。而每事秉公潔已。謝絕私交。實爲巡撫中之第一。李紱自廣西來京。陛見時。即奏田文鏡叅劾黃振國。汪誠邵言。論甚爲寬抑。張球居官聲名甚劣。田文鏡並不糾叅。且言黃振國此時已爲田文鏡監斃滅口矣。未幾。黃振國已從河南解赴來京。依然無恙。朕不知李紱受何人意指。而捏造此不稽之言。敢於冒昧陳奏也。至田文鏡所叅黃振國各案。皆係田文鏡自行奏請。遣大臣前往審理。朕因差侍郎海壽。吏貽直到豫。將各案重審。皆已究訊明白。定擬具奏。其張球一案。田文鏡早經認過請罪。部議亦於張球諱盜。

案內將田文鏡處分。夫督撫統轄通省地方。甚廣。屬員甚衆。其居心辦事。安能盡保其無過。田文鏡始而誤信張球爲可用。既而察其不肖。即據實叅奏。亦可以解其從前誤用之愆。若必追究已往。借端苛責。則督撫大吏將何道而始能免於指摘乎。至汪誠邵言。論皆係庸劣不堪之人。田文鏡叅處。並不寬抑。乃謝濟世所言黃振國張球。邵言。論汪誠等事。與從前李紱自廣西來京。陛見時所奏。一一脗合。朕思封疆大臣。能爲朝廷實心任事。即爲國之棟梁。朕之股肱。若不爲保護而任人傾陷。則朕何顏對天下封疆大臣乎。況從前特頒諭旨。言天下巡撫中。實心任事。不避嫌怨。爲國爲民者。惟田文鏡李衛楊文乾三人。今謝濟世聽人指使。將田文鏡糾叅。顯與朕之明旨相悖。且田文鏡並不可謂之權要。亦斷不能加以貪污之名。而謝濟世爲此叅奏者。其意不過欲使天下督撫皆因循苟且庸。

碌偷安。邀衆人之虛譽。保一己之身家。而不爲國家實心効力。以快其黨錮之私心。此種結黨營私。排擠傾陷之惡習。不可不嚴加懲治。是以令內閣九卿等。公同研究。務得實情。今內閣九卿等。審問謝濟世時。將伊所奏田丈鏡各款。逐一究訊。謝濟世皆茫無憑據。俯首無詞。則其受人指使。情弊顯然。謝濟世既自命爲報効國家之人。著革職。令往阿爾泰軍前効力贖罪。此案亦免深究。前朕曾降諭旨。凡天下官員。有被上司叅劾。冤抑者。許令赴都察院控訴。若黃振國。汪誠。邵言。綸。關。勲。被叅果屬冤抑。何不遵旨。赴都察院辯理。乃黃振國。汪誠。邵言。綸。暗結黨援。將本身所犯之罪。巧爲掩飾。飾鑽營。李紱密奏。今又指使謝濟世挺身陳奏。關。勲。以行賄被劾。乃不安本分。囑託佟鎮。寄信隆科多。在朕前稱揚其善。以圖僥倖。在黃振國。挾勢婪賂。狂妄不法。已罹重罪。而汪誠。邵言。綸。關。勲。等處分。不過罷

官。何至要結黨與。請託權要。必欲更翻前案。報復私讐。實爲法所難容。是以將黃振國。汪誠。置之重典。邵言。綸。關。勲。發遣邊衛充軍。朕素性不嗜殺人。但此姦惡之風。不得不懲一儆百。實爲人心風俗計也。半月以前。朕面諭九卿翰詹科道。戒以構黨營私。徇情請託。言之可謂諄切矣。今尚有無理妄奏。如謝濟世者。可見此風一時難於悛改。而朕之所以姑寬謝濟世者。蓋以不教而殺。實所不忍。教而不久。朕亦不忍。即加誅也。爾等諸臣。皆由科甲出身。將來爲督撫。爲學政。果能公忠體國。朕必當加恩保護。斷不使萑斐之人。得行其傾陷之計。倘懷私挾詐。顛倒是非。朕亦決不姑貸。凡此構黨排陷之風。朕必加整頓者。乃正所以爲爾等諸臣之身家子孫保全久遠之計。若諸臣果能遵朕訓旨。凡事秉公持正。合乎公是公非。則上下一心。君臣合德。永享昇平之福。豈不美與。諸臣當共勉之。○丙



寅

上命

皇四子弘曆莊親王允祿視馬武疾

諭曰馬武抱病危篤聞之深爲悽惻馬武事我皇考五十餘年朝夕侍奉不離左右恪恭謹慎事事能仰體

聖心每當盛夏嚴寒隨從勤勞並無幾微倦怠之色朕幼齡時伊抱扶服事備極小心其情事宛然如昨伊爲人雖未讀書而侍從

皇考數十年如一日其功甚大朕追念

皇考凡係昔年侍從之人皆加恩眷況馬武乃年齒最高効力最久

聖眷最渥之人是以朕聞其病勢沉重悲傷垂涕不能自己屢次降旨欲親身前往者視諸大臣合辭勸阻至再至三不得遂朕之願朕尚望其痊可倘伊病果不起著照伯爵賜與卹典賞銀一千兩並給與世襲阿達哈哈番以示朕優眷老臣之至意○免江南宣城等

三縣本年分水災額賦有差○丁卯諭戶部

今歲江南秋雨稍多其江安所屬被水州縣已令該督撫轉飭有司確查賑恤務使小民得所但聞入冬以後時有陰雨積水未消春麥未能及時耕種恐交春米價漸昂而青黃不接之時更須預爲籌及況蘇松戶口繁多民間食米多取給於外販尤當早爲留意查江安糧道有存貯還漕一項約計二萬八千餘石安慶廬州鳳陽淮安四府各有分貯留漕之項共計九萬餘石此米原爲地方備用而設迨今年月已久未必實貯在倉應差京官一員前往確查並會同江南督撫作何分別留運平糶之法以濟民食但江南地廣人稠需米之處此數未必敷用必設法多貯方覺寬裕其應作何採買運送備用之處著九卿速議具奏尋議江南現被水災需用米穀倍於他省應令該督撫動帑委員赴產米地方採買運送以濟民食或恐採買稽遲請暫

照河工事例將所捐銀兩改爲本色米穀每銀一兩收米一石或穀二石米穀之數少於常平則易於急公隣省之人亦准其赴捐悉令收買商販米石不論糶和紅白俱准收納分別府州縣之大小酌量應捐米穀之多寡捐足之日即行停止得旨依議蘇松常鎮四府地廣人稠需米甚多而四府所屬漕兌共一百四十餘萬石居七省漕糧三分之一今州縣既有被水之區恐小民輸納匪易著將成災五分以上之地畝漕糧緩徵一半約計將及二十萬石俾閭閻既寬正額之輸將而地方又有多餘之米粟則編戶窮黎當不慮其乏食矣其緩徵一半漕米著於雍正五年秋收後帶徵完納其不成災之地畝仍照額徵之數准其紅白兼收著將此速諭該督撫遵行○以工部左侍郎史貽直署理吏部左侍郎以內閣學士德新何國宗吳襄俱充經筵講官○調直隸古北口提督宋可進爲

陝西甘州提督以原任陝西甘州叅將加總兵銜郭成功署直隸古北口提督○兵部議覆原任山西總督管理巡撫事伊都立等疏言太原大同二鎮汛防請各酌道路衝僻安置汛兵多寡其道路村庄失事汛兵照疎防老爪賊例治罪俱應如所請得旨依議此內汛兵照例治罪之處著通行直隸各省一體遵行○署湖廣總督福敏等摺奏請將通省州縣各官酌調繁簡次第調換以便盤查倉庫錢糧奉

上諭湖廣一省舊無調繁調簡之例即他省亦未經通行朕踐阼以來督撫諸臣往往密爲奏請此舉若出於至公原屬美政倘涉於私比則其弊不可勝言矣所以朕不輕開此例即一時權宜行之惟視督撫之公私何如而斟酌於其間耳朕意調繁自必皆勤幹之員至於調簡或亦偶有抱屈者然大都姑容狗庇之舉居多地方繁簡固有不同即就極簡

州縣而論莫不皆有刑名錢穀之責其闡茸  
劣員安可任其曠官貽誤乎若不過僅短於  
才而無蕩檢踰閑之處宜勒令退休係科甲  
出身者或題請改教即如月選各官引見時  
朕觀其人雖似不及但豈得以語言相貌一  
見而定其優劣遂將無過之人即行斥革是  
以姑且補授令其蒞任是在爾等督撫大吏  
秉公衡鑑明試以功也朕反覆思維吏治須  
嚴為甄別若係庸材斷宜沙汰試思一人之  
榮辱得失較之國計民生輕重何啻倍蓰向  
來姑容陋習近於婦人之仁欲以此沽寬厚  
之虛名實不知乖激揚之大典也地方惟良  
吏難得果係有為有守之員遇因公累誤叅  
劾仍不妨另為題留設遇丁艱事故揆其情  
理如非孤子或亦可在任守制給假數月俾  
得盡其子道然後赴任倘該員報本念切堅  
欲奔赴則不必強或具本題請於服滿之日  
仍補本省遇缺即用如此方為鼓勵人材之

道今爾楚省牧令中察有精勤能幹之員而  
在僻地者用違其才誠為可惜爾等題請調  
繁可也至於才短而任衝繁之地欲為調簡  
者當仰遵朕諭加意斟酌而行均將與例不  
符情節備細聲明題奏又所奏次第調換盤  
查倉庫之說似可不必倘或不肖有司彼此  
互相容隱反致爾等難於稽察矣亦何益之  
有○安徽巡撫魏廷珍疏報宿州潛山泗州  
衛等十四州縣衛開墾雍正三年分田地一  
百九十八頃有奇并廬江等三縣開墾本年  
分田地五百五十頃有奇下部知之○戊辰  
實授陳時夏為江南江蘇巡撫○陝西西安  
左翼副都統董象台右翼副都統金無極俱  
緣事降調陞一等侍衛明白為陝西西安左  
翼漢軍副都統直隸通州副將賽都為陝西  
西安右翼漢軍副都統○免江南南陵等四  
縣本年分水災額賦有差○己巳

上命

皇四子弘曆怡親王允祥莊親王允祿及左翼四旗部院大臣一等待衛往奠故內大臣馬武茶酒○戶部遵旨議覆大學士朱軾條奏營田事例四款○自營已田者照田畝多寡給與九品以上五品以下頂帶以示優旌○効力營田者應酌量工程難易項畝多寡分別錄用○呈誤降調革職之員効力營田者准開復○流徙以上人犯効力營田者准減等俱應如所請從之○免江南邳州宿遷等四州縣衛本年分被水及雹災額賦有差○辛未免江南睢寧縣本年分水災額賦有差○旌表廣西宣化縣烈女李文高女李氏強姦不從被毆殞命給銀建坊入祠致祭如例○壬申雲貴總督鄂爾泰疏言黔省狝苗克悍長寨等一帶尤甚焚毀劫擄視爲慣常所劫男女又有川販沿途接應故克猷日熾臣委調官兵進剿克苗川販窩黨現經擒獲陣斬首級九顆所獲器械什物無算攻破者三

十六寨投誠者二十一寨招撫苗民五百餘戶三千餘口又查出熟田五千八百餘畝熟地一萬四千五百餘畝荒地九千六百餘畝各造清冊臣隨遵旨審理安插地方寧謐得旨數百年以來狝苗克悍不法擾害平民今鄂爾泰石禮哈馬會伯率領弁兵前往勦撫成功甚速地方俱已寧謐永無苗人騷擾之患甚屬可嘉著將鄂爾泰等從優議敘在事官員兵丁俱著照軍功例議敘如有用兵之時退縮不前者著嚴察議奏○甲戌戶部遵旨議覆兩浙鹽商輸銀積貯應照兩淮鹽義倉之例於杭州府地方建倉買米積貯隨時平糶從之○乙亥吏部奏大學士富寧安蒙恩賜爵三等侯照例請將從前所得拜他喇布勒哈番歸併授爲一等侯世襲罔替從之○九卿遵旨議覆部員奉差督學員缺另行銓補其加銜照庶吉士散館授職之例該員係二甲進士出身者加以編修職銜係三甲

同進士出身者加以檢討職銜一體稱為學院任滿仍候本部員缺補用從之○丙子諭都察院及五城御史等制錢乃日用之所必需務使充足流通始便民間之用國家開局年年鼓鑄而京師錢文不見加增外省地方亦未流布是必有銷燬制錢製造器皿以致錢文短少錢價日昂朕念切民生屢降諭旨而錢價仍未平減是以禁用黃銅器皿凡民間所有俱給價令其交官以資鼓鑄此悉心籌畫專為民間資生使用起見並非朕有需用銅斤之處而廣收民間之銅器於內府也似此有益於民間之事即當踴躍急公欣然交納使錢文贏餘日用瞻足尚何待於上官稽查催迫耶况銅器交官皆如數領受價值又何樂而不為且民間器皿非必定需黃銅製造其在有力之家則白銅紅銅皆非難得之物而無力之家如木盆磁器價廉工省亦未嘗不適於用非若錢文為人人所萬不可

缺者與其將黃銅器皿藏匿於家將來限滿三年犯禁獲罪何如彼此相勸早為交納既得價值而又受錢價減省之利益予著將此旨通行曉諭其咸體朕意○丁丑諭刑部從來監斃人犯多由獄官疎忽一任禁卒凌逼所致若使本犯有應死之罪又當別論其軍流以下輕罪之人瘦斃在獄甚屬可憫嗣後監斃不應死之輕犯與應死之重犯其處分似應分別輕重著為定例其犯輕罪之人在獄患病者應否保釋調治再督撫題報監斃人犯本內務將本犯情罪病故緣由聲明無令朦混著九卿一併議奏○刑部遵旨議覆貢監生員非本身錢糧包攬催收入已拖欠國課者應行黜革仍照數著落清完其包攬別戶錢糧雖無拖欠但身為矜監包攬錢糧即干法紀亦應黜革至里民納糧不行自封投櫃聽人攬納者照不應重律處分仍追出包與之數完官該管官不行查出罰俸一年

從之○戊寅諭多羅順承郡王錫保等正黃旗滿洲副都統宗室鄂齊自委任之後竭力行走此番差往西藏辦事明白著將伊父鄂飛未襲輔國公爵給與鄂齊承襲○陞光祿寺卿浙江觀風整俗使王國棟爲宗人府府丞仍留觀風整俗使任以禮部左侍郎唐執玉署理光祿寺卿事○陞直隸大名副將李佛保爲湖廣鎮總兵官○內閣等衙門議覆雲貴總督鄂爾泰疏言流官固宜重其職守土司尤宜嚴其處分應分爲三途盜由苗寨專責土司盜起內地責在文員盜自外來責在武職查土司等官世受厚恩理宜謹遵法度約束苗保乃日久藐視並不實心管攝遇有殺人劫擄之事知情故縱受賄隱藏若不嚴定考成勢必益無忌憚嗣後除命盜案件照例處分外如有故縱苗保擾害土民者該督撫即將該土司奏請革職另行承襲至有養盜殃民者題參嚴拏治罪倘能嚴行約

束擒拏盜賊奏明加級以示鼓勵至於文武官弁均有地方之責嗣後盜起內城則以文員爲專責官武職爲兼管官照例分別降調若盜自外來則以武職爲專責官以文員爲兼管官亦照例治罪再清盜之源莫善於保甲雲貴苗民雜處戶多畸零將零戶編甲獨戶遷移附近以便稽查之處行令該督悉心籌畫飭令該地方官善爲奉行安置得法又設立捕快汛兵原以稽查匪類嗣後督緝盜賊逾限不獲將捕快與快頭一併責比治罪至塘兵有酗酒賭博及偷竊等事按律加倍治罪若文官縱捕殃民武弁不整飭塘汛即題參從重議處並行令雲南貴州四川廣西湖南五省一併遵行從之○吏部遵旨議覆各省恩拔副榜貢生內已就教職者應令各省學臣於歲科兩考事竣會同巡撫與挨貢一體驗看造冊送部銓選年老者以原品休致從之○戶部議覆倉場侍郎托時等條奏

旗丁押運到通。每省每幫各有一人常住通州。謂之守候旗丁。於銷算時。賣補買補。交通各書吏需索分肥。弊端皆由此起。請嗣後凡漕糧抵通之時。令本幫運官造具旗丁花名清冊。投送坐糧廳。候糧米交清。照冊所開丁船名姓。立押回南。如有一丁潛住營私者。即將押空官弁。照疎縱例治罪。再各倉坐糧廳。將三升八合折價給丁之項。應行給價者。不即給價。應准抵欠者。不即准抵。勒索延遲。於銷算時。始准賣補買補。希圖分肥。或經倉場察出。或被旗丁首告。倉場立即題參。如應行南追給者。坐糧廳取具完欠各丁互結。行文各省糧道。於欠丁名下追銀給還。取具有餘幫丁收領申報。如各省糧道或有勒捐情弊。亦令總漕查參。俱應如所請。從之。○又議覆倉場侍郎托時疏。言漕幫失風掛欠。定例止收平米。不收晒颺折耗之米。其非失風而掛欠者。係折乾盜賣。不應與失風者一例。請照

當日起運之數。次年搭運抵通。應如所請。從之。○工部遵旨議覆。山東與河南接壤之曹縣。定陶。曹州。單。縣。城武等處。附近黃河地方。凡一切修築堤岸等工程。俱請交與副總河嵇曾筠就近管轄。從之。○命船廠地方。添立永吉州。設知州。州同。吏目。學正。各一員。寧古塔地方。添立泰寧縣。白都納地方。添立長寧縣。各設知縣。典史。教諭一員。俱隸奉天府管轄。從奉差內閣學士德新請也。○禮部右侍郎魏方泰。以衰老乞休。允之。○兩廣總督孔毓珣。題廣西太平府。憑祥土知州李天錦。老病乞休。請以其子李滋澤襲替。下部知之。○已卯。以和碩淑慎公主下嫁。觀音保。授為和碩額駙。○晉封科爾沁固山額駙輔國公拉錫為固山貝子。○庚辰。諭內閣。年來冬月封印之後。政務畧有餘閒。朕手書福字。賜內外大臣。諸臣奏謝。皆稱受朕賜福之恩。此世俗之言。非正理也。朕何能以福賜諸臣哉。不但

朕也即

上天亦豈能以福私與一人哉書曰惠迪吉從  
逆凶又曰天道福善禍淫易曰積善之家必  
有餘慶詩曰自求多福古聖人之垂訓深切  
著明如此從來善惡之報如影隨形福緣善  
慶視乎其人之自取他人不能助纖毫之力  
也且所謂福者不在乎富貴貧賤之間有富  
貴人之福有貧賤人之福或貧賤之人循理  
守分無患無憂其心志安舒四體暢適轉在  
富貴人之上是人人各有其福也朕之每年  
頒賜福字者蓋欲諸臣觸目警心時時存可  
以獲福之心行可以獲福之事如詩人之所  
言自求多福則諸福集於其身矣諸臣又嘗  
言賴朕之福此言亦屬非是蓋必諸臣皆有  
福方爲朕之福是朕實賴諸臣之福也又必  
天下百姓皆有福然後爲吾君臣之福是君  
與臣皆賴百姓之福也願與諸臣共勉修福  
之道可耳○又諭戶部尚書蔣廷錫在內廷

侍從二十餘年恪慎勤勞實心効力朕御極  
以來凡交與部院事務皆能悉心辦理明晰  
妥協簡任農曹尤爲稱職素性篤於孝道其  
母身享高年蔣廷錫朝夕承歡奉養惟謹朕  
優眷大臣推恩及於其母時加存問賜賚載  
頒今聞其母奄逝深爲軫惻特遣大臣前往  
賜奠茶酒加恩諭祭一次照生前例給與一  
品太夫人封誥並賜銀一千兩爲殯殮之資  
以示朕教孝勸忠之至意○辛巳以工部左  
侍郎史貽直倉場侍郎托時俱兼理禮部侍  
郎事○晉封青海多羅貝勒益蘇克汪扎爾  
爲多羅郡王○壬午

孝莊文皇后忌辰遣官祭

昭西陵○以江南京口將軍何天培爲兵部尚  
書直隸總督李紱爲工部右侍郎湖廣總督  
宜兆熊署理直隸總督調工部右侍郎劉師  
恕爲禮部右侍郎協辦直隸總督事○擢監  
察御史吳達禮爲光祿寺卿○以福建巡撫



毛文銓為江南京口將軍。陞廣東布政使。常  
賚為福建巡撫。以光祿寺卿官達為廣東布  
政使司布政使。○廣東按察使宋瑋患病解  
任。陞廣東惠潮道方願瑛為廣東按察使司  
按察使。○癸未。諭內閣。朕即位以來。視滿漢  
臣子均為一體。時時訓誨。以君臣之間。務敦  
元首股肱一體聯屬之實心。而不在于儀文  
度數之末。至於上之賜賚於下。下之進獻於  
上。不過藉微物以表誠意之交孚。若誠意不  
孚。而徒事虛文。則大非君臣一體之道也。朕  
三年以來。素服齋居。從未令進獻。至上年八  
月。三年之期已滿。十月為朕萬壽節。在廷諸  
臣有進獻書籍筆墨文玩之事。朕以諸臣之  
意出於誠懇。若一概拒却。恐無以聯上下之  
情。而成泰交之誼。故其物雖極輕微。樸陋。朕  
亦鑒其忱悃。收納一二。此朕優待臣工曲體  
下情之深思。並非因其進獻之物可適於內  
廷之用而收納也。旋已命停止羣臣之進獻。

矣。朕之視爾諸臣。實不啻家人骨肉。是以偶  
有食用之物。朕亦不論物之輕重。遇便即行  
頒賜。如論語所記。賜食賜腥。古人早已行之。  
朕實出於一片待下之誠心。豈藉此鼓勵望  
其報効乎。向來年節之時。

聖祖仁皇帝以口外所進鹿豕雉兔之類。頒賜  
諸王外。其餘止及於漢大學士及內廷供奉  
之翰林。則其優待漢人者如此。朕踵而行之。  
偏及於在廷大臣。無非家人父子歲時伏臘。  
歡欣浹洽之意。不在微物也。乃查嗣庭私編  
日記譏訕朝政。而於賞賜進獻之物。則以無  
為有。以少為多。將來散布流傳。必致人議論。  
即如楊名時李紱何世璽甘汝來等所進之  
物。奏單現在。李紱甘汝來又因不收。再三奏  
懇。觀其所獻俱堪一笑。此亦非伊等今日所  
進。偶涉菲薄。乃向日之例。大率皆然。我  
聖祖仁皇帝六十餘年。諸臣進獻之物。不過如  
此。天下人所共知者。蒙

聖祖寬大包容之度鑒其微忱不遺葑菲所收率多筆墨箋紙書冊之類思詎可謂至矣假若有悖逆狂妄如查嗣庭之誣妄記載者六十餘年之久又不知如何訛言也不幾以聖祖恤下之弘仁而反啓僉壬之訾議乎朕事率由舊章祇因查嗣庭之妄行訛謗是以有禁止漢官進獻之旨即年節賞賜之事朕意亦躊躇蓋恐照舊行之或啓無知小人之議論若將進獻賞賚概行停止又將謂朕之待下過於嚴峻無以聯上下之情而不合於聖祖之政此雖細微之事中有關係朕不得不加詳慎著將甘汝來奏摺並李紱等進獻奏單發與漢大學士九卿閱看議奏尋漢大學士九卿等援據舊典合詞具奏內外官員進獻及廷臣常年賞賜懇請仍照舊例得旨此朕慎重之意惟恐以濫賞啓人議論又恐因進獻開諂媚之端故令漢大臣等會議具奏今覽所奏援引舊典情詞懇切著照所請行

至於諸臣進獻之事外任大臣自古有進獻方物之理今仍准其進獻但所進之物必令廷臣共知之朕酌量收納亦必令廷臣共知之在內諸大臣原無方物可獻若以慶賀令節之期視爲成例相率進獻朕概不收納朕前所降諭旨甚明仍著遵行○諭署湖廣總督福敏朕原命爾暫署督篆俟宜兆熊一到交代即還昨宜兆熊來京陛見看伊精神力量甚覺勉強楚督節制兩省文武任鉅事繁統轄匪易且又不識一字但其操守尚優而心術亦正藹然有忠君愛國之誠爲可取耳朕茲令伊督理直隸事務以試觀可否兩湖重寄一時不得其人故欲將爾多留一兩年以經畫之爾其從容次第料理可也一兩年之語係朕約畧言之若一得人即命往替令爾旋都不必亟思赴闕致亂心曲近日廊廟中頗乏卿貳滿臣皇子左右亦需爾來輔翊留爾在楚乃出於不得已也宜仰體朕意勉

力爲之○河道總督齊蘇勒疏報臣於睢寧  
工次忽見黃河之水湛然澄清隨據河營守  
備朱錦等呈報自河南虞城縣至江南桃源  
縣共六百餘里於本月十六十七十八等日  
河水澄澈並無濁流兩岸士民紛紛稱瑞洵  
屬千古罕觀之奇徵臣不勝懽躍之至疏入  
報聞○甲申諭禮部嗣後自外省來京之大  
臣已入班者在伊本班坐未入班者在班末  
各按品級坐著爲定例○頒給總理西藏事  
務貝子康濟鼎印○丙戌歲暮恰祭

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵○遣官祭太歲之神○諭理藩院向來四

十八旗王台吉派爲兩班來往京城伊等即  
有本地要務或身抱疾病亦必前來交春始  
回明歲冬季又復該班日期既近冬寒往返  
勞苦深可軫念伊等內有願請朕安者當於  
草青時照常前來其年例應分爲三班二年  
一次俾伊等得以休息爾等議奏○河道總  
督齊蘇勒奏報朱家口決口合龍得旨嘉獎  
並加齊蘇勒爲太子太傅○丁亥賜朝正外  
藩科爾沁翁牛特教漢四子部落土默特扎  
魯特喀爾喀鄂爾多斯巴林阿霸哈納阿霸  
垓郭爾羅斯毛明安克西克騰蘇尼特吳喇  
忒扎賴特奈曼高齊忒阿祿科爾沁喀喇沁  
烏朱穆秦厄魯特青海厄魯特杜爾伯特和  
托輝特輝特王貝勒貝子公額駙台吉塔布  
囊等及內大臣大學士侍衛等宴

上進酒畢令左翼科爾沁和碩土謝圖親王阿  
拉卜曇右翼烏朱穆秦和碩車臣親王色登

敦多卜。至

御座前。

上親授飲其餘王貝勒貝子公額駙台吉塔布囊等俱令侍衛分觴授飲於坐次○以正藍旗蒙古副都統章祿署正藍旗漢軍都統○旌表八旗節婦滿洲克士圖妻覺羅氏等九十八人蒙古明璽妻關氏等八十二人漢軍任有福妻郭氏等三十人直隸各省節婦姚元度妻左氏等八百三十九人貢女余氏等十八人孝子薛英賢等三十七人各給銀建坊如例○是歲人丁戶口二千五百五十七萬九千六百七十五又永不加賦滋生人丁八十一萬一千二百二十四田地山蕩畦地八百九十六萬八千六百五十四頃十七畝有奇徵銀二千九百五十四萬六千四百一十八兩有奇米豆麥四百九十二萬九千三百三石有奇草四百九十萬六千五百三十三束茶三十萬七千七百七十引行鹽四百

九十八萬三千五百三十九引徵課銀三百八十六萬三千九百三兩鑄錢六十七萬五千一百六十有奇

大清世宗敬天昌運建中表正文武英明寬仁信毅大孝至誠憲皇帝實錄卷之五十一

六百餘里。實爲

喜實以為懼。蓋恐前此之受貺無因而後此

不能仰副也。惟有君臣益加勉勗。一德一心。恭承

天眷。昔

皇考臨御初年。偶有一二災祲之事。此特兆三逆之變亂。由於氣數使然。而

皇考朝乾夕惕。誠敬交孚。是以感格

上蒼。錫以多福。四海寧謐。曆數綿長。此天道彰

明較著者也。朕即位以來。敷政宣猷。豈足當

上天嘉貺。惟有孝敬思慕

皇考之心。實為誠切。或者仰邀

皇考昭察代籲

昊天。默祈福祐。從前疊賜嘉祥。今又有河清之

瑞。蓋許其已往而勉其將來也。朕祇承之下

益深敬畏。黽勉不遑。若允行慶賀。則沿襲頌

美之虛文。太非朕戒儆之素志。既蒙

皇考錫以希有之瑞。應告祭

景陵。申朕感激惶悚之誠。至於上年。朱家口河

水潰決。朕勅諭河臣悉心修築。今於十二月

十三日。決口合龍。越三日。即有河清之應。其見河神福國佑民。功用顯著。宜崇祀典。以答神庥。該部察例具奏。至所請陞殿受賀。不必行。諭八旗官員兵丁等。國用莫要於制錢。制錢充滿。價值日平。始於衆人生計有益。今錢局每年鼓鑄。並未流通外省。乃錢不加多。而價值反覺昂貴。皆因不肖之徒。希圖利息。銷燬制錢。製造器皿。以至如此。朕洞悉此等情弊。爰降諭旨。禁用黃銅器皿。令給官價收納。此特為爾等生計周詳籌畫。理應欣然踴躍。各將家中所有黃銅器皿。速行交出。聞有經該管人員催促。不肯即行交納者。又有遷移隱匿者。是誠何意。爾等有力之家。白銅紅銅鉛錫俱屬可用。至中人家。磁器木器。未嘗不適於用。而所需價值。又復廉省。爾等將黃銅器皿交納。既可照常得價。而制錢漸漸加多。充滿足用。於爾等生計。亦大有裨益。今爾等隱匿家中。將來三年限滿。發覺之日。自

干罪戾何如早為交納以得官價乎是以朕復行降旨曉諭再滿洲風俗原以淳樸儉約為尚今漸染漢人習俗互相倣倣以致諸凡用度皆涉侈靡不識撙節之道因酌定品次以禁服色勒限一年令其各按品次著用諭旨甚明此特軫念八旗滿洲官兵如同保赤關係尤切故曲為籌畫或有無知之徒於已禁之後新製衣服誑稱禁前所製若如此則終無底止時矣人之尊榮不在衣服惟在各人行止蓋富足之人少而貧乏之人多既已貧乏而強相倣倣則生計愈窘爾等與其為衣服拮据倣倣豈若安守本分砥厲於技藝品行如果能奮勉得至官員大僚即可服用矣凡官員兵丁所恃以謀生者惟在俸餉且各有應當之差若因製一衣服即耗費數月之錢糧其日用尚能饒裕乎夫儉約為持家根本不能節省於衣服等項焉能有益於生理若能謹遵朕諭儉約自持不事奢靡濫用

馴至比戶充盈方感戴朕教養之深恩也著交與八旗該管處再行曉諭務使咸知朕心各圖儉約以副朕軫恤優待旗人之至意○甲午

世祖章皇帝忌辰遣官祭

孝陵 諭八旗護軍統領前鋒統領等前鋒校護軍校前鋒護軍內有人材可用勤謹誠實者上三旗每旗揀選護軍二百名護軍校二十員下五旗每旗揀選護軍一百五十名護軍校十五員兩翼每翼揀選前鋒二百名前鋒校二十員著各該管叅領前鋒校護軍校等秉公據實呈明護軍統領前鋒統領如護軍統領前鋒統領大臣等各有所知亦著公同秉公揀選先定之旗分即行奏聞此次揀選勿論佐領亦不可止論其弓馬○乙未川陝總督岳鍾琪奏報普雄即梁山東通烏蒙鎮雄西接建昌南連雲貴北達我邊馬邊叙馬等營在烏蒙鎮雄特為退步者即此地也

其中番族甚多而賊番金格等負隅抗拒從前調遣漢土官兵進剿金格等逃匿山箐復遣建昌鎮臣趙儒化林協副將張成隆等會同前往相機勦撫前後俘馘甚衆所獲牛羊馬匹無算彼處番苗數十餘族相率乞降鎮臣趙儒等隨加化誨令將逆首金格等拏獻茲於十二月初三日逆首金格阿租已經擒獻并誘擒關壽一併解省審究臣請仰仗天威乘此勝兵將其餘番族一一招撫庶可一勞永逸得旨賊番金格等依恃險僻肆行不法以劫奪為生且煽惑普雄一帶番苗負隅抗拒為地方百姓之害其來久矣當日岳昇龍年羹堯亦曾奏請用兵征剿皆未擒獲渠魁使亮苗革心革面前歲因賊蠻阿底加巴等搶奪不法遊擊蘇凱差遣兵丁追捕賊衆聞風遠颺該弁將阿租之父姑姑踢打身死阿租遂與其叔金格挾仇報怨夤夜聚衆劫擄鐵廠民人又將營兵魏國臣綁去砍死以

祭姑姑似此兇惡性成干犯法紀斷難寬貸是以朕允地方督撫提鎮之請令建昌總兵趙儒化林協副將張成隆等率領漢土官兵前往相機勦撫岳鍾琪悉心經理調度有方趙儒張成隆勇敢當先奉行得宜在事官兵當寒天冰雪之時不避險阻奮勇効力直抵普雄地方今據岳鍾琪奏報寨峒賊衆咸知畏威懷德悉就勦撫將賊首金格阿租關壽三人擒獲投獻等語渠魁既已伏辜其餘黨再加詳悉料理安插則從此番地寧謐居民安堵甚屬可嘉岳鍾琪著該部議叙在事官員兵丁俱著加恩議叙賞賚○丙申以正白旗滿洲都統伍格為鑲黃旗領侍衛內大臣調鑲黃旗蒙古都統穆森為正白旗滿洲都統陞正藍旗護軍統領常色禮為鑲黃旗蒙古都統○正黃旗滿洲都統常雲緣事革職調鑲藍旗蒙古都統查克旦為正黃旗滿洲都統仍兼理鑲藍旗蒙古都統事務以散秩



大臣法璫為正黃旗護軍統領實授散秩大臣克什圖為正藍旗護軍統領陞正黃旗護軍叅領尼馬善為正黃旗滿洲副都統鑲藍旗叅領班第為正紅旗蒙古副都統正白旗護軍叅領常保為本旗漢軍副都統丁酉孟春享

太廟

上親詣行禮遣官祭太歲之神諭諸王大臣等朕每逢祭祀天氣必和諒去年冬至祭

天蒙降瑞雪今日祭

太廟又有微雪可為豐稔之兆此皆

天心默佑朕躬故於祭祀之日示以休徵朕心不勝忻慰然

天庥滋至人事益不可怠朕又不勝兢惕也爾諸臣其共勉之戊戌陝西西安右翼副都統關保緣事降調陞正紅旗協領朱蘭泰為陝西西安右翼滿洲副都統以正藍旗護軍統領克什圖署鑲黃旗蒙古都統己亥

諭戶部聞江西倉儲虧空甚多現今正在清查向來倉穀舊例存七糶三原為青黃不接之時用以接濟民食今裴律度因各州縣虧空竟將此為那補遮掩之計若仍聽其存糶則盤查難於清楚著從雍正五年為始將糶三之例暫行停止俟各州縣倉穀查清之後奏聞再行辛丑祈穀於

上帝

上親詣行禮諭大學士等太常寺無養廉之項

先農壇地租銀兩不必於修理

先農壇墻垣支用著賞給太常寺為養廉再各處修理

壇廟事宜從前俱著工部修理嗣後如有應行修理之處或令太常寺會同工部官員估計交與太常寺修理或即交與太常寺估計具題修理其動用何處錢糧並應於何處奏銷之處大學士會同太常寺議奏尋議嗣後各

處

壇廟應行修理之處俱由太常寺詳查會同工部堂司官估計具題交與太常寺修理其應用錢糧由工部取用工完之日即繕黃冊具題從之○順天府進春○壬寅諭刑部向因年羹堯狂悖妄亂結黨肆行法難寬宥朕不得已將伊治罪又恐其黨援固結不散伊諸子留在京師或彼此暗相比附又生事端故令徙居邊遠之地遇赦不赦今見年羹堯正法之後伊平日同黨之人實皆悔過解散無一人比附之者而當日平定青海年羹堯亦著有功績著將伊子遠徙邊省者俱赦回交與年遐齡管束以示朕格外恩宥之至意○以上元節賜外藩科爾沁翁牛特敖漢四子部落土默特喀爾喀鄂爾多斯巴林阿霸哈納扎魯特阿霸垓郭爾羅斯毛明安克西克騰蘇尼特吳喇忒扎賴特柰曼蒿齊忒阿祿科爾沁喀喇沁烏朱穆秦厄魯特杜爾伯特

青海厄魯特和托輝特輝特王貝勒貝子公額駙台吉塔布囊等及內大臣大學士侍衛等宴 癸卯

上幸豐澤園○賜外藩王貝勒貝子公額駙台吉塔布囊等宴賞賚有差○甲辰康親王崇安等覆奏先經河道總督齊蘇勒奏報黃河澄清嗣據漕運總督張大有河南巡撫田文鏡副總河嵇曾筠陸續奏稱黃河之水自河南陝州至江南桃源縣約計二千里水色澄清略無沙滓據各處沿河官弁呈報自雍正四年十二月初九日起至二十九日河水悉皆澄清而嵇曾筠於本年正月初四日奏稱親勘河水澄澈如前是則河水澄清遠跨陝西河南江南山東四省之境經歷二十日之久誠亘古以來未有之瑞伏懇陞殿慶賀以慰羣情得旨諸王大臣等奏稱河水澄清二千里期逾兩旬爲從來未有之瑞懇請陞殿慶賀朕嘗言天下至大庶務至繁斷非人主

一身所能經理必賴內外臣工協力贊襄然後可以成一道同風之盛。若上有涼德之主而下皆臯夔稷契之臣則工虞水火佐理有人政務亦不患其不舉。若上有堯舜之主而下皆共工驩兜之輩則耳目股肱無所資藉政務亦必至於廢弛。故人君之道以得人為要而人臣之道以奉職為先。此一定之理也。朕統臨萬方雖刻刻有勵精圖治之念然必賴內外臣工共天公忠各殫才力然後有實政實效及於吏治民生方可以感

天和而錫繁祉不然則朕雖有勤政之念豈能事事躬親辦理也。今見數年之中荷蒙

上天

皇考默佑疊賜嘉祥茲又有河清之上瑞朕細推天人感應之理自非無因當由內外臣工能體朕宵衣旰食之懷洗陽奉陰違之習分猷効職有數端之善上合

昊天

皇考之心是以錫茲福慶以勵將來爾等試再思之人事甫修僅有數端之善即邀

上天

皇考之嘉貺若此倘能益竭忠誠事事皆善則其獲福又當何如或由此而侈然自足怠惰前修則其獲譴又當何如可不慎乎可不懼乎況天道惡盈朕心方且因此益加戒儆所請慶賀典禮朕必不行朕念君臣之間實屬一體

上天

皇考既垂訓於朕朕即以此訓及諸臣

上天

皇考既錫福於朕朕即以此福及諸臣凡屬京官自大學士尚書以下主事以上內大臣都統前鋒統領護軍統領步軍統領以下叅領以上凡屬外官自督撫以下知縣以上武官自將軍提鎮以下叅將以上俱著加一級其王公等管理部院都統事務者應如何加恩

之處著宗人府議奏自茲以往內外臣工當益加黽勉精白乃心和衷共濟矢勤矢慎秉公去私凜

天鑒之匪遙念感應之不爽以至誠至敬仰承上天

皇考之眷佑則受福孔多永永勿替矣勉之勉之乙巳諭內閣從前奉天將軍蘇努等深負

皇考委用之恩於任內之事漫不經心內懷狡詐飾貌沽名將朝廷法紀滿洲制度盡行廢棄侵蝕庫帑虧空倉糧種種罪惡不可枚舉朕即位以來雖悉心竭力整飭修治於今五年尚未就緒頃據噶爾弼奏稱盛京城內所有駐防兵丁六千名節年俱各搬移城外或百里或五六十里居住等語夫以駐防地方之兵丁而聽其散處僻遠有此理乎皆由蘇努肆意擾亂國政嵩祝唐保住甘為蘇努犬馬曲意效尤所以二十年來流弊一至於此

伊等之罪至為深重盛京乃

太祖

太宗開基之地逼近

福陵

昭陵關係甚鉅著將蘇努家產交與嵩祝唐保

住查明再將伊等所有貲財俱帶往盛京以

為兵丁搬移入城之費如有應交與都統之

處即著交與都統令伊等効力贖罪六千名

兵丁縱不能盡行移入但移二三千名伊等

之罪亦可少輕若不悉心効力定將伊二人

從重治罪○又諭各省所貯倉穀原係歉年

賑濟之用實百姓性命所關地方官員虧空

倉穀者較之虧空銀兩其罪更為重大是以

朕即位以來時刻以倉儲為念總為民命起

見也雍正元年特頒諭旨令各省州縣於三

年之內將所虧倉穀悉行買補務期足數違

者重治其罪嗣又屢頒諭旨諄諄申飭並諭

各該督撫若所屬地方有不能如期補足情

由亦據實陳奏乃江西巡撫裴率度奏稱江西倉穀俱已補足並無虧缺且有數人在朕前稱江西乃產米之鄉不必多貯穀石應將江西現貯之穀酌量減數糶賣者今據邁柱摺奏現在查出江西州縣倉穀虧空甚多是裴率度所奏顯屬徇隱欺罔而從前之奏稱江西穀石當發糶者想皆受裴率度之囑託欲借此以掩蓋江西倉穀之虧空耳又據邁柱奏稱現在清查倉糧請將存七糶三之例暫行停止庶免朦混等語據此則江西從前之存七糶三不過借百姓之名以為掩飾官員虧空之計非真有出陳易新之事也裴率度身任封疆大臣為百姓所倚賴而忍以百姓性命所關之物化為子虛使屬官得其利百姓居其名有是理乎原任布政使張楷陳安策職司錢穀乃敢扶同欺隱以致倉儲虧缺若此從前裴率度奏摺力薦張楷陳安策而張楷陳安策來京陛見亦極口稱贊裴率

度似此明係彼此徇情比附袒護屬員盜虛名而貽實患甚屬可惡陳安策著革職與張楷一同發往江西交與邁柱伊都立將虧空情由嚴加審訊裴率度亦著革職與伊等質審務將虧空之項徹底明白清楚倘張楷陳安策裴率度仍然欺隱含糊不得清結定將伊等在江西地方正法以為私動倉儲輕視民命者之戒諭戶部兩淮巡鹽御史噶爾泰奏稱乙巳綱商人呈稱感戴皇恩撫恤鹽豐課裕家足戶盈情愿公捐銀二十四萬兩以充公用以達微忱等語朕軫恤衆商是以減除浮費加添鹽斤種種施恩之處無非欲使衆商均沾利益資本饒裕並不計其感激報効也伊等上年公捐銀兩朕因其既已捐出難於退還故令即於本地方建立鹽義倉以裕積貯備地方之用今伊等又復公捐大非朕意但據噶爾泰所奏衆商情詞懇切著將此項銀兩令衆商各暫行存貯將來遇有

公事動用之處再候諭旨。或將此項任伊等資生利息亦從其便。向後不必再捐。又據噶爾泰奏稱。衆商脩伊公務銀八萬兩。今一併交庫等語。此係噶爾泰應得之項。若有需用之處。聽其自行支用。伊若不接受。任其退還。衆商朕不收受。聞得煎鹽竈戶皆居住濱海之地。離城最遠。一遇歉收之歲。覓食維艱。若遠赴鹽義倉領取米石。恐窮民多往返之勞。朕意應計地之遠近。人之多寡。酌立數倉於近竈之地。積貯米穀。以備貧苦竈戶一時緩急之用。令誠實商人經管其事。若遇歉歲。即以此為賑貸之資。濟其困乏。著噶爾泰悉心經理。即於乙巳綱商人公捐銀兩內酌量動用若干。以為建倉積穀之費。竝遴選商人管理。務期實有裨益。命兵部尚書孫柱署理大學士事。署理湖廣總督福敏等奏言。湖廣苗徭地方不產硝磺。而各寨每以鎗砲傷人。明係奸民販賣轉入。崗寨臣等正行嚴禁。

乃查舊案。參革藩司張聖弼任內濫給硝磺牌照甚多。以致漢口經紀公然販賣。至今尚有存貯前撫臣鄭任鑰在藩司任內亦有伊戚林西周販賣。雖經詳明督撫而違禁射利殊玷官箴。理合奏聞。得旨。鄭任鑰在學政任內頗有清名。為巡撫時聞於應得之項亦不收受。今觀福敏等所奏。以硝磺違禁之物。且湖廣地方苗徭雜處。例禁更嚴。而鄭任鑰身為封疆大臣。縱其私人犯禁取利。是鄭任鑰之為人。於人所共知之處。則強制不取。以沽清廉之名。而於人所不知之處。則暗中巧取。以遂其營私之實。不知清廉之官當如是否耶。彼意在於名實兼收。而不知其終歸敗露。又如湖廣社倉一項。楊宗仁殫心經理。勸導百姓勉力公捐。以裕積貯。而鄭任鑰身為巡撫。徇庇屬員。聽其侵漁。置之不問。以致民間辛苦蓄積之物。皆化為烏有。但知取悅於屬員。不顧民生之緩急。尚得謂之愛養斯民者。

乎鄭任鑰著革職在湖廣修理江岸工程處効力贖罪、丙午。

上詣

恩佑寺行禮畢幸圓明園○賜外藩王貝勒貝子公額駙台吉塔布囊等及內大臣大學士侍衛等宴○廣東碣石總兵官陳良弼廣東左翼總兵官藍鳳俱緣事革職陞浙江湖州副將蘇明良為廣東碣石總兵官福建興化副將朱杰為廣東左翼總兵官命江蘇巡撫陳時夏運米十萬石至福建平糶以裕民食○丁未諭內閣各省將軍俱已量給養廉銀兩惟奉天黑龍江船廠三處將軍並無養廉之項著將長蘆鹽課餘銀內動用六千兩分給三處將軍至旗下大臣及有職掌之官員亦宜量給養廉著動用兩浙鹽課餘銀一萬兩分給兩翼前鋒統領護軍統領前鋒參領護軍參領前鋒侍衛等再動用兩淮鹽課餘銀二萬四千兩分給八旗都統以下至參

領等官已酉工部議覆河道總督齊蘇勒疏言睢寧縣朱家口堤工已經合龍大溜全歸正河惟是地居呂梁之下素稱險要請添築夾壩月堤并於臨河增修防風埽工以資鞏固應如所請從之○庚戌諭吏部內外各官皆有職業不可一日曠缺而大員尤為緊要外省督撫在任丁憂者已令聽候諭旨到日方行離任嗣後三品以上京官陞轉之日原任內若無同堂辦事之人仍令本人辦理俟爾部開缺奉旨補用人員後方行卸事其無管別衙門者亦一體遵行庶職任不致或曠○陞右通政羅其昌為光祿寺卿○以鑲白旗滿洲副都統圖納署正藍旗滿洲都統○刑部等衙門議覆禮部右侍郎塞楞額奉差審訊廣東駐防兵丁閏尚義等打毀米廠擁鬧巡撫公堂一案其為首之閏尚義陳顯聰及扎傷守備之譚英奇等均應擬斬立決為從之梁亞德湯亞四等均應擬絞監候原



任廣州將軍李林。平時不行約束兵丁。臨時復向巡撫楊文乾求情釋放。縱容曲庇。明係擾亂地方。李林應擬斬監候。從之。○辛亥。諭火器營大臣等。火器營甚屬緊要。馬上教習熟練。方為有益。凡屬滿洲。以騎射為根本。不可專習鳥鎗。而廢棄騎射。須在馬上射箭。放鎗。若令兵丁加意熟習。再兵丁內有自己養馬。學習鳥鎗技藝。及勤謹効力。當差者。爾等即當獎勵。以優等記名。其或行走不及者。當誘掖勸導。蓋教訓兵丁。須如父兄之於子弟。不可遽加呵責。若有下愚不移之人。或經再三教訓。終不悛改。仍然行止妄亂者。豈可留之京師。爾等當即行奏聞。發遣。爾等凡遇官兵齊集訓練之處。將朕諭旨。諄諄勸誘。明白曉諭。○壬子。

上回宮。雲貴總督鄂爾泰。遵旨議奏。候補通判管旆條陳事宜。一。漢姦宜禁。查邊境逞兇。莫如頑苗。而頑苗肆惡。專仗漢姦。苗之族類。

甚繁。凡黔粵四川邊界所在。皆有。今安設營汛。兵苗錯處之地。雖不能禁漢民之不相往來。而刼殺之風。自可少息。其餘無營汛之寨。原不許漢民雜居。借貿易之名。巧為勾通。自宜嚴行禁止。舊議以拏獲川販十五名。准予該管官紀錄一次。夫川販漢姦。潛匿亮寨。拏獲甚難。又多由外結。並不報部。故雖有鼓勵之典。而踴躍効力之員甚少。請嗣後凡有擒獲姦販。審明實有通同刼殺情罪。每擒獲一起。即予紀錄一次。一切刼殺案件。不得外結。有能告首姦販情實。罪當者。每獲一人。賞出首人銀五兩。但不得挾讐射利。如虛反坐。一。藥箭宜禁。查亮苗所恃。惟有亮器。臣自親行長寨。已將定廣各寨亮器查繳。惟是熟苗查繳頗易。生苗查繳甚難。若盡收熟苗之器械。必轉受生苗之摧殘。則外侮之來。反無以抵禦。不可不慎。今擬嚴定規條。一切兵器。只許收藏在家。以防盜賊。其有萬不得已事。必欲



攜帶夜行者給以號票每過塘汛盤驗放行至藥箭多自川粵而來現已密訪飭拿此風少減總俟充惡土官盡歸法度則此患可絕一倉穀宜積查積貯之法穀原勝米然實心任事存乎其人每見一經官糶則徒飽吏胥民不沾惠輕斗糶出重斗糶入官價減而民未受減價之利官買穀而民實受買穀之害此弊江浙為甚雲貴亦然臣自莅滇以來凡銀折印借民欠勢壓等弊漸次禁止其有虧缺勒限完補已各知警惕至於米應易穀雖經通行猶未盡一俟各倉清楚少待秋成可以就緒一黔省鼓鑄宜開查黔省地瘠民貧輕戥潮銀所在通行若換制錢必須加戥折色甚以為苦况充苗錯雜見財殺人往來行客尤不便帶錢而開採礦廠動聚萬人油米等項少不接濟則商無多息民累貴食一旦封閉而衆無所歸則結夥為盜不可不慎臣愚以為不如開墾田畝多積稻糧使油米價

賤則開採不難今猶未敢輕議也奏入報聞甲寅以正黃旗滿洲副都統永壽為禮部右侍郎仍兼副都統○乙卯諭內閣地方水利關係民生最為緊要如江南戶口繁庶宜更加修濬時其蓄洩以防旱澇向來屢有條奏之人但未經本省督撫奏請朕意亦久欲興修以資農務因海塘工程正在營治且水利事關重大必得實心辦事之人方有裨益即如目今畿輔水利賴有忠誠任事之怡親王始可興此大工不然則亦未敢輕易遽行也我皇考念切民依周知稼穡康熙四十六年巡省江浙所至必細驗水土燥濕高下之宜詳考五穀種植之性躬親講求將附近太湖及通江潮之處條分縷析特頒諭旨令江浙督撫於蘇松常鎮杭嘉湖地方疏濬河港以資灌溉修建閘座以便啟閉皆動用公帑錢糧不使絲毫出於民力

思至渥也。乃當時督撫諸臣不能實心仰體。惟以虛文奉行。糜費帑金二十餘萬。大都飽於官吏之侵漁。而無實效。深可痛恨。朕即位以來。事事仰繼。

皇考之詒謀。永圖民生之遠計。本欲俟直隸水利興修之後。令怡親王前往江浙地方。相度情形。商酌興修之舉。今巡撫陳時夏特行奏請。且稱費用不過十餘萬兩。即可成功。據陳時夏陳奏。應是地方不可遲緩之事。副都統

李淑德。昔任江南松江府同知。諳悉水利事。宜曾經條奏。頗爲明晰。原任山東巡撫陳世倌。年力精壯。現在閒居。著李淑德、陳世倌會同巡撫陳時夏。總河齊蘇勒。總督孔毓珣。悉心踏勘。詳加酌議。倘河工緊要。齊蘇勒不能親身前往。即行商酌定議具奏。凡建立閘座。疏濬河流。務期盡除淤塞。以杜泛溢之虞。廣蓄水泉。以收灌溉之益。其一應公費。俱動用庫帑支給。一切工程。交與李淑德、陳世倌監

督辦理。並諭吏部。將各部現任司員候選司員。及府州縣人員。內有具呈願往効力者。挑選十餘人。帶往江南。不必令出貲財。惟令辦理事務。交李淑德、陳世倌二人酌量委用。致仕太子少傅文淵閣大學士高其位。故遣簡親王神保。住率散秩大臣一員、侍衛十員。往奠茶酒。丙辰。諭內閣、太常寺、卿、鄒汝魯。進河清頌。內有舊染維新。風移俗易等語。朕御極以來。用人行政。事事效法。

皇考。凡朕所行政務。皆

皇考已行之舊章。所頒諭旨。皆

皇考已頒之寶訓。初未嘗少有所增損。更張也。

朕已屢行曉諭。中外大小臣工。無不知之。今

鄒汝魯所云舊染維新。風移俗易。不知其出

自何心。亦不知其有何所指。且所移者何風。

所易者何俗。舊染者何事。維新者何政。且書

經成語。舊染汚俗。咸與維新。此處豈可引用。

耶。鄒汝魯前在奉天府尹任內。並不實心供

職諸事怠忽聲名亦甚平常。來京陛見條奏數事皆屬荒唐不可行之事。因轉用爲太常寺卿。朕見伊言動舉止知非端方之人。又因伊弟縱容家人生事被叅革職。伊心懷怨望形於顏色。今茲河清之瑞朕並未令臣工進獻詩文鄒汝魯若不善文詞原可不必陳獻。乃於所進冊頁內出此悖謬之語顯係譏訕其屬可惡。著交與九卿公同嚴審定擬具奏。陞吏部左侍郎沈近思爲都察院左都御史。

仍兼理吏部侍郎事。○丁巳。正白旗蒙古副都統拉布坦緣事革職。以散秩大臣拉歆爲正白旗蒙古副都統。○議政王大臣等議覆副都統宗室鄂齊奏稱臣至西藏審視情形首領辦事之人互相不睦每每見於辭色達賴喇嘛雖甚聰敏但年紀尚幼未免有偏向伊父索諾木達爾扎之處。康濟鼐爲人甚好但恃伊勲績輕視衆噶隆爲衆所恨。阿爾布巴賦性陰險行事異於康濟鼐而索諾木

達爾扎因娶隆布奈二女三人合爲一黨。若調唆達賴喇嘛與康濟鼐不睦必至爭競生事。再噶隆甚多反增繁擾。隆布奈行止妄亂。扎爾鼐庸懦無能應將此二人以噶隆原銜解任。則阿爾布巴無人協助自然勢孤無作亂之人矣。請降訓旨。曉諭達賴喇嘛康濟鼐阿爾布巴等和衷辦事均應如所請。遣大臣一員賫旨前往曉諭。令伊等和好辦事。再達賴喇嘛母舅哀都阿喇木巴既誠心守護應給與達爾漢之號賞緞六疋。得旨著內閣學士僧格副都統馬喇差往達賴喇嘛處各賞銀一千兩。○戶部議覆江蘇巡撫陳時夏疏言江南省二十三衛向隸都司管轄今都司已裁其徵收錢糧盤查倉庫應歸附近之府州專轄結報請將上江之新安等衛歸徽州等府管轄下江之蘇州等衛歸蘇州府管轄江淮興武等衛歸江寧府管轄應如所請從之。

大清世宗敬天昌運建中表正文武英明寬仁  
信毅大孝至誠憲皇帝實錄卷之五十二

大清世宗敬天昌運建中表正文武英明寬仁  
信毅大孝至誠憲皇帝實錄卷之五十三

監修總纂官光祿大夫經筵講官太僕寺卿和碩大學士兼其轄內書院總纂官第三年伯加十五次

總裁官光祿大夫經筵講官太僕寺卿和碩大學士兼其轄內書院總裁官第三年伯加十五次

第三年伯加十三次

翰林院掌院學士加二級

經筵講官議政大臣滿洲內閣大學士常務禮部尚書仍兼管太常寺鴻臚寺第三年

敕修

雍正五年丁未二月戊午朔祭

大社

大稷

上親詣行禮○宗人府遵旨議奏前因黃河澄  
清奉旨將管理部院都統事務之王公一體  
加恩查王公無加級之例應各與紀錄一次  
得旨依議王公紀錄一次著准算俸二年○  
己未以四川提督周瑛為鑾儀衛鑾儀使○  
予故福建陸路提督黃陞祭葬謚勤恪贈太  
子太保○以故阿祿科爾沁多羅貝勒汪札

爾子達克丹襲爵○庚申。

上以直隸總督宜兆熊劉師恕奏秦原任總督李紱彌縫虧空一摺出示大學士九卿詹事科道等。諭曰：凡汝等科甲出身之人，朕因其較之捐納人員，目不識丁者不同，所以欲加任用。若盡如李紱、鄭任鑰等之營私作弊，轉不如非科甲之人矣。汝等宜思天人感應之理，絲毫不爽，果能至誠秉公，致朕於堯舜之君，朕必委曲保全。盡令爾等爲臯夔稷契之臣，將唐宋元明積染之習盡行洗滌，則天下永享太平。即爾等子孫亦蒙其福。朕所以誨諭諄諄者，蓋欲諸臣屏去虛文，崇尚實政，以仰答

天眷耳。且朕亦竝非謂已治愈，求其治也。爾等試思：今天下之大，果事事就理耶？爾等讀書，原欲致君澤民，建功立業，流譽於無窮。但功名富貴是有命焉，不可倖而致也；即禍患災難亦有命焉，不可倖而免也。但當誠意正心。

竭盡忠盡，以爲立身事君之本而已。朕所以誨諭諄諄者，實欲國泰民安，衆共受福。朕之所爲，竝無成見，不過渴飲而饑食，夏葛而冬裘，光天化日，因物而施耳。見今黃河澄清，朕實不敢以爲瑞，愈滋恐懼，修省之心也。○諭直省督撫提鎮等：向例千把總俱由督撫提鎮拔補，往往以其家人長隨及私自効力，請託夤緣之人補用，徇情面而無公道，以致老弱不堪之人得授千把總者甚多。其所管汛地道路之遠近，俱茫然不知，而兵丁內年力精壯技勇可觀者，轉不能得一官職，甚爲可憫。千把總職掌關係營伍，有稽查汛地管束兵丁之責，又爲行伍出身之途。若聽其因循冒濫，何以整飭戎政，鼓舞兵心？今定半年之限，令該督撫提鎮將所轄千把總內除曾經効力久歷行伍尚堪任使之入外，凡有老弱不堪不能稱職者，秉公細加考驗。考試盡行沙汰，不可姑容一人。其所出之缺，務將兵丁

內年力精壯技勇可觀之人從公選擇拔補不得仍蹈故習。諭雲南貴州四川廣西督撫提鎮等狎苗素稱兇悍加以漢姦販棍潛藏其中引誘爲惡以致燒殺劫掠毒害善良居民深受其擾今督臣鄂爾泰等奉旨勦撫業已擒獲兇苗販棍正在撫恤地方籌畫久遠之計朕聞滇黔蜀粵四省接壤之區猺獞雜處不時統衆越境讐殺攪害鄰封地方文武官員往往以責任不專彼此推諉苟且因循以致塵案莫結者甚多此天下之共知共聞者如廣西西隆州古障地方土目王尚義等與貴州普安州捧鮓地方之苗目阿九等互控一案遷延數年之久尚未審理朕已降旨督責此即其明証也況各省所設汛防在於腹內而猺獞則環居腹外防範難週遇有殺掠必待事主稟報始行追捕往返耽延兇徒已遠遁矣四省督撫提鎮宜各委賢員於四省接壤之地勘明界址凡猺獞販棍往來

要路設立營汛派撥遊守等官帶領弁兵駐防稽察儻有越境讐殺劫掠之事即時擒解不使漏網其委防弁兵以一年爲期即於四省附近營伍內輪流撥換如一年之內無越境生事之人及有而能逐名拏獲者四省督撫提鎮會同保題從優議敘兵丁量加賞賚儻有貪功生事騷擾地方者立即題參從重治罪。辛酉諭內閣九卿前據李紱奏稱田文鏡欲監斃黃振國以滅其口等語著將黃振國再行細訊田文鏡有何不公不法之事爲黃振國挾制而必欲置之死地以滅其口黃振國係必應正法之人此時有何顧忌田文鏡若果有不公不法之事著伊據實供出並不因其供出田文鏡之短方行正法亦不因其不供出田文鏡之短遂可邀寬減也據黃振國供稱伏讀上諭說黃振國之罪不至斬決可見皇上至聖至仁原不要殺我是李紱蔡瑒謝濟世三人要殺我等語朕前謂黃

振國之罪不至於斬決者乃謂從前田文鏡  
叅劾之案其罪本不至於死地及被叅之後  
蔡珽爲之黨護李紱爲之陳奏謝濟世又爲  
之翻案鈎結黨援造作蜚語撓亂國政誣陷  
大臣爲世道人心之害所關甚大是黃振國  
之罪雖服極刑而有餘尚得謂之罪不至死  
乎但其所以致此不可赦之死罪者實由蔡  
珽李紱謝濟世三人成之也著竝諭黃振國  
知之○內閣九卿翰詹科道議奏江西考試  
官查嗣庭俞鴻圖收受舉人牌坊銀兩除查  
嗣庭大逆不道另案歸結其巡撫汪隆布政  
使丁士一副考官俞鴻圖應按律治罪得旨  
舉人牌坊銀兩分送主考官向來亦相沿行  
之尚非贓銀之比但謂主考應該收受亦非  
也汪隆之過在於身爲封疆大臣而與欽差  
主考爲房屋交易之事應加處分以儆將來  
但其爲人尚老成著降四級以京員調用丁  
士一由部曹擢爲御史朕特簡任巡臺御史

隨陞福建按察使又陞授江西布政使伊受  
朕格外擢用之恩當於地方一切有關國計  
民生之事悉行奏聞方是乃丁士一負朕深  
恩竝不實心効力其在福建時阿附滿保黃  
國材於地方積弊多端俱行隱匿竝不陳奏  
及至江西又阿附裴率度且以布政使職掌  
之錢穀任各州縣處處虧空竟置若罔聞既  
不稽查又不揭報其扶同徇隱那移侵蝕之  
罪顯然著革職發往高其倬處或有應修城  
工或別有地方工程派伊出貲効力儻不盡  
心効力定行從重治罪俞鴻圖著革職在翰  
林院編修內行走儻三年無過准其開復至  
查嗣庭俞鴻圖名下追出收受牌坊銀兩既  
非贓銀不必入官俟江西會試舉人來京應  
試後無論中式不中式者俱按名散給○定  
湖南改歸貴州之清浪平溪二衛屬思州府  
管轄○吏部題戶部尚書蔣廷錫丁母憂請  
解任守制得旨蔣廷錫著給假數月奉母櫬

回籍喪葬事畢回京在任守制辦事○壬戌諭內閣據河道總督齊蘇勒等先後二次奏報黃河之水於上年十二月初九日漸清至十六十七十八等日湛然澄澈至二十二日止自河南虞城縣至江南桃源縣共六百餘里據總督孔毓珣奏報與齊蘇勒大畧相同據河南巡撫田文鏡奏報上年十二月初九日臣自衛輝府兌漕事竣至祥符縣渡河親見浮冰開凍之處微覺清澈隨委員查看見黃河自陝州以下東至虞城一千餘里悉皆澄清又今年正月初二初三等日委員親至河口看視尚然清澈又據初六日同知劉永錫稟報河水猶清據副總河嵇曾筠奏報與田文鏡大畧相同又據河南巡察給事中張元懷摺奏黃河之水至正月初九日尚見澄澈又據署山東巡撫塞楞額奏報十二月初九日曹縣地方忽見黃河漸清至十六七八等日澄清徹底又據四川學臣任蘭枝到京

口奏於正月初九日在潼關渡河親見河水清澈計地在陝州以上二百餘里朕將諸臣所奏合觀之時日多寡不同道里遠近亦不畫一既蒙上天恩賜嘉祥即一日二日比邑連村皆爲福應初不在時日之多寡與地方之遠近也今諸臣所奏大概相同其中微有不同者或因奏報之先後或因各處之情形或因管轄之疆界地連五省豈能一轍此亦理勢之常但事關希逢之瑞必應將如何同異之處分晰明白以爲徵信著總河副總河及河南山東山陝巡撫委員確查各據實事公同會疏陳奏不必扶同附會纖毫假借有負朕敬承天貺之至意○賑江南江寧等十九縣淮安大河二衛水災饑民○朝鮮國王李昞遣使臣表謝改正伊祖李倬被誣史書恩并獻方物得旨著將方物交內務府准作五年正貢○癸亥諭兵部水師甚屬緊要見今天津設立



水師令滿洲官兵操練學習其江寧駐防滿洲官兵亦應照天津例設立水師將鎮江水師見有船隻酌量撥給江寧將軍令其學習操練 陞湖北按察使蔡嵩爲太僕寺卿 廣東巡撫楊文乾奏請給假葬親允之調福建巡撫常賚署理廣東巡撫 工部議覆河東副總河嵇曾筠條奏河工事宜一河工埽料柳束爲重每年河水坍塌以致柳園漸少雖此坍塌淤而官無界址民多隱佔請敕撫臣將見存柳園丈勘立界清查淤地撥補還額嚴督河員廣爲栽種一印官專司民事係撫臣題授河員專司河工係河臣題授設官分職雖有定制民事河工原無歧視請令河臣撫臣會同保題陞調一豫省隄工向例撥江南河兵一千名輪班防守嗣因往返需時將兩岸堡夫挑拔五百名充代但工長汛險不敷驅策請仍照一千名之數於堡夫內拔補足額所有江南撥到千把總六員令各歸

專汛另請專設千總二員把總四員分隸開封府南岸同知管轄再於原設武陟千總二員內調取一員移駐歸德府汛所分撥河兵一百名交與該弁管領一豫省大隄每隔二里額設堡房一座令堡夫居住修墊水溝巡查鼠穴今臨河越隄堡房未設防守無人請遵照大隄之例速行建造一開封南岸祥符縣隄長八十餘里止有縣丞一員近日險汛下移祥符一帶工程更爲險要請添設主簿一員分管又開封下北河地方額設主簿一員隄埽綿長募夫辦料呼應不靈請添設巡檢二員分駐祥符儀封等縣適中之地協同廳汛搶護一切逃盜事宜令其稽察一歲搶修工程全賴汛船運料今豫省上自武陟下至虞城撥運無船不能立時接應且當汛水陡發村民迫於望救是汛船不但運料兼可濟人請查照江南汛船則例每汛造船五隻以便駕運均應如所請從之○賑江南泗州

桐城等九州縣水災饑民○旌表直隸長垣縣烈婦劉建子妻劉氏守貞拒姦忿激自縊山東曹縣烈女王宗湯女王氏拒姦不污被勒殞命各給銀建坊入祠致祭如例○甲子諭內閣三月十八日爲

皇考聖祖仁皇帝萬壽聖節舊例於是日虔誠齋肅禁止屠宰今應永遠遵行

至聖先師孔子師表萬世八月二十七日爲聖誕之期亦應虔肅致敬朕惟

君師功德恩被億載普天率土尊親之戴永永不忘而於

誕日尤當加謹以展恪恭思慕之誠非以佛誕爲比擬也著內閣九卿會同確議具奏尋議

先師聖誕應致齋一日不理刑名禁止屠宰得旨是○命加恩乾清門侍衛各按其品級增俸一倍○陞刑科給事中王肅章爲湖北按察使司按察使○戶部議覆怡親王允祥

等疏言水利營田修治如式者請交與地方官收管定其考成載入計典其畸零閒曠之地與各處河隄俱令地方官訓飭農民栽種樹木以護隄根以盡地利並將植過樹木若干冊報本管上司不時查視應如所請得旨依議修舉水利種植樹木等事原爲利濟民生必須詳諭勸導令其鼓舞從事方有裨益不得繩之以法若地方官員因關係考成督課嚴急則小民轉受其擾矣著直隸學臣轉飭教職各官切加曉諭不時勸課使小民踴躍興作若地方官員怠忽不加勸導或有逼勒過嚴者著學臣稽察奏報三路巡察御史亦著善爲勸導悉心稽察如地方官有奉行不善之處即行據實奏聞○又議覆協理河南道御史陳學海條奏直省徵收錢糧例有火耗輕重懸殊請敕下各督撫查核舊額酌定成規以便畫一遵行得旨火耗原非應有之項乃迫於時勢不能全行禁革耳故加耗

重者必重治其罪而賢員愛養斯民將舊有之數亦可輕減若一經督撫題定數目則火耗遂成定額雖遇清廉之官亦不能裁減而遇貪劣之員又將多取於此數之外以飽私索必致重累民生該御史請令督撫具題該部即照所請議覆均屬不合此處不准行○禮部題黃河澄清應遣官告祭江南清口河神并懇

御製碑文昭垂永久其武陟縣河神廟亦應一體告祭勒碑從之○理藩院議奏喀爾喀台吉塔布囊等前因擒勦吳梁海於和托輝特地方陣亡者應照例加一等世襲其官兵受傷者各按品級賞給銀兩從之○署湖廣總督福敏奏請動用耗羨銀兩修築荊州府江陵監利松滋等縣沿江隄岸得旨據福敏奏稱荊州地方沿江隄岸例係民隄民修今請動用耗羨銀兩修築令監修官防護朕思耗羨銀兩亦係小民脂膏凡地方應修工程於

民生實有裨益者即當動用帑金辦理不必取給於耗羨但此處既係民隄若修理之後即算欽工則凡遇隨時補葺之處小民不敢干涉轉致疎忽且恐頑劣之民恃有朝廷歲修之例不肯用心防護以致潰決害及廬田而民受其累此等處皆當預爲籌及荊州沿江隄岸著動用帑金遴委賢員監督修理修成之後仍算民隄令百姓加意保護隨時補葺俾得永受其益○署廣西巡撫韓良輔摺奏天河縣獄內拘禁莫東旺一名係李紱批飭枷責追贓結案之犯乃遷延一載尚未發落以致蠻獍糾集多人推倒土牆將莫東旺搶去得旨此係李紱甘汝來任內之事伊二人身爲封疆大臣此等細事不能早行完結遲延日久以致蠻獍敢於妄行有闕國體著將韓良輔奏摺發與李紱甘汝來看令二人明白回奏尋李紱甘汝來遵旨回奏得旨據李紱奏稱莫東旺一案經臣審結臣即起身

赴直隸新任其因何遲延一載尚未發落之處無由得知等語夫舊令尹之政必以告新令尹古人於罷官之後尚以國事爲念豈有李紱陞任總督不將此事明白交付接任巡撫囑其早行完結之理著將李紱甘汝來交部察議具奏○旌表山東烈婦曹州馬仲之妻郭氏痛夫身故投繯從死烈女冠縣陳煌聘妻劉氏聞夫身故矢死完貞各給銀建坊入祠致祭如例以故郭爾羅斯輔國公諾爾布子策旺扎卜襲爵○乙丑諭大學士九卿等廣東巡撫楊文乾條陳廣東事宜三件一係肇廣二府修築圍基之事據楊文乾奏稱頂冲之處必須用石工修築方能永久約計各項工程非數十萬金不可據阿克敦摺奏則云本地百姓言土隄易於修理若用石工將來民間力量不能修補轉於地方無益是以會稿時未曾列名等語據此則二人意見不同其應如何修理之處難以遙定俟孔

毓珣楊文乾到京時令九卿會同確議具奏一係廣東積貯倉穀之事據楊文乾奏稱廣東一歲所產米石即豐收之年僅足支半年有餘之食合計通省須積穀四百餘萬石等語夫本省所產之米不足供本省之食在歉年則有之若云每年如此即豐歲亦然恐無此理朕思廣東之米所以不敷廣東之用者或田疇荒廢未盡地利或興作怠惰未用人工或姦民貪得重價私賣海洋三者均未可定每年漕運進京之米亦不過三百餘萬石以廣東一省而積四百餘萬石之穀爲數太多難於查核而又當嶺南潮濕之地能保無霉爛之虞乎今廣東各屬見報存倉之穀一百六十餘萬石去冬又令廣西運穀三十萬石以備廣東之用是廣東已有穀一百九十餘萬石若此數實貯在倉則一時需用儘足支應不慮匱乏矣一係請開捐納以築圍基以備積貯之事既爲地方需米起見一開捐

納則米價反致昂貴於民不便故上年冬底  
爲廣東籌畫積貯九卿議開運穀捐監之例  
其所以令其運穀者即是此意若云開捐收  
納銀兩再委員採買於鄰省則何不動用庫  
帑採買而必廣開事例乎况廣東既有運穀  
捐監之例則將來米穀自然日益加多想揚  
文乾具本時尚未知運穀捐監之議也以上  
二事亦俟孔毓珣楊文乾到京之日九卿會  
同定議具奏至廣西撥運廣東之穀三十萬  
石仍遵前旨即速運送○刑部等衙門遵旨  
議覆太常寺卿鄒汝魯身爲大臣乃於進獻  
河清疏內故用悖逆之語顯肆譏訕請革職  
照律擬絞立決得旨鄒汝魯著革職從寬免  
死發往湖廣荊州府沿江隄岸工程處効力  
○免浙江安吉仁和等九州縣雍正四年分  
水災額賦有差○封禁雲南中甸銅礦停止  
鼓鑄錢文從總督鄂爾泰請也○丙寅諭內  
閣浙江杭嘉湖三府上年秋冬之間雨水稍

多收成畧歉今年青黃不接之時已令地方  
官商酌平糶以濟民食但念米價雖不至昂  
貴而無力窮苦之民本無糴米之資甚屬可  
憫著動用庫銀四萬兩令巡撫李衛會同將  
軍鄂彌達觀風整俗使王國棟悉心商酌於  
地方或開濬河道或修理城垣隄岸令小民  
就近傭工藉以餬口僅四萬金尚不敷用著  
李衛等再行具奏請旨○刑部遵旨議覆直  
省盜案嗣後州縣以至巡撫務嚴行究審將  
法所難宥及情有可原者一一分晰於疏內  
聲明照律不分首從擬斬立決具題大學士  
會同三法司仍照從前將應正法應減等發  
遣者分別詳議請旨其應發遣者改發內地  
三千里撥入驛站及營兵差使仍交與該管  
官員不時查點管轄毋致脫逃得旨緝盜乃  
安民之要務兇暴不翦則善良不獲寧居故  
立法不容寬貸祇因同夥多人其中原有被  
人誘脅而非秉性姦回屢行劫奪者朕仰體

聖祖仁皇帝好生之仁施恩法外必須各省督撫大吏實心奉行分晰至當使積賊大盜不至漏網方爲用法之平儻姑息養姦意謂多寬一人即可造福是乃縱盜殃民其造作罪孽更甚於嚴厲苛刻者嗣後督撫所議減等之盜犯儻至發遣之處怙惡不悛一經發覺定將原議之督撫從重議處○封哈密扎薩克達爾漢白克額敏爲鎮國公賞銀一千兩其下種地回民四百人各賞銀兩布足以口外開墾著有成效也○丁卯遣大學士富寧安祭先師孔子上謁陵是日啓行駐蹕白廟村○陞一等侍衛永壽爲孝陵總管○戊辰孝康章皇后忌辰遣官祭孝陵

上駐蹕五百戶○己巳

上駐蹕淋河○陞直隸宣化總兵官黃廷桂爲四川提督直隸山永副將李如栢爲直隸宣化總兵官○補行浙江廣東二省雍正二年分大計卓異官七員不謹官八員罷軟官五員年老官二十一員有疾官十三員才力不及官七員浮躁官一員分別陞賞處分如例○庚午

上謁

昭西陵

孝陵

孝東陵行禮舉哀旋謁

景陵遙望哭泣步至

寶城前行禮哀慟不已近侍大臣敦請再四始

回行宮是日

上回鑾駐蹕淋河○辛未

上駐蹕邦均之東○壬申

上駐蹕柳河屯○刑部議覆直隸總督今授工

部侍郎李紱疏言保定府理事同知職任繁劇請將河間府及天津州所屬十八州縣旗民大小案件改歸新設之天津州理事同知就近管轄應如所請從之○免福建連江羅源二縣雍正四年分水災額賦有差○禁止遼陽州開原縣二處金銀銅鉛等礦廠永遠不許開採從奉天將軍噶爾弼請也○河南巡撫田文鏡疏報汝州內鄉等八州縣開墾雍正三年分田地八百十九頃有奇江西巡撫邁柱疏報南昌等十五縣開墾雍正三年分田地一百五十二頃有奇湖北巡撫憲德疏報均州漢川等八州縣開墾雍正三年分田地一百三十頃有奇署廣西巡撫韓良輔疏報桂林梧州等七府開墾雍正三年分田地二十九頃有奇俱下部知之○癸酉上駐蹕姚家園諭內閣朕聞陝西鄭渠白渠龍洞向來引涇河之水溉田甚廣因歷年既久疏濬失宜龍洞與鄭白渠漸至於塞隄堰

坍塌醴泉涇陽等縣水田僅存其名深爲可惜特令該督岳鍾琪詳酌興修今據該督親勘奏稱龍洞急宜挑挖鄭白渠務當疏濬更須修築隄堰建設閘口以俾堅久已於西安布政司備公羨餘銀內先動一千兩委員將龍洞鄭白渠及時挑濬其建閘工料約估銀七千兩請亦於司庫存貯羨餘銀內動用等語朕惟興修隄堰乃於民生大有裨益之事著動用正項錢糧俟一切工程告竣造報工部查核務期渠道深通隄堰堅固俾農田得以永賴以副朕保惠元元之至意○賑江南福泉陽湖二縣水災饑民○甲戌上回宮○賑浙江平湖等三縣水災饑民○加福建興泉道巡海道銜移駐廈門改臺廈道爲臺灣道添設臺灣府通判一員駐澎湖裁澎湖巡檢一員從福建總督高其倬請也○乙亥以河清恩特命翰林院修撰編修檢討各加一級○河南巡撫田文鏡摺奏請將候

選州縣分發各省學習以裨吏治奉

上諭此議朕於踐阼之初業經思及因難以施行遂寢而未發蓋自古迄今大抵中材居多欲求出類拔萃之賢世不屢覲故理國之道貴儲材有素首先以厚風俗爲要務風俗既端斯趨向有方而人才蔚起不特科甲輩學古入官即一切旗漢人員宜無不講求經濟吏治民生豈盡茫然莫喻但恐其居心不肯恪秉公忠以奉乃職耳若慮以民社爲新進後生所嘗試之具粵稽舜典明試以功車服以庸已啓後世科資循格之端是以地方外吏全賴守封疆者激揚公正糾舉精明正所謂三載考績黜陟幽明也至云新選者少則數月多則經年安保其無害於民今學習之員不令攝事無由覈驗優劣委令署理彼僉邪小人之爲害於民又獨不然乎況督撫諸臣雖簡命自朕未必一皆公爾忘私或稍涉夤緣則大啓奔競其弊有不可勝言者不寧

惟是即朕見今用人之法亦止堪暫行一時將來自仍歸於

聖祖疇昔銓衡之成憲朕緣目擊官常懈弛吏治因循不得不大示鼓勵以振作羣工委靡之氣俟咸知奮勉治行改觀時朕另有裁處又據稱朕超擢教職爲州選舉生員爲縣雜職亦准卓異試觀如是甄拔才堪入彀者能得幾人此亦出於偶爾旁求非可永遠循行之良策所以吏兵兩部向年舊例悉仍舊貫未命更張一二間過督撫越例題請補授亦俱令聲明原委朕降特旨允行蓋有深意存焉豈俾輕紊成憲而致一代典章混淆無序哉陞湖北布政使王克莊爲太常寺卿解雲南巡撫楊名時任陞湖南布政使朱綱爲雲南巡撫調江南江蘇布政使漆紹文爲湖南布政使司布政使陞兩淮鹽運使張坦麟爲江南江蘇布政使司布政使以鑲白旗漢軍副都統黃焜爲湖北布政使司布政使



○調正紅旗漢軍副都統兼步軍總尉常在  
為鑲藍旗滿洲副都統。陞王府長史興安為  
正紅旗漢軍副都統。○丙子。陞江南安徽按  
察使祖秉圭為貴州布政使。司布政使江南  
江安督糧道馬世珩為江南安徽按察使。司  
按察使。○丁丑。江西巡撫汪滢疏言。江西地  
方舊有落地稅白潢為巡撫時將稅銀裁革  
不令商民完納。而以巡撫司道公捐銀兩代  
完。每年假造花名冊籍報部。其舊有收稅大  
使等官仍設立如前。接任巡撫王企靖裴率  
度皆照白潢之例行。應請批示遵行。得旨。國  
家經制錢糧。豈臣子可以意為增減。若江西  
此項稅銀不應徵收。則白潢應奏請於  
聖祖仁皇帝施恩豁免。若係地方應徵之項。則  
自應令商民完納。何得將公捐銀兩代商完  
課。曲市私恩。以博無知小人之稱頌。並不計  
及將來之可永行與否。且此端一開。他省督  
撫何以催辦國賦。似此飾詐沽名。豈人臣事

君之道。且江西近日叅出虧空甚多。皆由白  
潢當日徇情市恩。苟且姑容所致。至於汪滢  
身為巡撫。凡事不能據理而行。乃將白潢所  
行悖理之事。奏聞冀朕批示。朕若批令將稅  
銀豁免。則是國家之經費。

聖祖仁皇帝六十餘年所未免者。而朕安能任  
意輕免之耶。若批令仍向商民徵收。則是白  
潢已免之項。而朕復行徵收。無知愚民豈不  
歸怨於朕。若批令照白潢之例。以公捐銀兩  
代商完課。則國體何在。有此治天下之道乎。  
○署山東巡撫塞楞額疏報濟寧新城等九  
州縣開墾雍正三年分田地五十九頃有奇。  
安慶巡撫魏廷珍疏報靈璧縣開墾雍正二  
年分田地五百四十七頃有奇。俱下部知之。  
○戊寅。以廣西巡撫甘汝來為都察院左副  
都御史。實授韓良輔為廣西巡撫。○福建福  
州左翼副都統鄭繼寬休致。陞廣東雷州副  
將阿爾賽為福建福州左翼副都統。調浙江

杭州左翼漢軍副都統覺羅傳森爲浙江杭州右翼滿洲副都統陞廣東右翼總兵官雅斯哈爲浙江杭州左翼漢軍副都統○陞陝西涼州總兵官田峻爲廣西提督陝西洮岷副將袁繼蔭爲陝西涼州總兵官仍駐防哈密地方○湖廣彝陵總兵官劉業溥年老休致陞江西九江副將杜森爲湖廣彝陵總兵官○廣東高雷廉總兵官郝弘勳年老休致陞廣東南雄副將劉章爲廣東高雷廉總兵官調四川川北總兵官馬紀勳爲廣東右翼總兵官陞四川化林副將張成隆爲四川川北總兵官○四川重慶總兵官李耀年老休致陞直隸通州副將任國榮爲四川重慶總兵官○改湖南五寨司吏目爲巡檢從湖南巡撫布蘭泰等請也○工部議覆河道總督齊蘇勒疏言徐州以下黃運兩河石隄土隄綿亘數千里均宜加高培厚又月隄爲大隄藩蔽應加築者計一百十四處共需帑銀六

十八萬七千六百兩有奇應如所請得旨工程浩大齊蘇勒難於一一親身稽察著給事中黎致遠前往江南專司稽察之責凡工程錢糧與總河悉心辦理事竣來京○己卯調白都納副都統費雅思哈署船廠副都統陞黑龍江協領塔爾馬善爲白都納副都統○陞索倫總管那爾賽爲黑龍江副都統調奉天副都統額爾勤爲齊齊哈爾副都統山西右衛左翼副都統圖爾賽爲奉天副都統陞山西太原城守尉阿里哀爲山西右衛左翼副都統○予陣亡四川冕山營把總皮登榜卹賞如例○庚辰諭內閣敬覽

聖祖仁皇帝實錄內康熙五十一年五月二十日奉

旨山東人民出口種地者多至十萬有餘伊等皆朕黎庶既到口外種田生理若不容留令伊等何往但不互相對閱查明將來俱爲蒙古矣嗣後山東民人有到口外種地者該撫

查明年貌籍貫造冊移送稽查由口外回山東去者亦查明造冊移送該撫覆閱稽查則百姓不得任意往返而事亦得清楚矣朕披讀之下仰見我

皇考聖慮周詳撫民懷遠之至意此事今尚行否其直隸山西民人有往口外種地者亦照此例行否著大學士等查奏尋奏查康熙五十一年四月內曾奉

聖祖仁皇帝諭旨古北口六路種地民人酌設副將同知管理嗣經九卿議停未曾舉行至雍正元年二年三年陸續添設古北口張家口歸化城同知各一員與

聖祖當日諭旨早已符合但口外地方遼濶各該同知所轄恐有遺漏之處應令直隸山西督撫查明酌量分交管理並嚴飭三路同知各按所管地方將見在寄居民人與種地民人查明姓名籍貫造冊咨查各本籍仍令各省州縣官將所有出口種地民人記檔以備

日後查對嗣後再有出口種地之人俱著該同知一面安插一面移咨本籍查無過犯逃遁等情准其居住耕種年終造冊報部從之○辛巳以黃河澄清遣康親王崇安告祭景陵○遣官告祭江南清口河南武陟河神○甘肅巡撫石文焯奏世襲一等精奇尼哈番趙之璧應賠伊父趙弘燮贓銀並不依限交納應革去世職嚴追還項得旨趙良棟宣力疆場勞績懋著是以

聖祖仁皇帝將趙弘燮等加恩擢用畀以封疆重任乃趙弘燮深負高厚之恩居官貪劣贓私累累其名下應追各項銀兩本應將趙之璧革去世職嚴追完項但朕念趙良棟昔日功勲格外施恩及其後裔著將趙之璧從寬免革職銜其應追銀兩亦著免追留與伊等養贍以示朕優眷功臣之至意所有承追督催各官亦免查叅○以故輔國公蘇保弟誠保襲爵○壬午免江西新喻新淦二縣雍正

四年分水災額賦有差○癸未

孝昭仁皇后忌辰遣官祭

景陵 正白旗護軍統領來文緣事降調陞步

軍總尉海祐爲正白旗護軍統領○四川巡

撫馬會伯疏報成都保寧等府開墾雍正三

年分田地一百十二頃有奇下部知之○甲

申

上御經筵講畢賜大學士九卿詹事及講官等

宴○乙酉諭內閣廣西巡撫韓良輔奏稱廣

東地廣人稠專仰給於廣西之米在廣東本

處之人惟知貪財重利將地土多種龍眼甘

蔗煙葉青靛之屬以致民富而米少廣西地

瘠人稀豈能以所產供鄰省多人之販運等

語此奏與朕前旨相符可知閩廣民食之不

敷有由來矣著兩省總督巡撫等悉心勸導

俾人人知食乃民天各務本業盡力南畝不

得貪利而廢農功之大不得逐末而忘稼穡

之艱至於園圃果木之類當俟有餘地餘力

而後爲之豈可圖目前一時之利益而不籌

畫於養命之源以致緩急無所倚賴而待濟

於鄰省哉假使鄰省或亦歉收則又將何如

哉該督撫等務須諄切曉諭善爲化導俾愚

民豁然省悟踴躍趨事則地力不致虛耗而

米穀不致匱乏矣每見各省督撫大吏皆各

私其所轄之地方而於鄰省之休戚膜外視

之如高其俸則請運江南之米於福建而陳

時夏又欲留貯於江南楊文乾則欲運廣西

之米於廣東而韓良輔又欲留貯於廣西伊

等各從疆界起見甚屬褊小朕君臨萬方普

天率土皆吾赤子一省米穀不敷自然接濟

於鄰省有無相通古今之義若封疆大吏各

據本地實情奏聞則朕易於辦理儻各存偏

向本省之見不肯通融接濟則朕辦理甚難

若開捐納以積穀則地方米價必致高昂若

截漕米以濟民則天庾所關更爲緊要輟轉

思維實無善策是在凡爲督撫者體朕一視

同仁之意酌地方之緩急爲有無相通之道勿以彼此隔屬有心區別如此方不愧大臣公忠之誼而於國家懷保小民之治大有裨益也○丙戌春分朝

日於東郊遣顯親王衍潢行禮○諭內閣前鄂爾泰曾奏稱廣西泗城土司甚屬不法素爲民害請敕令廣西巡撫提督懲治朕曾降旨詢問韓良輔據韓良輔奏請欲往雲南與鄂爾泰面加商酌朕思此事甚有關係非韓良輔與鄂爾泰面議不可昨都察院奏原任廣西州判程旦控告羅文剛一案羅文剛統衆肆惡吞噬十一處村落竟敢與官兵相抗不容設立塘汛李紱身爲封疆大臣逡巡畏縮苟且彌縫但爲掩飾一時之計而於地方之利害民生之休戚毫不關心甘汝來時爲臬司亦因循怠忽不能整頓昨令廷臣詢問二人俱俯首無詞李紱甘汝來相繼爲廣西巡撫著二人前往廣西辦理土司之事從前疎

縱之兇徒羅文剛等著即交與李紱甘汝來速行擒拏不得容其免脫韓良輔前往雲南與鄂爾泰會商時著李紱一同前往將副將張傑調至省城署理廣西提督李紱一到同韓良輔即起身赴滇韓良輔起身後巡撫印務著甘汝來署理前朕准給韓良輔假期送其母櫬回籍著俟公事定議後伊酌量起身李紱甘汝來負朕擢用深恩今加寬宥容其効力贖罪務將廣西境內不法之苗夷與地方不法之姦民悉心料理俾盡革兇頑遵奉國憲以安良善以靖地方儻目前疎縱之羅文剛等不能擒獲及伊等料理土司之事虛文掩飾以卸目前之責將來仍有兇苗妄行干犯王章者定將李紱甘汝來從重治罪又如礦賊盤踞兩廣之間而兩省官員互相推諉以致宵小肆行良民時受其擾著李紱甘汝來會同阿克敦將兩省疆界一一清查分別防範管理使汛地各有專責匪類無計潛

藏不得仍前怠忽自干重罪若泗城土司怙惡不悛有應行用兵之處交與鄂爾泰調度廣西巡撫提督總兵官俱聽鄂爾泰節制○解四川按察使程如絲任陞山東鹽運使葛斗南爲四川按察使司按察使○增置貴州廣順州長寨一營設叅將一員守備一員千總二員把總四員撥大定兵五百名撫標兵一百二十名提標兵二百五十名歸該營管轄從雲貴總督鄂爾泰請也

世宗實錄卷五十四

三十一

大清世宗敬天昌運建中表正文武英明寬仁信毅大孝至誠憲皇帝實錄卷之五十三

大清世宗敬天昌運建中表正文武英明寬仁信毅大孝至誠憲皇帝實錄卷之五十四

教修

雍正五年丁未三月戊子朔諭直省督撫等

實錄卷五十四

一

向來普雄烏蒙狃苗等兇悍性成又有漢姦爲之煽惑引誘是以肆行不法且其地在深山密箐之間最爲險阻內地干法重罪之人往往逃匿其中一時難於捕緝上年冬岳鍾琪鄂爾泰奉命剿撫免苗今據奏報普雄烏蒙狃苗皆革面革心輸誠嚮化則內地犯法之人向來逃竄苗地者此時必不能隱藏又將轉徙他處爲苟活之計矣爲此密諭爾等可乘此機會設立賞格各密飭所屬文武官

弁嚴行稽查勿使匪類得以漏網倘稽查不  
慎將來發覺之後定將從前經過之處不行  
查出之地方官弁及該管上司從重治罪○  
吏部題三等精奇尼哈番三泰故銷去三次  
恩詔所得拖沙喇哈番餘三等阿思哈尼哈  
番以其親伯之孫闕保承襲從之○改陝西  
潼關衛爲潼關縣設知縣一員典史一員復  
設教諭訓導各一員從川陝總督岳鍾琪請  
也○改湖南靖州天柱營參將隸貴州提督

平定縣志

二

管轄從雲貴總督鄂爾泰署湖廣總督福敏  
等請也○庚寅諭內閣自古帝王致治誠民  
莫不以重農爲先務書陳無逸先知稼穡之  
艱難詩載豳風備敘田家之力作論語云百  
姓足君孰與不足孟子云民事不可緩也蓋  
國以民爲本民以食爲天農事者帝王所以  
承天養人久安長治之本也我國家撫綏寰  
宇

聖祖仁皇帝臨御六十餘年深仁厚澤休養生

息戶口日增生齒益繁而直省之內地不加  
廣近年以來各處皆有收成其被水歉收者  
不過州縣數處耳而米價遂覺漸貴閩廣之  
間頗有不敷之慮望濟於隣省良由地土之  
所產如舊而民間之食指愈多所入不足以  
供所出是以米少而價昂此亦理勢之必然  
者也夫米穀爲養命之寶人既賴之以生則  
當加意愛惜而不可萌輕棄之心且資之者  
衆尤當隨時撙節而不可縱口腹之欲每人  
能省一勺在我不覺其少而積少成多便可  
多養數人若人人如此則所積豈不更多所  
養豈不更衆乎養生家以食少爲要訣固所  
以頤神養和亦所以節用惜福也况脾主於  
信習慣便成自然每見食少之人其精神氣  
體未嘗不壯此顯而可見者至於各省地土  
其不可以種植五穀之處則不妨種他物以  
取利其可以種植五穀之處則當視之如寶  
勤加墾治樹藝菽粟安可舍本而逐末棄膏

腴之沃壤而變爲果木之場廢養殖之恒產以倖圖贏餘之利乎至於烟葉一種於生人日用毫無裨益而種植必擇肥饒善地尤爲妨農之甚者也小民較量錙銖但顧目前而不爲久遠之計故當圖利之時若令其舍多取寡棄重就輕必非其情之所願而地方官遽繩之以法則勢有所難行轉滋紛擾惟在良有司勤勤懇懇諄切勸諭俾小民豁然醒悟知稼穡爲身命之所關非此不能生活而其他皆不足恃則羣情踴躍不待督課而皆盡力於南畝矣朕聞江南江西湖廣粵東數省有一歲再熟之稻風土如此而仍至於乏食者是地土之力有餘而播植之功不足豈非小民習於怠惰而有司之化導者有未至邪或者曰米穀太多則價賤而難於糶賣昔人有穀賤傷農之說諺語所謂熟荒者此則不必過慮假若小民勤於耕作收穫豐盈至於價賤而難於出糶朕必多發官價以糶買

之使重農務本之良民獲利而有餘貲也朕生平愛惜米穀每食之時雖顆粒不肯拋棄以朕玉食萬方豈慮天庾之不給而所以如此撙節愛惜者實出於天性自然之敬慎竝不由於勉強且以米穀乃上天所賜以生養萬民者朕爲天下生民主惟有敬謹寶重仰冀天心默佑而賜時若歲獲有秋俾小民家有蓋藏人歌樂土朕旣爲億萬生民計不敢輕忽天貺爾等紳衿百姓獨不自爲一身一家之計乎朝夕生養之需旣受上天之賜若果加意愛惜隨時撙節則天必頻加錫賚長享盈寧之福若恣情縱欲暴殄天物則必上千天怒不蒙眷賚而水旱災祲之事皆所不免其理豈或爽哉又聞江西廣西地方竟有以米穀飼養豚豕者試思穀食之與肉食孰重孰輕孰緩孰急而乃以上天之所賜小民終歲勤苦之所獲者爲豢養



物類之用豈不干天和而輕民命乎。朕所以  
惓惓訓諭者。惟期天下之人。專務本業。以杜  
浮靡。愛惜物力。以圖久遠。共體朕敬迓天庥。  
勤恤民隱之意。則爾等家室必益。至於豐饒。  
爾等子孫必永綿其福澤。思之思之。毋忽朕  
言。著將此曉諭內外官民人等。並通行遠鄉。  
僻壤。咸使聞知。○又諭朕以今年閏月。節氣  
稍遲。二月天寒。故將會試日期。改至三月。但  
目今天氣尚覺寒冷。若再改期。又恐舉子盤  
費無多。難以久於旅食。今照舊於初八日入  
場。著曉諭各舉子。俱許攜帶手爐。以溫筆硯。  
皮衣及厚綿衣服。俱許穿進。但不得乘機懷  
挾。以滋弊端。場內茶飯。著供給官加意預備。  
朕另派大臣。照看料理。令早晚給與薑湯。并  
按名給發木炭。以資其用。○諭宗人府。廣寧  
有罪。已革退王爵。其弟廣祿人忠厚。著襲封  
和碩裕親王。○先是貴州安籠總兵官蔡成  
貴。摺奏廣西西隆州古障地方土目王尚義

等與貴州普安州捧鮮地方苗目阿九等。歷  
年互爭。至染烏舍壩。黎魯礫等寨一案。因土  
目自相讎殺。俱係外結。例無考成。是以遲延  
未結。請敕下黔粵撫臣。另委大員審辦。并請  
嗣後審理兩省交界土苗案件。敕部議定限  
期。於邊方實有裨益。奉旨發與雲貴總督鄂  
爾泰議奏。至是雲貴總督鄂爾泰覆奏。苗民  
劫奪不已。地方官姑息因循。釀成此習。其故  
多由外結。臣經將分別流土考成。使各有專  
責。不致案件遲延不結之處。具題在案。至於  
黔粵之交。原有大江爲界。祇因犬牙相錯。以  
致彼此相爭。今若劃江而理。江以南屬之粵。  
江以北屬之黔。則界限井然。防守稽察。皆易  
爲力。庶兩省之紛爭永絕矣。得旨。鄂爾泰既  
稱黔粵兩省當以大江分界。令韓良輔李紱  
前往雲南。與鄂爾泰面商苗地事宜。著將此  
事一併會同定議。其土苗爭訟案件。例由外  
結者。應如何定限之處。亦著議奏。○壬辰

上御太和殿視朝。諸王及文武陞轉各官謝恩。  
○諭兵部浙江綠旗兵丁懦弱騎射生疎。營伍不整。山陝兵丁人材壯健。弓馬嫻熟者頗多。將陝西各標營兵丁內揀選一百名移駐浙江。分撥各標教習訓練。俾浙省兵丁亦知鼓勵。於行伍大有裨益。其撥往兵丁內有人材可用。騎射嫻熟。能約束教習者。即行拔補千把總。總督岳鍾琪現在四川。兩部行文陝西提鎮將伊等標下及各營兵丁內漢仗弓馬俱好。情願攜帶家眷移駐浙江者。甘肅固原二提標各選二十名。肅州涼州寧夏西寧延綏興漢鎮標各選十名。共一百名。如無家眷隻身願往者。亦准其前往。倘兵丁內不能得願往之人。即行召募人材壯健。弓馬嫻熟。願往浙江者。以足其數。再兵丁自陝至浙路途迢遠。搬移家口費用繁多。兵丁難於措辦。係西安地方兵丁交與西安巡撫。係甘肅地方兵丁交與甘肅巡撫。酌量家口多少給與

足用盤費。務令兵丁得需實惠。但人多路遠。照管需人文職著於同知通判內選派一員。武職著於遊擊守備內選派一員。沿途督送。或一齊起程。或分數起前後起程。俟七八月間前往各兵抵浙之後。一切養贍安置之處。自有浙江巡撫提督會同料理。○左副都御史王之麟緣事降調。陞詹事府少詹事。錢以壇為都察院左副都御史。○吏部議覆廣西巡撫韓良輔疏言。廣西泗城土府同知並無職掌。請改為思恩府泗城理苗同知。專管泗城西隆西林等處苗民。餽殺搶劫之事。又太平府新改上龍下龍二土司。所屬鎮南大關係安南貢道。且水路可通內地。最為緊要。須設流官彈壓。請將太平府通判移駐上下龍地方。兼管憑祥土州等處。經理鎮南大關水陸隘口。緩輯土民。均應如所請。從之。○癸巳諭八旗都統等。兵丁等喜喪之事。俱已加恩賞給銀兩。朕思大臣官員內有家資饒裕者。

亦有家計艱窘者其於喜事尚可。若遇喪事。倉卒之間必致窘迫無措。嗣後大臣官員內。若遇喪事。有情願借銀者。著戶部借給四個。月俸祿。至下季扣除。若於未及扣除之前。有緣事革職者。除世襲官員外。仍令其賠補。如病故者。著即賞給。免令賠補。其行取戶部庫銀。恐一時不能即得。先將旗下恩賞兵丁銀兩給與。再行取戶部庫銀墊補。○以刑部尚書勵廷儀為會試正考官。都察院左都御史沈近思。吏部左侍郎史貽直為副考官。○宗人府議奏宗室海長打死家人六十八。擬枷責折贖六十八之父母。應請撤出。給與海長近族之兄伊克他哈。得旨此本內議將六十八之父母給與伊克他哈。原恐伊在本主家成讎。故撤出另給。今若給與近族之人。仍然成讎。或致苦累。著交部問六十八之父母。伊情願隨往海長族中誰家。即著撤出給與。嗣後永為定例。○戶部議覆雲貴總督鄂爾泰

疏奏雲南黑鹽井正額鹽每百觔請增新價銀四分二釐八毫。又撥給不敷課款。每鹽百觔增薪價銀二錢。應如所請。其迤東鹽價。每觔再減二釐之處。無庸議。得旨此事曾經李衛奏聞。朕令鄂爾泰復行查奏。今據鄂爾泰奏請於定額三分內。每觔再減二釐。以便商民。鄂爾泰李衛均從地方起見。其出產有舊無而可以新增者。亦有舊有而應當裁減者。若有彼此抵算之項。准其據實奏聞。則事皆核實。而督撫等亦易於辦理。倘止令其增添而不許其裁減。則殊非公平之道。而隱瞞那移之弊。且由此而生。即如貴州礦廠各處開閉不常。所收賦稅多有隱此補彼者。曾經毛文銓奏明改正。雲南自近年以來。督撫等清查鹽稅等項。約計增銀甚多。著鄂爾泰查明鹽觔內所增銀兩。核算明白。抵補減價增新之數。定議奏聞。○甲午旌表浙江德清縣烈婦蔡新蔡妻韓氏。因姑逼嫁。自縊完節。給銀

建坊入祠致祭如例○乙未諭吏部漢司官  
屢經侍班朕得認識滿司官中有不甚認識  
者嗣後凡遇御門理事之日著滿司官四員  
漢司官四員一體輪流侍班引見若有條奏  
之事即於侍班時密封具奏止許條陳一事  
不得以數事並奏如此則司官之賢否優劣  
可知矣○又諭士子讀書應試須專心講習  
方可望其成就八旗舉人生員內在護軍執  
事人行走者朕念其用度艱難恐致分心是  
以於雍正元年特加殊恩令其退回仍賞給  
錢糧養贍俾得專心讀書勉勵上進庶國家  
可收得人之益今已三年有餘其中或有年  
力衰邁及不肖之人徒領錢糧無志上進虛  
糜國帑者亦未可知若不加考課分別勤惰  
無以鼓勵人才著於會試後將八旗滿洲蒙  
古舉人生員漢軍舉人查明人數請題考試  
分別等第並驗其人品優劣具奏○調奉天  
府府尹蔡珽來京以盛京戶部侍郎王朝恩

兼理奉天府府尹事○丙申諭吏部盛京五  
部司官多係本處居住之人互相交結瞻徇  
情面欺蔽上司朕屢降諭旨不能悛改若不  
盡行調換難於整頓爾部將盛京本處之人  
現任郎中以下主事以上人員查明人數悉  
行調來以京員用其員缺著在京各部堂官  
揀選辦事中等司官爾部帶領引見補用所  
遺員缺即將盛京撤回之員補授如此則盛  
京堂官易於辦理而盛京部院積習可以悛  
改矣○刑部議覆廣東巡撫年希堯疏言原  
任崖州營遊擊劉陞貪縱不職已經叅革其  
應追贓銀悉於限內全完應照例免罪得旨  
原叅劉陞疏內有差遣兵丁勒令黎人供應  
派出工役等語朕思內地居民受地方官苛  
索便於申訴故易至於敗露若苗蠻黎獞等  
僻處外地知識庸愚倘加陵虐更可憫惻應  
嚴定處分以示懲戒不當照內地之例嗣後  
此等外地之人併改土歸流地方如該管官

員有差遣兵役騷擾逼勒等情其治罪之處當加於內地一等著九卿詳議定例具奏○

丁酉祭

歷代帝王

上親詣行禮○戊戌諭大學士九卿等朕辦理天下事務惟有物來順應初無成見成心蓋天下庶務殷繁人情詐僞變幻百出朦朧欺罔之處往往有之而一時聽從或不能不有錯悞惟知其錯悞而即爲改易不存回護之見則悞者可以不悞而是非瞭然人亦知所警懼古之聖賢不曰無過而曰改過不吝朕常以此自勉也如蔡瑛程如絲一案今日特宣諭爾等知之當日年羹堯奏請四川開設鼓鑄蔡瑛執奏以爲四川不產鉛觔及那親到彼則奏稱川省本有鉛觔而蔡瑛勒令各屬誑稱無鉛以撓公事因將鉛觔鍊就進呈似此顯係蔡瑛欺罔此時蔡瑛又有威逼知府蔣興仁自盡之事年羹堯又奏其任內劣

蹟種種是以朕將蔡瑛革職治罪及蔡瑛到京而年羹堯諸事敗露朕召蔡瑛入見伊歷陳已之枉屈及平日抗拒年羹堯以致被謗之處并年羹堯貪酷殘暴各款朕觀其爲人聽其言論似乎尚屬和平不應有逼死屬員之事是以宥其罪而用之伊在朕前奏稱程如絲爲四川第一好官因得罪年羹堯是以誣叅必欲致之死地今今年羹堯審訊必加以重刑則程如絲身命莫保等語朕以年羹堯素性殘虐蔡瑛之言似乎確實因降旨令石文焯秉公審理及石文焯審奏年羹堯所叅程如絲興販私鹽放鎗殺人之處實係寬抑朕因蔡瑛力言程如絲居官甚優是以用爲四川按察使以觀其後效然其中虛實眞僞朕究未釋然於中數年以來未嘗不時時留心訪察也前者檢閱汪景祺記載程如絲貪橫一條云程如絲重賄蔡瑛調補夔州知府程如絲至夔凡商家所有之鹽盡以半價

強買之私鹽船自夔至楚者官素不甚禁以活窮民程如絲悉奪之私鹽船過夔程如絲遣人籍其鹽私商不服程如絲集吏人鄉勇獵戶汎兵幾千人往捕治之烏鎗弓矢競發私商與捕人死者枕藉商人過客斃者無算蔡珽庇之不上聞湖督楊宗仁受客商呈詞欲入告程如絲指稱是年大將軍意楊督竟寢其事年公聞之遂具題劾奉旨革職拏問蔡珽入覲力言程如絲爲天下第一清官上將大用之今此案令西安巡撫石文焯秉公確審石欲脫程罪且議復其官以合聖意嗚呼浙撫黃叔琳以置土豪賀茂芳於死遂革職問罪乃知府殺人不計其數而反無過乎汪景祺記載之言如此伊乃年羹堯門下走狗其言何足爲據且謂石文焯出脫程如絲之罪乃迎合朕意此語更屬悖謬朕本無意石文焯何從迎合若云朕有所庇護則年羹堯乃朕當時藩邸舊人多年効力朕不

庇護年羹堯而乃庇護素不識認之程如絲乎卽如黃叔琳深受朕恩由太常卿歷陞巡撫極蒙委任優眷朕不庇護黃叔琳而乃庇護一海寧無賴之光棍乎朕之賞罰悉本至公無一毫偏向之處而石文焯之開脫程如絲或別有因今觀蔡珽革率放縱徇私妄爲則偏向程如絲顛倒是非乃伊之實情而其所以行背理之事較甚於此者更難悉數孔子曰君子不以人廢言汪景祺雖犯重罪身正典刑然其言未必字字皆虛今伊既有程如絲枉殺多人之語則外間爲此語者必不止於汪景祺一人此處甚有關於國家之政事必須究問明白得其實情始足以清吏治而肅官方剖是非而除壅蔽程如絲興販私鹽放鎗殺人一案著侍郎黃炳前往四川會同岳鍾琪馬會伯及湖北巡撫憲德逐一明白審理從前被程如絲之害者多係湖廣之人著憲德一一查出帶往四川質審再此案內

有應行質審之人俱聽黃炳等行文調取質審目今岳鍾琪現在四川著行文令伊暫留川省辦理此事蔡珽候刑部案件質問後即發往四川石文焯亦著前往四川於黃炳等會審時令蔡珽石文焯二人在傍觀看○陞三等侍衛戴豪為鑲白旗漢軍副都統○己亥

上親耕耤田詣

先農壇致祭畢更服至耕所仍行四推禮畢

上御觀耕臺命莊親王允祿怡親王允祥信郡王德昭行五推禮吏部尚書查弼納戶部左侍郎常壽禮部左侍郎三泰兵部右侍郎黃國材刑部左侍郎海壽工部右侍郎哲先都察院左僉都御史王廷揚通政使司通政使孫卓大理寺少卿薩齊庫行九推禮各以次耕如儀

上御齋宮順天府官員率耆老農夫行禮畢至耕耤所農夫終畝

上諭諸王大臣曰昨日天陰今日乃如此清明四年以來耕耤之日皆如此禮部原擬二月二十九日行耕耤禮朕改於今日不謂二十九日天氣風寒而今日則甚和霽也諸王大臣等奏曰

皇上凡舉行大禮之日天氣定然晴霽臣等以為可預必之事矣王以下各官行慶賀禮賜茶停止筵宴○庚子定鴻臚寺衙門仍屬禮部統轄○辛丑清明節遣官祭

永陵

福陵

昭陵

昭西陵

孝陵

孝東陵

上命

皇四子弘曆祭

景陵○理藩院遵旨議覆朝正外藩四十八旗



王台吉等嗣後應分爲三班。每隔二年來朝一次。從之。○兵部議覆福建總督高其倬疏言。閩省福興漳泉汀五府地狹人稠。自平定臺灣以來。生齒日增。本地所產不敷食用。惟開洋一途藉貿易之贏餘佐耕耘之不足。貧富均有裨益。從前暫議禁止。或慮盜米出洋。查外國皆產米之地。不藉資於中國。且洋盜多在沿海直洋。而商船皆在橫洋道路。並不相同。又慮有逗漏消息之處。現今外國之船許至中國廣東之船許至外國。彼來此往。歷年守法安靜。又慮有私販船料之事。外國船大中國船小。所有板片桅柁不足資彼處之用。應請復開洋禁。以惠商民。并令出洋之船酌量帶米回閩。實爲便益。應如所請。令該督詳立規條。嚴加防範。從之。○壬寅。

上詣

恩佑寺行禮畢。幸圓明園。○兵部議覆貴州巡撫何世璽疏言。安順府鎮寧州屬康佐司土

官薛世乾以罪革職。伊子幼穉無知。不能承襲。請將康佐司地方改歸鎮寧州管轄。應如所請。從之。○旌表河南烈婦杞縣劉世祥妻高氏。夫亡守義。即日投繯。夏邑縣張方夔妻王氏。夫故絕粒。踰旬殞命。各給銀建坊。入祠致祭。如例。○癸卯。署湖廣總督福敏摺奏。臣奉命至楚任事之後。即查衙門從前陋規。盡已革除。惟武昌廠稅一項。每年約計贏餘六七千。或七八千不等。又鹽商未裁禮銀四千兩。前任督臣楊宗仁留此爲總督養廉之用。臣非敢矯廉干譽。緣受恩深重。自奉過厚。踰蹈難安。除一切用度外。計餘銀四千兩。今因饑民停賑。恐青黃不接。易致乏食。即以存銀買米散賑。用廣

皇仁。至兩省刑名錢穀事務殷繁。必須幕賓相助辦理。所需修金等項。臣俱於歲底將支用存貯細數另行奏聞。奉

上諭。此事汝不必矯廉。汝係暫時署理。若令後



任難乎爲繼亦非情理之平。督撫衙門養廉自當酌定數目。朕豈有令汝等枵腹從事之理。况一切賞犒兵弁。延納幕賓之需。有斷不可省者。山西陝西河南督撫養廉朕皆許以三萬金。因楚省何項可作督撫養廉。朕未周知。難以批諭耳。汝膺署理之任。正可一秉公恕。斟酌允當之數。隨便附奏。○甲辰刑部等衙門議覆川陝總督岳鍾琪疏言趙智因被胞兄趙宗痛毆。情急回擊。中趙宗要害。殞命。趙智應改爲擬斬監候。得旨弟毆兄死。乃人倫風化所關。法無可貸。但因其中畧有可原之情。故交與九卿。令其再三酌議。衆論僉同。然後改爲監候。以姑緩其誅。此不過數十案件之中。間一從寬之事也。昨李紱審擬楊四毆死馬順一案。竟以楊四護父。強引鄭雄護母之例。欲寬其罪。夫殺人者死。律有明條。大臣惟有按律定擬。以待朕之酌量。若似李紱之枉法市恩。徇私要譽。則是朕之法外施仁。

偶然原情寬宥之處。臣工皆強爲比照。題請以濟其私。而用法多不得其平。內外臣工當以爲戒。○命八旗每佐領添設副佐領一員。協同辦事。○吏部右侍郎王沛懷以老病乞休。命加都察院左都御史銜致仕。○旌表山東高唐州烈女姚仔聘妻張氏。遇暴不污。被刃殞命。給銀建坊。入祠致祭。如例。○乙巳。

上詣

恩佑寺行禮。○丙午鄂羅斯察罕汗遣使臣薩瓦表賀登極進貢方物。賞賚如例。○丁未諭內閣向來督撫提鎮陳奏本章例有副本投遞通政司衙門。又有揭帖知會關涉之各部院。往往緊要之事未達朕前。而先已傳播於衆口。又如內外咨呈文書往來該衙門尤易疎忽。以致匪類探聽多生弊端。間有緝拏之犯聞風遠颺。遂致漏網。此皆不慎之故。貽誤匪輕。嗣後一切本章以及咨呈文書除平常通行事件外。其有關涉緊要之案與緝拏人

犯之處內外各衙門應密封投遞各該管官應謹慎辦理以防漏洩倘有疎忽將來事發之日究問根由必將漏洩之人及該管官員從重治罪○諭吏部會試舉人著兩部揀選引見併問九卿將所知者舉出再舉人內有伊等同鄉素日推服之人亦著舉人公舉或數人共舉一人或十數人共舉一人俱將姓名註明務須有猷有爲有守之人方可推薦不得冒濫○授故奉恩將軍安圖子阿爾寧爲奉恩將軍○戊申吏部議覆雲貴總督鄧爾泰疏言自湖廣改歸貴州之五開銅鼓二衛先經督臣高其倬奏請將五開衛改爲一縣兼管銅鼓衛地方令黎平府統轄奉旨允行臣細加訪察必須五開銅鼓分設二縣始於地方有益請添設知縣各一員典史各一員五開衛向無學校今請添設教諭訓導各一員銅鼓衛向設教授一員訓導一員今請將教授一員即改爲教諭其歲科二試取進

文武童生各如舊額均應如所請從之○旌表福建烈女永福縣方氏晉江縣徐氏俱未婚夫故自縊完貞各給銀建坊入祠致祭如例○己酉吏部議覆雲貴總督鄧爾泰疏言貴州銅仁府屬平頭司省溪司思南府屬沿河司訓溪司黎平府屬潭溪司八舟司龍里司歐陽司新化司洪州司原設吏目各一員稽察土司今請並加州同職銜重其職守以便就近彈壓應如所請從之○予故領侍衛內大臣馬武祭葬諡勤恪○旌表直隸成安縣烈婦苑成維妻池氏拒姦不污投井殞命給銀建坊入祠致祭如例○庚戌以康親王崇安兼理正紅旗漢軍都統事務○調兵部左侍郎嵇曾筠爲吏部右侍郎仍留河東副總河任轉兵部右侍郎楊汝穀爲左侍郎陞內閣學士胡煦爲兵部右侍郎○管理旗務王大臣等議覆副都統博第奏言旗下襲職向於缺出後方行傳集衆領佐領驍騎校領

催族長等取具家譜其所送家譜旗下無憑查對不無遺漏錯誤請嗣後凡係世職家譜預取保結校對鈐印存貯本旗衙門遇有世職缺出查對明晰奏請承襲從之○辛亥禮部奏會試舉人叨荷特恩合詞陳謝得旨朕視天下萬民皆爲一體況讀書鄉薦之人異日俱可作朕股肱耳目是以朕心待之實有一體聯屬之意愛養培護皆出於中心之自然竝非欲邀天下士子之感頌也今舉子等以會試叨荷特恩合詞陳謝是尚不能深悉朕一體相關之意而存上下彼此之形跡矣朕待天下惟有一誠而崇儒重道之心尤爲篤切但所崇者皆真儒所重者皆正道若徒尚虛文邀取名譽致貽世道人心之害朕不忍爲也爾等讀書之人實四民之所觀瞻風俗之所維繫果能誦法聖賢躬修實踐宅心正直行己端方則通籍於朝必能爲國家宣猷樹績膺棟梁之選卽退處鄉閭亦必能教

孝勸忠爲衆人之坊表故士習既端而人心尚有不正風俗尚有不淳者無是理也爾等既感朕恩卽當仰體朕心恪遵朕訓爭自濯磨或出或處皆端人正士爲國家所倚賴如此方爲實心報効不在感恩奏謝之儀文也○壬子戶部議覆署湖廣總督福敏等疏稱大江以南皆係財賦重地獨至米穀則江浙等省每賴湖廣接濟苟倉庾所積充足有餘不但本省無憂乏食卽江浙等省或有歉收可以撥運平糶順流直下誠甚便也今湖北湖南現存常平倉穀麥及截留漕米等項統計止有五十餘萬石視他省積貯較少臣等公同籌畫須每年買穀數十萬石分貯各倉以備不時之需查楚省向有各衙門鹽規銀十六萬兩經前督臣楊宗仁裁革迨楊宗仁故後各衙門仍復明裁暗收臣蒙皇上高厚隆恩萬無收受絲毫之理而觀感之下各衙門自不敢收受以此項銀兩買貯穀

石自可備用。再查江浙二省。現開事例。捐納貢監。以裕積貯。請令湖廣照例開捐。著各府知府收捐本色實貯在府倉廩。以便盤查。則湖廣積貯充裕。不惟本省足食。且東南各省便於撥運。平糶賑恤黎民。大有裨益。均應如所請。從之。○添設安徽江安糧道庫大使一員。從安徽布政使覺羅石麟請也。○移福建臺灣淡水營守備千總把總駐八里坌地方。從福建總督高其倬請也。○阿霸垓達爾漢貝子策伶東洛卜故遣官致祭。○癸丑諭吏部兵部刑部。盛京人員習氣澆薄。營謀鑽刺。朋比侵盜。甚是無恥。屢加教誡。終不悛改。皆緣犯法叅革。究治之後。仍在本地居住。往往生事滋擾。誘人爲非。無所不至。此等敗類。若不即令遷移。望風俗之歸於淳厚。終不可得。嗣後盛京居住滿洲蒙古漢軍文武官員。除因公註誤獲罪者。仍准本地方居住外。其犯侵盜虧欠錢糧。及姦貪訛詐之事。降革者。酌

其所犯事由。或令來京歸旗。或著於各省滿洲駐防之處安插。如此。則不肖之徒漸少。而盛京澆薄之習可息。爾三部嗣後凡遇盛京人員犯罪案件。俱照此定擬。仍將從前盛京旗員所犯侵盜錢糧姦貪訛詐等案內廢員。查明奏聞。○兵部議覆署湖廣總督福敏疏言。岳州府屬茅岡安撫司土官覃純一擒解姦匪。實屬奉法盡職。請加恩議敘。應如所請。照廣西安平土知州李肇之例。賞給朝衣一襲。得旨。李肇身爲土司。養民薄賦。乃其常職。今覃純一擒解姦匪。非循分盡職者可比。宜加等議敘。以示鼓勵。嗣後土司効力者。應酌量功績之大小。分別等差。加以恩典。著該部定議具奏。尋議覃純一應照內地文武官員拏獲隣境盜首之例。加一級紀錄一次。嗣後各省土司有拏獲姦匪者。亦照此例立有軍功。及奉法稱職者。照原題分別議敘。層次加銜。賞給朝衣。庶各省土司益知鼓勵。從之。

賞給會試下第舉子路費銀各五兩○旌表江西烈婦廬陵縣羅欽若妻李氏遇寇不辱赴水捐軀李向榮妻張氏抗賊不污冒刃殞命瑞金縣毛冠易妻廖氏因姑逼嫁飲藥完貞各給銀建坊入祠致祭如例○甲寅戶部議覆署江西巡撫邁柱疏言江西錢糧請照直隸山東等省之例將丁銀攤入地銀其各衛所屯丁銀攤入屯糧分派帶徵爲數無多兵民俱有裨益應如所請從之○兵部議覆雲貴總督鄂爾泰疏奏經理犮苗事宜一長寨等犮苗不遵化誨阻建營房調兵進剿首惡悉經擒獲其未獲人犯有自行投首及脅從附和者請一概從寬一苗民被剿四散已失耕種之期本年正賦請行豁免一歸寨苗民每人請月給糧三斗鹽六兩無力耕種者給以籽種以示撫恤其未歸寨者以一月爲限如逾限不回將該苗田土分賞兵丁一苗民地畝多恃強侵佔以致互相讎殺應令各

具契紙開明四至官給印信俾永遠承業一犮苗姓氏相同者多難於分別應令各照祖姓造報戶口清冊編立保甲其不知本姓者代爲立姓以便稽察一苗民逞兇皆由兵器嗣後苗民出入止許佩數寸小刀所有一切軍器悉令繳出如有私造者即行處決一營汛兵丁不得踐踏禾苗生事擾害如該汛文武官弁不加鈐束照溺職例治罪一長寨既有武職巡防仍須設一文員宣諭化導請以貴陽府同知移駐就近撫綏庶兵民咸得相安一打壤寨接連竹林井口允苗出沒其中應撥長寨把總一員移駐則竹林等寨俱得控制一允苗劫殺原非三五塘兵所能擒獲應令汛防各員一面申報督撫提鎮一面率兵擒拏所獲賊犯文武官會同審究無得袒庇徇私均應如所請從之○以故一等精奇尼哈番左世永子左洪瑞襲職○予故太子少傅文淵閣大學士兼禮部尚書高其位祭

葬謚文恪○乙卯兵部議覆山西太原總兵官袁立相疏言代州營向設千總一員守兵一百九十名馬一百五十九匹止備遞送京報文書並無緊要差遣請量留兵一百四十名專管塘務餘兵五十名馬一百五十九匹俱行裁汰應如所請從之○丙辰工部議覆河道總督齊蘇勒疏言黃河大溜頂衝之處請將陡岸削成斜坡令水隨坡溜再取密葉大柳懸於坡上以抵其溜之汕刷紓其力之猛烈久之大溜漸歸中泓而柳枝之上霜掛泥滓悉成沙灘易險爲平工不勞而費甚省并請凡河崖陡峻之處俱照此例行所需工費入搶修案內題銷應如所請從之

大清世宗敬天昌運建中表正文武英明寬仁信毅大孝至誠憲皇帝實錄卷之五十四

大清世宗敬天昌運建中表正文武英明寬仁  
信毅大孝至誠憲皇帝實錄卷之五十五

監修總裁官光祿大夫經筵講官太僕議政左侍郎和碩大學士兼兵部尚書總理兵部事務三等伯加十五級臣鄂爾泰

總裁官光祿大夫經筵日講官起居注太僕保和碩大學士兼戶部尚書領侍衛內大臣武英殿大學士兼工部尚書內閣學士

事等伯加十五級臣張廷玉光祿大夫經筵日講官起居注太僕議政大臣武英殿大學士兼工部尚書內閣學士

欽定官修書院事加二級臣孫毓汶光祿大夫經筵講官太子太傅兼領太僕議政大臣武英殿大學士兼禮部尚書領侍衛內大臣

經筵講官議政大臣協辦內閣大學士事務禮部尚書仍兼官太常寺鴻臚寺事加三級臣等奉

敕修

雍正五年丁未閏三月丁巳朔諭吏部朕日

理萬幾惟欲周知庶務通達下情是以廣開  
言路令人條奏事件冀於政治有所裨益近  
見條陳人員內頗有能據實陳奏不避嫌怨  
切中情弊者朕思此等之人其言既可採錄  
則其善亦不可泯嗣後凡內外大小引見人  
員如有條奏發交廷議允行者著該部記明  
檔冊其人日後或被堂官叅劾或被督撫糾  
叅該部議處覆本之時將該員某年條奏某  
事曾經允行之處寫簽夾於本內進呈以便

斟酌其事之輕重量與寬減則國家政治既  
得條奏之益而其人亦深受敢言之效庶可  
共加勗勵也 諭八旗大臣等旗人犯罪革  
退官兵在京閒住竝無恒業倚靠親戚爲生  
以致良善之人被累伊等無事遊手好閒自  
必爲非作惡將此等之人查出令於京城附  
近直隸地方耕種井田其作何安置之處爾  
等會議具奏尋議八旗另戶滿洲蒙古內因  
拖欠錢糧竝爲非犯法革退之官兵無產業  
可依者請俱查明連妻子發往井田每戶給  
地三十畝每五戶給牛三隻其製辦農具籽  
種竝半年口糧每戶給銀十五兩交與管理  
井田官員照伊人口多寡給與土房居住如  
有約束不嚴生事擾害等弊將該管官從重  
治罪得旨依議井田地方著添設驍騎校四  
員領催八名其俸祿錢糧陞轉之處照京城  
驍騎校領催之例行如有已經陞轉仍願在  
彼効力者即帶所陞品級在彼居住 戊午

湖南巡撫布蘭泰摺奏開礦事宜奉

上諭。開採一事。目前不無小利。人聚衆多。爲害甚鉅。從來礦徒。率皆五方匪類。烏合於深山窮谷之中。逐此末利。今聚之甚易。將來散之甚難也。至於利之在公在私。尚屬細事。爾果欲効忠。蓋何必諄諄以利爲言。豈不聞有一利必有一害。要當權其利與害之輕重大小而行之耳。添設盛京戶部。刑部。工部。漢郎中各一員。員外郎各一員。主事各一員。從監察御史傅色納請也。己未。以正白旗滿洲副都統岳爾岱。署刑部侍郎事。辛酉。諸王大臣等奏。原任兵部尚書法海。從前阿附允禩。極力鑽營。擅自回京。行止狂妄。應按律擬斬。得旨。法海原係革職。發往軍前効力之人。伊到軍前。竝無出力之處。惟極力鑽營。阿附允禩。自謂有所依庇。輒敢擅自回京。又有種種不法之處。本應按律治罪。今從寬免死。著發往插漢拖輝。交與通智單疇書管轄。聽

其差委。在水利處効力行走。一切事宜。毋許干預。若果實心効力。則已。如仍不實心効力。狂妄虛詐。著通智單疇書即行參奏。○癸亥。聖祖榮妃薨逝。

上降旨。親往祭奠。諸王大臣合詞陳奏。請照從前裕親王母妃薨逝之例。停止親往。

上命莊親王允祿。公馬爾賽。一等公舅舅白啟。

率侍衛二十員往奠。吏部議覆。川陝總督

岳鍾琪疏言。烏蒙土知府祿萬鍾。奉旨革職。

提至川省質審。烏蒙沿途土民。俱各投順。惟

白女底祿未申。二人率所屬苗衆。截路拒敵。

被官兵勦擊。旋亦投誠歸附。白女底祿未申

應行提究。烏蒙人民。久爲土酋殘虐。應請改

土歸流。以甦邊氓積困。查所參烏蒙各案。現

在雲南。應行令該督。將祿萬鍾等各犯解送

雲南質審。其烏蒙改土歸流之處。候旨遵行。

得旨。征勦烏蒙。搗其巢穴。係雲南官兵奮勇

總督鄂爾泰調度之功。然非川陝總督岳鍾



琪將冕山凉山不法番夷悉行勦撫去其犄角之勢則雲南官兵亦不能成功如此之速白女底祿未申敢於抗拒官兵甚屬可惡鄂爾泰屢次遣祿鼎坤招撫祿萬鍾而祿萬鍾不肯就撫及至勢窮力竭又至岳鍾琪軍前投到欲以巧脫重罪甚屬狡詐部議將祿萬鍾解往雲南質審甚是白女底祿未申擒獲之時亦著解往雲南質審餘依議○又議覆川陝總督岳鍾琪疏言鎮雄土知府隴慶侯穉弱無知不能約束土目懇請改土歸流適准雲貴督臣鄂爾泰咨稱隴慶侯向與祿萬鍾勾通作惡今復唆使逃匿抗拒官兵法所難寬等語查鎮雄土府界連黔蜀二省應行令該督將隴慶侯解赴雲南質審其應否改設流官歸併何省管轄亦令會同雲貴總督鄂爾泰妥議再奏得旨隴慶侯著解送雲南審明其鎮雄地方改土爲流歸併雲南就近管轄○旌表烈婦江南潁州呂明海妻霍氏

山西長治縣宋敬臣妻田氏俱拒姦不污被刃殞命各給銀建坊入祠致祭如例○甲子改廣西泗城土府及三江地方上林安隆二營俱歸泗城副將管轄從陞任廣西巡撫李紱請也○乙丑吏部遵旨會同九卿揀選下第舉人引見上命分發各直省以州縣委署試用諭曰守令乃親民之官關係百姓之休戚故得其人則民生被澤而風俗日淳不得其人則民生受累而風俗日薄自古安民必先察吏此不易之經也朕御極以來夙夜孜孜欲使薄海之內無一夫不獲其所而此願一時難遂者則以縣令之不能盡得其人也果能得有猷有爲有守之人布散各省分膺民社之寄彼一人之精神力量足以貫注乎一邑凡督撫大吏耳目心思之所不能徧及者縣令皆能體察經理之則民生安得不厚風俗安得不淳而朕心無一夫不獲之願於是乎可遂矣向

來各省縣令多循資按次照例選用之員故其中庸碌無能者有之年力衰憊者有之少不更事者有之以致苟且因循貪位竊祿諸事闕冗職掌廢弛此等之人尚不能顧一身之考成豈能爲地方之憑藉乎今因會試後天下舉子齊集京師朕思其中必有才品兼優之士是以特加遴選畀以縣令之任朕之所望於爾等者不僅在於辦理刑名徵收賦稅了簿書期會之責而已必須實盡父母斯民之道視衆庶爲一體剛柔相濟教養兼施化澆薄而爲醇良懲僉邪以安善類古稱愛民如子此語最宜體會父母愛子之心未有不教之以正者縣令果視民如子豈有優柔貽害姑息養姦行婦人之仁忘聖賢之義而可謂之洞廉保赤者乎書經曰罔違道以干百姓之譽自古聖賢爲治皆尚實政最惡虛名若時存沽名市惠之心必至爲同流合污之鄉愿又何能爲整綱飭紀之良吏乎從來

父子之間施者不以爲恩受者并忘其感守令之於民果能潛移默化使閭閻習爲固然而氓其感頌之迹斯不愧父母之稱而媲美古之循良矣紳士居鄉儻有違理肆行之處令有司約束勸導之者無非欲其同歸於善竝非令地方官有意摧折之也爾等蒞任後於紳士之品行端方者則當加意敬禮以樹四民之坊表其小有過愆者則勸戒之令其悛改其不可覺悟不可寬宥者則置之於法以警其餘如此則賞罰公明輿情悅服而觀感興起比戶可封矣爾等身叨鄉薦皆以古之孝廉相比擬何以克副此孝廉二字且現經下第選期尚遠朕破格遴選授以官職卽論感恩圖報之常情亦當人人自奮況朕心實仗爾等爲朕教養斯民移風易俗以成一道同風之盛爾等豈可薄待其身而爲陋習所漸染私欲所牽制乎爾等果能卓然自立不負選用朕自格外加恩儻拜命之初一時

感激而莅官以後頓改初心則不但國典王章無可寬貸即清夜靜思亦應無地自容矣勉之勉之○緩徵湖廣江夏沔陽等十七州縣衛雍正四年分及本年額賦○丙寅諭內閣凡州縣錢糧之虧空總不出侵欺那移二項當其侵那之時官固主之而經手之經承自無不知也乃不行稟阻且從而徇隱之以便作姦分肥迨至本官監追而經承且優游於事外本官問重罪而經承僅得不行稟阻之處分故凡虧空累累多由於官吏之相成也朕以爲經承庫吏經管倉庫之人亦宜重其處分之例更定以勸懲之法凡州縣官到任先揀選殷實老成胥吏二人充錢糧總吏通詳報部凡徵收錢糧即令隨徵報解不得存留內署承辦五年該縣無虧空者即將總吏咨部以九品雜職即用本官少有虧空該總吏力行稟阻如不聽從許徑赴司院呈明免罪若該吏不行稟阻致本官以虧空糾察

即將經承一同監追減本官一等治罪如此則經承有所勸懲不敢順從本官擅動國帑亦杜絕虧空之一法也○又諭據江西巡撫邁柱奏稱江西存倉穀石向係二錢一石折價存留各縣價銀二錢買穀一石實屬不敷等語朕思離任官員交代之際竝無穀石存倉而以二錢一石之賤價交與接任之員接任之員力難賠墊以致穀石空虛弊端種種國帑民生均受其累此皆裴率度及歷任布政使等徇情市惠強令接任官員收受之故著將江西通省折價銀兩交與裴率度及歷任布政使作速照數買穀還倉不得借端絲毫派累小民再直隸各省倉穀若有前任官折價存庫者不許新任官接受交代仍令前任官買穀交倉不許顆粒短少其該管督撫上司亦不得徇情寬縱儻敢故違定將本官及該管官分別從重治罪永著爲例○禮部議覆河南巡撫田文鏡疏言捐納貢監歸併

學臣與生員一體約束應如所請嗣後貢監犯事褫革行令督撫移咨學臣得旨該撫疏稱捐納貢監平日學臣毫無約束之權且與文武生員歸併學臣約束之例亦不畫一等語今部議貢監褫革者令地方官申報督撫移咨學臣一面褫革一面報部此議尚未周備捐納貢監既令學臣約束若必俟督撫移咨學臣則學臣仍無約束之權嗣後有應行褫革者令地方官申報督撫學臣其事屬督撫者准督撫移咨學臣其事屬學臣者准學臣移咨督撫如此始為周備○旌表江南宿遷縣烈婦周玉妻沙氏拒姦不污投繯殞命給銀建坊入祠致祭如例○丁卯諭大學士等從前奉天將軍噶爾弼奏盛京海洋應添設水師營分佈三處至鳳凰城訖於海塘議政大臣已經議准續據奉天府尹尹泰奏稱自山海關迤南錦州復州蓋州地方海洋係進登州之海口不比大海旅順口關現有水

師營今天津又設水師營此二營水師儘可輪班巡察若又添設水師營將來製造船隻修蓋營房以及兵餉等項所需錢糧浩繁究於巡察無益等語經議政大臣議令噶爾弼尹泰會同畫一定議具奏今噶爾弼尹泰仍各執己見具題朕意以尹泰所奏為是如添設水師營果於巡察有益即多費錢糧亦應舉行今既無益又何用添設從前朕降諭旨將盛京穀石由海用船運至天津盛京大臣奏稱盛京所有船隻難以海運穀石看來盛京所有船隻未必照數全備水手未必熟練著將朕旨曉諭議政王大臣此原係議政所議之事著再會議具奏尋議盛京添設水師營實屬無益應如尹泰所奏停止從之○戊辰陞署直隸總督宜兆熊為吏部尚書仍署直隸總督○命署湖廣總督福敏回京陞署江西巡撫邁柱為湖廣總督○兵部奏浙江武舉會試應照文舉人例停止得旨士習澆

滿不干武途。况浙省文有餘而武不及。毫無不便之處。武科著照舊會試。○己巳陞巡察湖廣御史趙城爲湖南布政使司布政使。○辛未諭河南巡撫田文鏡。向來河南有老爪賊爲害行旅。近見該省屢有圖財害命。不知兇犯姓名之案。或係老爪賊潛匿傷人。亦未可定。著該撫設法緝拏。務除匪類。毋致拖累無辜。○兵部議覆署理湖廣總督福敏條奏防範苗疆事宜五款。一嚴禁苗民互爲婚姻。一嚴禁姦民與苗借債鬻產。一嚴禁姦民勾引兇苗掘人塚墓。掠人牛畜。爲已報讎洩忿。一兇苗拒捕。責令營弁協拏。禁止苗民毋得私藏軍器。販賣火藥。一兇苗越界搶掠。責令鄰省文武官弁協力捕緝。俱應如所請。從之。○壬申。

上詣

恩佑寺行禮。○以翰林院侍讀學士沈翼機侍讀康五瑞司經局洗馬王蓼俱署日講起居

注官。○癸酉諭內務府。來京考試舉子。朕加恩體恤。屢諭崇文門監督不必查其行李。致滋勒索。但恐巡役人等未必奉行盡善。且恐日久弊生。或有不肖之徒假冒舉子名色夾帶貨物。亦未可定。爾等可於蘆溝橋查稅之所設立店房。務期寬展。可容多人。令舉子等即於店內安放行李。其有無應行上稅之項。爾等著人查看。看畢給與照票。令其入城。廣寧門不必重查。如此則舉子行裝不致狼藉。亦可免宵小假冒之弊矣。○鑲黃旗領侍衛內大臣伍格。年老休致。以散秩大臣公豐盛額爲鑲黃旗領侍衛內大臣。散秩大臣拉歆署正白旗領侍衛內大臣。○刑部遵旨議覆。監禁人犯因獄卒凌虐致斃。司獄官知而不舉者。仍照律治罪。其不因獄卒凌虐而病斃者。向例不分本犯情罪輕重。一例處分。誠爲未協。嗣後應將死罪軍流及杖徒以下人犯。分爲三等。按監斃人數分別議處。徒罪以下

人犯在監患病應行保釋調治再督撫題報監斃人犯務將所犯罪名所患病症有無凌虐竝輕罪人犯曾否保釋緣由逐一聲明如有朦混一併議處從之○雲貴總督鄂爾泰疏報四川烏蒙土府祿萬鍾縱容土目劫掠良民經陝西督臣岳鍾琪題叅革職奉旨命臣會審臣前赴東川有烏蒙祿鼎坤率二子投到臣遣其持檄往諭祿萬鍾等繳印就質乃祿萬鍾支吾違抗至再至三而鎮雄土府隴慶侯向與萬鍾同惡相濟合謀拒命叛逆顯然臣咨商陝西督臣岳鍾琪調遣將士分路擒勦萬鍾見勢危急擁兵逃往鎮雄臣檄曲尋總兵官劉起元率領官兵攻其閭江三灣諸險寨所向摧破兩酋計窮勢迫萬鍾等由筠連地方潛往川省遇川省守備胡璉解送成都隴慶侯等赴川省副將張玉行營繳印獻土今烏蒙鎮雄兩土府俱已平定現在量留官兵彈壓一面委員查勘界址并戶口

錢糧實數以便改土歸流其兩府設官安營事宜及應歸何省管轄之處聽陝西督臣岳鍾琪詳議請旨得旨祿萬鍾隴慶侯等已有旨解雲南質審鄂爾泰辦理甚屬可嘉著議敘其在事人員著查明分別議敘賞賚○復設河南河北守道一員駐劄武陟統轄彰德衛輝懷慶三府兼管河務以昨城縣并入延津縣裁知縣典史教諭訓導各一員從河南巡撫田文鏡請也○乙亥川陝總督岳鍾琪叅奏夔州府知府喬鐸等隱匿夔關稅銀得旨喬鐸著革職其捏結侵欺併程如絲扶同隱漏情由俱交與黃炳岳鍾琪會同該撫嚴審追擬具奏各省稅課向來隱匿者甚多雖奉旨稽查而徵收官員瞻顧從前隱匿之罪仍復支吾不將實數盡行報出及至敗露則於隱匿稅課之外又添欺罔之重罪逾不可逭朕心實爲不忍今特沛寬大之典准各處將實在數目自行首出其從前多收之處免

其究問朕既如此開恩。儻再有隱匿情由。日  
後發覺。定治以重罪。著該部通行曉諭知之。  
○免廣東東莞等六縣雍正四年分水災額  
賦有差。○厄魯特扎薩克貝子噶爾丹代青  
諾爾布故遣官致祭。○丁丑恭建

聖祖仁皇帝聖德神功碑於

景陵遣官告祭碑文曰

皇天眷佑我國家。顯謨盛烈。世世相承。

太祖

太宗肇基東土。締構鴻圖。

世祖混一寰瀛。克成駿業。篤生我

皇考皇帝。亶神聖之姿。立君師之極。大德廣運。

健行不息。至明如日。至仁如天。集皇王之大

成。亘古今而首出。書契以來罕有倫比。以揚

列聖之耿光。以裕我無疆大曆。服予小子。繼承

基緒。既奉冊寶。恭上

尊謚。惟山陵禮畢。宜建穹碑。欽惟我

皇考臨御六十餘年。厚德崇功。布濩宇宙。盈溢

簡牒。巍巍乎。蕩蕩乎。不可殫述。謹撮大概。鐫  
勒貞珉。用昭垂於億萬祀。敕曰

聖祖合天弘運。文武睿哲。恭儉寬裕。孝敬誠信。  
功德大成。仁皇帝諱玄燁

世祖體天隆運。定統建極。英睿欽文。大德弘功。  
至仁純孝。章皇帝第三子也。

母孝康慈和莊懿恭惠溫穆崇天育聖章皇后  
在姪時

孝莊文皇后見

孝康章皇后衣裾。若有龍繞。知爲毓聖之祥。逮

降誕之辰。異香盈室。經日不散。五色光華。與

日並耀。宮人內侍。咸所瞻仰。天表奇偉。耳大

聲洪。雙瞳日懸。隆準岳聳。膚理瑩白。皎然玉

質。舉止嚴重。性度恢宏。敦敏聰明。出言中理。

辛丑正月。嗣登大寶。時甫八齡。

孝莊文皇后問所欲對曰。惟願天下乂安。兆人

樂業。共享太平之福。

孝莊文皇后動容嘉歎。知能荷神器。爲生民主

也。自初讀書。十行俱下。畧不遺忘。講幄既開。日與儒臣論難往復。雖烈暑沴寒。未嘗暫輟。焚膏繼晷。常至中宵。遜志覃思。好古敏求。勤篤甚於儒素。譚經評史。發揮道奧。流覽之功。徧於七畧。爰及緯象聲律。算數百家之書。莫不觸類洞徹。得其精要。故知性知天。察人倫。而明庶物。雖一名一物。皆研究精微。而一以貫之敬。

天尊

祖禋祀。必親齋明盛服。率禮無怠。至年踰六十。頗艱拜起。冬至上辛。祫祭羣臣。懇請遣官恭代。猶必。

親詣省視。陳設行迎神之禮。退居齋幄。默致精誠。俟禮畢。然後旋輅。天性純孝。事。

孝莊文皇后垂三十年。致愛盡誠。委曲周至。從幸時乘馬不離左右。遇道路少仄。即下馬扶輦。踰嶺則扶掖升降。彌加恭謹。康熙二十六年冬。

孝莊文皇后聖體不豫

皇考親嘗湯藥。席地而坐。目不交睫。衣不解帶者三十五晝夜。逮疾大漸。自撰祝詞。步禱南郊。請減己算。以延慈壽。伏地誠懇。涕泗交頤。至居廬時。哀瘠過甚。不盥沐者數十日。釋服後。仍處偏殿。衣布素。恭送龍輜。每日必步隨數里。朝夕慟戚。如初喪。終身思慕。每一言及聲淚俱發。事。

孝惠章皇后垂六十年。備極孝養。省方江南。避暑塞外。必奉鑾輿以行。康熙四十九年。

孝惠章皇后壽躋七旬

皇考亦年近六旬矣。正月元夕。宮中張燈設宴。躬親起舞。稱萬壽觴。中外傳爲天家盛事。友愛裕親王等。同問安。

慈寧宮。每序家人之禮。親親之誼。久而彌篤。其疾也。屢親視之。其薨也。親臨之。宗室中用其才俊。而禮其高年。無爵位者。亦有常廩。自康熙六年始親政事。未明求衣。日昃忘食。數御。



門延見公卿詳論得失綜理萬幾日有常程  
靡所稽滯嘗於巡幸之次章奏未至秉燭以  
俟或於四鼓披覽達旦遂忘寢息孜孜圖治  
不自暇逸歷六十餘年終始惟一虛己求言  
以廣視聽片詞之善必蒙采錄或星象示異  
水旱爲沴即命羣下直陳休咎所起無所隱  
諱又命督撫諸臣密奏地方利弊所宜興罷  
者雖在萬里之外周悉情狀視若目前審官  
班祿必惟其當內自六卿之屬外自縣令以  
上臨軒召見觀其可否然後命之其以清修  
苦節著聞者立行甄擢以勸有位介胄之士  
無小大必親試其能開霽天顏從容詢問寸  
長微績竝加獎勵人皆感激自奮

聖性天授一經覬謁歷久不忘故文武之選程  
材使器官得其人人稱其職

皇考智勇天錫廟算如神三逆未畔之前即燭  
其終爲悖逆宜蚤定大計遣大臣趣召之吳  
三桂果反耿精忠繼之乃宣睿畧簡禁兵守

荊州安慶鎮江爲聲勢命諸王大臣爲大將  
軍分道竝進三桂自出至衡州湖南皆陷王  
師扼之於岳州用戰艦據江湖斷賊餉道三  
桂憂怖死遂拔岳州盡收湖南地由陝西取  
漢興定四川明年定貴州又明年定雲南逆  
孽自焚餘黨悉平精忠兵出仙霞旁擾溫台  
大兵過之衢州屢摧其鋒遂北入仙霞順流  
而下精忠自縛軍前溫台賊悉破散尚之信  
最後反王師北自韶州東自潮州感之之信  
束身乞降其間孫延齡陸梁於桂林王輔臣  
潰亂於寧羗戈鋌所指不久就俘當賊勢之  
熾大江以西五嶺以南悉爲賊踞烽火幾半  
海內

皇考默運神謨不動聲色八載之間再定寰寓  
廓清氛翳耿精忠之亂鄭經自廈門盜踞下  
游三府精忠敗大兵乘勝復三府經遁歸廈  
門越二年克廈門經遁歸臺灣以海舟守澎  
湖爲門戶

皇考決策命帥治朦朧。以六月乘北風攻澎湖。再戰破之。臺灣震警。乞降。遂以其地爲郡縣。海氛起於明季。自鄭成功巢穴茲島。傳子經及其孫。歷三世。出沒爲閩南患。至是悉靖。察哈爾部布爾尼者。元之遺裔。其先世納款獻傳國璽。故荷特恩。尚主封王。父阿布泰漸爲狂恣。

皇考不忍置諸法。羈諸盛京。俾布爾尼襲封。召之不至。遂以所部叛。遣將率禁旅討之。兩月之內。殲厥渠魁。招撫其衆。北藩以寧。鄂羅斯夙慕德化。奉職貢。乃其邊人羅剎踞雅克薩。城納我逋逃。以擾索倫。興師徂征。拔其城。縱其俘。振旅而還。會鄂羅斯之國王。遣使上疏謝罪。命大臣往定邊界。東北數千里。延及海邊。胥隸版圖。厄魯特者。元之牧牲人也。其頭目噶爾丹。梟桀習戰鬥。劫服諸番。殘回子數百餘城。復與喀爾喀構難。潛劫其衆。故喀爾喀七旗數十餘萬衆。皆稱臣內附。

皇考親巡塞外。受其朝謁。錫之名爵。頒諭兩部落。息兵寧人。噶爾丹顧頑梗弗率。以追喀爾喀爲名。闌入邊界。

皇考計安藩服。躬申天討。以康熙三十五年春。親統六師。由中路直抵克爾倫。料賊必逸而西。別遣大將由西路進兵圖拉。噶爾丹聞天兵至。棄其輜重。連夜西奔。恰遇西師於昭莫多。大破之。噶爾丹收合餘衆。竄伏窮荒。其冬車駕再出。至鄂爾多斯。遣使招附。明年春。又出寧夏。循賀蘭山。哈密擒其子以獻。其族類丹濟拉等。潛輸誠款。師次狼居胥山。天兵四布。噶爾丹勢孤援絕。仰藥自盡。丹濟拉攜其遺骸。及子女人口來歸。朔漠蕩定。其兄子策妄阿喇布坦。素與噶爾丹有隙。乘其南發。潛據其地。誘致逋逃。種類漸滋。因圖青海諸部。及西域諸番。暗遣人攻拉藏。殺之。掠據藏地。

皇考以

太宗文皇帝時。班禪額爾得尼達賴喇嘛。知東

土有聖人。遣使歸命。追念厥誠。不可以勿救。於是分遣將帥。率西寧諸路之兵。自青海入四川雲南之兵。自拉里入整旅前驅。不遺一矢。遂定藏地。復達賴喇嘛之位。安西域之衆。其他西番諸國。無不欣喜感戴。委贄恐後。軫念東南水患。屢勤翠華。躬視河淮。每步長隄。或駕小舟。周迴觀覽。高下險易。瞭若指掌。授策河臣。罔不奏效。開中河以避黃河。百八十里之險。治下河。則疏人字芒稻河。注之江。濬蝦鬚諸溝。注之海。治清河。則培高堰。塞六壩。以蓄其勢。開張福口裴家場。以暢其流。治黃河。則浚雲梯關。以通海口。築挑水壩。開陶莊引河。以導其北向。築減水壩。修鹽河。以洩其旁溢。於是淮不東漫。而北敵黃。黃不南灌。而東趨海。下河七州縣。化浸爲沃。農桑遍野。漕艘商舶。上下數千里。安若衽席。其在畿輔之內。則隄子牙。而漳滏潯沱。無泛溢。開柳岔口。而蘆溝不橫決。皆

皇考頻年巡省。面授經畫。用迄於成績。勤求民瘼。凡所在暘雨之期。封疆大吏。隨時奏聞。偶有旱潦。無不周知。賑恤之恩。不稽旬日。籌畫詳盡。溥徧優渥。故雖有愆伏。而民忘其災。遠至蒙古諸藩。竝厪

睿慮。分遣使臣。教以網罟耒耜之利。俾知鮮食艱食。每間積雪荒歉。即賜之牲畜米糧。咸獲贍給。康熙三十六年。朝鮮以大饑。告截河南漕米。由登州汎海。發盛京倉儲。合水陸運。致數萬石。平糶賜賚。凋瘵盡起。舉國忭慶。蠲租之詔。無歲不下。所在災傷。見告。即與減除。積年逋負。輒免追征。積算無慮億萬計。人用底於殷阜。四十八年。特敕遞免天下地丁錢糧三歲。而徧八埏之內。次第霑被。寬仁之澤。浹於黎庶。隆冬停流。遣之期。盛夏解圍。圉之禁。法司奏讞。多所矜釋。和氣薰陶。萬方康泰。至於三藩之亂。所全宥。不可勝紀。明降敕諭。尚之信耿精忠。罪大惡極。法應及族。但念尚可

喜耿仲明航海歸誠。著有勞績。其兄弟俱從寬免罪。屬下人有父兄子弟在賊中者。一無所問。又如噶爾丹子女。赦勿誅。俾子有室。女有家。仍官其子。自秦漢以來。叛逆之條。蔓及宗室。橫枉無辜。

皇考弘曠蕩之恩。遂除二千年誅戮慘酷之弊。慎茲祥刑。復於三代興行教化。申之以告誡。御製訓飭士子文。刊於學宮。

聖諭十六條。頒於州縣。訓詞深厚。丁寧周至。士習民風。於焉丕變。崇敬先師。表章前賢。東巡狩。至於克州。親詣闕里致祭。

孔子拜跪之儀。有加於往代。廣賢裔博士之封。宋儒周邵二程張朱。皆稱子而不名。升朱子祀於堂。壽考作人。開鄉會試者。各二十有二科。髦俊蔚興。相繼輩出。增江浙入學名數。廣直省鄉試解額。文思光被。苗穠之秀。隸籍蠻宮。島上君長。遣子弟就業辟雍。窮山越海。靡然嚮風。右文稽古。命儒臣纂修周易折中。

圖象卦爻之繹。親加論定。又修書詩春秋傳說彙纂。性理精義。朱子大全。經籍之道。煥然大明。又親授詞臣。考訂律曆。曆得合天。律諧真度。誠萬世不易之法。按北極之高。測地理。南北東西。差得皇輿全圖。其他所編輯。卷帙繁富。充於內府。聽政之暇。喜操翰墨。文成典誥。詩爲雅頌。書蹟神運。天矩爲百代楷模。闔五鈞之弓。射大鏃之天發。則必中。中必洞貫。文事武備。竝臻其極。所謂天縱之聖。又多能也。致敬前代。禮踰常典。自夏商以迄元明。帝王膺曆服者。咸入廟而享祀焉。前後南巡。親祭明孝陵者三。又欲封其後裔。俾承世祀。予小子祇奉遺言。錫之侯爵。公卿大臣。戎行將帥。多服官至四五十年。

皇考眷待耆舊。恩禮優渥。凡朝會讌享。龐眉皓首。濟濟盈庭。三代而下。誠爲盛典。

皇考自幼齡奉

孝莊文皇后慈訓。凡飲食起居。視聽言動。皆有

矩度盛德自然周旋中禮端宸莅政天顏肅穆雖宮庭閒燕一言一笑不以假人太和元氣充於四體冬不爐而自溫夏不扇而手足未嘗濡汗正衣冠尊瞻視終日儼乎若思逮於耄齡聖敬日躋敦尚儉素衣不辭澣濯食不取珍異宮掖人數至少光祿寺一歲所費較之前代僅十之一服御器用歷久不易未嘗以故敝棄遺巡幸所至不煩民間一物宮室舟舫純用樸斲無丹青之飾秉德謙冲自平定三逆肅清朔漠凱旋告功及五旬六旬萬壽節五十六年寶曆國家大慶諸王公文武臣僚太學生徒京兆耆老屢請恭上尊號雲集闕下備陳丹懇

皇考頻下諭旨讓而弗居於戲惟我

皇考躬備聖德久道化成風教翔洽錫福烝人胥躋於仁壽乃至鳥獸草木咸若守成之業恢於創造拓開疆宇廣袤各數萬里在昔未賓之國重譯踵至戴天履地含生負氣之倫

莫不尊親自有生民蓋莫盛於斯日者然且兢兢業業緝熙單心敬上天之明威察下民之視聽焦勞萬務未嘗以天位爲樂憂勤惕厲以迄於終身是所以接堯舜禹湯文武孔子之心傳優入聖域而仁覆天下也康熙六十一年十一月甲午崩

聖壽六十有九雍正元年九月丁丑葬景陵謹拜手稽首而作頌曰維我皇清上天眷命二儀凝祉

三朝篤慶

皇考紹烈建中表正亶聰亶明乃神乃聖翼翼昭事仰格

高穹化將道贊祭以誠通虔承

九廟孺慕

兩宮大孝備矣至德光融爰在冲年夙成睿智致泰之基徵乎言志日就月將古訓是嗜理數兼該窮源抽秘萬幾在御八表君臨克勤於政無逸爲箴求衣忘食日昃宵深慮周禹

跡事塵堯心。廣聽竝觀。樹旌建鼓。無情不達。有善必取。四門攸聞。百司式敘。文采珪璋。武羅貔虎。苞有三葉。怙勢恃恩。默運神機。載奠乾坤。旆麾烽息。弩指鯨奔。提封式廓。截海爲藩。元裔速辜。不修厥職。禁旅一臨。兇渠伏殛。羅刹擾邊。邊師討賊。拔城縱俘。感恩懷德。維彼梟雄。構難比鄰。比鄰內附。稽首稱臣。敢抗明詔。怙惡不悛。

天子三征。掃蕩邊塵。蠢茲遺孽。構氛西徼。自恃荒遐。狂跳縱暴。堂堂天兵。何幽不到。底定三危。恩同再造。瑤池之水。崑崙之岡。窮域絕漠。越海踰洋。書傳所記。咸我旼章。敷天率土。無不來王。睠念河淮。頻乘四載。既安二瀆。亦通百派。一授成功。萬世永賴。胥樂同憂。仁膏遍沛。周詩時邁。虞典歲巡。省方詢俗。輦路生春。蠲租賜復。歲有恩綸。惠心溥渥。益道平均。暘雨偶愆。恩澤已布。朔漠朝鮮。同霑膏露。象魏既懸。鷄竿屢樹。貫索其空。析楊可厝。德惟善

政道在遺經。紆御東魯。親奠兩楹。禮明樂備。檜柏增榮。光華復旦。天下文明。覃心四府。研精儒術。典籍大興。英髦踵出。爰在璣衡。協時正日。玉振金聲。審音調律。海涵地負。大哉王言。鸞鳳翥。煥乎宸翰。文經武緯。異用同源。道高能博。藝備德尊。歷代帝王。祀典彌厚。備列几筵。光延籙豆。修敬前朝。親臨鍾阜。三恪垂封。丞嘗有後。功勲耆舊。恩禮優容。龐眉皓首。濟濟雍雍。撫諫克讓。川受谷冲。穆穆其敬。安安其恭。六幕啟宇。八埏肇域。維我

皇考。憂勞靡極。三靈集祐。五紀膺曆。維我皇考。克勤不息。貽我臣庶。食德難忘。貽我子孫。卜世無疆。昌瑞之山。峯峙川長。功德穹碑。天日同光。○己卯。諭內閣。三農仰資雨澤。所重尤在春時。今年三月間。直隸地方雨暘不一。朕念切民依。時時體訪。昨閏三月十一日。京師及近畿之地。俱得雨澤。而薊州僅有微雨。不能霑足。朕向來屢降諭旨。凡水旱災祲之

故或因朝廷政事闕失或因該省大吏及該郡邑有司有乖職守各致愆尤或因本地風俗偷薄人情澆漓此數者皆足以上干

天和致使陰陽違序古人言此最爲詳備而朕研究天人感應之理確然知其不爽是以往往復諄諄訓諭中外期於共相儆勉修人事以格

天心此念無一刻或忘也今春畿輔遠近雨澤不均朕再四思維不得其故昨見保定府舉人蘇庭條奏請將本年帶徵錢糧緩其徵收而又故爲迫切愁苦之詞欲以聳動朕聽卽此可知小民之心無時屢足當收成偶歉之際朕多方拯恤比歲緩徵而小民皆習視爲固然迨及歲已豐熟全不念租賦乃惟正之供輸將乃分內之事仍思遷延僥倖遂其私心轉覺納科完糧爲意外之事相對輾轉志氣不舒遂致上干天和甘雨不能應時而降既忘朝廷撫綏保護

之深恩又忘

上天錫福惠民之大德人情如此尚得謂之風淳俗厚而可邀

上天之眷佑乎夫錢糧出於地畝凡應完國課者皆係有產業之家並非無力窮民可比豈有上年豐收之時全不籌及於今年國課之理假若民力果屬艱難該地方大吏有司自然體朕宵旰勤民之至意暫緩催科斷不忍過於迫急竭民力而違朕旨也朕因小民習染既久私欲難除不識君民一體之情不知天人感召之理致干

上蒼譴責垂慈示儆朕心深用憫惻切加訓飭果能遵朕諭旨安分守法循理奉公則俯仰寬舒心志暢適古人云和氣致祥將見五風十雨大有頻書斷不憂水旱災祲之爲累若宵小無知以爲朕因催科降此諭旨則不但不知朕教養之深恩抑且昧天人感應之理矣著直隸總督督率有司體恤民隱教養兼

施將朕此旨通行出示曉諭務使遠鄉僻壤之民詳悉知之○調江南江寧將軍覺羅伊禮布為奉天將軍陞陝西西安左翼副都統常壽為江南江寧將軍調正黃旗滿洲副都統尼馬善為陝西西安左翼滿洲副都統○庚辰諭內閣九卿翰詹科道等昔日

聖祖仁皇帝辦理天下事務六十餘年事事熟練故當奏事之時諸臣奏畢即令退散不必久待自朕辦理以來於大小政務未能洞悉周知而其果否悉合機宜之處亦未能自信每欲與諸臣商確計論以求其當是以諸臣奏事前來每多留一二時以待召見詢問又念諸臣伺候既久已過退食之時每令膳房頒賜飯食俾得飽餐以辦公事不致枵腹久待此朕體恤之至意也至於光祿寺每年動用錢糧仍遵

聖祖仁皇帝當年舊額無所增益其因添桌飯而支用者朕則另發內帑以給之朕躬行節

儉教導天下時以撙節愛養為心而此等多費之處實以辦理公事之故第恐衆人不知或以每日多備桌飯花費錢糧輒生議論故特將此細事諭令知之○辛巳宗人府議奏輔國公阿布蘭擅將

玉牒底本私交隆科多應革去公爵嚴行圈禁得旨阿布蘭著革去輔國公在伊家圈禁玉牒關係緊要隆科多向阿布蘭將繕錄清本要去收藏在家是何意見著問隆科多將情由回奏○刑部遵旨議覆苗蠻黎獐改土歸流地方官兵役有勒索財物者應分別數目治罪贓銀追給還主得旨此等應追入官銀兩即限內全完亦不寬免其罪永著為例○癸未

上詣

恩佑寺行禮畢回宮○乙酉諭內閣聞會試舉人感朕特恩以今年為朕五十萬壽特於京城寺廟設立經壇以申頌祝之意此舉甚為



虛妄。朕臨御天下。孜孜求治。凡所行之事。惟以循理爲本。誠以理之所在。即

天意所在。感孚默應。捷於影響。若朕所行。悉合於理。則問心無愧之處。即可以對越神明。而與情之頌祝與否。皆可置之不問也。朕儆戒乾惕之切。無時或釋。舉人乃平日讀書明理之人。當效法古之聖賢。豈可爲此世俗誕妄之舉。且朕正念士子貧寒。歸途艱於資斧。是以賞給路費。今乃費於無用之地。尤不能體朕之心矣。其所設經壇。即行禁止。朕又聞各省督撫。因朕今年五十萬壽。欲購覓玩好之物。以爲進獻者。此舉尤爲不可。夫地方大吏。偶有進獻方物土產者。不過借此以達其瞻仰之意。而朕之酌量收納。又復隨便分賜廷臣者。亦所以聯君臣上下之情。若今年亦只照每年之例備辦。尚准其奏達朕前。儻別有玩賞之物。概不寓目。朕仰賴

皇考福庇。在藩邸數十年。所蓄器玩。頗有及即

位後。見宮中傳留古玩器皿。皆質樸之物。實無奇異。爲人所罕見者。言之於人。亦令人難信。視朕藩邸所藏。尚屬不逮。朕深用抱愧。於懷。當日二阿哥在東宮時。廣蓄奇巧珍貴之物。數倍於

皇考宮中之所有。朕仰思

皇考恭儉至德。實可垂法萬世。欽服之誠。切於五內。益覺二阿哥之所爲。實屬無益。當爲鑒戒也。朕既深知二阿哥之非。若朕此時復留心玩好。廣收進獻。則將來子孫之賢而有識者。豈不以此爲朕躬之累乎。朕意欲俟暇時。將宮中所有之物。或係

皇考傳留。或朕藩邸舊蓄。一一分晰標記。以明皇考之儉德。俾世世子孫共知之。又安肯多收玩好。以滋朕心之愧乎。朕澄清吏治。令督撫諸臣。共勵廉隅。即量予公費。不過供其日用之需。安有餘資。搜求玩器。儻轉索之於屬員。則又開下吏逢迎奔競之漸。尚望其秉公督

率整飭官方乎。朕心惟以民安物阜爲美。薦賢舉能爲貴。僅督撫等。秉公察吏。實心爲國。行一利民之政。勝於獻希世之珍也。薦一可用之才。勝於貢連城之寶也。當年

皇考五十萬壽時。朕再三懇請慶賀。不蒙

俞允。若以朕所強求而不能仰得。

皇考之歡心者。今朕五十壽誕。躬自舉行。於心實有未安。至於設立經壇。建立碑亭等事。在皇考當日甚鄙而厭之。因見諸臣額懇之切。隨便聽其舉行。乃朕所深悉者。而其中羣下隱情在。

皇考實不能深知。朕居子臣之位四十年。於臣庶情形。皆所親見。是以不肯復爲。內外諸臣。其共體朕心。祇遵朕諭。殫竭誠意。屏絕虛文。勉之勉之。○又諭各省建立忠義節孝祠宇。及賞給老民老婦布絹米石。皆係朕之特恩。凡地方有司。自應實心奉行。以彰朝廷曠典。昨據安徽巡撫奏。太湖縣知縣冒開老婦

名數至二千餘名之多。即此則各省有司之奉行不能無弊可知矣。建立忠義節孝祠宇。表揚德行。在地方有司獎善慕義之公心。即捐輸已資。亦當勇往。今朕動用國帑爲之建立。而承辦各官尚忍於冒銷錢糧。草率從事。以致易於傾圮。有此情理乎。著行文各省督撫詳加察勘。有無冒銷。果否堅固之處。不得容其朦混。并令各地方官將所建祠宇造入盤查冊內。前後交代。儻工程不堅。未久即至坍塌者。仍著落原辦之人賠補。至於永遠照看修葺。則係地方官分內之事。若能隨時整理所費。不過數金多。亦不出數十金。甚易爲力。嗣後責成於地方官。則彼必視爲己事。時留心。大於祠廟有益。儻准其動用正項錢糧修理。則不肖有司必至借端開銷。而姦胥猾吏又從中侵漁入己。有名無實。屋宇必至頽壞。負朕彰善闡幽之至意矣。太湖縣冒開老婦名數。業已被叅。各省州縣必有冒濫開

銷及胥吏朦混侵蝕等弊著各省督撫一併確查如該地方官將浮冒之處自行出首免其治罪儻仍隱匿不報或經旁人告發或被督撫科道等題參定行嚴加治罪○辦理阿爾泰軍營糧餉事務已泰等疏報察罕叟爾特里庫爾奇勒扎克拜達里克四處屯田收穫大麥小麥青稞共二千六百一十八石有奇下部知之○丙戌諭宗人府弘昇辦理旗務並不以事爲事多方教訓不知悔改著不必辦理旗務嚴加議處具奏尋議弘昇身受隆恩封爲世子委以重任並不實心効力應革去世子得旨弘昇著革去世子交與伊父允祺在家嚴加訓誨若不能約束仍致妄行生事定行一併懲治○兵部議覆雲貴總督鄂爾泰疏言湖廣五開銅鼓平溪清浪四衛改歸黔省管轄應增設官兵防守五開銅鼓請將黎平協官兵撥防查黎平協原設副將一員守備一員千總二員把總四員兵六百

二十名今加五開銅鼓二衛地方遼闊恐難兼顧應添設守備一員兵三百八十名合原設之官兵分爲左右兩營駐防平溪清浪乃水陸要衝應撥鎮遠協分防思州之遊擊一員駐劄撥把總一員兵一百五十名分守平溪把總一員兵五十名分守清浪至思州係府治亦不可無官兵防守應於鎮遠協內撥千總一員兵五十名駐防其自湖廣歸併黔省之天柱營所有叅將守備千總等官應令黎平協副將兼轄再平溪清浪二衛請照五開銅鼓之例改爲二縣設知縣典史教諭訓導各一員均應如所請從之尋定五開新改縣曰開泰銅鼓新改縣曰錦屏平溪新改縣曰玉屏清浪新改縣曰青溪

大清世宗敬天昌運建中表正文武英明寬仁  
信毅大孝至誠憲皇帝實錄卷之五十五

大清世宗敬天昌運建中表正文武英明寬仁  
信毅大孝至誠憲皇帝實錄卷之五十六

監修官光祿大夫經筵官大學士兼兵部尚書理兵部事三等伯加十五級臣鄂爾泰  
副總裁光祿大夫經筵官起居注太僕寺卿大學士兼戶部尚書理戶部事三等伯加十五級臣  
三等伯加十三級臣張廷玉等謹奏  
乾隆五年丁未夏四月丁亥朔  
修

太廟

雍正五年丁未夏四月丁亥朔享

上親詣行禮 諭內閣大學士富寧安在

聖祖仁皇帝時宣力多年清操素著領兵邊塞  
十有餘載備極勤勞自朕即位以來見其辦  
理軍務恪慎周詳及簡任大學士公忠誠實  
靜正和平甚屬可嘉著加太子太傅以示優  
眷 陞內閣學士班第為理藩院額外侍郎  
內閣侍讀學士顧魯為內閣學士兼禮部侍  
郎 鑒儀使吳正安伊忒納俱緣事革職以

侯嚙爾薩一等侍衛那蘇圖俱爲鑒儀衛鑾儀使○戊子策試天下貢士彭啟豐等於

太和殿前制曰朕仰荷

上天

列祖恭佑之隆

聖祖仁皇帝付託之重臨御以來勤求治理日與羣臣訓誡咨儆切加勉勗惟期篤元首股肱之誼育膠庠塾序之材吏治實底於澄清民生共登於殷阜朝乾夕惕旰食宵衣此念

無一刻釋於懷也人君奉天出治而贊化端賴臣鄰人臣體國奉公而分猷必資羣力惟君臣聯爲一體故公爾忘私國爾忘家而明良之慶以成僚采聯爲一體故善則相勸過則相規而協恭之美以著朕推誠布公實視百爾臣工爲一體而諸臣之事君者果能盡一德一心之道而無慚於幽獨歟又何以使同朝共事者絕黨比之私化畛域之見以臻師師濟濟之盛歟國家所以重士者以士之

能自重也故必端其所習而後鄉黨視爲儀

型風俗資其表率乃或器凌詐僞干犯名教

習於曲學而不循正道務爲浮薄而不敦實

行士不自重而里巷小民從而輕之且相率

藉口而倣效之士習未端安望民風之歸於

厚乎今欲使讀書之人爭自濯磨澡身浴德

悉爲端人正士以樹四民之坊表必何道而

可守今爲親民之官百姓之休戚係焉古之

稱循吏者必以惠羣黎端風化爲要務故里

社之樹藝咸載史書物類之感乎皆徵治化

以至誠惻怛之實心盡父母斯民之實政剛

柔相濟教養兼施斯不愧循良矣朕欲百姓

乂安風俗淳美果何道而使司牧皆得其人

以收實效歟抑大法小廉必端本於大吏之

倡率歟若夫民爲邦本食爲民天勞民勸相

以盡地力自古重之蓋本業勤則衣食之源

裕俯仰足則禮義之化興正民之德必先厚

民之生良有以也海宇承平日久休養多年

戶口愈繁生齒愈衆而地不加廣自非人盡上農何以使倉廩足而婦子寧歟然則欲使野無不墾之土國無游手之民不事末利而專務恒產爲民牧者必如何勸勉鼓勵而後見豐亨豫大之休也夫朝宁有喜起之風則萬邦黎獻觀感奮興而野多俊乂矣長吏樹撫循之績則寰宇蒼生養恬耕鑿而戶樂豐盈矣爾多士留心經濟其詳著於篇朕將親覽焉○議政王大臣等議奏吐魯番回目白斤白克奏請照前每年差人請安進貢應不

准行得旨所議甚是但止令員外郎升柱遣其歸去而不言其故所見甚小辦理天下事務莫貴於誠理應以誠實曉諭之曰前策妄阿喇布坦無故來侵哈密又騷擾西藏

聖祖皇考將沿邊官兵兩路分發爾吐魯番當進兵大路若不先取爾吐魯番斷乎不可故取吐魯番留兵防守以保護爾等後策妄阿喇布坦悔過輸誠遣使根頓博洛胡爾哈特

來請罪朕仰體

聖祖皇考之心即將大兵撤回撤兵之後策妄阿喇布坦或以爾等歸順天朝尋隙生事將爾等騷擾亦未可定朕軫念爾等曾降諭旨有情願隨大兵同來者聽故拖克拖麻穆忒移來內地安居樂業爾等想已聞知今爾等奏請仍照前差人來京凡外番部落人等請安進貢從無禁止之例所以不令爾等來京者誠恐策妄阿喇布坦騷擾爾等耳爾等如言策妄阿喇布坦即便發兵亦不畏懼可以保吐魯番萬無一失朕亦不禁止爾等但恐將來策妄阿喇布坦騷擾爾吐魯番之時爾等雖欲奏報內地相隔甚遠大兵一時不及救援也著行文與升柱等曉諭吐魯番之回目知之○己丑吏部遵旨將會試下第舉人挑選各省教職引見

上諭曰教官有董率士子之責果能實心訓導使諸生讀書循理無佻達囂凌之習則齊民有

所觀法風俗可望淳厚所聞非淺鮮也乃向來教職因循偷惰全不以教訓為事朕屢頒諭旨而積習如故因於爾等下第舉人中擇文理明通者引見命往諭爾等科分名次尚非應選之人朕加恩特用務須勉力供職加意訓誨六年之內如果著有成效督撫題為朕格外加恩如有負職守經督撫題參朕不姑容也○吏部尚書查弼納降級調用仍署兵部尚書陞都察院左都御史福敏為吏部尚書吏部左侍郎查郎阿為都察院左都御史仍辦理吏部事○以正黃旗漢軍都統協理兵部侍郎事務黃國材署兵部尚書○兵部議覆署湖廣總督福敏疏言綏寧縣地方苗徭雜處應於黃桑坪設營彈壓請將不甚險要之宜都營遊擊撤移駐劄以改歸黔省之銅鼓五開平溪清浪四衛守備千把五員并原防守黃桑坪之把總一員兵三百零四名立為綏寧營本營設中軍守備一員千總

一員分把總四員帶兵防守單子隘鎮彝哨橫嶺新寨互相環衛應如所請從之○庚寅諭內閣打牲烏喇俱係內務府佐領之人不可令船廠將軍兼轄每年著乾清門侍衛一員內務府官一員與該處總管同辦事務其三姓地方甚屬緊要與將軍處相距甚遠止有協領一員若事件有誤竝無接辦之人著添設副協領一員授為從三品與正協領一同辦事○辛卯

上御太和殿傳臚賜殿試貢士彭啟豐等二百二十六人進士及第出身有差○鑲白旗護軍統領哈岱緣事革職以散秩大臣博爾屯為鑲白旗護軍統領○壬辰諭戶部國家設立寶源寶泉二局鼓鑄制錢原期充足流通以便民用乃鼓鑄日增而錢文不見其多錢價不見其平必有姦偽之徒銷燬制錢造作器皿以賈利害民者向經九卿會議凡黃銅器皿除樂器鏡面戩盤外其餘不准使用悉

令交官給與價值。朕令先試行於直隸及各處省城。無非欲杜燬錢之弊。而清其源也。乃立法甚明。而玩法者尚衆。昨步軍統領阿齊圖現於崇文門外。拏獲銷燬制錢之人。近在輦轂。尚有此輩。則鄉邑偏僻之地可知矣。此弊不除。錢文何以得充。著直隸總督嚴飭各地方官。密行緝拏。如有疎縱。將該地方官照溺職例革職。至於銅器交官給價。先試行於直隸及各處省城。其餘各府州縣地方。一時難於通行。故尚准其使用。然既准其使用。又復任其打造貨賣。則將來仍滋弊端。於事無益。著該督撫通行禁飭。嗣後各處鋪戶人等。不得製造黃銅新器。違者照例治罪。○雲貴總督鄂爾泰奏報鎮沅府猺賊。於正月十七日夜縱火肆掠。威遠同知署鎮沅知府事劉洪度被害。隨調元江協副將張應宗等領兵前往陸續獲賊首刀如珍等五十餘人。賊黨百餘人招回夷民三千餘戶。得旨猺賊聚衆

妄行大干法紀。在事官弁奮往効力。殊屬可嘉。著交部議敘。其被傷官兵著鄂爾泰查明分別優卹。○癸巳諭內閣。從來為政在乎得人。書曰。野無遺賢。萬邦咸寧。蓋賢才登進。在位者多。則分猷効職。庶績自能就理。而民生無不被其澤也。朕即位以來。加意旁求。凡所以延訪擢用之道。無不備至。如現任官員及候補候選科目諸人。每特令薦舉。遴選引見。廣開錄用之途。冀收羣策之力。又念各省學校原以養育人材。命學臣保舉賢能。升聞於朝。以備任使。乃直省學臣所舉人數不多。又或草率塞責。不能副得人之實。夫十室之邑。必有忠信。古者取人之法。惟鄉舉里選。合於三代之制。今直省府州縣學貢生。生員多者數百人。少亦不下百餘人。其中豈無行誼醇篤。好修自愛。明達之士乎。著州縣官會同該學教官。將貢生生員內。居家孝友。行己端方。才可辦事。而文亦可觀者。秉公確查。一學各



舉一人於今年冬底申報該上司奏聞請旨或實無可舉者出具印結該督撫查實奏聞朕因廣攬人材舉此曠典所以黜浮華而資實用州縣教職為一方師長選賢薦能乃其專責儻敢虛應故事濫舉非人照溺職例革職或徇情受賄則當重治其罪八旗之滿洲蒙古漢軍亦照此例將人品端方通曉漢文者著該佐領各舉一人如不得其人亦具印結令該都統彙齊奏聞請旨庶使潛修篤行之士得以表見而國家亦收得人之效矣○諭兵部向來軍政之年該管官員往往以干把等官劾叅塞責似此微弁優者可以隨時拔用劣者原係咨部黜革何待五年軍政之時嗣後著行停止○以兵部尚書何天培署江南江寧將軍○實授衆佛保為理藩院左侍郎仍兼內閣學士班第為理藩院右侍郎○旌表浙江分水縣烈婦張兆熊妻何氏山寇肆虐護姑櫻刃給銀建坊入祠致祭如例

上詣

○甲午

恩佑寺行禮畢幸圓明園○乙未廣西巡撫韓良輔摺奏移駐官弁事宜一查柳州設有同知通判各一員經歷司獄各一員今將柳屬之賓州改為直隸屬以四縣則柳州同知似屬冗員應裁至慶遠一府所轄一州四縣并南丹那地東蘭忻城等土州縣幅幘遼闊苗獠雜處乃僅設知府而無同知通判請以所裁之柳州同知改設慶遠府同知一轉移間大有裨益一查上林之三鎮在縣城東北一百四十餘里接界忻城安定二土司故明時號其地為東西二撫民設立思吉周岑古蓬三鎮給官田養贍土兵歷今三百餘年忘其舊制奪田爭立積案纍纍擬將思吉鎮之兵田查出分給土兵歸於三里營守備管轄輪撥經制千總一員以統制之并移佐貳一員協同守備暫駐思吉播以恩威俟思吉馴服

之後再及於周安古達俾一一革心同霑聖化一查工林縣處於安定古零忻城諸土司中所屬之東西二撫民及思吉等三鎮即故明所平之八寨也箐深山險獷悍難治向屬柳州府管轄雍正三年前撫臣李紱請改隸賓州之後一切要務徑達該州賓州又無官兵足資彈壓實於機宜未協若將工林改屬思恩府將三里營改屬思恩協不獨文武相去咫尺便於調度且將來經營三鎮其地既屬思恩則同知可以暫駐三里營與備弁協同辦理而思恩府協之聲威足以制服獷獷其古零安定等土司逐漸撫綏不難矣得旨著孔毓珣會同廣西巡撫提督議奏尋議柳州府應裁同知一員慶遠府應添同知一員俱准其改設其思吉鎮應移佐貳一員請即將上林縣之三畔鎮巡檢移駐至新經改屬賓州之上林縣及三里營請仍照舊制屬柳州府管轄無庸再議更改餘均應如所請行

從之○予故正紅旗蒙古副都統雅圖祭葬如例○丁酉調鑲黃旗漢軍副都統安華為廣東廣州右翼副都統鑲白旗漢軍副都統石文燭為鑲黃旗漢軍副都統陞鑲黃旗叅領劉汝霖為鑲白旗漢軍副都統○以鑲紅旗漢軍都統輔國公鄂奇協辦鑲黃旗漢軍都統事務○刑部議奏奉天府府尹蔡珽應許戴鐸求托轉奏等案應擬斬立決妻子入辛者庫財產入官得旨蔡珽著革職將此本暫收內閣俟伊四川案件審結到時一併進呈○戊戌宗人府議奏允祜於禁所藏埋魘魅歷供不諱又供出與阿其那共為不法應立正典刑得旨允祜著免其正法仍舊禁錮○己亥諭管理旗務諸王及滿洲文武大臣等自古人生以節儉為本蓋節儉則不至於困窮糜費則必至於凍餒此理所必然者也本朝滿洲素性淳樸凡遇出兵行圍俱係自備並無違誤而生計各足近來滿洲等不善

謀生惟恃錢糧度日不知節儉妄事奢靡朕屢曾降旨諄諄訓諭但兵丁等相染成風仍未改其糜費之習多有以口腹之故而鬻賣房產者即如每飯必欲食肉將一月所得錢糧不過多食肉數次即罄盡矣又將每季米石不思存貯備用違背禁令以賤價盡行糶賣沽酒市肉恣用無餘以致闔家匱乏凍餒交迫尚自誇張謂我從前曾食美物服鮮衣並不悔悟所以致此困窮者乃以美食鮮衣之故也今漢人謀生尚知節儉殷實之家每日肉食者甚少其貧乏之人孳孳謀食僅堪餬口若滿洲等果能節儉將每月所得錢糧少使留餘則日久習成生計自裕產業可立矣或有不肖之輩不守本分妄行糜費既至貧乏惟希恩賞從前

皇考軫念兵丁効力行間致有債負曾發帑金五百四十一萬五千餘兩一家獲賞俱至數百如此厚賚未聞兵丁等置有產業生計滋

益者悉由妄用於衣食徒令貿易之人得利一二年間蕩然無餘心愈奢侈而生計較前反加窘乏其後又發帑金六百五十五萬四千餘兩賞賜兵丁人等亦如從前立時費盡朕自即位以來除特行賞賜外賞給兵丁一月錢糧者數次每次所賞需銀三十五六萬兩此銀一入兵丁之手亦不過妄用於飲食不及十日悉為烏有亦何裨益且庫帑俱係國家之正項天下百姓之脂膏豈可無故濫行賞賚以累百萬之帑項徒供伊等數日口腹之費乎若不將惡習改除朕即有施恩之意亦不可舉行兵丁等果將朕訓諭之意曉然明晰實心遵行痛改妄行糜費之習朕加恩賞賜衆亦可得永遠均沾至生計各遂之時始知朕所以愛養滿洲之恩為至深且切也王大臣等亦宜各從儉約以為下人之表率行之既久自可挽此惡習滿洲乃國家根本朕知之既深豈有不教之理朕自即位以

來衆人有論朕爲太嚴者由朕欲衆人痛改惡習進於善良止其奢靡使知儉約凡朕意慮所及之處悉申禁令而不肖匪類不得肆行其意或妄加議論如朕曾有禁止酗酒禁止賭博赴園館鬪雞及鷓鴣蟋蟀僱人當差放印子銀兩典錢糧米石用黃銅器皿等諭旨悉爲兵丁等身家計也如此訓誨不已衆人咸應體朕苦衷且此等訓誡咸係皇考從前禁止之事並非創始於朕但當時之臣工未能實意奉行是以一應惡習未得盡改今王大臣官員內仰體朕旨加意奉行者不過十居其五大半未愜朕懷而無知之人遂論以爲過嚴如欲使若輩稱爲寬仁之主何難之有但不加約束任其種種糜費則不但坐視滿洲等漸流至於不得衣食毫無顏面即以國家全力養贍伊等亦且不能給足朕意實有所不忍勢亦必不可也爾等其仰副朕意各將所屬官兵及閒散人等剖析情

理不時詳加訓誡○陞署湖南巡撫布蘭泰爲戶部右侍郎仍署湖南巡撫○實授塞楞額爲山東巡撫○禮部議覆鑲黃旗滿洲都統兼前鋒統領鄂善奏鄂善之高祖常書自沾河歸誠蒙太祖高皇帝殊恩將親妹公主下嫁因在盛京薨逝未得冊封懇請追給封典應如所請其應封固倫公主和碩公主之處恭候欽定得旨著封爲和碩公主○喀爾喀扎薩克多羅郡王益素克年老解退以其子垂扎卜襲替○庚子陞詹事府少詹事蔡世遠爲內閣學士兼禮部侍郎以少詹事任蘭枝署內閣學士○河道總督齊蘇勒疏言黃運兩河堤岸綿亘數千餘里沿河地方官遇工程險急以河工事非涉己或致旁觀膜視查徐邳豐沛蕭碭靈睢寧宿遷虹縣桃源清河安東山陽寶應高郵江都等十七州縣爲黃運兩河必經之地請敕令江南督撫照東豫兩省之例

於所屬州縣內擇才堪肆應者會同保題引見調補如遇緊急要工俾印河各官協力勦事從之○賑山東鄒平等十二縣濟南一衛水災饑民○辛丑諭內閣朕今年五十已有諭旨不行慶賀禮昨楊名時南天祥奏摺俱稱今年進京慶祝萬壽朕思

聖祖仁皇帝久道化成聖德神功際天蟠地當年五十

聖壽之時尚未允行慶賀之禮朕臨御以來雖時時有勵精圖治又安海宇之心而實在善政善教可以造福於社稷蒼生者何事堪以自信正當君臣交相儆勉期於有成又安可為此粉飾之事以滋煩擾乎朕之待下惟有一誠諸臣果矢誠懇之念於隱微寤寐之中尊君親上如詩書所載元后父母之誼豈不勝於拜舞彤墀效稱觴祝嘏之儀節乎外任諸臣俱不必具本奏請來京只照常年之例行若有因地方事務應來京陛見者朕自另

降諭旨其各省耆民等若有欲來京慶祝者著地方官切止之再各省地方若有指稱萬壽建立經壇或聚集梨園誼諱糜費者此皆生事不安本分之徒誘惑愚人希圖財利尤宜嚴禁儻有司不行禁止經朕訪聞定照欺罔之律治罪○調鑲紅旗蒙古副都統薩爾禪為正黃旗滿洲副都統陞鑲紅旗叅領岳岱為本旗蒙古副都統○添設宗人府宗室御史二員屬都察院管轄○壬寅調兵部左侍郎阿克敦為吏部左侍郎仍署理廣東巡撫印務以署刑部侍郎正白旗滿洲副都統岳爾岱為吏部右侍郎仍兼副都統轉兵部右侍郎圖理琛為左侍郎調禮部右侍郎永壽為兵部右侍郎刑部右侍郎莽鵠立為禮部右侍郎以公塞爾臣署理禮部右侍郎○盛京兵部侍郎吳爾泰緣事降調陞都察院左副都御史永福為盛京兵部侍郎○以鑲黃旗漢軍副都統石文煥署正藍旗漢軍都

統○陞山東布政使張保為刑部右侍郎直隸口北道岳溶為山東布政使司布政使○癸卯

孝端文皇后忌辰遣官祭

昭陵○四川布政使佛喜緣事降調以署通州副將管承澤為四川布政使司布政使○旌表直隸肅寧縣烈女傅之玉女傅氏拒姦不污被刃殞命給銀建坊入祠致祭如例○甲辰正藍旗滿洲都統公音德惠病解任以其

子訥親襲替○調鑲白旗滿洲都統希爾根為正藍旗滿洲都統○乙巳諭宗人府淳親王子弘曙愚昧怠惰竝無勉勵成人之意著將其長子革去伊弟弘曙人老成著封為長子○議政王大臣等遵旨議覆雲貴總督鄂爾泰疏言中甸一區為雲南西面藩籬延袤二千餘里應設弁兵以資控制但中甸雖地大民衆天氣寒冷不能種植維西一帶天氣和暢又接鶴麗鎮劍川協之汛防外通西藏

實緊要之區應於維西建立大營設參將一員千總一員把總一員兵四百名駐劄中甸地方應設守備一員把總一員兵丁二百名駐劄中甸之格咱地方應設兵五十名奔雜拉渡口應設把總一員兵五十名祁宗喇普二處應各設兵五十名阿墩子應設千總一員兵一百五十名浪滄江應設把總一員兵五十名其守備千把兵丁統屬於維西營之參將仍聽鶴麗鎮統轄則聲勢聯絡呼應得靈其設兵一千名應於鶴麗鎮抽兵四百名劍川協抽兵二百名援勦左右兩協抽兵四百名撥歸維西營餉銀移彼就此已敷給放其所設營弁應裁援勦右協守備一員兩協標千總各一員把總各二員撥補維西營止須設參將一員一轉移間內外營制俱合機宜而兵餉不致增添矣均應如所請得旨維西一區乃通藏之路甚屬緊要今令兵丁移駐邊遠地方搬移家屬等項不可節省錢糧

必須豐裕足用。施恩前往。著降旨與總督鄂爾泰辦理。餘依議。雲貴總督鄂爾泰題。雲南永昌府灣甸土知州景先哲故請以其子景榮名承襲下部知之。○丙午。諭議政王大臣等。雍正三四年以來。外省將軍督撫提鎮等多有請於該地方添設子母礮者。經議政王大臣及兵部議行。昨閱

聖祖仁皇帝實錄內載。山西總兵官金國正額捐造子母礮一疏。奉

諭旨。子母礮係八旗火器。各省概造。斷乎不可。皇考必另有聖意。朕因不知當時曾有此旨。遂爾准行。今既已錯誤。應如何辦理。著議政王大臣定議具奏。尋議。子母礮原係內製。不便通給外省。前議准行。實臣等錯誤。今議盛京寧古塔近海黑龍江與鄂羅斯接壤。三處仍照前設立子母礮一百位。此外各省舊存子母礮及捐造者。悉令查明送部。至礮位係軍中必需之器。查各省每兵一千名。設立威遠

礮四位。子母礮六位。應行令該將軍督撫提鎮查明本省礮位。咨明臣等。按冊酌撥。以符原額礮位之數。若本省不足。或於隣省移取。或動正項錢糧製造。得旨。各處應設礮位。俟撥給齊備之後。將彼地所有子母礮。賞送來京交部。以護軍統領克什圖為正白旗領侍衛內大臣。丁未。刑部議覆署直隸總督宜兆熊疏。言順義縣民張四。戕死旗人方冬魁。應絞監候。得旨。方冬魁乃旗下閒散之人。理應安分家居。今因飲酒沉醉。見張四。不讓坐。遂恃強罵詈。扭打致張四情急。刀戕殞命。向來居鄉旗人。欺陵民人者甚多。即方冬魁之事。可見。著將張四免死。枷責。從輕發落。為旗人恃強陵弱者戒。竝曉諭八旗及各屯莊居住之旗人。咸使聞知。○署湖廣總督福敏摺奏。謬沖花苗蠢動。經臣會商黔省協力擒捕。今黔省委撥遊守二員。帶兵三百五十名。臣委遊擊吳文都司劉策名。帶兵三百名。

會齊進剿黔兵堵截後路楚兵從前路直抵賊寨兕苗四散逃竄深箐官兵深入搜捕現在通行窮追臣又飛檄副將黃賢協同擒剿務盡根株俟事竣日查明疆界作何安設塘汛巡防善後之策臣與黔省督撫提臣會同酌議奏聞奉

上諭閱奏捕苗情形深愜朕懷此番籌畫甚合機宜戊申以散秩大臣公夸岱阿齊圖佛倫侯陳泰五格拉歌侯噶爾薩俱為內大臣移雲南鶴慶府通判駐維西添設劍川州判一員駐中甸從雲貴總督鄂爾泰請也己酉諭內閣治天下之道在於用人今日刑部堂官塞爾圖等保舉筆帖式一人陞補主事朕問其在部辦事幾年則對曰三月又問所以保舉之由則曰因伊坐臺十二年是以舉之朕令內外各衙門遴選人員者原期官得其人人稱其職使吏治民生均收實效也況刑部為民命所關朕尤加意慎重惟恐

用人不當使刑罰偶失其平干

天和而枉國法此意乃舉朝所共知者塞爾圖等以朝廷量能授職之典視為用情市恩之地此不過身受者一人感激而已而欲有益於國家之事生眾人鼓勵之心豈可得乎朕治天下用賞用罰悉秉至公夫賞所當賞則在朕竝非加恩而受之者不必私感罰所當罰則在朕竝非用威而受之者亦不當懷怨凡受恩而生感者即受罰而生怨者也施恩而喜人之感激者即用罰而懼人之怨望者也然則喜人感激將日日施恩而懼人怨望不幾置法度於不用乎塞爾圖等身為大臣乃庶官之表率今存卑鄙狹小之見既欲市賣私恩則必迴避嫌怨似此私心自用即作威作福之所由也此風斷不可長是以特行宣諭令內外臣工咸以為戒○又諭領侍衛內大臣六員實授內大臣亦著定為六員朕特旨額外補授者可准為額外之員○辛亥



諭河道總督齊蘇勒兩江總督范時繹江蘇巡撫陳時夏欽差督理江蘇水利李淑德陳世倌朕軫念民依以蘇松地勢稍下特遣大臣會同督撫開濬水道爲久遠之計太湖之水歸海者經劉河白茆河居多必徑直深廣令水暢出方能一勞永逸圖誌所載二河形勢數十里一徑直趨入海無少曲折因海口爲潮沙壅塞悉成平陸今既開濬疏通務必盡去新漲地畝以復故道聞有地方土民不願開濬投遞公呈或請別開支河或請另開新道其言紛紛不一此皆背公懷私之徒也儻至惑於聽聞依違遷避使積水不能暢出數年後仍致壅塞則罪不可逭矣該督撫欽差等當竭力秉公詳勘務爲一勞永逸之策或有生事阻撓者指名叅處嚴禁刁風無得少有欺隱苟且塞責了事異日代人受過也○壬子諭內閣安南國定界一事朕已加恩別議立界該國王不知感激又復具本從廣

東雲南二省總督處求爲題達伊愚昧無知朕當頒敕諭再行開示昨鄂爾泰奏稱已移咨文前去如文到日該國王已遵奉施行則此不必再頒一切事宜著鄂爾泰妥酌行之○吏部題二等阿思哈尼哈番陳俊因病休致應銷去恩詔所得拖沙喇哈番餘三等阿思哈尼哈番以其子陳國儀襲替從之○旌表河南商邱縣烈婦張孟林妻苗氏拒姦被刃貞烈不污給銀建坊入祠致祭如例○癸丑諭內閣朕以移風易俗爲心凡習俗相沿不能振拔者咸與以自新之路如山西之樂戶浙江之惰民皆除其賤籍使爲良民所以勵廉恥而廣風化也近聞江南徽州府則有伴僮寧國府則有世僕本地呼爲細民幾與樂戶惰民相同又其甚者如二姓丁戶村莊相等而此姓乃係彼姓伴僮世僕凡彼姓有婚喪之事此姓即往服役稍有不合加以箠楚及訊其僕役起自何時則皆茫然無考非

實有上下之分不過相沿惡習耳此朕得諸傳聞者若果有之應予開豁為良俾得奮興向上免至污賤終身累及後裔著該撫查明定議具奏尋禮部議覆安慶巡撫魏廷珍遵旨議奏江南徽寧等處向有伴傭世僕名色請嗣後紳衿之家典買奴僕有文契可考未經贖身者本身及其子孫俱應聽從伊主役使即已贖身其本身及在王家所生子孫仍應存主僕名分其不在王家所生者應照旗人開戶之例豁免為良至年代久遠文契無存不受王家養者概不得以世僕名之永行嚴禁應如所議從之○授一甲進士彭啟豐為翰林院修撰鄧啟元馬宏琦為翰林院編修○西洋博爾都噶爾國王若寧遣使麥德樂表貢方物宴賚如例○甲寅調正白旗漢軍副都統常保為鑲黃旗蒙古副都統陞鑲白旗護軍叅領德爾芬為正白旗漢軍副都統○乙卯諭八旗大臣內務府總管等直

隸州縣緝拏逃盜每每察訪至內府莊頭之家而莊頭等護庇不令緝捕以致逃人盜案匪類不絕再八旗在屯居住人等多係不思上進怠惰浮薄之輩竟有窩藏逃盜欺陵百姓好事妄為者若不嚴加約束必至妄生事端八旗都統內務府總管等行文直隸總督及巡察御史嗣後內府莊頭及鄉居旗人有窩藏逃盜在家者地方官差役搜捕有抗拒者即將窩家一併拏究或有不守本分酗酒生事妄為者該地方官即行詳報總督若係旗人由總督移咨該旗係內府莊頭移咨內務府該旗及內務府將應行審理者即行審理應行拏送者即行拏送若有遲延違誤將爾等治罪若地方官徇隱不行詳報總督或已詳報而總督不行移咨各該管處者被巡察御史題叅該總督及州縣官一併嚴加議處巡察御史徇隱不行查叅或別案發覺或經朕訪聞務必重治其罪如此立法則內府

莊頭及居鄉旗人各知警戒畏法守分而直  
隸地方窩藏逃盜之弊可清於鄉居旗人百  
姓亦大有裨益○宣化總兵官李如柏疏言  
宣鎮所屬各營請於執三眼鎗及大刀兵丁  
內酌改數名爲藤牌手得旨各處營伍所習  
武藝所用器械原無定制是以武弁到任往  
往以己所好尚操演所屬兵丁學習未久而  
接任旋復更改非訓練專精之道也除騎射  
通行學習外其餘各種操演著該上司會同  
通省大員因地所宜酌量永遠規制定議以  
聞

大清世宗敬天昌運建中表正文武英明寬仁  
信毅大孝至誠憲皇帝實錄卷之五十六

大清世宗敬天昌運建中表正文武英明寬仁  
信毅大孝至誠憲皇帝實錄卷之五十七

監修禮部官光祿大夫經筵講官太僕寺卿和碩大學士兼兵部尚書總理兵部事務伯加十三級戶部尚書

禮部尚書光祿大夫經筵講官起居注太僕寺卿和碩大學士兼兵部尚書總理兵部事務伯加十三級戶部尚書

事官伯加十三級戶部尚書光祿大夫經筵講官起居注太僕寺卿和碩大學士兼兵部尚書總理兵部事務伯加十三級戶部尚書

翰林院掌院事加二級戶部尚書光祿大夫經筵講官太子太僕寺卿和碩大學士兼禮部尚書伯加十三級戶部尚書

經筵講官議政大臣內閣大學士書院部尚書仍兼管太常寺鴻臚寺事官伯加十三級戶部尚書

敕修

雍正五年丁未五月丙辰朔陞鑲白旗蒙古

副都統塔拉圖為正藍旗護軍統領○戊午

孝誠仁皇后忌辰遣官祭

景陵○調正白旗滿洲都統拉錫為鑲白旗滿

洲都統以正藍旗滿洲副都統多賽署鑲黃

旗蒙古都統○己未夏至祭

地於

方澤遣康親王崇安行禮○諭內閣前織造等

衙門貢獻物件所進御用繡線黃龍袍曾至

九件之多又燈幃之上有加以綵繡為飾者

朕心深為不悅即降旨誠諭近因端陽令節  
外間所進香囊宮扇中有裝飾華麗雕刻精  
工者此皆開風俗奢侈之端朕所深惡而不  
取也向來外省諸臣凡有進獻方物朕每頒  
賜諸王內外大臣如黃龍繡緞之類既不可  
以頒賜不過收貯於宮中耳其餘華燦之物  
在朕用之心中尚覺不安若賜諸王大臣在  
伊等亦覺非分豈非費於無益之地乎況朕  
素性實不喜華靡一切器具惟以雅潔適用  
為貴此朕搏節愛惜之心本出自然並非勉  
強數十年如一日者凡外臣進獻惟應量加  
工價少異於市肆之物即可見恭敬之忱何  
必過於工巧人情喜新好異無所底止見一  
美麗式樣初則競相慕效後必出奇鬬勝此  
雕文纂組古人所以斥為奇袤豈可導使為  
之而不防其漸乎蓋治天下之道莫要於厚  
風俗而厚風俗之道必當崇儉而去奢若諸  
臣以奢為尚又何以訓民儉乎朕觀四民之

業士之外農爲最貴。凡士工商賈皆賴食於農。以故農爲天下之本務。而工賈皆其末也。今若於器用服玩爭尚華巧。必將多用工匠。市肆中多一工作之人。則田畝中少一耕稼之人。且愚民見工匠之利多於力田。必羣趨而爲工。羣趨爲工。則物之製造者必多。物多則售賣不易。必致壅滯而價賤。是逐末之人多。不但有害於農。而並有害於工也。小民舍輕利而趨重利。故逐末易而務本難。苟遽然繩之以法。必非其情之所願。而勢有所難行。惟在平日留心勸導。使民知本業之爲貴。崇尚樸實。不爲華巧。如此日積月累。遂成風俗。雖不必使爲工者盡歸於農。然可免爲農者相率而趨於工矣。至於士人所業在乎讀書明理。以爲世用。故居四民之首。然父兄之教子弟。亦當觀其才質如何。若果穎悟。恂謹。可望有成。則當使之就學而爲士。若愚濁。中下之資。讀書難通。即當早令改業。使盡力於南畝。誠恐讀書不成。而又粗識數字。曠廢閒遊。必

致非分妄爲。越禮犯法。是浮慕讀書之名。而不得其道。其傷農而害本者。爲尤甚也。朕深揆人情。物理之源。知奢儉一端。關係民生風俗者至大。故欲中外臣民。黜奢賤末。專力於本。人人自厚其生。自正其德。則天下共享太平之樂矣。朕自身體力行。爲天下先。諸王內外大臣。文武官弁。與鄉紳富戶。當深體朕心。欽遵朕諭。期共勉之。○諭吏部。庶吉士陳浩等。教習已久。今加考試。應分別授職。除編修王安國。已經授職外。清書庶吉士陳浩。趙昶。嚴源。壽。劉統勳。黃祐。俱著授爲編修。劉統勳著在南書房行走。漢書庶吉士吳應枚。汪由敦。王峻。吳龍。應蔣。振鷺。李清植。趙大鯨。于枋。朱良。裘吳。兆雲。開泰。楊士鑑。徐煥。然。吳廷熙。顧贊。熊暉。吉。俱著授爲編修。張若涵。程光鉅。俱著授爲檢討。徐天麒。以部屬用。諸錦。周廷燮。陳璟。歸進士。原班用。舒明著再教習三年。○庚申。諭內閣。朕覽治河方畧。見原任河道總督靳輔。昔年修理河工。勞績茂著。

欲加恩澤以獎勲庸據該部查奏靳輔於康熙四十六年已蒙

聖祖仁皇帝加贈官保給與世職今著追贈工部尚書銜予祭一次以示朕篤念前勞至意○辛酉諭內閣今科選拔庶常應如何簡選考試務得人材以濟實用爾等會議具奏尋議進士選拔庶常原屬儲才大典必得學問素優才品兼著之士方可選列清華查雍正元年癸卯科殿試後集諸進士於保和殿

御試竝令九卿各舉所知雍正二年甲辰科照前舉行今科進士亦應詳加考試仍令內閣九卿確行保舉其考試擬用論詔奏議詩四題或作一二篇或諸體全構聽其各展所長屆期欽點大臣閱卷進呈其進士內有彼此熟悉素為衆所推服者亦令公同舉出伏候皇上親加選定從之○以戶部左侍郎常壽署禮部右侍郎○壬戌議政王大臣等議覆署黑龍江將軍公傅爾丹奏言墨爾根城舊有

額兵九百名竝無鎗礮船隻請添置漢軍二佐領挑選兵一百名設佐領二員驍騎校二員合前兵共一千名照例添設鎗礮船隻令其操演應如所請從之○內閣等衙門議奏查嗣庭蒙恩擢用歷官至禮部侍郎陰懷二心忍行橫議臣等謹將查嗣庭所著日記悖逆不道大罪竝賁緣請託關節私書逐款究審嗣庭亦俯首甘誅無能置喙除各輕罪不議外應照大逆律凌遲處死今已在監病故應戮屍梟示查嗣庭之兄查慎行查嗣璫子查雲姪查克念查基應斬立決查嗣庭之子查克上在監病故次子查長椿查大梁查克緝姪查開查學俱年十五以下應給功臣之家為奴所有財產查明入官得旨查嗣庭著戮屍梟示伊子查雲改為應斬監候查慎行年已老邁且家居日久南北相隔路遠查嗣庭所為惡亂之事伊實無由得知著將查慎行父子俱從寬免釋放回籍查嗣庭之胞兄

查嗣瑯胞姪查基。俱免死流三千里。案內擬給功臣之家爲奴各犯。亦著流三千里。其應行拏解之犯。該撫查明。一併發遣。查嗣庭名下應追家產。著變價。留於浙江。以充海塘工程之用。○癸亥。輔國公阿布蘭緣罪革爵。封其姪法爾善爲輔國公。○以正白旗滿洲副都統博第。協理正白旗漢軍都統事務。○甲子。宗人府叅奏滿都護隱匿

聖祖仁皇帝硃批諭旨。應革去公爵。得旨。滿都護係朕親叔恭親王之子。是以朕即位時。任以要職。伊自委用之後。總不肯實心爲國家出力。惟戀戀於阿其那。蘇努。保泰等黨。與甘爲犬馬。不孝不忠。伊弟海山。人甚狂悖。海山之子倫木布。

聖祖仁皇帝望其成人。令隨乾清門御前侍衛處行走。及

皇考升遐。伊竟無滴淚。朕見其如此忘恩。實爲痛恨。故令於伊父海山處拘禁。滿都護之弟

對青額庸劣無恥。在侍衛班中。飲酒沉醉。竟在中和殿階上。洩溺。滿都護隱匿不叅。及朕聞知。止於革退。亦未將伊究治也。海山任貝勒時。滿都護任伊陵辱。隱忍不露。而暗將海山謀陷中傷。糾伊黨與。極力排擠。其姦詐處。朕知之最悉。雖時加訓誨。伊並不感恩改悔。而於其黨與。則甘心出其胯下。伊大罪甚多。不勝枚舉。因伊尚無子嗣。彼兄弟子姪中。又無可以襲封之人。是以朕俱寬免。今未交

硃批之事。以伊身所犯之罪較論之。此猶其小者耳。若將滿都護革去公爵。則恭親王子孫承襲無人。滿都護雖不念其父。朕豈不念朕叔父乎。著從寬免革公爵。俟伊改悔。○調福建汀州總兵官陳祖訓爲廣東南澳總兵官。廣東左翼總兵官朱杰爲福建汀州總兵官。福建金門總兵官謝希賢爲廣東左翼總兵官。○乙丑。以翰林院侍讀學士王蔭。沈翼機俱充日講起居注官。○刑部議覆。署江西巡

撫邁柱奏永新縣民朱倫三同姪朱三傑致死伊弟朱寧三一案。朱倫三應擬流徙，朱三傑應擬徒，得旨。從來兇悍之人，偷竊姦宄，怙惡不悛，以致伯叔兄弟重受其累，本人所犯之罪，在國法雖未至於死，而其尊長族人翦除兇惡，訓誡子弟，治以家法，至於身死，亦是懲惡防患之道，情非得已，不當按律擬以抵償。如朱倫三因伊弟朱寧三屢次犯竊，累伊鬻男變產代賠贓銀，又復偷牛被獲，故將朱寧三致死。朱三傑竝未與謀，若將朱倫三、朱三傑徒流等罪俱從寬免。嗣後凡遇兇惡不法之人，經官懲治，怙惡不悛，為合族所共惡者，准族人鳴之於官，或將伊流徙遠方，以除宗族之害，或以家法處治，至於身死，免其抵罪。著九卿詳悉定議具奏。尋議兇悍之人，伯叔兄弟治以家法，因而致死，若必按律擬抵，則不法子弟終不知所懼。嗣後許族人呈明地方官，照所犯罪科斷。若已經官懲治，仍

不悛，改該地方官查明過犯實蹟，流三千里。儻事起一時，合族公憤，處以家法致死，該地方官審明所犯確有應死之罪，將為首者照罪人應死而擅殺律，予杖。若罪不至死，將為首者照應得之罪減一等，免其抵償。若本人竝非兇悍不法，無過犯實蹟，而族人誣捏毆斃者，將為首之人仍照本律科斷。從之。○廣西巡撫韓良輔奏報蒼梧道張若需病故得旨。張若需居官勤慎小心，著加按察使銜，以示優卹。○旌表直隸深州烈婦馮喜公妻李氏拒姦不污，自縊全貞，給銀建坊，入祠致祭。如例。○丙寅，工部議覆江蘇七浦閘應留應毀事宜。據會勘水利廣東總督孔毓珣稱：太倉州七鴉河之七浦閘，係宣洩巴城諸湖及婁江之水，隨潮啓閉，請立閘夫啓閉，以收實用。陞任江南總督查弼納亦言：七浦與海口相近，為劉河要口，特為蓄洩，常熟諸湖竝海潮之水，歷今五十餘年，應仍其舊。戶部尚



書蔣廷錫則奏七浦地方自建閘以來潮水爲閘所阻潮大時閘外之田每慮浸溢潮小則閘內之田灌溉無資應請拆毀署江南總督范時繹亦言七浦閘河身窄狹潮進則其勢迅疾沙泥隨潮而入潮退則勢平緩不能盡隨而出輿情以拆毀爲便俱與孔毓珣所奏不同應再令范時繹及江蘇巡撫陳時夏會同河道總督齊蘇勒原任山東巡撫陳世倌郎中鄂禮丁憂在籍戶部尚書蔣廷錫等虛公確議畫一具奏從之○戊辰

皇后千秋節停止行禮筵宴○遣官祭

闕聖帝君○己巳詹事府詹事陳萬策緣事降調以順天府府尹劉於義爲詹事府詹事兼理府尹事○庚午賑廣東三水等五縣水災饑民○辛未大學士等奏遵旨詢問揚州府在京官員通政使繆沅等會議原任給事中許承宣條陳揚州水利一疏據稱揚州舊有陳公勾城上雷下雷小新五塘淤蓄天長

六合上游之水及盱泗壽春支流接於高寶各湖歷代資以濟運兼灌溉江都儀徵山田數十萬頃自明季豪強侵占爲田遂致堙塞僅邀照舊開修誠於地方有益得旨著交與總督范時繹總河齊蘇勒巡撫陳時夏定議具奏○工部議覆河東副總河嵇曾筠疏言蘭陽縣管梁蔡耿四水口一帶隄工河勢衝啗應將梁蔡耿三水口迎溜處所搶築埽壩加鑲堅固並於四水口隄南各築魚鱗月隄以作重門之障其二堡至三堡大隄水激隄鬆應幫築貼隄又祥符縣南岸李盤寨程家寨等處月隄卑薄應增築高厚祥陳二縣舊有民隄數處應一例加幫以資抵禦陳留縣七八九堡大隄地勢窪下汎水直射隄根隄北舊有隔隄年久殘缺並須與老隄一例增培以免衝刷之患應如所請從之○壬申以原任山東濟寧州副將李柟爲正紅旗漢軍副都統○癸酉調江西巡撫伊都立來京戶

部右侍郎署湖南巡撫布蘭泰爲江西巡撫。以浙江觀風整俗使王國棟爲湖南巡撫。浙江布政使許容以原銜爲浙江觀風整俗使。陞江南蘇松道孔毓璞爲浙江布政使司布政使。○調湖北巡撫憲德爲四川巡撫。四川巡撫馬會伯爲湖北巡撫。○旌表浙江海寧縣烈婦章大第妻蔣氏拒姦不污墮水殞命。給銀建坊。入祠致祭如例。○甲戌以鑲藍旗漢軍副都統傅泰爲戶部右侍郎。○旌表河南汜水縣烈女李愈女李氏守正拒姦被刃殞命。給銀建坊。入祠致祭如例。○乙亥以正白旗滿洲副都統博第署正藍旗蒙古都統。○陞鑲紅旗漢軍副都統金以坦爲江南京口將軍。湖廣襄陽總兵官張溥爲鑲紅旗漢軍副都統。調河南南陽總兵官楊鵬爲湖廣襄陽總兵官。陞貴州定廣副將馬世龍爲河南南陽總兵官。○以署直隸古北口提督郭成功爲陝西寧夏總兵官。陞直隸正定總兵

官楊鯤爲直隸古北口提督。以原任直隸正定總兵官張起鵬爲直隸正定總兵官。○吏部議奏雲貴總督鄂爾泰勦撫烏蒙鎮雄土府有功應加二級。得旨鄂爾泰著加二級。賞給拜他喇布勒哈番世職。○兵部議覆雲貴總督鄂爾泰疏言貴州安順州四面環夷。五方雜處。請立安順一營。設守備一員。千總一員。把總二員。將壩陽石頭寨黎兒哨。山京四汛。歸併管轄。即移四汛兵三百二十名。分防汛守。竝移安順府經歷一員。兼巡檢職銜。駐安順州城內專司查緝。均應如所請。從之。○刑部奏。向例在京問擬徒罪人犯。無論本地及外省人民。俱送順天府府尹衙門充發。限滿仍聽回京。京師首善之地。豈宜令姦徒雜處。請嗣後問擬徒犯。順天府所屬州縣。仍送該府尹發遣。其餘各省民人。俱遞回各該處督撫衙門發遣。年限滿日。交與地方官管束。不許再至京師。如有私自來京者。拏獲之日。

加責遞回該地方官照例議處其容留之家亦一併分別旗民治罪得旨此等匪類豈但不宜再令來京即往別省亦生事妄行嗣後徒犯限滿回籍交與地方官嚴行管束不許出境僅有私自出境及在本處生事者地方官查明即將該犯擬流遠省如該地方官管束不嚴聽其出境生事定行嚴加處分丙子以康親王崇安管理正藍旗三旗事務添設湖北漢陽縣漢口鎮巡檢一員從湖北巡撫憲德請也戊寅

孝恭仁皇后忌辰遣官祭

景陵己卯刑部議覆福建巡撫毛文銓疏報鹽梟彭瑞仁等致死鄭建如一案查彭瑞仁拒捕殺人明係大夥私販應令該撫訪拏夥黨并將失察各官查叅得旨部駁甚是毛文銓前任貴州巡撫時朕聞其全不實心任事降旨調回時因福建巡撫員缺朕見毛文銓奏對明白且歷外任已久因諄切開導冀其

後改前非伊亦感悔流涕是以授為福建巡撫詎意下愚不移到任之後沽取虛名一切刑名錢穀事件全不實心辦理以致地方姦徒橫行官吏恣意作弊倉庫亦多虛懸每次陳奏地方事務俱屬虛誑支吾朕燭照其姦屢加訓飭今又以私梟拒捕殺人之案稱為零星小販並不究訊夥黨查叅失察各官似此曲法縱姦大負朕委任之意有玷封疆重任甚屬可惡毛文銓著解將軍任留閩將此案務須據實審明定擬具奏○戶部遵旨議

覆廣東巡撫楊文乾條奏廣東事宜三款一請廣積貯查粵省倉穀見存一百六十餘萬石又去冬奉旨令廣西運穀三十萬石已足備用嶺南潮濕之地倉穀不便多貯惟惠潮瓊三府僻處海隅產米甚少請酌增穀石分貯各屬縣應如所請一請修圍基據楊文乾奏稱須用石工阿克敦則稱土隄易於修理意見不同難以遙定應遵旨俟孔毓珣楊文

乾到京會同九卿另議。請開捐例。查捐穀事例。本因積貯起見。今廣東增貯倉穀。爲數無多。應無庸議。從之。○庚辰。諭直省司道府等官。朕惟治道之要。莫大於用人。督撫經理地方。必任用司道知府。猶朕統御天下。必任用在廷諸大臣。如廷臣不能實心任事。則庶務之繁。朕豈能以一人獨理。如司道府不能實心任事。則屬員之賢否。民生之利弊。督撫豈能徧悉而周知。用人之關於治道。誠至重矣。第人之才具不同。心術各異。用之有甚難者。彼司道府等官。有一等姦巧之人。督撫有所委託。稍涉繁難。謂非分內所應辦。即逡巡退縮。似此懷姦詭避。而反沽不阿諛上司之名。此人之不能爲督撫用者也。有一種好事之人。不安本分。惟所欲爲。如遇無能之督撫。則事無大小。任其簸弄。督撫爲所把持。而不能自主。如遇有爲之督撫。則巧窺意指。百計投合。督撫不覺入其彀中。一任逞其私智。此

又督撫之用非其人者也。顧爲督撫者。勢不能不於所屬之司道府。寄耳目。委腹心。必將遴選其能任事者而委任焉。人見其於稠人之中。專任一二人。則指爲鑽營奔競。甚至媒孽其短。以爲怙勢作威。攬權納賄。必致損敗督撫之聲名。此等皆非公恕之論也。且其人既爲督撫所信任。自當不取悅於同官。不徇庇乎下屬。銳意孤行。無所顧惜。其心有何攬權怙勢之可言哉。論者不察其心。從而媒孽之。抑何不恕之甚乎。朕以爲人之行事所辨在公私是非之間而已。向令此一二專任之司道府官。果能秉公持正。實心辦理地方之事。不特督撫資其贊助。朕亦且嘉賴焉。要之用人有專任一二人者。亦事勢有所不得已焉耳。設使各省司道府等官。皆殫其宣力分猷之實。則督撫何樂而不多用也。亦猶在廷諸大臣。人人公忠體國。則皆朕之股肱心膂。朕求之而不可得者。又何取乎一二人之專

任哉。但知人則哲。惟帝其難之。彼爲督撫者。因屬員中不能盡得其人而用之。乃不得已而以耳目腹心。專付之於一二人。或有擇之不精。用之不慎。所託非人。稍有所覺。即當警省改悔。不可袒護飾非。則無過矣。朕實深悉直省督撫用人之委曲。復洞鑒直省司道府各官種種情僞。爲此諄切曉諭。俾各警惕猛省。直省督撫務須仰體朕意。將屬員時加體察。勿爲宵小欺蒙。朕自有遠照。斷不使若輩少有遁情。夫天下上智下愚之人無幾。惟中材可與爲善。可與爲不善者居多。尚其敬聽朕訓。共勉爲秉公持正。實心辦事之人。下不愧州縣之表率。上以不負督撫任用者。不負朝廷。則吏治蒸蒸日上。措天下於郅隆。不亦美與。○命內務府總管步軍統領巡視五城御史嚴查內務府及諸王貝勒等門下放出爲民之太監。發回原籍。○二等精奇尼哈番劉俊傑緣事革退。以原立官劉良佐之孫常

住襲職。○壬午諭議政王大臣等。安西新設重鎮。其兵馬錢糧。係按季赴蘭州支領。但邊陲重地。恐有一時需用之處。朕意欲撥銀數萬兩。交與安西總兵官存貯備用。哈密亦著存貯數千兩。儻有需用。准該鎮一面奏聞。一面動用。爾等會同定議具奏。尋議安西兵馬錢糧酌撥銀四萬兩交貯該鎮。其哈密遇有需用。亦於此項內撥給。得旨著於四萬兩之外。再撥銀二萬兩。以備兵丁平時通融之用。不必具奏。仍於發餉時照數扣除。○陞一等侍衛納秦爲奉天副都統。寧古塔副都統阿岱緣事降調。陞二等侍衛常德爲寧古塔副都統。○甲申以署兵部尚書黃國材辦理刑部尚書事。工部左侍郎鄂爾奇協辦刑部事務。○予故南澳總兵官聶國翰祭一次。

大清世宗敬天昌運建中表正文武英明寬仁  
信毅大孝至誠憲皇帝實錄卷之五十七

大清世宗敬天昌運建中表正文武英明寬仁  
信毅大孝至誠憲皇帝實錄卷之五十八

監修總裁官光祿大夫經筵講官太僕寺卿兼翰林院掌院學士等伯加十三級臣

總纂官光祿大夫經筵講官起居注太僕寺卿兼翰林院掌院學士等伯加十三級臣

纂修官光祿大夫經筵講官起居注太僕寺卿兼翰林院掌院學士等伯加十三級臣

翰林院掌院學士加二級臣

經筵講官議政大臣協辦內閣大學士事務禮部尚書仍兼官太常寺卿詹事府詹事等奉

敕修

雍正五年丁未六月丙戌朔諭內閣近有不

實錄卷五十八

法匪類造作訛言一人煽惑眾口喧騰以致  
人心驚惶良民受累如京城之訛傳挑選秀  
女賜西洋人浙江之訛傳海寧屠城此必姦  
惡之徒不肯改過遷善怨朕約束懲治甚嚴  
故肆其鬼蜮之伎倆搖惑眾心以希朕之畏  
而中止此則大悞矣朕非庸懦無能主也如  
京城造言之人現在拏獲按律治罪惟是百  
姓等一聞浮言遂爾倉皇失措皆由平日不  
知朕之存心故易為所動在姦民固罪不容

誅而小民無識亦殊覺愚而可憫也朕自臨御以來日夕憂勤惟以愛民爲念凡所行之政所發之令無一不準乎天理體乎人情多方籌畫委曲周詳愛我百姓實懷父母保赤之心思勤惻怛出於至誠若有一毫不便於民立即措置得宜務使安居樂業無一夫不獲其所故地方一有不肖官員不法姦民定加懲治蓋恐姦邪一日不去良善一日不安且亦欲令姦邪改過自新同歸於善此一片真誠愛民之苦心

上蒼

后土

聖祖在天之靈鑒之凡我赤子宜無不昭然共見假如偶有傳聞其事若不合乎天理人情即應度理揆情以爲此斷非我主上所行者果如此深信不疑縱使無稽之言百端傳播亦付之不聽而消歸烏有矣浙江風俗向來澆薄士子不守禮教勢豪欺壓鄉閭恣意橫

行罔知國法不得不嚴加整飭使惡黨潛踪愚民安堵此更朕保護浙人之舉豈非棄之於化外俟能改行率德之時朕自仍沛恩膏也總之姦惡之人懲不畏死謗國害民法所不宥嗣後該地方有司務期密訪嚴拏立置重典凡爾遠近良民當共信朕斷不肯爲累民之事一切浮言彼此相戒勿聽則俯仰順適寤寐安舒永無倉皇失所之慮庶不負朕勤民保赤之心而姦惡不法之輩亦無所逞

其伎倆矣著將此發與五城順天府及各直省督撫轉行各州縣刊刻頒布務期遠鄉僻壤咸使聞知吏部議覆貴州布政使祖秉圭條奏外任各官已犯黜革之條自知功名不保經營歸計不顧官箴請嗣後督撫於題叅後即行摘印遴員委署查大計八法及虧空錢糧舊例出本後即行摘印至於錢糧經徵經催刑名承緝接緝凡關係革職者須詳核分數扣算限期方可定議況降調官員或

有加級紀錄抵銷未便遽行摘印得旨凡外任各官有應行降調革職者或奉朕特旨留任故該部議稱未便遽行摘印但祖秉圭所奏亦切中情弊不可不加防範嗣後該督撫題叅降調革職之員即行摘印委員署理俟該部議覆奉旨定案之日再行開缺若有旨寬免仍准復任永著爲例○河道總督齊蘇勒會同西安巡撫法敏山西巡撫德明署山東巡撫塞楞額副總河嵇曾筠河南巡撫田文鏡遵旨查奏黃河澄清各省起止日期陝西山西於雍正四年十二月初八九等日起至五年正月十二三等日止河南於十二月初九日起至五年正月初十日止山東曹縣於十二月初九日起至五年正月初十日止單縣於十二月初九日微清十六十七十八等日澄清徹底至二十二日以後復舊江南於十二月十六日起至二十三日止此見黃河澄清自上而下也再查河清於江南之桃

源而止十二月二十三日桃源以上迄於河南交界始見濁流自是而接壤之界以漸復舊最後山西陝西於正月十二三等日止此見濁流復舊自下而上也計陝西清三十六日山西清三十五日河南清三十一日山東單縣清十四日江南清七日實爲千年之嘉應

聖世之瑞徵疏入報聞○署湖廣總督福敏奏虧空社倉穀石各員請分別議處得旨社倉之設所以預積貯而備緩急朕御極以來令各省舉行曾屢頒訓諭務俾民間踴躍樂輸量力儲蓄不可繩以官法誠以官法相繩則勉強催促轉滋煩擾惟期設法開導使衆樂從不致一毫擾累乃爲盡善也數年之內各省督撫奉行最力者惟湖廣總督楊宗仁今據福敏陸續盤查具奏前來始知原報甚多而現貯無幾此中情弊想因不肖有司侵蝕入已或那移以掩其虧空又或楊宗仁銳



於舉行而各官迎合其意虛報穀數以少爲多均未可定總之舉行社倉之法其中實有甚難者我

聖祖仁皇帝深知其難是以李光地奏請而未允張伯行暫行而即罷此實事勢使然也以民間積貯言之在富饒之家自有蓄積雖遇歉收而無藉乎倉穀則當輸納之時往往退縮不前至貧乏之家仰給社倉固爲殷切而每歲所收僅供生計又無餘粟可納以備緩急此責諸民者之難也至於州縣官實心視百姓爲一體者豈可多得今以常平之穀爲國家之公儲關係己身之考成尚且侵欺那用虧空纍纍況民間之社倉安能望其盡心經理使之實貯以濟用乎朕之舉行社倉實因民生起見又諸臣條奏多言之鑿鑿是以令各省酌量試行以觀其成效何如並非責令一槩施行也湖廣社倉虧缺之數即交與福敏悉心清查僅穀已如數交倉而州縣侵

蝕那移忍以百姓預備之需充一己之私用者著即於原侵那之州縣名下嚴追賠補或民間原未交倉或交倉之數與原報之數多寡不符者若必欲令民間照數完納恐小民力有未敷未免竭蹶非朕曲體民隱之意福敏辦理此事必須至公至當方於吏治民生兩有裨益也自古有治人無治法必有忠信樂善之良民方可以主社倉之出入必有清廉愛民之良吏方可以任社倉之稽查各省官民果能實力奉行而善全無弊朕實嘉之至於繩以官法而好尚虛名則有司奉行不善負朕本意矣丁亥諭內閣學政一官所以化導士習養育人材職任甚重近年以來各省督學諸臣頗能仰體朕心祇遵朕訓矢公矢慎杜絕苞苴深可嘉獎但向來學政恣行貪劣以國家興賢造士之途視爲射利營私之地此固本人之不肖而亦大半由於提調官員贊成之也其學政之秉心貪劣者

與提調官通同作弊固不待言而學政之可與爲善可與爲惡者提調官則引誘之或挾制之使不得全其操守而於其中網取厚利此提調官之惡習而天下之所通知者也學政原有關防若提調官持正秉公則學政必不能肆行無忌學政果能公明廉潔提調官更當敬禮而玉成之豈可反導之爲非乎提調與學政相爲表裏嗣後學政聲名不好應將提調官一併議處其如何定例之處著九卿會議具奏尋議學臣考試凡關防啟閉以及拆卷發案俱經提調官之手如有通同作弊者應照貪官例革職提問如學臣私鬻名器提調官防範不嚴照溺職例革職如有胥吏招搖受賄等弊提調官不行訪拏別經發覺照失察衙役犯贓例議處儻學臣操守清廉提調官反爲引誘挾制者准學臣即行指叅照貪官例治罪從之○戊子戶部議覆前任四川巡撫馬會伯疏言楚民入川落業者

定例令地方官給與印照驗放近有自湖廣福建江西廣東來川者竟無執照可驗窮民挈眷遷移若勒令回籍必致流離失所任其接踵而來又恐姦良混襍伏乞敕下各省撫臣凡入川窮民務令各該地方官給以印照到日驗明安插查康熙五十一年湖南巡撫潘宗洛題請楚民入蜀開墾該地方給與印照仍造冊送四川巡撫查驗有回楚省者川撫亦給照造冊兩相稽查遵行在案應如所請行文福建等省遵例給照四川巡撫亦轉飭確查其應准入籍者即編入保甲加意撫綏毋使失所從之○己丑諭內閣朕所交事件甚多諸大臣因何不行覆奏若事不可施行應將不可施行之處聲明具奏朕不憚暑熱竟日坐勤政殿竟無事辦而諸大臣如此因循不奏其意將誰諉乎著內閣將朕交與各該處一切事件俱查明具奏嗣後奉特旨所交事務竝揀選引見人員等事著該處每

月將已結未結情由聲明交送內閣。於月底彙奏。尋議臣等遵旨行文各部院衙門。將一切事件每月聲明已未結情由送閣彙奏外。其內務府另設有御史。應仍交該御史稽察。步軍統領所辦之事。與別衙門不同。應仍交步軍統領奏聞。八旗向有當月人員。應即交當月之都統副都統等查奏。得旨。步軍統領衙門事件。亦著派滿漢御史各一員稽察辦理。○庚寅。旌表山東曹縣烈婦邵東妻趙氏。拒姦不污。被刃殞命。給銀建坊。入祠致祭。如例。○辛卯。諭內閣。常平倉穀。乃民命所關。數年以來。朕爲此事宵旰焦勞。諄諄訓誡。若地方大小官員。苟有人心。斷不忍置之膜外。查福建通省應貯米穀。共一百七十八萬石。爲數可謂足矣。乃上年稍覺歉收。米價畧長。而地方大小官員。與兵民之心。皇皇以缺米爲慮。彼時朕即疑閩省積貯之數。必有虧空。故地方情形若此也。近聞閩省各屬倉穀錢糧。

虛懸者甚多。有銀穀兩空者。有無穀而僅存價值者。至於實貯在倉者。則十無三四。毛文銓身爲巡撫。奉朕面訓。切諭乃將無作有。捏稱實貯在倉。敢於欺罔。且忍以百姓性命之所需。供屬員之侵那作孽。負國負恩。莫此爲甚。向來直隸江西二省倉儲不實。經朕特遣大臣前往逐一清查。茲遴選人員。命往將虧空之州縣官。即行更換。是以二省倉穀漸次清楚。今閩省積弊若此。亦當特遣大臣會同新任巡撫。常賚將通省倉穀秉公據實。一一清查。其揀選府州縣等官。著即帶往。并前所發人員。遵照諭旨。分別題補委署。如有查出虧空之州縣。並失察之知府等官。即將伊等解任。審追其員缺。將前後命往人員。應題補者。題補。應委署者。委署。務期徹底澄清。不使絲毫朦混。以副朕察吏惠民之至意。○諭翰林院。選拔庶常。原以作養人材。今科進士特加簡閱。取錢本誠。莊柱。于辰。劉復。王丕。烈。周。

祖榮鄒一桂余棟張鵬翀張灝李實賁林璵  
王雲銘金相原衷戴王承堯繆煥李學裕劉  
東寧李直劉青芝陳師儉許琰富魁世臣王  
植周紹龍周龍官楊嗣璟王興吾包祚永郭  
石渠陳其嵩隋人鵬常保佳呂熾張乾元等  
三十七員俱著改爲庶吉士并修撰彭啟豐  
編修鄧啟元馬宏琦分別清漢書教習○壬  
辰陞左僉都御史王廷揚爲宗人府府丞○  
癸巳諭內閣倉場米石乃國家第一要務試  
思此項米石民間輸納何等辛苦官員徵解  
何等煩勞糧艘運送京師何等繁難一顆一  
粒皆當愛惜不忍輕忽朕爲此時加訓飭曾  
降旨令修理倉廩不惜多費帑金務期完固  
托時陳守創身爲倉場侍郎自當仰體朕心  
悉心料理昨朕特遣大臣等前往查看京通  
各處倉廩屋瓦滲漏牆壁損壞者十居八九  
所貯米石漸至潮濕霉爛夫以如珠如玉之  
米糧而視爲泥沙棄擲忍心害理莫此爲甚

若不嚴行稽察無以儆怠忽而清弊端在京  
十倉每倉派都統或副都統各一員御史中  
不論滿漢每倉各派一員專任稽察之責所  
有米石出入支放奏銷事件仍屬倉場侍郎  
管理其房屋滲漏牆垣損壞與倉內鋪墊及  
匪類偷竊一切情弊俱交與派出之都統副  
都統御史稽察遇有查出之處即行知倉場  
侍郎若倉場侍郎等不即辦理妥協致遲  
延著都統副都統御史奏聞僅有應行查出  
之處不行查出將缺少米石著落倉場監督  
等官與派出之都統副都統御史分賠其通  
州三倉交與通永道通州副將稽察亦照依  
京倉例行 又諭福建通省倉穀虧空甚多  
巡撫毛文銓扶同欺隱經朕訪聞確實特遣  
大臣前往盤查務令徹底澄清顆粒無虧以  
備民間緩急之用朕之爲閩民籌畫者可爲  
殫心竭力矣但恐不肖有司聞欽差將至向  
紳衿富戶那移借貸以掩飾其虧空之項而

紳衿富戶或畏其威勢或迫於情面不得已代爲應付以圖彌縫於一時均未可定朕此番差遣大臣清查斷不容有絲毫朦混隱匿且揀選府州縣等官多員令帶往更換是現任者必去而接任者新來儻紳衿富戶等一將貲財穀米借出便成官物用是特頒此旨明白曉諭俾勿墮貪官劣員之術中使地方積弊永除而後任官員亦共知儆戒不至仍蹈前轍著將此通行福建郡邑鄉村咸使聞知○議政王大臣等議奏隆科多私抄

王牒存貯家中及降旨詢問又不據實具奏應俟辦完鄂羅斯疆界事件將伊革職拏問治罪得旨爾等所議俟隆科多辦完鄂羅斯之事再行拏回甚非朕意朕從前差隆科多前去並非不得其人以其能辦理而使之也鄂羅斯事件最易料理特給伊効力之路以贖罪耳乃隆科多去後看其陳奏一應事件不但不稍改伊之衷心逆行且並不承認過失

而舉動狂悖全無愧懼將朕降旨行文查問之事隱匿巧飾無一誠實之語伊既不實心効力則留伊在彼反致妄行攪擾毫無裨益可將隆科多調回令其速來未到京以前爾等請旨鄂羅斯邊疆等事著克什圖前往與四格圖理琛辦理○命廣東巡撫楊文乾浙江觀風整俗使許容吏部郎中鄂彌達內務府員外郎伊拉齊同往福建會同巡撫常賚盤查倉庫錢糧○戶部議覆署理江西巡撫邁柱疏言州縣徵收錢糧該管上司有督催盤查之責必須各歸省分以便就近稽察今江西南昌前衛饒撫二所屯糧屯丁既屬江南之建德東流二縣徵比而督催仍在南昌饒撫三府隔越千里鞭長不及請將此項編徵改隸江南池州府掌管應如所請從之○甲午以都察院左都御史沈近思工部左侍郎鄂爾奇教習庶吉士○戶部議覆署理雲南巡撫楊名時疏言滇省駐防又未多官兵

撤回所有存貯米麵請交人木多胡土克圖看守查無成例況存貯日久必致浥爛應令再議具題得旨朕思番民素不食米若令供支中甸官兵則路遠難於運送著將炒麵二百石賞給胡土克圖並將存剩米一千九百餘石交伊收管嗣後凡有西藏往來差遣之人應給口糧者即於此項內動支○乙未刑部等衙門議奏盛京員外郎江海等領出買米銀兩擅行借放取利江海等俱應擬斬監候得旨盛京習俗甚屬不堪若將曾經犯法之人仍留彼處勢必惑亂人心又生事端習染不能改革自雍正二年爲始盛京犯法之旗人官員除發遣外其革職枷責案件完結之人俱著勒限送部該部具奏請旨永著爲例盛京習俗改易時候旨再行停止○工部議覆廣東總督孔毓珣奏據河道總督齊蘇勒言淮徐道一官有經管徐邳宿遷一帶黃運兩河之責地方遼濶工程浩繁該道駐扎

清江與宿遷關相距二百餘里不惟難以稽察而遇河工緊急之時更不能分身兼顧請將宿遷關稅務勒令督撫擇就近賢員以司其事再揚州江防同知既管瓜洲一帶江工又收由關稅課亦難兼顧應請一例飭令別委俾同知得專力修防應如所請得旨宿遷關著交與年希堯兼管由關稅課著該撫遴選就近地方賢員管理○丙申。

御製黃河澄清碑文勒石於江南清口河南武陟縣河神廟內其文曰朕聞

上天孚佑生民日監在下垂示休徵警覺有位凡欲使之懋德勤政無怠無荒而修省加虔用答嘉貺天人感應之理致不爽也我皇考聖祖仁皇帝功德隆盛臨御久長厚澤深仁洋溢於薄海內外朕寅紹鴻圖仰承盛烈蒙被

福蔭民物安阜數年以來嘉祥疊見雍正四年十有二月河道總督齊蘇勒副總河嵇曾筠

漕運總督張大有河南巡撫田文鏡山東巡撫塞楞額陝西巡撫法敏先後馳奏黃河自陝西府谷縣歷山西河南山東以至江南之桃源水開水清湛然澄澈其在陝西山西始見於雍正四年十有二月八日乙丑迄於雍正五年正月十三日庚子凡三十有六日其在河南山東始見於十有二月九日丙寅迄於次年正月十日丁酉凡三十有一日山東之單縣亦清於丙寅至癸酉甲戌清澈見底而是月之二十二日己卯漸復其舊凡十有四日其在江南則始於十有二月十六日癸酉迄於是月二十三日庚辰凡七日蓋其清也自上而下及其復舊自下而上故時日之先後遠近漸次如此維時中外臣民僉以河清爲千年罕見之盛事稽諸史冊咸稱上瑞况横亘三千一百餘里綿歷三旬有餘尤亘古所未覩合辭懇請御殿受賀至再至三朕惟上天之錫福降災猶人君之用賞行罰感

召之機分於敬肆一念甫動休咎頓殊朕祇若

昊天敬慕

皇考翼翼小心夙夜罔敢懈怠因得仰邀

皇考昭察默顧

蒼穹錫茲福慶朕惟慮前此之受貺無因且恐

將來之承庥不易朝乾夕惕益深謹凜特命

虔告

景陵以申忱悃專遣大臣致祭

河神以彰靈應至升殿受賀沿襲頌美之虛

文朕所不取是以堅却不允而廣推

皇考錫嘏弘仁施恩中外羣臣有專職者咸晉

一階諄諭周詳共加敬勉爰允廷臣所請勒

石以紀夫天一生水實爲天地之氣所流通

而河稱四瀆之宗上應雲漢澄潔安流用昭

嘉瑞天和協應必有自來詩曰文王陟降在

帝左右蓋言文王與天同德而子孫蒙其福

澤也我

皇考配

天之靈於昭在上。眷顧啟迪至深且厚。朕祇承瑞應。恐懼悚惶。嘉與羣臣增修實政。書曰。昭受上帝。天其申命。用休又曰。先王奉若天道。君臣上下之間。無忘戒儆。朕亦惟是嚴恭寅畏。不遑康寧。庶幾求無負於

上天

皇考錫予嘉祥之至意。濡毫紀實。鐫勒貞珉。用抒朕祇敬之誠。永自儆勗云爾。內閣學士何國宗緣事降調。實授任蘭枝爲內閣學士。兼禮部侍郎。調鑲白旗漢軍副都統戴豪爲本旗蒙古副都統。陞廣東高州總兵官郝宏勳爲鑲白旗漢軍副都統。工部議覆署理江南總督范時繹疏言。通州地勢西高東下。河水由江入海。以通州爲咽喉。必水口深通。蓄洩得宜。則泰州如臯均受其益。若水口淤淺。蓄洩無方。則通州先受其害。查水口凡有三處。觀音壩逼近大江。地屬浮沙。鹽倉壩

之水高於江水。俱難建閘。惟唐家壩舊存閘基。距江約二十里。中稍淤塞。疏濬甚易。且旁有兩小壩。亦皆引水入江之道。請將唐家壩復建爲閘。兩小壩一律開通。改爲石涵洞。於農田水利甚有裨益。應如所請。從之。又議覆廣東總督孔毓珣遵旨疏奏江南水利四條。一。閘座之啟閉宜定。吳淞江之吳淞閘。劉河之天妃閘。傾圯年久。太倉州之七浦閘。查無閘板。昭文縣之白茆閘。現在淤塞。常熟縣之福山閘。舊閘坍塌。新閘尚存。潮水發時。激流逆上。渾沙淀積。內河日淤。更難宣洩。宜時其啟閉。定立章程。吳淞天妃二閘。應各設閘夫二十名。七浦白茆二閘。各設八名。徐六閘設六名。九曲得勝孟瀆三河三閘。各設四名。責令經管官敬謹看守。隨潮啟閉。應如所請。或設閘官。或令巡檢兼管。并閘座有應修應建之處。行令該督撫會同總河酌議。其七浦一閘。現行總河會勘。俟具題到日再議。一。田



圩之勸築宜勤三吳地勢四高中下狀若盤  
孟議水利者皆稱高築田圩即遇霖潦不致  
淹浸請敕水利各官實心勸築每區五一圩  
長輪流報充應將所請行令該督撫會同總  
河確議有無裨益一河道之壅滯宜禁濱河  
州縣於河道內或立椿砌砌或架板爲屋或  
倚田攤佔以致河身淤淀請除現在陞科成  
熟田畝并已成房屋無甚大碍者姑從民便  
外其餘槩行嚴禁毋卸者不許增修又支河  
小港引蓄河流分資灌溉請於農隙後勸諭  
深浚即以開挑之土培築田圩一水利之考  
核宜明蘇松等州縣賦役甚繁兼責以河道  
事宜恐難兼顧請將水利事宜專責兼水利  
銜之同知通判縣丞主簿等官如應添設人  
員該撫臣酌量題請並將江常鎮道蘇松太  
道均兼水利營田銜令水利各官有所統轄  
入於大計內分別考核均應如所請從之○  
蘇祿國王蘇老丹臣母漢末母拉律林表言

臣僻居荒服遠隔神京幸際昌期末由趨覲  
邇來天無烈風霖雨海不揚波知中國必有  
聖人臣捧閱歷朝紀事原有觀光之例是用遣  
使臣龔廷綏阿石丹奉臣赤心仰陳彤陛敬  
獻本國所產土物聊效野人負暄之意得旨  
蘇祿國隔越重洋未通職貢今該國王輸誠  
向化遣使遠來進貢方物奏辭懇切具見悃  
忱其有應行議奏之處著大學士九卿詳議  
以聞尋議東南海外諸國琉球荷蘭安南暹  
羅初次奉表納貢頒敕諭一道即令來使齎  
捧還國其使臣賜宴頒賞遣官伴送今蘇祿  
國初次奉表稱臣納貢應照例行以示嘉獎  
從之○敕諭蘇祿國王母漢末母拉律林朕  
惟職責虔修爲臣輸忠之大義寵施弘錫大  
國柔遠之常經越重海以瞻雲識嚮風之有  
素宜加賚予以勵蓋誠爾蘇祿國王母漢末  
母拉律林屬在遐陬克舒丹悃敬恭遣使梯  
航不隔於滄溟懇切陳詞琛贄并將其方物

慕義之忱良可嘉尚是用降敕獎諭並賜王  
文綺器皿等物王其祇受益矢恪恭副朕眷  
懷至王所請貢期念爾國遠在重洋往來迢  
遞酌俟五年之外一修歲獻之儀若王有所  
敷陳則隨時上達故茲敕諭○戊戌解陝西  
西安巡撫法敏陝西西安按察使塞欽江西  
按察使積善任以刑部右侍郎張保為陝西  
西安巡撫陞戶部員外郎碩色為陝西西安  
按察使司按察使兼理河東鹽務湖北鹽驛  
道柳國勳為江西按察使司按察使○擢監  
察御史西琳為刑部右侍郎○庚子諭內閣  
盛京甚屬緊要兵民旗人最多且地方遼濶  
十三城相隔七八百里有餘將軍副都統俱  
駐劄盛京內地教訓整理不能周到朕意當  
照船廠寧古塔白都納例各設副都統一員  
管理自廣寧義州錦州寧遠至山海關設副  
都統一員復州熊岳南金州鳳凰城岫巖旅  
順等處設副都統一員令其分轄管理一切

事務教訓衆人改易陋俗當有裨益再開原  
與船廠相隔六百餘里自開原押送發遣人  
犯官兵往返行走月餘甚屬勞苦聞得從前  
議於船廠開原適中之地在克爾素驛站左  
右酌設官兵因與圍場相近恐禽獸駭逸而  
止今查此處雖近圍場仍是大路可以安設  
官兵惟當禁其駭散圍場耳但必須相視膏  
腴可耕之地令其永遠居住則押送發遣人  
犯往還可免勞苦矣著議政王大臣詳議具  
奏尋議盛京將軍及副都統俱在一城駐劄  
十三城相距遼濶應於錦州及熊岳地方添  
設副都統各一員即於盛京副都統二員內  
移駐錦州一員其熊岳一員交兵部照例奏  
請補放現今熊岳錦州俱有原駐之官兵毋  
庸另議至開原船廠相隔六百餘里押送人  
犯官兵往返勞苦應於適中之地酌設佐領  
二員驍騎校二員兵一百名查船廠將軍屬  
下有佐領四十五員驍騎校五十員兵三千

三百餘名應即於此項官兵內有孤獨情願移駐者令其移駐並令該將軍親往相視地勢不得駭散團場其官兵居住房屋照例料估奏聞從之封誠親王允祉子弘景爲鎮國公○調湖南按察使趙殿最來京陞江西糧道李蘭爲湖南按察使司按察使○辛丑諸王滿漢文武大臣合辭具奏蘇努悖逆妄亂其子孫俱應照叛逆例正法

上召入王大臣等諭曰蘇努雖已削籍離宗然原係宗室之人爾等請將伊之子孫照叛逆例治罪是其子孫俱應即行正法此事甚有關係爾等具本之時隨衆列名或不便獨抒己見今朕特命爾等入見面加詢問

天地

祖宗昭察於上爾等衆人中或有一人意見不同可即於此時據實面奏事之是非君臣共之儻有不應誅戮之人加以誅戮使朕有用刑不當之名實爾諸臣之咎若諸臣心有所

見藏匿於中將來必受蘇努之禍即已身倖免其子孫受禍亦必與蘇努之子孫同爾等思之慎之諸王大臣僉奏云蘇努罪大惡極今又查出

聖祖仁皇帝硃批奏摺蘇努敢於

御筆之旁狂書塗抹臣等將伊子孫請照叛逆例治罪實屬至當

上又問滿都護查弼納之意以爲何如亦俱奏稱應照叛逆例治罪

上諭曰觀滿都護今日光景似出實心至於查弼納欲將蘇努子孫盡行正法其心較衆人更爲迫切衆人所執者國法而查弼納所懷者私心也蓋查弼納與蘇努既固結於先惟恐連累於後不若將伊子孫盡行剪滅永除己身將來之禍此情事之必然者即此可見結黨之人事敗之後其同黨即自相攻擊小人情狀古今一轍也夫要結黨與平時未必得其相助之力及至有事反多一等操戈下

石之流則小人結黨豈不無益而有危害乎而趨附匪黨之人平時亦未必得其援引之力及至有事豈能免於牽連即倖而逃於法網而憂虞畏懼慚報終身豈不可耻之甚乎滿都護查弼納與蘇努結交前後情形如此爾等諸臣深知目覩皆當以此爲戒諸王大臣參奏之本著交三法司定議具奏○旌表直隸東安縣烈婦劉三妻趙氏拒姦不辱投繯自盡給銀建坊入祠致祭如例○壬寅諭內閣近因考試新科進士以宋儒所云士人當有禮義廉耻句爲論題諸進士試卷進呈朕躬自披覽見其文藝之工拙優劣固有不同然大槩皆詞章記誦之常談未能真知題中之理蘊而實有發明蓋所言止於儀文末節而已非禮義廉耻之大者也朕則謂古人言禮義廉耻國之四維者蓋以天下之大四海之衆皆範圍其中而不可須臾離而士人貴有禮義廉耻之說所指甚遠所包甚宏上

之爲人君下之爲人臣皆當求其大者以爲務而不可局於儀文末節間也以禮言之如化民成俗五教明倫使天下之人爲臣皆知忠爲子皆知孝此禮之大者也進退周旋俯仰揖讓此禮之小者也以義言之如開誠布公蕩平正直使天下之人無黨無偏和衷共濟此義之大者也然諾不欺出入必謹此義之小者也以廉言之理財制用崇儉務本使天下之人家給人足路不拾遺盜賊不生爭訟不作貪官污吏無以自容此廉之大者也箪食豆羹一介不取此廉之小者也至於以耻言之爲人君者憲天出治誠和萬民則當以一夫不獲其所爲耻爲人臣者行義達道兼善天下則當以其君之不爲堯舜爲耻若夫鄉黨自好不失言於人不失色於人此乃耻之小者耳欲爲君盡君道欲爲臣盡臣道而其道不外禮義廉耻之四端士人者以天下爲己任其身既爲臣之身而有致君之責

者豈可徒知其小節而不知其大者乎。夫禮義廉恥由一端之小者擴而充之皆可以保四海。然必知其大者而務之自可不遺於其小。若或徒窺小節而不知其大則迂拘曲謹祇圖檢束一身而不敢任天下之重。此則細民之行而非士人之道也。孔子曰人能弘道非道弘人。其可不勉自奮立乎。朕引見新科進士時即欲面加訓諭因天氣炎熱恐伊等暫時跪聽不能悉心領會今特詳爲宣示朕願與大小諸臣交相儆勉詳思禮義廉恥之大者身體力行則人心風俗蒸蒸日上而唐虞三代之治庶幾其可復見也。○以翰林院編修勵宗萬張廷瑑俱署日講起居注官。○陞一等侍衛伊都善爲鑲藍旗漢軍副都統。○癸卯諭吏部各省官員數年以內已經該督撫隨時舉劾今屆三年大計之期著停止一次。○戶部議覆陝西道御史高維新條奏京師爲萬方輻輳之地人民紛雜所以府縣

之外又設五城兵馬司指揮等官按疆分理各有專司查城內地方有基址界限可以爲憑至城外鄉村與州縣接壤者雖有四至冊可稽但未立有界牌遇命盜事件往往互相推諉請令順天府府尹并五城御史清查立界以垂永久應如所請從之。○乙巳刑部尚書塞爾圖緣事革職陞山西巡撫德明爲刑部尚書江南安徽布政使覺羅石麟爲山西巡撫貴州按察使富貴爲江南安徽布政使司布政使。○雲貴總督鄂爾泰題孟定土知府罕珍病故無嗣請以其姪罕監猛承襲下部知之。○丁未諭內閣據怡親王奏稱玉田縣還鄉河隄岸衝決附近之田禾廬舍被淹傷損朕心深爲軫念著散秩大臣常明率同御史勒音特錢兆沆二人前往查勘並帶帑金二萬兩速行賑濟若有動用倉穀之處將本縣倉穀即行動用務使小民得所不致流離再被水地畝本年應納之錢糧朕本欲全

免恐此時有已經完納者著行緩徵明年錢糧蠲免一年該地方有司應加意撫綏以副朕愛養窮民之至意又諭昔年曾奉

聖祖仁皇帝諭旨海外噶喇吧乃紅毛國泊船之所呂宋乃西洋泊船之所彼處藏匿賊盜甚多內地之民希圖獲利往往留在彼處不可不預爲措置隨經廷臣與閩廣督撫議令內地之人留在外洋者准附洋船帶回內地奉

旨准行在案此乃

聖祖仁皇帝綏靖海疆且不忍令內地之民轉徙異地實仁育義正之盛心也但數年以來附洋船而回者甚少朕思此輩多係不安本分之人若聽其去來任意不論年月之久遠伊等益無顧忌輕去其鄉而飄流外國者愈衆矣嗣後應定限期若逾限不回是其人甘心流移外方無可憫惜朕意不許令其復回內地如此則貿易欲歸之人不敢稽遲在外

矣將此交與高其倬楊文乾常賚悉心酌議並如何定限年月之處一併詳議具奏尋福建總督高其倬遵旨議奏康熙五十六年定例入洋貿易人民三年之內准其回籍其五十六年以後私去者不得徇縱入口久已遵行在案又現住外洋之船或去來人數不符或年貌互異者即係頂替私回應嚴飭守口官於洋船回時點對照票細加稽查如有情弊將船戶及汛口官員分別治罪至閩粵洋船出入總在廈門虎門守泊嗣後別處口岸概行嚴禁得旨康熙五十六年定例之時隨據福建等省奏報回籍者幾及二千餘人是出洋之人皆已陸續返棹而存留彼地者皆甘心異域及五十六年以後違禁私越者也方今洋禁新開禁約不可不嚴以免內地民人貪冒飄流之漸其從前逗留外洋之人不准回籍餘依議一等公隆科多緣罪革爵以其弟慶復襲替戊申解雲南按察使江

芑任陞雲南糧儲道張允隨爲雲南按察使  
司按察使○戶部議覆雲貴總督鄂爾泰疏  
言滇省採買銅觔除供鼓鑄一百餘萬觔外  
每歲多不過二三十萬觔今歲銅礦增盛就  
現在核算五年分銅觔可獲三百數十餘萬  
但銅多本少收買不敷懇於鹽務盈餘銀兩  
酌借五六萬兩發價收銅運至鎮江漢口令  
江南浙江湖廣辦銅諸省出價收買以便還  
項查各省承辦銅觔除廣東福建從無遲悞  
浙江現在開洋毋庸另購外其湖南湖北以  
採買維艱每逾定限而江蘇則辦新不足舊  
欠滋多應如該督所請將滇省鼓鑄餘銅二  
百數十餘萬動用鹽務盈餘銀六萬兩收買  
即委滇員運至鎮江漢口賣價還項庶滇省  
餘銅既得流通而江蘇及湖南湖北承辦亦  
免遲誤實於彼此均有裨益從之○刑部遵  
旨議奏罪犯潛逃當加倍治罪而官民知情  
藏匿尤宜分別嚴懲查律內犯罪事發逃走

於本罪上加二等罪止杖一百流三千里凡  
知他人犯罪事發而將犯人藏匿在家不行  
捕告者減罪人所犯一等不知者勿論立法  
過輕以致任意潛逃朋比隱匿請嗣後負罪  
潛逃之犯笞杖之罪仍照律行外其徒流絞  
斬等罪皆加等定擬其藏匿之家除不知情  
者仍照律行外民人知情藏匿者照本犯原  
罪治罪若係職官革職仍照本犯原罪治罪  
不准折贖從之○壬子復設湖南靖州州判  
一員從原任湖南巡撫布蘭泰請也○癸丑  
諭內閣倉場米石乃國計民命所關顆粒皆  
當珍惜必廩座堅完米粟方不至於霉爛朕  
宵旰勤勞百計經營布置即如廩底之板四  
圍之牆不惜數十萬帑金創造修整則身任  
倉塲之責者自當加意慎重以仰副朕懷托  
時陳守劄身任倉塲全不實心料理以致倉  
廩損壞滲漏處凡九百二十九座米粟竟有  
霉爛者托時陳守劄並無一語奏聞甚爲溺

職著將托時陳守劄及各倉滿漢監督盡行革職解任御史殷式訓專司查倉之責乃敢扶同徇隱亦著革職解任凡各廩座損壞滲漏之處俱著動支正項錢糧修理若仍交與舊任各官必致苟且塞責虛費錢糧不能實在完整著欽差都統御史通水道等同新任倉場侍郎監督官員實心料理務期完固仍著托時陳守劄殷式訓及解任之舊監督一同看視每倉修理動用錢糧若干著本倉監督與托時陳守劄殷式訓分賠補項霉爛米石亦著伊等照數分賠其舊任監督著議政王大臣會同大學士詳加訊問如有本倉廩座全無損漏者仍留原任將新補監督撤回如從前曾將滲漏之處詳報倉場者著將情由聲明奏聞吏部右侍郎岳爾岱順天府府尹劉於義著補授倉場侍郎順天府府尹事務著左僉都御史申大成暫行署理○調署兩江總督正藍旗漢軍都統范時繹爲鑲白

旗漢軍都統仍留總督任陞正藍旗漢軍副都統朱之璉爲本旗漢軍都統○兵部議覆福建總督高其倬疏言太湖周圍八百餘里交衝兩省界連八邑山湖錯雜最易藏姦向設遊擊一員專管浙屬惟因湖面難分江浙仍令遊擊駐劄江南之西山與江省左右二營叅將協力巡查但江省官兵分布各汛已可兼顧而浙省港汊繁多現止遊擊一員千總一員把總二員兵四百二十五名分防陸路二十八汛配駕巡船一十六隻顧此失彼擬添兵二百三十五名請於台邑防守金清洋嶼二汛之兵撥一百四十五名衢邑存城額兵撥九十名增入太湖營則裒多益寡庶得實用又大錢汛口爲浙江咽喉要道雍正元年將原駐之守備調歸江南立左右叅將營應照原制仍設守備一員以資彈壓俾舟帆寧謐姦宄潛消應如所請從之○裁陝西寧夏府玉泉倉大使一員從川陝總督岳鍾



琪請也。予故致仕湖北巡撫年遐齡祭一次。甲寅。調兵部左侍郎。圖理琛為吏部右侍郎。轉兵部右侍郎。永壽為左侍郎。陞鑾儀衛鑾儀使。那蘇圖為兵部右侍郎。禮部議奏各省耕藉儀注。一壇位之規制。各省州縣衛所擇東郊立為藉田。於藉田後建壇。壇後立廟。祀

先農之神。一祭祀之品物。應照祭

社稷壇例。一藉田之禮儀。省城督撫秉耒知縣執箱。知府播種。府城知府秉耒。佐貳執箱。知縣播種。州縣正印秉耒。佐貳執箱。播種。專城衛所亦用正印秉耒。如無屬員。選用耆老執箱。播種。俱照九卿例。九推九返。一農具。牛隻籽種。灌溉之成規。農具。赤色。牛。黑色。籽種。悉照各處土宜。擇勤慎農夫二名。免其差役。酌給口糧。令看守壇廟。灌溉藉田。每歲欽天監選定吉期。各省同日舉行。從之。

大清世宗敬天昌運建中表正文武英明寬仁信毅大孝至誠憲皇帝實錄卷之五十八

大清世宗敬天昌運建中表正文武英明寬仁  
信毅大孝至誠憲皇帝實錄卷之五十九

監修總裁官光祿大夫經筵講官太僕議政大臣保和殿大學士兼兵部尚書理藩院事務等因欽此

總纂官光祿大夫經筵講官起居注大臣保和殿大學士兼兵部尚書理藩院事務等因欽此

纂修官光祿大夫經筵講官起居注大臣保和殿大學士兼兵部尚書理藩院事務等因欽此

翰林院掌院學士二級戶部右侍郎光祿大夫經筵講官太子太保東閣大學士兼禮部尚書等因欽此

經筵講官議政大臣協辦內閣大學士事務等因欽此

較修

雍正五年丁未秋七月乙卯朔享

太廟遣莊親王允祿行禮○諭戶部湖北地方  
今年四五月間雨水稍多江流泛漲沿江之  
地罹於水患如武昌府屬之咸寧蒲圻嘉魚  
三縣武昌武左二衛漢陽府屬之漢陽漢川  
二縣荊州府屬之江陵荊州衛黃州府屬之  
黃陂黃梅二縣田畝被淹米價漸昂朕心深  
為軫念著該地方官加意撫恤朕又思此縣  
衛數處既經被水仍令其輸納錢糧民間未  
免竭蹶著將今歲錢糧全行蠲免儻有已經

完納者准作雍正六年應完之項再各省藩  
庫俱有酌留銀兩備用因湖北並無存剩銀  
兩是以未曾酌留今既有蠲免之州縣恐俸  
餉公用等項一時或有不敷查湖南藩庫有  
存貯銀三十萬兩著將銀十萬兩就近撥解  
湖北布政司再將兩淮鹽課撥動二十萬兩  
以十萬兩解送湖南補項以十萬兩解送湖  
北備用又聞湖南近江州縣亦有數處被水  
著總督巡撫確實查明亦照湖北咸寧蒲圻  
等縣衛之例將今歲錢糧蠲免○鑲白旗漢  
軍都統范時捷緣事革職以鑲黃旗漢軍副  
都統李淑德署理鑲白旗漢軍都統○以大  
學士一等侯富寧安總理鑲白旗漢軍都統  
○正藍旗蒙古副都統章桂緣事革職陞大  
理寺卿薩齊庫為正藍旗蒙古副都統○丙  
辰諭禮部  
昭西陵帷幄用金黃色  
孝東陵帷幄用明黃色

陵寢神龕寶座供奉之物。理應同色。但供奉多年。不敢輕易更換。俟年代久遠。遇應更換之時。著俱用明黃色。○以康親王崇安管理正藍旗漢軍都統。大學士一等侯富寧安兼理正紅旗漢軍都統。○丁巳。諭內閣。項岳鍾琪奏稱四川成都府城中。有一男子。沿街叫喊。說岳鍾琪帶領川陝兵馬。欲行造反。其人已被提督黃廷桂拏獲。臣不便檄訊。又不敢隱匿等語。數年以來。在朕前讒譖岳鍾琪者甚多。不但謗書一篋而已。甚至有謂岳鍾琪係岳飛之後。伊意欲修宋金之報復者。其荒唐悖謬。至於此極。岳鍾琪懋著功勳。朕故任以西陲要地。付以川陝重兵。而儉險姦邪之徒。造作蜚語。煽惑人心。讒毀大臣。其罪可勝誅乎。此成都造言之人。斷非出於無因。或蔡瑑程如絲輩。懷挾私怨。暗中指使。或再有播弄之人。均未可定。著交與黃炳、黃廷桂會同嚴審。此事關係誣謗國家大臣重案。非民間誣

告比也。至於川陝兵民向來淳良忠厚。且受聖祖仁皇帝六十餘年深仁厚澤。淪肌浹髓。朕即位以來。又屢加恩澤。伊等至誠感激。西省數年用兵。軍民人人踴躍急公。其尊君親上之習。實衆所共知共聞者。今姦民乃云欲從岳鍾琪謀反。是不但誣岳鍾琪一人。而竝誣川陝兵民以叛逆之罪矣。黃炳等務將實情審明具奏。諭吏部各衙門筆帖式在部院辦事者。必當慎重揀選補用。方於部務有益。嗣後補用筆帖式時。爾部將應補之人俱帶來引見。朕酌量補用。再筆帖式內若有不願在伊本衙門行走。因而告病解退。希圖另補好缺者。其起補時俱著於伊本衙門缺出補用。再盛京人員赴任。向來原無憑限。往往補用之後。經年累月。竟不到任。其堂官亦不咨查。至現任官員有告假來京者。亦多無故稽留。不回本任。以致部務廢弛。此等風俗。不可不加意整理。嗣後選補盛京官員。以奉旨之

日爲始扣限一個月到任若有違限者該堂官查明咨部題參照例議處除公事差遣外有告假來京者該堂官奏明奉旨給假方准其來京○以兵部右侍郎那蘇圖署吏部侍郎事○旌表福建福清縣烈女陳我照聘妻何氏未婚夫故奔喪自縊給銀建坊入祠致祭如例○戊午諭部院八旗大臣等朕從前屢降諭旨令文武大臣各將家人嚴行約束無得聽其朋謀結黨串通生事反覆訓誡至再至三無如漸染既久積習尚未盡除凡屬旗人一八大臣之列即有一出名之管家於同類中輾轉糾合結黨營私入伊等之黨者則於伊主之前稱揚贊美令其主人亦互相交好不入伊等之黨者則於伊主之前離間陷害令其主人亦互相傾軋夫家主果念家僕出力欲加撫育之恩亦祇宜於家門之內加意思養何必縱容結成黨與以伊等之好惡爲從違乎縱僕在外招搖生事及至劣跡

敗露被其貽累此風關係匪輕嗣後文武大臣等嚴行約束家僕實力稽查務使各安本分勿得縱容結黨僕仍前玩忽不加嚴禁經朕聞知必將此等惡僕即行正法著通行傳諭八旗以及內府佐領咸使知之○吏部議奏工部尚書李永紹辦理殿試桌椅遲延復捏奏已經收賄應請革職得旨朕即位時聞李永紹居官聲名不好是以調任盛京工部侍郎令其効力贖罪伊在奉天實能洗心改過聲名甚優故擢用工部尚書乃伊自任尚書以來並不實心効力所辦事務舛錯謬妄如

昭西陵碑文鐫字及恭建  
聖祖仁皇帝聖德神功碑關係  
祖宗重大典禮伊皆因循怠忽又如製造戰船火礮器械行文錯誤修理大城牆垣故意遲延其他交部議處之案甚多今此備造殿試桌椅一事明係有意欺隱姑念其年老効力

多年從寬免其革職著降三級休致。刑部議奏原任莊浪同知王廷松那移庫茶三千包借與遲煥茶價銀兩應著王廷松賠補其茶葉仍於遲煥名下照追入官得旨凡缺欠錢糧著落賠補之案本人不能完補者再於應賠之人著落賠補勿令重追。屢降諭旨甚明。今刑部既議王廷松借與遲煥之三千包茶價銀九百兩著落王廷松賠補又議於遲煥名下追茶三千包入官似此重複著追甚屬不合著再議具奏。尋議遲煥向王廷松索取茶規王廷松因將庫茶三千封借與以致虧空應向遲煥名下追茶價銀九百兩抵還虧空從之。河道總督齊蘇勒穆魯奏報伏汎安瀾得旨疏內稱頌之語俱有洪福齊天。河伯効靈字樣朕敬天祀神至誠至恪如齊天字樣實為越理即効靈字樣朕覽之心亦不安嗣後內外臣工本章內將此等祝頌之語通行禁止。己未調

署兵部尚書辦理刑部尚書事黃國材為工部尚書。戶部議覆廣西巡撫韓良輔疏言粵西全州羅城陽朔三州縣有田少丁重田多丁輕者又有棄產而丁銀未除得產而丁銀未納者無業貧民尤為苦累請將此三州縣丁銀自雍正六年為始按糧額派輸以均賦役應如所請從之。加原任護軍叅領阿必達副都統銜復給拜他喇布勒哈番世職。辛酉以盛京刑部侍郎武格兼理盛京禮部侍郎。以散秩大臣公慶復為鑾儀衛鑾儀使。壬戌諭吏部八旗恩廕本具奏完日將降授三品廕生之公侯伯及官員等傳集宣諭曰爾等現今職分應得一二品廕生因爾等平日爵高祿重並無效法祖父圖報國家之心亦不以文學武藝訓教子弟徒恃父祖舊勞累世榮顯凡遇公事因循怠忽規避不前所以將爾等子弟降授三品廕生且爾等子弟年俱幼穉若得一品二品廕生當即

以員外郎主事補用補官之後才質庸碌不能辦理部務徒被衆革亦屬可憫今暫給三品廕生正欲使伊等勉力學習若果勤謹自立學習成材之日爾等本身即可懇恩具奏朕固樂於加恩若爾等子弟內誠有才質英俊可膺一品二品廕生之任者爾等今日即可陳奏朕亦樂於加恩仍賜以一品二品廕生○刑部侍郎黃炳等審奏程如絲在夔州知府任內販賣私鹽重賄蔡珽依勢橫行殺傷多人殘忍已極蔡珽身任巡撫利欲薰心袒護保舉程如絲爲四川第一好官負恩罔上俱應擬斬立決得旨此案內程如絲所差巡兵甚多黃炳未曾詳究又據程如絲自認販賣私鹽四萬餘包而蔡珽推爲不知程如絲私販之事焉有私鹽至四萬餘包之多而蔡珽不知之理黃炳亦未將此處究問且所審喬鐸隱匿變關稅銀一案佛喜通同作弊之處本內亦未置議黃炳辦理此事甚屬不

及但程如絲蔡珽已擬立斬罪無可加而案內牽連各犯多人一加駁詰又至遷延拖累是以交與法司議結將來黃炳尚有另行差委之處儻似此草率審理定行嚴加議處佛喜負恩作姦著將伊布政使任內錢糧事件速令交代清楚拏解來京質審○署福建巡撫毛文銓奏汀漳道劉燦揭報漳州府知府耿國祚龍溪令魏彪倉庫相近彼此那移耿國祚詳揭劉燦縱容家人書役等索詐銀兩互相揭告俱請解任質審得旨朕看劉燦爲人麤鹵不識大體則有之若貪贓枉法之事可以料其必無聞伊到任後揭報屬員虧空被人將伊揭帖藏匿伊心憤激於衆人前以首觸牆旋即具詳辭官因士民多人環繞攀留而止今毛文銓所參道府互揭一案其過自在耿國祚魏彪著將耿國祚魏彪解任質審劉燦仍著在任質審俱交與楊文乾常賚審明定擬○賑陝西固原州水災饑民○

予故理藩院額外侍郎兼鑲黃旗蒙古副都統本錫祭一次。○癸亥兵部議覆雲貴總督鄂爾泰疏言雲南鎮沅府附近之威遠係新闢地方而普洱乃沅江府舊屬流官所轄皆須設兵彈壓應令普洱參將帶兵五百名移駐威遠威遠守備帶兵三百名移駐普洱又鎮沅府內通袁牢四面夷獠茶山地勢狹隘不能安設多兵應令茶山守備帶兵三百名移駐鎮沅茶山設千總一員帶兵二百名防守者樂近於鎮沅界接景東應令把總一員帶兵一百名駐防其餘沅地仍令原設千把帶兵防守總屬於普威營參將仍令臨元總兵官副將統轄則聲勢聯絡呼應得靈矣均應如所請從之。○甲子

孝懿仁皇后忌辰遣官祭

景陵○諭大學士九卿等七月初一日朕曾頒諭旨云從來天人感召之理捷於影響凡地方水旱災禍皆由人事所致或朝廷政事有

所闕失或督撫大吏不修其職或郡縣守令不得其人又或一鄉一邑之中人心詐僞風俗澆漓此數端者皆足以干

天和而名災禍是以朕諄諄訓飭頒發諭旨至再至三而宵旰之時無刻不深乾惕但天下至大兆民至衆察吏之責莫如督撫親民之官莫如守令若地方有司官果能視民如子休戚相關平時化導有方惻隱一體則民氣舒暢而乖戾潛消設偶遇雨暘愆期又復爲民請命虔誠祈禱自可挽回

天意感召休和如張堪之麥秀兩岐魯恭之蝗不入境史冊所傳皆實有其事實有其理非虛語也近見有司官平時不能盡愛養之道民生不厚民俗不淳既足上千天譴及遇水旱又漠不關心不知悔過自省縱事祈禱虛文不過勉強塞責甚至不肖之員惟恐報災蠲賦己身不得火耗羨餘而隱匿不報者有之又或本身原有虧空轉冀水旱得邀賑濟

以便開銷而百姓竝不沾顆粒之惠者有之。似此居心行事。竟將民生疾苦。視同陌路。則民氣鬱而不舒。何以弭天災而召豐穰乎。朕爲天下主。凡民生之休戚。吏治之得失。皆朕躬之責。亦難推諉於臣工。況臣工之是非。即朕之是非。朕又何能推諉乎。但用人察吏之道。各有等次。朕所察用者。督撫也。督撫所察用者。有司也。若督撫不得其人。朕之過也。有司不得其人。則督撫之過也。至地方百姓不能爲之遂生復性。捍患禦災。則其過專在有司矣。夫爲政之道。在於得人。而用人之法。只得博採輿論。然使但以輿論爲憑。則如裴率度。張楷人。皆稱其秉公持正。謹慎和平。及至近日。江西虧空畢露。弊端種種。皆裴率度。張楷任內之事。至如河南巡撫田文鏡。耆尚有李紱。謝濟世等。誣爲貪婪。如此不辨公私。顛倒是非之事。不可枚舉。則輿論又不足盡憑矣。輿論既不足盡憑。則人之賢否。何由而知。

是以試用之以觀其後。即古聖人明試以功之意。試之而稱其職。豈非朕心之所樂願。試之而不稱其職。自當速行更換。豈有劣員既經敗露。尚可姑留在任乎。乃無知小人。不知朕進退人才之苦心。而輒有輕於去留之私議。此則愚昧之甚者也。爲督撫者。當體朕察吏安民之苦心。竭誠秉公。倡率百僚。使地方有司皆能實盡父母斯民之道。則上與下合。爲一心。官與民聯。爲一體。和氣致祥。休嘉日集。斷不致旱澇之爲憂矣。今年春月。直隸地方有數處少雨。朕心軫念。不遑寧處。降旨詢問。而總督宜兆熊。劉師恕。坦然奏稱。今年閏月。嗣後得雨。亦不爲遲。朕已降旨切責。如此存心怠忽。豈能感召天和。從前雍正二年春。河南地方少雨。田文鏡具摺奏聞。朕覽奏爲之心動。竭誠祈禱。乃伊摺奏到京之二日。河南即得大雨。自後三年之內。豫省皆獲豐收。連歲穀秀十三穗。麥秀



三岐可見至誠感格。無有不應。凡封疆大臣皆能如此存心。則地方斷無不受福之理。田文鏡當加殊恩。以示嘉獎。著加兵部尚書銜。授爲河南總督。總兵以下聽其節制。此係特恩。不爲豫省定例。朕意各省地方莫要於水旱之事。當定爲地方官之考成。除直隸之玉田寶坻等處。江南之泗州盱眙等處。湖廣之江陵沔陽等處。廣東之圍基等處。皆濱江近河。素稱沮洳之地。似此等地方。難以定議。外其餘地方官員。儻有政治不修。化導不力。以致民氣不舒。災祲見告者。或有自顧已私。匿災不報者。應作何嚴加處分之處。著大學士九卿詳議具奏。如此則人人知敬。

天勤民之道矣。自古有治人無治法。朕所降諭旨。丁寧往復。無非念切民生。然必奉行盡善。方收實效。即如社倉一事。朕數年以來。屢屢降旨。但可勸民自爲。不可繩以官法。前楊宗仁在湖廣。銳於舉行。而州縣官迎合其意。勉

強行之。近日竟有官吏將此項米穀侵挪者。此即奉行社倉之弊。非朕之意也。又如民間向來多將膏腴之壤。栽種烟葉。以圖重利。朕慮其拋荒農務。諭令有司善爲勸導。使知務本。諭旨甚明。竝非迫令一時改業也。今聞有將民間已種之烟葉。竟行拔去者。此時既不能樹藝五穀。而已種之物。又復棄置。豈不農末兩失。大負朕愛養百姓之初心耶。朕所降諭旨。明白周詳。而奉行者如此舛錯。皆係愚劣官員。不能領會。且遠鄉僻壤之地。未曾曉諭。周知。此皆地方大吏疎忽之咎。著將此諭旨。遍傳直省。務使遠鄉僻壤咸共知之。此乃初一日所降諭旨也。乃數日以來。陰雨連綿。不見晴霽。朕甚憂畏。虔誠修省。細思近日用人行政之處。可以自信。或因前日頒發諭旨。欲將地方水旱定爲有司考成之處。其事有所不可。故

上天垂象。以示意耶。其以水旱爲考成之處。不

必定例。大學士九卿不必議奏。著將前後所降諭旨彙寫一處。仍復通行。並令大小官員各錄一道存貯官署。以自儆省。且使知朕敬天乾惕之至意。期與內外大小臣工共勉之。其餘仍照前旨行。○乙丑

上以陰雨連綿。在圓明園齋戒虔禱。雨中步行數里詣

恩佑寺禱於

聖祖仁皇帝御容前。是日雨勢稍止。夜分而霽。

翼日大晴。○命直省各建龍神廟。○丙寅。刑

部議奏。山西猗氏縣姦民令狐士義。因受塞

恩黑資給還鄉。志存叛逆。挾稟遠赴西寧。語

多狂悖。合依大逆律。凌遲處死。得旨令狐士

義著改爲立斬梟示。○發帑金六萬兩。遣官

賑直隸濱河州縣被水窮民。○丁卯

上詣

恩佑寺行禮。○旌表安徽太和縣烈婦馮小妻

段氏守正拒姦。自刎殞命。給銀建坊。入祠致

祭如例。○戊辰。署湖南巡撫布蘭泰奏報。五月以後。湖南雨水稍多。兼川襄水發。匯赴洞庭。其近湖低窪之處。有湘陰益陽。已陵臨湘華容澧州安鄉岳州武陵龍陽沅江等十一州縣。衛申報被水。已經委員查勘。動支公用銀兩賑恤。其餘長沙等九府州屬。各報早稻已於六月初收成。約計有八分九分十分不等。其中晚二稻盡皆秀發。八月俱可收穫。目今米麥價值俱已平減。得旨朕前令該督撫行查湖南被水之地。今據布蘭泰奏報。十一州縣衛被水甚爲可憫。著照湖北被水之地。一體加恩。雖據布蘭泰奏稱。已經動用銀兩。委員賑恤。朕恐所發之銀。或未敷用。著再動用司庫帑銀二萬兩。作速確查散給。務使窮民均沾實惠。如王國棟已經到任。即交與王國棟料理。至湖南湖北近江濱湖之地。雖地勢低窪。易至泛溢。然居民常被水患。朕心甚爲憫惻。或有堤岸未修。或有疏濬不力。俟邁

柱到任後會同湖北湖南巡撫悉心商酌。將如何興修防護之處詳悉定議。又聞近日湖南米價稍貴之時。即有姦民撐駕小舟。指稱被水災民求乞米糧。而搶刮客舟財物者。凡屬良民斷無有因一時被水米貴而肯甘心爲盜之理。此皆平素克惡匪類。冒懷詭詐。乘地方稍有旱潦。遂以迫於饑寒爲名。煽惑衆心。妄行不法。甚屬可惡。據布蘭泰奏稱生事爲首之姦民已被擒獲。著該撫嚴加審訊。或另有指使之人或尚有克惡之黨。究問明白。分別首從定擬。○己巳中元節。遣官祭

永陵

福陵

昭陵

昭西陵

孝陵

孝東陵

景陵○工部尚書緯奇緣事革職。以內大臣公

奎岱爲工部尚書仍兼內大臣行走。○陞詹事府少詹事張廷璐爲詹事府詹事。庚午

上自圓明園進西直門詣

大高殿祈晴禮畢風日晴明○

上以本月十八日

皇四子婚禮吉期回宮。○辛未吏部議覆署甘肅巡撫鍾保疏言口外赤金靖逆柳溝廳衛

所各員已照邊俸論陞至新設之安西廳衛及歸德所一缺更遠於赤金等處請照邊俸

之例五年陞用應如所請從之。○癸酉諭禮

部朕惟

孔子以天縱之至德集羣聖之大成堯舜禹湯文武相傳之道具於經籍者賴

孔子纂述修明之而魯論一書尤切於人生日用之實使萬世之倫紀以明萬世之名分

以辨萬世之人心以正風俗以端若無

孔子之教則人將忽於天秩天敘之經昧於民彝物則之理勢必以小加大以少陵長以

賤妨貴尊卑倒置上下無等干名犯分越禮悖義所謂君不君臣不臣父不父子不子雖有粟吾得而食諸其爲世道人心之害尚可勝言哉惟有

孔子之教而人道之大經彝倫之至理昭然如日月之麗天江河之行地歷世愈久其道彌彰統智愚賢不肖之儔無有能越其範圍者綱維既立而人無踰閑蕩檢之事在君上尤受其益易曰君子以辨上下定民志禮運曰禮達而分定使非

孔子立教垂訓則上下何以辨理制何以達此

孔子所以治萬世之天下而爲生民以來所未有也使爲君者不知尊崇

孔子亦何以建極於上而表正萬邦乎人第知

孔子之教在明倫紀辨名分正人心端風俗亦知倫紀既明名分既辨人心既正風俗既

端而受其益者之尤在君上也哉朕故表而出之以見

孔子之道之大而

孔子之功之隆也○以兵部左侍郎阿克敦署廣東巡撫○西藏噶隆扎薩克台吉頗羅鼐等奏報康濟鼐與準噶爾構兵所辦諸事洵有裨益乃阿爾布已隆布奈扎爾鼐等會同前藏頭目於六月十八日將康濟鼐殺害臣即收聚後藏軍兵防守駐劄阿爾布已等復發兵來侵被臣殺傷無算今臣帶領兵衆勦捕阿爾布已等伏祈

皇上速遣官兵進藏勦滅逆魁以安西藏奏入報聞○甲戌發庫帑賞給八旗兵丁滿洲每佐領一百兩蒙古每佐領七十兩漢軍每佐領五十兩上三旗包衣佐領內管領及五旗諸王之包衣佐領俱照滿洲旗下賞給以雨水連綿房垣傾倒故也○革工部右侍郎哲先任擢工部郎中法保爲工部右侍郎○乙

亥。予故杭州副都統覺羅塞什圖。祭一次。○旌表安徽虹縣烈婦魏天臣妻谷氏拒姦不從。舍念自縊。給銀建坊。入祠致祭如例。○丙子。晉封輔國公弘旺。鄂齊。熙良。俱爲鎮國公。○革刑部右侍郎高其佩任。在都統行走。陞大理寺卿。單疇書爲刑部右侍郎。○擢戶部員外郎赫勝額爲貴州按察使。司按察使。○刑部議奏浙江平湖縣生員施從望家婢女翠金。黑夜拒姦。奪刀抗禦。守節不污。被戮慘死。例應給銀旌表。建坊墓前。因係婢女。良賤宜分。停其入祠致祭。從之。○丁丑。哈密扎薩克鎮國公達爾漢白克額敏遣使謝恩。以遣內地官兵駐防哈密。又發帑修理哈密城垣。故也。○戊寅。

上御太和殿視朝。文武陞轉各官謝恩。○原任

江西巡撫伊都立。緣事革職。發往郭爾昆圖拉地方代享特辦理種地事務。効力贖罪。○己卯。刑部等衙門議覆康親王等參奏蘇努

於

聖祖仁皇帝硃批諭旨。狂書塗抹。悖逆已極。應將伊子孫照叛逆例。悉行正法。得旨。朕從前在藩邸時。與蘇努竝無絲毫嫌怨。祇因蘇努爲人陰險姦邪。爲惡黨之首。引誘宗親。要結匪類。欲以擾亂政事。煽惑人心。其害關於宗社。誠爲元惡。渠魁。舉朝所共知者。朕即位後。冀其改過。自新。封爲貝勒。厚加恩眷。而伊竝不感恩悔罪。仍復怙惡不悛。又見朕防範嚴密。伊不得遂結黨之私。復教導其諸子。肆行不法。甚至蘇爾金。庫爾陳。烏爾臣。信從西洋外國之教。朕屢次降旨諭令悔改。伊竟公然抗違。奏稱願甘正法。不肯改易。似此忘本背君。藐視國法。喪心蔑理。聞者莫不駭異。今查

出昔年

聖祖仁皇帝硃批奏摺。蘇努竟於

御筆中間狂書塗抹。見者無不心寒髮指。是其背叛之心。顯然昭著。罪實同於大逆。本應將

伊子孫照法司所議俱行正法但伊子孫多至四十人若悉行正法朕心有所不忍僅分別存留於法又覺未協今從寬暫免其死仍照前禁錮著將蘇努父子前後所犯罪案及朕所降諭旨遍行曉諭伊之子孫若嗣後伊等安靜守法再無過犯則開恩全其性命儻諸人中有一人犯法者不論情罪之輕重定照此議將伊即行正法 庚辰以內閣學士僧格蔡世遠俱充經筵講官 實授申大成爲順天府府尹 調鑲白旗蒙古副都統戴豪爲正白旗滿洲副都統以原任直隸布政使羅密爲鑲白旗蒙古副都統陞王府長史邁祿爲正藍旗漢軍副都統仍兼長史行走 署湖廣總督福敏摺奏臣查看安陸荊州各府被水隄堪今年冬初水退尚未嚴寒正可興工仰懇

皇恩自十月初一日起即爲賑濟除老幼婦女照常計口給食外其餘丁壯皆令修築隄堪

優給賑米自必踴躍赴工易於告竣則饑民不至乏食而隄工可以完固矣奉

上諭此議甚善應如是行 賑江南無爲舒城等六州縣水災饑民 辛巳以翰林院侍讀徐本提督貴州學政 擢山西太原府知府郭銍爲廣西按察使司按察使 吏部議覆雲貴總督鄂爾泰疏言東川一府地方遼濶實非一知府一經歷所能遍理查巧家營逼近烏蒙去府甚遠應立一縣設知縣一員管轄馬書弩革米糧壩以扯汎等處者海地方素通烏蒙暗行不法應設典史一員管轄革舍阿固伙紅等處駐劄者海其歹補地方離府百里山深箐險應設巡檢一員管轄五龍畢七法戛等處又則補地方遠在江外亦應設巡檢一員管轄阿木可祖普毛杉木箐等處至東川府教職諸事向係知府兼攝請添設教授一員專司學校歲取文武童生各十名均應如所請從之尋定巧家營新設縣曰

會澤免江南太倉丹徒等五州縣蘇州鎮海二衛雍正四年分水災額賦有差○壬午諭內閣法敏從司官之職朕加特恩用至倉場侍郎歷任巡撫乃伊深負朕恩一味沽名釣譽苟且因循朕屢加訓誨而伊全然不知悛改即如南坪冕山之苗蠻等肆行不法騷擾居民搶奪行旅爲地方之患久矣岳鍾琪方議用兵勦撫以爲除暴安民之計而法敏密摺奏稱近邊員弁僥倖軍功議敘遂生喜功好事之心或致激成事端等語比時朕見其奏猶以爲此庸人迂濶之見或道聽塗說之言而不識安邊經國之遠圖是以詳悉批示冀其醒悟今岳鍾琪料理南坪冕山等處苗蠻之事迅速成功永除地方之累而法敏與佛喜程如絲喬鐸等通同作弊之處一一敗露可知法敏從前之奏實與蔡瑑佛喜程如絲暗結黨援欲以傾陷岳鍾琪而阻撓國家之政事竝非迂濶之見出於無心者也其

護庇屬下貪官隱匿變關稅課乃伊營私作弊之一節耳負國負恩莫此爲甚法敏著革職拏問將伊所奏原摺發出交九卿嚴審定擬○大學士九卿等奏順天府恭進耜田所產嘉穀一莖雙穗五本一莖三穗至四穗五穗十二本一莖六穗至七穗八穗十四本一莖九穗二本一莖十穗至十一穗十二穗六本一莖十三穗二本又內務府恭進豐澤園皇上親植稻穀雙穗者二百七十本三穗者十五本四穗者一本臣等欣逢嘉瑞請宣付史館俾垂永久報聞○旌表福建惠安縣烈女林起聘妻吳氏守正拒姦自縊完貞給銀建坊入祠致祭如例○癸未諭直省總督巡撫等自雍正二年以來朕躬耕耜田而耜田之中每歲必產嘉穀上年自雙穗至於九穗今歲則自雙穗至於十三穗在廷諸臣及京師耆庶皆驚訝以爲奇朕之宣示於衆者竝非矜詡誇張以爲祥瑞蓋實有見於天人感

之理捷於影響而朕敬

天之心至誠至切願與內外大小臣工共勉之也稼穡爲天地之寶民命攸關我

聖祖仁皇帝臨御六十餘年無刻不以重農力穡爲先務仰觀天時俯察地利辨土性而課人功咨雨暘而防旱潦綢繆區畫旰食宵衣偶遇雨澤愆期

聖心憂勞之切侍側臣子皆惶悚不寧所以爲萬世謀粒食者至矣盡矣朕朝夕瞻仰者四十餘年今續承大統竭誠效法念切民依每年度祀

先農躬耕帝藉仰蒙

上天眷佑疊錫嘉禾是以特頒諭旨令各省守土官共舉耕藉之禮爲萬方百姓祈禱秋成今見各省督撫奏報處處風雨均調春麥秋禾並登豐稔雖邊遠荒僻之地亦慶有秋惟直隸湖廣安徽數州縣近水最低之處常年被潦者畧有浸注亦不爲災是今歲可稱大

有年矣良由各省初耕藉田各該有司自然小心敬慎齋戒虔誠是以感格

上蒼而獲此盈寧之錫儻從此益加敬謹不懈初心則歲歲屢豐可以預必爾督撫等可通行曉諭所屬官民當凜

帝鑒之匪遙勿視耕藉爲故事永矢嚴恪以迓天和天下臣民受福斯朕之福也

大清世宗敬天昌運建中表正文武英明寬仁信毅大孝至誠憲皇帝實錄卷之五十九



大清世宗敬天昌運建中表正文武英明寬仁  
信毅大孝至誠憲皇帝實錄卷之六十

監修總纂光祿大夫經筵講官太僕寺卿和碩大學士兼兵部尚書總理兵部事務三等伯加十五級臣鄂爾泰

總纂官光祿大夫經筵日講官起居注太僕寺卿和碩大學士兼戶部尚書吏部尚書翰林院掌院

事三等伯加十三級臣張廷玉光祿大夫經筵日講官起居注太僕寺卿和碩大學士兼兵部尚書仍兼管

翰林院掌院事加二級臣福祿光祿大夫經筵講官太子太僕寺卿大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事臣三泰等奉

教修

雍正五年丁未八月甲申朔諭刑部李茂卿

實錄卷六十

打死胡君彩之案若非爾部駁令覆審則兇  
犯李茂卿脫然無罪而屍親胡君星反坐以  
証告擬流不惟是非失實亦且冤抑莫伸矣  
今駁回覆審該撫將一切實情審出李茂卿  
擬絞監候方成信案似此定稿司官若不量  
加獎勵則將來實心辦事之員何由鼓舞嗣  
後此等事件爾部司官苟能細心究核駁令  
覆審改正妥協者應量加議敘以示獎勵若  
有將應照覆完結之案妄行苛駁徒滋弊端

者亦當加以懲戒○吏部議覆署福建巡撫

毛文銓疏言臺灣知縣以上等官舊例三年

俸滿加陞銜再留三年題陞其佐貳教職等

官請照知縣以上之例俸滿加陞銜再留三

年至沿海兼有棚民州縣准其三年俸滿即

陞若止係沿海而無棚民或有棚民而非沿

海之缺亦請照臺灣例三年稱職加銜再留

三年陞轉俱應如所請從之○兵部議覆江

南提督魏經國疏言蘇州城守營向設遊擊

中軍守備各一員千總二員把總五員馬步

兵七百五十四名所管內外關廟居民櫛比

水陸邨莊汛地共六十餘處應請添兵二百

四十六名合成一千名之數以資巡防又崑

山素稱劇邑水陸汛地九處向設千總一員

駐劄不足彈壓擬將府城之中軍守備改為

左軍守備照舊駐劄外請添設右軍守備一

員駐守崑山并管轄原設之千總稽查城外

各汛至松江府華亭新分之奉賢縣署在青

邨上海新分之南匯縣署在南匯俱有城池及錢糧倉庫請各添守兵一百名均應如所請從之○刑部議覆雲南巡撫楊名時疏叅姚安府土同知高厚德占奪民田欺隱莊地請革其世職改設流官遷其家口於省城應如所請從之○議敘土司隨師進勦青海等處功雜谷宣撫使同知板第兒吉加宣撫使銜瓦寺安撫使桑朗溫愷加宣撫使同知銜莊浪指揮僉事魯華齡三寨指揮僉事丹壩扎什雙岸朗柯四員俱加指揮同知銜包坐千戶桑柱等俱加指揮僉事銜及各土目土兵等賞賚有差○免江南常熟昭文二縣雍正四年分水災額賦有差○乙酉工部議奏都統盧詢等監修昭西陵工程辦理不慎應分別處分得旨據盧詢奏稱修工時值雨水連綿磚塊被溼以致入冬冰凍將磚塊擠出週圍裂墜石角磕損等語

陵工關係重大自應敬謹修理今盧詢等以冬寒冰凍爲詞當時未凍之先何不速行完工及至冰凍之時又何不據實奏聞請旨明係草率怠忽甚屬可惡著將盧詢鈕倫革職令來保動支正項錢糧交與盧詢等速行修理仍著來保監督如果工程堅固完好屆期三年該部奏聞將盧詢鈕倫免其治罪若三年之內有些微損裂之處即將盧詢鈕倫正法○議政王大臣等議覆川陝總督岳鍾琪疏言西寧北川口外大通川白塔川及野馬川之測爾克地方城垣營房漸次告竣其應設官兵應預爲酌派臣查肅州鎮屬永固城等營涼州鎮屬永昌等營向因逼鄰邊境設馬六步四或馬步各半今大通鎮營扼險拒要肅州口外又設安西重鎮表壯聲威則永固等營皆屬內地應將肅州涼州二鎮所屬永固永昌等十八營馬兵量裁九百六十名連寧夏鎮標後營近已裁去馬兵六百名共裁

馬兵一千五百六十名大通鎮有控制援勦之責應照馬步各半之例設馬兵一千名步兵一千名測爾克遊擊逼近邊境路通青海應設馬兵三百二十名步兵四百八十名白塔川叅將與西寧北川營相去止五十里距大通鎮不過一百餘里聲氣響應應設馬兵二百四十名步兵五百六十名均應如所請得旨西大通等處初設兵丁甚屬緊要其應添設叅將遊擊守備千總等官著岳鍾琪於陝西武官內應題補者題補應調補者具題調補○丁亥遣怡親王允祥祭

先師孔子○調工部左侍郎史貽直爲戶部

左侍郎戶部右侍郎吳士玉爲工部左侍郎

○免山東鄒平等十縣濟南一衛雍正四年

分水災額賦有差○戊子祭

大社

大稷

上親詣行禮○己丑

上御經筵講畢賜大學士九卿詹事及講官等宴○領侍衛內大臣公馬爾賽等議奏原任將軍祁里德統率軍營在軍前勒索蒙古銀兩駝馬縱容家人包攬捐納冒銷錢糧入己已達色鑽營諂媚認伊爲父即將已達色題補筆帖式竝代其捐陞主事祁里德婪贓不法本應正法因已故無庸議其家產應入官已達色應斬監候不准援赦寬免得旨此本內將已達色等議以不得援赦寬免者原爲兵餉事務關係重大之故但本內竝未聲明嗣後凡有軍機兵餉之事俱不應援赦寬免著永爲定例○署直隸總督宜兆熊等疏叅大城縣知縣李先枝貪婪成性罔念民瘼將地畝人丁於額徵之外加派私收苦累小民請革職究審得旨李紱任直隸總督時將李先枝題陞天津州知州朕調來引見看其人甚屬庸常故令仍回知縣原任今以私派被叅劣款現有明據常見科甲出身人員多有

黃緣黨庇之惡習。而貪贓枉法者。尚不多見。今李先枝目無國法。公然私派科斂。苦累小民。實為科目中之匪類。而李紱乃敢在朕前特薦。題補天津要缺。是李紱不但有心袒護。且必有暗受李先枝請託之處。著將李先枝革職。鞫其私派情由。及本內有名人犯該督等一併嚴審定擬。再將如何請託李紱之處。務須究出。具奏。李紱受朕深恩。不思報効。敢於營私欺罔。甚屬可惡。著將李紱革職。其工部侍郎員缺。著申大成補授。仍兼管順天府府尹事。前因廣西貴州查勘疆界及擒拏羅文剛二案。將李紱發往廣西。彼時降旨。若不能拏獲羅文剛。即將李紱在廣西正法。今羅文剛已經緝獲。是李紱在廣西無可辦理之事。著行文令李紱來京。現在應行質問之案件甚多。且李紱曾在朕前奏稱。蔡珽為人粗疎鹵莽。則有之。若貪婪不法之事。臣可以保其必無。今蔡珽諸事敗露。在四川任內受

賄貪贓。劣蹟昭著。李紱敢於庇護私黨。在朕前妄奏。此處亦應審問。○署湖廣總督福敏疏報湖北歸州鍾祥等六州縣開墾雍正四年分田地七十六頃有奇。下部知之。○添設湖南糧道庫大使一員。裁衡陽縣松柏市巡檢一員。從湖南巡撫布蘭泰請也。○庚寅。以額外護軍統領袞泰為正黃旗護軍統領。○鑲藍旗護軍統領喀爾吉善。緣事革職。陞鑲藍旗滿洲副都統伯馬蘭泰為鑲藍旗護軍統領。調正紅旗滿洲副都統阿山為鑲藍旗滿洲副都統。以天津水師營都統覺羅巴延德為正紅旗滿洲副都統。陞鑲紅旗蒙古副都統泰布為鑲藍旗蒙古都統。以散秩大臣侯五格為鑲紅旗蒙古副都統。○命設米穀倉六所於江南泰州通州如皋鹽城海州板浦附近商竈地方。以備賑濟。○辛卯。免江南泗州桐城等十州縣雍正四年分水災額賦有差。○壬辰。

太宗文皇帝忌辰遣官祭

昭陵○陞浙江瑞安副將林君陞為浙江定海

總兵官○癸巳秋分夕

月於西郊

上親詣行禮○

上幸圓明園○禮部尚書賴都休致協理禮部

尚書法海緣事革職陞戶部左侍郎常壽為

禮部尚書調刑部右侍郎西琳為戶部左侍

郎仍兼管刑部侍郎事陞西安巡撫張保為

刑部右侍郎仍署理西安巡撫事調江南安

徽布政使富貴為雲南布政使司布政使以

巡視兩淮鹽政噶爾泰署理江南安徽布政

使司布政使○甲午

太祖高皇帝忌辰遣官祭

福陵○戶部議覆山東巡撫塞楞額疏言請將

捐監存價未買倉穀之各州縣查明題參應

如所請得旨山東捐監之數每石折銀三錢

係當時經手官員之弊接任官因價少難於

購買展轉遲延以致穀石久虛今若責令現

任官添銀購買殊非公平之道當日經手之

員多收銀兩現在查明著追若三錢之數不

敷應於此項著追銀兩內准其酌撥添補即

行購買以實倉儲其價值數目令該撫照實

在時價酌定○乙未遣官祭

關聖帝君○戶部議覆署廣西巡撫甘汝來

疏言思恩府屬之西隆州西林縣僻處西北

距府千里之外界接滇黔獠獍頑梗知府耳

目難周請改西隆州為直隸州西林縣距州

百四十里可以就近分歸管轄應如所請從

之○刑部等衙門議奏湖南辰谿縣姦民謝

錄正聚眾傷官持械拒敵雖無陷城大逆但

負固八載情罪重大將謝錄正應凌遲處死

妻子給付功臣之家為奴同謀拒敵之陳彬

臣等應斬立決脅從附和之張如茂等應發

三姓等處地方給披甲人等為奴從之○工

部等衙門議覆川陝總督岳鍾琪遵旨查覆

四川永寧協副將張瑛條奏內酌議可行者四款。一四川松潘鎮爲川西屏障城堡損壞不足以壯聲威而資防禦請委員確估修築完固。一雲南東川府會理州貴州威寧府屬之阿底鹽倉等處永寧之各夷屯歸流已久其土目各治其民流官向土目收糧終非久訖請將土目遷往腹地其催糧之里長甲首令內地輪流充當其土民悉令薙髮男婦俱照內地服飾。一貴州威寧府屬之永寧縣去府千里駐劄衙署乃與四川之敘永同知共在永寧而所屬人民散處於四川江安納溪興義等縣且無貴州營汛而以四川永寧協營升代爲稽查姦良莫辨請將永寧縣改歸四川隸於同城之敘永同知管轄。一東川府土人習讀蠻書不諳文藝請設立義學俟教化有成照湖廣考取苗蠻童生例另編字號酌量進取以示鼓舞均應如所請從之。○旌表福建漳平縣烈女陳少韓聘妻劉氏未婚

夫故投繯盡節給銀建坊入祠致祭如例。丙申諭內閣各省副將叅將著該省之督撫提鎮會同分別列爲一等二等三等出具考語密咨兵部添寫履歷年齒鄉貫繕摺進呈其副將叅將中有曾經特用及該上司題陞者亦仍分別等次出具考語一體咨部。○景陵一等侍衛關保恭進陵寢地方所產高粱一莖雙穗四穗十一穗及所產嘉穀雙穗三穗不等報聞。吏部等衙門議奏現任官員職守地方各有專責不得借終養之名誣卸職任即或父母衰疾迎養維艱陳情詳請必歷俸三年該督撫查明該員政務竝無怠忽倉穀錢糧竝無虧空取結具題照例准其終養或從前家有次丁出仕之後兄弟物故父母無人奉事者該督撫取其原籍地方官印結具題不拘年限准其回籍從之。○雲南巡撫楊名時疏報廣南蒙化二府尋甸昆明等八州縣開墾雍正四年分

田地六十一頃有奇。下部知之。○丁酉。吏部議覆署廣西巡撫甘汝來疏言。太平府屬之思明州。向隸思明土府同知。自改土為流。始歸太平府管轄。止留吏目一員。仍駐其地。該州地處極邊。鄰近交趾。土民獷悍。非吏目所能約束。太平知府遠在百里之外。鞭長莫及。請將該州仍歸附近之思明土府同知管轄。應如所請。從之。○免江南吳縣等十八縣淮安大河二衛。雍正四年分水災額賦有差。○

己亥。廣東總督孔毓珣疏言。臣由曲阜縣路經江南鳳陽府屬之宿州。及靈璧縣地方。溝洫不通。雨水停積。訪之土人。宿州之水有流入新河者。有流入運河者。亦有流入澮河者。其靈璧縣之水。則悉入澮河。而匯於洪澤湖。出清口。合黃水入海。請敕安徽撫臣。令該地方官照舊溝深淺。用力疏濬。則雨水暢流。可無停蓄之患。得旨。凡為大臣者。當視國事如家事。即非己身管轄之地。有所見聞。亦當據

實陳奏。方為公忠之道。孔毓珣經過宿州靈璧地方。見溝洫不通。雨水停積。即行奏聞。甚屬可嘉。著交部議敘。魏廷珍身為巡撫。於本省事務。漫不關心。以致低窪之處。被水停注。甚屬疎忽。怠玩。著交部嚴察議奏。孔毓珣所奏。著交與總督范時繹。轉交署布政使噶爾泰。確查被水之民。加恩賑恤。並將應行疏濬之水道。相度修治。使積水暢流。不為民害。○裁陝西洮陽驛。武威驛。永昌驛。古浪驛。南大

通驛。西寧驛。嘉順驛。巴古驛。王鉉大壩驛。驛丞九員。添設寬溝驛。三眼井驛。營盤水驛。驛丞三員。從護理甘肅巡撫鍾保請也。○庚子。諭大學士九卿等。天下庶務殷繁。斷非一人所能辦理。朕宵旰勤勞。勵精圖治。而分猷贊理之任。實於爾諸大臣。是賴為大臣者。必須視國事如家事。方可謂之公忠。不負朕股肱心膂之寄。如爾等自理家務。必商酌盡善。措置得宜。斷無漫然為之。聽其錯誤。不為釐正。

之理至於教導家人約束奴僕其分別優劣賞罰寬嚴之間爾等亦斷無率意而行之事而獨至辦理公事之時類多苟且塞責漫不經心或隨衆畫題畫行而於其中之原委曲折茫然不知或心知其不可而瞻顧不肯直言以爲非我一人之事不如隨班逐隊以免是非至於接待屬員如同僚友平時不辨別其是非不督責其過失及至甄別之際又復瞻徇情面曲直不分種種陋習皆部院大臣所不能免古人云公爾忘私國爾忘家言人臣既以身許國即當置家事於不問也今縱不能如古人之體國奉公忘私忘家亦安可視國事家事截然分爲兩途而輕重疎密其相去若是之遠哉庸臣具臣之習切宜深戒朕日以良臣名臣之道期望大臣爾等慎勿菲薄自待重負朕期望之心至於諸臣存心之誠僞朕觀其陳奏之言辦理之事即可洞悉其隱微或改變初心或屏除舊習朕一見

無不知之不可不自勉也夫人臣之弊莫大於迎合上意此朕所深惡而日加訓誡者朕欲大小臣工俱爲好官爾等若欲迎合朕意何不即以勉爲好官爲迎合之首務則朕之心慰爾等亦無負於朕矣 癸卯諭大學士等

皇祖妣

皇妣外家俱有世襲公爵

孝誠仁皇后外家之公爵因常恭獲罪奉

皇考諭旨革退而彼時未令承襲者

皇考或有深意存焉今可著常海之子倫布承

襲再原任都統賴塔當三逆變亂時伊統兵

征勦克復雲南功績懋著朕恭聞

聖祖仁皇帝實錄備悉其詳因伊身有過犯其

功過適足以相抵是以未封公爵給以阿思

哈尼哈番在國法實爲允當且當日之不優

封賴塔者欲使立功之人咸知儆惕收斂不

可恃功驕肆妄爲今事歷多年後人已知鑒



成奉法著將賴塔追封爲一等公。令伊孫博爾屯承襲。以示朕眷念舊臣之至意。○諭內閣。積善由刑部司官。朕加恩擢至江西按察使。准其具摺奏事。伊自應勉竭忠誠。凡有所見。據實奏聞。乃自到任以後。諸凡事務。一概隱匿。並不陳奏。值邁柱到任之時。亦當將地方事務。一一告知。同心協辦。以報朕格外擢用之恩。乃反袒護裴律度等。徇庇屬員。邀結黨與。捏造無稽之談。誣參邁柱。邁柱到任以來。不避嫌怨。爲地方生民計。實心効力。天下共知。伊縱不竭誠協助邁柱辦理。又何忍誣陷邁柱。此等行事。是何肺腑。聽誰指使。積善向爲刑部司官。塞爾圖若非黨與。何故將如此不肖之人保舉。著富寧安查郎阿。會同刑部堂官。訊問積善。務將始末緣由審出。若不實供。即嚴加刑訊。○以翰林院編修張廷琛充日講起居注官。○吏部議覆雲貴總督鄂爾泰疏。言廣西貴州交界地方。犬牙相錯。惟

紅水一江。天之所以限黔粵也。議以紅水江爲界。江以南屬之廣西。江以北屬之貴州。凡廣西西隆州所屬羅煩。冊亨等四甲。及泗城府所屬上江。長壩。桑郎。羅斛等十六甲。俱在江北。應請割隸貴州。其地南北約三百里。東西徑六七百里。勢既遼闊。民復兇悍。請於泗城對江之長壩地方。建設州治。添知州一員。吏目一員。學正一員。管理之。東北羅斛四甲。與貴州定番。永寧二州相連。土苗兇頑。山谿尤險。請於羅斛甲地方。設州判一員。分理之。西隆州所割四甲。距長壩遠。請於冊亨甲地方。設州同一員。分理之。其武弁亦屬緊要。請設城守遊擊一員。千總一員。兵二百五十名。防守長壩地方。守備一員。把總一員。兵一百五十名。防守冊亨甲地方。把總一員。兵一百名。防守羅斛甲地方。俱歸安籠鎮統轄。至泗城之北。有一肩作山。爲黔粵分界。黔屬之董家旗等十寨。穿入泗城。請將此十寨俱歸

新設之州管理再安順一府原轄三州五縣南籠一廳地方廣濶再轄新設州地數百里勢難兼顧請將南籠廳改爲府治添設知府一員經歷一員仍留南籠通判爲之佐理將安順府所屬之普安一州安南普安二縣并新設一州俱歸南籠府管轄其鎮寧永寧二州普定安平清鎮三縣仍歸安順府管轄又普安州之捧鮮地方有養馬箐穿連三十餘里爲三江之咽喉夷獯之要隘上江白雲峯險峻異常惟一徑迂迴攀援而上法巖寨山高十五里路險巖危至染寨烟戶百餘家田多民富若於捧鮮地方設立一營白雲壘之上撥弁員帶兵扼險法巖至染二處設立大汛防守不惟黔夷可以控制卽粵獯亦不敢起釁查黃草壩在捧鮮之內請卽以駐防黃草壩之安籠鎮標左營遊擊一員千總一員把總一員兵三百名移駐捧鮮將原防捧鮮汛之把總一員兵五十名移駐黃草壩黃草

壩民居稠密漢多夷少且距州遙遠請於普安州添設州判一員分駐其地稽查姦宄卽將貴州按察司經歷裁汰改設普安州判均應如所請從之尋定長壩新設州曰永豐又議覆雲貴總督鄂爾泰疏言泗城土知府岑映宸橫徵濫派衆不聊生以致殺劫爲活復差役攜帶兵器越境掣人甚至調兵數千於耆耋地方扎營七盤以誇強悍臣等奉旨各調官兵在營候檄岑映宸自知罪犯難逃隨繳印信號紙呈懇免死改流存祀請將岑映宸革去世職改設流官知府岑映宸妻子家口一併解至浙江原籍安插查岑映宸之祖岑繼祿曾有率土兵迎導大軍之功請將映宸之弟武舉岑映翰賞給八品頂帶仍居泗城量給田產奉祀不得干預地方生事至泗城一協向設官弁但駐守泗城內哨外哨其接壤黔苗數百里內竝無一兵防汛請將泗城協副將裁去改設右江總兵官添設左

右兩營遊擊各一員左營遊擊兼管中軍事駐劄畝樂地方右營遊擊駐劄百色地方每營添設千總一員把總二員泗城協原設守備千總把總仍照前駐劄共設兵一千六百名屬右江鎮管轄再安隆營改為隆林營添設遊擊一員把總一員并原設安隆營守備一員千總一員俱駐劄西隆州共設兵五百名分汛防守聽右江鎮統轄其原設上林守備營兵丁令歸隆林營管轄均應如所請從之○予故陝西寧夏總兵官張君烈祭葬如例○甲辰廣東瓊州總兵官黃助年老休致陞廣東瓊州副將施廷專為廣東瓊州總兵官○山西大同總兵官王以謙緣事革職以正白旗漢軍副都統祖秉衡為山西大同總兵官陞浙江黃巖總兵官董一隆為正白旗漢軍副都統浙江嚴州副將方文登為浙江黃巖總兵官○乙巳調鑲紅旗漢軍都統鎮國公鄂齊為直隸天津水師營都統以輔國

公塞爾臣兼理鑲紅旗漢軍都統事○議政王大臣等議覆郡王額駙策零等奏稱臣等與鄂羅斯使臣薩瓦等相見議定疆界事宜臣以應為界址之處詳告薩瓦云東邊額爾古納等處昔年內大臣索額圖等與爾使臣費耀多爾等議歸爾國無庸再議今自額爾古納河岸以至阿魯哈當蘇阿魯奇都勒齊克太奇林俱係我處斥堠應以相對之楚庫河為界自此往西沿布爾古特山等處以博木沙畢羅嶺為界定界之後不得混雜居住及容留逃盜人等犯者互相查拏隨與伯四格侍郎圖理琛等以應立界石地方繕寫給與薩瓦薩瓦及布里雅特吳梁海等俱皆心服據薩瓦云此次幸為使臣瞻仰天顏既優賜我察罕汗復賞賚奉使人眾皇恩優渥今既秉公辦理即可永為定界臣等隨派侍衛胡畢圖郎中納延泰等與鄂羅斯副使一番一番諾費池等指定東西界址議

立界石俟其回時即將界址山河地名繕寫繪圖恭呈

御覽應照策凌等所議立石定界曉諭喀爾喀汗王各扎薩克黑龍江將軍等令其約束屬人不得越界生事違者從重治罪至恰克圖口定為貿易之所應派理藩院司官一員管理貿易人數照例不得過二百其京城鄂羅斯館應為修整令使臣居住其來京讀書幼童及教習等亦令同居官給養贍如願回者聽其歸國至領侍衛內大臣克什圖前派往代隆科多辦事今疆界已定應令其來京從之○丁未議政王大臣等議奏翁牛特扎薩克多羅杜楞郡王和碩額駙蒼津背恩自專奏請策妄阿喇布坦煎茶之使者入藏行走其屬悖逆應將蒼津之扎薩克郡王和碩額駙革退其郡王另請承襲得旨扎薩克多羅杜楞郡王著貝子鄂齊爾承襲○刑部等衙門議覆雲南巡撫楊名時疏言鎮沅府土知

府刁瀚姦占民妻強奪田地光淫貪劣應擬絞監候鎮沅地方已經改土為流應將刁瀚家口遷住省城無留土屬滋事應如所請得旨疏內所稱將刁瀚家口遷住省城之處朕思伊之家口若仍留本省管束太嚴則伊等不得其所若令疎放恐又復生事犯法刁瀚之家口著遷往江寧省城令該督酌量安頓務令得所凡有改土為流之土司其遷移何處及如何量給房產俾得存養之處著九卿酌量該土司所犯罪案分別詳議具奏○免江南福泉陽湖二縣雍正四年分水災額賦有差○戊申諭怡親王大學士富寧安張廷玉等西安滿洲兵著派二千名令副都統尼馬善預備管領寧夏滿洲兵派一千名令副都統蘇圖預備管領其綠旗兵陝西省預備五千名四川省預備三千名雲南省預備三千名爾等可行文與岳鍾琪鄂爾泰即遵照派辦管兵之官弁及應用帳房等項一有調

發之處候文到即便啓行岳鍾琪現在四川著回到西安將預備兵馬之事料理畢即馳驛來京朕有面降諭旨之處其川陝總督印務仍著岳鍾琪隨路帶辦不必委人署理○陞光祿寺卿羅其昌爲大理寺卿○己酉以湖廣提督馮允中署陝西西大通總兵官陝西興漢總兵官劉世明署湖廣提督陝西督標中軍副將曹勳署陝西興漢總兵官○總理水利營田事怡親王等疏報現值秋成所

營京東灤州豐潤薊州平谷寶坻玉田等六州縣稻田三百三十五頃京西慶都唐縣新安涞水房山涿州安州安肅等八州縣稻田七百六十頃七十二畝天津靜海武清等三州縣稻田六百二十三頃八十七畝京南正定平山定州邢臺沙河南和平鄉任縣永年磁州等十州縣稻田一千五百六十七頃七十八畝其民間自營己田如文安一縣三千餘頃安州新安任邱等三州縣二千餘頃據

各處呈報新營水田俱禾稻茂密高可四五尺每畝可收穀五六七石不等至正定府之平山縣及直隸天津州呈送新開水田所產瑞稻或一莖三穗或一莖雙穗謹呈御覽下部知之○庚戌八旗都統帶領各旗副佐領引見

上諭各都統等八旗人員乃國家根本所關甚重養育教誨不可少懈佐領者乃統轄一佐領之人俾佐領下人等皆不失生計不染惡俗養之教之使趨於善莫要於佐領爾等理宜爲國家宣力正己率物教育所轄佐領下人佐領內有原管佐領有世管佐領有公中佐領原管佐領乃

太祖

太宗時爾等之祖或率所部來歸或戰陣有功賞賜人口各編爲佐領今其管理是爾等與佐領下人同是滿洲其中亦有從爾等之祖宣力國家得授世職逮於子孫爾等理宜骨

月視之。若自以爲原管佐領。將佐領下人。視同奴隸而陵賤之。豈惟國法不容。亦敗汝祖勤勞所立之基業矣。世管佐領。因爾等之祖曾宣力國家。或人材可用。善於管轄。故令其管理佐領。世世相傳。以至於爾等之身。爾等理宜將佐領下人。愛惜訓誨。念爾祖之勤勞。以永保累世所管之佐領也。再管公中佐領之人。特以其能理佐領之事。能教佐領下人。是以揀選令其管理。益宜視佐領下人。如同手足。誘掖訓導。誠切肫篤。則佐領下人。無不成就。佐領內事。無不辦理矣。夫佐領之管佐領下人。無異州縣之於百姓。州縣所轄地方。或百里有餘。或幾二百里。戶口人民。不下數萬。徵糧斷訟。事件繁多。然猶可爲地方興利除弊。懲惡勸善。俾庶民各遂其生。一佐領下滿洲。多不及二百人。少或七八十人。計戶不過四五十家。世爲同里。孰守分節。儉孰越禮。奢侈孰孝弟勤學。孰妄亂生事。諒無有不知。

者也。管佐領之人。誠於佐領內之善者。獎勸優待。薦舉以鼓勵之。則善者益樂爲善。其劣者。視如子弟。初教之不改。再則斥辱之。誠如此。愛惜而訓誨之。雖係下愚。亦必中心省悟。儻有賦性頑劣。怙終不悛者。即申詳參。領都統等懲戒之。或送部治罪。以警衆人。則佐領下頑梗之徒。咸懼而不敢爲非矣。今佐領內。或有不肖之人。自恃身爲佐領。陵虐佐領下人。不論是非。恣意妄行。其或昏懦怠惰之輩。將佐領事。盡誣之。驕驕校。領催轉相傳示。其或貪鄙之輩。不知愛惜。反貪小利。而賤刻之。則佐領下人。何由心服。何由成就。是以朕今特令每佐領設副佐領一員。協同佐領辦事。和衷共濟。儻副佐領目無佐領。不問事理。肆行無忌。該佐領即申詳都統。若佐領與佐領下人結黨。目無副佐領。朦朧作弊。副佐領亦即申詳都統。不可彼此瞻徇情面。爾等以朕訓旨。謹識於心。將佐領下人。教育約束。勉習。

文武之業。副朕樂育八旗人材之至意。○辛亥諭湖廣督撫等。湖廣近江濱湖之州縣如咸寧蒲圻數處。今歲被水特頒諭旨。將今歲錢糧全行蠲免。沔陽潛江監利一州二縣及衛所屯田皆屬低窪之地。與咸寧等處相同。照例將今歲錢糧全免。其有已經完納者。准抵算明年額賦。朕因軫念楚省窮民。已發帑銀二萬兩。令該督撫加意賑恤。此銀僅有不敷。湖北現有買穀備用之銀六萬兩。即將此項銀兩動支。於應用之州縣分給賑恤。務令均沾實惠。○壬子戶部議覆川陝總督岳鍾琪疏言。沙州招民墾種。臣檄甘肅布政使鍾保轉飭平慶臨鞏甘涼西七府及肅州廳各於所屬酌量補招。務足二千四百戶之數。但所招之民戶遠近不一。臣恐有誤春作。已令安西鎮派撥兵丁代種籽粒二千石。今所招之戶至彼者一千四百一十九戶。其未至彼者七百二十九戶。已過播種之期。請補足二

百五十二戶。俟明春一併發往。每戶各分地土百畝。給以籽種六石。應如所請。從之。○以故青海扎薩克輔國公諾爾布彭蘇克養子達錫班珠爾襲爵。○癸丑刑部等衙門議奏。窩盜黃三聖等行劫松江府奉賢縣裴詩度典舖一案。應照強盜窩主共謀分贓例。應斬立決。得旨。黃三聖等著即處斬。黃三聖已經行劫二次。此案內又復窩盜分贓。兇惡已極。而陳時夏以為情有可原。擬以發遣。甚屬疎縱。前張楷將確實強盜數人改招寬釋。又如今歲秋審招冊內署甘肅巡撫鍾保將因姦殺死親夫案內姦夫樊先成擬為緩決。其夫既遭慘死。其婦又被極刑。皆因樊先成而起。此人尚可緩決乎。又福建巡撫毛文銓將賭博殺死人命之邱奇章擬以緩決。邱奇章設局誘賭。又復毒毆斃人。性命兇惡。若此尚可緩決乎。書經曰。天討有罪。五刑五用。哉。刑罰之設。乃帝王代天出治。除暴安良之要務。而

無識之流以爲曲全一人便可得美名而獲厚福殊不知其人無罪而蹈顛危果能救之則爲陰隲儻係犯罪應死之人而故意寬縱是爲枉法殃民豈不上干天地之和乎如國家之設倉積穀乃水旱緩急之所賴百姓性命之所關而徇情邀譽之上司一任屬員之侵漁而不問以致顆粒無存倉庫空虛一時需用無所資藉而嗷嗷待哺之民已成溝中之瘠是爲民父母而使千百善良之人死於其手此等罪孽上通於

天今乃於此處不加儆戒恐懼以贖愆尤而欲曲活行兇劫奪之盜犯以求邀福於冥冥之中乎古聖人所云罪疑惟輕者亦必其中本有可疑之處然後酌量從輕未聞於無可疑之中而枉法寬貸以沽長厚之名也夫政寬則民慢因而犯法者愈多是不能息事而轉以生事不能愛人而轉以害人故子產云水懦弱民狎而玩之故多死焉火烈民望而畏

之故鮮死焉此一定之理也朕覽秋審緩決人犯中亦有情罪可惡者或因彼時正法之人已多故從緩決並非一次緩決之後便永不正法也若內外辦理諸臣以爲一次既寬便不當正法則與緩決二字之意不符陳時夏毛文銓鍾保身任封疆不能秉公持正而枉法故縱是何意見著明白回奏○旌表山東烈婦濮州殷秉志妻樊氏樂安縣吳燠妻李氏俱夫故投繯從容殉節各給銀建坊入祠致祭如例



大清世宗敬天昌運建中表正文武英明寬仁  
信毅大孝至誠憲皇帝實錄卷之六十

大清世宗敬天昌運建中表正文武英明寬仁  
信毅大孝至誠憲皇帝實錄卷之六十一

監修總裁官光祿大夫經筵講官太僕議政大臣保和殿大學士兼兵部尚書總理兵部事務伯加十五級臣鄂爾泰

總裁官光祿大夫經筵日講官起居注太僕議政大臣保和殿大學士兼戶部尚書仍兼管吏部尚書翰林院掌院

事等伯加十三級臣張廷玉光祿大夫經筵日講官起居注太僕議政大臣武英殿大學士兼工部尚書仍兼管

翰林院掌院事加二級臣福敏光祿大夫經筵講官太子太保東閣大學士兼禮部尚書加六級臣徐本光祿大夫

經筵講官議政大臣協辦內閣大學士兼禮部尚書仍兼管太常寺鴻臚寺事等伯加三級

敕修

雍正五年丁未九月甲寅朔賑福建永定縣

水災饑民○乙卯遣官祭

歷代帝王○遣官祭城隍之神○諭各省督

撫等民生日用所需制錢最為切要朕特為

便民起見屢頒諭旨嚴禁銷燬制錢竝令京

城及各省督撫駐劄之省城不許鑄造黃銅

器皿三品以下官員及兵民人等不得私用

此朕欲期錢文豐裕為小民易於資生非朕

有所需用也已曾諄切詳諭不啻再三京城

現今奉行錢價已覺稍平乃近聞各處督撫

駐劄之省城銅器店內仍用黃銅鑄造者甚多此明係各省督撫不實力奉行徒以告示曉諭虛文掩飾而已朕向因錢局鼓鑄日增而錢文日見短少即知有銷燬制錢鑄造銅器之弊嗣於京城內屢次拏獲銷燬制錢之姦民而欽差官員至甘肅地方亦見有燬錢爲器者省會乃督撫駐節之區耳目最近政令易行非若遠鄉僻壤之難於稽察也若果實心遵奉甚屬易事朕爲制錢籌畫宵旰焦勞各省地方官辦運銅餉亦甚費經營跋涉之苦然後官局得以鼓鑄錢文以資百姓之用夫以鑄錢如此之難而姦棍貪財射利竟將已成之錢復行銷燬故禁用黃銅者所以杜燬錢之源也今特再加訓誡各省督撫務宜實力奉行儻仍前疎忽定將督撫嚴加處分至從前曾斟酌三品以上許用黃銅器皿今覺濫用者多嗣後惟一品官員之家器皿許用黃銅餘著通行禁止○旌表山西聞喜

縣烈女張漢英女張氏守正拒姦被刃殞命給銀建坊入祠致祭如例○丙辰工部議覆河道總督齊蘇勒疏叅革職同知李世彦等分賠江南睢寧縣朱家口漫坍工程銀兩應如所請得旨河工追賠之項其中情由不一有該員侵蝕入己者有修築草率本不堅固易致衝決應當賠修者有當潰決之時該員預知例當賠修而以少報多先留地步者甚至有故意損壞工程以便興修開銷者種種積弊不可枚舉但亦有經手之員本無情弊而照例則應分賠者在該員情稍可原而承追之時無力全完亦於國帑無益朕意欲開恩稍爲變通其如何酌量分別定例之處著九卿詳議具奏尋議嗣後除侵蝕浮冒損壞工程等弊仍照定例遵行外至黃河一年之內運河三年之內隄工實係堅固已經題報而陡遇衝決者止令承修官賠修四分如該員修築已完未及題報陡遇衝決者該總河

督撫查無浮冒。據實保題。亦令賠修四分。其餘六分。俱准開銷。其黃河一年。運河三年之外。隄工陡遇衝決。而防守各員。實無疎虞懈弛者。該總河督撫查明。令防守道廳千把等官。共賠四分。其餘六分。准其開銷。所有承修防守各員。俱令革職留任。戴罪効力。工完准其開復。總河督撫保題不實者。查出嚴加議處。從之。○陝西西安將軍貝勒延信。來京陛見。命大學士侯富寧。安署理陝西西安將軍。○丁巳。以順承郡王錫保。管理正紅旗漢軍都統。○戊午。諭戶部。前商人胡嘉佩等。虧欠帑銀。開出朝鮮國人。賒欠銀六萬餘兩。以抵公項。朕恐開報不實。或有累及外國之處。故令行文詢問。並令內地貿易之人。與朝鮮賒欠之人。在中江地方。質對明白。使中外之人。不得互相推諉。以息擾累。今據盛京禮部奏。呈朝鮮國王李昫。咨文支離巧飾。則該國之人。欠銀之處。顯然矣。本應照議政所議。按數

追還。朕思當日朝鮮已故國王李燾。才幹優長。政令嚴肅。深蒙

聖祖仁皇帝眷注嘉獎。李燾曾將伊國負欠之人。正法想見其辦事之公明。向聞李昫柔懦無能。觀此咨文。推託牽強。必其陪臣所為。非該國王語氣。似此清查積欠之事。該國王不能辦理。今若以不能辦理之事。委之甚非朕柔遠之意。此案不必質對。其朝鮮國人應還之銀。著從寬免追。此朕加恩於外藩。並非疎法於內地也。至從前該國王李燾。理民馭下之善。朕至今思之。○江南江蘇按察使徐琳。緣事革職。擢兵部員外郎。覺羅白清。為江南江蘇按察使。司按察使。○刑部議覆。左侍郎海壽奏。言刑曹現審事件。均係奉旨所交。緊要之案。理宜專員分理。請於臣部十四司內。揀選滿漢司官各六員。分隸左右二司。并飭禮部鑄給現審左右二司印各一顆。應如所請。從之。○己未。諭議政王大臣等。康濟鼎屬

下厄魯特等原係青海之人。曾降旨與達賴喇嘛令將此等人。交副都統馬喇內閣學士僧格移於青海地方居住。爾等行文與岳鍾琪將四川布政司庫銀動用一萬兩。酌派官兵送往西藏。交與馬喇僧格備辦。糧賞移居之厄魯特等。○免江南溧陽無錫二縣雍正四年分水災額賦有差。○庚申諭議政王大臣等。前因達鼐報稱康濟鼐被擒之信。恐策妄阿喇布坦有窺伺西藏之意。是以降旨令陝西各路及四川雲南各派兵馬預備。以候調遣。今康濟鼐被害情由係西藏噶隆等彼此不睦。自相殘害之小事。不須用兵。著將各路兵馬停止。不必預備。○理藩院奏稱青海貝子噶爾丹代青諾爾布病故。無人承襲。伊妻請以姪貝子達錫策零兼襲。伊夫世職查貝子無兼襲兩職之例。應無庸議。得旨。噶爾丹代青諾爾布於青海羅卜藏丹津之事。著有功績。因議敘封為貝子。今既病故。伊兄

弟兩家止有貝子達錫策零一人。著從優加恩。并兩貝子職。晉封為貝勒。世襲罔替。○辛酉。太常寺卿王克莊緣事降調。陞右通政劉聲芳為太常寺卿。○以鑲白旗滿洲副都統宗室圖納兼理鑲白旗漢軍都統事。○壬戌。上以重陽令節。御正大光明殿。賜諸王大臣宴。及綴疋有差。并以雍正四年重陽慶宴。柏梁體詩墨帖頒賜諸王大臣及翰詹等官。直省督撫學臣各一冊。○以故阿霸垓固山貝子策伶東洛卜孫齊旺襲爵。○癸亥。諭大學士等。弭盜安民。乃為治之首務。但緝盜之例。最難於斟酌盡善。如立法稍嚴。似可防盜犯漏網之虞。杜地方官諱匿不報之患。然上司督責州縣。州縣督責捕役。按期處分。勒限責比。過於迫切。人多顧惜考成。巧圖脫卸。勢必有誣陷冤濫之事。如立法稍寬。似可詳籌緝捕。免累無辜。然又恐州縣視同膜外。漫不經心。捕役玩法養姦。盜風愈熾。此緝盜設法之難。

也。至於失事之家。往往亦有張大其詞者。或以少爲多。或以竊爲強。甚至扳害平人。洩其私憤。挾制官長。任意肆行。此又報盜之弊也。以上種種情形。朕皆知之。甚悉。今覽田文鏡奏摺。豫省地方。有全無影響。而捏報被盜者。有別因事故。而託稱盜案者。有以竊爲強。欲快其挾制之私者。有以口角微嫌。遂報被盜。欲逞其刁誣之計者。既有如此惡習。法當嚴加禁止。但思若嚴捏報被盜之處。分刁詐者。固知斂跡。恐謹良者。必至不敢報盜矣。朕實難之。夫弭盜之法。貴乎至公。至平。寬嚴輕重之間。皆須斟酌得宜。俾盜犯不能漏網。平民不致拖累。官吏皆盡緝盜之責。而不敢任意以失實事主。得伸被盜之苦。而不敢借端以滋擾。如此匪類方知儆懼。而良民悉得寧居。爾等可會同九卿科道。及部曹內。曾經外任年久者。悉心酌議。務期妥協。并將田文鏡摺奏詳議具奏。○吏部議覆河南總督田文鏡

疏奏。南陽府屬舊有南召縣。順治十六年裁併南陽縣管轄。止設巡檢一員。駐劄南召舊署。但其地界連萬山路。通山陝湖廣五方叢雜。實屬要區。請將南陽府通判移駐南召。其原駐南召之雅路鎮巡檢。改駐南召嵩縣適中之李清店地方。應如所請。從之。○禮部議覆四川巡撫憲德疏。奏成都府灌縣都江堰口廟祀李二郎。從前未授封號。查係秦蜀守李冰之子二郎。除水怪。鑿離堆。穿三十六江。灌漑成都等州縣稻田。至今江水安瀾。不乾不溢。應請敕賜封號等語。按史記漢書專載蜀守李冰鑿離堆。穿二江。惟灌口志書內有使其子二郎鑿山穿江之事。是李冰實主治水之功。又按王圻續文獻通考。元至順元年封秦蜀郡太守李冰及其子二郎俱爲王爵。今該撫祇請封李二郎。而不及李冰。似未妥協。請將李冰並給封號之處。恭候欽定。得旨。李冰李二郎俱著給與封號。尋封李冰爲敷

澤興濟通佑王李二郎爲承績廣惠顯英王  
○免江南上元等三縣雍正四年分水災額  
賦有差○乙丑諭吏部凡縣令改授教職者  
因其不勝牧民之任例當罷黜朕念其讀書  
攻苦選授一官不忍遽令廢棄是以俾居師  
儒之席以展其所學此朕格外之恩也況教  
官有化導士子之責較理民之任關係尤重  
應當殫心竭力以盡職守儻因改授之故志  
氣隳頹奉職怠忽著各省巡撫學政查叅議  
處○諭戶部朕聞江南浙江近水之地數處  
被水軫念窮民朕懷殷切著江南總督范時  
繹動用庫銀二萬兩於上下兩江應用之處  
散賑浙江巡撫李衛動用庫銀一萬兩於應  
用之處散賑令窮民均沾實惠○諭理藩院  
翁牛特郡王鄂齊爾在  
皇考時効力年久朕特施恩賞給貝子此貝子  
之爵著鄂齊爾之子台吉羅卜臧承襲○調  
浙江布政使孔毓璞爲陝西甘肅布政使司

布政使陞河南按察使彭維新爲浙江布政  
使司布政使內閣侍讀學士李秉忠爲河南  
按察使司按察使湖廣武昌道呂耀曾爲四  
川按察使司按察使○吏部議奏甘肅布政  
使護理巡撫印務鍾保因固原州偶遇驟雨  
城牆舊磚剝落田禾畧被冰雹尚未成災乃  
竝不確查冒昧具奏殊屬不合經提督路振  
揚目覩情形據實陳明鍾保應降三級調用  
得旨鍾保由司官之職朕加恩擢用至布政  
使伊到任以來專務虛名竝不實心辦事上  
年詳辦兵糧一案將國家錢糧市恩邀譽今  
年秋審又將因姦殺死親夫之重犯擬以緩  
決刑罰顛倒見者無不駭異至於摺奏錯誤  
乖張之處不可枚舉一味柔軟沽名鍾保著  
革職以爲人臣負恩溺職者之戒○丙寅諭  
王大臣等王公大臣官員等朝服頂帶俱有  
定制但平時所用服色竝無分別應如何辨  
別品級之處著議政王大臣九卿會議具奏

尋議諸王及大小臣子平時所戴暖帽涼帽俱照朝帽頂分別令其戴用凡親王世子郡王長子貝勒貝子八八分公俱用紅寶石頂未入八分公固倫額駙和碩額駙民公侯伯鎮國將軍及一品大臣俱用珊瑚頂輔國將軍奉國將軍多羅額駙二品三品大臣俱用起花珊瑚頂奉恩將軍固山額駙及四品官員俱用青金石頂五品六品官員俱用水晶石頂七品以下及進士舉人貢生俱用金頂生員監生俱用銀頂從之○命兵部尚書署大學士事孫柱爲文淵閣大學士兼兵部尚書實授查弼納爲兵部尚書○解廣西巡撫韓良輔任調署廣東巡撫阿克敦署理廣西巡撫○陞雲南騰越副將段宗岳爲廣西右江總兵官○丁卯陞大理寺少卿呂謙恒爲光祿寺卿○雲貴總督鄂爾泰疏奏雍正二年雲南提督郝玉麟帶兵由中甸前進入木多時各兵曾借餉銀五萬七千二百四十餘

兩雍正四年撤兵之時原議作三年扣還今已扣除本年夏秋二季銀七千一百一十兩其餘尚有四萬三千兩若三年扣還兵丁畧覺艱難請寬作六年扣還得旨當日兵丁前往入木多時未免起身匆忙馬駝之屬畧覺多費朕心軫念原欲將借支餉銀全行豁免以示恩恤因一時未暇降旨今覽鄂爾泰所奏著將應扣銀四萬三千兩悉行豁免其已扣之七千餘兩仍照數賞給兵丁以副朕愛養兵丁之至意○戊辰諭吏部聖人之道爲人臣者過闕必趨而於家庭父母之前亦有趨庭之禮蓋因敬謹之念素存於中故舉動威儀之間自無怠忽也前者大朝之時有漢司官二人於班聯之中大失禮節朕降嚴旨欲重治二人之罪嗣後衆人皆知儆惕因而寬釋至於引見之時往往漢官有在朕前高視濶步舉動不恭者又聞各部堂司官辦理公事滿司見滿堂則屈一膝應對而漢司之

對堂官。則或立或蹲。一任其意。同一堂司。何以滿漢之禮互異。即科道滿漢禮節亦不相同。況漢司官陞遷。方爲道府。道府之見督撫。卑躬屈節。竟有違例朝服跪道。以爲恭敬。惟恐以簡畧獲罪者。夫督撫品級。既不及部院堂官。而司官品級。則又卑於道府。何以爲京官。則傲慢不恭。而爲外吏。則謙抑過度。是伊等不知爵位之尊卑。而但論權勢之輕重也。司官不敬堂官。相沿日久。平日不知禮儀。是以至朕前。亦不能約束身心。每至草率不恭。如昨日御史韓瑛於朕御門時。捧持本章。竟不恭敬高舉。今已被叅。現在部議。又如原任侍郎陳守。創年羹堯曾奏其粗率無禮。一日在諸王大臣會議之處。曳衣露足。見者無不哂笑。從來滿洲風俗。尊君親上。出乎至誠。事不敢越禮。而漢人不知倣倣何也。朕以誨人不倦爲心。有一見聞。即明白指示。欲其醒悟。後改不忍聽其暗昧終身。大凡爲司官而

不敬堂官者。其人必無上進之志。滿漢司官之禮。自應畫一。如何酌定。著九卿會議具奏。尋議嗣後朝房辦事堂官席地而坐。漢司官應照滿司官俱屈一膝。應對於堂官前。往來俱行趨走。漢科道亦照滿科道禮節。畫一遵行。其有或蹲或立。怠慢不恭者。俱令該堂官指名叅處。該堂官瞻徇不行。叅出者一併交部議處。從之。○諭戶部。向來山西虧空甚多。國帑久虛。不能彌補。歷任撫臣。每請將虧空人員革職留任。彌補不但毫無益於國帑。此等劣員。轉將虧空爲護符。無所不爲。民生實受其害。諾岷蒞任後。將虧空人員盡行叅革。酌定以公完公之法。將州縣之火耗重者。嚴行裁汰。酌中量留。耗羨抵補。無著之虧空。不使累及民間。而官員亦免承追不力之叅罰。又恐官員無以養廉。復酌撥以爲日用之資。凡地方公務所需。亦皆取給於此。上不誤公下。不累民。此實通權達變之良策也。諾岷在



任二年將山西數十年未清之積案漸漸就緒伊都立接任柔懦無能且好務虛名因循瞻顧從前諾岷之未及清理者未能清理一事當諾岷在任之時高成齡不得已協力相助上緊辦理及伊都立接任高成齡苟且怠忽贊成伊都立之廢弛今見年歲已久舊案不能楚結又經朕數次嚴諭始請定承追之限獨不思數年以來藏匿花費弊端種種清理愈難高成齡何不陳奏於從前而乃遲至於今日乎應如何追完之處侯石麟到任後與高成齡悉心定議具奏伊都立曾奏稱地方虧空彌補全完之後應將耗羨解充公帑他省亦屢有如此陳奏之人朕皆嚴切訓飭之蓋耗羨者出產於地方即小民之膏脂也以地方之出產完本地之虧項所謂以公完公官民均有裨益若虧空既完則此項耗羨應仍歸於本地之官民豈有收入公帑之理他省亦有將州縣之耗羨提解十分中之二

三以備公用者該地方大吏應念此項雖充公用實民力之所輸將百凡撙節愛惜不使妄費遇有應用之事而後動用方為節用愛人之道乃近來督撫藩司等多以此項既已捐之於公取攜甚便任意支用如此非諾岷提解火耗之初心矣昨田文鏡奏稱河南固始縣東關官河一道地勢窪下七月間驟雨水漲東岸長興集西岸站馬集二處被水浸注民房倒塌漂沒人口幸而水退甚速禾稼無恙竝不成災無庸題請蠲免其被水人民已將司庫存貯耗羨之銀動撥令道員確查散賑加意撫恤等語如田文鏡之辦理此事乃以地方之耗羨為地方之公用百姓得沾恩惠而耗羨之留誠為有益大凡地方小有水旱之事勘不成災於例不應題本者該督撫當就近酌量料理竝具摺奏聞務令朕得知地方情形無絲毫隱匿方不負封疆大臣之任田文鏡所奏固始臨河鄉村被水之處

河道或有應修濬以除水患者著田文鏡商酌辦理○已已雲貴總督鄂爾泰疏奏臣前任江蘇藩司於所屬水利悉心咨訪畧知大要及奉命來滇心未暫忘前閱邸抄知

聖主發帑金十萬委大臣辦理更蒙

聖恩著臣胞弟鄂禮同往協辦謹據臣所見冒昧陳奏按劉河白茆二處奉旨開濬此誠湖海二區之脈絡江浙六郡之要津也至江寧之秦淮其源有二一出句容華山一出溧水

東廬山合流入方山埭自通濟水門入於郡城内外交資其利甚溥但久不疏濬河道雖存僅於夏秋暫通舟楫如不及今疏濬勢必日就湮廢若揚州之五塘久屬豪強侵佔而故址尚存由揚州至邵伯高郵寶應直達淮安稍遇水大一望汪洋若開濬五塘亦足分其下流但河隄綿亘三百餘里設閘雖多而淮黃及湖一時匯聚橫行泛溢須別分支河出水迅駛則淮揚二郡永遠奠定庶江北之

水患息矣江南自劉河白茆之外其南北要津莫如鎮江之漕河在丹徒界者四十五里在丹陽界者九十里地勢如建瓴雖有京口呂城奔牛諸閘可以蓄水而河身淺狹每年隨濬隨淤皆由挑濬時淤泥堆積兩岸大雨淋漓仍復衝卸入河一至冬月水涸難行漕船輓運艱難民船起旱盤壩公私交困臣查此地係杭嘉湖蘇松常鎮七府行漕之河而向來每歲挑濬獨責之丹陽是丹陽之民獨受其累臣於雍正二年間料估工費公中疏濬然猶未能如式且附近各境有可比丹陽之練湖者皆應開通以助運河使流注無窮不須復浚庶爲一勞永逸之計至各郡州縣之内外城河并各鎮市支河港瀆塘浦之類一切疏通之法總須倡率有方調度得宜又非臣言之所能盡也臣曾任江南故不揣愚昧越職陳奏得旨覽鄂爾泰所奏江南水道事宜甚屬周詳但摺内有越職陳奏字樣凡

內外大臣越職辦事。固爲不可。至非己身職任之事。有關國計民生者。既有見聞。據實入告。方合公忠體國之義。乃盡職。非越職也。鄂爾泰所奏發與范時繹。陳時夏。齊蘇勒。陳世倌。鄂禮。就近詳加相度。悉心妥議具奏。○雲貴總督鄂爾泰摺奏。花苗一種。介在楚黔兼連西粵。犷悍難馴。謬冲尤甚。今黎平知府張廣泗率領弁員。攻破其地。陸續擒獲賊苗共二百三十餘名。所有渠魁姚相明等。現在定擬會題。自此各寨畏威懷德。有歸歐鬼壘。九厥。交椅。几馬等寨。俱花苗種類。其頭目率領羣苗。冊開戶口。花名。同詣行營。願求內附。查歸歐鬼壘等寨。係黎平府所屬洪州土司界外。應歸洪州管轄。交椅。几馬。二寨。係廣西懷遠縣所屬幹冲地方界內。應歸懷遠縣管轄。從之。○安慶巡撫魏廷珍疏報宿州潛山等九州縣開墾雍正四年分田地六十頃有奇。下部知之。○庚午。雲貴總督鄂爾泰摺奏。雲

南永北府浪蕩地方。與四川之腊汝窩邊界相接。今四川建昌總兵官趙儒。征勦腊汝窩。臣以川省用兵事同一體。隨委永北遊擊徐成貞等率領健兵五百名前往浪蕩駐劄。分路堵禦。協同川兵進勦。擒殺多人。餘皆降服。兩省各皆撤兵回營奉

上諭。封疆大臣不分彼此。毫不推諉。瞻顧何事。不能辦理也。嘉悅覽之。○旌表河南確山縣烈婦林泰妻李氏。守正拒姦。含羞自縊。給銀建坊入祠致祭如例。○辛未。雲貴總督鄂爾泰摺奏。雲南臨元鎮屬威遠新平一帶地方。裸賊猖獗。潛匿魯魁哀牢。出沒江內江外。爲害已久。前以鎮沅逞逆。因而威遠裸賊扎鐵匠等乘機劫寨。新平野賊李百疊等亦肆行搶殺。臣嚴檄臨元總兵官孫宏本等帶領弁兵協力擒勦。深入搜箐。斬殺過半。威遠裸衆擒獻賊首扎鐵匠等。新平兇賊李百疊聞風畏懼。亦率衆投訴。願爲良民。從此威遠新平

地方安堵得旨嘉獎○山東巡撫塞楞額疏奏東平州安山湖清出官地請給無地之民蓋屋居住裁柳捕魚爲業得旨塞楞額奏稱無地之民准其在堤旁蓋屋居住捕魚爲業並未計及窮民蓋屋製船之費應作何酌量賞助地方現有耗羨備用銀兩不於此等愛養百姓之處支給更於何事動用塞楞額所奏甚屬疎漏著另議具奏○添設四川驛鹽道一員從四川巡撫憲德請也○免江南吳

江安東二縣雍正四年分水災額賦有差○壬申以廣東廣州將軍石禮哈署理廣東巡撫○山西太原總兵官袁立相疏言澤州一城偏處西南逼近太行山民情强悍難治向設把總一員兵十名不足以資彈壓請添設守備一員千總一員并添馬步守兵五十名及撥潞澤營之兵四十名東西塢嶺二營之兵二十名連原設之兵十名共兵一百二十名令守備千總帶兵一百名駐劄澤州仍歸

潞澤營叅將管轄其原設之把總帶兵二十名移駐太行山頂之攔車鎮地方分防晉廟草底二舖從之○癸酉以禮部左侍郎兼內閣學士三泰充經筵講官○甲戌添設湖北糧道庫大使一員裁蒲圻縣羊樓司巡檢一員從署湖廣總督福敏請也○兵部議覆廣東總督孔毓珣疏言崖州儋州萬州逼近黎岐煙瘴未消三營遊擊守備官員請照邊俸五年俸滿之例陞轉又三江口一協內扼八排外連湖廣廣西深山嵐瘴約束徭民實爲險要請與理徭同知一體照邊俸三年即陞之例均應如所請從之○乙亥諭內閣滿洲居首之大學士在前行走外其餘大學士行走班次應按其補授之日前後行走不必分別滿漢張廷玉著在孫柱前嗣後補授大學士時著將班次前後請旨具奏○以翰林院編修崔紀馬金門俱署日講起居注官○陞湖廣衡州副將周一德爲湖廣鎮總兵官

○丙子諭各省督撫藩臬等朕宵旰勤勞時以教養萬民爲念所頒諭旨皆正德厚生之要務實切於民生日用者乃聞向來諭旨頒至各省不過省會之地一出告示州縣並未遍傳至於鄉村莊堡偏僻之區則更無從知之矣如禁止黃銅賭博宰牛等事朕爲百姓籌畫者委曲周詳而地方官員有司不行禁約上司置若罔聞無怪乎百姓之迷而不悟也京師乃五方雜處之地凡禁約之事較他省爲難今京城內外市賣銅器及羣聚賭博者俱已禁止豈外省轉不能行乎他如清查保甲積貯社倉之類行之必以其漸地方始無紛擾若驟然舉行而迫之以官法姦胥猾吏將借端爲非轉爲小民之累今觀地方大吏於應當從容辦理之事則急切爲之而於一時可以禁止之事實有益而無害者則漫不經心豈非緩急失宜先後不得其序耶至於邪教妖言大有關於人心風俗該地方官

一有所聞即當留心根究庶可以消姦宄而安良善所謂防微杜漸也若下司隱匿不報或上司知之又欲化有事爲無事勢必致姦宄漏網匪黨無所忌憚附和者愈衆則將來株連者愈多是本欲息事而轉致多事故不如懲治之於早也各省督撫藩臬皆地方大吏勉之毋忽○丁丑

上詣

恩佑寺行禮○諭刑部刑名關係民命死者不可復生斷者不可復續故禮記王制曰刑者例也例者成也一成而不可變故君子盡心焉朕於刑名更加慎重書曰天討有罪五刑五用哉五刑有輕重之等無一非天理之當然故當輕當重必須至公至平乃爲欽承天道若應嚴而寬便是逆天稍寬且不可而況於嚴乎朕爲人君尚不可寬嚴稍失其平況人臣居法司之任者乎凡有案件始之以聽斷繼之以研訊定之以律例若稍有不公不

平之處則情罪之輕重不得其宜而用法之寬嚴皆失其當矣。蓋鴟鶚不除無以致鸞鳳。稂莠不剪無以植嘉禾。司刑名者姑息養姦則小人無所懲戒必不能改惡以從善。此所謂婦人之仁其害豈淺小哉。故刑法者使人遷善遠罪所以輔教化者也。舜之勉臯陶曰汝作士明于五刑以弼五教期于予治刑期于無刑民協于中夫持法之平可以成協中之化故居法司之任者不但重罪不可疎忽即輕罪亦當詳慎務操其至公至平之心而時凜天監在茲之懼使用法之寬嚴悉當情罪之輕重允孚則不愧明允之司而成無刑之治矣。○戊寅吏部等衙門議覆河南總督田文鏡疏稱豫省紳衿苛虐佃戶請定例嚴行禁止嗣後不法紳衿如有苛虐佃戶者地方官詳報題叅鄉紳照違制例議處衿監吏員革去職銜得旨凡立法務得其平本內但議田主苛虐佃戶之非僅有姦頑佃戶拖欠

租課欺慢田主者何以並不議及著再議具奏尋議嗣後姦頑佃戶拖欠租課欺慢田主者請照不應重律論杖所欠之租勒追給主直省一體遵行從之。○刑部疏叅蔡珽從前四川巡撫任內屢蹈重罪部議革職及威逼屬員蔣興仁自盡部議斬罪悉蒙聖慈寬宥擢授左都御史洊至兩部尚書兼漢軍都統署理直隸總督仍敢肆行無忌種種不法復蒙矜宥調授奉天府尹乃尚不知改悔挾詐懷私罪案山積今將蔡珽所犯諸罪謹列陳之如怡親王等查勘水利撥兵引導訛傳七省騷擾營兵其罪一伊子蔭生欺公請復其罪二本章錯誤並不認罪狡飾狂悖其罪三寧遠州知州孫大桐將徵收米豆私自借出蔡珽徇隱不叅其罪四屬員刑名案件故違部限蔡珽袒庇不提其罪五錦縣知縣呂曰宮虧空米豆蔡珽代為欺隱其罪六奉天府屬徵收銀米擅令停解任意藐法其

罪七。奉屬各府州縣支給俸工銀兩竟不飭查日期疎忽政務其罪八。寧遠等州縣所收莊頭餘地租糧草束改折銀穀並不詳查玩忽國計其罪九。舖司被人奪去公文並不批查懈弛公務其罪十。良民控告訛詐案件竟不准理縱暴殃民其罪十一。盛京侍郎武格所叅孫大桐疎縱一案竝無冤抑蔡珽懷私妄奏其罪十二。私受夔州府知府喬鐸夔關稅銀一千八百八十兩富順縣知縣劉上駟鹽規銀五千兩婪贓入己其罪十三。捏造公用名色冒銷藩庫銀三萬兩其罪十四。收受貪殘不法之程如絲銀六萬六千兩金九百兩貪賄庇姦懷欺保舉其罪十五。交結大逆不道之查嗣庭其罪十六。黨庇行止妄亂之戴鐸其罪十七。讒譖岳鍾琪稱為不可深信。後岳鍾琪經過保定時又恐姦迹敗露轉以無稽荒謬之語巧為播弄。讒忌姦險其罪十八。按之律例蔡珽所犯諸罪均干大辟。蔡珽

應斬立決。伊妻子入辛者庫財產入官。今伊現在四川質審。應行文四川巡撫將伊作速鎖解來京正法。得旨。蔡珽從寬改為應斬。著監候秋後處決。餘依議。○己卯。以翰林院編修顧仔提督廣東學政。○川陝總督岳鍾琪疏奏湖廣江西廣東廣西等省之民逃荒入川不下數萬戶。請開招民事例給窮民牛具籽種。令其開墾荒地方為有益。得旨。覽岳鍾琪奏朕心深為憫惻。各省大小官員於地方歉收即當題請設法撫恤。況各省皆有耗羨備用銀兩。即當以此為賑恤貧民之用。何得坐視百姓之窘迫不加賑恤。而令其逃往他省乎。今據岳鍾琪奏請設法安插。令其開墾以為生計。此實安輯貧民之急務。其牛具籽種口糧等項之費不必另開事例。現今有營田水利捐納銀兩數餘之項存貯在京。著於此內撥發十萬兩解川應用。僅有不敷。該督撫再為奏請。但此等遠來多人良姦莫辨。不



行稽查。必轉爲良民之擾。且恐既開招墾之端。愚民無知。但圖目前之利。必至輕去其鄉。亦非所以愛之也。且地方官吏坐視百姓之遠徙異鄉。而不知軫念。斷不可不加懲戒。著岳鍾琪會同巡撫憲德。行令四川州縣將雍正四年秋冬以後各省入川人戶。逐一稽查。姓名籍貫。果係窮民。酌量安插。再備造細冊。咨查原籍。將所用牛種口糧銀兩著落原籍之州縣官照數補還。如此則游惰之民不致混冒。而地方官亦知所儆戒。共以愛養百姓爲務。可杜流移之患於將來矣。○授鎮國公弘春妹爲郡主。壻色卜騰旺布爲和碩額駙。○湖廣總督福敏題。永順宣慰司彭肇槐患病休致。請以其子彭景燧襲替。下部知之。○

庚辰

孝慈高皇后忌辰。遣官祭

福陵。○

上回宮。○吏部議覆雲貴總督鄂爾泰疏。奏雲

南文職員缺。有調補三年。即陞者。有調補五年。即陞者。今准部咨。令臣確查定議。臣查雲南省之元江。普洱。廣南。師宗。威遠等缺。及新改流之鎮沅府。恩樂縣。俱極邊瘴癘。宣威州。係初闢之地。俱照舊例。揀選調補三年。俸滿陞用。東川府。夷多。漢少。所轄之巧家營。今新改會澤縣。及者海。歹補。則補等處地方。俱去府寫遠。遇有知府。知縣。雜職等缺。請於本省揀選調補。五年。俸滿陞用。其開化。廣西二府。正雜等官。及廣西府分防五槽等處。通判。新平縣。知縣。祿勸州。知州。麗江府。知府。經歷。鶴慶府。分駐維西。通判。劍川州。分駐中甸。州判。黑白二井。提舉。彌沙。阿陋二井。大使。各缺。或鄰逼番夷。或地方緊要。俱請照例。仍於本省揀選調補。以邊俸陞轉。至鶴慶。順寧。永昌。永北。四知府。劍川。騰越。雲州。三知州。雖非調補之缺。但遠在極邊。接壤外域。亦應照邊俸聽部陞轉。其雲南元江。協。廣南。普威二營。駐劄



處所煙瘴未消夷性兇悍副叅守備等官請照文職之例揀選調補三年俸滿陞用東川一營遊守員缺亦揀選調補五年俸滿陞用至黔省黎平定廣二協都勻一營雖非煙瘴之區但接壤生苗甚屬緊要副叅守備員缺并請揀選題補均應如所請從之○戶部等衙門議覆福建總督高其倬疏奏臺灣府所屬四縣查得臺灣一縣之人原有家眷其鳳山諸羅彰化三縣之人係新經遷處全無妻室是以戶口不滋地多曠土就臣淺昧之見若令全不搬眷固非民願若一槩搬眷歲增日益又將有人滿之患均非長策請嗣後住臺人民其貿易僱工及無業之人全無田地一槩不准搬眷往臺若實在耕食之人令呈明地方官查有墾種之田并有房廬者即行給照令其搬往安插至佃戶之中有住臺經五年而業主又肯具結保留者准其給照搬眷其餘一槩不准等語查臺灣遠隔重洋實

稱要地舊例閩粵人民往臺墾種者所有妻眷一槩不許攜帶止許隻身在臺而全家仍住本籍蓋在臺雖為游民而在本籍則皆土著今若令其搬眷成家是使伊等棄內地現在之田廬營臺地新遷之產業在民間徒滋煩擾非國家向來立法之初意應將高其倬所請毋庸議得旨九卿所議是臺灣人民攜帶家口應行與否歷來衆論不一朕令高其倬到閩後詳慎酌量定議具奏今高其倬所奏亦胸無定見而為此游移遷就之詞古人云利不什不變法害不什不變制著仍照舊例行待朕再加酌量○辛巳吏部疏奏廣東肇高道王士俊揭報廣東布政使官達受賄婪贓令重役李長茂委管黃江廠稅王士俊詳請署撫阿克敦嚴訊署撫令按察使方瑛力勸士俊從寬銷釋等情得旨官達方瑛俱著解任質審廣東布政司印務著少詹事王蔭署理按察司印務著翰林院侍講尹

繼善署理○兵部議覆署直隸總督宜兆熊等疏言磁州駐防千總一員兵一百十三名實屬官微兵寡應令大名協右營守備帶兵一百九名移駐磁州至元城縣應令大名協右營千總帶兵一百二十五名專汛小灘鎮應令右營把總帶兵六十一名防守均應如所請從之○壬午戶部疏奏請將各省運到霉溼漕米發還旗丁另行買補得旨今年雨水畧多運送米石不無霉溼若令旗丁盡行賠補未免苦累窮丁但將成塊不可食之米揀出發回○移河南上北河同知改駐陽武縣太平鎮地方其新設之上南河同知駐中牟縣楊橋下北河同知駐祥符縣陳橋懷慶府黃河同知駐武陟縣二舖營武陟縣主簿駐木樂店從河南總督田文鏡請也

大清世宗敬天昌運建中表正文武英明寬仁信毅大孝至誠憲皇帝實錄卷之六十一

景陵○頒雍正六年時憲曆○甲申命署江南

應支何營兵丁多寡遠近之間總無一定皆

聽每年酌估以致胥吏作姦上下其手近聞該督撫等將放糧之州縣與領糧之營汛酌量派定以除積弊但平居無事之時支放皆有定額僅遇用兵籌餉之際需用糧石不在定額之數若不預定章程恐不肖官吏臨時又開納賄營私之路著該督將甘肅所屬州縣額徵糧石之多寡與營汛之遠近逐一計算應如何估撥悉心酌定使支放皆奉成規不萌鑽營規避之念則於官弁兵民均有裨益○諭大學士九卿等科道職司言路乃朝廷政務所關當矢竭公忠無欺無隱方為稱職朕觀數年以來科道陳奏者竝無忠謹可信之詞又有庸陋之科道既不敢直陳政務之大端又恐蹈緘默之愆往往撝拾瑣細迂謬毫無關係之事濫行條奏甚至顛倒是非紊亂黑白或借以行私植黨者有之從來人君聽言納諫原為美德但言之公者自應嘉納而言之私者豈可漫為聽從今科道所奏

朕若不加採納則以朕為不能受諫若所言謬妄而稍為懲戒則謂刻待言官以杜忠諫之路此為君之所以難也舊例科道吏部等官專用科目出身之人科道職司糾叅吏部管理考察相為表裏凡外任科目出身之州縣官一經行取內陞即可補授吏部科道由是操督撫之短長敢於上司前傲慢無禮為督撫者亦恐結怨報復不加約束頗為吏治人心之害是以數年以來行取之典未曾舉行朕思禮部管理科場翰詹職司文翰國學官員有課士之責自宜專用科目之人若科道吏部皆係辦事衙門竝非用其文墨也何必拘定科目乎朕意欲將舊例變通以杜黨援之弊而收用人之效嗣後銓補科道吏部及州縣行取之例著大學士九卿等詳議具奏但此例相沿已久今欲變通若稍有未協恐生疑議如或不應更易即各陳所見毋面從背非以蹈欺罔尋議嗣後科道缺出在京

則令翰林院掌院於編修檢討內保送各部院堂官於各屬司官內不論科甲貢監擇其勤敏練達立心正直者保送引見補用在外則各省督撫將州縣官保送引見恭候選定其留京者以科道補用至吏部四司郎中等員缺與戶兵工刑四部司員不論科甲貢監俱歸月選從之戶部議覆川陝總督岳鍾琪疏言川省運販米船向無船料客商或夾帶私鹽違禁之物無可稽查而沿途地方官往往借端需索請照淮關船料尺寸則例抽報料稅所輸無幾稽查甚便至米船出川地方官如有勒索稽留者該督撫指名題參應如所請從之喀爾喀車臣汗滾臣遣使進九白年貢宴賚如例丙戌諭內閣八旗滿洲火器營護軍校及兵丁等往蘆溝橋操演鎗礮起身甚速天氣寒冷著每人賞給銀五兩製備禦寒衣服不得妄費以禮部左侍郎唐執玉爲武會試正考官都察院左副都

御史錢以墀爲副考官（丁亥正紅旗漢軍副都統李楠緣事革職陞正黃旗護軍參領舒楞額爲正紅旗漢軍副都統順承郡王錫保等遵旨審奏隆科多罪案大不敬之罪五欺罔之罪四紊亂朝政之罪三姦黨之罪六不法之罪七貪婪之罪十六查隆科多私抄

王牒收藏在家大不敬之罪一將

聖祖仁皇帝欽賜御書貼在廂房視爲玩具大不敬之罪二妄擬諸葛亮奏稱白帝城受命之日即是死期已至之時大不敬之罪三盛京兵部主事馬岱之事屢奉

聖諭隆科多明知干犯復行妄奏大不敬之罪四

皇上賞銀三千兩著令修理公主墳墓隆科多遲至三年竟不修理大不敬之罪五聖祖仁皇帝升遐之日隆科多並未在御前亦未派出近御之人乃詭稱伊身曾帶乚

首以防不測欺罔之罪一狂言妄奏提督之權甚大一呼可聚二萬兵欺罔之罪二時當太平盛世臣民戴德守分安居而隆科多作有刺客之狀故將

壇廟桌下搜查欺罔之罪三妄奏被叅知縣關隙原係好官欺罔之罪四

皇上謁

陵之日妄奏諸王心變紊亂朝政之罪一妄奏調取年羹堯來京必生事端紊亂朝政之罪

二妄奏舉國之人俱不可信紊亂朝政之罪

三交結阿靈阿揆敘邀結人心姦黨之罪一

保奏大逆之查嗣庭姦黨之罪二徇庇傳臬

沈竹戴鐸已海不行查叅姦黨之罪三比暱

伊門下行走之蔡起俊姦黨之罪四徇庇阿

錫禹法敏將倉場所奏浥爛倉米著落歷年

監督分賠之案巧爲袒護具奏姦黨之罪五

曲庇菩薩保囑託佛格免叅姦黨之罪六任

吏部尚書時所辦銓選官員皆自稱爲佟選

不法之罪一縱容家人勒索財物包攬招搖

肆行無忌不法之罪二徇庇提督衙門筆帖

式詹泰囑託原任吏部侍郎勒什布改換成

例不法之罪三發遣安西人犯應給口糧并

赤金等處應裁應補兵丁之處故行推諉欲

以貽誤公事不法之罪四因係佟姓捏造惟

有人冬耐歲寒之語向人誇示以爲姓應圖

讖不法之罪五自知身犯重罪將私取金銀

預行寄藏菩薩保家不法之罪六挾勢用強

恐嚇内外人等不法之罪七索詐安圖銀三

十八萬兩貪婪之罪一收受趙世顯銀一萬

二千兩貪婪之罪二收受滿保金三百兩貪

婪之罪三收受蘇克濟銀三萬六千餘兩貪

婪之罪四收受甘國璧金五百兩銀一千兩

貪婪之罪五收受程光珠銀五千兩貪婪之

罪六收受六格猫睛映紅寶石貪婪之罪七

收受姚讓銀五百兩貪婪之罪八收受張其

仁銀一千兩貪婪之罪九收受王廷揚銀二

萬兩。貪婪之罪十收受吳存禮銀一萬二千兩。貪婪之罪十一收受鄂海銀一千五百兩。貪婪之罪十二收受佟國勳銀二千四百兩。貪婪之罪十三收受佟世祿銀二千兩。貪婪之罪十四收受李樹德銀二萬一千四百餘兩。貪婪之罪十五收受菩薩保銀五千兩。貪婪之罪十六以上罪狀昭著。隆科多應擬斬立決。妻子入辛者庫財產入官。疏入。

上召議政王大臣內閣九卿等。諭曰。隆科多所

犯四十一款重罪。實不容誅。但

皇考升遐之日。召朕之諸兄弟及隆科多入見。面降諭旨。以大統付朕。是大臣之內承

旨者。惟隆科多一人。今因罪誅戮。雖於國法允

當。而朕心則有所不忍。隆科多忍負

皇考及朕高厚之恩。肆行不法。朕既誤加信任。於初又不曾嚴行禁約。於繼今惟有朕身引過而已。在隆科多負恩狂悖。以致臣民共憤。此伊自作之孽。

皇考在

天之靈。必昭鑒而默誅之。隆科多免其正法。於暢春園外附近空地造屋三間。永遠禁錮。伊之家產何必入官。其應追贓銀數十萬。尚且不足抵賠。著交該旗照數追完。其妻子亦免入辛者庫。伊子岳興阿著革職。玉柱著發往黑龍江當差。理藩院奏。鄂羅斯頭目郎喀呈請將商人之馬匹牛羊留在張家口外牧放。應如所請。令張家口察哈爾總管嚴行稽查盜賊。禁止鬪毆。得旨。鄂羅斯既欲將伊等馬匹牲畜放牧邊外。著照所請行。即派司官一員前去稽查盜賊。禁止鬪毆。并曉諭鄂羅斯郎喀爾等留住之人。必須揀選善能管轄者為首。使約束爾等之人。毋令生事。再行文與就近居住之總管等。著各屬下人加意約束。防禁盜賊。鄂羅斯係外藩小國。如伊等馬匹牲畜被人偷竊遺失。查係何處地方。即著該地方總管等查緝交付。若不能查獲。著該

地方總管等照數賠償。戊子。諭吏部。臺灣遠隔海洋。向來學政交與臺灣道兼管。朕思道員管理地方之事。又兼學政。未免稍繁。應將學政交與派往巡察之漢御史管理。永著爲例。戶部遵旨議覆。西安八旗出征官員所借銀兩。請於各人所得俸銀內坐扣。其休致病故者。俱於伊等子弟所得俸銀錢糧扣完得旨。凡出征兵丁所借銀兩。朕已加恩。盡行豁免。其官員等所借俸銀。未曾豁免者。原有深意。蓋官員與兵丁不同。若與兵丁一體豁免。則將來遇有差遣之時。本人不便借支。該管官不便借給。緩急之際。轉覺無所資藉。朕所以未曾降旨豁免者。正加恩於出征之官員也。但已經休致及亡故之人。本身既無俸可扣。於其子孫俸餉內扣還。朕心不忍。除有罪革職人員外。著加恩全行豁免。至外委之員。本無俸祿。可以指借。當時何得借與。以市私恩。著查明於原借給之將軍大臣名下。

追補。凡滿洲蒙古漢軍綠旗各處出征之官員。俱照此旨行。福建總督高其倬疏言。各處彈兌錢糧。一以部頒法馬爲準。福建各屬收解錢糧。輕重不等。司庫部頒法馬止有一副。彈兌紛繁。將銅質磨擦。分數漸輕。請頒部法二副。應用循環繳換。得旨。部頒法馬。乃輕重合宜之式樣。各省布政司自應照式較準。製成法馬。並令闔屬畫一遵奉。其或有出納之際。加重減輕者。即當嚴查叅處。此乃經常之道。豈有錢糧總匯之布政司。出納繁多。專以法馬一副。日日彈用。以致銅質銷磨。輕重失實之理。且部中循環更換。亦不勝其繁。高其倬所奏迂濶。若此。宜乎福建各屬收解錢糧。輕重不等也。著該部將朕諭旨通行各省。僅有如閩省因一副常用。將銅磨輕。與原頒分兩不符者。咨部另請頒給。○己丑。諭內閣。外省鄉試房考。舊例皆用現任知縣入闈。朕思知縣身爲民牧。地方政務甚繁。入闈動經



數月諸事或至遲悞朕意欲將外省房考之例斟酌更定或於鄰省中舉人進士之在家候選者臨期調取數十人交與監臨之督撫秉公掣籤令其入闈分校著九卿悉心詳議具奏○以鑲白旗護軍統領公博爾屯署鑲黃旗蒙古都統○命貴州巡撫何世璽來京陛見以貴州布政使祖秉圭署理貴州巡撫貴州按察使赫勝額署理貴州布政使司布政使貴州黎平府知府張廣泗署理貴州按察使司按察使○命大學士九卿等觀浙江巡撫李衛所進瑞穀大學士等奏言

皇上至德光昭太和翔洽是以宇內徧產嘉禾浙江又呈瑞穀臣等不勝懼忭得旨覽卿等所奏此非朕涼德所能致想浙省澆漓之習必然丕變是以感召

上蒼如此之瑞應朕深爲浙省臣民慶幸著將此曉諭浙江通省○刑部等衙門奏宛平縣民重陽因伊妻龔氏與張起鳳通姦將龔氏

打死張起鳳被打走脫重陽應擬絞監候得旨律載止殺姦婦者照毆妻至死律擬絞蓋恐姦情不實將此杜借名殺妻之弊若姦情是實而姦夫被毆走脫及拏獲到官承認者亦照此擬罪殊未允協著九卿會議具奏尋議本夫於姦所獲姦將妻毆死姦夫走脫後被拏獲到官審明姦情是實姦夫供認不諱者將姦夫擬絞監候本夫照不應重律杖八十永爲定例從之○庚寅諭吏部朕因盛京

各官習氣不好是以揀選京員調補原欲其悉心辦理事務若到任未久即以京城員缺陞用於盛京部務無益嗣後由京補授盛京滿漢司官歷俸三年方行陞轉如三年內遇伊應陞之時爾部奏聞以陞銜留任仍以陞銜較俸○命理藩院右侍郎班第回內閣學士任陞內閣學士顧魯爲理藩院左侍郎調理藩院左侍郎衆佛保爲右侍郎○辛卯刑部議奏四川成都府拏獲捏稱岳鍾琪造反

之人據侍郎黃炳等。雷係湖廣黃州府麻陽縣民。盧宗漢寄居川省長壽縣。因贖田私事。希圖准狀。播造浮言。沿街叫喊。並無主使之。應將盧宗漢。照妖言惑眾律。擬斬監候。從之。○壬辰諭內閣。朕覽文武官員履歷。開載年歲。任意增減。多有不實。外省文武年歲不實者尤多。夫國家用人。惟論其才力之可以辦事。任職與否。原不以年歲之老少為重輕。如老成望重之人。宜於居官服政。年齒雖多。而精神尚健。即屬可用之員。若年雖未老。而志氣萎靡。則不可用。是多者不必減之為少也。少年精壯之人。宜於効力宣勞。年雖輕。而辦事勤敏。亦屬可用之員。若年齒雖大。而才具庸劣。則不可用。是少者不必增之為多也。人之立身。事事皆當誠實。不可涉於欺詐。彼增減年歲者。無益於功名。而有關於品行。豈得習為固然。今朕特為訓諭。凡各官從前之年歲不實者。著即行改正。令以實在年歲開

明註冊。○癸巳諭兵部。明年更換阿爾泰駐防兵丁時。將軍巴賽員缺。著派護軍統領公博爾屯前往。叅贊大臣常色禮員缺。著派都統查克旦前往。其駐防兵丁。即令博爾屯查克旦會同該旗大人。預將年力精壯漢仗。好可以學習成材者。揀選派出。令其前往。○陞索倫總管塔爾岱為白都納副都統。仍兼理總管事務。并發帑五千兩。交塔爾岱帶往酌量養育索倫窮苦之人。及賞給効力兵丁。○調奉天錦州副都統圖爾賽為熊岳副都統。陞奉天總管多索禮為奉天錦州副都統。仍兼理總管事務。○甲午諭兵部。各省武職內俱有可用之人。因各省有題補不題補之分。是以各員陞轉。遂有遲速之異。其有題缺之省分。該督撫提鎮。得揀選保題。陞遷甚速。至本無題缺及題缺無多之省分。即有諳練賢員。亦必論俸陞遷。格於成例。每多遲滯。殊覺不均。嗣後本無題缺。并題缺無多之省分。著

該督撫提鎮兼公揀選將職名開列具本保題爾部註冊以備朕揀擇酌用戶部議覆河道總督齊蘇勒等疏報江南朱家口堵塞之後安河等淀以至木家墩一帶地方盡皆淤成膏腴美地分晰丈勘新淤地畝泗州虹縣桃源睢寧宿遷五州縣共丈出二萬二千六百二十二頃六十三畝零共應陞科銀四萬八千四百五十兩零此新淤之地俱係平行沃土非尋常湖灘可比應即於雍正六年陞課起租其木家墩一帶俟乾涸之日陸續清丈另行報陞併請於五州縣適中之地在宿遷縣白洋河鎮設立衛守備一員徵收錢糧新衛賜以嘉名伏候欽定應如所請從之尋定新設衛曰潼安乙未賞各省會試下第武舉銀各四兩康親王崇安等遵旨議覆順天學政孫嘉淦條奏請整飭八旗官學以育人材嗣後選官學生務擇聰明俊秀子弟考課分習清漢書每旗給官房一所為學

舍以貢生五人為教習派定所教人數優其廩給專其訓導又不時稽查勤惰期滿分別議敘應如所請從之丙申諭大學士九卿等天地生財原以濟生民之用貴乎流通於宇宙之間故出之於此得之於彼流通轉移各受其益此即裒多益寡酌盈劑虛之道也乃愚昧無知之人不明此義惟恐積之不固秘之不深或以萬計或以數十萬計埋藏地中多方掩蓋不令人知迨歲月久遠子孫亦無從踪跡遂至迷失是錙銖而積之什襲而藏之者竟歸於烏有亦惑之甚者矣或有時被他人剽取旁觀忤妬每致紛爭角訟因而受累招尤豈非埋藏者實貽之害乎似此愚昧無知之見若不明白開導終至迷而不悟朕為愛養生民計欲使財寶流通彼此得其利濟其作何曉諭勸戒禁止之處著九卿會議具奏再富家巨室每以金銀殉葬毫無益於死者而徒起小人覬覦之心厥後往往不

免偷掘之事。此其於理不順於事非宜更不待智者而後知也。竝將此通行曉諭勸導之。尋議通行八旗及各直省督撫轉飭地方官遍張告示宣揚。

聖訓明白曉諭禁止嗣後有將金銀埋藏地中及被他人偷掘者事發將所藏金銀充地方賑恤窮民之用。至以金銀殉葬尤非禮制應一併曉諭禁止。從之。諭兵部滿洲兵丁弓馬技勇均屬優長。惟於水師向未練習。是以朕令天津地方設立水師營。今杭州駐防兵丁既在濱江沿海之地亦當挑選壯丁學習水師。著鄂彌達李衛悉心商酌具奏。諭八旗都統等獲罪人犯俱送刑部監禁。監內人多或致感觸時氣。旗人與民人不同。民人犯法完結之日即回原籍。若旗人罪案完結仍供各項差役。竝非棄置不用之人也。所以治其罪者特欲其知所懲戒改悔耳。乃旗人一罹罪戾即成廢人。殊覺可惜。況監內拘禁者

又皆惡亂姦險之重罪人犯一處拘禁。豈有善言相告。不但不能悔改。徒習於爲惡而已。除八旗現審之罪人及審實之死罪。照常存刑部監禁外。其審結定罪緩決候審及虧空官銀監追人等著八旗各將入官房屋修築高牆分爲三所。重犯一處。輕犯一處。犯婦一處。如此分別監禁。既可減災病亦無擾亂等事。包衣佐領下人等亦照此行。宗室覺羅等於宗人府拘禁。似爲允當。著管理旗務王大臣會同內務府總管詳議具奏。尋議八旗各將入官房屋修築高牆分爲三所。重犯輕犯以及犯婦分別看守。所需米糧柴炭等項照例支取。看視醫生請旨派委衆犯家屬。准於初二十六入看。并嚴禁看守人等徇情需索。從之。飭各省總兵官毋得進獻方物。丁酉。

上御太和殿視朝。諸王及文武陞轉各官謝恩。戊戌。命文淵閣大學士張廷玉爲文華殿

大學士仍兼管戶部尚書翰林院掌院學士事。禮部等衙門遵旨議覆各部院堂司官相見儀注并請滿漢畫一遵行。不得互異得旨。堂司相見體統雖經大臣等議定。而科道與各部司官皆不曾與議。恐狂妄無知之小人將來別有議論。亦未可知。此所定儀注著科道與部院司官公同詳議具奏。尋議朝廷名分自有尊卑。滿漢禮儀尤當畫一。所議堂司相見儀注及滿漢科道體統相同之處。至爲允當。應請著爲定例。永遠遵行。從之。署直隸總督宜兆熊疏言。霸州雄縣等二十四州縣被水窮民已蒙恩散賑。其各屬被水地畝錢糧暫請緩征。得旨。朕念直隸濱河之地易於被水。用沛特恩。遣官發帑加意賑恤。此乃格外惠及窮民之意。至於被水之處仍應勘明分數題請。照例蠲恤。不得因已經遣官發帑遂不照定例遵行。並諭各省知之。○己亥諭議政王大臣等。阿爾布巴差兵至阿里。

欲害頗羅鼐。被頗羅鼐將伊所發之兵盡行截殺。已領兵往招征。勦阿爾布巴。此舉若能事成。於西藏有益。但今現有欽差馬喇僧格在藏。恐伊等或爲阿爾布巴所惑。從中講和。或被阿爾布巴等誑誘。以至頗羅鼐受害。則大有關係。著岳鍾琪於川陝標下官員內選擇熟習番情通曉番語。可以差遣往藏者。速令其前往。將一應情節密述與馬喇僧格俾伊等心中明白。則諸事無阻。此諭著學士班第送去。其詳悉之處。班第口傳。軍營効力行走。原任大同總兵官馬觀伯奏言。鄂爾昆圖拉地方爲極邊初墾之地。近產瑞麥。有一莖至十五穗之多。實屬希逢之上瑞罕觀之嘉祥。得旨。今歲各省俱產嘉禾。項馬觀伯復進瑞麥。朕觀自古聖帝賢王。皆務實心實政。不以祥瑞爲尚。朕深明此理。擯斥虛文。因今歲爲通行耜田典禮之初。即獲感召天和。是以特爲表著。以明天人感應之理。捷於影響。

期中外諸臣益加誠敬共相儆勉於將來也但恐地方有司未必深悉朕心或競尚嘉禾之美名借端粉飾致有隱匿早潦而不以上聞者亦未可定著將雍正五年以後各省田畝所產嘉禾俱停其進獻奏聞○庚子諭內閣鳳凰城中江稅務向來俱係城守尉等員管理但此處係外國交易之地關係緊要嗣後著盛京五部堂官於司官內揀選奏聞派出管理一年更換刑部議覆山西太原府理事通判常安條奏驛站馬夫驛夫外又有館夫一項併各衙門額設燈夫請盡行裁革以免科派應如所請從之辛丑諭刑部向來另戶之人犯罪發遣俱不爲奴但另戶亦有不同其中有卑污下賤同於奴僕者亦有原係家下奴僕開戶而爲另戶者若發遣遠方不令人管束又致生事嗣後除滿洲正身之另戶外如有此等犯罪發遣者著該部酌量給與披甲之人爲奴當差○加湖廣總督

邁柱兵部尚書銜以兵部侍郎胡煦兼理禮部侍郎事務調正紅旗漢軍副都統常在爲鑲藍旗滿洲副都統○癸卯諭滿漢文武大臣等凡爲國家大臣者非爵位崇顯體貌魁梧之謂必其胸襟識量所見者大方可謂之大臣朕觀諸臣中有器量小者見朕賞賜則欣喜不勝現於詞色夫受賞而欣喜若此則受罰必怨忿於心矣朕之賞罰悉出大公總視乎其人之自取受賞者當思所以致賞之由竝思所以不愧乎賞之道則可以常保其恩賞受罰者當思所以致罰之由竝思所以免罰之道則可以不至於再罰矣○諭刑部向來重犯越獄之事甚多既有關於國體而此等兇頑逃出更有害於良民經朕嚴加申飭將督撫地方官定以考成伊等始知儆惕將各犯緝獲今各處越獄之風未息與其懲治於事後何如防範於事先或因城垣不完或因固圍不固或因巡邏人少稽查不

密始得乘間潛逃。無所忌憚。著各省督撫按察司將如何料理。可免重犯疎忽之處。各陳所見到。日著九卿斟酌定例。遵行。敕直隸各鎮總兵官。俱受古北口提督楊錕節制。後不爲例。乙巳諭兵部。明年更換阿爾泰駐防兵丁時。管理蒙古兵之副都統員缺。著派護軍統領塔拉圖。丁未添設索倫打虎兒八叅領下滿洲副總管四員。索倫打虎兒副總管四員。己酉諭戶部。朕御極以來。愛養黎元。勤求治理。各省錢糧耗羨。原非應有。本欲悉行革除。因廣爲諮詢。留心體察。知州縣官員實有不得已之用度。若將耗羨盡行禁止。在廉謹之員。實難支持。而貪污不肖之徒。勢必藉口。無以養廉。恣意苛索。百姓轉受其累。是以錢糧之有火耗。由來已久。各處皆有相沿之例。其數亦多寡不同。惟應於火耗過重之員。重治其罪。若有司官酌量收納。不加重苛取於民。小民亦覺相安。此各省之大

勢也。查各省之中。賦稅最多者。莫如江南之蘇松二府。浙江之嘉湖二府。每府多至數十萬。地方百姓未免艱於輸將。其賦稅加重之由。始於明初。洪武時四府之人。爲張士誠固守。故平定之後。籍諸富民之田。以爲官田。按私租爲稅額。夫負固之罪。在士誠一人。而乃歸咎於百姓。加其稅賦。此洪武之苛政也。有明二百餘年。減復不一。我朝定鼎以來。亦照明例徵收。蓋因陸續辦理軍需經費。所在未便遽行裁減。我

皇考聖祖仁皇帝常論及此。雍正三年。朕仰體皇考多年寬賦之聖心。將蘇松二府額徵浮糧豁免。彼時頒發諭旨。甚明。本欲一體加恩於嘉湖二府。因浙江風俗澆漓。正須化導。不便啓其望恩倖澤之心。故爾暫止。今見浙俗漸次轉移。改而遷善。朕心深慰。用沛恩膏。查嘉興府額徵銀四十萬二千九百餘兩。湖州府額徵銀三十九



萬九千九百餘兩俱著減十分之一二府共免銀八萬七千二百兩有奇永著為例至於浙省地方各官養廉之資更無別項而耗羨則每兩不過五六分以通省額徵之數計之每年耗羨僅十四萬兩自督撫將軍副都統學政及藩臬道府同知通判州縣等官共一百二十員凡用度公費皆取資於此似不足支應除嘉湖二府錢糧已經減免外著將杭州寧波紹興台州金華衢州嚴州溫州處州等九府額徵銀二百五萬兩按十分之一內存半計算得銀十萬兩賞給各官以爲養廉合之州縣耗羨則有二十四萬兩從雍正六年爲始俱著提解司庫令該撫酌量官職之大小府州縣地方之繁簡秉公派定數目奏聞餘銀存爲本省公事之用朕軫念浙省官民施恩格外百姓賦稅之稍重者則將徵額之數特賜裁減官員用度之不足者則將惟正之供賞給養廉朕今施恩於官者實施恩

於民之意無非欲百姓等催科不擾皆樂業於田間官員等俯仰裕如咸盡心於官守僅官員不知副朕愛民之苦心仍有作奸犯科隱糧逋賦及侵漁公帑剝削民膏者在天理國法俱難姑容加以重懲更無可貸思之慎之以禮部右侍郎莽鵠立署理陝西甘肅巡撫事務禮部議覆奉天府府丞須洲疏言奉天府學民籍廩生一年一貢似覺太速請二年一貢滿字號廩生五年一貢似覺太遲請三年一貢再盛京幅輳廣濶滿漢生員散處千里之內總屬府學教官管轄耳目難周請令查明居址撥歸相近州縣學督課俱應如所請從之雲貴總督鄂爾泰奏威遠新平猺賊倚恃深山密箐專以劫殺爲活從前雖屢經用兵緣允頑難以遽擒或反代爲容隱由來已久比鎮沅蠢動二處猺賊遂乘機聚衆焚掠鄉村臣隨飭征勦鎮沅之各路勝兵一鼓擒勦現獲威遠賊首扎鐵匠新平



賊首李百疊等餘黨就撫得旨裸賊倚恃險阻肆行不法爲害地方鄂爾泰檄令各路官兵乘勢勦撫兇犯成擒地方從此寧謐甚爲可嘉著交部議敘總兵孫弘本奉該督調度實心効力勞績懋著著從優議敘烟瘴地方又值炎暑官弁兵丁等奮勇効力皆屬勤勞著從優議敘賞賚其中有染病受傷以致身故者俱照陣亡例一體恩卹○庚戌授鎮國公弘春妹爲縣君塔哈祿爲固山額駙○壬子

萬壽節停止朝賀筵宴遣官祭

福陵

昭陵

昭西陵

孝陵

孝東陵

景陵遣官祭真武東嶽城隍之神

大清世宗敬天昌運建中表正文武英明寬仁信毅大孝至誠憲皇帝實錄卷之六十二

大清世宗敬天昌運建中表正文武英明寬仁  
信毅大孝至誠憲皇帝實錄卷之六十三

監修總裁官光祿大夫經筵講官太僕寺卿和碩大學士兼兵部尚書總理兵部事務三等伯加五級臣鄂爾泰

總裁官光祿大夫經筵講官起居注太僕寺卿和碩大學士兼戶部尚書仍兼吏部尚書翰林院掌院

事三等伯加十三級臣張廷玉光祿大夫經筵講官起居注太僕寺卿和碩大學士兼工部尚書仍兼管

翰林院事務加二級臣福敏光祿大夫經筵講官太子太傅東閣大學士兼禮部尚書加六級臣徐本光祿大夫

廷議官議政大臣協辦內閣大學士事務禮部尚書仍兼管太常寺鴻臚寺事務三等侯

敕修

雍正五年丁未十一月癸丑朔諭議政王大

臣等

一

二

臣等現今西藏頗羅鼐帶兵報康濟鼐之讎  
與阿爾布巴戰鬪相持應特派大臣領兵料  
理曾經繕寫諭旨頒給達賴喇嘛其來年大  
臣前往應帶領兵丁目今預備俟青草發萌  
時前去此所派兵丁著議政王大臣等議奏  
從前派兵時除官賞置辦預備恩賜銀兩外  
其稍有不足者多指伊等俸餉支借今次所  
派官兵應停其借給著從優賞賚其料理藏  
內軍機事務著左都御史查郎阿副都統邁

祿前去選派西安滿洲兵四百名隨往四川  
綠旗兵丁著散秩大臣品級鑾儀使周瑛帶  
領陝西綠旗兵丁著西寧總兵官周開捷帶  
領雲南綠旗兵丁交與鄂爾泰酌量選派總  
兵官一員副將一員著留一員在又木多駐  
劄一員領兵進藏周瑛賞銀四千兩周開捷  
并所派雲南之總兵每人各賞銀三千兩副  
將各賞銀一千兩叅將各賞銀五百兩至賞  
給遊擊以下等官爾等酌議具奏尋議大臣  
進藏料理不可不帶兵前往所帶西安滿洲  
兵四百名應派協領一員佐領二員防禦二  
員驍騎校四員管轄進藏再派陝西綠旗兵  
八千名四川綠旗兵四千名雲南綠旗兵三  
千名每兵丁二千名派副將一員一千名或  
派叅將遊擊一員管轄守備千把等官令該  
督撫提鎮等配合派出其銀兩各遵旨從優  
賞賚遊擊四百兩守備三百兩千總二百兩  
把總一百六十兩馬兵二十兩步兵十六兩

俱預爲備辦。俟明年青草發萌時起程。令左都御史查郎阿於明年正月內自京由西安西寧同周開捷出口進藏。應帶部院衙門賢能司官四員筆帖式四員理藩院領催二名各賞給俸祿錢糧置辦前往從之。○甲寅諭內閣延信已犯重罪革去貝勒交與宗人府究審著行文與富寧安將伊家產查明看守其家屬人口著派官兵解送進京。○乙卯諭吏部定例凡在京各部院官員因病告假回籍調理者病痊之日仍以原衙門補用至在外各官一經告病即令休致所以防不肖有司之託病規避也夫外官有地方之責患病不能辦事自應呈請離任但病痊之日格於成例雖有才具優長之員不得起用殊爲可惜從前有府縣官員告病者朕降旨調來引見見其才尚可用即命醫調治痊可仍行補用誠以人才難得雖片長薄技不忍棄置也嗣後外官告病者著督撫查明確實具題令

其回籍調治痊可有情願起用者於本籍起文赴部引見仍以原缺補用如此則可以杜規避之端而人才亦不至於淪棄矣。○予故領侍衛內大臣三等公音德祭葬諡愍敬。○丁巳諭議政王大臣等阿爾泰軍營辦理糧餉事務已泰雙喜之缺著派原任巡撫法敏原任內閣學士傅德前往更換伊等到日同伊都立三人管理糧餉種地事務効力贖罪明年大兵起程時隨將軍前往。○諭內閣戶部侍郎西琳著補授西安巡撫張保著回刑部侍郎原任常德壽到京時著署理戶部侍郎事務浙閩總督高其倬辦理兩省之事才力少不及李衛著授爲浙江總督管巡撫事從前鄂海楊琳爲總督時因不能兼攝兩省之事是以曾用年羹堯爲四川總督孔毓珣爲廣西總督總之酌量時勢因人而施也今李衛亦照此爲浙江總督不爲浙江定例。○諭理藩院今年口外蒙古地方收穫甚豐科

爾沁教漢等十六處扎薩克地方未能豐收。宜加特恩。科爾沁地方五旗著賞銀三千兩。交與現今在京科爾沁王羅卜臧滾布貝子。拉錫等帶去。查明賞給。教漢等十一處扎薩克地方著賞銀六千兩。爾衙門派司官二員。分兩路帶去。會同各處扎薩克查明賞給。再此等扎薩克各旗倉內現有存貯米糧。其未能豐收者應如何酌量借給之處。爾衙門議奏。尋議應令科爾沁教漢十六旗於和碩土謝圖親王阿拉卜彙等旗倉內。每戶借給米五斗。造冊送部查核。明年秋收抵還從之。○戊午。諭刑部。奉天習俗不好。凡犯罪發遣之人。若發往相近邊地。必至逃回。又生事端。嗣後犯法之人。應枷責發遣者。著解送來京。照例枷責滿日。發與西安荊州等處滿洲駐防之兵丁爲奴。向來奉天等處發遣人犯。并彼處旗下家人私逃者甚多。該將軍等但有緝捕之名。而無其實。嗣後著該將軍等將每年

緝獲之犯。與未獲之犯。於年底報部。奏聞候旨。分別賞罰。其從前逃走之犯。著該將軍等通行出示曉諭。令其自首。若伊等於雍正六年五月以前自行投到。則免其逃走之罪。仍照本罪安插。儻不行自首。被人拏獲。則嚴加治罪。以上數條。著該部定議具奏。○江西巡撫布蘭泰。奏原任撫標遊擊今陞蔚州參將裴魁。從前虛冒馬糧二分。步糧三分。守糧六分。今經查出。請革職究追。得旨。武弁虛冒糧餉幾分。乃歷來積弊。較有司之貪贓枉法。累及國計民生者。似有分別。該上司等應預行嚴飭。令其悛改。爲國家愛惜人才。若切加訓誨。仍不遵奉。則當參革治罪。今布蘭泰到任伊始。尚未教導屬員。遽以空糧幾分。將裴魁參奏。未免過刻。若督撫等皆如此。參劾恐有用之未受微愆之累。而不得改過自新者多矣。朕念裴魁從前効力。從寬免其究問。著降三級留任。朕此番降旨。將裴魁寬免。深恐

各省武弁等尅扣兵糧而該管上司等徇情寬縱者由此漸多。若照例將裴魁治罪則又恐各該上司以此事叅處爲是因而刻意搜求使可用之員遽行黜革實屬可惜是以明降諭旨凡此寬嚴輕重之間朕實以至公之心而權衡於至當之理封疆大臣等祇遵朕訓隨事察理因時制宜遇屬員中之小過當加訓戒容其改悔自新方能事事合乎公平至當也○庚申諭內閣前據怡親王及大學士朱軾奏稱直隸水田稻穀豐收民間多不慣食稻米請發銀採買米石使得賣米價銀轉買小米高粱於百姓甚屬有益此特爲民食計非爲倉儲計也近聞州縣中竟有逼勒小民強買稻米者此等不肖官吏生事擾民將朕愛民德政奉行不善反爲擾民之事較之一切貪劣之員尤爲可惡著該督等查叅治罪儻徇情隱庇不行查叅將該督等一併嚴加議處○又諭朕惟漢史始志地理蓋本

禹貢職方之遺而脩其郡邑紀其戶口以宣究其風俗教化也今各省皆有志書惟八旗未經紀載我朝立制滿洲蒙古漢軍俱隸八旗每旗自都統副都統叅領佐領下建領催間散人體統則尊卑相承形勢則臂指相使規模宏遠條理精密超越前古豈可無以紀述其盛況其間偉人輩出樹宏勲而建茂績與夫忠臣孝子義夫節婦潛德幽光足爲人倫之表範者不可勝數若不爲之採摭薈萃何以昭示無窮朕意欲論述編次彙成八旗志書年來恭修聖祖仁皇帝實錄今已漸次告成即著諸總裁官領其事選滿漢翰林分纂其滿洲漢軍內有通曉漢文而學問優長堪備纂修之任者無論進士舉人貢監生員以至間散人等俱著該旗都統副都統保送但勿徇情濫舉以副朕慎重著述之至意○壬戌冬至祀天於

園丘

上親詣行禮○遣官祭

永陵

福陵

昭陵

昭西陵

孝陵

孝東陵

景陵○停止次日朝賀○諭內閣朕日理萬幾

勤思上治凡外省來京之小臣如州縣佐貳等官常令引見并許條奏地方事務數年以來覽所奏甚多其中指陳近理言有可採者或交部議或即准行此皆朕留心政治期有裨益於地方之意也特恐行之日久致生弊端或各省督撫藩臬等見地方事務有不便自行陳奏之處因授意於屬官令其寫入條陳之內亦未可定朕防微杜漸不得不預行曉諭儻有此等則顯蹈欺罔之罪一經發露

斷不寬貸至朕屢頒諭旨訓勵臣工總為國計民生之至要各省督撫諸臣自當實心遵奉但恐前任督撫所奉之諭旨接任者未曾備悉或致日久廢弛著各省督撫等將歷來所奉諭旨俱繕錄成冊一一詳載以便每日觀覽觸目警心并將此冊交代不許失漏藏匿如此則前任奉行之諭旨後任仍得知所遵循觀覽之際悉如親承朕訓於國計民生庶有裨益○又諭朕覽明太祖所著洪武寶訓一書詞義周詳誥誨諄切所以教其子孫臣庶者亦費苦心但明太祖起自布衣奄有天下雖姿性過人而其識見尚局於卑隘其規模未臻於廣大蓋緣文過其實言行多不能相符而議論自相矛盾者有之朕觀堯舜授受心法惟有一中治世之道必事事合乎時中始為至善我

太祖

太宗

世祖

聖祖相承之神謨聖烈合於大中至正之道者已經敬輯

聖訓垂爲世法而從前史冊所載歷代帝王之舉動言論每於中道之權衡或未能悉協大抵由於時勢之所值不同故政治訓辭亦因之而有偏向後之論者遂不能無疑議於其間朕意欲將經史所載歷代帝王之嘉言懿行可以紹執中建極之心傳者採錄成書爲後世子孫之法鑒著派翰林官分任纂修陸續進呈朕親加酌定○諭戶部自古治水之法惟在順其自然之勢而利導之蓋水之爲害大抵由於故道堙塞使水不得徑直暢流以致泛溢而爲患但恐徑直之路堙塞年久或民間既已蓋造室廬開墾田畝或且安葬墳墓人情各顧其私未免百計阻撓而司其事者惑於浮議遂致遷就紆回別開溝洫苟且從事而不能成一勞永逸之舉此治水之

通弊也今江南地方現在興修水利若水勢必由之路有礙墳墓即於興修水利錢糧內動支銀兩給與本人令其改葬俾小民既有營葬之資而河工亦收利導之益則水患可除水利可興地方永遠蒙福矣○以鑲黃旗蒙古都統常色禮爲陝西西安將軍仍留軍前其陝西西安將軍事務大學士富寧安仍暫行署理○禮部遵旨議覆嗣後各直省鄉試房考官除順天仍照舊例外其外省鄉試俱於鄰省調取在籍候選之進士舉人文行素優者掣籤入闈分校其兩省接壤附近三百里內者不得混行咨送從之○癸亥陞一等侍衛葉楚爲正藍旗蒙古副都統調山西右衛左翼副都統阿里衮爲河南副都統陞二等侍衛明亮爲山西右衛左翼副都統○兵部議覆湖廣彝陵鎮總兵官杜森疏言伊父陝西寧夏鎮標右營千總杜呈源隨師進剿吳逆陣亡懇照例入祠應如所請從之○

山東巡撫塞楞額疏報鄒平等五縣開墾雍正五年分田地二千三百八十五頃有奇下部知之○旌表浙江山陰縣烈婦鄭龍山妻嚴氏夫故殉節飲藥殞命給銀建坊入祠致祭如例○甲子禮部議覆署直隸總督宜兆熊疏言臨城縣原任湖廣兩桂營都司追贈遊擊劉芳周於康熙三年調勦西山逆賊臨陣捐軀請照例入祠應如所請從之○兵部議覆福建總督高其倬疏言浙江黃巖鎮中營千總陳天祿不遵禁令與把總黃正登賄放米船出洋該管遊擊劉廷選失於覺察均應照律治罪得旨依議朕聞廣東福建之人性多貪利而習俗輕悍敢於爲非其曾經身爲武弁者或因事革退閒廢在家不能安分常於本地方生事此等人既久列營伍於武職上司衙門往來習熟又因曾任職官舉動言語足以煽惑地方往往藐玩國法肆行無忌愚昧之人被其引誘而不覺朕意嗣後廣

東福建二省及浙江沿海溫台寧波等府之武職官員有因事叅處已經革職治罪而家居者不便仍留本地居住其原任守備千把等官則酌量派往直隸山東河南等省入伍食糧伊等既歸營伍聽受約束又得養贍其身家儻有漢仗弓馬尚好者仍可改過自新勉圖効力其副將以下都司以上革職治罪之員若係本省之人著另行請旨其如何分別定議之處著該部詳議具奏尋議嗣後廣東福建及浙江沿海溫台等府之人在本地曾爲武弁革退治罪者不許仍留本籍居住應將廣東人派往山東福建人派往河南浙江溫台等府人派往直隸交與各營入伍食糧如再有過犯按律加倍治罪果能勤慎効力仍令酌量補用儻有私自回籍者照配所逃回例治罪至副將以下都司以上等官非微弁可比應令該督撫於題叅疏內聲明請旨定奪從之○乙丑



聖祖仁皇帝忌辰遣官祭

景陵○丁卯策試天下中式武舉夏糧等一百十六名於

太和殿前○諭內閣昔

聖祖仁皇帝嘗稱巴圖魯公鰲拜効力處甚多厥功甚大因犯重案不得已將伊治罪伊孫達禮善朕甚望其成立欲加恩育但伊人甚平常行止不堪可惜不能承朕恩眷當時諭旨如此朕數十年來惟聞鰲拜僭妄無禮擅權作威之罪未深知伊之功勳併不知鰲拜子孫現在者何人昨引見達福時方知達福人去得朕又恭閱

聖祖仁皇帝實錄鰲拜所効功績每多超衆之處是以康熙五十二年

聖祖特命查鰲拜之子孫加恩賞給一等阿思哈尼哈番

皇考既已施恩寬免鰲拜之罪應將鰲拜効力所得一等公爵給達福承襲世襲罔替仍授

爲散秩大臣鰲拜著致祭一次至建立石碑加恩等處交該部查例具奏○諭兵部本營

兵丁不得拔補本營千把前經高其倬奏請部議准行數年以來朕留心體訪始知將此處兵丁用爲他處千把頗多未便蓋兵丁平日所管汛地其情形險阻素所深知及用爲千把諸事有駕輕就熟之益若用往他處則初到之日一切茫然必待學習而後通曉此辦理公事之當籌及者也至於微員末弁安土重遷盤費居址措置匪易若令調換至數百里外必至拮据艱難有室家之累此又私情之當籌及者也朕思本營兵丁卽爲本營千把誠不能免於牽制瞻徇若於同城之中互相更換如係左營則用爲右營前營則用爲後營又如撫標鎮標之同城者亦可彼此更換庶於公私兩便其地方止有一營者或應於就近調補或應仍照從前舊例著該部定議具奏尋議嗣後督撫提鎮於本標下左

右前後等營准其互相拔補或同城協營亦許彼此更換至獨營地方千總有左哨右哨之分把總有頭司二司之別如無隣近營汛可即於本營左右哨二司調拔庶兵丁管理汛務各皆嫺熟且可免遷移之累從之○禮部奏鑲藍旗間散宗室盧式之繼妻民覺羅氏懷貞守節年例相符應加旌表給與銀兩緞疋并獎諭勅命一道從之○免湖北蘄州黃岡等四州縣黃州蘄州二衛本年分水災額賦有差○雲貴總督鄂爾泰題雲南永北土知府阿錦先故請以其子阿有威承襲下部知之○予故四川成都副都統給都統銜法喀察葬如例○戊辰

上御瀛臺紫光閣閱視中式武舉騎射○以翰林院編修勵宗萬提督山西學政○陞正白旗蒙古副都統拉歆爲鑲黃旗蒙古都統○正藍旗滿洲副都統覺羅英柱緣事革職以一等公達福爲正藍旗滿洲副都統○雲貴

總督鄂爾泰疏言黔省邊界生苗不納糧賦不受管轄隨其自便無所不爲由來已久臣自勦撫長寨後生苗目覩長寨苗戶安居樂業各思投誠內附長寨後路克猛等處及馬頭山松把廣順州定番州古羊山外等處招撫化誨夷苗共一百八十四寨一千八百餘戶俱聞風嚮化並獻弓弩盔甲雖區區頑苗頑獠不啻犬羊或交夷土夷糧何增毫末但念其原無統轄遂任彼擾害邊疆欲行稽查無從踪跡縱思撫恤末由招安今仰賴聖主聲教所訖莫不願附版圖但戶口必須編造錢糧自應從輕且夷民半無姓氏名字雷同應行更定姓名彙冊報部酌爲額賦按年輸租庶幾邊境長寧夷民永賴得旨苗民梗化由來已久况屬生苗尤難懾服綏靖鄂爾泰勦撫並用威惠兼施俾生苗等嚮化輸誠咸願納賦歸附版籍又謬冲逆苗等素稱犷悍難馴今勦撫已靖悉皆內嚮鄂爾泰辦理

甚屬可嘉著由拜他喇布勒哈番加授一等  
阿達哈哈番世職以獎勞績張廣泗遵依鄂  
爾泰調度實心出力著交部從優議叙在事  
官兵應如何議叙賞賚之處著鄂爾泰分別  
具奏○庚午理藩院遵旨議覆澤卜尊丹巴  
胡土克圖請加封澤卜尊丹巴喇嘛遣官齋  
捧敕印送至喀爾喀庫倫地方得旨澤卜尊  
丹巴胡土克圖與班禪額爾得尼達賴喇嘛  
等之後身出處甚確應封於庫倫地方以掌  
釋教朕爲普天維持宣揚教化之宗主而釋  
教又無分於內外東西隨處皆可以闡揚昔  
達賴喇嘛與班禪額爾得尼在西藏時其居  
住青海之厄魯特顧實汗等實與之鄰近相  
與護持故其教盛行於西藏自此各部落俱  
爲檀越踵而行之有年矣蓋宣揚釋教得有  
名大喇嘛出世即可宣揚豈僅在西域一方  
耶澤卜尊丹巴胡土克圖其鍾靈原有根源  
乃與達賴喇嘛班禪額爾得尼相等之大喇

嘛也故衆喀爾喀俱尊敬供奉之且伊所居  
庫倫地方弟子甚衆著動用帑銀十萬兩修  
建大剎封伊後身俾令住持齊集衆喇嘛亦  
如西域講習經典宣揚釋教再多倫腦兒地  
方乃衆喀爾喀歸順時我

皇考巡狩於此衆喀爾喀齊來朝覲會盟之地  
也應造寺宇以表彰之俾去世之張家胡土  
克圖居住張家胡土克圖者西域有名之大  
喇嘛也唐古特人衆敬悅誠服在達賴喇嘛  
班禪額爾得尼之上各處蒙古亦皆尊敬供  
奉今其後身稟性靈異確實可據著將多倫  
腦兒地方寺宇亦動帑銀十萬兩修理寬廣  
使張家胡土克圖之後身住持於此齊集喇  
嘛亦如西域講習經典以宣揚釋教蒙古汗  
王貝勒貝子公台吉等既同爲檀越朕如此  
推廣教法建造寺宇一如西域今喇嘛居住  
講習經典於伊等蒙古之誦經行善亦甚便  
易蓋禮佛行善無分遠近宣揚釋教之處愈

多則佛法可以日廣。即澤卜尊丹巴胡土克圖。張家胡土克圖。皆前世達賴喇嘛之弟子。伊等豈肯忘其宗派耶。○戶部等衙門議覆四川巡撫憲德疏奏。各府州縣增設裁改事宜。一成都府請復設華陽縣。添知縣一員。典史一員。教諭一員。訓導一員。裁府屬之稅課大使一員。一請改資縣爲直隸資州。管轄仁壽。資陽。井研。內江。四縣。裁資縣原設之典史一員。改綿州爲直隸州。管轄德陽。安縣。綿竹。梓潼。四縣。其威州應行裁汰。併入保縣管理。改茂州爲直隸州。兼轄汶川。保縣。二縣。及各土司。一請裁馬湖府。其知府經歷教授各一員。俱行裁汰。將馬湖府原屬之屏山縣歸併叙州府管轄。其叙州府通判請移駐馬湖府。管束雷波等各土司。均應如所請。從之。○予故都統追封一等公諡襄毅賴塔察一次。○予故浙江定海總兵官林亮祭葬如例。贈都督同知。○辛未。

上御瀛臺紫光閣閱視中式武舉步射技勇。○署湖廣總督福敏奏報。勦撫謬冲花苗巢穴。已焚搜獲男婦現在解審。官兵俱撤回原汛。得音花苗地連黔楚素行不法爲害地方。今福敏會同勦撫楚地。從此無克苗之擾。甚屬可嘉。福敏著交部議叙。其在事官弁兵丁應如何議叙賞賚之處。著福敏分別具奏。○免江南沛縣雍正四年分水災額賦有差。○予故正藍旗護軍統領英合子祭一次。○壬申。上御瀛臺紫光閣閱視中式武舉步射復命親軍護軍等步射。○授故奉國將軍舒圖子拖禪爲奉恩將軍。○癸酉。兵部議覆盛京偷採衆犯私越邊口往朝鮮地方行兇不法。據該國王李昫咨報。皆由守口官弁廢弛徇縱所致。除將失察之該管官革職拏審外。嗣後應嚴行查禁。儻守口官不驗明印票任其出入者。該將軍督撫提鎮題叅。交刑部嚴行治罪。得旨依議。著該管之將軍督撫提鎮等實力

奉行嗣後僅有越境生事者定將該管各官從重議處再者昔年

聖祖仁皇帝頒諭朝鮮國王僅有盜賊前往伊國劫掠著該國王即行追拏殺戮生擒解送自朕即位以來又降諭旨若飄風船隻人內有無票妄行生事者該國王即照伊國律例懲戒治罪屢次諭旨甚明今內地盜竊之輩因各處捕緝禁約甚嚴無處可以藏匿是以潛逃外國苟且偷生該國王既列藩封當為朝廷盡捕盜安民之職乃柔懦不能遵奉轉使內地犯法之人恃朝鮮以為潛踪避罪之地此風斷不可長嗣後僅有匪類越境生事而朝鮮不能擒獲以致漏網者著該國王將伊國防汎之員題叅治罪該部將該國王一併議處以為藩王不能遵旨奉行捕盜安民者之戒著將此行文與朝鮮國王知之○甲戌

上御太和殿傳臚賜殿試武舉王元浩等一百

十六人武進士及第出身有差○盛京工部侍郎常保緣事降調陞大理寺卿通智為盛京工部侍郎仍留陝西辦理開墾修渠事務以盛京刑部侍郎武格兼理盛京工部侍郎事○乙亥宗人府議奏閒散宗室廣善蒙恩賞給公銜在

陵寢居住越分請安請革去公銜以閒散章京看守

陵寢大學士蕭永藻不行攔阻聽其請安應革職得旨廣善著革去公銜在閒散章京之列行走蕭永藻向來操守甚好伊恃其操守驕矜偏執諸事任意在

聖祖仁皇帝時並無實心効力之處及朕即位因其年逾七旬為舊日大臣加恩優待念景陵事務關係重大特命伊一切總理且令伊得就閒散之地以頤養暮年正所以善全之也乃伊不知感朕之恩且以朕不加任用時懷怨望之意自到

陵寢以來事事推諉瞻徇不肯實心辦理即如筆帖式等強奪民人牛隻而伊不行約束小人偷鋸

陵旁枯樹而伊不知查訪貝勒允禩到

陵行禮而伊不行齊集其餘如請安來京不候旨即去似此疎慢之罪甚多不可悉數惟知阿諛允禩以長其傲慢狂肆之罪而其特行條奏者則裁汰舊設之官員減去祭祀之乳牛以爲節省錢糧之計不知大體負恩廢職蕭永藻著革職仍在

陵寢地方居住効力○丙子諭諸王大臣等朕每恭讀

聖祖仁皇帝實錄必虔加頂禮然後展誦每遇聖祖尊號必頂禮致敬不敢平視此朕居敬存心不待勉強非獨一事爲然也聖人戒慎恐懼之功無間須臾時時收斂此心便是敬稍或不敬則此心縱逸而不可追矣凡人動怒之時或與人相爭之時心尤易縱切須以敬

自持果能操存涵養不但是聖賢修己工夫亦可得養生之道不可不加之意也爾等每聆朕諭旨聽受之下中心誠服在爾等斷無面從背違之習然恐存此成見或中心以爲是未必果然全是也設爾等陳奏之言朕或誤以未當者爲當其失僅在一事所係猶小若朕所發諭旨爾等漫以未盡善者爲盡善其所係不綦重乎嗣後切須爲朕存心致思詳加體認不可稍有遷就迎合之意使朕有失言過舉朕於爾等有厚望焉○丁丑諭八旗都統等歷來滿洲人材壯健弓馬技勇罕與比倫前令八旗查得親軍護軍內能開八個力以上硬弓者現有一萬八千餘人昨朕在瀛臺考試天下武舉騎射之後令八旗人等當衆人之前校射伊等所用之弓自十八個力以至十三個力不等舉重若輕從容合度衆武舉等咸驚異以爲從來罕覩朕心甚爲嘉悅著分別賞給銀兩伊等藝勇超羣是

其盡心學習之所致嗣後務須更加勉勵演習熟練不可以弓力相爭尚將此通諭八旗知之○戶部議覆兩廣總督孔毓珣奏廣東東莞場大使胡文煥等缺少鹽額請革職留任勒限追賠應如所請限六個月補足限滿不完題明革任得旨凡官員任內因錢糧未清議以革職留任者原屬國家寬典蓋欲其於留任後作速完結虧欠之項不使其逍遙事外得以脫然無累孔毓珣於鹽政不得不如此辦理然使限滿不完仍議以革任則怠惰劣員究竟得以逍遙事外徒貽接管官之叅罰而已朕思督撫等奏請革職留任追項之員若不准其留任則地方大吏惟恐欠項無著必有因循瞻顧不即題叅之弊但既准其留任應如何勒限嚴追及至限滿不完於革任後應如何治罪懲戒并如何留於原地方嚴追完項之處著九卿定議具奏○兵部議覆川陝總督岳鍾琪疏言嗣後有自備

鞍馬隨軍効力人員請令領兵將軍督撫提鎮考驗報部方准收錄應如所請得旨隨軍効力之人往往有未諳營伍而具呈願往濫邀議叙者此等自備鞍馬之人若後來力量不足必致遲誤公事及遲誤之後又不便與衆一同治罪於軍前甚屬無益嗣後若有自備鞍馬願往効力之人俱不必准○戊寅諭刑部凡強盜拒捕將官兵傷死之案除同夥傷人之時該犯不在一處者仍照例議罪外其同在一處或三五成羣雖非下手之人既在旁目覩即係同惡共濟法所難寬嗣後應照舊例立決向來各省督撫於命盜案件或稱酒後殺傷或稱飢寒所迫巧爲開釋是皆婦寺之仁未聞聖賢之義者夫酗酒之徒已非良善況恃酒致傷人命更屬凶殘今不因酗酒而加其罪反因酗酒而寬其罪恐姦惡之徒借麪蘖迷心之名以肆其兇暴殺人之計流弊固無窮矣至迫於飢寒之說在老弱

之人容或有之。然爲盜賊者。必係年力強壯之人。耕種傭工。何事不可資生。餬口乃喪心。滅理甘蹈刑戮。而不顧乎。蓋良善之人。雖遇飢寒。亦斷不爲盜。克惡之人。不必飢寒而後爲盜。其理顯而易明。凡爲封疆大臣者。豈可不察情理。而姑息以養姦乎。朕代天以出治。督撫受職以理民。克暴在所當懲。良善在所當恤。所謂天命天討也。一夫不獲其所。實吾君臣之責。儻無辜之民。不能保護而安全之。而使之有轉徙流亡者。此必水旱之不時。積貯之未備。地利之未興。科派苦累之未革。實朕與該督撫經理失宜。而使斯民罹於困阨也。清夜捫心。應如何抱慚負疚。若坐視百千良善之失所。而不生惻隱之心。轉於克暴殃民之盜賊。加之憐憫。欲枉法以保全之。豈非賞罰顛倒。重負父母斯民之責耶。朕儆惕之切。無一時稍釋於懷。願天下督撫臣工。咸體斯意。○議叙鎮海堡截擊羅卜藏丹津。拜守

護城池各員弁功。分別加銜紀錄。陣亡兵丁。照例恤賞有差。○庚辰諭內閣

壇

廟祭祀典禮攸關。理宜潔淨齋戒。近聞大臣官員。於齋戒處飲酒嬉戲。殊失敬謹之節。著派監察御史二員。各部衙門司官四員。每旗賢能旗員各一員。內府官員二員。三旗侍衛二員前往

壇內嚴行稽察。至旗下大臣俱有管兵責任。祭祀前期一日。著即在各該旗衙門齋戒。至次早預先前往再

天壇內有放鷹打鎗成羣飲酒遊戲者。著禮部太常寺出示嚴禁。仍不時派司官前往稽察。嚴拏治罪。○又諭。向來常有演習拳棒之人。自號教師。召誘徒衆。鼓惑愚民。此等多係遊手好閒。不務本業之流。而強悍少年。從之學習。廢弛營生之道。羣居終日。尚氣角勝。以致賭博酗酒。打降之類。往往由此而起。甚且有



以行教爲名勾引劫盜竊賊擾累地方者若言民間學習拳棒可以防身禦侮不知人果謹遵國法爲善良尚廉耻則盜賊之風盡息而鬪訟之累自消又何須拳棒以防身乎若使實有膂力勇健過人何不學習弓馬或就武科考試或投營伍食糧爲國家効力以圖榮身上進豈可私行教習誘惑小民耶著各省督撫轉飭地方官將拳棒一事嚴行禁止如有仍前自號教師及投師學習者即行拏究庶遊手浮蕩之徒知所儆懼好勇鬪狠之習不致漸染而民俗可歸於謹厚矣○戶部議覆川陝總督岳鍾琪疏言川省欺隱田地請遴選賢能司官前往查丈應如所請於各部司官并候補候選州縣內揀選引見命往如有姦民脅衆阻撓者按律治罪得旨此本內但稱姦民阻撓公事按律治罪而百姓實有冤抑下情如何准其陳訴之處未曾議及著通行曉諭大量案內百姓果有冤抑下情

准其控告該督撫欽差官員秉公審理儻所控虛妄將本人照誣告者加等律治罪所請大量地畝人員著於小京堂科道內揀選并令各部堂官將司官保送一併帶來引見其帶往大量人員著於庶吉士現任主事內閣中書中行評博候補候選人員內揀選引見○宗人府議奏順承郡王錫保徇庇黨羽並不將延信大不敬之事叅奏又將不能騎馬之章京派拏延信以致遲誤應將錫保王爵並管理宗人府事務一併革退圈禁家中得旨錫保革去王爵及圈禁之處俱從寬免其特恩賞給之親王俸祿護衛官員俱著撤回仍罰郡王俸三年○工部議覆河道總督齊蘇勒等遵旨議奏江南太倉州七浦閘現在堅固仍應存留其閘內河身淤淺之處請挑浚深寬以資暢流又吳淞天妃二閘久經冲卸應各移建上首相度修築應如所請從之○陞福建布政使沈廷正爲貴州巡撫調署

貴州巡撫祖秉圭爲廣西巡撫陞長蘆鹽運使趙國麟爲福建布政使司布政使廣西布政使黃叔琬緣事降調陞廣西按察使郭鉷爲廣西布政使司布政使監察御史張元懷爲廣西按察使司按察使實授赫勝額爲貴州布政使司布政使張廣泗爲貴州按察使司按察使○免湖北公安石首二縣荆左荆右二衛本年分水災額賦有差○辛巳以康親王崇安爲宗人府宗令調宗令順承郡王錫保爲左宗正解右宗正德普任轉左宗正信郡王德昭爲右宗正○陞通政使兼太常寺卿孫卓爲禮部右侍郎擢工部郎中傅德爲太常寺卿○實授莽鵠立爲陝西甘肅巡撫○免浙江安吉仁和等十州縣杭州前右二衛本年分水災額賦有差

大清世宗敬天昌運建中表正文武英明寬仁信毅大孝至誠憲皇帝實錄卷之六十三

大清世宗敬天昌運建中表正文武英明寬仁  
信毅大孝至誠憲皇帝實錄卷之六十四

並終議教官光祿大夫經筵講官太僕議政大臣保和殿大學士兼兵部尚書總理兵部事三等伯加十五級日郭爾泰

紀載官光祿大夫經筵講官起居注太僕議政大臣保和殿大學士兼兵部尚書仍兼管吏部尚書翰林院掌院

事三等伯加十三級日張廷玉光祿大夫經筵講官起居注太僕議政大臣武英殿大學士兼吏部尚書仍兼管

翰林院掌院事加二級日福祿光祿大夫經筵講官太子太保東閣大學士兼禮部尚書加六級日徐本光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事日王泰等奉

敕修

雍正五年丁未十二月壬午朔諭諸王大臣

等。諸王及旗下大臣。部院大臣。內務府總管等。在乾清門外辦事。所有跟隨之人。並無限制。以致人數衆多。頗覺繁雜。爾等查例議奏。尋議親王以下宗室公以上。如進內禁門。帶護衛一員。部院大臣等。帶筆帖式一人。旗下大臣等。帶印房筆帖式。或領催一人。又乾清門侍衛人等。出入景運門。隆宗門。後右門。俱照例投職名查驗。在內行走之王等。亦得在隆宗門出入。其餘俱令在後左門出入。從之。

○命署黑龍江將軍公傅爾丹來京。陞兵部右侍郎那蘇圖爲黑龍江將軍。○以正藍旗滿洲副都統一等公達福。爲左翼前鋒統領。○振武將軍宗室公巴賽疏報。鄂爾昆圖拉等處。屯田收穫青稞麥。糜。共二千六百五十石。有奇。下部知之。○癸未。兵部遵旨議覆雲南威遠新平猓賊聚衆劫掠。殘害居民。由來已久。該督鄂爾泰。嚴檄官兵。乘機勦撫。兇賊就擒。地方寧謐。應加二級。以獎勲勞。管總兵官事孫弘本。實心効力。應從優議敘。功加二等。從之。○賑江南泰興縣水災饑民。○雲南楚姚總兵官南天培。以年老乞休。允之。加署都督僉事銜致仕。○甲申。遣官祭甘肅河源之神。○刊刻孝經小學。清漢文告成。御製孝經序文曰。孝經者。聖人所以彰明彝訓。覺悟生民。溯天地之性。則知人爲萬物之靈。敘家國之倫。則知孝爲百行之始。人能孝於其親。處稱悖實之士。出成忠順之臣。下以此

爲立身之要。上以此爲立教之原。故謂之至德要道。自昔聖帝哲王。宰世經物。未有不以孝治爲先務者也。恭惟

聖祖仁皇帝。續述

世祖章皇帝遺緒

詔命儒臣編輯孝經衍義一百卷。刊行海內。垂示永久。顧以篇帙繁多。慮讀者未能周徧。朕乃命專譯經文。以便誦習。夫孝經一書。詞簡義暢。可不煩注解而自明。誠使內外臣庶。父以教其子。師以教其徒。口誦其文。心知其理。身踐其事。爲士大夫者。能資孝作忠。揚名顯親。爲庶人者。能謹身節用。竭力致養。家庭務敦於本行。閭里胥嚮於淳風。如此。則親遜成化。和氣薰蒸。躋比戶可封之俗。是朕之所厚望也夫。

御製小學序文曰。古者八歲而入小學。教之以灑掃應對進退之節。愛親敬長之義。俾童而習之。以養其德性。其說散見經傳。朱子採集

爲小學一書。所以示人教學之方。而有以爲正心修身之本。其言約。其理該。蓋六經四子性理諸書之階梯也。

皇考聖祖仁皇帝。嘗

特頒諭旨。令有司兼以命題課士。海內士子。固已咸知誦法矣。又

命尚書顧八代一人。繙譯清文。日進呈

覽。欽定三年而後成。嘉惠後學之心。至深且厚。當日未經刊刻。頒行。朕敬承

皇考遺志。特命校對授梓。以資肄習。讀者宜知綱常倫紀之當崇。視聽言動之當謹。與夫嘉言懿行之當遵循。慕效修其職。自在家庭日用之常經。而充其量。可以成聖賢忠孝之大節。子弟之習於是而淳。教化之原。於是而備。詩曰。成人有德。小子有造。朕蓋深有望焉。○諭兵部。前科武進士大半皆授爲侍衛。餘亦依次俱得選用。今科進士。朕恐其多選侍衛。反不能盡心學習。所以揀選侍衛者甚少。但

伊等未得一時錄用置之閒散殊爲可惜今特廣爲加恩將未選侍衛之滿洲蒙古進士授爲藍翎交與領侍衛內大臣効力行走漢軍進士交與該旗以驍騎校補用其餘漢進士有人材可用者分發各省賞食千總俸令督撫提鎮試看如果材力壯勇効力勤謹者以守備題補○乙酉諭禮部直省拔貢舊例十二年題請舉行一次後因各省學政不能秉公選取國子監未便照例請行於雍正元年特行一次朕思各州縣每年歲貢較其食廩淺深挨次出貢內多年力衰邁之人欲得人材必須選拔著各省學臣於科考時照例府學拔取二名州縣學拔取一名寧缺勿濫務取學問優通品行端方才猷可用之人令其來京朕將親加考驗令入國子監肄業如有學問荒陋人品不端才具庸劣者將該學政嚴加議處嗣後六年選拔一次國子監屆期題請候旨○刑部遵旨議覆奉天等處人

犯有應枷責發遣者該將軍查明送部照例枷責滿日若係滿洲另戶正身發給西安等處駐防當差其身爲奴僕及奴僕開戶而爲另戶者發給西安等處駐防兵丁爲奴至奉天西安等處旗下家人逃走及發給爲奴當差之人脫逃者令各該將軍年底彙奏又從前在逃之犯已奉旨寬限自首若過限不行投到獲日將減等盜犯於原發遣處正法平常發遣之犯有行兇爲匪者亦於原發遣處正法如無爲匪之處枷號兩個月鞭一百仍交原發遣處安插若旗下家人私自逃走者加逃罪一等治罪從之○以故一等阿思哈尼哈番金鐸子金貫襲職○丁亥  
孝惠章皇后忌辰遣官祭  
孝東陵○諭大學士九卿等爲治之道首重得人朕臨御以來夙夜孜孜廣爲諮訪期得人材以理庶政而內外臣工所保舉之員其中秉公推薦足備任使者固不乏人而徇私濫

舉。及苟且塞責者。亦復不少。朕思薦舉人材。關係國家辨材論官之要道。舉得其人。則政事無不就理。舉非其人。則弊從此而生。孟子曰。立賢無方。孔子曰。舉爾所知。觀聖賢之言。則知得人之道。宜廣其途。以爲搜羅。而各舉所知。庶可以收克知灼見之益也。今特諭內外諸臣等。京官自翰林科道郎中以上。外官自知府道員學政以上。武官自副將以上。旗員自叅領以上。皆令各舉一人。滿洲官員。則保舉滿洲漢軍官員。則保舉漢軍漢人官員。則保舉漢人文職官員。許保武職。武職官員。許保文職。於滿漢文武內。或係見任職官。或係候補候選之人。或係進士舉人貢監生員。或係山林隱逸。務期有猷有爲。有守品行才具。足備國家之用者。各人密封奏摺。赴奏事人員處轉奏。外官則遣家人齎送密摺來京。付奏事人呈進。即或親戚子姪等。亦可據實薦奏。不必以嫌疑引避。但京官如尚書侍郎

外官如督撫提鎮兩司。皆係朕已經深知簡任者。不必入所薦之列。其奏摺內。只開列本人官銜姓名。註明所薦之人官銜考語。不必引頌聖繁文。此朕旁求俊乂之苦心。冀賢才輩出。師濟盈廷。俾百職得宜。庶務舉凡有保舉之責者。不得瞻顧私交。不得受人囑託。不得互相商議。不得輕聽風聞。夫十室之邑。必有忠信。凡人生平。豈無一人熟識深知者。況既列朝紳。受國家之爵祿。而朕又推心置腹。畀以舉賢薦能之美事。儻猶有懷藏私意。濫舉非人者。清夜捫心。尚可以爲人乎。且朕之觀人。往往洞見隱微。將來觀所舉之人。即可知舉人者。心術之公私。識見之明昧。亦不使諸臣得以行其私也。○諸王大臣等。審奏延信罪狀二十款。查延信向與阿其那。阿靈阿。拉錫。普奇等。結爲黨羽。與二阿哥爲敵。黨援之罪一。奉旨詢問年羹堯之處。並不據實揭報。爲之徇隱。具奏黨援之罪二。在西寧時

陽爲不附和允禩揜人耳目而陰與允禩交結黨援之罪三及復令其進藏時鑽營年羹堯代伊解釋保奏黨援之罪四延信原係阿其那阿靈阿蘇努等同黨奉旨交問伊身爲將軍貝勒明知其事反將無干之漢人路振揚舉出黨援之罪五遵奉阿其那傾心効順稱阿其那樸實稱阿靈阿爲人傑將伊女與阿爾松阿結親黨援之罪六捏造逆言告知年羹堯希脫黨謀黨援之罪七當

御前昂然伸足大不敬之罪一

皇上諭旨訓責坐聽不行跪聆大不敬之罪二

時屆

萬壽聖節不俟慶祝薦自起程回任大不敬之罪三在西安時不遵諭旨將地方要務並未奏聞一事大不敬之罪四假捏病狀扶杖行走及令伊署大將軍印務棄杖前往欺妄之罪一諭旨訓練士卒不行欽遵反懷怨望將士卒混行痛責擾亂國政之罪一奉旨詢問

應否進藏之處並不實心籌畫但云路有煙瘴希圖惑衆擾亂國政之罪二在將軍任內不親加訓練祇圖晏逸負恩之罪一妄行保題官兵一百九十餘人市恩邀結人心之罪一在甘州時值青海用兵亂行調動遠處兵丁幾致可危失誤兵機之罪一身爲將軍聞賊寇臨邊並不發兵迨新城子失陷之後始行發兵失誤軍機之罪二將掣到逆賊阿扯布坦溫布屬下蒙古七人並不究審竟行釋放失誤軍機之罪三進藏時將國帑十萬兩入己貪婪之罪一以上各罪案延信俱自認不諱請按律斬決以彰國法妻子發往右衛財產入官所屬佐領下人等交該旗辦理得旨延信從寬免死著與隆科多在一處監禁伊子不必革去宗室凡閒散宗室原有在王府佐領兼轄之例伊等著著入顯親王府佐領管轄驅使至伊屬下佐領人等原從顯親王家下分出仍著賞與顯親王家產不必入官

伊有種種貪贓虧缺銀兩著將伊家產交與旗下大臣等查明還項○戊子兵部遵旨議覆湖廣謬冲花苗恃險頑梗屢行劫殺爲害地方總督福敏調撥三路官兵悉行搜捕應加二級從之○己丑諭八旗大臣凡獲罪革職之人經朕復加錄用即無罪矣嗣後承襲官職之時照常將伊等之子開列著爲例○擢監察御史性桂爲大理寺卿○授故奉國將軍尼雅翰子佛照爲奉恩將軍○庚寅陞正白旗護軍叅領覺羅海蘭爲本旗蒙古副都統鑲白旗漢軍副都統郝宏勳爲鑲藍旗漢軍都統○調福建臺灣總兵官陳倫炯爲廣東高雷廉總兵官江西南贛總兵官王郡爲福建臺灣總兵官廣東高雷廉總兵官劉章爲江西南贛總兵官○倉場總督岳爾岱等參奏各省運弁鄒世權等七十八員到通違限應交部議處得旨糧船抵通若限期緊迫勢難依限全到運官俱被叅處似覺可憫

著九卿會同倉場侍郎定議寬限但不得有誤回空則於公私均便尋議江南浙江湖廣江西四省糧船過淮抵通原有六個月限期今不能依限過淮自難責以依限抵通若運官運弁監兌等員過淮違限既有處分抵通違限又有處分是一運而兩被叅罰矣嗣後四省糧船如過淮違限十日已經處分者將抵通違限免其處分從之○壬辰內閣等衙門遵旨議覆河南總督田文鏡條奏盜案各款○事主捏報強劫如以姦情人命鬪毆等事捏報盜案本身無罪者分別擬杖本身有應得之罪者從重治罪若憑空捏報者照律問遣甲長鄰佑扶同捏報者照事主減一等治罪應如所請但捏報既定嚴例或事主已經據報而有司抑勒諱盜改強爲竊者除將該地方官照例革職處分外該管各上司及督撫均應分別降調○呈報盜案責令州縣正印官會同營汛呈往事主家查勘情形訊



供填報如州縣官不親詣查驗捏作親驗者革職該管官照徇庇例議處應如所請。正印官公出不及查勘即令佐貳官申請鄰邑正印官代驗查地方佐貳捕官原以備地方之事若正印官公出應令佐貳捕官會同營汛星速代驗如查驗不實照正印官處分得旨盜案逾限不完即行叅處原爲官役弛縱而設若因限期迫促致有誣拏平民裁贓買贓教唆口供扳累無辜諸弊甚非清理盜案之道嗣後果有虛實情形未分盜賊未確限內不能完結承審官應如何詳報上司應如何報部展限之處著另議儻有將易結之盜案不行速結濫請展限該督撫漫爲咨部經部駁查者應將該督撫及該有司如何處分之處亦著詳議又議稱凡報盜案責令州縣正印官會同營汛星往事主家查勘情形所以防事主狡飾之端也夫事主之強悍者或以竊報強柔懦者或以強改竊固有狡飾之

情至於地方文武官員因畏疎防承緝處分恐嚇事主抑勒改供亦未可定如有此等不肖官吏應作何處分之處亦著詳議又議稱初報盜劫正印官公出應令佐貳捕官會同營汛速驗但佐貳捕官未可深信如遇失事而正印官公出佐貳捕官一面會同汛弁查驗先行緝捕一面申請鄰邑印官至事主家覆加查驗尤爲詳慎應如何定例之處俱著詳議具奏尋議嗣後盜案果有虛實情形未分盜賊未確限內不能完結者該管上司核明報部准其展限四個月儻承審官將易結之盜案濫請展限者革職該管官及督撫分別降罰至地方文武官員因畏疎防承緝處分抑勒事主改供者革職再地方失事印官公出應令佐貳捕官一面會同汛弁查緝一面申請鄰邑印官覆驗如鄰邑印官推諉附會者照徇庇例降調餘俱如前議行從之○癸巳諭八旗大臣旗員以習武爲要即文職

亦不可廢。若將弟兄子姪帶赴外任家口既多。如何能爲廉吏。而子弟但知倚仗勢力。無所不爲。擾害百姓最爲惡習。漢軍內不得人才。皆由於此也。年幼者隨任猶可。十八歲以上。理應留京。令其披甲。學習馬步弓箭。與國家出力。如可以習文者。送赴官學讀書。著將外省旗員帶族人赴任所之處。永行禁止。儻係親子十八歲以上。欲帶赴任所者。著具呈該旗大臣請旨。再旗人不應作外省驛丞典史等雜職。漢軍內壯丁多之佐領添編佐領。或在直隸綠旗營當兵俱著會同吏兵二部定議。尋議滿洲蒙古漢軍凡補授外任者。嗣後俱不准其將十八歲以上之子弟隨任。其見在帶往者。應撤回該旗。當差學習。至旗人補用外任文武雜職。亦應永行停止。漢軍閒散人丁。有情願入綠旗者。該旗咨部轉送直隸總督。造入民籍。准選爲綠旗兵行走。得旨。外省旗員見在隨任子弟。姑免調回。其文武

雜職等官俱著回旗。如有該督撫提鎮等保留者。准其留任。○以戶部左侍郎史貽直兼管吏部工部侍郎事。兵部左侍郎楊汝穀兼管吏部侍郎事。○旌表山東陽穀縣烈婦孟守才妻郭氏。拒姦不從。自縊殞命。給銀建坊入祠致祭如例。○甲午。準噶爾台吉噶爾丹策零遣使臣特磊來朝。頒敕諭一道。令使臣齎回。諭曰。據奏知爾父病故。不勝惋惜。爾父在時。將一切事務。未得裁處妥協。台吉知爾父負朕之恩。爲非遣使遠來。朕甚嘉之。方今西藏地方。噶隆阿爾布巴等與頗羅鼐等。彼此結讎。舉兵相拒。朕正在躊躇。爾奏稱欲在西域煎茶設供。廣行釋教。以安衆生。似屬非分。準噶爾乃西北隅一小部落耳。釋教之廣行與否。豈關爾之煎茶設供耶。朕即位元年。爾父奏稱寬宥伊罪。言詞恭順。朕以爲出於至誠。故欲清理疆界。乃命使二次。爾父反生嫌疑。不能遵奉朕旨。再羅卜藏丹津乃青海

和碩特扎什巴圖爾之子。伊骨肉中無故弄兵。互相殘害。朕差大臣前往。命各息兵。而羅卜藏丹津。乃敢悖我。

皇考聖祖養育之恩。負朕之德。侵犯內境。被守邊輕兵擊敗。遠行逃竄。爾父應即為擒獻。始見和好之誼。乃於本地隱匿窩留。是何意耶。由此觀之。從前所奏。無一誠實之處。可知矣。前者羅卜藏丹津。乃一愚戾不忠不孝之人。爾父年高。歷練力能。將伊酌量裁處。可以生之。亦可以制之。必不被伊愚弄。是以不曾勒追。今爾年少。與彼相等。以羅卜藏丹津之志氣。高傲不顧恩義。斷不肯屈於爾下。守分安居。必將離間爾等。於爾大有不便。爾務須將羅卜藏丹津送來。朕念伊父扎什巴圖爾。從前勞績。斷不將伊誅戮。仍施恩養。爾其祇遵朕命。爾台吉應將利害輕重。盡心籌畫。自立主見。特茲敕諭。○以翰林院編修汪由敦。署日講起居注官。○調正藍旗漢軍副都統

邁祿。為本旗滿洲副都統。陞正藍旗護軍參領魏臘。為本旗漢軍副都統。○禮部議覆。四川巡撫憲德疏言。東川府改隸雲南。所有寄籍東川入學生員。請照例改歸本籍應試。應如所請。從之。○上駟院鏤草夫六十一。解送錢糧。於回空車內。拾得遺失元寶一錠。不自隱匿。呈報本衙門。奏聞。得旨嘉獎。即以所拾銀賞給。○賑江南海州清河二州縣水災饑民。○丙申。解江南提督魏經國任。革太子少傅尚書銜。并世職。回京另用。○陞山東兗州總兵官栢之蕃。為江南提督。以鑲白旗漢軍副都統劉汝霖。為山東兗州總兵官。○陞雲南按察使張允隨。為雲南布政使。司布政使。貴州貴東道趙弘本。為雲南按察使。司按察使。使刑部郎中納海。為河南按察使。司按察使。○戊戌。諭兵部。聞湖南驛站棚廠。係各官捐備。未設有正項支銷。著照湖北之例。添設雲南四川浙江三省驛站。亦准其支銷正項。該

地方有司實力奉行俾得均霑實惠○諭刑部嗣後枷責之犯奉旨改為發遣者律不重科俱免其枷責之罪若有情罪可惡雖令發遣仍應枷責者臨時請旨○戶部議覆雲貴總督鄂爾泰疏言祿豐新興蒙化等一十二府州縣額徵糧米每屆四年折徵一次後經督撫題定永遠折徵查開化府接壤交趾鉛廠河添設汛防大理臨安二府有提鎮駐劄併省城重地兵米均宜多貯請將附近開化之蒙自寧州路南三州縣附近臨安之石屏州附近大理之蒙化府附近省城之新興宜良二州縣額米俱改徵本色以裕兵食如遇四年一折仍照例折徵應如所請以雍正六年為始從之○刑部等衙門議奏福建民林琯妻王氏與吳高通姦用毒藥謀死親夫吳高復將王氏謀娶王氏應凌遲處死吳高應斬監候得旨吳高情罪可惡著改為立斬餘依議嗣後有因姦謀死親夫復設計謀娶姦

婦為妻妾者俱改為立決著為例○都察院左都御史沈近思故遣平郡王福彭及散秩大臣往奠賜銀五百兩予祭葬謚端恪贈禮部尚書太子少傅廕一子入監讀書○己亥諭內閣吳淞石塘當日勘估時於海潮紆緩之處酌量修築土塘蓋因工程浩大節省錢糧起見但東南財賦之區灌溉田畝保聚室廬全賴海塘捍衛朕思海勢衝激風濤旋轉難定土塘經歷年久未免可虞不若一例改築石塘為百姓萬年之利著該撫確行勘估不得惜費省工苟且塞責務須堅固永垂久遠以副朕經理海疆愛養民命之至意○諭兵部向來雲貴川廣以及楚省各土司僻在邊隅肆為不法擾害地方剽掠行旅且彼此互相仇殺爭奪不休而於所轄苗蠻尤復任意殘害草菅民命罪惡多端不可悉數是以朕命各省督撫等悉心籌畫可否令其改土歸流各遵王化此朕念邊地窮民皆吾赤子

欲令永除困苦咸樂安全竝非以煙瘴荒陋之區尚有土地人民之可利因之開拓疆宇增益版圖而爲此舉也今幸承平日久國家聲教遠敷而任事大臣又能宣布朕意勦撫兼施所在土司俱已望風歸向竝未重煩兵力而願爲內屬者數省皆然自此土司所屬之夷民即我內地之編氓土司所轄之頭目即我內地之黎獻民胞物與一視同仁所當加意撫綏安輯使人人得所共登衽席而後可副朕懷也但地方遼濶文官武弁需員甚多其間未必盡屬賢良之輩且恐官弁等之意以爲土民昔在水火今既內附已脫從前之暴虐即畧有需索亦屬無傷此等意見則萬萬不可著該督撫提鎮等嚴切曉諭不妨至再至三且須時時留心訪察稍覺其人不宜苗疆之任即時調換竝嚴禁兵丁胥役生事滋擾務俾政事清明地方寧謐安居樂業共享昇平儻有不遵朕旨絲毫苛索於土民

地方者著該上司立即叅劾重治其罪即係平日保舉之人亦不可爲之容隱果能據實糾叅朕必宥其失察之愆嘉其公忠之誼該督撫提鎮等可共體朕心各盡懷保邊民之道○考察天下軍政卓異官四十九員貪官三員不謹官二十一員年老官七十五員有疾官三十三員才力不及官五十一員浮躁官八員罷軟官三十員分別陞賞處分如例○兵部議覆福建總督高其倬浙江巡撫李衛疏言浙江提督統轄全省水陸非若閩省分設水陸二提督者可比請照提臣石雲倬所題將提標之中營守備右營遊擊二缺改設水師并選熟練水性千總二員把總四員輪班出洋督察應如所請從之○庚子調吏部右侍郎圖理琛爲兵部右侍郎以正紅旗漢軍副都統舒楞額爲吏部右侍郎仍兼理副都統事○辛丑戶部等衙門遵旨議覆直省各官有應徵錢糧未清題請留任者勒限

一年完項。准其開復。如限滿不完。即行革任。再限一年。同新任接徵之員。嚴催完報。限滿又不完。即將該員照未完分數治罪。并將督催及接徵各員議處。從之。○戶部議覆。署兩江總督范時繹疏言。丁隨糧辦。最爲均平良法。請以雍正六年爲始。將江蘇安徽各州縣應徵丁銀。均攤入地畝內徵收。應如所請。從之。○又議覆廣東總督孔毓珣疏言。廣東廉州府欽州西北地名三不要。與廣西之上思州。安南國之河口接壤。既不屬欽州。上思州管轄亦不屬安南。地界故名三不要。查此地與廣東龍門協相近。請歸併欽州。以便就近撫綏。而該地有三村。曰白雞。曰白鴿。曰白灘。又有土名曰北崙。最爲險要。請於龍門協派撥千把兵丁設汛防守。巡遊彈壓。俱應如所請。從之。○署兩江總督范時繹疏言。江南太倉州鎮洋縣境內劉河鉅工。已蒙發帑開濬。而七浦一河。原係民田。該地士民情願自行

開濬。業戶給資佃戶出工。不敢再費帑金。候旨遵行。得旨。君民原屬一體。民間之生計。即國計也。儻遇國用不敷之時。勢不得不資藉於民力。今國用充足。朕爲地方籌畫。萬年之利。不惜多費帑金。興修鉅工。養育萬姓。若仍用民力以辦公事。非朕本心也。況小民効力工程。或致荒其本業。而又不免官吏之督催煩擾。朕心實爲不忍。著仍動公帑辦理。並將朕旨通行曉諭該州縣士民。伊等當體朕愛養元元之心。於工程告成之後。加意照看。歲歲疏濬。防護俾地方永受其益。則勝於目前之趨事赴功多矣。○擢理藩院郎中納延泰爲理藩院額外侍郎。○賑江南懷寧等十四縣水災饑民。○免直隸雄縣等四縣本年分水災額賦有差。○壬寅陞禮部左侍郎唐執玉爲都察院左都御史。轉吏部右侍郎。嵇曾筠爲左侍郎。仍留河東副總河任。調禮部右侍郎劉師恕爲吏部右侍郎。仍署直隸總督。

陞都察院左副都御史錢以壇爲禮部右侍郎○鑲黃旗漢軍副都統李淑德緣事革職陞正白旗護軍叅領常保爲鑲黃旗漢軍副都統一等侍衛輝邦爲鑲白旗漢軍副都統福建陸路提督丁士傑緣事革職調浙江提督石雲倬爲福建陸路提督○護甘肅巡撫鍾保題臨洮衛土司指揮使趙煜故請以其姪趙延基承襲下部知之○癸卯諭大學士九卿等人臣朋黨之弊最足以害人心亂國政唐虞之世共工驩兜輩比周爲黨舜必寘之於法孔子曰君子矜而不爭羣而不黨易經渙之六四曰渙其羣元吉朱子謂上承九五下無應與爲能散其朋黨之象則大善而吉是朋黨之小人固自古帝王之所必誅聖賢之所垂戒其爲世道人心計誠深且切也蓋人臣之道惟在公忠體國古之純臣公爾忘私國爾忘家精白乃心鞠躬盡瘁念念惟知有君父事事惟知有朝廷雖一己之身

家且不暇顧又何至有營私結黨朋比爲姦之事惟姦惡之小人其心既陰險狡詐忍於背逆君父擾亂國政而其才又足以籠絡要結使姦邪之輩盡入其黨遂成牢不可破之勢當日蘇努阿靈阿鄂倫岱等同惡相濟結爲邪黨凡屬在朝臣工其庸懦無能者則棄置之而於聰明才智之人或動之以利或怵之以害或震懾之以權勢或誘惑之以美名使其人不得不墮其術中彼此固結日肆邪謀自以爲國家大事皆在其掌握操縱之中以此煽惑人心擾亂國政若非我皇考至聖至明乾綱獨斷則伊等比黨之害可勝言哉朕在藩邸時知之甚悉故臨御以來將伊等朋黨爲姦之處屢次宣示中外蓋深爲世道人心宗社國家之計不得不痛加懲創嚴加誡諭惟冀大小臣工以伊等爲炯戒共絕背公植黨之私時懷公忠體國之念則一德一心上下

交而其志同其於世道人心

宗社國家豈不深有利益哉○甲辰以戶部左

侍郎史貽直兼管順天府府尹事○莊親王

等奏言查八旗內有繼養另戶旗人之子請

撥回本旗歸宗繼養民人之子請撥出爲民

繼養僕人之子分檔僕人之子內有情願仍

歸本主及本主亦情願容留者准其容留情

願爲民者請俱撥出爲民得旨繼養子嗣人

等原非內府之人除將旗人歸併各該旗外

其民人之子及僕人之子俱著爲民從前當

過官差者各賞銀十兩其撥出爲民之後隨

分安生母得妄干法紀○乙巳諭議政王大

臣等巴賽在軍前年滿原欲換回今王丹津

多爾濟奏稱將軍巴賽常色禮辦理一切事

務管轄兵丁整飭妥協等語見有羅卜臧舒

努事件軍前甚屬緊要巴賽著再留三年著

博爾屯查克旦率領更換兵丁前往協助巴

賽辦事自京城派副都統諾穆柱速赴軍營

同常色禮將兵領回○江蘇巡撫陳時夏奏

報松江府華亭縣地方於十一月二十四日

天降甘露樹枝茅屋之上大如晶珠自辰至

已凝結不散父老歡慶奇祥合行奏聞得旨

頻年以來屢蒙

上蒼垂賜休徵朕意但以封疆大臣得人代朕

宣化爲真瑞似此嘉穀甘露景星慶雲河清

海晏之祥朕實不敢以感召自居亦不敢以

祥瑞誇詡於天下後世也爾等當仰體朕意

期共勉之慎之○陝西西安按察使兼管河

東鹽政碩色奏報十月初三日起至十一月

十一日止池鹽獻瑞不需人力自然滋生多

至七百萬餘觔悉皆顆粒盤簇味甘如飴迥

異常鹽下部知之○丙午

孝莊文皇后忌辰遣官祭

昭西陵 順天府進春○光祿寺卿呂謙恒以

老病乞休允之 擢福建延建邵道王璣爲

光祿寺卿○陞江南蘇松總兵官陳天培爲



浙江提督調湖廣永州總兵官楊國相爲江南蘇松總兵官陞直隸永平副將岳奇爲湖廣永州總兵官○戊申諭工部向來漢軍得補河員凡經手一切工程修築既不完固防守復多疎虞上下通同侵欺浮冒虛糜國帑甚至冀幸隄工之衝決以遂其侵那開銷之私計種種弊端朕所洞悉今總河齊蘇勒悉心釐剔一應工程整頓料理俱有成效凡屬河員亟宜洗心滌慮痛改前非各自奮勉蓋河工關係運道民生河官之責任較之他員實爲重大務須悉知利害殫心竭力若塗飾耳目苟且塞責經該督題叅定加重處斷不能寬也著將此旨徧諭河員互相儆戒以副朕厪念運道民生之至意○庚戌歲暮裕祭

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵○遣官祭太歲之神○廣東巡撫楊文乾奏言閩省係邊海重地風俗不甚醇樸新補各官多係初任不能諳練請將曾經出仕熟練民事者命往數員交與督撫於緊要縣缺補用得旨閩省地方緊要數年以來屢次揀選人員命往無如該督撫因循寬縱漫無覺察以致吏治廢弛必得賢能練達之員始能整頓風而除陋習除川陝雲貴廣西外著各省督撫於所屬知縣內每省揀選一人務擇其謹慎老成才猷敏練在任年久者一面具奏一面調赴閩省交與該督撫酌量補用○辛亥賜朝正外藩科爾沁教漢阿霸垓烏朱穆秦喀喇沁巴林翁牛特喀爾喀素曼土默

特高齊忒鄂爾多斯四子部落厄魯特青海厄魯特蘇尼特輝特阿霸哈納吳喇忒郭爾羅斯毛明安扎魯特阿祿科爾沁杜爾伯特王貝勒貝子公額駙台吉塔布囊等及內大臣大學士侍衛等宴○旌表八旗節婦滿洲卓倫妻那拉氏等一百十八人蒙古張索柱妻顧氏等七人漢軍楊善世妻劉氏等二十四人直隸各省節婦吳以焯妻沈氏等四百七十一人貞女吳氏等十二人孝子王九芸等二十三人孝婦唐美烜妻藍氏一人各給銀建坊如例○是歲人丁戶口二千五百六十五萬六千一百十八又永不加賦滋生人丁八十五萬二千八百七十七田地山蕩畦地八百六十三萬六千二百九十一頃四十六畝有奇徵銀二千九百八十一萬五千二十一兩有奇米豆麥五百三萬一千一百七十石有奇草五百八十四萬七千三百一十八束茶三十一萬八千四百七十五引行鹽

五百一十一萬九千四百八十六引徵課銀三百八十六萬四千七十八兩鑄錢七萬二千三百五十二萬八千有奇

大清世宗敬天昌運建中表正文武英明寬仁信毅大孝至誠憲皇帝實錄卷之六十四

大清世宗敬天昌運建中表正文武英明寬仁  
信毅大孝至誠憲皇帝實錄卷之六十五

監修總裁官光祿大夫經筵講官太僕寺卿臣保和殿大學士兼兵部尚書總理兵部事務臣等伯加十五級臣等開泰

總纂官光祿大夫經筵日講官起居注太僕寺卿臣保和殿大學士兼兵部尚書臣等伯加十五級臣等開泰

事三等伯加十三級臣等起居注太僕寺卿臣保和殿大學士兼兵部尚書臣等伯加十五級臣等開泰

翰林院掌院學士加二級臣等起居注太僕寺卿臣保和殿大學士兼兵部尚書臣等伯加十五級臣等開泰

經筵講官經筵大學士臣等起居注太僕寺卿臣保和殿大學士兼兵部尚書臣等伯加十五級臣等開泰

敕修

雍正六年戊申春正月壬子朔

上詣

堂子行禮回宮拜

神畢御殿王以下文武各官外藩王及使臣等

上表朝賀停止筵宴○朝鮮國王李昞遣陪

臣李樞等表賀冬至元旦

萬壽節及進歲貢禮物宴賚如例○癸丑諭內

閣從前將江南河兵一千名撥往河南教習

椿埽原議回日裁汰但此兵丁既熟悉椿埽

尚可留用今詢河道總督齊蘇勒南河仍有

需用之處此一千兵丁不必裁汰著仍留營

差用河工差遣武弁之處甚多每營止有守

備一員管轄亦屬不敷且缺少武職大員著

添設叅將一員遊擊二員守備十員令叅將

統轄遊擊分管名為河營○甲寅浙江杭州

左翼漢軍副都統雅斯哈緣事降調陞陝西

肅州總兵官楊長泰為浙江杭州左翼漢軍

副都統調浙江杭州右翼漢軍副都統匡名

世為鑲白旗漢軍副都統陞廣東廣州叅領

陳世璠為浙江杭州右翼漢軍副都統山東

兗州總兵官劉汝霖為江南京口左翼副都

統調江南蘇松總兵官楊國相為山東兗州

總兵官福建金門總兵官林秀為江南蘇松

總兵官河南河北總兵官紀成斌為陝西肅

州總兵官陞浙江湖州副將冉起鳳為福建

金門總兵官江南徐州副將閃文繡為河南

河北總兵官○以內閣侍讀學士西柱為江

南河道副總河○以正白旗滿洲副都統戴

豪署本旗漢軍都統○丁巳賜朝正外藩王貝勒貝子公額駙台吉塔布囊等宴於豐澤園○封青海厄魯特扎薩克台吉羅卜藏察罕爲輔國公○戊午

世祖章皇帝忌辰遣官祭

孝陵○己未浙閩總督高其倬摺奏同安縣大姓李姓陳姓蘇姓莊姓柯姓合爲包姓小姓各雜姓合爲齊姓彼此聚衆格鬪互相殺傷隨經差委員弁將大姓爲首之李邦小姓爲

首之葉祖傳等擒獲審究以懲愚悍之習奉上諭此等處須要鼓舞屬實心盡力方能有濟設遇一二有爲者甫欲整理稍加振作緣耳目不明讒謗易入拘以文法不原其情輒目之爲多事喜功屬員窺見隱微人人惟思潔身自全而已誰肯任怨冒愆勇往向前汝等督撫操通省權衡意指所向好惡愛憎閭閻匪淺若肯強勉如此力行一二年後見有成效始信朕言之不誣也一人之精力有限

如不能合衆力以爲用諸務殊難就理惟宜廣視聽勤訪察再加以委用得人則何事不克辦集耶○辛酉祈穀於

上帝

上親詣行禮○壬戌以散秩大臣閔保總理三陵事務○調雲南巡撫朱綱爲福建巡撫福建巡撫常賚爲雲南巡撫○癸亥孟春享太廟

上親詣行禮○遣官祭太歲之神○甲子

上幸圓明園○諭內閣君臣上下之間必至誠相接始不愧堂廉一體之誼朕待內外大小臣工推心置腹事事至誠而爲臣者尚忍以僞妄欺詐之意待朕其罪誠不可逭宜兆熊乃旗下平常無能之人因其尚忠厚謹慎荷蒙

聖祖仁皇帝深恩用至福建將軍伊在任並未出力報効及朕即位以來伊亦不過尋常供職前因直隸總督員缺一時不得其人故令

伊署理印務畀以畿輔節制之重任教導訓誨至再至三然則朕之恩尚可負乎劉師恕向來過誤多端近年屢經彰著朕見其人尚謹慎小心且年力精壯深有悔過遷善之念是以降旨寬宥格外加恩令其協辦直隸總督事務以觀後效然則朕之恩尚可負乎張迺係年羹堯案內獲罪之人且又虧欠錢糧法難寬貸朕念伊祖張玉書在

聖祖仁皇帝時効力多年而伊之過犯大約由

於年羹堯之挾制不能自主於是赦其過愆復其官爵諄切訓諭冀其成人伊亦感激愧悔奏稱情願竭力報効朕是以用爲直隸布政使然則朕之恩尚可負乎魏定國由知州擢用知府又經福敏法海保薦是以用爲直隸按察使且因伊服官効力朕推恩及於其父逾格優待然則朕之恩尚可負乎大名府知府曾達聖前者被參虧空朕料其歷任多年必有作獎貪贓之款令該督藩臬等曉諭

該地方若果有被屈受害之人准其據實控告審理以懲貪墨昨聞有老秀才呈告曾達聖居官劣款而張迺將此秀才嚴刑斃命詐稱在監病故且坐以平素積惡之名不思辯寃既奉諭旨誣告自有國法即此秀才果有應得之罪亦當審實奏聞按律置之於法方足以服衆心豈有訟獄未定曾達聖之案未結而將首告之人遽以三木畢其性命之理此必有意袒護曾達聖惟恐控告者多先殺

一人以箝衆口似此慘酷之行世所罕見宜兆熊劉師恕身爲總督若罔聞知負朕任用之恩甘蹈徇隱之咎尚得謂之事君以誠無欺無隱者乎魏定國專司一省刑名乃任張迺之恣意妄行全不置問及朕面加詰責則將顛倒是非草菅人命數案全推於張迺而置身於事外若然則直隸之設立臬司衙門者何爲朕之簡用魏定國者又何取乎朕以至誠待諸臣而諸臣以欺詐待朕若不嚴加

懲治此風何由而息張迺魏定國俱著解任  
著福敏史貽直前往保定將曾逢聖各案及  
夾斃秀才情由一一秉公嚴審務將實情悉  
行究出不得絲毫徇隱○解山西布政使高  
成齡任調江南江蘇布政使張坦麟爲山東  
布政使司布政使山東布政使岳濬爲山西  
布政使司布政使陞江南江蘇糧道趙向奎  
爲江南江蘇布政使司布政使兩淮鹽運使  
張璩爲直隸按察使司按察使○乙丑以上  
元節賜外藩科爾沁教漢阿霸垓烏朱穆秦  
喀喇沁巴林翁牛特蘇尼特郭爾羅斯喀爾  
喀奈曼土默特阿霸哈納厄魯特青海厄魯  
特圖爾古特輝特吳喇忒扎魯特和託輝特  
王貝勒貝子公額駙台吉塔布囊等及內大  
臣大學士侍衛等宴○晉封故惠郡王博翁  
果諾孫貝勒球琳爲多羅惠郡王鎮國公弘  
春爲固山貝子○丙寅上元節賜外藩王貝  
勒貝子公額駙台吉塔布囊等及內大臣大

學士侍衛等宴○丁卯以國子監祭酒孫嘉  
淦署順天府府尹○授宗室揚德女爲鄉君  
塔格扎多爾積秩四品○辛未命察罕叟爾  
軍營前鋒統領穆克登回京○癸酉諭內閣  
朕於雍正二年即聞直隸滄州地方有偷鑄  
私錢之匪類因飭令總督李維鈞嚴行查拏  
伊回奏已經嚴查並無私鑄今步軍統領阿  
齊圖奏稱番役因公前往滄州拏獲私鑄之  
劉七等夥黨多人並獲私鑄器皿觀此則滄  
州姦民私鑄之弊由來已久而地方大吏漫  
無覺察今始敗露夫私鑄錢文大干法紀且  
私錢不息則錢法不能畫一而銷燬制錢等  
弊皆由此而生何以便民間之用幾輔近地  
尚有此等姦民則各省遠方安保必無此弊  
著通行申飭倘直省督撫中有似此疎縱者  
一經察出必照溺職例處分○甲戌添設江  
南蘇松屬吳淞天妃七浦三閘閘官各一員  
白茆徐六涇二閘閘官各一員從河道總督

齊蘇勒請也○乙亥陞詹事府詹事留保爲  
通政使司通政使仍兼詹事府詹事○戶部  
等衙門議覆四川巡撫憲德條奏安插入川  
人戶事宜一入川人戶衆多姦良不一飭令  
該管官逐戶挨查取結編入保甲有遊手生  
事者即行驅逐其實係匪類現有過犯者解  
回原籍知情隱匿暨官員失察者竝加處分  
一雍正四年秋冬以後入川人戶請將戶口  
姓名人數開明移查各原籍細加核實分別  
內有本省已犯事故者即行逐回其留川之  
人實係貧民無可資生者酌撥地畝竝借給  
牛種口糧所用銀兩移咨本籍各府州縣照  
數賠補或有移家落業依託親故謀生者如  
資本無多不能經運仍酌量給與地畝令其  
自行開墾不必給與牛種口糧一入川人戶  
有情願回籍者不必給與口糧將姓名人數  
咨明本籍川省仍造冊存案倘日後復來川  
省即行懲治一川省無著地畝現在清查丈

勘俟清丈完日分別科則編列字號計留川  
人戶之數按畝均分認墾如有佔越爭競者  
槩行驅逐一稽查安插之事分派各該道員  
經理其保寧一府舊無道員請歸併川東道  
辦理現在奉撥庫銀十萬兩即分給各該道  
員收領令確查應給人戶按數給發造冊查  
核如有扣剋侵冒等弊嚴加叅究一開墾荒  
地之道府州縣果能實力奉行辦理妥協者  
事竣照例議敘雜佐等官勤慎稱職者亦照  
州縣一體議敘倘有怠玩虛冒即行糾叅均  
應如所請從之○丙子轉禮部右侍郎錢以  
壇爲左侍郎陞甘肅巡撫石文焯爲禮部右  
侍郎○正白旗護軍統領海枯年老休致陞  
正藍旗漢軍副都統魏臘爲正白旗護軍統  
領○鑲黃旗蒙古副都統常保以老病乞休  
允之○戊寅諭內閣凡律例之設乃詳情察  
理揆度至當而後定者也審擬罪案之時應  
引某條則引之斷無輕重任意或介在兩可

之理常見外省本章及法司議覆疏內往往有先引一例復云不便照此治罪更引重罪以坐之此乃臣下巧於營私之陋習或欲以嚴刻之名歸之於上或冀法外之恩巧於開脫均非明允之道從前已經降旨禁止而去冬刑部本內猶有蹈此者夫治獄之道貴得其平而司刑之官在乎執法今以一罪而引兩律則是法無一定而獄不得其平矣豈朕明刑弼教之至意乎嗣後再有兩引條例者外省督撫提鎮本章著通政司駁回將情由叅奏三法司本章著內閣駁回將情由叅奏若所犯之罪當引輕律而故意坐以重罪亦難逃朕之洞鑒內外執法臣工各宜凜遵毋忽○陞江西布政使王承烈為都察院左副都御史浙江杭嘉湖道徐鼎為江西布政使司布政使督理蘇州織造高斌為廣東布政使司布政使福建臺灣道吳昌祚為山東按察使司按察使○大學士兼管翰林院掌院

事張廷玉疏言謹查內閣部院奉旨事件俱交起居注衙門登記檔案惟八旗具奏奉旨事件向例不交起居注臣等無從記載請自雍正五年為始凡八旗具奏奉旨及揀選人員補授官職之處俱照閣部送館以便載入記注從之○己卯以刑部右侍郎張保吏部右侍郎兼正紅旗漢軍副都統舒楞額俱兼管都察院左都御史事兵部右侍郎胡煦協理副都御史事○山西右衛左翼副都統明亮緣事革職調鑲藍旗滿洲副都統阿三為山西右衛左翼副都統○先是雍正三年四月原任雲貴總督高其倬查奏安南國疆界有內地舊境一百二十里應加清理於賭咒河立界安南國王具奏陳請上命雲貴總督鄂爾泰復行清查給還八十里於鉛廠山下小河以內四十里立界安南國王復激切陳訴五年五月初四日上頒敕諭一道諭安南國王朕令內外地方官



清理疆界據原任雲貴總督高其倬遵旨詳  
考誌書知開化府與安南國渭川州之界當  
在開化府逢春里賭咒河是以於斜路村等  
處設立防汛以肅邊境比因該國王具奏前  
來情詞懇切朕以懷遠爲心免從所請諭令  
該督撤回防汛人員別議立界此朕委曲保  
全之特恩也嗣據新任總督鄂爾泰奏稱查  
得鉛廠山下地方山川形勢中外截然且誌  
書可憑糧冊可據塘汛舊基可查居民服飾  
可驗實係內地應於此立界誠爲仁至義盡  
等語朕允其所奏頒諭該國王遵奉施行料  
王祇承之下定當鼓舞懽欣戴朕錫土寧人  
之德踴躍拜命乃該國王仍復具奏辯訴是  
王以執迷之心蓄無厭之望忘先世恭順之  
悃忱負朕懷柔之渥澤也高其倬鄂爾泰皆  
公平鎮靜之臣非喜事邀功之輩祇以官守  
所在不敢徇私情朕統御寰區凡茲臣服  
之邦莫非吾土何必較論此區區四十里之

地但分疆定界政所當先侯甸要荒事同一  
體目今遠藩蒙古奉朕諭旨莫不欽承恐後  
豈該國素稱禮義之鄉獨違越於德化之外  
哉王不必以從前侵占內地爲嫌中心疑懼  
必欲拳拳申辯此乃前人之誤非王之過也  
王惟祇遵朕諭朕不深求其既往仍加惠於  
將來倘意或遲回有失從前恭順之義則朕  
亦無從施懷遠之仁矣朕怙冒遠方至誠至  
切用是諄諄曉諭思之思之復於九月二十  
六日命副都御史杭奕祿內閣學士任蘭枝  
往安南國宣諭杭奕祿等尚未至安南安南  
國王接領五月初四日敕諭感恩悔過至是  
雲貴總督鄂爾泰以其陳謝表文奏呈表文  
曰安南國王臣黎維禔謹奏十二月初二日  
臣接領敕諭焚香披閱喜懼交并竊臣國渭  
川州與雲南開化府接壤原以賭咒河爲界  
即馬伯汛下之小河臣國邊目世遵守土臣  
罔知侵占內地爲何等事且未奉詔書是以

備因陳奏旋奉敕諭令撤回斜路村等處人員別議立界之地仰蒙慈照欣幸無涯今復奉敕諭定於鉛廠山小河立界諭臣勿恃優待之恩懷無厭之望自干國典臣咫尺天威彌深木谷目今鉛廠山經廣南知府先已設關門築房屋立界碑臣國邊目土目遵臣嚴飭帖然無言臣竭誠累世向化

聖朝蒙

聖祖仁皇帝柔懷六十餘年今恭逢

皇帝陛下新膺景命如日方升且薄海敷天莫非臣土此四十里地臣何敢介意有所缺望也茲荷綸音曉諭誠切臣感戴

聖恩欣躍歡忭惟願萬方拱命

聖壽無疆

聖朝千萬年太平臣國千萬年奉貢謹奏得旨覽王奏感恩悔過詞意虔恭朕特沛殊恩將雲南督臣等查出之地四十里賞賜該國王尋頒敕諭齎送雲南即令杭奕祿任蘭枝前

往安南宣讀

聖諭敕諭曰朕前令守土各官清立疆界原屬行之於內地未令清查及於安南也督臣高其倬以職任封疆詳考誌書兼訪輿論知開化府與安南分界之處當在逢春里之賭咒河於是一面設立防汎一面奏聞比因該國王陳奏朕特降諭旨令該督另議立界又恐高其倬固執已見復命接任總督鄂爾泰秉公辦理鄂爾泰體朕懷遠之心定界於鉛廠山下小河一面設立防汎一面奏聞較之舊界已縮減八十里誠爲仁至義盡此皆地方大臣經理邊疆職分所當爲者也朕統馭寰區凡屬臣服之邦皆隸版籍安南既列藩封尺地莫非吾土何必較論此區區四十里之壤若該國王以至情懇求朕亦何難開恩賜與祇以該督臣兩次定界之時該國王激切奏請過於缺望種種陳訴甚爲不恭該國王既失事上之道朕亦無從施惠下之恩此天

地之常經上下之定體乃王之自取非朕初心也頃鄂爾泰將該國王上年十二月內本章呈奏知該國王深感朝廷怙冒之仁自悔從前執迷之誤踴躍拜命詞意虔恭朕覽閱之餘甚爲嘉悅在王既知盡禮在朕便可加恩況此四十里之地在雲南爲朕之內地在安南仍爲朕之外藩一毫無所分別著將此地仍賞賜該國王世守之竝遣大臣等前至該國宣諭朕衷朕念已加惠藩王亦當俯從民便倘此地居住民人有情願遷入內地者已令督臣鄂爾泰酌量料理并諭該國王知之○吏部議覆原任兵部尚書何天培條奏向來奉差審事官員例無關防遇有本章俱借用地方督撫提鎮等官印信其一切行提人犯調取卷宗概用空白文移殊非慎重之意嗣後請鑄造關防十顆存貯禮部遇有審事官員隨時給發事竣仍繳部收貯應如所請從之○庚辰諭值班侍衛及守衛護軍等

滿洲舊制最重學習清語近見挑選之侍衛護軍等棄其應習之清語反以漢語互相戲謔甚屬不合且滿洲人等俱係

太祖

太宗

世祖

聖祖皇考之所留遺者當日耆舊大臣務以造就後進爲心每將習學滿洲本務努力上進之語時時教導今兵丁值班之處彼此戲謔殊非善習嗣後各宜勉勵屏除習氣以清語拉弓及相搏等技專心習學此爾等進身之階國家亦收得人之效矣○辛巳諭雲貴總督鄂爾泰覽安南國王陳謝本章感恩悔過踴躍拜命情詞甚屬恭順該王既知盡禮朕亦便可加恩著將此四十里之地仍舊賞賜該國王特頒敕諭一道仍令杭奕祿任蘭枝齎往彼國宣諭朕意但思朕既加恩外藩亦當俯從民便此四十里內所居人民若有情

願遷移內地居住者可加意資助安插目今滇省現有開墾地土之事即令伊等受田耕種務使得所其情願仍居外地屬安南管轄者亦聽其意○戶部議覆河東巡鹽御史碩色疏言河東鹽池爲山陝河南三省食鹽所關其防水之池牆渠堰均屬緊要查舊例於額引羨餘之內每年動撥銀五千兩歲修渠堰而池牆一帶若不每歲補修恐致大修之年倍多費用請於添設餘引羨餘銀內每歲再動撥六千兩以三千兩作歲修池牆之用以三千兩存貯運庫積至五年以作大修之費則池牆渠堰俱可永保完固此等工程運同不能獨力兼營請於附近州縣揀選幹員凡遇修築之時委用五六員協助監修庶事有專責而工無怠誤均應如所請從之○移江西貴溪縣縣丞駐江甯山從江西巡撫布蘭泰請也

大清世宗敬天昌運建中表正文武英明寬仁信毅大孝至誠憲皇帝實錄卷之六十五

大清世宗敬天昌運建中表正文武英明寬仁  
信毅大孝至誠憲皇帝實錄卷之六十六

監修總裁官光祿大夫經筵講官大學士兼禮部尚書總理事務加十五級臣劉世明

總裁官光祿大夫經筵講官大學士兼禮部尚書總理事務加十五級臣劉世明

事三等伯加十五級臣張廷玉光祿大夫經筵講官大學士兼禮部尚書總理事務加十五級臣劉世明

翰林院掌院學士加二級臣福敏光祿大夫經筵講官大學士兼禮部尚書總理事務加十五級臣劉世明

經筵講官議政大臣協辦內閣大學士事務禮部尚書仍兼管太常寺鴻臚寺事務臣三泰等奉

敕修

雍正六年戊申二月壬午朔琉球國中山王

貢表

尚敬遣使表貢方物宴賚如例○兵部議覆

川陝總督岳鍾琪條奏川省苗疆善後事宜

一建昌土司惟河東河西宣慰司寧番安撫

司三處地方最廣而河東半近涼山半近內

地請仍授安承爵之女安鳳英為長官司約

束涼山一帶其附近內地者俱改隸流官管

轄至河西寧番逼近內地悉改歸流其阿都

宣撫司阿史安撫司及紐結至溪等土千百

戶共五十六處一併改流近衛者歸衛管轄

近營者歸營管轄並擇番苗之老成殷實者

立為鄉約保長令其約束一建昌舊設通判

應行裁去改置一府設知府一員經歷一員

裁建昌衛及左中前三所禮州守禦所改置

一縣其寧番鹽井二衛俱行裁去改置二縣

各設知縣一員典史一員會川衛改併會理

州移會川營千總帶兵一百名分防州屬之

會理苦竹者保三寨以上一州三縣俱隸新

設之府管轄一建昌為邊疆重地請於越嶲

貢表

所屬之柏香坪添設守備千總把總各一員

駐兵三百名冕山貼近乾縣添設遊擊一員

中軍守備一員千總二員把總四員駐兵五

百名移冕山營中軍守備駐寧番衛城添兵

二百五十名寧越營原設守備應改為都司

添設千總一員兵一百五十名鹽井衛添設

遊擊一員千總二員把總一員兵二百五十

名其原設守備改為中軍守備帶把總一員

兵一百名移駐河西會川所屬之披砂添設

遊擊一員。中軍守備一員。千總二員。把總四員。兵五百名。再撥建昌鎮標中營守備一員。帶兵八十名。移駐建昌東之木托。撥建昌鎮標右營遊擊一員。千總一員。帶兵二百五十名。移駐建昌西北之熱水。各與該地方之原設弁兵協同防守。一苗民頑蠢性成。地方文武官員如有勒索科派等弊。應計贓治罪。上司失察亦一併究擬。一各衛所漢苗雜處田土交錯。多有欺隱。致相訐告。地方官應於農隙之時。履畝親勘。務俾各守己業。永杜爭端。一苗獠等類。每爲漢人奴婢。應令地方官查明。概行發還。如果有身價酌量追給贖回。違者治罪。一漢番交界之處。每月立定場期三次。彼此公平交易。該管官選差兵役稽查。不許漢民用強短價。及兵役借端稍勒。其或私入夷穴交易。別有勾結情弊。從重治罪。地方官失察者。一併議處。一苗民既知向化。即與齊民無異。令該管流官一體編入保甲。互相

稽查。一禁止漢民誘騙蠻人什物。僅被控告訊實。照例追贓治罪外。如有允蠻無故將漢民綁擄。以及被漢民誘騙。不告官司。肆行綁擄者。將惡蠻從重治罪。一苗蠻散處邊方。每有此處土司所轄。而居住彼處者。遇有事故。每多隱漏。應令該管官編造戶冊。分清住址。僅有事犯。即於該地方追究。一苗獠舊俗。多以利刃隨身。口角細故。逞兇殘殺。今既改土歸流。應飭地方官轉飭該管頭目人等。嚴行查禁。不許帶刀出入。并不許私藏烏鎗違禁等物。一苗民散處山箐。易於逃遁。如遇地方失事。汛官帶兵巡捕。地方官差役嚴拏。併移會鄰汛協力窮追務獲。如有徇庇疎縱。及牽累良苗者。將該管官弁分別議處。均應如所請從之。尋定建昌新設府曰寧遠。建昌新設縣曰西昌。寧番新設縣曰冕寧。鹽井新設縣曰鹽源。○甲申。

上回宮○諭禮部朝鮮年貢之例。每年貢米百

石。朕念該國路程遙遠。運送匪易。著減去稻米三十石。江米三十石。每年止貢江米四十石。足供祭祀之用。永著爲例。○喀爾喀扎薩克多羅郡王多爾濟喇布坦。老病乞休。以其子敏珠爾多爾濟襲替。○乙酉。戶部議覆。四川巡撫憲德疏言。越舊衛官馬廠等處。番民五百二十五戶。願入版圖。認納蕎糧一百四十一石。以充賦稅。應如所請。令其每年照數輸納。越舊衛所就近撥充營汛兵餉。從之。○

丙戌。諭宗人府。果郡王爲人直樸謹慎。品行卓然。朕即位以來。命王辦理理藩院。及三旗事務。數年。矢志忠誠。毫不顧及己私。執持正理。概不瞻徇。贊襄朕躬。允稱篤敬。王微有弱疾。雖偶爾在家調養。而一切交辦事件。仍然盡心料理。今承我

聖祖皇考六十餘年。至聖至神。化洽宇宙之恩。普天共享昇平。固無庸似昔年諸王効力於行間。朕以爲若能盡心爲國。備極忠誠。恪守

臣子恭順之道。其人爲尤勝其事爲尤難。著將王晉封親王。爲朕之子弟及世世子孫之表範。○諭內閣。據廣東總督孔毓珣奏。稱龍門協副將景慧。奉該管總兵官調取考驗。渡海遭風漂沒。又該協右營把總謝廷彥。輪值冬季遊巡。帶領兵丁泛海。亦被風漂沒等語。聞之深爲憫惻。查康熙五十二年內。福建臺灣廣東碣石。有海洋遭風傷損官兵之事。蒙聖祖仁皇帝特頒諭旨。令地方大吏。加以恩卹。

竝令嗣後通行。但向來未曾分別官兵詳著爲例。恐地方官奉行不力。或至日久廢弛。亦未可定。朕思海洋危險之地。凡官兵兵丁。若因公事差委。遭風受困者。當照軍功加恩。儻有不幸。至於身故者。當照陣亡之例優卹。再漕運船隻。在大江黃河危險之處。遭風漂沒者。亦係因公。情實可憫。又如黃河下埽之人。辦理工程。不惜身命。均當比照軍前之例。定以恩卹之條。著九卿分別詳細定議具奏。尋

議嗣後沿海省分。因公差委之官弁兵丁。與領運弁丁。黃河下埽之人。凡於海洋大江。黃河。遭風沒水。幸獲生全者。照軍功保守在事有功之例加恩。其或漂沒身故者。官員不論職銜大小。俱照軍功陣亡例。以現在職任。分別贈卹。外委官員。及馬步兵丁。旗丁等。亦照軍功陣亡例。分別給與祭葬銀兩。其無親屬者。該督撫給銀。委官致祭。再濱海島嶼。并內江運河。如有奉文差委官弁兵丁工役人等。遭險受困。及漂沒者。令該地方官確查分晰具題。照例予卹。至奉調考驗之官弁兵丁。其予卹之處。照軍功例各減一等。頭舵水手人等。被淹身故者。照軍功二等例。從之。○丁亥。諭內閣。朕惟風雨時若。百物繁昌。皆由誠敬感格。

天心用能。福佑下民。時和歲稔。而司天號令。長養阜成。風神之貺。厥功允懋。頻年以來。朕虔祀龍神。福庇蒼生。歷有明驗。因思古稱雨暘

燠寒。以風爲本。亦宜特隆祀典。以答洪庥。考之周禮。大宗伯以禋燎祀風師。虞書禋於六宗。劉歆鄭康成之說。咸謂六宗之內。風其一也。歷代各置壇兆。至宋祥符間。曾立風伯廟。近代及本朝。俱列

南郊四配之中。典禮具備。今欲於都城和會之地。特建廟宇。因時禱祀。以展朕爲民祈福之誠。其考據禮儀。相度營建之處。著禮工二部會同內務府。詳議具奏。尋議。謹按風師爲箕星。經傳考據。歷有明文。箕星係蒼龍之第七宿。位在東北。致祭方向。自宜就其星位。謹擇都城東北官房一所。建立廟宇。規模倣時應宮式樣。俟廟成之日。行令欽天監擇吉供奉。從之。○江西巡撫布蘭泰疏報南昌等十九縣開墾雍正四年分田地一百七十頃有奇。下部知之。○戊子。祭

大社

大稷



上親詣行禮○己丑授輔國公伊爾登女爲鄉  
君壻雅隆阿秩四品○裁江西豐城縣江潁  
司巡檢缺歸併柿源司巡檢管理從江西巡  
撫布蘭泰請也○湖北巡撫馬會伯疏報光  
化縣開墾雍正四年分田地五十頃有奇四  
川巡撫憲德疏報綿州德陽等十四州縣開  
墾雍正四年分田地四十五頃有奇俱下部  
知之○庚寅直隸總督宜兆熊疏報通州文  
安等四州縣開墾雍正五年分田地五十頃

有奇河南總督田文鏡疏報鄧州鄆陵等九  
州縣開墾雍正四年分田地八百三十頃有  
奇俱下部知之○免直隸薊州高陽等九州  
縣雍正五年分水災額賦有差○議敘勦撫  
苗疆功給貴州提督楊天縱拖沙喇哈番○  
辛卯春分朝

日於東郊  
上親詣行禮○諭議政王大臣等丁壽常色禮  
巴泰俱奏請仍留察罕叟爾軍營効力丁壽

著留軍營巴泰常色禮俱著來京○調江西  
布政使徐鼎爲直隸布政使司布政使陞湖  
南按察使李蘭爲江西布政使司布政使湖  
北武昌道趙弘恩爲湖南按察使司按察使  
○壬辰

孝康章皇后忌辰遣官祭

孝陵○禮部議覆福建巡撫常賚疏言暹羅國  
王誠心嚮化遣該國夷商運載米石貨物直  
達廈門請聽其在厦發賣照例徵稅委員監  
督嗣後暹羅運米商船來至福建廣東浙江  
者請照此一體遵行應如所請得旨依議米  
穀不必上稅著爲例○山東巡撫塞楞額疏  
報鄒縣等六縣開墾雍正四年分田地三十  
四頃有奇下部知之○免直隸保定縣雍正  
五年分水災額賦有差○癸巳

上御經筵講畢賜大學士九卿詹事及講官等  
宴○兵部議覆雲貴總督鄂爾泰疏言烏蒙  
鎮雄地方遼濶且烏蒙緊接東川鎮雄兼接

威寧謹酌定營制。烏蒙設立一鎮。以總兵一員統轄。率領遊擊一員。守備一員。千總二員。把總四員。兵一千三百名。駐劄烏蒙。分設遊擊一員。千總一員。把總二員。兵三百名。駐劄大關。遊擊一員。千總一員。把總二員。兵三百名。駐劄涼山。守備一員。把總二員。兵二百名。駐劄米貼。守備一員。把總一員。兵二百名。駐劄魯甸。千總一員。兵一百名。駐劄鹽井渡。千總一員。兵一百名。駐劄灘頭。把總一員。兵一百名。駐劄牛皮寨。其鎮雄添設參將一員。率領守備一員。千總一員。把總一員。兵六百名。駐劄鎮雄。千總一員。兵一百二十名。駐劄夷良。把總一員。兵一百二十名。駐劄威信。把總一員。兵八十名。駐劄叻西。改貴州威寧鎮爲一營。裁去總兵一缺。遊擊三缺。守備二缺。千總四缺。把總八缺。及兵五百名。添設參將一員。留守備一員。千總二員。把總四員。兵一千名。又裁去督

標左右援勦兩協副將二缺。遊擊二缺。守備二缺。千總四缺。把總八缺。及兵三千一百名。改援勦協原轄之尋甸羅平二汛歸雲南曲尋鎮統轄。仍留右協兵六百名。增入曲尋鎮。其威寧及援勦兩協所裁兵三千六百名。即以補充烏蒙鎮雄新設兵數。再雲南永北鎮兵四百名。撥歸維西營分汛防守。所有貴州之威寧雲南之鎮雄東川三營。總歸烏蒙鎮管轄。俱受雲南貴州提督節制。其威寧原轄之畢赤營。歸大定協管轄。均應如所請。從之。

○山西巡撫覺羅石麟疏報大同等府開墾雍正四年分田地三十四頃有奇。湖南巡撫王國棟疏報岳州等府開墾雍正四年分田地一百三頃有奇。署廣西巡撫阿克敦疏報桂林等府開墾雍正四年分田地六十六頃有奇。俱下部知之。○甲午。遣官祭歷代帝王。○遣官祭關聖帝君。○以兵部右侍郎胡煦教習庶吉

士○調雲南曲尋總兵官劉起元爲雲南烏蒙總兵官。貴州威寧總兵官孫士魁爲雲南曲尋總兵官。○管理旗務王大臣等遵旨議覆八旗滿洲蒙古漢軍請按旗分撥給官房設立米局二十四處各領戶部銀五千兩。委官二員領催四名辦理。每旗各派參領一員稽查。通州於近倉之處分左右二翼按給內務府官房設立米局二處各領戶部銀八千兩。委官四員領催八名辦理。每翼揆旗各承查一年。仍令該都統等不時查察。此外違禁買賣者嚴行禁止。從之。○戶部議覆福建總督高其倬條奏閩省鹽政事宜。一謹產地之收曬。閩省鹽場福清一場最大。其各團所產之鹽零散難稽。請建設總倉。令各團曬丁將所曬之鹽統歸一處封鎖。則稽查自易。且免雨濕水淹之患。莆田一場各團涵窟並無遮蔽。應設法修砌以資防護。至潯美。浯州。涪州。惠安。漳浦。南場。金坑。漳南。詔安等場俱各委

員整頓。期有實效。○嚴銷地之售賣。閩鹽向係商行。後改爲官賣。近復用水客肩販。請暫令水客分認行銷。而以官運接濟。俟行之三年。有辦理無誤者。報部命爲商人再請發引。以立成法。至存積鹽斤。照例於場鹽多產之時。官動課銀就場收積。以備接濟。一。定鹽課之額數。閩省鹽課有額徵公費二項。共徵銀一十七萬有奇。嗣後俱作正額。其額外溢行之鹽。所獲銀兩。造爲盈餘報查。除支給鹽道暨各場官役公用外。餘俱造入盈餘冊奏銷。所有解部水脚。即於長價等項內撥給。一。酌辦理之人員。閩省舊設辦理鹽務各官。雍正二年悉行裁去。嗣後請於通省佐雜官內遴選廉幹之員。管理鈐束。仍不時遣員巡查。均應如所請。從之。○工部議覆兩江總督范時繹疏言。淮揚下河七邑。惟興化地勢最窪。分流東注。有梓辛等五河。河身最淺。應行疏濬。其場河自泰屬富安場至鹽屬五佑場。及王

家港牛灣等處亟宜深挑。又泰州城北鮑家壩之運鹽河向無隄防。應築土隄一道。其劉莊之青龍橋應改爲石閘。鹽城之石礮口。天妃口。廖家港草堰口。如臯之苴洋。黃沙洋。各宜增建石閘。董家溝。徐家涵等處應設涵洞。以資宣洩。應如所請。從之。○又議覆河東副總河嵇曾筠疏言。儀封縣黃河北岸水勢衝急。將雷家寺上首之灘崖刷成支河一道。每當水勢泛漲。搶救不遑。臣查舊有廢隄。應請加幫高厚。接築土壩一道。將支河跨斷。不使掣溜侵隄。再南岸青龍崗迤下。水勢縈紆。將上灣洶作深兜。與下灣相對。請乘勢開挖。引河一道。導水東行。則大河之水既暢。支河之勢自緩矣。應如所請。從之。○旌表山東武定州烈婦劉小來妻許氏。拒姦不污。被刃殞命。河南南陽縣烈女張天章聘妻白氏。父逼改嫁。自縊完貞。各給銀建坊。入祠致祭。如例。○乙未旌表故明河南夏邑縣義民張瑾率衆

捍寇。就義捐軀。給銀建坊。入祠致祭。如例。○丙申諭直省督撫布政使等。任土作貢。天地之常經。守法奉公。生民之恒性。斷無有食地之利。而不願輸納。正供以甘。蹈罪戾者。何以錢糧虧空。拖欠之弊。積習相沿。難於整理。如此。一則胥吏中飽之患未除也。或由包攬入己。或由洗改串票。或將投匱之銀。釣封竊取。或將應比之戶。匿名免追。種種弊端。不可枚舉。其故皆由於錢糧完欠細數。官未嘗顯示於民。在官則以爲民欠。在民則以爲已完。故吏胥得以作姦。而官民並受蒙蔽。應飭州縣官。每年令各鄉各里書手。將所管欠戶各名下。已完錢糧若干。尚欠若干。逐一開明。呈送州縣官。查對無差。即用印出示。各貼本里。使欠糧之民。家喻戶曉。如有中飽等弊。許執串票具控。則吏胥不得肆其姦盜矣。再則不肖有司。借端侵漁。那新掩舊之弊。不可不察也。朕因各省舊欠甚多。恐民力難於輸納。格外

開恩。准其分年帶徵其應徵之數。有在十年以上者。亦有寬至十年以外者。酌其多寡。分別遠近。此朕愛養黎元之至意。期於民欠易完。而民力可紓也。乃聞有不肖州縣官。另立私冊。於每年應徵分數之外。溢額多收。及至報解之時。止照分數起解。該管上司。因其已經照數起解。不復再行稽查。而此多徵之數。遂得任其侵那。又成虧空之項。且民間見已經完納者。徒供官吏之侵漁。亦遂怠其急公之念。而抗延拖欠之事。由此而起。朕意分年帶徵之項。亦應將花戶名下。每年應完若干之處。詳細開明。出榜曉示。令其按數完納。以上二條。乃據朕所聞書示。其作何因地制宜。與斟酌立法之處。總在地方大臣詳察弊端。權衡損益。督率有司。實心經理。果有忠誠廉幹之人。自無不可清釐之事。信乎治賦在乎得人。除弊方能立政。任地方之重寄者。其慎思之。○陞一等侍衛賽音察克烏。

景陵總管○丁酉祭

先師孔子

上親詣行禮

御製仲丁詣祭

文廟詩一章。勒石立碑國學。並頒發各省府州縣學宮。○直隸天津總兵官趙國瑛緣事革職。陞直隸張家口副將岳超龍。爲直隸天津總兵官。○戊戌。吏部等衙門議覆。雲貴總督鄂爾泰疏。稱烏蒙鎮雄。既經改土歸流。併歸滇省管轄。謹查烏蒙鎮雄地方。接壤千有餘里。而烏蒙地勢尤廣。請仍設爲府治。其扼要之地。一爲天砥。去舊治七里。軒廠寬平。可建城垣。請設知府一員。教授一員。經歷一員。司獄一員。知事一員。一爲天關壘。去府城寫遠。設通判一員。駐劄。又米貼地方。去府治西北三百里。控馭險要。設知縣一員。教諭一員。典史一員。又魯甸鹽井渡地方。各設巡檢一員。駐劄。至於鎮雄較烏蒙稍隘。請改爲州治。稍

移而南建立城垣設知州一員學正一員吏目一員其夷良地方設州同一員駐劄威信地方設州判一員駐劄母享地方設巡檢一員駐劄俱歸烏蒙府管轄至府州縣文武童生請暫照小學例各取進十名均應如所請從之尋定烏蒙曰烏蒙府附郭縣曰永善縣鎮雄曰鎮雄州旌表河南中弁縣烈婦張舜妻白氏夫亡服闋祭畢自經鹿邑縣烈女孫芳聘妻殷氏澠池縣烈女高金甲聘妻張氏俱未婚夫殞矢志投繯各給銀建坊入祠致祭如例 己亥

上親耕藉田詣

先農壇致祭畢更服至耕所仍行四推禮畢上御觀耕臺命莊親王允祿怡親王允祥裕親王廣祿行五推禮吏部尚書公夸岱戶部尚書常壽禮部侍郎三泰兵部尚書查弼納刑部尚書勵廷儀工部尚書黃國材都察院左副都御史舒楞額通政使司通政使留保大理

寺卿性桂行九推禮各以次耕如儀

上御齋宮順天府官員率耆老農夫行禮畢至耕藉所農夫終畝王以下各官行慶賀禮賜茶停止筵宴○庚子諭內閣外省州縣官員引見時有留京以部屬試用者因觀其才具似屬平常而一時不能遽定是以令其在部辦事以試看之若此等之人用爲部屬即照常例陞轉恐平常之員與部中辦事之能員無所分別非當日留京試看之本意凡奉旨交部試用之員俱俟該堂官委用試驗具奏保舉後方准照例陞轉將此傳諭各部知之○命署江南江寧將軍拉錫來京以上駟苑總管來文爲江南江寧將軍○戶部議覆兩江總督范時繹疏言江屬蘆洲坍漲不常丈勘之年以漲補坍致彼此混淆收納錢糧官民不便請嗣後將兩江蘆洲田地遵員清丈分劃疆界一切錢糧案件酌歸附近州縣管理應如所請從之○辛丑

上詣

恩佑寺行禮畢。幸圓明園。○以貴州巡撫何世璠爲刑部額外侍郎。○湖北巡撫馬會伯疏報均州漢川二州縣開墾雍正四年分田地一十二項有奇。下部知之。○免直隸肅寧縣。雍正五年分水災額賦有差。○壬寅。諭禮部。考試冒籍之弊。向來習以爲常。理當清查禁約。況今滇黔楚粵等省。苗民嚮化。新增土司入學額數。爲學臣者尤宜加意禁飭。毋使不肖士子冒其籍貫。阻土民讀書上進之路。再者朕念各省學臣用度不敷。特令各該地方給與養廉。俾伊等盤費從容。得以盡心考校。杜絕私情。但聞向來陋規。學臣有餽送督撫之項。若外存養廉之名。而暗中仍有餽送之實。則考試必至不能肅清。深負朕加恩學臣之意矣。目前雖無此事。因恐將來日久弊生。故論及之。○諭兵部。永順土司彭肇槐。恪慎小心。恭順素著。兼能撫輯土民。遵守法度。甚

屬可嘉。據湖廣督撫等奏稱彭肇槐情願改土爲流。使土人同沾王化。朕本不欲從其所請。又據辰沅靖道王柔面奏。彭肇槐實願改土爲流。情詞懇切。朕念該土司既具嚮化誠心。不忍拒却。特沛殊恩。以示優眷。彭肇槐著授爲叅將。即於新設流官地方補用。並賜以拖沙喇哈番之職。世襲罔替。再賞銀一萬兩。聽其在江西祖籍地方立產安插。俾其子孫永遠得所。○以內大臣佛倫協理內務府總管事務。○旌表烈婦江南句容縣王善性妻潘氏。吳縣羅佐廷妻錢氏。吳江縣陳起瀛妻沈氏。龐雲衢妻費氏。青浦縣張文輝妻顏氏。江陰縣沈翼妻倪氏。沛縣王王衡妻祁氏。歙縣方駿業妻吳氏。績溪縣胡光祖妻吳氏。江西新建縣鄒朝英妻王氏。新昌縣劉守發妻吳氏。永新縣樊紹聖妻賀氏。龍泉縣張元鈿妻彭氏。俱夫亡矢志。從容殉節。烈女。江南上元縣沈邦彥聘妻王氏。江西都昌縣余英涵

聘妻彭氏俱未婚夫殞守義捐軀各給銀建坊入祠致祭如例○甲辰諭內閣上年聞湖廣廣東江西等省之民因本地歉收米貴相率而遷移四川者不下數萬人已令四川督撫設法安插毋使失所但思上年江西收成頗好即湖廣廣東亦非歉歲不過近水之地畧被淹損何至居民輕去其鄉者如此之衆也因時時留心體察今據各省陸續奏聞大約因川省曠土本寬米多價賤而無知之民平日既懷趨利之見又有傳說者謂川省之米三錢可買一石又有一種包攬棍徒極言川省易於度日一去入籍便可富饒愚民被其煽惑不獨貧者墮其術中即有業者亦鬻產以圖富足獨不思川省食物價賤之故蓋因地廣人稀食用者少是以如此若遠近之人雲集一省則食之者衆求如從前之賤價豈可得乎況彼此相隔或至千里或數千里小民離棄鄉井扶老挈幼跋涉山川安有餘

資以供路費中途困阨求救無門不相率而爲匪類勢必爲溝中之瘠矣豈非輕舉妄動自貽伊戚乎草野識見庸愚必須訓示方能醒悟爲地方官者當撫綏之於平日而勸教之於臨時開其愚蒙卹其窮困時勤訓導使百姓知故土之可戀轉徙之非宜則愚民之不醒悟者亦少矣且各省皆有可墾之田土而所以任其廢棄者其故有二一則民俗好爲爭競當其未墾之時則置之不問及至既墾之後則羣起相爭是以將可耕之壤拋爲曠土甚爲可惜一則墾田必須工本而寒苦之民不能措辦以致委諸草莽爲有司者誠能經其疆界以息爭端助其籽種以資耕作寬其陞科之年優其上農之賞則百姓斷無有不踴躍鼓舞趨事赴工者矣朕宵旰勤勞無刻不以百姓生計爲念茲頒諭旨並非禁百姓之謀食於他方也祇以愚民無知圖利心切惑於邪說見異而遷遂輕舍故鄉甘受



流離之苦。朕心實爲不忍。夫在彼在此。皆吾赤子。若本籍果逢歉歲。難以資生。該地方有司仰體朕心。即時奏聞。朕必沛以恩膏。使之得所。何必分散他方。以冀不可必得之利。著各督撫曉諭官民等知之。○陞正藍旗護軍叅領宗室滿珠錫禮爲鑲黃旗蒙古副都統。正白旗叅領李國權爲正藍旗漢軍副都統。○命副都統職銜勒什布回京。以內大臣克什圖總管阿爾泰一路軍臺事務。○乙巳。授輔國公裕壽女爲鄉君。塔明福秩四品。○免直隸豐潤博野二縣雍正五年分水災額賦有差。○丙午。清明節。遣官祭。

永陵。

福陵。

昭陵。

昭西陵。

孝陵。

孝東陵。

景陵。

上詣

恩佑寺行禮。○工部議覆山東巡撫塞楞額疏言。東省柳長河在東平汶上二州縣間。日漸淤淺。近地居民屢遭水患。查此河雖一帶相連。而中有金線嶺分隔。勢難開鑿。今酌開引河二道。一從嶺北注安山入湖。一從嶺南出閘口濟運。應如所請。從之。○四川巡撫憲德疏言。叅革按察使程如絲奉旨正法。於部文未到之前五六日。自縊身死。顯係提塘先期漏洩。應將各省提塘通行裁革。得旨。提塘管理京報。設立久矣。豈能禁革不用。但伊等借郵傳之名。作姦滋弊。習以爲常。如奉旨正法之人。可以預通信息。亦可將奉旨寬宥之人。先期設詞嚇詐。此等弊端。不可不加防範。應如何定例。俾緊要事件。不致先期漏洩。或以官員承充提塘。分別賞罰。定其考成。著九卿確議。尋議提塘之設。難以裁革。向來多係微

末職銜。自無愛惜功名之念。且從未將作姦提塘。及保送不實之各官。定有處分。是以種種弊端。無所顧忌。請行令各督撫於本省武進士。及候補候選守備人員內揀選。取具該地方官印結。申送咨部頂補。三年無過。准照本班即用。怠惰貽誤者。即行斥革。如將應密事件預通信息。及設詞恐嚇詐騙。一經發覺。即交刑部治罪。其出結之該地方官。及督撫失察者。分別議處。從之。○丁未。

孝昭仁皇后忌辰。遣官祭。

景陵。○調江南江蘇按察使覺羅白清爲浙江按察使。司按察使浙江按察使董永茂爲江南江蘇按察使。司按察使。○添設湖南湘潭縣城外巡檢一員。從湖南巡撫王國棟請也。○庚戌。諭內閣。吏戶兵刑工五部堂官。今皆各殫厥職。贊襄政治。共相黽勉。矢勤矢慎。端方自持。剔除情弊。杜絕請托。甚屬可嘉。朕深許之。夫大臣果能廉潔自守。其用度必稍不

敷。朕因國家政事。資藉大臣之力。而使之分心家計。朕心不忍。五部大臣內。除差往外省署事之人。外俸銀俸米。著加倍給與。其署理之大臣。亦照此賞給。若遇罰俸案件。將朕分外所給之俸。不必入議。○兵部尚書何天培。緣事降調。陞吏部左侍郎嵇曾筠。爲兵部尚書。仍辦理河工事務。以刑部額外侍郎何世璠。爲戶部右侍郎。仍專管刑部事務。○兵部右侍郎圖理琛。緣事革職。調禮部左侍郎三泰。爲兵部右侍郎。仍兼管禮部太常寺事務。盛京工部侍郎通智。爲禮部左侍郎。○以鑲藍旗護軍統領伯馬蘭泰。兼管鑲藍旗滿洲副都統事務。○免直隸青靜海二縣雍正五年分水災額賦有差。○旌表浙江遂安縣烈婦毛鳴讓妻余氏。夫亡絕粒。矢志完貞。陝西張掖縣烈女孫兆麟。聘妻韓氏。未婚夫亡。聞訃自縊。各給銀建坊。入祠致祭。如例。

大清世宗敬天昌運建中表正文武英明寬仁  
信毅大孝至誠憲皇帝實錄卷之六十六

大清世宗敬天昌運建中表正文武英明寬仁  
信毅大孝至誠憲皇帝實錄卷之六十七

監修官欽定大清世宗憲皇帝實錄卷之六十七

總纂官欽定大清世宗憲皇帝實錄卷之六十七

纂修官欽定大清世宗憲皇帝實錄卷之六十七

纂修官欽定大清世宗憲皇帝實錄卷之六十七

纂修官欽定大清世宗憲皇帝實錄卷之六十七

敕修

雍正六年戊申三月辛亥朔免直隸東安縣

雍正五年分水灾額賦有差○壬子諭內閣

覽福建巡撫常賚奏稱羅源縣孝子李盛山

割肝救其母病傷重身故請加旌表部議以

割肝乃小民輕生愚孝向無旌表之例應不

准行朕思我

世祖章皇帝

聖祖仁皇帝臨御萬方立教明倫與人為善而

於此例慎予旌表者誠天地好生之盛心聖

人覺世之至道視人命為至重不可以愚昧

而誤戕念孝道爲至宏不可以毀傷爲正理  
立法垂訓實有深意但向來地方有司未嘗  
以聖賢經常之道與國家愛養之心明白曉  
諭開導編氓是以愚夫愚婦救親而捐軀殉  
夫而殞命者往往有之既有其事若不予以  
旌表恐無以彰其苦志而慰其幽魂所以數  
十年來雖定不予旌表之例而仍許其奏聞  
且有邀恩於常格之外者仰見

聖祖仁皇帝哀矜下民之

聖心固如是之周詳而委曲也孝經曰身體髮  
膚受之父母不敢毀傷孝之始也孟子曰事  
孰爲大事親爲大守孰爲大守身爲大此皆  
言人子一身乃父母之遺體雖一髮一指不  
可偶有虧損以傷父母之所貽也孔子曰父  
母惟其疾之憂蓋父母愛子之心無所不至  
偶有疾病尚以爲憂設有不肖忤逆之子父  
母且怒而矜之若純孝之子則父母之憐愛  
又當何如也若以己身患病之故致其子割

肝肉以充飲饌和湯藥縱其子無恙父母之  
心斷無不驚憂慘惕不安之理況因此而至  
於傷生又豈父母所忍聞者乎夫父母有疾  
固人子所當盡心竭力之時而孝道多端實  
不容効命捐軀於一節孔子曰生事之以禮  
死葬之以禮祭之以禮是人生孺慕之誠原  
通百年而無間者也人子一身承先啓後負  
荷甚鉅若舍生殞命於倉猝之間而忘宗祀  
繼續之重非所以爲孝也況人子於親本乎  
天性儻能盡至誠純孝之實則親病雖篤呼  
籲請禱力省一身之過誓願爲一正人如此  
必能感天地動鬼神何須割肝剝股以爲回  
生之良劑乎家庭之行惟在至誠至敬善體  
親心不必以驚世駭俗之爲著奇於日用倫  
常之外也至若婦人從一之義醮而不改乃  
天下之正道而其間節婦烈婦亦有不同者  
烈婦以死殉夫慷慨相從於地下固爲人所  
難能然烈婦難而節婦尤難蓋從死者取決

於一時而守貞者必歷夫永久從死者致命而遂已守貞者備嘗夫艱難且烈婦之殉節捐軀其間情事亦有不同者或迫於貧窶而寡自全之計或出於憤激而不暇爲日後之思不知夫亡之後婦職之當盡者更多上有翁姑則當奉養以代爲子之道下有後嗣則當教育以代爲父之道他如修治蘋蘩經理家業其事難以悉數安得以一死畢其責乎是以節婦之旌表載在典章而烈婦不在定例之內者誠以烈婦捐生與割肝剗股之愚孝其事相類假若倣倣者多則戕生者衆爲上者之所不忍也向來未曾通行曉諭朕今特頒諭旨著地方有司廣爲宣布務期僻壤荒村家喻戶曉俾愚民咸知孝子節婦自有常經而保全生命實爲正理則倫常之地皆合中庸不負國家教養於全之德矣儻訓諭之後仍有不愛軀命蹈於危亡者朕亦不概加旌表以成閭閻激烈之風長愚民輕生之

習也湖廣總督邁柱疏言各屬隄塍歷係業戶按糧派夫運土逐年歲修今各業戶感戴鴻恩情願照上年水痕加高修築其支河淤塞之處業戶亦照歲修之例自行挑濬得旨修築江隄疏濬河道該地方既有歲修之定例今百姓踴躍從事加工修濬甚屬可嘉用沛特恩助其力作查康熙五十五年湖北湖南地方興修隄岸河道工程蒙

聖祖仁皇帝特恩賞助米糧人工之費共計銀六萬兩今朕遵照此例將帑銀賞賜六萬兩令邁柱於湖北湖南二省酌量工程多寡分派散給並飭地方有司實心料理使小民均沾實惠工程永遠堅固以副朕愛養楚民之至意○免直隸邯鄲縣雍正五年分水灾額賦有差○癸丑諭戶部君民上下之間休戚相同本屬一體論語曰百姓足君孰與不足是民間之生計即國計也自古人君無不恤民之灾濟民之困者而至於歛歲蠲免之數

往往多寡不同者則時勢羸絀爲之出於不得已也如明洪武時凡水旱地方稅糧即與蠲免成化時凡被災之地以十分爲率減免三分弘治時全荒者免七分九分者免六分以是遞減至被荒四分免一分而止我朝順治初年凡被荒之地或全免或免半或免十分之三以被災之輕重定額數之多寡順治十年議定被災八九十分者免十分之三五六七分者免十分之二四分者免十分之一康熙十七年議定歉收地方除五分以下不成災外六分者免十分之一七八分者免十分之二九分十分者免十分之三此例現在遵行凡此多寡不同之數或旋減而旋增皆因其時勢爲之亦非先後互異意爲增損也數十年來雖定三分之例然

聖祖仁皇帝深仁厚澤愛養斯民或因偶有水旱而全蠲本地之租亦且竝無荒歉而輸免天下之賦浩蕩之恩不可勝舉而特未曾更

改舊例者蓋恐國家經費或有不敷故仍存成法而加恩於常格之外耳朕即位以來命怡親王等管理戶部事務清查虧項剔除弊端悉心經理數年之中庫帑漸見充裕以是觀之治賦若得其人則經費無不敷之事用沛特恩將蠲免之例加增分數以惠烝黎其被災十分者著免七分九分者著免六分八分者著免四分七分者著免二分六分者著免一分將此通行各省知之朕視萬民實爲一體洞瘝念切懷保情殷因思自古無不愛民恤下之人君亦斷無不急公親上之黎庶祇以時勢所值各有不同今就目前國用計之可以加惠吾民使霑渥澤是以斟酌分數定爲規條儻將來國用益饒更可加增於此數之外假若經費或有不足凡爾百姓自然踴躍輸將則此例又可變通必不因朝廷格外之恩而遂忘奉公之本念也如此則君民一心上與下各盡其道太和洋溢感格

上蒼將見灾沴全消雨暘時若豐亨有慶早滂  
無聞豈不美歟竝令各省督撫轉飭有司徧  
諭鄉村衆庶咸使聞知○諭禮部光祿寺  
陵寢祭祀銀器等項向從光祿寺臨期運送此  
器皿關係祭祀大典路遠運送往返恐不潔  
淨且或致有損傷殊非誠敬奉祀之意況每  
逢祭祀運送未免徒費跋涉其作何辦理之  
處著查議具奏尋議上

陵寢四時大祭所用器皿俱全惟每年十一月

十三日

聖祖仁皇帝忌辰照週年例致祭所用器皿由  
光祿寺齋送再每歲清明歲暮嬪以下竝榮  
親王園寢上墳所用器皿亦由光祿寺齋送  
請嗣後每年

聖祖仁皇帝忌辰致祭所用金器即用

景陵四時大祭備用之金器其餘一切器皿貯  
存光祿寺者照數送往內有白銅盤碟二項  
由內務府取用亦令照數送往至每次致祭

用銀茶桶三十八隻應令製造全備交管理  
陵寢事務大臣嚴飭內閣防竝禮部郎中等敬  
謹收貯如有遺失損傷題參治罪從之○甲  
寅禮部遵旨議覆已故鰲拜既賞還一等公  
應照例給與全葬并致祭一次從之○乙卯  
湖廣總督邁柱疏言原任武陵縣知縣馬騰  
衢任內虧空銀兩應於原任巡撫趙申喬名  
下追賠完項得旨爲督撫者或操守不謹平  
時勒索屬員或沽譽邀名徇情寬縱以示恩

惠有此二者屬員虧空當令其分賠如趙申  
喬當日居官操守清廉又復實心任事毫不  
瞻徇情面實大臣中之罕見者今伊屬員虧  
空若照例令伊賠補是清正任事之大臣與  
貪鄙庸碌者同一處分而子孫皆不免拖累  
殊非激濁揚清之道此項銀兩不必於趙申  
喬名下著追償趙申喬名下再有似此應賠  
之項俱照此例免其賠補著該部將此通行  
各直省知之○丁巳調鑲紅旗蒙古副都統

侯五格爲鑲藍旗滿洲副都統陞一等侍衛  
南岱爲鑲紅旗蒙古副都統（文華殿大學  
士兼吏部尚書田從典以老病乞休溫旨褒  
嘉加太子太師賜帑銀五千兩允其致仕）  
戊午命戶部尚書蔣廷錫爲文淵閣大學士  
兼理戶部尚書事陞署兩江總督鑲白旗漢  
軍都統范時繹爲戶部尚書仍留總督任（  
陞雲南元江副將張應宗爲雲南楚姚總兵  
官）己未吏部以新補無錫縣知縣江日容

崑山縣知縣朱紘帶領引見

上諭曰縣令乃親民之官最爲緊要得其人則  
一縣之事無有不理不得其人則一縣之事  
必多廢弛蓋以縣令於百里之內民事可以  
周知若果實心辦理則古人所謂無一夫不  
獲其所者乃力所能爲非空文也向來州縣  
往往以民風之樸魯者謂爲馴良而可愚以  
民風之秀穎者謂爲巧詐而難御如無錫崑  
山自來皆苦煩劇殊不知地方所以難治者

皆由縣令未能實心辦理之故耳若果實心  
實政惠澤及民則秀穎之俗其易治尤甚於  
樸魯如無錫崑山地方人多稟山川之秀氣  
讀書明理者多人心之公道易於感動非如  
愚樸之人賢否不能一時立辨也縣令果毫  
無欺僞其效即旋至而立應有何煩劇難治  
之理乎凡天下小民總不可欺視之雖若頗  
蒙而有司所行之政毫不能掩其耳目但可  
以正感而不可以術馭至於州縣徵收錢糧  
人人皆知寓撫字於催科然皆逐末不知其  
本夫正供之項小民無不樂輸緣不肖有司  
每於額外浮派以求贏餘或朘民脂膏希圖  
肥己或上司勒索借爲逢迎以致吏胥乘間  
中飽百弊叢生小民不勝苦累遂有姦猾之  
徒得持官府之短長抗糧包攬任意拖欠醇  
良者亦輸納不前矣若州縣潔己愛民毫無  
浮派則民間正供乃義當完納之項何憚而  
不早完乎惟當於肯完正供者實意撫恤於



實在抗欠之頑戶嚴其催比毫不瞻顧此乃  
寓撫字於催科之道也即如爲政之道不外  
寬猛兩端傳云寬以濟猛猛以濟寬者非謂  
行數端寬縱之事隨濟以數端之猛行數端  
猛烈之事隨濟以數端之寬也惟在斟酌於  
情理之中宜寬而寬寬而不失於慢宜猛而  
猛猛而不失於殘寬猛咸得其宜乃爲相濟  
之道未有遇事之先橫寬猛之念於胸中之  
理也此皆庸迂者錯會古人之意耳向來地  
方官多有欲借鄉紳之游揚則交結鄉紳而  
欺陵百姓或欲百姓之稱譽則袒庇百姓而  
摧折鄉紳不知百姓爲國家之赤子豈可徇  
巨室之私交而肆其陵虐至於鄉紳或祖父  
爲國家宣勞或己身爲國家効力又豈可使  
簪纓之族轉賤於編氓而故爲摧抑乎是鄉  
紳百姓皆不可存成見以待之惟當準之天  
理人情論其是非曲直物來順應而不爲天  
下先乃能處之各得其平而無一偏之私也

每見居官者於蒞任之始多喜沽名釣譽行  
一二巧偽之事以求媚於人不知巧偽之術  
決無久久可行之理始雖粉飾可觀未幾而  
行藏畢露其可恥實甚何如秉公持正後先  
如一乎要之操守清廉乃居官之大本操守  
素優則實心實政皆能力行而有餘否則大  
本已虧雖欲竭蹶矯飾而勢有不能故凡居  
官者必當端其操守以爲根本乃可以勉爲  
良吏夫太上言忘身而身存居官者僅能置  
利害得失於度外一以公忠報國愛民爲心  
則不求名而聲譽自孚不求榮而爵祿自至  
若不能忘懷得失則舉動瞻徇行止卑污究  
之身敗名裂祿位仍不能保實爲可憫朕於  
外省大小臣工之賢否無不留心體察是以  
實心任事之員由縣令而序歷司道以至擢  
任督撫者頗不乏人爾等當仰遵朕諭實力  
奉行不惟百姓受爾等愛養之惠亦爾等自  
求多福之道也○禮部議覆山西巡撫覺羅

石麟題。嶧縣烈女郝琪聘妻賀氏。殉夫自縊。應予旌表。其婢女安氏。戀主投繯。應否加旌。請旨遵行。得旨。俱著旌表。○庚申。以侯陳泰署正白旗領侍衛內大臣。○工部議覆。署兩江總督范時繹等遵旨議奏。淮揚水利事宜。查揚州府舊有五塘。淤蓄上流。諸水歲久湮塞。請將現有溝洫築壩截水。其淺淤處挑深。所費無多。為利甚溥。至五塘下流有串場河。久未疏濬。閘座多廢。請查明興工修理。應如所請。從之。○辛酉。以原任兵部尚書何天培署兵部尚書。○鄂爾多斯扎薩克郡王喇錫班珠爾故遣官致祭。○壬戌。諭八旗都統等。補授護軍校驍騎校之時。嗣後於本佐領內揀選十人。照常擬定一正一陪。帶領引見。其餘八人。俱令預備。若所擬正陪人內無可用者。朕即閱看預備之人。如本佐領內不得可用之人。於該旗揀選補授者。仍照常擬二人引見。○命鑄給副都統花善鎮守扎克拜達

里克城副都統印。總管托和齊管理察哈爾兵丁總管關防。總管珠瑚代管理土默特兵丁總管關防。○癸亥。河東副總河嵇曾筠。摺奏蘭陽新險工程平穩情形。奉  
上諭。從來有備則無患。覽奏抵禦機宜。朕懷似可不為伏秋慮矣。雖然。天下事往往功成於險變。起於平。智或有時不及。施力亦有時不足。恃心一放。則必至懈弛。故書垂無逸之訓。而詩載戰兢之誠也。要當敬慎日增。斯須不可去念。期共勉之。○命文華殿大學士張廷玉為保和殿大學士。仍兼戶部尚書翰林院掌院學士。○正白旗漢軍都統李成龍緣事降調。以署兵部尚書何天培為正白旗漢軍都統。江南松江提督魏經國為鑲紅旗漢軍都統。○正紅旗滿洲副都統覺羅巴延德緣事革職。調正紅旗漢軍副都統吏部右侍郎舒楞額為正紅旗滿洲副都統。陞鑲藍旗叅領朱國極為正紅旗漢軍副都統。○吏部議

覆湖南巡撫王國棟疏言舊例苗疆各缺官員三年陞轉。為期太速。請嗣後定以五年庶可留心地方事務。應如所請。從之。○甲子。吏部題。二等伯唐保住。緣事革職。應銷去恩詔。所得七拖沙喇哈番。餘一等阿思哈尼哈番。以其姪瞻布襲替。從之。○丙寅。兩廣總督孔毓珣題。廣西南寧府忠州土知州黃紹宗。因病乞休。請以其子黃鑑襲替。下部知之。○丁卯。以故一等阿思哈尼哈番保赤子傳奇襲職。○戊辰。

上詣

恩佑寺行禮。○庚午。諭議政王大臣等。向來大兵駐劄之處。皆有大員辦理軍需。目今進藏官兵駐劄西寧。著巡撫莽鵠立就近前往料理。○正黃旗蒙古副都統永福。緣事革職。陞鑲紅旗護軍叅領韋馱保。為正黃旗蒙古副都統。○兵部題。管理阿爾泰種地之候補守備等期滿。請照例更換得旨。阿爾泰種地之

候補人員。如不分別等次。定其優劣。則伊等同知鼓勵。著行文該將軍。於期滿更換之日。分為一二三等。具奏。如果皆實心効力。則皆列一等。如皆係平常。則當盡列下等。不可因有等次。遂強分優劣。以人就等。務須秉公。分晰開列具奏。○辛未。調禮部右侍郎石文燁。為吏部左侍郎。陞光祿寺卿吳達禮。為盛京工部侍郎。○壬申。以戶部左侍郎史貽直。兼管吏部侍郎事務。○旌表四川巴縣烈婦劉公昇妻吳氏。拒姦不污。自刎殞命。給銀建坊。入祠致祭。如例。○癸酉。安徽巡撫魏廷珍。疏言歙縣鄉民。違例演戲。應加嚴禁。得旨。雍正元年間。鴻臚寺卿李鳳翥。曾奏稱鄉邑中共為神會。斂錢演戲。男女混雜。耗費多端。應行禁止。朕因其所奏合理。降旨允行。蓋州縣村堡之間。借演戲為名。招呼匪類。開設賭場。男女混淆。鬪毆生事。種種不法。擾害鄉愚。此則地方有司所當嚴禁者。至於有力之家。祀神

酬願歡慶之會歌咏太平在民間有必不容己之情在國法無一概禁止之理今但稱違例演戲而未分晰其緣由則是凡屬演戲者皆爲犯法國家無此科條也朕之立法皆準諸情理之至當從無不可施行之事亦從無不便於民之事其有不便而難行者則有司奉行之不善也况朕屢諭各省督撫若有禁約難行之處即當據實奏聞以弛其禁若陽奉陰違無其實而有其名何以示信失體甚矣又如賭博一事乃應行嚴禁萬無可寬者而省會之地尚公然市賣賭具督撫兩司不能覺察豈有將民間不能禁止而國法所不曾禁止者一概入於禁約之例恐問之督撫大吏亦無以自解也著將此通行曉諭知之○免直隸霸州雍正五年分水灾額賦有差一甲戌貴州布政使赫勝額緣事革職陞吏部郎中鄂彌達爲貴州布政使司布政使戶部議覆浙江總督李衛等條奏經理玉環

山事宜一增改文員玉環山地方周圍七百餘里田地十萬餘畝山巖平衍土性肥饒界在溫台之間實爲海疆要地請設溫台玉環清軍餉捕同知一員將太平縣界之楚門老岸南塘北塘芳杜東舉密溪洞林樂清縣界之磐石蒲岐三盤黃大舉狀元舉茅埏等處俱歸玉環境內管轄裁樂清縣嶺店驛驛丞缺改設巡檢一員聽該同知差遣一招徠開墾將玉環山中並附近玉環之山田地畝逐一丈明給與太平樂清兩縣人民入籍管業其本省附近玉環之郡邑有願入籍耕種者一體編入保甲所有開墾田畝即於本年起科分上中下三則嗣後每年將墾過數目陸續報部查核一嚴禁私米玉環開墾地畝請照臺灣之例徵收本色完倉其濱海潮溼之地折穀收貯至所餘米穀小民欲行糶賣者許運往溫郡及太平樂清縣等處售賣給票查驗毋得私販出洋儻有無票偷運者照例

治罪官弁失於覺察及通同徇隱者即行參究。興修水利玉環可耕之地向來原設隄塘以資捍護今年久傾圯請委員詳悉相度除赴壑殷實之民聽其自行修建外其情願領帑承壑者該同知酌量借給俟秋收後照數繳還。籌畫經費玉環初經設汛置官需用多端勢難盡出公帑查玉環各寨舊有採捕漁船應照例刊號給牌今赴玉環查驗其濱海煎鹽之戶亦令編入保甲併竈聚煎官收官賣毋許私販出境所有漁鹽稅銀即以備各項公費之需俟玉環一切經理完備後另照內地之例各歸藩司鹽政項下充餉。酌定營制玉環立左右二營設參將一員守備二員千總二員把總四員兵九百名以左營爲陸路右營爲水師其添設弁兵即就近移調撥補請裁磐石營水師參將一缺守備一缺千總一缺把總四缺兵五百五十名改歸玉環營再撥太平營東寨千總一員兵一

百一十九名樂清營兵一百名大荆營兵一百名温州城守營兵三十一名俱歸入玉環營仍添設守備一員以足新置弁兵之數其舊隸黃巖磐石兩營防守之陸路並磐石營原管之洋面與附近玉環舊隸黃巖之洋汛俱歸玉環營管轄玉環營歸温州鎮統轄磐石營請改爲陸路設都司一員千總一員把總二員兵三百名查該營除移調玉環營弁兵外仍存千總一員兵二百七名請裁衛協右營都司一缺改爲磐石營都司再抽撥台協把總一員衛協把總一員兵九十三名合原存兵弁以足新定之額仍歸樂清營管轄均應如所請從之。禮部議覆四川巡撫憲德疏言黎大所舊係州治後以人士稀少生童寄籍於各府州縣考試今生齒日繁文風漸盛請設立一學取進文武童生各六名並撥榮經縣訓導一員專司課士其在外府州縣衛寄籍入學已經補廩者仍聽其於寄籍

之處考試挨次出貢其餘增附生及武生改歸黎學肄業考試應如所請從之○乙亥諭內閣朕前降旨令各省督撫提鎮等將副將參將分別列爲一等二等三等出具考語密咨兵部繕摺進呈但思人之存心行事亦有先後易轍者若以等次考語既定不便改易則身列優等者或有自恃妄爲之心而身列下等者將不復有奮勵上進之念非隨時造就之道也著再行文督撫提鎮等若先經分別等次咨部之各員內或怠惰前修或悛改舊習則當優等降爲劣等劣等陞爲優等該督撫提鎮據實移咨兵部不必回護前言若前任上司所定而後任有應當更改者亦照此咨部將此通行各省武弁等皆令知之○諭兵部嗣後白都納船廠黑龍江等處補授世襲佐領遇有應襲之人年幼不能辦理事務者亦照京城例著人署理其應襲之人與應署理之人一併送來引見著轉行各該將

軍知之○正黃旗滿洲副都統薩爾禪綠事革職調鑲紅旗漢軍副都統唐喀爲正黃旗滿洲副都統以侯噶爾薩爲鑲紅旗漢軍副都統○解江西按察使柳國勲任陞江西鹽驛道胡瀛爲江西按察使司按察使○裁安徽南陵縣裁嶺司巡檢一員從安徽巡撫魏廷珍請也○丙子諭內閣朕覽律例舊文於名例內載有八議之條曰議親議故議功議賢議能議勤議貴議賓此歷代相沿之文其來已久我朝律例於此條雖具載其文而實未嘗照此例行者蓋有深意存焉夫刑法之設所以奉天罰罪乃天下之至公至平無容意爲輕重者也若於親故功賢等人之有罪者故爲屈法以示優容則是可意爲低昂而律非一定者矣尚可謂之公平乎且親故功賢等人或以効力宣勞爲朝廷所倚眷或以勲門戚畹爲國家所優崇其人既異於常人則尤當制節謹度秉禮守義以爲士民之倡

率乃不知自愛而致罹於法是其違理道而蹈愆尤非蚩蚩之氓無知誤犯者可比也。倘執法者又曲爲之宥。何以懲惡而勸善乎。如所犯之罪果出於無心而情有可原。則爲之臨時酌量。特與加恩。亦未爲不可。若預著爲律。是於親故功賢等人未有過之先。即以不肖之人待之。名爲從厚。其實乃出於至薄也。且使恃有八議之條。或任意爲非。漫無顧忌。必有自干大法而不止者。是又以寬容之虛文而轉陷之於罪戾。姑息之愛。尤不可以爲優恤矣。今修輯律例。各條務俱詳加斟酌。以期至當。惟此八議之條。若概爲刪去。恐人不知其非理而害法。故仍令載入。特爲頒示。諭旨俾天下曉然於此律之不可爲訓。而親故人等亦各知儆惕而重犯法。是則朕欽恤之至意也。○諭兵部。烏蒙鎮雄等處猺夷不法。已經勦撫。今又有匪類餘黨。私自嘯聚。現在用兵擒拏。所有用兵事宜。俱著總督鄂爾泰

節制調度。其四川建昌等處派兵堵截。亦聽鄂爾泰節制調度。○陞浙江布政使彭維新爲禮部右侍郎。調廣東布政使高斌爲浙江布政使。司布政使陞山西按察使蔣洞爲廣東布政使。司布政使廣東鹽運使史在甲爲山西按察使。司按察使吏部郎中公元爲廣東按察使。司按察使。○以都察院左僉都御史徐湛恩協辦河東河道事務。○丁丑諭工部闕里

文廟工程關係重大。著山東巡撫塞楞額督催辦理。務期工程堅固。尅期告竣。不得惜費。省工耽延時日。報竣之後。朕尚欲親詣展禮。或遣王大臣前往恭代。並查勘工程。將此速行。塞楞額遵旨奉行。○添設浙江海寧縣巡鹽千總一員。兵一百名。駐長安鎮。從浙江總督李衛請也。○戶部議覆四川巡撫憲德疏言。入川人民衆多。酌量安插。以一夫一婦爲一戶。給水田三十畝。或旱地五十畝。如有兄

弟子姪之成丁者每丁增給水田十五畝或旱地二十五畝若一户內老小丁多不敷養贍者臨時酌增俱給以照票令其管業至應給牛種口糧請照滇省之例每戶給銀十二兩仍令五戶環保其水旱田地定於三年五年陞科所領牛種價銀統於原籍地方官追賠免其在川扣還均應如所請從之○兵部議覆奉天將軍覺羅伊禮布條奏奉天事宜一錦州新邊白石嘴新台門二處關係甚屬緊要請將舊邊官兵移駐防守一奉天所屬十四城舊設城守尉十員協領二員掌印防禦二員請照在京八旗正副叅領佐領驍騎校之例於有城守尉處委副城守尉有協領處委副協領有掌印防禦處委副掌印防禦各一員令其公同辦理一山海關外奉天所屬看守邊門及沿途駐防官員請照驛丞等官給與印信以杜文移往來私竊更換之弊一奉天旗民雜處請遴委賢員會同地方官

徹底清查係民則歸州縣管轄係旗人則查明各該旗分入於各該佐領冊內管轄庶姦匪不得潛藏如清查官員有徇端擾累旗民者即行查叅均應如所請從之○戊寅

上回宮○諭兵部武弁之千把總雖係微末之員然兵丁出身行伍由此進階多有洊歷至大員者但其職分卑微易遭叅革內中如行止不端官箴有玷或嗜酒賭博性情乖張或衰惰廢弛才技庸劣者令其罷黜固無足惜至於因公累誤而其人平日効力勤慎有志向上弓馬熟嫻身材壯健者一經錄事革退營中拘於廢弁不便復令食糧遂至放廢終身實為可惜著督撫提鎮通行所屬於革職千把內遇有才技可用之人而所緣之事實屬因公無關官箴品行者仍准入伍食糧俾得再圖上進之路庶人才不致淪棄而於營伍亦有裨益倘有徇情受託將不堪之廢弁濫收入伍者一經發覺將准其食糧之該管



官照徇庇屬員例議處以儆冒濫○予故江寧將軍常壽祭葬如例○免直隸寶坻縣雍正五年分水灾額賦有差○己卯兵部議覆兩廣總督孔毓珣疏言廣西太平府之思陵西南半壁與安南之祿州密邇請撥左江鎮標內把總一員帶兵五十名駐防思陵州歸新泰營叅將管轄至南丹土州向有錫礦請將來賓把總一員兵八十名再撥河池營兵二十名一同移駐錫廠地方聽河池叅將管轄所遺來賓一汛於提標內撥兵防守再南丹之六寨哨與邕坪哨之者扛地方人悍地險請撥柳慶協千總一員於該協左右兩營各抽兵三十名令千總帶兵四十名駐防六寨哨委隊目一名帶兵十九名駐防者扛應如所請從之○庚辰調山東兗州總兵官楊國相爲湖廣永州總兵官湖廣永州總兵官岳含奇爲山東兗州總兵官○敕封江南淮安府清口風神爲清和宣惠風伯之神○雲

貴總督鄂爾泰疏報化導生苗木林工七等一百一十五寨輸誠納賦附載版圖下部知之

大清世宗敬天昌運建中表正文武英明寬仁信毅大孝至誠憲皇帝實錄卷之六十七

大清世宗敬天昌運建中表正文武英明寬仁  
信毅大孝至誠憲皇帝實錄卷之六十八

監修官光祿大夫經筵講官太僕寺卿和碩大學士吏部尚書總理事務三等伯內閣學士

總纂官光祿大夫經筵講官起居注太僕寺卿和碩大學士戶部尚書仍兼吏部尚書翰林院掌院

事三等伯內閣學士經筵講官起居注太僕寺卿和碩大學士吏部尚書仍兼吏部尚書翰林院掌院

翰林院掌院事加二級直隸總督光祿大夫經筵講官太子太僕寺卿和碩大學士吏部尚書仍兼吏部尚書翰林院掌院

經筵講官議政大臣協辦內閣大學士事務禮部尚書仍兼吏部尚書鴻臚寺卿事三等奉直大夫

敕修

雍正六年戊申夏四月辛巳朔享

太廟

上親詣行禮○

上詣

恩佑寺行禮畢幸圓明園○諭議政王大臣等  
阿爾泰換班兵丁八月內方得到彼換回兵  
丁俟到後起程於十一月盡方能至京時既  
嚴寒兵丁不無苦累如何可使換回兵丁預  
先起程不受寒凍即能至京著議奏尋議查  
自歸化城至扎克拜達里克有上海新驛舊

驛阿拉克諾海古爾班賽堪五路若令換班  
兵丁於四月二十間起程由張家口至歸化  
城分作四路博爾屯查克旦塔拉圖諾穆枉  
分領各由一路而行再令歸化城都統丹晉  
等每路選派熟識道路之叅領佐領等官各  
一員令其選擇水草引路前行大約於七月  
二十間可至扎克拜達里克應令軍營兵丁  
俱預在扎克拜達里克等候此際暫派盛京  
船廠官兵令其哨望俟換班兵丁到時即令  
起程仍令熟識道路官員沿途指引可於十  
月二十間至京庶官兵不受寒凍從之○壬  
午陞正黃旗火器營叅領姜密為  
昭陵總管○吏部議覆山西巡撫覺羅石麟疏  
言蒲州為三晉之咽喉澤州當衝繁之重地  
僅設直隸州不足以資彈壓請陞州為府各  
設知府一員同知一員經歷一員統轄原隸  
之四縣附郭各添設知縣一員專理一邑之  
事所有二州學正改為教諭吏目改為典史

再蒲州之永樂鎮距城一百二十里。澤州之  
攔車鎮係南北行旅往來之所。請將二府新  
設之同知分防二鎮以專緝捕之責。應如所  
請。從之。尋定蒲州新陞府曰蒲州府。澤州新  
陞府曰澤州府。蒲州附郭縣曰永濟。澤州附  
郭縣曰鳳臺。旌表河南中牟縣烈婦李貴  
妻沈氏拒姦不污自縊殞命。給銀建坊。入祠  
致祭如例。甲申以翰林院編修馬金門充  
日講起居注官。調鑲黃旗滿洲都統鄂善  
爲鑲白旗漢軍都統。以署領侍衛內大臣侯  
陳泰爲鑲黃旗滿洲都統。仍兼署領侍衛內  
大臣。旌表山東烈婦益都縣高源妻劉氏。  
鄭城縣劉煜含妻張氏俱夫亡投繯從容殉  
節。各給銀建坊。入祠致祭如例。乙酉川陝  
總督岳鍾琪疏言陝甘兩省丁銀照各省以  
糧載丁之例題請。奉旨允行在案。今查應減  
丁銀之朝邑等二十一州縣。於未及攤定之  
先。照原額徵收。共銀六千七百九十二兩。若

按戶退還。則糧戶畸零難於散給。必致胥吏  
中飽。應請存貯司庫以充兵餉。得旨。該督既  
稱按戶退還。必滋胥吏中飽之弊。著照所請。  
停其退還。但此項銀兩係陝民輸納之物。著  
留貯陝西。於地方公事如積貯興修之類。有  
裨益於民者。該督撫酌量奏聞。動支應用。不  
必撥充兵餉。丙戌補行直隸古北各協營  
雍正五年分軍政卓異官二員。年老官一員。  
才力不及官一員。分別陞賞處分如例。○喀  
爾喀貝子達濟故遣官致祭。丁亥諭兵部。  
官員罰俸之事。若有紀錄者。例應准其抵銷。  
無紀錄者。雖有所加之級。俱不准抵銷。但紀  
錄既可抵銷罰俸之事。則所加之級亦可改  
爲紀錄抵銷。嗣後在京八旗武官。凡有罰俸  
之事。若情願將議敘等事所加之級改爲紀  
錄抵銷罰俸者。准其改抵。惟特恩所賞之級  
俱不准改抵。○刑部議奏署直隸總督吏部  
尚書宜兆熊吏部右侍郎劉師恕失察革職。

大名府知府曾逢聖一案。應降級調用。得旨。宜兆熊。劉師恕。俱著降調。暫署直隸總督事務。○庚寅。諭內閣。積貯米穀。所以備旱。務緩急之需。民命攸關。最爲切要。朕無時不加訓飭。嚴其考成。務期地方有司。實力奉行。庶可有備無患。又念倉廩若不堅固。必有霉爛。虧折等弊。是以雍正四年。諭令各省加意修理。但恐有司視爲具文。奉行不力。且新舊官未定倉廩交代之例。或去任之員。以損壞滲漏之廩座。任意交代。貽累於後官。或接任之員。有霉爛虧空等情。而藉口舊日倉廩之不修。委咎於前任。似此種種弊端。皆於積貯之政。大有關係。嗣後著將各府州縣倉廩。入於交盤項內。新舊交代。若有傾圮滲漏之處。著接任官即行揭報。儻有徇情濫受者。即係接任官之責。除照例處分外。仍令賠修。如此。則有司各顧考成。於積穀養民之道。實有裨益。其如何定例之處。著九卿會議具奏。尋議。嗣後

各府州縣倉廩俱造入交盤項內。若有木植毀爛。傾圮滲漏者。著接任官即行揭報。將前任官照例議處。賠補。如接任官有徇隱濫受者。亦照例議處。仍令賠修。其霉爛虧空米石。著限年賠完。限內不完。照例治罪。從之。○署南贛總兵官張溥疏言。准巡撫布蘭泰咨開。本標隨丁名糧俱行招募補足。已將隨丁名糧六十分考補五十四分。暫留六分。再行考補得旨。從來文武原屬兩途。其養廉用度亦各不侔。督撫爲封疆大吏。全在察吏安民。撫輯地方。一應衙門用度。耗羨等項。足資爲用。隨丁名糧。固可革除。提鎮專任戎行。責在整頓營伍。訓練士卒。一應衙門用度。舍隨丁名糧之外。別無所出。武臣由將備陞至總兵階級。既峻。其用度自應寬裕。儻將此項裁革。無以養廉。勢必諸事掣肘。且衙門用度不敷。即有廉潔之員。亦易改操。此揆情度理。有不當革除者。今布蘭泰將伊隨丁名糧裁補。併鎮

臣之隨丁名糧亦勒令革除殊非中道著兵部行文布蘭泰知之○予故副都統兼察哈爾總管哈濟噶爾祭葬贈都統銜○壬辰諭內閣凡監禁之斬絞重犯越獄顯係該管官疎縱之故若但照例革職轉得脫然事外矣嗣後應將疎縱之州縣等官限滿不獲者照例革職仍留地方與接任官協同緝捕果能將越獄之犯緝拏全獲准將該員送部引見酌量開復俾尚有自新之路若三年限滿仍不能拏獲或不能全獲俱著該督撫奏聞請旨如此則疎縱者知所儆懼而盡心捕逃者亦尚可邀恩其如何詳細定例之處著九卿議奏尋議嗣後因斬絞重犯越獄降調之員仍留地方令其設法與接任官協同緝捕如三年限滿一名不獲照二名不獲例降三級調用二名不獲照三名不獲一名例革職二名不獲後止獲一名者仍照二名不獲例降三級調用軍流以下罪犯越獄脫逃應仍照

定例一二名者罰俸一年三四名者降一級調用從之○癸己免直隸永清縣梁城所雍正五年分水災額賦有差○甲午陞通政使繆沅爲內閣學士兼禮部侍郎○免直隸文安王田二縣雍正五年分水災額賦有差○乙未陞山西殺虎口副將魏麟爲直隸正定總兵官○丙申禮部遵旨議覆革職降級留任官員職掌班次一切照舊惟朝服頂帶與職任不符班聯未昭畫一請嗣後凡文武大小官員革職降級奉旨留任者除陞轉開列及停扣俸祿之處俱照例遵行外其朝服頂帶准仍照本任品級班聯秩然體統昭而觀瞻肅矣從之○丁酉孝端文皇后忌辰遣官祭昭陵○戊戌以鑲白旗漢軍都統鄂善署本旗護軍統領○己亥以翰林院侍讀索柱充日講起居注官○庚子以正藍旗蒙古副都統薩齊庫署鑲黃旗蒙古都統○予告大學士

田從典行。至良鄉縣病故。遺疏奏聞。得旨。田從典才品優長。老成練達。端方公直。恪慎恭謹。自辦理部務。以及簡任綸扉。實心宣力。勤勞懋著。屢以老病乞休。情詞懇切。朕因允其所請。加太子太師銜。以原官致仕。賜以帑金。馳驛回籍。冀其頤養康健。於一二年後。再來京陛見。以慰朕眷念老臣之意。忽聞患病溘逝。朕心深為軫悼。遣散秩大臣一員。三旗侍衛六員。往奠茶酒。并念伊子年齒尚幼。無辦理事務之人。遣內閣漢學士一員。滿洲侍讀學士一員。前往辦理地方官酌量委員。沿途照看。送至原籍。其應得卹典。著察例具奏。伊子年幼家居。著山西巡撫傳諭該地方官。時加照看。新舊接任之員。俱將此旨傳知。通行遵奉。前朕賜田從典匾額對聯。可暫於巡撫衙門收貯。俟諭祭之時。於兩司中令一人齋往頒賜。○壬寅。諭內閣錢糧之加耗羨。原非應有之項。朕勤求治理。愛養黎民。本欲將此

項悉行禁革。而博採輿論。留心體訪。凡為州縣地方官。實有萬不得已公私兩項之用度。若全革耗羨。其勢必不可行。為有司者。果能減輕收納。不苛取於民。在民亦所樂從。此耗羨所以未盡裁革之故也。州縣既有耗羨。而上司官員。無以養廉。勢不得不收州縣之餽送。是上司冒貪職之罪。以為日用之資。在謹慎小心者。則畏懼而不敢行。必至過於窘迫。而貪取濫用者。又因無所限制。借規禮之名。恣意橫索。弊端種種。州縣公私之用。既有不敷。必致加派巧取。為害於民。況上司既收屬員之規禮。則必有瞻顧回護之處。而下屬反得操上司之短長。於察吏之道。大有關係。所以雍正二年間。山西巡撫諾岷。請以通省耗羨。提解存公。將閩省公事之費。及上司下屬養廉之需。咸取於此。上不誤公。下不累民。無偏多偏少之弊。無苛索橫徵之擾。實通權達變之善策。朕是以降旨允行。此提解火耗之

所由來也。向來山西虧空甚多。國帑久虛。不能彌補。從前撫臣多請將虧空之員革職留任。以爲彌補之計。夫以不肖之徒。令其留任還帑。是以虧空爲護官之符。不但無益於國計。亦且有害於民生。而德音在任。又借彌補虧空之名。提火耗以肥私橐。及諾岷接任。潔已奉公。實心辦理。將虧空劣員悉行叅革。州縣火耗嚴行裁減。而酌留羨餘以補無著之虧空。既不累及於閭閻。而有司亦免叅罰。又爲官員定養廉之資。爲公事留辦理之費。諾岷此舉。於國計民生。上下公私。均有裨益。然伊當始行之時。不但晉省屬員怨望。而內外臣工皆有異詞。朕彼時降旨曰。此事惟如諾岷之督撫方能行之耳。蓋朕之意。原聽各省督撫自爲之。而至於不能行之督撫。不便行之地方。則朕竝未強之使行也。諾岷舉行之後。隨有數省倣效其意。提解十分中二三。以備公用。亦以地方公務繁多。若不預爲計畫。

則一時需費。仍至累及小民。然此亦皆督撫自行奏請者。非由朕諭也。伊都立接諾岷之任。曾奏稱山西虧空漸次清楚。將來耗羨便可充餉。朕嚴切訓飭曰。本地之羨餘。只應作本地之用度。若歸公充餉。斷無是理。且恐相沿日久。遂成公項。不肖官員。竟有重複徵收之事矣。田文鏡亦曾奏稱豫省虧空彌補已清。火耗尚有贏餘等語。朕批示之曰。此項耗羨。原係豫省官民之物。假使果有贏餘。則當增添官員養廉之資。使其用度寬裕。儻再有贏餘。則當再減民間火耗之數。使其儲蓄充盈。蓋朕之准其提解耗羨者。原是愛養官民之苦心。若以支給地方公用之外。尚有餘資。即准收作公項。朕必不爲也。前陳時夏亦具奏欲行提解耗羨之法。因其有分別地方有無多寡之語。朕諭之曰。政令之行。必須各屬一體。方得均平。若有所分別。便可高下其手。易滋弊端。諭旨如此。聞陳時夏向人云。奉旨

令全提耗羨。此乃陳時夏自行奏請之事。而以其名歸之於朕。朕不受也。今魏廷珍又效法之。以上江提解火耗之事。具摺陳奏。恐外人不知。亦以爲出自朕意。故特頒此旨。明白曉諭。蓋提解火耗之舉。若行之果善。亦督撫分內之事。不得居功。儻行之不善。實足爲伊身家性命之患。無所逃罪。總在伊等自行度量。其願行者。朕不拒阻。其不願者。朕亦不强也。○癸卯。吏部尚書福敏緣事革職。陞都察院左都御史查郎阿爲吏部尚書。兵部右侍郎三泰爲都察院左都御史。仍兼理禮部太常寺事務。○以議政大臣公傅爾丹署吏部尚書。○乙巳。諭吏部據浙江總督李衛奏稱。候補知縣李弘沂先經委署餘杭縣試用。才具尚屬有餘。續經改署桐廬縣事。辦事頗知黽勉。今因患病。相應勒令休致。夫平常無能之員。因患病休致。固不足惜。若係可以辦事之員。因一時患病。遂令休致。放廢終身。豈不可

惜。況今已有外官病痊起用原缺之例。嗣後道府州縣等官。除實在老病不能供職外。其有一時患病。而平日居官尚好。於地方有益者。著該督撫酌量奏聞。解任給假調理。俟病愈之後。仍復補用。如此則人才不致棄置。而事務亦不致廢弛矣。○調兵部尚書副總河嵇曾筠爲吏部尚書。仍辦理副總河事。戶部右侍郎何世璽爲吏部右侍郎。○吏部議覆浙江總督李衛疏奏。遵旨揀選舉人題補教職。今選何玉機等九十員。分別科分名次。遇缺咨部補用。歲底彙題。應如所請。得旨。教職雖非州縣可比。亦係職守官員。無咨部補用。年終始行彙題之理。嗣後補用教職人員。著每月一次具題。永著爲例。○科爾沁輔國公薩麻迪故遣官致祭。○丙午。湖北布政使黃焜緣事革職。調直隸布政使徐鼎爲湖北布政使。司布政使陞山東按察使楊紹爲直隸布政使。司布政使調署陝西。西大通總兵



官湖廣提督馮允中署陝西西寧總兵官仍兼署西大通總兵官印務○戶部議覆山西巡撫覺羅石麟疏言山西之蔚州與直隸之蔚縣界址交錯應俱歸直隸宣化府管轄廣昌縣與蔚縣縣治村莊俱相交錯而蔚縣向設廣昌巡檢一員止經管廣德一里請將廣德地方歸併廣昌仍隸山西大同府管轄其巡檢缺可以裁汰至廣昌守備向係宣化蔚州路管轄今應專屬山西靈邱路叅將管轄均應如所請從之○丁未諭內閣凡辦理府州縣事務若得曾經出仕諳練之人於地方實有裨益朕愛惜人才於罷斥之員常降旨調來引見以觀其才具之優劣不忍令其棄置今思從前因公累誤之員其中未必無才守可觀者著吏部行文各省凡知府同知通判知州知縣任內除大計特疏糾參外其因公累誤降革者該員曾經居官五年而離任之後交代清楚無錢糧案件未清之處准本

人親赴吏部具呈吏部不拘人數即行奏聞考試履歷帶領引見候朕酌量起用起用之後若有貪婪不法再經叅出必嚴加治罪儻係平庸無能或行止不端之人妄自陳請希圖僥倖者亦難逃朕之鑒察○工部議覆山東巡撫塞楞額疏言安山湖隄內無地窮民查明共四百五十九戶捕魚爲業之湖民共七十五名應遵旨動用本省耗羨銀兩於隄旁搭蓋房屋設置船隻分給各民俾得安居樂業應如所請從之○戊申以正白旗滿洲副都統戴豪署正藍旗護軍統領已酉諭內閣據禮部侍郎錢以塏疏奏伊祖錢楞於順治年間以委署知縣盡節殉難懇請恩卹著該部查明議奏尋議順治九年福建巡撫張學聖將沙縣令董濟等五員殉難緣由題請賜卹因署將樂縣知縣錢楞係委署之員照例未經議卹今該侍郎錢以塏既稱伊祖錢楞隨征入閩與董濟等四員同時殉難應

將錢楞追贈福建按察使司僉事。廕一子入監讀書。照加贈品級。給與祭葬。從之。庚戌。戶部議覆浙江總督兼理兩浙鹽課事務李衛疏言江南蘇松常鎮四府民間食鹽定例行銷浙引。至京口一帶地方接壤兩淮。僅隔一江。私販易於偷渡。是以從前鎮江開口責成文武各員。盤驗搜查。但日久法弛。以致私販潛滋。浙鹽壅滯。請交江常鎮道就近管理。督同鎮江府海防同知京口將軍標下副將鎮江城守叅將輪流分班經管。不論糧艘兵船差船。如有夾帶私鹽。許即嚴拏。其水陸一切私鹽。竝令查拏。儻有疎縱失察。照例糾叅。仍嚴禁官弁兵役。毋得勒捐商民。需索進聞使費。儻該道員不能實力整頓。該督即行指叅。照例議處。應如所請。得旨。依議。盤查私鹽。著該管官員實力奉行。竝令江南巡察御史不時訪察。

大清世宗敬天昌運建中表正文武英明寬仁信毅大孝至誠憲皇帝實錄卷之六十八

大清世宗敬天昌運建中表正文武英明寬仁  
信毅大考至誠憲皇帝實錄卷之六十九

監修總裁官光祿大夫經筵講官太僕議政大臣保和殿大學士兼兵部尚書總理兵部事務三等伯加十五級臣鄂爾泰

總裁官光祿大夫經筵日講官起居注太僕兼太子太保保和殿大學士兼戶部尚書仍兼管吏部尚書翰林院掌院

事三等伯加十三級臣張廷玉光祿大夫經筵日講官起居注太僕議政大臣武英殿大學士兼吏部尚書仍兼管

翰林院掌院事加二級臣福敏光祿大夫經筵講官太子太保東閣大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事務臣三泰等奉

敕修

雍正六年戊申五月辛亥朔授裕親王廣祿

姊為縣君塔羅卜藏為固山額駙壬子下

嫁鑲紅旗和碩額駙伊倫奇之郡主故遣官

致祭○癸丑

孝誠仁皇后忌辰遣官祭

景陵○陞廣西布政使郭銑為廣西巡撫廣西

按察使張元懷為廣西布政使司布政使山

西冀寧道常安為廣西按察使司按察使○

湖廣永州總兵官楊國相緣事革職調浙江

温州總兵官邊士偉為湖廣永州總兵官江

南狼山總兵官郭祺患病解任調浙江處州

總兵官王安國為江南狼山總兵官福建金

門總兵官冉起鳳為浙江處州總兵官陞浙

江杭州副將李燦為浙江温州總兵官浙江

瑞安副將許良彬為福建金門總兵官○甲

寅旌表福建長汀縣烈婦陳廣發妻熊氏遇

暴不污被刃殞命給銀建坊入祠致祭如例

○丙辰諭內閣各省驛站夫役原以備公事

之用國家歲費帑金本欲使州縣無賠累之

苦民間無差派之擾官民並受其福也但聞

各省往來人員有不應用驛夫而擅自動用

者該管之人或畏其威勢而不敢不應或迫

於情面而不得不應積習相沿驟難禁止地

方夫役並受擾累重負朕加惠官民之至意

嗣後惟兵部勘合欽差大臣及督撫入境學

差試差或知府下縣盤查及他員奉督撫差

委盤查者准動用夫役其餘概不准用儻有

違例妄索者該管官即行揭報督撫題叅若

該管官違例濫應發覺之日。照例治罪。著各省管理驛站之道員。不時查察。儻有徇隱。一併處分。○丁巳。戶部議覆。川陝總督岳鍾琪疏言。綏德州所隸綏德衛地。雜處於綏德米脂。清澗。三州縣。及榆林中十營堡之中。其間有阻隔一縣。而遙爲管轄者。亦有四圍俱係縣土。而一區孤懸者。地既分歸。民亦散處。該管官難於經理。請將該屬地方。近州者仍歸州轄。近縣者改歸縣轄。應如所請。從之。○戊午。雲貴總督鄂爾泰疏報。東川雖久改流。而六營長九伙目。俱沿舊習。各踞一方。有則補營長。祿世豪。法夏伙目。祿天佑。素稱兇悍。爲害邊疆。今祿天佑已經擒獲。現在安設防汛。祿世豪前已被擒。解司供擬在案。二兇既靖。一郡悉寧。其餘營長伙目。俱可漸次整理得旨。平定東川。在事官兵。勤勞効力。甚屬可嘉。著鄂爾泰查明。分別等次具題。交部議敘賞賚。○己未。戶部議覆。原任蘇州織造兼理潁

潁關稅務高斌疏言。許潁關稅務向經監督高瑱題請。部頒則例刊榜懸掛。但歷來商稅實未照例抽納。浮溢居多。查現在該關所行則例。亦甚平當。商民稱便。應將所有詳悉數目。據實開報。請下部查核。刊定成例。永遠遵行。應如所請。並行令各省經理關務之處。有似此陽奉陰違者。悉行奏請查核。以昭畫一。從之。○壬戌。諭內閣。據山西太原總兵官袁立相奏。稱平垣營守備梁玉年已六十八歲。雖干八法。而精力不衰。且操守廉潔。辦事敏練等語。夫八法內開列年老者。蓋謂其衰老不能辦事。故令罷斥。竝非限定年逾若干。即入於八法之內也。若限定年歲。以爲處分。則年齒未老。而早衰不能辦事者。又將姑容之乎。況年老諳練事務之人。尤爲難得。儻精力可用。該上司當優待之。以爲後進之表式。今袁立相既稱梁玉精力不衰。而操守廉潔。辦事敏練。只因其六十八歲。遂將伊填入八法

叅劾之內殊非體朕愛惜人才之意。梁王著仍留原任。并令袁立相酌量。梁王既年老歷練。若可勝遊擊之任。將來遇有缺出。著即題補。○江西巡撫布蘭泰奏。小漢驛驛丞餽送上司規禮。得旨。從前上司各官無養廉之資。勢不得不受屬員之餽送。而屬員之力。難以供應。故地方陋規。不能悉行裁革。數年以來。朕百計籌畫。爲大小官員酌定養廉之項。使公私有賴。俯仰無憂。儻再有索取規禮者。自當重治其罪。至於從前之陋規。各省各項。何處不有。今若但就一二事叅劾懲治。而其餘悉置之不問。則嚴於此而寬於彼。用法不得其平。若將既往之事。一一追溯查叅。恐大小官員。無人得免處分。繁擾紛紜。殊非爲政之體。況不教而加之以罪。乃聖人之所戒。如貪贓侵帑。甚有關係之事。自不可隱匿姑容。以長貪風而廢國法。使墨吏不知儆懼。若地方多年相沿之陋規。只當禁約於將來。不應

追究其既往。即使本人自首。情願繳出。亦只應具摺請旨。或將此留爲地方公事之用。今乃顯然具本題叅。且欲將此銀歸作公項。非情理也。此案不必究問。著該部行文將朕此旨。訓諭布蘭泰。○免江南無爲宿松等五州縣。雍正五年分水災額賦有差。○癸亥。

皇后千秋節。停止行禮筵宴。○遣官祭

關聖帝君。○工部議覆。署兩江總督范時繹等遵旨查奏雲貴總督鄂爾泰條陳江南水利事宜。除鎮洋縣劉河。昭文縣白茆河。揚州五塘等工。另議辦理外。其丹徒丹陽一帶運河。係杭嘉湖蘇松常鎮太八府州之運道。嗣後每歲撈淺所需銀兩。請於八府州屬按照漕額均派。秋深委員挑濬。江寧府秦淮河。其在城外者。著業佃人戶附近挑濬。以資灌溉。城內梗塞之處。令沿河居民。每年撈浚。毋許堆積污穢。凡房屋占入河基之處。俟有傾圮。悉令查明清出。毋使日就湮廢。至江南各府

州縣城河并市鎮支河港瀆應行疏濬之處通行查明實力修濬不得侵派小民虛應故事應如所請從之○甲子夏至祭

地於

方澤遣康親王崇安行禮○以通政使留保署翰林院掌院學士○乙丑陞四川松茂道李世倬爲陝西甘肅按察使司按察使○兵部議覆署直隸總督宜兆熊疏言宣化府屬之保安延慶二州屬在關外旗人雜處最爲緊

要城內止有知州吏目等員竝無武弁防禦如文職遇調則城池倉庫門禁鎖鑰乏員防護查張家口協標兩營竝無專汛護送等差應撥把總二員令其移駐改歸懷來永寧二路叅將都司管轄應如所請從之○丙寅諭吏部人臣和衷共濟始於公事有所裨益今直隸總督宜兆熊劉師恕意見不合諸事參差朕屢加訓飭不能悛改若仍令同辦總督事務必致貽誤宜兆熊原係庸碌平常之人

朕因其操守一節尚有可取故試用之自署福建直隸總督兩任觀之全不曉事著回京照部議所降之級補用吏部侍郎何世璠著署理直隸總督事務仍著劉師恕照前一同辦理○以翰林院侍讀學士謝王寵署日講起居注官○丁卯諭兵部富寧安署西安將軍事務以來爲時已久所出員缺竝未題補一次省城官弁乃定額之缺俱有管兵之責關係甚重富寧安之意以爲伊乃署印將軍苟且推卸俟常色禮到日聽其補放曾不計及伊身之署理或久也常色禮於今歲臘月自軍中至京明正方到西安如許員缺安可經年虛懸富寧安在巴爾庫爾出征處爲將軍十餘年西安兵丁認識大半凡遇員缺理宜即行題補况爲現任大學士非比別項小職銜之署將軍事者朕向日聞伊操守好辦事誠篤自授爲大學士以來恩賜頻仍錫封侯爵寵眷優渥富寧安理應屏除一切奮不顧身

將國家事務實心辦理。乃凡事惟自圖保全。視國家之事。與伊了無干涉。深負朕恩。富寧安現署將軍印務。著交兵部嚴行察議。尋議署西安將軍富寧安受

皇上洪恩。寵眷優渥。乃西安駐防武職。關係甚重。而富寧安並不題補一次。視國家之事。漫不經心。深負

皇上任用之恩。應將富寧安照溺職例革職。所得一等侯世職。一併革去。得旨富寧安著革

去恩賞世職。其革去大學士之處。著從寬免

調福建金門總兵官許良彬。為福建南澳

總兵官。福建南澳總兵官陳祖訓。為福建金

門總兵官。戊辰。免直隸天津州雍正五年

分水災額賦有差。○己巳。諭內閣。國家舉行

大計。乃三年考績之大典。其中卓異人員。皆

加以特恩。不次擢用。誠以該管上司為國家

薦拔人材。必深知灼見。然後列為卓異。斷無

有徇私受託。草率冒濫。以負國恩而辱鉅典

者。而到任未久之上司。不能深知屬員之賢

否。又准其題請展限。以俟確訪。如此則屬員

人品之邪正。自無有不能辦晰之理。乃見有

從前卓異之員。而後任內竟至貪贓枉法。罹

於重罪者。夫以三年之久。數百屬員之多。保

舉數人。以光大典。則非一時應詔薦舉可比

也。其人既犯貪贓枉法之條。則平日必係行

止姦邪之輩。又非尋常註誤。及才力不及之

類可比也。督撫提鎮等。專以察吏為務。而乃

以此等之人。列為卓異。及至敗露之後。尚可

藉口於知人之不易。不能保其將來乎。此等

若不定以處分。恐相沿日久。必有濫舉失實

之弊。嗣後文武卓異官員。有犯貪贓不法之

款。而審訊確實者。將從前列為卓異之上司。

一併議處。儻於該員未敗露之先。有能查出

奏奏者。免其處分。其如何定例之處。著九卿

詳議具奏。尋議嗣後文武卓異之員。原任內

有濫行貪酷不法之處。原薦舉卓異之上司。

不行揭報題叅者督撫提鎮降五級調用司道府副將遊擊等均行革職若文武官員卓異之後或復回本任或陞轉他省別犯貪贓不法之款其原薦舉之各上司仍同在一省不行揭報題叅者督撫提鎮降二級調用司道府副將遊擊等降三級調用如不同在一省無容揭報題叅者督撫提鎮降一級調用司道府副將遊擊等降二級調用不准抵銷從之○命領侍衛內大臣公馬爾賽在學士內辦事○庚午補行江西撫標雍正五年分軍政卓異官一員罷軟官一員年老官二員有疾官一員才力不及官一員分別陞賞處分如例○辛未署兵部尚書何天培緣事革職陞吏部左侍郎石文燁爲兵部尚書○巴林榮憲固倫公主卒遣官致祭○壬申諭內閣張坦麟從前爲通倉監督乃倉務廢弛已極之時惟有張坦麟所管廩座整齊堅固米石無虧則張坦麟之實心爲國家辦事不

圖習染可知矣及朕即位用爲兩淮鹽運使伊別除弊端一塵不染則其操守又可知矣及用爲蘇州藩司到任後陳時夏即與之不合朕因撫藩既相齟齬不便仍令共事一方將張坦麟調任山東俾兩人各辦職任之事今當交代之時陳時夏令趙向奎勸捐吹求百計播弄且違旨不令速赴新任必欲使張坦麟在蘇藩任內得受過愆以彰張坦麟之非而成己之是此等用意豈能逃朕之鑒察乎即據陳時夏奏摺中稱張坦麟交存銀二萬餘兩曾經奏明充餉又復云此項終成虧空不思此項既已歸公何以又成虧空是陳時夏之言不過欲歸過於張坦麟而不覺其自相矛盾矣且督撫同在一方見聞確切總督范時繹極稱張坦麟居官之善而陳時夏則力貶之豈非出於私意乎大凡督撫不能甄別屬員優劣即爲不能勝任朕以大公至正之心聽言觀人無絲毫偏向之處而諸臣



亦斷不能欺朕之耳目。即如各省藩臬赴任時。朕多准其具摺奏事。蓋欲周知地方之情形。或有爲督撫所不及知者。或有爲督撫不肯言者。故令兩司得以陳奏。且觀其居心之邪正。公私。朕嘗諭之曰。朕竝非疑督撫而信爾等也。若信任爾等過於督撫。即當以爾等爲督撫矣。何以尚在兩司之列乎。此凡任兩司者。人人共知之諭旨也。況設計傾陷。朋比黨同。乃朕之所深惡。屢頒嚴旨訓飭。今趙向奎聽從陳時夏指使。深負朕簡用之恩。蘇松民情聰慧。多有好用智巧者。陳時夏誠實有餘。而才識不足。不能勝蘇撫之任。著解任。往山東署理布政司事。陳時夏既稱張坦麟。蘇州任內。錢糧不清。著將張坦麟仍留江蘇署理巡撫印務。看陳時夏張坦麟任事之後。辦理如何。再降諭旨。鑲藍旗漢軍都統郝宏勳。以老病乞休。允之。○以正白旗滿洲副都統博第署正藍旗護軍統領。○癸酉。

孝恭仁皇后忌辰。遣官祭。

景陵。○甲戌。陞翰林院侍讀學士阿爾賽爲光祿寺卿。○以正白旗滿洲副都統戴豪署鑲白旗滿洲都統。○乙亥。諭內閣。田文鏡自到河南以來。忠誠體國。公正廉明。豫省境內吏畏民懷。稱爲樂土。以此上感天和。從前三年收成豐稔。而今歲八府各州。二麥復登大有。又如連年豫省黃河工程。當暑雨時行之際。全無泛溢。此皆天地嘉佑之明驗。吏治民風之善。實爲直省第一。鄂爾泰公忠勤誠。實心任事。經理咸宜。是以雲南地方。連歲豐登。今年通省郡縣。以及苗蠻荒僻之地。二麥皆有十分收成。滇省父老。稱爲罕覯。從來天人感應之理。捷如影響。若各省督撫皆能如田文鏡。鄂爾泰。則天下允稱大治矣。朕久欲用田文鏡。爲他省總督。因豫省官民受其化導。撫綏深切愛戴。朕不忍令其舍之而去。今思山東民俗。官方宜加整理。河南與山東地界相

連以田文鏡之精神力量辦理兩省之事綽然有餘。著將田文鏡授爲河東總督。管理二省事務。凡山東應行關會總督案件。俱照別省總督之例。定限辦理。山東官吏不得藉口有所稽遲。此朕因人設立之曠典。不爲定例。諭兵部。山西太原總兵袁立相。老成練達。實心任事。幾次欲用爲提督。因太原一鎮甚屬緊要。是以未用於他省。著授爲提督。節制山西全省。此朕因才而用者。不必爲例。以

叅贊丁壽署軍營前鋒統領。工部議覆河道總督齊蘇勒疏言。徐州黃河南岸曹家壩。縷隄因對岸新生沙嘴。逼溜南移。甚屬危險。應亟下大埽。以資捍禦。睢寧縣黃河南岸王家堂上首。今春河溜汕刷。縷隄之外。竝無月隄重障。應加築戢。隄一道宿遷縣黃河北岸。皂河舊隄大溜北徙。直受頂衝。應加工搶修。竝築壩臺攔護。其桃源縣黃河北岸單家莊外當黃流內係運道。目今水勢直射隄根。應

下樓崖順埽。并修築埽臺一座。又安東縣黃河北岸高家唐家二莊。正當黃溜頂衝。河崖坍塌。亦應加鑲高厚。以固隄工。均應如所請。從之。○雲貴總督鄂爾泰疏報苗賊刀正彥。主使兇類。號召窩泥。肆行劫害。民臣調遣官土弁兵擒剿。深入攸樂等寨。直搗賊巢。首惡黨與悉就擒撫。得旨。鄂爾泰著議敘。具奏其在事官弁兵丁。於烟瘴險遠之地。勤勞効力。著從優議敘。賞賚。提督郝玉麟亦著從優議敘。尋議雲貴總督鄂爾泰應加二級。提督郝玉麟應功加二等。授署都督同知。其在事有功官弁兵丁。俟造冊到日。分別陞賞。從之。○旌表陝西烈婦。雒南縣薛匡倫妻邵氏。遇強不辱。被刃捐軀。沔縣李聖極妻趙氏。夫亡投繯從容就義。各給銀建坊。入祠致祭。如例。○丙子陞正藍旗漢軍副都統李國權爲正白旗漢軍都統。○丁丑陞鑲藍旗漢軍副都統耿化祚爲本旗漢軍都統。○戊寅陞福建

澎湖副將呂瑞麟為福建海壇總兵官

大清世宗敬天昌運建中表正文武英明寬仁  
信毅大孝至誠憲皇帝實錄卷之六十九

大清世宗敬天昌運建中表正文武英明寬仁  
信毅大孝至誠憲皇帝實錄卷之七十

敕修

雍正六年戊申六月庚辰朔諭吏部向來滿

洲官員各按旗分陞轉如該旗不得其人則  
俸淺者往往驟得推陞該旗人多即俸深者  
陞轉亦致遲滯似於銓法未為均平朕意筆  
帖式等自當按旗補用至主事以上等官或  
可不拘旗分通行論俸陞轉但此例由來已  
久在當年定例之初必有深意爾部會同滿  
洲大學士各部滿洲堂官及八旗管旗王大  
臣等秉公據理詳悉妥議具奏尋議滿洲官  
員向有旗缺翼缺公缺之分後因陞轉不均

監修總裁官光祿大夫經筵講官太僕寺卿兼翰林院掌院學士等因欽此  
總纂官光祿大夫經筵講官太僕寺卿兼翰林院掌院學士等因欽此  
纂修官光祿大夫經筵講官太僕寺卿兼翰林院掌院學士等因欽此  
纂修官光祿大夫經筵講官太僕寺卿兼翰林院掌院學士等因欽此  
纂修官光祿大夫經筵講官太僕寺卿兼翰林院掌院學士等因欽此  
纂修官光祿大夫經筵講官太僕寺卿兼翰林院掌院學士等因欽此  
纂修官光祿大夫經筵講官太僕寺卿兼翰林院掌院學士等因欽此  
纂修官光祿大夫經筵講官太僕寺卿兼翰林院掌院學士等因欽此  
纂修官光祿大夫經筵講官太僕寺卿兼翰林院掌院學士等因欽此  
纂修官光祿大夫經筵講官太僕寺卿兼翰林院掌院學士等因欽此

於康熙八年將各部堂主事改爲公缺。又於康熙十年將各部郎中亦改爲公缺。八旗通行論俸陞補。惟員外郎主事等官。今仍按旗陞轉。銓法實未盡一。嗣後請將員外郎內按翼按旗補用之員。照郎中例改爲公缺。主事內按旗補用之員。照堂主事例亦改爲公缺。其內閣中書監察御史給事中。向係旗缺。工部製造庫郎中。向係翼缺。俱改爲公缺。至旗缺翼缺公缺。向來各立班次。今既一併改爲公缺。應將郎中爲一班。員外郎爲一班。主事爲一班。其刑部司官。例用通曉漢字之人。應另立一班。八旗通行論俸陞轉。又各項革職降調人員。有捐復原職原級及經保題。并照伊所降之級補用者。非奉特旨開復。概不通論。前俸捐納人員。向例試俸三年。各項議敘人員。應亦令試俸三年。若議敘捐納人員內有本無前俸者。試俸五年。奉特旨補用之人。無前俸者。試俸三年。其各項應陞員外郎之

主事等官。俱令試俸二年。再行通論。前俸陞轉。至試俸年限未滿之前。遇有缺出。陞轉恐致乏員。應令吏部行文各部院將應陞人員保送引見。欽點補授。如此。則銓法盡一。而各員陞轉得以均平矣。從之。○移湖北漢陽府糧捕通判駐漢口鎮。荊州府糧捕通判駐沙市。從湖廣總督邁柱請也。○予故太子太師文華殿大學士致仕田從典祭葬。謚文端。○辛巳。雲南威遠司同知劉洪度查拏夷獍遇賊被害。加贈知府銜。致祭一次。廕一子入監讀書。○壬午。補行山西省雍正五年分軍政。不謹官一員。罷軟官一員。年老官一員。才力不及官四員。分別處分如例。○刑部議覆福建巡撫常賚疏言。建安縣民魏華音勒死親姪魏樟茂。應依故殺姪律擬罪。得旨。尊長致死卑幼。而律例內定罪從輕者。原爲倫常名分起見也。今魏華音因犯偷割稻穀。恐被告發。輒將已故胞兄之獨子。年僅十三歲於昏

夜勒死。以爲誣告圖賴之計。似此兇惡慘毒之人。已在倫常之外。安得尚論尊卑長幼之名分乎。向來定例。未曾詳加分晰。似未甚協朕意。凡因家務及卑幼有過而致死者。仍照舊例。其將卑幼致死。以脫卸己罪。及誣賴他人者。應另定治罪之條。正所以重倫常而厚風俗。著九卿詳悉定議具奏。尋議嗣後有因己身有罪。或與他人有隙。將期親卑幼致死。以脫卸己罪。及誣賴他人者。應照親伯叔奪兄弟之子房產等情故殺例。擬絞監候從之。

○癸未授先賢冉雍六十七代孫冉天琳。五經博士世職。○甲申。以大學士蔣廷錫爲纂修。

聖祖仁皇帝實錄總裁官。○丙戌。調陝西學政左春坊左庶子楊超曾提督順天學政。加原任陝西榆林道朱曙孫翰林院侍講銜提督陝西學政。○以署廣東按察使尹繼善協辦江南河工事務。調河南布政使費金吾爲山

東布政使司布政使。以原任湖南按察使謝旻署理河南布政使司布政使。陞江西驛鹽道劉枬爲江南安徽按察使司按察使。○調福建福州將軍蔡良爲廣東廣州將軍。廣東廣州將軍石禮哈爲福建福州將軍。○刑部議奏熱審案內旗人沈國良等。久經在逃。今自投回應。照律發遣得旨。逃人自行投回。而該旗送部發遣部內。即議以發遣均屬錯誤。似此投回之逃人。仍擬以發遣。則在逃人等

孰肯自行投回。嗣後將逃人在外。曾否爲非。并伊在逃月日次數之多寡。應如何酌量分別治罪之處。著刑部會同旗下大臣詳議定例。永遠遵行。○丁亥。陞署國子監祭酒謝王寵爲順天府府尹。仍署國子監祭酒。○吏部議覆河道總督齊蘇勒參奏監生火政升陳琦假冒考職州同。應照律杖徒。援赦寬免。得旨。大小官職皆國家名器。所關假冒之人。欺君罔上。盜竊名器。其罪較十惡不赦者亦不

爲輕此等之人若僥倖得官出身先已不正何以爲百姓之表率且狡詐性成罔知信義必至於貪贓壞法無所不爲若但以杖徒不足以示懲大政升陳琦著發邊衛充軍不准援赦嗣後永以爲例現在各省官員雜職內若有假冒頂替之人著自行出首朕開恩免其治罪但令革職回籍倘仍戀職潛藏將來或被糾叅或被告發則於邊衛充軍之外加等治罪著通行直省督撫徧諭所屬官員人等知之○戊子敕封河東鹽池神爲昭惠裕阜鹽池之神○己丑調禮部左侍郎通智爲兵部右侍郎工部左侍郎鄂爾奇爲禮部左侍郎仍兼管工部侍郎事○陞山東巡撫塞楞額爲工部左侍郎以山西布政使岳濬署山東巡撫○壬辰諭內閣外省將軍訓練兵丁頗能嚴加約束是以近來兵丁各知安分守法亦能嫻習騎射武藝但駐防兵丁常買地方民人爲僕中多匪類往往自恃旗人

生事不法將軍等有密奏此事者來京陛見之副都統亦有因朕詢問據實陳奏者朕知之甚悉既爲兵丁理應隨時隨地勤苦習勞豈可忘其職分所在多置使令之人營求便安之理兵丁所恃以爲生者惟在糧餉僕從既多所需衣食亦廣一人所得糧餉何能養多人且果係良民豈肯入旗爲奴其入旗爲奴者或在地方被事欲圖報復或賭博飲酒不務本業或係大盜懼捕或爲人命逃避希圖藏身此等之人何能得其力乎況將犯法爲盜之人買爲奴僕一經發覺必貽累己身此皆兵丁愚昧無知貪其價賤妄思多得奴僕曾不計其豢養之艱難罪戾之株連也著行文各省將軍副都統通行曉諭嚴禁嗣後如有違旨收買民人爲僕著該將軍叅處如隱匿不奏著地方大臣官員密奏倘地方大臣官員亦通同徇隱經他處發覺將該管大臣官員及地方大臣官員一併從重治罪

○癸巳以翰林院侍講春山元日講起居注官○雲南巡撫常賡緣事革職調貴州巡撫沈廷正為雲南巡撫陞貴州按察使張廣泗為貴州巡撫調雲南按察使趙弘本為貴州按察使司按察使陞雲南鹽驛道劉業長為雲南按察使司按察使○裁江西布政使照磨一員南昌府檢校一員樂安縣縣丞一員臨江府豐積倉大使一員九江府廣盈倉大使一員南浦所大使一員從江西巡撫布蘭泰請也○丙申諭內閣為政之道以愛民為本愛民者必須厚民之生雨暘時若百穀順成始可登蒼生於衽席然感召

天和必由於民情之舒暢而民情舒暢必由於吏治之克修從來言吏治者不外興利除弊二大端夫利之所在小民自必趨事赴功不待督率而為者為上者不過相導之而已至於除弊則小民所不能為之事而專賴為上之人時刻留心體察破積習以厚民風者也

蓋地方之害莫大於貪官蠹役之朘削強紳劣衿之欺陵地棍土豪之暴橫巨盜積賊之劫奪此等之人不能化導懲戒則百姓不獲安生假若為大吏有司者圖寬大之名沽安靜之譽於貪官蠹役則庇護之於強紳劣衿則寬假之於地棍土豪則姑容之於巨盜積賊則疎縱之雖在己無殘害百姓之實蹟而留此害民之人令百姓暗中受其荼毒無可控訴古人云養稂莠者害禾稼惠姦宄者賊良民如此則民氣何由而舒

天和何由而致乎

天以牧民之任授之君臣而百姓又復敬謹尊奉胼手胝足竭力輸將以事其上為君臣者當共思之受

天之恩奉

天之命食民之食衣民之衣而乃怠忽優游不能鋤姦禁暴置民間疾苦於度外上負穹蒼下負百姓誠天地間之大罪人矣豈但天

理有所不容。即清夜捫心。當如何愧怍。有牧民之責者。各宜撫躬自問。時加警省。慎之勉之。○丁酉。旌表河南封邱縣烈婦王國士妻周氏。拒姦不污。投繯殞命。給銀建坊。入祠致祭。如例。○戊戌。補行四川廣西二省雍正五年分軍政。不謹官二員。罷軟官四員。年老官一員。有疾官一員。才力不及官三員。分別處分。如例。○吏部遵旨議覆。文武官員劣跡昭著者。同城之知府司道。親標該管官。統轄官弁。既分別議處。其不同城者。應減同城一等。分別百里以內。百里以外議處。至屬員劣蹟。正在訪察。而督撫提鎮已先察出。若即行具揭者。其文武官員。照失察例處分。亦應分別同城不同城。與百里以內。百里以外。於疏內聲明。以憑察核。從之。○刑部議覆。署直隸總督宜兆熊疏言。元氏縣民柳文保毆死伊姪柳福滿。應否照鶴六斤之例。准其留養得旨。向例斬絞等犯。非常赦所不原者。其父母年

至七十家無次丁。始將應否留養之處。開明罪犯情由。請旨定奪。此乃法外之仁也。然亦必本犯之罪有可原。其父母之情有可憫。然後准其留養。從前鶴六斤之案。其父母年未七十。而李紱違例。兩請法司議覆。時即照兩請具奏。朕以被毆之人。係抽風身死。情罪尚輕。姑從寬典。准其留養。竝非著為定例也。今宜兆熊等。將柳文保之案。援引鶴六斤之例。兩請具題。該部理應嚴行駁詰。按律定擬。方為平允。今仍照兩請議覆。欲自沽寬大之虛名。而不顧國家之憲典。殊不知將實在有罪之人。枉法縱釋。使死者含冤。生者抱痛。積孽亦已深矣。而欲以此邀福於冥冥之中。有此天理乎。且定例父母七十。方行兩請。是合例之人。尚須酌其情罪之輕重。而後從寬。今若又開未及七十留養之例。將來各省效尤。凡父母現存之人。皆可援以為請。而鬪毆殺傷。擬抵者。無幾矣。兇暴之徒。必至肆行無忌。何



以示懲嗣後若情罪果輕該督撫據實陳奏朕自揆情度理開恩寬宥無得強引留養以開枉法之端○己亥宗人府議奏誠親王允祉受

皇上隆恩不知感激身為親王惟利是視將國家政事置之度外將伊私事妄行瀆奏復因查出勒索蘇克濟銀兩詢問之際情惡怨望在

上前喝責王大臣等毫無臣禮應革去王爵禁錮私第得旨允祉原係昏庸下賈不明大義之人從前

聖祖皇考因伊不孝不忠屢經降旨切責朕御極以來允祉舉動無禮妄行瀆奏之處不可枚舉朕思現在惟此一兄事事容忍昨於諸王大臣前憤怒情狀實屬悖逆但朕兄弟內如此等者幾人故為此種狂妄必欲令朕將伊等治罪其心誠不可解良由朕不能感化所致亦未可謂皆若輩之罪也允祉免其褫

爵拘禁著降親王為郡王撤去佐領四個視其改過與否伊此等悖逆皆由伊子弘晟所致法難姑容著將弘晟等交宗人府嚴行鎖禁嗣後一應交與諸王公等會議之處允祉不必入班○庚子禮部議覆福建總督高其倬疏言原任山西道監察御史蕭震於康熙十三年遭耿逆之變與原任邵武府知府張瑞午等合謀討賊事洩身殉妻妾媳婢同時死節查張瑞午等俱經予卹蕭震亦應照品級致祭一次入功臣廟其妻林氏妾張氏媳鄭氏俱應准其旌表給銀建坊入祠致祭其婢曾氏照例旌表限於名分停止入祠從之○辛丑諭吏部張廣泗現有招撫生苗等事貴州巡撫事務仍著沈廷正署理今張廣泗得以從容辦理俟張廣泗到任後沈廷正再赴雲南新任○禁都察院都事經屢筆帖忒及直省按察使經歷照磨官僭用獬豸補服從都察院左都御史三泰請也○以領侍衛

內大臣尚崇廩總理

三陵事務○壬寅以果親王允禮兼理鑲藍旗蒙古都統事務○松江府知府周中鎡山清裏河把總陸章督築吳淞江險工被溺身故加贈周中鎡太僕寺卿給全葬致祭一次廕一子入監讀書陸章致祭一次廕一子以衛千總用○甲辰調浙江處州總兵官冉起鳳為浙江溫州總兵官浙江溫州總兵官李燦為浙江黃巖總兵官浙江黃巖總兵官方文登為浙江處州總兵官○乙巳諭議政王大臣等內務府自添設御史之後於事甚有裨益今各旗雖原有御史稽查事務並未查奏一事爾八旗不論滿洲蒙古漢軍驍騎參領前鋒參領護軍參領內有為人誠實能通文義者各旗大臣及前鋒統領護軍統領等會同每旗揀選八員引見補授御史四員稽查旗內事務仍兼原任行走如果實心辦事朕將伊等補用部院衙門此時查出事件姑給

數月限期凡有舛錯不齊之處該旗查明改換整理倘仍有不改換整理者於次年正月間參奏其原設稽查旗內事務御史仍照常稽查○添設雲南鎮元府經歷一員宣威州吏目一員恩樂縣典史一員從雲貴總督鄂爾泰請也○丙午調江南京口左翼副都統劉汝霖為正藍旗漢軍副都統陞廣東廣州協領高其伸為江南京口左翼副都統廣東廣州協領董朝衡為福建福州右翼副都統○戊申封故理密親王子弘曠為輔國公

大清世宗敬天昌運建中表正文武英明寬仁  
信毅大孝至誠憲皇帝實錄卷之七十

大清世宗敬天昌運建中表正文武英明寬仁  
信毅大孝至誠憲皇帝實錄卷之七十一

監修總裁官光祿大夫經筵講官太僕寺卿弘文館大學士兼禮部尚書總理事務王公大臣等

總裁官光祿大夫經筵講官起居注太僕寺卿弘文館大學士兼禮部尚書總理事務王公大臣等

纂修官光祿大夫經筵講官起居注太僕寺卿弘文館大學士兼禮部尚書總理事務王公大臣等

纂修官光祿大夫經筵講官起居注太僕寺卿弘文館大學士兼禮部尚書總理事務王公大臣等

纂修官光祿大夫經筵講官起居注太僕寺卿弘文館大學士兼禮部尚書總理事務王公大臣等

敕修

雍正六年戊申秋七月庚戌朔享

太廟遣裕親王廣祿行禮○大學士等工部  
奏銷雍正二年分錢糧黃冊遲延不奏特於  
今年六月初一日始行進呈朕令大學士等  
詰問工部堂官隨經大學士等奏黃冊乃  
按日記載之檔案何事不在其內定例凡遇  
朔望吉期在京各衙門進呈奏章俱各詳加  
檢點黃國材等任意疎忽全無敬謹之心應  
將伊等交部嚴加議處等語夫  
天道福善禍淫賞善罰惡書經曰惠迪吉從逆

凶此外別無可以趨吉避凶之道至於忌諱  
機祥乃庸人下愚之見朕察理極明惟知順  
理以爲事

天之本毫無避忌爾等大學士侍左右諒無  
不深知者但人臣事君之道當時存敬謹忠  
愛之心是以每逢佳節吉辰呈送本章皆留  
心檢點此亦自古相沿之例至於奏章內有  
陵寢字樣者亦必留心檢點蓋恐陳奏披覽之  
時觸目傷感也朕之思念

皇考

皇妣無時稍釋於懷而於吉旦清晨必焚香瞻  
禮豈因展閱黃冊見

陵寢字樣然後悲感於心乎只因工部堂官等  
全無尊君親上之心怠玩疎忽不得已詰問  
申飭冀其醒悟悔改又恐此輩庸鄙無知以  
爲朕因避忌月朔不快於心將黃冊發出降  
旨切責是以特令伊等於今日月朔進呈朕  
覽面加曉諭所以開導伊等之愚蒙而教以

尊君親上之大義竝使衆人共知之○以翰  
林院侍講凌如煥充日講起居注官○旌表  
湖南靖州烈婦趙聯會妻鄧氏于歸三月夫  
故投繯廣東順德縣烈女何瑞謙聘妻胡氏  
夫故奔喪服闋自盡各給銀建坊入祠致祭  
如例○辛亥諭內閣戢盜乃安民之首務稂  
莠不翦則嘉禾不生姦宄不除則良善不安  
此一定之理朕時以此訓飭各省督撫有司  
諄諄往復而能實力奉行著有成效者甚少  
如江南蘇松等地方盜案多於他處而陳時  
夏等竝未將積惡渠魁緝拏懲治范時繹管  
轄三省戢盜之才亦覺不足是以下江地方  
盜風不能止息小民受其擾累朕深爲厯念  
浙省盜案向來亦多自李衛莅任以來留心  
整理匪類知所畏懼文武屬員協力緝捕不  
致漏網又派委文武官弁分地巡查將盜賊  
拐逃假銀扒手賭博等犯嚴拏懲治以儆刁  
頑而安善類李衛甚屬可嘉著將江蘇所屬

七府五州除錢糧刑名外。其一切盜案俱交與李衛管理。文武各官受其節制。有能盡心緝捕。及疎防貽誤者。聽其舉劾。遇有緝捕訪拏盜賊等事。各營兵弁聽其調遣。江南督撫等官亦仍照舊辦理。不得因李衛管理稽查盜案而生推諉之念。○總理營田水利事務怡親王允祥奏。効力主簿梁文中在薊州營治水田。將水泉微細之地。捏報堪營。因民間觀望。差拘責比。復逼迫民人。將已中豇豆高糧等項拔去。請將梁文中革職。交直隸總督審擬。得旨。凡興修河渠田畝等事。朕意本欲惠養斯民。為地方永賴之利。乃差往人員等奉行不善。轉為閭閻之擾。前聞直隸工員內有因營治稻田。拔去民間已種豇豆之事。因諭令怡親王確查。今據怡親王等查實。叅奏梁文中不行曉諭於事先。乃將已成之禾稼逼令拋棄。違理妄行。顯欲阻撓政事。非無心錯誤可比。該巡察御史苗壽陶正中。何以

不行查叅。梁文中所犯既實。不必交與該督再審。著革去職銜。即於工所枷號示衆。其所毀壞豇豆。著於梁文中名下照數追賠。○戶部議覆浙江總督李衛疏言。紹興府屬上虞縣沿海民田。歷年為潮汐侵削。坍塌沒五千餘畝。皆係業戶賠納錢糧。不勝其累。而上虞夏蓋湖周遭一百餘里。就中漲淤之地。已有私墾成田者。因令該縣查丈已墾者。許民自首未墾者。許民認業。共計田六千七百三十畝。請將坍塌應徵銀五百六十餘兩。即行除額。其新墾田於雍正六年起科。庶額賦永清。公私兩便。應如所請。從之。○補行湖南省雍正五年分軍政有疾官一員。處分如例。○癸丑。陞光祿寺卿王璣為通政使司通政使。○宗人府叅奏。輔國公敬恒。三陵朔望行禮。不遵會典。違例濫用贊禮郎。甚屬僭越。應革去輔國公。從之。○甲寅。諭刑部。嗣後漢軍除犯死罪外。其犯軍流者。兩部行

文該旗將其祖父或係從龍舊人或有軍功陣亡之處查明奏聞再漢軍犯罪既照例發配即照民人例杖責發落○調刑部右侍郎單疇書爲戶部右侍郎禮部右侍郎彭維新爲刑部右侍郎陞內閣學士蔡世遠爲禮部右侍郎○浙江總督李衛疏報象山等六縣開墾雍正五年分田地二十四頃有奇下部知之○河東總督田文鏡摺奏河南府孟津縣居民翟世有以耕種爲業本年四月有陝西三原縣人秦泰販買棉花遺銀一百七十兩翟世有在路拾獲歸告伊妻尋遇原主給還不取分毫并不受謝義舉清操已經給匾嘉賞竝請立碑獎勵奉

上諭天下之治平在乎端風俗而風俗之整理在乎正人心若人之存心果能守法奉公安分知足則不貪苟得之財不爲非理之事余影無愧俯仰寬舒而和氣致祥自然災害潛消諸福畢至子孫竝獲安享所謂積善之家

必有餘慶也朕愛養黎元教誨諄諄至詳且悉惟期薄海內外革薄從忠以成蕩平正直之治而地方大吏有司等既不能躬行禮讓以爲民之倡復不能懇切周詳以宣朕之訓是以還淳返樸之風不多概見朕心實企望之今見孟津翟世有之事乃風俗休美之明徵國家實在之祥瑞也朕心深爲嘉悅夫秉彝好德人心所同十室之邑必有忠信宇宙之大兆民之廣豈無崇廉尚義之人祇因大吏有司不以民風淳薄爲念或遂至湮沒不彰耳果能化導訓迪於平時而遇忠孝節義之人敬禮表揚以爲衆人之勸則奮發興起豈不成比戶可封之俗乎翟世有著給與七品頂帶仍賞銀一百兩以旌其善凡人境遇之豐嗇貧富皆有一定之數不可以倖而致假若貪者有餘而廉者不足則是定數不足憑而天道不可問矣無奈世人貪心一萌遂以明白淺顯之理不能知覺而見利思義

不拾遺金。便爲古今罕觀之事。如翟世有者。乃耕田力作之農民。未必備讀聖賢之詩書。取法古人之行誼。而天性樸誠。不欺暗室。用能化導其妻。共成義舉。是以令聞達於朝廷。拜章服帑金之賜。如但計一時之利。所得不過百餘金。用輒易罄。較今日之榮名。豈啻霄壤之分哉。儻人人觀感興起。皆能如此存心。則不但成讓路讓畔之休風。而本人亦必受上蒼之嘉祐。荷國家之恩榮。詎不美歟。上年京

城內有鋤草夫役六十一者。於伊草車內。拾得銀五十兩。不肯私取。當官呈出。隨經該管官員奏聞。朕已降旨獎賞。此事與翟世有之還金相類。朕爲人心風俗起見。特頒此諭旨。通行曉諭。內外官民人等知之。○乙卯。添設四川鹽驛道衙門鹽茶大使一員。從四川巡撫憲德請也。○工部議覆。河道總督齊蘇勒等疏言。瓜洲河道。乃糧船經行要區。前因江流北徙。挑挖月河一道。河口窄狹。水勢涵湧。

逼近城垣。似宜堵閉。查舊時運口離城頗遠。河形寬濶。兩岸土堅。請令空重糧船。仍由故道。其淤淺之處。挑浚深通。其現存閘座完固。毋庸另修。閘之內外。請建夾壩三道。攔河柴壩一道。乘時修築。俱應如所請。從之。○丙辰。諭內閣。工部將國子監建立碑亭。繪圖呈覽。其舊立碑亭。有用黃瓦綠瓦之不同。朕詢問工部侍郎法保。吳士玉皆茫然。不能置對。國學建立碑亭。典禮攸關。司其事者。自當詳考源委。然後入告。乃法保。吳士玉於辦理陳奏之事。漫不經心。有玷職守。著交部嚴加議處。○調鑲白旗漢軍副都統輝邦。爲本旗蒙古副都統。鑲白旗蒙古副都統梁永熙。爲本旗漢軍副都統。○戊午。江西巡撫布蘭泰。奏清江縣知縣牛元弼。於需雨之時。並不親身祈禱。屠宰甫禁。旋開張筵唱戲。政務不理。臨江府知府吳恩。景代爲隱飾。請一併革職。得旨。牛元弼。於屠宰開禁之後。開筵唱戲。不比祈

禱之時。若牛元弼平日性好聲歌。耽於逸樂。則布蘭泰何以不早行參奏。至所參政務不理。亦當實指其廢弛者何事。今因一時意見。遽將該縣嚴叅。竝知府一同革職。定例內屬員犯貪贓重罪者。知府徇庇。及失於覺察。其處分止降級調用。今因屬員唱戲。而遂將知府奏請革職。似此越例之事。幾有作福作威之意矣。朕之待督撫大臣。深加信任。常有督撫叅劾尚輕。而朕從重處分者。總以揆情度理。期於公當而已。凡爲督撫者。當爲國家愛惜人才。而於叅劾之間。尤當加意慎重。若誤去一幹員。其過更在誤薦劣員之上。蓋薦一劣員而誤用之。異日自然敗露。若將幹員誤行罷斥。則其人終身放廢。不可復振。天下人才幾何。豈可因一時之喜怒。而濫行摧折乎。察吏之道。公明二者。缺一不可。若存心本公。而識見不到。必致爲屬員所欺瞞。浮言所蒙蔽。布蘭泰之存心。雖無私徇。而少知人之明。

且瑣屑不識大體。地方雨暘之時。若水旱之爲災。全係乎督撫大臣之感召。若果能布德行仁。安民察吏。自能上感。

天和。豐亨有慶。若政事有關。舉劾失宜。以致雨澤不能應時而降。此時徒恃祈禱之虛文。已屬庸鄙之見。而乃欲諉過於屬員。以謝己之責。不亦屈抑之甚乎。牛元弼。吳恩景。不必革職。若二人任內。另有虧空劣蹟。著布蘭泰查明續叅。再降諭旨。若別無款蹟。可叅者。將牛元弼。吳恩景。送部引見。候旨另用。○雲貴總督鄂爾泰疏報。四川所屬涼山。近連米貼。地甚荒野。吞都沙馬。雷波。黃螂等。各土司。俱係米貼。猓賊。祿永。孝妻。陸氏之姻親。賊黨有恃。故敢於蠢動。吞都土司。德昌。助惡謀逆。臣檄令鶴麗總兵。張耀祖等。三路進剿。已將首惡陸氏擒獲。其未獲之德昌。現檄軍弁。攻取山寨。以絕根株。得旨。米貼逆夷。肆行不法。抗拒官兵。鄂爾泰。令總兵張耀祖等。領兵深入。直



搗賊巢擒獲渠魁撫定餘黨。在事弁兵著從優議敘賞賚。湖北巡撫馬會伯疏報鍾祥等六縣開墾雍正五年分田地三十七頃有奇。下部知之。已未。

孝懿仁皇后忌辰遣官祭

景陵。以陝西巡撫西琳署陝西西安將軍。庚申諭內閣。向來督撫赴任之時。有奏請將平日所知人員帶往。以備委用者。朕因督撫事務甚繁。欲得素所熟悉之人。以收臂指之效。事屬可行。是以允從所請。令其帶往。酌量題補。近聞督撫等帶往人員。在地方不甚相宜。或羣相趨奉。而指爲上司之腹心。或妄生議論。而以爲上官之偏袒。其中弊端日生。以致流言不少。如楊文乾請帶王士俊。殷邦翰前往廣東。楊文乾信用之。廣東闔省人心不服。陳時夏請帶蔡益仁往蘇。而江南之人指爲陳時夏之耳目。莽鵠立請帶朱亨衍李敏德。傅樹崇往陝西。原爲備辦軍需。乃不令効

力一事。藩司孔毓璞即逢迎巡撫以一人委署二缺。而命往試用之員。不行委署。此皆帶往人員。不宜於地方者。朕思所帶之二三人。其得力有限。而沮衆人効力之心。則爲益少而無益多。况屬員之微愆小過。上司本應曲體保全。而既爲督撫帶往。親信之人。理當畏避嫌疑。有不便格外保全之勢。亦非所以愛惜人才也。且督撫等果公正精明。善於察吏。則闔屬中。豈無有廉幹之員。可相信以心。相資爲理者。何必於帶往之一二人是賴。而啟衆口之疑議乎。文官與武職不同。武職以弓馬技勇爲主。有操練兵丁。差委巡緝之事。督撫提鎮等。將熟悉之人。奏請帶往。以供使令。可以得其効用之益。至於文員。則不應帶往。從前督撫等之奏請。甚非。朕亦不當允從其請。除督撫已經到任之後。因本地要缺奉旨題補。而本地不得其人。將別省舊屬題補者。不必解任外。如楊文乾。陳時夏。莽鵠。李及各

省督撫大吏。從前所請帶往之人。目今現在屬下者。俱著回京。請旨另用。○山西巡撫覺羅石麟奏報。滎河縣沿河地方。黃河水漲。被淹村莊。共十有八處。現在設法撫恤。得旨。地方年穀之豐歉。水旱之有無。全係乎督撫政事之得失。天人相感之理。確乎不爽。石麟自任巡撫以來。精神不能周到。才力甚覺勉強。朕已屢次訓飭。兼為地方廛念。今滎河縣果有河水泛溢。淹及村莊之事。夫黃河之在山西。尚非險要之處。而今歲入夏以來。又非多雨之年。乃忽聞水漲為患。豈非封疆大吏。政事有關。故

上天垂象以示儆乎。凡督撫之責。全在於察吏除盜。以安輯百姓。儻不能盡斯二者。必致上干

天和。黎庶并受其困。凡屬封疆大臣。當如何之。黽勉盡心。以稱職任。而大臣等之保薦督撫者。當如何之。公忠詳慎。務令得人以副君上

之諮詢。造生民之福澤乎。其滎河縣被水之民。加意撫恤之處。著該部速議。尋議按名散賑。務使均沾實惠。從之。○辛酉。戶部議覆倉場侍郎岳爾岱等奏言。現今天庾充盈。倉廩不足存貯。請另加建造。應如所請。除京師九倉。現有廩座外。應相擇高敞之區。與車運相近之處。建倉廩一百七十一座。收貯新糧。從之。雲貴總督鄂爾泰疏報。米貼賊黨悉平。鶴麗總兵張耀祖所領官兵已於五月二十六日撤回。其井底壘及沿江渡口等處。原議駐兵三百名。請添設二百名。足資巡察防範。得旨。米貼之事。既竣。滇兵可以回汛。目下逃竄。不過逆夷吞都土司德昌一人。易於緝捕。其勦撫雷波土司。川省所撥之兵。自足辦理。四川提督黃廷桂有應行知會滇省官弁之處。著黃廷桂就近知會。餘照所請行。○雲貴總督鄂爾泰摺奏。烏蒙案內革職土司祿鼎坤。乃祿萬鍾之親叔。向居魯甸。亦屬渠魁。而

當日官兵進勦烏蒙時。祿鼎坤帶領二子。及魯甸頭目等。投見知府黃士傑。隨經總兵劉起元。給以外委守備。立功贖罪。及臣親至東川。又復給牌。准其効力錄用。祿鼎坤始而前往化導。祿萬鍾母子。勸其歸順。因主文劉建隆等抗違不從。帶領祿萬鍾母子。逃往大關。鼎坤自備口糧。督領土兵三千。直搗鎮雄之脇。是以萬鍾計窮勢迫。投奔川營。且招撫烏蒙頭目五十餘人。各目所屬百姓數千戶。俱赴營投順。逮米貼陸氏等。勾通川獠。抗拒官兵。鼎坤願以妻子爲質。調率土兵。親往効力。又有同案之白頗阿業。亦隨鼎坤投誠者。前陳明哲等抗違拒敵。阿業曾率土兵血戰破圍。此皆有功之夷人。祿鼎坤今應遠徙江寧。阿業因其兄係叛案重犯。緣坐應流。仰懇俞旨。可否寬免。奉

上諭朕怙冒萬方內地外夷皆同仁一視本欲其胥歸於善以受朝廷撫綏教養之恩祿鼎

坤既能悔過自新輸誠向化且奮勇努力以助官軍與兇苗之怙惡不悛者相去霄壤應加特恩以爲衆人之勸前經鄂爾泰題請照新定之例將祿鼎坤發往江寧安插今加特恩免其跋涉遷移即令安插雲南省城將祿鼎坤隸總督標下管轄令鄂爾泰酌量題授職銜并賞給養贍之資俾得從容敷用以示恩獎其同案之白頗阿業亦能悔罪輸誠著將流徙之罪開恩寬免○川陝總督岳鍾琪

奏報據西藏駐劄之叅將顏清如呈稱五月二十五日頗羅鼐率所部兵由潘玉口至喀巴地方先遣兵一千餘名衝戰喀木卡倫與隆布奈之兵相敵是夜西藏斥埃兵丁俱隨從頗羅鼐二十六日頗羅鼐率兵直抵西藏駐藏大臣馬臘僧格即往布達拉地方守護達賴喇嘛頗羅鼐一面安撫西藏一面派兵將布達拉地方圍困二十七日馬臘僧格回至西藏二十八日各廟喇嘛將阿爾布巴隆

布奈扎爾鼐等擒獻頗羅鼐將伊等拘禁。遂來見馬臘僧格告稱。今率阿里及後藏兵共九千餘名。前來西藏。既獲讎人。即欲回後藏防守隘口。兵丁等乞奏聞。

皇上加恩賞賜等語。臣查頗羅鼐於大兵未到之前。奮勉報讎。擒獲渠魁。此皆

聖主恩威遠布之所致。但渠魁雖已就擒。阿爾布巴之子哀布現在江達。率兵駐劄。臣行令鑾儀使周瑛嚴加防範。俟大兵到藏。協力攻

勦。至頗羅鼐之兵九千餘名。請加賞賜。以示鼓勵。得旨。頗羅鼐兵丁殊爲効力。著查郎阿等將預備軍需錢糧內。動支三萬兩。給與頗羅鼐。令其酌量賞兵。旌表雲南鎮沅府烈婦王得遠妻張氏。猘賊害夫。赴火全節。給銀建坊。入祠致祭。如例。甲子中元節。遣官祭永陵。

福陵。

昭陵。

昭西陵。

孝陵。

孝東陵。

景陵。

上詣

恩佑寺行禮。禮部議覆山東巡撫塞楞額奏報商河縣民張煥之妻李氏。於雍正二年壽登百歲。因伊夫服制未滿。獎慶之禮。不忍舉行。今已服闋。理合舉報。應照例予旌。得旨。李

氏壽越期頤。心明大義。高年淑範。實屬可嘉。著賞賜內府緞二端。貂皮四張。人參二觔。以示朕格外加恩之至意。旌表江蘇沛縣烈女魏宣女魏氏。年幼禦暴。忿激自縊。給銀建坊。入祠致祭。如例。乙丑。諸王大臣等疏奏。西藏阿爾布巴等殺害駐劄西藏之貝子康濟鼐。罪難寬宥。今頗羅鼐仰仗天威。率兵直抵藏地。將渠魁阿爾布巴隆布奈扎爾鼐三人悉行擒獲。西藏平定。合詞奏賀。得旨。阿爾

布巴等背理妄行。藐視國法。朕爲綏靖邊陲之計。特命大臣領兵前往察究情由。就近申討。今據奏報。頗羅鼐率所部兵馬。先抵藏地。其各寺喇嘛。將首惡之阿爾布巴等三人。獻出拘禁。渠魁既已就擒。藏地可以寧謐。在大兵不發一矢。在西藏未傷一人。此等大事而成功之易。若此。是皆仰賴

上帝之垂慈。

皇考之默佑。實非朕涼德之所及也。因諸王大

臣等陳奏。將此宣諭知之。○丁卯。正白旗漢軍副都統董一隆。緣事革職。以原任侍郎常保爲正白旗漢軍副都統。○戊辰。陞陝西肅州總兵官紀成斌爲陝西固原提督。陝西洮岷副將樊廷爲陝西肅州總兵官。○署直隸總督何世璽疏報。宣化府深井堡等處。開墾本年分田地六十頃有奇。下部知之。○己巳。諭禮部。怡親王之子弘曠薨逝。弘曠係王妃所出。著照貝勒例殯葬。○以署翰林院掌院

學士事。通政使司通政使留保。翰林院侍讀學士覺羅逢泰。俱充經筵講官。○戶部議覆。浙江總督兼理兩浙鹽務事李衛遵旨會議。署兩江總督范時繹等條奏兩淮鹽務七條。一。各竈燒鹽處。令商人公舉幹練殷實者。按其場竈酌用數人。并設立竈長巡役。查核其鹽觔多寡。盡入商垣。以杜竈丁私賣之弊。一。各場大使。將入垣鹽觔數目。按月冊報該御史衙門察核。以杜隱藏偷售之弊。一。凡州縣場司。俱令設立十家保甲。互相稽查。遇有私販。據實首明。將本犯照例治罪。私鹽變價分別賞給。誣者治以反坐之罪。儻有徇隱等情。被旁人告發者。該州縣場司官。照失察私鹽例。叅處一。兩淮所轄隔省案件。惟恐呼應不靈。且長途解審。往反滋累。請轉飭湖廣。江西。河南等省。各驛鹽道。加意督緝。將鹽務案件。就近審理完結。一。兩淮地方遼闊。兼有長江之險。私梟易於盤踞。請令該督撫提鎮。鹽政

嚴飭官弁兵役巡查口岸。實力緝拏。場員俱係雜職。且賢愚不等。請令該督撫將所屬場官確加甄別。如果實有堪用者。仍行留任。其餘應請揀發家道殷實之候補候選同知等員。管理場務。一貧難小民。許其負鹽四十觔。於不銷官引地方。易米度日。如有私相買賣。併於銷引地方。公然貨售。及假託肩挑背負運送窩囤。合成大夥私鹽等弊。該地方官立即嚴拏。照私鹽併數律治罪。以上七條。俱應如所請。從之。○旌表河南南陽縣烈婦郭振江妻李氏。拒姦不辱。被毆殞命。給銀建坊。入祠致祭如例。○庚午。敕封京都風神。為應時顯佑風伯之神。○河東總督田文鏡疏報。祥符等九十五州縣。開墾雍正五年分田地六千八百八十三頃有奇。下部知之。○辛未。諭刑部。為治莫要於安民。安民莫急於弭盜。朕夙夜孜孜。勤求治理。無時不以安輯萬姓為念。豈忍沽寬大之虛名。姑息養姦。以貽害

吾善良之赤子乎。邇者各省文武大吏亦知仰體朕懷。嚴緝盜賊之踪跡。窮治盜賊之根株。如浙江江南數十年之大盜積賊。悉行拏獲。而究問從前。則供出劫財害命之案。不可勝數。似此狡獪渠魁。尚不能逃於法網。則凡為盜賊之人。其可不知悔懼乎。朕念為盜賊者。前此之愚頑。皆自陷於死而不知。而今此之窮蹙。又將求其生而不得。輾轉思維。深為不忍。因是特頒訓諭。指示迷途。而望其自新。悛改。凡為盜賊者。皆吾民也。乃不肯為國家愛養之良民。而甘為國家誅殛之匪類。豈非自作之孽。更復何所歸咎乎。而為盜賊者。每藉口於饑寒所迫。計出無聊。夫慮饑寒者。謀生之心也。而為盜賊者。取死之道也。以求生之心。而趨必死之路。雖在下愚。不應出此。凡能為盜賊之人。必非老弱殘廢之輩。有可用之膂力。有可用之心思。若務農耕種。負販傭工。即可為餬口之計。或入營食糧。當差効力。

且可爲上進之階。宇宙間謀生之人百千萬億而謀生之策亦甚多端。奈何作此喪心昧理違條犯法之事乎。蓋由此輩或遊手好閒或賭博縱飲或好勇鬪狠。一旦困乏窮苦利欲薰心。遂生殺害劫奪之念。以爲昏夜之間無人識認。未必即被拘執而受刑戮也。不知一案敗露。則衆案皆難掩藏。一人被擒。則夥黨皆難隱匿。往事具在。豈不聞之。盜賊若肯爲善良必不致於饑寒而死。以視身首異處肆於市曹。桎梏囹圄。傷殘肢體。父母妻子遷徙流離。果何得而何失。孰危而孰安乎。朕心惡此輩之肆行不法。又深憫此輩之愚昧無知。示以自新之路。特施法外之仁。許其自首免罪。凡各省盜賊未經緝獲到官者。其中爲首造意及傷害人命之犯。若自行陳首。朕酌其情稍可原者。量從寬減。若被人引誘迫脅跟隨爲盜之犯。自行出首。則將伊應得之罪予以寬宥。俾得改除舊惡。永爲良民。受國家

惠養之澤。若此旨既到之後而爲盜賊者。不行自首。其有已經自首免罪之後而復爲盜賊者。定行加重治罪。儻有不肖官員因盜案不結。有碍考成。賄買無賴之人冒認爲盜。自行出首。以圖銷案者。一經察出。將賄買之官及代認之人俱即正法不貸。著在京在外地方大吏通行所屬。俾遠鄉僻壤之民咸共知之。壬申戶部議覆四川巡撫憲德疏言。夔州關稅向委夔州府知府監收。請於己酉年爲始。照許墅淮關例。派差監督一員徵課。按年遴員更換。應如所請。從之。○予故太子太傅武英殿大學士富寧安祭葬。謚文恭。○癸酉山西巡撫覺羅石麟疏報太原等府開墾本年分田地三千一百五十頃有奇。下部知之。○甲戌兵部議覆署兩江總督范時繹疏言。漕標之廟灣鹽城二營原係沿海地方。汛遠兵少。稽察難周。請於射陽湖口。窰子港。添設守備。把總各一員。兵二百名。佃湖集。添設



千總一員。兵五十名。小關子。添設守備。把總各一員。兵二百名。駐劄汛地防守。總屬漕標統轄。并添沙船八隻。分撥遊巡。應如所請。從之。○乙亥。諭內閣。前山東叅革知縣朱成元。令家人叩閤一案。朕命學士繆沅。前往審理。據繆沅將朱成元蒲臺縣任內。餽送巡撫布按各官規禮印簿。查出陳奏。朕一一閱看。知係朱成元任內二十餘年。餽上司之陋規。而自雍正元年以後。仍復餽送如故。已交部嚴察議奏。自朕即位以來。嚴飭官方禁止私賄。又恐督撫等官。用度不敷。暗中巧取。是以給與養廉之項。俾其公私有賴。俯仰從容。庶永杜苞苴。以爲澄清吏治之本。蓋上司既受屬官之餽遺。又何以禁止屬官之貪墨。甚至以餽遺之多寡。分情誼之厚薄。則屬員之優劣。何由辯別。而吏治尚可問乎。各省督撫養廉之項。皆經奏聞奉旨者。司道等官。亦皆於公用內支給。其無公項可支之員。亦應於督撫

前陳明。准其收受何項。以爲用度。豈有朝廷既給養廉。而仍收受屬員陋規之理。今觀山東巡撫司道等官之私受陋規。如故則他省或有似此欺隱私受者。亦未可知。著各省督撫。一一嚴查。據實陳奏。在地方官薪水之資。自不可缺。但於屬員之手。接受節禮陋規。則斷乎不可。目今各省內。或有尚未分給養廉之員。著各省督撫。悉心商酌。辦理奏聞。寧可以州縣應出之項。解至藩庫。從公發給。而不使其自相授受。廢公議而徇私交。留禮儀交際之名。而長貪婪賄賂之弊也。儻再有私收規禮者。將該員置之重典。其該管之督撫亦從重治罪。○諭正紅旗漢軍都統等。原任大學士甯完我。乃國家舊臣。朕念伊功績。查伊後人具三世孫甯蘭人老成。若有驍騎校缺出。帶領引見。甯蘭家貧。賞住房一所。內庫銀五百兩。四世孫甯邦壘人平常。係康親王屬下。交與康親王給伊拜唐阿錢糧。若能習



文即令其讀書。儻不能習文。則挑在拜唐阿上。教導行走。成就時。著王泰聞（內務府總管常明奏報。盧溝橋遵旨蓋造官房。安歇會試舉子。工程告竣。得旨。此朕體恤應試舉子之意。俾其有旅次居宿之安。而無盤查行李之擾。但恐各省舉子。未必知有新設頓宿之處。著禮部行文各該督撫。通行曉諭。竝令崇文門每年查稅官員。實心奉行。嚴飭巡察人役等。毋得借端稽留。額外苛索。）丙子。以署

江蘇巡撫張坦麟為內閣學士兼禮部侍郎。仍署理巡撫事務。戊寅。刑部尚書勵廷儀條奏。請除監生考職倩代頂冒之弊。得旨。各省監生。每於考職之時。或憚於跋涉。或不諳文理。常託在京之親戚朋友。代為應考。而本人安坐原籍。濫竊職銜。此等陋習。相沿已久。是以數年來。朕特遣大臣等。司考試之事。及後訪察。知考試之臣。亦只能校閱文藝。不能除假冒之弊。故於上年考試之後。朕令將一千一

百餘人。通行引見。彼時伊等自知頂冒情虧。不敢報名引見者。九百餘人。俱經降旨革退。其引見之二百餘人。朕以為皆係正身。又見其中有人材可用者。因揀選七十餘人。交部即用。或令外省督撫試用。且有加恩用至知縣知州等官者。近聞此即用人員之內。竟尚有頂冒之人。似此敢於欺罔。可謂慙不畏死者矣。今朕開恩。准其自行出首。若代考得官之人。遵旨出首。朕酌量寬減其罪。其託人代考者。情罪較輕。若遵旨出首。但革去監生。不治其罪。儻仍前隱匿不首。一經察出。將與者受者。即行正法。其從前歷來考職監生。有代考得官者。俱照此例行。（吏部議。領侍衛內大臣公在內閣辦事。馬爾賽等奏。工部所造黃冊。屢經催辦。乃任意遲延。特於月朔吉日進呈。顯係怠玩疎忽。應將尚書黃國材侍郎鄂爾奇。吳士玉。法保。申大成。照溺職例革職。得旨。黃國材。鄂爾奇。法保。俱著革職。從寬

留任。吳士玉革去工部侍郎。著在內閣學士內効力行走。申大成著革職。○加工部主事管式龍翰林院檢討銜。提督湖北學政。○改四川遵義桐梓綏陽仁懷四縣。正安一州。及遵義協官兵俱隸貴州管轄。從雲貴總督鄂爾泰請也。○賑甘肅蘭州電災饑民。

大清世宗敬天昌運建中表正文武英明寬仁  
信毅大孝至誠憲皇帝實錄卷之七十一

大清世宗敬天昌運建中表正文武英明寬仁  
信毅大孝至誠憲皇帝實錄卷之七十二

救修

雍正六年戊申八月己卯朔諭直省督撫等

知府一官管理通郡有察吏之責如知府得人則察吏以安民於地方實有裨益但知府內有僅係循分供職不能察吏而又素無過犯不至於叅劾者此等人員若令其久任地方於屬員賢否必不能詳察周知於吏治無益著各省督撫將見任知府詳加甄別其有才具中平不能察吏者一面具題以在京部屬改補仍令該員暫留本任辦事一面於本省同知以下知縣以上等官內揀選能勝知

府之任者保題送部引見如所保人員可用准其補授俟伊到任後著前任知府交代清楚來京以部屬之缺改用如此則因才器使辦理部務得人而各省知府均屬勝任之員矣若所保人員到京引見時朕察其才具亦屬中平則仍將前任知府留於原任各省督撫宜秉公詳擇以副朕澄敘官方之至意○庚辰福建巡撫朱綱奏言各省舉行耕藉典禮於雍正四年奉旨選擇潔淨豐腴之地建壇置田又於雍正五年接部頒儀注內載耕田應在東郊但閩省州縣前此已建之壇已置之田有不在東郊者今若悉令更改而地勢各有不同或依山濱海甚難辦理奏聞請旨得旨禮部所議耕田儀注引禮記天子耕於南郊諸侯耕於東郊之文是以將各省耕田議於東郊建置此禮部識見拘泥之處夫建立藉田必在郡邑近城之地而各郡各邑地勢不同其城東一面或依山嶺或近河渠

未必俱係平壤即無山水阻隔亦未必俱係潔淨豐腴之區安得以諸侯東郊爲比而令地方有司難於辦理乎況已建之壇已置之田又令遷移他所不但耗費更張亦大非敬謹虔誠之道閩省已設壇田不必更動其各省與此相類者著將此諭旨通行各巡撫曉諭所屬知之○壬午諭議政王大臣管理旗務王大臣等九門雖有官兵看守俱在城內居住其城外並無看守官兵或於吊橋附近空間之處修造營房派兵數百名居住看守甚屬有益著會同詳議具奏尋議除正陽門外有巡捕營官兵不必令旗兵看守外崇文門等八門外於沿河空間處修造房屋各滿洲蒙古漢軍三旗派章京四員驍騎校四員馬甲二百名挈家移住其房屋章京八間驍騎校五間兵丁二間於城門附近修造堆子八處令官兵等輪替該班於附郭等處不時巡查匪類從之○擢監察御史宗室塞爾赫

爲都察院左副都御史○以降調光祿寺少卿汪澄爲光祿寺卿○癸未

上回宮○甲申。

上御經筵講畢。賜大學士九卿詹事及講官等宴○諭內閣官員有涖民之責其語言必使人人共曉然後可以通達民情而辦理無誤是以古者六書之制必使諧聲會意嫻習語言所以成導道之風著同文之治也朕每引見大小臣工凡陳奏履歷之時惟有福建廣東兩省之人仍係鄉音不可通曉夫伊等以見登仕籍之人經赴部演禮之後其敷奏對揚尚有不可通曉之語則赴任他省又安能於宣讀訓諭審斷詞訟皆歷歷清楚使小民共知而共解乎官民上下語言不通必致吏胥從中代爲傳述於是添飾假借百弊叢生而事理之貽誤者多矣且此兩省之人其語言既皆不可通曉不但伊等歷任他省不能深悉下民之情即伊等身爲編氓亦必不能

明白官長之意是上下之情扞格不通其爲不便實甚但語言自幼習成驟難改易必徐加訓導庶幾歷久可通應令福建廣東兩省督撫轉飭所屬各府州縣有司及教官遍爲傳示多方教導務期語言明白使人通曉不對可得詳明而出仕他方民情亦易於通達矣諭刑部凡州縣正印官因公出境遇有即應正法人犯理宜即令本州縣之佐貳官監決其應如何定例之處著查明議奏尋議凡遇決不待時之犯部文到日正印官因公出境即令同城之州同州判縣丞主簿等官會同本城之武職官并遵查不停刑日期代行監決再查州縣內無佐貳官之處甚多而吏目典史官職卑微不便令其監決應令該知府於部文到日即派委府屬之同知通判經歷等官星速至該州縣亦會同本城之武職官并遵查不停刑日期代行監決著爲定

例從之。命江西巡撫布蘭泰來京以署江蘇巡撫內閣學士張坦麟署江西巡撫內閣侍讀學士協辦河工事務尹繼善署江蘇巡撫。雲貴總督鄂爾泰疏報雲南鎮沅府開墾彝田四百三十頃有奇下部知之。免江南高郵桃源等七州縣雍正五年分水災額賦有差。○乙酉諭吏部州縣爲親民之官地方事務全資料理凡有委署印務者必鄰近地方始能兼顧向來督撫藩司等委員署印每憑一己之私心而不計道里之遠近此習相沿已久近日秉公之上司已將此等陋習剔除而其餘尚有未能盡改者如常賚官達之在廣東則以韶州府乳源縣令署廣州府之花縣又以廣州府花縣令署惠州府之海豐縣此皆隔府差委相去數百里之遠者夫州縣一官錢糧必及時徵收盜賊必立時緝捕人命必當時相驗承審案件必如限完結若於數百里之外兼攝印篆不但顧此失彼

諸務廢弛而吏役奔忙人犯拖累種種遲誤之處難以悉數嗣後州縣缺出該上司等必須選委鄰近官員署理儘正印官一時不得其人即遴選鄰近之賢能佐貳官署理如係地方要缺鄰近難得其人則將隔府正印官委署另委官員以署該員本縣之事務期人地相宜而各縣公務又不至於遲誤斯有裨益儻該上司有市惠徇情任意委署者經朕察出定嚴加處分。○諭湖廣督撫等桑植土司向國棟保靖土司彭御彬暴虐不仁動輒殺戮且骨肉相殘土民如在水火朕聞之深加憫惻既有被害男婦紛紛來歸情願編入版籍以免殘虐若拒而不納則結怨之土民必至無遺類矣朕撫有四海內地苗疆皆朕版圖漢土民人皆朕赤子偶有一夫不獲皆厯朕懷况數千里土民安忍置之度外今俯順輿情俱准改土爲流設官綏輯彈壓其應行審理之舊案著該督撫一併審結但帶兵

入內官弁等須仰體朕心不得殺戮無辜竝  
曉諭平日奉法之士司仍各安居樂業不必  
疑懼其土民向被桑植保靖二土司殘虐者  
著加意撫恤去其苛政務使出水火而登衽  
席以副朕除暴安民之意如有助惡黨與即  
行剪除儻歸誠嚮化皆從寬釋其向國棟彭  
御彬應安插何省不令失所之處著該督撫  
酌量定議以廣朕法外之仁仍將此曉諭附  
近土司咸使悉知朕意○命辦大學士事領  
侍衛內大臣公馬爾賽爲武英殿大學士兼  
吏部尚書○以戶部右侍郎傅泰署廣東巡  
撫調署廣東布政使王暮來京以廣東肇高  
廉道王士俊署廣東布政使司布政使○丁  
亥

太宗文皇帝忌辰遣官祭

昭陵○諭諸王大臣等朕待臣下至公至平從  
無一毫偏向惟視其人如何耳如楊文乾爲  
廣東巡撫石禮哈與阿克敦常賚官達四人

協力朋謀欲加傾陷而朕早已洞燭其私嚴  
加申飭石禮哈曾面奏楊文乾與伊不合恐  
被中傷朕諭之曰爾等四人協力尚不能害  
一楊文乾楊文乾一人之力獨能害爾等乎  
後楊文乾具摺陳辯朕諭此事朕先已洞悉  
其隱微何待爾辯爾今自辯轉覺其小矣總  
之滿洲漢軍漢人朕俱視爲一體竝無彼此  
分別又如邁柱巡撫江西則按察使積善誣  
奏之及總督湖廣則布政使黃焜誣奏之朕  
察二人之狡詐竝加處分又如李衛爲浙江  
巡撫而黃炳誣奏其雲南藩司任內之事朕  
亦洞燭其狡詐又如田文鏡爲河南巡撫而  
蔡珽李紱謝濟世等交結黨與極力排陷後  
皆敗露自罹重譴夫邁柱滿洲也李衛漢人  
也田文鏡楊文乾漢軍也但能竭忠盡力則  
彼挾私傾陷之徒無論其爲滿洲漢軍漢人  
皆不得施其狡獪茲謀則朕之公平無偏可  
知矣爾諸王大臣須存同朝共事之公心不

可畧有分別畛域之私見每遇一事惟秉公持正齊心併力據理以辨之勿稍存一滿漢形迹於胸中以致事有參差蓋同朝之人雖地分不同其所辦之事皆朝廷之事也何有於滿洲漢人漢軍蒙古而生彼此之見哉國家須滿漢協心文武共濟而後能致治夫文武不可偏重而滿漢顧可以偏向乎心無偏向則公公則未有不和既公且和是以百官得其序萬事得其宜而天下莫不治平矣人有自患其孤立者此謬說也古之所謂孤臣者其上讒諂蔽明舉朝皆以邪曲害公義而其人孤忠莫白故謂之孤今之人縱矯然自異豈得謂舉朝無一同志况朕以公正無私之心臨蒞於上爲臣者果能忠誠自矢而於上一心一德雖舉朝無同聲附和之人其爲不孤也孰大焉從來上下交而其志同其要總在一誠誠之爲道有感必通爾等以誠來朕即以誠應設或爾等不誠而以詐僞來亦

必不能逃朕之洞鑒也勉之慎之○免江南海州清河二州縣雍正五年分水災額賦有差○戊子祭

大社

大稷

上親詣行禮○

上詣

恩佑寺行禮畢幸圓明園○己丑

太祖高皇帝忌辰遣官祭

福陵○諭內閣

世祖皇帝御製人臣儆心錄刻板收貯禮部著文武英殿將滿漢文各印千本進呈其板內字畫圈點有應加修整者著武英殿人員校看辦理○宗人府疏奏已革輔國公敬恒公爵例應降一等授封今遵旨以敬恒親弟雲升之長子釋迦保襲爲鎮國將軍從之○戶部議覆湖廣總督邁柱疏言荊州一府綿延千有餘里其所屬之歸州巴東興山長陽四

州縣施州衛大田所俱地處山僻離府寫遠請將歸州升爲直隸州裁施州大田二衛所歸併爲縣施州衛所管之施南十五土司應歸縣轄同巴東興山長陽三縣俱隸歸州衛所原設之遊擊把總仍留彈壓其衛守備千總守禦所千總俱裁去設歸州州判一員新縣知縣一員典史一員巡檢一員衛教授改爲教諭其訓導應仍舊制均應如所請從之尋定新設縣曰恩施○辛卯調戶部左侍郎史貽直爲吏部左侍郎陞通政使王璣爲戶部左侍郎○壬辰諭內閣凡各衙門事件交與科道官員稽察者蓋欲其按限歸結不致遲誤也近見科道行查之案其衙門隨便託詞回覆而科道遂不復問情由是科道之稽察不過查其遺漏而已其遲延之故竝未致問殊非差委科道之本意嗣後若但以行查塞責遇有不應遲延之案該衙門託詞回覆而科道官竝不詳查即置之不問者經朕察

出定將科道一併處分○以江南京口將軍金以坦爲鑲藍旗漢軍副都統○福建按察使喬學尹緣事革職擢福建漳州府知府潘體豐爲福建按察使司按察使○刑部議奏滁州民賈榮生毆死無服族弟賈必富應擬絞監候安徽巡撫魏廷珍以賈榮生之母徐氏年已七十六歲家無次子題請留養查徐氏見有出繼次子賈瑞生可以養贍與留養之例不符該撫所請無庸議得旨賈榮生依擬絞著監候秋後處決大臣執法貴得其平始無偏輕偏重之弊克副明刑弼教之意屢降諭旨甚爲明晰今魏廷珍又以不合例之人題請留養且稱與例相符顯係市恩枉法將魏廷珍交部嚴察議奏以爲人臣市恩枉法者之戒○山西道御史晏斯盛奏八旗巡役每以查拏僭越借端肆橫臣乘馬入城竝未令人導引祇因隨行一騎偶然驚突前行前鋒兵丁等遽將臣拘至營房及管旗大



臣問明始行放回似此巡查不實臣不敢以事涉己身隱忍緘默得旨凡官員等車馬儀從之屬各有等次從前降旨申飭者原以重體統而防僭越今左翼前鋒兵丁等借端滋擾混行查拏甚為多事若被屈官員隱忍不言則此輩益至肆行無忌晏斯盛據實陳奏甚屬可嘉著交部議敘其生事妄行之兵丁及該管官員等著交部議處○甲午陞內閣學士繆沅為工部左侍郎都察院左副都御史王承烈為工部右侍郎○陞山西大同總兵官祖秉衡為江南京口將軍陝西定邊副將張善為山西大同總兵官○河南總督田文鏡疏報歸德府商邱縣賣麵貧人陳懷金拾獲遺金二十四兩全數付還銀主王盛立力辭酬謝得旨朕訓誨臣民惟以正人心厚風俗為首務期於薄海內外去澆漓之習敦仁讓之風今豫省鄉民不拾遺金者既有孟津之翟世有又有商邱之陳懷金見利思義

暗室無欺古稱難得之事一時屢見可見民心淳樸性善皆同率教從風頡頏更捷實風俗轉移之機會朕心深為慰悅陳懷金著給與九品頂帶賞銀五十兩以旌其善○乙未諭內閣蝗蝻最為田禾之害迅加撲滅猶可以人力勝之昔我

聖祖仁皇帝訓飭地方各官諄諄以捕蝗為急務其不力者加以處分無非養民防患之至意乃州縣有司往往玩忽從事不肯實心奉行而小民性耽安逸憚於捕滅之勞且愚昧無知又恐捕撲多人以致踐傷禾黍瞻顧遲迴不肯盡力不知蝻子初生就地撲滅易於驅除一或稍懈聽其生翅飛揚則人力難施且至蔓延他境為害不可言矣前兩江總督范時繹摺奏邳州地方有蝗蝻萌生朕即諭令竭力撲滅無俾遺種莫被屬員朦蔽近聞彼處蝗蝻該地方官並未用力撲滅怠玩從事而督撫付之不聞著范時繹查明題參並

將該督撫交部嚴加議處以儆怠玩○革正黃旗漢軍都統黃國材任仍在工部尚書任內効力行走○解甘肅巡撫莽鵠立任以署湖廣提督陝西興漢總兵官劉世明爲甘肅巡撫實授曹勳爲陝西興漢總兵官以直隸天津總兵官岳超龍署湖廣提督直隸張家口副將張三讓署直隸天津總兵官○議政王大臣等議覆杭州將軍鄂彌達等奏稱臣等遵旨議設浙江滿洲水師營查平湖縣乍浦地方係江浙海口要路通達外洋諸國且離杭州止有二百餘里易於照應請挑選水師兵丁二千名駐劄乍浦杭州八旗滿洲蒙古內挑選餘丁八百名或於京城江南挑選八百名再於浙省沿海水師各營兵丁內選諳練水性船務者四百名爲捕盜頭舵水手之用共合二千名之數分爲左右二營輪班操演請派杭州副都統一員移駐管轄滿洲旗分設協領二員仍兼佐領添設佐領四員

防禦三員驍騎校六員蒙古旗分設佐領二員防禦一員驍騎校二員弁兵照例給與俸祿銀米及器械營房船隻等項再請設理事同知一員副都統衙門筆帖式二員均應如所請從之○丙申諭江南督撫總河等河工固屬緊要而州縣官均有地方民社之任所關尤重沿河州縣缺出該督撫將工程効力之人題補伊等雖能辦理河務但民社事件最爲緊要該員等未必即能諳練今署兩江總督范時鐸等保題周之準等七人於河工事務自屬所長至果否能勝民社之任難以遽定此見出各缺著將該員掣補委署令該督撫留心試用如一年後果能實心任事有益地方該督撫會同總河另行具題實授○丁酉遣大學士張廷玉祭先師孔子○諭吏部朕屢降旨嚴禁官員等收受陋規以清吏治今山東原任蒲臺縣朱成元印簿所開黃炳余甸收受之項鑿鑿可

據及詢問黃炳余甸伊二人尚掩飾巧辯不肯承認甚屬可惡著將黃炳余甸革職解往山東交與田文鏡岳濬繆沅將此案及通省屬員餽送之處一一嚴審定擬具奏博爾多見在江南質審別案著該部行文江南督撫將伊收受朱成元及通省屬官規禮訊取確供移送東省僅博爾多不吐實情即加刑訊

○戊戌秋分夕

月於西郊遣簡親王神保住行禮○己亥諭王

大臣等從前降旨令留兵三千名駐藏今聞藏地收成歉薄若多駐兵丁未免糧穀不敷著將川陝兵丁各留一千名駐藏共成二千之數令正藍旗滿洲副都統邁祿鑒儀使周瑛總統管領並令永昌協副將馬紀師一同駐藏料理○鑲黃旗漢軍都統觀音保緣事革職陞鑲黃旗漢軍副都統石文煬為本旗漢軍都統○庚子陝西巡撫西琳奏原任刑部尚書張廷樞子中允張縉告假在籍多

藏厚積招集悍僕索債聚斂所有收受趙世顯銀兩一任催迫抗旨不完得旨陳夢雷係降附耿逆之人蒙

聖祖仁皇帝宥其重罪從寬發遣後又開恩赦回京師令其在誠郡王處行走乃伊生事招搖交結邪黨意欲擾亂國政其種種不法之處朕知之甚悉不可一日姑容是以於雍正元年仍令將伊發遣不使留住內地煽惑人心似此重罪之犯而刑部尚書陶賴張廷樞於朕初登極之際徇情枉法故意寬縱二人之罪經隆科多奏朕知隆科多與陶賴張廷樞原有嫌隙或欲假公濟私是以特寬二人之罪止令降職閒居此朕莫大之恩伊二人當深知感戴省愆改過昨陶賴藏匿勒什布職私數萬兩該旗王大臣詢問時尚敢傲慢不恭咆哮狂肆不肯承認及至欲加刑訊始一一據實供出目今此案尚未審結將來陶賴自有應得之罪另降諭旨至於張廷樞

名下應追銀兩皆貪婪不法之贓款自當遵奉法度速行完納何至以抗延被叅伊子張縉又稱病家居不肯供職効力顯係父子心懷怨望又復倚仗聲勢蕩檢踰閑聚斂營私剝削鄉里甚屬可惡張廷樞張縉俱著革職拏問交與該督撫嚴審治罪○辛丑正黃旗蒙古副都統佛保住韋馱保正紅旗漢軍副都統興安俱緣事革職陞鑲紅旗叅領鼎格正紅旗護軍叅領保德俱爲正黃旗蒙古副都統鑲藍旗叅領韓光基爲正紅旗漢軍副都統正黃旗護軍叅領七十爲鑲紅旗蒙古副都統○壬寅正黃旗蒙古都統伊爾哈岱緣事革職陞右翼前鋒統領公伊爾登爲正黃旗蒙古都統正黃旗護軍統領袁泰爲右翼前鋒統領正黃旗護軍叅領協辦護軍統領事四格爲正黃旗護軍統領○戶部等衙門遵旨議覆奉差四川丈量刑科給事中高維新等條奏事宜四款一川省田畝肥瘠不

均影射規避混爭許告皆由疆界混淆請乘此清丈之時將各地方整理界牌其田地在其縣者即編入某縣納糧令兩縣推收清楚毋得影射規避至山坡鄉村各立石定名毋得仍前混淆一川省按糧計地並不合算地畝分晰科則以致漏脫欺隱應俟各屬地畝清丈之後即將各戶田畝查明頃畝四至分別上中下科則填給印票令業戶收據其應納錢糧悉照科則徵收一從前川省差徭繁重保甲人役或按月支應或按里分派數鄉之人夾雜一處名爲跳甲插花其弊無窮今雜辦差徭悉蒙恩免豈可任其仍沿積習違者叅處以息擾累一建武營等處地方官莊地畝併民間互爭田地兩造均無憑據入官充公者俱令首報查丈照江海新淤地畝歸公之例作爲官田仍令原佃耕種詳造地畝租額報部查核其每年所收籽粒歸入常平倉交與該地方官管理以備賑糶俱應如所

請從之○癸卯旌表河南唐縣烈婦蔣玉閨妻趙氏拒姦不辱守正自縊給銀建坊入祠致祭如例○甲辰諭兵部烏蒙鎮雄改土歸流經總督鄂爾泰請設鎮營將援勅左右兩協官兵裁撥烏蒙并將威寧一鎮改營所餘官兵移駐鎮雄朕已降旨允行從前維西移駐之弁兵俱加恩賞給今烏蒙一鎮弁兵亦係新設應沛恩膏俾其資斧豐裕著照維西之例交與鄂爾泰酌量遠近分別賞賚以示

朕加惠邊地弁兵之至意○予故福建海壇總兵官朱文祭葬如例○乙巳遣官祭

關聖帝君○諭戶部據繆沅等奏稱山東商人將舊引護新重複影射一案查自康熙五十二年起應追賠銀一百零五萬餘兩商人劉袞等已經自認桑園設關之後官引疏通新舊接護原有陋弊情願將影射銀兩於雍正六年內上課四十萬兩其六十五萬餘兩在明年一年內分限全完又稱自順治八年

以後應追重複影射銀四百餘萬兩應否分年著追等語夫鹽務積弊雖始於順治八年然自順治八年至康熙五十一年歷歲已久承辦之商屢易其人此時難於究問其應賠之四百餘萬兩免其著追至於康熙五十二年以後商人認賠銀兩稱於今年明年內分限全完此乃商人目前畏懼刑罰勉強承認而將來力不能完仍至歸於無著於國課無益似此積弊種種歷來東省之巡撫及巡鹽

御史等官安得推為不知其中必有通同作弊之處應再確詢商人令其一一供出有應賠者派令分賠其在商者稍寬其限則受賄作弊之官員不至脫然事外而商力亦紓實有裨益著該部另議具奏○丁未諭內閣浙江士習澆薄朕為世道人心計不得不嚴加整理今二年以來李衛王國棟先後奏稱兩浙士子感朕訓誨之恩省愆悔過將舊日置凌奔競之習痛自改除可稱士風丕變前年

朕原降旨。浙人秉性聰慧。既知讀書。必明大義。非如强悍執滯之難於感化者。一經指示。則醒悟亦必最捷。不出二三載。可以望其自新。今果然矣。明年即屆鄉試之期。浙省士子。准其照舊鄉會考試。以示朕訓俗牖民樂聞遷善之至意。○喀爾喀扎薩克達爾漢貝勒詹達古米故遣官致祭。

大清世宗敬天昌運建中表正文武英明寬仁  
信毅大孝至誠憲皇帝實錄卷之七十二

大清世宗敬天昌運建中表正文武英明寬仁  
信毅大孝至誠憲皇帝實錄卷之七十三

救修

雍正六年戊申九月戊申朔禮部議奏各省

卷之十三

督撫學政所舉名宦鄉賢請敕下九卿會同  
本省部院官員詳慎核定得旨朕思既係本  
省之人在伊等瞻顧鄉曲之情或有難於直  
語之處且同在一省而隔越府縣即未能深  
知確實所言何可爲據著仍交與原舉報之  
地方官令其再行確查儻從前所舉不實准  
其檢舉不加處分若所舉確實著出結保送  
日後儻查出冒濫將出結之員從重議處○  
工部議覆河東副總河嵇曾筠疏言蘭陽縣

耿家寨北岸隄工因積水深潭黃流洶湧應下埽釘椿加幫築壩并將月隄增加高厚以資捍禦應如所請從之○廣東總督孔毓珣疏報德慶番禺等二十二州縣開墾雍正五年分田地四十二頃有奇下部知之○己酉諭內閣各省水師兵丁惟福建最爲熟練朕前降旨令藍廷珍揀選五十名發往浙江照陝西兵丁赴浙之例令其補充營伍教習浙江水師其起身盤費及到浙安插之處令高其倬李衛照例賞給查湖北湖南共有水師七營向來操演亦未精熟須得閩人爲之教導著照浙江之例令藍廷珍揀選熟練之兵丁五十名發往湖廣交與總督提督分撥各營令其教習其起身盤費及在楚安插之處亦著高其倬邁柱等照浙江之例料理賞給再舊例湖廣鎮標協標考拔千把先行咨送提督轉送總督再加考試方行補用但湖南湖北路途遙遠又隔洞庭之險微弁往返艱

難資斧不易且致久曠汛守嗣後湖北二十四營千把專隸總督考定咨知提督湖南二十四營千把專隸提督考定咨知總督俾微員得省遠行之費而汛守亦不至於久曠若新任總督提督到楚之時南北各標武職等官仍聽總督提督通行調試分別優劣○以都察院左副都御史宗室塞爾赫在內閣學士裏行○正黃旗滿洲副都統唐喀緣事革職陞正黃旗護軍叅領花色爲本旗滿洲副都統○鑲紅旗蒙古副都統岳岱鑲藍旗蒙古副都統廣西俱緣事革職陞一等侍衛宗室哈爾吉爲鑲紅旗蒙古副都統鑲藍旗護軍叅領敦巴爲本旗蒙古副都統○庚戌調山西右衛右翼副都統達爾馬來京陞鑲黃旗叅領巴爾賽爲山西右衛右翼副都統○兵部奏言臣部彙查軍需虧空造冊進呈其有未經寬免者請定限勒追得旨軍需案內代兵分賠銀兩一項從前止將千兩以上之

滿洲官員開列請旨而未嘗開有千兩以下之官員是以彼時降旨將千兩以上者寬免而未及其餘今覽冊內既有千兩以下之官員豈有多者從寬而少者轉行勒追之理此乃從前開列疎漏之處著將千兩以下者一體寬免○旌表山東新泰縣烈婦趙宗實妻尹氏拒姦不辱自縊完貞給銀建坊入祠致祭如例○辛亥諭內閣前據廣西學政衛昌績疏稱梧州府藤縣所有部發在京官員議刺錢名世之詩二冊教諭譚玉琪借與監生胡祚悠霍廷杞閱看私加圈點甚屬狂肆等語今朕將原書調來親覽見書中詩句數處伊以己意加圈於旁竝無狂妄指摘之處此乃遠方之人迂濶庸愚一時錯誤不必深究著將私借官書之教官譚玉琪罰俸一年衛昌績據實奏給與紀錄一次○正藍旗滿洲副都統多賽年老休致陞三等侍衛查爾泰爲正藍旗滿洲副都統○壬子陞鑲藍旗

漢軍副都統金以坦爲正黃旗漢軍都統鑲紅旗蒙古副都統七十爲本旗護軍統領一等侍衛富昌爲鑲紅旗蒙古副都統王府長史承保爲鑲藍旗漢軍副都統○予故廣東巡撫楊文乾祭葬如例○旌表山東安邱縣烈婦王法學妻孟氏拒暴不污忿激自縊給銀建坊入祠致祭如例○癸丑諭內閣陝屬之河西官員等奉職邊方地瘠事繁非內地可比加以承辦大差更多勞費朕心深爲軫念聞向來各官養廉皆於徵糧耗米內分派支給朕思耗糧一項未能充補大小官員之用查三邊稅務有贏餘銀兩著總督岳鍾琪會同該撫將河西道府廳州縣衛所分別大小衝僻於河西稅羨耗糧二項下比照陝員銀數支給以爲養廉之費具摺奏聞即行辦理俾伊等用度從容勤於職業以副朕加恩邊地官員之至意○又諭原任南陽總兵官李永陞向以居官不職收受軍政陋規經接



任官叅劾部議革職治罪朕令發往阿爾泰驛站坐臺効力今年春間朕恭閱

聖祖仁皇帝實錄見原任四川總督李國英擒勦逆寇勞績茂著因命查其子孫帶領引見彼時將伊孫李永安授爲副叅領并知李永陞即李國英之孫特從臺站地方調回授爲叅領面諭之曰爾不自念爾之祖父勉爲好官朕心實不忍忘爾祖父之勞績也今特加恩宥仍予錄用爾其思之勉之昨該旗奏伊名下應追未完銀兩伊情願變產扣俸完納朕又降旨免追矣大凡官員等之祖父爲國家宣力抒誠致身殉節者其子孫應體祖父之忠心倍加黽勉以紹家聲斯不愧名臣之後若犯法婪贓虧空國帑不修名節有玷家風是不忠之外又加不孝之罪以情理論之應加倍重懲然朕繼述

先志褒功獎善追維往昔時時眷注於懷是伊等不肖之子孫忍於自忘其祖父而朕則不

忍以其子孫之不肖遂忘其先人之善不加恩於其後嗣也著八旗通查凡有祖父陣亡盡節及偉績殊勲載在國史而子孫犯法問罪及虧空拖欠者無論已結未結著該旗大臣等秉公據實確查具奏又漢人中如嵇曾筠之父錢以塏之祖抗節捐軀舍生取義已荷國恩優加榮獎又如趙申喬楊宗仁清廉公正乃國家實心任事之大臣其任內一切應賠銀兩朕已槩從寬免無使絲毫牽累著

各省督撫等確查所屬有居官清正如趙申喬楊宗仁湯斌陳瓚張伯行之比而其子孫犯法問罪及虧空拖欠者無論已結未結俱行秉公據實具奏若其祖父係陣亡盡節者亦照八旗例查奏○以鑲紅旗漢軍副都統張溥署正黃旗漢軍都統○免山西榮河縣本年分水災額賦有差○甲寅吏部左侍郎阿克敦緣事革職擢監察御史宗室普泰爲吏部左侍郎○議敘平定湖廣謬冲花苗軍

功靖州協副將黃賢等各加銜紀錄有差兵丁三百五十三名各賞給銀兩○乙卯諭戶部今歲福建地方有數縣雨澤稀少秋成未必全收閩省地狹人稠每年米穀不無借資於鄰省今既有少雨之處恐明春米價騰貴不可不預爲籌畫著將浙江漕糧截留運送以備閩省平糶浙江總督李衛會同福建督撫酌定數目或十萬石或十五萬石或二十萬石並如何運送接運之處速行妥議辦理○又諭朕思閩省必須二十萬石接濟此時正兌漕之日若兩省往來會商未免遲延著將浙江漕米截留十萬石江南漕米截留十萬石行令各該督撫速行辦理○諭兵部阿爾泰兵即日回京著於領侍衛內大臣內派一人散秩大臣內派一人齎茶食於駐軍地方設幄賜食將軍賞銀一百兩副都統奎蘭大賞銀三十兩護軍叅領驍騎叅領賞銀二十兩官員等賞銀十兩護軍等賞銀五兩披

甲人賞銀四兩令其攜至家中以備家庭權聚之費○以工部尚書公夸岱署鑲白旗滿洲都統○陞鑲白旗護軍叅領明德爲永陵總管○授輔國公愛音圖子吉存爲鎮國將軍鎮國公追封固山貝子準達子蘇爾禪爲輔國將軍奉恩將軍福清子福康奉恩將軍尤奇子壽佑奉恩將軍顧祿固子齊世玖奉恩將軍圖納子松健奉恩將軍呂順子登博俱爲奉恩將軍○丙辰皇八子福惠薨照親王例殯葬○丁巳吏部議覆理藩院尚書特古忒等奏稱理藩院專司蒙古事務非通曉蒙古字話之人不能辦理請於八旗蒙古官學生監生內有能翻譯滿洲蒙古字話者吏部會同理藩院考取以各部院蒙古筆帖式挨次補用唐古特學生由理藩院考試翻譯蒙古唐古特字話揀選好者以理藩院唐古特筆帖式挨次補用又唐古特學生補用筆帖式中書者仍兼唐古特學行走陞至主

事員外方令其離學廡所學唐古特字不致荒廢又舊例蒙古官學生唐古特學生補用中書似屬太優嗣後官學生停其補用中書中書缺出於八旗蒙古筆帖式內揀選補用至內閣蒙古中書額設十六缺內有唐古特中書四員查內閣翻唐古特字話既設巴克什喇嘛並不專藉中書請於唐古特中書內裁去二缺止留二缺令唐古特學生出身之筆帖式補用其蒙古中書十二員令理藩院會同內閣於八旗蒙古筆帖式內考試擬定正陪咨送吏部引見補用此補授中書人員內由理藩院蒙古筆帖式考取者仍以理藩院應陞之缺陞轉由吏部等衙門考取者仍以吏部等衙門應陞之缺用又國子監八旗蒙古官學生監生學習滿洲蒙古翻譯既各蒙恩賞給錢糧其內蒙古學實屬多設請將內蒙古學裁去其裁退之學生俟國子監本旗學生缺出坐補其裁退之助教俟國子監

助教缺出坐補又八旗蒙古監生官學生內有學習漢文情願考試滿漢翻譯者令其考試取中後以吏部等衙門蒙古筆帖式缺與考試取中人員一體挨次補用又理藩院內額設郎中五員員外郎十九員主事五員係專司蒙古事務取其諳練不便將別部人員陞補亦未可陞補別部嗣後理藩院缺出請於理藩院蒙古筆帖式各口驛站及將軍駐防並察哈爾等處蒙古筆帖式并由理藩院筆帖式考取補用之中書助教五官正等不論旗分通行較俸陞補由主事陞補本院員外郎郎中再與六部滿洲蒙古郎中一體較俸陞轉又內閣蒙古侍讀二員太僕寺蒙古員外郎二員盛京刑部蒙古員外郎二員亦係專司蒙古事務之人嗣後缺出請於理藩院蒙古主事內不論旗分通行較俸陞補又八旗遊牧員外郎主事仍照舊例由理藩院於蒙古護軍校驍騎校中書筆帖式護軍內

揀選補放又喜峯口殺虎口驛站員外郎各一缺張家口歸化城蒙古理事同知各一員原係揀選之缺應照定例於理藩院司官內揀選補授又國子監助教八員係訓迪滿洲蒙古翻譯之員嗣後遇缺於理藩院及修書蒙古筆帖式并國子監閒散巴克什內令理藩院會同國子監揀選擬定正陪咨送吏部帶領引見補用又欽天監蒙古五官正二員原係考選之缺請照例於內閣蒙古中書八旗蒙古筆帖式內考選咨部引見補用又六部蒙古郎中員外郎主事都察院監察御史原俱係理藩院六部蒙古人員通行陞補之缺今理藩院人員既不令其陞轉別部嗣後六部蒙古主事缺出請將吏部等衙門蒙古筆帖式及中書五官正等不論旗分通行較俸陞補又理藩院司官筆帖式內有不通曉蒙古字話又不通曉漢文者交與該堂官甄別令其回旗以對品旗員補用其不能翻譯

字話而能通曉滿漢翻譯之員令該堂官咨部註冊俟彙齊人數吏部奏請欽點閱卷大臣公同考試果係翻譯精通者准其於六部司官筆帖式等通行較俸以應陞之缺陞補俱應如所請從之○旌表浙江義烏縣烈女駱錦璫女駱氏拒盜不辱自縊明志給銀建坊入祠致祭如例○己未兵部議覆川陝總督岳鍾琪疏言西固土司黃登燭堅錯父子濟惡岷州土司趙廷賢朋比為姦番民不安住牧情願改土歸流查黃登燭堅錯所管番地附近西固請將西固州同改為撫夷同知頒給印信以資撫馭趙廷賢所管番地附近岷州請隸岷州同知管轄至西固岷州地連邊寨汛守宜嚴請於兩土司適中之地令該管洮岷協委把總二員各撥兵二十名分駐巡查俱應如所請從之○庚申陞雲南糧道元展成為雲南按察使司按察使○辛酉諭內閣省會之區民居稠密人烟湊集一或弗

戒於火每至比屋延燒被火之家倉皇搬運兼有無賴棍徒以救火爲名乘機搶竊地方官員雖率領衙役赴救而心力不齊且救火之具不備難以撲滅昨因湖廣荊州居民失火蔓延鄰舍行令該地方官倣照京城置備救火器具以資防範今著各省督撫一體遵照於省會之地多設水桶水銃鉤鐮麻搭之類分貯各衙門令文武各官派定人役兵丁儻遇火警齊集救護即時撲滅並將搶火惡棍查拏治罪向例地方失火延燒屋宇稍多者地方官員例有處分近多視爲具文或曲爲掩飾嗣後著該上司嚴查叅劾不得徇情隱匿其或赴救不力以致延燒多戶至數十家以上者著據實查叅嚴加議處至於各府州縣竝令該地方官預備防範以副朕恤民禦患之至意○壬戌鑲黃旗蒙古副都統兆保正藍旗蒙古副都統薩齊庫俱緣事革職陞三等侍衛常祿爲鑲黃旗蒙古副都統正

藍旗叅領博什希爲本旗蒙古副都統○癸亥遣官祭

歷代帝王○遣官祭城隍之神○諭議政王大臣等天津初設滿洲兵丁所定一切制度最爲緊要以前兵丁合夥曾往同知衙門內炒鬧今披甲巴寧阿又拏小刀將營田之知縣戳傷伊乃當兵之人將官員無故動刀戳傷甚屬可惡此等之人若不加以重罪則匪類不知警戒著議政王大臣會同三法司究擬具奏鄂齊乃有罪之間散宗室朕加恩用至大臣錫封公爵可謂尊榮之至伊竝不感戴朕恩爲國家効力前差往藏內凡事以私心辦理及回至朕前朕將去年阿爾布巴等殺害康濟鼐一事詢問伊亦不知羞愧遮飾具奏補授天津都統以後仍不改過總不實心辦事竝不教訓管束官員兵丁陸續生事鄂齊辜負朕恩其公爵都統一并革去補授三等侍衛効力行走不嚴行管束巴寧阿之

該管協領佐領防禦驍騎校俱著革職即在天津披甲効力行走所遺員缺著都統速行揀選補授奉天將軍覺羅伊禮布因盛京事務繁多雖勉強供職終不勝任著調補天津都統伊禮布未到天津以前都統事務著前鋒統領宸泰署理其奉天將軍事務著盛京刑部侍郎武格暫行署理○陞鑲黃旗叅領張文正爲本旗漢軍副都統○旌表河南榮澤縣烈婦趙景瑞妻趙氏拒姦不辱自縊完貞給銀建坊入祠致祭如例○甲子諭吏部陝西平涼府知府李桐因察核屬員被知縣卓鳳詔詳揭經莽鵠立題叅已降旨解任質審今據總督岳鍾琪奏稱李桐頗能盡心辦理軍需似此能員題叅解任深可惋惜等語朕前曾屢降諭旨督撫大臣當爲國家愛惜人才如有賢能之員不得以小過微愆遽行叅奏令其廢棄李桐爲伊父生日受屬員壽屏此猶情理之可恕者莽鵠立不念其平日

居官尚能効力即行叅奏殊非大臣公忠爲國之意李桐著照岳鍾琪所請免其解任候審仍留原任○乙丑諭內閣工部侍郎塞楞額著兼內閣學士行走嗣後御門之日各部院所奏本章著派內閣侍讀學士二員輪班接本接本後即出不必再入○丙寅頒給世祖章皇帝御製人臣儆心錄滿漢大學士以下四品京堂以上及內閣翰詹等官人各一部○諭內閣各省保舉貢生生員以教職用者止可用爲教職即俸滿應陞之時不得別行陞轉○調工部左侍郎繆沅爲刑部左侍郎○陞光祿寺卿汪澄爲內閣學士兼禮部侍郎○宗人府府丞王廷揚爲通政使司通政使○大理寺卿羅其昌緣事革職○陞奉天府府丞黎致遠爲大理寺卿○丁卯工部等衙門議覆浙江總督李衛遵旨議奏江南松江海塘事宜四款一海塘初議建石工三千八百五十四丈今已築完二千四百九十丈若盡議

折改則人工盡棄且從前委官多已故罷任者即盡法追究仍於塘工無濟臣請就目前新築石塘選料換式倣照浙江海塘建築堅固將新舊接續即有一二損傷不難相機改補一土塘之附於石塘背後者蓋因石塘初築外當風濤內則孤立必培築土塘以護之每年應派管理之員動支歲修款項隨時粘補至搶築土塘本在石塘之外其間高低厚薄不同應俟農隙之時擇其低薄斷續處令

沿塘居民漸次補築高厚一東灣至周公墩張家舍至倪家路離海甚近俱應先爲建築再金山嘴老土塘至東華家角共六千二百餘丈原估工料不敷應請飭令該督撫另行委員確丈估計至舊塘之石坍陷水中應撈取湊築新塘更爲適用一興舉鉅工必有總理之大員又必有分任之衆職今監督蘇松太道魏觀生長北方於海塘非所素習請發熟諳塘工之陞任京卿俞兆岳綜司其事以

魏觀會同稽查再請敕下江南督撫另於通省同知通判等官內選擇委任管理分築俱應如所請得旨依議海塘工程事務仍著李衛會同江南督撫稽察辦理○免江南懷寧等十四縣鳳陽一衛雍正五年分水災額賦有差○己巳諭內閣今年各省奉旨緩決人犯著大學士三法司九卿會同將各案細加詳查確議其中如有情罪稍輕尚可原宥者將該犯情由分別開明逐省陸續具奏即內

有特旨治罪之案亦必詳酌務須情罪允協以期至當○工部議覆署理山東巡撫印務布政使岳濬奏登州鎮標戰船大修拆造例應登州府海防同知李向榮承修今任意遲延逾限兩月有餘應照例降一級調用得旨戰船關係緊要從前修理不能堅固併逾限遲延官員議處之例似屬稍輕嗣後修理戰船不能堅固及逾限遲延者應嚴定處分以示儆戒但從前定限過於緊迫應作何寬



展限期俾承修官員得以從容辦理又該上司等或有勒掣肘以致辦理遲延亦應定以處分俱著九卿詳悉定議具奏○庚午諭戶部論語曰百姓足君孰與不足朕宵旰孜孜惟以足民益下爲念是以各省逋賦則蠲至數百萬每年正額則免至數十萬凡興作工程俱支國帑偶逢旱澇蠲賑兼施此中外所共知共見者乃邇年以來各省督撫等有以地方舊有之項不敢入己奏請歸公者彼時陳奏之際似出急公奉法之心今細加體察此等款項多係地方相沿之積弊歷年未革之陋規不取之於民即取之於國者一種欺世盜名之督撫往往奏請歸公以博清廉之美譽更有本係一己之贓私入己囊橐又恐敗露不得已而奏請歸公以蓋前愆又或回護前任之員而奏請歸公以掩其短則是諸臣欲沽一己之名欲逃一己之罪而巧借奉公之說爲此遮飾之計也著各省督撫等

悉心確查若無礙於國無礙於民可以歸公之項則將緣由備細聲明具摺陳奏候朕批示其有上竊之於國而下取之於民者則應永行裁革不許借歸公之名以遂其私心而掩其積弊如有仍蹈舊習者經朕察出定行嚴加處分○以翰林院侍讀學士康五瑞充日講起居注官○吏部議奏兵部尚書查弼納等徇情給發黃國材家人路引令往湖廣廣東變產賠項應照例處分得旨查弼納著降二級從寬免革任仍將降級之處註冊於應行開復之後再俟三年無過方准開復嗣後革職降調留任之員再有降革處分朕復加恩寬免留任者俱照此例將後案註冊俟前案開復再將後案計至三年無過方准開復其有數案處分者計案遞加永著爲例○壬申免江西上高縣雍正五年分旱災額賦有差○甲戌

孝慈高皇后忌辰遣官祭



福陵諭內閣大凡爲臣者必以報稱君上爲心而不得有瞻顧身家之念古聖賢之教忠皆是道也蓋在平時則正其誼不謀其利明其道不計其功孝弟忠信一一皆盡其實而不可有一毫之虛假及乎居官則國爾忘家公爾忘私盡屏其偏陂黨同之習悉去其沽名市惠之念此之謂實心任事而智名勇功於是乎出矣夫臣下之用心在上未有不洞燭其隱微者古之良臣有嘉謀嘉猷則入告於內而順應於外其誠意之交孚何如其懇摯苟或挾詐任術飾貌修文隱微有潛伏之私則必不能忠敬以事上而有不知其情僞者乎凡學古入官者宜矢之以至誠將之以篤敬秉虛公以揆大中之則務正直以遵王道之平存忠君爲國之實心務立身行道之大本以此自勉更以此交勉則可以成明良一德之盛矣○諭禮部各省考取拔貢原欲遴選儒生以宏教育向來之例俱於見考

一二等生員內選拔文行兼優者但恐作文有一日之短長而文理平通不列優等者其人或品行端方才識練達足備國家之用亦未可定嗣後著各省學政不必拘一二等之生員俱准收考酌量試以時務策論其人果有識見才幹再訪其平日品行端方即正考未列優等亦准選拔則文行兼收可以昭國家廣攬人材之典○陞順天府府尹署國子監祭酒事謝王寵爲都察院左副都御史仍兼管順天府府尹事○乙亥上回宮○川陝總督岳鍾琪疏秦涇陽縣竊賊党奇等于永壽縣拏獲忽被卦子數十人持械拒捕以致党奇等脫逃永壽縣知縣周之彝庸情疎忽應請革職得旨周之彝嚴加議處具奏聞卦子匪類隸籍於江南之廬鳳及河南山東直隸山陝地方其男婦皆習拳棒技藝攜帶馬騾遨遊各省每遇人烟稠密之地則以技藝博取錢米及至孤村獨舍行旅

單身則恣意搶奪與盜賊無異如陝西永壽縣一案公然持械拒捕搶奪賊犯其肆行不法可知又聞漢中府盤獲挈家游蕩之男女數十口見在審訊嗣後著各該地方官悉心稽查儻有此等匪類潛匿境內即著查出押解回籍收入保甲如在外別有夥盜不法事情仍按律治罪儻容留之地方不行查出或已經解回之後縱令再出者將該管官嚴加處分○添設安徽布政司衙門倉大使一員裁照磨一員從安徽巡撫魏廷珍請也○丙子河東總督田文鏡疏言東省倉庫錢糧俱有虧空且多那新掩舊之弊歷任撫臣不及查叅皆該管之知府知州爲之通同徇隱請嗣後東省知府直隸知州離任時將所轄州縣倉庫錢糧俱照豫省交代之例限三箇月令接任官查明出結如有虧空即著落知府知州均半分賠完後方許另赴新任儻接任官徇情出結者即著落出結之官分賠再查

知府直隸知州亦有倉庫向係該管之道員盤查請嗣後道員陞遷事故離任者亦照此例交代得旨東省吏治廢弛倉庫錢糧尚有虧空且多那新掩舊及仍復收受陋規加增火耗科派等弊是以特命田文鏡爲河東總督整理清查掃除錮習雖管理錢糧係巡撫專責然岳濬以少年新辦巡撫之事或有未諳田文鏡練達老成經理豫省錢糧已有成效則東省錢糧於積弊叢生之後應悉聽田文鏡主張料理岳濬與費金吾盡心竭力協同贊助則自無不清釐之患矣儻稍存怠忽之念經朕察出定將布政使嚴加處分該撫一併議處田文鏡此奏俱照所請行又前邁柱差往江西辦理錢糧甚爲妥協今湖北湖南錢糧亦有不清者著邁柱與巡撫一同辦理凡各省錢糧總督舊無兼辦之責今令田文鏡邁柱兼理者乃因人而施後不爲例○喀爾喀瓦齊賴巴圖土謝圖汗汪扎爾多爾

濟達什垂木丕爾託音各遣使進九白年貢  
俱宴賚如例○丁丑差往西藏吏部尚書查  
郎阿等奏臣等遵旨統領大兵自五月初六  
日由西寧出口於八月初一日至西藏即會  
同在藏駐劄之副都統馬喇學士僧格將阿  
爾布巴隆布奈扎爾鼐等審訊據阿爾布巴  
等供稱謀殺康濟鼐是實查阿爾布巴等身  
受國恩不思報効乃心存叛逆大干法紀應  
分別情罪將阿爾布巴隆布奈俱擬凌遲其  
阿爾布巴之子噶爾丹益楚克袞楚克拉賈  
布鄂達爾漢噶爾藏吹達爾隆布奈之子席  
木本吹扎特俱擬斬將扎爾鼐擬斬其妻及  
子喇克桑扎木巴并二逆之妻女及同胞兄  
弟俱離本處發遣併將協助阿爾布巴等之  
喇嘛人衆亦分別治罪番人素性兇惡阿爾  
布巴等須令番衆目覩正法以示懲戒臣等  
一面奏聞一面將阿爾布巴等及事內應斬  
人犯即行正法其應行發遣之人由撤回兵

丁內酌量派出解送至江寧杭州荊州將軍  
處賞給兵丁爲奴奏入報聞

大清世宗敬天昌運建中表正文武英明寬仁  
信毅大孝至誠憲皇帝實錄卷之七十三

大清世宗敬天昌運建中表正文武英明寬仁  
信毅大孝至誠憲皇帝實錄卷之七十四

監修總裁官光祿大夫經筵講官太僕寺卿和碩大學士兼兵部尚書總理其部事務伯加十五級臣鄂爾泰

總裁官光祿大夫經筵日講官起居注太僕寺卿太子太保保和殿大學士兼戶部尚書仍兼管吏部尚書翰林院掌院

第三等伯加十二級臣張廷玉光祿大夫經筵講官起居注太僕寺卿太子太保保和殿大學士兼戶部尚書仍兼管

翰林院掌院事加二級臣福敏光祿大夫經筵講官太子太保東閣大學士兼禮部尚書加六級臣徐本光祿大夫

經筵講官兼太僕寺卿太子太保保和殿大學士兼戶部尚書仍兼管吏部尚書

敕修

雍正六年戊申冬十月戊寅朔享

太廟

上親詣行禮遣官祭

永陵

福陵

昭陵

昭西陵

孝陵

孝東陵

景陵

上詣

恩佑寺行禮畢幸圓明園頒雍正七年時憲

曆己卯以翰林院侍講學士覺羅吳拜充

日講起居注官詹事府少詹事伊爾敦翰林

院侍讀國璉編修開泰俱署日講起居注官

戶部議覆福建總督高其倬遵旨議奏洋

船出入口必按定期限方易稽查嗣後每

年出口船隻應令於四月內造報入口船隻

於九月內造報如入口之船有番賬未清不

便即回者准俟來年六七月間回港有遭風

飄泊他省者准取具該地方官印結齎回有

舟行被溺無憑查據者飭取飄回餘人或鄰

船客商等確供詳核儻故意遲延竝徇私捏

報即行分別究處至每船應酌帶米石暹羅

大船三百石中船二百石噶喇巴大船二百

五十石中船二百石呂宋等處大船二百石

中船一百石埕仔等處中船各一百石如有

偷漏以接濟外洋例論罪再出洋之船動經

數月油釘稜蔴等物酌量許帶仍註明數目以憑查驗均應如所議從之○又議覆川陝總督岳鍾琪疏言陝甘二屬丁銀偏累向經題准攤入地畝徵收但甘屬河東地方糧輕而丁多河西地方糧重而丁少若將河東丁銀攤入河西是兩處田糧輕者益輕而重者更重請將二屬各自均派河東則丁隨糧辦河西則糧照丁攤應如所請從之○庚辰鑲藍旗漢軍都統耿化祚等查奏佐領許端應還伊父許國桂贓銀請將許端供出房地私債抵補得旨此等追比之事當量其情事若果有借券憑據者尚可令其賠還再如上司官員挾制勒索者此係干犯國法貪婪之項亦屬理應追比至竝無文券中保止據一面之辭遽令賠還深爲悖謬其曾因親友情誼餽送數十百金者若照伊所供著賠或遇外任人員雖實未收受而勢難爲此數十百金來京質審不得已承認賠償則是科斂衆人

之銀錢代此等貪婪犯官賠墊此乃斷不可行之事八旗內如有類此者斷不可准彼既拖欠銀兩不能完納自有彼應得之罪也○改直隸永平府糧捕同知爲理事同知仍兼糧捕事務從署直隸總督何世璜請也○辛巳諭戶部向來江浙收兌漕糧俱用本地粳米擇其乾圓潔淨者方准交納遇收成稍薄之年該督撫每以紅白兼收爲請朕皆允行夫米糧乾潔皆可久貯原不在色之紅白江浙二省戶口繁多每年應納漕糧將及四百萬石若必拘定本地粳米恐米價昂貴民間難於輸將嗣後江浙徵收漕米但擇乾圓潔淨不必較論米色准令紅白兼收私粳竝納著爲例○鑲紅旗滿洲副都統布達時緣事革職調鑲藍旗滿洲副都統伯馬蘭泰爲鑲紅旗滿洲副都統陞正黃旗叅領德祿爲鑲藍旗滿洲副都統○旌表直隸饒陽縣烈女金光斗女金氏拒姦不污投環殞命給銀建

坊入祠致祭如例。壬午。諭吏部雲南貴州廣西三省文武官升嗣後有係鄂爾泰題補之員應行引見者不必一面具題一面送部引見著鄂爾泰先行請旨若令來京引見再起身來京竝傳諭兵部嗣後鄂爾泰題補文武官員有應行議令引見者俱將應否引見之處於本內請旨以兵部右侍郎胡煦協辦刑部侍郎事都察院左副都御史杭奕祿協辦刑部額外侍郎事。陞右通政冀棟爲光祿寺卿。戶部議覆盛京戶部侍郎王朝恩疏言船廠等處新設永吉泰寧長寧三州縣民人入籍無多丁口錢糧有限請將從前安插各處流徙人等及本身已故而子孫戚屬無力還鄉者除係賞旗爲奴并當差之人仍聽將軍管轄外其餘悉令撥給永泰長三州縣管轄嗣後發到徙民竝令於五年之後一體完糧當丁均應如所請從之。○癸未。鑲黃旗蒙古副都統宗室滿珠錫禮奏言京營

武弁等員參將以下千總以上應參用滿洲不宜專用漢人得旨從來爲治之道在開誠布公遐邇一體若因滿漢存分別之見則是有意猜疑互相漠視豈可以爲治乎。天之生人滿漢一理其才質不齊有善有不善者乃人情之常用人惟當辨其可否不當論其爲滿爲漢也自我

太祖高皇帝開國之初即滿漢兼用是以規模宏遠中外歸心蓋漢人中國有不可用之人而可用者亦多如三藩變亂之際漢人中能奮勇効力以及捐軀殉節者正不乏人豈可謂漢人不當用乎滿洲中固有可用之人而不可用者亦多如貪贓壞法罔上營私之輩豈可因其爲滿洲而用之乎且滿洲人數本少今祇將中外緊要之缺補用已足辦理若參將以下之員弁悉將滿洲補用則人數不敷勢必有員缺而無補授之人朕屢諭在廷諸臣當一德一心和衷共濟勿各存私見而

分彼此在滿洲當禮重漢人勿有意以相遠始爲存至公無我之心去黨同伐異之習蓋天下之人有不必強同者五方風氣不齊習尚因之有異如滿洲長於騎射漢人長於文章西北之人果決有餘東南之人穎慧較勝非惟不必強同實可以相濟爲理者也至若言語嗜好服食起居從俗從宜各得其適此則天下之大各省不同而一省之中各府州縣亦有不同豈但滿漢有異乎朕臨御以來以四海爲一家萬物爲一體於用人之際必期有裨於國計民生故凡秉公持正實心辦事者雖疎遠之人而必用有徇私利己壞法亂政者雖親近之人而必黜總無分別滿漢之見惟知天下爲公凡中外諸臣皆宜深體朕懷同寅協恭股肱手足交相爲濟則國家深有倚賴久安長治之道必由於此也○陞太僕寺卿蔡嵩爲宗人府府丞○陞湖南按察使趙弘恩爲四川布政使司布政使湖南

岳常道郭朝祚爲湖南按察使司按察使○喀爾喀車臣汗滾臣故遣官往奠茶酒竝賞銀一千兩○甲申以故鄂爾多斯扎薩克多羅郡王喇錫班珠爾兄子查木陽襲爵封其子色卜騰諾爾布爲輔國公先是喇錫班珠爾之兄薩克巴爲董羅卜長子代襲王爵尋病卒子查木陽尚幼伊祖母請封弟喇錫班珠爾爲多羅郡王至是喇錫班珠爾復病卒故有是命○乙酉禮部議覆廣西學政衛昌績疏言考試武童今雖用武弁監射而內外場頂換之弊不能盡息應令學臣會同監試於合式武童內有技勇漢仗好者另用好字印面閱卷時先儘數取進如不足額再將合式卷內補入應如所請得旨考試武童令武弁監射者不過相助學臣之意其去取仍聽學臣閱文定奪若先儘好字號取進則外場重於內場矣假過微末武弁及不能秉公監射之人情弊不可勝數嗣後應用何等武弁

監射若該武弁監閱不公聽學臣奏應如何定其處分之處著再議尋議考試武童例用武職監射滿洲漢軍用副都統奉天用滿洲協領直隸各省用副將叅將遊擊該督撫提鎮揀送監射如武員監閱不公濫用記印許該學臣指叅從之丁亥諭兵部黔省見有勦撫古州八萬之事又協勦粵西不法猥苗所有額設兵丁或不敷用著將湖南就近營兵酌撥一千名前往貴州聽鄂爾泰楊天縱節制調遣此所撥兵丁著黃州副將李繩祖帶領管轄再將荊州滿洲駐防兵撥一千名移駐常德府令副都統觀音保帶領駐劄朕再將在京大臣派出一員同往以資彈壓又諭廣西八達寨允苗素行不法從前提督田峻意欲用兵征勦一面具奏一面即行發兵朕比時諭令慎重籌畫不可輕舉總督孔毓珣亦據田峻知會具摺奏聞田峻既欲舉行此事若果遴選兵弁調度有方何難計

日安帖乃田峻遣弁失宜臨事疎忽以致極小苗寨相持日久不能迅速成功及黔省兵至鼓勇向前竟被損傷或黔兵急於成功輕敵受損或粵西兵丁坐視不救其情事俱未可定粵西自韓良輔李紱甘汝來等數人辦事習爲情玩既不能操練兵丁又不能撫綏苗衆兵力懦弱諸事廢弛相沿日久而田峻又係中平之才以致兇苗公然肆惡迨雲貴總督鄂爾泰調發滇黔之兵甫至其地逆猥即行投首黨衆悉皆嚮化鄂爾泰辦理甚屬可嘉查廣西地方離廣東總督駐劄之處較遠而與滇黔兩省相近著鄂爾泰總督雲貴廣西三省一應軍民事務俱照總督之例管轄滇黔官土兵丁年來勦撫所到成功不獨官兵奮勇即土兵亦俱効力著動正項銀十萬兩交鄂爾泰酌量分別賞給其征勦八達寨之官弁兵丁中有陣亡受傷者已令加恩優卹仍照例給與卹典賞賚凡屬征勦蠻夷



不但官兵損傷者朕心深爲軫惻卽苗民被害亦深可憫此番總兵段宗岳雖統兵失利但伊到任未久又所用者乃廣西懦弱之兵或有不得已之處田畯係總統調度之員難辭其責其間功罪輕重俱著鄂爾泰詳查分別定議又鄂爾泰奏稱今年冬間前往貴州辦理公事著與廣西巡撫金鉷知會日期屆期金鉷親赴貴州將粵省地方一應事宜與鄂爾泰面共講論悉心妥議經理自有裨益

以故喀爾喀車臣汗滾臣子冊卜登拜音珠爾襲爵戊子以左春坊左贊善許王猷署日講起居注官奉使安南副都御史杭奕祿內閣學士任蘭枝疏奏臣等於本年三月十一日在雲南省城奉到

上諭著將鉛廠山之地賞賜安南國王又頒敕諭一道令臣等齎往宣諭臣等於三月二十一日由滇省起程取道廣西五月至鎮南關安南陪臣范謙益等六員叩接臣等率護從

文官同知一員武官守備二員卽日出關關門之外見安南國人鼓掌歡呼響應山谷六月初八日抵貂瑤營公館國王遣陪臣迎勞次日隨發儀注宣讀國王請照該國敬天之禮惟行五拜三叩臣等移書詰責謂

天朝定制薄海共遵無得更張負茲盛典伊等愧悚聽命十六日臣等渡富良江至彼國長安門國王黎維禔跪迎敕諭隨出迂臣等致敬盡禮臣隨捧敕諭由中門入安置殿上國王率文武陪臣行三跪九叩首禮聽宣畢謝恩臣等復宣示

皇上中外一視竝從前不忍加兵之意種種恩德亘古所無嗣後當倍加忠慎戒飭守邊員目毋得滋事自取禍階國王聞言以手至額者再四誓當世世子孫永矢臣節復送至長安門備陳繾綣兼餽膳儀臣等仰體

聖明柔恤遠藩德意婉辭不受於二十日起程至二十九日入鎮南關隨有陪臣吳廷碩等

四員依前叩謁行禮齋有國王陳謝奏章一道禮部申文一角求臣等帶回轉奏臣等伏思安南僻處荒服久列外藩

皇上念其累世恭順不忍以片壤之故即加兵討而鑒其感恩悔罪之忱更沛以行賞錫地之典此誠怙冒之鴻慈撫綏之至計也臣等睹異域之歡騰識天威之遐暢理合據實奏聞伏祈宣付史館昭垂萬世從之安南國王黎維禔疏謝賞賜鉛廠山地四十里恩下部知之○己丑授宗室德昌女爲縣君塔羅卜藏敦多布爲固山額駙○庚寅諭兵部康熙四十二年定例自提督以至千把各給親丁名糧以爲養育家口僕從之需此外不許一名虛冒夫有一武弁即有親丁此項名糧理應前後官弁接受者聞湖廣原任提督俞益謨於離任之時將伊標下所有名糧一一募補但知有己而不知有人甚非體恤武弁之道嗣後武弁去任之時即將名糧停扣不

必募補留此與接任之員俾其得需餘潤若他省營伍中有與湖廣提標相類者俱著遵朕此旨行○解浙江按察使覺羅白清任以原任江南安徽按察使馬世珩署浙江按察使司按察使○辛卯諭吏部湖廣土司甚多各司其地供職輸將與流官無異其不守法度者該督撫題參議處改土爲流以安地方若能循分奉法撫綏其民即與州縣之循良相同朕深嘉悅何必改土爲流使失其世業前據湖南巡撫王國棟奏稱下崗長官司向鼎晟懇請改土爲流甚爲誠切朕未准行今又奏稱土民有控告該土司之案正在查審朕思從前該土司改土爲流之請大抵由於土民之慫慂及土司所請未曾准行而土民復又列款控告冀朕嚴治土司之罪而盡改爲流其所控必非實情著該撫留心詳察凡屬土民必不敢控告土司皆由漢姦唆使播弄冀生事端以便從中逞姦滋弊耳若各處

土司等因他處已改爲流不得已而傲傲呈請者朕皆不准若被漢姦唆使控告俾土司獲罪而改土爲流者朕更不忍該督撫等當以朕內外一體之懷通行曉諭俾土司等守土奉法共受國恩不必改土爲流始爲嚮化至於土司實在不法惡蹟確著者該督撫據實叅劾治罪諭戶部直隸爲首善之地今歲春麥秋禾俱登豐稔民人樂業朕心深慰但地方有歷年帶徵之錢糧若令新舊並納雖逢豐稔之歲而民力未必寬然有餘若欲使小民共被恩澤惟有將明年之賦預行蠲免著將直隸雍正七年額徵錢糧內蠲免四十一萬七千八百九十兩爾部可確查分數行文該督通行所屬州縣一體敬謹遵奉以副朕愛養黎元加惠畿輔之至意又諭從前西邊用兵多年允禔狂悖貪婪肆行不法又有延信等胸懷姦宥背公營私借軍需之名擾累地方耗費國帑遂致領兵承辦各員

效尤無忌浮冒侵欺勒索嚇詐種種姦弊難以枚舉及至銷算軍需盡行敗露諸人名下應追銀兩共計六百餘萬若按律治罪則應置重典者甚多朕無可奈何開恩暫寬治罪令定限追完實法外之仁也此時力不能完者自應仍置之於法但念伊等在行間効力多年朕心有所不忍然國家一定之經費若一任侵蝕浮冒則國帑攸關國法安在朕亦不得而私者今再四思維內府庫中有收貯銀兩乃

聖祖仁皇帝及朕歷年躬行節儉之所餘積非部中經費可比用是大沛恩膏將此銀兩動支九十四萬餘兩代滿漢蒙古官兵清還應追之項此朕委曲保全之至意格外施恩之曠典夫國家養育兵弁原爲効力疆場執銳披堅乃臣子之常分僅一遇軍旅之事即存貪財網利之心則天理必不能容國法亦難姑貸此次受恩之後若不知感激愧悔互相

儆戒洗心滌慮宣力抒誠將來再有犯者必難再邀倖免也思之思之○壬辰調陝西甘肅巡撫劉世明爲福建巡撫以浙江觀風整俗使許容爲甘肅巡撫加浙江糧道蔡仕舫都察院僉都御史銜爲浙江觀風整俗使○癸巳諭諸王大臣等向因宗室諸王等閒居無職掌之事朕意望其學習事務增長才識是以諭令數人管理旗下之事原欲其與旗下大臣和衷共濟也今觀諸王之辦旗下事者與該旗大臣不甚相安似此則於諸王無益而於公事亦未免耽誤矣況諸王等所辦之事有舛錯者若一概從寬則有關於國法若照例處分朕心又實不忍不若仍令閒居以善全之康親王崇安順承郡王錫保信郡王德昭俱不必辦旗下事公塞爾臣伊爾登所管都統事務亦著革退此內王公等所有職掌除宗人府外其餘兼管之處俱著停止○調兵部尚書石文燁爲禮部尚書陞陝西

固原提督路振揚爲兵部尚書工部左侍郎塞楞額緣事革職調刑部右侍郎張保爲工部左侍郎陞都察院左副都御史杭奕祿爲刑部左侍郎調刑部左侍郎海壽爲右侍郎以鑲藍旗滿洲副都統德祿在內閣學士裏行 甲午諭諸王大臣等易經謙卦之辭曰天道虧盈而益謙地道變盈而流謙鬼神害盈而福謙人道惡盈而好謙蓋滿則招損謙則受益此一定不易之道古聖人所以惓惓垂訓也人之所以能謙尤在於公而不私和而不同周書之示誡則曰以公滅私虞書之陳謨則曰同寅協恭和衷哉公私和同之間實君子小人之所由分凡人立身行己待人接物未有不嚴辨於此而可以無失者也朕日以公和訓誨諸臣而能遵奉者少爾等同爲國家大臣彼此實屬一體若見彼有錯誤之處即當密告之令其悔改而聽受之人默感其意即改其愆方爲正理今則見人有

錯誤於背後譏誚之而當面且作褒揚之詞間有箴規過失者聽者不但不感且從而怨恨之身爲國家大臣豈可蹈此等陋習子路人告之以有過則喜其樂於聞過者正其勇於改過也今人能自知其過者甚少如朕降旨詰責處分之人伊等心中尚懷怨望不能省愆何況朋友箴規之言安能欣然聽受乎易曰君子以虛受人周子通書曰無欲則靜虛動直蓋凡人之心虛則明有所蔽錮則昏人有欲求好之心尚流於偏而不得其正況心意之間全是一團私欲蒙蔽其顛倒錯亂可勝言乎諸臣能公則可以祛意念之私能和則可以去阿比之習既公且和則自然能謙能虛於己則樂受規勸之言於人則能盡直諒之道人己之間兩得之矣○乙未

上詣

恩佑寺行禮畢回宮○川陝總督岳鍾琪疏報四川建昌鎮屬喇汝窩賊番素行不法嗣經

擒勒平定復有逆番了馬車糾黨搶劫隨撥兵進剿於本年七月十八日擒獲了馬車賊黨以次就擒番疆底定下部知之○丙申以天津水師營都統覺羅伊禮布署正黃旗滿洲都統○兵部議奏江南盜犯奚貴卿等行劫犯案甚多今已緝獲其從前諱匿失察各官請令該督查明參處得旨向來各省地方官疎縱盜賊習以爲常故失察之案甚多今拏獲盜賊之後若將年遠失察官員一一追問議處不但案牘繁多其中必有賢能之員因此受累罷斥者且恐處分太衆以致緝捕審訊之人有所瞻徇隱匿亦未可定嗣後定例自雍正三年正月以後失察盜案之官員仍照例查參處分若失察在雍正三年以前者一概免其查參議處○丁酉諭內閣福建有喬學尹失出故縱各案及禪濟布奏臺灣縣知縣周鍾瑄等款皆有關係之事必須特差大臣審理始成信讞著吏部左侍郎史

貽直前往會同高其倬劉世明等一一秉公  
察審歸結史貽直既奉差閩省管理吏部事  
務公傳爾丹又別有出差辦理之事伊等起  
程後吏部尚書事務著大學士張廷玉刑部  
侍郎杭奕祿暫行署理其吏部行文批到諸  
事著兵部侍郎楊汝穀代管○陞內閣學士  
汪隆爲工部左侍郎 予故福建巡撫朱綱  
祭葬諡勤恪贈兵部尚書○己亥諸王大臣  
等奏臣等敬觀

景陵寶城所生瑞芝五本光彩輝燦五色鮮潤  
欽惟

聖祖仁皇帝盛德崇功超越隆古深仁厚澤竝  
被羣生我

皇上純孝性成至誠昭格今茲

景陵寶城特產芝英根莖挺茂不附木石而生  
莖蓋堅瑩自稟瑰金之質數合九天之中位  
色分五岳之方隅圖牒希聞史冊未載臣等  
謹按帝王世紀云堯治天下太和芝草生於

郊孝經援神契云王者至孝格天則神芝生  
又瑞命紀云五行四時調和陰陽之精以生  
五色神芝爲聖世美符焉請宣付史館昭垂  
萬世得旨朕以實心實政爲本不言符瑞但  
今芝草生於

景陵寶城此我

聖祖仁皇帝昭示嘉祥景象朕心不勝感慶准  
照所請宣付史館○賑福建侯官等八縣旱  
災饑民○庚子諭吏部國家政務必得其人  
而後理朕加意旁求多方遴選惟期庶司百  
職俊乂在官以收得人之效但各職需人之  
處甚多該督撫等又屢屢奏請而現在赴部  
銓選之員不敷揀用因思自古人臣爲國有  
以人事君之義孔子論舉賢才之道亦云舉  
爾所知可見凡人生平必有深知篤信之才  
足備朝廷任使者果其以公忠爲心自無薦  
舉不得其實之理也茲特降諭旨著京官大  
學士以下主事以上之漢軍漢人外官督撫

以下知縣以上之滿洲漢軍漢人每員各舉一人除現任知縣以上官員不必保舉外或係舉貢生監或係山林隱逸果有品行才猷可備任使者即親戚子弟亦不必引避嫌疑據實保舉至外官所轄之現任佐貳雜職等屬員亦准其保薦朕從政務需人起見開誠布公以期集思廣益內外大小臣工等共受國恩時懷報効自應秉公據實以展臣子之心必無有徇私冒濫以自蹈欺罔者儻或舉

非其人將來覺察或試用不稱責有攸歸勉之勉之諭兵部據朝鮮國王李昫咨禮部文稱本國賊黨恐有潛逃懇飭關口防汛訶察等語朝鮮世効恭順伊國逆犯即係朝廷法所應誅之人儻有逃入邊口內地者自當即爲擒捕著行文盛京山東等處邊界地方官員朝鮮之語言衣服與內地民人迥別易於稽查儻有此等罪犯潛逃者著即嚴拏解京如有窩留藏匿等情從重治罪○陞正紅

旗護軍統領雅親爲正黃旗蒙古都統仍兼正紅旗護軍統領鑲紅旗漢軍副都統噶爾薩爲本旗蒙古都統工部遵旨議覆福建浙江江南江西廣東湖廣山東等省額設內河外海戰船所關甚鉅承修之員每有逾限不即修完及修完而未能堅固者因議處定例稍輕之故也嗣後修造戰船如有未至應修年限損壞者請著承修之員賠修六分督修之員賠修四分仍將承修官革職督修官降調至勒限完工之期過於緊迫嗣後小修大修應各展限期先期領銀備料儻仍有遲誤應照舊例各加一倍處分其有承修之員延挨請領及該上司故意指勒并將未完之船捏報完工者分別從重議處從之○辛丑戶部議覆陞任浙江糧道蔡仕舫條奏糧務事宜一押運官宜令兼司監兌一衛所備弁宜加操演一運丁宜嚴規避一白糧宜隨漕糧並徵均應如所奏從之○賑江南宿州靈

壁二州縣。電災饑民。○壬寅。

上御太和殿視朝。諸王暨文武陞轉各官謝恩。

○陞左通政陳良弼為太僕寺卿。○癸卯。以原任甘肅巡撫莽鵠立署正藍旗滿洲副都統。兼署理藩院侍郎事。○湖南巡撫王國棟疏報岳州九谿二衛開墾雍正四年分田地一百三頃有奇。下部知之。○丙午。

萬壽節。停止朝賀筵宴。○遣官祭

福陵。

昭陵。

昭西陵。

孝陵。

孝東陵。

景陵。○遣官祭真武。東嶽城隍之神。

大清世宗敬天昌運建中表正文武英明寬仁  
信毅大孝至誠憲皇帝實錄卷之七十四



大清世宗敬天昌運建中表正文武英明寬仁  
信毅大孝至誠憲皇帝實錄卷之七十五

監修總纂官光祿大夫經筵講官保和殿大學士兼兵部尚書總理兵部事務三等伯加五級臣鄂爾泰

總裁官光祿大夫經筵講官起居注太僕寺卿保和殿大學士兼戶部尚書內務府總管翰林院掌院

掌三等伯加十三級臣張廷玉光祿大夫經筵講官起居注太僕寺卿保和殿大學士兼工部尚書內務府總管

翰林院掌院事加二級臣福敏光祿大夫經筵講官太子太僕寺卿保和殿大學士兼禮部尚書加六級臣徐本光祿大夫

經筵講官太子太僕寺卿保和殿大學士兼禮部尚書太子太僕寺卿保和殿大學士兼禮部尚書

敕修

雍正六年戊申十一月丁未朔戊申改四

年表卷之七十五

川成都府管糧同知為管糧水利同知經理  
都江以下各堰工從四川巡撫憲德請也○  
己酉諭內閣朕御極之初即降諭旨令諸臣  
不必進獻儀物雍正三年冬諸臣以初行吉  
禮有進獻器皿書籍筆墨者朕酌收一二隨  
降旨令在京大臣嗣後停其進獻至在外督  
撫進本省方物土宜蓋以土產諸物乃各省  
所出該督撫藉此以展其敬愛依戀之心朕  
亦因以昭上下一體之誼其物不嫌於輕微

簡畧者所重不係乎物也今各省督撫中尚  
有未能深體朕心於土產之外復以器玩進  
獻者朕思督撫職任封疆用度繁多特為籌  
畫養廉之項原以供其日用要務之需安能  
尚有餘資購求古玩僅在己不能購求轉向  
屬員索取尤為不可人臣事君之道惟在至  
誠至敬豈僅在區區進獻之豐美乎儻能永  
矢丹誠為地方安民察吏薦舉廉幹為國家  
供職分猷其可寶可貴豈不遠勝於連城之  
璧乎茲特再行宣諭儻或仍有進獻古玩者  
則並其方物土宜亦行擯却○戶部議覆雲  
貴廣西總督鄂爾泰疏言滇省蒙化寧州宜  
良等七府州縣額徵糧米運至兵多之州縣  
山路崎嶇艱於輸輓請照從前永折之價每  
石折銀九錢解赴兵多之處採買交倉名曰  
輕齋民實稱便其米多兵少各屬並請照例  
折價應如所請從之○庚戌諭戶部福建歷  
年地丁錢糧雍正四年冊報共未完銀四十

四萬二千一百餘兩。其或欠在官。或欠在民。從前未曾分別明晰。經朕特遣大臣會同督撫徹底清查。除查出官吏侵蝕那移虧空外。實在民欠銀三十三萬八千三百餘兩。朕思今年閏省州縣有數處微欠雨澤。收成諒不能十分豐足。若於明年徵收正額之外。仍帶徵歷年舊欠。恐民力艱於輸將。茲特大沛恩膏。將康熙五十五年起至雍正四年民欠地丁銀三十三萬八千三百餘兩。槩予蠲免。其有已徵在官者。即照數留抵雍正己酉年本戶正賦。此朕惠養黎元。勤求民隱之至意。該督撫等應仰體朕心。家諭戶曉。並嚴飭州縣等官實力奉行。務俾小民均沾實惠。儻有不肖州縣陽奉陰違。或將已徵在官者。侵匿入己。仍作民欠開報。或將應行蠲免者。私自徵收。一經察出。定將州縣官從重治罪。該督撫一併嚴加處分。再雲南貴州四川廣東廣西等省。皆係邊遠地方。如有歷年實在民欠錢

糧俱著該督撫詳細查明。將實數具奏。陞江南江安督糧道葛森為山西按察使。司按察使。○癸丑諭大學士九卿等。朕恭閱

太祖高皇帝實錄內

聖訓。昭垂惟時。以敬

天為要務。諄諄誥誡。念茲在茲。邇來又覽明太祖本紀所載當時訓諭之詞。亦皆原本敬天之意。是知天道昭明。鑒觀有赫。與人事感孚。捷於影響。自古迄今。神靈首出之君。必皆以欽崇時憲為盛德大業所由成。承烈顯謨。所由極此。明太祖之開創規模。與我

太祖高皇帝。後先同揆。良有以也。夫天覆冒萬物。至高至遠。而其實上際下蟠。惟一理為充周人心之中。稟賦自天。其大公至正之理。即天之所以為天也。朕臨御萬幾。日深乾惕。祇求事事上合

天心。至在廷諸大臣。佐朕為理。有贊襄輔翼之責。一言一動。皆在上蒼降鑒之中。亦當無時

無事而不敬畏豈可蔽於一己之私不知旦明陟降之理乎茲朕特以素所躬行實踐者廣勛諸臣諸臣當每日於所欲言欲行之事一一揆度理義惕然內省必可以上對天地下自對其祖禰而無愧無怍者然後舉而行之則以自知之明爲自省之功時刻糾虔庶無褻越蓋事之純乎天理者即以討罰刑威加之於人而其實乃所以爲善事之違乎天理者即以慶賞賜予加之於人而其實乃所以爲不善故凡違道干譽煦煦爲仁自謂不愧於天者乃悖天之尤者也可不慎乎又若刑名之官職司邦憲爲天下生命所關操生殺出入之大柄尤不可不知天道之精微凡議重議輕皆宜準之國法推之人情無枉無濫協於咸中乃可以爲敬天畏天之實也故非特徇私利己之念毫不可萌即揣摩朕意妄爲迎合亦萬萬不可夫人命至重自古帝王所最慎在朕之權衡成讞斟酌詳審原無

成見於胸中諸臣有一毫迎合之見則私意障蔽天理無自而彰勢必宜寬而或嚴宜嚴而或寬既不能彈對越之誠又安能適合朕意之所在乎爾諸臣果能以循理爲矜恤以執法爲常經寬猛咸宜至公至當則天理之所昭垂即必爲朕心之所孚合是揣摩迎合之私原可以不事也朕念一德一心明良交泰之道無有大於事

天者是以不憚詳詳縷晰而著明之爾諸臣其敬聽無忽○陞正紅旗叅領李永陞爲鑲紅旗漢軍副都統○盛京戶部侍郎署奉天府尹王朝恩疏報復州長寧等三州縣開墾雍正五年分田地九十六頃有奇下部知之○甲寅吏部議覆山東學政王世琛條奏學正事宜一兗州府魚臺縣學請添設訓導一員登州府福山縣學請添設教諭一員一濟南府之泰安等三州兗州府之曹州等三州既改爲直隸州其從前由六州撥入府學之

文武生員請改歸該州學肄業。並飭各省直隸州照例遵行。○學臣奉差歲科共有兩次考冊報部。惟生員緣事欠考等項止於歲考報冊內開載。科考俱不開報。嗣後科考報冊請照歲冊例併行造報。○鴻臚寺序班經制六缺例由直隸河南山東山西四省生員在京者具呈考補。但此等生員皆因規避考試倩人遞呈。並未親身到京。嗣後生員願考序班者請令取具同鄉京官印結。選取留寺學習。其迭催不赴考之生該寺查出除名。仍歸學肄業。○文廟樂舞童請就近於衍聖公所屬戶人子弟內挑補。如不足額仍於曲阜縣童生內挑選。○東省衛籍童生及衍聖公所屬戶人子弟俱散居各州縣地方。請令於現在居住之地應試。毋許兩地赴考。違者照冒籍例治罪。均應如所請從之。○添設直隸冷口古北口喜峯口獨石口防守尉各一員。千家店防禦

一員。裁古北口喜峯口獨石口防禦各二員。從鑲白旗漢軍都統鄂善請也。○以故科爾沁輔國公薩麻廸子拉錫塞旺襲爵。○乙卯朝鮮國王李昫遣使奏謝減免貢米恩宴。賚如例。○丙辰諭內務府咸安宮房屋現在空閒著設立官學。將包衣佐領內管領之子弟並景山官學生內揀選穎秀者或五六十名或一百餘名入學肄業。○正黃旗漢軍副都統李林森緣事革職。以三等伯王貳為正黃旗漢軍副都統。○刑部議覆原任江西巡撫布蘭泰疏言信豐縣民殷志素家僕殷來福仔夥同邱文遠等偷竊伊主財物。殷來福仔應依奴婢盜家長財物減凡盜一等例免刺。僉流應如所請。邱文遠等獲日另結得旨。查律內監守自盜併贓論罪是較平常竊盜擬罪較重。今奴婢盜家長財物與監守自盜官物者情罪相等。豈盜官物者應從重而盜家長財物者便可從輕乎。况殷來福仔起意勾

引外人同盜伊主財物情罪尤屬可惡部議引減等之律定擬尤屬未協嗣後奴婢盜家長財物應如何定例之處該部詳議具奏尋議向例奴婢偷盜家長財物罪止於流是以勾引夥同姦奴罔知儆懼嗣後奴婢自行偷竊家長財物者請照竊盜律分別贓數定擬不准減等仍行刺字其奴婢起意勾引外人同竊者照凡竊盜律分別贓數遞加一等治罪贓數滿貫至一百二十兩以上者照律擬絞監候三百兩以上者照監守自盜三百兩例擬斬俱不准援赦其被勾引之外人仍照竊盜律分別定擬從之○改陝西階州小川驛歸成縣管轄從川陝總督岳鍾琪請也○丁巳陞大理寺少卿何國宗爲內閣學士兼禮部侍郎○以翰林院侍講凌如煥提督湖北學政○戊午諭內閣邇年川陝漢土官兵勦撫番苗遠涉藏地効力勤勞朕心深爲軫念著動支庫帑銀十萬兩交與總督岳鍾琪

會同四川提督黃廷桂酌量分別等次通行賞給以示朕加恩沛澤之至意○陞大理寺卿性桂爲都察院左副都御史○安慶巡撫魏廷珍疏報安慶等府開墾本年分田地二千二百一十五頃有奇下部知之○己未聖祖仁皇帝忌辰遣官祭

景陵○諭兵部山東濟寧州有羣盜持械猝至文武齊集公所致傷官兵一事朕思武弁尚有營兵跟隨而文官祇有衙役書吏不足備捍禦之用似應給與防護之人爾等酌議具奏尋議各省州縣額設民壯五十名又有捕役皂快人等防護未嘗無人因州縣官視爲具文不加操練卒然有事即畏避潛藏請令直省督撫嚴飭各州縣於所設壯丁內挑選壯健能軍器者二十名用爲長隨以資防護該省兩司官給與五十名道府給與四十名同知通判給與二十五名總於各州縣壯丁內揀送州縣佐貳官亦宜酌量給與或四名

或六名即在本州縣揀選至所給每年工食銀六兩不得以荒缺扣減從之○庚申諭內閣九卿朝審情實人犯其中情罪稍輕者昨已降旨減等發落其餘應行勾到人犯今年著停其勾決○戶部議覆廣西巡撫金鉷疏言苗地高椅几馬二寨係黔楚粵三省極邊之地無所專隸茲據該苗向化輸誠情願歸隸廣西懷遠縣管轄但二寨田畝半係新墾非膏腴可比應照懷邑下則起科其二寨人丁亦應照康熙五十二年續生人丁永不加賦之例免其編徵丁銀均應如所請從之○鑲藍旗蒙古副都統碩色以老病乞休允之○喀爾喀郡王益素克故遣官致祭○壬戌戶部議覆江南巡察御史戴音保條奏江南鹽務六款一竈戶之私煎宜禁一過壩之叢弊宜除一屯船之偷卸宜嚴一豪棍之窩頓宜究一巡防之要害宜明一審理之推求宜實均應如所請行文各巡鹽御史及該省督

撫遵行從之○工部等衙門議覆川陝總督岳鍾琪遵旨酌議督理插漢拖輝工程侍郎通智單疇書摺奏事宜一插漢拖輝地方遼濶開墾田地可得二萬餘頃止設新渠一縣鞭長莫及請沿賀蘭山一帶直抵石嘴子爲界於省嵬營左近添立一縣設知縣典史各一員欽定縣名鑄給印信○漢唐二渠向設水利同知一員專司其責今新開六羊渠等處堤岸甚長工完之後皆宜歲修請添設水利通判一員專司渠務一招徠人民雖有四千餘戶讀書士子尚屬有限請學校教官暫停設立一石嘴子地方向設營汛防守今既設兩縣宜分移二城請將守備一員把總一員兵一百五十名移駐添設縣治把總一員兵一百名駐於新渠城內○鄂爾多斯向在閭門交易今既開渠築堤招集民人請將市口移於石嘴子墩臺按期貿易仍令守備把總稽查彈壓庶不致借端生事均應如所請

得旨建立學校一條據奏招徠人民已有四千餘戶朕思其中亦多讀書之人若必俟人文蔚起始行考取恐遠方士子目前阻其讀書上進之階應將兩縣中現在讀書願就考試者許其附入鄰近州縣內考試酌量加額收錄入學俟兩縣人文漸盛建學設官之日仍行撥入本學庶爲妥協餘依議尋定新設縣名曰寶豐○予故原任吏部左侍郎加尚書銜致仕李旭升祭葬如例○癸亥諭戶部今年江西省有數縣稍歉雨澤恐明春米價昂貴著將本年起運漕糧內截留十萬石存貯本省以備將來之用○甲子諭兵部向來預備軍需如採買騾馬製辦物件之類不肖有司往往虛耗國帑派累民間種種弊端朕知之甚悉已降旨屢行申飭禁止而此風尚未全改朕愛養斯民不使絲毫擾累凡軍務所需悉動帑金照時價購辦又恐承辦官員預留將來核減之地稍借民力以助公事特

令岳鍾琪等核定折中價值僅時價可減卽爲節省或定價不敷據實奏加此皆體恤官員撫綏黎庶之至意也儻嗣後承辦各員再有剋扣短發侵蝕等弊其罪誠不可逭若參革之後必俟審擬定案方行著追則百姓守候補領之價必致累月經年而不能得深可軫念嗣後一經題叅摘卹卽照數核明剋扣之價先動軍需銀兩傳集百姓如數找給仍將該員於本境枷號勒限追完如逾限不完嚴加治罪庶貪墨之人知所儆懼而軍需有益民無擾累矣○實授拉歆爲正白旗領侍衛內大臣○乙丑諭內閣湖南官員養廉已令該撫將通省耗羨計算均勻分給又該省各府雜稅銀兩項下有報出贏餘銀七千二百二十兩著該撫將此項添入亦可少資各官養廉之用○丁卯冬至祀

天於  
園丘

上親詣行禮○遣官祭

永陵

福陵

昭陵

昭西陵

孝陵

孝東陵

景陵○停止次日朝賀○戊辰諭內閣江西布政使王承烈陞任來京奏稱布蘭泰在江西巡撫之任每事過於嚴刻朕因著令來京面加詢問布蘭泰本一微末之人朕因其居心謹慎操守尚好是以歷任擢用為湖南巡撫後見其居官辦事識見褊小已降旨調回授為侍郎適江西巡撫未得其人復將伊調撫江西竝諭伊云江西事務自邁柱整頓之後汝可遵守安靜辦理乃伊到江西後復蹈故轍竝無改悔之念伊兩任內所辦之事所奏之摺朕見其苛刻瑣細不知為政大體朕隨

事切加訓誨所以批諭之者剴切詳明至再至三現在收貯俱發與大臣及王承烈看過原不待王承烈之陳奏而後知之也所以將伊調回者意欲面行詢問竝加訓諭尚冀其或能悛改乃伊奏稱臣在江西所辦事件往往從重從嚴待皇上敕改使恩出自上朕一聞此語心中為之戰慄不覺汗流浹背夫辦事之道惟在秉公得理中正無偏今有意嚴刻先為過甚以待折中必朕留心體察方得更改而伊又未預先奏明朕又安從逆料其有心過嚴而事事皆為駁正乎况巡撫所辦地方事務不陳奏於朕前者甚多安可預存嚴厲之見乎布蘭泰深負朕恩溺職已甚著革職○戶部議覆護理江西巡撫印務布政使李蘭疏言直省州縣各官到任日期向來止報吏部不報戶部是以交盤遲延戶部無從查核請將到任日期報明戶部即以到任日為始定限兩月交盤錢糧逾限題參應如



所請得旨向來州縣交盤錢糧倉穀俱以兩月爲限但額徵數少之地方自可依限清楚其額數繁多之處定限未免太迫嗣後州縣錢糧交代五萬兩以上者令展限一個月十萬兩以上者展限兩個月十五萬兩以上者展限三個月著爲定例通行直省一體遵行○添設欽天監西洋人監副一員○已已調河南按察使納海來京調廣東按察使公元爲河南按察使司按察使以廣東惠潮道樓儼署理廣東按察使司按察使○兵部議覆黑龍江將軍那蘇圖等疏言黑龍江等處八旗索倫打虎兒三十九佐領內有襲與伊等子弟者亦有輪流補放者因向無定例每遇缺出不免互相爭訟查索倫打虎兒三十九佐領內所有噶那遜等十七佐領向未將他姓之人補放請俱授爲世襲佐領遇有缺出即於伊等子弟內揀選補放其畢爾冲額等二十二佐領向非承襲之缺請俱定爲公中

佐領如遇缺出於各旗防禦驍騎校內挑選補放均應如所請從之○辦理藏務吏部尚書查郎阿等遵旨覆奏查陝省進藏兵丁共八千名此內除留於木魯烏蘇之東蒿沁察罕哈達兵二千名坐站兵一千八十名現至藏兵四千九百二十名四川進藏兵共四千名此內除留於黎烏齊兵二千名坐站兵五百名現至藏兵一千五百名雲南進藏兵三千名於羅隆宗留兵二千名入木多留兵一千名臣等謹遵諭旨揀選陝西兵一千名四川兵一千名交與駐劄西藏之大臣邁祿周瑛副將馬紀師並酌量派出陝西四川遊擊守備千把等官令其駐劄以備差遣達賴喇嘛於二十三日自藏起程所撤兵丁分作五隊第一隊副將惠延祖帶領寧夏兵一千五十名第二隊臣查郎阿馬喇帶領西安滿洲兵四百名固原兵五百名四川兵一百名副將周起鳳將達賴喇嘛在臣隊內防護令副

將楊大力帶領四川兵四百名前行第三隊  
叅將王有循帶領督標兵四百九十名涼州  
兵二百三十名第四隊守備戴義雄潘世喜  
帶領固原兵七百五十名第五隊總兵官周  
開捷帶領西寧兵八百名殿後以次起程其  
雲南總兵官南天祥原率領兵一千名駐劄  
乂木多今西藏事方平定且將達賴喇嘛移  
往裏塘請將乂木多兵丁於藏兵未撤之先  
暫令駐劄以便應援奏入報聞廣東將軍  
蔡良叅奏左營中軍副將金國泰右營遊擊  
吳廷元酗酒不職得旨廣東文武官員每以  
飲酒宴會爲事相習成風今將軍標下將弁  
羣聚酣飲致相爭毆此風不改官箴安在書  
經以三風十愆儆於有位曰敢有恒舞於宮  
酣歌於室時謂巫風又曰卿士有一於身家  
必喪古訓所垂豈非官方之炯戒嗣後該督  
撫將軍應將屬員嚴加申飭其或不悛即行  
叅處大凡居官者或遇節令之期或有喜慶

之事設酒開筵原所不禁若以酒食游戲徵  
逐應酬不惟玩愒時日廢弛政務并起忿爭  
結怨之端有關大體各省文武大臣俱宜約  
束屬員時加訓誨庶於風俗官方並有裨益  
○喀爾喀輔國公冊凌巴爾故遣官致祭○  
庚午諭戶部廣西梧州二廠稅課每年贏餘  
銀三萬一千四百餘兩著交與該撫賞給府  
州縣及佐貳官以爲養廉其雍正四年四月  
以前各官所收贏餘銀兩俱從寬免其追賠  
又諭朕前降旨令江南浙江各截留漕米  
十萬石以濟閩省之用今據福建總督高其  
倬奏稱十萬石可以敷用著將江浙漕米各  
運五萬石赴閩其餘仍起運來通○陞四川  
夔州府屬達州爲直隸州兼轄東鄉太平二  
縣從川陝總督岳鍾琪請也○辛未諭內閣  
山東濟寧州城內匪類糾黨劫獄盜庫拒捕  
傷人大干法紀在城之文武官弁等督率兵  
丁併力擒拏登時俱獲未令免脫一犯甚屬

可嘉此案內被傷身故之兵丁數人因擒捕兇犯奮不顧身深可憫惻應加恩照陣亡例賞卹其被賊所傷數人及擒賊有功之官弁兵丁俱應照軍功例議敘賞賚著河道總督會同山東督撫查明分別等次具奏知州高令樹家屬被賊所傷雖未致命亦可軫念著賞銀一千兩高令樹平日居官如何著該督撫查奏凡州縣捕役原爲緝盜安民而設濟寧州此案盜犯聞其蓄念設謀已久何以該州官員捕役平時既漫無覺察而臨時又畏避不前則捕務廢弛可知著該督等一併嚴察議處奏聞兇犯劫獄之日若在監人犯有未敢隨衆妄動者則係畏法改過之人亦著查明奏聞著該部分別請旨減等發落○壬申管理旗務王大臣等議覆正紅旗漢軍副都統韓光基奏言向來八旗每兩旗共立官學一所今請增添四所每旗各立一學并增添教習四員每學各用一員其讀書之人二

十歲以下十歲以上俱令入學肄業至八旗因公降革人員應請交與八旗大臣等擇其可用者引見遇缺補用以贖前愆其革退兵丁請擇其可用者仍准挑兵均應如所請從之○戶部議覆刑部尚書勵廷儀條奏禁止販賣私鹽四款一窩頓私販之家宜究一無引私鹽之禁宜嚴一獲鹽不獲人槩行免追之例宜明一有司拏獲不報及減多報少之罪宜重均應如所請從之○癸酉陞太常寺卿傅德爲大理寺卿仍兼理太常寺卿事○雲貴廣西總督鄂爾泰疏言滇省無著虧空銀兩屢次移咨各原籍查追俱稱無產可變雖將本身家屬監禁嚴比不過徒稽歲月究於錢糧無補查滇省欺隱田土內有漏報勲莊叛產等項不自行首報別案發覺審出應令納價准爲己業又滇省現任官委署他任者其署任內養廉現議扣留一半以此二項代補遠年無著虧空約計兩年可以全楚得

旨。雲南邊遠地方。非近省可比。數年以來。各官遵依鄂爾泰教導。辦理地方事務。甚屬効力。其署任內。重收養廉之處。不必扣除一半。又欺隱田土。納價之項。著存公備用。至於通省無著虧空。共二萬六千六百餘兩。該督既稱實係無可著追。著開恩豁免。○甲戌。以鑲紅旗漢軍副都統張溥署廣西提督。○調貴州安籠總兵官蔡成貴為廣西右江總兵官。陞貴州黎平副將哈元生為貴州安籠總兵官。○一統志總裁大學士蔣廷錫等奏言。本朝名宦人物。各省志書既多缺畧。即有採錄。又不無冒濫。必得詳查確核。採其行義事跡。卓然可傳者。方足以勵俗維風。信今傳後。請諭各該督撫。將本省名宦鄉賢孝子節婦。一應事實。詳細查核。無缺無濫。於一年內保送到館。以便細加核實。詳慎增載。得旨。朕惟志書與史傳相表裏。其登載一代名宦人物。較之山川風土。尤為緊要。必詳細確查。慎重採

錄。至公至當。使偉績懿行。逾久彌光。乃稱不朽盛事。今若以一年為期。恐時日太促。或未免草率從事。著各省督撫。將本省通志。重加修輯。務期考據詳明。撫採精當。既無闕畧。亦無冒濫。以成完善之書。如一年未能竣事。或寬至二三年內。纂成具奏。如所纂之書。果能精詳公當。而又速成。著將督撫等官。俱交部議敘。僅時日既延。而所纂之書。又草率濫畧。亦即從重處分。至於書中各項分類條目。仍照例排纂。其本朝人物一項。著照所請。將各省所有名宦鄉賢孝子節婦。一應事實。即詳查確核。先行彙送一統志館。以便增輯成書。○乙亥。諭戶部。滇省邊鎮諸臣。用度不敷。朕深為軫念。著將報明公件餘剩銀一萬三千兩。全行賞給提鎮等官。以為養廉。若有贏餘。令該提鎮酌為營伍公事之用。以副朕眷念邊鎮之至意。○諭兵部。雲南等省。所有苗蠻獷獷種類甚多。殘忍性成。逞兇嗜殺。剽掠行

旅賊害良民。又或劫去人口。重價勒贖。所以爲內地平民之害者。不可枚舉。而衆苗之中。又復互相仇殺。爭奪不休。於其所轄土民。則任意傷殘。草菅人命。朕念普天率土之民。皆吾赤子。豈肯令邊省蒼黎。獨受苗人之侵擾。而苗衆繁多。朕亦不忍聽其獨在德化之外。是以從封疆大臣之請。勦撫兼行。切加訓誨。務以化導招徠爲本。不可脅以兵威。或致多有殺戮。屢頒諭旨。甚明。今幸數年之內。苗人陸續歸誠者。甚衆。將來可望地方寧謐。但官弁士卒。跋涉於深林密箐之間。歷險峻之區。染瘴癘之氣。而苗性狡獪。反覆當用兵之際。往往詭詐。負隅出其不意。以致官兵受傷。亦間有之事。夫弁兵受國家多年教養之恩。雖臨陣捐軀。義不避難。但以蠢然無知之苗蠻。而致損我義勇之士卒。得失不足相抵。朕心深爲憫惻。除已降旨。賜卹賞賚外。其雲南貴州。四川。勦撫苗蠻之官弁兵丁。從前若有預

借銀兩。俱免其還項。陣亡之官弁兵丁。著照陣亡例。加倍賞給銀兩。得病身故。及受傷之官弁兵丁。著照陣亡例。賞給銀兩。俱交與鄂爾泰。岳鍾琪。各於所屬確查。動帑遵旨賞賜。務俾均沾實惠。以副朕優卹弁兵之至意。○吏部議覆。署貴州巡撫沈廷正疏言。黔省命盜案件。向援苗例。多屬外結。後經督臣鄂爾泰題准。苗一切案件。皆扣限完結。今據司詳定。番苗等州縣土苗命盜各案。從前各官既不依限緝審。逾限又不查叅。若將接任之員一例議處。又屬寬抑。請將所報各案疎防承緝之官。自雍正元年起。以題明准到部覆之日爲始。逐案分別按限查叅。應如所請。得旨。苗民案件。扣限完結。係雍正五年所定之例。其官員等處分之處。著從雍正六年起。照例扣限查叅。六年前案件。免其查揭。○雲貴廣西總督鄂爾泰疏報雲南等府開墾本年分田地九百四十三頃有奇。下部知之。

○丙子諭戶部。蘇州巡撫所屬七府五州自康熙五十一年起。至雍正四年。未完地丁錢糧積至八百一十三萬八千餘兩。其中蘇、松、常三府太倉一州積欠最多。自一百四十餘萬兩。至一百八十餘萬兩不等。朕念切民瘼。凡閭閻疾苦。周知洞悉。此未完錢糧。或有產去糧存而不能完納者。或有人產已盡而無可催追者。又或有從前遇歉收之歲。而地方官匿荒未報。小民無力輸將。致成拖欠者。累積十餘年之久。其數至千百萬兩。但其中有或本係該地方官虧空。而希圖卸脫。捏作民欠者。或糧戶已經交納。而姦胥蠹役侵蝕入己。仍作民欠者。是此項未完。大約官虧空者十之一二。吏侵蝕者十之三四。其實係民欠。不過四五而已。在貧窶之民。固不能為無米之炊。而官吏因緣作弊。蠹國害民。情罪可惡。若非徹底清釐。即欲加惠於百姓。其道無由。是以從前令張楷將江蘇民欠清查分晰。張

楷竝不清查。奏稱俱係民欠。請分年帶徵。朕雖姑允其請。意甚未愜。鄂爾泰於蘇州布政使任內。實力稽查。將有頭緒。時以雲南巡撫職任綦重。將鄂爾泰補授。而清查之案。又未竟其事。後陳時夏到任之後。一味怠忽。疲玩毫無。整理釐剔之心。將從前分年帶徵之項。一并催追。以致小民艱於輸納。地方官又奉行不善。日事敲朴。嚴比七府五州之黎庶。不得霑被恩澤。朕心深為軫念。乃陳時夏又奏稱蘇松積欠難於清結。從前既蒙聖恩蠲免浮糧。今請以舊欠之糧。均派於新糧戶內。分年徵收。以抵補積欠。夫蘇松浮糧。朕仰承皇考聖心。每歲額免四十五萬兩。煌煌明旨。布告億兆。豈有既蠲正額。而復借此抵補積欠之理。朕以誠信待天下臣民。寧肯為巧詐之術乎。且舊欠自有本人。即非本人。亦自另有著落。若舍此不追。而均派新糧。是刁民因積欠而得利。良民因先輸而倍徵。從此人人效

尤誰復輸供正賦。況以舊欠派入新糧。舊欠未必全完。而新糧又致欠缺。此種狂悖之論。不過因朕留伊在蘇州清理未完。一時不能脫身。藉此草率完結耳。今尹繼善現在清查。尹繼善初任封疆。茲事煩重。非一人心力所能辦理。蘇松等七府。太倉等五州。歷年帶徵地丁錢糧。著一槩暫停徵比。俟朕派員前往。與該地方官協理清查。將各州縣官侵若干。吏蝕若干。實在民欠若干。一一釐剔清楚。朕當再降諭旨。戶部即遵諭行。令該督撫通行。出示曉諭。其派員分查之處。著戶部詳悉定議具奏。○命內閣學士班第副都統羅密。往庫倫地方。會同王丹津多爾濟。修建廟宇。侍郎張保。原任巡撫布蘭泰。往多倫腦兒。會同王色登敦多卜。修理廟宇。

大清世宗敬天昌運建中表正文武英明寬仁  
信毅大孝至誠憲皇帝實錄卷之七十五

大清世宗敬天昌運建中表正文武英明寬仁  
信毅大孝至誠憲皇帝實錄卷之七十六

監修總裁官光祿大夫經筵講官太子太師禮部尚書總理事務三寶通奉副都統

總纂官光祿大夫經筵講官太子太師禮部尚書總理事務三寶通奉副都統

纂修官光祿大夫經筵講官太子太師禮部尚書總理事務三寶通奉副都統

纂修官光祿大夫經筵講官太子太師禮部尚書總理事務三寶通奉副都統

纂修官光祿大夫經筵講官太子太師禮部尚書總理事務三寶通奉副都統

教修

雍正六年戊申十二月丁丑朔以刑部右侍

郎彭維新充經筵講官○陝西巡撫西琳疏

言陝西西鄉縣無著浮糧於雍正元年奉旨

永行免徵并蠲除康熙六十年以前舊欠在

案今查該縣尚有六十一年分未完銀一千

三百兩應請一併豁免從之○戊寅

上詣

恩佑寺行禮畢幸圓明園○己卯

上自圓明園幸淨明園駐蹕○調正藍旗滿洲

都統希爾根為鑲黃旗蒙古都統陞正藍旗

滿洲副都統查爾泰為本旗滿洲都統○雲  
貴廣西總督鄂爾泰疏報貴州苗拜克猛長  
寨古羊等生苗共一百四十五寨願附版圖  
輸納糧賦下部知之○庚辰

上於玉泉山大閱賜扈從內大臣及大臣官員  
兵丁等貂皮甲仗緞疋銀兩各有差

上幸圓明園○辛巳

上回宮○振武將軍宗室公巴賽疏報鄂爾昆  
集爾麻泰圖拉等處屯田收穫青稞麥蘆共

二千八百四十石有奇下部知之○壬午

孝惠章皇后忌辰遣官祭

孝東陵○丙戌諭兵部李衛自簡任浙江總督

以來凡保舉武弁俱極允協具見留心營務

嗣後下江軍政舉劾著總督范時繹張大有

會同李衛辦理○丁亥諭戶部朕惟善政養

民利賴必資地力而率作興事倡先端藉縉

紳惟茲寧夏所屬之插漢拖輝地廣土饒水

利充裕朕特遣大臣會同該督撫等悉心經



理濬治渠道設縣築城募民墾種次第修舉行見人民樂業饒沃殷阜漸成西北蕃庶之區此朕經國裕民之至計欲使地無遺力而亦寧夏一方人數千百年未興之樂利也聞彼中得水可墾之地計二萬餘頃每戶以百畝授田可安置二萬戶朕已諭令廣行召募遠近人民給以牛具籽種銀兩俾得盡力開墾給爲世業惟是原議寧夏本籍現在出仕文武官員俱令開墾授業俾爲世享之利今聞報墾者寥寥記曰貨惡其棄於地也力惡其不出於身也況乎上以急公而裕國下以力本而厚生縉紳者小民之望也果能身先倡率則民間之趨事赴功者必衆凡屬本籍之人不論文武官員或現任或家居均當踴躍從事急先墾種不可觀望因循耽延善舉凡茲所墾地畝俱照原議給爲世業三年起科果能使沃土腴田有廣收之益無閒曠之區則不但於體國經野之謨重有攸賴而經

營世產伊等子孫亦蒙永遠之澤矣議政王大臣等遵旨議覆辦理西藏事務吏部尚書查郎阿等奏稱頗羅鼐原在後藏與唐古特相居日久衆皆信服應遵旨令頗羅鼐總管後藏事務自後藏至岡底斯阿里等處俱令其管理其前藏事務訪問素爲土伯特信服之人二名授爲噶隆據頗羅鼐保選二人名色朱特色布騰一名策凌旺扎爾俱係大員之子素爲人所敬重臣等見二人誠實明白即令管理前藏投爲噶隆但招地初定新放二噶隆辦理恐不能妥協頗羅鼐辦理噶隆事務爲人心服查前藏後藏相離不遠事可兼辦臣等暫令頗羅鼐統管前藏後藏俟達賴喇嘛遷移完畢招地撤兵再令頗羅鼐專管後藏均應如所請從之○已丑諭刑部今年各省秋審情實人犯內有情罪畧可原者已於勾到之時改爲監候刑部情實人犯今年暫停處決其情罪畧可原者分別減

等發落。至於督撫九卿所擬緩決之犯論法。則均有應得之罪。而其中情事不一。尚有彼輕於此。稍可從寬者。或因一朝之忿奮不顧身。或因纖毫之利。偶相爭角。或因旁觀不平。而致鬪。或因被打情急。而還毆。似此類者。均非有謀害之念。於平日并無必殺之意。於臨時祇以愚民無知。好勇鬪狠。遂致陷於重辟。雖悔難追。深可憫惻。茲朕再四酌量。特施法外之仁。將此等人犯。照可矜人犯。免死減等之例發落。伊等試思。生於人世。同爲父母妻子所倚賴之身。何苦捨命輕生。自罹法網。縱使終身緩決。亦只於囹圄之中。幽囚待斃。不亦大可哀乎。今幸遇國家寬典。特予矜全。從此再生之年。皆爲遷善之日。當知恩不可以倖邀。法不可以再試。痛自悔恨。改前非。共爲良善之民。倘或再有過犯。則斷乎不能苟免矣。著該督撫於各犯發落之時。將朕此旨明白宣諭。加意訓誡。務令人人改過自新。以

副朕矜恤下民之至意。授裕親王廣祿姊爲縣君。婿多爾吉護爲固山額駙。陞陝西洮岷副將顏清如爲陝西延綏總兵官。陞陝西鞏昌府屬之秦階二州爲直隸州。以清水秦安禮兩當隸秦州。文成二縣隸階州。改徽州爲徽縣。亦隸秦州。徽州原設州判一員。改爲階州州判。原設吏目一員。改管徽縣典史事。原設學正一員。改管徽縣教諭事。從川陝總督岳鍾琪請也。旌表盛京錦縣烈女才柱才女才氏。拒姦不污。投繯殞命。給銀建坊。入祠致祭。如例。辛卯諭兵部。達賴喇嘛來居裡塘。已派副都統鼐格前往迎接。駐劄照看。鼐格缺著派都統巴爾米忒前往。以鑲白旗滿洲都統拉錫署直隸天津都統。戶部議覆西安布政使署甘肅巡撫張廷棟奏言。甘省由前任巡撫石文焯收買小錢。改鑄大錢。擾民已甚。請暫停鼓鑄。應如所請。得旨。從前禁止小錢之時。伊都立曾奏請收買。

小錢朕嚴飭伊都立以民間行使小錢已久今若將小錢盡收入官倘一時未能多鑄大錢則民間市易不敷所用大有不便伊都立遵朕諭旨而止甘肅巡撫石文焯又奏請發帑收買小錢暫開鼓鑄朕批諭云所陳開鑄一事朕詳細斟酌再諭若因不能禁止小錢欲藉此爲良策恐未必所燬錢銅能敷新鑄之用也小錢之禁不可急驟暫寬候旨乃石文焯並不遵奉候朕再降諭旨復具摺懇請收錢開鑄朕以石文焯身在地方屢次懇切陳奏必確有所見是以允其所請交部准行不意收錢開鑄之弊煩擾驛站貽累官民至於如此是石文焯之屢奏不過固執已見文過飾非而已石文焯身爲封疆大臣不將所行之事籌畫萬全遽行屢次陳奏甚屬草率著將石文焯交部議處○青海厄魯特扎薩克輔國公冊凌故遣官致祭○壬辰諭兵部達賴喇嘛自藏起程明年二月初可至裡塘

此地原有喇嘛寺院可以居住著四川重慶總兵官任國榮帶領進藏兵丁二千名前赴裡塘暫住防護弁兵等天寒路遠効力勤勞應加賞賚以示軫念達賴喇嘛初至裡塘其應支供給預爲辦理重慶總兵印務著岳鍾琪委員署理○江南江蘇按察使董永茂緣事革職調浙江按察使馬世圻署江南江蘇按察使司按察使陞戶科給事中方觀爲浙江按察使司按察使○三等精奇尼哈番英敏緣事革退以其弟英俊襲替○癸巳禮部恭奉

太祖高皇帝  
孝慈高皇后  
太宗文皇帝  
孝端文皇后  
孝莊文皇后  
世祖章皇帝  
孝惠章皇后

孝康章皇后

聖祖仁皇帝

孝誠仁皇后

孝昭仁皇后

孝懿仁皇后

孝恭仁皇后加上

尊謚

冊

寶安奉

太廟

上親詣行禮○甲午大學士朱軾以積疴未痊奏請解任調養得旨卿才具優長品行端謹老成練達勤敏和衷朕所深知正資倚任今偶患咳嗽之症自可從容調理待其痊可向來漢大學士多用二員現今閣中有大學士張廷玉蔣廷錫二人辦理實無曠缺卿當頤養之時必須寬懷澄慮不以事物撓心自然藥餌有功漸次平復以慰朕之殷懷今若以

久未入直仍慮及內閣職務雖矢心匪懈具見卿之惓誠而思慮紛縈殊有乖於調攝之道朕昨以卿抱病多時特遣內大臣前往看視聞卿於內大臣之前力疾叩謝禮數繁多甚覺勞頓次日清晨又至宮門謝恩是轉增朕心之不安於義深爲未協朕知卿素性拘謹舉動備極小心是以比來一切飲饌服食之類未便頻頻頒賜正所以冀卿之安逸望卿之速痊也嗣後宜恪遵朕訓時加頤養導引中和節勞靜攝即受朕恩賚亦免其拜跪始於病體爲宜卿年尚未老若調攝有方自然全愈爲朕宣力之處甚多此時不必以解退陳情用是特手書諭旨賜卿其悉朕惓惓之至意○四川巡撫憲德奏言西藏烏蒙等處辦運軍需蒙恩動用倉穀毋許絲毫累民今崇慶州紳衿士庶以已資代辦穀數至三千餘石及催令赴倉領回皆稱情願捐輸留爲本州儲備得旨該州士民慕義急公情詞

肫摯此皆

聖祖仁皇帝六十餘年深仁厚澤浹髓淪肌之  
效朕心甚爲慰慶著將崇慶州雍正七年額  
徵錢糧全行蠲免以示格外加恩善良之至  
意○左副都御史甘汝來緣事革職陞太僕  
寺卿陳良弼爲都察院左副都御史○復設  
江南海州營守備一員駐清口鎮從漕運總  
督張大有請也○乙未陞福建福州左翼副  
都統阿爾賽爲福建福州將軍○旌表河南  
鄧州烈女王文秀女王氏被劫不污自刎完  
貞給銀建坊入祠致祭如例○丙申大清律  
集解附例告成總裁纂修各官交部議敘○  
大學士九卿等議奏倉場米石虧空應著落  
前任監督各官攤賠得旨倉儲關係天庾最  
爲緊要從前倉務廢弛弊竇叢生不得不嚴  
加整頓凡所以清查虧空治罪分賠者總欲  
令後人知所做戒也今倉場各官俱已奉法  
積弊漸清人情咸知警惕矣此項虧折餘米

歷年已久其爲何年何人之虧空實難確指  
用沛特恩將此數十萬攤賠米石概行豁免  
內有已經賠補者其急公守法之心甚爲可  
嘉著照數給還並交部議敘以示獎勵○吏  
部議覆巡察順天等處御史苗壽奏言順天  
府屬二十五州縣衛驛傳糧餉向係通永霸  
昌二道分轄嗣因直屬興舉水利將通永道  
缺改爲河道所司河務多於水次辦理從前  
一切職掌未能兼顧請將通永道舊轄各州  
縣衛應行承辦之事悉歸霸昌道管轄應如  
所請從之○又議覆廣西巡撫金鉷疏言思  
明一州地方狹小毋庸專設流官其就近之  
思明知府又係土司從無統轄流官之例請  
將該州仍歸太平府管轄應如所請從之  
戶部議覆廣西巡撫金鉷疏言桂林府屬潯  
江等處各礦請召募本地殷實商人自備資  
本開採所得礦砂以三歸公以七給商其梧  
州府屬之芋茨山產有金砂請另委員辦理

再粵西貧瘠銅器稀少如開採得銅竝請價買以供鼓鑄均應如所請從之○命河南開歸河道分巡南汝道山東分守濟東道分守登萊青道竝加水利銜各府同知通判及各直隸州同州判竝兼管水利聽道員調委從河東總督田文鏡請也○裁直隸古北口同知一員從巡察順天等處御史苗壽請也○丁酉諭內閣從前西藏用兵之時頗羅鼐甚爲効力蒙

聖祖仁皇帝授爲扎薩克台吉上年西藏噶隆等因嫉妬爭權彼此不睦阿爾布巴隆布奈扎爾鼐暗結匪類公然肆惡將朝廷敕封貝子總理事務之康濟鼐擅行殺害併欲害及頗羅鼐頗羅鼐受其逼迫領兵爲康濟鼐復讎將逆黨罪狀奏聞是以朕特遣大臣等領兵前往究問情由以便分別治罪頗羅鼐聞大兵將至率衆奮勇前驅直抵藏地阿爾布巴等力屈勢窮被各寺喇嘛等拘執獻出欽

差大臣到彼一一究問盡得其悖逆妄亂之情已將阿爾布巴等及逆黨正法西藏藏此渠魁黃教可興番衆可輯頗羅鼐深知大義討逆鋤姦俾無辜受害者得雪沉寃背旨肆行者早正刑辟甚屬可嘉著封爲貝子以獎義勇以昭國憲○戊戌諭兵部哈密駐防官兵每年輪換定期於十二月內派往朕思臘月天寒草枯水凍官兵跋涉爲難查從前甘肅官兵駐防哈密有五月內更換之例今仍著於五月內派往○己亥工部議覆盛京戶部侍郎兼理奉天府尹王朝恩條奏各省修造戰船舊例解送總督親驗總督或轉委中軍以致監造文員每被需索兼多徇隱是以船隻工料皆屬虛糜其實不能堅固請嗣後修造戰船各該督撫務須親驗應如所請得旨戰船關係緊要若僅委中軍驗看或彼此瞻徇情面不據實詳覆致使物料柔脆不能經久嗣後修造戰船當造成之日其船廠附

近省城者著在城之督撫提鎮及布按兩司親往驗看其船廠離省遠者著附近府城之文武大員公同驗看務令修造堅固倘有不能堅固及浮冒侵蝕等弊即行題叅治罪庶承修之文職有所顧忌不敢草率浮銷而監工之武弁亦可免借端需索之弊著該部遵諭速行○庚子諭戶部江南錢糧積欠甚多總理務在得人分查亦須專責著戶部侍郎王璣刑部侍郎彭維新前往會同署巡撫尹繼善巡察御史伊拉齊布政使趙向奎總理其事其分查各府大員蘇州府著交與知府徐永祐蘇郡事務煩多著該督撫委員代理松江府著派浙江杭嘉湖道王溯維其杭嘉湖道員缺著李衛委員署理常州府著派蘇松糧道馮景夏若馮景夏輪當押運之年著總漕張大有委員代管押運鎮江府著派福建汀漳道朱鴻緒太倉州著派湖廣岳常道溫而遜其汀漳道岳常道印務著該督撫委

員署理江淮揚三府及徐通邳海四州分查大員著各部院堂官於在京科道及部屬內揀選保舉引見派出至協查各府所屬州縣應用四十餘員亦著各部院堂官於候補候選州縣及曾任江南之州縣因公罣誤無虧空未完者各舉所知並將吏部記名人員一併帶領引見候旨命往若在京派往之員或不敷用或不能勝任著尹繼善趙向奎徐永祐王溯維馮景夏朱鴻緒溫而遜將所知堪任清查之員各行保舉該署撫會同總理大臣奏聞現今浙江總督李衛管理江南督緝之事此清查積欠事務亦令李衛與聞其總理大臣分查協查各員作何分別給與日用養廉之資著該部議奏○解陝西西安巡撫西琳任以陝西西安布政使張廷棟署西安巡撫陝西西安右翼漢軍副都統賽都緣事革任調鑲黃旗漢軍副都統張正文爲陝西西安右翼漢軍副都統○陝西西安右翼

滿洲副都統朱蘭泰年老休致調陝西寧夏副都統蘇穆爾濟爲陝西西安右翼滿洲副都統（辛丑）

孝莊文皇后忌辰遣官祭

昭西陵（壬寅擢吏部郎中馬爾泰爲工部額外侍郎）陝西安西總兵官潘之善患病解任以陝西興漢總兵官曹勦署陝西安西總兵官陝西鳳凰副將董紹祖署陝西興漢總兵官（甲辰歲暮裕祭）

太廟

上親詣行禮（遣官祭）

永陵

福陵

昭陵

昭西陵

孝陵

孝東陵


景陵（遣官祭太歲之神）（乙巳賜朝正外藩）

科爾沁翁牛特四子部落鄂爾多斯扎魯特喀爾喀阿霸垓阿霸哈納教漢毛明安克西克騰巴林蒿齊忒杜爾伯特吳喇忒阿祿科爾沁喀喇沁土默特厄魯特青海厄魯特蘇尼特輝特圖爾古特烏朱穆泰哈密玉貝勒貝子公額駙台吉塔布囊等及內大臣大學士侍衛等宴○旌表八旗節婦滿洲觀音保妻博爾吉氏等七十五人蒙古濟爾泰妻史德特氏等十四人漢軍范弘鈞妻黃氏等二十一人直隸各省節婦沈瑗妻夏氏等四百二十人貞女徐氏等十二人孝子李盛山吳修齡二人孝女莫氏一人孝婦趙氏一人各給銀建坊如例○是歲人丁戶口二千五百六十六萬九百八十又永不加賦滋生人丁八十六萬七百一十田地山蕩畦地八百六十五萬二千五百三十六頃二十畝有奇徵銀二千九百四十九萬九千九百一十六兩有奇米豆麥五百四萬一千二百七十九石有奇草五百八



十二萬二千四百七十七束茶三十一萬八  
千七百七十五引行鹽五百一十二萬二千  
四百十二引徵課銀三百八十七萬六千一  
百有奇鑄錢七萬四千六百三十萬四千有  
奇

大清世宗敬天昌運建中表正文武英明寬仁  
信毅大孝至誠憲皇帝實錄卷之七十六



統一書號: 11018·1355—7

定 價: 53.00 元